

續修四庫全書

《續修四庫全書》編纂委員會編

續修四庫全書



上海古籍出版社

八一七・史部・政書類

皇朝續文獻通考四百卷（卷八十六至卷一百五十八）

劉錦藻撰

.....

2675/08

皇朝續文獻通考卷八十六

選舉考三 舉士

道光元年吏禮二部軍機大臣會議增改科場迴避各條凡子弟及同族除支分派遠散居各省各府籍貫迴異毋庸迴避外其餘雖分居外省外府在五服以內及服制雖遠聚族一處之各本族並外祖父翁婿甥舅妻之嫡兄弟妻之姊妹夫妻之胞姪嫡姊妹之夫嫡姑之夫嫡姑之子舅之子母姨之子女之妻之祖孫女之夫本身兒女姻親概令照例迴避

又議覆御史程伯鑾條奏順天鄉試中血士子廣額一摺查南北血每科定例各取中三十六名遇廣額年分各增十名約計正額三名有奇加廣一名又查近科順天鄉試錄中血每科中式七八九名不等此次恭逢 恩詔加廣中額所有中血應請比照南北血正額三名有奇加廣一名之例如取中在三名以上加廣一名六名以上加廣二名九名以上加廣三名即中數再多總以三名為率以示限制

又 諭本年八月天氣尚覺暑熱京城內外兼有時疫流行因念貢院中號舍淋隘士子等萃處鬱蒸恐致傳染疾病非所以示體恤今科順天鄉試著展期一月於九月舉行該衙門即行曉諭俾眾咸知

又湖廣總督陳若霖奏查辦苗疆事宜一摺奉 諭苗舉人有願赴京會試者即照本省舉人之例給與公車銀兩仍嚴禁書吏需索俾令踴躍觀光

又 諭據御史奏近日繙譯會試多有槍冒頂替等弊該衙門御史點名時親友跟役擁擠誼諱不遵約束請派員彈壓等語考試場規理應嚴肅繙譯事同一例何得似此漫無約束嗣後考試八旗繙譯著承辦場務衙門奏請簡派左右翼副都統各一員屆期帶領所屬官兵在點名之處稽查彈壓令士子等魚貫入場如有喧鬧冒混者按例懲辦併著該御史等據實參奏以肅場規

二年 諭御史邱家煒奏請申禁士子懷挾並查禁坊刻小本書籍售賣一摺鄉會試為掄才大典有志之士束身自愛何至故犯科條據該御史奏稱近有倩人寫成小卷或將坊刻小本書籍攜帶入場甚至有貢院夫役包攬代為帶

入者殊屬大干功令嗣後著辦理科場及接檢各官凡遇考試務遵科場條例認真查辦不得視為具文亦不得任聽搜檢人役有意栽害其坊刻小本講章策略等書著該地方官出示嚴禁以杜弊端至本年鄉試年分邱家煒違例條奏科場事宜著交部察議

又給事中王松年奏同考官隨薦加批一摺奉 諭同考官薦卷順天鄉試及會試向不加批取中後始行補加薦批亦恐啟草率遷就之弊嗣後並著分校各員於呈薦之卷將所以應薦之故黏簽加批聽主考酌定去留俟取中後仍於卷內註明以昭覈實

又大學士托津等會議 內廷考試章程嗣後毋論何項考試在 保和殿考試時於 前左門外唱名 中左門階上散卷 乾清宮考試時於 中左門外唱名門內井亭邊散卷 圓明園正大光明殿考試於 大宮門外階上唱名內橋以南散卷以上考試唱名皆於辨色時令承辦衙門堂官一人帶領承辦司員在彼看視領卷後依次而入不得前後參差仍於 前左門 中左門唱名時令值宿之前鋒護軍統領 圓明園大宮門唱名時令值宿之管理

圓明園八旗官兵大臣稽察彈壓送考人員一名不得闖入至 中和殿階下向有 大門侍衛二十員應請將 乾清門階下 出入賢良門階下各添派 大門侍衛二十員管束俟考試人員至階下時皆由 欽派監試王大臣帶領按名次進內列坐監試王大臣侍衛即在 殿門內外嚴密稽察除 乾清宮 正大光明殿係屬 內廷向無 大門侍衛官員進內其 保和殿考試所派 大門侍衛在 中和殿兩旁專察閑雜人等不准進至 保和殿階下

其執事人員及承辦各衙門官員除 殿試 朝考日期派有御史在 中和殿階下稽察亦不得進至 保和殿階下外其餘執事人員散題照料事畢即行退出 中左門外聽候如有不依次序任意攙越或不遵定制擁擠喧嘩由該衙門承辦堂官及管門之大臣據實指名參奏如進至 禁門有干功令者由監試王大臣立時嚴行參辦一摺奉 旨嗣後宮廷考試著照大學士御前大臣軍機大臣所議章程辦理其唱名散卷並令承辦衙門堂官一人按照議

定處所在彼看視預考人員領卷後依次而入不得前後參差值宿之前錄護軍統領管理閱官兵大臣當認真稽察彈壓勿任送考人員闖入如有不遵定制洩漏喧嘩者著該承辦衙門堂官及管門之大臣據實指名參奏其進至禁門有干功令者著監試王大臣即行參辦以昭嚴肅

又諭孟住等奏請借項生息資助旗籍舉人會試一摺廣東距京遙遠駐防八旗文武舉人進京會試資斧維艱加恩著照所請准其於扣存兵丁馬價存貯藩庫銀內賞借一萬兩發商生息遇會試之年每名除例賞水腳銀二十兩零外加賞銀三十兩賞賸餘銀積有成數陸續歸還原款年終報部核銷

三年諭薩秉阿奏請撥項生息賞給旗籍舉人會試等語福建距京遙遠駐防八旗滿洲漢軍文武舉人進京會試資斧維艱加恩著照所請准其於閩海關庫貯平餘罰科截贖三項閒款存銀內撥銀一萬兩發商一分生息遇會試之年每名除照例由藩司給水腳銀三十餘兩外加賞銀四十兩年終造冊報部核銷

又癸未科應舉行大挑於二年七月具奏奉 諭明歲各省舉人屆應大挑之年惟見在各省及河工候補各員人數壅滯所有癸未科大挑著暫緩一科於丙戌科會試後舉行又本年議覆御史佛恩多條奏滿洲蒙古漢軍舉人一體准其大挑今查明歲丙戌科會試後理應遵 旨舉行大挑奉 旨依議

又奏准本科會試准至公堂知照臺灣士子實在人數共十一名經本部開單另請 欽定中額奉 旨臺灣取中一名

又 諭朕此次釋奠禮成臨雍講學諸生觀禮循集橋門允宜廣錫恩施以昭盛典著於道光五年乙酉科順天鄉試皿字號卷內廣額十五名用示朕嘉惠膠庠鼓勵人才之至意

五年奉 旨由進士出身之滿漢侍郎內閣學士三品京堂及四五品京堂內未與考試試差者俱著於五月初四日在宮內上書房考試其有不願赴考者聽仍向禮部聲明於開列考官本內扣除其已經考試見陞廢事之鍾昌著毋庸再行考試

六年 諭朕恭閱 皇祖高宗純皇帝實錄內載乾隆四十五年 聖諭鄉試為檢才大典欲拔真才先清弊竇本年順天鄉試經檢校王大臣奏擊獲懷挾傳遞及頂名代倩不一而足順天科場特派王大臣等於轅門龍門逐次嚴查尚有此等弊竇何況外省稽察揆查斷不能如京師之嚴密乃歷年批閱各撫奏摺均以三場無弊一奏塞責實因模稜市譽不肯認真任怨耳嗣後各省巡撫凡遇大比之期必須實力稽查如有弊端即當嚴加究治等因欽此仰見 皇祖選拔真才諄諄訓誡之至意科場條禁首嚴懷挾誠以始進不正則士習不端弊竇不清則真才不出於檢才大有關係鄉會試檢校王大臣及各省督撫自宜認真釐剔以期拔取人才乃近年各省學政尙有查出挾帶生童交提調懲辦者至鄉會試屆期檢校王大臣並不認真率以三場無弊一奏了事觀為具文不肖士子竟有鈔錄陳文僥倖中式者檢才大典與其黜革於後孰若別弊於先嗣後鄉會試檢校王大臣及各省監臨等務須破除情面嚴剔弊端認真辦理查照定例不許夾帶片紙隻字一經查出立予斥革照例懲辦

七年議覆大學士兩江總督蔣攸銛奏江南鄉試迴避成例最為變通一摺查科場條例內載乾隆五十三年議准嗣後籍隸江蘇安徽人員見任兩省司道以上等官者子弟親族概不准應江南鄉試等語誠以兩省合考恐入場廉官有迎合上司情弊故定例不嫌從嚴茲據該督奏請於迴避成例量為變通等語查巡撫兩司統轄全省學政辦理遺才至省城道府首縣本有經理場務之責如係籍隸兩省者遇鄉試時其子弟自應迴避以杜弊端此外如總河僅轄沿河州縣巡道所屬僅有數府州若概令與巡撫等官一律辦理似乎無所區別伏思廉官入場於所轄上司子弟誠恐有囑託等弊至非其所轄之上司平日本無交涉臨時亦不至瞻徇自應量為變通應如該督所請嗣後籍隸江南兩省者除巡撫兩司學政省城道府首縣仍照向例辦理外其總河巡道等官遇所屬開送廉員亦應照例迴避如所屬並無入廉之官其子弟親族應准其一體鄉試俾得就近觀光以廣登進仍請責成監臨於派撥廉員時分別嚴查如有朦混入場者照例治罪

八年 諭我朝掄才取士於定立制科之外復設繙譯科目既以廣八旗士子登進之階亦識不忘本業立法誠爲至善無如近日旗人力學者少轉視科目爲迂途不復勉圖進取即如從前乾隆年間繙譯鄉試滿洲約五六百人蒙古約五六百人本年應試人數計考滿洲繙譯者僅一百三十餘人蒙古繙譯者僅二十餘人人數既較前多寡懸殊取中之卷自係簡拔其尤乃昨日覆試中式滿洲繙譯舉子八名內即有文理欠通錯誤太甚者四名罰令停科其餘未經中式之卷文藝字畫概可想見清語騎射爲旗人根本近日八旗生齒日繁而勤學應舉者轉日見其少豈國家設立科目本意特降旨申諭八旗人等嗣後務當父教其子兄誡其弟勤加策勵共效親摩期於精研本業以備旁求毋負朕誼誥誥至意

又禮部奏准順天鄉試正副考官各部尚書兼管順天府尹向係開列嗣後道光二年議准順天鄉試漢監臨開列兼管順天府尹及府尹銜名奏派查該府尹入場監臨所有印信係兼管府尹管理於開列考官自有望礙見據吏部聲明尚書盧蔭溥管理府尹印信堂銜不克開送應請於具題考官本內扣除以重職守嗣後即照此辦理

又 諭本年順天鄉試題本著於初四日具題

十二年 諭鄉會試爲掄才大典必須整肅場規嚴防弊竇方足以端士習而拔真才上年給事中劉光三陳奏科場士子恃衆玩法亟宜嚴加整頓當令大學士軍機大臣會同禮部議覆該給事中所陳十條尙屬周密本年會試屆期立法伊始除知貢舉遵照前降諭旨先期出示嚴切曉諭外恐不肖士子尙未免恃符竊法作奸犯科用再剴切誥諭各省士子務各滌慮洗心恪遵功令點名時魚貫而入毋得仍前混行擁擠如有遲誤靜候補點其不遵約束肆行喧鬧者若彈壓總兵拏究已接簽者不許復出轅門已領卷者不准復出號舍如有懷挾立即懲辦誤帶者雖免治罪仍不准其入場其八旗士子令彈壓副都統親身巡查不准越號並著責成按檢王大臣稽查接談換卷彈壓副都統兩翼在城總兵會試知貢舉遵照妥辦如不實力奉行著監試御史據實指名參

奏本年鄉試即照此次會試一律辦理朕開科取士以備國家任使此日之舉子即異日之考官豈容魚目混珠倖邀錄取一經查出弊竇即嚴懲不貸

又 諭本日據按檢王大臣仁壽等奏頭場接出誤帶四書之直隸生員沈封顏李瑞符戈鏡蟠周福遐賈康吉山東貢生賀澄元廣西監生秦紹謙安徽貢生程受易等八名照例逐出又接出攜帶詩文之直隸生員吳思同朱孔彰郭先春石俊庵李會慶生許向辰山東貢生王之城等七名當即斥革枷號示衆辦理尙屬認真近來士習日壞前據科道等條奏防弊之法經朕降旨准行並誼誥誥誥幾於三令五申該士子宜如何滌慮洗心奉公守法乃本科鄉試仍有吳思同等攜帶詩文之事該士子以身試法行險僥倖習爲故常恬不知恥若令其倖得科名通籍後黃綠鑽刺更何事不可爲尙望其爲朝廷出力耶從前歷科派出按檢王大臣總以毫無弊竇一奏塞責可見沽名釣譽全不實心任事此次按檢尙屬認真所以鬼域伎倆紛紛敗露而苟且混入者仍所難免三年大比爲士子進身之始即倖而獲選清夜捫心自問豈不可恥本科二三年仍嚴行按檢如查有懷挾情弊即一律懲辦嗣後該士子等務須恪遵功令敦品勵行勉爲真才實學毋再存倖獲之心求榮反辱其按檢王大臣及都察院堂官派出科道等總當認真辦理不可日久生懈

又 諭朱士彥等奏二場查出亂號之順天生員陳元暉未經領卷先混入場之直隸生員徐最亭均即逐出辦理尙屬認真向來派出稽察接談換卷有無情弊從未查出具奏可見沽名釣譽討好士子原不以別釐弊端爲事本年經朕降旨誥誥誥誥此次稽察即有混亂場規之生員二名而苟且混入者仍所難免嗣後該士子等務須恪遵功令毋以身試法求榮反辱其派出之大臣等總當認真辦理不可視爲具文

又 諭三載賓興爲掄才大典各直省主試經朕特加簡任宜如何滌慮洗心認真較閱務求爲國得人順天同考官及會試同考官俱係翰詹科道部屬該員等甲第本高又經朕親加校試尙無荒謬之人充選所以得人較盛各直省同考官則年老舉人居多勢不能振作精神悉心閱卷即由近科進士亦不免

經手簿書錢穀文理日就荒蕪各省督撫雖照例考試廉官仍恐視為具文全恃主試按閱落卷庶可嚴去取而拔真才士子握槩懷鉛三年大比一經屈抑又須三年考試或竟有終身淪棄者豈不可惜該主試俱係科甲出身試回思未第之先芸窗誦讀與多士何異若祇就舊卷照常挑選而於落卷漠不關情設身處地於心何忍嗣後各省督撫務將廉官認真考校不得以年老荒謬之員濫行充數其典試各員必須將闈中試卷全行校閱不得僅就薦卷取中方為不負委任見屆簡放雲南貴州考官之時剴切詳明特申誥誡倘各省正副考官草率從事經朕別有訪聞即將該主試嚴懲不貸

十三年 諭本日殿試新進士前十本進呈經朕親定已拆彌封填寫名次矣其餘二甲三甲進士卷著原派之收掌官四員在內閣嚴密關防并著監試御史各二員每日輪流在內稽查不許豫先宣洩俟二十九日前十名進士帶領引見後再行拆閱彌封填寫全榜

又 諭御史劉誼奏請嚴禁直省鄉試積弊一摺直省鄉試為抡才大典必須嚴別弊端拔取真才如該御史所奏近來州縣調籥入省並不遵照定例徑赴公所往往在外居住以致不肖士子夤緣干謁拜為師生私通關節並賄囑禮房句通內籥收掌書吏豫傳紅號竟將某卷直送某房以便呈薦且該書吏等當未揭曉之先輒窺探消息寄信出闈私相傳播似此積弊相沿殊屬大干法紀士子之夤緣干謁總由州縣之防檢不嚴即書吏之窺探舞弊亦由州縣之轉相賄囑若不嚴行飭禁何以肅功令而拔真才著通諭各直省督撫於明年舉行甲午正科遇州縣調籥入省務令遵照定例選入公所不得在外居住與人交接往來致啟士子夤營之習如該州縣不知檢束或招致士子私通關節或賄託書吏指認紅號該督撫當不時查察一經發覺即嚴參懲辦至入場監臨之日尤當飭令提調暨內外監試各員慎密關防嚴查弊竇以杜倖進

又 諭御史宗廣奏點派考官拆封禁止窺探搜越一摺順天鄉試禮部會試點派考官密本向係大學士於午門前拆封眼同稽察御史宣旨唱名凡不入闈者俱應迴避如該御史所奏近年以來每屆拆封之期竟有未經考差及無執事閒人混入其中紛紛擁擠殊非慎重關防之道嗣後考官拆封之日著禮部於午門中開恭設黃案為拆封及接收覈對之用並責成稽察御史認真查察倘仍有窺探搜越等弊即行據實參奏

十四年禮部奏見察科場條例擬酌改六條 諭曰禮部奏酌改科場條例六條詳閱單內請將空補擡頭者定為罰停二科朕思該士子等草莽新進體例未必盡諸若以無心錯誤概予從嚴殊非愛惜人才之意嗣後中式墨卷有於擡頭處空補者仍著照空補字數之例罰停一科

十五年定順天鄉試中式舉人覆試例

又 諭御史岳鎮南奏請嚴禁科場謄錄積弊一摺鄉會試為抡才大典糊名易書立法至為周密乾隆五十二年嚴定謄錄所防弊規條責成知貢舉監臨隨時查察理宜永遠遵循以除弊竇若如該御史所奏近來科場多有包攬謄錄之人場前議定記號擇其書寫精工者給銀修卷甚至私帶墨墨代改詩文於科名大有關係不可不嚴加防範嗣後鄉會試著遵照舊章責成知貢舉監臨實力奉行嚴飭謄錄各所官員加意查察但有夾帶墨墨代改文字諸弊立即嚴拿究辦倘不認真查察一經發覺定將知貢舉監試一併懲處不貸

又 諭禮部奏鄉試親供解部酌定校對章程各直省鄉試揭曉後中式舉人例應填寫親供與試卷一併送部交磨勘大臣細加校對此次順天鄉試親供已由該部節催順天府尹迅速解部惟各直省程途遠近不一著按照例限上緊嚴催其業經填寫者全行送部以憑送覆勘大臣對其有程途較遠者著迅速飭催填寫送部以次歸入下屆校對如第四次磨勘時仍未送到該學政聲明情節統於會試前期咨送禮部轉送覆勘大臣補行校對至遇有事故不克填寫親供者迨經補填解部往往先後不齊所有各直省陸續補送親供屆時毋庸交覆勘大臣即著禮部隨時詳細校對

又御史易鏡清奏三場試策請改用律例一道下禮部議尋議國家設科取士責以報稱者甚多不獨在理刑一端若於進身之始先責以名法之學無論勦說雷同無裨實用即真心講貫者亦必荒其本業旁及專家以法律為詩書更

恐揣摩求合之士承迎風旨因緣爲奸士習之不端關防之不密多由於此不可不防其流弊該御史所奏應毋庸議

又 諭鄉會試爲檢才大典士子讀書當知自愛其有因人數衆多微倖亂號以身試法者雖設有號單底簿互相覈對誠恐稽查未清轉不無遺漏舛錯其亂號士子或託人代填或捏寫詭名即欲杜絕弊端無從查對事屬有名無實自無容稍存遷就茲據禮部將查號之法遵旨覈議具奏於認真辦理之中立法仍歸簡易嗣後著仍照定例辦理其士子進號既經看柵官役認明卷面字號相符如號數已滿即將號柵鎖閉封門後監臨監試等仍分段入號親查如監臨查號不力責成監試監試查號不力責成監臨互相指參毋許稍有徇庇姑容致滋弊混其八旗號舍即著彈壓副都統親身巡查以專責成士子如有亂號即行扶出設爲時已晚未便開門即將試卷扣除並將該士子交至公堂派員看守俟放牌時扶出其有挺身肆鬧者照例治罪

十七年 諭向來鄉會試大典場內有監臨知貢舉稽查門貢院門特派王大臣專司接檢立法本極周備近來視爲具文漸行疏懈以致士子紛紛懷挾毫無顧忌此次於士子懷挾雖難保無遺漏幸免而每場均能搜出辦理認真尙屬可嘉嗣後凡遇考試務當認真按檢力除積弊勉副朕拔取真才至意倘意存姑息仍涉因循別經參劾必將派出之按檢王大臣從重懲處其三場接出之江蘇監生慕承勳攜帶書策並非無心誤帶著照例辦理

又 諭前據御史朱濬條陳科場弊竇各款當交禮部議奏茲據該部查明鄉會試試卷戳印後並無專員管理著照所議嗣後均准添派至公堂委官二員專司看守以杜書吏偷改描摹之弊所有該御史所請鄉試增添外收掌一員管理收發試卷之處著毋庸議至會試外收掌事務向由提調兼辦並著照鄉試之例設外收掌一員以專責成其受卷彌封兩所人役承辦事件完竣時由知貢舉監臨隨時查明飭令隨同外籛官一併出闈毋許逗遛滋弊至三場事竣酌留委官書吏人等概不准告假出闈其業經出闈者亦不准藉端復入自此次明定章程之後會試責成知貢舉鄉試責成監臨並監試各御史認真查

察如委官書吏等仍蹈前轍別滋事端即行分別參處責懲毋稍寬縱倘意存隱飾別經發覺定將該知貢舉監臨御史等嚴懲不貸

又 諭向來鄉會試年分該部奏請派員磨勘試卷凡文理紕繆筆迹不符均應籤出照例懲辦蓋欲拔取真才必須嚴絕弊端故不得不加以詳慎近來磨勘等官往往任意寬厚僅於字句微疵略加指摘而於文理紕繆筆迹不符等弊或致草率預例禁一弛倖進多而真才屈甚非朕振興文教之意本年宗室鄉試順天鄉試原卷及中式覆試各卷著派出之磨勘官等公同校閱認真覈對如仍前玩泄視爲具文日後別經發覺惟該磨勘官等是問

又 諭前因鄉會試試卷繁多彌封官四員果否足敷辦理並如何責成知貢舉監臨等稽查酌定處分之處降旨令軍機大臣會同該部議奏稱科場定例本極周詳彌封一所關係甚重祇在經理之得宜不在人數之增設至知貢舉監臨總理場務例有稽查之責向無處分即該所官處分亦輕請從重定議等語嗣後鄉會試仍照例用彌封官四員即責成知貢舉監臨擇其年力富強精明幹練者先行派定彌封無須與各所官掣籤以昭慎重並著知貢舉監臨隨時稽查務令遵照定例親自印號不准假手書吏其有漏印條記用印模糊與弊竇無關者仍著照舊辦理至錯印紅號有關士子中式者每卷該所官照遺漏舛錯例罰俸一年知貢舉監臨失於查察照疏忽例罰俸三箇月三卷以上該所官降一級留任知貢舉監臨罰俸九個月如查有情弊立即嚴參倘知貢舉監臨不行參處別經發覺除該所官照例究治外知貢舉監臨照徇情例降二級調用以上各處分俱不准其抵銷其外籛受卷謄錄對讀收掌各所官著一併責成知貢舉監臨認真稽查以歸責一並著禮部纂入科場條例永遠遵行

十九年 諭御史陳光亨奏請飭禁內外臣僚認師生一摺所言甚是鄉會試考官憑文取士中式者感其識拔誼誼等師生尙屬禮緣義起然在官言官在朝言朝斷不可以私廢公至新進士殿試朝考一經館選即與閱卷官認師生已屬非是若京察一等大計卓異者與本官上司認師生是身荷俯擢之恩心

感保舉之力受爵公朝拜恩私室其非國家考績求賢之義至近來外省風氣州縣輒與道府認師生府道輒與督撫認師生是以勢利為結納拜門下者品已不端難保不恃門生之情而專事請託假上司之聲勢相與招搖種種貪緣皆由此起又安望其持正秉公各盡職守耶嗣後內外臣工總當守分勵品斷不准藉師生稱謂以為攀援干進之階至部院大臣及各省督撫等尤當正己率屬以人事君遇有藉端干謁者即行面為屏斥概不准因遲詞卑禮稍事姑容庶屬吏共知教品用以杜奔競而肅官方

謹案韓愈有言師者所以傳道授業解惑也古之稱師者曰經師曰人師知非著道德能文章者不敢自居先達之列也降至叔世名利中於人心偶經品題便許門下薛瑄謂拜爵公朝謝恩私室蓋已慨乎言之矣

二十一年 諭國家設科取士原以儲蓄人材用備他日棟梁之選該士子等宜如何謹飭自愛勉勵甄陶勿存倖進之心常切懷刑之懼乃近來士習未醇往往懷挾入場冀圖鈔襲本科會試經王大臣等搜出十餘名之多已照例懲辦矣因思士習首重立品文藝次之若於進身之始已存苟且倖倖之心微論事敗罹法身壞名裂即使漏網幸得科第厚顏登仕有玷科名植本已虧尙何論其異日居官行政耶每科揆檢王大臣經朕簡派並非虛應故事實欲釐剔弊端如果認真揆查毋任懷挾混入固可轉移風氣且懲一儆百暗中保全尤多此次揆檢王大臣等辦事認真可嘉之至嗣後王大臣等遇有試場簡派揆檢差使仍當嚴密揆查毋稍疏懈倘有玩法士子即時懲辦以挽頹風該士子等有鑒前車之覆自應恪守場規儻仍估過不悛朕惟執法懲辦

二十三年 諭各直省中式舉人自下科始一體覆試

又 諭國家分設八旗兵丁駐防各省立意至為深遠嗣因生齒日繁披甲名糧例有定額勢不能概令食糧當差而各弁兵子弟亦有讀書向上通曉文義者轉其應試以廣進取之階所以造就人才體恤旗僕者無微不至但思八旗根本騎射為先清語尤其本業至兼習漢文亦取其文義清通便於繕譯乃近年以來各駐防弁兵子弟往往鶩於虛名浮華相尚遂致輕視弓馬怠荒武備

其於應習之清語視為無足重輕甚至不能曉解朕恭閱嘉慶五年 皇考諭旨各省駐防人等准於該省考試文生原係於伊等格外施恩若專務此而廢棄清語騎射即停止此例不准考試亦屬應該俟清語騎射演習熟練時方准考試等因欽此仰見我 皇考聖慮周詳 訓誡諄諄之至意因思清語騎射全在該管大臣官員等平日盡心訓飭操演而弁兵子弟亦必令藉此進身方能益加奮勉見在武備鄉試各省駐防一體與考應試之人弓馬如果熟嫻不患無登進之路其應文試者必應改試繕譯庶不至專習漢文轉荒本業除本科各省文鄉試仍照例准其應考外嗣後各處駐防俱著改應繕譯考試俾有志上進者咸知非熟習清文不能倖邀拔擢自必爭相磨厲日益精通其各該將軍副都統等尤宜隨時訓練董勸兼施毋得視為具文因循積習以副朕崇實黜浮之意其考試一切章程及繕譯童試進額鄉會試中額應如何酌定之處著軍機大臣會同該部悉心詳議具奏

二十七年 諭從前鄉試迴避士子雍正年間曾於內閣另行考試或將試卷另封進呈派員校閱均係出自 特恩並未著為定例迨乾隆年間即經先後停止嗣因御史陸朝棟率行陳請願徇私常奉 嚴旨將該御史交刑部治罪至嘉慶四年復有御史郭保長條陳此事經部議准仍奉 特旨駁斥是迴避士子另行考試事屬難行疊奉 聖訓昭垂豈容臣工任意瀆請祝慶恭見任禮部尚書明知此事早經停止乃因本科迴避士子人數較多獨出己見率行面奏實屬沽名釣譽冒昧瀆陳著交部嚴加議處嗣後鄉會試迴避士子無論人數多少其另行考試之處並著永遠停止

二十九年准各省駐防文舉人見任京官者一體會試

咸豐五年以捐輸軍餉永廣福建臺灣府閩籍鄉試中額一名又以捐輸軍餉永廣四川鄉試中額五名又以捐輸軍餉永廣浙江鄉試中額一名六年以捐輸軍餉永廣浙江鄉試中額二名七年以浙江捐輸軍餉永廣鄉試中額一名又以捐輸軍餉永廣湖南文鄉試中額四名又以捐輸軍餉永廣河南文鄉試中額二名又以捐輸軍餉永

廣江西鄉試中額二名又以捐輸軍餉永廣山西鄉試中額三名廣東鄉試中額四名

八年 諭前因官文奏湖北紳民於捐餉外自備口糧團練防勦懇請再行加廣文武鄉試中額當交該部議奏茲據禮兵二部會奏該省捐助軍餉業經准加鄉試定額三名此次所請因募勇防勦再行加廣中額之處銀數既無可稽額數何從定額所有該省紳民應如何酌予獎勵著該督秉公辦理

又 諭前據胡興仁奏官卷中額不敷請於廣額內加中一名當交禮部察覆具奏茲據奏稱該撫所請與例意不符等語浙江省本科應試官生僅止二十五名以每二十名取中一名擬計其零數尚不及半所缺之額例應以民卷補中且該省所加中額五名均係永遠定額若撥入官卷加中恐此後相沿竟為官卷定額殊覺過優倘各省紛紛援案聲請不足以示限制惟浙江省見已揭曉如已由官卷加中其中式舉人著毋庸扣除嗣後不得援以為例此後捐輸軍餉加廣中額省分亦不得援照辦理所有遠例奏請之浙江巡撫胡興仁並該省正考官寶璽副考官馬瑞琦均著交部議處

又 諭御史孟傳金奏中式舉人平齡殊墨不符物議沸騰請特行覆試一摺著派裁垣端華全慶陳孚恩認真查辦不准稍涉迴護並將摺內所指各情可傳集同考官一併訊辦

又 諭本年鄉試主考官各官荒謬已極覆勘試卷應訊辦查議者竟有五十名之多該考官等朕聞其中亦尚有不取昧良者除同考官有無情賄遂案查訊外其正考官柏葆著先行革職聽候傳訊副考官朱鳳標程庭桂均著暫行解任聽候查辦至此案頭緒紛繁著欽派王大臣等毋得含混了事認真研鞫按例從嚴懲辦

九年 上御勤政殿召見惠親王怡親王載垣鄭親王端華軍機大臣彭蘊章穆蔭匡源文祥內務府大臣瑞麟麟魁文彩存佑文豐尚書肅順全慶陳孚恩趙光許乃普 諭曰本日據載垣等奏會審科場案內已革大員並已革職員定擬罪名先行擬結一摺朕詳加披覽反復審定有不能不為在廷諸臣明白

宣示者科場為抡才大典交通舞弊定例甚嚴自來典試大小諸臣從無敢以身試法輕犯刑章者不意柏葆以一品大員乃率恩藐法至於如是柏葆身任大學士在內廷行走有年曾任內務府大臣軍機大臣且係科甲出身豈不知科場定例竟以家人求請輒即撤換試卷若使新祥尚在加以夾訊何難盡情吐露既有 成憲可循朕即不為已甚但就所供情節詳加審覈情雖可原法難寬宥言念及此不禁垂淚柏葆著照王大臣所擬即行處斬派肅順趙光前赴市曹監視行刑已革編修浦安已革舉人羅鴻輝已革主事李鶴齡均著照例斬決以昭炯戒副考官戶部尚書朱鳳標於柏葆撤換試卷案中並未查詢出場後又不即行參奏若照舊例辦理知情徇隱即應治罪即止於失察亦應研訊惟閱其供詞尚無知情弊諒朱鳳標亦不敢公然徇縱從寬即行革職同考官降調編修鄒石麟為已革舉人平齡更換殊卷實屬違例著革職永不敘用其磨勘查出試卷應行查辦之舉人余汝偕等十二名並同考官徐桐鍾琇涂登綱何福成對讀官鮑應鳴應得處分著交禮部查照科場條例定擬具奏至墨卷內更改馬丞字樣是否由外廉傳遞之處著原派之監臨明白回奏另片奏催未經到案之謝森堉熊元培李日華等三名著江蘇巡撫即行派員迅速解京歸案審訊嗣後科場大典秉文衡者皆當潔己虛懷杜絕干請應試士子亦各立品自愛毋蹈貪緣覆轍則朕此次執法嚴懲正為士林維持風氣爾在廷諸臣當能默喻朕衷也

臣謹案科場大典例禁甚嚴彼時賄賂公行恬不為怪且始經發覺柏葆因成黨營求以科名為餽贈 文宗乾綱獨斷雖 朝廷親貴而亦刑人於市與眾棄之非所謂法行自上者與

是年以捐輸軍餉永廣福建鄉試中額十名安徽二名又以捐輸軍餉永廣湖北鄉試中額一名江蘇四名

又 諭何桂清徐有壬奏酌議借閱鄉試事宜開單呈覽一摺本年已未恩科江南文闈鄉試借用浙閩舉行其內外廉一切事宜自應參酌舊章變通辦理除監臨事務前已降旨令江蘇學政孫葆元入闈代辦外其外廉提調著照何

桂清等所擬派令江蘇署臬司蔡映斗屆期隨帶委員赴浙設局辦理仍由浙江撫臣加派見任大員及印委各員幫辦內廉提調及監試等官著由江蘇省酌派道府大員前往內外廉官由江蘇調派其巡查彈壓檢各武職即由浙江巡撫就近派充至該省鄉試係帶行乙卯正科所有官卷民卷中額均著加倍取中其捐輸推廣之額均歸民卷取中不得加入官卷與考生監著學政於錄遺時通飭各府州廳縣學確實加結詳送以杜弊竇至所稱同考官擬改爲十房之處前因張芾奏安徽紳士願請舉行鄉試業經降旨准其於十月內同江蘇一併借用浙閩辦理試卷既多恐十房不敷分枝著該督等酌量添派

又 諭前邵亨豫奏皖省應試士子僅徽州甯國二府廣德一州經禮部奏定例四成取中加額二名茲據該學政奏稱見在應試士子不止三屬著加恩將本年己未科及恩科補行乙卯正科以六成取中五十四名其加額四名全歸本屆取中餘四成三十六名歸入下屆辛酉及補行戊午正科取中又以續捐軍餉再永廣浙江鄉試中額一名又以提督李世忠捐餉加河南鄉試中額三名

又 諭前因江南文闈鄉試以軍務未竣兩次停止本年恩榜特開該省督撫奏請用浙省文闈舉行該部議交浙江巡撫察看辦理旋據胡興仁覆奏聲稱號舍不敷恐多窒礙等語朕以江南士子未免向隅復諭令江南浙江各督撫妥爲籌畫茲據何桂清徐有壬胡興仁會奏據稱咨商安徽學政該省距浙較遠賊氛未靖且歲科兩試久停士子等未能一律應試擬分別辦理以昭慎重著照所請本年江蘇省鄉試即定於十月內舉行借用浙江文闈辦理安徽省鄉試著俟該省平定地方較多應如何通融辦理之處由該督撫屆時奏請補行

十年 諭禮部題請派繙譯會試提調官一本所有開列揀選司員二員著照文會試之例由該堂官帶領引見候旨揀派並著該部纂入則例永遠遵行又以續捐軍餉永廣廣東鄉試中額六名又以捐輸軍餉永廣江西鄉試中額一名

十一年 諭致仕大學士祁寯藻奏請復各省駐防考取文舉人生員舊例等語各省駐防八旗向來本有可取文舉人生員之例自道光年間改爲繙譯將舊例停止原爲八旗人員均應諳習國語清文以爲本務恐其因考試漢文致有荒廢見在繙譯考試各省遵行已歷有年其駐防八旗中通達漢文積學之士不克觀光誠爲可惜嗣後著於駐防繙譯科甲外仍復駐防考取文舉人生員之例均准其鄉會試與繙譯一體錄用以廣登進該駐防八旗人等仍不得以專務漢文致將繙譯國語稍涉荒廢

同治元年 諭本年壬戌科會試場期已近各省來京會試舉人有因道途梗阻到京遲誤未與覆試者照例不得會試惟念該舉人等志切觀光遠道跋涉而來或因經過水陸阻滯並非有心遲誤若照定例不准入場未免向隅所有各省見在到京未與覆試之舉人著加恩准其先行一體會試俟場後再補行覆試其中如有應罰停會試者即由禮部知照知貢舉將該卷扣除並著禮部即日出示曉諭於卷箱未經封送貢院以前迅速辦理俾得同沾嘉惠此係因各省軍務未竣道途多梗用特格外加恩嗣後不得援以爲例

又 諭向來派閱殿廷考試試卷均於即日閱畢分別等第開單進呈昨派出閱看各省舉人補行覆試試卷之大員賈楨等於所閱試卷盡日之力直至酉刻尚未閱竟徑行請旨先散因爲時已晚不能不姑允所請該大臣等於欽派閱卷例應嚴密何以遲至次日始行閱竣殊非慎重關防之道賈楨瑞常朱鳳標卓保董恂吳存義靈桂石贊清張之萬均著交部議處嗣後殿廷考試派出閱卷大臣仍各敬謹將事將派閱試卷務須即日閱竟以符舊制

又 諭考試爲抡才大典閱卷大臣均出自特簡理宜悉心校閱慎重去取方足以昭平允况殿廷考試人數無多派出之閱卷大臣每人所閱多者不過一二十卷盡日之長何難詳細校閱本月十五日考試試差人員經大學士賈楨等分別去取呈覽復命議政王軍機大臣詳加覆閱乃張之萬擬取之霍穆欽詩內樂字誤寫作樂沈秉成詩句聲喚一輪孤全句費解既經籤出仍復擬取尤非因尋常小有疵累籤出者可比吳存義擬取之張丙炎詩句歎字誤寫作

款王發桂擬取之馬元瑞全詩低三格寫實屬違式其餘擬取卷內添註改補以及筆畫小有錯誤未經籤出者甚多因其無關弊竇免其撤去外試思考差各員係豫爲典試衡文之選若令詩句失黏文理費解之員濫膺是選豈能識拔真才該閱卷大臣等如謂有心舞弊尙可料其不敢但卽以此一事而論其不以公事爲重任意草率亦可類推見常 兩宮皇太后親裁庶政該大臣等事事任勞任怨尙恐不足報答 皇考文宗顯皇帝簡用之恩豈可掉以輕心稍存玩忽此次姑免深究嗣後各部院大臣辦理一切公務須振刷精神實事求是方爲不負委任儻再有此等情事則是有心欺罔必當嚴懲不貸

又 諭給事中鍾佩賢奏併科鄉試省分請添派考官等語據稱近來各省鄉試每因軍務停止追軍務平定兩科歸併舉行中額已加一倍更有捐輸廣額不在其內是考官取中之卷幾增倍半而考官猶循舊例仍用正副各一人深恐校閱稍有未周棄取必多未協嗣後凡有兩科並舉者請飭部於本內聲明照順天鄉試之例添派副考官一員同司衡校等語順天鄉試舊萃各省士子人數既衆校閱亦繁是以向例多派一二員以崇體制至各省人數有定比年以來因軍務停止開有歸併舉行者中額雖多一倍人數並不加增各省主考經朝廷特簡自應悉心衡鑒以期拔取真才何至有校閱未周棄取未協之慮該給事中請照順天鄉試添派考官之處徒更成法無裨掄才所奏著毋庸議

又 諭禮部奏遵議給事中吳焯條陳造就真才悉歸實學請於鄉會試責成考官嚴取真才並出題不得割裂各等語我朝制藝取士人才輩出奉行既久不免有空疏剽竊之弊亟須崇尚實學力挽頹風著照該部所議嗣後鄉會試責成考官詳加校閱頭場四書文以清真雅正爲宗二場經文取其有關實義者若敷衍成文概棄勿錄三場策問以經史與時事分問使貫串古今通達治體者得以敷陳政事得失利弊以及籌餉用兵之道其言果有可採不必責以忌避亦不得繼以小疵庶於由舊之中仍寓責實之意貢士射策原以規其經濟學問乃近科以來專務繕寫相習成風嗣後著仍遵舊例不必拘以字數最

短者以千字爲率其不及者以不入格論各貢士從容條對不必專事繕寫自可拔取真才士子趨向隨主試爲轉移近日各省考試題目多有割裂太其應試生童途各鉤心鬪角習爲穿鑿支離最爲風俗人心之害嗣後各省學政及府州縣學各官務各恪遵功令所出試題不得割裂小巧牽連無理及詩題引用僻書私集以正文體而培風化遠者照例議處

是年廣湖北鄉試中額四名廣山西鄉試中額一名廣貴州鄉試中額一名廣安徽鄉試中額二名

二年廣廣東鄉試中額一名廣山西鄉試中額二名廣湖北鄉試中額二名三年廣江蘇鄉試中額四名安徽三名廣江西鄉試中額一名廣山西鄉試中額二名

又曾國藩奏江甯省城於六月克復定十一月舉行江南鄉試應於九月二十二日請 旨簡放考官從之

五年 諭御史盧士杰奏各省鄉試請飭部先期頒發條例暨禮部事宜一摺鄉試爲國家掄才大典理宜整肅場規力祛弊竇禮部科場條例本極詳備久經頒發各省一體遵辦乃日久視爲具文弊端百出承辦鄉試書吏往往於彌封等所互相串通消息若不申明條例嚴加防範流弊伊於胡底嗣後每遇鄉試年分著禮部將科場條例及續增事宜先期頒發各省該提調監試房考各官務當恪守成規力杜關節以副朝廷拔擢真才至意

又 諭御史王師曾奏請停止捐免罰科等語所奏不爲無見鄉會試應勘覆試定例恭嚴近日章程准以銀兩捐免應勘覆試幾同虛設殊於政體有礙嗣後文武鄉會試應勘覆試罰令停科停殿試者概不准按案捐免以肅功令

是年廣浙江鄉試中額二名廣廣西鄉試中額二名廣安徽鄉試中額一名廣江蘇鄉試中額一名廣四川鄉試中額一名

又 諭張亮基奏黔省鄉試停科過久請舉行本年丁卯科及補行乙卯戊午兩科一摺向來各省鄉試定例祇准補行一科惟念貴州自軍興以來已逾十載停科最久該處山川險阻籌費艱難該士子等志切觀光自應俯如所請所

有貴州省舉行本年丁卯科鄉試准其補行乙卯科並加恩准補戊午科按照定廣各類併數取中以作士氣

六年廣直隸鄉試中額二名廣廣西鄉試中額二名廣安徽鄉試中額一名

廣貴州鄉試中額一名

七年廣河南鄉試中額三名

八年 諭禮部奏遵議左宗棠等奏請補行陝甘鄉試一摺陝甘鄉試前因軍務久未舉行見在陝西全境肅清甘肅之煙慶各屬亦已安謐著准其於本年特開一科補行壬戌恩科及甲子正科鄉試陝甘中額向係合併取中甘省軍務未竣各屬士子未能一律赴試自應酌留中額以昭平允著照左宗棠所議辦理恩詔廣額亦著照禮部所議取中

九年 諭桂清奏請嚴密緝譯鄉會試及考試拔貢關防一摺緝譯鄉會試及考試八旗拔貢均係國家掄才大典如該侍郎所奏近日考試緝譯歸併文場關防不能嚴密士子專占一號既不免有代倩等弊且士子十六日出場十八日始行奏派閱卷十七日一日竟無關防亦難保無請託情事至考試八旗拔貢卷面雖揭浮籤仍將佐領之名註於旗分之下殊不足以昭慎密著自明年會試起緝譯鄉會試均改復舊制其考試八旗拔貢並著自同治癸酉科爲始由部頒發卷面字式永遠遵行

又廣江蘇鄉試文武中額各八名

十一年 諭御史袁承業奏考試弊竇多端請旨嚴禁一摺考試爲掄才大典功令森嚴豈容潛滋弊竇若如該御史所奏近年考試教習謄錄各項大半冒名代倩鄉會兩關並殿廷考試各種弊端亦未盡絕實屬不成事體嗣後中外大小臣工凡與衡文之任者務各精白乃心嚴絕干謁其外廉各官亦應認真稽覈力杜諸弊庶奔競者倖獲無由而真才不至掩蔽經此次訓誡之後儻仍敢玩法營私或被入參劾或別經發覺朝廷惟有執法嚴懲決不寬貸

又 諭御史吳鳳藻奏鄉會兩關請整頓謄錄對讀積弊並請飭逐場校閱各摺片文闡謄錄對讀等官原爲除弊而設若如該御史所奏謄錄任意潦草對

讀視爲具文此等弊端亟應嚴行整頓嗣後各省監臨知貢舉務當飭令各執事官認真辦理有犯必懲至闈中校閱文藝本應三場並重不得專重第一場此後中外臣工凡與衡文之任者務當逐場校閱拔真才毋許草率從事十三年 諭本年補行覆試日期較早各省續到之未經覆試舉人不能一體會試未免向隅自應量爲變通以示嘉惠士林至意著禮部查明此次如有未經覆試舉人准其先行會試俟會試後再令補行覆試倘覆試時有應行罰科等事仍著該部知照知貢舉照例辦理嗣後各省應行覆試舉人務當及早晉京如期應試毋許任意遲延此係破格加恩嗣後不得援以爲例

又 諭鴻臚寺少卿梁僧寶奏磨勘鄉試中卷應議過多請飭申明定例一摺磨勘試卷關繫甚重近來往往視爲具文上年癸酉科各省鄉試中卷經磨勘官及覆勘大臣指出疵謬甚多國家設科取士原期甄拔真才豈容以疵謬之文濫竿充數嗣後鄉會試考官務宜悉心較閱認真去取毋得草率從事並著禮部於磨勘時查照向章將科場條例及磨勘處分各條詳細申明認真辦理

皇朝續文獻通考卷八十七

選舉考四 舉士

光緒二十四年 諭我朝承宋明舊制以四書文取士康熙年間曾經停止八股改試策論未久旋復舊制一時文運昌明儒生稽古窮經類能推究本原發明義理制科所得實不乏通經致用之才乃近來風氣日漓文體日敝所試時藝大都隨題敷衍於經義罕有發明而譚陋空疏者每獲濫竽充選若不因時通變何以見實學而拔真才著自下科為始鄉會試及生童歲科各試向用四書文者一律改試策論其如何分場命題考試一切詳細章程該部即妥議具奏此次特降諭旨實因時文積弊太深不得不隨時改變以破拘墟之習至士人為學自當以四子書六經為根柢策論與制義殊流同源仍不外通經史以達時務總期體用兼備人皆勉為通儒毋得競進博涉徒蹈空言致負朝廷破格求才至意

二十七年 諭科舉為揀才大典我朝沿用前明舊制以八股文取士名臣碩儒多出其中其好學者皆潛心經史文藻特其緒餘乃行之二百餘年流弊日深士子但視為弋取科名之具勦襲庸濫於經史大義毫無發明急宜講求實學挽回積習查近來各省通商智巧日出尤貴博通中外儲為有用之材所有各項考試不得不因時變通以期造就著自明年為始嗣後鄉會試頭場試中國政治史事論五篇二場試各國政治藝學策論五道三場試四書義二篇五經義一篇考官閱卷合校各場以定去取不得偏重一場生童歲科兩考仍先試經古一場專試中國政治史事及各國政治藝學策論正場試四書義五經義各一篇考試差庶吉士散館均用論一篇策一道進士朝考論疏殿試策問均以中國政治史事及各國政治藝學命題以上一切考試凡四書五經義均不准用八股文程式策論均應切實敷陳不得仍前空行剽竊自此次降旨之後皆當爭自濯磨務以四書五經為根本究心經濟力戒浮囂明體達用足備器使庶副朝廷求治作人之至意所有各試場詳細章程及其餘各項考試未盡事宜著禮部會同政務處妥議具奏

臣謹案 國朝八股取士仿自前明物極則變理有固然邇年青衿之士秦半枵腹無論各國政治藝術如墮雲霧即我中國經史大義亦罕有研究及之者輒囊視月不免貽人口實今者舍舊謀新特頒 明詔誠能崇實學祛積弊溝通中外蔚為明體達用之成材今而後作人之盛其庶幾乎

二十九年奕劻等奏光緒二十七年四月奉 旨照博學鴻詞科例開經濟特科著政務處大臣議定考試章程二十八年十月奉 諭著政務處分咨原保大臣及各省督撫分別咨送務於四月以前齊集京師當經恭錄分咨遵照計中外臣工奏保者三百七十餘人其中有見任實缺或充要差為該省督撫奏留不考者見在報到一百二十二二人既奉 旨會試後舉行自毋庸再予展限應請 欽定日期 特旨宣示所有考試事宜由禮部查照向章辦理惟原奏係以二場分試策論見就試人少擬略變通以第一場為正場錄取者再行覆試一場均試以論一篇策一道並請 欽命題目簡派大臣校閱進呈恭候 欽定等第帶領引 見嗣於閏五月十六日在保和殿考試六月 予考取一等袁嘉穀等九名二等馮善徵等十八名升敘有差

三十年吏部奏定舉貢考職並優貢錄用知縣補缺班次章程 三十一年袁世凱張之洞等奏罷科舉略稱科舉之弊古今人言之綦詳而科舉之阻礙學堂妨誤人才臣世凱臣之洞等亦迭經奏陳久在 聖明洞鑒之中無煩縷述是以前奉 諭旨遞減科舉中額期以三科減盡十年之後取士概歸學堂固已明示天下以作新之基而徐俟夫時機之至所以為興學培才計者用意至為深遠臣等默觀大局熟察時趨覺見在危迫情形更甚曩日而科舉一日不停士人皆有微倖得第之心以分其砥礪實修之志民間更相率觀望私立學堂者絕少非公家財力所能普及學堂決無大興之望就目前而論縱使科舉立停學堂備設亦必須十數年後人才始盛如再遲至十年甫停科舉學堂有遷延之勢人才非急切可求又必須二十餘年後始得多士之用科舉夙為外人詬病學堂最為新政大端一旦毅然決然舍舊謀新則風聲所

樹觀望益傾羣且刮目相看推誠相與而中國士子之留學外洋者亦知進身之路歸重學堂益將勵志潛修不爲邪說浮言所惑顯收有用之才俊隱戢不虞之詭謀所關甚宏收效甚鉅且設立學堂者並非專爲儲才乃以開通民志爲主使人人獲有普及之教育具有普通之智能上知效忠於國下得自謀其生也其才高者固足以佐治理次者亦不失爲合格國民兵農工商各完其義務而分任其事業婦人孺子亦不使閒處而與教於家庭無地無學無人不學以此致富奚不富以此圖強奚不强故不獨普之勝法日之勝俄識者皆歸其功於小學校師即其他文明之邦強盛之原亦孰不基於學校而我國獨相形見絀者則以科舉不停學校不廣士心既莫能堅定民智復無由大開求其進化日新也難矣故欲補救時艱必自推廣學校始而欲推廣學校必自先停科舉始擬請 宸衷獨斷雷厲風行立沛 綸音停罷科舉庶幾廣學育仁化民成俗胥基於此雖然科舉停矣尚有切要之辦法數端學生乃可相維於不敝一在於首重經學也或慮科舉一停將至荒經不知習舉業者未必皆湛深經術但因科場題目所在不得不記誦經文又因詞章敷佐之需不得不撈拾經典故自四書五經而外他經多棄置不觀即五經亦不皆全讀讀者亦不盡能解是何與於傳經今學堂奏定章程首以經學根柢爲重小學中學均限定讀經講經溫經時刻不准減少計中學畢業共須讀過十經能通大義而大學堂通儒院均設有經學專科餘如史學文學理學諸門凡舊學所有者皆包括無遺且較爲詳備蓋於保存國粹尤爲兢兢所慮辦學之人喜新厭故不知學經則雖諸生備諸各種科學亦僅造成一汎濫無本之人才何濟於用應請 飭下各省督撫學政責成辦理學務人員注意經學暨國文國史則舊學不虞荒廢抑且日見昌明一在於崇品行也查科場試士但憑文字短長不問人品賢否暗中摸索最足爲世詬譏今學堂定章於各科學外另立品行一門亦用積分法與各門科學一體考核同視分數共言語容止行禮作事交際出遊六項隨處稽察第其等差考試時亦以該生平日品行分數併計合算亟應聲明定章請 飭各省認真遵辦則人人可期達材成德自不至於越矩僨規一師

範宜速造就也各省學堂之不多患不在無款無地而在無師應請 旨切飭各省多派中學已通之士出洋就學分習速成師範及完全師範兩種尤以多派舉貢生員爲善並於各省會多設師範傳習所師資既富學自易興此爲辦學入手第一要義不容稍涉遲緩一未畢業之學生暫勿率取也各省設立學堂遲早不一程度不齊或學業有期或畢課尙早若不待畢業驟加考試則苟且速成弊將日滋若必待全行畢業則各省之辦學較遲者必至缺其選舉士林又將失望今籌一通融辦法既不同科舉之敷衍故事亦不向學堂而遷就濫登要取士仍歸學堂之中學堂不蹈科舉之弊擬請此數年內除學堂實係畢業者屆期奏請考試外其餘則專取已經畢業之簡易科師範生予以舉人進士之出身既可以勸教育之員廣教育之基並隱以勵績學而杜倖進外國無速成小中高等各學而有速成師範學具有深意至五年以後完全師範生畢業者已多更足以應選舉而有餘此等師範生皆國文已優學術純謹斷無流弊且多係舉貢生員爲之本可以得科第之人亦非僥倖迨十年以後各省學堂逐漸畢業人才濟濟更可不窮於用一舊學應舉之寒儒宜籌出路也文士失館生計頓蹙除年壯才敏者入師範學堂外其不能爲師範生者賢而安分則困窮可憫不肖而無賴或至爲非生事亦甚可憂擬請十年三科之內各省優貢照舊舉行已酉科拔貢亦照舊辦理皆仍於舊學生員中考取其已入學堂者照章不准應考惟優貢之額過少擬請按省分大小酌量增加分別錄取 朝考後用爲京官知縣等項三科後再行請 旨其已中舉人五貢者此三科內擬令各省督撫學政每三年一次保送舉貢若干名略照會試中額加兩三倍送京考試凡算學地理財政兵事交涉鐵路礦務警察外國政法等事但有一長皆可保送俟考試時分別去取試以經義史論一場專門學一場共兩場其取定者酌量用爲主事主事書知縣等官如此則鄉試雖停而生員可得優拔貢會試雖停而舉貢可以考官職正科舉之名專歸於急需之學堂廣登進之途藉恤夫舊學之寒士庶乎平允易行各得其所少長同臻於有用新舊遞嬗於無形矣以上五條皆停科舉後最爲切要之端而行之可期無弊

應請一併 飭下各省督撫學政切實遵辦至各省學堂未辦者宜從速提倡已辦者宜極力擴充以及各學堂學生之良莠與夫辦理學務人員之功過均應隨時認真考察分別懲勸奉 上諭袁世凱等奏請立停科舉推廣學校並等辦法一摺三代以前選士皆由學校而得人極盛實我中國興賢育才之隆軌即東西洋各國富強之效亦無不本於學堂方今時局多艱儲才為急朝廷以近日科舉每習空文屢降明詔飭令各省督撫廣設學堂將俾全國之人咸趨實學以便任使用意至為深厚前因管學大臣等議奏已准將鄉會試中額分三科遞減茲據該督等奏稱科舉不停民間相率觀望欲推廣學堂必先停科舉等語所陳不為無見著即自丙午科為始所有鄉會試一律停止各省歲科考試亦即停止其以前之舉貢生員分別量予出路及其餘各條均著照所請辦理總之學堂本古學校之制其獎勵出身又與科舉無異歷次定章原以修身讀經為本各門科學尤皆切於實用是在官紳申明宗旨聞風興起多建學堂普及教育國家既獲樹人之益即地方亦與有光榮經此次諭旨後著學務大臣迅速頒發各種教科書以定指歸而宏造就並著責成各該督撫實力統籌嚴飭府廳州縣趕緊於城鄉各處備設蒙小學堂慎擇師資廣開民智其各認真舉辦隨時考察不得敷衍瞻徇致滋流弊務期進德修業體用兼該共副朝廷勸學作人之至意

臣謹案董子曰天不變道亦不變而易則曰窮則變變則通通則久何也蓋不能不變者法也而不可變者道也孔子曰殷因於夏禮所損益可知也周因於殷禮所損益可知也因者道也損益者法也光宣之際盛言變法持之有故言之成理固未可厚非也乃變法而並道變之亡無日矣廢科舉與學堂變法之大者也然變其法非變其道當時定議諸臣未嘗不見及乎此故其疏中於重經學崇品行諸大端兢兢注意無如奉行者中無真識盲然惟知從新乃致法變一時而道喪千載固諸臣所不及料也雖然法之不可不變而不可妄變必待其人而後行亦可見矣

三十二年政務處奏定舉貢生員出路章程六條略稱見在科舉初停學堂未

廣各省舉貢人數合計不下數萬人生員不下數十萬人國家以科舉取士士之雋異者成出其中其次亦多鄉黨自好不乏可用之才中年以上不能再入學堂原奏保送優拔兩途定額無多不免窮途之歎方今捐例未止保案尙多該舉貢生員等非研經已久即績學多年似較捐保兩途造就尙易如能量材器使加以磨礱未始不可收拔十得五之效臣等謹將舉貢生員出路詳酌妥議有為新章所已行有為成例所原有稍示變通仍予限制其原奏保送一條各省仍應遵照辦理至該貢等分發外省既有到省甄別之條又有入法政學堂肄習之案擬請 飭各督撫認真辦理以期澄汰庸瑣成就廉能庶於掄才馭吏之道均有裨益謹擬寬籌舉貢生員出路章程六條一酌加優拔貢額查優拔貢向皆由優等生員取錄兼甄文行所得人才較多自應量予加取以廣甄拔擬請已酉科舉行拔貢照向額加倍考取本年丙午即係考取優貢之年以後三年舉行一次各省均照例額加倍考取取錄原額倍取以惠寒峻均於壬子年考優後一律停止學堂學生仍照原奏不准與考一考用膳錄查管學大臣遞減科舉原奏本有多挑膳錄之請上年吏部奏准考取膳錄各部書吏漸次裁汰清繕文牘需人必多擬仿吏部辦法推廣各部院衙門均令考用膳錄幫繕公牘舉人五貢生員分為三等酌給津貼二年後分別獎敘准以實官分發其舉人拔貢優貢充考膳錄當差期滿並由該堂官擇尤奏請改用七品小京官在部行走俾昭激勵一已就揀選舉人准令報捐分發免交補班銀兩查定例舉人近省三科遠省一科以上者皆准就揀選以知縣註冊惟揀選並無班次見在科舉既停近省舉人並有未能註冊者擬請嗣後各省舉人不必限定三科均准以揀選知縣註冊並由吏部酌定班次選用其中式已過十年有願分發到省者令交分發銀兩即准分省試用各項貢生就職照此辦理一截取舉人請毋庸再用教職查舉人截取向用知縣教職兩途科舉停後專重學堂教官事務愈簡上年吏部奏准裁去復設一缺擬定選班以師範生開補截取教職得缺無期查直隸州州同及各項鹽庫大使或為舉人應得之官或為大挑知縣借補之職擬請嗣後截取舉人除用知縣外兼用直隸

州州同鹽庫各大使以廣登進其截取舉人已奉 旨以知縣用者並請准其隨時分發毋庸扣限俾及時效用至恩拔副貢生向例准以直隸州州判就職註選而歲優兩貢不與未免向隅且直隸州州判額缺甚少殊覺擁擠並請量加推廣凡五貢均准一體以按察鹽運使經歷散州州判府經歷縣丞分別註冊選用如捐交分發銀兩即准分省試用一生員考職查管學大臣遞減科舉摺內生員准比照已滿吏考職用為佐貳雜職分發試用之語又定例貢監考職皆令來京考試惟各省生員多係寒士概令來京殊不足以示體恤且人數過多宜加限制擬除年輕諸生應挑入學堂及見充各學堂教員見入師範學堂見送出洋游學各生外其餘生員均於考優貢之年准令各州縣會同教官遴選保送由各督撫會同學政認真考試取其文理暢達事理明晰者大省取一百名中省取七十名小省取五十名其保送人數約照取額十倍毋得過溢每州縣應送若干名由該督撫等分別酌定先期飭遵取定等次將所取各生姓名三代年貌造冊咨送吏部一等以巡檢用二等以典史用分別註選如願捐分發銀兩者並准分省試用亦截至壬子年止以示限制一每科會試中式之貢士有未經覆試者有覆試後未應 殿試或朝考者向例於下科補考今科舉既停擬請准令該員等取具同鄉京官印結赴吏部呈請已經覆試或殿試者即開列所考等第甲第名次帶領引 見懇 恩給予出身分別錄用未經覆試者亦請查照新章免其覆試引 見錄用其已免覆試之舉人並請一體准其照例就揀以免向隅

又學部禮部奏准見在學政專司考校學堂事務不隸禮部其從前之貢士舉人恩拔副貢優貢並廣增附生例貢監生考試引 見解卷行文以及改籍更名就職報捐一應事宜統由禮部仍照例章分別核辦至由學堂出身之進士舉人優拔副貢廣增附生暨出洋游學畢業生並國子監歸併學部後在學部領照之監生考試引 見解卷行文以及改籍更名就職報捐一應事宜統由學部查照新章分別核辦

又禮部奏本年政務處奏准寬籌舉貢生員出路其第五條章程內開管學大

臣奏遞減科舉摺內聲明生員准比照已滿吏考職用為佐貳雜職分發試用 等按照原奏覆加細釋查舊學生員除挑入學堂及見充教員出洋游學並綠事註劣業經出學各省不准保送外其餘人數多寡不同應由各督撫飭令各州縣會同教官酌量保送不得畸輕畸重以免偏枯俟優生考畢在省舉行學政見已裁撤擬由提學使分為兩場局門考試頭場試以經義史論各一篇二場試以時務策兩篇如有長於算學輿地財政兵政交涉鐵路礦務警章外國政法等事俱令於頭場前赴提學使司報明於二場試以專門題目合校兩場以定去取試卷即照科歲考試酌加篇頁嚴密密封取定後將試卷呈送督撫核辦並造具各生姓名三代年貌清冊分送吏禮兩部試卷即隨優貢卷解交 吏部俾昭慎重

又奏保送舉貢事屬新辦各省道途遠近不一若非先立標準未免無所適從 等細釋袁世凱等原奏所請三年一次仍係規仿三年大比且意在疏通舊學其考試年分及起送赴考各節自應查照會試舊章參酌辦理惟會試中額向由 吏部開歷屆比較單奏請 欽定此次加額保送擬請以二十四年戊戌科 欽定會試中額為斷於本額外再加三倍以廣登進至原奏統言舉貢實則核計各省舉貢堪膺保送者究屬舉佔多數貢居少數擬以舉四貢一分別計算宗室由宗人府八旗由都統各省由督撫按照原奏遴選長於算學地理等科如額保送造具年貌籍貫科分清冊於年內咨部並分給該舉貢等咨文統限明年二月到京親齎投考屆期再將考試章程另行具奏

又學部等奏 部奏准考驗游學畢業生自本年始每年八月舉行一次見據各省咨送應考學生陸續到京亟應議定考驗章程以憑辦理查上年考驗游學畢業生因其時科舉未停學部未設按照鄉會試覆試之例奏請在 保和殿考試本係一時權宜之計見在科舉既已停罷又值 朝廷綜核名實之時自應妥議章程悉心考驗 等詳考外國制度大都學成試驗與入官考驗分為兩事而條理實相貫通 部此次考驗游學畢業生即各國學成試驗之意擬酌照奏定分科大學畢業及高等畢業章程由 部會同 欽派大臣按照

所習學科分門考試務求詳密試畢酌擬等第帶領引 見恭候 欽定分別給與進士舉人等出身仍將某科字樣加於進士等名目之上以爲表識京外衙門可就所分之科分別調用加以試驗奏請 錄用庶幾循名責實各盡所長

考試游學畢業生章程

一考試分兩場第一場就各畢業生文憑所注學科擇要命題考驗第二場試中國文外國文

一第一場每學科各命三題作二題爲完卷第二場試中國文一題外國文一題作一題爲完卷

一試卷由襄校分閱評記分數再由學部大臣會同 欽派大臣詳細覆校分別最優等中等

一畢業生考列最優等者給予進士出身考列優等及中等者給予舉人出身均由學部開單帶領引 見請 旨

一畢業生准給出身者並加某學科字樣習文科者准稱文科進士文科舉人習法科者准稱法科進士法科舉人醫科理科工科商科農科仿此

三十三年考察政治館王大臣奏准各省畢業學生先以鄉官考試任用學部奏定限制考試游學畢業生嗣憲政編查館會奏核定游學畢業生

廷試錄用章程

一凡在外國高等以上各學堂之畢業生經學部考驗合格奉 旨賞給進士舉人出身後每年在 保和殿舉行 廷試一次其 廷試日期於八月

考驗畢業以後由學部奏請 欽定

一於 廷試之前一日由學部奏請 欽派深明中國文學及科學並外國文之大員數人以爲閱卷大臣仿 殿試例先期在內閣值宿以便擬題

一由學部諮訪明通科學及外國文之京外各官開單奏請 欽派數員爲襄校官亦先期在內閣值宿以重關防

一恭應 廷試者作經義一篇科學論說一篇其經義題目一道恭候 欽

命科學題目應由閱卷大臣按應試者之學科門類每門各擬二題仿 殿試例恭候 欽定

一此項 廷試試卷由學部備辦每人各給中文卷一本其科學論說願用西文書寫者先期呈明給西文卷

一東西國之醫科工科格致科農科大學畢業生及各項高等實業學堂畢業者往往僅以科學見長不工文字此項學生准其僅作科學論說一篇不必兼作經義

一此項游學畢業生之 廷試卷分爲一三三三中文與科學並能優長者列一等中文平安科學優長者列二等科學優長未作中文卷者列三等惟

一二三各等不必全備如全係佳卷不妨盡列一等如無中文優長者亦不妨盡置之二三等

一此項游學畢業生之 廷試卷由閱卷大臣擬定等第奏請 欽定後應由學部將該生等帶領引 見其已得有進士出身者按照奏准鼓勵游學

章程及三十一年考驗游學畢業生金邦平等成案請 旨分別賞給翰林主事等官其已得有舉人出身者仿照本年舉人考職成案請 旨分別賞

給主事內閣中書小京官知縣等官均於排單內按其所入學堂之程度與畢業考驗及 廷試之等第分別註明恭候 欽定

一凡經學部考驗列最優等 賞給進士者 廷試列在一等引 見時於排單內註明擬請 旨賞給翰林院編修或檢討經學部考驗列最優等

賞給進士者 廷試列在二等引 見時於排單內註明擬請 旨賞給翰林院庶吉士俟三年期滿由掌院學士出具考語奏請分別授職編修或檢討經學部考驗列最優等 賞給進士者 廷試列在二等與經學部考驗

列優等 賞給舉人者 廷試列在一等引 見時於排單內註明擬請 旨賞給主事按照所學科目分部學習經學部考驗列優等 賞給舉人者

廷試列在二等與經學部考驗列中等 賞給舉人者 廷試列在一等引 見時均於排單內註明擬請 旨賞給內閣中書經學部考驗列優等

賞給舉人者 廷試列在三等引 見時於排單內註明擬請 旨賞給知縣分省即用經學部考驗列中等 賞給舉人者 廷試列在二等引 見時於排單內註明擬請 旨賞給七品小京官按照所學科目分部學習 其 廷試列在三等者引 見時於排單內註明擬請 旨賞給知縣分省試用

一上屆 賞給進士舉人未經 廷試者准其一體 廷試 一已有原官願就本班者准其於 廷試前期呈明仍以原官照從前進士 告歸本班用章程辦理

又吏部奏准保送舉人見遺後酌予錄用又奏准舉貢錄用部屬人員統分各部又禮部奏准籌給京旗文生員繙譯生員出路

又憲政編查館奏准見在科舉停罷此後最能授官以學堂為取材之所嗣後遊學畢業人員請暫照光緒三十一年考驗游學畢業生金邦平等成案經 欽派大臣會同學部考試請予出身後擬令恭應 廷試一次照從前 殿試

例請 旨分別授職以廣登進而勵真才俟將來考試官吏章程大定再將各學堂實官獎勵及此項授職考試體察情形酌量變通奏准辦理前由學部妥議 廷試章程十一條送由 館核定開單呈 覽由學部奏請 欽定廷試日期一體遵行

又考試舉貢錄取吳承仕等三百六十七人 給予主事小京官知縣各職

三十四年學部奏在日本私立大學畢業學生應先由部考驗合格始准應考游學畢業略稱查日本近來私立立法政大學日見增多其所收中國學生程度每多遷就往往有名雖在學終年在游蕩實在到堂聽講歸齋自習之日無多甚有入學一二年而已自專門部升大學畢業者若非嚴加甄核准其一體與考則謬種流傳大有害於後進人才 臣部前准出使日本大臣李家駒函稱私立大學多有插班學生其在校年月迭經派員往各學校查詢祕不肯告非另定甄錄之法不可 臣等見擬令在日本私立立法政各大學畢業生之學生除

由普通畢業升入之學生呈有普通畢業文憑者外概於考試之前先由 臣部考驗普通學大要及日本文語一場務須認真校閱考核合格始准其應考游學畢業以重名器

臣謹案顧炎武有言考試欲其難不欲其易科舉取士所學雖非所用拔十猶可得一而皓首窮經不第者尚實繁有徒今採東西學堂制度三年畢業人人可操左券無論所學果否可用而即此難易之別已判霄壤况如學部所奏其營營自粥而來者果何等也夫歷代取士之法皆因時損益不泥一端必拾遺闕異域習俗之殊絕者盡棄所學而學焉風會所趨未知所屆豈區區考驗校閱所得防閑哉不禁長太息矣

宣統元年禮部奏酌擬變通保送舉貢略稱查光緒三十一年前直隸總督袁世凱等奏准停止科舉摺內所稱舉人五貢三科內令各省督撫每三年一次保送若干名略照會試中額加兩三倍送京考試凡算學地理財政兵事交涉鐵路礦務警察外國法政等事但有一長皆可保送俟考試時分別去取等語又三十二年 臣部具奏酌擬保送舉貢辦法請以二十四年戊戌科會試 欽定中額為斷於本額外再加三倍按舉四貢一計算由各該督撫如額保送等因通行在案又奏准在京八旗並各省駐防保送舉貢由各旗及各省將軍等酌量額數備文分送在京各旗由值年旗大臣如額選取又三十三年各省督撫保送舉貢冊內多有逾額或已有官階或學堂定有獎勵者均隨時電駁咨回另行選取又准軍機處交都察院奏各省舉貢未與考送請由部量予甄取等因奉 旨著照所請該部知道欽此尋覆准欽遵辦理並附片奏准值年旗大臣奏稱八旗並各省駐防保送舉貢彙總造冊仍由部考試經 臣部擬請歸入甄錄場內一體考試又三十四年奏准場務繁多自應次第舉行各省先考選拔生次考優生次生員考職次考試送保舉貢統限明年六月以後十一月以前一律考竣等因各在案本年各省考試保送舉貢有應略予變通者有應申明定章者自宜先期奏明以便通行遵照除候補候選得有實官及學堂教習學生畢業定有獎勵者並各省實缺教官與未經 朝考之優拔生均不准

與考外查從前舉多貢少是以定爲舉四貢一今科舉久停舉人揀選就職出路較寬優貢則加四倍考取歲貢則加倍考取約略計之貢亦不居少數此次保送自應略予變通擬請不分舉貢仍照上屆奏定額數由各督撫一體憑文錄送至上屆京師甄錄一場原係一時權宜本屆保送舉貢亟須申明定章照

部上年奏准考試次序由各督撫於接奉部文後即行酌定考試月分通飭各府廳州縣徧行曉諭各舉貢無論游學游幕隨任及出洋遊歷並各衙門騰錄錄事未得獎敘者均於前期各歸本省聽候考試其未由本省考試及考試被遺各舉貢均不准來京取結具呈邀求甄錄吉林黑龍江兩省舉貢仍赴奉天一同考試宗室舉人仍由宗人府如額考選八旗及各省駐防舉貢並結譯舉人仍由各旗及各將軍都統督撫等備文分送在京各旗統歸值年旗大臣如額考選其應考各舉貢習某科者均於投卷時自行註明有兼習數門者亦應擇報一門考試時頭場試以經義史論題各一道二場試以算學地理財政兵事交涉鐵路礦務警察外國政法各一門題目臨時酌定不拘合格校兩場如額選取取定後造具姓名年貌三代籍貫科分註明考某門清冊隨同試卷題紙於年內解部並分給該舉貢等咨文統限明年二月到京親齎投考以便三月內奏定考試日期如逾期不到即歸入下屆考試不得再開一場以示限制恭候 命下 臣部通行京外各衙門遵照辦理

又禮部奏議覆督撫奏太原等處駐防及口外十二廳請添優拔貢額等略稱所有山西太原綏遠右衛各駐防准其合設拔貢額一名歸入山西附考口外十二廳准其合設拔貢額二名至生員考職原請歸入本省額內不必另定名額之處應如所奏辦理又請添駐防優貢二名查與政務處奏定每六十名准取優貢一名章程不符應毋庸議又駐防保送舉貢應遵照部奏定章程仍由該將軍等備文分送在京各旗由值年旗大臣考選俾與各省駐防一律至駐防生員考職仍查照 臣部奏准章程辦理

又四川總督趙爾巽奏紳民完納津捐請廣優貢額數略稱川省光緒二十八二十九兩年津貼捐輸銀四百三十八萬三千四百一十九兩八錢五分零五

毫六絲准以四百二十萬兩加廣川省優貢一十四名即於己酉年考取

又禮部奏遵議福州將軍奏請添設駐防選拔額

又東三省總督錫良署奉天巡撫程德全奏請將海龍新民 興京鳳凰鎮安通化懷仁安東寬甸懷德康平奉化綏中各府廳縣十二學在學生員合考添設拔貢六名

又四川總督趙爾巽奏大甯縣學分設拔額均下部議奏

又 諭電寄護理雲貴總督沈秉堃據電奏請將雲南會澤等廳縣添設拔額等語著該部速議具奏

又署直隸總督那桐奏請將永平保定遵化滄州各駐防合設拔額一名

又禮部奏議覆護滇督奏請添設會澤等廳縣拔額略稱會澤文山寶甯三縣生員均逾百名擬請將該縣各設拔額一名倍取一名龍陵安平巧家三廳均逾五十名恩安甯洱二縣均四十餘名擬請將該廳縣各設拔額一名不得倍取其餘恩茅中甸維西威遠他郎大關緬甸魯甸永北各廳縣均不及四十名人數太少未便遽設拔貢名額

又奏議覆東督等奏請酌立江省拔貢名額略稱查該省存部學冊滿字合字兩號共生員四十餘名呼蘭綏化兩府共生員五十餘名核與歷次新添拔額成案相符擬如所請滿字號合字號准其合設拔額一名呼蘭府綏化府准其合設拔額一名均不得倍取

又禮部奏議覆陝西巡撫奏西安駐防及留壩廳添設選拔名額略稱查該省存部學冊西安駐防及留壩廳在學生員均在百名以外自應准其各設拔貢名額惟應按照福州成案由該撫確查見今該旗學及留壩廳學實在生員究有若干名果均在百名以外即照政務處奏定章程准其加倍考取如該旗學及該廳學內有不及百名者即照來電所請准設拔貢額一名不得倍取

又議覆陝甘總督奏甘肅甯靈等廳縣添設選拔名額查該省存部學冊甯靈廳及平遠縣在學生員均逾五十名擬如所請准各設選拔一名其海城縣在學生員僅有八十餘名應准設拔額一名至化平直隸廳在學生員僅三十餘

名人數過少未便准其添設拔貢名額均依議行

又學部奏酌擬考試畢業游學生章程分爲八項曰考生資格曰查驗文憑曰預行甄錄曰分門命題曰考試日期曰分等給獎曰分別職掌曰嚴密關防略仿科舉取士之遺兼取學堂積分之法如尙有續增之處容奏明辦理

又添設已酉科拔貢額 奉天海龍新民興京鳳凰鎮安通化懷仁安東寬甸懷德康平奉化綏中各府廳州縣合取二名倍取二名熱河朝陽平泉赤峯建昌各府州縣各一名倍取一名遼平豐寧兩縣圍場糧捕廳三屬合取一名倍取一名駐防圍場圍庭莊頭合取一名倍取一名直隸永平保定遵化滄州各駐防合取一名四川大甯縣一名陝西駐防及留壩廳各一名甘肅甯遠海城各廳縣各一名

又 諭吉林巡撫陳昭常電奏懇將五常廳等九學合考添設拔額等語著禮部議奏尋奏遵查該省存部學冊五常雙城賓州延吉伊通農安敦化磐石長壽各廳州縣共九學在學生員名數與原奏無異並核與歷次新添拔額成案相符擬如所請五常廳等九學准其合設拔額一名倍取一名共取二名又禮部奏准添廣西百色廳及恩隆縣拔貢額各一名

又御史趙熙奏見考試游學畢業生名單取列最優等者工科六名農科二名醫科二名格致科二名法政科一名聞歸自西洋者凡十三名以向例言之皆有翰林之望夫以專門實業之士充文學侍從之臣責以撰文之任所習非所用彰彰明矣即優等中等內凡農工商醫諸科以之爲內閣中書爲知縣爲不相當之主事亦與立法之意相悖是非可視爲細故也所習非所用該生將無可辦之事而遇事又無可用之人其久也凡事一無可責之效似不如以農工商科之人分置農工商部或派各省振興實業醫科者分置陸軍部或民政部庶爲近理此不可不於未廷試時先定之也又向例最優等應廷試取列一等者即編修二等亦庶吉士三等亦主事一日之長雖劣不掩其短是誠未免過優似非平情核實之道至廷試定期明年想必別有深意惟從前八月鄉試因舉人散在各道省非數月不能齊集故會試必定次年今畢業生既成集

較之下矣似亦可稍爲變通以便單寒之士也抑臣尤有請者學位與官職當各爲一事不必畢業者人人皆官何也人人以學爲生計自立之道也人人以官爲生計非自立之道也方今各學堂學生及游學生合之優拔諸生人人皆官官既日多一日誠恐生計日促一日應請 旨飭學部合參中外循名核實詳議經久之方下學部議奏尋奏查東西各國實業俱有專司凡機械公司農場醫院之類隨地備設其督辦經理各員皆與在官無異故凡研精一藝者一經學成即可執業自效中國向以帖括試士自 部定有留學生考試章程一時研習科學者稍稍有以見用惟館閣之階向皆視爲華選者專門實業之士擯不見與恐習農工商醫者誤以爲國家取士有所歧視轉非提倡實業之意是以屢屆 廷試按照等第一律授職實亦權宜不得已之辦法近來游學生之授職翰林中書者多充學堂教習或爲各部調用亦尙非盡置閒散總之國家造就人才將欲使實業之人習皆所用則必商務振興物產競出凡機器製造公私局廠徧布內地然後習實業者無不得用之人即無不可責之效若但如原奏所稱以農工商科之人分置農工商部無論該部人員大半居於行政地位即概用實業人員而員缺皆有定額嗣後外洋游學及內地實業學堂畢業者接迹而起恐置之農工商部與用爲翰林中書其爲投閒置散會無少異推之醫科之於陸軍部民政部勢當復相同惟就見在情形而論游學生畢業授職大半咸集都下其有授職知縣者亦多呈請留京供差不願就外以致邊遠省分需用實業人才供不副求 等公同商酌明年游學生 廷試擬請仍照等第分別授職一面由 部將農工商醫各科人員除有授職知縣者應令遵章赴省不得援請留京外其餘彙爲一冊分咨各省督撫查明學堂局廠及官私已經成立之公司遇有需用此項人員開列人數電知 部即由 部請 旨發往該省委用並聲明不扣資俸其法政畢業人員亦擬照此辦理如蒙 俞允即由 部遵奉施行原奏又稱最優等應 廷試取列一等者即編修二等庶吉士三等亦用主事未免過優又 廷試日期應請變通及學位官職當各爲一事不必畢業者人人皆官等語查憲政編查館奏定分年籌備事宜

宣統三年實行文官考試章程一俟此項章程實行則學堂畢業授官自應分爲兩事即游學生 廷試亦可停止所有詳細章程應由憲政編查館妥議具奏見在距實行文官考試年限不遠擬請一切因仍舊章辦理

又吏部奏酌增考職京員並考班中書改外辦法略稱舉貢分省知縣既歸併即用班內則舉貢主事書改就之知縣亦即歸併裁取進士班內其舉人考班中書改就之知縣則歸併裁取舉人班內統由 臣部按照兩項裁取例章分別核辦至游學生知縣班次如係學部奏明即用者亦即附於即用進士之後與舉貢即用較奉 旨先後日期係照章試用者仍按其出身附於裁取舉人之後與見定考班中書改就並嗣後隨時裁取人員統較分發到省先後分別補用以昭畫一其餘捐納議敘等項出身人員仍不得援以爲例

又禮部奏八旗并各省駐防保送舉貢由禮部選取
又兩廣總督張人駿奏甯京兩防生員已逾百名擬按案添設拔貢一名倍取一名以廣登進

又禮部以考試各省保送舉貢中額請得 旨宗室取中二名滿洲取中十三名蒙古取中四名漢軍取中五名直隸取中三十二名奉天取中四名山東取中二十六名山西取中十二名河南取中十六名陝西取中十一名甘肅取中七名江蘇取中二十名安徽取中十四名浙江取中二十二名江西取中二十一湖北取中十五名湖南取中十二名四川取中十四名福建取中二十二名廣東取中十五名廣西取中十二名雲南取中十名貴州取中十一名

又學部奏州縣停選請將高等實業學堂獎勵章程變通改訂略稱見在州縣停選各省高等實業學堂逐漸畢業此項獎勵章程自應酌量變通以免窒礙查奏定學堂章程各省高等學堂畢業獎勵考列最優等者作爲舉人內以內閣中書儘先補用外以知州分省儘先補用考列優等者作爲舉人內以中書科中書儘先補用外以知縣分省儘先補用考列中等者作爲舉人內以部寺司務補用外以通判分省補用高等實業學堂與高等學堂均係高等三年畢業程度亦復相同似可比照改訂見在各省實業待興需才孔亟定章既專獎

給外官應與高等學堂所獎外官一律辦理俾獲及時效用其畢業獎勵章程考列最優等者作爲舉人以知州儘先選用擬改爲作爲舉人以知州分省儘先補用考列優等者作爲舉人以知縣儘先選用擬改爲作爲舉人以知縣分省儘先補用考列中等者作爲舉人以州同儘先選用擬改爲作爲舉人以州同分省儘先補用如蒙 俞允即由 臣部遵照辦理

又法部奏議覆浙江巡撫奏考試法官請將審判研究所畢業學員一體與試法官考列期在八月舉行各省應考人員合格者無多將來恐不敷考選查有本省法政畢業人員有二年以上程度者又留學日本法政速成畢業在本省充當法政教員三年者此數項可否通融准其一律與考各等語 臣等當即咨商憲政編查館核議見准覆稱法官考試事屬創舉各省地處偏僻風氣未開自應暫准該省凡留學外國法政速成畢業在本省充當法政教員三年以上者及本省法政二年以上畢業領有優等文憑者均與第一次考試仍僅以此次爲限將來仍照定章辦理等語查館臣覆稱各節留學不必限於日本但統言外國以寬其途畢業既縮至二年必定以優等文憑以防其濫酌損益實於變通之中仍寓限制之意惟 臣等更有請者合格應考人員爲數無多恐不獨於省爲然見有江蘇撫臣電稱招考以來報名無幾等情蘇省係風氣早開交通便利省分且尚有乏才之歎其他各省可推而知見既擬推廣辦法自未便限於黔省一隅以滋歧異擬請將京外凡留學外國法政速成畢業在本省充當法政教員三年以上者及本省法政二年以上畢業領有優等文憑者均暫准其於此次收考以廣登進而免偏枯再 臣部上月具奏議覆浙江巡撫增請將審判研究所畢業學員一體與試摺內曾遵定章將該所學員未滿三年學期者議令不准與考奉 旨依議在案見在京外既擬暫行變通浙省亦應量予增損擬請凡在該省審判研究所接續有二年程度畢業領有優等文憑者本屆亦准其與第一次考試他省有似此資格人員亦准暫照此辦理仍僅以此次爲限以符館議

二年考試舉貢錄取陳命官等三百二十人 給予主事小京官知縣各職

登科總目

乾隆五十二年丁未科 廷試顧鈺等一百四十一人 賜史致光等進士及第出身有差

五十四年己酉預行正科 廷試錢楷等一百八人 賜胡長齡等進士及第出身有差

五十五年庚戌 恩科 廷試朱文翰等九十七人 賜石韞玉等進士及第出身有差

五十八年癸丑科 廷試吳貽詠等八十一人 賜潘世恩等進士及第出身有差

六十年乙卯 恩科 廷試王以錡等一百十人 賜王以銜等進士及第出身有差

嘉慶元年丙辰 恩科 廷試袁樞等一百四十四人 賜趙文楷等進士及第出身有差

四年己未科 廷試史致儼等二百二十人 賜姚文田等進士及第出身有差

六年辛酉 恩科 廷試馬有章等二百七十五人 賜顧皋等進士及第出身有差

七年壬戌科 廷試吳廷琛等二百四十八人 賜吳廷琛等進士及第出身有差

十年乙丑科 廷試胡敬等二百四十三人 賜彭浚等進士及第出身有差

十三年戊辰科 廷試劉嗣綰等二百六十一人 賜吳信中等進士及第出身有差

十四年己巳 恩科 廷試孔傳綸等二百四十一人 賜洪登等進士及第出身有差

十六年辛未科 廷試朱壬林等二百三十七人 賜蔣立鏞等進士及第出身有差

十九年甲戌科 廷試瞿溶等二百二十六人 賜龍汝言等進士及第出身有差

二十二年丁丑科 廷試龐大奎等二百五十五人 賜吳其濬等進士及第出身有差

二十四年己卯 恩科 廷試費庚吉等二百二十五人 賜陳沆等進士及第出身有差

二十五年庚辰科 廷試陳繼昌等二百四十六人 賜陳繼昌等進士及第出身有差

道光二年壬午 恩科 廷試呂龍光等二百二十二二人 賜戴蘭芬等進士及第出身有差

三年癸未科 廷試杜受田等二百四十六人 賜林召棠等進士及第出身有差

六年丙戌科 廷試王慶元等二百六十五人 賜朱昌頤等進士及第出身有差

九年己丑科 廷試劉有慶等二百二十一人 賜李振鈞等進士及第出身有差

十二年壬辰 恩科 廷試馬學易等二百六人 賜吳鍾駿等進士及第出身有差

十三年癸巳科 廷試許相等二百二十人 賜汪鳴相等進士及第出身有差

十五年乙未科 廷試張景星等二百七十二人 賜劉繹等進士及第出身有差

十六年丙申 恩科 廷試夏子齡等一百七十二人 賜林鴻年等進士及第出身有差

十八年戊戌科 廷試王振綱等一百九十四人 賜鈕福保等進士及第出身有差	二年癸亥 恩科廷試黃體芳等二百人 賜翁會源等進士及第出身有差
二十年庚子科 廷試吳敬義等一百八十人 賜李承霖等進士及第出身有差	四年乙丑科 廷試廖鶴年等二百六十五人 賜崇綺等進士及第出身有差
二十一年辛丑 恩科 廷試蔡念慈等二百二人 賜龍啟瑞等進士及第出身有差	七年戊辰科 廷試蔡以瑋等二百七十人 賜洪鈞等進士及第出身有差
二十四年甲辰科 廷試焦青宇等二百九人 賜孫毓淮等進士及第出身有差	十年辛未科 廷試李聯珠等三百二十三人 賜梁燿樞等進士及第出身有差
二十五年乙巳 恩科 廷試蔣超伯等二百十七人 賜蕭錦忠等進士及第出身有差	十三年甲戌科 廷試秦應遠等三百三十八人 賜陸潤庠等進士及第出身有差
二十七年丁未科 廷試許彭壽等二百三十一人 賜張之萬等進士及第出身有差	光緒二年丙子 恩科 廷試陸殿鵬等三百二十四人 賜曹鴻勳等進士及第出身有差
三十年庚戌科 廷試鄒石麟等二百十二人 賜陸增祥等進士及第出身有差	三年丁丑科 廷試劉秉哲等三百二十九人 賜王仁堪等進士及第出身有差
咸豐二年壬子 恩科 廷試孫慶成等二百三十九人 賜章鋈等進士及第出身有差	六年庚辰科 廷試吳樹棻等三百三十人 賜黃思永等進士及第出身有差
三年癸丑科 廷試吳鳳藻等二百十三人 賜孫如僅等進士及第出身有差	九年癸未科 廷試齊本瑜等三百八人 賜陳冕等進士及第出身有差
六年丙辰科 廷試馬元瑞等二百十六人 賜翁同龢等進士及第出身有差	十二年丙戌科 廷試劉培等三百十九人 賜趙以炯等進士及第出身有差
九年己未科 廷試馬傳煦等二百三十九人 賜孫家鼐等進士及第出身有差	十五年己丑科 廷試許葉芬等二百九十六人 賜張建勳等進士及第出身有差
十年庚申 恩科 廷試徐致祥等一百八十九人 賜鍾駿聲等進士及第出身有差	十六年庚寅 恩科 廷試夏曾佑等三百二十六人 賜吳魯等進士及第出身有差
同治元年壬戌科 廷試李慶沅等一百九十三人 賜徐郁等進士及第出身有差	十八年壬辰科 廷試劉可毅等三百十七人 賜劉福姚等進士及第出身有差
	二十年甲午 恩科 廷試陶世鳳等三百十四人 賜張奎等進士及第出身有差
	二十一年乙未科 廷試陳海梅等二百七十九人 賜駱成驥等進士及第出身有差

出身有差

二十四年戊戌科 廷試陸增焯等三百四十八人 賜夏同猷等進士及第

出身有差 二十九年癸卯補壬寅 恩科 廷試周蘊良等三百十五人 賜王壽彭等

進士及第出身有差 三十年甲辰 恩科 廷試譚延闓等二百七十三人 賜劉春霖等進士及

第出身有差 臣謹案 本朝開科恩正并計一百十二次進士約二萬六千人重宴瓊

林奉有 恩旨者二十二人考此曠典始於乾隆十六年其前後有重遇

臚傳未與筵宴者七人徐元夢 康熙癸丑進士官尚書大僕趙執信 康

己未進士官 王材任 康熙己未進士 熊本 康熙丙戌進士 乾隆丙辰進

士 鄭岱 鍾 乾隆壬申進士 戴元均 乾隆乙未進士 合共二十九人不但科

第佳話亦 熙朝人瑞也或有漏略想鳳毛麟角不多觀矣至重宴鹿鳴

會典所載乾隆三十九年迄光緒十二年有百六十人又就奏案及各處

接錄得四十餘人康雍開無從稽考即近年年終彙咨禮部者亦不可得

見諒不乏人不復具錄矣 乾隆十六年 諭前任詹事黃叔琳康熙辛未探花年躋大盜重遇臚傳洵稱

熙朝人瑞著從優加給侍郎銜 二十五年庚辰科大學士史貽直再遇臚傳除重與 恩榮宴外仍 御製詩

以賜之 五十五年 諭大學士嵇璜係雍正庚戌科進士茲當周甲之期與新進士先

後同年實屬人文盛事著照史貽直例重與恩榮宴以為藝林佳話 嘉慶十九年 諭前任鴻臚寺卿翁方綱係乾隆壬申科進士茲榜重逢加恩

賞給二品銜 道光三年 諭前任通政司經歷郭祚熾會榜重逢加恩賞給六品銜 九年 諭前戶部主事潘奕雋年躋九表茲榜重逢加恩賞四品卿銜

十二年 諭前四川銅梁縣知縣貴逢甲會榜重逢加恩賞知州銜

十九年奏准致仕尚書李奕疇重與恩榮筵宴 咸豐三年 諭潘世恩由乾隆癸丑科一甲一名進士洊登揆席年逾八表望

重士林洵為熙朝人瑞茲屆殿試之期例得重與恩榮筵宴業經朕親書瓊林

人瑞四字扁額先期頒賜以示寵榮茲據禮部具奏朕心深為嘉慰潘世恩之

孫潘祖同著加恩賞給舉人准其一體會試 同治元年 諭前翰林院編修林春溥茲榜重逢著加恩賞給四品卿銜

十年奏幸未科會試山東在籍紳士陳述經適逢中式周甲之期奉 旨賞給

四品卿銜 十三年 諭二品頂戴前廣東候補道李宗沆茲榜重逢加恩賞給頭品頂戴

光緒三年題准河南在籍前任知縣郭鑑庚於本年丁丑科會試豫行重與

恩榮筵 五年 諭二品銜前江蘇常鎮道周頊著賞給頭品頂戴

六年 諭前戶部右侍郎溫葆深上年因鄉舉重逢賞給頭品頂戴見又重遇

恩榮筵燕加恩賞給太子少保銜 八年 諭前署福建汀漳龍道王廣業前因鄉舉重逢賞加二品頂戴見在重

遇恩榮筵燕加恩賞給頭品頂戴 又 諭休致光祿寺卿兼署刑部侍郎雷以誠見屆重逢恩榮筵燕加恩賞給

頭品頂戴 十三年 諭頭品頂戴前雲南布政使宋延春前因鄉舉重逢賞加太子少保

銜見在年屆九旬重遇恩榮筵燕加恩賞給太子太保銜 二十四年湖北巡撫奏已革雲南巡撫賈洪詔重宴瓊林奉 旨賞給頭品頂

戴 二十六年浙江巡撫奏前翰林院侍讀學士孫鏘鳴重宴瓊林奉 旨賞侍郎

銜 三十二年四川總督奏前翰林院編修伍榮齡重宴瓊林奉 旨賞侍講學士

銜

宣統元年以會試重逢 賞三品卿銜前署山東督糧道郭鑑襄頭品頂戴

巨謹案科第至是為止以後專試出洋游學生初時祇數十人不數年至四百餘人且每歲一試其源源而來者方興未艾科舉時代三年大比禮闈釋褐不過二三百人尙嫌仕途壅塞今增數倍不知此濟濟者將置身何所附錄於後俾資考鏡焉

三十一年乙巳考試出洋畢業生 給予金邦平等十四人進士舉人出身並賞翰林院檢討主事 中書知縣各職有差

三十二年丙午 賜游學畢業生陳錦濤等三十一人進士舉人有差

三十三年丁未驗看 廷試游學畢業生 賞進士章宗元等四十人翰林主事 中書知縣各職有差

三十四年戊申 予游學畢業生陳振先等進士舉人出身有差

宣統元年己酉引 見 廷試游學畢業生進士黃德章等一百二人 予翰林院編修檢討庶吉士主事內閣中書小京官知縣各職有差

又學部考試游學畢業生最優等林大閔等十三名優等子樹楨等五十二名中等林大同等一百九十名

二年庚戌 廷試游學生一等梁宓等八十名二等王兆枏等一百三十二名三等侯毓汶等二十六名

又驗看學部考驗游學畢業生吳匡時等七人 賞給進士舉人有差

又引 見 廷試游學畢業生進士項驥等二百三十七人 予翰林各職有差

三年辛亥引 見 廷試游學畢業生進士江懷古等四百三十九人 予翰林各職有差

皇朝續文獻通考卷八十八

選舉考五 孝廉方正

世宗登極 恩詔採用漢代賢良方正與孝廉之科特舉孝廉

方正 賜六品章服尋引 見用五十五歲以上者為知州餘用知縣嗣

後 列聖踐阼沿為 恩例與廉舉孝何其慎也卒罕聞有名臣魁士出

於是科豈非極盛之名不易副有司循例而舉之各員亦循例而應之歟

人未有不顧名思義者其悍然敢以大科自居赴京就試毋亦與唐人所

譏策馬應不求聞達之科者等耳

嘉慶元年 恩詔每府州縣衛各舉孝廉方正暫賜六品頂戴榮身以備召用

務期採訪真確毋得濫舉

道光元年 諭御史許乃濟奏保舉孝廉方正請嚴實奉行一摺國家頒發明

詔令府州縣衛保舉孝廉方正及舉薦才品優長之士原以廣勵人材冀收得

賢之效乃比來外省視為不急之務或數郡不舉一人其所舉者又或牽於情

賄漫以衰庸充數以致此事竟成具文殊失拔滯顯幽之義夫鄉舉里選古有

其制天下之大豈無遺才此次著各直省督撫各飭所屬悉心採訪務得操履

純潔才猷傑出物望允孚可備國家任使者登諸薦牘其行誼幹略各於名冊

內切實註明咨部引見以備錄用不得託言矜慎率以無人可舉為辭若以偽

亂真所舉不公則國有常罰諒各督撫亦不肯出此也

咸豐元年 諭給事中蘇廷魁陳奏一摺朕詳加披覽所稱求宏濟之道防駭

泰之萌意在推誠任賢慎始圖治能見其大朕甚嘉之其論孝廉方正一條亦

合循名責實之意著各省督撫學政認真訪擇務將品學優眾所推服之人

切實保舉以備錄用毋得虛應故事名實不符如所舉非人惟濫保之員是問

九年 諭吏部奏孝廉方正知縣懇請分發試用一摺向來各省保舉孝廉方

正各員引見後以知縣用者例應雙月單月歸部銓選茲據該部奏候選知縣

孫長順等呈稱銓選無期不甘自棄自應釐為變通俾得及時自效著准其籤

分各省照拔貢知縣試用二年期滿後歸於拔貢補用一人之例將孝廉方正

補用一人其以州同州判用者亦准其一體分發歸於試用班內序補

同治元年 諭御史何兆瀛奏保舉孝廉方正請飭採訪真儒等語各直省保

舉孝廉方正理宜慎重若如該御史所奏不加訪問遽登薦剡甚至查錄錯刺

者雜糅其中殊不足以光盛典此次應舉孝廉方正著各督撫學政嚴密訪察

務須人品學問為鄉里素所推許者始准薦舉不得以名實不符之人濫竿充

數

又 諭我朝自 列聖以來於御極之初各直省督撫選舉孝廉方正原以振

拔幽滯用端風俗典至鉅也朕於上年御極後即詔各直省督撫秉公選舉並

因知縣黎庶昌條陳復諭各督撫等迅速選舉見距上年頒詔之日已閱年餘

而各省選舉甚屬寥寥十室之邑必有忠信今各州縣大者不下數萬戶小者

亦萬餘戶豈無忠信誠懇之士堪膺是選良由地方有司視為具文既不虛心

延訪而潛修之士又不肯干謁公庭以致應詔無人國家登明選公之典轉

成具文其何以振風俗而勵人材著在京四品以上大員及直省督撫學政無

論紳士布衣其有實在堪膺孝廉方正之選者各舉所知總以躬行實踐為先

不准專取文詞藻麗者濫膺盛典俟送部引見後候旨分別錄用其有年登耄

或或誠樸無華足為里閭矜式不願來京者即著該地方官歲時存問賜以酒

米俾後進知所則微用副朝廷振興實行之至意

光緒元年 詔舉孝廉方正

五年周德潤奏略曰士人進身之路以立品為先大臣薦士之心以秉公為貴

恭逢 皇上御極之初 命天下保舉孝廉方正典至隆也然其名甚美其實

難副昔漢用董仲舒言令列侯郡守擇吏民賢者歲貢各二人而茂才孝廉於

是始宋太宗即位思振淹滯賜諸科出身者五百餘人薛居正等以為取人太

驟而僥倖之心於士習者且數百年而不可返夫砥節礪行之儒大都不求

聞達其虛聲動眾者必非真材况資緣以求保薦耶近聞各直省所舉孝廉方

正名實相符者固不乏人其虛應故事徇人情者尤指不勝屈而鄉曲之士

遂以奔走郡縣聯絡紳耆為捷徑致令卑劣庸劣之輩濫廁孝廉方正之名殊

非 朝廷敦崇實學之意擬請 通諭各督撫秉公保薦實缺毋濫力矯徇情之弊以杜倖進之心

宣統元年吏部奏遵議御史饒芝祥奏孝廉方正選舉冒濫請定章程略稱制科之設皆 臨軒集試獨孝廉方正之行非文字所可取驗故事前之詳覈先在有司例載保舉孝廉方正之法須地方紳衿耆庶鄰里鄉黨合詞呈報地方官會同該學教官訪查果確再造具事實清冊加同印甘各結詳由本府而道而司而院逐加覆核以達於 朝其有徇情濫舉等弊即照濫保匪人例分別議處是原奏保舉不實一條本係古今通患但定例具在不難執法以隨其後至所請仿諮議局章程令初選議員投票決選之處見在議員智識未必完全是否較勝舊法應聽各直省各就地方情形酌量奏明辦理又原奏選額不嚴一條據稱湖北黃岡一縣竟多至十餘人惟見在各省並無奏報到部者尙難據爲定說並以概他府州縣恭查同治初年 詔舉孝廉方正歷奉 聖訓有頒詔已閱年餘而各省舉者寥寥十室之邑必有忠信今州縣大者不下數萬戶小者亦萬戶豈無忠信誠懇之士堪膺是選地方有司既不虛心延訪而潛修之士又不肯干謁公庭以致應詔無人其何以振風俗而勵人才等語是詳釋設科之意方患徵辟之不來豈患獎借之或過其奏內並引漢制二十萬口以上舉一人爲比亦係郡國常貢之法而不可以例 特科自來方志所稱或以一鄉而希風鄒魯或以一門而媲美高陽善氣所鍾何分域畔蓋誠無其人雖通都大邑不能禁其額缺設有其人而又不止一二亦不便因其同縣轉使抑而不揚該御史欲照選拔等例定爲大縣二名小縣一名毋乃轉啟冒濫虛僞之弊又原奏年齡未限一條查孝廉年不滿四十不得薦舉雖同仿於漢代但其時固亦言茂才異行自可不拘年齡而胡廣郭度史敞等上書猶皆以爲不便可見一時矯枉本非中道至節孝鄉賢比擬尤爲不類無論馨香之報祇取論定而孝廉方正之選方待試用立爲期限萬一幸逢 曠典之時及歲者不必晁董而不及歲者實多終賈 朝廷將何以處之且歷來官司固有增減年齡以應功令者是期限亦徒成具文以上各條 等酌核再三似均可毋庸

置議惟近來人心不古廉恥道衰該御史奏內既稱有學官龍斷士子賄託舉國若狂等情縱或言之已甚容爲事所難免自應由 部申明定制再通飭各督撫加意察訪遇有輿論未洽及以上所陳諸弊即立予扣除並將所司照例嚴參務使巖穴之士不致羞與爲伍而虛聲純盜者亦惶然於榮名之不可倖邀庶幾振拔幽滯移易風俗光昭 國家一代令典

又吏部奏各省保舉孝廉方正請將舊例限期酌減略稱定例各省保舉孝廉方正以恭逢 恩詔之日起予限八年每年到部人數三員以上於二月八月開各會驗奏考一次所有各省保舉業經吏部題覆奉 旨者該員人文到部在本屆會驗以前歸本屆考試在會驗以後即歸下屆考試其有已逾八年八月考試之期於八年十二月以前到部者准於九年二月開再行展考一次如復遲至展考後始行續到祇准頂戴榮身等語又查 穆宗御極之次年曾因知縣黎庶昌條陳一再 降旨令各督撫將孝廉方正迅速選舉煌煌 諭明亦經恭纂入例是題報固期於加慎而 恩命亦未可久淹見在具題事件均已改奏各省水陸程途亦較便往日似公車赴 闕已別無阻滯之端且 臨軒盛典僅以陸續報到之三數人一歲再舉亦嫌煩瑣 等語公同商酌擬請將舊例八年限期酌減爲四年除本年已屆冬令毋庸考試外嗣後應於宣統二三四三年中每年八月舉行考試一次各省應舉人員務按年五月以前彙齊奏報俟 部核覆後迅速給咨限七月內人文到部不願赴部者亦令於先期切實查明如遲至第四年限滿以後始行到部即毋庸再予展考以壹觀聽而免稽留均依議行

二年 諭詔舉孝廉方正本係厚恩特典亟應嚴行甄覈切實選舉查此次各省所保多至百數十人少亦數十人雖考試縮短年限亦豈可過於冒濫嗣後各省保舉此項員生著各督撫遵照所屬按照定例悉心選擇從嚴甄取必其人品行卓著鄉望素孚確有事實者方准列保以重名器

又引見各省孝廉方正得 旨考取一等之舉貢朱炳燾等十五名著以知縣用廈增附監生魏炳文等三十五名著以直隸州州判鹽運司經歷用考取二

等之舉人劉慶鴻等二名著以直隸州州同布政使經歷問用五貢安于恆等十名著以直隸州州判鹽運司經歷用廩增附監生王調元等六十二名著以府經歷縣丞州吏目縣主簿道庫大使用其餘未經錄取各員均著賞給六品頂戴

武舉

臣謹案我朝以騎射定天下是以二百五十六年所有鄉會武試靡不以馬步射爲兢兢雖二場試弓刀石內場試武經應試者已以意爲重輕矣咸豐時東南多故調關東勁旅黑龍江習弓矢吉林三姓習火鎗後關東兵之在江南北者吉林三姓屢有功而黑龍江無聞焉此未盡遷地之勿良抑弓矢之與火器其利鈍固如是其懸殊也十九世紀鎗礮之烈世變之急民生之禍此詎庸以常理測哉

乾隆五十三年 諭據惠齡奏辦理武關事宜摺內稱連場較閱將各武生照例考試馬箭地毬及步箭弓刀石等技將弓馬嫻熟技勇可觀年力強壯者挑取記注其餘生疏軟弱者一概汰去仍出示曉諭將該生等或因騎射或因技勇未能入選之處於各名下詳悉註明使該生等各知汰去之故等語所辦可嘉已於摺內批示向來武關校閱率多循例辦理未能實心甄別是以順天武鄉試及武會試特派皇子大臣監同閱看以昭慎重至各省舉行武關係巡撫專司其事往往於技勇弓馬並不認真考校無所激勸今惠齡將各生技藝可觀者密爲挑記仍將未能入選之人於各生名下註明出示使被汰之故曉然共知令各生等自知愧勉思奮所辦殊爲妥善各省巡撫俱當照此辦理認真校閱不得草率從事

五十五年議准鑄 欽命知武舉關防存貯兵部俟派出知武舉後齎帶入場印用試卷

又定武會試外場每圍兩旗公派參領一員兵丁十名巡管辰字圍鑲黃正黃兩旗宿字圍正白正紅兩旗列字圍鑲白鑲紅兩旗張字圍鑲藍正藍兩旗兵部先期行文各旗滿洲蒙古漢軍都統照數派定將職名送部交提調官臨時

查點

嘉慶四年 諭本年值武會試之期向例於殿試後除挑用侍衛外其餘俱分別營衛守備選用但念今年武會試業經加恩廣額中數稍多其衛用守備及各營守備員缺需次自不乏人又有捐班輪次開用者此項分別營衛選用守備計其得缺須在十餘年或數十年之外未免守候年久著再加恩將此次殿試武進士除挑用侍衛外其餘俱分發川陝楚豫及曾經調兵各省以營守備試用俾得及時自效並著兵部查明檔案所有在用兵及調兵各省按照調兵多寡擬定應發若干員數目開單進呈候朕簡發

又 諭宗室向有會試之例後經停止敬惟 皇考聖意原因宗室當嫻習騎射以存滿洲舊俗恐其專攻文藝沾染漢人習氣轉致弓馬生疏然自停止考試以後騎射亦未能精熟天潢支派繁衍自當仍准應試廣其登進之路兼可使讀書變化氣質不致無所執業別生事端且應試之前例應閱射馬步箭方准入場於騎射原不致偏廢舊制宗室俱不由鄉舉徑赴會試未免過優嗣後宗室應考者自辛酉科爲始與生監一體鄉試應定中額著禮部擬議奏聞候朕酌定再向來宗室人員祇在宗人府供職升轉科道其途亦屬稍隘嗣後各部司員准以宗室補用其如何酌定額缺之處著吏部會同宗人府議奏

五年議准宗室應鄉會試及考試繙譯照八旗考試之例由宗人府考試馬步箭挑取合式者奏請 欽派王大臣覆試後再行錄科其奉天宗室學考試馬步箭合式者就近咨送奉天將軍覆試再行錄科送京至點名入場時於宗人府左右宗人內先期 欽派一員彈壓巡查

六年 諭向來武舉會試中式後覆試馬步箭及弓刀石三項技藝其不合式者罰停殿試一科二次覆試仍不合式又罰停一科至三次不能合式即行斥革因思文會試舉人有覆試停科者俟停科已滿即准其殿試不再隨新科覆試文武會試辦理未能盡一且武舉若停科至二三次年歲愈增其技藝自更遜於前覺經覆試必至終於斥革嗣後武舉會試中式著照文會試覆試一次之例將馬步箭弓刀石逐一覆驗如前後不符罰停殿試一科俟下屆會試之

年即著加恩准其一體殿試

又議准武鄉試內場卷面歷科將地毬一項併入馬箭冊內並未另註嗣後照武會試之例將地毬一項另款開註

又 諭國家設立科目文武原應並重但文闈條例甚嚴防弊頗為周密及中式後將本生珠墨卷解部後欽派大臣磨勘其中文理疵謬者分別次數停科至武生應試考官均係面定去取並非暗中摸索較之文場易於滋弊向來各省武鄉試本未定有磨勘之例嗣後各省武鄉試題名錄內俱著將中式武生馬步箭弓刀石技藝逐一分註俟各該省題名錄進呈後隨時發交兵部陸續磨對其中有未經合式濫行取中者即著兵部查照文闈之例酌定章程將本生量予停科考試官分別議處自下科為始通行遵照若各省因有此旨而於題名錄內浮開具報別經發覺必當治以捏飾之罪欽此遵 旨議定武鄉試題名錄內俱將馬步箭所中枝數並弓刀石斤兩分晰註於中式武生姓名之下進呈後交兵部陸續磨對其中有一項未經合式者本生罰停會試一科二項者罰停二科三項者罰停三科再三者本生所中武舉斥革考試官各按濫行取中名數多寡分別議處如有本未合式捏飾浮開除考試官嚴行治罪外將本生斥革訊究兵部於每屆鄉試之年 欽奉 勅交題名錄依次磨對完竣後即行彙總題覆

九年議准武鄉試挑入好字者中箭枝數多在十枝上下技勇三項皆係頭號或有二項頭號者蓋以武闈取士原以備干城之選必須揀拔真才不得濫行取錄嗣後凡馬步箭於五枝定額之外又能多中而三項技勇內有二項二號者罰停會試一科一項二號一項三號者罰停會試二科二項三號者罰停會試三科如馬步箭僅中五枝又有二項三號者即將本生斥革考試官分別議處統俟磨對完竣後兵部彙總具題至於順天鄉試向係兵部侍郎會同順天府府尹府丞校射其中式武舉是否合式之處未便仍歸兵部磨勘應俟題名錄 勅發兵部比照文闈磨勘之例將內閣六部都察院通政使司大理寺各官銜名開列清單進呈恭候 欽點二三員磨勘以杜瞻徇

又覆准文闈鄉試恭進 御覽題名錄及送部鄉試各錄均於姓名下開載年歲其武鄉試錄照文鄉試之例辦理以昭畫一

又 諭順天武鄉試大典乾隆年間朕屢蒙 皇考高宗純皇帝欽派監射計自十月初五開弓至十一日始行出榜其技藝時日本為寬裕因思初六係萬壽節日大小臣工均應行禮祝釐其派出各員若紛紛前往武闈未能全班恭祝既無以抒其忱悃亦於體制不合嗣後順天武鄉試外場應改於十月初七日開弓十二日出榜

二十二年 諭御史李振祐奏請禁考試騎射頂替積弊一摺所奏甚是八旗以旗射為根本是以考試進士舉人生員以及考試繙譯均先閱看騎射其弓馬生疏者即不准應試此我朝之舊典必應永遠實力奉行若其人素不練習騎射臨場倩人代替即與文場考試槍替無異必應按律治罪嗣後凡遇此項考試著各旗都統等親身先行考驗能騎射者始准送名派出監試之王大臣於考試時令各旗章京等逐排識認射畢步箭即射馬箭仍令本人下馬至階前報名如查有替代情弊將雇倩之人與替代之人一併治罪倘監試王大臣等市惠徇縱別經發覺定將王大臣等一併懲處嗣後遇有考試著報明御前大臣奏派乾清門侍衛二人至放馬處監視

臣謹案明廣東兵備副使汪鉉已得佛郎機之製行於中國方嘉慶季年泰西鎗礮業已出有前膛新製而我狃於騎射且有頂替等弊焉豈待交綏而始知不敵哉

二十五年 諭武科規制於馬步射之外試以開弓舞刀擲石以驗技勇由來已久嗣於嘉慶十八年議令滿洲蒙古旗人與漢軍漢人一體應試滿洲蒙古舊例祇試馬步射硬弓遂將舞刀一事一律停止今思技勇內既有舞刀一項滿洲蒙古士子自應一體練習亦不迫以時日著自道光三年為始凡滿洲蒙古漢軍漢人之應童試者俱仍試以舞刀至五年鄉試六年會試均已嫻熟一體考試以復舊規

道光二年 諭順天武鄉試大典乾隆年間定於十月初五日開弓十一日出

榜至嘉慶九年始改爲十月初七日開弓十二日出榜因思校藝時日自應稍從寬裕嗣後順天鄉試外場著仍照舊例於十月初五日開弓十一日出榜著爲例

三年 諭御史溥治奏武闈考試請歸簡易一摺武鄉會試向有出號弓原以試其人之挽強與否其能從容滿引入毅者自較頭號爲優本年朕親臨新科武舉一甲進士張雲亭等皆係出號之弓且能開挽從容是以被置一甲如該御史所奏將出號弓裁汰是於武闈校試之道全然不曉矣其所請酌改考官進內場日期係爲節省一日之費用起見不知大體妄思更變舊章甚屬紕謬所奏不可行

六年 諭軍機大臣會同兵部奏覆試中式武舉章程一摺舊例覆試停科下屆仍令覆試積至三次即行斥革固覺過重惟概免其再令覆試迨補行殿試時仍不合式轉致紛繁自應循照舊例量爲變通仍令隨同新科武舉覆試寬其斥革之罰與以登進之階嗣後武鄉會試著該考官悉心甄別除弓刀石三項皆係三號者不准合式外如有一二項頭二號者固爲合式即有一項頭號二項二號並三項俱係二號者俱准合式仍以三項頭號爲最優取中覆試時即照初次填註字號認真考校所有中式武舉覆試技勇不符及覆試合式殿試技勇不符罰令停科者下屆概令隨同新科武舉覆試積至三次覆試不能合式即將中式字樣註銷仍留武舉准其入營差操按照該武舉科分照例銓選其該武舉等初次覆試因何項不符罰科者下屆即覆試何項以歸簡易至取士必嚴初進各省考試武童亦宜慎重遴選向來取進童生原有缺額勿濫之例乃近因人數不足輒以技藝較弱之人取充學額著通諭各省學政嗣後考試武童時如人數不敷即行缺額毋得濫竽充數

十一年 諭御史達鋪奏請定武闈章程一摺定例馬射三靶相距各三十步俾士子得有引弦持滿之候若如該御史所奏馬射之靶請各減六步則三靶相離過近三矢不及引發且所稱第一靶請設於考棚前二十步以便查看獨不思第二第三靶轉致遼遠更難查閱又請於硬弓靶上繫以絲繩直達弦上

必繩直弦彎始爲引滿其絲繩尺寸須定例限試思士子臂有長短不能一律相同何能拘定絲繩尺寸又據稱撥石時用方石置於棚前令士子撥起號石置大石上欲令士子將號石撥至大石上又令何人將號石撥下以待按名試撥所奏各條均屬窒礙難行著毋庸議至比試大刀不可使背面花不全及刀尖拂地此種不合格者原不准錄取亦毋庸議所稱雙單好字應如何明定格式及酌量人數予以定額之處著兵部議奏其另片奏稱武場附近地方近年多有銀號布鋪之人扮作擺攤賣藥等項探聽風聲隨機撞騙著責成監試御史及步軍統領衙門順天府認真訪查懲辦以杜弊端

又 諭兵部議駁御史達鋪條奏明定雙單好格式及酌量予以定額一摺雙單好皆係密記予以格式定額是先已揭曉不足以昭慎重該御史所奏著毋庸議惟思分閱校閱恐監射大臣意見好寬嚴不能畫一此之單好即彼之雙好內擬憑卷面所鈐雙單好字號取中亦不足以昭平允嗣後武闈雙單好字宜量予限制不准逾額應如何分別密記著兵部再行妥議具奏如有格礙難行或恐別滋弊端著於摺內據實聲明請旨

又 諭前因兵部議駁御史達鋪條奏明定雙單好格式酌量予以定額當交該部再行妥議茲據該部奏稱武闈挑取雙好分按各圍應試人數每百名酌挑二十二名不及百名者即按數遞減等語分圍校閱務在嚴明得人嗣後監射校射大臣總須嚴加鑒拔每百名挑取不得逾二十二名之數如不得人即再行減少亦無不可斷不得以才技未嫻之人勉強挑取充數

十三年 諭武科爲掄才大典所有派出監射之王大臣宜如何公平考校以副朕求才若渴之心應科中式武舉雖有能開出號弓者是以一甲進士即在此內挑取上年壬辰科中式武舉雖有出號弓而比較馬步箭及刀石技勇之優劣拔取一甲一名李廣金係十二力本科朕親試中式武舉內牛鳳山孫和平俱報開十二力弓朕見其從容引滿因賞給十三力弓仍能開滿可見此中不乏人才皆由監射校射之王大臣自顧考成慮覆試殿試時弓力不符先爲此避重就輕之舉武科大典竟無一出號弓成何事體若使牛鳳山等竟不能

開出號弓朕憑何取中一甲武進士乎嗣後各省考試武場當認真挑取練習挽強之技其派出監射校射之王大臣等務須秉公校閱爲國求才用備干城之選不得規避處分屈抑人才豫爲弓力不符地步再八力弓係屬三號歷科開有備數充選之人究非上乘本科會試中式武舉陳正坤常奎基金碧元王家燮俱係開八力弓未免過多甚不出色嗣後有似此開八力弓而刀石並無頭號者該王大臣等即不准挑入好字以杜倖進

又 諭向來武會試內場取中試卷先於雙好字號內選取如不足額再於單好字號內選取是以各武舉試卷封後仍送外廉御史各照原箭冊印明雙單好字號馬箭地毬步箭弓刀石於各卷面上分六項填註移送內廉以憑去取此定例也武科之設以外場爲主其弓力強弱尤足定其優劣至馬步箭本有一日之長短第能合式自可命中即如朕御紫光閣試中式武舉馬步箭其能全中者再閱時未必仍能疊中至默寫武經又其餘事斷不能憑此爲去取本科會試特派白鎔胡達源爲正副考官宜如何認真考覈爲國求材乃殿試後特命軍機大臣覆覈箭冊除貴州本無雙好此次中式單好武舉王家燮陳正坤應無庸議外辰字圍福建武舉見有雙好一名取中單好許逢時一名陝甘有雙好四名除呂廷魁丁定國二人中式外取中單好馬興臨一名宿字圍滿洲蒙古有雙好五名除慶喜隆山雅爾胡善三人中式外取中單好烏和哩一名列字圍山東有雙好六名除紀冠軍唐汝蕙樓夢麟三人中式外取中單好楊雲鳳一名廣東有雙好五名除韓南輝何如啟二人中式外取中單好李達元池化龍二名此數人俱僅開十力弓惟烏和哩開十二力弓及派員覆試又復不符其馬興臨許逢時二人覆試弓亦不符尤不可解究竟該考官等置雙好而中單好以何爲憑若以中箭多寡爲辭則陝甘雙好中均係馬步全中何以舍此取彼若以默寫武經爲去取則是重其所輕伊等有心支吾欺飾強詞奪理其咎更重至內廉監試御史蘇芳阿給事中黃爵滋試卷原不寓目亦不應干預考官取中之事第見有雙好字號考官取中單好出閣後即應據實劾參何竟緘默不言亦安用此監試爲耶白鎔胡達源蘇芳阿黃爵滋俱著單

銜各具摺明白回奏不准會商聯銜

十四年定八旗考試文童生文舉人文進士筆帖式繙譯童生舉人進士兵部將領侍衛內大臣大學士都統職名開列奏請 欽點二員監試騎射考試武生兵部將副都統職名開列奏請 欽點二員會同順天學政考試騎射弓刀石其 盛京滿洲蒙古漢軍考取生員由 盛京將軍副都統等驗射馬步箭能射者交與奉天府丞考試

十六年 諭本日召見新進士內正白旗滿洲進士慶廉一名形同殘廢步履甚艱因思我朝錄用旗員首重騎射八旗士子應試必先試以騎射合式者方准入場此乃一定之例不可廢者也慶廉既有殘疾豈能考試馬步箭適據御史永桐奏請飭查覈實等語著兵部查明派出監射之王大臣如何定爲合式准其會試之處秉公據實具奏並著監試王大臣及咨送考試之正白旗滿洲都統等明白回奏

又 諭前因正白旗滿洲進士慶廉形同殘廢步履甚艱當降旨著兵部查明准其會試之處據實具奏並著監射王大臣及咨送考試之都統等明白回奏茲據兵部及該旗都統監射王大臣等奏中樞政考內載凡遇考試進士舉人生員人等其有手拐者免考馬步箭等語並准兵部呈送大清會典暨中樞政考經軍機大臣開單進呈朕詳加披閱會典內載係手疾字樣中樞政考所載係手拐字樣著兵部遵照會典改正以歸畫一該監射王大臣及咨送考試之都統等於會試雖屬違例免其考試馬步箭但慶廉形同殘廢尙不止於手疾該都統等不行駁斥率准送考自係瞻徇情面不肯認真該監射王大臣按照原冊不復行查依樣葫蘆不能實心於此可見睿親王仁壽貝子繇德及正白旗滿洲都統文孚等俱著交各該衙門嚴加議處慶廉著仍照前旨歸班銓選

又 命嗣後咨送八旗士子考試添派滿御史一員監射
又奏定會試取中武舉十月十五日 殿試默寫武經十七日 紫光閣閱看馬步箭十八日 紫光閣閱看弓刀石十九日帶領引 見恭候 欽定甲第二十日傳臚奉 旨兵部奏本年會試取中武舉請旨於十月十日 紫光閣

閱看馬步箭十八日閱看弓刀石十九帶領引見二十日傳臚如此排日辦理諸可詳審從容嗣後該部俱著照此奏請

十九年奉 旨向例武殿試御紫光閣第一日閱視中式武舉馬步箭第二日閱視技勇舉回宮即於是日帶領引見諸武舉由西苑門進內趨走不無擁擠本科武殿試朕於十月十八日御紫光閣閱視馬步箭十九日在景運門外御箭亭閱看弓刀石回宮後帶領引見二十日陞殿傳臚著為令

又 諭御史扎克丹奏請將武鄉會試卷面浮夾名籤改為黏貼等語本年武鄉試正藍旗玉山與正黃旗玉山卷面填寫互相舛錯據御史稱係因試卷內浮夾名籤互相舛錯以致填寫不符自應酌改以昭慎重嗣後武鄉會試卷內浮夾名籤之處著改為長方小籤書寫姓名籍貫旗分黏於卷面空處印用戳記俟彌封後交與監試御史按冊填寫與監臨提調等官面對紅號印簿無訛即將黏貼小籤揭去再行交入內簾以免訛錯而杜更換

二十四年 諭本月二十日朕御太和殿專為武殿試傳臚其應行謝恩人員向係附於是日行禮乃臚唱時一甲一名武進士徐開業一甲三名武進士梅萬清均未到班當經都察院鴻臚寺參奏交兵部查詢據稱徐開業梅萬清寓居西城是夜先至西華門因門未開啟繞至東華門以致遲誤等語各進士分住東西城是夜多有由西門進內者一甲二名秦鍾英等均未遲誤何以徐開業梅萬清二人獨未到班所言殊不足信事關典禮非尋常失誤可比本應全行斥革念其究係草茅新進徐開業著革去一甲一名並頭等侍衛梅萬清革去一甲三名並二等侍衛施恩俱仍留武進士再別停明年殿試一科俟下屆武會試時再與新中式武舉一體殿試其本科一甲一名武進士即以秦鍾英拔補授為頭等侍衛一應宴資兵部照例給予一甲二名三名均無庸再補

二十七年 諭載銓等奏會議另造硬弓以備應用著武備院於明春另行製造時先將弓胎盤挽極熟試歷兩寒暑再置樺皮上架墜驗較之所議歷一寒暑當更妥協且於下科武鄉會試仍可不誤調取平時妥為收貯屆期於前兩月調理純熟務要一律整齊毋許弓力稍有參差及至因情形致調用時轉致

弊竇其五旗所存硬弓亦著武備院一律另造亦如前驗試再交兵部令該旗領回收貯備用所有舊存硬弓著仍交各該處照例存貯不可令舊吏等隨意拋擲或乘閒竊取倘新製各弓有參差之處著即以舊弓比較

咸豐九年 諭兵部題請派本年武會試提調官一本所有開列滿漢司員四人著照文會試之例由該堂官帶領引見候旨揀派並著該部纂入則例永遠遵行

同治元年 諭兵部奏請武舉可否一體覆試請旨遵行一摺直隸已未科武舉卯慶春等辛酉科武舉王玉魁等均於上年覆試因技勇不符罰停此次會試一科自不應隨同各省新中式武舉再行覆試惟念該武舉等於恩詔條款內寬免停科之旨未經詳譯遽行跋涉來京且值初元特開恩榜亦不妨稍為變通以廣登進所有該科武舉等均著准其附入此次各省中式武舉覆試場內一體覆試如覆試相符即著免其罰科一體會試倘仍不相符即作為兩次不符再行罰停下次會試一科以杜取巧而示限制

又 諭武會試考官趙光等奏武舉試卷不合可否取中請旨遵行一摺本年壬戌科會試山東山西廣東各省武舉試卷有曳白及多寫題目等字樣者雖據奏稱該武舉等外場較優而內場究屬違式不合著該考官將各武舉試卷仍遵定例取中其違式不合者不得取錄以符定制

又 諭前因武會試考官趙光等奏武舉試卷不合可否取中請旨當經諭令遵例取中違式者不得錄取茲據御史張晉祺梅啟照各奏稱武鄉會試定例應先於雙好字號內選取如不足額始取單好至內場默寫武經違式者不得取中例有專條本年壬戌科武會試山東等省武舉有外場列入雙好因內場誤寫題目或越幅書寫數與例載違式者不同請飭嗣後武場照例辦理等語武鄉會試均以外場為重內場試卷小疵原可不必苛求惟有干例載違式專條者不准取中其內場試卷別有舛誤並非例文所指違式專條外場已列雙好應否仍行錄取並無明文應如何畫一辦理之處著兵部妥議章程具奏尋議上武闈以外場為主至內場有犯違式專條者應遵定例不准取中其

餘外誤仍准取中但不得濫置前列

光緒二十三年 諭前據榮祿高燾會胡燏棻先後奏請設立武備特科的改章程各摺片當經諭令軍機大臣會同兵部議奏茲據該王大臣等分別准駁詳議覆奏並擬定大概章程開單呈請朕詳加披閱尙屬核實可行國家設科武備與文事並重原期遴選真才以備折衝之用見在風氣聿新雖無庸設立特科亦應參酌情形變通舊制著照該大臣等所擬各省武鄉試自光緒二十六年庚子科爲始會試自光緒二十七年辛丑科爲始童試自下屆爲始一律改試鎗礮其默寫武經一場著即行裁去所有一切未盡事宜及各省應如何設立武備學堂之處著該衙門隨時奏明辦理見在時局艱難朝廷釐定章程專務振興實學武場改試鎗礮亦轉移風氣之一端嗣後主試之王大臣及督撫學政尤當認真考核務在作其忠勇開其智識平時則嚴督功課校試則秉公去取毋得奉行日久又成具文致負育人材至意

臣謹案 國家以騎射定天下方入關之始亦甚得力於紅衣大將軍

錫之封號何以考試弓刀石沿習二百五十六年必至情見勢絀而後

諭改將母人人但知爲進身計上以是求即下以是應類不復力求進步

抑風氣之開亦會有其時歟

又湖廣總督張之洞奏竊惟今日用兵專恃火器外洋各國鎗礮之製日出而益精武學教練之法日推而益密中國武科取士斷宜專習火器別定新規然後無所習非所用之弊惟是變法伊始防弊宜慎取才宜精查初次部咨會奏各條恐器械之不能盡一也則定指名代購之例恐濫用之漫無限制也則定報明有案之例二次部咨照廣西撫臣黃槐森原奏洋鎗由士子購買鎗桿鎗考姓名防微杜漸頗極周詳願 猶有鯁鯁慮者軍火一項例禁嚴固立法之精義亦有國之恆規考之東西各國保安之鎗遊獵之銃皆須繳納稅捐頒發執照違者或科罰或沒入或監禁則視其多少而爲之差蓋與我國舊例用意大略相同自髮捻蕩平以來各省遂無大亂其實販運邊隅亂萌時有即如近年熱河教匪甘肅回匪亦甚披猖或兵甫集而衆降或鋒一交而敵潰

實由同治初年洋鎗洋礮流入中華漸推漸廣官軍所用無論精粗總係洋械火器精利聲威震懾亂民無抗拒之資宵小弭蕩芽之漸今若概准演習一縣火器累百盈千收藏之家良莠不齊武生武舉本多強梁生事之徒又假以利器一有意外會匪游勇糾結橫行頃刻亂作其禍豈可勝言雖云稽察責諸地方然州縣事繁習惰不過視爲查私鑄查燒鍋禁宰牛禁賭博之類但以具文行之若時常挨戶搜查則不免騷擾若但憑差役一報鄉保一結則必然有名無實即如民間私藏鳥鎗州縣官例有處分而閩粵鄉鎮鎗礮如林然則稽察之說豈可恃乎光緒十七年江南有查獲洋人美生私賣軍火接濟匪徒謀奪鎮江以及金陵之案迨二十二年廣東又有查獲匪徒私運軍火入城爲亂圍據廣州省城之案前鑒不遠豈可更揚其波且近日各國鎗礮式樣日新月繁雜同一鎗礮而藥彈門類區別甚多改造原裝等差不一若應考者每人各執一式之鎗如何考校高下如須同係一式私家零購則先後參差由官代購則不勝繁擾此層似多窒礙 詳稽舊制參考新章審酌通籌謹擬一營伍學堂武科三事合一之法查原奏章程第四條云欲廣爲招徠則綠營制兵防營練勇不妨准其報名鄉試又二次部咨云此次改革意在合考試與操防通融定制凡武生投營營兵應試以及武舉武進士如何教練管束各大吏當參酌營制妥籌良法各等語竊謂莫如就此條之意而推之查武場條例八旗驍騎校前鋒領催等官以及馬甲步甲分別准應武鄉試武童試綠營兵丁有願應武童試者各歸本縣與武童一體考試其取進武生准應鄉試取中武舉准應會試其千把等官或係武生或係武舉均分別鄉試會試故各省向有兵童兵生名目是武科人才取諸旗綠各營弁兵本係 國家舊制既以用其素習兼以勵其勤操立法之意至爲精切閱遠至今於旗綠弁兵而外又有防營弁勇一項比之綠營年力人才較爲強壯操練火器較爲嫺熟今武科改試鎗礮莫若即令營弁兵勇應試最爲無患於地方而有益於軍旅若令應武試者皆於武備學堂肄業一節勢有所難目前風氣初開有武備學堂者祇四五省一省亦止一堂且武學教習甚難不能不取才異地故學堂之經費既鉅學生之額

數無多大率一堂不過數十人又必須文理清通習氣馴謹者若各府各縣均設學堂一時斷無許多之經費亦斷無許多之教習若謂令武職教練則中華將弁向來惟尚勇敢其精細者不過約束紀律較為詳明其於火器理法測算繪圖工程製造邊海形勢罕能通曉至文理通暢能讀洋書者尤不易覓故各省大小武職能教兵勇者或間有之能教將弁者決無其人其稍能通曉一二能教兵勇者即已矜貴非常則必留在防營使充營官教習豈肯令其散往各屬教授武生武童乎是學堂之廣設尤為不易至各營兵勇究係曾經本營華洋教習教練雖不能遺語精深尚可得其粗淺且外洋定章凡入武備學堂三年者必須隨營操練一二年以增閱歷斷無學生常在營伍之外者若即令兵勇應試名籍易考鈐束易施所用鎗礮發之本營自然一律擬請惟兵勇准應武童試兵勇取進武生後仍在營充伍者准應武鄉試兵勇取中武舉後仍在營充伍者准應武會試其已拔實缺外委實缺把總候補千總者准作為武生應鄉試已補實缺千總守備者准作為武舉應會試綠營弁兵令該營專管之參游都守保結冊送勇營弁勇令該管之本營管帶官保結冊送童試由各營送交原籍知府錄送學政考試免其縣考以省紛繁而免曠誤旗營仍照舊章鄉試仍由綠營勇營各營官冊送學政錄科會試仍照舊章但武弁兵勇均應照例歸原籍考試不得混考凡非在營見充武弁兵勇者均不得應武童試此後既無營外之武童自無營外之武生既無營外之武生自無營外之武舉武進士矣其從前取進取中之武生武舉見未在本營者准其呈請附入本省防營或學堂自備資斧隨同學習其鎗礮即用本營本堂者藥彈價值由該生呈繳並仿照外洋學堂章程令其酌繳本生火食束脩雜用器具各費由該管營官及管堂之員察其年力精壯性情謹樸者方准收錄若不守規條不能勤學頑鈍難教者均隨即斥退其學堂畢業者分發本省各營酌量委用將來風氣漸開華弁可充教習者漸多各府州縣有自行籌資設立武備學堂者准其稟官辦理既設學堂則必由官約束稽察堂中雖有鎗礮可無伏戎藉寇之虞迨學成後統發各營分別效用則營伍學生合為一貫而整飭科舉即所以整飭營

伍矣總之非見在營伍之兵勇不准應武童試非見在營伍之武生武舉不准應武鄉試武會試即例准應試之武弁若見不在營者亦不得錄送咨送鄉會試正與部臣前奏寓營制於科舉之意相合而其利有三外洋火器價值甚昂平日練習需用藥彈為數尤鉅若生童借費不購則操練無具臨場考錄勉湊中額仍無裨益若各省紛紛購買則合計所費不貲似平空增一絕大漏卮亦為非計今應試取之兵勇則操練械藥本是各營應有之需開有願附防營專心練習者規矩嚴肅人數必不甚多且所有鎗礮即由官借用藥彈由該生繳價是日塞漏其利一也我朝將材輩出大率不外乎旗營官校綠營弁兵招募練勇三項總之皆係行伍自成豐軍興以來其由武舉武進士呈功著稱者實屬寥寥此輩恃符武斷如虎而冠魚肉鄉民窩庇匪盜每遇歲試鄉試武童武生聚集省城府城必滋生無數事端街市店舖日有戒心訛詐逞兇防範隱忍待至場畢則彼此相慶各省官商士民無不以為巨患萬口一辭徒以舊例相沿幾如附骨之疽去之無術究其所長者不過粗豪臂力伴中箭枝不識字者十人而九臨敵之火器既未嘗習制勝之韜鈴更未嘗解即使安分守法豈能與於干城腹心之選乎且各省武生武童舊習騎射硬弓刀石亦只臨場肆習數月無論中否過考輒已廢棄於國家儲材禦侮之意毫不相涉今若專令營弁兵勇就試即入武學登武科以後仍有本營長官鈐束無從為非其技藝亦不至荒廢如慮專准兵勇應試恐武童武生必少則又不然一省綠營弁勇合計多者二萬以外少則一萬五千以外三年之內止取武生千餘名取武舉數十名或十人而取一或二十人而取一何慮不敷且應試者果能人人皆有材藝何在於多如本無材藝混場僥倖眾橫行多愈為害從此可為地方暗減此一項違法擾害之游民此尤潛移默化之微權矣是日戢暴其利二也暗昔征討髮捻之時各路軍營有以步卒水手不數年而保至提鎮者海內忠勇之士翕然向風近年軍務較平保案少則防軍之拔擢難文法繁則綠營之升遷尤難雖有偉材壯志無所得官糧餉聊以糊口操練視為具文雖經按期檢閱空言獎勵收效終微蓋兵勇自視不過如擔夫匠役食力營生其謹愿者

僅不爲會匪地痞而已人既卑視兵勇兵勇因而自卑若望其深明敵愾同仇之大義講求破敵制勝之方略蓋亦難矣今若懸此一途以爲營弁兵勇進身之階功名所在則肄習自精不待朝廷督責將帥勸勉而各省各營皆爲勁旅矣是曰勵軍其利三也抑臣尤有進者親上死長者強國之本原明恥教戰者強兵之要術當此豪強憑陵不已正所謂天下危注意將之會近來東西洋各國精研兵事最重武職其國君即服提督之服鄰國之君互相贈送以將官之銜故人以當兵爲榮以從軍爲樂以敗奔爲恥王子之尊下儕成卒一隊之長榮若登仙凡掛名軍籍者居鄉則戚黨貴之過市則路人敬之以故弁兵之自愛聲名修飭行檢過於儒士中國乃有好錢不打釘好人不當兵之諺稍有身家成所鄙棄貴賤之分強弱之源也夫中國所貴者士士之徒步而致公卿者多矣人之貴之蓋有由也中國所賤者兵兵之荷戈而流爲傭丐者衆矣人之賤之固其所也即使不終於困餓而三四十歲以外猶爲傭養之賤卒五十年以外始爲循資之裨將既已純乎暮氣豈能建立奇功今欲重武厲兵而積習已深不能驟改空言訓勉亦恐無裨惟有勵行伍以科舉之一法使其非由行伍不得科舉非由科舉不得將官爵祿所在則豪傑爭趨流品既殊則廉耻自立將領不肯侮辱旁人不敢輕藐從此凡爲兵勇儼然並列士流欣然同得高第夫然後世俗文儒皆肯入伍感慨激發人人有執干戈衛社稷之心然則今日欲求中國士氣之奮軍實之修轉移微權必在於此又臣區區之微意也綜考各國軍政有武學而無武科其各等學堂以次考拔發營錄用即是中國武科武試從無不由學堂出身之官弁亦無不充軍營將校之學生其法實將武營武學武科三事合而爲一其法最善故今日欲採擇西法莫如先自練兵始學西人之練兵莫如自開兵勇之升階合學堂營伍始若其學習考試之法非僅改用鎗砲遂能收效歷考外洋諸國從無不讀書不明算不能繪圖之將弁亦無不識字之兵丁誠以今日戰事日精戰具日巧即一哨弁之微亦斷非粗材下品所能勝任若祇考鎗砲準頭從容施放中靶者多殊難去取且憑此即授以侍衛參游都守之官似亦太易擬請仿馬步箭弓刀石武經三場之

制頭場試鎗砲準頭兼令演試裝拆運動之法二場試各式體操及馬上放鎗步下擊刺之技三場試測繪工程臺壘鐵路地雷水雷與他戰法等學鄉會試格式宜較嚴童試格式宜較寬三場合校智勇兼優將來海膺將領庶可勝任又考外洋兵制及武學章程初入營及未弁入學堂者多不得過二十歲蓋以年力少壯則體操及測算各事始能按程學習穎悟易通以後凡應試武童武科亦宜酌定年限即武科從寬亦不得過二十五歲至所試之鎗砲則以單響毛瑟爲主蓋此項鎗砲各局多能自製砲則以單響七生半車砲及六生車砲爲主蓋此項砲用處最多而江甯局製熟鐵六生車砲一名兩磅砲成本較輕雖不如外洋之精操練亦頗可用他局仿造尙不甚難即自江南購造亦不甚貴若本省自有七生半車砲者亦可通融學習考試通行似惟此兩種鎗砲最爲適用而易得若快鎗快砲過於精巧珍貴各路軍營尙且難得各省生童豈能皆習此種他日製造既廣改習亦不難也

二十七年 諭武科一途本因前明舊制相沿已久流弊滋多而所習硬弓刀石及馬步射皆與兵事無涉施之今日亦無所用自應設法變通力求實際嗣後武生童考試及武科鄉會試著即一律永遠停止所有武舉人武進士均令投標學習其精壯之武生及向經應試之武童均應募入伍俟各省備立武備學堂後再行酌定挑選考試章程以儲將材

臣謹案自鎗砲興而弓矢之制廢猶之弓矢盛而戈矛之制鈍也蓋戰陣勝負之數亦與前迥異矣今雖有拔山扛鼎氣蓋一世之勇適與鎗砲遇未有能旦夕枝梧者然則力固有時而窮與窮則變變則通令各省遍設武備學堂研究各國戰術師其長以救吾短亦時勢之所必至也

任子
臣謹案博奕說 國家崇獎有功之至意也貴如五等之封固已其次凡軍功及五品以下流內外陣亡殉難者最殺亦給雲騎尉襲完恩騎尉因替漢有宗廟爾無絕世以勵成勞以勸來者甚盛事也前代恩澤浸廣如南郊聖節致仕遺表秩滿兩任皆得任子未脫乳臭遠點朝列方嬖竹馬

已佩金魚其能免於充濫與我 朝定制凡廕生必入國子監肄業期滿
考試授官學而後入政立法至為美善唯髮捻之變殉難者多弊混者亦
多宗圖冊結族鄰供認兵部定章非不縝密而殉難者之家屬非鄉愚即
孤寡烏乎得其詳不肖書吏遂乃裝點影射假捏名姓豫留虛步頂戴可
以販認世俸可以冒領以恤任子而實以秦盜吏洵之汰之以求其實庶
忠裔得永食忠勤之報乎

乾隆五十六年革前湖廣總督陳輝祖子陳山焜前福建巡撫楊景素子楊焄
主事職發往伊犁效力贖罪其餘子一併斥革不許出仕

臣謹案時陳輝祖楊景素已故以湖廣督撫舒常李封福建督撫特成額
富勒渾革職治罪追論湖北積弊起於陳輝祖福建則起於楊景素特嚴
謹其子山焜焄皆捐納主事以疆吏而味良負恩在任婪索所得貲財子
孫又得捐納官職以為進身之階仕途竟成龍斷今從嚴示懲雷霆一聲
紈袴失色罰及其後益覺賞延於世足為廉吏勸耳

嘉慶四年 命予告大學士蔡新子內閣中書本俊一體 殿試

臣謹案本俊於二年以舉人 特賞內閣中書

又 賜賢良後裔故大學士朱軾曾孫生員晉麟知縣振聲景華舉人

五年 諭 皇祖建立賢良祠實為千古曠典 皇考復念其後裔恩意有加
迄今已閱六十餘年朕欽誦 聖謨緬懷篤棊凡宣勞佐治之大臣曾入賢良
祠者其子孫或未登仕籍或品級卑微著該部行查八旗都統及各該督撫等
遵照舊制詳悉查明送部引見以示朕念舊加恩至意

又 賜尚書朱珪孫涂舉人

又 諭八旗大員廕生年已及歲者俱由各該旗咨報吏部帶領引見分別錄
用惟宗室廕生向無引見之例朕思前年以來六部各衙門已定有宗室額缺
並准宗室子弟應鄉會試以廣登進之路則宗室廕生自宜一體任用所有嘉
慶元年宗室廕生俱著加恩交宗人府查明於及歲時送吏部帶領引見候朕
分別錄用以示錫類推恩至意

又定宗室三品廕生奉 旨以文員用者應以宗人府主事及有宗室主事之
吏禮刑工四部分用三品廕生專以宗人府七品筆帖式用四品廕生如奉
旨以八品筆帖式用者查宗人府筆帖式二十缺俱係七品應令其授為八品
食俸仍補七品筆帖式額缺

又 賜賢良後裔原任刑部尚書魏象樞六世孫煜原任禮部尚書楊名時曾
孫景曾江蘇巡撫徐士林孫從旭舉人原任工部尚書湯斌四世孫生員念曾
舉人廣西巡撫傅宏烈六世孫縣丞徽壠知縣 賜故大學士蔡新孫舉人行
達進士原任大學士李光地元孫維範舉人

二十五年七月 宣宗嗣位八月 賜原任侍郎萬承風子監生方熙舉人一
體會試念上書房授讀之勞也

十一月 賜賢良後裔原任大學士吳璵四世孫拔貢生沆福建巡撫潘思集
曾孫監生福舉人

道光二十九年以原任山西巡撫吳其濬裁革鹽規潔已奉公查明子孫 賞
給舉人有差

臣謹案吳其濬長子候選縣主簿吳元禧次子分發通判吳榮禧遇缺即
補三子候選知縣吳崇恩遇缺即選四子監生吳承恩五子監生吳洪恩
長孫吳榕讓均舉人夫不受陋規亦不足為邁倫之高節吳其濬別無奇
行祇此裁革鹽規後嗣尙蒙 殊寵廉吏不可為而可為楚以寢邱封叔
敖尙待優孟之陳請厚薄詎可同日語哉

咸豐五年 賞廣西陣亡總兵官董光甲子國賢通判國良舉人通判景垣同
知

同治五年 諭吏部奏原任都察院左副都御史張芾之子張師劬應否賞還
廕生聲明請旨一摺據稱舉人張師劬由伊父張芾侍郎任內得有二品廕生
嗣因張芾革職照例革廕張芾起用後旋於同治元年五月在籍殉難奉旨照
侍郎例從優賜卹究與生前開復者有間應否還廕之處請旨遵行等語張芾
前在陝西原籍勸諭回匪在倉頭鎮地方被害甚慘業經降旨照侍郎例賜卹

該故員沒於王事忠烈可風伊子張師幼原得二品廕生著加恩准其賞還
光緒元年欽奉 恩詔文官在京四品以上在外三品以上武官在京在外二
品以上照見在品級各廕一子入監讀書

十五年欽奉 恩詔從前恩詔後升職加銜補官者悉照見在職銜給予封典
京官文職三品以上武職二品以上各廕一子入監讀書

三十一年奏准免漢文武廕生考試如滿員例

三十四年 諭自咸豐同治以來髮捻回各匪擾亂各省陸續戡定其文武大
員勳績卓著者皆已懋賞酬庸或錫予爵職見計閱時已五十餘年各勳臣子
孫其名位顯達者固不乏人而浮沉下位伏處鄉里者亦復不少方今朝廷保
民綏邊銳意向武聞聲思將彌念前勞當經諭令各省督撫各旗都統將勳績
尤爲卓越諸臣後裔查明有何官職報茲據軍機大臣開單呈覽自應渥沛
恩施前西安將軍多隆阿之次孫署墨爾根副都統正黃旗協領壽慶著以副
都統記名簡放會孫應襲男爵奎弼著以郎中補用前湖北提督向榮之曾孫
向楷著以知府分省即補向迺全著以主事補用前安徽巡撫江忠源之孫江
慎動著以知府分省即補會孫一等輕車都尉江勤培著以員外郎分補用
前布政使銜浙江甯紹台道羅澤南之孫騎都尉羅長耿著以知府記名簡放
會孫羅延祚著以主事分省補用前協辦大學士四川總督駱秉章之孫浙江
嚴州同知調補玉環同知駱懋著以知府在任即選會孫駱毓樞著以主事
分省補用前江南提督張國樞之孫男爵張繩祖著以知府分省即補張繼祖
著以主事分省補用前巡撫銜浙江布政使李續賓之孫度支部郎中兼襲男
爵李前著著以道員記名簡放會孫李正繩著以主事分省補用前兵部尚書
彭玉麟之次孫湖北補用道彭見綏著以道員記名簡放會孫彭萬激著以主
事分省補用前陝甘總督楊岳斌之子軍機處存記福建遇缺儘先題奏道一
等輕車都尉楊正儀著仍以道員記名簡放孫楊道徵著以主事分省補用四
川提督鮑超之次子農工商部主事兼襲子爵鮑祖恩著以知府即選孫陸軍
部主事鮑世爵著以郎中分省補用前署安徽巡撫布政使李孟羣之孫李興

仁著以知州即選李興孝著以主事分省補用前江西南贛鎮總兵程學啟之
嗣子江蘇試用道兼襲男爵程建勳著以道員記名簡放前廣東提督劉松山
之孫江蘇候補道兼襲子爵劉國安著以道員記名簡放會孫劉家珉著以主
事分省補用前貴州提督馮子材之次子浙江候補知府馮相華著以道員記
名簡放孫馮承鳳著以主事分省補用前湖南提督塔齊布著該管旗查明立
嗣奏請恩施用示朝廷培植世臣激勵將士之至意

又 諭軍機大臣等所有單開功勳最著之前雲貴總督劉長佑等二十三員
有無後嗣有何官職著各旗都統各省督撫查明咨報軍機處彙案請旨

又吏部奏河工邊防等職人員酌定限制略稱擬請嗣後遇有河工邊防出
洋暨經理路礦輪電銀號商務等項及例所未備人員如祇因病身故雖經各
該督撫部臣奏請援照軍營立功後積勞病故議卹奉 旨允准其從優者

部亦祇按承辦軍需積勞病故例照大洋大江漂沒及殉難議給贈銜未請從
優者照內洋內河及軍營病故人員減等贈銜均毋庸給廕

又 諭吏部奏軍機處領班章京領班章京應否比照三四品京堂一律給
廕民政部內外城總務處僉事是否毋庸給廕一片軍機處領班章京等著准
其給廕內外城總務處僉事著毋庸給廕

又吏部奏欽奉 恩詔核辦廕生由題改奏略稱查定例各官不論加級及宮
保等銜均照食俸廕子非見任者不廕原品解任食俸者准廕又承廕定限三

年有軍務省分統兵大員准其展限一年如再逾限即毋庸置議各等語查品
級考內開正一品內閣大學士從一品各部尚書都察院都御史正二品各部

侍郎大理院正卿從二品內閣學士翰林院掌院學士各省布政使奉天左右
參贊正三品都察院副都御史宗人府府丞翰林院學士各部左右丞大理院

少卿大學堂總監督度支部總銀行正監督造幣廠正監督順天府府尹各省
提學使各省按察使東三省提法使雲南交涉使奉天吉林交涉使民政司使

奉天旌務司使從三品民政部內外城巡警總廳廳丞大理院總檢察廳廳丞
各省鹽運司使奉天度支蒙務二司司使吉林度支司司使正四品翰林院侍

讀

讀學士各部左右參議順天府承國子丞掌印給事中法部京師高等審判廳廳丞法部京師高等檢察廳檢察長大理院推丞度支部總銀行副監督造幣廠副監督從四品翰林院侍講學士內閣侍讀學士法部京師內外城地方審判廳廳丞等官俱照見任食俸品級各廢一子其原品解任食俸者亦照例准廢又定例衍聖公慶曆照正一品總督與尚書同巡撫與侍郎同又查存案內務府大臣照正二品給廢三院卿照正三品給廢又各國出使大臣見經改設專缺所有二等出使大臣應請照二品給廢三等出使大臣頭等參贊均應請照三品給廢所有旗員之子應取具該旗印文漢員之子應取各該衙門印文在外各官之子應取督撫各該衙門印文俱開明應廢姓名年貌籍貫送部

臣部照例彙奏註冊給照
宣統元年吏部奏准漢員改授都統副都統所得廢生仍照漢例擬 旨並從二品以下改製各項官階

又 諭前經查明成豐同治以來勘定髮捻回各匪文武大員之子孫業已加恩錄用茲據續行查出各員自應一體施恩前雲貴總督劉長佑之長孫載取安徽直隸州知州劉繩武著以知府仍留原省補用曾孫知府銜儘先選用同知劉鶴慶著以知府選用前巡撫一等男爵劉銘傳之次孫候選道陸軍部郎中劉朝望著以道員即選贈布政使銜道員王鑫之長孫花翎同知銜江蘇補用知縣王禮恒著以直隸州知州仍留原省補用曾孫王傳薪著以主事分部補用前綏遠城將軍福興之長孫度支部郎中鐵保著以道員記名簡放前河南歸德鎮總兵一等子爵李臣典之孫李榮尊著以主事分部補用前浙江提督鄧紹良之長孫湖北候補通判鄧世勳著以直隸州知州仍留原省即補曾孫鄧守清著以主事分部補用都統銜前廣東副都統烏蘭泰之孫二等輕車都尉普霖著以員外郎分部補用曾孫世昌著以主事分部補用前署廣西提督甘肅肅州鎮總兵張玉良之長孫應襲騎都尉張錫恩著以直隸州知州分省即補前工部左侍郎呂賢基之嫡長曾孫承襲騎都尉兼一雲騎尉湖北候補知府呂美璟著以知府仍留原省即補前漕運總督袁甲三之孫度支部郎

中袁世勳著以道員記名簡放前都察院副都御史江西巡撫張芾之孫承襲騎都尉兼一雲騎尉張漢著以直隸州知州分省補用前著貴州巡撫韓超之孫湖北候補主簿選用知縣升用直隸州知州韓方樸著以知府遇缺即選布政使銜前福建督糧道趙景賢之次子開復前廣西柳州府知府趙淶彥著以道員分省補用孫江蘇試用通判趙之聰著以直隸州知州仍留原省補用前雲南鶴麗鎮總兵朱洪章之子應襲騎都尉朱桂著以主事分部補用朱家炯著以通判分省補用前直隸提督郭松林之長子世襲一等輕車都尉兵部主事載取河南直隸州知州郭人凱著以知府仍留原省即補前廣東巡撫蔣益澧之孫優附生蔣祖權著以主事分部補用布政使銜前江南道員溫紹原之嫡長孫溫祖遠著以主事分部補用曾孫附生承襲騎都尉師範學堂畢業生溫翔著以直隸州知州分省補用前署安徽廬鳳穎道金光飭之嗣孫應襲騎都尉兼雲騎尉金志鵬著以直隸州知州遇缺即選前護軍統領恆齡之曾孫法部主事蔭康著以員外郎仍留本部補用元孫志海著以主事分部補用前新疆巡撫一等男爵劉錦棠之子新疆候補直隸州知州劉國祉著以知府仍留原省補用記名提督前廣西右江鎮總兵張樹珊之子承襲騎都尉兼一雲騎尉浙江候補道張雲遠著以道員記名簡放孫監生員外郎職銜張紹烈著以員外郎分部補用贈布政使銜升用知府前天津縣知縣謝子澄之子候選直隸州州判謝觀瀾著以直隸州知州選用孫附貢生謝焜著以主事分部補用示朝廷培植世臣激勵將士之至意

又 諭昨日召見之承襲一等子爵廣西委用知府李長祿著仍以知府補用承襲一等男爵候選道度支部員外郎劉朝仰著以道員即選

皇朝續文獻通考卷八十九

選舉考六 吏道

臣謹案周選太宰置其輔鄭注輔府史相沿而為今之書吏是吏者本所以輔官者也漢初以試吏入官每至宰輔當時儒吏並進未嘗偏有輕重也東京以後流品漸分儒漸鄙吏而吏亦因以自輕馬考吏道一門始終可以考見直至今日胥吏為叢弊之藪然既用之不能不予以銓敘以酬其勞故 朝廷於吏道出身銓用之法防範極為周密以前沿革已見皇朝通考道光緒二十七年 詔各部署案卷一併銷燬責成各部堂官督率司員躬親部務并為舊日書吏寬籌出路乃一舉而廓清之茲纂吏道一門有互見於職役考中者并仍之以備覽云

乾隆五十二年奏准在京事簡書吏各該吏員五年役滿各該管官出具切實印甘各結取具本吏親供保送即令各堂官及各督撫於每年七月內傳集嚴密考試自行錄取在京不得過十分之七在外不得過十分之五其僅止一名不數錄取者如實係當差勤慎文理明通仍准錄取仍將錄取試卷及該吏年貌籍貫三代姓氏造冊限十月內咨送吏部其錄取一等者以從九品雜職用二等者以未入流雜職用填給執照註冊銓選其不取之姓名籍貫亦令送部存案以杜重考

五十六年奏准在京各衙門書吏供事及各省書吏無論已滿未滿概不准其改籍歸宗更名復姓以杜弊端
嘉慶五年奏准書吏五年役滿即行報明開缺倘各衙門以該吏經手事件未完暫請留辦概不准行其修書各館供事報滿後仍留館辦事者准其咨留十二年奏准考職人員如有因銓選無期情願註銷職銜另圖別業者准其註銷仍行文該吏原籍地方不得再行充吏
二十二年定凡書吏供事報捐官職分發籤掣省分因病告假未經領照赴省者定限一年呈明病痊領照赴省試用如逾限不行呈明病痊領照者將該員分發並雙單月一併註銷仍歸原班飭令回籍候選

道光九年 諭御史姜梅奏役滿書吏應隨時勒限回籍一摺各部院經承例

應於五年役滿飭令回籍原因該書吏等充役有年熟悉衙門事務易啟句通賄囑之弊是以役滿不准逗遛在京立法至為嚴密如該御史所稱近來役滿書吏回籍者不過十之一二並有因役滿即須回籍每於將及五年之時先行告退即可不在役滿之列又有冒入大興宛平籍貫改名捐納微職以候選為名遂得潛留京中串通綫索或說事過財或指名撞騙或造作假偽或幫同訛詐其弊不一而足至戶部捐納房書吏向係本衙門貼寫充補亦俟五年役滿另行更換該書吏等雖係貼寫亦應與役滿經承一體飭令回籍嗣後各衙門書吏役滿後著隨時行知順天府五城勒限飭回原籍其充役將及五年無故具呈告退者亦著督飭回籍倘有役滿後改名冒入大興宛平籍貫捐納職官並戶部捐納房役滿貼寫者一併嚴查照例辦理不准在京稽留以除積弊咸豐元年 諭御史周有篔奏已滿已革書吏在京逗遛請飭查拏一摺向例在京役滿書吏勒限飭令回籍如有逾限不即啟程及到籍後潛行來京著由地方官查報斥革遞解並革退書吏一律遞回原籍嚴加管束不准在京逗遛定例極為嚴密乃近來如戶部已滿書吏王潤祥工部已滿書吏章端本兵部已滿書吏陶姓皆役滿仍住京師舞弊犯案可見各衙門已革已滿書吏任意逗遛不回籍者正復不少此輩盤踞京中與見在經承貼寫互相勾結把持公事漁利分肥是其慣技且難保無已滿者另名重充已革者更名復充情弊若不嚴行查究何以除積蠹而遏弊源著在京各衙門隨時查察究辦並著步軍統領衙門順天府五城一體訪拏照例嚴懲

同治六年通政司于凌辰請禁書吏捐保知縣疏云竊惟知縣一官刑名錢穀實有專司撫字皆宜盡善我 朝設官置吏以來首嚴茲選非科甲官蔭明經正途出身者不得濫授選因軍餉浩繁暫開捐納一途原屬權宜萬不得已之計復恐其賢愚錯雜有害百姓故立甄別之法以防之慮深遠矣至於書吏該衙門當差十數年而後始得充經承經承役滿後其能幹者僅得從九未入職銜而亦不能即選其已登仕途者雖非永無升轉之例或經督撫保舉亦必其

曾任雜職佐貳論資計俸著有能聲方准升轉從未聞有以向在本衙門當差之書吏並未充過經承亦未選過從九未入而即驟選知縣實缺者有之實自近來之保舉遞加始查書吏派充各項差使非必事務繁多轉勞於本衙門也亦非必自備資斧甚苦於本衙門也赴差有口費住差有津貼較在本衙門已偏得多多且又非若軍營差使並無所用其奇才異能試問所司者何事亦不過供奔走管書記耳以書吏爭趨之捷徑即保以雜職佐貳已不為不優矣而保者竟遞保至正印選者即銓選一實階殊與慎重名器之道未甚允協且各衙門書吏久慣作奸偽非精明上司靡不墮其術中是以每恭逢 恩詔蠲租減賦賑災救荒凡有關民瘼者 天語煌煌必切誠毋任書吏舞弊仰見 朝廷洞燭靡遺刻刻防杜至意若一旦而令若輩驟膺親民之任故習復萌勢必多方培克以謀飽其私棄何暇為國何肯為民書吏縣令斷非小民福星况當此兵燹以後地方半多凋殘何堪再事剝削全賴為司牧者廉明公正愷惻慈祥以與民休息至如何安集如何撫綏更如何而始可以為民父母在書吏平日既未討論講求臨時必至錯置顛倒縱使督撫不時舉劾其閒愛惜功名者亦所或有然求十一於千百之中竊恐官方之日壞而民生之日蹙也縣令一官所關實非淺鮮可否請 旨飭下吏部按冊逐一檢查將書吏由保舉層層遞加至銓選知縣一條永行禁革其已選知縣實缺並已經指省分發試用知縣或由得保舉知縣後加捐者概行撤銷另為酌核獎敘更擬請嗣後除銅局捐輸軍營保舉外凡係派書吏差使永不得層層遞保至正印官階以示限制而杜冒濫庶於 國體官方兩有神益

光緒二十七年 諭見在整頓部務裁汰書吏原為社弊起見所有各部裁汰之書吏朝廷格外加恩予以出身著吏部按照向來年滿書吏應得議敘章程妥議辦法以示體恤

張春晉吏必用士人議 舊制各部衙門胥吏三年而滿不聽久據今且或為世業或為販買舞文竊柄鈎結為奸吏道之壞大半由此今府州縣以下既各專一職俸屬以外必用胥吏今之胥吏周禮太宰所屬殷輔之

士眾也用之途一一自變法分職之日始或由各府州縣以下官自行選召或暫照舊章令本有之吏正身供職三年三年之內無過失被人告發得罪者給照許其子孫入官立普通學堂時三年不納膳金畢業領憑更入專門學堂者各學堂就近送京外官各衙門由各衙門官選用一見在府州縣學生年三四十以上素行謹愿而文學平常不得入學堂者各學官院長就近擇送各衙門由各衙門官選用並三年而易其升降以俸督撫司道衙門之俸優於府府屬衙門之俸優於州州屬衙門之俸優於縣屬

宣統三年內閣通行各督撫文官任用章程將次頒布吏員考職應先行停止方伎亦附

臣謹案自史遷傳扁鵲倉公及日者龜策後人因之有方伎一門 皇朝通考齒席馬氏列入選舉 聖祖天縱多能中西畢貫一時鴻碩雲蒸霧涌往往 召直蒙養齋又做前代畫院設如意館於啟祥宮南兼及工藝供奉者或由大臣薦引 特賜出身官秩沿逮 高宗且於幾餘臨幸黼黻昇平於斯為盛而前考紀載闕如豈藝成而下卑無高論歟嗣後海禁大開泰西科學灌輸中夏爭奇炫巧層出不窮識時者競以為富強根本舍舊謀新趨之若鶩蓋風會使然不堪觀續已前考所載祇欽天監太醫院寥寥數條而會典禮部有此門備登僧道喇嘛茲遵其例推廣之為宗教云

嘉慶十二年御史徐國楠奏請續修天文時憲二志經大學士首舉優貢生汪萊通推步歷算之術入館纂修十四年書成議敘以本班教職用

十七年題准三姓阿爾楚喀地方設有監獄各設無俸從九品醫官一員由部照例給劄令其任事

道光元年烏程諸生陳杰考取天文生任欽天監博士累官國子監算學助教供職時憲科時嘗親至觀象臺督率值班天文生頻年實測黃赤大距為二十一度二十七分未經奏明不敢用迨甲辰歲修儀象考成績編監臣取此數上

之而 欽定頒行時已謝病告歸矣

二十二年英吉利兵犯沿海數省船礮之利爲中國所未有大學士卓秉恬疏
薦戶部主事丁守存通天文歷算風角壬遁之術善製器命繕進圖說借郎中
文康徐有壬赴天津監造地雷火機等器試之皆驗累官湖北督糧道
咸豐十年准旗人學習外國語言文字

同治三年廣東巡撫郭嵩燾特疏薦南海諸生鄒伯奇精天文歷算貫通中西
以疾辭未就

五年覆准嗣後醫官扣滿六年由太醫院會同禮部將吏目醫士恩糧等員考
試一次分別去留

七年郭嵩燾疏薦海甯諸生李善蘭精通算學徵入同文館充總教習總理衙
門章京授戶部郎中加三品卿銜

光緒六年 諭善製船械精通算學者保薦

八年直隸總督李鴻章奏略稱候選道徐建寅先在上海機器局歷練有年熟
諳製造嗣調赴山東總辦機器局經丁寶楨奏保奉 旨送部因遵往德國充
當參贊不克赴京該員熟悉洋務於船礮製造之學研究尤精見既銷差回華
自應仍遵前 旨送部引 見候 旨錄用

十年 諭前國子監司業潘衍桐奏請特開藝學一科御史方汝紹請開實學
科並據翰林院侍讀王邦壘奏添陳藝學開科流弊御史唐椿森奏曲藝不宜
設科先後諭令大學士等一併妥議茲據會議具奏國家造就人材不拘一格
設科取士原爲遴選實學起見即講求藝學亦未嘗不可兼收並取正不必別
立科目致涉紛歧嗣後如有精於西法之人在京著各大臣保送同文館考試
在外著各該督撫收入機器局當差其無機器局省分分別咨送南北洋大臣
核其學術技藝切實保薦庶於因時制宜之中仍不失實事求是之意潘衍桐
方汝紹所請特開藝學實學科之處均著毋庸置議
十二年御史謝祖源奏竊維周髀九數時人命官考工五材庶士分職班固志
前代藝文於經典外列叙兵書術數方技諸略此皆專門利用之學聖人不廢

近世士大夫每囿於見聞語及環球各國交際之通例富強之本計或鄙夷而

不屑道夫外洋測算衍自中法制器相材原於考工營陣束伍乃古者司馬法
步伐進退之遺開採五金仿於周禮北人之職測量地輿亦晉人裴秀成法禮
失求野豈彼智而我獨愚特中土習爲游談其平日留心講習者良少耳請

敕出使各國大臣隨時分飭參贊隨員游歷境內考核紀載分門講求並督率
出洋武弁學生等學習各項技藝董勸並行以收實效至翰詹部屬中如實有
制器通算測地知兵之選堅樸耐勞志節超邁者可否請 旨勅翰林院六部

覈實保薦並咨送總理衙門考核再行奏請發往奉 旨該衙門議奏

十三年督辦福建船廠大臣裴蔭森奏查出洋藝成學生或回華供差或留洋
監製皆在奏定考核員紳之後未曾咨部立案者計有陳林璋黃庭王迴瀾王

福昌鄭誠李芳榮六員該學生等均屬 國家造就成材足資器使未便置之
閒散荒棄前功經 旨委派差使懇 恩准予立案

又唐炯奏礦務事體繁重兼以庫帑出納亟需羣策羣力始免貽誤查有候選
知縣濮文曦深通化學諳習開辦礦事宜該員見在京候選四川機器局委

員巡檢商啟文精於製造機器該員曾經已故督臣丁寶楨奏保四川越嶲廳
同知鄧林明晰鉤稽諸練鼓鑄該員籍隸江西見已告病開缺回籍懇 恩飭

吏部及四川江西督撫令該員等迅速來滇聽 旨差遣用資贊助
十九年 命直省擇保精曉天文醫理卜筮數學及嫻於堪輿者上之內務府

二十四年 命中外舉製造駕駛聲光化電人材

臣謹案當時臨海董毓琦嘗製汽輪精算法兼工繪事曾以知府保薦無
錫徐建寅承其父徐壽家學於泰西藝術具見原委尤精製器以直隸候
補道調至湖北監造無烟火藥已成藥炸裂殞焉 賜優卹中國何嘗無

人材特 上不重視致少專門耳

宣統元年以精製造嫻外交復已革四品卿銜廣東補用道魏瀚原官原銜

又 諭據梁敦彥奏遵章核定游學專門各員開單呈覽一摺擬列一等之序
天佑賞給工科進士嚴復文科進士魏瀚李維格鄭清瀛鄺榮光吳仰曾均工

科進士李湯生文科進士楊廉臣工科進士張康仁法科進士伍光建王邵廉均文科進士擬列二等之鄭祐昌李大受溫秉仁均賞給工科舉人陳聯祥格致科舉人盧守孟劉冠雄江起鵬均工科舉人餘依議

謹案以上各員係由直省督撫保送 欽派大臣會同學部覈定給予出身與游學畢業考試者不同故特錄於此

又學部奏絕學專家懇 恩宣付史館略稱據候補五品京堂軍機處行走楊壽樞等呈稱江蘇金阊縣已故運同銜直隸州知州華衡芳及其弟已故直隸州州判華世芳研精算術深明格致同治初元江南創設機器製造局築廠置機華衡芳多所贊畫繕譯館開任算學地質諸門成書十二種都百六十餘卷風行海內先後主講上海格致書院湖北自強學堂兩湖書院無錫映實學堂成就學生甚眾華世芳歷充學堂算學教授精勤士論翁服該二紳學遂行優導學界之先河為師儒所尊仰謹開具事實清冊及所譯著書目呈請代奏正在核辦聞復據呈稱江蘇無錫縣已故二品封職徐壽於數學律呂幾何重學鑛產汽機醫學光學電學均能窮源委索隱鉤深經前大學士曾國藩後先委辦安設機器局江南製造局在安慶機器局與華衡芳等造成木質輪船一艘為中國自製輪船之始在江南製造局發明製造強水棉花藥水煤藥諸法又繕譯西書成聲光化電營陣軍械各種書籍凡數百種為中國講求西歐藝術之濫觴同治十三年在上海設立格致書院肄習西學西藝為今日開辦學堂之先聲他如山東四川機器局大北煤鐵開平徐州煤礦漢河金鑛亦多賴故紳訂定章程畫畫規制奇材異能當代罕覩呈請併案奏明伏考 國朝儒臣精通算學者如梅文鼎王寅旭諸人均得列傳儒林近世如浙江海甯州已故三品卿銜李善蘭亦以精暗人之業經館臣採訪事實為之立傳又已故道員徐建寅即徐壽之次子長於製造化學均奏請立傳查華衡芳世芳較李善蘭稍晚出而與之齊名徐建寅之學即受之於其父徐壽擬援成案懇將華衡芳華世芳徐壽三人事實著述宣付 國史館立傳以振學風而昭來許三年直隸總督陳夔龍奏請 賞屈永秋醫科進士學位

宗教

謹案古無所謂宗教也自釋氏入中國其道自別為宗於是六朝後有此說且有儒釋道三教之稱儒與二氏比肩不於倫此六朝人之陋也凡宗教之立必異乎當世之政俗學術而自為一派入其教乃為其徒衆人不在此列故有教內教外之界限佛道耶回皆然我國尊崇孔聖二千年來已如日月經天江河行地釋老繼興耶回後入其道判然以異前考缺焉不載然於朝章國故風俗人心均有關係爰撮其大略附方伎後以觀覽焉

佛教 始祖為中天竺釋迦牟尼 國昭王二十四年四月八日天竺迦維衛十九入世特山修行 世教化四十九年 後漢明帝永平八年其教始入中國魏書釋老志隋書經籍志言之甚詳降及有唐高僧輩出各闡師傳遂開宗派約而計之都凡十宗曰律宗曰俱舍宗曰成實宗曰三論宗曰瑜珈宗曰天台宗曰賢首宗曰慈恩宗曰禪宗曰淨土宗言其盛衰則律宗自明末寶華山三昧律師後代有聞人禪宗分派臨濟為盛高僧不可備指賢首宗至明季式微 國初柏亭大師成法出撰述宏富大闡宗風天台宗自明末藕益大師後兼開淨土法門靈乘靈耀宏宣此宗康熙時淨土宗大師有省庵夢東達默古崑瑜珈宗久亡慈恩三論諸宗更無人顧問矣昔人謂學校壞而二氏之教興刑賞窮而地獄之說起神道設教聖人所尚與人為善豈曰小補歷代帝王頗多信仰三武之摧殘不旋踵而即復諸儒闢之不得或亦極其精華以自淑我 朝順治至乾隆最盛嘉慶以後衰衰咸豐時洪楊擾攘以耶穌教為號召排斥異教寺觀為墟然剝極則復光緒年間又勃然興起矣粵稽 世祖皈依禪宗順治十五年遣使迎僧通秀及其徒行森至京供養西苑十六年 諭爾禪師通秀臨濟嫡傳笑巖近裔心源明潔行解孤高故於戊戌之秋特遣皇華之使聘來京闕卓錫上林朕於聽覽之餘親詢釋梵之奧實獲我心深契予志洵法門之龍象禪院之珠林者也恭釋 綸音尊崇備至餘如玄水吳道恣慈璞聰等皆承 召對不令稱臣致

拜都門宗風自此大振 聖祖巡幸所至寺院各有題詞遇山林學道之士
優禮有加親製重修天竺碑文有云能仁之最等於好生佛道之成關乎民
隱將使般若之門隨方而啟仁壽之域舉世咸登 聖祖整理儒學不遺餘
力而其尊崇佛教則猶先代之遺風也 世宗喜研禪理又極提倡淨土自
號圓明居士撰有 御選語錄十九卷揀廢辨異錄八卷語錄第十二卷係
與人問答言句第十九卷則集內廷王大臣諸人之語錄名曰當今法會於
淨土祖師中特提蓮池大師為模範采其要語別為一卷 御製序文云朕
欲表淨土一門使學人宴坐水月道場不欲歧而視之誤謗般若故擇其言
之融會貫通者刊為外集以示後世蓋鑒於禪宗空洞之弊而欲矯正之示
學人以腳踏實地也 高宗篤嗜藏經盡力於剞劂與翻譯明萬曆中所刊
大藏六千七百七十一卷乾隆三年 敕選後世大德著述增為七千二百
四十七卷從事雕刻是謂龍藏先是 聖祖曾刊刻圓覺金剛等二十二經
為 國朝刊經之始龍藏則經始於 世宗而 高宗完成之者也二十四
年 敕和碩莊親王允祿選擇通習梵音之人詳譯全藏經中諸咒編為滿
漢蒙古西番合璧大藏全咒計八十八卷附同文韻統六卷字母讀法一卷
讀咒法一卷共九十六卷頒發中外各大叢林三十八年又 敕以國書翻
譯大藏經五十五年告成計二千四百六十六卷敬觀 列聖重佛開教既
如上述然於寺院之建立僧尼之出家限制甚嚴臚列事例如左
順治二年定僧道均給度牒以防姦偽凡寺觀若干僧道若干各令住持詳詢
籍貫具結投僧道官加具總結在京者呈部在直省者赴地方官呈送彙申撫
按解部頒給度牒不許冒充混領事發罪坐經管官 按明制凡給度牒先令考
得給不取者俾其剃度故僧多有學問 無初免試惟之制研究三藏名解矣
又嚴禁京城內外不許擅造寺廟佛像必報部方許建造僧道不許自置緣簿
募化不許私削髮為僧僧道官住持縱隱一併治罪
六年題准僧道必有度牒方准住持焚修查無過犯者每名納銀四兩給予度
牒州縣於歲底解司彙解戶部

八年奉 旨僧道均免納銀有請給度牒者州縣察數報司呈禮部照數給發
十五年題准已給漢字度牒者繳部換給清漢字度牒
康熙四年題准本戶不及三丁及十六歲以上不許出家違例者治罪僧道官
及住持知而不舉一併治罪
六年通計直省敕建大寺廟六千七十有三小寺廟六千四百有九私建大寺
廟八千四百五十有八小寺廟五萬八千六百八十有二僧十一萬二千九百
二名道二萬一千二百八十六名尼八千六百十五名共計寺廟七萬九千六
百二十有二僧尼道士十四萬一百九十三名
十三年定僧錄司善世闡教講經覺義左右各二人道錄司正一演法至靈至
義左右各二人在外省府曰僧綱司道紀司州曰僧正司道正司縣曰僧會司
道會司專管僧道恪守戒律清規違者聽其究治若所犯與軍民相涉在京申
部酌審在外聽有司斷理
五十年 諭直省創建寺廟多占據百姓田廬既成之後愚民又為僧道日用
糾集銀錢購買田地給予以致民田漸少且游民充為僧道藏匿逃亡罪犯行
事不法實擾亂地方著各督撫及地方官除原有寺廟外其創建增造永行禁
止
雍正十三年十一月 高宗諭佛法以明心見性興善能仁舍貪除慾忍辱和
光為本而後世緇流竟借佛祖兒孫之名以為取利邀名之具奸詐盜偽無所
不為以致宗風頹敗象教衰微此皆不肖僧徒貽之咎也我 皇考聰明睿知
天縱多能而於性宗之理洞晰精微深通奧妙萬幾餘暇每召見僧衲指示提
撕冀其勉力參悟俾佛教廣有傳人以為勸善去惡之一助此 大慈悲父覺
世之苦心也乃數年以來真能領會 聖訓者甚少 皇考嘗為歎息今陸續
散出於外其間品行不一難保無借端生事之人如昔年 世祖章皇帝時木
陳恣大有名望深被 恩禮而其所著北游集則狂悖乖謬之語甚多至其誇
張 恩遇處尤為庸鄙又玉琳國師弟子骨殿行峯著侍香紀略一書更為誕
妄荒唐供人噴飯已蒙 皇考特降嚴旨查出銷毀此中外所共知者前事可

聖朕不得不留心申飭著該部傳旨通行曉諭凡在內廷曾經行走之僧人理應感戴 皇考指迷接引之深恩放倒身心努力參究方不負 聖慈期望之至意倘因偶見 天顏會聞 聖訓遂欲借端誇耀或造作言辭或招搖不法在國典則爲匪類在佛教則爲罪人其過犯不與平人等朕一經察出必按國法佛法加倍治罪不稍寬貸又 諭歷代僧人披剃有給與度牒之制順治八年停其納銀康熙初年並給發度牒亦經停止蓋其時僧徒尙未甚多又當玉琳國師筑溪禪師主持法席相繼振興猶知共循遺軌故不給度牒亦屬可行近日緇流太衆品類混淆真心出家修道者百無一二而愚下無賴之人游手聚食且有獲罪逃匿者竄迹其中是以佛門之人日衆而佛法日衰不惟參求正覺克紹宗風者寥寥即嚴持戒律習學小乘之人亦不多見屢稟清規徒增塵玷流弊不可勝言朕崇敬佛法乘信夙深參悟實功仰蒙 皇考嘉獎許於當今法會中契超無上者朕爲第一則並無薄待釋子之成見可知特以護持正教之殷懷不得不辨其薰蕕加之甄別著該部仍行頒發度牒給在京及各省僧綱司等嗣後情願出家之人必須給度牒方准披剃仍飭府州縣等衙門嚴查僧官胥吏毋許借端需索擾累僧徒違者從重治罪

又 諭四民之中惟農夫作苦自食其力最爲無愧飭庀八材以利民用非百工莫備士則學大人之學故錄其賢者能者至於商賈阜通貨賄亦未嘗無益於人而古昔聖王尙虛逐末者多令不得衣絲乘車推擇爲吏以重抑之今僧中有號爲應付者各分房頭世守田宅飲酒食肉並無顧忌甚者且畜妻子道士之火居者亦然夫一夫不耕或受之飢一女不織或受之寒多一僧道即少一農民乃若輩不惟不耕而食且食必精良不惟不織而衣且衣必細美室廬器用玩好百物爭取華靡計一農夫三人肉袒深耕尙不足以給僧道一人不亦悖乎朕於二氏之學皆洞悉其源流今降此旨並非博不尙佛老之名也蓋見今之學佛人豈特如佛祖者無有卽如近代高僧能外形骸清淨超悟者亦稀今之道士豈特如老莊者無有卽如前世山澤之癯能凝神氣怡養壽命者亦稀然苟能遵守戒律焚修於山林寂寞之區布衣蠶食獨善其身猶於民無

害也今則不事作業甘食美衣十百爲羣農工商賈終歲竭蹶以奉之而蕩檢踰閑於其師之說亦毫不不能守是不獨在國家爲游民卽繩以佛老之說亦爲敗類而可聽其耗民財溷民俗乎著直省督撫飭各州縣按籍稽查除名山谷剝收接十方叢林及雖在城市而願受度牒遵守戒律閉戶清修者不問外其餘房頭應付僧火居道士集衆面問願還俗者聽之願守寺院者亦聽之但身領度牒不得招受生徒所有貨產如何量給還俗及守寺院者爲衣食計其餘歸公留爲地方養濟窮民之用並道士亦給度牒之法該部詳議具奏

乾隆元年 諭前降諭旨甚明乃聞外省傳述錯誤僧道皆惶惑不安恐資產歸公遂爾弊端百出有將己身田宅詭寄他人戶下希圖藏匿者有謀囑書吏分立花戶詭名以多報少者有減價速售變銀入囊者且有局外匪類從中索詐者夫此僧道既謀利戀財如是隱之仙佛之法乃疎糶稂莠也卽取其私囊歸公以養濟窮民亦何不可天下後世自有公論但朕以天地好生之心爲心一物不得其所如己推而納之溝中此庸愚無知之僧道亦天下一物耳何忍視同膜外著該部先行曉諭去其迷惑至應付僧火居道士之資產因無所歸著是以有養濟窮民之說究竟國家豈需此區區財物亦不必稽察歸公著重議具奏又聞外間有尼僧一種其中年老無依情願削髮者尙無他故其年少出家之人心志未定而強令寂守空門往往蕩檢踰閑爲人心風俗之害且聞江浙地方竟有未削髮而號稱比丘者尤可詫異應照僧道例不許招受生徒免致牽引日衆其情願爲尼者必待年四十以上其餘概行禁止著一併會議遵 旨議定僧錄等令地方官於戒僧內選擇樸實之人報部充補道錄等於道士內無家室實在住廟者慎選充補其見在僧道素守清規者均應頒給度牒若經僧道等官之手易滋需索擾累應令各督撫轉飭該地方官造冊取結彙齊報部照冊給發各僧道收執遇有事故將原領度牒追繳如有改名更替或藉名影射及私行出家者照違制律治罪至應付僧人令地方官傳集面詢果願受戒給予度牒不願者卽令還俗編入里甲爲民若老邁殘疾既難受戒又難還俗者查實亦給度牒又如深山僻壤寺僧不能遠出受戒及俗家並

無所歸者亦姑注册惟不許招受生徒至在京及各省道士果無家室實心焚修者給予部照毋庸給牒火居道士勒令還俗有年老別無營運者亦暫給部照不許招徒其尼僧一項照僧道例願還俗者聽無歸者亦暫給牒不得招受少年女徒嗣後婦女有年未四十出家者嚴行禁止至各寺資產免其稽查以省紛擾

又覆准年少沙彌道童果無父兄可依暫留寺觀道冊備案年至二十不願受戒及二十以內力能謀生願還俗者聽至年少女尼不准暫留庵廟惟四體偏廢及實無所歸者照僧道殘廢例暫行給牒以贖餘生

二年 諭朕之酌復度牒以僧道太繁賢愚混雜其中多童稚孤貧父母主張出家非其所願亦有託迹緇黃利其財產蕩檢險閉甚至匪類作奸犯科不得已而剃髮道裝以避捕詰藏垢納污無所不至是以給發度牒令有稽考亦如民間之保甲不致藏奸貢監之執照不容假冒果能奉行盡善則教律整飭而閭閻亦覺肅清豈欲繁爲法禁苦累方外之民耶夫釋道原爲異端然誦詩書而罔顧行檢者其得罪聖賢視異端尤甚且如星相雜流及回回天主等教國家功令未嘗概行禁絕彼僧道亦不過營生之一術耳窮老孤獨多賴以存活其戒惡勸善化導愚頑亦不無小補帝王法天道博愛無私將使含生之類無一不得其所僧道果能閉戶焚修亦如隱逸之士避迹山林於世教非有大害豈必盡驅還俗使失業無依至於少年爲尼恐心志未定別生事端故待年已老成始許披剃亦非盡絕其教也若云僧道多一人則南畝少一人恐目今僧道未必皆肯盡力南畝也朕令直省督撫年終彙題即欲徐徐辦理之意並非盡行禁絕爲僧道也又前年以民間喜建寺廟而舊時傾圮者多特諭止許修葺近聞舊址重修者絕少聞有新建寺廟地方官並不將朕旨宣布亦忘忽從事之一端並諭令知之

四年奏准自乾隆元年起至四年止其頒發各省度牒部照三十四萬一百一十二紙遵照原議令其師徒次第相傳不再給發各督撫仍於五年審丁之期別具清冊報部

又議准民間獨子概不許度爲僧道嚴飭地方官曉示倘有故犯本家家長及受徒之僧道均照違制律問擬僧道勒令還俗僧道官不行查出一并斥革

九年議准河南三教堂中設佛老聖人三像總計豫省約五百九十餘處而商城石洞尤爲宏壯像用銅鐵土木石皆藻繪金飾其坐次佛居中老子聖人互相左右而略小其身俯仰旁側其奉祀繙流羽士霄陵信陽等州縣住持女僧尤屬穢褻即飭該撫嚴行禁止聖像不便毀銷如欲移奉令該撫查明通省書院若干義學若干或有潔淨公所漸次奉迎安設其祠宇改稱寺觀三教額碑悉行撤去若向屬公地管領無人見在住持僧道本無產業可依酌令遷於別寺觀居住佛老諸像聽其移奉將其地改爲書院義學安奉聖像報明禮部存案豫省界連燕趙秦晉北五省風氣相類三教堂亦所在多有惟南中罕聞然道流建醮輒以天尊之號謬加聖人誑惑愚俗誣罔不經一體嚴行飭禁三十九年 諭僧道度牒本屬無關緊要而查辦適以滋擾著永遠停止其選充僧道官令地方官查明具結辦理

嘉慶十七年 諭給事中甘家斌奏請禁止婦女入廟以維風化一摺婦女進寺燒香本有例禁京城廟宇叢多或日久奉行不力著步軍統領順天府五城出示曉諭如有開會招搖婦女入寺者一體查禁至收留匪徒一節各寺院開曠房屋招租取利在所不禁但須分別良莠若知情容留姦宄一經發覺將該僧道從重治罪所奏外省僧人置田招佃之處亦著該地方官隨時稽查毋令滋弊

道光二十四年議准嗣後遇有僧道坐門募化並作關募化概行驅逐如有詭索攪擾一經拿獲按所犯情節從嚴究辦至穿掌釘腮各項惡化比照恐嚇詐賴人故自傷殘律杖八十分別咨送禮部僧錄司照擬發落

喇嘛教 源出於釋氏盛行於西藏蒙古

高宗御製喇嘛說曰佛法始自天竺東流而至西番其番僧又相傳稱謂喇嘛喇嘛之字漢書不載元明史中或訛書爲刺馬子細思其義蓋西番語謂上曰喇謂無曰嘛喇嘛者謂無上即漢語稱僧爲上人之意耳喇嘛又稱黃教蓋自

西番高僧帕克巴始盛於元沿及於明封帝師國師者皆有之我朝惟康熙年開祇封一章嘉國師相襲至今其達賴喇嘛班禪額爾德尼之號不過沿元明之舊換其製數耳蓋中外黃教總司以此二人各部蒙古一心歸之興黃教即所以安眾蒙古所繫非小故不可不保護之而非若元朝之曲庇詔敬番僧也其呼圖克圖之相襲乃以僧家無子授之徒與子何異故必覓一聰明有福相者俾為呼畢勒罕幼而習之長成乃稱呼圖克圖此亦無可如何中之權巧方便耳其來已久不可殫述孰意近世其風日下所生之呼畢勒罕率出一族斯則與世襲爵祿何異予意以為大不然蓋佛本無生豈有轉世但今無轉世之呼圖克圖則數萬番僧無所皈依不如此耳去歲廓爾喀之聽沙瑪爾巴之誘劫略藏地已其明驗雖與兵進期彼即畏罪請降藏地以安然轉生之呼畢勒罕出於一族是乃為私佛豈有私故不可不禁茲余製一金瓶送往西藏於凡轉世之呼畢勒罕眾所舉數人各書其名置餅中掣籤以定雖不能盡去其弊較之從前一人之授意者或略公矣 天語煌煌瞭如指掌所謂黃教者

大宗有四一達賴二班禪三章嘉呼圖克圖四世布丹巴即噶布倫其額兵官曰譯有載等甲譯等名行政官曰第巴曰第布 著黃衣戴

黃帽與紅帽派區別紅教帶黃教則否明代以兵力逐紅帽派遂為西藏統治者蒙古喇嘛教分漠北漠南二大部演而為布達拉扎什倫布庫倫多倫泊四支與駐京喇嘛皆受前藏達賴之管轄會典理藩院駐京者掌印札薩克喇嘛一人副一人札薩克喇嘛四人達喇嘛十七人副四人蘇拉喇嘛十九人教習蘇拉喇嘛六人額外教習四人德木齊三十一人格斯貴五十人其徒眾曰格隆曰班第內務府三旗及 東陵隆福寺 西陵永福寺各設若干人又由京派往伊犁掌教堪布一人派往四川懋功之廣法寺堪布一人此外熱河盛京五台山歸化城多倫諾爾等處額缺升轉皆照駐京喇嘛之例駐京呼圖克圖會加國師禪師封號者左翼頭班章嘉呼圖克圖二班敏珠爾呼圖克圖右翼頭班噶勒丹錫呼圖克圖二班濟隆呼圖克圖皆列於 雍和宮總堪布避暑山莊普甯寺總堪布之上考喇嘛歸順在 太宗時崇德七年達賴班禪謂東土有聖人出特質方物表稱曼珠

師利大皇帝聖年 遣使存問稱之為金剛大士順治八年創建後黃寺剃度喇嘛百有八人均以內府三旗及五旗王公府屬管領下人披剃三旗二旗十四人雍正初以 潛邸為雍和宮為京師第一大廟設王大臣管理之喇嘛皆用西藏言文不通漢語傳授教法率限於蒙古滿洲絕少漢人前藏曰達賴喇嘛後藏曰班禪額爾德尼以教首掌政權屢起內闢布在方策無待縷陳略舉事例俾知梗概

順治十年前藏五世達賴喇嘛來朝 賜以金册金印授為西天大善自在佛領天下釋教 康熙十八年題准札薩克喇嘛給予印信其餘格隆班第等給予禁條度牒不給印信

四十九年覆准國師名爵甚大非有功績不得濫授帳州國師后丹子達節其師后丹子初授護印僧綱司後因攻賊有功升授國師給予鍍金銀印業已承襲一次今達節以年老辭職其徒后尖采甯布並無功績不得承襲令照初封職授為護印僧綱司給銅印 敕書舊印繳內閣

五十二年議准班禪呼圖克圖動修釋教敬謹納貢照達賴喇嘛之例給予金册金印 敕書錫封班禪額爾德尼

雍正元年議准六世達賴喇嘛册印照五世之銜換給並增蒙古字別給 敕書令其辦理噶布倫事務

四年議准西甯所屬百里外僧寺九十四處河州所屬僅三處內有名國師禪師而會類 敕印者有未頒給者有名為寺廟而實無者有名寺廟而為名部落者各處喇嘛或二三名以至百六七十名此等原係土番雜處明初頒給敕印我 朝亦會頒給緣邊居之人野性難化故令其信任喇嘛承襲管轄若因循舊制不酌量更定恐日久竟恃為世守所關匪細嗣後令各寺族佃歸併內地為民所給敕印盡行收改不令管轄番眾其如何給予喇嘛空銜俸祿之處俟該督具奏再議

五年 諭理藩院奏請敕封哲布尊丹巴呼圖克圖之後身其鍾靈大有根源

乃與達賴喇嘛班禪額爾德尼相等之大喇嘛也衆喀爾喀皆尊敬供奉且其所居庫倫弟子共衆著動用帑銀十萬兩修建大利封伊後身

乾隆元年議准在京各寺廟原有度牒之喇嘛格隆班第共九百五十九名後增福佑等寺食錢糧之格隆班第共三百十四名皆未得牒應按名補給再札薩克大喇嘛以下德木齊格斯貴以上皆有隨分食糧之徒若無度牒難以稽察約束除章嘉呼圖克圖等自藏帶來之徒不給外其隨分食糧之徒一併給牒仍令該管大喇嘛每年二季將並無額外多收及私爲班第之處具結報院察核

三十九年奏准停止番僧度牒

五十四年 諭自藏內有巴爾布之事諸務紛繁此後務得曉事之達喇嘛幫助達賴喇嘛辦事始有神益濟隆呼圖克圖人明白經卷亦好伊之根器本大著賞給畢理克圖諾們汗名號作爲札薩克達喇嘛遣往藏內率領各噶布倫等幫助達賴喇嘛辦事

又 諭據巴忠等奏喇嘛兄弟改仲綏綏等各賞與經典名號俟有別廟堪布缺出即行補放等語此事不值如此辦理達賴喇嘛兄弟近年並未聞有恣意妄行之處若如此辦理未免情事張皇此皆巴忠等識見短淺致有此奏著傳諭舒濂等照常看待祇須留心體察倘伊等滋事舞弊即行奏聞治罪如無別故不得妄事紛更以示體恤

五十七年 諭西藏爲達賴班禪駐錫之地各蒙古及番衆前往煎茶瞻拜皈依佛法必其化身的確方足以行禪教而愜衆心今藏內呼畢勒罕圓寂後俱令拉穆吹忠作法降神俟神附伊體指明呼畢勒罕所在吹忠既不能認眞降神往往受人屬求任意妄指是以親族姻婭遞相傳襲近數十年總出一家竟與蒙古之世襲無異以致物議沸騰嗣後應令吹忠認真作法指出務尋實在根基呼畢勒罕名姓若干將其生年月日各寫一籤貯於由京發去奔巴金瓶內令達賴喇嘛等會同駐藏大臣公同念經對衆拈定具奏作爲呼畢勒罕不得聽其仍前任意妄指以除積弊而服人心

又達 旨議定凡蒙古番子部落呈報呼圖克圖大喇嘛之呼畢勒罕出世准

於間散台吉或屬下人等及唐古特平人之子嗣內指認其達賴班禪之親族及各蒙古汗王貝勒貝子公札薩克台吉之子孫均禁止指認呼畢勒罕凡各處之呼圖克圖及舊有之大喇嘛等圓寂後均准尋認呼畢勒罕其無名小廟坐牀從前並未出有呼畢勒罕之尋常喇嘛已故後均不准尋認呼畢勒罕五十九年 諭青海之察漢諾們汗係一札薩克有管理游牧之責伊之呼畢勒罕必須伊屬下心服方於事有益嗣後察漢諾們汗圓寂擬呼畢勒罕時無論伊族人親戚按伊屬下人帖服者入於奔巴金瓶掣定毋庸固執新例

嘉慶二十四年 諭玉麟等奏藏中僧俗求定達賴喇嘛呼畢勒罕甚屬非是從前呈報呼畢勒罕出世每多附會爭端漸起弊竇叢生 皇考洞燭其情設金瓶緘名掣定之制自當萬世遵行今裏塘所報幼孩其靈異何足徵信若違聽其言與從前指定一人者何異玉麟等不行嚴駁實爲錯誤著傳旨申飭此次幼孩即作爲入瓶籤掣之一俟續報再得其二方可將三名同緘入瓶照定制掣籤著明白傳諭第穆呼圖克圖毋許再瀆若來京求請即查拏治罪

道光二年 諭達賴喇嘛之呼畢勒罕朕撫馭天下惟期萬方各安生業振興道學昨據駐藏大臣奏稱自呼畢勒罕降生後藏中屢著吉祥且爾容貌端方舉止沈重經卷熟練並能辨認前代達賴喇嘛供過佛尊用過物件故普藏僧俗皆傾心悅服擇二月十二日釋迦牟尼佛傳教吉期在布達拉等廟令呼圖克圖等念經七日並在班禪額爾德尼前念經禱祝後詣 高宗聖容前行禮畢由奔巴金瓶內將兩名掣出覽奏欣悅降旨將爾作爲達賴喇嘛之呼畢勒罕並派駐藏大臣等在廟內公同鑒視爾坐牀所有賞爾各物派理藩院司員帶往到時祇領爾正聰明長進之時理應感戴朕恩勤習經卷圖與黃教俾僧俗人等均安居樂業毋忽

十九年定呼圖克圖等除封國師禪師名號准其兼授外概不得以呼圖克圖兼諾們汗班第達堪布綽爾濟等職銜亦不得以國師兼禪師名號二十五年定台吉當喇嘛照例報院請領度牒如未領牒私自出家者勒令還

俗失察之盟長札薩克罰俸
咸豐六年 諭滿慶奏達賴喇嘛圖寂將商上事務暫交呼圖克圖掌管一摺
據稱呼圖克圖人尚穩妥從前曾代辦商上事務數年均無乖錯
見因達賴圖寂已將一切事宜令其暫管惟以後商上事務該呼圖克圖掌管
能否勝任著悉心察看再行具奏至唐古忒僧俗人等見在是否照常安靜著
該大臣妥為彈壓毋令滋事

同治四年 諭羅布藏青饒汪曲協理商上事務為僧俗等所深服所有商上
承辦藏務掌管黃教額爾蒙額諾們汗印信著即賞給祇領掌管以符舊制
光緒六年 諭此次達賴喇嘛坐牀除經頒給賞件外著丁寶楨於司庫內提
銀一萬兩派員送至西藏交色楞額給領

宣統二年 諭西藏達賴喇嘛阿旺羅布藏吐布丹甲錯濟業汪曲却勒朗結
夙荷先朝恩遇至優極渥該達賴具有天良應如何虔修經典恪守前規以期
傳衍黃教乃自執掌商上事務以來驕奢淫佚暴戾恣睢為前此所未有甚且
跋扈妄為擅違朝命虐用藏眾輕啟端緒光緒三十年六月間乘亂潛逃駐
藏大臣以該達賴聲名狼藉據實糾參奉旨暫行革去名號迨該達賴行抵庫
倫折回西甯朝廷念其遠道馳驅冀其自新核改飭地方官隨時存問照料前
年來京展親賜加封號錫資駢蕃並於起程回藏時派員護送該達賴雖沿途
逗遛需索騷擾無不量予優容曲加體恤寬既往而策將來用意至為深厚此
次川兵入藏專為彈壓地方保護開埠藏人本無庸疑慮詎該達賴回藏後布
散流言藉端抗拒詎誣大臣停止供給疊經剴切開導置若罔聞前據聯豫等
電奏川兵甫抵拉薩該達賴未經報明即於正月初三夜潛出不知何往當諭
令該大臣設法追回妥為安置迄今尚無下落掌理教務何可迭次擯離且查
該達賴反覆狡詐自外生成實屬上負國恩下辜眾望不足為各呼圖克圖之
領袖著即革去達賴喇嘛名號以示懲處嗣後無論逃往何處及是否回藏均
視與齊民無異並著駐藏大臣迅即訪尋靈異幼子數人繕寫名錄照案入於
金瓶掣定作為前代達賴喇嘛之真正呼畢勒罕奏請施恩俾克傳經延世以

重教務朝廷彰善瘴惡一秉大公凡爾藏中僧俗皆吾赤子自此次降諭之後
其各遵守法度共保治安毋負朕綏靖邊疆維持黃教之至意

臣謹案川督趙爾巽奏報達賴恣虐民心不附藏中僧俗本無抗拒王師
之意達賴以威脅之故川兵在藏藏軍不待交綏而即紛散亂事似可無
慮惟聞吾國駐藏之委員將枝多為達賴所用聯豫尤失眾心致專與為
難俾其供給羅列罪狀詣幫辦溫宗堯處控告會徐方紹統師至達賴憂
沮正月二日赴布達拉山約溫相見面允三事請溫商聯豫不許溫以單
銜咨復意為足安其心不料次夕遽遁溫即開缺赴川譯英國藍皮書附
奏大旨謂英俄兩國各自為防各有所忌我宜趁此時機整理藏政藏人
分三級曰官吏曰喇嘛曰百姓政尚專制官吏之命令雖至慮不敢違喇
嘛百姓無不仰其鼻息喇嘛向俄百姓向英我能增長權力制其官吏則
向俄向英均歸無效云云近傳外電達賴已抵俄京將借俄力以返拉薩
確否不可知第俄使其臣德支埃仕於達賴為堪布給巨費久播眾口
前年達賴出京屢思導之游俄俄我撓之英復沮之是以中止今以我之罪
臣尊為上客光緒二十七年宣統元年達賴兩次其牢籠也專為蒙古也
英則懼其假途西藏以危印度故猜沮甚至達賴前在印度茲乃親若無
詔殆與俄協謀早定乎此事關係大局不憚煩言敘當日情形備後之治
藏者取鑒爾自達賴斥革後英俄二使均來照會乞恩外部復文官寺罪
况達抗胡首迭次擅離藏地何可更示寬容竟棄兵已不勝羣教之任
亦隨爾胡首迭次擅離藏地何可更示寬容竟棄兵已不勝羣教之任
藏中政體無庸云云

又 諭駐藏大臣聯豫奏稱光緒二十五年已革達賴喇嘛咨稱第穆呼圖克
圖阿旺羅布藏稱勒饒結賄延贖對康巴喇嘛使用邪兄圖害達賴生命請撤
銷呼圖克圖及靖善禪師名號茲據布資緝寺洛嶺朱倉喇嘛等偕同第穆本
寺喇嘛聯名稟稱第穆呼圖克圖並無劣迹竟被奇冤臆列案情懇請恩施等
語此案既據聯豫查明第穆呼圖克圖無端受禍良堪矜憫著加恩復其靖善
禪師名號並賞還第穆呼圖克圖准其轉世所有該寺內財物田產仍由商上

查明如數給還以彰公道而維黃教

道教 秦漢以來但有方士爲神仙之說無所謂道家者以老聃爲道教之

祖張陵爲大宗始於北魏寇謙之而唐時乃盛行天師世家稱道陵三編志

字輔漢沛豐邑人爲留侯八世孫漢光武建武十年生於天目山章帝和

帝屢召不起客蜀隱鶴鳴山造符書爲人治病桓帝永壽二年以經籙印劍

授其子衡衡子魯拜漢南太守魯子盛自漢川徙居信州龍虎山世以其法

私相傳授未聞見重於朝廷至嵩山道士寇謙之奉其書獻魏明帝帝起天

師道場於平城始見尊重按晉書殷仲堪及郗愔郗曇均奉天師道王羲之

傳世事張氏五斗米道凝之信之尤篤足徵天師之稱典午已然梁武帝因

陶貞白詣張道裕爲立元壇三百所唐天寶六載贈天師爲太師宋祥符九

年賜信州道士張士隨號真靜先生嗣是世襲封號特無階品徽宗崇寧二

年賜張繼先號虛靖先生元世祖至元十三年賜張宗演靈應冲和真人之

號給三品銀印令主江南道教明洪武元年太祖曰天豈有師革其舊號封

張正常爲正一嗣教護國開祖通誠崇道宏德大真人秩二品隆慶中降爲

提點六品萬曆時復之 國初沿明制朝會班列左都御史下侍郎上議詮

次事實而以依附道教者綴於後焉

順治三年江西巡撫李翔鳳進正一真人符四十幅 諭曰致福之道在敬天

勤民安所事此朝廷一用天下必致效尤其置之

八年五十二代天師張應京入覲 封爲正一嗣教大真人給一品印 諭曰

國家繼天立極光昭典禮清靜之教亦所不廢爾祖張道陵博通五經覃精玄

教治民疾病俾不惑神怪子孫嗣教代有崇封茲特命爾襲職掌理道錄統率

族屬務使異端方術不得惑亂愚民今朝綱整肅百度維貞爾其申飭教規遵

行正道其附山本教族屬賢愚不同悉聽糾察此外不得干預爾尤宜法祖奉

道謹德修行身立模範禁約該管員役俾之一守法紀毋致生事庶不負朝廷

優加盛典爾其欽承之

十二年五十三代天師洪任入覲 命工部覓宅以靈祐宮察院地居之 敕

免本戶及上清宮各色徭役

康熙十九年五十四代天師繼宗入覲時有覬奪大真人印者 聖祖命分壇

禱雨繼宗奏應於某日得雨至時果應 上甚嘉歎命隨謁法員吳士行等三

人留京三年一易日給餼廩來往給驛馬復增二員爲例繼宗還山 御書大

上清宮額賜之

三十三年命進香五岳

四十二年授光祿大夫

四十六年 賜第京師

五十二年 賜帑銀修龍虎山殿宇

雍正元年授五十五代天師錫麟光祿大夫

八年 命法官袁近垣禮斗有應

九年賜帑銀重修龍虎山殿宇並增置香田 諭曰域中有三教曰儒曰釋曰

道儒教本乎聖人爲生民立命乃治世之大經大法而釋氏之明心見性道家

之鍊氣凝神亦於吾儒存心養氣之旨不悖且其教皆主於勸人爲善戒人爲

惡亦有補於治化道家所用經籙符章能祈晴禱雨治病驅邪其濟人利物之

功驗人所共知其來久矣江西貴溪縣龍虎山漢代張道陵鍊丹成道於其地

嘗得祕書通神變化驅除妖異其經籙符章印劍以授子孫歷朝重之至今世

襲真人其弟子法官轉相師授往往能闡教演法如元之張留孫明之邵元節

皆賜號真人宣揚其祖師道術者也夫道必待其人而後顯設遇邪魔外道逞

其妖妄之術或且疑其爲道之累而不知於道固無損也一有闡教演法之人

則正道昌明顯著而邪魔外道頓歸消滅此自然之理也昨歲朕躬偶爾違和

賈士芳還其邪術假託祝由以治病朕覺其邪妄立時誅之而餘邪經擾經旬

未能退淨有法官袁近垣者秉性忠實居心誠敬爲朕設壇禮斗其至誠默感

確有靈應又以符水解退餘邪渙然冰釋朕躬悅豫舉體安和袁近垣一片忠

悃深屬可嘉因賜以四品龍虎山提點司欽安殿住持袁近垣自早歲入山學

道歷數十年焚修習鍊不懈益虔是以能得其祖師真人之正傳夫得真人之

道以大展其效忠闡法之地真人之道益顯其護國通神之力非所謂道必待人而顯者乎查龍虎山真人府上清宮歷唐宋元明代有修建至我朝康熙二十六年張繼宗陛見蒙 聖祖親灑宸翰賜號碧城並頒扁額賜以帑金修理宮殿今歷年已久祠廟漸就零落著發內庫銀兩命欽差前往重加修建務期宏敞堅固煥然一新朕之此舉非崇奉道教以祈福祥也以婁近垣忠誠實本於真人之道法夫人見其家有賢子孫必推本其祖先而稱美之况乎道法相傳闡教護國著有明效可忘所自乎今茲崇飾廟貌表示鴻規乃情理之至當國家酬庸報功之典所不可缺者且使天下之人知正教常垂宇宙其裨益於世道人心非淺鮮也

十年頒給龍虎山上清宮提點司印信並提舉等劄付先是張錫麟於康熙六十一年會咨部請頒給提點印信一顆提舉等員部劄十道未邀部准至是特諭頒給

十一年 賜婁近垣常住大光明殿封為妙正真人頒給提舉以下劄付二十二張

乾隆元年 諭清釐天下僧道惟龍虎山上清宮法官道眾不令頒給度牒部照聽真人提點給與印照在京各直省清微靈寶道士果無家室住廟焚修應事者仍給部照無庸給牒外至火居道士但令還俗有年老不能還俗者亦暫給照不許招徒

四年議奏嗣後真人差委法員往各省開壇傳度一概永行禁止如有法員潛往各省考選道士受錄傳徒者一經發覺將法員治罪該真人一併議處

七年五十六代天師張遇隆入覲 御賜教演宗傳額

十二年覆准張氏真人名號非朝官卿尹之稱存其舊名正所以別其流品前因無案可稽兩遇 覃恩加至光祿大夫封及三代邀榮逾分理應更正嗣後不許援引假借題給 封典至正一真人有統率龍虎山上清宮道眾之責視提點演法稍優按太醫院使秩正五品醫巫類本相等應將正一真人亦授為正五品從前所用銀印繳部換給真人承襲已久不過令其奉祀宮觀非若文

武動階為 國家酬庸之典爰及苗裔以示顯庸者可比有缺應補仍由該撫察其子孫應襲者取具地方官印結咨部製補照道官例註冊至於朝覲為述職大典筵宴實惠下 隆恩未便令道流躬身其間即一概停止以肅體制三十一年 諭正一真人向係承襲一品前據副都御史梅穀成奏請量加裁抑經部議覆降為五品第念其宋元以來承襲已久世守道教即遇有過愆亦應抵其人以罪不應議及其世襲然舊例一品班序未免太優遠降五品又未免過於貶損著加恩視三品秩永為例是年五十七代天師張存義入覲 賜真靈福地額

四十五年五十八代天師張起隆入賀 萬壽實資有加

五十四年 諭正一真人嗣後著五年一次來京

嘉慶五年五十九代天師張鈺入覲

九年奏准正一真人係三品職其所用印信乃係五品與見在品秩不符嗣後換給三品印信以符體制

二十四年 諭正一真人係屬方外原不得與朝臣同列嗣後仍照舊例朝覲筵燕概行停止

道光元年 諭瑞弼奏正一真人張鈺懇請來京叩謁一摺張鈺前經停其朝覲著不准來京

又定龍虎山上清宮設提點一員正六品 提舉一員從六品 副理二員贊教四員七均

品知事十八員未入 缺出由正一真人於本山道眾內選補出具考語報部補放給劄每屆年終造各法官及道眾年貌籍貫清冊報該撫咨部查覈如有私

鈐執照發給法官及用空白劄付向各省考選道士並咨士民投充挂名等事該法官及投充之人從重治罪仍將正一真人職名咨送吏部議處

九年六十代天師張培源襲爵成豐九年督辦團練

同治元年六十一代天師張仁最襲爵今為六十二代天師張元旭光緒中襲爵

邪教與異端不同若古之楊墨今之佛老異端也漢之張角明之徐鴻儒邪

教也楊墨言仁義而差者佛老言心性道德而差者其學雖誤其心無他其徒黨從無犯上作亂之事君子有辭而闕之無取而戮之若邪教之徒小則惑人大則釁亂古所謂造言亂民之刑不待教而誅者也我朝太宗時已惡爲厲禁崇德七年 諭禮部自古僧以供佛爲事道以祀神爲事近有善友邪教非僧非道一無所歸實係左道也自後除僧道外凡從善友邪教者不論老少男婦爾部示行禁止順治三年給事中林起龍奏近日風俗大壞異端蜂起有白蓮大成混元無爲等教種種名色以燒香禮懺煽惑人心因而或起異謀或從盜賊此真奸民之尤乞速 敕都察院五城御史及在外撫按等官卽行嚴捕處以重罪爲杜漸防微之計雍正二年五年八年先後有除莠黜邪教民俗之 諭並禁左道妖言讖緯圖說乾隆三十九年充州府民王倫習清水邪教號召無賴亡命作亂於臨清五十一年臺灣新化民林爽文結天地會起兵而尤以白蓮教爲甚白蓮教借治病除災造作經呪以惑衆而斂錢者也元末韓山童創之明王森徐鴻儒繼之皆以焚香聚衆作亂事雖無成徒侶漸廣禁之不絕四十年河南教首劉松以謀亂被捕其徒劉之協宋之清等遂謀不軌五十八年事覺之協逸去教徒揭竿紛起蔓延湖北四川陝西甘肅河南等省嘉慶七年始勦平之所謂川楚教匪也嘉慶十三年 諭給事中周廷森奏請嚴懲匪徒一摺據稱近日江南之穎州亳州徐州河南之歸德山東之曹州沂州兗州一帶多有無賴棍徒搜刀聚衆設立順刀會虎尾鞭義和拳八卦教名目橫行鄉曲欺壓良善其滋事先由賭博而起遇會場市集公然搭棚押寶聚賭句通胥吏爲之耳目請飭三省督撫認真緝清查保甲密訪爲首棍徒姓名拿獲盡法懲治並責成地方官嚴定黜陟等語江南安徽河南山東毗連各州縣既有此等匪徒自應嚴辦以靖閭閻不可養癰貽患至清查保甲雖屬緝匪良法但地方官寄耳目於里胥保正設里保皆其黨類仍不肯據實舉報總在府縣各官平日留心體訪隨案查拏將首犯嚴辦使脅從者知懼不敢隨同爲匪自不至釀成巨案株累多人若胥吏等在官人役敢於通同包庇尤應密舉重辦別

除積蠶者交各督撫認真查辦開葺不職者立予糾參十七年 諭創立教名私相授受行蹤詭秘惟恐人知始於一二奸民倡爲邪說其意專在傳徒斂錢而愚民無知惑於禍福之說輾轉傳習迷不知返不惜捐資破產飽首惡之囊橐迨官府查辦則爲徒黨亦與首犯同罹法網貽害多人深堪憫惻 聖有謨訓仁言利溥此外又有青蓮教八卦教理改天大刀會小刀會均白蓮之支裔徧布黃河流域而以滑縣李文成及大興林清爲之魁釀成十八年犯 闕巨案雖卽撲滅亦云殆矣光緒二十六年 諭總理衙門奏請嚴禁拳會一摺上年山東巡撫電奏各屬義和拳會以仇教爲名到處滋擾並及直隸南境疊諭直隸山東督撫派兵彈壓此種私立會名聚衆生事若不嚴行禁止恐無知小民被其煽惑蔓延日廣迨釀成巨案不得不用兵勦辦所傷實多朝廷不忍不教而誅著各督撫剴切曉諭俾百姓咸知私立會名皆屬違禁犯法務宜革除惡習勉爲良民倘蹈故轍卽行從嚴懲辦勿稍寬縱按義和拳乃白蓮教遺孽以練習拳棒爲名集會聚衆有祖師及大師兄二師兄等稱紅巾紅帶自謂八卦教中離卦之一派亦間有黃帶藍帶者女童習紅燈罩婦人習藍燈罩紅者衣紅藍者衣藍佩符誦呪謂有神護身鎗礮不能入所降之神多稗官野乘所云之黎山聖母樊梨花劉金定之類男則洪鈞老祖孫行者李太白劉伯溫之類詭稱念呪能禦鎗礮而斃於鎗礮者衆衆相屬愚民翕然從之蓋以扶清滅洋爲詞自居義民人亦以義民相目無斥其爲邪教者桐鄉勞乃宣時幸直隸吳橋縣知其焚教堂戕教民非真仇教也特窺民教不和之隙假公憤以資號召乃錄嘉慶二十年那彥成奏疏詳敘該黨教派及歷辦成案屬據報刑刑刊印源流考以示士民大聲疾呼上陳疆吏東南半壁猶賴其力得爲焦頭爛額之救濟此宗教史上一大公案也在理教起於 國初其祖曰楊萊如從勞山程揚旺學一日自言見聖宗下降度化遂得道傳燕齊開得大弟子八人遂立斯教嘉慶間設公所於天津梁家咀子漸及河南山東滿州各地所謂在理者言在儒釋道三教之理中奉釋教之法修道教之行習儒教之理其習俗戒煙酒而不

禁茹葷不設像不焚香多用呪歌偈語光緒六年御史李璣奏請密拿人以其禁煙酒有益也入者仍多北方尤盛太谷教主三教合一開山祖爲明嘉靖間之李兆恩始傳者道光時石埭周太谷字也游揚州江督百齡巷之下獄瘐死門弟子記遺說曰太谷經再傳有南北二派北派推儀徵張石琴字中成豐時髮捻起移家山東肥城縣之黃崖山據險自保從之者如流水泉匪亦以爲通逃藪語朋與同治四年東撫閻敬銘發兵往剿積中自焚全若一炬此派遂亡開南派者儀徵李晴峯字山引積中爲戒深相韜晦入室高弟爲黃隰朋字年由名進士宰泗水十年解組後居吳中講學及門號爲黃老師而不名名流多欽仰之餘如天地會三合三點及大乘紅陽白陽等教名目夥頤等諸自節矣

基督教 猶太人耶穌所創稱基督者希伯來之邁西亞語蓋即施恩澤者之義爲教徒之尊稱生於西歷紀元前四年漢哀帝建當時猶太教徒期望基督降生教授世人耶穌毅然自信奔馳各處說天國之福音顯奇迹愈衆民之病爲猶太教徒所惡控之羅馬官吏釘死於十字架其教以新舊約爲經典當信神爲慈愛之父人類皆神之子女兄弟姊妹基督自身亦神之子齋神命以救世故謂爲自天降下者天主教之名即本於此盛行於歐洲西歷十一世紀分爲天主教希臘教至十六世紀更由天主教而分新舊兩派俗稱舊教爲天主教新教爲耶穌茲將傳入我國後歷史略敘之明熹宗天啟五年西安發見大秦景教流行中國碑文謂貞觀九年景教僧始抵長安十二年詔准在京師建大秦寺景教爲基督教之一派是爲傳入中國之始元世祖時天主教徒至北京信徒達六千人中國之有正式基督教自此始明季意大利之利瑪竇以天文算學爲神宗嘉許於是北京始建瑰偉之教堂及於全國信徒達三十萬人基督教之基礎以立迨 國朝德人湯若望以歷學爲 聖祖信任授欽天監監正卒諡勤懇湯與南皆天主教徒謹守利瑪竇遺法不強使奉教者盡變中國習俗禮式 世宗嚴禁異教雍正元

年禮部議覆浙閩總督覺羅滿保奏西洋人在各省起蓋天主教堂潛住行教人心漸被煽惑毫無裨益請將各省西洋人除送京效力外餘俱安插澳門天主教堂改爲公所諸人其教者嚴行禁飭得 旨允行 仁宗秉承祖訓嘉慶十年 諭軍民人等嗣後備再有與西洋人往來習教者即照違旨例從重懲究決不寬貸又 諭西洋人等除貿易外如有私行逗遛講經傳教等事即隨時飭禁十六年 諭刑部議覆御史甘家斌奏請嚴定西洋之傳教治罪專條一摺西人素奉天主其本國人自行傳習本可置之不問至若誑惑內地民人甚至私立神甫等項名號蔓延各省實屬大干法紀而內地民人安心被其誘惑遞相傳授迷罔不解豈不荒悖試思其教不敬神明不奉祖先顯畔正道內地民人聽從傳習受其詭立名號此與悖逆何異若不嚴定科條大加懲創何以杜邪術而正人心嗣後西洋人有私自刊刻經卷倡立講會蠱惑多人及旗民等向西洋轉爲傳習並私立名號煽惑羣衆確有實據爲首者當定爲絞決其傳教煽惑而人數不多亦無名號者著定爲絞候僅止聽從入教不知悔改者發往黑龍江給索倫達呼爾爲奴旗人銷去旗檔至西洋人見住京師者不過令其在欽天監推步天文無他技藝足供差使其不諳天文者何容任其閒住滋事著該管大臣等即行查明除在欽天監有差使者仍令供職外其餘俱著發交兩廣總督俟有該國船隻到粵附便遣令歸國其在京當差之西洋人仍當嚴加約束禁絕旗民往來以杜流弊至直省地方更無西洋人應當差役豈得容其潛往傳習邪教著各督撫實力嚴查如有在境逗遛者立即查拏分別辦理以淨根株基督教之不能擴展者以此嘉慶十二年新教教徒美國人瑪利遜初至廣東研究中國文字語言以便待時發展道光二十五年兩廣總督奏備關西夷呈請天主教教人爲善非邪教請弛漢人習教之禁部議准海口立天主堂華人入教者聽之自二十二年江甯條約成立以來廣東福建廈門寧波上海五處開爲通商口岸教士接踵由五口潛入內地一時東南數省到處有十字架之標記咸豐八年中英訂立天津條約增開天津爲商埠於是基督教

更擴展於黃河流域以及東北各省抑有甚者前此基督教之深入內地實
 犯 朝廷禁令而天津條約則明白規定耶穌教徒之安分者中國不得苛
 待禁阻中法條約亦云天主教徒得入內地自由傳教地方官必厚加保護
 至咸豐十年北京條約更許法國教士在各省租賃土地建造房屋之權英
 法既開先例各國羣起效尤光緒二十九年中美條約即其著者基督教有
 此保障數十年中遂突飛猛進發達極盛而民教之齟齬以起其始入教者
 人多不齒故教民必被欺於平民自江甯約章定後地方官吏負有保護教
 士之責民教相爭往往袒教民而抑平民以苟圖息事而牧師神甫等又藐
 視官吏護庇教徒於是教民勢力頓出平民之上無賴之徒輒藉入教以魚
 肉鄉里平民屈抑無告乃激而成仇教巨案除法國以教士被殺聯英內犯
 德國以教士遭害租借膠州外他如天津混星子皖南白會清溫州施鴻禱
 長樂羅金福花縣王任鳳海陽林奴仔鶴山李鏡湖九江赫教士江甯謝長
 年永年魏長慶各案紛起幾無宵歲每一案發貧毀身富破產株累者眾民
 怨益滋積憤既深有觸斯發光緒二十六年乃有義和拳之亂殺教士燬教
 堂基督教受重大之打擊然不久即行恢復日益擴大荒廢僻壤幾無不有
 教堂之盛時焉本國暨教尚未漸被之地基督教已先我而入文化侵略莫
 知所屆有識之士怒焉憂之至其派別之多殆難更僕數祇就美國教會而
 言已有七十餘派之多愈分愈歧名稱繁夥其在中國者宣統元年出使義
 國大臣錢鈞二疏言之甚詳載外交考傳歲癸丑各教會聯合設立中華續
 行委辦會於上海為交通國內外教會之總樞紐總計全國天主教徒約四
 十萬人基督教徒約二百七十二萬人教會除宗教宣傳外對於社會事業
 如教育醫藥等亦極力進行所辦學校中小學凡一萬三千餘所大學專
 門學校二十餘所醫院三百二十餘所藥房二百四十餘家常年傳道事業
 之投資為數甚鉅尤以美國為最平均年約四百萬金元竟超出於在華商
 業投資矣按通譯後始於光緒通立教所繼而擴張
 回教 教主穆罕默德生於南朝陳宣帝太建三年世居阿拉伯之麥加城

父母歿育於祖祖歿育於叔二十五歲前學為賈旋娶哈底徹氏四十一歲
 受天經遂受天命即聖位彼教稱為聖元年次年遣賽爾弟幹歌士等四人
 入中國所傳天經凡三十部都六千六百六十六章名甫爾加尼亦曰可蘭
 此即穆氏挾以布教者也五十四歲遷都默底納彼教稱為遷都元年置四
 配暨輔士遷士侍從等六十四歲三月十二日卒唐太宗貞觀八年以額補白克尼
 聖位唐書西域傳永徽二年大食王繼密莫末賦遣使朝貢自言王大食
 氏有國三十四年傳二世說者謂繼密莫末賦即額補白克尼之轉音杜佑
 通典亦附紀回教又謂之摩尼教歷宋及元寔盛故元史回人之有傳者甚
 夥明史亦敘回回歷法有官分年月分年之別其時回教勢力已跨立於歐
 亞非三洲之間即天山南路東西六千餘里南北千餘里皆為所囊括緣其
 酋本元太祖次子哈薩特裔世封於此迨明季瑪墨特自西域來各回城靡
 然從之蓋回教初分十葉索尼兩派而東土之十葉又分兩派厄魯特之盛
 遂元裔實回裔延至 國朝雖疊加勦撫而回疆從此多事矣甘肅西甯番
 地撒拉爾司人所奉回經皆默誦乾隆初有循化廳回人自西域歸環誦回
 經自謂得真傳創立新教遂與老教為仇其黨蘇四十三殺老教徒百餘人
 四十六年大學士阿桂平蘭州府之華林山而新教一熄嗣有伏羌縣阿渾
 田五馬四圭張文慶等仍興新教為馬明心報復老教徒又被焚掠阿桂平
 通渭縣之石釜堡而新教再熾然東土回變不止為爭教而起河西甘涼回
 米刺印丁國棟土倫太於順治五六年開圍鞏昌應大同則孟喬芳張勇平
 之大小和卓木布那敦霍集占於乾隆二十二年開據庫車奔喀什噶爾
 葉爾羌則兆惠富德明瑞阿里衮平之烏什阿刺布圖於乾隆二十九年據
 烏什則明瑞鄂寶平之和卓木之孫張格爾於道光六年據喀什噶爾英吉
 沙爾和闐葉爾羌攻烏什阿克蘇則長齡楊遇春楊芳平之張格爾之兄玉
 素普又於道光十年為浩罕挾以圍喀什噶爾亦平於長齡楊遇春凡此皆
 回回教人之在甘肅新疆者其在雲南則咸豐五六年以後杜文秀起蒙化
 馬和馬貴起激江馬金保藍平貴起姚州馬世德起臨安通海開攻大理裔

雲南至同治元年赫明堂任立又入陝西渭南圍同州攻西安甘肅之馬化龍據金積堡馬桂源起西甯馬彥龍占魁攻狄道馬文祿占肅州董福祥屯花馬池和卓木之裔耶古柏亦乘之入喀什噶爾三省皆騷擾至同治十二年岑毓英始平雲南光緒三年左宗棠始次第平甘肅新疆事詳 欽定各方略考乾隆四十九年 諭甘省回民久隸耕織食毛踐土便與齊民無異該省地方饒瘠閒有不登即行蠲免賑濟較他省爲尤多回民等在編氓之中百數十年仰沐膏澤家給人足伊等具有天良豈不當稍知感激且地方官並無苛虐酷派激變事端乃逆回等敢於光天化日之下肆其逆謀實爲國法不容神人共憤是知 國朝之待回民若保赤子而回民之叛變爲不可恕四十七年因廣西巡撫朱椿查辦海富潤袁二一案 諭云舊教回民各省多有而在陝省及北直居住者尤多其平日所誦經典亦係相沿舊本並非實有謗毀顯爲悖逆之語且就朱椿見在簽出書內字句大約鄙俚者多不得竟指爲狂悖若必鯁鯁繩以國法將不勝其擾於是海貴省釋天方至聖實錄年譜及版片等項給還回民袁國祚遂將穆罕默德天經三十部譯呈 高宗固以僧道喇嘛視之未嘗斥爲邪教也至其教之支分派別除舊教新教外喇嘛場黑褐衫舍勒爾三門皆新教中之支派又有大會花寺兩派大會教中人吸煙飲酒彼族以爲穢污教門恆仇視之故同治初元馬桂源將大會中人壓死石磊下者百餘人又有撒喇十二工卽新疆之纏頭回也纏民雖數十家必建寺寺必有學其人篤信教祖牢不可破百餘年來於回部設官施教卒無法以啟牖之惟其民俗自爲風氣世代相傳改宗不易在中國並不傳教應試入仕與齊民同故不爲異教人所嫉視又於孔子獨致尊崇故與儒生不生惡感惟纏回則以拜孔子爲大恥要之彼教回經祇備回民奉誦與中國固有文化並無若何之影響其居處固不限甘新雲貴諸省而到處社會皆漠視之其教徒不與教外人結婚且尙薄葬戒食豕肉故國人信從者卒尠云

皇朝續文獻通考卷九十

選舉考七 舉官

臣謹案馬考云舉士舉官本合為一自唐以試士屬禮部試吏屬吏部而其事始分今舉士辟舉既立專目吏部銓選又復裁廢實亦無甚紀載因沿前例略纂之以著於篇

嘉慶三年奏准內閣中書准其註銷改補教職

四年欽奉 恩詔所有八旗漢軍及各省貢監生准其考取職銜遵 旨於五年鄉試之前考取其考試銓選等項均照舊例辦理

六年奏准國子監學正學錄准其註銷改補教職

八年奏准分部主事內閣中書准其註銷仍歸知縣原班銓選

九年奏准新進士即用知縣有情願改就教職者准其呈明以教職改補

十年奏准滿洲新進士奉 旨以知縣即用人員呈請改補京職者以筆帖式改補

十一年奏准新進士凡奉 旨以部屬用者籤分各部學習未屆三年滿期及

奉 旨以內閣中書用者行走不及一年未經出考咨部如有情願註銷者准

其於本科尚未截取之前豫行具呈吏部准其歸於知縣原班銓選其業經期

滿奏留保留之員無論本科曾否截取概不准其註銷翰詹等官大考改補主

事中書及庶吉士散館以主事中書用者均係 特旨改補之員不准其請改

知縣

十二年奏准新進士 殿試後未經 朝考適遇事故回籍續經補行

又奏准 召試 欽賜舉人於會試後准其呈明揀選就職歸於各本年科分

之後註冊一體截取選用

又 諭各省舉人自嘉慶六年辛酉科大挑後至明歲會試又閱六年著於戊

辰科會試後大挑照上屆之例將近年辛酉甲子及本年丁卯三科舉人扣除

其庚申以上各科舉人俱准一體與挑該部屆期查照向例奏辦

十九年奏定拔貢來京 朝考未經錄取及恩貢副榜歲貢優貢生遇鄉試之

年有在京應試者准其取具同鄉京官印結具呈就職就教分別註冊選用如非鄉試之年不准就職就教

又定會試後各省舉人挑選引 見分別以知縣教職錄用吏部於每科會試

前查明上次大挑之後如已閱六年將應否再行挑選具奏請 旨如奉 旨

挑選將近三科之人扣除由吏部奏請 欽派王大臣揀選俟 派出後即日

秉公挑取其應挑之人各按省分每排十名挑選一等二名二等三名

二十二年 諭大挑舉人原以疏通寒峻近來各省分發人員漸覺壅滯昨經

大學士會同吏部酌議章程量加調劑朕思南河東河北河三處河工亦需員

差委若於此項大挑一等人員內分發試用俾之學習河務以河工之繁簡定

人數之多寡既可策勵人材亦可疏通額缺其應如何酌定員數並試用甄別

限期及補用缺分章程著吏部詳議具奏遵 旨議定發往河工人員於挑定

一等人員內復加揀選年力強壯堪膺驅策者揀選六十員籤掣發往試用

道光二年 諭御史趙柄奏請慎嚴改教以重學校一摺所奏是國家教化之

興由於勸學各省教職得一品端學裕之員盡心化導於士習民風均有裨益

近日各省甄別州縣凡才具平庸不諳吏治年力就衰各員率請改教此等衰

庸之員即令其司鐸安望其實心化導克稱厥職乎如該御史所奏或因誤公

虧項避重就輕或因替人騰缺設法量移特借出身名目藉以見好市恩騰缺

量移事無確據亦不可空言妄論而避重就輕市恩見好之處在所不免溯查

乾隆五十一年欽奉 聖諭各省知縣已經得缺到任數月後不勝民牧者即

以原品休致概不准復行改教等因欽此煌煌 聖訓永當遵守勿替嗣後各

直省督撫於才不勝任之知縣如未經得缺將該員品學尚堪秉鐸之處切實

聲明仍酌量奏請改教其實缺人員履任在半年外者才不勝任即概予休致

不得因其正途出身率請改教該督撫務各秉公甄別尤不得因有此旨將開

冗各員一味姑容轉致貽誤地方也

四年定各省保薦優行生員准作貢生願就教職者亦照歲貢之例由學臣會

同巡撫傳齊驗看咨部附於本年歲貢之末選用

又定恩拔副貢生在監肄業期滿以教職用者歸於肄業班內照期滿日期先後以教諭選用優貢歲貢肄業期滿亦照日期先後均以復設訓導選用如係本班頂選之員仍歸原班銓選

六年奏定各部額外主事候選國子監學正學錄中式進士奉 旨分發各省以知縣即用及歸班銓選人員如有呈請註銷仍歸原班者各部額外主事准其仍歸主事原班上學習行走候選國子監學正學錄仍歸學正學錄考取原班按考取名次先後銓選其候補內閣中書仍歸中書原班俟有缺出考取者歸於進士班內以次補用若遇舉人到班亦准其按照考取名次仍歸舉人原班補用捐納者仍按其捐納名次補用至候補中書中式進士改授庶吉士散館奉 旨歸班選用人員呈請仍歸中書原班銓選者亦即照此辦理

十四年奏准進士候補國子監學正學錄准其註銷仍歸進士本班銓選以本科截取之期為斷其在截取以後具呈者概不准其註銷

十七年定進士引 見以部屬用內閣中書用及以國子監學正學錄用者部屬無論期滿奏留中書無論保留咨部及投供候選之學正學錄情願註銷者具呈吏部奏明歸於知縣原班銓選如本科業經截取不准註銷

咸豐九年定七品小京官中式進士改庶吉士散館奉 旨歸原班銓選如有呈請仍歸七品小京官原班補用者准其仍回原衙門行走

十年定請歸七品小京官原班仍回原衙門行走應以後次到衙門之日起俸不准接算前俸

同治九年定直省教職中式進士以知縣歸班銓選仍應回任人員如呈請開缺聽候截取以及教職中式貢士未經 殿試呈請先開底缺均停其論俸推升

又 諭嗣後由部員中書中式進士以知縣用呈請改歸原班仍准行惟改歸後不准截取外用捐輸分發若有京察一等記名者由吏部專摺具奏並知會軍機處於名單內黏籤註明至由部員中式以中書用由中書中式以部員用俱不准改歸原班以杜取巧

又議定南河總督員缺業經裁汰其大挑知縣應挑河工三十員一律停止發往

又定大挑一等各省舉人引 見奉 旨以知縣錄用人員內除呈請改歸二等教職外應覈計錄用人數按各省已到省未經補缺大挑知縣多寡均勻配籤統掣分別赴省截留並無餘賸之籤

光緒六年奏定補科中式舉人以補行年分為斷查補行時係鄉試正科年分即歸正科較名次先後截取

十二年定各部主事學習期滿部務未能諳悉再行學習三年作為期滿者俟奏留後按後次期滿之日計算

三十二年御史劉汝驥奏嚴限制保舉略稱自強之基莫要於整頓吏治而為吏治之蠹賊者則莫如保舉一途夫有一官必有一事有一事必有責成此通

義也而今則官自官事自事就京師言之財政處有差練兵處有差專心致志以營之何也為謀保地步也就各省言之釐金局清丈局銀元局籌款局齊捐

局衛生局疊牀架屋何也為開保地步也壞人心術墮人志節皆此保舉二字階之厲也然以是繩人猶不足關其口而奪之氣也請言其罔上營私者一日

河工保 國家歲糜數十萬內帑以慎重河防乃封疆大吏輒以此為調劑屬員之舉幸而無事倖承保州縣通同保府道連篇累牘超乘者以數十計然桑

乾之潰決黃河之昏墊且歲相告也一日軍功保中與將相以書生而致微侯以走卒而膺專閫宜也乃至提鎮不能謀一戰邊吏不能守一城一廠工之鼓

譟一饑民之嗷聚且浮夸其詞曰大張捷伐若夫耳未聞鼙鼓足未履沙場而謬以為殺敵致果身經百戰者又比比也一日勸捐保賑捐係 國家萬不得

已之事不圖毀虛銜者十之七據實官者且十之三也順直賑捐一案保至一千三百餘人山東工賑捐保至五百餘人此外如奉天安徽廣西四川等省亦

不下千人然以此繩人猶不足誅其心而盪其腦也 更言其顯抗 朝旨者已革瓊州總兵申道發缺額剋餉非奉 旨發往新疆者乎何至今逗遛不前

已革浙防統領吳家正庇匪殃民非奉 旨永不敘用者乎何忽然投營自效

凡類此者不勝縷指臣不知置 朝旨於何地也未已也 更言其傷 國體者張振勳以倚頓鉅貲而保卿寺張煜南以陶朱心計而保京堂 國家破格用人將以聯絡商情猶可說也吳懋鼎匯豐之康巴度也西人奴隸之與威獲無殊何以有四品京堂之保周榮曜粵關之書吏虎而冠者也何以有出使大臣之保臣不知置 國體於何地也擬請 嚴飭各省將軍督撫力除積弊不得徇情濫保以杜倖進至永不敘用人員尤當懷遠 諭旨不得率請開復如有似前荒謬者以遠制論並請 飭下政務處吏部嚴定新章詳議以聞奉 上諭御史劉汝驥奏仕途蕪雜保舉過濫請除積弊一摺保舉一途原為朝廷鼓舞人才之具惟必須真知灼見確係勞績卓著名實相符方可登諸薦牘凡有保人之責者應如何詳慎遴選愛惜名器若如該御史所奏近來濫保各節種種情弊實堪痛恨嗣後各省將軍督撫等保薦人才務當力除積弊不得徇私濫保以杜倖進至應如何嚴定限制之處著政務處會同吏戶兵等部妥議具奏

又吏部以州縣正途日少奏准將進士截取班優加選用

三十三年憲政編查館奏稱嗣後京外各衙門人員除由考試錄用及照章分發到部到省者應各按向章辦理毋庸另訂章程外其奏調人員如原係實缺候補者准令以原官或改以對品及相當官缺分別奏補原係學習試用者應令於奏調後接算前資扣足年限奏留補用其未經分發僅係候選者應自奏調到差之日起概令當差一年後分別以原官或改以對品及相當官缺留部留省學習試用仍俟照章期滿後奏留補用其未經考試原無官階之畢業學生如確係在專門及高等各學堂以上畢業得有文憑者應由奏調衙門將各該生文憑咨送學部勘驗合格後再將該員奏調到差日期咨行吏部存案自到差之日起扣足二年在京各衙門准其分別保以主事或以七品小京官學習行走在外各衙門准其保以知縣試用仍俟學習期滿甄別後奏留補用此外僅有虛銜各員及文憑不合格曾入高等以上學堂未經畢業之學生准由各衙門隨時考選以八九品官委用除照章升轉外不得越級奏保以示限制

三十四年大學堂總監督劉廷琛奏請留意人才以定根本至計摺竊維 皇上入承大統新政伊始為羣情瞻望萬國觀聽之所關論者紛紛議法 謂要在用人蓋法待人而行得其人則收往咸宜失其人則庶事叢脞方今時勢孔棘萬端待理天下之事當與天下之賢者共之故 朝廷惟以留意人才為第一義夫天下大矣用人衆矣 朝廷安得一而察之其道在 朝廷本至公至明之心以擇樞臣樞臣本至公至明之心以求真才選賢士則若網在綱得執簡馭繁之道矣然學不足以辨賢否識不足以察情偽或以喜怒為賞罰則不公或以愛憎為是非則不明不公不明禍及天下大可惜也 愚謂今日所最急者曰激揚已用之人才儲備待用之人才培養未用之人才而歸本於監國攝政王講求學問以擴充智識謹披瀝陳之人才之消長恆視 朝廷賞罰為轉移不待賞而為善不待罰而不為惡者皆豪傑之士其餘大率中才耳賞罰嚴明則有勉於向善之思賞罰混淆則有同流合汙之勢孔子曰舉直錯諸枉能使枉者直若反其道而用之則能使直者枉至於直者亦枉國事尚可言乎近歲賄賂公行官方淆亂內而各部堂官外而督撫司道 朝廷所與共治天下者也堂官非其人則一部之人才壞督撫非其人則一省之人才壞竊計 朝廷簡用雖多忠實之輩而貪庸狡滑庸茸鄙瑣據要津而任封圻者蓋不少矣舉嚴疆要領半付此輩政府貪攫權勢位置私人遂以敗壞風氣敝國病民尚何望其宣德意而體時艱耶應請 皇上廣加甄訪嚴申賞罰其忠正廉能者優擢之循分盡職者策勵之素號貪劣聲名狼藉者立予罷斥一二以樹風聲或經言官劾劾實力查辦不少寬假庶使聞風感動知所勸懲蓋當積弊已深非激濁揚清不足以振垂墜之綱而作方新之氣孔子之繫易曰毒天下孟子之論政曰驅而之善天下惶然於雷霆之威方可以被雨露之澤此已用之人才不可不激揚者也今天下人才疲耗極矣 國家臨朝興歎每遇除授要缺羣情引領想望輒難得勝任愉快之人至於才德重望緩急可倚環顧宇內尤覺寥寥詩云人之云亡邦國殄瘁此亦極可憂矣豈天地之氣果有時而衰竭哉一代之才恆足供一代之用蓋 朝廷用舍失當而樞府各汲引私

人不爲 國家儲備於平日也每歎今日用人不惟不能得人才實足以敗壞人才政以賄成羣相鑽刺醜正惡直專取柔媚熟者用之風骨靡然習爲巧詐設有緩急何以捍患難而濟艱危三年蓄艾誠不可不豫爲之所矣臣愚謂軍機大臣之才當於尙侍督撫中儲備之尙侍督撫之才當於丞參司道中儲備之丞參司道之才當於部院各員司及府州縣中儲備之今試觀外省藩司能勝任督撫者幾人哉一旦濫竽充數以一省之土地人民委託於昏庸之手民生國計念之寒心應請 朝廷與軍機大臣博加諮察詢事考言無分滿漢廓然大公若者勝艱鉅若者資幹濟若者勝煩劇若者備驅策一一研求存注庶內外人才日往來於心目之閒遇有簡用熟商審處本如不得已之心爲之地擇人之計務使賢者在位能者在職雖未必盡得其當而拔十得五亦足以濟一時之用而轉移風氣於無形及今不圖今日求督撫之才不可得異日將求道府之才亦不可得矣雖有廣土衆民誰與共之詩云迨天之未陰雨綢繆靡戶此待用之人才不可不儲備者也大凡傑異之才恆閒世一出應事之才不擇地而生昔人以動曰天下無才爲不祥之言十室之邑必有忠信但視培養之道何如耳內而部院外而各省注籍仕版數盈千萬雖品流猥雜而聰秀端實之士固不乏人前大學士曾國藩云以若干人才近在眼前不能加意培植甚可惜也蓋人才以磨練而出以造就而成以濡染習氣而壞端賴 朝廷珍惜名器大臣謝絕請託以公道用人以虛心察吏然後豪傑始思振奮中才亦爭自濯磨今各省督撫深居簡出罕與僚屬相接苟直奔競習爲固常京官素稱安靜近亦甚不如前矣新更官制倖進已多侈談運動之機因惜廉恥之節以致樸誠之士消磨歲月末由表見浮薄之士酣嬉徵逐而日入傾邪長官無深鑑人倫之誠庶僚無研求學術之時人才坐壞殊堪憂歎昔曾國藩應詔陳言一疏論用人有轉移之道有培養之方有考察之法其言最爲剴切百世可行謹鈔呈 御覽伏乞 俯賜采擇並請 明詔飭下各部院堂官以及各省督撫痛除積習按照會國藩所陳各節列爲課程長官以此辨屬吏之優劣 朝廷卽以此考大吏之淺深使天下咸知 聖意所在力矯鑽營頹廢之

風斯漸有發榮滋長之象日積月漸功效自彰人才庶廢續不窮矣此未用之人才不可不培養者也夫人才者 國家之元氣大都外上陳二端相需爲用諸臣分寄其責任 朝廷實筭其機械臣尤伏願 監國攝政王廣稽古訓精研學識使鑒別不爽其衡始克盡鼓舞裁成之妙漢臣董仲舒曰正一心以正朝廷正朝廷以正百官正百官以正萬民其理蓋萬世不能易也應請 中外大臣保薦賢儒與之講求學問探古今之治理窮中 新智識日進緝熙光明則朗鏡高懸萬態之妍媸立辨而於留意人才乃毫釐不失矣蓋臣所陳激揚者治標之道也儲備培養者治本之道也請 監國攝政王講學則治本中之治本也伏冀 垂念百年大計省覽施行實 宗 社無疆之福臣職司學務竊懷天下之憂不敢不殫竭愚忠惟識見疏淺未足以裨 聖治之萬一不勝悚惕戰兢之至

宣統二年內閣侍讀學士延昌奏舉行法官考試請 飭改定規則一各地方審判檢察廳長宜令一律與考一與考之舉貢文職刑幕人員宜分別加以限制下所司議奏尋憲政編查館奏所陳各節實早在臣等計慮之中應請毋庸置議

又大學堂總監督劉廷琛論用人秉公疏略稱臣於本年疏陳時弊稱止亂之源必本大公以用人非空言補救也蓋用人爲行政之本方今百度更張得其人或可以救時不得人祇足以誤國故用人之道尤不可不亟講也引申其義約有四端曰辨邪正曰審材器曰杜倖競曰嚴賞罰四者不可廢一臣謹爲我 皇上陳之今日所患者咸謂新舊意見之爭臣所慮者尤在風俗人心之敝管子曰禮義廉恥國之四維四維不張國乃滅亡今世棄禮義捐廉恥日甚非 朝廷獎用廉正之士以救之誠不知遷流何極矣蓋法無古今君子行之則利小人之則害理無中外心術正者可恃心術邪者難憑故論者謂東漢亡於黨禍諸葛亮獨以親小人遠賢臣痛恨桓靈論者謂北宋亡於新法朱子獨以疏韓富用呂蔡歸罪安石是知變法在用人用人莫先於辨邪正昔文宗御極前大學士倭仁進嚴辨君子小人一疏 文宗手詔褒嘉遂操以爲

做亂之本其言君子小人之分藏於心術者難知發於事爲者易見大抵君子拙訥小人巧佞君子廉退小人躁進君子愛惜人才小人排擠異己君子圖遠大以國家元氣爲先小人計目前以聚斂刻薄爲務剛正不撓無所阿嚮者君子也依違兩可伺候人主喜怒以相趨避者小人也諛諂匡拂爲朝廷補闕拾遺者君子也遷就逢迎導人主遂非長傲者小人也復推而論之凡避遠權勢者君子趨附親貴者小人兢兢思濟生民者君子孜孜以圖富貴者小人以扶持綱常爲慮而不隨時論爲輕重者君子以揣摩風氣爲心而不計倫紀之存亡者小人要之君子喻義小人喻利天下無愛錢之君子天下無不貪利之小人 皇上卽此觀之復察其言論考其行爲則羣臣邪正自難逃 聖明洞鑒之中審爲君子則用之不疑審爲小人則斥之必速不惟人才漸出而風俗亦可轉移矣或謂濟時以才猶斷斷辨其心術未免迂遠不切不知天下未有心術不端而辦事能有實際者前湖北巡撫胡林翼論吏治疏曰今日上下相蒙瞶不知恥推求其故則由是非不明是非所以不明則誤於使貪使詐之說不知己則爲貪詐所使而曰吾能使貪使詐豈不謬哉其言切中時弊足爲用小人者之戒此邪正之宜辨者一也人才辨之既難而用之尤難蓋人之才分各殊大受小知不容勉强責難駘以千里必貽僨蹶之憂誤浮薄爲賢能遂召危亡之禍故用人者有因材器使之義焉昔黃霸名成治郡而爲相不過庸才段熲功在平羌而立朝不免敗節歷觀史冊往事可徵故有爲守令則優爲監司則絀爲監司尙循分盡職爲督撫則張皇失措者矣亦有爲司官則優爲堂官則絀爲堂官尙按部就班爲樞臣則大體叢脞者矣夫天下用人至廣勢難徧察而周知亦擇其重要者而已宋范仲淹曰深於正道有憂天下之心者可備輔相精於經術通聖人之指者可備顧問正色敢言有端士之操者可備諫諍能言方略有烈士之風者可備將相今朝廷重職內則樞部外則督撫伏求 皇上留神詳察必公忠體國深知政治大體者然後可以參密勿必學識優長通知時事者然後可以綜部務必才兼文武廉正愛民者然後可以任封疆必曉暢戎機夙富經驗者然後可以典兵事精神專注此數十人則約

而易精復與廷臣隨時討論參稽互證灼知其才之所宜乃量能授職而各責之以實則濫等瘼職者或寡矣蓋用人未能得當其禍每至於病國殃民卽如已革湖南巡撫岑春煇本以按察使超擢在湘數年尙稱安靜一臨事變立致顛隳使早知非方面之才 朝廷不予以疆符何致貽兩敗之悔今以楊文鼎繼之其廉靜不及岑春煇而貪詐過於莊賡良固知 朝廷亦非稱意之選不得已而畀之識者憂湘亂之未已也故人才必熟察於平時而舉措始不虞其失當此材器之宜審者一也名器爲天下之公物故聖王操爵賞之柄一階一秩不輕以假人非吝之也誠恐名器一輕則人懷倖心而無以厲天下之豪傑也自前軍機大臣袁世凱用事假破格之說以行其私有以編修候補道而得侍郎有以候補道假副都統銜而爲巡撫其自道府不數年而躋節鉞者幾半天下至以末秩驟升監司丞參者殆難枚舉彼固謂獎拔人才由今觀之其所拔趙秉鈞唐紹怡楊士琦等類皆貪庸之選何嘗有幹濟時艱者不過盜 朝廷名器以自張權勢耳由是倖門日開鑽營日盛人人有巽然不靖之意而風氣乃大壞矣故袁世凱攬權勢之罪顯壞風氣之毒深後之視今猶今之視昔安可復徇廷臣之意而沿其故習耶大抵破格用人之說所以待絕異之才或名實素著物望所歸或建立功勳賞加不次若平居無事必歷試而後用積勞而始遷宋蘇軾曰雖有卓異之器必有已成之功一則使其更變而知難事不輕作一則使其功高而望重人自無辭誠篤論也日本皇太子從事陸軍由少佐累遷始至少將不敢以儲貳之尊驟加諸夙將之上其他用人莫不皆然所謂爵人於朝與衆共之雖國主不以私其子其強盛豈偶然哉今仕途奔競監國攝政王亦深知其弊矣而用人猶有太驟者如吳祿貞游學歸國未久遽升副都統曹汝霖前年尙任郎中遽署外務部侍郎此等或薄有才能使之歷練歲時方可期其遠到乃一無功績遽予超遷已非培養人材之道若以速成之學工運動之方 朝廷遂拔之高位尤非所以示天下也夫欲貴者人之同情公卿將相跬步可圖亦孰不百計營求以希詭遇風俗安得而不衰人才安得而不壞乎此倖進之宜杜者一也天下何以治紀綱立而已紀綱何以立賞

罰明而已人不能皆賢亦不必皆不肖惟有功則賞有過則罰使賢者有所勸而益趨於善不肖者有所憚而不敢爲惡是以紀綱立而天下治昔齊威王賞卽墨大夫烹阿大夫而齊國強於天下漢宣帝勵精圖治其要在綜覈名實信賞必罰諸葛亮治蜀盡忠益時者雖仇必賞犯法怠慢者雖親必罰善無微而不賞惡無纖而不貶古來英君察相莫不兢兢於此今天下紀綱漸弛矣自皇上登極罷斥袁世凱陳璧人心爲之一振乃未幾而泄沓如故貪玩如故則賞太重而罰太輕也京堂爲卿貳之階先朝最爲矜重以左宗棠劉錦棠督辦軍務始賞卿銜以寵異之其餘不數親也上年度支部設監理財政官一舉而賞卿銜者二十餘人朝野莫不驚怪今年盧靜遠易通謙等賞二品銜外閒竊議皆不知有何功績其他爲臣子循分應爲之事而濫邀優獎者不可勝數此賞太重也若夫人心積玩非朝廷雷霆震發不足以悚惕其精神乃各督撫貪庸不職者既經言官參劾查辦得實朝廷每予優容概從寬典尤可異者廣東新軍滋事一案恭讀上諭兩廣總督袁樹勛於兵勇交關彈壓勦撫兩失其宜數年訓練剋期成鎮之軍一旦決裂敗壞其咎實有難辭聖訓煌煌罪案昭著即應治以措置乖方貽誤軍情之律吏部乃敢議擬革職留任處分以肆欺罔朝廷遽批允之且湖南飢民滋事莊廣良措置失當議革職矣而袁樹勛彈壓勦撫兩失其宜乃准留任已爲罪重罰輕况重以決裂敗壞之咎耶實天下所未解也至丁乃揚以袁樹勛奏參開缺未幾遽升府尹如該督所劾是則丁乃揚任運司已不稱職矣如該督所劾非則其辦理鹽務不善無疑又何以勝總督之任耶與袁樹勛夙有世誼特爲朝廷紀綱憚耳此罰太輕也賞太重則人以爵賞爲易得之物僥倖冒之而忘其非分罰太輕則人以法紀爲不足畏益營私飭法而無所不爲司馬光之言曰仁恩所被止於目前姦宄得志紀綱不立其禍蓋有不堪設想者伏願朝廷於臣工功罪權衡至當賞必有功罰必當罪庶人人惻然於爵賞之不可妄冀法紀之不可妄干是非既明紀綱自振天下皆爭自濯磨以奮於功名之路矣此賞罰之宜嚴者一也以上四端辨邪正所以澄其源審材器所以當其用杜倖競所以

防其濫嚴賞罰所以振其綱效有相資功不可闕伏念立憲政體行政官爲議員攻擊理當辭職朝廷至公至明議員自不敢妄相訾毀若行政官屢爲議員抨擊則朝廷威福不尊若議員與行政官朋比把持則政治網維愈亂故用人尤爲豫備立憲第一要義臣本愚陋去年仰蒙召見監國攝政王面諭汝言切直可隨時條奏感激涕思所以報念行政莫大於用人前疏義有未盡用敢條列四端媿無以裨補萬一

三年內閣奏各省補署官缺酌定限制略稱內選外補之敝在於班次資格不足以得人故臣等前次奏請停選即兼以變通外補破除班次資格爲宗旨開有仍留班次者亦令於本班酌補以期爲地擇人實事求是惟各省積習已深若非嚴加整頓則良法美意亦同具文查近來各省奏補咨補官缺核其出缺日期竟有在二三年前者懸缺不補漫無限制推其遲延之由無非爲調劑委署之計及至補缺之後又或不令到任紛紛調署部選之員則謂吏事非所素習外補之缺又謂拘於班次藉人地之不宜爲紛更之便計甚至積重不返沿成例章委署一年輒予瓜代一官傳舍致賢者有才而無所施不肖者攘利而惟恐後吏治窳敗職此之由見在選班既停統歸外補節目疏闊簡而易行無分缺分繁簡並准擇人地相宜者酌量補用與從前情形迥不相同當此籌備憲政之時自應嚴定限制以勵官常擬請嗣後缺出均令遵照題缺定限遠省限九十日次遠省七十日近省五十日一律揀選升調補授如有違限照例分別議處一經補缺即行飭赴本任並將到任日期隨時咨報查核不准輕易調署除本任官暫時離任應令委員代理外其有實係因公不能到任及緣事撤任必須擇人地相宜者委令署理如不得力即時撤委果能留心地方公事始終勤奮亦不必限定一年期滿遠行更調庶缺無久懸官得久任地方吏治不無少裨

又內閣奏擬保獎暫行章程八條 勞績領照未便漫無限制也 議敘之案應概令開單奏保也 咨送履歷時宜隨案咨送底官執照也 舊案扣驗捐照宜酌定期限也 新案舊案辦理宜歸畫一也 保案不必過分等次也

例保之案免其咨送立案銜名也 保舉班次宜酌定辦法以歸一律也

辟舉

臣謹案科目之外特詔舉賢古謂之辟舉 開國時 詔舉山林隱逸見於順治二年制書十三年科臣梁鋡疏略曰 皇上寤寐求才詔舉山林隱逸應聘之士自不乏人然采訪未確有負盛舉如江南舉呂陽授監司未幾以賊革職山東舉王運熙授科員未有建明以計典去呂陽等豈真抱匡濟之才不過爲梯榮之藉耳夫山林者何謂其遠於朝市也隱逸者何謂其異於趨競也舉逸大典必得其人乃當其位所飭細加采訪似當時已有名實不符之慮唯視所舉者之邪正即可知被徵者之賢奸存古制而破資格風聲所樹凡讀書之士咸力學敦行勉爲有用之儒其於士習人材深裨益敬仍前考績之如左

嘉慶四年 命薦舉賢員各大臣除所舉犯大奸惡者罪坐舉主外餘悉寬免毋顧慮以致湮沒

道光十二年 諭直省道府廳州縣人員平日立品居心官聲輿論該督撫見聞所及隨時察看自必知之最悉著各於所屬道府廳州縣中有實在潔已愛民誠心辦公衆口交稱者由該督撫出具切實考語秉公具摺保奏數員候朕簡用該督撫務當各矢公忠據實保舉勿許稍有瞻徇冒濫

咸豐二年 諭宗稷辰奏平寇需才請保舉備用一摺見在用兵省分委用需人如有才兼文武膽識出衆之士自應隨時採訪或令隨營或辦團練以收實效該御史所稱湖南之左宗棠浙江湖州之姚承與江蘇常州之周騰虎管晏廣西桂林之唐啟華才略各有所長著江蘇浙江湖南廣西各督撫悉心訪察如其人果有經濟之才即著出具切實考語送部引見此外銜茅伏處不乏英奇並著各省督撫廣爲諮訪擇其素懷忠義韜略過人者據實保奏一併給咨送部引見候朕錄用總期保舉得實毋尙虛聲

五年 命湖南在籍知縣劉蓉赴羅澤南軍營隨同辦理營務從湖北巡撫胡林翼之請也

臣謹案劉蓉因親老回籍胡林翼奏稱其熟悉營務足資襄辦故命之

七年 賞湖北隱逸布衣萬斛泉七品頂戴宋鼎鄒金粟八品頂戴從巡撫胡林翼請也林翼原奏竊惟鄂居天下之中水陸四達平時富商巨賈往來聚集競尚繁華閭閻耳濡目染相習成風變本加厲識者蓋隱憂焉迨經兵燹迭擾民氣凋殘遷播流離四民同因此固循環剝復之自然亦天心人事轉振之機會也 臣惟移風易俗教化爲先願官之於民條告或視爲具文刑章亦倖圖苟免不若其鄉之賢士大夫朝夕與處情易通而言易入者亦勢使然也特以側陋寒微不求聞達當道者又不接羅汲引任其淪沒巖阿無怪乎滔滔皆是提躬無人而浮僞之士且以爲積學立品如某某者卒亦無所表見甚至窮餓終老人亦何樂爲君子而恥不爲君子哉此世風之所之日下而人才之所宜急舉也鄂之興國州爲江西入楚門戶逆匪頻年禍負蹂躪特甚處士萬斛泉結茅山中讀書講道賊至時正襟端坐絃誦不輟賊亦不敢逼自相引去平日以朱子小學暨近思錄爲宗尤精研大學衍義並性理諸書家貧性孝取與不苟前學臣龍啟瑞杜翰將拔爲秀才途不應試延主崇正書院講席深裨士林其弟子宋鼎鄒金粟均布衣不求仕進安貧樂道砥礪廉隅爲鄉里所矜式 臣徵之皆不肯出復加採訪輿論翕然竊以造物生才原關氣數 國家選士不限雲泥當盡力挽頹風得才士百不若得醜士一可否仰乞 天恩准將興國州處士萬斛泉給予國子監學正銜宋鼎鄒金粟給予翰林院待詔銜庶幾觀感奮興頑廉懦立共率由於仁義道德之域實於人心風俗大有裨益

臣謹案萬斛泉於光緒九年復由湖廣總督涂宗瀛奏 賞國子監博士銜二十八年又從張之洞請 賞五品銜其時年已九十三矣

九年 命浙江在籍鹽運使金安清幫籌本省軍餉仍兼皖南捐餉事宜

十年 命兵部郎中左宗棠以四品京堂候補襄辦署兩江總督曾國藩軍務 臣謹案五年御史宗稷辰奏保左宗棠姚承與周騰虎管晏唐啟華奉諭飭各督撫具考語送部引見六年湖廣總督官文奏保左宗棠有匡時平寇之才時已在湖南巡撫賒乘章幕中至是乃有京堂襄辦之命

十一年 諭見在各省軍務未竣亟應簡拔人才講求吏治以期康保小民俾無失所各該督撫於所屬各員平日立品居官知之有素著擇其廉潔自愛任事實心及素著循聲民情愛戴堪勝道府者臚列政績出具切實考語酌保數員候旨簡用其道府及州縣各官如有出色之員著一併核實保奏倘所保之人查有貪汙劣迹或名實不符朕惟該督撫是問其各力除積習秉公保薦毋得瞻徇情面任令屬員夤緣倖進以副朕知人安民至意

同治元年 諭近因封疆藩臬在在需人疊諭曾國藩等臚舉人才以備任使見在皖省司道如江忠濟馬新貽蔣凝學葉兆蘭均閱歷戎行其材器如何該大臣知之有素即著詳細奏聞此外有職分較卑而器識甚遠將來堪以登用者並著一併具奏從前楚省人才極盛諒該省仍不乏人左宗棠李續宜均知以得人為急務該大臣生同里閉著即函商加意延訪隨時奏聞用備他日任使

二年 諭河南學政景其澐奏請將品學兼優之副貢生蘇源生等量予錄用當經交部議奏茲據吏部奏稱擬請照優貢新章附入下科優貢之末由該部驗到考試分別等第請旨錄用嗣後各省學政於生員中果有品學兼優之士均歸入優貢一途不得於優貢外別開保舉之門等語所奏自係為慎重選舉起見惟此次景其澐所保各該生等既經該學政詳加查覈自應名實相符所有河南副貢生蘇源生歲貢生李澐曹肅孫附生許靜于錦堂均著以本省訓導用嗣後各省學政於該省生員中如有經明行修之士真知灼見許其酌保數人以為鄉里矜式不准視為常例濫行保奏以杜倖進而重選舉儻有夤緣干進舉非其人必將該學政議處以為濫保者戒

三年 賞在籍刑部主事鄭獻甫五品卿銜從廣西巡撫張凱奏請也
光緒七年兩廣總督張樹聲廣東巡撫裕寬奏略曰前著山西襄陵縣知縣朱次琦南海縣進士講明正學身體力行任襄陵時卓卓多異政其督修平河水利得水田三萬餘畝縣民至今賴之臣樹聲前在山西即聞彼都人稱祝勿衰及來粵經年益益其守先待後門牆高峻足不入城市比閩族黨德善良所

居九江一鄉無拖欠錢糧者尤通省所罕也國子監學錄銜陳澧番出縣舉人持躬謹嚴識量宏遠通經學道粹然儒者所著聲律通考漢書地理志水道圖說原任大學士曾國藩服其精博其餘著述尚多亦皆能發明義理篤實純正士人出其門下者率知束身修行成就最眾此兩人者皆以經世之才治經生之業今皆年逾七旬祥麟鳳潛德勿曜等待罪疆圻而使姓名不達於天聽亦尸素之咎也伏維周官太宰以九兩繫邦國三曰師四曰儒而於司徒本俗復聯以師儒治本所關蓋非淺鮮况粵中習尚流失如朱次琦陳澧兩人者年碩德實副周官師儒之選松柏後凋於歲寒雞鳴不已於風雨尤宜表而出之風厲一世奉 諭朱次琦陳澧均著加恩賞給五品卿銜以為敦品績學者勸

十年 諭左宗棠奏遵旨保薦人才一摺都察院右副都御史曾紀澤浙江布政使德馨江甯布政使梁燾煌甘肅布政使魏光燾署直隸津海關道盛宣懷降調山西布政使方大湜均著交軍機處存記四川候補道劉麒祥著吏部帶領引見

十一年 諭黃體芳奏查明績學之士懇恩獎勵等語江蘇舉人汪士鐸等篤志潛修績學不倦允宜量予獎勵以資觀感舉人汪士鐸著賞給國子監助教銜監生高延第著賞給翰林院待詔銜

臣謹案黃體芳原奏略曰查有江甯縣舉人汪士鐸貞固絕俗博通冠時所著南北史補志水經圖說江甯府志尤稱精治該舉人為前湖北撫臣胡林翼典試江南所得士重其學行敬禮殊優前大學士兩江督臣曾國藩親造其廬固請乃見江甯人士稱其清介可風山陽縣監生高延第操行純懇學問優長前粵寇踞省城時隨其父士魁在籍舉辦團練歷著勤勞平日於地方利弊尤能悉心籌畫事竣即退官吏造訪罕觀其面獎誘後進必以道義相切磨所著老子正義淮安府志盱眙縣志亦頗淹該洵所謂幼學砥行不求聞達與古之隱逸君子同一懷抱與

十三年 賞前直隸棗強縣知縣方宗誠五品卿銜從安徽學政貴恆之請也

二十一年安徽學政李端遇奏保在籍山西即用知縣汪宗沂學行 特賞五品卿銜

又 賞前安徽合肥縣知縣孫葆田五品卿銜從山東巡撫李秉衡之請也

二十二年 諭爲政之要首在得人前諭中外臣工保薦人才業經次第擢用當茲時事孔艱尤應選拔真才藉資幹濟著各部院堂官各省將軍督撫於平日真知灼見器識宏通才猷卓越究心時務體用兼備者臚列事實專摺保奏其有奇才異能精於天文地理算法格致製造諸學必試有明效不涉空談各舉專長俾資節取該大臣當念以人事君之義一秉至公詳加察核倘或苟且塞責謬采虛聲甚至援引私人瞻徇情面濫保之咎例有專條定惟原保之人是問

二十三年 賞在籍舉人王棻內閣中書銜從浙江學政徐致祥之請也

三十三年 諭奉 懿旨振興國勢必先簡拔人才朝廷側席求賢全賴內外臣工實心訪薦著在京大學士各部院尚書侍郎都御史在外各省督撫率同藩學臬三司公同訪求詳慎甄擇不拘官階大小及有無官職如確知有才堪大用及各擅專長者即行切實薦舉以備任使每省多不得過五人至少一人所舉各員其心術品望材器學識暨生平經歷事實詳晰臚列限六箇月內具奏朝廷因材器使本無求全責備之心各該員所夙擅者固應標舉其長卽偶有所偏亦可指明其短一俟陸續報到後由吏部奏請簡派明達公正王大臣分期訂期察驗訊問出具考語聽候召見分別量材破格擢用迨試有成績原保各員定予嘉獎其一無所舉及舉不以實者量加處分濫舉固應示罰蔽賢亦須示懲庶幾賢才登進共濟時艱有厚望焉

又 命勞乃宣樊恭煦丁仁長穆荃孫宋書升湯壽潛郭立山來京豫備召見三十四年 諭前因需才孔亟諭令內外臣工切實保薦派那桐等將第一期報到人員查驗詢問出具考語嗣經一律召見引見完竣 給予單開之內閣中書周嵩堯翰林院編修袁嘉穀郭則澐林炳章銀行正監督張允言度支部右丞傅蘭泰左參議曾習經署右參議程利川郎中晏安瀾管象頤祿米倉監

督陸軍部主事惠崇學部參事官江翰陸軍部軍實司科長同協參領陳槐農工部部郎中胡祥鏞給事中朱顯廷四川成都府遺缺知府成昌候補三院卿內務府郎中誠璋署理直隸清河河道照臣候選道李熙山西汾州府知府紹彝河南保途知府胡鼎彝湖南即用知縣熊范興等升敘有差

又第二期保薦人才 予內閣中書張國淦學部七品小京官平遠大理院檢察廳應丞王世琪推事董康王儀通郵傳部左丞李煜瀛陝西陝安道沈潛甘肅新疆阿克蘇道楊增新前四川建昌道王季寅河南候補道于滄淵韓國鈞江蘇補用道汪瑞閩山西補用道張毅安徽試用知府謝宗誠候選知府胡薇元直隸候補知縣洪壽彭湖南鄞縣知縣李見荃候選縣丞朱學程日本畢業生蹇念益等升敘有差

又 諭此次保薦人才所有在京各衙門人員奉旨以丞參參議三四品京堂候補者均著在任候補

又以湛深經術 賞湖南湘潭舉人王閔運爲檢討

皇朝續文獻通考卷九十一

選舉考八 考課

臣謹案明自孫丕揚定製餼之例論者至以銓部為額部前代選舉之典固已剝壞無復存矣 國朝小廉大法凡京察大計甄別大考軍政至明且嚴其於虞廷三考周官六計唐四善二十七最之成規均已兼收其效使內外大臣奉以周旋一無失墜雖破盡資格培盡食墨可也續以考課著於篇

乾隆五十一年定大考改部翰詹及大小京官等分班補用例

五十二年 諭嗣後各省督撫於府道大計卓異自當公同具奏其密奏考語務宜各抒所見分別填註自行陳奏其大計之年亦著將藩臬考語各行咨部不得彼此關會致致扶同徇庇之弊

五十七年 諭據吳省兩奏准督臣梁肯堂咨送年滿保薦甄別鈔疏令學政衙門備案內有保薦教職二員李德與祇見過一次吳士升並未見過因業經具題咨商無及已咨會梁肯堂行司調送補驗等語各省教職係學政專管其保薦堪膺民社之員陞任知縣後如才具平常不能勝任原保之學政定例處分禁嚴各省保薦教職時自應與學臣會商擇其才具優長者會銜保題今梁肯堂所保教職二員並未先與學政酌商於會銜具題後始行鈔疏知照備案殊非慎重保薦之道竟係梁肯堂不以學政為事率臆徑行國家簡任學政豈不竟同虛設乎梁肯堂着嚴行申飭此後遇有甄別保薦教職等事均應照例會同學政先行的商秉公辦理聯銜具題毋庸仍前徑行專辦以符體制至各省督撫若於保薦甄別地方官員亦有似此並不彼此會商輒以一人專主即會銜具題者一經發覺朕必重治其罪

嘉慶二年 諭考驗軍政甚關緊要特派王大臣等理應每日前往據實考驗此內如實有另派別項差使併因進班不到者尚可寬恕因尋常奏事後或不到實屬非是如再有出派差使推故不到必從重治罪

五年 諭三載考績始自唐虞至今日則為京察用人之典至要而選士之方

必推氣節未有阿諛諂媚之徒而能有廉明之政者也近年以來六部堂官所拔職之司員大率以迎合已意者為曉事之人以執稿剖辨者為不曉事之輩以每日催調卑詞巧捷者為勤慎以在司坐辦口齒木訥者為迂拙遂至趨承卑鄙乞憐昏夜白晝驕人仕路類風幾不可問氣節消磨殆盡成何政體耶近日堂司各官雖比前稍知檢束奔競之風恐未能盡改總由積習相沿狂瀾難返朕思轉移風氣之方須立矜式觀摩之準見已屆京察之期各部俱應慎重選舉詢謀僉同果有猷守兼優者自應首薦餘則宵取資格較久謹愿樸實之員其少年澆薄才華發越者亦應令其經練下屆再行保列則相觀益善更足以勵後起之俊黜華崇實於政治不無小補再京察之時尚書侍郎應各備一冊密職實否公議之日再行同覽眾所獎許者拔之眾所屏棄者黜之以公心辦公事勿存絲毫私意問心無愧斯可對君嚴辦之時不准司官書吏家人在旁窺探亦不准豫為洩露遊譽市恩此旨著通行曉諭各錄一道懸於公署朝夕觀覽觸目警心以副朕循名責實務得真才之至意

又 諭向來四五品京堂及翰林院讀講學士並左右庶子等官每遇京察之年係吏部開列王大臣名單請旨簡派驗看分別等第由吏部帶領引見但此等人員職分較大俱係朕特加簡擢伊等與王大臣向無交涉事件又無統屬其賢否何由深知所定等第亦未必確當况於驗看後仍須帶領引見又何必多此驗看為耶嗣後四五品京堂及翰詹學士等官即照京堂三品之例一體帶領引見不必由王大臣驗看著為令

八年 諭向來軍政之年不准告病以杜武員規避之弊其奉旨查閱營伍年分事關考覈即與軍政無異著照舉行軍政之例不准告病乞休違者照例參辦

九年 諭京察為考績大典各部院衙門堂官就所屬中供職勤慎者保列一等經吏部帶領引見奉旨准其一等加一級所以獎勞示勸並非專為簡用外任而設也至其中有經朕察看材堪任使者特行圈出交該堂官再出具切實考語覆行引見以備簡擢外任各該堂官於所屬人員或素悉其才具優長或

深信其居官廉謹原可分別注考朕因材器使於簡用時繁簡先後自有權衡其家有老親或身為獨子而侍養情殷者即見任外官尙得援例終養此次京察記名後此項人員仍准其聲明留京供職外其餘概不得以不勝外任呈請內用試思該員在京供職既係出色之員經該堂官遴注上考豈有畀以外任轉藉口才不稱職之理且該堂官既已舉才薦能列名上達亦不得復以本衙門辦事需人奏請仍留本任見在京察引見屆期著先將此諭令各衙門知之十一年諭據貢楚克扎布奏會議西甯辦事大臣節制兼轄附近鎮道各員酌定章程一摺西甯鎮道與青海大臣近在同城向無統屬遇有蒙古番子交涉事件僅令貴德德營各員專司辦理未免呼應不靈不足以資彈壓嗣後著照該大臣等所請西甯文員自道府以下武員自鎮協以下俱歸該大臣兼轄節制遇有蒙古番子交涉事件即由該大臣主政其民人地方事務仍由該督主政該鎮道等於關涉青海蒙古番子案件自當申報青海大臣若祇係尋常地方案件即當專報總督免致牽混干預至軍政大計年分該鎮道等辦理蒙古番子案件功過由該大臣出具考語咨會該督再將該員等平日辦理地方事務是否認真由該督會同參酌舉劾以示勸懲

又諭大學士六部尙書議奏京察事宜一摺京官分隸司曹辦理部務公同酌數原不能指定一二事註爲某人勞績即刑部司員平反案件亦事所有不能因一事即登之薦贖三載考績爲激揚大典各部院堂官自應統計所屬司員平日人品之賢否才具之優絀秉持公正推賢選能自克名實相副爲朝廷收得人之效此內除該司員得有尋常過失例准保薦者不計外若三年內有處分較重礙於陞轉仍照例扣除以歸覈實若捐納人員初登仕版自應令其經歷事務藉資造就大學士等議令分別年資以示限制尙爲平允此等人員如實有才品出衆者原准一體保薦予以上進之階若年勞相等則捐納出身之人自不若科目正途於事理較爲明晰嗣後各部院堂官保舉捐納人員必取資格較深才具實在優長爲衆論翕服者方可與選餘俱不准濫保充數以杜倖進至軍機處司員自雍正年間定制以來均係以本衙門額缺承辦軍

機處事務其陞遷保舉悉由本衙門堂官註考相沿已久若以計典獨歸之軍機處更定官制事多格礙惟軍機司員內其辦事勤慎又能兼部務者自當列之上考其祇在軍機處行走而於部務未能諳習者本衙門堂官不得意存選就濫行保舉軍機大臣尤不得授意各部院堂官扶同薦舉以昭公愷

十二年諭京察大典所以甄別賢否明示激勸向來內外大員由吏部開列具奏朕數其勤能者均特旨賞給議敘其餘或照舊供職或量予罷斥其司官等經各該衙門甄別等第後內保薦一等者亦皆引見各予加級惟三四品以下京堂尙由王大臣驗看擬列一等者例無加級近年概行帶領引見除年老才具平庸者量予降黜外餘仍照舊供職並無甄敘之例因思三四品以下京堂官其才具優劣不同且三年內勤惰各異若有懲無勸既與內外大臣辦理兩歧並不得與各部院司官保列一等同邀加級未免偏枯所有此次京察引見三品以下京堂各官太常寺少卿色克精額差使勤奮祝祝嫻熟太常寺少卿錢楷內閣侍讀學士文孚在軍機處行走有年供職勤慎著加恩交部議敘其太常寺少卿陳鍾琛大理寺少卿楊長桂內閣侍讀學士通恩通政使司參議聞嘉言或人本平庸或年已衰邁著以原品休致餘俱著照舊供職嗣後京察三四品京堂引見均即照此辦理並將此旨載入吏部則例

又諭向來部院各衙門京察一等人員引見後經朕圈出者俱交該堂官再出具切實考語覆行引見以備備擢道府至內務府一等人員向來引見後有圈出者並不覆行引見辦理殊未盡一內務府人員記名後既可一體俯放道府自應交各堂官再詳覈該員平日居官辦事出具切實考語覆行帶領引見即實有親老情願侍養者亦當准其一體註明庶考績大典倍昭詳慎而於部院定例亦屬相符所有此次內務府引見京察人員照此辦理著爲令

十三年奏定軍政年分告病乞休官員照查閱營伍年分題准成案辦理凡副將以下營衛千總以上未經考驗軍政之先遵請告病乞休即勒令休致若經考驗以後仍准其告病乞休

十四年諭京察爲考績大典自應覈其辦事勤惰以分黜陟必須擇品行素

端才猷茂著者登之上考方足以昭激勸若祇取浮華奔競之徒嘉其趨走承順言語便捷工於迎合者即予保薦而不按其平日之品行慎加甄別則心術稍有不端才具又何足取且一等人員於保薦後可以帶領引見記名倘其其次等者例不得預若欲守素優之人不獲仰邀登進於人才已多屈抑倘一等中竟有倖列之人一經記名擢用即可由道府海推大員其居心辦事素不可問將來必致貪酷債事關繫尤重前於嘉慶五年特降諭旨令各衙門慎重保薦茲因京察屆期特再行申諭倘有不揀擇人品率行保舉致記名擢用之後有營私敗檢貽誤地方釀成重大案件則惟原保官是問

二十一年 諭御史王松年奏嚴飭各督撫慎揀邑令並首繁缺州縣一摺收令為親民之官以勤理民事為重首縣為通省倡率賦重事繁必須慎選賢能方克稱職乃向來督撫大吏專以浮華便捷之人奏請升調甚至視如奴隸一切日用所需悉皆取給該縣今日役役於供頓逢迎非賂則里膏脂即侵挪國家帑藏直省州縣敢於公然虧缺肆無忌憚其風氣實開於此近雖漸知斂戢仍恐陋習未能盡除著通諭各督撫凡有升調首邑繁缺州縣務擇悃悃無華盡心民瘼者以端風尚如德品端方才能幹濟自屬上選即德優於才器局稍謹而樸誠任事廉潔愛民亦必不致貽累地方較之流俗波靡者其相去遠矣督撫為吏治綱領其各正己率屬慎簡乃俾用副朕崇實黜浮至意

道光元年 諭御史劉綬奏各省舉劾人員宜詳覈事實一摺國家澄敘官方原貴徇名責實惟是人才難得求其始終一轍者恆不數觀如州縣中之前舉後劾及繁簡互調亦不能禁之使無若封疆大吏果有是非倒置以愛憎為取舍者科道等有所見聞即應據實參奏徒為事後空言於事何補至所云不采虛名務求實際此實察吏要言各省督撫有進退人才之責當秉公考察激濁揚清嗣後保舉屬吏無論大計卓異及隨時薦擢均詳其在任政績確切註考以防冒濫其列之彈章者亦必將劣迹開載不得籠統劾參致有屈抑用副朕精覈黜陟之意

三年 諭御史王世祚奏歷屆京察有出任道府督撫轍令回京者堂官薦之

於前督撫劾之於後或保或參互相矛盾此言未嘗不是然猷守兼優者固屬攸往咸宜其資格較久謹愿樸實之員原有部務熟悉而初膺外任未必裕如者朕屢飭直省督撫隨時甄別原非一經薦舉即不復加以參劾也其襄庸各員該堂官等自應嚴加甄汰倘憐其衰憊特予矜全曲徇人情好為姑息一經發覺惟該堂官是問至所稱候補各員有才堪造就不妨試以吏案策勵使前似為得人起見然候補人員於稿案事件原應一律講求以期熟悉至補缺先後接次敘用自有一定成例各衙門有例可循倘恐堂官以愛憎為取舍不盡公允若妄更成例越次揀選名為鼓勵人材實以開奔競之門躁進者遂捷足先得守分者必致補缺無期此端一開流弊滋甚所奏斷不可行至各員簡擢外任或因貪劣被參原保各官吏部本有處分定例亦無庸更立科條也

四年 諭京察大典所關甚重各衙門堂官果能黜華崇實推賢選能自可為朝廷收得人之效若如近日侯際清賄罪舞弊一案牽涉官吏實出情理之外恩德盛思道均係刑部司官恩德又管理賄罪事務輒與市井棍徒朋謀賄囑撞騙多金該堂官既不能即時察辦猶復將恩德登諸薦牒其餘公同定稿各員亦皆該堂官保列一等或被供指得賄或以聽情徇隱並有形同木偶隨和畫諾竟置公事於不問者似此名實混淆是非顯置所謂澄敘官方者安在各部院大臣為朕素所信任其薦舉自應公允一經引見不能不量為甄錄何至以登明選公之舉竟有踰閑收檢者謬廁其間是該大臣於考察一事惟知奉行具文苟且塞責舉非其人谷將誰屬且此等不肖人員服官豈敢藐視法紀營私賈貨設令得膺外任勢必紊擾公事肢削民膏益復何所顧忌向例九卿保舉官員如貪婪事發原保舉官定有濫舉處分此案既據托津等審明擬奏所有從前率將恩德等保列一等之刑部堂官吏部查取職名照例議處因思刑部如是各衙門恐亦不無此弊明年即屆京察之期著先行諭知各部院堂官務當精白乃心秉公選拔於所屬內必平日深知其居心公正辦事諳練者公議尤協方准書之上考以備任使若不加覈實冒濫充數甚至瞻顧情面曲徇己私將來該員等款迹敗露朕惟原保之堂官是問

五年 諭朕因宗室生齒日繁諭令絲課等議立章程用昭懲勸前經絲課等條奏各事宜復交大學士軍機大臣會同各該衙門詳議茲據托津等分別准駁具奏朕詳加披閱內京察宜加鼓勵一條京察爲激揚大典自應一體加以鼓勵嗣後京察一等之宗室理事官各部院宗室郎中引見圈出後著准其一體復帶引見候朕酌量錄用其副理事官等員仍照舊例辦理如有不稱職之員亦著隨時甄別

又 諭御史但明倫奏六部司官勤惰不一請定章程隨事察覈一摺部院司員之勤惰惟在該堂官隨時查察秉公甄覈若徒設科條無關激勸於治道官常有何裨益京察爲考績鉅典原應分別黜陟不宜有舉無劾即司員論俸截取亦須察其才具之短長以辦事之勤惰分別內外繁簡不應概予保奏則激濁揚清獎勵懲怠自皆有所觀法豈不較該御史所奏十日不進署分別記過一月不進署即行參處者於勗勵人材之道爲有實濟乎著通諭各部院堂官平時將該司員等留心稽考遇京察之年勤慎公明者註以上考忘惰庸劣者予以甄劾其隨時論俸截取亦當察其才具堪勝外任與否不可徒以應對便給慣於奔競者濫行截取以肅吏治

又給事中吳傑奏略稱京察與外省大計武職軍政黜陟攸關實 朝廷進退人才之鉅典乃大計軍政皆有舉有劾而近年六部辦理京察除保舉一等數員外其餘無問賢否概列二等閒有三等數人仍准留任 臣愚以爲六部者天下庶政之所自出各堂官事務繁劇每遇案件到部豈能徧觀盡識其准駁出入由司員主稿苟非操守清廉通達治體外省有應舉行者或拘牽苛細而當准者不准其稍近弊混者又或草率遷就而當駁者不駁得失之閒所關尤鉅伏查道光四年刑部司員恩德於候際清案內撞騙多金奉 旨以該員保列一等特將原保之堂官議處 聖諭諄諄誥誡不啻至再至三乃五年京察仍有保列一等之安志在坐糧廳任內執法營私是奉行諸臣尙未能仰體 聖意夫所舉既不能無濫所劾必失之益寬抑思有舉有劾即古之黜陟幽明所以使賢者知勤不肖者知懲新進中材咸知勉於賢而儆於不肖若近年辦理

京察六法不施一概留任有勤無懲賢能者以爲例有登進不肖者以爲例無放斥而中材之尸位素餐者亦恬不知恥不思有所振作於吏治人心大有關係明年係舉行京察之歲就 臣管見謹擬二條敬爲我 皇上陳之一查京察條例一二等以外三等停升其應去官員照六法例注考議處是考績之典本非專爲保舉而設何以近年辦理屬於六法者概不一見如謂隨時甄別不待三年則如刑部辦理侯際清之案工部私竊硝磺之案司員徇利營私屢經發覺該堂官未有先事糾參者且京察定例守謹而才政俱平及才長政勤而守平者已應列爲三等在各部堂官受 恩深重自不敢一味瞻徇惟於司員之科甲出身者或因其年格較深不無顧惜因而捐班雜項亦予優容試思名器至重豈爲貧老而設庶司至繁豈任庸劣久玷此等人員留之且恐誤公如謂人才難得未可以一售廢棄應請 敕下部臣於該員平日居心及所辦之事辨其過失之公私因公者尙可姑容以策後效涉私者斷無遷就何用包荒如此則吏治庶幾實矣一查近日多有不勝外任選用部員者緣該員服官外省雖未能稱職而部司政務皆係公同辦理較之外任惟本員一人專主者其事權既分其責備亦可稍寬然如初任未諳吏事及守謹而才不足者冀可於部務觀摩藉資造就若歷任繁劇聲名平常祇因劣迹未彰幸免革廢一旦置之政事之地復任戀棧其於內外例案較多熟悉誠恐串通胥吏流弊益滋且既爲公論所擯彼自知遷轉無階更難望其振作應請 敕下部臣於外任改部人員加意察看其知愧知奮動慎在公者照常供職外如有始終怙習不悛及精力衰頹辦事遲鈍者該堂官權其輕重分別黜懲毋稍姑息致誤公事如此則人心庶幾務實矣以上二條申明舊章釐剔細習懲而知勸嚴以濟寬舉錯必覈公平嫌怨勿存私見則官常彌肅趨向日端似於吏治人心較有神益又 諭給事中吳傑奏京察屆期請舉劾並行一摺所奏甚是見在各省督撫藩臬曾任京職者居多今日部員之賢否關繫他日外省人才之盛衰嗣後各衙門堂官辦理京察務須和衷商榷拔取賢才其終年未經到署案件全不留心或奔走僅事趨承文理未能通曉賢浮不謹徇庇書役聲名平常者概

予甄汰毋得稍事姑容至外任改部人員亦須加意察看其庸碌無能及精力衰頹難望振作者應即黜革示懲毋任戀棧若勤慎在公實心任事才堪造就仍不妨據實保列總之人才難得冗濫須除惟在各該堂官秉公遴選認真甄別毋設成心毋存私見務擇操守廉潔通達治體者列之上考所謂惻惻無華日計不足月計有餘吏治自蒸蒸日上矣

九年 諭松筠奏酌定清釐案牘章程通飭各屬實力奉行一摺州縣爲親民之官若果於詞訟勤明聽斷則冤抑得伸是非立判不特兩造帖服而架詞唆訟者焉得逞其伎倆無如近日州縣勤敏者少每遇差提案犯動輒累月經年即使刑判無枉拖累已多况未必悉臻平允因而輾轉上控該管上司又未能澈除積習或仍發交審辦或復回護固結以致小民含冤屢控訟累日深此外省之通病深爲可恨此等劣員不顧天理不念人情任聽書役如狼如虎擾害閭閻滅盡天良所謂以不忍人之心行不忍人之政者安在松筠接署督篆檢校積案酌定章程以嚴考覈著照所請嗣後令各州縣將所收呈詞按月詳報已結未結若干逐案聲敘報明查覈分別記功記過以昭勸懲該管道府及直隸州於所屬有關罪名出入之案如能於上控及審轉時據實平反改擬得當者仍照例具題由部覈明奏請鼓勵倘該管上司不知勸恤民隱或不能虛衷提訊或仍批交該州縣審理致有拖累無辜冤獄莫伸之事卽一併從嚴參辦以慎庶獄而肅官常

又 諭孫爾準等甄別府廳州縣一摺知縣改補教職從前定例除自行呈請改教者不抗年限外其由督撫甄別之員實任已逾半年卽以原品休致概不准復行改教道光二年復經御史趙丙陳奏降旨通行茲該督等以宣德縣知縣李瓊標才識迂拘難膺民社因係舉人出身請以教職改用該員在任已及四年既係才不勝任卽應勒令休致所請以教職改用之處著不准行嗣後各督撫甄別屬員務須遵例覈辦如有蒙混具奏者定卽重懲不貸又以前倉場侍郎松廷邱樹棠姑容患病屬員不行甄別特予降調十五年 諭御史劉夢蘭奏大計屆期請飭嚴加考覈一摺爲政首重官人安

民必先察吏各直省官員每屆三年大計由該督撫詳加考覈舉得其人則材成知嚮風靡得其實則不肖羣知畏罪是澄敘官方之中實寓選拔真才之意各省大吏身膺重任爲朕耳目所寄宜如何精白乃心秉公甄別以風示羣儆若如該御史所奏牧令之勤恤民隱者類多模訥拙誠不工容媚而不肖者專事迎合取巧並無實心任事之意該上司受其朦蔽轉予卓異此等風氣近來各省或亦不免見值辦理大計之時各督撫等務當破除情面公正居心隨事隨時認真體察於所屬各吏人品心術政績事實詳加考覈分別激揚斷不准賢否混淆濫登薦剡

臣謹案 國朝自順治四年准吏部奏用才守政年四格以定黜陟之權當是時 上閱大計疏已謂大學士范文程等曰貪吏何其多也此輩平時侵漁小民茲當大計之年亦應戒懼泊 高宗御宇 諭曰昔蕭何相漢終舉曹參羊祜佐晉亦進杜預薦賈自代青史稱焉無如督撫不盡賢明每遇考績任意顛倒甚或以金錢之多寡爲上下烏虜吏治之壞壞於守令者半壞於大吏者亦半也

二十三年 諭大考翰詹經監試王大臣查出右贊善如山懷挾賦本如山著卽革職交刑部照例治罪
咸豐四年 諭京察爲激揚大典向例各衙門保列一等人員皆有定額原所以防浮冒或不得其人卽當任缺毋濫近來各堂官如數薦列從無缺額其上以一等人員如或始勤終怠原可改入二等乃近來往往盡列一等絕少更改至應列六法人員除年老有疾者各衙門尚有數人其填浮濫不謹等款者亦屬寥寥殊非慎重舉劾之道見屆辦理京察之年著各衙門堂官認真考覈毋蹈瞻徇之習俾該司員等咸知振作以備簡任將此通諭各院衙門知之
六年 諭吏部奏京察一等人員呈明親老請明定限制一摺各衙門京察一等人員其因親老情願留養者例准於初次圈出後在部呈請扣除乃近來有俟記名後始行移咨吏部者雖同係據實呈請究屬辦理兩歧嗣後京察一等人員如有親老情願留京供職者著於初次引見奉旨圈出後卽由各該衙門

咨報吏部扣除其初次未經記名再遇復帶人員亦著該衙門於保送時咨明吏部扣除均毋庸帶領引見如於奉旨記名外用之後始行呈明親老者概不准行以示限制而歸畫一

又 諭各省舉行大計所以保舉循良汰除庸劣爲三載考績大典全在封疆大吏秉公甄別果有勤求治理民情愛戴者始准覈實薦舉毋許濫竽充數至辦理軍務省分或地方甫經收復有待撫綏或疆圍逼近寇氛亟籌保衛得一廉能之吏實足庇廕一方當將實心任事各員留心存記於舉行計典時列入上考以備推用其或以逢迎爲要結固惜聲名以便佞爲才能毫無政績若令忝居民牧必致貽誤地方亟應隨時淘汰以肅官常不得因其尙無顯著劣迹一味姑容僅以年老有疾人員參劾充數似此循名責實分別勸懲庶吏治蒸蒸日上朕實有厚望焉

七年 諭吏部奏遵旨議覆鴻臚寺鼓勵人員一摺京察保薦例有定額鴻臚寺額保三員無分滿漢著照定例辦理所請分別漢員擬添舉額之處著毋庸議至該衙門漢主簿鳴贊序班等官應得升途著照部議按照十五項小京官六年俸滿之例變通辦理以應升之缺歸於俸滿即升班內與各省佐雜俸滿即補人員比較日期先後升用如遇俸滿到班仍准論俸升用不得援例捐免歷俸以示限制該部即纂入則例永遠遵行

十年 諭前據吏部奏請舉行京察當經諭令各部院衙門本年京察有劾無薦覈實辦理嗣據吏部奏請仍飭在京各衙門秉公保舉不必拘符定額復諭令此次列薦章者不得逾額之半並將京師戒嚴期內在署辦事並曾否遷移各員分別開單具奏各部院堂官考覈司員必察其平素勤惰始能分別舉劾若其人向來辦事認真而數月未能到署遠行甄劾似覺可惜或非出色之員僅於戒嚴期內照常到署登薦體亦不足以昭平允所有在京大小官員應行辛酉年京察著展緩一年照例辦理其 陵寢衙門及盛京等處仍著照舊舉行並著各該堂官留心查覈如有貽誤公事之員隨時參劾毋許瞻徇

十一年 諭給事中哲臣奏請嚴定京察章程先期開單進呈一摺京察爲考

績大典各該衙門堂官保列一等人員出具考語由吏部帶領引見本非專爲節用外任而設其特行圈出之員令該堂官再出具切實考語覆行引見始量予錄用立法本極周密該給事中奏請令各該堂官將應行保列堪勝道府之員先期出具考語開單進呈圈出後再行帶領引見既與定例不符且失京察本意况所保之員未經引見豈能僅據該堂官考語遽定其人之才具所奏殊屬非是著毋庸議原摺著即擲還

又 諭大學士桂良等奏遵議御史華祝三奏部議京察截俸日期察礙難行一摺京察大典前經吏部奏准展緩一年至截俸日期欽奉諭旨扣至咸豐十一年三月截止當欽遵辦理至一切停升註考事宜亦經吏部奏明分別覈辦尙無窒礙該御史原奏內稱京察必視差使之優劣定等第之高下上年差使應列一等至本年三月升調別衙門若仍與一等則與截俸不符不與一等則資俸以百年爲限勞績不以酉年爲憑等語向來升調人員一年以外仍准統計前俸至填註政績考語半年以外即由升任衙門註考若舍新任之資俸論原衙門之差使辦理更難畫一又稱一等升遷三等降調等語向來一等加級三等照舊供職並無升遷降調之說所奏係屬錯誤又稱酉年三月以後病症服閱升調銓補得缺各員均不應在考察之列將不分等第從無實缺人員不加甄別之理仍分等第列入三等者必有置辯等語升調得缺本係實缺人員該御史謂與病症服閱銓補得缺各員均不在考察之列已屬聲敍未明至應否分別等第業經吏部奏明例應考察及不應考察之員統以三月爲斷亦與截俸兩無窒礙又稱禮兵部員缺本少本年三月以後各員中或以事故去而此後得缺者皆係不合例人員恐致無員可保等語歷屆京察保薦不得其人即任缺無溢 聖訓煌煌允宜遵守豈該御史尙未之知又稱本年三月後考察各員有屢經升轉者有呈誤停升者論其體制則新階敍用與舊階敍用判然各別論其處分則考察在前呈誤在後難以持平恐升轉易致冒濫被議者不能折服其心截俸亦多扞格等語向來考察期內凡有升轉議處事件概行停止此次展緩一年勢難一切停止不辦亦經准吏部所奏註考等項事宜均

照見在官職辦理今該御史所指窒礙各情俱應歸停升之例辦理與截俸毫無干涉又片奏此次京察需以四載不爲遲將來紹以二年不爲速等語三載考績古有明訓該御史強爲二年四年之說尤屬不諳政體所奏著毋庸議

同治五年 諭御史張觀鈞奏請飭各衙門堂官認真辦理京察等語三載考績爲激揚大典各衙門保薦人員一經得缺卽有地方之責近來各省或軍務未平或瘡痍未起尤須得人而理惟知人不易非平日留心考察區別豈能悉當嘉慶年間曾奉 諭旨京察之事尙書侍郎應各備一冊密識賢否公議之日再行同覽衆所獎許者拔之衆所屏棄者黜之當以公心辦公事勿存絲毫私意 聖訓煌煌允宜永遠遵守今冬又屆辦理京察之期著各衙門堂官欽遵 成憲將該司員等人才具悉心體察隨時存記以備臨時公同酌定期於鑒別精當以收得人之效並著各衙門堂官常川進署與該司員等講求公事藉以規其人之賢否秉公保薦用副朝廷拔擢真才至意

十年 諭國家設官分職在部院衙門司員御史原欲其諳練政體詳求例意今日爲儲才之淵藪異日出爲方面自能才識出衆茂著循聲今則不然進身之始卽百計營求豫爲保舉地步非入署幫印幫稿卽檔房學習日日奔走僕僕勤則勤矣於部務何益於例案之輕重分別以及清弊之源更不必問矣試問如此無恥之輩昏夜乞俸之徒在內卽無立身之品一日濫膺薦積焉望其奉公守法不過到省後先計其缺分之肥瘠量一歲之所入爲奉承老師上官地步不數年病呈又入告矣滿載而歸徒爲子孫置產之資胥吾民之脂膏也爲堂官者率不察其人品辦事若何止就目前所見應對明晰卽許其部務熟諳甚至暗受囑託賄徇情面視保舉爲市恩無怪司員視一等爲美具也滿漢堂司本無歧視原應一體辦公近見各部司員漢員尙有講求例案者居心公正固不乏人而把持不許滿員入手者亦屬不少滿員復甘認頹唐者更幸一等記名早離部署今日之藏垢納污豫博美譽爲將來貪婪肥己之具而已嗣後初到部者司員概不許幫印幫稿筆帖式亦不許檔房學習總期試以實事觀其成功杜奔競之風收得人之效諸卿其共勉之

皇朝續文獻通考卷九十一

選舉考九 考課

光緒七年 諭侍郎寶廷奏京察積弊難除請責成樞臣考察一摺京察為考績大典應朝 聖訓諄諄誥誡 成憲昭垂本年復申諭各部院衙門秉公考核至為嚴切該堂官等自當懷遵前旨力除積弊並查照定章於所屬各員悉心甄別各備一冊密識賢否公同酌定期於舉劾至當倘仍視為具文竟有瞻徇情面舉劾不公等弊一經查出定當從嚴懲處至所奏京察後將冊封送軍機處以親各堂官棄取之公私並飭樞臣將保列一等司員分日傳至詳加驗看詰問等語各部院司員等平日才品如何非本衙門堂官不能周知悉至軍機大臣豫參密勿獻可替否本其職分若各部院京察一等人員於引見召見之外復令該大臣等博採時論考查驗看無論各堂官去取之公私與各該員居官之賢否未能取決立談之頃且流弊滋多亦屬無此政體所奏著毋庸議

二十二年 諭右庶子濟激奏督撫參劾屬員請飭詳陳劣迹以杜弊端等語疆吏參劾屬員應以核實為主嗣後務須詳核劣迹毋得以空言奏

二十四年 諭朝廷於整飭吏治不啻三令五申乃各省大吏往往粉飾因循於所屬各員不肯認真考察以致賢者無由各盡其長不肖者得以自匿其短甚至已被吏議尚不免巧為開脫誤國病民皆由於此著各省督撫嗣後於屬員中務當詳加考察賢能者即行臚陳政績保薦擢用其曠廢職事營私舞弊之員隨時分別奏請立予革職經此次申諭後各該督撫身膺重寄倘其振刷精神秉公舉劾

又 諭州縣為親民之官必須才守兼優庶無愧父母斯民之任近來督撫往往意存遷就不復從嚴考核甚至著名要缺或以調劑私人不思庸劣者濫廁仕途賢能者轉多屈抑殊非綜核名實之意該督撫等受國重寄必當以吏治民生為重以後無論實缺署任均須為地擇人不可為人擇地如有疲庸不肖之員隨時甄別務期仕途澄清官方共飭用副朝廷察吏安民之至意

二十八年 諭為政之要首在得人內而部院外而封疆均應以詢事考言為鑒別人才之準各部院衙門行走人員旅進旅退何以明習例章諳練政事見當振興庶務亟應切實考察以期鼓勵真才著各堂官於該衙門司員除掌印主稿各員每日自有應辦之件應隨時考試外其餘各員不分滿漢及筆帖式均令檢閱例案俾得專心考究遇有應辦應議奏各事件即令學習擬稿並准其各抒所見將說帖呈堂查閱以備採擇一切要差即由此選派務使司員皆能親身治事書吏等自無從蒙蔽攬權至各省候補人員冗濫尤甚平時不加考核一旦使之臨民從事安望其措置得宜近來各省已有奏設課吏館者自應一體通行惟見在考核人才不能視為調劑閒員之舉仍著該將軍督撫兩司等傳見僚屬訪問公事以規其才識並查其品行其實者量加委任不必盡拘資格其不堪造就者即據實參劾咨回原籍統限半年具奏一次務當破除情面嚴行甄別不准虛應故事稍涉瞻徇

又 諭圖治必先察吏而馭吏尤在勸懲各省分發人員例應由督撫切實甄別原以考查賢否分別去留法至善也乃近來各省期滿甄別類皆寬泛注考全數留補無一斥退者即隨時甄別亦屬寥寥見在捐納保舉倍形擁擠巧黠之流紛紛資緣奔走即中材亦相率效尤吏治之壞皆由於此亟應痛除積習以肅官方嗣後各該督撫務當破除情面嚴加考核自道府以至州縣凡初到省者必躬親面試其尚堪造就者均令人課吏館講政治法律一切居官之要隨時酌予委差以規其才識期滿甄別一秉大公優者留補劣者斥罷平等者再勒限學習均各出具切實考語不得仍前含糊混濶選授實缺之捐納保舉各員亦應一體考試察看分別辦理毋稍遷就瞻徇

三十一年 考察政治館奏核州縣事實並酌擬辦法
又 政務處奏准考核各省州縣事實分別勸懲並畫一章程五條略稱本屆各州縣事實表冊直隸江蘇等省已到十四起詳加查覈分為最優等優等中等次等四級其列入最優等者擬請仍交各督撫出具切實考語具奏實缺者以應升之缺在任候升署缺者遇缺即補列入優等者擬請交部議敘列入平等

者擬請准其照舊供職列入次等者擬請仍由各督撫隨時督飭將應辦各項認真舉辦如果始終不知奮勉即行分別撤參倘各該州縣或已因另案撤參而此次列入最優等者應由該督撫查明原委情節分別公罪私罪請旨辦理列入優等平等次等者即毋庸置議擬擬畫一章程五條一開報宜嚴實也查各省表冊或但云籌辦命盜監押或並無已結未結起數其有於工藝下注男耕女織四字於種植下注棉花三成禾穀七成者一味搪塞成何事體見由臣等酌定表式嗣後務須依式填寫已辦未辦一一核實開報以免匿飾一咨報宜按限也此係奉 特旨飭辦之件原令年底開報即各省奏准展緩亦以次年三月至五月為止嗣後近省儘三月遠省儘五月務須一律奏結不得任意延緩一前後任宜界畫分明也州縣在任或一二年或三四年不等以前任所辦之事歸功見在殊失情理之平嗣後開報時必須聲明某項原有若干該州縣到任後添辦某項若干成效若何以清眉目一優次等級宜有定限也學堂當以開設處所學生人數最多者為上次多者為中少者為下警察工藝種種當以辦有成效者為上已經開辦者為中不辦者為下命盜詞訟當以全無或全結者為上未結不及二成者為中逾二成者為下盜案以全無或全獲者為上過半者為中不及半者為下錢漕以全完者為上欠數少者為中多者為下一州縣宜久任也查各省州縣通計到任不及一年者或十之三四成或十之四五成甚且有至六成以上者至於實缺人員紛紛更調置棋不定勢必人人萌五日京兆之心即事事有一暴十寒之慮嗣後各督撫務須慎簡庶僚畀之久任以上五條通行各省一體照辦以防流弊

三十二年學部奏准興學為地方要政列入考成本與錢穀刑名並重查各省地方官員補著舉劾向由藩臬會同具詳見既添設學司應改為藩學臬三司會同具詳庶各顧考成於興學育才不無裨益

又吏部奏添設學治館略稱除道府大員暨各項正途出身學堂畢業曾任實缺應升人員及已經到省過班人員仍照例月選分發由各督撫查看甄別毋庸入館學習外其非正途出身學堂畢業之捐納保舉初任牧令丞倅暨例應

投供之佐雜各員赴部投供分發者分別入館分門學習如公事明白堪以入仕者學習不拘日期輪選到班時即照例擬選其吏事不諳文義不通者應暫行停選虛積過班令其留館學習六箇月再行察看果能造就日進再行補選所遺之缺即以其次到班應選之人遞推擬選至分發各員先由臣等考試合格者飭令附入驗看其不合格者亦令其學習三箇月再行驗看分發以上月選分發兩項人員如留館學習後仍無進益者再留館學習一年如所習終無進益即行停其銓選分發

又 諭方今時局艱難朝廷宵旰憂勞日求振作爾大小臣工應如何破除積習共矢公忠乃聞郵傳部尚書張百熙侍郎唐紹儀到部以來時有意見任用人員亦不免瞻徇情面屢招物議殊負委任本應將該尚書侍郎均予罷斥轉得置身事外姑從寬免張百熙唐紹儀著傳旨嚴行申飭該部丞參及所調司員著該尚書侍郎等認真甄擇分別去留一切應辦事宜並責成公同商酌妥籌經理倘再稍參私隱貽誤公事定惟該尚書侍郎等是問

三十三年考察政治館奏准各省州縣事實表冊上屆會由政務處考核並另擬通行畫一章程五條請 旨頒行茲據各督撫先後咨到光緒三十一年分事實表冊除廣西及東三省仍在展緩之例計咨到者直隸熱河江蘇安徽江西山東山西河南陝西甘肅新疆福建浙江湖南四川廣東雲南貴州等十八起所填事實已照定式分註雖聞有參差而大致尚稱畫一造報期限不免稍逾皆據聲稱初改格式不無輾轉耽擱惟湖北一省至今尚未咨報轉瞬三十二年分又將屆期未便再事延緩謹就已到各省詳加考覈互為比較分爲最優等優等平等次等各級繕單呈 覽其到任不及一年各員無關考核此次即不復開單以省煩冗惟查上屆奏定章程列入最優等者請仍交各督撫出具切實考語具奏實缺者以應升之缺在任候升者遇缺即補等語見計三十年分辦理已逾一年各該督撫並無加考奏獎之案若各省大吏無意奉行一兩年後勢必視為具文於吏治仍無裨益 等以爲既欲實事考覈斷不可空言勸懲查 大計卓異人員例准送部引 見今開事實表冊皆有政績

可查與尋常甄別不同擬請凡州縣列入最優等者即令各該督撫加具切實考語送部引見實缺者請旨升用候補者發回原省遇缺即補其列入次等人員雖視計典有別然原章請由督撫督飭各員認真舉辦如果始終不知奮勉即行分別撤參等語亦恐不足以資策勵擬請交各督撫詳加察看酌照處分降罰之例如頻年屢任皆列次等實缺者停升候補者扣補至最優等之因案參撤及優等平各員仍悉照章辦理各省咨報之件有與章程不甚符合者如學堂但有處所而無人數巡警但云籌辦而無員名或以團防練勇爲警察或以罪犯習藝爲工藝或混監押不分或漏錢糧不報督撫加考又或不分等第不論年限更覺漫無限制此次臣等考核凡在任不滿一年者均予詳細剔除其有三四月到任年底尚未交卸各員統歸下屆覈辦若原無等第各省則就其事實考語酌量定擬此後仍令各該督撫自行核辦如其再有漏略應即駁回更換以昭覈實至列入優等連任各州縣既不必歲歲列優亦未便遽降平等應飭各督撫查明上屆優等各員若事實毫無出入即另列一單註明與上屆同俾免淆複倘於各項新政實有擴充始終不懈者准予升列最優等抑或始勤終怠亦即降等以期允當又各省咨報限期原定近省不逾五月各省多未如限本屆列單各員往往事故歧出離任居多且有原列優等而見被參劾者追加論列固屬具文概事刪除亦乖成例嗣後應再飭催依限咨報以憑核辦又查事實表冊自應注重前項列新四項而列優等各員尚未能逐項舉辦各督撫原奏或稱風氣未開或稱財力不足自係實在情形惟日久不辦適同諉卸亟應酌定年限責成於三年內將見任未辦之事次第分期辦理三年後仍不舉行即不准列優用示區別至工藝種植兩項往往以尋常地方物產濫行開列而不能就原有者加意擴充未有者留心勸辦應飭查明各屬工藝種植幾種製造出產若干詳細登列然後再將見在推廣開辦情形並逐年有無效驗切實陳明庶不致空捏虛飾目前禁煙伊始舊種罌粟各區必須各相土宜豫籌有利植物勸諭逐年改種方於小民生計無礙他如江蘇之絲貨綉貨閩粵之漆器竹器等類向爲著名工藝於近年商務尤有關係

均應切實提倡一併開報以資查考請由本屆爲始凡最優等優等次等各員即飭各該督撫查照此次奏章辦理其餘各條亦均責令認真遵辦

又以官制增改變通京察章程吏部奏京察爲三年考績大典願自改制以來卿寺既互有裁併部院亦屢經增改額缺固已不齊遷除又復迥異自應酌改舊章以期措施盡善由臣部咨商各衙門將新設員缺酌定一人名數及應行變通事宜知照到部再由臣等督同司官詳考例章按切時勢分別增刪開單請旨遵行

又憲政編查館奏定切實考驗外官章程六條一變通考試舊例概令先行學習一分別學堂等第必須嚴示勸懲一考驗應條具實迹一甄別須改定辦法一在省候補人員宜通行考試一次一出考上司應酌予議處如議行三十四年民政部奏請飭各省督撫將州縣事實表冊除照章咨送憲政館外另造一分送部考核俟核定優劣分別等第仍咨請憲政編查館王大臣覆核主稿會同具奏請旨勸懲

又憲政編查館奏光緒三十二年州縣事實表冊續據直隸熱河江蘇安徽江西山東山西河南陝西甘肅新疆浙江福建湖南四川廣東雲南貴州等十八省先後咨送到館臣等覆加查核除照原定章程將到任未及一年各員刪除不列等第外仍分別最優等優等平等次等四級內有上屆優等三員查核各項新政實有擴充洵屬始終不懈應准升列最優等與上屆及本屆最優等各員一併請旨飭令各該督撫加具切實考語送部引見其餘上屆列優等各員本屆新政無甚擴充或並未將原有新增事實分別註明或雖註明而與原報不符應即另列一單無庸再開事實以免淆複至兩屆均列次等人員應照奏定辦法分別停升扣補由各該督撫詳加察看奏咨辦理謹各分等繕單呈覽請旨遵行此次各省送到事實表冊較上屆已爲盡一惟於新政各項多未能切實推行見在三十二年考核後又屆期各省仍未依限造送湖北一省始終未經咨報應再請旨飭催並飭各省務各遵照迭次奏定章程認真辦理庶不至日久奉行視爲故事再查本年民政部奏准考核民政飭令各

省分造州縣事實清冊送部會核此次三十二年州縣事實各省造報在前仍由臣館覆核應自光緒三十三年為始再行會同民政部考核具奏又吏部奏定變通京察事宜

一舊例京察三年一次吏部將在京滿漢尚書侍郎左都御史內閣學士副都御史及盛京五部侍郎為一本在外總督巡撫為一本繕具簡明履歷清單具題候旨等語除盛京五部侍郎奉裁不計外今按外務部請飭各國二三等公使均已改作實缺與從前暫作差事者不同應請由外務部飭取各該員履歷咨送過部由臣部附入總督巡撫之末通為一摺具奏候旨

一舊例三四五六品京堂及內閣侍讀學士翰林院侍讀學士詹事府左右庶子順天府府尹府丞奉天府府尹府丞俱繕具簡明履歷清單通為一本具題後帶領引見等語除各卿寺通政司詹事府奉天府各官奉裁不計外今按新設官缺若各部左右丞大學堂總監督民政部內外城巡警總廳廳丞大理院總檢察廳廳丞京師總銀行正監督造幣廠正監督各部左右參議學部國子丞都察院掌印給事中法部京師高等審判廳廳丞高等檢察廳檢察長大理院推丞總銀行副監督造幣廠副監督法部京師內外城地方審判廳廳丞均應照三四品京堂例繕具簡明履歷清單通為一摺具奏後帶領引見

一舊例大理寺正卿少卿係照三四五六品京堂例繕具簡明履歷清單通為一本具題後帶領引見等語今按大理一官業已改寺為院正卿秩二品應附入滿漢侍郎之後通為一摺具奏候旨少卿秩三品應按照三品京堂例繕具簡明履歷清單通為一摺具奏後帶領引見

一舊例軍機處章京悉由本衙門堂官註考今按頭二班皆已定有專缺應由王大臣遵照新章辦理其滿漢領班章京四員秩三品應按照三品京堂例幫領班章京四員秩四品應按照四品京堂例繕具簡明履歷清單通為一摺具奏後帶領引見

一舊例丁憂起復仍回原衙門已補人員到任後已過半年准其接算前俸查此項人員見在起復到署後即支食半俸擬由到署支食半俸起已過半年准其接算前俸再舊例外任官員丁憂回旗奉旨內用者不准通理前俸惟查此項人員內有由京察一等蒙恩簡放者係原食京俸人員擬自補缺之日准其通理前俸

一舊例滿漢官缺各有定額今按新定官制新舊各衙門一切差缺多半因材委補不分滿漢此屆京察大典自不宜仍拘成格致滋窒礙應請保送一等人員按照額缺計算不必盡分滿漢

一舊例每屆京察各衙門均按照所定額缺七人舉一今按軍機處翰林院衙門奏定新章按照六人舉一係為廣籌出路起見查部院人員一體當差自不宜稍有軒輊擬請援照軍機處翰林院成案凡保送一等員數皆按照額缺六人舉一俾示平允其中如額缺餘至四缺以上者准該堂官擇其才具出衆實有政績可考者保薦一員如不得其人任缺毋濫至一等人員自當照例呈進黃冊其二三等人員免造黃冊以省煩瀆

一舊例太常寺所屬之四五六品看守壇廟官祠祭署奉祀祀丞等官但論其禮儀之是否嫻熟行走之是否敬謹無庸填註四格等語今按民政部五六七品警官大理院看守所官皆專管一事自應援照奉祀等官成例警官但論其巡緝之是否勤奮看守官但論其防範之是否周密俱填註切實考語及稱職勳職供職字樣並六法等款以定去留俱無庸填註四格再此項人員按所定額數每六員中酌保一員俟引見圈出後由臣部照章以應升之缺升用註冊

一舊例宗室人員遇有列保一等奉硃筆圈出覆帶引見後如蒙恩記名即以道府恭候簡用如係最近支派於排單綠頭籤內照向例一等人員註明內用等語今按各卿寺衙門大半裁撤內用無階可升擬請嗣後宗室一等人員於綠頭籤內註明係屬近支於圈出覆帶後如蒙恩記名即與各項人員一律進單以道府恭候簡用

一舊例 盛京分建五部所屬官員俱歸 京察辦理今按東三省已分設督撫應與各行省一律舉行大計三年一次查奉天左右參贊秩正二品奉天交涉旗務民政三司可使奉天吉林提法使秩正三品奉天度支蒙務二司可使秩正三品擬請令該督撫出具考語繕具履歷清單咨部由部彙覈具奏其道府以下等官該督撫應舉應劾之員分爲二摺照各行省舊例辦理

一舊例 盛京各衙門及 三陵官員筆帖式均由 盛京將軍註考今 盛京將軍奉裁所有 盛京各衙門及 三陵官員筆帖式應由東三省總督註考

一各省均添設提學使司提學使一員秩正三品列銜在藩司之下臬司之上應請令該督撫出具考語附於藩司之次繕具履歷清單咨部由部彙覈具奏

一以上各條或有未盡事宜及須再行酌改之處由 臣部隨時具奏請 旨 其原定則例無庸變通者應均照舊辦理

又民政部奏進考核巡警官吏章程九條京師自巡警總廳廳丞以下各省自巡警道以下所有辦事成績均由 臣部定期核辦分別殿最請 旨勸懲其實係成績昭著或辦事不力者亦即隨時奏明辦理

又吏部奏續定京察事宜
一民政部法部郵傳部等衙門新設之小京官均係額設之缺與從前各衙門小京官未定額缺者不同擬請於此項人員內每六員舉一等一員不得與郎員主併計其外務部吏部度支部禮部學部理藩部所設之司務理藩部舊設之司庫僅一二缺不敷保薦者自應仍照舊例辦理
一內閣等衙門所設之中書司務小京官筆帖式等官保列一等引 見記名者即以同知通判選用註冊並擬請准其隨時分發未經 記名者即以各衙門應升之缺儘先升用註冊
一學部所設之書記官法部大理院郵傳部所設之錄事如遇 京察保列

一等冊送到部由 臣部查覈具奏奉 旨後即以各該衙門應升之缺註冊儘先升用毋庸帶領引 見其有由筆帖式改補者亦一律辦理

一各衙門所設之書記官錄事及原設之筆帖式保列一等額數均擬定每七員舉一其裁缺籤分各衙門筆帖式既係作爲實缺自應與額設之缺併計准其一體保列

一民政部新設之六七品醫官法部新設之監醫正監醫佐皆專理一事自應援照從前奉祀祀丞及御醫吏目等官成例醫官但論其藝能之是否精通醫官但論其醫理是否通曉俱填註切實考語及稱職勤職供職字樣並六法等款以定去留無庸填註四格

一歸併禮部之簿正司庫典簿鳴贊序班等官共十六缺擬請仍保一等二員原太常寺禮祝官贊禮郎共四十三缺擬請仍保一等六員原鴻臚寺鳴贊十四缺擬請仍保一等二員歸併學部之典簿典籍七八九品奉祀官正副通贊官二三等書記官共二十四缺擬請仍保一等三員以符定例

又奏定法部民政部各廳京察一等員數略稱法部新設之高等審判檢察廳及內外城地方審判檢察廳初級審判檢察廳檢察推事等官共計百有餘員幾與法部額缺相埒所辦各事雖極繁要然究係專辦內外城承審案件與各部院統轄各省應辦事宜情形不同若仍照新章每六員准其保薦一員未免漫無區別查各廳額設之五六品檢察官推事等官共九十一缺擬請准保一等八員又七品以下典簿各官共二十二缺擬請准保一等二員惟見在各廳所設員缺補授尙未足額本屆京察各廳保薦一等人員應照該部本年十月奏定先儘法部實缺調補授之員計俸保薦其保薦額數應請照 臣部此次章程辦理以便永遠遵守如不得其人任缺無濫又民政部新設之內外城總倉事等官共十三缺專理內外城警察事宜與法部新設各廳所辦事件大致相等擬請內外城准各保一等一員以歸畫一
又吏部奏已酉年京察毋庸提前趕辦聲明請 旨摺先經 臣部以本屆舉行京察應行變通事宜業經隨時奏明請 旨遵行在案查定例在京各衙門考

察各官應於明年三月以前造冊送部四月內帶領引 見惟歷屆俱係查照成案提前趕辦於前一年封印前造冊送部二月內帶領引 見歷經遵照辦理此屆京察臣部查照舊案奏請提前趕辦於本年八月奉 旨依議欽此復經通行各在案臣等查京察大典事體至為繁要見值 國家 大喪此次已酉年京察臣等擬請參照定例各衙門於明年閏二月以前造冊送部即於是日遵例停其升轉臣部於三月內會同都察院給事中京畿道封門考察俟辦竣後同大學士都察院給事中京畿道過堂四月內帶領引 見毋庸提前趕辦恭候 命下遵照施行俟屆期再由 臣部擬定封門過堂引 見各日期另行奏明辦理

宣統元年吏部奏酌擬考核調用人員切實辦法略稱查奏調之風始於外省軍務河工節經 臣部嚴定限制嗣以時艱日亟各督撫每有陳請 朝廷常不惜曲予允從俾收指臂之效甚者且奏寬一切文法因之 臣部原定限制亦有不可盡行者至在京衙門本無調用人員之例自新部院同時並建需才過多勢不能不仿照外省權宜集事惟一經奏咨便為合格與 臣部分發之制迥殊故 臣部亦遂無從過問見在奉 旨令 臣部切實考核 臣等何敢稍避嫌疑惟是承疏節閱目之後為提綱挈領之謀責成固在 臣部而遵守尤在各部院各省謹擬辦法十條繕單呈 覽抑尤有進者奏調固以矯舊制之失但專藉奏調亦嫌偏重除新設部院請酌增簽分事宜已於另摺陳奏外其東三省新疆等處可否比照各省一律分發之處請 飭各該省督撫察看情形切實聲覆以臻完密

又御史胡思敬奏請嚴治賦吏開單彙呈乾隆歷辦成案摺竊以人性之趨利猶水性之趨下趨之者衆則必爭爭之甚則必亂聖人憂人生好利之心不可過而爭亂者未有已也於是而制禮禮所不能齊之不得已而用刑自邪說興禮教之防大裂人主所恃以臨馭四方者惟此三尺之法若又廢而不舉彼視耽耽而欲逐逐曾何憚而不恣睢漢時守令非察廉不得升擢見之班范二史列傳可考而知宋太祖立法最寬自開寶以來所犯重辟多得貸死惟賦吏不

宥古帝王所以兢兢於此者非苟慕廉潔惡貪濁之名為不美惡夫貪濁之影響及於國政者毒於猛獸洪水將潰爛不可收拾也蓋自苞苴請託之風盛其用人也狡而亡恥者掖之驟登華要賢而剛介自守者壓之使悲憤憔悴困頓以死其治獄也貪而無辜者可枉法陷之富而好亂者可破械出之 廟堂頒行一政則此輩多一號召之符部院添設一官則此輩多一販鬻之貨甚者如案滅六國廣布金錢遣辨士游說東諸侯使其君臣自攜貳漢用陳平計捐四萬金縱反閉於楚遂滅項氏人之無良至以社稷輸人坐視其主虜死不恤賦吏之可畏如此又况昔時之賦私易覺今日之賦私難明輪電交通匯帖大行無輩運之勢無盜劫之險商股洋行偽名詭寄因非若輩輸委之區暮夜登門叩謁出片紙於袖中雖鬼神莫能蹤迹也昔時之賦私易足今日之賦私難覺一姬可破數萬金建一第可破數十萬金交游宴會犒賞之資驕子豪奴浪擲無節下至骨董書畫賈人懸贖鼎以招必欲一致而後快故奢侈之習既成雖沾沾自喜之徒末路窘乏無聊不得不毀節喪名作此日暮途窮之舉發者更何論焉昔時賦私之途隘今日賦私之徑寬新政用財如泥沙私囊既充出少許以供土木外觀之耀疆臣具疏奏報計臣莫能駁也用人之格既破長官一紙調用動輒數十百員內自丞參以至各廳外自使司以至各道或指名請 簡或報奏 存記謬列刻章辨形銅臭吏曹不能詰也紐解綱弛陵夷至此雖日下敲金之令驟增百千億萬官帑不除時而樹刺盡矣雖大治戰艦著養百萬勁兵一聞敵至相率棄甲而逃耳 臣觀乾隆一朝三品以上大員以犯賊罪至斬絞自盡者凡四十餘人其罪不至誅及被誅而非犯賊并四品以下犯官不與焉以 高宗之聖明經 世宗整飭紀綱之後清議之公名教之重古所未有汚吏宜有所憚乃六十年開大獄屢與誅夷不絕稽諸故府案治之由不盡發自言官也或一時因事感觸而生疑竇或 召對臣工面詰而得其端倪或查辦甲案而乙案同時發覺其執法之堅且不僅殃及其身而止也或牽連舉主或貽累同僚或譴及同省科道其查辦之嚴亦不盡付疆臣任其一奏塞責也初查不實別 簡重臣覆查覆查又不盡解京 廷訊并查辦之員

坐之不特此也罪人不學古有明訓而良卿富德王宜望陳輝祖伍拉納之獄并取其子而投之邊豈好刻哉奸人贖貨巧者暴殄以肥身拙者居積以遺子孫彼知一朝失敗不能全其身且不能保其子也懲一儆百庶乎其知戒矣當時雷厲風行無不伸之法即無不破之奸而高宗猶私歎水懦易玩時時引疚於心雖當老期歸政之年尚誅一總督一巡撫一按察使不肯法外施仁稍露倦勤之意我皇上聰明天亶誠不難上堯高宗而今日政教人心風俗視祖宗中葉孰為盛衰蓋有不能為斯世諱者數十年來上下以相忍為國未聞戮一吏抄一產豈乾隆之朝皆小人而光緒以後之人皆君子高宗席全盛之勢推赤心置羣臣腹中敵不畏死者背風而馳日趨陷大辟而奸仍不止皇上冲齡踐阼適當多難之秋不一震天威欲坐收富國強兵之效此愚臣所未喻也一國之大十數萬方里之遙朝廷所藉以寄耳目者不過數十言官雖許以風聞言事而足迹不出一城在作者密斂機牙豈容有罅隙之漏在言者深防螫毒或不無嚙嚅之情故近年仕路喧傳有謂袁世凱侵吞京奉鐵路永平鹽捐百餘萬者有謂楊士驤受李德順五十萬金句結洋商者有謂袁樹勛以三十萬金得山東巡撫者有謂朱家寶在吉林捐載六十萬金回籍者有謂楊士琦飾美姬以獻袁世凱取名杏娘用示親媚者雖人言藉藉不盡無因誰敢以道聽途說之詞貿然入告是故上下賊私狼藉偶有一二得挂臺諫之彈章因以上達天聽者蓋幾經遲回審慎而後出也事下查辦大臣率多方為之揜飾徒坐一二末秩微員李代桃僵塗飾衆人耳目即或罪狀昭彰不憚代為剖雪如陳璧之陰賊貪婪又聽其飽颺而去上有法而不自行臣下朋比營私遂有心攘貨債帳併一官以相賣弄蓋早窺見朝廷之舉動知其必無後患矣今臣所開乾隆一朝賊私重犯先後共二十九案尚恐不無挂漏念先朝締造之艱豫謀所以振聵發聵之策以後有實犯奸賊革職有餘罪人員應如何按律實行之處出自宸斷非微臣所敢擅擬謹將乾隆六年至六十年三品以上大員犯賊得罪各案彙繕清單恭呈 御覽

謹案光宣之際官邪日恣苞苴賄託嘖有煩言如胡思敬清單所呈以

乾隆全盛之朝賊案發覺者書之已累牘難罄叔末之朦蔽可知矣茲將原呈二十九案摘錄每案得罪最重之人計正法者十二監視及畏罪自盡者八斬監候者八較監候者一分列於後以垂炯戒

正法者十二案 乾隆六年山西學政喀爾欽 二十二年湖南布政使楊灝 又山西巡撫蔣洲 三十一年山西巡撫和其衷 三十一年兩淮鹽政高恆普 福 三十一年貴州巡撫良卿按察使高積 三十一年雲南布政使錢度 四十一年參贊大臣富德 四十一年回疆辦事大臣高棟 四十一年浙江巡撫原任甘肅布政使王宜望 五十一年兩淮鹽運使柴楨原任浙江巡撫福崧 六十一年閩浙總督伍拉納 閩撫浦霖按察使錢受椿 監視及畏罪自盡者八案 乾隆六年提督鄂善 十三年總河周學健 十五年四川學政朱荃 廿二年雲南總督恆文 三十一年湖南巡撫李因培 三十八年大學士四川總督阿爾泰 四十年山東巡撫國泰布政使于易簡 四十九年江西巡撫郝碩 斬監候者八案 乾隆十六年雲南巡撫圖爾炳 又護理湖北巡撫嚴瑞龍 廿五年江西巡撫阿思哈 廿七年侍郎吉慶 四十年大學士雲貴總督李侍堯 四十七年浙江巡撫陳輝祖布政使國棟 五十年兩廣總督富勒渾 五十年江蘇巡撫閔鶚元 較監候者一案 五十年兩淮鹽政巴爾阿

又 諭憲政編查館會奏覆核各省州縣事實分別勸懲開單呈覽一摺著依議行各省州縣事實原以考核吏治鼓勵人才乃近來各督撫所開事實詳核者固多而疏略者在所不免揆諸事理殊難憑信似此積習相沿實於憲政前途大有妨礙即如巡警一項所報事實或僅寥寥數名或尚未經舉辦餘事可以類推定限禁嚴豈容任意諉飾著各督撫查照歷次奏定章程認真辦理務將事實表冊據實造報嚴定等第毋得稍涉虛濫

又憲政編查館會奏考核各省州縣事實略稱查奏定辦法內稱凡州縣列入最優等者令各該督撫加具切實考語送部引見列入優等連任各州縣倘於各項新政實有擴充始終不懈者准予升列最優等頻年屢任皆列次等實缺者停升候補者扣補各等語等見就各省送到事實清冊詳加考核除照章分列最優等優等平等次等四級外內有前上兩屆均列優等而各項新政

實有擴充洵屬始終不懈者應予升列最優等以示獎勵至兩屆均列次等並應照章分別停升扣補又有三屆均列次等一員應由該省督撫撤任察看如實係難期振作即予參處惟考核之法原以甄別人才各省造報清冊必須切實臚陳方足以資旌別而昭激勸茲查各省州縣所開事實詳數者固有所疏略者仍多甚或每縣開報學堂則多至一二千處詞訟則少至一二十起揆之事理殊難憑信顯係州縣任意粉飾而督撫又並不認真覆核率行咨送似此積久相沿必至名實乖違激揚鮮效見值豫備立憲之際實行憲政全恃民官即論巡警一項本年應各粗具規模而三十三年事實或僅寥寥數名或尚未經舉辦定限甚嚴斷不容稍有飾諉請飭下各省督撫查照歷次奏定章程認真辦理務將事實表冊據實造報嚴定等第毋得稍涉虛濫

二年吏部奏見屆三年大計之期各省新設之提學提法度支交涉等使均應照藩臬兩使繕具履歷咨部核奏東三省新疆均改行省應一律辦理惟所設員缺尚未盡補能否按額舉薦由該督撫奏明辦理至教職各省見裁若干缺如員數不敷仍不得照定額保送再查舊例薦舉卓異人員任內如有正項錢糧未完臬係居官清廉能幹或見在兼三兼四繁缺在本省歷俸已滿三年或並非兼三兼四繁缺在本省已滿五年均准其送部引見否則議駁等查各省考核事實列入最優等優等人員但考其一年之政績無論缺分繁簡不計歷俸年限均准保列但卓異人員自應歷俸三年方合黜陟幽明之意惟任內有錢糧未完處分並非兼三兼四繁缺例應扣歷俸五年人員一經列入最優等優等亦得引見加級反視計典為無足輕重等商酌除任內有錢糧未完見在兼三兼四繁缺在本省歷俸已滿三年者仍照舊辦理其任內有錢糧未完處分非兼三兼四繁缺例應扣歷俸五年人員如經考核列入最優等優等者自未便仍以五年歷俸之例相繩應亦以三年計俸核辦其非最優等優等人員仍照舊辦理又奏各省近年保列卓異人員赴部引見有遲至兩三屆之久者亟應申明定例嗣後按照定限其歷屆保列卓異未經引見人員擬限於本年封印前給咨送部帶引再延即照例議處均從之

又法部奏考驗京外已設各審判檢察衙門人員略稱查補行考驗之舉原為審判得人起見惟已設各審判檢察衙門與甫議籌設者不同見有之推檢各官練習已非一日職務亦各有專司則考驗辦法似未可與初試為吏者相提並論且該衙門中不乏熟習律例長於聽斷之員若就法院編制法免試各條比例參觀有不能不分別辦理者等公同酌度復與憲政編查館會商妥協所有在京各審判檢察衙門即擬查取實缺候補推檢各官凡由部院調用通計歷資十年以上或法政科舉人以上出身或合於法官考試任用章程第二條所定襄校官之資格者以及進士出身或以舉人而曾習法政畢業者均准免其考試外其餘各員照第二次考試之法辦理其調用而尚未奏留人員照章應補行考驗者應作為第一次考試仍由部開單請派通曉法律大員一員會同等乘公考驗以昭慎重其外省已設各廳如東三省成立在先天津試辦最早雖屬交通省分若概調該員來京考驗於廳務不無窒礙即由部查照廣西舉行法官考試奏案辦理期便施行至各該督撫因審判需才就京師各衙門先後調用者不乏其人照章均在補行考驗之列統由部行令各該督撫轉飭提法使一律分別補行考驗以杜取巧而免濫竽又查各該審判檢察衙門開辦歷有年所各員朝夕從公不無成績可錄擬仿學堂考試加入動學計分成分案將各該員平日辦事成績與考試各門總分數平均計算以二除之而定為考驗總分數庶考言詢事不僅爭一日之短長而責實循名要重在平時之經驗

又憲政編查館等奏各省府廳州縣事實向歸臣部會同考核見在司法既已獨立而提學使及巡警勸業兩道又復各設專官將來府廳州縣官制尚須改訂職掌必有變更若仍照從前奏定章程恐難適合擬請自本屆考核竣事後即行停止由各該主管衙門另訂考核章程會同督撫飭司道認真辦理又憲政編查館會奏遵議考驗外官畫一辦法略稱等前次奏定切實考驗外官章程六條原分考試考驗兩項辦法正途出身及曾任要差各員統歸考驗餘則通行考試歷經各省遵辦並陸續咨報到館等以各省辦法未能畫

一會於上年加訂章程三條內有法政知識宜設法推廣一節係採取湖南法政官校附設自修科辦法除應入學堂各員仍分別入學肆習外其餘正途出身及見有要差暨考試列入一二等人員均須領取法政學堂講義自行研究遇有疑義隨時函詢學堂答復每屆一學期將所閱講義及研究心得作為筆記並送學堂核驗如有曠廢玩棄情事由督撫分別記過此項講義由學堂擇必要學科編纂發給以三學期為畢業等語當經通行各省遵照在案該升撫所謂趨易避難無人肯投身學問之途一節自可無慮見在湖北江西河南三省已定有發行校外講義章程大致與湖南自修科辦法相似而尤以河南為較備其餘各省當再由_臣館咨令查照前後奏咨章程切實推行以宏造就竊維法政一科雖重學問尤貴經驗經驗既富自能措置裕如總在各該督撫察吏嚴明實心考驗即其政之舉廢以見其才優絀庶幾地方行政日起有功三年法部奏酌擬各省提法司屬官獎勵辦法略稱提法司衙門屬官分掌各科責任繁重事原創始端資經營締造之才期以方來亦負爾規曹隨之責又况必經考試登進之資格綦嚴果其著有微勞報最之升途宜定見在各省提法司衙門屬官分科辦事迭據奏報有案將來期限屆滿其辦事勤勞確有成績者自應分別酌予獎敘惟如何獎敘之處向無明文規定若不豫定畫一辦法不足以資鼓勵而便遵守上年七月學部奏酌擬學務公所人員獎勵辦法一摺內稱其有實心任事屆滿三年有職人員准其按照尋常保舉加銜無職人員參酌定章咨明吏部給予六七品職銜如供職又至五年之久不論有無官職一律均照異常勞績請獎至三年屆滿未經按照尋常請獎者至五年屆滿時亦准一律按照異常辦理各等語奉_旨依議欽此歷經遵照辦理_臣等公同商酌所有提法司屬官獎勵辦法擬即按照學部奏定學務公所人員獎勵成案一律照辦

憲政編查館原奏內開新政日興請由各該主管衙門另訂考核章程會同督撫督飭司道認真辦理等語當經農工商部就主管事項擬具考核直省府廳州縣辦理實業勸懲章程草案遵照新章咨送內閣由_臣奕劻等交由法制院逐條覆核簽商修正定為十三條_臣等伏維求治端在於得人循名要期於責實必長官有雷厲風行之舉斯屬僚無敷衍塞責之心中國地大物博甲於歐西種植工藝果能力求進步不難立致富饒是又在各該督撫重維本計體察情形隨時咨商閣部認真督飭之耳

又農工商部會奏勸業道大計應照民政部奏定巡警道大計辦法由各該省督撫注考由農工商部郵傳部會同考核殿最

又農工商部會奏考核直省府廳州縣辦理實業勸懲章程略稱宣統二年前

皇朝續文獻通考卷九十三

選舉考十 賞選

臣謹案賞選爲 朝廷不得已之政內外大臣絀於理財不能仰體 列聖求才防弊之苦心以致屢閉屢開終莫由塞此弊孔國與民交受其病矣明知科目出身之人不但飢餓不振卽貪賊壞法者亦復項背相望與捐納實一邱之貉第流品愈雜則澄敘愈難此孔不塞勢將官多民少後難爲繼開例以來其爲選舉一大宗者歷有年所不可以不紀馬考績考均有此目特循其名以補前考所未備云

順治十八年 諭吏部兵部向來文武各官捐助銀米各部議定有紀錄加級授官之例今思捐助急公雖應激勸但大小臣工各有職業必實著勞績方可加級授官若止捐助銀米非慎重名器之意嗣後有捐助銀米者俱不必加級授官祇予紀錄除有事故准其抵銷外若有應加卹資者作何定議酌議具奏康熙十六年左都御史宋德宜奏捐例係萬不得已而開然開例三載所入祇二百萬有奇而捐納最多者莫如知縣至五百餘人始因缺多易得踴躍爭趨今見非數年不能選授亦觀望徘徊請 飭部限期停止以示慎重名器之意十九年部例捐納官到任三年後稱職者具題升轉不稱者罷之已復令捐銀者免其具題左都御史徐元文奏 國家大體所關惟賢不肖之辨今吏途甚雜所以令三年具題者欲使賢者勸不肖者懼若輸銀可免具題是金多者與稱職同科也 臣謂稱職非可捐納而得此曹以見任之官營輸入之計何所不至所急宜停止者也歲貢本屬正途自開捐納生員之例遂得并捐歲貢 臣謂正途非可捐納而得其由捐歲貢得官者仍須保舉方可一體升轉所宜急更者也總之捐納係一時權宜願於收復滇南之日卽 賜明詔概止不行則聖政一新而人心大快矣

雍正二年 諭戶部開例捐納少助軍需原屬一時權宜非可行之久遠 皇考會屢言捐納非美事朕續承大統亦以軍需浩繁戶部供支不繼捐納事例仍暫開收今仰賴 皇考在天之靈西邊軍務將已告竣卽見有需用錢糧之

處爲數無多著將戶部與陝西各項事例卽行停止其運糧赴巴爾庫爾與肅州所動西安藩庫銀兩悉作正項報銷

乾隆三十五年 諭從前暫開捐例原屬一時權宜究於事體非宜停捐以後曾有奏請再開者朕皆斥而不允今國家帑藏充盈方屢次加恩普錫糧賦惟期歲富閭閻國用無虞不足開捐一事竟當永遠停止至於見行事例如報捐貢監並徵末職銜及封典加級等項皆於名器無妨原可仍聽照舊捐納因思未登仕籍之人冀邀冠服章身並有加捐實級請封藉以顯揚者自屬人情之常且所指定係虛銜既無礙正途銓選亦不致濫竊誤公若僅以末職卑階爲限未免阻人希榮之念或可推廣其例量以何銜爲止俾伊等各隨所願量力報捐至降革留任人員原屬因公處分且其人尙不至於擯棄是以量予加恩俾得在任自效但一經議處卽停升轉直待數年無過方准開復從前曾有捐復之例復經部議刪除第念此等人員未嘗無可及錄而用之人若以微省淹滯亦覺可惜自當仍准援例捐復俾得自新以上各條應如何定例之處著軍機大臣會同各部詳悉妥議具奏尋議見行捐例外官自未入流以上至州同爲止武職自把總以上至游擊爲止並無京官職銜今擬照豫工例京官自未入流從九品及一應小京官以上至郎中爲止外官自未入流以上至道員爲止至武職舊例係捐至游擊職銜已屬三品毋庸再議俱准其捐納職銜不准選用從之

五十八年 諭爲治之要首在用人而人才究以正途爲重前因軍需河務支用浩繁暫開捐例原屬一時權宜不久卽行停止迄今閱二十餘年而府庫充盈並不因停捐稍形支絀銓選既無壅滯人才亦得奮興可見捐納一事竟當不必舉行不特慎重名器並以嘉惠士林我子孫亦應奉以爲法倘復有奏請開捐者卽爲言利之臣更當斥而勿用惟貢監一途乃衆所願弗占正途不過給予頂帶無礙銓政亦仿古人納粟之意事尙可行

嘉慶四年 諭給事中廣興奏道府州縣等官管理地方職任綦重捐納人員初登仕版一旦濫膺重寄難免貽誤請將此次由俊秀附生報捐道府知州知

縣四項人員俱停其銓選實缺仍准加捐分發製籤各省交與該督撫留心試看如果材堪造就者扣滿三年酌量題補等語係爲慎重地方澄清吏治起見其意固屬甚善但此事若於初開捐例之時即行條奏原可採取施行今此四項人員俱早經報捐上兌而該給事中始爲此言未免稍遲矣夫納貲仕進其中固有可用之材然吏道雜而多端原屬出於不得已之舉今已准其援例報捐所捐之項俱已交納而又停其銓選則是示人以不信其停選後復令加捐分發於政體亦殊有礙該給事中此奏難以准行至所奏報捐人員由部掣籤時請欽派科道數員赴部會同監掣一節於防弊之道自爲有益著照所請辦理

八年奏准報捐官生隨任祖父及親伯叔親兄弟見任京外職官任所者在京具呈本衙門在外申報本省上司准其請咨赴選進士舉人恩拔副優優貢亦准取具印結具呈到部俟行查禮部如果科分名次准貢年分相符亦准註冊銓選均毋庸再取本籍文結

又奏准捐納人員三代名姓存歿實在年歲以及有無次丁等項總以原取赴選文結爲憑不得任意呈請更改

又奏准官生上捐後領有戶部執照如有由候補候選人員報捐者查其業經取有本籍赴選文結以及降革捐復人員已有前任交代清楚並回籍文結到部者均免其重取文結仍令該員取具同鄉六品以上京官印結具呈到部呈驗執照查與捐冊相符即准其註冊銓選

又奏准捐納人員給有執照由原籍地方官起文赴選者該督撫嚴飭地方官查明該員有無違礙事故取具鄰族甘結逐名造具赴選冊結按限出詳不得任意遲延其中如有勒指情事准本員取具印結呈明註選仍行文該督撫查明果有勒指情事即行嚴參究辦如本員未經在籍具呈率行赴部呈請註選將本員嚴行議處

十年奏准見任外官有經管倉庫錢糧違例捐陞離任及部選實缺人員各督撫等於該員赴部時確實查核咨文內聲明交代清楚實無虧欠字樣方准銓

選赴任

十一年奏准見任實授之員捐陞離任續經註銷仍歸原職補用者悉令其以實缺坐補

又奏准捐納道府如係曾任知府同知直隸州知州并州縣正印等官加捐者及見在滿漢京職堪勝繁缺准以繁簡各缺一體選用其貢監生初捐及見捐滿漢京職僅堪簡缺並外任佐雜等官遞捐者專以簡缺選用

十二年定捐納道府加捐分發不論繁簡均准製籤分發俟試用一年期滿其原以例准部選繁缺者無論簡缺均准該督撫酌量題補原以例應專選簡缺者該督撫詳加察看如果堪勝繁缺據實奏明留於該省遇有相當缺出酌量題補其祇堪簡缺該省並無簡缺可補者亦據實奏明或歸部選或改發有簡缺省分候補請旨定奪知府原以簡缺選用者分發後不得以繁缺題補其無簡缺省分即毋庸歸入分發

又奏定舊例報捐分發教職業經保送先用復遵新例報捐過班分發者與新例捐納人員計缺輪用先用新班初捐二人次用舊班保送先用捐過新班分發者一人

又奏准捐納各項人員止准聲明實在之祖籍寄籍其有占至二三省者概不准行

又奏准援例捐陞未經銓選緣事降革續經援例開復原官其捐陞之項不准隨帶如捐陞離任後已取有交代文結報部即係實已離任候選之員遇有降調處分應照捐陞品級遞降註冊銓補如雖捐陞任尚未有交代文結報部仍係見任官遇有降調處分概不准照捐陞品級遞降註冊銓補

十六年 諭部院捐納各員俱已籤分學習行走既云學習則必有優劣之殊該堂官於行走年滿之時自當詳加甄別乃近來各該堂官於捐納報滿人員無不保留一味市恩邀譽只圖見好於人不顧登進之濫不辨賢否之別近來大員俱中此病朕實寒心嗣後各衙門於捐納學習各員斷不准一概留署務當秉公甄別不但其才質高下差使勤惰不當混淆即其平素行止亦當留心

審視核實去取切勿稍涉徇情浮濫干咎

二十四年 諭吳璣等奏從前歷屆大工均有投效之例或認辦工段或交納捐貲此次武陟大工請援照成例准令各省投效人員赴工捐輸交納豫省藩庫除准分發四省三河外其連界之山西陝西安徽湖北浙江等省並准分發自道員至佐雜分別授職等語見在武陟大工需費浩繁著照所請准令各省人員投效其如何按捐輸之多寡分別授職及分發之處仍著吳璣等查照上屆成例妥議具奏

二十五年 諭吏部議奏正途捐班選法請仍照舊例一摺銓選之法本有一定班次捐班就本班銓補於正途並無撓越自未便因一時人數較多遽更舊制嗣後捐納人員著責成各部院堂官各省督撫認真查察如有流品猥雜及不識詩書實難稱職者隨時甄別據實奏聞勿得稍有姑容以杜倖進

道光二年 諭朕恭閱 皇考仁宗睿皇帝實錄內載嘉慶十六年 諭部院捐納各員俱係籤分學習行走既云學習則必有優劣之殊該堂官於行走年滿時自當詳加甄別乃近來各該堂官於捐納報滿人員無不保留一味市恩邀譽止圖見好於人不顧登進之濫不辨賢否之別近來大員俱中此病朕實寒心仰見 皇考澄敘官方隨時訓飭至意朕思各部院行走司員不獨捐納一項即正途出身人員籤分學習於行走年滿時亦照例由該堂官察看分別奏留此等人員奏留後即可循資得缺以次洊升迨其俸滿截取便膺外任若於奏留時不嚴行甄別則庸劣闖首之員均得濫竽充數一經外任必致貽誤地方不可不慎之於始嗣後各部院堂官於所屬學習行走年滿司員無論捐納正途務當破除積習秉公和衷據實甄別毋得瞻徇情面濫行奏留如有任意姑容不加察覈將來該員得膺外任於引見召對時經朕看出或別經訪聞查有劣迹惟該堂官是問

八年 諭此次酌增常例報捐分發人員於本月籤掣各省試用例應引見發往者共一百餘名其例不引見發往人員為數更多此後每月尚有陸續分發之員向例試用期滿該督撫鹽政甄別去留此項捐納試用人員固未便過事

苛求斷不可稍有姑容致滋冗濫著各該督撫鹽政等於該員等到省後留心察看如有不識詩書或限於才識實難稱職者不必拘定年限隨時認真甄覈據實具奏

咸豐元年 諭給事中汪元方奏請停增附捐納教職一摺教職有考課諸生之責增附生員學業尚淺驟令司鐸不足以示矜式著即將增附捐教一條永行停止至前項捐生已經選補者應不准其濫膺保薦其應如何酌定限制之處著該部議奏

又戶部奏上年奏准暫開捐例擬請行文各省遵照辦理謹先酌議辦法二條一應屆奏開事例捐生赴部報捐零費甚為繁重應請將歸公飯銀照費並四分平餘具呈領照諸費概行裁撤一外省捐輸章程有加無已所捐銀數動用並不報銷無從稽覈此次擬開事例係在部庫交銀將外省捐輸一律停止從之

二年定郡王載銓等奏酌擬寬籌軍餉章程一王公文武京外各官及致仕休致降革丁憂告病大小官員一體量力捐輸一八旗已未出仕之宗室量力捐輸應如何獎勵之處請 旨定奪一翰詹科道准捐外任一京察一等記名道府各員准捐分發一京外各官已補缺者試俸歷俸年限准全行捐免一內閣中書准捐免試俸一各項回衙門行走之員准報捐外任一告假告病及丁憂服滿在 恩詔以前各員准仍照原官捐請封典並准加級請封一捐封不限服制並准照例定應封品級酌加推廣一准推廣外姻尊長捐封一休致人員准照原銜捐封一降革不准捐復人員除實犯賊私外其餘准加倍半捐復一舉人及恩拔歲副優貢生准報捐國子監助教學正學錄一文武各官分別京外准各按品級報捐花翎一降革一品以下文武官員向不在捐復之例者准捐復原官頂帶一軍臺效力官犯准先繳臺費分別釋回免遣一發遣新疆等處官犯分別已未到戍酌定贖罪銀數准釋回免遣一軍營官員兵勇所得領項及商賈匯兌銀兩暫行交官充餉給與印單酌定期限給領一用廣儲司舊存金牌以抵軍營賞需一照浙江夷務案內用賞銀執照一京外置買房田未





稅契者於文到日限三月內補稅一招商開採熱河及新疆各城並各直省所屬金銀礦得旨覽所議各條各項回原衙門行走之員報捐外任仍應歸吏部帶領引見候朕欽定京外文武一二品降革人員如有願捐復原銜者亦須奏明請旨以示限制而懲惡劣新疆等處官犯贖罪一條著暫不必行餘依議六年 諭御史毛昶熙奏請嚴捐復之例並飭督撫保舉廉能各等語近年捐例疊經推廣即如捐復一項未免失諸過寬嗣後除因公獲咎人員仍照例准其捐復外其有事涉私罪而核其情節尙屬可原者始准加成捐復若廢弛不職有玷官方酷虐貪汙念民瘼者不得率行奏請以致漫無區別其應如何分別條款明定章程以示限制之處著該部妥議具奏至澄清吏治必先拔擢賢才自用兵以來各直省牧令或堅守城池認真團練或安輯難民嚴鞫土匪一經奏請獎勵無不立沛恩施嗣後仍著各直省大吏認真考察所屬各員如有治行廉能內而安民外而禦侮著有成效者隨時專摺保奏候朕錄用進賢之賞在所不吝倘所舉非人或失諸冒濫亦必治以應得之咎務當循名責實勿徇虛聲以副朕孜孜求治之至意

七年 諭給事中張修育奏道府捐輸獎敘請明示限制等語各直省候補候選道府人員捐輸軍餉等項准其記名遇有本省缺出請旨簡放施恩已極優渥而該督撫等或請遇有各省缺出簡放未免漫無限制此後除軍營保舉不計外所有捐輸及別項出力人員止准請旨記名遇有本省缺出簡放不得請放各省之缺以示限制

又 諭御史何兆瀛奏捐納司員請照月選官之例由該堂官分別考其文理等語各部院司員向例於三年報滿後由該堂官分別咨留近來捐納司員人數較多能否主稿辦事自應豫為察看著各部院堂官於該司員等奏留之先驗其文理如果能辦稿案即與正途人員一體派差其或未能主稿而心地明白行走勤慎者當派雜項差使以資練習

又 諭御史朱文江奏捐納司員應令講求例案無庸考試論題一摺前因御史何兆瀛請將捐納司員考試文理當經降旨令各部院堂官於奏留之先驗

其文理如果能辦稿案即與正途人員一體派差原以部院行走人員向來不盡由科甲出身但須明白稿案方可造就成材茲據朱文江奏聞近日兵部考試司員係用論題並未詢以本部事件是徒有考試之名於各該員之能否當差仍屬無從知悉定例學習司員三年期滿本應分別去留惟在該堂官平時察其才具能否辦事俟屆期滿之時自然去取公允毋庸以考試虛文徒飾觀聽

八年 諭吏部奏遵議山西巡撫恆福等請停增附捐教一摺據稱捐例變通原屬權宜之計請俟軍務告竣再行停止等語教職有考課士子之責增附生捐教前經停止嗣因戶部奏請暫為變通究不足以示矜式所有增附貢報捐教職一條仍著停止以重學校而勵真才

九年 諭據勝保等前奏推廣捐例八條除該部議駁各條外其議准之候補班人員准捐候補班先用保舉人員准捐入候補班及軍務省分人員准於鄰近軍務省分通融捐升改捐軍營帶隊差委人員准捐免赴部投供各條均經照議准行想該部業已行文知照矣

十年 諭吏部奏請將正途京員捐升道府選法酌擬變通一摺吏部銓選道府各員其由正途京員捐升者俱照見行章程辦理相沿已久若為特旨錄用人員遵行更改舊章殊多窒礙且恐視為捷徑紛紛改途易開取巧之門嗣後正途京員未經補缺捐升道府著仍仿照咸豐元年奏定章程專選簡缺所請以繁簡統用之處著無庸議

又 諭前因軍務未竣推廣捐例節經戶部等衙門議准親屬同官一省捐免迴避茲據吏部奏稱行之日久流弊滋多著照所議即行停止其從前已經捐免各員著各督撫府尹勒限三個月飭令詳細呈明如係捐省之員准其另指一省各按原班序補倘係軍務省分不得另指無軍務省分以杜取巧業經得缺各員咨部以總督兼轄省分改掣如無總督兼轄及兼轄省分或係本籍祖籍即改掣鄰近省分均歸入班次遇缺即補未補缺各員准其呈明戶部將迴避銀兩改為加級記錄倘逾限不報即照隱匿私罪例議處不准抵銷以復舊

制而肅官方

十一年 諭給事中高廷祐奏捐官流品濶雜請飭令出結官認真稽查等語近來捐例繁多流品不一全賴各省出結官認真稽查以杜弊混若如該給事中所奏近日各官出結多虛應故事有名無實以致身家不清白之人皆得蒙捐出仕無從指摘更難保無匪徒混迹其間實屬有干禁令嗣後各省有自俊秀貢監以及雜職虛銜捐官者先令取具親友互保到局對認無誤方准出結其餘各項報捐人員亦皆詳究來歷毋任混淆倘有前項情弊除出結官照例議處外其管理印結局官員該部查取職名一併嚴加議處

同治元年 諭前因御史裘德俊奏商賈人等祇准捐虛銜雜職不准報捐正印實在官階當令吏部戶部會議具奏茲據奏稱商人報捐例所不禁倘其中有通達事情留心時務者亦未便阻其上進但文員正印官職於民生國計關係尤多名器不得不益加慎重該御史所奏不為無見等語著照該部所議自此次奉旨之日為始凡由商賈出身者祇准其捐納虛銜頂帶並州同以下佐貳雜職實在官階等項以示限制其在奉旨以前報捐者均著免其置議如官聲尚好著有勞績人員仍准予以正印升途俾資觀感

又 諭前因吏部戶部會議御史裘德俊所奏商賈人等不准捐納正印官以示限制當經降旨允准續據戶部奏稱捐銅局接奉此旨後捐生觀望有礙餉需請仍照舊章辦理復經旨依議茲據御史劉毓楠孟傳金奏稱前後所奉諭旨未符請折中辦理並明降諭旨各等語戶部所奏捐銅局捐輸章程請仍暫照舊章辦理因恐捐生長難觀望不能不權宜一時是以於原奏內聲明軍務稍平再行遵辦於所奉諭旨尚非不符惟該御史等所奏係為澄清流品起見著該部俟軍務稍平即將商賈人等不得報捐正印及捐生取具京外各印結章程遵照前旨辦理

又 諭御史呂序程奏休致及永不敘用人員請不准開復捐復等語向來休致人員例不准其捐復其永不敘用之員劣迹昭著情節尤重是以終身摺棄以示重懲定制綦嚴纖毫未能寬假乃近來各省休致人員往往保舉開復並

於永不敘用人員亦請先行開復永不敘用之案以為將來保舉地步實屬故違定制殊非朝廷澄敘官方之意嗣後各省督撫及各路總兵大臣於此二項人員不准濫行保奏亦不准代請捐復如有仍前濫習濫保者必須將該督撫大臣從嚴懲處並將所保之員查明有無賄屬請託等弊分別從重治罪二年 諭給事中郭祥瑞奏近日捐班流品太雜竟有市井賍僧及劣幕書士痞無賴與臺僕隸之徒亦皆張羅雜湊濶入仕途請飭各直省督撫遇有捐納到省人員認真考察嚴加甄駁以清吏治等語軍興以來需費浩繁國帑支絀捐銅事例之設實朝廷出於不得已見既難於停止即不得不思所以補救之方若如所奏此輩濫等官途貽害百姓迨至激成事端仍復耗費軍需則是捐銅之設非徒無益而反有害近來外省大吏如左宗棠沈葆楨屢經嚴駁州縣捐納出身者居多均經降旨分別准行可見各該省疆吏果能留意人才於此輩人等到省接見時早有一番考察如果才具品概不能稱職非惟不可令其到任且必當從嚴甄駁為朝廷惜名器為仕途清流品為地方弭禍亂各直省大吏實操其權嗣後著各直省督撫府尹遇有捐納人員到省務必認真察看或考其行誼或訪其聲名或令作牧令之論或令讀吏治之書隨時分別舉劾如有惡劣不堪造就者即行嚴參毋稍姑息庶吏治可望肅清流品不至混淆而於軍需亦仍無妨礙

臣謹案納費為吏濫觴漢武當是時史公作平準書已太息而首之曰郎選喪矣吏道益雜不選而多賈人矣然要若不若後世之濫也蓋徑既廣流品自蕪以利相牟何所不至如郭祥瑞所請近日捐班竟有市井賍僧及劣幕書士痞無賴與臺僕隸之徒亦皆張羅雜湊濶入仕途烏虜若輩蠢蠢皆為利來 朝廷名器豈容假人急切為籌款計惟變賣官為要爵尚為彼善於此耳

三年 諭閣部敬銘奏請重名器以裕京餉一摺據稱捐例之開藉以籌餉餉精近來行久弊滋如道府州縣等官責任均重自減成收捐以來以官為貿易者得爾其開明效驗將賸虧帑項請飭將道府州縣四項仍按舊餉定例減二成

章程呈繳實銀均在京銅局報捐等語所奏不為無見道府有表率之責州縣為親民之官均應慎選廉能以襄治理近因指數較輕遂致所收易濫在挾資干進者流且自視為無足重輕一經得官於地方吏治民瘼漫不加察恣情侵蝕固利營私下則朘削民生上則虧挪國帑總緣收捐太易人品混淆亟應明定章程以示限制嗣後各省捐局除丞倅雜職仍准照常收捐外其道州府州縣四項官職著戶部按照籌餉定例減二成章程收捐實銀並令均在京銅局報捐各省捐局即將收捐道府州縣四項官職之處一律停止

四年山東巡撫閻敬銘奏竊惟捐例之開藉以籌備京外餉精原為萬不得已之政而行久弊滋不但無補軍精抑且暗虧國計伏見我 皇上御極以來時以澄敘官方為念於大學士祁寯藻順天府府尹蔣琦齡之奏下疏通正途之議於給事中郭祥瑞之奏嚴甄別捐納之條於湖南巡撫譚世臨之奏加實交免保之例仰見 聖明洞鑒至悉至詳但流品之雜名器之濫諸官皆詳切言之而流弊之極至於侵 國帑病民生者則言之未詳夫 國家立賢無方正途出身者未必皆賢輸納出身者豈盡不肖然捐輸原為籌餉計 請即以籌餉言之外省自道府以至佐雜等官皆准捐納丞倅雜職尚無民社之責道則巡察數郡府則表率一方州縣一官則寄以地方寄以百姓寄以城池府庫寄以錢糧征收責任尤重自古未有不慎選牧令而能治天下者也即以納資階進亦不宜視之太輕今計各省捐輸減成章程合以籌餉定例直東兩省離京不遠報捐章程與銅局相等豫省以餉票折收加一成見銀約居十成之二湖廣川浙約居十成之三江西兩廣約不及十成之三雲貴約居十成之二安徽全收餉票約居十成之一其餘各省均無過於三成者計由俊秀捐納州縣至指省分發不過千金至捐免保舉一成長收實銀亦僅增數百金耳持千餘金之本儼然為數萬生靈託命之官宜其祇計及州縣之有錢糧未必計及地方之有百姓以 臣所見收納錢糧而計山東一省大縣五六萬兩小縣亦萬餘兩不等彼以官為貿易者廁於其間略一侵吞已逾原捐之數即令嚴查重究參革查抄而所侵之項已歸無著 國家所賴者惟正款之錢糧捐輸不過補助

於萬一若如此明效輸將暗虧帑項通盤籌計是得於捐輸者少而失於帑項者多即為籌餉計亦不宜減成輕予人以州縣也道府為督率州縣之官州縣既須照例加成道府亦應歸一律惟有仰懇 皇上飭將道府州縣四項官職仍按籌餉定例減二成章程呈繳實銀均在京銅局報捐不得以鈔票見錢繞算庶救餉補偏而於軍餉亦大有裨益或謂見在部定章程凡捐納人員到省後均由督撫甄別立法慎密察吏不明督撫之責也不知巧宦行徑每善彌縫到省之初類能謹愼一經受象目見可欲違易其操迨至上官查出利參於事已為無及即於此項人員到省嚴為考試胥子停委停補既非 朝廷示人以信之義亦無以激輸公報效之忱且停者此輩安必來者即勝於前待之太輕人不自惜棄置若器改鑿非宜 臣愚以為徒齊其末不如力遏其源也或謂同一捐資未必捐項多者皆可用之才捐項少者盡不肖之輩不知從前捐納州縣一官不下萬金非家道殷實及自度才器尚堪任使者必不敢冒昧呈捐其父兄亦不令其子弟驟進即任官後經手錢糧思欲染指自揣身家甚重亦不肯嘗試為非所以 朝屢開事例權濟一時均無大弊獨至今日不然者因捐一州縣所費無多有力者子弟相沿爭為龍斷無力者借貸而至易於取償官不安於末秩士不安於讀書眾志紛紛羣趨於利欲其自愛其可得耶非開捐之為害而減成之為害昭昭然矣或謂各省軍務未平需餉正殷京師八旗營餉待用尤急遽議加增或恐捐生觀望致餉項無出不知見辦軍務各直省均不專藉捐輸直東豫晉之餉出於地丁江皖湖廣之餉出於地丁者半出於釐稅者半粵閩之餉出於地丁鹽茶陝甘之餉出於地丁協濟川浙之餉出於地丁釐稅惟雲貴兩省餉無所出稍資於此合歲而計所入無幾究亦無益軍資今僅將此四項官職改歸京局其餘仍照例減成報捐則各省均可補苴毋庸過慮惟京餉所需甚急何敢不慎加計議 臣在農曹詳知銅局每月所入出於封典職銜貢監生者十之七出於實職官階者十之三此四項在實職官階中尚不能及三分之一即使上免者少於捐務原無大損况擬收新章照籌餉例定銀數收納實銀以多補少捐一名仍可抵從前之三四名且外省不得

報捐則此項必盡歸餉局亦一律不准減成則捐生無所希冀人知名器可貴自必更樂輸將京餉將日見其增而無所損此所以急請變通辦理也前准部咨議覆湖南撫臣惲世臨之奏擬俟軍務稍平再行更正部臣綜計盈虛實為慎重軍餉起見臣之所請非敢不利害兼籌實見此四項官職減成收捐並無益於軍餉而反有傷於國計故敢冒瀆 聖慈妄獻末議

五年 諭左宗棠奏閩省武營捐班太多請分別辦理並請停止報捐武職等語所奏甚是武營流品混雜勢豪策名右職藉為護符劣弁巧獵升階專為牟利自應嚴加區別以肅軍政所有福建捐納武職各員弁著該督撫一律送部引見其未經引見人員並不准改標委署惟此等情弊不獨福建一省為然嗣後各省報捐武職均著停止

七年 諭御史袁方城奏仕途流品日雜請飭考覈裁汰一摺據稱近年捐納人員眾多其中流品混雜請嚴行裁汰等語敕令與民最親必須公正廉潔方足以資治理若如該御史所奏實恐仕途日雜亟須嚴加考覈著各省督撫於通省州縣內凡由俊秀監生捐納之員無論實缺署事候補隨時面加考試如有文理清順議論通達者方准與正途人員一例升轉補用倘文理荒謬即以原品休致考試時仍須嚴密關防毋任代倩傳遞虛行故事至居官之勤惰行己之貪廉雖正途人員亦當一體隨時察看秉公舉劾

馮桂芬變捐例議 道光中安徽朱孝廉鳳鳴叩關進所為尚書題論 上溫詔褒之其任官惟賢一論頗傳誦 京師有曰 國家用科目君子小人參半也用捐班則專用小人矣又曰上以急公好義為招特假以為名下以利市三倍為券將務求其實又曰捐班途迫必工賄賂必厚交結必廣趨避必熟上司必愛悅吏部必護持又曰與其開捐不如勒派富民百十家之勒派其害偏開捐則將為貧民億萬家之勒派其害普與其開捐不如加賦有形有限之加賦其害近開捐則將為無形無限之加賦其害遠決開捐之弊可謂至矣平心論之實苛論也 國朝捐班亦有李公世傑傅公鼎諸人安得謂專用小人乎願特千百中之一二耳夫求一二

於千百中難矣近十年來捐途多而吏治益壞吏治壞而世變益亟世變亟而度支益蹙度支蹙而捐途益多是以亂召亂之道也居今日而論治誠以停止捐輸為第一義 國朝自招民知縣以來時開捐例皆暫行而非常行道光咸豐兩朝 御極之初即首停捐例厥後以大兵役徇廷臣之請始又舉行固知開捐非 列聖意也願今軍務未肅待用方亟如之何考商輟賜民爵為輕名器之漸漢置錯從而鬻爵甚於軼矣至入贊補吏創於漢武溢於東漢及晉縣延於唐宋元而幾絕於明景泰元年始命輸納者給冠帶二年令世襲武職四年令生員納粟補國子生如是而已然則必欲為權宜之計無已其修民爵之令乎商輟之法貧者得賈與人漢時亦有民得賈爵之令又公大夫以上令丞與抗禮今捐輸之推廣無孔不入獨此二者未之及新例移獎有賈與人之賈而必設為中表至戚之限明導以欺何為者至郎中道員之賈一縣令得坐堂皇以辱之安望抗禮哉是亦一開也應請留封典虛銜二者倍蓰其捐數許於若干年內移名若干次有官者不與更仿令丞抗禮之制明定禮節以榮之韓氏英曾有此議實行之無弊者彼諸夷以利為國富商輒與大酋敵體而絕無入仕之路一犯法則朝為座上客夕為階下囚故富商倍重犯法此亦抗禮無弊之一證其實職升銜加級及賈監一切停止見任有政績者上司特疏保留改其籍曰薦舉其餘無論實缺候補候選皆視原輸銀數改入民爵以示大信且令天下曉然知非往時甫停復開之比捐班中果有才士無所冀俸無所需待將羣然泮厲鼓舞於正途斯官方可以澄敘人才可以奮興矣

光緒八年 諭給事中孔憲毅奏捐納人員過班指省兩項請飭停止等語著戶部議奏

九年戶部衙門奏海防需餉請開捐實官以裕餉源奉 旨依議 臣謹案 朝廷或逢河決或遇海警哀者仰屋無計率以開捐實官請迨事竣而捐留捐留而弊叢花樣益新價值益賤 朝廷收涓滴之利不

知其取諸吾民者將鼓肌劍髓以償之豈特如賈三倍也哉

二十七年 諭奉 懿旨捐納職官本一時權宜之政近來捐輸益濫流弊滋多人品混淆仕路允雜實爲吏治民生之害見在振興庶務亟應加意澄清嗣後無論何項事例均著不准報捐實官自降旨之日起卽行永遠停止通限一個月內截數報部毋得奏請展限其虛銜封典翎枝貢監及見行常例准捐各項究竟有無妨礙著該部核議奏明辦理

三十年戶部推廣捐復新章

三十一年戶部奏請停止捐納武職略稱請將武職捐輸實官虛銜及捐復銜翎封典一切捐項一律停止除已經分發人員照章辦理外其未經赴部各員俟奏准之日起限五個月內所有捐輸人員統令赴部分發倘逾期不到一律停其分發以重員缺而肅營伍

又以四川巴塘兵事需款浩繁准援廣西等省成案開辦實官捐一年

又山東巡撫楊士驤奏山東黃河工款重要七項常捐實難停止請再展限一年以資彌補

三十二年袁世凱奏前因准軍餉項不敷計授先後向津滬號商挪借計積欠銀四十餘萬兩無計歸補請准照新海防例獎給實官以免商情疑阻下戶部議奏

又戶部奏准停止實官捐輸

三十四年陸軍部奏據御史李浚奏稱近年各省土豪地痞於頂戴翎枝任意僭用請 飭下各該部除正途文武功名曾經欽奉 諭旨外其各項獎勵未經發鈔之件概由各該部按照實官虛銜翎枝頂戴以一票爲一起行知各該地方官註冊存案並由地方官開具姓名住址榜示通衢如部文未到本人領有執照自行呈驗者准予先行出榜倘各部並無行知本人亦未驗照不難隨時發覺治以應得之咎等語查該御史所稱各節係爲慎重名器起見軍興以來各軍營功牌獎札毫無限制遂使不肖官吏展轉售賣其弊不可究詰請 飭下各省督撫及統兵大員嚴密查訪如有僭用頂戴翎枝者分別究辦所有

發給軍功牌札宜令造冊按季咨部備案至開具姓名住址榜示通衢應由各該省體察情形辦理至 臣部核議奏咨獎案卽隨案行知各該省並照官階註冊所請以一票爲一起行知各該地方官註冊之處應毋庸議

又 諭張人駿電奏悉所請援照江直兩省成案辦理代收賑捐及常捐各項著准其開辦一年期滿後卽行停止度支部知道

宣統元年度支部覆奏御史石長信奏補助海軍優加爵賞略稱查原奏內稱中國議復海軍需費尤多查漢之卜式輸財助邊賜爵關內侯日本有以重資濟國難者亦賞男爵擬請 特設海軍爵賞凡五等之封除公侯伯以待勳庸外其子男及輕車都尉以至恩騎尉等爵均以補助之多寡定爵之大小及承襲之差等惟子男分位崇高報效若干必請 旨特賞並優予權利俟設上議院時與各世爵一體選舉其嫡子之承襲者准入貴胄學堂畢業時仍按等第酌予實官至輕車都尉以下等爵俱照諸議局新章一體選舉其嫡子之承襲者准於學堂畢業時亦按等第酌予實官以示獎勵是實官之捐榮及本身好爵之糜慶流後裔迨規則擬定通行各直省並咨使臣駐各國者及各商會則國中巨富海外僑商必有熱心公益聞風而興起者請 旨飭下度支部分別等差詳定勳章等語 臣等竊維興復海軍必以籌款爲當務之急該御史奏請設立海軍爵賞自係爲籌集鉅款優加獎勵起見惟錫爵雖屬至榮榮輸終非易事該御史原奏以下式輸財賜爵爲言 臣等固不敢謂急公好義世必無卜式其人第以今日民力彫弊各省捐輸均成弩末一旦懸爵賞以鼓舞之而謂富室僑商聞風興起必能立集鉅款此說未可深恃前年農工商部奏定華商爵賞章程凡辦理農工商業資本在一千萬圓以上或二千萬圓以上者分別賞給子男封爵典至優渥在商民自出資本自營實業與輸納公家不同乃朝廷提倡實業不惜爵賞以爲之勸而商民之出鉅資以邀懋賞者至今尙寂無所聞况海軍爵賞乃欲商民輸納資財以濟公家之用恐需者甚殷應者終寥寥無幾徒於實官停捐之後別懸一爵之令無益軍需有傷政體竊爲朝廷名器惜之該御史所請特設海軍爵賞由部釐定等差之處應請勿庸置

議

又兩江總督端方等奏江南賑捐及七項常捐兩年期滿遵限停止惟江南息借農工商部存本銀兩懸欠甚鉅請准將代收免保留省兩項捐輸接展一年下部議奏

又度支部奏議覆鄂督奏捐振萬金以上請獎官礙難照准略稱查光緒二十七年奉 上諭近來仕途冗雜嗣後無論何項事例均著不准報捐實官自奉旨之日起即行永遠停止二十九年改務處議准練兵籌餉有實官捐升一條復經 部於三十二年奏明停止各在案該督所請核合捐例獎以實職一節礙難議准所有報效實銀一萬兩以上者仍照向章奏明請 旨辦理

又度支部奏議覆直督等電奏整頓捐務籌議辦法略稱查直隸總督端方等電奏內稱各省每因水旱偏災籌辦工賑迭經援案奏請開辦賑捐及七項常捐並代收部庫常捐當工賑待款之時不能不稍事權宜減折招徠互相仿效遂致報部之數與外開實收之數多寡迥不相符而承辦各員並無絲毫弊混迨至案結造報不得不設法融銷此非一省一局為然見在各省財政業經度支部奏奉 諭旨清理此項賑捐常捐銷案自應一律實報實銷惟捐款減收既久各省成數又復不同既擬澈底清釐必期收款銷數針孔相符始足以掃除積習若不寬其既往准將已收未銷之案據實造報誠恐實支之說猶屬虛文而銷案仍不免牽掣茲經公同商酌擬將各省辦捐銷案除業經造報不計外其已經收款尚未造銷者應准由各省自將迭次遞減實收數目於造報時據實聲敘其已經造銷一半尚未全案報竣者准將以前銷案實清界限以後據實接報即有以捐款撥作他項之用者既係以公濟公不妨據實造報至各省紳商如有籌墊捐款此次改章以前未及請獎者應令各省將實收銀數咨報立案俟部定新章後照章核獎又清理財政章程凡光緒三十三年以前作為舊案此則未便拘定年限緣見在外辦減收融銷係歷年銜接而下與二十三年以前無異應另議收捐辦法以後作為新案以前概作舊案庶不致事出兩歧別滋轉輾自經奏明廓清之後應仍另定整頓章程以杜各省再蹈

私減搶收之弊查賑捐銜封翎枝貢監與常捐之七項情形不同賑捐各項無甚關繫數少則願捐之人尚多數鉅則願捐之人必少若七項則凡係職官內用到部外用各省均須報捐各捐生既處於不得不捐之勢成數不妨稍從其重近來各省偏災迭見工賑需款值此物力維艱舍此亦無籌措之方若照部章原定成數收數必減於餉需不無關礙似應酌中定擬庶可藉資挹注擬請飭部分別核議明定賑捐常捐折收實在數目不准再行私減搶收查出嚴參或由各省就京設局統收按成分撥不准再發空白咨冊庶與捐款銷案均有裨益等語 等竊維近年仕途日雜財用日匱名器愈不足重而各省收捐濟急無不貶價求售每下愈況於公家裨益無幾而隱匿侵蝕濫支濫銷之弊不可勝言 部頗有所聞會飭各省財政監理官查實具報適據端方等以整頓捐務籌擬核實報銷各辦法聯銜電奏當因各該省通年減收實數 部無案可稽電令查報旋據先後電咨聲覆大抵見在賑捐實收之數照例銀不及半成翎枝常捐實收之數不過一成有奇輕濫至此宜其報部之數多寡迥不相符也若不改弦更張將來伊於胡底惟各省工賑待款孔亟倘仍按原定成數概歸部庫收捐恐不足以廣招徠亦未能隨時隨地取給既據該督等聲請明定折收實數自應分別核辦 部等公同商酌擬將捐免保舉留省二項暨十成貢監即日改回部庫收捐仍以十成實銀上兌其常捐七項擬酌減五成以五成實銀上兌賑捐銜封貢監等項先已減為四成擬再酌減二成以二成實銀上兌其道員捐二品頂戴及貢監捐鹽運使職銜以三成實銀上兌部飯照費均照例另交各捐所收銀款應准各辦捐省分留用俾資挹注惟整頓之法不可不嚴查各省減收章程承辦之員最易上下其手省城總局固高踞為利藪而奉派勸捐之員又各立分局自為風氣不實不盡更難枚舉乃謂毫無弊混夫誰信之茲雖明定減收成數如仍聽各省自收難保不復蹈故轍伏思大清銀行各省見設分行自可就近兌收另派委員經理一面將捐局的量裁撤其詳細事宜容由 部核定飭知遵辦至各省報部文冊亦應勒限清釐所有已填給實收各捐款迅造履歷清冊咨送雲南貴州廣東福建四省限於年底到部

直隸等省均限於十月底到部仍按舊章核准以示體恤其文冊逾限到部者
倘予發還恐滋紛擾擬俟該捐生赴部呈請核准換照之日飭在部庫補交成
數查係賑捐外收半成者再按例銀補交一成半常捐外收一成零者再按例
銀補交四成均改照新章核准再行給照此外各省紳商籌墊捐款改章以前
未及請獎者應令將實收銀數咨報立案統按新章核獎以期一律又原奏所
稱核實報銷各辦法應准其據實聲敘由部隨案核覆另行辦理比來籌款
維艱捐務已成弩末不得不設法維持庶幾兩有裨益

又度支部奏酌擬報捐翎枝銀數略稱查翎枝一項非軍功勞績不與定例捐
款較重並有京官外官之別咸豐年間曾經核減一次嗣後捐例大開始定爲
層遞辦法由一品實職報捐花翎應銀四千兩二品應銀三千兩三品應銀二
千兩又三品以上虛銜人員應銀一千八百兩四品以下實職虛銜人員應銀
九百兩藍翎減半惟四品以下捐員較多見在各外省收捐私減至一百三十
餘兩爲數未免太少等語中核定擬將三品以上報捐花翎者照原章酌收
一半四品以下酌收銀四百兩報冊逾限到部者補交銀三百兩藍翎半之俾
昭平允

又奏酌擬各省捐助學款請獎畫一辦法略稱各省學堂捐助經費銀兩及報
效房產器物等項向准核給獎敘按照銜封貢監銀數以五成實銀計算聞近
年各省亦有私自減折並估價浮冒之弊其報效鉅款者僅交七成即爲奏請
獎給實官尤非慎重名器之道見在賑捐既改新章自應畫一辦理擬請嗣後
如有捐助學堂經費銀兩者飭就近省分大清銀行上兌以期核實該款仍
撥歸各該學堂應用其報效房產器物等項責成該提學使督同地方官切實
估價如有浮冒查出嚴參至應給獎敘即按此次新定賑捐成數核准俾昭公
允均依議行

又署理兩廣總督袁樹勛奏常捐依限停止
又閩浙總督松壽奏福州府屬並長門馬江颶風爲災災情之重災區之廣實
爲數十年所未見所幸隨時撫恤元氣不致大傷惟是閩地貧瘠庫藏空虛賑

捐收款久已挪用無存值此災重費繁來日方長後難爲繼惟有再請展辦賑
捐及七項常捐一年並援案兼收捐免保舉及留省兩項以濟要需

又 諭湖廣總督陳夔龍電奏賑款難籌請將添收七項常捐及原辦賑捐再
予展限一年著度支部妥速議奏

又閩浙總督松壽電奏閩省賑捐情形與別省不同請展限三箇月陸續咨獎
暫免加成

二年吏部會奏遵議陸觀麟條陳各部院調用外官留補京職應補交實銀略
稱查原奏內稱自各部院改行新政往往奏調咨調外官對品改用京職如通
判以主事用縣丞府經歷以部司務用等類例銀相去懸殊甚至有未經在部
核准及只一職銜之員即以京職奏留補用塗徑一開恐遂啟倖進鑽營之漸
查戶部籌餉事例改捐降捐條款載有京外各官其情願對品改捐者准其改
捐互捐等語目前實官捐輸早已停止而外官調改京職日見其多若不嚴定
章程略示限制何以息奔競而重帑藏擬請 旨飭下吏部度支部修訂監核
專條嗣後各部院如有奏調咨調外官對品以京職補留之員一律查其是否
實官是否在部核准再令按照籌餉事例改捐互捐條款繳納實銀其有補留
推事檢察各官於籌餉事例無銀數可稽者應照品級相同之京職辦理該項
人員既經奏調咨調於前隨後補納實銀與停止實官捐輸之意無礙即於籌
款之中兼寓慎重名器之意等語吏部查在京衙門向無調用人員之例自各
新部院先後建設仿照外省奏調人員之法權宜集事一經奏請無不曲予允
從比年以來幾成通例奏調不已更有咨調札調者僥倖充濫亦所不免上年
欽奉 明諭飭令將奏調咨調各員由吏部切實考核經部擬定章程十條
聲明業經調用各員咨明 部一體考核分別准駁並不得再有咨調札調名
目奏奉 俞允通行在案是限制之法已極嚴密似不必另定辦法致涉紛歧
今該部中請將調用外官留補京職之員照改捐互捐之例令其補交實銀係
爲慎重名器起見其說尙屬可行惟查各部院調用各員有早已補授實缺者
有補缺後復經升轉者且有補授實缺旋經裁汰者若一律勒令補交諸多窒

礙且於事理亦近煩苛等擬請寬其既往嚴其將來由度支部按照品級分別酌定銀數作為見行專章嗣後如有由外官調用京職之員除查明該員底官是否相符另行核辦外飭令照見調之官交足銀數呈驗執照方准作為到署如託故延緩俟將來奏留或補缺時由部照章議駁如此酌量辦理帑項不必藉此加增而於澄清仕途不無裨度支部查外官調用京職既經吏部核議令照見調之官交足銀數方准作為到署部擬即按各該員原有底官加捐見調之官捐足分發銀數按照從前奏晉順直賑捐成案統以例定三成實銀上兌專歸部庫收捐如非正途出身並應查照向章另行補交免保舉免考試補監等項銀兩其新設推事等官雖於捐例並無銀數可考擬照例載京職品級相同銀數核辦惟此項調用之員部無從查考應以此次奉旨之日起嗣後凡有由外官奏調京職之員概由吏部飭令赴部交納捐款俟收銀後即由部發給執照隨時知照吏部註冊照例辦理

又吉林巡撫陳昭常奏續辦春賑請開辦賑捐及七項常捐下部議奏

又度支部奏議覆吉林巡撫奏吉林省續辦春賑請援案開辦賑捐及七項常捐略稱吉省被災之重為百十年來所未有辦理賑恤亦非尋常災區可比其額赫穆新開河蛟河一帶受災尤重不特田廬牲畜漂沒無遺而土為水冲石骨顯露可耕之地盡變石田哀此流亡永無生業之可望故前奏所陳首以移民就墾為先務舉凡遷時之路費遷後之捐循尤須籌集大宗之款始能舉辦至被災戶口據各屬彙報共大小丁口十六萬餘自上年六月起錢米兼放以工代賑冬閒復設立粥廠製發棉衣所有各處募捐之款及公倉積存之穀除陸續散放外所存無幾續辦春賑固慮不敷然既難豫為寬籌亦祇好逐漸接濟一俟春熟可收或向易於從事無如吉省氣候過寒植物發生較晚必至夏秋之閒始有雜糧可收雖名春賑而支持賑期實需四五月之久重以去年糧食數無多欲籌接濟之方實少妥善之法查光緒三十二年江南北所屬各州縣大水為災由前兩江總督臣端方奏請開辦街封貢監翎枝捐款及七項常捐

光緒三十四年湖北涿涿為災由調任湖廣督臣陳夔龍奏請展辦賑捐並添收七項常捐均奉 先朝特旨准行吉省上年水災之重不減江鄂而賑期之久而視江鄂有加懇 恩俯念留都舊治哀鴻嗷嗷准照江鄂成案開辦賑捐及七項常捐以一年為限一切捐例改照新章如有捐助賑款實銀在萬兩以上擬請專摺奏請優獎以示鼓勵等查宣統元年九月部議覆前直隸總督端方等電奏整頓捐務籌擬核實報銷摺內陳明擬將免保舉留省二項暨十成貢監即日改回部庫收捐仍以十成實銀上兌其常捐七項酌以五成實銀上兌賑捐街封貢監等項以二成實銀上兌道員捐二品頂戴及貢監捐鹽運使職銜以三成實銀上兌又附陳三品以上報捐花翎者照原章酌收一半四品以下酌收銀四百兩藍翎半之各等因奏准通行遵照在案茲據吉林巡撫陳昭常奏稱吉省被災之重為百十年來所未有辦理賑恤亦非尋常災區可比請援照江鄂成案開辦賑捐及七項常捐以一年為限一切捐例概照新章如有捐助賑款實銀在萬兩以上擬請專摺奏請優獎等查該撫原奏所稱各節係屬實在情形擬准援案開辦街封等項賑捐及七項常捐以資接濟均以一年為限屆滿停止其請獎各員所捐銀兩歸大清分銀行核實兌收至各省紳商捐助賑款數在萬兩以上者雖經各省奏請優獎有案均係出自特恩允准並無奏定優獎章程此次該撫所請捐助賑款在萬兩以上者奏請優獎一節部未敢擅擬

又度支部奏准江北水災添收七項常捐一年

又奏准四川省餉源不繼再辦宣統三年捐輸一次

又奏准安徽災重需款續辦七項常捐一年

又奏准湖北籌辦工賑賑捐常捐再展限一年

三年度支部會奏遵議御史陳善同奏甄別降革捐復新章流弊滋大請予撤銷略稱查原奏內稱宣統二年度支部奏覆皖賑籌款一摺內稱甄別一項分別降調人員准其加五捐復革職人員准其加倍捐復等語在廷諸臣之條陳部臣之議准本皆一時萬不得已之計惜未及即其事之利害輕重而熟籌之

耳夫以賑恤災黎之故而縱虎兇出押以吸無辜赤子之脂膏殆非此豫備立憲時代所應有之政體實官捐例爲未有職官者而設然其中要不無可用之才而又恃有甄別定例之繩其後補救者正自不少今獨爲降革之貪官汚吏破除甄別制限開此方便之門謂非獎勵官邪其誰信之夫督撫甄別屬官本係朝廷處罰有罪之大典縱偶有寬抑度不過百中之一二未可以病其全體乃甫掛彈章而卽可以加五倍之財力光復舊物爲官吏者其何所儆也皇上昇甄別之權於督撫信督撫也今取其所降革者而概准捐復爲督撫者將何所指手足耶且降革人員之不犯職者類不能出此捐復之資其能出此鉅資者非苞苴充盈則必其欲取償於異日者也方今廉恥道喪勸懲不行官出死力効一職吏督撫猶百計彌縫不使敗露督撫之不避嫌怨糾劾屬員者在今日已爲不可多得之員而又以金錢之力不轉瞬而恢其固有自今以往誰復肯爲怨府耶藉曰爲災區計不得不稍予通融立有定期不致大滋弊竇不知治天下者當持大體處犯職者以罰金於事實猶爲不可而況令其納金而獎之以原官乎無謂之舉卽一日已嫌其多而况更限至半年乎降革之員既具此捐復能力一經到省差缺自易一旦事權在手故態復萌誰任其咎是因災民之故而病及良民亦殊覺得不償失矣請 旨飭吏部度支部將此項甄別降革捐復新章卽予撤銷等語度支部查宣統二年 臣部會同吏部議覆巡撫袁大化御史石長信等奏皖北災重籌款賑濟摺內陳明甄別一項分別降調人員准其加五捐復革職人員准其加倍捐復專歸部庫收捐限宣統三年五月底截止在案茲據御史陳善同奏甄別降革捐復新章流弊滋大請予撤銷等因查甄別降革人員原在吏部定例十三條不准捐復之列前因皖北災情奇重亟宜籌款賑濟暫准推廣甄別降革人員捐復一條無非爲多籌鉅款拯救災黎起見乃自奏准開辦迄今兩月有餘收數甚屬寥寥徒開捐復之途無裨災賑之用既據該御史陳善同指陳流弊請予撤銷擬請准如所奏將甄別降革捐復一項卽行停止以昭慎重

皇朝續文獻通考卷九十四

賜進士出身頭品頂戴前內閣侍讀學士 臣劉錦藻恭纂 學校考一

臣謹案自漢武廣厲學官一以利誘進之而三代學校之遺意蕩焉無復存矣經術衰熄考據詩賦策論時文特一時之風尚焉耳所關於身心性命與夫國計民生之利病者蔑有也宋胡瑗分經義治事為兩齋士稍稍向實學矣先後四大書院規橈粲然濂洛關閩尤為正學之嚮元得許衡姚寬吳廣積為之師斯道僅賴以不墜明有天下振刷南北監粗知崇尚道學首善東林一時傾赴旋假閤寺以擢正人舉鉤黨以陷善類人之云亡國亦隨之陽明一代大儒即知即行於東西哲學不謀而足相印證日本明治維新大半原本王學姚江學派詬之於國中而行之於海外以是知天下無無用之道學也 國朝定鼎首以興學為汲汲 勸善要言 聖諭廣訓頒示行省儒林服習咸漸漬於忠君親上之大義自 皇子以遠編氓自宵監以遠鄉校官學義學如雲如林甲午以後怵於外患 明詔興學三令五申奉行未善流弊滋多 皇朝通考變通馬考所列四門首宗學次旗學次太學次直省鄉黨之學次祠祭稟贈錄後次視學養老續考均仍之復增書院圖書學堂共九門云

宗學

臣謹案虞書命夔典學以教胥子其殆宗學之權輿乎禮王制王太子王子羣后之太子與卿大夫元士之適子國之俊選皆於春秋教禮樂冬夏教詩書近頃泰西學制自王子及公卿大臣子弟亦無有不及歲入學者我 朝右文敷化 世祖入關即於翌年建立宗學設教習等官嚴其課程與古者保抱傅輔之意實冥相契合邇來 朝廷學學求治復派親貴至各國游學以視俄彼得改服易裝親詣荷蘭學習造船術夫豈多讓也哉

雍正十一年 諭任啟運授為翰林在阿哥書房行走

臣謹案乾隆九年編次詞林典故未列 上書房惟史傳載徐元夢於康熙三十二年以侍講入直法海於三十七年以檢討入直諸臣曰教書曰課讀無師傳之稱而其居處稱爲 南薰殿西長房兆祥所成福官亦無上書房之名恭讀 高宗御製懷舊詩有設席懋勳殿之句當始於雍正年間我 朝皇子暨近支王公及歲讀書必 簡翰林官授讀 列聖相承殷殷垂誠固極慎重也此與宗學攸別而關係尤大 皇朝通考不載今特彙纂冠宗學之前以見 本朝家法焉

陳康祺郎潛紀聞 世稱上齋曰三天蓋由從前 列聖每歲駐蹕澄懷園諸王公即讀書園廬其地爲 殿三層皆有 世宗御書扁額前曰前垂天一作天不謂之前天中曰中天景物一作中立謂之中天後曰後天不老謂之後天統謂之三天自淀園被毀 上書房設大內詞臣入直詢以三天舊稱幾乎不知緣始矣至 南書房康熙十六年始立張文端公英以侍講學士首被是選蓋入侍左右備顧問云

乾隆十三年 諭阿哥之師傅請達所以誘掖訓誨教阿哥以孝道禮儀者今遇此大事阿哥竟茫然無措於孝道禮儀未克盡處甚多此等事謂必閱歷而後能行可乎此皆師傅請達平日並未教導之所致也伊等深負朕荷用之恩阿哥經朕訓飭外和親王來保鄂容安著各罰食俸三年其餘師傅請達著各罰俸一年張廷玉梁詩正俱非專師著免其罰俸

臣謹案是年二月 上東巡幸 皇太后率 皇后啟鑿三月 駕至德州登舟 孝賢皇后崩隨還京師此 諭蓋在皇子百日精素期內也十四年 諭原任禮部侍郎沈德潛前令其帶原銜食俸在阿哥書房行走今年近八旬精力益衰著原品休致 又 賞孫嘉淦左副都御史銜在上書房行走

十八年 諭古稱建儲爲國大計朕酌古準今深知於理勢有所難行載在史冊者姑置弗論即如理密親王當 皇祖聖祖仁皇帝時 聖慈鍾愛初無閒言嗣以東宮既建押噶匪人陷於失德再致廢黜其先所置宮僚何嘗非一時

之選如湯斌即所稱當代醇儒然亦何神萬一蓋別立官府則僚屬多人賢否參雜斷難保其不滋事端夫以 聖祖之包含宏大尚迫於 宗社之重必不可容可見建儲一事亦如封建井田固不可行之近世也是以 皇考鑒於前事默定 宸衷不事建儲分府惟擇老成宿望之大臣如朱軾鄂爾泰福敏張廷玉蔡世遠等勸讀內廷 聖謨深遠 慈覆如天朕繼承以來恪遵 家法令皇子等讀書內廷亦惟慎簡師傅俾之薰陶德性讀習經書日有程課其視出閣就傅有名無實者相去為何如耶要之豫教固所當重實亦存乎其人此則 蒼穹之敷祐 宗社之貽庥景運靈長有非人力所致者矣

二十二年 諭何國宗罷職以來家居無事算法尚伊世學著賞給編修銜在上書房行走
三十一年 諭朕昨見十五阿哥所執扇頭有題畫詩句文理字畫尙覺可觀詢之知出十一阿哥之手幼齡所學如此自屬可教但落款作兄鏡泉三字則非皇子所宜此蓋師傅輩書生習氣以別號爲美稱妄與取字而不知其鄙俗可憎且於蒙養之道甚有關繫皇子讀書惟當講求大義期有神於立身行己至於尋章摘句已爲末務矧以虛名相尚耶皇子中或年齒已長聞有書齋名字見之圖章尙無大礙若十一阿哥方在童年正宜函養德性尊聞行知又豈可以此種浮僞之事消其見識耶朕昔在藩邸未嘗不留意詩文然從未有彼此唱酬題贈之事亦未敢私取別號猶憶朕年二十二歲時 皇考世宗憲皇帝因辦當今法會一書垂問汝等有號否朕謹以未曾有號對我 皇考因命朕爲長春居士和親王爲旭日居士朕之有號實由 皇考所賜然亦從未以之署款題識此皆和親王所深悉可問而知也我國家世教醇樸之風所重在乎習國書學騎射凡我子孫自當恪守 前型崇尙本務以冀垂貽悠久至於飾號美觀何裨實濟豈可效書愚陋習流於虛謾而不加察乎設使不知省改相習成風其流弊必致令羽林侍衛等官咸以脫劍學書爲風雅相率而入於無用甚且改易衣冠更變舊俗所關於國運人心良非淺鮮不可不知儆惕朕前此御製皇朝禮器圖序特暢申其旨曾令阿哥等誦誦邇來批閱通鑑輯覽

於北魏金元諸朝凡政事之守舊可法變更宜戒者無不諄切辨論以資考鑑將來書成時亦必頒賜講習益當仰體朕之思深計遠矣阿哥等誕育皇家資性原非常人可及其於讀書穎悟自易見功至若騎射行圍等事則非身習勞苦不能精熟人情好逸惡勞往往趨於所便若不深自提策必至習爲文弱而不能振作久之將 祖宗成憲亦罔識遵循其患且無所底止豈可不豫防其漸耶阿哥等此時即善辭章工書法不過儒生一藝之長朕初不以爲喜若能熟諳國語嫻習弓馬乃國家創垂令緒朕所嘉尙實在此而不在彼總師傅須董率衆師傅等教以正道總諳達亦督令衆諳達時刻提撕勸勉勿使阿哥等耽於便安著將此諭實貼上書房俾諸皇子觸目警心咸體朕意毋忽

三十五年 諭阿哥等在書房讀書所以檢束身心自當出入有常跬步必謹如每月派祭 奉先殿等事原可循例徑行其餘或有他故外出必須以實奏聞庶舉動不得自由且有合於出告之禮今八阿哥以已事入城並未奏知又不關白師傅殊屬非理且皇子每出例派散秩大臣侍衛等護行非惟體制宜然亦所以致其防閑使不得行止任情趨於所便也乃八阿哥僅帶親隨及圍門護軍數人策騎同往有何急務而恩還如此縱不自重其如大體何率此以往或相習效尤無所顧忌必將肆意游行無所不至且恐外間愚妄之徒得以藉端詭遇馴至結納依附諸弊皆從此隱伏其所關係尤鉅不可不爲先事之防况阿哥等漸皆長成尤宜慎於所習即在書房原非專事儒生佔畢惟當循循規矩使心志不至外馳且弟兄輩朝夕相聚砥礪交資盡化其畛域伎忌之見亦甚有益其阿哥等之未習職事者固當以就學爲先務即如四阿哥派管武英殿等處六阿哥派管內務府絲恩阿哥派管前鋒統領遇有應行事宜及有與同事大臣商酌者自不妨各就官所辦公其無事之時仍當日理常課即文書畫諾亦可攜至齋中正復並行不悖其他更不容稍有曠廢矣至於八阿哥進城之事朕初亦竟不知因近日派諸皇子詣 黑龍潭分班祈雨八阿哥與十一阿哥同班適伊二人下班之期朕遣人喚至傳旨詢及兩壇事惟十一阿哥對答始知八阿哥之私自入城朕並非有意觀察而其迹自然顯露得以

因事提撕小懲大誡未必非諸皇子之福在八阿哥當益深感懼即衆阿哥亦當共知奮勉方不負朕教育成全恩意若八阿哥謂十一阿哥計發其私懷憤恨此乃不明理之見諒亦不出此試思十一阿哥當朕問及時設稍爲其兄掩飾彌縫豈非欺父若喚來面詢何能復隱且朕非特慈愛諸皇子爲之杜漸防微實敬念我祖宗貽澤之長惟期世世子孫永守無斁因不惜諄諄教迪諸皇子宜善體朕心恪遵朕訓志日篤而業日修復彼此相親相愛式好無尤方能永承福慶至師傅爲皇子授讀豈僅以尋章摘句爲能竟不知隨事規勸俾明大義而總師傅則尤當盡心誨導凡事納之於善勿使稍有過愆方爲無忝厥職今於八阿哥擅自出入一節漫無覺察所司何事且朕昨歲即聞書房中諸務懈弛乃總師傅從無人奏及一語此非漠不關心即係務爲姑息以致阿哥等不復畏憚釀成此事所謂愛之適以害之又豈朕委任老成本意乎若諸達等之不曉事理自取咎戾更不足責備矣今已將八阿哥及師傅諸達分別示儆並爲明切誠諭令錄一通實貼上書房使皇子等朝夕觀省知所儆戒又諭今日偶有詢問四阿哥之事遣人至書房傳旨知四阿哥藉此爲名一日不進書房殊屬非是但較之夏間八阿哥自回明園擅行入城者其過稍輕此次姑從寬免責向後如不知省改一經查出不能再爲曲恕其師傅諸達所司何事著即查參議處

四十三年 諭古來惟以豫教之說屬之太子於是明季遂有因儲嗣未立不肯令皇子出閣者衆皆起而爭之此其非理若我國家之制諸皇子六歲以上即就上書房讀書即皇孫亦然既選京堂翰林以分課其讀復派大學士尙書數人以總視其成更簡滿洲蒙古大臣侍衛等以肆之國語騎射長幼相聚所夕程功初無歧視之心詎有嫌疑之迹實大異乎勝國之所爲也

五十四年 諭朕閱內左門登載上書房阿哥等師傅入直門單自三十日至初六日所有皇子皇孫之師傅竟全行未到殊出情理之外因召見皇十七子同軍機大臣並劉墉等面加詢問如係阿哥等不到書房以致師傅各自散去則其咎在阿哥自當例加懲責今據皇十七子奏稱阿哥等每日俱到書房師

傅們往往有不到者曾經阿哥們面屬其入直伊等連日仍未進內等語皇子等年齒俱長學問已成可無須按日督課至皇孫皇曾孫皇元孫等正在年幼勤學之時豈可稍有閒斷師傅等俱由朕特派之人自應各矢勤慎即或本衙門有應辦之事亦當以書房爲重况見在師傅內多係閣學翰林事務清簡並非不能兼顧者何得曠職誤功懈弛若此皇子爲皇孫輩之父叔行與師傅等胥有主賓之誼師傅等如此忘玩不能訓其子姪皇子等即當正詞勸諭如勸之不聽亦應奏聞乃竟聽伊等任意曠職皇子等亦不能無咎至書房設有總師傅並不專司訓課其責專在稽察與總誥達之於衆諸達等無異師傅內有怠惰不到者總師傅自應隨時糾劾方爲無忝厥職今該師傅等竟相率不到其過甚大而總師傅復置若罔聞又安用伊等爲耶此而不嚴加懲創又復何以示儆嵇璜年已衰邁王杰兼軍機處行走情尙可原著從寬交部議處劉墉胡高望謝墉吉夢熊茅元銘錢榮錢樾嚴福程昌期秦承業邵玉清萬承風俱著交部嚴加議處至阿肅達椿身係滿洲且見爲內閣學士毫無所事其咎更不容辭均著革職仍各杖四十板留在上書房效力行走以贖前愆而觀後效又諭昨因上書房阿哥等師傅七日之久無一人入書房已降旨將總師傅嵇璜王杰交部議處矣劉墉係大學士劉統勳之子朕念伊父宣力年久特加恩擢用其在府道任內頗屬黽勉及爲學政即不肯認真速授湖南巡撫聲名亦屬平常因內用尙書其辦理部務更復一味模稜朕曲賜優容未加譴責伊自當感激朕恩亟思奮益矢勤慎今阿哥師傅等不到書房至七日之久劉墉身爲總師傅又非如嵇璜年老王杰兼軍機處行走者可比乃竟置若罔聞似此辜負溺職於國家則爲不忠於伊父則爲不孝其過甚大豈可復邀寬宥且伊係大員亦不必再俟部議劉墉著降爲侍郎仍任總師傅上行走不必復兼兩書房以觀其能愧悔奮勉否師傅等之任意懈弛皆由總師傅不能稽查督飭所致嵇璜王杰既不能隨時查察即不必復兼此虛名著改派阿桂李綬爲總師傅以專責成王傑修見實患病無庸交部亦不必在上書房行走著總師傅等另選人品端方學問優長之員帶領引見候朕簡派謝墉在學政任

內聲名平常本係獲咎之人前京察議處時經吏部議以革職念其學問尚優是以從寬留任仍令在上書房效力伊更當知過感奮乃亦復偷安更屬有乖職守謝墮著降爲編修革職留任不必復在上書房行走著在武英殿修書處效力贖罪其餘各師傳等統俟部議上時再降諭旨

五十五年 諭朕技閱臣工等所進萬壽歌頌內有上書房行走侍講吳壽昌恭紀九言詩一册上句用韻分叶體製新穎詩句藻麗其辭章雖屬可觀不免有聘博見才之意因思上書房翰林入教皇子皇孫等讀書惟須立品端純藉資輔導原不同應舉求名者僅在文藝詞章之末况皇子及皇孫年長者學業已成其年幼之皇孫皇曾孫元孫等甫經就傅不過章句誦讀之功尚屬易於啟迪選擇師傳祇以品行爲先與其徒藉詞藻華而不實轉不若樸誠恂謹之人尙可資其坐錄卽如阿爾學問雖未優長而資格已深人亦謹飭於皇子師傳頗屬相宜見在皇子等俱已年長上書房翰林等皆係皇孫皇曾孫元孫之師傳若以外閒師弟世誼而論行輩多屬相等且有誼屬晚輩者在皇子師傳親身訓課自不至於交結干求而行輩較晚之師傳等分同賓友恐不安本分之人藉以結納交通致有如從前秦雄與皇孫德往來交結之事不可不防其漸向來上書房師傳缺出係學院學士自行揀選僅會同內閣帶領引見今阿桂嵇璜俱已年老精力不同嗣後著大學士等公同揀選不必專取才華務擇資深立品之員帶領引見候朕簡用至皇子皇孫等與上書房師傳朝夕晤對止須勤勉訓課不得泛論文藝相敘閒談爲俗例唱和之舉致啟齷齪或不寬貸著將此旨恭錄一道交上書房存記俾知警惕

六十年 諭朕念臨御以來孜孜勤政悉由與學懋修所致回憶沖齡就傅時福敏啟蒙蔡世遠教以古文作法從此肆力學業益進當年久侍講帷數陳啟沃福敏蔡世遠兩師傳之力爲多今朕年登八旬閱五旬懷舊學尤宜增秩三公原贈尙書蔡世遠可加贈太傅以示朕崇禮師儒至意

嘉慶二十二年 諭朕恭閱 聖祖仁皇帝實錄內載康熙四十七年 諭諸

大臣曰近日聞諸阿哥常撻辱諸大臣侍衛又每尋毀端加苦毒於王貝勒等諸阿哥見今俱未受封爵卽受封後除伊屬下人外凡有罪過亦當奏聞候朕處分伊等何得恣意妄行撻辱乎朕爲天下元后凡事但遵大義而行無罪之人未嘗枉法處治國家惟有一主諸阿哥擅辱大小官員傷國家大體此風斷不可長嗣後諸阿哥如仍不改前轍許被撻之人面詰其見撻之故稍有冤抑卽赴朕前叩告朕且欣然聽理斷不罪其人也至於爾等有所見聞亦應據實上陳若一切隱諱後來漸至殺人亦將隱而不奏乎爾等隱而不奏卽加等治罪矣仰見 聖訓煌煌端本養正之至意見今皇子等恪遵綱紀實無有違性作威之事但諷教之道不可不先 聖祖貽謀洵爲萬年法守皇子等皆當聰聽 彝訓知所鑒戒况左右隨從之人如諸達哈珠色太監等遇有過失據實奏明候朕處治不可任性妄行有乖禮則再朕聞近日上書房四阿哥均係按日授經二阿哥三阿哥不立課程二阿哥尙閒日撰作詩文三阿哥則經年累月詩文俱置不作朕在潛邸時未有一日不作詩文今雖日理萬幾於政事之暇尙時時游藝不肯稍有暇逸御製詩文日月編排卷帙繁富阿哥等日在書房並無他事又無旗務管理若僅卯入申出不肯留心學問豈不竟成伏曠夫人之心志不專於此必移於彼豈可別有所好關繫甚鉅奚若游藝詩文發抒經史可以陶冶性情增長知識且日有常課亦以收其放心其獲益實非淺鮮嗣後二阿哥三阿哥每日俱應作詩三五日必作文一篇不可閒斷使業精於勤勿荒於嬉以收進志時敏之效著將此旨鈔錄一通交上書房存記俾皇子皇孫等觸目儆心永遠欽承

二十三年 諭昨日召見果齊斯歡詢問四阿哥功課據奏甫學屬對詩文俱未能作朕前在藩邸時十一歲卽能屬對十二歲卽能賦詩壬辰十三歲時皇考高宗純皇帝命面和 聖製五言律七言律詩味餘書室詩集中卽載有朕十三歲詩草四阿哥質性聰明儘可讀書本年已十四歲詩文尙俱未學皆由果齊斯歡學問平常不能循循善誘而又因循疲玩以致耽誤果齊斯歡負恩已極著革去一應差使俾上書房師傳共知儆戒所有四阿哥師傳著大學

士會同翰林院掌院學士在翰林中選擇品學兼優者三人帶領引見候朕簡用未經引見以前著陳官俊暫行授讀

道光二年 諭阿哥等年至十五歲著習學騎射每月演習二三次在京城內則於紫光閣在圓明園則於閱武樓阿哥等演習騎射時著內廷請遠二人輪流隨往年十六歲習學鳥槍每年春秋二季在山高水長一月演習一二次嗣後阿哥等及皇孫皆照此學習著為令

三年 諭秦承業前經朕宣召來京加以超擢令仍在上書房行走以伊老諱言語不謹不能不治以應得之罪朕體懷舊學秦承業究係上書房行走多年之人此時年近八旬著加恩賞還翰林院侍講學士銜不必來京謝恩以示體恤

又 諭禮部尚書汪廷珍於嘉慶十七年蒙 皇考簡用上書房師傅與朕朝夕講論非法不道學問淵博迨至二十三年受任總師傅以來倍加勤慎考古證今談皆中道使朕通經義辨邪正受益良多又自朕親政後畀以左都御史尚書之任辦理均能妥協是汪廷珍於師道臣道之義可謂兼備矣本日臨雍講學因思曩者討論之功眷懷舊學用沛恩施汪廷珍著加太子太保銜伊子汪保原見同籍守制服闋來京時該衙門遇有員外郎缺出時即行奏補用示朕崇儒重道之意著將此旨鈔錄一通交上書房存貯

十二年 諭朕沖齡就傅時原任侍郎贈禮部尚書萬承恩原任翰林院侍講學士加三品卿銜秦承業先後在上書房課讀盡心講貫深資啟沃即朕之今日尚能兢兢自守者兩師傅之功也眷懷舊學特沛恩施萬承恩著晉贈太傅其子童生萬方楨著賞給舉人准其一體會試其孫候選府經歷萬長齡著遇缺即補秦承業著著贈禮部尚書銜其子候選員外郎秦繩曾著賞加四品卿銜嗣子監生秦象會著賞給舉人准其一體會試用示朕誼篤師儒有加無已之至意

二十三年 御製跋成哲親王養正四箴示諸皇子曰養正書屋之義備載集序茲不復贅彼時朕伯成哲親王親製養正四箴書以勸子蓋聞發 聖旨精

微 慈恩高厚也予永矢弗諼規模感須臾易敢忽諸淵自嘉慶丙辰迄今四十有八年矣雖不敢期諸案過然尙克兢兢自守者非我 皇考之慈訓我伯父之儆省其可得耶每一思之感慟交榮茲皇孫等齒漸成童蒙養之功第一要務我諸兒若能體朕之心守朕之訓義制事禮制心存三畏之言慷慨四箴之誠庶幾免乎敗度敗禮知誘物役也命上書房師傅等各於阿哥讀書處手錄一幅懸掛壁間俾觸目警心相親而善同歸百度維貞之道方厚望焉

咸豐二年 諭杜受田蒙 皇考特達之知入直上書房為朕講習討論十餘年中日承啟迪獲益良多朕親政後以刑部尚書協辦大學士遺膝敷陳深資匡弼前因豐工未合江南山東兩省窮黎急需賑卹特派前往查辦念其觸暑道征心力交瘁正切憫懷而前後奏摺總未自陳病狀乃以感受暑溼遂至不起披覽遺章不覺聲淚俱下悲痛實深回憶書齋景况如在目前奉使陛辭情尤眷戀方冀贊襄維艱論常聞詎料相際兩月晤對無期耶其父前禮部侍郎杜琦年屆九旬猝聞此信定深悼痛令恩華前往看視並賞人覆十兩以資調養

又 諭杜受田品端學粹正色立朝朝夕納誨凡所陳說悉本唐虞三代聖賢相傳之旨實能發明蘊奧體用兼該朕即位後周咨時政利弊民生疾苦亦能盡心獻替故沃良多嘉慶年間大學士朱珪仰蒙 皇祖仁宗睿皇帝鑒其品節特諡文正杜受田公忠正直探諸法實足當正字而無愧其即賜諡文正毋庸內閣擬請

臣謹案 本朝舊學諸臣若張文端勵文恪徐文定獻文端程文敏福文端朱文端蔡文勤朱文正汪文端諸公皆以論思典學啟沃 聖聰其裨益於 主德者至深且久迨咸豐朝則杜文正為最著稱公道光十六年直上書房及 文宗御極前後十有七年朝夕輔導未嘗一日離側當奉使日入辭涕泣感動左右故公遺疏中感戀靡已念楚氛未靖河患未平尤以敬天法祖勤政愛民崇節儉慎好惡平賞罰為言 上震悼輟朝

序茲不復贅彼時朕伯成哲親王親製養正四箴書以勸子蓋聞發 聖旨精

微 慈恩高厚也予永矢弗諼規模感須臾易敢忽諸淵自嘉慶丙辰迄今四十有八年矣雖不敢期諸案過然尙克兢兢自守者非我 皇考之慈訓我伯父之儆省其可得耶每一思之感慟交榮茲皇孫等齒漸成童蒙養之功第一要務我諸兒若能體朕之心守朕之訓義制事禮制心存三畏之言慷慨四箴之誠庶幾免乎敗度敗禮知誘物役也命上書房師傅等各於阿哥讀書處手錄一幅懸掛壁間俾觸目警心相親而善同歸百度維貞之道方厚望焉

咸豐二年 諭杜受田蒙 皇考特達之知入直上書房為朕講習討論十餘年中日承啟迪獲益良多朕親政後以刑部尚書協辦大學士遺膝敷陳深資匡弼前因豐工未合江南山東兩省窮黎急需賑卹特派前往查辦念其觸暑道征心力交瘁正切憫懷而前後奏摺總未自陳病狀乃以感受暑溼遂至不起披覽遺章不覺聲淚俱下悲痛實深回憶書齋景况如在目前奉使陛辭情尤眷戀方冀贊襄維艱論常聞詎料相際兩月晤對無期耶其父前禮部侍郎杜琦年屆九旬猝聞此信定深悼痛令恩華前往看視並賞人覆十兩以資調養

靈樞抵京 親臨賜奠 召見公父塲慰勞有加特晉尙書銜食全俸
恩禮優渥蓋非徒以禮崇師傅其契合符揆有迥出尋常萬萬者中外聞
知爲公感泣亦非徒謂遭逢隆備誠以其時嶺嶠盜方熾承平久政事多
隳廢左右臣僚或有隱微難喻及疏遠陳詞所不易白者獨恃公從容宣
達於密勿之閒耳恭誦 明詔淋漓悲感可想見君臣一德之隆焉

又 諭恭親王奕訢於本月二十二日分府著在內廷行走仍在上書房讀書
同治元年 命惇親王充上書房總譜達

三年 諭鍾郡王孚郡王均著在內廷行走仍在上書房讀書
七年 諭貝勒載澂不入八分鎮國公載濂俱著加恩在上書房讀書

光緒十五年 諭曹鴻勳著授載潤讀張仁黼著授載濟讀

二十五年 諭大阿哥正當典學之年嗣後大內著在宏德殿讀書駐蹕西苑
著在殿讀書派崇綺爲師傅授讀并派徐桐常川照料

二十六年 諭大阿哥典學伊始讀書課程關係緊要著責成徐桐崇綺選擇
品學兼優者二三員據實保奏候旨簡用

臣謹案當時詔正月二十七日入學保高廣恩在 宏德殿行走拳匪變
起 乘輿西狩崇綺殉節徐桐自縊次年 回鑾於開封行在奉 懿旨

已革端郡王載漪得罪 列祖列宗既經嚴譴其子豈宜膺儲位之重自
應更正前命溥儀著撤去大阿哥名號並卽出宮其冬又奉 懿旨溥儀

回京後著在載瀛府第居住隨時管教不准與外人接交倘出外滋事惟
載瀛是問竊維典學不過數月而國本動搖實基於是用特恭錄以下卽

遵前考例爲宗學云

嘉慶四年議准給事中宗室慶岱奏向來左翼宗學官學生七十名右翼宗學
官學生六十名原酌量兩翼宗室額數而定今計兩翼宗室額數相仿照該給
事中所奏將兩翼官學生額數畫一於右翼官學添設官學生十名向來左翼
官學滿洲教習二名漢教習五名右翼官學滿洲教習二名漢教習四名自停
止考試以來將漢教習俱改爲滿洲教習今蒙 聖主殊恩 賞賜宗室等考

試之途照該給事中所奏改設漢教習將兩翼官學生額數畫一於每學改設
漢教習四員應將在學滿洲教習查覈於每學內留三員其裁汰者咨行禮部
照例充補別學再見在學之宗室學生等著交管學大臣將壯年不能成就者
查覈出缺遇考試之年及族長出結之在家讀書宗室等俱交稽
察宗學漢大臣等覈實考試將文理通順者再行入考

又盛京宗學覺羅官學向設漢教習四員嗣經停止今宗室應試兼習漢文自
當照舊設宗學覺羅官學各二員照在京考試教習例開列五部侍郎奉天府丞
街名奏請 欽點會同將軍於該處進士舉人五頁內試四書文一篇詩一首
將試卷封呈 御覽恭候 欽定遇缺挨次補用

十年覆准宗人府咨鑲黃旗覺羅學滿教習吉勒杭阿正紅旗覺羅學滿教習
阿彌太均三年期滿當經本部行文該旗將新案考取之鑲藍旗滿教習慶文
應補鑲黃旗缺鑲白旗之扎克當阿應補正紅旗缺今該教習等以官學與本
旗互相竊遠恐有曠課之虞慶文係鑲藍旗住居西城與正紅旗官學相近扎
克當阿係鑲白旗住居東城與鑲黃旗官學相近情願兩學對調得以就近教
讀並各取有本佐領圖結到部應一例准其調補

十三年議准少詹事梁上國條奏整頓官學一摺嗣後除咸安宮外其餘教習
概令住學每月止准假三日除期者報滿時不予一等不住學內卽開缺另補
至各官學生查雍正七年定例宗室覺羅子弟年十九歲以上與年十八歲以
下曾在家讀書願就學者均准入學則有師者自不必概停挑選惟官學以廣
樂育應酌定限制凡文職五品以上武職三品以上能延師者停其挑選俾單
寒子弟挑選益廣則造就愈多而挂名浮曠者當實力稽查宗室覺羅交總管
王公咸安宮交管學大臣景山交內務府大臣八旗交國子監堂官督率各員
嚴立簿記凡學生每月止准假三日逾期者量罰公費全不到館者開缺另挑
所稱功課不准以時文塞責亦不准逢三逢八僅交課卷了局等語竊思八股
非經史精義不能佳教習等果能發明經義學生各以經史爲時文則獲益自
多惟學生年歲不一亦當酌立功課凡十二三歲以上教讀四書十八九歲以

上教誦經書毋得徒託虛文以昭覈實

又兩翼宗學各添學生三十名連前共百名其公費膏火等項仍於戶工二部支領

十五年奏准查宗學漢教習額設八缺近因事故等項出缺傳補未到者較多惟覺羅官學漢教習新班尚有四十名未補此次宗學所懸一缺即將覺羅學新班候補教習內按照見在應補名次暫行借補俟明年辛未科攷取後兩學仍照舊分補與傳補班次無礙嗣各學漢教習有似此考取班次及錄用銓選班次相同偶遇傳補乏人即照此通融辦理

十七年議准挑取各官學漢教習例宗學八缺覺羅十五缺均於會試薦卷舉人挑取傳補

二十五年奏准盛京宗學於原設滿漢教習各二人外再添設滿漢各一人

道光四年 諭旨昌等奏盛京宗室覺羅學生見屆五年應行考試之期查明額數不敷請展限辦理著照所請展限五年俟足數額數咨報宗人府奏請考試

八年 諭昨據托津等奏查詢奕繪與烏爾恭阿因整頓宗學意見不合一事兩翼宗學一切功課支用章程著仍照嘉慶十三年議定條款辦理嚴飭該學總管副管等認真督課其副管記名人數過多未免冒濫著管理宗學王等於新舊記名宗室內秉公遴選酌定人數記名辦稿存案以杜流弊

九年 諭昨據宗人府奏派考試盛京宗室覺羅肄業年滿學生已派克勤郡王尙格會同侍郎凱音布特登額考試矣此項學生考取後例得以侍衛筆帖式分別錄用爲官學生進身之階數年考試一次若入場時查察不嚴致有槍情等弊豈能拔取真才著奕顯查明向來考試係由何衙門派員稽察務當關防嚴密認真查察不得有名無實仍滋流弊

又 諭奕顯奏宗室學正管長常差拮据請添給公費口米盛京宗室學向設正管長一員副管長二員副管長除每年照例支領俸銀四十兩外每月尚有公費銀三兩口米三斗其正管長則每年僅領俸銀四十五兩並無公費口米

未足以昭平允著照所請嗣後盛京宗室學正管長准其照副管長之例每月添給公費銀三兩口米三斗應領公費於該將軍衙門奏准借撥船規銀兩交商生息項內支給所需口米由內倉關領以資津貼

十二年 諭嗣後左右兩翼宗學在學學生著仍按宗學向來每月考課之期由查學滿漢大臣出題從嚴面試分列等第其連次考取優等者准其記名存檔俟有本學副管缺出與不在學應行揀選之宗室人員由管學之王大臣等一體揀選補用

咸豐六年 諭考試應封宗室向按優劣等第照封爵表條例辦理道光二十四年會將降等給封之例酌改以示變通惟等第較次之員尙有停封永不准考之例日後即加意學習亦無上進之路未免過於從嚴應如何酌量變通著宗人府擬議章程具奏至向來考試章程均係閱定試卷後再閱馬步騎射此後或改爲先行看箭之處著一併酌議具奏

同治七年大理寺卿王榕吉奏略稱 自同治初年奉 命稽察左翼宗學當向該管官切實致屬課程務須認真初次入學尙有教習數員肄業生二十餘人在學接晤此後時復前往則日形疏懈荒畧或無一人稽察教習者難得與宗學生晤面出題課試交卷亦復寥寥詰其何以如此據該管官僉稱宗室之廢學大都皆貧所累餬口無資實有萬難認真者緣宗學肄業生向章每月給米三斗紙筆墨按時給領夏季以冰冬季以炭自經費不敷月米裁減又改爲折色向之領米三斗者今領米不及二升其他更無論焉每月所領僅數兩日之食其充裕之家亦或自行延師課讀然力能延師者十之一不能延師者十之九在各學教習不過敷衍歲月藉爲出身之階而職司稽察者扶同隱忍實覺負疚於中 臣在順天府尹任時於金臺書院考試之期遇有宗室子弟應試者必酌予獎勵按置一二等俾得稍分膏火愛其才又憐其貧也伏思我皇上誼篤親親推恩錫類之仁無所不至獨於入學讀書之子弟月米未復舊觀似無以示優異而昭激勵且兩翼宗學每年所撥節者不過糶米五六百石地方水旱偏災一經奏報 朝廷不惜截漕十萬石二十萬石立予 恩施即

京師之普濟堂功德林及通州之王慈園每冬尙蒙 恩賞倉米五六百石及三四百石不等豈以宗室子弟培養所關而稍有靳惜耶可否請 旨飭下宗人府王公妥議登頓章程肄業生月米應如何復舊勸學與不動者應如何分別勸懲教習官應如何專以責成備俸滿並無實效應否再留數年以觀後效獎勵警惰庶教習專心以納誨學者崇德而象賢將見宗室子弟純明行修大可爲棟幹之才小亦不失圭璋之品則 聖朝之恩明誼美歷久彌光矣

光緒二十七年 諭交涉事宜最關重要見在茲與庶務尤應博採所長以遊歷人員於各國政治工藝潛心考究實力講求庶幾蔚爲通材足備國家任使近來各省士子留心時務多赴各國學堂肄業惟宗室人員風氣未開亟須廣爲造就著宗人府八旗都統遴選各旗子弟年在十五歲以上二十五歲以下志趣正大資質聰明體質強壯者造冊開送軍機處進呈聽候派員覆核挑選人赴各國遊學藉閱歷而廣見聞用副朝廷圖治育才至意

二十八年 諭翰林院侍讀寶熙奏請變通宗室八旗學校章程一摺據稱宗室學生及覺羅等教習學生恆不到館虛糜故事八旗官學於中西根柢之學亦少講求著照所請將宗室覺羅八旗等學改設小學堂中學堂均歸入大學堂辦理庶幾掃除積弊造就通才著張百熙妥爲經理以專責成而收實效另片奏請飭各省駐防官學書院一律改爲小學堂並慎選官員豫防流弊各等語並著張百熙核議具奏

三十一年趙爾巽奏整頓宗室覺羅學台設五城小學堂以固根本下學務大臣知之

臣謹案官學改中小學堂以及貴胄學堂本可聯綴於下緣新舊不同且貴胄又分法政陸軍未便混入學堂既列子目無論何種學堂概歸一處以清界限

皇朝續文獻通考卷九十五

學校考二 旗學

臣謹案 朝廷之待八旗者至矣天下甫定文教事興順治初元即 敕

八旗子弟入監讀書設立官學嗣後景山咸安宮及 盛京官學先後興

八旗義學八旗學堂等銳意擴張宜人材之興雲湧而風翔矣

乾隆五十三年 諭嗣後景山官學應行引見教習仍著該堂官自行帶領惟

將應以何項請用之處先向吏部查數候部覆到日再行遵辦倘有不合定例

辦理錯誤者即著吏部據實奏參

五十四年奏八旗官學額設官學生通共八百五十名嗣後於查學時實驗其

年幼多熟經書及文理明順者給與雙分錢糧遇缺歸併每學限以十名之內

實缺無溢若一二年內學業不進仍行甄退並於教習中擇其學問較優者將

雙分錢糧官學生專令督課備教習因循曠職即行斥退果能功課勤密著有

成效於照例報滿之後予以補官日記錄一次仍督責該官學助教等逐日稽

查訓課務使俊異之材皆有成就奉 旨此項官學生額缺每旗於百名內裁

去十名添作出色學生膏火以示勸懲固不為多但於其中挑取十名給與雙

分錢糧未免過優嗣後如遇甄汰時百名陸續裁扣十名挑取多熟經書文理

明順者將此十名錢糧分爲二十分給予既足以昭鼓舞又可以多育人材較

爲兩有神益

嘉慶四年議准八旗官學生每逢國子監季考年十四歲以上者習步射十八

歲以上者習騎射

又奏准在京八旗滿蒙童生額進六十名擬計應試人數均在五六名取一名

各省駐防准此俟三屆歲科取進逾三十名應設廩增額數照小學例各二名

五年一貢新補廩生仍俟食饌十年後出貢文風日盛再行酌增

五年 諭朕恭閱 皇考高宗純皇帝實錄參領金珩奏請將各省駐防滿蒙

漢官子弟於歲科兩試令該將軍考試馬步箭即送附近府縣考取 皇考

以駐防子弟有能讀書向學者聽其來京應試若悉准在外應考則伊等競尚

虛名必致騎射生疏操演怠忽更有何人充駐防之用事未准行因思上年通

恩條奏駐防事宜請令旗人另設學額就近考試入學再聽赴京鄉試彼時朕

尚未閱 實錄即交議奏准行蓋因各處駐防兵丁較雍正乾隆年間生齒增

倍而披甲名額例有定額概令食糧當差則人浮於缺勢有所難若徒手嬉游

必至習於非義其能有讀書向上者必令遠赴京師應試資斧又恐不給是以

准就近應歲科試以廣取進之階我滿洲根本騎射爲先嗣後各省駐防官弁

子弟不得因有就近考試之例遂荒騎射本業者該將軍等飭諭各官弁文肆

舉業者仍當嫻習騎射以仰副 皇考教育八旗及朕多方造就之至意

又 諭宋澍奏新例駐防旗人另設學額通恩原奏將新進生員歸入府學約

束但各學教官於清語騎射皆不通曉令其教導轉屬無益所奏向是所有駐

防新進生員即交佐領約束於清語騎射加意訓習其月課文藝則交府學閱

卷各省駐防一體遵行

七年奏准八旗漢軍外郎不准揀選官學生凡考試繙譯漢軍官學生與本旗

生監一體考試補用

又 諭朕恭閱 皇考實錄乾隆十八年奉 諭滿洲習俗純樸自我朝一統

以來始學漢文曾將五經四子通鑑等書繙譯刊行近有不肖之徒不繙譯正

傳反將水滸西廂記等小說繙譯使人閱看誘以爲惡甚至以滿洲單字還音

鈔寫替詞者俱有滿洲習俗之偷皆由於此不可不嚴行禁止等因仰見我

皇考崇正黜邪爲風俗人心計者至深且遠從前滿洲盡皆通曉清文是以尚

能繙譯甚至清話生疏不識清字其粗曉漢文者又以經史正文詞義深奧難

於誦習專取各種無稽小說日事披覽而人心漸即於偷此不獨滿洲爲然即

漢人亦更多蹈此陋習如經史爲學問根柢自應悉心研討至諸子百家不過

供文人涉獵已屬蕪餘乃鄉曲小民不但經史不能領悟即子集亦束置不觀

惟喜習詞俗劇及一切鄙俚之詞更有編造新文廣爲傳播大率不外乎草竊

姦究之事而愚民之好勇鬪狠者溺於邪惡轉相慕效糾結盟肆行淫暴概

由看此等書詞所致世道人心大有關係不可不重申嚴禁但此時若紛紛查辦未免假手胥吏轉致擾累著在京之步軍統領順天府五城各衙門及外省各督撫通飭地方出示勸諭將各坊肆及家藏不經小說見已刊播者令其自行燒燬不得仍留原板此後並不准再行編造刊刻以端風化而息詖詞

十三年奏准 景山官學生缺出即在本旗佐領管領下通行挑選其回子佐領下四缺仍照舊辦理

十四年議准 景山官學生係挑選內務府三旗子弟與八旗不甚相懸應照八旗官學之例將年十歲以外十八歲以內者入學肄業十年限滿學業無成者撥回本旗另行挑差

十七年議准 景山學十二缺於會試薦卷舉人內挑取傳補八旗教習二十二缺以順天鄉試薦卷正途貢生挑取傳補 咸安宮教習九缺以歸班進士名次在前者奏明補用及會試薦卷舉人挑補

十八年 諭各省駐防兵丁子弟准就近考試入學因鄉試必須來京路遠者每以艱於資斧裹足不前嗣後駐防入學者即令在該省鄉試於造就人才之道較為有益

二十一年奏准外火器營官學教習額設四名分訓左右兩翼子弟由部考取送補三年期滿著有成效由該處出具考語咨吏部議敘照健銳營教習例辦理

又 圓明園官學教習額設六名由部考取送補期滿議敘俱照健銳營辦理

二十三年 諭國家造就八旗人材以騎射為根本其考試文藝乃末技耳仰蒙 列聖施恩增此一途以廣登進之路即缺此一途亦於八旗人材無損定例旗人報考文場必先試以馬步射方准入闈以示不忘本也承平日久舍勞就逸者多又因科甲人員升遷較速途各爭趨文事憚於騎射甚至考試文章竟有私減年歲冀免馬射者大乖立法之意昨據哈爾爾景祿奏考驗八旗文童馬步射內有年歲不符者三十八名當派軍機大臣查明具奏茲據奏正藍旗覺羅邁拉松阿佛珠靈阿二名恭查 玉牒內開載年歲實係私減捏報邁

拉松阿佛珠靈阿不但此次扣除著永遠不准考試文場其該管參佐領著交部議處考驗不實之都統英和著交部察議至所奏各旗文童優異額等二十八名該對該旗戶冊年歲均屬相符之處尚未覈實不足為憑著交戶部檢齊各該旗報部戶口冊再行逐一確查據實具奏冊內挖補年歲之內務府文童保助常縣二名亦一併查明具奏其本無戶口冊之王公包衣希彥等六名著該王公自行查明據實具奏

又 諭永琦等奏懇添設內務府官學一摺 東陵八旗官學設自乾隆年間遵行已久內務府官役子弟生齒日繁添設官學亦足以資教育加恩著照所請准其 景陵 裕陵兩處內務府官園之內各設官學一所即於內務府人員內遴選滿漢通曉文義諳習騎射者派充教習月給薪水紙筆銀三兩在永濟庫存貯項下動支報銷此外各園居住之官役子弟令其就近歸學訓習該管大臣等隨時稽查分別勸懲以收實效

二十五年 諭英和等議奏松筠請設八旗滿洲蒙古義學一摺八旗設學固為廣育人材起見然攤扣地租錢糧於政務實未得體况各旗舊有甲喇學除學舍見存毋庸添設外其房屋坍塌者或量為修葺或另行躉賃即於恩賞八旗房租制錢項下自行酌辦所用教習果有成效該都統自行鼓勵亦毋庸另立章程

又八月 恩詔江甯京口兩處駐防旗童照取進數目加取廣州府旗籍照盛京加額例六名以上加三名四五名加二名二三名加一名如佳卷無多齊缺毋濫倘祇取一名毋庸議加

道光三年奏准八旗官學生留學以十年為斷其有考取文生員繙譯生員者以考中日為始留學十年如再中副榜拔貢優貢等復以中式日為始扣滿十年俾得底於有成如中式舉人則有銓選之路不得再行留學

八年 諭松筠奏請添設蒙古官學一摺熱河都統衙門常有各札薩克蒙古字來文及各旗蒙古控案據查該衙門僅有喀喇沁土默特數旗粗知繙清之章京等所譯情詞難免外誤著照所請熱河駐防八旗准設蒙古官學其教習

即以馬甲西陵阿補充並准將前鋒德克精額同教讀見已考有閒散旗丁二十名著即作為蒙古學生定額一年後有能編寫者儘先挑補馬甲教習等即以委署驍騎等缺儘先拔補如遇蒙古來文及控告呈詞已挑馬甲之學生能譯清文著作為額外貼寫筆帖式以示鼓勵所有薪水等項著照滿州官學於印房生息項下支給

十三年 諭前據保昌等奏吉林三廳紳士捐資建立考棚請令學臣按臨考試一摺朕即覺其不可行當交禮部議奏意必議駁方為正辦乃本日據奏該處自設立學額以來民字號及滿合字號應試生員若干名童生若干名均未詳細聲明倘人數較少駁令試臣前往考試不獨往來跋涉尤屬徒擾驛站所有該處各廳應試者共有若干人應飭交該將軍查明開單咨部再行覈議等語殊屬非是朕恭閱 列聖實錄俱以我滿洲根本騎射為先若專以讀書應試為能必將輕視弓馬其攻肄舉業者仍當嫻習騎射務臻純熟 聖訓煌煌久已垂為 成憲自當恪守舊章况吉林為發祥之地非各省駐防可比尤宜以騎射為重何得專以應試為能轉致拋荒弓馬舊業即謂有民人與試而國家承平百數十年吉林民風古樸正見其不染習氣何必以攻習舉業為臻上理耶今欲添設考棚無論文風未必遽優即使絃誦日增而弓馬轉致輒弱大非朕教育旗人之意也保昌等率為此奏殊屬忘本關係不小保昌倭榜泰禮部堂官俱著傳旨申飭所奏著不准行嗣後吉林士子仍著循舊例令其赴奉天省寄棚考試總須恪遵 聖訓以嫻習騎射為當務之急毋得習尚文辭轉瀆濇樸以副朕黜華崇實之至意

十四年議准黑龍江呼蘭河地方向未設有官學以致揀選貼寫筆帖式時或難其人嗣後准在現任筆帖式內擇文優品端者一人作為教習照齊齊哈爾等處之例給予原食錢糧俟三年期滿由該城守尉查有實效出具考語奏報吏部議敘

二十二年奏准綏遠城繙譯教習並無傳補之人此次考試又無可取之卷遇有缺出未便久懸三年內見充教習如有報滿或有事故即於已滿繙譯教習

內挑取暫補俟三年後考取有人再行撤回

二十三年 諭八旗根本騎射為先清語尤其本業至兼習漢文亦取其文義清通便於繙譯乃近年駐防弁兵子弟往往於虛名浮華相尚遂至輕視弓馬怠荒武備於應習之清語視為無足輕重甚至不能曉解恭閱嘉慶五年皇考諭旨駐防人等准於該省考試文生原係格外恩施如專務此而廢清語騎射即停止此例亦屬該仰見 皇考訓誡諄諄之至意因思清語騎射全在該管大臣等平日盡心訓飭操演而弁兵子弟亦必藉此進身方能益加勸勉見在武鄉試駐防一體與考弓馬如悉嫻熟不思無登進之路其應文試者必應試以繙譯庶不至專習漢文轉荒本業除本科文鄉試仍照例准其應考外嗣後各省駐防俱著改繙譯考試俾知非熟習清文不能倖邀拔擢自必爭相磨厲日益精通一切章程及繙譯童試進額鄉會試中額應如何酌定著軍機大臣會同該部議奏遵議文生改應繙譯鄉試由該將軍副都統城守尉等考送錄科其歲科兩試毋庸再由學政考試

三十年 諭本日召見安徽蕪采營游擊薩齡阿朕觀其人雖粗率詢營伍事務尚屬去得惟伊謝恩時並未奏清語追問及眼前清語亦茫然不知且奏稱自幼並未學習殊堪詫異我朝根本以清語騎射為首務薩齡阿實屬旗人中之敗類伊本由健銳營出身者仍回健銳營當差賞給四品頂帶令伊專心學習清語騎射毋仍蹈外省惡習著載銓等留心察看如果自知奮勉俟有章京缺出酌量補用

又 諭通政司使參議倭什璋布奏習清文以培根本一摺清文為滿洲本業各旗士子自應習之有素據稱考試八旗繙譯生員向有各該旗考試後錄送之例嗣後凡遇考試八旗中書筆帖式繙譯官譯漢官該旗錄送時即照考試繙譯生員之例先由各旗佐領考試如佐領不諳清文即由參領考試仍俟都統副都統與查旗御史會考甄別錄送倘有冒名傳遞情弊立即嚴參懲辦咸豐元年 諭御史王茂蔭奏請振興人才酌擬五條呈覽其請造就宗室八旗人才歷陳近來積習自係實在情形我朝人才蔚起宗室八旗文武謀略超

越前代良由習尚醇樸不事浮華以清語騎射爲本務登進之途原不必盡由科甲蓋學爲有用之學斯才皆有用之才近來文風日盛留心經濟者固不乏人第恐沾染時習以文章風雅自詡不思講求本務殊非崇實黜華之道疊經申諭諄諄我宗室及八旗大小臣工諒必咸喻朕意嗣後益當奮勉砥礪求爲有用之學以備國家腹心干城之選該管王大臣等尤當因才造就俾文學武備各盡其長毋負朕培養教誨之意

四年 諭八旗人員騎射清文是其本務即使於清文義理不能精通亦豈有不曉清語不識清字遂得自命爲旗人之理道光年間特奉 諭旨停止駐防文試專考繙譯原期返樸還醇俾我八旗子弟咸知本業乃近日八旗人員仍有專習漢文於清語清字全不講求沾染習氣徒務虛文實堪痛恨嗣後無論何項出身人員均宜習練清文通曉講解卽由文鄉會試入仕之員及兵丁子弟亦應一體練習以務根本

五年以奉天八旗捐輸加奉天府所屬滿洲蒙古永遠學額二名漢軍四名六年 諭繙譯孝經係雍正年間編輯爲八旗各項考試命題之本向無清文漢字合寫成書且其時滿洲新語未備書中音義皆係舊語見在各省駐防鄉試童試舉行繙譯已歷有年在京各項考試尤爲八旗士子進身之階誠恐其循誦傳習不免參差簡略朕因詳加校閱遵照乾隆年間 欽命繙譯五經新語悉加釐定著武英殿刊刻清文漢字合璧成書頒行中外俾各士子講習有資用昭法守

又 諭前據大學士文慶等進呈前任巴里坤領隊大臣二等侍衛孟保繙譯大學衍義一書當交鑲黃旗漢軍校刊並派侍郎穆蔭協同校閱茲據文慶等奏稱督同繙書房司員等詳加校訂並發交該旗印務章京會同孟保刊刻成書朕覆加披閱均係欽遵乾隆年間 欽定繙譯四書五經通鑑各批新語詳加釐定因思宋臣真德秀此書因大學條目彙集經史考證得失於聖學治道均有發明康熙十一年 聖祖仁皇帝特命翰林院掌院學士福達禮等繙譯頒行願其時滿洲新語未備引用經史皆係舊語對音切字有未經繙譯成文

者又止清文單行未及增註漢字今既引用新語又成滿漢合璧開卷瞭然洵足爲士子編摩之助著將刊板交武英殿刷印頒行俾在京八旗及各省駐防同資講肄

魯之裕滿漢字音論 國朝之制以進士與詞林選者年四十五歲以前必使習國書而四十五歲以後者免焉良以其舌本因年而趨不能強之圓捷也予雖不與其習而嘗耳目乎其閒徐乃悟夫中外文字聲音之不同無他左與右之別也偏與正之分也音與字之異也而且有橫與直之判也口與耳之殊也聲與音之歧也何也滿書之文左旋而其行則條而向右漢書之文右旋而其行則條而向左漢之書正而錯之以成形者也滿之書偏而纏之以爲體者也漢以一字主一音滿以一字貫數音漢書自上而下相聯以屬辭而滿之外若喇嘛若回疆若西番等國則左旋橫繞以層盤疊綴而爲始終焉其相授受也滿以耳漢以目耳貴聽非聽無讀也目貴明非明易說也故漢書以詳勝詳乃該之而靡遺滿書以簡勝如諧曲者然雖有書特以標其略焉耳故漢書之讀別在聲就聲而借之有轉注假借之術以通其所窮滿書之讀別在音卽音而傳之愈屈曲愈圓轉而愈不可以窮蓋聲有盡而音無方故無字之音恆多也然漢學者之辨於字必晰其點畫至於音則彼此互異弗較也滿學者之辨於音務研其清濁至於字則體勢小差弗計也故漢有不可勝記之字滿有不可勝誦之音漢字以變化神其奇滿音以圓捷靈其妙是以切韻之學漢之不識其起例者甚多而滿則自然而合之無他源流近而舌音習焉耳

七年 諭總管內務府大臣裕誠等奏請將世職幼官歸入兩翼幼官學一摺內務府承襲世職幼官向不入官學肄業及歲時復不分優劣概不准支食全俸殊不足以廣造就而示勸懲此後內務府世職幼官著照八旗定例歸入兩翼幼官學肄業以昭畫一
又奏准 圓明園八旗包衣三旗原設繙譯教習八名惟鑲黃正黃正白鑲白正紅鑲紅六旗每兩旗教習各一名官學俱設在營外如遇雨雪諸生不克赴

學致有曠課其正藍鑲藍包衣等三旗每旗教習各一名官學設在本旗就近訓讀頗有成效是各旗專設學校實有裨益嗣後添教習三名每旗各一名歸本旗營內教讀俾就近學習

又內務府三旗世職幼官移附八旗世職幼官學一體學習清書騎射

九年以續行捐輸加奉天滿洲蒙古永遠學額三名漢軍四名

十一年 諭各省駐防向有考取舉人生員之例自道光年間改為繙譯將舊例停止原為八旗人員均應諳習國語清文以為本務恐因考試漢文致有荒廢見在繙譯考試已歷有年通達漢文績學之士不克觀光誠為可惜嗣後著於駐防繙譯科甲外仍復考取文學人生員之例准其鄉會試與繙譯一體錄用以廣登進該駐防人等仍不得專務漢文致將繙譯國語荒廢用副教本育才至意

同治元年議准各省駐防前經取進之文生暨繙譯生從前應繙譯鄉試者見或仍應繙譯或改應文闈均聽其便嗣後取進之繙譯生員即專應繙譯不必兼應文闈其新進之生員專應文試有願應繙譯者准自呈明改應繙譯既改之後不得再應文闈

又覆准駐防捐納監生願應鄉試者造冊咨送兵部考試馬步箭合式者方准入場

又 諭孟保奏請將滿洲蒙古成書添註漢字刊板進呈該副都統留心繙譯所刊三體 聖諭廣訓於辦理清字蒙古事件足資裨益著准其將板片呈交武英殿以備刷印孟保著交部議敘

六年以西安將軍多隆阿攻克回巢得銀充餉加京旗滿洲蒙古永遠學額十名又加東三省滿蒙永遠學額十名按三處畫分除撥吉林三名黑龍江二名外所有加額給奉天滿洲蒙古五名自戊辰歲試始分別取進連前所加五名適符大學十名之限嗣後東三省再有捐輸不准再加滿蒙永遠學額以示限制

八年議准吉林省城及各屬地方未設立教習嗣後添置古塔伯都訥三姓

阿拉楚喀雙城堡烏拉總管衙門各處滿教習各一員均以該處無品筆帖式考校咨部補授不開底缺至白山書院係為旗童誦讀漢書而設亦添漢文教習一員即以將軍衙門五司當差水手營正丁貼書揀補咨部均作永遠定額其旗童習讀之處由該將軍等挑選至教習三年差滿照章升用如成效不敷再留三年方准送部引 見

十一年議准廣東駐防生員見在一百餘人嗣後設立拔貢一名

光緒元年議准吉林五常堡添設滿教習一員由該堡領催甲兵委署筆帖式揀其通曉清漢文兼能騎射者考補咨部永作定額不開底缺仍支原缺餉銀五年期滿如有成效遇本旗驍騎校出缺與領催一同列選

七年奏准吉林省城漢官學祇教習一員學童多至數十人教導難周再添漢教習二員仍由當差水手營正丁貼書及該營生員內考委隨同教授將來原設教習缺出即以添委教習揀補其兩翼滿官學原設助教官二員每翼生徒不下百餘名功課亦難周備准各添滿教習三名均由各旗擇滿文優長者揀用與助教官一體教導仍由各旗揀武教習二名專司練騎所有文武委教習三年著有成效以應升之缺拔補或有始勤終惰者即隨時更換各教習需費及生徒膏火統由吉林將軍籌辦並不時派員查課以免日久懈生

八年寶廷奏 本朝制度滿漢並用從前八旗人材輩出凡漢員所不能辦者滿員往往每能有功今則大異於昔矣夫外省尚可不分滿漢京官滿漢並列不能通融合十八省漢人而取之猶未必人盡稱職旗人之數不敵一府亦必勉強備員豈免濫竽之訥此時如此日後可知近年八旗文風未見大遜於前何以消乏如此推原其故一由於官學廢弛教育無法雖不乏讀書應試之人而專攻舉業所學皆非所用一由於開捐以來進身太易捐一筆帖式謀入檔房但能奔走攀援雖目儀職丁不十年即可富貴縱有聰明可造之材沾染陋習亦漸趨於輕浮卑佞故有謂檔房為汨人之淵語雖近激非過論也今欲培八旗人材必自整頓官學與筆帖式始整頓官學前已有 旨交議至筆帖式則尤不可緩之圖八旗就此途者較他途為尤多必當亟行整頓整頓如何惟

教之習例而已查考試筆帖式定制極嚴今則搶替傳遞無弊不有清理非易既未能遵清其源似不可不亟疏其流近來堂官視筆帖式如吏役往往不屑整頓即有心整頓者亦不過嚴察考動簿冊就令筆帖式日日到署送送堂官所習仍奔走伺候於公事何益乎是仍導之爲輕浮爲卑佞也考試難於核實不如核之於到部擬仿外省分發難職佐貳到省考試之法變通試之凡筆帖式到部不論實缺候補捐納考取一律試以滿漢文必大致通順方准作爲到部其太荒謬者駁回令自學習三年再赴部考試如仍不通仍駁回學習一年再赴部考試必能通順方准留部學習三年期滿奏留亦必遵例認真甄別不准虛應故事如到署考試與奏留甄別不認真者堂官以諭詢論各部立學例館擇司員之深於例者派充教習不分滿漢合一署筆帖式皆使習例漢文淺者先教之習漢文每月堂官考之分別優劣每季再考年終大考優者酌予烏布劣者酌開烏布三年京察以例案之生熟並差使之勤惰分別等第題升主事其不願習例者縱釋通差使奮勉雖保一等但宜別項差使不准題升主事主事者員外郎郎中之階行將主稿掌印安有不通例案而克勝任者近來滿司員中半皆備員公事但特漢員與書吏主持不習例故也聞直隸按察使剛毅在部時專心習例從學甚多及官外任甚有政聲則習例之效也果能認真習例不十年六部當添許多幹練滿員異日府道封疆何至有乏才之患哉或謂滿之有筆帖式如漢之有書吏無須習例但重滿文夫使終身但爲此官固不必深求如欲爲司員則不可不習例矣而况積資俸內可以正撥席外可以領兼所乎習之法某司行走即習某司之例異日精通即可掌某司印主某司稿如才力有餘願兼習者聽之其限於才力不願習例者亦聽之或慮因此恐有繕譯廢弛之弊不知漢文不通未有能通滿文者從前筆帖式重滿文者恐其求工文詞而致荒滿文非謂不必通漢文不必諳例案也今責以通漢文諸例案則曰吾習滿文及考以滿文則又全不通曉竊不知其何所習也三年考試之法具在但能認真甄別又何慮繕譯之廢弛乎伏讀乾隆二十九年 聖諭近聞各部院辦事惟司員呈堂查稿而各司筆帖式經年不得常

見堂官其所熟悉者不過跟班數人而已筆帖式將來俱可陞用司員若該堂官未經謀面遇有保題陞用之處祇以司官之言爲憑於理未協堂官自應於筆帖式內留心察看遇有堪以造就尙能辦事者時加訓勉以期有成又讀雍正五年 聖諭各衙筆帖式俱係辦事人員將來陞用堂司之人雖經考取必當慎重揀選人材補用方於部務有益仰見 列聖培養人材至意足徵筆帖式非但當習漢文而必講求部務矣夫造就之方揀選之法亦惟是教之習例而別其能習不能習而已八旗人材所關甚大培養之要在於此二者乞 飭軍機大臣詳酌妥議斷自 聖衷似無庸更下部議六部堂官差務殷繁多此一舉未免更增勞劇然諸臣皆受 國厚恩滿員固當以培植後進爲己任即漢員亦不至有膜視之心想皆以是說爲然也

又 諭御史俊又奏請整頓官學一摺國家設立八旗官學原以培養人才該教習等宜如何安心督課以期名實相符若如所奏近來各官學生並不入學肄業教習助教亦不認真教誨督責尙復成何事體著國子監堂官嚴飭各該學教習助教盡心訓誨毋任積久懈生該堂官務當隨時稽查認真整頓又 諭吏部國子監奏會議整頓八旗官學請派員詳議一摺八旗官學廢弛已久此次籌議整頓事同船始所有一切事宜應如何設法變通妥籌辦理之處著派寶璽李鴻藻徐桐麟書會同國子監堂官體察情形妥議具奏九年奏准重修八旗官學告成應於滿漢科甲人員中每學派一員爲管學官並於一二品大員中 簡一員爲管理八旗官學大臣管學官八員由管學大臣酌保

又管學官八員無論滿漢已仕未仕但取人品端慤學問優長者充選除升任副都御史以上勞難兼顧應即開除外其餘各員均定二年期滿酌量更換如實在得力奏請留學以資整頓至一切事宜均責成管學官認真辦理所有各學司事即由管學官自行延訂又見在學舍修竣並各繪圖冊派管學官一員專司其事所有年修等項即由管學官督同司事經理毋庸再由各旗經理並將各圖冊於更換時移交接管

又嗣後挑選官學生不拘官階品級但擇子弟秀良尤須先儘貧寒子弟如學生住非本旗界址距別旗學舍較近者仍准就近附學以示體恤各學生並令每日在學早飯一餐俾晨出暮歸免致荒嬉所選學生如有家資較裕力能延師者准其報明不必在學肄業仍分定教習每月面試二次其月課季課與在學諸生同考但滿蒙漢統計不得逾二十名俾不致多占寒素額缺

又嗣後學生到學後先儘學習漢文務令漢文通曉然後學習清文

又八旗官學每學添設翰林官一員於編修檢討內揀派令其分學訓課月課季課由管學官會同翰林官及國子監助教分司考校翰林官考經義詩文助教考經書及清文蒙古文均由管學官擬定優劣存記簿冊四季由管學大臣率同管學官翰林官助教定期會考列優等者獎勵劣等者示罰年終將所記簿冊統計優劣分別賞罰以昭勸懲其春秋二季赴監會考仍由國子監辦理又向例每學漢教習四員嗣後添額外二員以備不時替代其報滿日期仍以補實之日起算連開扣足三年如補後未滿三年已有成效准由初到之日起算以示鼓勵其原設滿蒙教習弓箭教習悉仍其舊

又教習月給津貼銀六兩月費銀二兩令其常年住學每日兩餐肴饌由學備辦其舊例銀米衣裘一概停止額外教習照實缺減半滿蒙教習如本身食有錢糧者除照舊關支外本學酌給津貼月費亦減半支領

又每學添司事三人館役廚役十二名所有津貼月費及工銀暨銀米雜項前奏常年經費以三萬二千兩為率由戶部分期發放由管學大臣備文具領交管學官動用又籌辦官學前經戶部指撥銀十五萬兩除工程用銀七萬八千兩有奇外餘銀業經奏明留為學中製備一切之用由管學大臣發商存息所有學生獎賞及房屋應修雜款即於此項內撥節動用以期經久

又近來保送學生各旗委任領並不認真選擇致有冒名頂替之弊嗣後各旗幼丁送監挑選後除由國子監備名冊送學外仍責成該佐領出具甘結飭領催同該幼丁父兄帶領來學如查有情弊將佐領奏參領催咨革

十一年奏准八旗幼丁有情願入學該旗抑勒不送者准其自行報明本旗官

學由該幼丁父兄帶領到學管學員考驗如果資質聰俊暫予存記俟有額缺再行文本旗取具圖片傳該幼丁赴監與保送之幼丁一體挑選送學

又官學生無論何項考試於選考之初先由管學大臣面試可以應考方准保送至應考取中之學生未經傳補者停給膏火仍准留學其考中恩監生例應赴監如願就近肄業亦准留學惟已挑取官學生者不准兼考同文館學生並咨查同文館記名學生內如有官學生一律開除不至遷就兩途紛其心志

又官學生除怠惰偷安無故曠課及實犯學規不遵約束者仍照例革退並咨旗管束外其有年十五以上實係資性魯鈍不能讀及所限字數者令將四書讀訖咨回本旗除滿蒙照舊挑補披甲漢軍挑補鄂爾布外仍准先行坐補養育兵以資養贍所出官學生缺由各旗都統於十三歲以下之養育兵內選聰明秀俊與應行挑補官學生之幼丁一併送監挑補

又作文學生以經書為重不得託名作文轉荒正業讀書學生責成管學官量其資質限定每日授生書若干行非要事及實病不准曠課其考課之法十三歲以下以背誦識字默書三項為要能三兩項者為上一項者次之一項不能者為下十四歲以上以背誦識字默書講書四項為要能三四項為上兩項者次之一項者為下如能講書通澈無論年歲雖兩項亦為上等教習報滿時學生除事假病假外功課無曠上等學生及半而無下等或下等居十之一二而上等過半者出具上等考語下等及半而無上等者出具下等考語餘俱出中等考語上等考語用八字中等七字下等四字著為定式其有教習訓課甚勤誘掖有法而學生資質不能受益者准教習報管學官詳查功課酌量去留如在該教習將屆期滿一年之內不准請革學生管學官亦不得率行撥館以杜徇私取巧之弊至平日課程以背誦默講四項認真訓練倘教習有廢曠館職不以功課為重者由管學官報管學大臣將該教習咨回另補管學官不得力者由管學大臣奏請更換

又各學滿教習祇一員見令督課清文頗有勞績由吏部分別升階酌加優敘以示鼓勵如有文理疏淺者即咨回本旗由管學大臣延聘通曉滿文不拘已

仕未仕入學教習俟得人再行接任其延聘之員毋庸議獎

十三年奏准留學教習三年報滿時暫緩引 見統俟六年期滿果能實心訓導由管學大臣出具考語併案引 見專以知縣錄用歸入新定班次用示優異

又教習如遇場期給假三十日期服給假二十日均令自覓文理優長之士來學代理功課有誤惟該教習是問倘遇患病請假或數日或十數日亦令覓代如前病逾三月未痊開缺另補將來病痊傳補後再行接算以在學之日前後統計

十四年議准嗣後教習統以四缺爲一輪按新舊輪補一周後再有缺出查取國子監肄業之五貢無論會否考取教習擇屢列優等者揀送數人由管學大臣考取咨補凡住監屢考優等之五貢均由監隨時知照禮部註冊以昭覈實而免紛歧

楊鍾駿論八旗官學之制有成安官學景山學宗學覺羅學八旗官學漢軍義學幼官學設繙譯教習弓箭教習以教督之設管理大臣總副管以約束之宗室黃帶子官學東西城分左右翼各兩翰林教習輪日稽課咸安官學在內西華門內爲八旗官宦子弟讀書之所兩翰林爲漢總裁按日稽課其殿西西配殿讀滿洲書則滿總裁稽之祭酒盛昱復官學議擬修復變通之法甚詳其言曰八旗之人不及漢人什百分之一八旗之京官乃多於漢人數倍荒陋貪鄙動爲人笑筆帖式旗官之初階也近者不由學而由捐黃口乳臭目不知書伺候堂官有同奴隸浸而升司官放道府甚且長封疆長臺閣內患之所由起外侮之所由來孰非此輩階之厲哉又云和坤擅政凡其職拔旗人以巧趨避爲德以工鑽刺爲才以善進退周旋俯仰爲知禮而風氣變營第宅美衣服飾廚傳蓄姬侍寵奴僕酒肉乘於衝綺羅照於市樓臺相接鐘鼓相聞恣睢跳踉於鞦韆之下嗟乎此爲八旗言之也至光宣之閉士夫之官京朝者咸奉此輩爲師而罔上負國不獨不學之旗人爲然矣吁可畏哉

皇朝續文獻通考卷九十六

學校考三 太學

謹案建首善自京師始世祖定鼎之初即仿古太學之遺意設立國子監俾八旗子弟與直省貢監生得從容肄業其中而以祭酒司業等董率之當是時餼餼者文彬彬者士甚至荒裔殊族亦嚮風慕義率其子弟來讀我太學書者嗚呼豈不盛與其後司教者漸失初指屢聚坐擁皋比荒落監生一經捐納亦得濫廁其間人遂以太學為叢垢矣自設學堂後概為學堂一門不復混入

乾隆五十一年奏准臨雍典禮陪祀聖賢後裔凡生員監生奉祀生向例均作恩貢無所區別此次後裔內復有武生俊秀為向來所無准作監生至俊秀原無頂戴既係聖賢後裔在陪祀之列亦請恩准作為監生

五十三年諭見任官丁憂尚須回籍守制其報捐俊秀既係服制未滿何迫不及待而必差人報捐該部併入應准條內未為允協嗣後丁憂人等不准報捐服滿後仍令本人親身赴部具呈始可准行

又嗣後錄科考到俱令管理國子監大臣及滿漢祭酒司業在署校閱一次不取不得再考

五十四年覆准在監肄業貢監生令助教等官臨期認認其不在監肄業者雖起有本籍文結仍取具同鄉京官印結令出結官識認其在部候選及各館膳錄由各衙門咨送者亦令取具同鄉官印結臨場識認

五十五年御製集石鼓所有文成十章製鼓重刻有序鼓凡十在大成門外左右分列

又曰凡舉大事者必有其會與其時而總賴昭明天既以成其功武成九次無論矣即如回庫全書及以國書譯漢藏經皆始於予六旬之後既而悔之以為舉事已晚恐難觀其成越十餘載四庫全書則早參考裝潢畢以貯之閣而所譯漢藏經亦將告畢就此非天恩垂佑俾予雖老而善成此二事乎近因閱石鼓文惜其歲久漫漶所存不及半夫以國學興賢述古之為使千萬年之

後並此僅存者胥歸無何有之鄉有治世之責者視之而弗教予且不成為讀書之人矣斯事體大千古讀書人所不能任亦從無道及者予故不作文及此未至耄耋智昏爰藏此事蓋石鼓之為宣王時作與夫宜置國學為萬世讀書者之津逮自以韓昌黎之見為正車攻吉日之章班班可考也夫有其見而無其力且未思及存其詩則予較昌黎為勝矣茲用幸翰苑之例親定首章截其長以補後數章之短即用文中字並成末章自第二至第九命彭元瑞按餘字各補成章非因難以見巧實述古以傳今於是石鼓之文仍在十鼓井井有條而不紊矣舊鼓舊文為千古重器不可輕動但置木棚蔽其風雨以永萬世而新為十鼓以刻十章並列國學以公天下惠後儒則仍周宣之文也熱河文廟為歲歲惠遠詰武之地亦命置之以詔來世庶乎宣王中興之烈不泯宣聖膺世之道恆昭而予及耄耋之年尚得藏此崇文之舉執非會之萃時之合深蒙 昊既之所致哉希周家卜世之久嚮皇清重道之規後世子孫尚慎念之是為序

重排石鼓文音訓

避我同功作車既王釋文攻字說古文作王此避馬既同避車既好避馬既

駢從馬同君子貞釋文貞字說古文作王此避馬既同避車既好避馬既

駢從馬同君子貞釋文貞字說古文作王此避馬既同避車既好避馬既

右一八九字凡二十

謹案避字古文吾字見夏竦古文四聲韻辭尚功潘迪釋為我不知庚鼓已有我字避我二字未可混同好本作致說文引商書曰無有作致從女丑聲今尚書作好好之古音讀如狃又讀如朽是為同聲通用字致與駢本古合韵之證故潘氏謂駢與詩四牡孔阜之阜音義同若郭忠恕讀駢為駢鄭樵音寶皆非鼓文原本云君子鼎邈鼎旂錢大昕曰當讀君子鼎邈鼎旂羅振玉曰古寫諸經如采葑采葑苦采苦等文尚作采葑采葑是唐人尚如此書也吳大澂說文古籀補云邈古文獵鼎旂借為云潘迪云員作鼎說文員音云益也兩部實古文作鼎知鼎為古員字速

樹栗其人與千戶侯等是也氏至也今用抵字前漢項籍傳抵牾陽史司馬欣注相歸抵也亦通作邱爾雅釋器邱謂之抵郭註根抵皆物之邱邱即底故劉氏以氏作底重排本作抵皆通真鄭作莫並非作莫重排本似誤論潘迪已鼓原本作雋注云薛氏作華按說文雋木華也况於切古韻在十虞聲榮也戶瓜切古韻在九麻此字當從潘氏作雋重排本作雋徧攷諸家並無此字羅氏振玉曰尹氏彭壽云翰从飛猶翼字亦作鸞適說文气行兒通作攸行水也段氏曰气行之適水行之攸皆主和緩宮非丙鼓本義按爾雅釋山大山宮小山郭璞注宮謂圍繞之禮記曰君爲廬宮之是也鄭注宮謂圍障之也以寺而乍即論語山梁雌雉時哉時哉三

其邊孔庚獸直通作室說文處處豕豬潘云成作音韻蜀潘云恐是韻子雅牛其應鹿雉兔趨鄭云直離反潘云亦其吳吳古老反大白澤獸也趨趨廣說文走意其虎左驂馬報諸家皆之大黃弓射之

右八二字重文二

臣謹案適丙鼓已鼓原文兩見今重排本作適引潘作適似誤按前漢章實傳萬國適平注古文攸字又五行志彝倫適敘地理志鄧水適同並與攸同餘甲鼓原本篆文如是馮氏从之作越是也今重排本篆文作泚惟越字甲鼓原篆極明晰可證說文引詩曰謂地蓋厚不敢不越今小雅作踏毛傳曰累足也蓋越謂古字通

即鹿又說文走也搏鷹又文古同填說鮮登鄭人掌共五齊七五時百同異胡鄭施俱作豆潘作放乞及是申如天之離施潘引說文朱森石鼓考秀蘇作執鄭作社章云說文員乍微表劇注微適也潘云未詳臚作府潘云未詳

右九八字重文三

臣謹案真丁鼓本義真如者猶軫軫然也有乘載之義真軫義通今重排本既從鄭作填劉氏嘗釋填如爲闕如亦通闕與王鼓篆文原本君迥然

不同張燕昌石鼓文釋存謂石本是嘉字諸家釋作喜非微石鼓文定本作滅滅即滅于逼切說文滅疾流也或字从一者地也从土亦地也从彳从水通江賦云側滅漣湜是其義也庸字篆法與召伯虎敦及號季子白盤略同金石諸家作庸从由似調

達隳既射遺馬飢說文止用實孔庚庚王學之作康康安樂也敕說文戒也書益嗣文治字古孝經作乳古老子作網帥數田車既安日佳丙申用各爲章害時同見不永靈

右十一八字重文三

臣謹案韻古載字詩曰春日載陽箋云載之爲則也又承也事也害壬鼓作害本義薛氏作周今重排本从詩葛覃篇亦斷章取義耳

五十六年 諭自漢唐宋以來皆有石經之刻所以考定聖賢經傳使文字異同歸於一是嘉惠藝林昭垂奕奕甚盛典也但歷年久遠率多殘缺即開有片石流傳如開成紹興年間所刊今尚存貯西安杭州等府學者亦均非全經完本我朝文治光昌崇儒重道朕臨御五十餘年稽古表章孜孜不倦前曾命所司創建辟雍以光文教並重排石鼓文壽諸貞珉而十三經雖有武英殿刊本未經勒石因思從前蔣衡所進手書十三經會命內廷翰林詳覈舛譌藏弄懋勳殿有年允宜刊之石版列於太學用垂永久着派和坤王杰爲總裁董誥劉墉金簡彭元瑞爲副總裁並派金士松沈初阮元瑚圖禮那彥成隨同校勘但卷帙繁多恐尙不敷辦理着總裁等再行遴派三人以足八員之數爲校勘諸臣等其悉心研辨務臻完善以副朕尊經崇文之至意欽此遵於 辟雍殿左右恭立 欽定十三經石刻碑共一百九十通於彝倫堂內左右恭列 御製石刻蔣衡書十三經序 文曰前歲集石鼓文而爲之序有曰凡舉大事者必有其會與其時而總賴昭明 天貺以成其功信弗爽也石鼓不過周宣王之事列於 文廟之門以寓興文尙俟其時其會若夫十三經則古聖先賢出諸口以傳道授教其重於石鼓文奚啻倍蓰哉則今之石刻十三經是矣蓋此經爲蔣衡手書獻於乾隆庚

六年 諭向來俊秀監生鄉試錄科係由國子監考試錄送因吳省欽條奏改爲欽派大臣在貢院局試嗣又有御史奏請復舊例者經禮部議駁未行此時貢院正值興修未能在彼錄科此次俊秀監生仍由國子監考試不必欽派大臣以後或應照舊例或仍在貢院錄科之處並著軍機大臣會同禮部一併議奏遵 旨議定俊秀貢監仍令國子監照舊辦理惟於錄科之後即將俊秀貢監原卷封送禮部嚴密貯庫俟揭曉後磨勘之日凡有俊秀貢監中式者均查出錄科原卷夾於中式試卷之中覈其筆迹文理有迥不相符者舉出究辦八年 諭前因彭元瑞奏太學石經見在所刊碑文與 御纂 欽定本開有異同請詳加察覈特簡派大臣悉心檢校茲據董誥等奏將石經全部公同詳細校勘除會奉 特旨改刊各條外實無違背更改之處並開列清單進呈因思石經爲同文盛舉從前彭元瑞撰進之考文提要亦係援引武英殿唐宋石經及天祿琳瑯宋槧各書作爲證據見在太學石經早已刊布通行毋庸改易其石經內有遺漏筆畫及錯刻草率各條著交御書處查照修整以臻完善九年 諭管國子監事大學士劉墉祭酒潤祥顧德慶等我國家 列聖重光以典學親師爲首務羣士雲濡化雨泱泱論肌朕紹承 大烈三年卽舉臨雍之典八年於茲就兢業不敢昕夕愆忘今仰荷 洪慈武功歲事文教宜修首善之地尤加意焉夫學以明倫爲本士以喻義爲先倫不修而以文資飾義不明而以利計私何以爲士子之倡乎學校之科條非不燦然顧或於倫物不躬行則三德六行皆空華矣或於利義不明辨則服古入官皆市道矣爾監臣可不孜孜以是道其國子爾多士可不汲汲以是臻於高明毋以爲迂闊而遠於事情毋以爲陳言而不求切已朕所厚望於臣工庶士滋濯其心誠勤無懈以培植賢才爲國棟幹焉

又奏准湖廣之苗猶廣東之黎峒廣西之土官土目子弟雲南威遠之彝人四川之番民羌民等向俱准應童試如願捐監准其一體報捐

十七年議准黔省每逢拔貢之年准其一體舉優惟舉報優生升入太學者例當考試經藝兼須確訪實行由該學政覈實辦理毋得濫舉充數

十八年覆准土司既經承襲卽係職官不得再捐監生

又由民壯改充縣役所管督解遞犯承差詞訟與卓快名異實同其子孫不准捐納監生

又順天向未舉報優生與各省未能盡一應由學政行知各學酌量保題如不得其人任缺毋濫至八旗生員人文蔚起優貢應一體舉行如有文行兼優之士准其另舉優生一名如無人可舉仍不得濫竿充數

十九年 諭禮部奏議駁御史黃中傑條陳優貢考試一摺各省優生三年舉報一次與拔貢十二年舉行者年數懸殊如一體廷試錄用實於體制未協該御史所奏不可行至該部稱嗣後優貢免其來京朝考以示體恤所議亦非各省優生由學政會同督撫保題升入太學朝考後始准作貢斯合貢於王廷之義若停止朝考名實不符禮部堂官輕改舊章著傳旨申飭優貢朝考仍照舊例行

二十二年覆准附生告頂後准其報捐貢生不得應試

二十三年覆准農民承充號房並非隸卒改充委無別項身家不清之處准其報捐監生

道光三年 諭祭酒等曰成均首善之地風勵天下實始於茲咨爾監臣式茲多士尙其端乃教術正乃典型無卽於華無鄰於固入孝出弟擇友親師庶幾成風紹祚 聖緒惟爾監臣無曠厥職

又奏准歲貢到監肄業八旗取本旗文直省取本籍文並准取具同鄉六品以上京官印結以歸畫一

是年 上臨雍講學大學士長齡曹振鏞進講大學欲修其身者先正其心欲正其心者先誠其意 上宣御論曰聖人垂訓後世齊家治國平天下胥本於一身身也者顯揚垂裕表率之則也有明德新民之責者豈可忽哉夫修身有道不事外求心爲身之主宰意乃心之發端其理本屬於一貫其次第則有不可紊者人君以一身承堯舜禹湯之緒下慰億兆蒸黎之望萬幾至蹟一心應之無偏無倚始足以昭感化然志壹則動氣氣壹則動志此皆意未能誠耳

意既未誠欲心之正難欲身之修尤難必也敬以直內虛以應物去私克己復見天心無一息或懈無一念或弛持之以謹慎養之以和平純一不已渣滓不留意與心無二致而後綏猷建極措正施行正朝廷以正百官正百官以正萬民未嘗以修身示天下而吾身之修即莫不共揭於天下所謂形端表正動罔不宜將見上行下效咸有一德治理蒸蒸日上由是推而至於致知格物而大學之功全矣

九年以平定回疆告成太學 上親製碑文勒石大成門外曰征而滅之謂之勤生而致之謂之擒命將出師聲罪致討此可必得之數也執手張拳生彙駢繫此不可必得之數也矧既已遁逃而猶望其自投羅網尤難之難矣乃失之而復得之且生得之此豈人力哉天也逆回張格爾者為薩木薩克之子自稱係和卓木後裔嘉慶二十五年冲巴噶什愛曼布噶特比蘇蘭奇與張格爾糾煽回衆殺傷卡倫官兵欲圍喀什噶爾經官兵擊敗張逆等竄逸道光四年張逆復糾合同衆晝夜搶卡官兵繼獲助逆賊目張逆復遁五年差人詐降句結四百餘人為亂因奈曼部落不從仍復竄赴薩雅克部落句結汰劣克等同來喀什噶爾滋事巴彥巴圖帶兵出卡遇賊接仗中鎗自刎朕諭慶祥往喀什噶爾督同永芹辦理勦捕事宜旋因永芹病歿以慶祥為喀什噶爾參贊大臣六年六月張逆率安集延布噶特五百餘人夜由開齊山路突至阿爾圖什回莊衆回從逆者多分投搶城臺路斷絕所調援兵路梗未能猝赴英吉沙爾葉爾羌和闐既分兵應援存城兵少賊勢猖獗各城紛紛告急烏什阿克蘇二城亦俱戒嚴朕遂授長齡為揚威將軍楊遇春武隆阿為參贊大臣先後調派吉林黑龍江官兵三千名各路官兵三萬二千餘名又簡派巴圖魯侍衛章京等馳往帶兵進剿隨頒發殊諭十條指授機宜而賊匪擾至阿克蘇渾巴什河南岸屯聚伺隙躡渡經長清達凌阿巴哈布等督兵晝夜嚴防兩路夾攻殺賊甚夥賊首奔竄追斃之楊芳搜勦阿爾坪從逆賊匪戮殆盡七年長齡等於二月初六日統大兵進剿二十三日洋阿爾巴特甫經接仗賊勢披靡布噶特俱奔竄二十五日進至沙布都爾莊鏖戰擒賊匪數萬二十八日進至阿瓦巴

特回莊三次續獲勝仗三月初一日克復喀什噶爾張逆先已乘閒竄逸長齡留喀什噶爾楊遇春等帶兵進剿英吉沙爾葉爾羌以次收復楊芳分勦和闐亦克復其城朕以四城雖定逆首未除諭長齡派兵各要隘安營務確探張逆蹤迹期於必獲五月長齡奏張逆在木吉地方潛匿飭安福等出卡追捕添調楊芳督辦張逆復竄拉克沙地方檄令喀拉提錦部協助擒賊論楊遇春來京入覲楊芳授為參贊大臣長齡奏請仍留喀什噶爾朕允其所請並諭以張逆勢難窮蹙難保其不復來窺伺該將軍等當嚴加防範設法勦擒張逆果於十二月二十七日潛由開齊山路入卡長齡楊芳分統將領連夜勦捕追及於喀什噶爾蓋山兩路並勦衆賊逃竄張逆僅賸賊黨十餘人情急將自絕頸總兵胡超等奪刀生擒之餘賊戮無遺隨將張逆解大營檻送闕下獻俘長齡等紅旗報捷閱二十日遞至京師爰錫封長齡為威勇公楊芳為果勇侯其餘將士升賞有差朕思回疆自 皇祖高宗純皇帝平定以來休養生息六十餘年彼回衆踐食土毛無不感承 聖化乃張格爾以逆裔遺孽招集沙蟲之族潛行梟獍之謀朕何敢不道揚 先烈勉迪 前光是役也擒渠於萬里而遙奏績於一年以來備脅從之衆一鼓皆殲而煽惑之魁隻身遠遁事未稱爲盡善功猶墮於垂成且逆首或畏罪自戕或拒捕被戮雖伸國法未快人心是既得而猶未得也今則飛蛾赴火自蹈危機臨陣生擒束手就縛與檄諭外夷設計縛獻者厥功尤偉然此豈人力所能爲哉罪人斯得 天奪其魄也我武惟揚天之所助順也禮曰執有罪告成於學故據事書之繫以銘曰惟我 皇祖拓土開疆大小和卓自取滅亡背恩反噬敢肆鴟張爰敕將帥剪彼披猖二酋授首獻馘廟堂 威懷 德綏靖遐荒濟惡作奸薩木薩克遠匿深藏苟延喘息弗忍加誅投畀有北逞其詭謀爲鬼爲蜮助虐者誰狼心叵測曰安集延曰布噶特根株弗斷滋蔓難圖查張格爾甘自速辜巧營三窟雄長一隅窺邊越卡常苦覲覲有時擊敗窮若囚拘乘閒而遁終爲逃遁煽亂游魂借誅遺孽搶占城垣棄隴巢穴鴟毒豺凶蜂屯蟻結竟抗顏行羣效據竊前園後攻左牽右掣燎之方揚如火烈烈恭行 天討詰爾戎兵卜云其吉命將邁征三戰三捷

克復四城以少勝衆猛助軍聲狡哉鼠竄惜死偷生神人共憤星掃樓槍窮猿投林枯魚泣釜遜迹莫值執襲而虜自夏徂冬以防爲堵彼若不來我焉能取惟天不容倖羅網畧故智復萌餘勇欲賈霜鋒雪甲桓桓我師賊棄馬走高山屢屢揮弓電閃激矢風追逆渠生縛援戈而麾自我勦之自我擒之堂堂正正盪定西陲將軍長齡首功懋賞參贊揚芳壯猷優獎爾公爾侯用褒忠諫大小臣工恩波浩蕩押獻戎俘又安邊壞紫閣銘勳凌煙畫像凱歌除夕慶洽元辰萬方送喜九寓同春確應靈序允惠黎民如天之福如天之仁告功太學勒碑成均嚴恭寅畏天命懷遵

又覆准江蘇海關扞丈手並不由他項拔升與安徽蕪湖關操練總由巡役拔補者有閒亦不承票拘犯行杖准其一體報捐嗣後扞丈手須身家清白方准投充如由他役拔補者仍不得援以爲例

二十三年議准廩增附青衣生等有願棄文就武者准其報捐武監生執照內註明應武鄉試不准再應文闈以杜文武跨考之弊

咸豐四年覆准生員緣事斥革案擬笞杖以下情節較輕准其捐監另捐官職若罪已擬徒不准加倍報捐

九年諭此次考試國子監滿州助教各試卷或文或理或清漢字畫未能端楷經肅順等校閱實無合式堪以錄取之卷著吏部另行查取合例人員奏請派員考試此次考試人員不准與考

同治元年諭太學爲自古培植人才之地我朝振興庠序加意教育世宗憲皇帝賞給庫銀增輯費舍首善之區四方觀瞻所繫必得如唐之韓愈宋之胡瑗躬行實踐講明正學以爲表率人材自能蒸蒸日上乃近來國子監專以文藝課士該祭酒等既以是爲去取而士子亦復以是爲工拙於造就人材之道何裨焉著嗣後於應課詩文外兼課策論以經史性理諸書命題用規實學並著該祭酒等督飭各堂助教正學錄分日講說獎勵精勤懲戒游惰黜華崇實以端趨向其有留心事務通知古今者亦當隨時獎拔以勸多士該堂官爲諸生師長尤當自飭廉隅俾知矜式

二年諭御史劉毓楠奏請整頓各學教習等語據稱滿漢各學設立教習統於國子監見充教習者傳補後並無生徒肄業期滿僅尋數人赴監謂之交功課其實並無功課可交即可得官各等語著國子監堂官查明認真整頓稽覈功課之勤惰分別勸懲毋得有無實敷衍了事以昭覈實

又諭官文奏湖南優貢懇照中省定額一摺湖南近年人才蔚起講求實學即如各路軍營以諸生而委身戎馬建立勳勞膺封疆將帥之任者不一而足庠序之中經明行修踐履克敦者諒更不乏其人加恩著照所請選舉優貢准與湖北一律照中省四名定額舉行以同治三年甲子科爲始由該學政會同該督撫覈實辦理見當破格求才之際各省於優貢一途均當痛除向來虛冒積習訪舉潛修積學之士廣其登進爲國得人以副殷望

四年奏准考試優生定例頭場試四書文二篇二場經解一篇策一道五言八韻詩一首由學政會同督撫覆試驗看覆試照拔貢例試四書經文策各一篇所有頭二場並覆試各卷解部磨勘並於卷面分註字樣以免參差

五年奏准歲貢一途非積數年之資不能揆出今捐輸准作歲貢則挾資二百餘兩即與皓首窮經之士同列成均於勸學作人之道均屬未宜且於考試教習後准其補捐歲貢作爲正途尤易取巧見當增修捐例應將火器營章程內廩增附報捐歲貢三條刪去停止報捐

六年議准貢生旗扁銀兩惟恩歲兩貢照例分給拔副優三項例內雖無明文惟均係正途自應援例聽其自行豎立至捐貢雖列成均與臨場取中有閒應示區別除從前已經自置免其拆毀外嗣後不准與五貢自置旗扁

十年議准國子監算學生考取恩監生在監當差不克回籍者取具同鄉京官印結呈請禮部節知原籍查照

光緒二年覆准陝甘二省優貢向照中省考取四名見在分省考試應將原額畫分該學政各照小省例考取陝西甘肅均不得過一二名不得其人任缺毋濫

七年奏准優生朝考統限次年五月內赴京驗到其呈報患病等項及後期續

到各生隨時由部會同國子監堂官奏請補考實因丁憂方准與下屆新生同應朝考

又拔貢補考向由禮部國子監會同考試文理明通者准作貢生入監肄業荒謬者斥革疵累者發回原學嗣後在部補考選拔生與優生補考者均遵此例九年奏准定例年老諸生有由俊秀捐監者查明報捐在十科以前曾經鄉試者如三場完竣照生員例一體 恩施應試錄科即照年老生員例用廩生公同具保呈州縣官驗照數其年貌相符加具查無頂替印結送考國子監及學政始准收考如有情弊一經發覺分別治罪至文武互試之例久經停止由武生捐監者止准應文闈其捐納武監生概不准應文鄉試

十一年 令各直省舉人一體入監肄業即於貢監生額內通融錄補從國子監祭酒王先謙之請也

臣謹案明史選舉志入國學者通謂之監生有貢監監例監舉監舉監即舉人也洪武初擇年少舉人趙惟一等入學永樂中舉人會試下第錄其優者俾入學以俟後科遂為定制 國朝惟貢監得入國學舉人從無入監肄業者茲得疏請通融益足廣裁成而資鼓勵矣

二十六年陝西總督陶模奏京師為首善之地太學為育才之所教法未修何由得士臣以為宜教督撫學政選擇舉貢之敦行力學者及大臣子弟蒙 恩應者入監肄業略倣周官師氏保氏之法宋儒程朱學校之制胡瑗經義治事之規治經務通大義治事必達時務祭酒司業當擇學行兼優眾所推服者久於其任教以致君澤民之道修己治人之方擇學業有成者上其名於 朝凡部院需人督撫請揀皆於是選取之成效既著復取堪為人師者令分教於天下庶學宮不為虛設士子皆有實行治化之基實在於此至納粟入監係明景泰開稅政沿至今日流弊實多所有捐納貢監生舊例擬請一律停止

三十一年國子監奏擬南學堂辦法略稱南學堂添設科學並開辦滿蒙文學堂均奉 旨允准在案見奉 明詔停止科舉及歲科各項考試自應一律按照學堂章程辦理查定章所載開高等學堂一時無合格畢業生可酌選品行

端謹學有根柢者補習普通一年然後入學 臣監南學肄業舉貢監生在學有年經史文學素所肄習自陸續添設科學以來已逾半載以視補習普通學科目亦多相合今擬將諸生年學合格者令補習普通一年考試合格即升為高等學堂擬名曰成均高等學堂謹粗擬辦法條晰陳之一曰專學業南學內外班肄業生奏定一百八十名兩次添設三十名科學既設又添設附學生三十名南學各生自添科學均照學堂講授今停止科舉擬將舊章一律變通庶使共求實學以裨有用二曰訂科目高等學堂分類分年科目係普通畢業後遵章辦理一歷史二地理三算學四格致五圖畫六策論七英語八體操除中學外其各項科目與南學續添各科學均尚符合以之補習普通極為捷便三曰定房舍查定章凡高等學堂至少以能容二百人以上以期人才多聚等語南學房舍除新改講堂及新建講堂各一座並各項執事應用房舍外其諸生宿舍以每房三人計之足敷二百人以上人數惟自修室與宿舍有別當擇各院正廳舍作公共自修室應俟普通畢業升高等之時再為詳查改設四曰擇教員經史文學即派 臣監官員講授算學一門早設專官其餘各科目見用之教習查其所學均足備高等教習之選惟按奏章高等學科較普通為多需用教習較眾自應添聘於未升高等以前早為儲備以期臨時不誤五曰派執事南學原設有正副管學官提調官皆兼理衙署學務其未盡事宜仍應責成辦理外擬按高等學堂章程擇 臣監文學優長通曉學務之員酌派再不敷用當設副員以佐之六曰別名額查補習普通升入高等之例只能行之五年限內嗣後中學堂畢業即可升入高等 臣監所設高等學堂即以二百名為率約計補習普通畢業之時即各中學堂已將畢業擬按照程度由 臣監招足額數分別入堂七曰慎考獎各省高等學堂學生畢業由督撫學政會同主考考試給予出身官階並由學務處覆試 臣監高等畢業除由監給予文憑外應如何會同考試給獎之處均俟議奏奉 旨後遵辦八曰備器用南學自添設科學以來所有器具均已照學堂應用各物添置改造暫可敷用惟儀器標本各事依改設高等學堂即行添置九曰教育肄業舉貢監生其年學合格者令補習普通考

入高等學堂其年齒稍長中學淹通之合格者擬附設一速成師範學堂即簡易科查定章簡易科目一修身二教育三中國文學四歷史五地理六算學七格致八圖畫九體操除中學外其餘科目皆與補習普通科目相合且屬有增無減雖深淺精粗稍有不同以普通科之教習兼爲講授均可勝任一年期滿給予文憑而速成師範畢業出學以後即補習普通亦將畢業之時此後便可專辦高等學堂倘補習普通尚有不合資格者臨時查看情形再行分別辦理十日籌用款目南學內外班肄業生及執事官員一切津貼膏火獎賞雜費每年領有 恩賞銀八千四百兩今既改立學堂除八千四百兩擬仍請 恩賞作爲的款外其餘不敷尙擬由 監照費飯食銀兩項下撥款作開辦及常年經費惟此項入無定額當先儘學堂辦理近來停止監生捐納實官恐此後捐監日少費亦隨之自當設法籌措總期事不中廢款不虛糜至新設滿蒙之學堂見已考錄二百四十名就滿蒙漢三項文字命題分別等第聽候傳到入學講堂齋舍器具刻已興工建置其詳細章程俟 等酌定再行具奏

三十二年學部奏略稱國子監南學見改師範學堂其舊日肄業各生有已滿三年因年齒加長不宜再入學堂者尙多留滯京師無力歸里查該生等就學成均窮年研習不無可取若聽其終身棄置未免向隅伏查本年政務處奏定酌予生員出路章程凡年長不能入堂者於考優貢之年令地方官保送由督撫考取咨送吏部分別授以巡檢典史等官所以體恤寒畯用意甚厚今南學肄業年長各生與年長生員事同一律似可同邀 曠典又查吏部考職舊例貢監皆准與考南學肄業各生多係貢監亦與考職定章相符惟該生等去籍遠近不同未便咨回本籍應考擬請援生員由督撫考職新章略加變通凡南學舊班肄業生已經三年期滿者其貢監擬由 部督同國子丞嚴加考試核其文理暢達即咨送吏部分別貢監授以州吏目典史等官舉人則不拘科分年限由 部咨送吏部概予截取少示優異至五貢廩貢當仍照舊例咨送吏部以復設教諭訓導選用舉人五貢廩貢本係正途均請免其考試其肄業未滿三年者仍不准與考咨部庶於體恤之中少寓裁制之意

皇朝續文獻通考卷九十七

學校考四 直省鄉黨之學

議案古者家有塾黨有庠術有序國有學其所稱為士者出則負耒入則橫經莫不雅歌投壺以詠先王之風吁何其盛也 國朝三載賓興

天子命學臣以時按郡而甄錄之復為之慎選儒官以資表率茂矣美矣迨其既也師與生終歲不相見惟入學時之修脯則斷斷焉士風何由不振乎此法東西洋廣設小學施國民教育之說所由興也學堂另列專門茲祇遵 皇朝通考事例著於篇

乾隆五十二年 諭吏部奏福建省甄別教職數之額缺數目不及百之二三請將該督撫學政照例議處但念該督撫均有承辦兵差及料理軍餉等事此大無暇甄別教職未能照例辦尚屬有因李侍堯徐嗣曾著從寬免其交部至該處學政陸錫熊考覈教職是其專責軍務又非其承辦乃甄別不及百之二三咎實難辭陸錫熊著交部議處

五十四年 諭翁方綱奏江西士子有臨場習用新出小本講章又坊間亦有編輯經書擬題及套語策略等類於臨場時刊刻發賣見出示嚴行禁止併於建昌一帶刊書之處遍為飭禁等語講章策略等項竟有刊刻小本不特士子臨場閱看既得弋獲捷徑且易於懷挾尤不可不防其弊翁方綱嚴行飭禁所辦至是江西既有此項小本發賣恐各省亦不免仿照刊刻流傳轉售各督撫學政一體出示禁止其已經刻印者令其繳出銷燬所有京城坊肆等處並著順天府尹等一併留心查禁以杜僥倖

五十七年 諭五經為聖賢垂教之書士子有志進取竟有未讀全經者可見士習之荒疏卑靡著通諭各督撫及學政等務須實心查察嚴行禁止俾士各通經文風振作其應如何立法查禁以端士習之處著軍機大臣會同禮部妥議具奏遵 旨議定行令各督撫學政轉飭所屬將坊間所存刪節經書版片限三月內押令盡數呈繳銷燬如逾限不交一經查出照違 制律治罪其未能詳查之地方官及各督撫學政均照例分別議處併飭出示曉諭各屬士子

如有前曾購買此等刪節經書者亦令其作速自行銷燬

五十八年 諭前因各省士子有肆習坊間刪本經書降旨令各督撫嚴行查禁解京銷燬節據該督撫等陸續查繳但恐日久懈弛不可不再申厲禁以端士習而崇實學夫經籍自孔子刪定豈容後人妄為芟節皆由不通士子或落第之人不能通經致用遂以弋名之心轉而弋利往往於經書內避去諱用語句任意刪減或標寫擬題以為庸陋士子場屋揣摩之具而坊間即為刊刻傳播彼此沾潤此等貪鄙之見不特非讀書上進者所為亦且有玷士林自慚名教各督撫當飭屬留心查辦使若輩知所懼自不敢復蹈故轍而坊間既無此種書本亦無從刊布漁利况六經為聖賢垂教之書字字俱有精義乃竟臆為揀擇作此刪本經書而躁進之士又欲於糟粕之中另標捷徑不但失前聖立言之意於士風亦大有關係想自用制藝取士以來或即有此項刪本經書亦非起於今日然不清其源安能令其流之不溢甚耶該督撫若以此次查繳之後即視為具文弛其禁令則牟利書坊又復漸行出售輾轉流傳終難盡絕嗣後仍著各督撫嚴飭所屬認真查禁並將繳過刪本經書數目及有無傳習之處三年彙奏一次俾士各通經文風不致以副朕敦崇經學整飭士風至意六十年奏准乾隆十六年後恭遇 巡幸增廣學額大學加取五名中學四名小學三名盛京等處向取進六名以上者增額三名四五名者增二名二三名者增一名歷經辦理在案隨節知各該學政並奉天府丞一體遵辦

嘉慶元年 恩詔各省入學額數大學加七名中學加五名小學加三名四年 高宗升配禮成奉 恩詔大學加七名中學五名小學三名舉行一次不著為例 又覆准軍營效力 賞給預戴職銜之生員原係出力有功之人其有志上進願應歲科試者仍准其補廩出貢其不願應試甘以頂戴榮身者免其歲試於學册內自列一款報部 五年 諭國家設立州縣原資以牧養斯民勤勉吏治若出境迎送上詞不特有曠職守而奔緣奔走之弊即從此起豈設官分職之意耶至生員躬列膠庠

乃遇大員過境亦有教官率迎道左之習更屬無謂即朕於巡歷所經止令地方官於二三十里內前來瞻覲若途遠即不令前來前往熱河時因經過文廟有生員在道旁跪迎他處從無此事今聞那彥成奉命往陝沿途地方官多遠來接候實屬外省惡習著通諭各省凡有守土之責者遇上司欽差所過地方非有公事傳詢不得輕離職任至教官爲訓迪之司尤不應率領生員道旁迎送俱著一體嚴禁倘經此次諭禁之後仍蹈從前陋習一經覺察或被人糾參必當嚴究

八年 諭湖北學政茹芬因蒲圻縣劣衿熊士鼈抗糧縱兇滋事自請議處一摺各省設立學政原欲其化導士子訓俗型方非徒以校閱藝文遂稱盡職蓋士爲四民之首學政於平日誠能盡心訓迪令士子循循然動遵法度而士子等又各於鄉黨中互相勸諭俾人人知尊君親上之義則奸宄潛消善良蔚起士習端而民風厚所謂經正則庶民興庶民興斯無邪惡也今熊士鼈身列膠庠敢於抗糧縱兇釀成變如昇等糾眾劫獄鉅案此等劣衿自由平時失於教導所致茹芬到任已久咎有應得著交部議處至各省學政職司學校有教士之責與其俟該生員等有抗糧包攬訟武斷種種不法之事犯而後懲焉若正其趨向使之遷善遠罪而不自知總之道政齊刑末也道德齊禮本也德禮之化非平日漸摩涵育焉能蒸蒸日上變着通諭各學政務宜敦崇教化庶庠序皆循規矩罔得資表率

十年 諭刑部議覆鐵保等奏審擬吳江縣勒休知縣王廷瑄虧缺倉庫銀米並生監王元九等勒索漕規分別定罪一摺王廷瑄辦漕不善挪移庫項數逾二萬兩以上實屬昏庸不職着依擬應斬監候仍勒限照數追完再行分別辦理餘均着照部議完結至此案王廷瑄挪移虧缺數至累萬皆因刁生劣監等在倉吵鬧勒索陋規所致今審訊確實所有附和得規計賊較輕之吳景修等三百十四名均經部議照該督所請一併飭提責處生監皆讀書人今以一案而罪犯責處者至三百餘名之多閱之殊不愜意但該生監身列膠庠不守隊碑輒敢恃符尋釁挾制官長吵鬧漕倉強索規費此直無賴棍徒之所爲豈復

尙成士類朕聞各省劣衿往往出入公門干與非分以收漕一節持地方官之短長而江蘇爲尤甚各該州縣或平日與之交結遂其取求懲擊既盈即遇不肖官吏實有罔利營私等事亦復袒庇不言徒使鄉里小民暗遭剝削設稍不遂意則遇事輒生枝節每屆開征時控交醜米藉端滋事動即以浮收漕糧列名上控其實家無擔石無非包攬交收視爲利藪此等惡習大壞名教今吳江一縣分得漕規生監已有三百餘人其餘郡縣可想而知朕培養士子至優且渥原望其束身自愛鍵戶讀書並當勸化閭里愚民知所觀法方不愧四民之首乃蕩檢除閑至於此極尙視然胸身士林乎所有吳景修等三百十四名朕即概加以扑責亦其自取但欲養其廉恥此次姑免責處予以自新之路嗣後著鐵保汪志伊會同莫晉督飭該教官等嚴切教導隨時管束務使該生監等痛滌前非安分守法如遇收漕時該州縣果有浮收入己情事自應據實劾參倘該生監等不知悔改仍蹈故轍或此外刁紳劣衿有把持漕務訛詐陋規等事切詞控告審屬子虛者一經查出即當奏明從嚴治罪決不寬貸不惟扑作教刑士子自不惜廉恥朕亦不能廢法博譽總之士林爲風化所關待之優正以責之厚朕嘉惠士子然如此等敗類亦斷不肯稍事姑容必欲挽回積習而後已該生監等其各悛違訓諭立品懷刑慎毋聽之藐藐自蹈罪戾致貽後悔將此通諭知之

又 諭盛京爲風化所基文治漸摩彬彬絃誦朕鑾輅來臨士子等恭迎獻册應一體加恩著將盛京滿合二號及奉天所屬各學於科考廣額一次
十三年 諭畿輔爲首善之區人文漸被多士蔚興茲因循覽河隄巡幸淀津親風所莅並宜加惠士林所有直隸通省入學名數大學增五名中學四名小學三名
又 覆准福建興化府學生員翁邦彥等出資捐修 文廟獲邀議敘與尋常得有職銜者不同即照軍營效力之例辦理每遇鄉試仍由該學申送入場應試十七年御史辛從益奏各省設立學官月課久不舉行有師生之名而無訓誨之實文風難望整飭所關非淺請 勅各省學政實心董率以昭風厲而崇教

化等語奉 旨着通諭各省學政各率所屬實心整頓
又覆准福建福州府生員高允卿本係文童因軍功效力 欽賜生員卽照世
職人員改作文生例辦理

十九年 諭韓城縣登仕籍者有強克捷之忠良前大學士王杰正色立朝亦
籍隸該縣士風醇茂宜示優旌著加恩賜祭一壇將韓城縣文武學額各增五
名永著為例

二十二年 諭御史卿祖培奏請飭各省學政講明朱子全書以端士習一摺
教化爲立政之本以正人心以厚風俗非特各省學政當講明正學以端士習
卽督撫藩臬以至道府州縣各負有治民之責皆應隨時化導俾小民遷善遠
惡力返淳風宋儒朱子全書固足以闡明經術而五經及四子書炳若日星若
在官者各能身體力行以爲編氓倡率亦何不可收世道人心之益朕前降諭
旨令牧民者惟以孝弟忠信禮義廉恥爲教民之先務直省大小官吏果能仰
體朕意實力奉行廣爲勸諭使父誡其子兄誡其弟久之漸摩成習薰德而善
良者衆日計雖不足月計則有餘也其有愚頑梗化之徒狃於邪說則明刑所
以弼教化導與懲創相輔而行使民知畏法而生懼心卽漸知意義而生愧心
至於有恥且格則經正民興自無邪惡矣

二十四年 諭謝階樹奏生員欠考人衆請分別辦理一摺湖南欠考諸生自
三次至八次者竟有七百七十名之多積習相沿本應概行黜革姑念人數衆
多其欠考三次各生著照乾隆年間之例暫免革除欠考四次者亦加恩暫免
均勒限各儘回籍補考至欠五次至八次者俱著卽行黜革以肅學校

二十五年八月 恩詔增廣直省學額

道光元年 仁宗升配殿成增廣直省學額
又覆准江西萬載土籍額進十二名棚籍四名共十六名奉兩次 恩詔照大
學例每次廣額土籍五名棚籍二名

二年 諭御史趙柄奏慎嚴改教以重學校一摺國家教化之興由於勸學各
省教職得品端學裕之員盡心化導於士習民風均有裨益近日各省甄別州

縣凡才具平庸年力就衰各員率請改教此等衰庸之員卽令司鐸安望克稱
厥職嗣後各督撫於才不勝任之知縣未經得缺將該員品學尙堪秉鐸切實
聲明酌量奏請改教其實缺人員履任在半年外者卽予休致不得因其正途
出身率請改教秉公甄別尤不得因有此旨將闕冗各員一味姑容轉致貽誤
地方也

三年 諭韓鼎晉奏學校事宜據稱閩省文武生員緣事不結之案新舊積至
一百三十餘起之多州縣等因無關處分任意延宕應令學政將每年已銷未
銷數目查明彙奏又地方官押令生員跟拘人犯往往案據未明擅押班館甚
至責子拘父責弟拘兄大乖倫理應請嚴行查禁至生員犯案必確有證據始
准詳革訊屬無干依限卽時請復其各屬府試院試士子由籍赴郡遠近不一
艱於旅費者甚多請將府院連試等語各直省士習瀟灑不一其不守以碑者
固宜嚴辦示懲而安分讀書者亦宜曲加體恤以培士氣該副都御史所奏四
條是否可行著趙慎珍於到任後會同新任學政沈維鏞悉心妥議如果州縣
有士子牽連控案任聽差役原告捏稟拖累及率請斥革衣頂者查明嚴禁參
辦其府院連考並著查明各屬情形酌量辦理

又 諭禮部議覆河南學政吳越請酌改管束撥府文武生員章程著照所議
嗣後各直省撥入府學文武生員除由附郭州縣撥入者仍歸府學管束外其
餘無論里數遠近卽令本州縣學嚴加管束該府學教官仍一體查察不得藉
詞推諉倘有徇縱情弊將該教官等一體查參所有附郭諸生月課仍在府學
至各州縣撥府文生距府學較近卽赴府學應課距州縣學較近卽赴州縣學
應課並著於取進時分別報明填註學册以憑督課其歲科考試幫補出貢等
項仍歸府學辦理着通諭各省學政一體遵行

四年建雙城堡義學

五年 諭朱士彥奏請禁訟戶抗糧以端士習一摺士爲四民之首自宜恪守
臥碑束身自愛况錢漕係惟正之供定例貧生交納錢糧以次年二月四日爲
率較平民展至數月待士已爲優厚豈容積年抗欠如該學政所奏浙江杭嘉

湖三府近來錢漕逋欠甚多俱係生監上控有案包漕鬧漕抗不完納地方官不能催徵加以訟戶名目與訟師訟棍無異該生等恬不為怪於士習大有關係不可不嚴行懲辦該學政甫經到任即出示曉諭甚屬認真著該撫程含章會同整頓毋許再有訟戶名目自本年為始如有不肖生監恃符抗欠逾限不完著即行擬革嚴辦示懲

又覆准應生未經引見旋即入學其鄉試錄遺時照文生員兼襲世職之例辦理免其歲考

六年 諭浙江士習不端朕所夙知實心整頓怨者必多以前學政之因循姑縱不問可知矣吁世道人心日下為政者一從實整頓則怨謗沸騰朕為天下主焉可不力執類風昌明正學俾臣子各揚其職佐臻上理也朱士彥不合之處另降諭旨並著程含章將此硃批摺令朱士彥觀看諒伊必知感知懼知朕用人聽言之難也

九年覆准各學報劣生員本不應列一二等况廩生報劣即停廩領其由增生附生報劣者何得復行幫補至考試定例惟五等生員不准錄遺列四等者向無不准之例該生員劉停廩既照四等之例其考試自應一律辦理

十五年 諭御史俞焜奏嚴覈優劣以端士習一摺從來民風之醇樸由於士習之端謹凡有教士之責者不徒課以文藝務在敦崇實行嚴為旌別以樹風聲若如該御史所奏近來各地方官於貢監生員並不隨時稽察教官舉報優行人數日增不無冒濫其有素行不端者類皆徇隱不報刁劣之徒肆無顧忌往往出入公庭句申胥吏或以他人酒糧出名包攬或以不干己事聯名訟訐逞筆舌以玩法恃衣頂為護符甚至欺壓鄉閭挾制官長犯法滋事日積愈多於風俗人心大有關係不可不嚴行甄覈著各督撫府尹學政嚴飭該地方官暨各教職務須隨時訓誡認真稽查舉優者勿徇虛名報劣者毋許姑息倘仍瞻徇隱匿致釀事端即將各該地方官及教職從嚴參辦

又 諭御史豫泰奏請整飭學校以勵人材一摺學校為培養人材之地士品克端斯民風日茂亦惟訓迪有術斯士習益淳定例每於朔望敬謹宣講 聖

諭廣訓並分派教官親赴四鄉宣講俾城鄉士民共知遵守各省府州縣設立書院置出牧息以資膏火並建義學以教鄉僻童蒙書院院長必須延請品端學裕之人以資教導教官季課月課分定甲乙以示激勵立法已為周密若如該御史所奏近來奉行日久親若具文教官懈於訓誨士風習於浮夸尤宜亟加整頓振起人材著直省各督撫嚴飭地方官遵照成例宣講 聖諭廣訓務須實力奉行不得日久生懈其書院房宇租田隨時妥為修理查察不得任聽傾圮及斗胥人等濫混侵蝕捐建義學以資倡率書院肄業生童必須嚴加甄別不得瞻徇情面濫行去取延請院長必擇品學兼優之士不得徇情濫薦教官考校季課月課務宜精詳舉報優劣務歸覈實民間呈報忠孝節義等事務飭隨時詳請旌表不得任聽需索規費致多延擱

十七年 諭御史巫宜稷奏振興學校一摺直省儒學書院之設所以教學造士培植人材立法極為周備若如所奏近來教官大率不能振作竟有干預地方公事劣生莠士因之效尤以致包抗錢糧起滅詞訟士風人才日益汗下尙復成何政體著直省督撫學政嚴加整頓通飭教官務當敬教勸學無負乃職其不能砥礪士節扶持名教者即行嚴參懲辦至各省書院延請院長原為激勵人材而設近日竟有薦而不到館者有甫經到館旋取脩金以去者並有不到館而上司代取脩金轉付者殊屬有名無實著直省督撫各體察情形覈實整頓務使館無虛曠士有師承勉副朕崇重實學至意

二十八年 諭准湖南新甯縣各鄉向多庵觀地處偏僻每易竊奸飭該縣查明拆毀酌留數處改設義學延師教讀俾僻處崇蒸向化

三十年 諭學校為教化之原士子訓課責在教官教官賢否責在學政近日教官一途半皆年老衰庸及末學淺見之士著各省學政嚴行考校文行兼優者方准列薦庸劣不職者即行甄別至於月課歲考尤須認真課卷按季申送學政諸生優劣學冊三年咨部備查

又覆准廣西省奉 恩詔增廣學額太平土州原額四名嘉慶道光年間每遇廣額悉照小學加三名見計原額四名之東蘭州天保縣歸順州西隆州西林

縣均照舊案取進其新設凌雲縣四名之學加額二名新設奉議州三名之學加額一名

咸豐元年 諭前據徐廣縉等奏南海東莞兩縣因公項命案之嫌聲言罷考請分別停其考試已降旨飭令暫為停考查明懲辦其被累之同學察實奏明仍即許其考試該督等諒已確查辦理見尚未據續奏朕心殊深懸念此事一由書院公費之改移一由生員抗糧而自盡固緣一二人懷嫌發動亦安知非有激而然其閒附和想亦無多南海一書院中與東莞一邑生徒皆為所累若不分晰是非明白勸懲致使良莠同科轉非所以策勵士習至義倉經費始而斷入書院繼而斷還義倉何以前後兩歧東莞抗糧一案生員黎子驊何以在縣署自戕有無屈抑以致眾心不平士風刁玩固宜重懲吏治乖方亦應嚴懲著徐廣縉葉名琛體察羣情務期平允玩法者不可無所董戒被累者亦不可過事苛求即將見在辦理情形據實具奏

又浙江巡撫常大澗奏於甯波府城四門分設義學督同道府恭將 欽定四言韻文 頒發各學

又浙江學政吳鍾駿奏甯波府城諸夷雜處左道易惑見飭各學教官於鄉鎮中勸立義學以正人心

二年 宣宗升配禮成增廣直省學額

三年 諭見在大江南北援勦之兵不下二十餘萬朕不惜帑金為民除害統計所撥已及二千七百餘萬兩際茲大兵雲集需餉尤殷不能不借資民力以濟軍儲著照大學士等所請由各督撫妥為勸導無論已捐未捐省分凡紳民捐資備餉一省至十萬兩者准廣該省文武鄉試中額各一名一廳州縣捐至二千兩者准廣該處文武試學額各一名如應廣之額浮於原額即遞行推展倘捐數較多展至數次有餘准於奏請時聲明分別酌加永額

八年奏准各省捐輸軍餉前准一廳州縣捐銀一萬兩者加永遠文武學額各一名均以十名為限惟原額不及十名各學所加永額概不得浮於原額之數其原額僅止十名並不止十名各學所加定額已至十名者續有捐輸不准再

加定額

九年 諭江蘇學政孫葆元奏請責成教官提調襄理考試一摺各省設立教官原以整飭學規訓迪諸生俾各安分教品以圖上進若如所奏江蘇生監多有不安本分包攬抗糧種種惡習教官不能稽察約束此等庸懦之員何以整頓學校嗣後各屬生監滋事教官不能認真約束即著該學政指明嚴懲辦至學政局門考試場外弊端勢難稽查全賴提調知府彈壓巡查乃近來提調多派丞倅州縣等官充當不足以資統攝嗣後各省學政考試各屬如遇考棚在外縣之處仍由該督撫派委知府充當提調該府不准託名公事私委屬員代辦以重考政

十年奏准陝西省咸寧長安醴泉鄠同官涇陽藍田咸陽興平整屋三原大荔華鳳翔鄜州十六州縣酌設回民義學九十四處舊有義學從新整理三十九處

十一年九月 恩詔增廣直省學額

同治元年 恩詔增廣直省學額

謹案各省學額有因府縣新設而定者有因改隸而分撥增減者有因文風日盛而特加者均隨時酌議 恩詔廣額向有成例祇增本年一次至咸同時軍興紳民捐輸加額乃係永廣無省蔑有其閒修城辦團墊辦軍需報效欠餉稿師助勦無不蒙 恩又有文武官員獨捐專加原籍學額者名數多寡不一具詳會典不復備錄茲特分省按年列表以見此十餘年中下則敵愾同仇 上則恩膏疊沛而士林尤蒙 嘉惠焉

奉天 咸豐三年七年九年同治七年

直隸 咸豐四年九年同治四年五年六年八年

江蘇 咸豐四年七年八年九年十年同治元年二年三年四年五年六年

七年八年九年

安徽 咸豐四年五年六年七年九年十年同治元年二年三年四年五年

六年七年八年九年

浙江 咸豐六年七年九年十年同治元年三年四年五年七年十年
 江西 咸豐四年七年九年十年十一年同治元年二年三年四年五年
 六年七年八年九年
 福建 咸豐五年七年九年同治二年三年九年
 河南 咸豐三年七年八年十年同治元年六年七年八年九年
 山東 咸豐九年十年同治三年五年六年八年九年十年
 山西 咸豐五年八年九年十一年
 湖北 咸豐四年七年八年十年同治二年三年四年五年六年七年八
 年九年
 湖南 咸豐三年四年六年七年八年十一年同治元年二年三年四年
 五年六年七年八年九年
 陝西 咸豐四年八年十一年同治八年九年
 甘肅 咸豐五年九年同治元年
 四川 咸豐七年八年九年十年十一年同治元年三年四年五年六年
 七年八年九年大半按期
 廣東 咸豐四年五年七年八年十一年同治二年三年四年五年六年
 七年八年九年十年
 廣西 咸豐三年同治元年五年
 雲南 同治九年
 貴州 同治七年
 商籍附 咸豐六年浙江十年同治五年五錄
 臣謹案兩淮山東廣東向有商籍而永廣學額祇直隸浙江山西三省四
 川甫於咸豐八年因鹽商輸將鉅萬議准於健爲樂山兩縣合設商學定
 額四名富順榮兩縣同均以二十名取進一名如應試人多不得浮於定
 額倘人數不敷實有文理通達者亦取進一名歸健爲富順兩教官訓課
 三年後量設廩生增生各五名不給廩餼照例五年一貢云

又 諭自來儲才養士必視學校爲盛衰我朝 列聖相承庠序修明敦崇實
 學 皇考御極之初卽命生童就試者兼習性理等書原冀其趨向一端則學
 術自正以收化民成俗之效乃近來各省教職等官並不實力奉行認真訓課
 惟知索取賚禮備貪得無厭又其甚者往往干預地方公事並或遇事魚肉
 士子詭譎神竊又安望其經明行修足爲士林表率耶嗣後各省學政務當整
 躬率屬督飭各教官讀書立品毋爲士子所輕平時訓導諸生總以躬行實踐
 爲歸勿崇尚浮華勿虛應故事其稱職者准各學政會同督撫保奏給予獎勵
 如庸劣充數及少年浮動不克舉職者並著隨時甄劾不必待至大計年分庶
 人知自愛爭自濯磨並飭各教官分日於該處城鄉市鎮設立公所宣講 聖
 諭務使愚頑感化經正民興正學昌明人才蔚起實有厚望焉
 又 諭蔣琦齡奏請崇正學以端政本等語我朝崇儒重道正學昌明士子循
 誦習傳咸知宗尚程朱以闡聖教惟沿習既久或徒驚道學之虛名而於天理
 民彝之實際未能研求勢且誤入歧途於風俗人心大有關係各直省學政等
 躬司扁迪凡枝閱試藝固宜恪遵功令悉以程朱講義爲宗尤應將性理諸書
 隨時開揚使躬列膠庠者咸知探濂洛關閩之淵源以格致誠正爲本務身體
 力行務求實踐不徒以空語靈明流爲僞學至鄭孔諸儒學尙考據爲歷代典
 章文物所宗理無偏廢惟不得矜口耳之記誦荒心身之踐履尤在職司教士
 者區別後先薰陶樂育士習既端民風斯厚海宇承平奇袤不作於以觀政教
 之成焉
 又 諭安徽學政馬恩溥奏請分別勸懲以嚴學校一摺安徽各屬久淪於賊
 自上年光復安慶後疊復城池該省生監因地方爲賊久踞無處逃避致被裹
 脅尙非甘心從逆可比節經降旨寬宥從一律予以自新惟該生監等名列
 膠庠陷身於賊究屬聲名有玷若不稍予薄懲無以治輿情而平士論此項生
 監卽照該學政所擬註劣外再罰停鄉試三年其舊案應幫補廩增者一併停
 止仍交該學政嚴加管束三年無過始准應試其有甘心從賊或爲畫策並會
 帶賊隊與官兵接仗者卽係身爲叛逆罪不容誅法無可貸著該省督撫飭地

方官查明即行奏請正法毋任漏網

二年 諭國子監司業馬壽金奏請慎簡學官以崇教化一摺自來化民成俗必資學校之振興上年會降旨令各省學政督率教官讀書立品訓導諸生並隨時宣講 聖諭以期經正民興共臻上理茲據奏稱近來地方大吏於州縣之賢不肖尚能據實劾薦而於教職一官則概未齒及老邁戀棧而過示優容年少輕浮而不知甄劾以致為是官者類廢是甘不知振作請飭各省督撫詳加考察至宣講 聖諭尤為化導之本並請飭學臣實力奉行等語所奏不為無見方今大江南北漸就肅清一切撫綏安輯疊經降旨責成地方官吏妥為辦理教養兼施使百姓革面洗心不致再為教匪邪說所煽惑學校之設尤關緊要着各督撫學政於通省學官詳加考察罷其老邁黜其輕浮其品學兼優循循善誘者務當隨時獎勵以風其餘並著學臣督飭教官宣講 聖諭考其勤惰分別勸懲庶幾經明行修邪慝不作至書院義學亦培植人才之一助乃近來風氣延請者多徇私情為師者止圖修脯陋習相沿牢不可破並著各省地方官力除積弊毋徒遷就官紳務各延請者碩以副敦崇實學至意

四年 諭御史汪朝榮奏江甯常州兩府所屬各州縣學宮大半被毀見在地方新復亟宜興建學宮請飭設局勸捐撥海塘捐輸新例請獎仍照捐數加廣學額中額並提用釐金先為興建將捐項歸款另片奏江蘇舊有紫陽正誼兩書院官給膏火並有官產沙田租籽作為經費請飭一併清理冀復舊規等語國家設立學校原以端士習而正民風見在江南地方已臻底定各州縣學宮如有被賊焚毀者自當次第興修據奏江甯常州兩府所屬學宮大半被毀亟應察度情形及時修葺惟兵燹之餘民力彫弊一切善後事宜應辦甚多即此興建學宮一項工程經費亦頗不少自應先為籌畫所稱勸辦捐輸是否可行著曾國藩李鴻章詳細酌度商議具奏其書院舊有官產沙田著李鴻章飭令該地方官妥為經理並將紫陽正誼兩書院舊章設法整頓

五年 諭廣東肇慶上客各民構衅械鬥仇殺多年經瑞麟將益澄將客民資給遣散分赴高廉雷瓊及廣西之賀容貴等縣安插所有新遷客民准附入各

該州縣另編客籍一體考試每童生二十名准取進一名

六年 諭學政嚴科兩試童生正場之前例有考古一場著學政於按考時備諭生童有能默誦五經通曉經義者准其報名即於考古場中面試拔之以為研經者勸其未經報考者亦令認習某經於下屆按冊試之該學政務期崇尚實學以副朝廷樂育人才至意

七年議准各省如有紳富捐輸鉅款暨官弁兵勇報效欠餉不請獎敘專請加學額者其銀數照舊章酌加一倍一廳州縣捐銀至二萬兩加文武學額各一名凡未報部者概不計算令各督撫查明實用實銷之款切實覈減方准奏請加額不得任聽籠統開報致滋流弊

十年議准外省捐輸止准請加一次文武學額不准請加永額從前已加定額者由各學政於歲科兩試嚴加考察如有文理荒謬及素行不端各生仍照定例辦理

光緒二年議准川省訟棍多係貢監文武生唆架扛幫大為民害由學政嚴飭辦理教官等如有徇匿照例議處

七年李明墀奏苗疆文風日盛請添設鳳凰乾州二廳及保靖縣廩增各類以勵人材

八年覆准各學欠考各生如實患病疾及年屆七旬者准其出結申詳照例給予衣頂不准再應鄉試

又 諭前據內閣侍讀學士文碩奏河南學政慶壽恆斥革欠考生員一案言官挾私妄奏撫臣查覆瞻徇當交都察院會同禮部兵部查奏茲據覆奏請旨辦理各省文武各生三次歲考無故不到例應斥革此次河南欠考各生人數眾多其中有因災後轉徙流離未能如期赴試者其情不無可原著該學政詳查欠考年分是否實因災荒有無規避情事咨部分別辦理此後應遵定例欠考三次經該學政斥革者不得藉詞援引率請開復以符定制

九年 諭御史陳啟泰奏請整飭學校以端吏治一摺學政職司文教士子風尚視為轉移膺是選者必能束身砥行振興實學方為無忝厥職各省學政向

出該省督撫於年終密陳考語嗣後務當認真察查出具切實考語具奏倘有聲名平常不能稱職之員並不據實奏聞一經發覺惟該督撫是問

又奏准各省學政如佳卷無多僅敷原額取進將加廣之額停止或原額不敷取進即任缺毋濫見在學額本寬所缺之額毋庸於下屆補足

十年覆准設義學哈密五堂吐魯番六堂庫爾喀喇四堂庫車五堂阿克蘇五堂烏什三堂喀什噶爾五堂瑪納巴什三堂英吉沙爾三堂葉爾羌七堂和闐四堂巴里坤四堂奇臺縣四堂濟木薩三堂阜康縣二堂迪化縣六堂昌吉縣二堂綏來縣四堂呼圖壁二堂共七十七堂每月給束脩等項銀十二兩一切雜款在內嗣後義學經費在房租雜稅內動支按年報部查覈

十二年 諭卞寶第奏整頓士習嚴申禁令等語湖南沅州府芷江縣童生聚眾鬧考竟有毆傷知府情事業經將首犯分別正法懲辦近來各省文武生童往往糾眾滋鬧藉事罷考希圖挾制官長藐法已極恭讀雍正十二年諭旨各省生童有與地方官爭競而相率罷考者即將罷考之人停其考試若合已合學俱罷亦即全停考試 聖訓煌煌自應遵守各省生童或未徧知著直省督撫學政通行曉諭務使士子咸知儆懼毋得逞忿滋事致干重辟

二十六年 諭內閣侍讀學士陳夔龍奏士風日漓請飭整頓學校一摺從來保邦制治首重求才而人才之興端由學校該學士奏稱校士與教其道相為表裏校之於一且要在教之於平時自是探本之論凡有教士之責者務令宣明聖學加意提倡嚴定課程寬籌經費多備正經正史一切經濟性理有用之書慎選生徒專門肄業俾成有用之才不得但工帖括弋取科名貽人口實書院山長務擇經明行修品望素著之儒盡心訓迪官師考藝之時專以敦尚品行為重諸生中果有品端學粹志在匡時者自應從優獎勵務底於成其或內行不修鄉評不洽放言高論氣質張沽染康梁惡習者嚴斥而痛懲之不稍假借至於朔望釋菜宣講 聖諭廣訓諸節尤當敬謹將事不得視為具文學術既正士習自端人心風俗因之轉移強國之道端基於此

三十二年 學部議覆御史張瑞蔭奏州縣學宮亟宜修理略謂原奏稱州縣

學宮關係極重自學堂漸興科舉日廢生員四方覓食教職無以聊生以致職守盡荒學宮日壞莫若即學宮隙地設一蒙學令教職為蒙學之師酌給束脩不令常行回家教職守學宮破壞嚴定考成每年提學使派人稽查一次隨時修理有能捐款興修者准照捐建學堂從優請獎等語查向例府州縣學宮有應行修理之處悉由地方官據實確估詳明督撫學政動工修理工竣委員驗明責令該教員守護遇有殘缺酌量修補應由 臣部咨行各省並由提學使隨時稽查以副 朝廷崇聖興學之至意所請地方紳士捐貲興修給獎一節應如所陳又請於學宮隙地建築蒙學令教職為師一節查蒙學即奏定章程所謂初等小學堂附建於學宮隙地原為學生瞻仰宮牆涵育德性起見惟是州縣學宮未必皆有隙地不必盡合建築初等小學堂之用且限以教職充當教員尤非正辦教職程度不一其中豈無學術湛深德行純備之員見在各學堂教員缺乏用才實多如概限以充當初等小學堂教員轉致屈抑人才應由地方官吏揆度地勢酌量人材斟酌辦理不必限定學宮隙地始建小學堂教職必充教員總期興學用人兩有神益

宣統元年山東巡撫袁樹勛奏堂邑義丐武訓經光緒十四年給予樂善好施建坊今臨清有武訓義塾即乞人所建者也訪諸耆老云武訓行乞三十餘年未嘗費一錢甘一飯終身不娶積餘寸設學三州縣宅舍經費惟備借人董理已絕不過問惟師生有情者則長跪其前因是成就日多 臣查武訓所設學塾與捐錢之數有在奏獎以後者以一乞人興學三州縣捐貲萬餘串僅予尋常旌表不足以示來茲而風薄俗懇 恩宣付史館立傳以彰奇行

三十二年 學部議覆御史張瑞蔭奏州縣學宮亟宜修理略謂原奏稱州縣

皇朝續文獻通考卷九十八

學校考五 祠祭喪贈錄後

臣謹案我 朝崇德初元即 遣官致祭 先師孔子 列聖相承疊申 隆禮光緒三十二年升為大祀尊師重道曠古獨崇惜乎鴻典丕張鳩工 經始遽遭政變未觀厥成雖美猶有憾而天不變道亦不變固可俟百世 而不惑也謹綴事例著於篇

乾隆五十一年 上詣熱河 文廟行禮

又奏准陪祀人數聖裔向例五人皆曲阜籍由衍聖公帶領此次衢州孔氏南 宗五經博士帶領二人查與各氏博士人數亦符但不行區別恐致牽混嗣後 定曲阜五人衢州二人又 元聖裔向例陪祀二人係山東之東野氏今陝西 姬氏於乾隆四十三年蒙 恩添設五經博士請 元聖裔照各氏博士每員 帶領二人之例定為東野氏二人姬氏二人又有子裔向例陪祀二人此次江 蘇崇明有氏由奉祀生有昭熊帶領與各氏五經博士帶領族人之例不符且 隨從奉祀生之人若照陪祀後裔之例辦理則加優轉至過於奉祀生實未允 協自應照例扣除見在有氏五經博士經山東撫臣學臣以肥城有氏承襲俟 准襲後令該博士遵例帶領又朱子裔向例陪祀二人查安徽婺源福建建安 各有額設五經博士此次二人俱係婺源籍未免偏枯亦未便照衢州孔氏陝 西姬氏之例嗣後將原定二人於安徽福建二處分派定為婺源一人建安一 人

五十二年 諭太常寺參奏劉埔於遺祭 文廟節次行禮後未行一揖之禮 從前朕為皇子時曾經致祭 文廟記所行儀注並無此禮今禮部儀注有此 自係相沿俗禮未經改定劉埔未照例行該堂官固應據實參奏但此一揖之 禮俱在上香獻爵飲福受胙之後本係小節劉埔未經遵行尚非大過姑免交 部但劉埔之意既以為斷不可行自應奏明更改乃並未陳奏而於向用儀注 率任臆改此則非是至相沿一揖之禮本不可行嗣後著於儀注內改正 五十五年 東巡 親祭 孔廟詣 孔林行三爵酒禮 顏曾思孟專廟造

官致祭是年 高宗八旬萬壽遣官致祭 闕里

六十年 諭朕自臨御以來恭遇 郊 廟大祀無弗祇肅躬親即中祀之禮 亦多親詣舉行嗣因年屆八旬曾經降旨所有中祀典禮如先農朝日夕月等 壇俱於八旬前兩年內以次親祭一週原因年壽日高恐精力或有不逮是以 中祀之禮於五十年後不復親行今思先師孔子道集大成師表萬世朕自沖 齡服膺聖教久而無倦凡行政典學悉皆得自心傳况丙辰年即係歸政之期 本年為朕御極六十年二月上丁允宜展禮宮牆用申企慕此次 文廟釋奠 朕親詣行禮以昭崇儒重道之誠其應行典禮該衙門照例豫備

嘉慶元年 授 受禮成遣官致祭 闕里

又仲春上丁致祭 先師孔子 皇帝親詣行禮 三年七年十五年二十 三年均同

又 勅甘肅貴德廳建 文廟

三年 皇帝臨雍典禮與乾隆五十年同

四年 御書聖集大成扁額懸 大成殿並頒發直省懸於學宮

又 高宗升配 南郊遺官致祭 闕里

七年 諭准秦博士伏子勝口授尚書典謨誓誥之文賴以不墜傳經之功甚鉅 既據該撫查明祠墓碑記遺迹尚存嫡派子孫世系可考請將伏子勝六十五

代孫伏敬祖立為五經博士一員以崇祠祀

八年 諭據御史朱紱奏申明行禮時刻以重祀典一摺所奏甚是祭祀大典 例有一定時刻總當在寅卯之間行禮方合禮經質明將事之義即執事陪祀

人員有失儀不到等事亦可便於糾察今據奏此次遣官祭祀 先師孔子行 禮時甫屆丑正寅初以致陪祀人員未及齊到時尙黑暗該御史等亦無從稽

查皆因行禮太早之故向來朕於 壇 廟大祀凡親詣行禮者經該衙門先

期具奏行禮時刻開有酌量改早之處亦不過一二刻且奉旨後通傳各衙門

謹遵祇候屆時自可齊集至遣官行禮若不定以時刻則陪祀人員安能一一

無誤糾儀之御史何從稽察嗣後遇有遣官祭祀著禮部太常寺按照定例時

刻傳知行禮大臣及執事陪祀各員一體遵照其派出行禮大臣是日即遇值

日奏事亦不必因禮畢後尙須趨赴宮門呈遞膳牌將事過早致有歧誤如有不遵傳定時刻率意遲早者該御史等照例糾察以重祀典而昭誠敬

十三年 諭御史孔昭虔奏請修先賢祠廟以崇祀典一摺山東曲阜縣建有復聖顏子專廟久廢崇祀今祠宇日就頹廢自應亟加修葺整復舊觀因思闕里至聖孔子廟宮牆在望典極崇隆自雍正年間估修以後迄今歷有歲時恐垣墉樑宇間有滲圯之處亦宜速爲繕治以肅觀瞻著山東巡撫吉綸親往敬謹閱勘一併覈實確估奏明動項興修

又 諭吉綸估修 孔廟顏子祠並泰山廟宇各工請分別購料次第興工一摺 孔林釋奠典禮攸存朕心殷仰止本欲躬親瞻禮用舉上儀但近年東省吏治廢弛地方州縣等官不知遵守法度即如廣興英綸兩案伊等多藉辦差爲名逢迎取悅交接餽送習以成風朕鑒時巡一切加意整飭不致令地方官困供億之繁但隨從大小官員人數較多其中或有不自愛之徒失於檢束該州縣等從而交接餽送是可知彼時法在必懲亦斷不能逃朕洞鑒然省方問俗正屆行慶施惠之時若紛紛辦理此等案件使官員等多受懲處亦於巡典未協因思乾隆四十九年五十五年朕在蕩邸時隨侍 皇考兩至曲阜從登泰山此時即暫緩瞻禮亦無不可且本年已屆五旬萬壽既未及舉行斯典不妨展至六旬萬壽之年或卽於慶節前一年再行前往此數年中將山東吏治大加整頓使習俗改移恪遵廉法彼時朕親臨在躬舉盛儀庶爲妥協所有該省應修各工該撫將可以從緩者卽行緩辦

十四年 仁宗五旬萬壽遣官致祭 闕里二十四年六月

十六年 上御經筵釋奠 先師孔子

二十三年 上詣 文廟瞻禮

二十五年八月 宣宗登極遣官致祭 闕里

道光元年 御書聖協時中扁額懸 大成殿並頒發直省學宮

二年 命琦善恭修 孔林

又 予明臣劉宗周從祀 聖廟位列西廡明儒蔡清之次

三年 予原任尙書湯斌從祀 聖廟位列東廡明儒羅欽順之次

又 春上丁祭 先師孔子 皇帝親詣行禮

四年 議准顯孫氏五經博士改歸嫡長顯孫樹勳承襲

五年 予明臣黃道周從祀 聖廟位列羅欽順之次

又以曾紀瑚承襲五經博士

又議准江蘇常熟縣五經博士言良愛申訴不實比照奉祀官告訐詞訟犯罪納贖之例准其納贖仍襲五經博士嗣後遇有博士犯罪案由刑部照例咨送禮部會議並咨該省督撫遵照

六年 予明臣呂坤從祀 聖廟位列蔡清之次

又 予唐臣陸贄從祀 聖廟位列東廡宋儒何基之次

八年 予明直隸舉人孫奇逢從祀 聖廟

九年 上詣 文廟瞻禮

十年 奏准查勘 元聖周公廟有應行修理之處由山東巡撫動項興辦

十六年 諭汪振基奏山西省壽陽等縣均有三教廟 至聖先師孔子與佛老同廟供奉與祀典不符著申啟賢通飭各屬卽行更正其各省有似此同廟供奉之處著該督撫一律更正以崇正學

二十年 覆准世襲翰林院五經博士孔憲坤病故無子承襲以該博士之胞弟憲堂代襲主奉祀事俟憲堂有子卽繼憲坤爲嗣並飭孔憲堂赴部考試

二十三年 諭山東曲阜縣 先師林廟係萬方觀禮之鄉遇有祀典必應致誠盡敬以示尊崇一切禮儀祭品尤宜整齊潔用肅觀瞻見在雖無不備之處但恐日久懈生稍失誠敬著山東巡撫嚴飭地方官隨時察看每屆祭祀之期務須恪恭將事毋得視爲具文

二十九年 予宋儒謝良佐從祀 聖廟位列東廡宋儒楊時之次

魏源學校應增祀先聖周公議 謹按周禮文王世子凡入學者必釋奠於先聖先師鄭康成註曰先聖謂周公先師謂孔子考禮記出於周魯之儒鄭氏註在東漢之世則是周漢時已皆祀周公爲先聖孔子爲先師下

及唐宋均無啟聖殿之祀其祀啟聖者始於元世而明代因之我 朝雍正年開始加封王爵其實史記孔子世家及左傳孟懿子之言皆祇謂孔子祖爲正考甫生孔甫嘉嘉生防叔始去宋家於魯防叔生伯夏伯夏生叔梁紇統爲五世初無木金父畢夷父二世此二世出於王肅僞家語不可爲典要即啟聖四世之祀亦祇宜祀於闕里孔氏家廟由衍聖公奉祀其於天下各省郡邑學校崇文敷教之誼無當也是以本朝 列聖祀學祇拜先師而無拈香啟聖殿之事各省學政地方官丁祭及朔望行禮皆祇詣大成殿而無祀啟聖殿之事既同虛設曷謂尊崇學校所崇五經易詩書禮皆原本於周公而述定於孔子如周易之六十四爻皆作於周公而傳翼於孔子詩之雅頌南幽皆出於周公而正樂於孔子書之周誥固出周公而典謨虞夏之書亦周史藏之而孔子編定之至於周禮儀禮及二戴所記禮儀三百威儀三千尤皆出周公一聖之手惟春秋因魯史之舊而筆削於孔子耳故夫子自言述而不作蓋作者之謂聖述者之謂明孔子一生夢周公而師文王文王已在歷代帝王祀典之列則以師道兼治道者惟周公孔子而已孟子以周公與大禹爲三聖唐韓愈原道篇曰由周公而上而爲君故其道行由周公而下而爲民故其說長今天下不特學校所誦習皆周公經典即上而 朝廷制度六官分治皆周禮冢宰司徒宗伯司馬司空之職且太常所奏樂舞皆周官大樂正之道上自 壇 廟下及郡國所行吉凶軍賓嘉五禮皆周公之制及欽天監測算儀器皆周官土圭挈壺保章及周髀算數之遺所用典籍符印文字皆周官保氏六書之體中庸所謂車同軌書同文行同倫雖有其位苟無其德不敢作禮樂焉雖有其德苟無其位亦不敢作禮樂焉洵乎非德位皆隆如周公者不足當之矣 國家崇德報功凡歷代有功德於民者皆列祀典况以三代大聖在孔子之前創萬世禮樂之制朝野無不遵行而學校祭祀俎豆不及豈非一大缺典爲人心所不安乎且古制本以周孔並崇今應請於 朝廷復周漢之制即以天下學宮之啟聖殿爲先

聖殿中供先聖周公之神位恭請 御書祖述憲章四字扁額懸之中央每歲春秋丁祭祇增一牲幣地方官朔望行禮祇多一拜跪不動一椽而崇德報功盡美盡善從此禮樂教化之源與日月昭而天地悠也豈非一朝盛事必當興舉者歟其啟聖五王木主宜用檀藏恭貯於尊經閣至於崇祀則其從祀於先師者即其從祀於先聖者也昧昧我思羹牆在望不登朝列無望颺言敬撰斯誼以俟來哲

三十年正月 文宗登極遣官致祭 闕里

咸豐元年 諭禮部議覆福建巡撫徐繼畬等奏請以李綱從祠文廟一摺宋丞相諡忠定李綱立朝守正風節凜然迹其生平諱論忠言具詳奏牘實能扶危定傾明體達用以天下安危爲己任而不爲身圖亮節純忠炳著史冊允宜特予表章敦崇風教李綱著照部議從祀 文廟西廡列於先儒胡安國之次以獎忠義而激懦頌

又 御書德齊轉載扁額懸 大成殿並頒直省學宮

二年 諭禮部議覆調任河南巡撫李德等奏請以韓琦從祀文廟一摺宋臣韓琦歷仕三朝勳業彪炳其生平學問經濟原本忠孝我 世宗憲皇帝 高宗純皇帝諭旨論贊疊賜嘉洵爲千古定論宜膺懋典俾列宮牆韓琦著照部議從祀 文廟東廡列於先儒陸贄之次以勵忠誠而崇實學

又 宣宗升配南北郊遣官致祭 闕里

三年仲春上丁祭 先師孔子 皇帝親詣行禮

又 予先賢公明儀從祀 聖廟位列東廡先賢縣竄之次

六年河南學政俞樾奏定文廟祀典記 樾言昔孔子周流列國同時賢大夫其克協聖心者於衛則有伯玉於鄭則有子產而觀論語所載則於子產尤稱道弗衰蓋孔子在鄭嘗以兄事之及其卒也爲之流涕今 文廟從祀有邈瑗而無公孫僑非所以遵循聖心脩明祀事也 臣比因校士再至鄭州登東里之墟渡溱洧之水緬懷遺愛想見其人夫附驥益顯未必及門衛鄭兩賢事同一體瑗既從祀僑胡獨遺 臣愚以爲先賢鄭大夫公孫僑宜從祀 文廟大成殿

兩廡又按孔子有兄曰孟皮故論語稱孔子以兄子妻南容而史記弟子列傳有孔子兄子孔忠蓋皆孟皮之子也孟皮言行無所表見然既為孔子之兄則亦祀典所不可闕者孔子曰所求乎弟以事兄未能也今以孔子為帝王萬世之師京師郡縣莫不崇祀上及其祖下逮其孫而獨缺其兄揆之至聖之心或者猶有憾乎臣愚以為孟皮宜配享 文廟崇聖祠奏上 詔下其議於禮部僉曰宜如臣樞言爰定公孫僑從祀大成殿西廡位林放上孟皮配享崇聖祠位西向第一

七年議定 聖兄孟皮增入 崇聖祠從祀

八年以宋儒陸秀夫從祀 文廟位列西廡文天祥之次

十年以明儒曹端從祀 文廟位列東廡胡居仁之上

又議定從祀章程例無明條應以闡明聖學傳授道統為斷嗣後除著書立說羽翼經傳真能實踐躬行者准臚列事實奏請從祀外其餘忠義激烈者入昭忠祠言行端方者入鄉賢祠以道事君澤及民庶者入名宦祠概不得濫請從祀 聖廟其名臣賢輔已經配祭歷代帝王廟者亦毋庸再請從祀以示區別

十一年十月 穆宗登極遣官致祭 闕里

同治元年 御書聖神天縱扁額懸 大成殿並頒發直省學宮

二年奏准附饗 廟廷祀典至鉅應 飭各省督撫學政恪遵咸豐十年定章如為必應從祀之先賢先儒方准督撫會同學政詳加考核奏明請 旨並將其人生平著述事迹送部查核其 欽定書籍中引用若干條論贊若干條先儒書籍中引用若干條論贊若干條詳細造冊請 飭大學士九卿國子監會同禮部議奏

又 予魯人毛亨從祀 聖廟位列東廡伏勝之次明臣呂柟從祀 聖廟位

列西廡蔡清之次

又 予明儒方孝孺從祀 聖廟位列西廡陳澧之次

又御史劉毓楠奏請祀兩廡新章再行嚴議奉 諭先儒升附學宮久經

列聖論定至為精當咸豐十年酌定章程以示限制原以宮牆巍峻祀典至崇

必其學術精純足為師表者方可俎豆馨香用昭毋替該御史以新章過嚴如宋儒黃震等均經禮部議駁謂士人皆以聖賢為難幾必至人心風俗日流於奇邪異端而不及覺推該御史之意必將舉古人之聚徒講學著有性理等書者悉登兩廡之列方足以資興起而德行之儒平日躬行實踐師法聖賢實為身後從祀之計議論殊屬迂謬所奏著毋庸議

又禮部議定先賢先儒祀典次序繪圖頒發各省

又奏准今先賢中增祀公孫僑公明侯二人公孫僑年先於蘧瑗應在蘧上擬公孫僑移東廡第一位蘧瑗移西廡第一位林放與蘧瑗並稱擬移東廡第二位而移蘧瑗滅明於西廡第二位夜皮為孔子弟子公明侯為曾子弟子擬移牧皮於東廡三十五位公明侯於西廡三十五位其餘悉仍其舊以省東西移易先儒增祀者十五人其位次隨時擬定限於東西多寡之數於時代不無參差今台原定從祀與續經增祀之儒各就時代按其生平一東一西以次排列庶無凌躐之虞

又奏准先儒東廡位次公羊高伏勝毛亨孔安國后蒼鄭康成范甯陸贄范仲淹歐陽修司馬光謝良佐羅從彥李綱張栻陸九淵陳淳真德秀何基文天祥趙復金履祥陳澧方孝孺薛瑄胡居仁羅欽順呂柟劉宗周孫奇逢陸隴其西廡位次穀梁赤高堂生董仲舒毛萇杜子春諸葛亮王通韓愈胡瑗韓琦楊時尹焞胡安國李侗呂祖謙黃幹蔡沈魏了翁王柏陸秀夫許衡吳澄許謙曹端陳獻章蔡清王守仁呂坤黃道周湯斌

又以賊毀尼山 聖廟鑄衍聖公孔祥珂山東巡撫閻敬銘級

三年 諭本年克復江甯撤除逆首自應遣官釋奠 先師孔子用告成功所有應行典禮著該衙門照例辦理

又 詔修曲阜縣 聖廟及各省學宮

四年以東省逆氛 諭固敬銘等防護孔子陵廟

七年 諭李鴻章奏曲阜 孔廟宜及時修葺請飭兩江湖廣總督各籌銀二

萬兩解山東並由山東巡撫在本省籌銀二萬兩派員與修等語著曾國藩

郭柏蔭各等二萬速解東省著丁寶楨在該省籌銀二萬兩遴員謹將大成殿九開撥字及坍塌各工擇要興修以昭誠敬

又 予宋臣袁燮從祀 聖廟位列西廡宋儒呂祖謙之次

十年 予先儒張履祥從祀 聖廟位列東廡明儒孫奇逢之次

十二年 穆宗親政遣官致祭 闕里

光緒元年正月 德宗登極遣官致祭 闕里

又 御書斯文在茲扁額懸 大成殿並頒直省學宮

又 予先儒陸世儀從祀 聖廟位列西廡明儒黃道周之次

二年國子監司業汪鳴鑾奏為漢儒有功聖經請祀 文廟以光鉅典而崇實學摺竊維聖人之道垂諸六經而經之義理非訓詁不明訓詁非文字不著周公作爾雅雅者正也所以正文字也古者曰文今世曰字孔子論政必先正名

且極之禮樂刑罰則文字所繫顧不重乎漢太尉南閣祭酒許慎生東京中葉去古稍遠俗儒或詭更正文以耀於世慎於是著說文解字十四篇五百四

十部九千三百五十三文敘篆文合以古籀古聖人初造書契之意得不盡混

者賴有此書之存後漢書儒林傳稱慎性篤學博又曰五經無雙許叔重其為

當時推敬亦可概見伏讀 高宗純皇帝 欽定四庫全書總目於說文一書

稱其推究六書之義分部類從至為精密然則士生今日而欲因文見道舍是

奚由夫說文之學至我 朝而始大顯如惠棟朱筠錢大昕王念孫段玉裁戴

震孫星衍嚴可均阮元桂馥等諸家撰述各有發明稱極盛矣而春秋有事文

廟未有議及配享者臣愚以為兩漢傳經之功莫大於鄭康成而鄭康成註禮

嘗徵引許書鄭之於許年代未遠而其書已為刺取其服膺可知 四庫總目

謂兩漢經學極盛若許若鄭尤皆一代通儒非後來一知半解者所可望其津

涯 聖諭煌煌允為千秋定論許鄭並稱無所軒輊雍正二年已復康成從祀

士林僉稱盛舉而許慎大儒事同一例則慎之應從祀者一也訓詁之學首推

毛氏善承毛學者惟許慎故說文之義往往與毛傳相合 四庫總目定詩傳

為毛亨所撰同治二年 允御史劉慶之請列祀毛亨於東廡而慎獨未與則

慎之應祀者二也漢人說經喜用識緯雖大儒猶或不免惟說文一書不雜識

緯家言其稱易孟氏書孔氏以及論語孝經皆古文也凡古文舊說散失無傳

者猶存什一於千百七十子之微言大義賴以不墜魏晉以來注書者奉為科

律往往單辭片義引用者多至十餘家他傳注所未有其有功於經訓誠非淺

鮮則慎之應從祀者三也朱子崛起南宋躬行實踐上承孔孟之傳而四書集

註引用說文者不可枚舉朱子語類云讀書不理會字畫音韻卻枉費無限詞

說幸補而卒不得其大義甚害事也是宋儒之講求義理非本訓詁文字而亦

無由以明說文解性情二字獨主性善之說與孟子董仲舒之言相表裏則慎

之應從祀者四也綜其網羅古訓博采通人天地山川王制禮儀靡不畢貫實

足為聖經之羽翼示後學之津梁下禮部議奏准漢儒許慎從祀 文廟位

列東廡后着之次

又吳大澂奏名儒王建常請祀 文廟下禮部議奏

三年江蘇巡撫吳元炳奏據婁縣紳士前戶部主事姚光發等呈稱伏讀家語

七十二弟子解叔仲會魯人少孔子五十歲與孔璇年相比每孺子之執筆記

事於夫子二人迭侍左右孟武伯見孔子而問曰此二孺子幼也於學豈能識

於壯哉孔子曰少成若性也習慣若自然也然則兩賢執筆記事親承教有

功於贊修刪定實無淺深輕重之差而有祀有不祀推原其故叔仲會之從祀

助於唐開元二十七年其時但憑史記為斷而史記未列孔璇之名後司馬貞

所註史記索隱仍引家語原文以補其闕 國朝檢討朱彝尊孔子弟子考於

孔璇事實內亦據家語之言謂惟因二子合傳故不復標璇名則公論自不可

掩夫孔子微言大義炳若日星天下萬世得以循誦習傳絜兩賢之力居多叔

仲會久經從祀惟孔璇未與斯列此歷朝之闕典有待 聖世之表章呈請具

奏 案家語叔仲會孔璇同侍 聖門執筆記事信而有徵又查家語敘列杏

壇弟子秦祖以下祇存姓名他如申縉申棖薛邦即鄭國均已備列兩廡如

先賢孔璇者日侍函丈確有事實且叔仲會早已從祀而孔璇祀典獨遺似應

一體配祀官牆以光俎豆下禮部議奏

又 予漢河開獻王劉德從祀 聖廟位列西廡董仲舒之次

四年 予先儒張伯行從祀 聖廟位列東廡陸隴其之次

五年 予宋儒輔廣從祀 聖廟位列西廡黃幹之次

十一年 諭前因陳寶琛奏請將黃宗羲顧炎武從祀 文廟當令禮部議奏

據該部會同大學士九卿具奏請毋庸從祀又據潘祖蔭等另奏請旨准行著

大學士六部九卿翰詹科道再行詳議具奏

十二年 諭前因禮部會奏議駁陳寶琛奏請以黃宗羲顧炎武從祀 文廟

與尚書潘祖蔭等另摺請准從祀意見兩歧當令大學士等議奏茲據額勒和

布等仰稽 列聖垂謨參考廷臣議論請照禮臣原奏議駁等語黃宗羲顧炎

武即著毋庸從祀 文廟仍准其入鄉賢以重明禮而昭矜式

十三年 德宗親政遣官致祭 闕里

十八年 諭禮部議覆福建學政沈源深奏請以宋儒游酢從祀 文廟一摺

宋儒游酢清德望重在當時已與程朱諸賢為人心所共推重所著論語雜解

中庸義孟子雜解易說詩二南義等書足以闡明聖學羽翼經傳其生平出處

史傳昭垂允為躬行實踐宜膺茂典俾列宮牆游酢著從祀 文廟位在西廡

楊時之次以崇實學而闡幽光

二十年 諭每歲春秋大祀中祀致祭之期朕已次第親詣行禮 至聖先師

祀典綦重本年八月初三日致祭 文廟朕親詣行禮以申誠敬

又奉 旨 文廟禮節內添入飲福受胙

又 諭翰林院侍讀王懿榮奏衍聖公府各項地產載在會典事例且闕里文

獻考頃畝甚詳前巡撫張曜查出銅山沛縣一項涸田未及其奏請飭查明撥

補等語衍聖公府田產既有官私載籍可憑自無難確切履勘著戶部行知兩

江總督江蘇山東各巡撫按照原奏調齊卷冊分晰查清如數撥補據實具奏

另片奏請將修葺曲阜書院罰款銀兩發交生息以充四氏學膏火著山東巡

撫查明辦理又請飭各省書局所刻經籍解送衍聖公府儲藏著山東巡撫咨

各督撫遵照辦理

詳載田賦
考官田賦

二十一年 諭禮部議覆陝西學政黎榮翰奏請將宋儒呂大臨從祀 文廟

一摺宋儒呂大臨純修正學與游酢楊時諸賢同列程子之門所著易經章句

大易圖象易傳指歸禮記傳註論語中庸解孟子章義等書皆足發明聖學羽

翬經傳其生平尤遠於孔為朱子所引重洵屬制義誠篤無愧純儒呂大臨著

從祀 文廟位在東廡謝良佐之次以崇實學而光茂典

二十八年二月丁酉釋奠於 先師

三十二年學部奏請將孔子升為大祀略稱據 部行走刑部主事姚大榮呈

稱本年學部奏定教育宗旨分忠君尊孔尚公尚武尚實五端推求實義悉秉

孔門緒論散在羣經尋繹愈顯伏維孔子之聖生民未有 國朝 列聖表章

正道典禮備隆惟道與時為變通禮隨世為沿革外界之習染既深衛道之防

維宜峻撫時感事竊於尊孔主義上請實行查西國君主嗣位先宣布信教誓

詞與國民共定一尊使皆歸向蓋彼族以宗教為主位主位既定此後百變不

離其宗我國於孔子尊之曰至聖親之曰先師粵稽典禮孔廟僅列中祀夫孔

子德配天地自當與 闕里 方澤同躋大祀查康熙年間 聖祖仁皇帝以

朱子升配先哲而理學大興雍正年間 世宗憲皇帝復以鄭康成從祀而經

學昌盛風行草偃全賴提倡雖孔子之聖不緣大祀中祀為加損而民間觀聽

所係悉視 朝廷意旨為轉移倘奉 特詔顯躋大祀振溥海內外之人心後

此教育普及科學博綜亦有以範圍不過而豫定民志矣呈請代奏前來 等

查該主事所呈為尊崇孔教起見應否 飭禮部覆議具奏伏候 聖裁奉

諭朕奉 皇太后懿旨孔子至聖德配天地萬世師表允宜升為大祀以昭隆

重一切應行典禮該衙門議奏

又 諭奉 懿旨湖北按察使梁鼎芬奏請建曲阜學堂各摺片孔子為萬世

師表昨經降旨升為大祀曲阜聖人之鄉自應建設學堂以拓宏規而啓後進

著張之洞督同湖北提學使黃紹箕等悉心籌畫妥慎辦理所需經費即著該

督籌辦並頒發帑銀十萬兩由山東藩庫發給

又禮部議大祀典禮二十三條

一先師升為大祀係屬大典擬請 特派親王先期祇告 天地 太廟 社稷及太學 先師廟

一廟制街門三開 大成門五開 大成殿七開 御碑亭十四座舊制皆覆黃瓦餘覆綠瓦今擬通覆黃瓦

一神牌舊制朱地金書今擬金地青書

一神帳及案衣舊制紺金紅緞今擬改用黃雲緞

一爵舊制用銅 親臨釋奠增設鑿金銀爵一鑿金銅爵二今擬均改用玉

一祭品舊制十簋十豆今擬加二簋二豆為十二簋十二豆

一樂舞舊制六佾今擬用八佾舊制專用文舞今擬添用武舞

一釋奠舊制 遣官時多今擬春秋丁祭請 皇帝親詣行禮以昭隆重有事則親王恭代

一分獻舊制 親詣釋奠分獻四配以尙書分獻十二哲及兩廡以侍郎今擬分獻四配以大學士分獻十二哲及兩廡以尙書如親王恭代則分獻四配以尙書分獻十二哲及兩廡以侍郎

一視牲舊制先二日禮部尙書一人視牲今擬改先三日視牲

一齋戒牌銅人舊制先二日太常寺進設於 乾清門今擬先三日進設

一致齋舊制 皇帝齋於大內二日今擬請致齋三日

一入廟升殿舊制贊引對引恭導 皇帝由中門內入 大成門中門升階進 殿中門至拜位今擬請由左門入大成門左門升階進 殿左門至拜位祭畢禮成出殿門亦如之如 遣親王恭代舊制入左門今擬改入右門舊制出左門今擬改出右門

一迎神送神舊制 皇上行二跪六拜禮今擬行三跪九拜禮

一上香舊制 皇帝立而不跪查會典大祀皆跪上香 日 月中祀亦跪上香 先師既升大祀擬請 皇帝跪上香

一跪奠帛爵親行三獻光緒二十年八月丁祭 親臨釋奠業已遵行今請著為令

一飲福受胙光緒二十年 親祭始行此禮請著為令惟查二十年禮節謝福胙行二跪六拜禮今擬謝福胙行三跪九拜禮又查會典大祀贊禮郎贊 賜福胙中祀贊答福胙今擬贊 賜福胙舊制 遣官飲福受胙今擬如親王恭代不飲福受胙

一太學及直省祭文既升大祀擬請交翰林院另行恭撰

一臨文稱引 先師舊制雙據今擬改為三據

一立碑 先師既升大祀擬請 御製碑文立石

一崇聖祠正位祭品舊制羊一豕一籩八豆八今擬加牛一加籩二豆二

一崇聖祠承祭官舊制 親祭 先師之年 崇聖祠以大學士承祭今擬 親臨釋奠 崇聖祠以親王承祭如 遣親王釋奠則 崇聖祠以大學士承祭

一直省府廳州縣 文廟規制供奉禮器樂舞暨 崇聖祠祭品擬並同太學行禮儀節仍遵舊制惟承祭官出入向例由左側門今擬改由右側門不飲福受胙

又署兩廣總督岑春煊奏稱南洋為歐亞往來孔道與廣東相隔一水各埠經商華人十居八九不下四五百萬人茲據荷蘭屬爪哇島泗水埠華商張濟安等稟請在該埠建立孔子廟堂前來 查南洋各埠於不在祀典之祠宇迷信尤甚檳榔嶼新建梅樂寺費三四十萬金新加坡重修粵海廟費十數萬壩崖大伯公廟迎神賽會糜費輒以數萬計近且聞有一富人捐貲近二十餘萬在附近叻坡建佛寺者至如吉隆之議立尊孔學堂星洲之議建孔子學堂提議在五六年以前迄未成立吉隆尊孔學堂經 前派視學員勸集三四萬金刻期開辦星洲孔子學堂尙無頭緒從前香山教諭張克誠稟准前督臣陶模往南洋開明遊書社提倡孔教惜勢力尙微民智不開良堪浩歎今泗水張濟安等集成鉅款籌建孔子廟堂誠遠量宏有功聖教善道南行此為先路當經批飭仿照內地園橋壁泮規模遵式建造復專派荷蘭華僑總領學員常川駐島整頓學務並咨駐荷使臣酌派荷屬爪哇總領事訓習禮儀俾領學董學生春

秋致祭以隆祀典而宏聖教各埠華僑於是觀感裨益實非淺鮮

三十三年八月祭 先師孔子廟 上親詣行禮

三十四年以荷屬華僑建立 文廟頒給 御書扁額

又禮部奏上年御史趙啟霖奏請將國初大儒王夫之黃宗羲顧炎武從祀

文廟一摺交臣等議奏考王夫之黃宗羲顧炎武等生當明季鑒宋以後講學

家空談性命不根故訓之弊毅然以窮經爲天下倡而後德性問學尊道並行

此次奉 旨交議誠宜博訪周咨以求至當於是奏請仿照會議政務章程移

會各衙門將該故儒等應准應駁之處開具說帖送交臣部核議奏奉 諭旨

允准旋經各署堂司開送說帖都二十六條其主夫之宗羲炎武並准從祀者

十居其九等以爲是非聽諸天下固見公論於人心予奪出於 朝廷尤待

折衷於 宸斷擬將顧炎武從祀請 旨准行其王夫之黃宗羲應否與顧炎

武一律從祀之處恭候 聖裁奉 旨禮部會奏遵議先儒從祀分別請旨一

摺顧炎武王夫之黃宗羲均著從祀 文廟東廡夫之位列孫奇逢之次炎武

位列王夫之之次西廡宗羲位列黃道周之次

又學部奏 文廟工程辦法參稽禮制相度地形擬采三楹五陛之規以備典

禮 又禮部奏懸掛 文廟扁額位次請 旨欽定摺光緒三十四年十一月奉

旨 列聖御極之初均恭書扁額懸掛 文廟茲朕寅紹丕基敬循舊典命南

書房翰林恭書中和位育扁額交造辦處成造一分敬懸京師太學 文廟其

墨筆著衍聖公孔令貽到京時由軍機處交領敬謹齋回製造扁額於闕里

文廟恭懸墨筆無庸繳進即於闕里收藏所有直省府廳州縣著武英殿摹勒

頒發一體懸掛欽此見准國子丞呈稱恭查例案凡遇 列聖御極之初於

文廟恭懸扁額奉 旨後由國子監將 大成殿內 列聖所懸扁額方位次

序具摺繪圖貼恭呈 御覽並擬 皇上恭懸扁額方位恭候 欽定俟造

辦處製成後再由國子監行文欽天監擇定吉期移咨工部派員懸掛等因今

逢 皇上御極之初恭懸 文廟扁額應查舊制豫擬方位謹將 列聖所懸

扁額方位次序並見擬 皇上恭懸扁額方位繪具圖說恭呈 御覽俟 欽

定後再由臣等謹吉懸掛敬謹辦理

又十一月 上登極遣官致祭 闕里

宣統元年祭 先師孔子遺莊親王載功恭代行禮

又學部奏恭懸 文廟御書中和位育扁額

又 諭給事中陳慶桂奏明儒湛若水講明正學請從祀孔廟一摺著禮部議

奏尋奏湛若水學問著述未足當經儒之目立朝大節亦尙不無遺議各衙門

說帖主駁者多從祀之處擬毋庸議

又先是 上御極初敬循舊典命南書房翰林恭書扁額懸於闕里 文廟其

墨筆俟衍聖公孔令貽到京時由軍機處交領敬謹齋回製造至是孔令貽咨

由山東巡撫袁樹勳據情代奏因令貽上年丁親母憂在籍守制未敢赴京與

賀若俟服闋後再行入都承領爲時太久可否先行差官代領以免稽遲抑或

俟服闋後再行親身承領得 旨著仍遵前旨俟服闋來京承領用昭朕尊重

至意

又八月朔祭 先師孔子遺豫親王懋林恭代行禮

又都察院代奏候選訓導王元稹呈請以漢儒趙岐從祀 文廟

又陝甘總督升允奏購製 文廟各器支用銀兩略稱甘省僻處邊隅迭遭兵

燹 文廟彝器本未完全 抵任以來恆以缺而不備引爲深疚茲幸 曠

典特頒 先師升祀既極崇德報功之意宜有禮明樂備之休因派員赴滬照

章採購所有八音之奏八佾之舞以及簠簋豆籩之羅列尊彝彝鼎之燦陳均

已煥然一新秩然大備來年春秋釋菜冠裳踴躍當見 至聖金聲玉振之留

遺益動邊人血氣尊親之嚮慕計購禮器樂舞等項共支蘭平銀五千二百三

十七兩零甘庫向無閒欸可支擬即作正開銷

又學部奏酌擬曲阜學堂辦法並請派開缺湖北按察使梁鼎芬爲監督

二年直隸總督陳夔龍奏元儒劉因學術精純志行卓越前明請從祀者七次

均格於時議自勝國以迄 昭代儒臣迭有論辨前修未泯公論益彰應請

俯准將其從祀 文廟以闡幽潛而資坊表

又拓修奉天省 文廟從東三省總督錫良請也

又 諭御史松廷奏 文廟典禮至重請 旨交議一摺著禮部會同估修大臣妥議具奏

又禮部會奏略稱查松廷原奏 先師孔子升為大祀一切典禮務極崇隆至殿宇階墀為 神所憑依當敬謹典守似不宜輕易更張蓋改作固足以示隆

重而沿舊亦所以妥 神靈京師 文廟為天下所矜式自應先定規制經禮部議奏復經前大學士張之洞咨商估修大臣會同禮部學部擬奏工程浩大

所費甚鉅一時未能舉辦查京師 文廟係一成三陸正殿七楹外加行廊夾室兩楹已隱具九楹之象况有多年行樹倘因展拓而或損折於心亦有未安

應請 旨飭會議政務大臣調查禮部並估修大臣等各奏案詳細參考或一仍其舊或略有變通或分年辦理妥議具奏又禮部原奏稱直省府廳州縣

文廟供奉禮器樂舞並同太學似宜有所區別應請一併交議以重祀典等語等當即會同前往 文廟敬謹查看伏念 先師神牌移奉彝倫堂為時已久

亟應恭奉還御以安 神靈惟工程浩大又復限於地勢該御史所籌或一仍舊制或略有變通或分年辦理於慎重典禮之中仍寓因時制宜之意斟酌

實為妥善 等謹分別緩急詳擬辦法恭查大成殿七楹左右夾室各一楹惟夾室舊有板壁開隔中開祇有七楹謹擬將板壁撤去使夾室兩楹與正殿七

楹通合為一共成九楹雖敬考會典通禮諸書並無大祀必須正殿九楹明文即就該御史原奏所稱九楹而論其數亦適相符殿前階階原係一成三陸若

改建三成五陸必須拓展地基有礙行樹原奏慮及或有損折於心未安亦係實情若仍一成舊制但改五陸則祭時鋪設樓薦外地勢較狹樂懸佾舞亦恐

不敷分布似可毋庸更改以上各條 等均擬請一仍舊制者也大成殿原係七楹三門今既改為九楹擬於東西再次楹各闢一門增為五門以符正殿

五門規則四配十二哲龕座原係綠色琉璃擬改用黃色琉璃東西兩廡各十

九開每間設連四龕一座東西各七十六位先儒增祀 神牌既多見時東廡

已少一龕位西廡僅餘一龕位既不便以東廡之位移奉西廡且將來再有增

祀龕位亦有不敷查與兩廡相連者係收藏祭器庫房礙難再行展拓擬將連

四龕改為連六龕舊係一龕兩案改為一龕三案既可多增位次而陳列祭器

仍復釐然清疏以上各條 等均擬請略為變通者也 崇聖祠正殿五楹今

既增性牢蓮豆行禮地勢較隘擬請拓為七楹其東西兩廡則各就廡後隙地

量為移展以免新增正殿兩楹為兩廡所掩並擬於 崇聖祠正門外西旁添

建甌瓦房三間以備承祭官更衣之用大成門內外舊有碑亭十三座皆 列

聖因事建立以示尊崇今 先聖既升大祀擬於工竣後恭請 御製碑文立

石建亭以垂久遠至殿宇應用瓦色大成殿東西廡大成門 先師廟門 列

聖御碑亭十三座大成殿前之燎屋 先師廟門外之屏垣請一律通覆黃瓦

其屏垣垂柱等飾亦改用黃色琉璃 崇聖祠正殿正門擬改覆黃瓦兩廡則

仿照大成殿兩廡舊式改用甌瓦綠綠瓦綠瓦板瓦者各仍向時規制一律修

成殿東西掖東西列舍大成門外持敬門暨 崇聖祠西向外門等處並明英

宗建立之碑亭一座其用綠瓦黑瓦綠瓦板瓦者各仍向時規制一律修

飾見新省性亭亦暫依舊式一併見新惟見時大成殿未成 先師神牌尚未

還御 崇聖神牌別無處所可以供奉兩處工程勢難同時並舉擬請自大成

殿東西廡大成門 先師廟門外之屏垣等處先行興修迨恭奉 先師神牌

還御後再由學部體察情形奏請移奉 崇聖祠神牌於彝倫堂將 崇聖祠

工程以次修理以上各條 等均擬請分年辦理者也至原奏又稱直省府廳

州縣 文廟供奉禮器樂舞似宜有所區別等語恭查 欽定大清通禮直省

府廳州縣 文廟祭祀陳設器數與京師無異其祝詞樂章均與太學不同是

已有所區別應請毋庸另議

又吉林巡撫陳昭常奏購地重建 文廟

三年以漢儒趙岐元儒劉因從祀 文廟岐位列杜子春之次因位列趙復之

次

又 諭御史蕭丙炎奏請將宋儒周必大從祀 孔廟著禮部議奏

又都察院奏學部諮議官劉師培呈稱東漢大儒賈逵學行卓絕請從祀 文廟下部議奏

又禮部尙書榮慶奏估修 文廟工程擬定辦法估計十成足銀三十七萬四百餘兩擬分三期請領又奏監修飯食紙張等項擬每月請領經費銀一百兩均從之

又陝甘總督長庚奏請將故儒李中孚從祀 文廟下部議奏

皇朝續文獻通考卷九十九

學校考六 視學養老

臣謹案視學養老截然兩事馬考合為一門既有祠祭此實駢枝况臨雍典禮有須載入太學者不愈見複雜乎 本朝稽古考文 憲廟已改幸學為詣學而此門仍沿端臨之舊茲遵前考連類合纂其已登太學祠祭者更不復書云

乾隆五十三年 諭據保甯等奏稱布魯特畢班壁特伊母今年一百六歲尙屬壯健感激天恩恭祝萬壽令伊稟知等語布魯特畢班壁特之母見年一百六歲精神矍鑠西域遠徼共沐昇平上瑞朕心深為欣慰著施恩賞給大緞一匹貂皮六張伊子前來具稟禮儀恭順亦屬可嘉並著賞給藍翎以示朕優獎高年無間內外至意

五十四年 諭福康安奏廣東新甯縣壽民李適本見年一百二歲淳良謹厚孝友可風請旨旌表等語李適本年逾期願康強矍鑠洵為昇平人瑞所有應行旌表並賞給銀兩緞疋之處著該部照例具題用示優獎老年至意

又 諭惠齡奏江夏縣民吳國瑞見年一百二歲孫曾繞膝請旨旌表等語吳國瑞年逾百齡精神矍鑠洵為昇平人瑞特賜御製詩章所有應行賞資及建坊旌表之處著該部照例具題

又 諭前據伊齡阿等奏本年順天鄉試諸生中年屆八十七以上者俱三場完竣等語見在榜發未經中式俯念該生等年臻耄耋踴躍觀光洵為藝林盛事其年在八十以上之左昌宗等九名並年在七十以上之副榜單備俱著加恩賞給舉人准其一體會試其年在七十以上之高日新等三十三名俱著加恩賞給副榜以彰壽世作人至意

又 諭本年鄉試諸生年屆八十七以上未經中式者除順天業經加恩外茲據各省陸續奏到諸生中年踴躍踴躍觀光共有百餘人雖未經中式而三場均能完竣洵為士林盛事所有八十以上江南省之胡椿等十七名江西省之黃景亮等四名浙江省之方宗華等六名福建省之吳維新等三名湖北

省之劉化龍等四名湖南省之劉豐年等七名河南省之馮希賢等七名山東省之王有年等五名山西省之李文明等六名陝西省之張大烈等五名四川省之潘履謙等六名廣東省之李賴予等七名雲南省之湯祚昌等二名貴州省之楊宜科等五名俱著加恩賞給舉人准其一體會試七十以上浙江之沈志超等十二名湖北之劉中陵等十四名湖南之黃佑啟山西之宋守祀等二十七名俱著加恩賞給副榜

五十五年 諭朕披閱康熙年間 萬壽聖典恭載 聖祖六旬萬壽時各省老民多有來京慶祝者今朕壽屆八旬普天同慶薄海臣民咸深抃舞朕恐外省文武大員紛紛願請是以每省酌派二員並令各帶道府丞倅將備等官來京以遂其祝釐瞻觀之忱至各省耆民人等雖未降旨准其赴闕而草野情殷葵向思欲遠來效悃祝延萬壽者想亦不少朕思年老之人正須頤養長途跋涉未免辛動或因水土不服偶生疾病轉非體恤高年之意不但外省地方道路遙遠不便前來即順天直隸老民僻處鄉隅亦不必齊赴京師致滋勞頓前已於恩詔內令查明各省耆民資以粟布銀兩溥被恩施茲特再降諭旨著各督撫轉飭地方官出示曉諭凡欲來京慶祝之老民等俱著不必前來以副朕安老引年至意

又 諭據知貢舉鐵保奏本年會試舉子內九十歲以上者四名八十歲以上者七十三名七十歲以上者二十四名皆三場完竣未經中式等語本年朕屆八旬特開萬壽恩科各省舉子年老應試者至一百餘人之多洵為昇平盛事除九十以上之段三連業經賞給都察院都事銜八十以上之曹京賞給國子監典簿銜七十以上之姜价項朱榮杰邵利達賞給國子監學正銜吳澹賞給翰林院典簿銜外所有年屆九十以上之劉湘胡椿陳鳳翔八十以上之吳霖等七十三名俱著賞給翰林院檢討銜七十歲以上之董繼允等十九名俱著賞給國子監學正銜其九十以上者各加賞緞三疋八十以上者各加賞緞二疋七十以上者各加賞緞一疋並年在九十八十七十以上前經賞給職銜之段三連等七名亦著一體分別賞給緞疋以示朕嘉惠耆儒仁壽作人之

至意

又 諭何裕城奏安徽省原任翰林院庶吉士曹昂見任徽州府學教授呂韶監生張惇方秦耀祖耆民姚一溥余文章沈必可秦連茹俱見年八十以上五世同堂請各賜予恩資等語曹昂等俱年臻耆艾繞膝曾元洵爲昇平人瑞所有應行加恩賞資之處著該部察例辦理

五十六年 諭向來各省遇有壽民年逾百歲及五世一堂應行旌表賞資之處俱係照例具題嗣因朕得有五代元孫上年又係朕八旬壽辰中外臣民同深歡忭是以各督撫等於所屬民人內見有年登耄耄繞膝曾元者具摺入告以爲昇平盛事然在上年奏報則可此後仍當照例具題辦理朕從不侈言祥瑞崇尚虛文總期時和年豐天下共享盈寧之福斯實爲庶徵上瑞如不過皓首龐眉含飴衍慶固屬閭閻佳事而朕心廬念黎元時深願望者實在彼而不在此也嗣後各省有百歲耆民及五世同堂等事著各督撫不必專摺奏請所有本日穆和蘭奏沁水縣民李汝霖封邱縣民張廷照長麟奏銅山縣民王進公福崧奏烏程縣民翁尙英臨海縣民侯介福瑞安縣民蔡次玉等卽著該部照例辦理

五十七年 諭致仕上駟院卿李質穎年逾八十親見七代五世同堂實爲熙朝盛事除照例給予扁額外著加恩賞給總管內務府大臣銜以示錫慶引年至意

又 諭朕仰蒙 昊眷慶澤延洪五代一堂誕膺多福因思朕逮事 皇祖

皇考復得元孫親見七代實爲古今罕有前曾降旨令八旗都統步軍統領順天府府尹及各省督撫詳查臣民中如有實曾親身望見祖父下逮元孫有指證者據實奏聞優加恩眷茲當歲歲開韶元正肇慶節據內務府正白旗查有致仕上駟院卿李質穎並據馮光熊奏忻州監生張克用趙鈺解州民人陳徽舜交城縣民人武漁河江蘭奏濟甯州原任雲南布政使李承鄴朱珪奏欽縣捐職府知事潘起煌均係上事祖父下逮元孫確有指證並飭造系圖冊結咨部等語李承鄴等年踰耄耄或曾列卿寮或安居菴屋親見七代五世同堂實

爲昇平盛事著加恩賞給七葉衍祥扁額字樣令該部及各督撫製造頒給用昭壽寓同登斂時敷錫之盛嗣後遇有續行奏到者該部卽照例彙題一體頒賞扁額

又 諭據覆勘鄉試試卷大臣等奏河南省中式舉人年八十一歲之曹逢庚詩內彩散雲漢外句漢字誤作平聲應議停會試一科等語詩律平仄向有一三五不論之說今曹逢庚於應用平聲之第四字誤用仄聲非如一三五等字可比雖詩家拗體或不拘然場屋中講求聲病此等拗字自非所宜本應照議停科但該生詩句內若第三字亦用仄聲則於音調更爲錯誤今第三字所用雲字係屬平聲雖第四字失黏較之全行舛錯者有閒且該生年逾八十妥協完場文理竟能中式所有一字之疵尙可姑原曹逢庚著加恩免其罰科以示優恤耆年格外恩施至意

又 諭據明興等奏稱蒙郭勒多爾部落之一百一歲年老布嚕特伊特推瑪斯請賞戴金頂等語布嚕特伊特推瑪斯見年一百一歲尙能乘馬實屬昇平人瑞今復思便於商旅自行捐貲於布庫部落之納林河搭蓋橋座尙屬急公伊特推瑪斯著加恩賞戴金頂仍由該處庫中賞給大緞二疋以示鼓勵

六十年 諭吉慶奏平陽縣民林世叨見年九十五歲五世同堂等語林世叨年近期頤曾元繞膝實爲昇平好事特加賞大荷包一對小荷包四箇仍著該部照例給與扁額用示嘉惠耆齡至意

又 諭朱珪奏翰林院檢討銜謝啟祚見年一百二歲視履從容等語謝啟祚年逾百齡精神矍鑠曾元繞膝五代同堂洵爲昇平人瑞著加賞編修銜御書扁額以賜並賞給大荷包一對小荷包四箇所有應行建坊旌表之處仍著該部照例辦理

又 諭本年係朕御極六十年慶期業經降旨不必舉行慶典因思蔡新在籍年久情殷瞻戀自當陳請來京祝釐但閩省距京較遠蔡新年近九十長途跋涉於高年頤養之道究非所宜著伍拉納等傳知蔡新竟可不必前來蔡新務宜仰體朕懷遵照此旨毋庸再行陳請以副朕體恤至意

又 諭我國家重熙累治景運昌明綏萬屢豐中外禔福所以涵濡休養咸登仁壽者實爲史冊所罕觀我 皇祖聖祖仁皇帝冲齡踐祚統馭寰區仁漸義摩熙熙皞皞康熙年間曾舉行千叟宴與天下臣民躋壽寓而迓繁禧爲千載一時之嘉會朕誕膺丕緒敬紹鴻圖夙夜孜孜勤求治理仰賴 昊蒼篤佑列祖貽庥海宇乂安人民樂利會於乾隆五十年乙巳恭照 皇祖千叟宴舉行盛典迄今已逾十年逢吉康強精神純固明歲丙辰紀元周甲躬舉授受上儀尤屬曠古所未有天下臣民歌詠太平期頤咸慶者此十年內又不知凡幾允宜再啟耄筵以紀重光之盛著於明年正月初吉再舉千叟宴盛典惟是前次乙巳朕壽七旬有五是以六十歲以上者俱令與宴明年朕壽八旬開六若仍照前次六十以上即著入宴年齒皆如兒輩長幼懸殊轉爲未協此次應自七十歲以上准其入宴用示朕介景延祺申錫無疆至意

嘉慶元年 太上皇帝勅諭內閣曰本日舉行千叟宴京畿及各旗籍兵民踴躍倍來相與盛典龐眉皓首鬢髮盈廷實爲吉祥盛事業經分別加恩普加賞資並各加賞緞疋銀鏤外所有老民熊國沛年一百六歲邱成龍年一百歲尤屬昇平人瑞俱著加恩賞給六品頂戴其九十以上老民鄧永祀梁廷裕開散覺羅烏庫里步甲文保舒昌阿馬甲王廷桂內務府閒散人田起龍王大榮俱著賞給七品頂戴以示引年養老敷錫壽祺至意

臣 謹案養老之典備著禮經漢時天子臨雍講學有親袒割牲以昭虔恪者至若侯王設醬公卿饌珍則尤禮之常焉我 朝自康熙六十一年

賜千叟宴 召內外臣民年六十五以上者得三百四十人宴於乾清宮

前 命諸王以下執爵勸飲有差 高宗法 祖愛民踵而行之 先聖

後聖道揆同符不益見 昇平盛事哉

二年 賜高年頂戴八千四百七十九人

三年 上臨辟雍行講學禮加衍聖公孔繁灝太子太保 賜至聖後裔及各氏後裔進講滿漢大學士祭酒司業以下至肄業生及在京觀禮之進士舉人貢監生等俱照乾隆五十年酌擬如例各氏陪祀後裔送監讀書者三十九人

廣國子監鄉試中額十五名

又 覆准衍聖公之本生父係地封虛銜毋庸隨班聽講

十三年 諭本科會試中式新進士王服經年八十五歲殿試三甲文理清通引見時看其精神尙健洵爲熙朝人瑞伊即未經中式亦例邀恩賞翰林院檢討銜今若改用庶吉士令其在館學習伊已耄耄詞賦之學或非所長且散館轉需時日王服經著加恩即授爲翰林院檢討以示加惠耆儒至意嗣後有中式進士年在八旬以外者均著照此例行

十四年 諭本年萬壽會試恩科各省年老舉子皓首窮經觀光踴躍三場完竣者有三百七十餘名之多實爲壽宇祥徵本日降旨已分別加銜並此內曾得編修檢討銜者亦一體遞予加銜矣因思伊等衰年望澤勵志風磨固宜廣被榮施慰其暮景而施恩亦當定以限制不可過濫且編檢係詞垣清秩自不應再赴禮闈嗣後年老舉子祇得學正助教銜者仍准其會試若未經中式加銜檢討其已得檢討銜者即不必再行會試著爲例至九十以上者年近期願非尋常年老舉子可比來京會試向有賞給司業之例並不因曾經賞銜以次遞加自可照舊辦理此外年老給銜者如遇祝慶迎鑾陳獻詩冊屆期原可酌量加恩不拘成例也

臣 謹案年老會試舉人賞職銜始於乾隆元年鄉試舉子賞舉人始於乾隆三十五年分別八十以上賞舉人七十以上賞副榜始於乾隆五十四年當時孫士毅奏川省鄉闈年老未經中式者甚多將例監及年分較近並衰邁不能進京會試者概行汰去 上諭稱爲得當嘉慶六年議准年老諸生以詳查年歲爲本先交禮部覆覈再行具奏各省例監捐在十科以前曾經應試者方照生員例一體奏請嘉慶十八年奉 旨照舊例遞加十歲方准列入蓋疊沛 恩施固見壽考作人之盛而不予限制亦非慎重名器之心溯乾隆之初至光緒之季無科歲有不堪觀縷茲登一二餘從蓋闕欲考其詳請稽會典

又 諭順天府尹朱銘奏伊母王氏見年八十六歲迎養在京五世同堂謹據

實奏聞等語朱鎔之母王氏年逾八旬家縣五世承恩祿養洵爲盛世嘉祥加恩特賜御書扁額一面並賞大卷八絲緞二疋小卷八絲緞二件線縐二件綾三件竹木漆陳設九件以示恩渥其例應賞資之處仍著原籍該撫循例具題十五年廣西疏報壽民藍祥一百四十二歲 特賜御製詩章御書扁額六品頂戴銀五十兩

道光二年 諭 先師孔子德配天地道冠古今我朝 列祖 列宗暨我皇考仁宗睿皇帝親詣釋奠臨雍講學多士圍橋觀聽洵盛典也朕寅紹丕基心誠嚮慕謹於明年仲春上丁親詣辟雍登堂釋奠用昭崇師重道稽古右文至意其應行典禮事儀著各該衙門先期敬謹豫備

咸豐三年 上詣 文廟釋奠禮成 御奕倫堂更衣 親臨辟雍講學講中庸致中和一節尚書皇天無親四句王公衍聖公九卿大學士詹事起居注官入侍至聖後裔五經博士各氏後裔及學官進士舉人廩生貢監生等圍橋肅立 上賜講官坐大學士裕誠祁寯藻進講四書國子監祭酒訥爾濟龍元傳進講書經講畢 上宣御論時王公百官及聽講進士舉人等跪聆 聖訓畢王以下各官行三跪九叩禮祭酒司業率學士諸生謝 恩禮成 恩資進講大學士祭酒並衍聖公聖裔後裔國子監官觀禮進士舉人廩生貢監生等有差廣太學乙卯科鄉試中額十五名頒發刊刻 御論二篇奉 旨是日如遇雨著照乾隆五十年加賞例加賞

同治元年 諭本日禮部具題壽民殷瑞麟暨王世泰夫婦年逾百歲張朝燦五世同堂本三件俱係咸豐十年奉 旨交部議奏雖據稱題覆各省壽民壽婦本章向無定限然特無定限時閱三年始行題覆實屬遲延該壽民等年逾耄期例得邀恩似此任意延擱使不得榮施早沐致國家殊恩曠典幾屬具文近來各衙門辦事往往藉口例文不顧緩急類此者不知凡幾深堪痛恨所有禮部歷任承辦司員著查取職名交部議處該部堂官一併察議以儆玩泄六年以年逾九旬 賞原任漕運總督袁甲三母郭氏扁額十二年原任漕運總督袁甲三母郭氏百歲生辰頌 御書扁額旌賞如例

光緒九年 諭鑲白旗滿州都統伯彥訥謨祜等奏總兵年屆百齡一摺前甘肅肅州鎮總兵萬福前在軍營曾著勞績咸豐年間開缺回旗奉旨賞食全俸見屆百齡精神強固洵爲熙朝人瑞萬福著加恩賞給頭品頂戴所有例應旌表之處仍著禮部核議具奏

十七年 予年逾百齡五世同堂之直隸寧津縣壽民魏連有旌表並賞銀緞又 予年屆百齡五世同堂之福建惠安縣壽婦劉氏旌表並賞銀兩

三十三年以禮部左侍郎張亨嘉之母年屆百齡賞給御書扁額宣統元年 旌各省壽民壽婦年逾百歲五世同堂並未屆百齡五世同堂暨各省壽民壽婦年逾百歲有差

又 諭禮部奏甘肅固原州回民李生潮年逾百歲核與乾隆年間趙元寅之案相同而年復較多應如何優加賞資聲明請旨一摺李生潮著照例旌表並於例賞外加恩多賞一倍再行加賞御書扁額一方用昭嘉惠耆民至意尋賞扁額曰遐齡人瑞

二年 旌表鑲紅旗滿洲包衣廷瑞佐領下附生鄧豐德七世同居官給銀三十兩聽其自行建坊並於忠義孝弟祠內石碑上題名

又 旌表直隸高陽縣壽婦崔王氏湖北黃梅縣命婦石喻氏建始縣壽婦李孫氏湖南長沙縣壽婦何朱氏廣西羅城縣壽婦任王氏均年逾百歲五世同堂湖北南漳縣壽民王所封年屆百歲五世同堂廣東新會縣壽婦唐歐陽氏嘉應州壽婦黃吳氏均年逾百歲親見七代五世同堂地方官給銀三十兩聽其自行建坊即給予壽民壽婦例得字樣並各賞給銀十兩緞一疋其 恩賞銀緞由部行文內務府支領發交該督撫轉給祇領廣東壽婦唐歐陽氏黃吳氏由總督製造七葉衍祥扁額頒給如例

又 旌表廣東開平縣壽職張璧如暨妻周氏鶴山縣壽職梁祖意暨妻鍾氏均夫婦同登百歲高要縣壽婦陸陳氏嘉應州壽民鍾士超四川眉州壽婦孟吳氏鄧李氏江北廳壽民冉瑞英名山縣壽婦張楊氏忠州壽民陳義宗奉天岫巖州壽婦郝趙氏雲南河西縣壽婦楊柏氏騰越廳壽婦賈李氏江蘇常熟

縣壽婦曾丁氏廣西東蘭州壽民黃明輝灌陽縣壽民何德武壽婦蔣王氏山西平遙縣壽職白琪均年逾百歲地方官給銀三十兩聽其自行建坊卽給予壽民壽婦各字樣如例

又 旌表直隸阜城縣壽民趙玉山鉅鹿縣壽婦鄧王氏武舉安騰壽民谷懋昌定興縣壽民陳永安順天香河縣壽婦趙楊氏東安縣壽婦陳李氏 盛京鑲黃旗壽婦孟馬氏奉天承德縣壽民陳萬清復州壽婦何曲氏四川璧山縣壽民江尙岷李祖輝甯州壽婦劉鍾氏合江縣壽民戴映奎南川縣壽民徐裕林雙流縣壽婦張帥氏河南光山縣壽婦金王氏江西都昌縣壽婦秦張氏順天東安縣壽婦劉朱氏均係未屆百齡五世同堂直隸涑水縣壽婦李蘇氏奉天蓋平縣壽民王作霖江西臨川縣壽婦桂朱氏山西臨汾縣壽婦秦李氏湖南安化縣壽民譚德魁暨蕭氏均年未屆百齡親見七代五世同堂按照年歲分別給予扁額賞給緞疋銀兩其直隸壽婦李蘇氏奉天壽民王作霖江西壽婦桂朱氏山西壽婦李秦氏湖南壽民譚壽魁暨妻蕭氏由各督撫製造七葉衍祥扁額如例

三年 諭楊文鼎奏耆紳念公好義壽近期願懇恩施一摺湖南紳士頭品頂戴候補三品京堂朱昌齡耆年碩德久洽鄉閭上年湘省災歉該紳創捐巨款辦理平糶保全大局平時於地方義舉無不勇於從事洵屬樂善不倦老而彌篤加恩着賞給內閣學士銜以示獎勵

皇朝續文獻通考卷一百

學校考七 書院

臣謹案古無所謂書院也庠序而已我朝自順治十四年從撫臣袁廓字請修復衡陽石鼓書院嗣後各直省以次建設始未嘗不師生蠹沒研究道藝爲國光寵未幾山長以疲瘵充數士子以儂薄相高其所日夕明唔者無過時文帖括然率貪微末之膏火甚至有頭垂垂白不肯去者烏庫朱子有言科舉不累人人自累科舉耳夫書院非猶是也哉前考入直省鄉黨之學今另立一門

乾隆五十九年議准湖南巡撫姜晟奏掌教期滿著有成效請給議敘一摺湖南省城嶽麓書院於乾隆四十七年延請湘潭縣原任鴻臚寺少卿羅典在院訓課六年屆滿經前撫臣浦霖以該院長著有成效奏請交部照例議敘並聲明留院掌教茲又屆六年期滿查羅典學行兼優訓誨不倦實有成效今屆二次期滿應准其紀錄二次

六十年議准江蘇巡撫奏稱鎮江府屬丹陽縣江心突漲沙灘二段請撥入該縣新建鳳鳴書院收租以充膏火一摺查丹陽境內江心突漲沙灘三千五百七十三畝零先據該撫咨請撥歸鳳鳴書院管業收息以充膏火經查明書院係該縣紳士捐設與官爲經理者不同行令將前項沙地照江省無主沙灘之例召變充公茲據該撫奏稱前項沙灘實因浮出江心坍塌廢定不堪圍築成田屢召無人承買祇可召佃佈種蘆葦薄收租息復委道府勘明實在情形仍請撥歸鳳鳴書院召佃承種收租上裕國課下惠士林等語係爲教育人材嘉惠士林起見應如所請辦理其每年所收租息除完納課賦外其餘若干師生膏火作何支給亦應酌定章程分晰報部稽覈

吳省欽重建錦江書院講堂記 古術序黨庠家塾之制左右相向俱在堂以外後世太學之堂曰彙倫曰明倫郡縣則皆立明倫堂堂即學也書院與郡縣學不同始於唐盛於宋其堂曰講堂者則自漢文翁始華陽國志翁立文學精舍講堂作石室盧照鄰有文翁講堂詩是已然亦稱學堂

漢書翁脩起學堂顏師古以爲學之館舍今日學堂顏有意記翁作講堂左右開溫古時習二堂復作禮殿蓋古以周公爲先聖孔子爲先師以禮殿祀周公孔子圖七十二子像以精舍居文學祭酒典學從事司儀主事二堂居左右生復爲堂授受其業自弟子言之曰學自師言之曰講今成郡錦江書院傳自石室舊址稍東南十餘步即文廟廟故禮殿其南直府學宋祁稱石室置翁像在禮殿右廡竊疑石闕石柱在堂前室在堂後翁又不宜自置像或祁所見即高殿增立者而非翁所立室雖殿室相距不遠而以今書院爲舊講堂尤信乾隆癸巳予視學來蜀謁廟畢即登書院之堂巡試既旋秋潦致圯因捐月俸新之權臬使顧公聞而飲之糜官錢二百四十緡俾郵縣教諭張照飭材自灌口集諸生正告曰蜀學盛自翁翁好學通春秋遺張叔司馬相如等詣京師受業博士還教鄉里歐陽修所見翁石柱題名尙一百有八人相如不以經術著而凡將篇小學宗之若張叔即張寬世有張七車之目作春秋章句十五萬言聖之心在經經之傳在受在授以孝景之不任儒又郡國向未立學翁振厲絕業所治向風固宜爲循吏首特班固去翁遠足迹未至蜀如司馬遷之於吳公未及詳其名師古復不注至張崇文歷代小志始言翁翁名黨字仲翁翁之後惟朕最賢朕或作朕或作勝紀述遼曠名有顯晦異同迹有與廢惟其德長以不毀耳我朝涵濡教澤儒風丕振省會大書院多以仕而已者主之屆六年大吏上其名有異者予優敘郡縣之士升選萃處日計廩月計試揭衣隅坐先經義而後時文先行誼而後進取以聽講副主講之心雖蜀學再盛不難矣

嘉慶十年蘇州省城添建正誼書院

十六年 上謁 西陵閏三月幸蓮池書院

二十二年 諭各省教官廢棄職業懶於月課書院義學資緣推薦濫膺講席並有索取束脩身不到館者殊失慎選師資之義著該督撫學政務延經明行修之士講習討論如有庸陋之人濫竽充數者立即斥退以端教術

道光元年 諭朱勳奏籌撥書院膏火一摺陝西興安府屬七廳縣地處南山居民蕃庶向以僻處山陬文風差遜據該撫查明該府廳縣有向設書院而無膏火者有並無書院者請將該府屬入官叛產一項作為書院膏火俾資訓課著照所請辦理

二年 諭松筠奏整頓直隸書院所辦甚是各省府廳州縣分設書院原與學校相輔而行近日廢弛者多整頓者少如所稱院長並不到館及令教職兼充且有非科第出身之人覲居是席流品更為冒濫實去名存於教化有可裨益著通諭各省督撫於所屬書院務須認真稽查延請品學兼優紳士住院訓課其向不到館支取乾俸之弊永行禁止至各屬教職俱有本任課士之責嗣後不得兼充以專責成並飭所屬如有書院房屋坍塌應修之處即行修整俾各士子聚眾觀摩以收實效

又 諭左輔奏移建省城書院以復舊規一摺湖南省城南門外妙高峯下為宋儒張栻城南書院舊址康熙年間屢經修築閱時既久堂室無存前經改建城內東南隅近亦就圯且淋隘為塵不能收多士觀摩之益茲據查明原址督同屬員及紳士捐輸移建克復前賢舊規與嶽麓書院同為通省士子肄業之所洵足興崇文教樂育人材所辦甚好著准所請頒賜御書扁額摹勒懸掛用示朕加惠士林至意

又 諭徐焜奏西安駐防八旗各佐領下生員及已冠童生必須設立書院以資教導請於馬廠地租項下餘賸銀兩並存庫馬價銀內暫行借撥發商生息以為延師脩脯及月課獎賞之用等語滿洲風俗以清語騎射為重其有志讀書勤學上進者原可自得師資豈盡在官為訓課始能獲益且近來各省書院日就廢弛均係有名無實朕所深知該將軍奏請撥款設立書院行之日久必致仍屬具文於造就人才終無裨益所奏著不准行

又 諭富俊奏書院教讀乏人請改發廢員一摺據稱吉林向有白山書院八旗及民籍子弟俱在內肄業僅聘本地諸生教讀難收實效請將發遣廢員馬瑞辰改發吉林專司教讀所奏實屬謬悠之見東三省為我朝根本之地原以

清語騎射為重朕屢次申諭總期崇實黜華弓馬嫻熟俾知共守清風富俊係滿洲大員且在東三省年分最久於該處旗民本計自應遵照舊規實力講求方為不負委任乃議課生徒學習文藝必致清語日益生疏弓馬漸形嫻弱究之書院仍屬具文於造就人材毫無裨益是舍本逐末大失朕望焉現馬瑞辰係發遣黑龍江充當苦差之員何得率請改發吉林俾司課讀所奏斷不可行富俊著傳旨嚴行申飭

四年 諭趙慎畛奏閩省建設書院請賜扁額一摺福建省城鼇峰書院康熙乾隆年間均奉 御賜扁額茲據稱鼇峰之外向有共學書院一所日久圯廢疊經捐資建復改名鳳池書院並籌畫經費為修脯膏火之資俾生童一體肄業著頒賞御書扁額交該督摹勒懸掛

又 諭程祖洛奏籌議移建書院一摺河南省城大梁書院地處淋隘難以棲止據查城內舊有捐建備用官房一所堪以改建書院一切經費該撫等捐資辦理著照所請准將官房改建書院俾中州士子肄業用副朕教育人材之至意

五年 諭程含章奏請將鹽政節省工食銀兩撥給書院等語浙江鹽政衙門人役向給工食銀三千三百四十餘兩在運庫引費及藩庫存留項下支發見在鹽政改歸巡撫兼管除書吏號房存留外其餘人役裁減一半已足敷用所有此項銀兩准撥敷文崇紫陽三書院作為生童膏火獎賞之用

十一年 諭蘇成額奏書院院長六年期滿請交部議敘一摺湖南省會嶽麓書院向延前任御史歐陽厚均在院訓課迄今又滿六年始終不倦著有成效著交部議敘仍留院訓課以示鼓勵

十四年 諭給事中黃爵滋奏綜覈名實一摺朕詳加披閱書院所以育才今州縣書院率多廢圯或以無品無學之人濫充山長因循苟且視為具文著通諭各省督撫嚴飭地方官興復書院選擇山長不准以奉行虛文了事無負朕誥切語誠至意

又議准各省會書院院長令學政會同督撫公同舉報其各府縣院長由地方

官會同教官紳耆公同舉報務擇經明行修之人概不得由上司挾薦亦不得虛立院長名目並不親赴書院訓課仍令學政於案臨時稽查以昭嚴實

十五年 諭御史豫泰奏請整飭學校以勵人材著各督撫嚴飭地方官其書院房宇租田隨時修理查辦不得任意傾圮及斗胥人等蒙混侵蝕肄業生童必須嚴加甄別不得瞻徇情面濫行去取延請院長必須精擇品學兼優之士不得徇情濫薦

十八年 諭中福奏請鼓勵勸建書院捐脩出力人員一摺書院之設培養人才振興文教係各督撫地方官應辦之事烏魯木齊地處邊陲與內地各省情形不同該都統等惟常講求武備實力操防開墾屯田廣儲糧餉方合足食足兵之道其撫馭商民尤宜示以恩信俾人人知感知奮緩急有資若照各省州縣建立書院之例徒務虛名是重其所輕必至輕其所重又安望其認真訓練克盡職守耶此事勸建之初係由長清誤會諭旨並未專摺具奏宮呢揚阿到任後又未詳查奏明請旨均屬不合除長清業經身故毋庸議外宮呢揚阿著交部議處此次中福摺內並不將前此案山詳細聲敘率為承辦各員乞恩實屬冒昧著一併交部議處所有懇請鼓勵各員之處著不准行

咸豐元年 諭前經特召前任太常寺卿唐鑑來京疊次召對嘉其品學兼優器識安定欲令留京供職該員年逾七旬力陳衰老若使勉強服官轉非所以示體恤唐鑑著加恩賞給二品銜仍留江南主講書院江南為人文淵藪得老成碩學為之教導俾後進有所矜式於士習民風當有裨益也

同治二年 議准近來軍務省分各府州縣竟將書院公項藉端挪移以致肄業無人月課廢弛嗣後由各督撫嚴飭各屬於事平之後將書院膏火一項凡從前置有公項田畝者作速清理其有原存經費無存者亦當設法辦理使士子聚處觀摩庶舉業不致久荒而人心可以底定

八年 湖北學政張之洞奏設經心書院

十年 諭康國器奏重修書院請頒匾額一摺廣西省城向設秀峰宣城榕湖三書院因年久傾圮籌款興修見已工竣著南書房翰林各書匾額一方交護

撫祇領

十三年 諭張樹聲奏修復書院請頒匾額一摺江蘇省城紫陽正誼兩書院因毀於兵燹籌款興修見在先後工竣規制復舊朕親書匾額各一方交該撫祇領懸掛

光緒元年 奏准奉天府共十五城除新民廳未立學校及新設學校之昌圖岫巖二廳開原廣甯二縣向無書院外其萃德萃升書院為奉府公共錦縣凌川書院為錦府公共他如遼陽之襄平海城之塔山蓋平之辰州金州之南金鐵嶺之銀岡甯遠之柳城以及復州義州各書院均設立多年足資化導無如奉行不力日久廢弛見飭存有經費地方詳報實存若干限明嚴延師課讀以復舊制其尙存屋宇各處止須添設膏火亦飭亟為修復新設學校之昌岫二廳建立學宮存有餘款並令酌籌舉行

五年 奏准直隸山東口駐防十旗與土著人民戶口繁盛惟讀書之家頗少見經察哈爾都統率同旗漢官紳捐造掄才書院由都統及廳縣輪期考課督率紳董認真辦理

六年 奏准江甯駐防於營內擇一官所改為崇文書院延請主講每月除在署局試外仍飭生童赴院肄業

七年 修復黔省 文廟書院從巡撫岑毓英之請也又修復江南鍾山書院從兩江總督劉坤一之請也

九年 奏准江西鹿洞書院在司庫等銀一萬一千兩以一萬發典生息存書院膏火經費以一千作修理經費

又 諭御史陳啟泰奏請整飭學校一摺各省書院為培植人材而設必須院長得人方足以資模楷若如所奏請託干求流弊滋多以致有名無實嗣後書院院長均著由地方官紳自行延訪品學兼優之人各該上司概不准徇情薦薦以杜弊端

又 左宗棠奏 前接江蘇學政黃體芳緝稱江陰縣建經古書院名曰南菁仿請經精舍之例專課通省經古惟經費不敷落成有待請撥款接濟並常年膏

火之資_臣以冊建書院係嘉惠士林起見捐廉一千兩佐書院工料之費並准北票費項下提銀二萬兩解由學臣飭江陰縣發商生息以爲每年膏火之資年終結算申報學臣移咨_臣署備案

又江西巡撫潘蔚奏前奉 諭修白鹿洞書院並與學臣商酌擬整頓各府州縣書院添給膏火以慰士林而重學校以本省之錢爲地方之用亦屬萬不可緩

_臣謹案書院肇自唐開元中與古石室精舍相似而不同始東宮麗正殿藏經籍置修書院已而大明宮外冊集賢書院學士通籍出入蓋用以廣購求事校讐也逮宋嵩陽廬卓嶽麗陽踵起設立以居生徒而白鹿洞經朱子設教尤足爲同學之津梁明郭瑄輯白鹿洞志簡略未備 國初廖文英重修燬於火星子縣知縣毛德琦補輯自宋以逮我 朝興復沿革藏書祀典學田藝文及先正格言靡不畢搜書凡十九卷道光時廉州何太守取此志第六至第八卷所集歷來主洞諸先哲學規別刊一集桐城方東樹序稱朱子集羣儒之大成使斯道昭明如日中天其遺文教澤一字一言皆如布帛菽粟必欲興起人心風俗莫如崇朱子之學爲切云此書外間罕親覽者當有留存整頓書院大可刊印廣布奉爲繩墨於以復古道而成善俗豈不懿哉

十一年兵部尙書彭玉麟奏_臣本籍衡陽士紳奉前學臣朱道然而論册建船山書院於南城外擇師主講已閱一年因院地逼近城市湫隘舊廡殊不足以安絃誦復由_臣捐資改建於湘水中之東洲查船山爲前明遺臣王夫之隱居地在衡陽蒸水左岸夫之爲崇禎十五年舉人逢亂不赴會試明年流寇張獻忠陷衡州迫脅士類從亂不降者投之湘江夫之走匿南嶽賊執其父朝聘爲質以索之夫之因自刺兩臂作重創昇往易父賊乃俱免之順治三年明桂藩子永明王由榔號稱興其大學士瞿式耜疏薦夫之於桂授行人司行人屢疏劾王化澄等幾陷不測康熙十八年吳三桂僭號於衡覓夫之作勸進表夫之潛逃去後乃隱居石船山築土室著書其中學者稱船山先生 聖清大定

巡撫鄭端聞夫之曾拒僞命又爲我 朝貞士屬郡守鍊粟帛請見夫之受粟返帛辭不見年七十四卒所著書四百餘卷其論學以漢儒爲門戶以宋五子爲堂奧尤神契張載之說作正蒙釋義與所著思問錄內外篇互相發明論者謂我 朝鉅儒輩出或攻良知捷獲之說或辨易圖之鑿或詳考名物訓詁音韻正詩集傳之疏或修補三禮時享之儀號爲卓絕而夫之皆已發之於前與後賢若合符契不愧命世獨出之君子_臣案夫之當時海內碩儒北有孫奇逢西有李中孚東南則黃宗羲顧炎武雖皆肥遯自甘力辭徵辟然蕙紳多從之游著述亦行於世名稱彰獨夫之匿迹韜聲不欲身隱而文著故世亦鮮知之者沒後四十年督學潘宗洛稍訪求其遺書泊乾隆中 四庫館開而夫之所著易詩書春秋諸經釋疏始備著錄 聖朝闡幽崇賢列夫之於儒林傳於是天下始知其名學臣朱道然既册立書院講明夫之之學兩江督臣曾國荃復將家藏所刻船山遺書三百二十二卷板片捐置書院又捐助膏獎銀兩嘉惠來學_臣與夫之生同里開親讀其書私淑其人敢不勉竭綿薄力任重建書院之舉惟是該書院係集衡永郴桂府州所屬舉貢生監肄業其中則凡延聘師儒甄別生徒整飭院規給發膏獎皆應歸衡州分巡道主持其事其肄業生先由巡道札飭各府縣及各學公同詳慎舉報出具切實考語送道應試每年定期二月初旬由道甄別一次覆試以定取錄課分超特一三等級定額無多載在章程內俟經費稍足再行推廣至書院掌教山長應聘何人不得以借才異地爲嫌及外省籍貫皆可惟擇學問品望素優者由本籍士紳商請巡道關聘仍由巡道轉達學政不得徇私由人濫薦亦不得掌教不到院致送乾脩以昭鄭重而節虛糜當此海氛不靖異教龐雜補救之術惟在扶植人才出膺艱鉅而人才之賢否端賴學校之陶成_臣以諸生遭際 聖明忝竊非分無濟時艱所望二三豪俊景仰鄉賢乘時奮勉養其正氣儲爲通才是_臣區區之私心所竊願者可否懇 恩飭湖南撫臣學臣札衡永道將船山書院一切應辦事宜妥議舉行實於興學育才之道不無裨益其南城書院舊址改作船山祠宇祀夫之粟主其中請 旨飭有司春秋致祭俾士民有所觀感而昭激勵

又頒 御書屬於河南嵩陽書院從學政邵松年之請也

十三年奏准廣東省城西北五里源頭鄉勸建廣雅書院合課兩廣諸生撥款息款共得銀七萬七千一百五十兩充膏火薪水各項經費

又兩廣總督張之洞奏略稱准總署咨開此次小呂宋新設領事薪俸經費妥籌辦法 體察情形小呂宋領事派定後第一年經費先行核給令該領事將歲收册照各費報明抵還第二年後不費公帑就餘款酌撥若干量設書院一所購置經書發給存儲令各該領事紳董選擇流寓儒士以爲之師隨時爲華人士子弟講授使習聞聖人之教則聰明志氣得以擴充而愈開水源木本之思益將深固得 旨該衙門議奏

十六年湖廣總督張之洞辦兩湖書院次年具奏

二十年河南勸建明道書院

二十三年浙江巡撫廖壽豐奏略稱查杭州省城舊有數文崇文紫陽學海詩經東城書院六所今方以制藝取士勢難驟爲更張另設則無此經費惟有酌籌改併因勢利導擇有志之士獎進而培植之庶趨向端而成就易泰西各學門徑甚多每以兵農工商化驗製造可切於時用而算學則其階梯語言文字乃從入之門非博通格致不得謂之學成 臣會商紳董就普慈寺後見有羣屋量加修治專設一院名曰求是書院委杭州府知府林啟爲總辦延一西人爲正教習授各種西學華教習二人副之一授西文一授算學委監院一人管理院事由紳士保送年二十以內之舉貢生監飭該總辦考取覆試接見詢問擇其行誼篤實文理優長平日究心時務而無嗜好習氣者送院肄業但予獎賞不給膏火學以五年爲限明定規約安立課程每日肄業之暇令泛覽經史國朝掌故及中外報紙務期明體達用以孔孟程朱爲宗旨將有得之處撰爲日記按旬彙送查考年終由 臣通校各藝分別等第勤者獎惰者罰不率教者斥優異者存記另選繙譯之人譯各種有用之書爲振興學校之助常年經費需銀五千餘兩購置儀器圖籍暨學生紙筆一切雜用不在此數當此開辦之始規模不敢過侈俟經費稍充再圖展拓

又陝西巡撫魏光燾奏略稱前撫臣張汝梅奏請勸建格致實學書院度地於涇陽縣治前學臣許振禱奏建味經書院之側工竣驗收料尙堅實規模亦覺闊敞四周餘地甚多可爲將來推廣學舍及講求製造之用擬命名曰崇實書院中分四齋曰致遠齋以周易四書孝經爲本先儒性理諸書附之兼考外國教務風俗人情而致力於格致各學以儲明體達用之材曰學古齋以書經春秋三傳爲本歷代史鑑紀事附之兼講外國古今時局政治並刑律公法條約以備奉使折衝之選曰求志齋以三禮爲本正續三通及國朝掌故之書附之兼外國水陸兵法輿地農學礦務以培濟世經邦之略曰興藝齋以詩經爾雅爲本周秦諸子及訓詁考據諸書附之兼習外國語言文字並推算測量遞及汽化聲光各學以裕制器尙象之源每齋先設肄業生十五名由學臣於歲科兩試調取年二十四歲以內心地誠篤資性聰明之生員分齋肄習漸次推廣以每齋四十人爲定額齋學長一人司分教之任山長一席茲有主講味經書院咸陽縣舉人劉光賁品高學邃留心經世於格致各學夙所講求可以兼掌此席將來經費稍充生徒加衆或專訂或另延再當斟酌辦理至肄業生擬月給膏火銀二兩五錢每日早起講習中學二時考求西學二時中有所得則撰爲劄記朔望送山長校閱季終送學政評次而殿最焉每月由督撫學政司道各官輪流課試其學業精通才能卓越者應遵總理衙門奏定章程由督撫學政會考保送以備器使

又山西巡撫胡聘之奏請變通書院章程

二十五年湖南巡撫俞廉三奏湖南省城設立求實書院

二十六年 諭書院與學校相輔而行常年脩脯膏獎地方皆儲有的款足爲經久之計尤宜責成地方官認真整頓慎選名師嚴定教士之法勤求有用之學師道立而善人多遠近自必聞風景附經此申諭之後各省督撫學政務宜將學校書院加意整頓責成教官山長痛除積習勤思教育其有師訓不職主講不稱者隨時撤參以示懲儆用副朝廷維持士習培植根本至意

三十三年湖廣總督張之洞奏將湖北經心書院改爲存古學堂

皇朝續文獻通考卷一百一

學校考八 圖書

臣謹案我 朝尊儒重學稽古右文上騰東壁之輝下逮西崑之府淵源
河洛啟發篇章嘉惠士林超邁前古 皇朝通考於 頒發書籍雜入太
學鄉黨之學而臣下進呈著作又載選舉攷考課門似未盡一茲立圖書
專門併歸一類眉目較清而以學堂編輯教科書附焉

乾隆五十五年 諭四庫全書查萃古今載籍至為美備不特內府珍藏藉資
乙覽亦欲以流傳廣播沾溉藝林前因卷頁浩繁中多舛錯特令總纂等復加
詳細讎校俾無魯魚亥豕之訛茲已釐訂蒞工悉臻完善所有江浙兩省文宗
文匯文淵三閣應貯全書見在陸續頒發藏皮該處為人文淵藪嗜古好學之
士自必羣思博覽藉廣見聞從前曾經降旨准其赴閣檢視鈔錄用資蒐討但
地方有司恐士子等繕閱汚損或至過為珍秘阻其爭先快靚之忱則所頒三
分全書亦僅束之高閣轉非朕授輯羣書津逮學髦之思即武英殿聚珍板諸
書排印無多恐士子等亦未能全行購買著該督撫等諄飭所屬俟貯閣全書
排架齊集後諭令該省士子有願讀中秘書者許其呈明到閣鈔閱但不得任
其私自攜歸以致稍有遺失至文淵等閣禁地森嚴士人等固不便進內鈔閱
但翰林院見有存貯底本如有情殷誦習者亦許其就近檢錄掌院不得勒阻
留難如此廣為傳播俾茹古者得睹生平未見互為鈔錄傳之日久使石渠天
祿之藏無不家絃戶誦益昭右文稽古嘉惠士林盛事不亦善乎
五十八年 諭安徽巡撫朱珪進御製說經古文閱其後跋頌皆過當但歷舉
朕敬 天法 祖勤政愛民各大端見諸設施者與平日闡發經義實有符合
語皆紀實並非泛為諛詞我世世子孫果能善繼善述欽承法守學於古訓見
諸躬行以朕之心為心以朕之政為政則是國家億萬年無疆之庥朕於茲有
厚望焉此冊著諸皇子及皇孫繇恩各繕寫一部並將此旨冠於簡端將來頒
設諸處以垂久遠至朱珪於御製古文細釋推闡能見其大跋語尤得體要殊
屬可嘉著賞給筆墨等件以示獎勵

五十九年 諭九月開石經館大臣等奏士子所讀經書多係坊本舛謬衍缺
不一而足近因刊刻石經出內府所弄天祿琳瑯宋版各經命 臣等詳悉校對
與武英殿官刻諸書參稽印證逐條摘出釐訂成編書不過六册而俗本相沿
譌謬靡不開卷瞭然擬名考文提要請頒行天下於乙卯科鄉試為始三科後
儘再有沿用坊監本以致外誤者將考官士子分別議處停科朕已允行茲該
館書成呈覽抽閱數條不過字句書體間有異同於聖賢經義初無出入士子
等操觚構藝惟期闢發經旨亦不必以一二字之增損偏旁之同異為去取也
又 諭原任禮部侍郎胡煦著志讀書究心理學著有周易函書探入四庫全
書經部尚為績學之臣著加恩補行賜諡以示眷念著舊獎勵儒臣至意尋予
諡文良
六十年 奏准貴德廳新設學宮所有存貯書籍應准其照循化廳之例頒給
文廟樂章並祭禮儀節 上諭 御製詩文集 御纂周易述義詩義折中春
秋直解 欽定春秋三禮義疏 欽定鄉會墨選 欽定書經傳說四書解義
性理精義朱子全書等項書籍分別存貯流傳交代以廣誦習
嘉慶九年以文淵閣度藏書籍見有續增歸架各册增設校理四員協同武英
殿纂修各員校對
十一年 諭御史葉紹楨奏請續編皇清文類以光文治一摺我 朝重熙累
洽邦治同文康熙四十八年編集皇清文類乾隆年間重加纂輯卷首恭載
列聖聖製次附廷臣賦頌各體書成以後 皇考高宗純皇帝聖製詩文集共
編五百四十餘卷朕景紹 前徽亦每有因文見道之作而六十餘年以來親
藩王公以逮臣工等奏御篇目其和聲鳴盛堪備採擇者積而愈多允宜續加
哀集宣布藝林著俟恭纂 實錄告成後開館編纂
十三年 諭朕惟農桑為致治之原我朝 列聖相承惠愛黎元勤思本業
聖祖詔刊耕織圖四十六幅作為詩章分冠其上 皇祖依題成什 皇考繼
和 元韻均以 聖祖之心為心敬念民依後先同揆乾隆二年曾 命纂輯
授時通考內列耕織圖二卷朕紹承 前烈日以民生為念近於幾暇續題耕

織圖成五言律詩四十六章檢閱授時通考係刊於乾隆七年其耕織圖卷內恭載 聖祖御製於前次列 世宗御製又次列 皇考御製則書 皇帝御製當時體例應然今朕續有題詠應補行編載著交文穎館總裁等恭查耕織圖各幅前 皇考御製詩改書 高宗純皇帝御製恭和 聖祖仁皇帝原韻再將朕詩列後標目書皇帝御製繕冊進呈交武英殿補刊以示重民務本至意

又 諭內府舊藏全唐文卷帙闕富於有唐一代帝王以迄士庶所著各體文採輯大備洵為藝苑鉅觀敬思 聖祖仁皇帝欽定全唐詩風行海寓操觚家獲視初盛中晚源流有裨詩教甚大茲全唐文奔歲中祕外開承學之士無由與窺美備允宜頒示寰瀛以昭盛軌著將此書交文穎館通行鈔錄並詳稽載籍有應補入者一體編輯校勘完善進呈覽後刊刻頒行用副朕嘉惠士林至意

又 諭朕勤求民事念切授衣編氓禦寒所需惟棉之用最廣從前 聖祖仁皇帝曾製木棉賦迨乾隆年間直隸總督方觀承恭繪棉花圖撰說進呈 皇考高宗純皇帝嘉覽之餘按其圖說十六事 親製詩章體物抒吟功用悉備朕紹衣 先烈敬念民依近於幾暇敬依 皇考聖製原韻作詩十六首誠以衣被之原講求宜切生民日用所繫實與稼穡蠶桑並崇本業著交文穎館敬謹輯為一書命名授衣廣訓首載 聖祖聖製賦次載 皇考聖製詩再將朕御製和韻詩載入其方觀承所進圖幅並發交如意館做照鈎摹同原冊所進圖說等件一併存載俟書成呈覽刊刻頒行以垂永久

又 諭試用通判王履泰於回鑾途次恭進編輯畿輔安瀾志六函當令董誥等公同閱看具奏朕覆加披覽於直隸通省河道原委辨證明晰並將古今修防事實詳悉登載足資參考尚屬有用之書著武英殿用聚珍板排印以備頒賞王履泰著發往直隸以通判即補交溫承惠遇有應辦水利事宜差遣委用十四年 頒發書籍於盛京各學 聖祖仁皇帝文集 世祖憲皇帝文集 聖諭廣訓 硃批諭旨 御製樂善堂全集定本 高宗純皇帝文集 高宗

純皇帝詩集 御製日知薈說 御纂周易折中 欽定書經傳說彙纂 欽

定詩經傳說彙纂 欽定春秋傳說彙纂 日講易經解義 日講書經解義

日講春秋解義 日講禮記解義 日講四書解義 欽定周官義疏 欽

定儀禮義疏 御註孝經 御定孝經集註 御定孝經衍義 御纂周易述

義 御纂詩義折中 御纂春秋直解 御定音韻闡微 御定康熙字典

御批資治通鑑綱目 御製評鑑綱要 御製薩爾濟戰書事 御纂朱子全

書 御纂性理精義 御定子史精華 御定淵鑑類函 御定佩文韻府

御定韻府拾遺 御定全唐詩 御選古文淵鑑 御選唐宋文醇 御選唐

宋詩醇 欽定四書文 欽定增訂清文鑑 欽定滿州蒙古文鑑 欽定同

文韻統 欽定清漢對音字式 御製繙譯四書 御製繙譯五經 欽定大

清通禮 欽定皇朝禮器圖式 御製味餘書室全集 御製詩初集周易註

疏尚書註疏毛詩註疏左傳註疏公羊註疏穀梁註疏周禮註疏儀禮註疏禮

記註疏論語註疏孟子註疏孝經註疏爾雅註疏史記漢書後漢書三國志晉

書宋書南齊書梁書陳書魏書北齊書周書隋書南史北史舊唐書新唐書五

代史宋史遼史金史元史明史通志文獻通考

十五年 諭御史伯依保奏請禁小說一摺坊本小說無非好勇鬪狠穢蕪不

端之事在稍知自愛者尚不為其所惑而無知之徒一經入目往往被其牽誘

於風俗人心殊有關繫本干例禁但日久奉行不力而市賈又以此刊刻取利

其名目尚不止如該御史所奏數種著五城御史出示曉諭禁止如有此等刻

本即行銷燬亦不得令吏胥等藉端投查致有滋擾

十七年 諭御史王澤奏請刊刻治河方略以重河防一摺著交文穎館敬司

其事即行文在京各衙門及河道總督湖自康熙以來凡歷次河工所奉 聖

諭及大小臣工條議足資參考者俱詳查繕錄造冊移咨該館並令江南河東

河道總督將河湖堤堰等工分晰繪圖附冊咨送俟各項冊籍略備即奏請簡

派總裁遴員修輯進呈後刊刻頒行以垂久遠

十八年 諭生員鮑廷博於乾隆年間恭進書籍其藏書之知不足齋仰蒙

高宗純皇帝寵以詩章朕亦曾加題詠復據浙江巡撫方受疇代進所刻知不足齋叢書第二十六集鮑廷博年逾八旬好古積學老而不倦著加恩賞給舉人俾其世衍書香廣刊秘籍亦藝林之勝事也

二十年 諭乾隆年間曾纂輯秘殿珠林石渠寶笈正續二編所有 列聖宸翰暨古今臣工書畫業經繕寫成書尊藏秘閣茲查續編成於乾隆癸丑迄今二十三年 皇考染翰揮毫收藏內府者又積至千有餘件朕幾暇怡情惟以翰墨爲事閱時既久卷帙亦繁應一併詮次用志歲月至內外臣工祝嘏抒誠所進古今書畫亦復不少允宜遵照前書定例重爲遴選昭示來茲

道光三年 諭原任直隸水利營田觀察使陳儀著有直隸河渠志於畿輔諸水沿波討源而於永定河議論尤詳又據御史余文銓將陳儀文集進呈內載文安河隄事宜四河兩淀私議永定引河口私議治河蠡測篇似有所見朕前派張文浩等會同蔣攸銛將南北運河並永定大清漕汴各河情形悉心查勘通籌全局近又命辦理永定河堵築事宜特發去直隸河渠志一册及陳儀文集直隸河道事宜一本著詳悉查閱以備考證

四年頒 御製養正書屋全集於國子監

五年 諭已革御史捐納員外郎蔣詩呈進畿輔水利志一百卷著交蔣攸銛詳細閱看如有可採擇據實具奏

又頒發吉林開國方略八旗民俗通考盛京通志清文大清律例 御定淵鑑類函康濟錄耕織圖清字四書清字五經蒙古文 聖諭廣訓

十一年重修康熙字典成

十九年 諭前據署兩江總督陳楚署江蘇巡撫裕謙江蘇學政祁雋藻奏請飭下儒臣敬謹推闡 聖諭廣訓內黜異端以崇正學一條擬撰有韻之文頒發各省當經降旨著翰林院敬謹撰擬茲奉院學士等進呈四言韻文一篇朕詳加披閱足以闡明 聖訓啟迪愚蒙著禮部即頒行各省學政恭書刊刻備頒鄉塾俾民間童蒙誦習激發良知涵育薰陶風俗蒸蒸日上朕實有厚望焉二十二年重修大清一統志成 御製序文

咸豐元年陸建瀛奏恭刊 御纂性理精義 聖諭廣訓直解進呈 又 諭禮部奏江蘇舉人彭縣訓導朱駿聲呈遞說文通訓定聲一書朕幾餘披覽引證尙爲賅洽頗於小學有裨朱駿聲著賞加國子監博士銜以爲留心經訓者勸

三年 諭禮部奏福建舉人林昌彝呈進三禮通釋一書留心經訓徵引詳明著以教授歸部選用以示獎勵

又 諭前太常寺卿唐鑑呈進畿輔水利備覽朕詳加披閱於西北水利言之甚悉其水道各圖按照各府州縣條分縷晰亦極詳覈近年東南各省漕務疲敝若畿輔地方廣興水利於國計民生大有裨益著桂良於直隸軍務告竣時悉心體察各屬地勢酌度情形派明幹大員前往履勘妥爲籌辦畿輔水利備覽十二本著發給閱看

六年 諭繙譯孝經係雍正年間編輯爲八旗各項考試命題之本向無清文漢字合寫成書且其時滿州新語未備書中音義皆係舊語見在各省駐防鄉試童試舉行繙譯已歷有年在京各項考試尤爲八旗士子進身之階誠恐循誦習傳不免參差簡略朕詳加校閱遵乾隆年間 欽定繙譯五經新語悉加釐定著武英殿刊刻清文漢字合璧成書頒行中外俾各士子講習有資用昭法守

又 諭前據大學士文慶等進呈前任巴里坤領隊大臣孟保繙譯大學衍義一書均遵乾隆 欽定繙譯四書五經通鑑各案新語詳加釐定因思宋臣真德秀此書彙集經史考證得失於聖學治道均有發明康熙十一年 聖祖特命繙譯頒行顧其時滿洲新語未備引用經史皆係舊語對音切字有未經繙譯成文者又祇清文單行未及增註漢字今既引用新語又成滿漢合璧開卷瞭然洵足爲士子編摩之助著將刊板交武英殿印行俾在京八旗及各省駐防同資講肄用副朕稽古同文至意

同治元年 諭前據禮部奏廣東舉人揀選知縣桂文燦呈遞經學叢書四函當交南書房翰林詳加閱看進呈該舉人所呈各種考證箋註均尙詳明羣經

補正一編於近儒惠棟戴震段玉裁王念孫諸經說多所糾正蒼萃衆家確有依據具見潛心研究之功惟古人通經致用總以躬行實踐爲歸經師人師合爲一致方能羽翼聖經無慚名教箋註始於漢儒而鄭康成行誼篤實鄉愚感化至以鄭公名其鄉其他經明行修者尤指不勝屈可見讀書明理必須體用兼備不徒以記誦訓詁見長也桂文燦既能潛心古訓不蹈浮靡之習務當益加刻勵身體力行勉爲有體有用之學以備國家任使書留覽

三年兩江總督曾國藩遵繪長江圖說進呈

六年鑲白旗蒙古副都統孟保疏進繙譯醒世要言命武英殿印頒八旗各學

又 諭禮部增修學政全書

又 諭鮑源深奏請飭刊刻書籍頒發各學一摺江蘇等省自遭兵燹以後各府州縣學中舊藏書籍大半散佚經史版片亦皆毀失無存見在地方已就肅清亟應振興文教士子有志讀書而載籍難於購覓其何以資講貫而惠藝林著各省督撫轉飭所屬將舊存學中書籍廣爲購補並將 列聖御纂欽定經史各書先行敬謹重刊頒發各學並准書肆刷印以廣流傳俾各省士子得所研求同敦實學用副朝廷教育人才至意

又奏准浙江省自遭兵燹從前算經閩文淵閣所存書籍俱已毀失見在省設局重刊 欽定七經 御批通鑑 御選古文淵鑑等書其餘學問經濟所必需者隨時訪取善本陸續發刊

七年 諭丁日昌奏設局刊刻收令各書一摺州縣爲親民之官地方之安危繫之丁日昌見擬編刊收令各書頒發所屬即著實力奉行俾各州縣得所效法其小學經史等編有裨學校者並著陸續刊刻廣爲流布至邪說傳奇爲風俗人心之害自應嚴行禁止著各省督撫飭屬一體查禁焚毀不准坊肆售賣以端士習而正民心

又 諭前據侍郎胡肇智呈進前任安徽潁州府教授夏忻恭繕 聖諭十六條附律易解一卷暨所撰權弓辨誣三卷述朱質疑十六卷當交南書房翰林閱看據稱該員所輯附律易解尙得周官與民讀法遺意用於講約甚有裨益

其權弓辨誣述朱質疑二書亦均能有所發明該員年屆耄耄篤學不倦其屬可嘉即著武英殿將該員所繕 聖諭十六條附律易解刊刻頒發其權弓辨誣述朱質疑兩書均著留覽

八年奏准湖北省開設書局重刊四書十三經原註讀本爲童蒙肄業之資其餘訪覓善本次第開雕再浙江江甯蘇州湖北四省公議合刻二十四史頒發各學書院並准書賈隨時刷印以廣流傳

九年 諭前據詹事府詹事夏同善通政使司副使朱智鴻臚寺少卿許庚身呈進前內閣中書張應昌所著春秋屬辭辨例編八十卷當交南書房翰林閱看據稱所著原本宋儒兼及衆說附按語亦頗詳審該員者年好學甚屬可嘉所進之書即著留覽

又 諭御史吳鳳藻奏明儒呂坤所著實政錄最爲吏治鍼砭見在江南湖北浙江等省均開書局請飭刊刻等語著該省督撫於刊刻經史之餘即刻呂坤實政錄廣爲流布俾收實效而飭官方

又議准已開書局省分令該督撫將朱子小學一書刊刻以廣流傳而資誦習十年 諭御史劉瑞祺奏請銷燬小說書版一摺坊本小說例禁甚嚴近來各省書肆竟敢違禁刊刻公然售賣於風俗人心殊有關繫亟應嚴行查禁著各省督撫府尹飭屬查明應禁各書嚴切曉示將書版全行收毀不准再行編造刊印亦不得任聽吏胥藉端搜查致涉騷擾

謹案漢藝文志小說者流蓋出於稗官傳曰雖小道必有可觀者焉致遠恐泥是以君子不爲也近來歐洲各國小說風靡羣以爲民智之開與有力焉俄國大文豪託爾斯泰則尤以小說鳴一時然要皆於世道人心廩廩焉爲之防吾國小說不出誨盜誨淫兩種恣意鼓吹徒惑衆聽蓋有不容不嚴禁者矣

十一年恭親王等恭進纂輯勦平粵匪方略四百二十卷勦平捻匪方略二百二十卷

光緒四年 諭前據都察院奏主事楊恩海等呈進伊補楊景仁所輯濟編

二函當交南書房翰林閱看據稱是書於荒政事宜極爲詳備實爲有用之書見稱開雕將竣著沈葆楨吳元炳酌印若干咨行各省用裨荒政

七年修復浙江省文淵閣頒發 欽定勦平粵匪方略

又 諭前據潘祖蔭翁同龢呈進已故孝廉方正江蘇貢生陳奐所著毛詩傳疏一書當交南書房翰林閱看據稱陳奐於嘉慶道光年間積三十年之功乃成此書篤守毛氏專力研求無過之者該貢生研精詩學於毛亨訓詁頗能闡發洵屬有裨經義所進之書即著留覽

又順天府府尹游百川疏進故戶部主事郝懿行著春秋比事屬辭記春秋說略爾雅義疏山海經箋疏四種 上嘉納之

九年 諭都察院奏續修會典事例請飭妥議開館章程一摺續修會典必須各衙門則例修輯完備方能編纂成書著各該堂官等督飭司員將所有稿件悉心編次俟一律告竣再降諭旨

十四年 諭瞿鴻機奏前廣東高廉道陸心源因國子監廣求書籍選擇家藏舊書一百五十種計二千四百餘卷附以所刊叢書等三百餘卷願行捐送到監據稱陸心源自解官後刊校古書潛心著述茲復慨捐羣籍洵屬稽古尙義伊子廩生陸樹藩附生陸樹屏均著賞給國子監學正銜以示嘉獎

十五年 諭翰林院編修王懿榮呈請續修四庫全書並臚陳本朝儒臣所撰十三經疏義請飭取列學官各一摺著俟會典纂輯告成後由翰林院奏明請旨

又兩廣總督張之洞奏請頒廣雅書院扁額略稱廣東省會冊建廣雅書院選調兩省士子肄業其中嚴定學規慎防流弊分經史理學經濟四門隨其性之所近而習之各立課程日記以便考核兩省肄業生額定各百名人數衆多添設分教四人分門講授至策勵品行考察勤惰院長實總其成 於公餘之暇閒詣書院考業稽疑時加訓勉先之以嚴辨義利課之以博約兼資大旨欲力救漢學宋學之偏痛戒有文無行之弊兩年以來才俊輩出造就斐然其餘亦多恪守院規不蹈陋習十年以後人才必大有可觀竊惟嶺海雄博本多秀傑

之才近來華洋錯處事雜言囂習俗所移其志趣凡下者多存希圖倖獲之念其才智穎悟者或有歧於異學之憂 臣設立書院之舉竊欲鼓舞士類維持世風上者闡明聖道砥礪名節博古通今明習時務期於體用兼備儲爲國家植幹之材次者亦能圭璧躬躬拘拘鄉黨不染浮囂近利習氣足以淑身化俗士習既善民風因之伏惟我朝崇儒重道 列聖典學右文各省會書院多蒙發帑興修贈給諸生膏火江蘇之紫陽書院浙江之敷文崇文兩書院福建之紫峯書院均蒙 聖祖頒給御書扁額其江蘇福建之紫陽紫峯兩書院重蒙 高宗頒賜扁額同治年間福建册立正誼書院江蘇重建正誼紫陽兩書院復蒙 穆宗俯允疆臣之請頒發御書扁額欽 列聖宸翰之昭垂示多士訓行之正軌人文日盛厥有由來今粵東册建廣雅書院事同一律懇 恩頒發御書扁額垂範士林以正學術而勵儒修

十六年山東巡撫張曜奏雍正七年 命各省重修通志上諸史館山東通志卽於是時開局排纂至乾隆元年造成迄今又閱一百五十餘年文獻所關久未編輯比年 畿輔與安徽湖北各省通志均已先後成書山東夙稱文物之區雖疊經兵燹册籍不無散佚然及今搜輯尙易爲力所需經費當與司道各官捐廉備用

二十年以纂輯平定陝甘新疆回匪方略三百二十卷平定雲南回匪方略五十卷平定貴州苗匪方略四十卷全書告成予世鐸等優敘有差

二十二年李端棻奏略稱廣設藏書樓好學之士半屬寒畯購書既苦無力借書又難其人坐此孤陋寡聞無所成就者不知凡幾 高宗純皇帝知其然也特於江南設文宗文匯文瀾三閣備度祕籍恣人借觀嘉慶開大學士阮元推廣此意在焦山靈隱起立書藏津逮後學自此以往江浙文風甲於天下作人之盛成效可觀也今請依乾隆故事更加增廣自 京師及直省省會咸設大書樓調 殿版及各官書局所刻書籍暨同文館製造局所譯西法按部分送各省以實之其或有切用之書爲民間刻本官局所無者開列清單徐行購補其西學陸續譯出者譯局隨時咨送妥定章程許人入樓看讀由地方官擇好

學解事之人經理其事則向之無書可讀者皆得自勉於學無爲棄才矣古今中外有用之書官書局有刻本者居十之七八每局酌提數部分送各省其費至省其事至順一奉 明詔事即立辦而餉遺學者增益人才其益非淺鮮也二十四年 諭翰林院侍講黃紹箕呈進張之洞所著勸學篇詳加披覽持論平正通達於學術人心大有裨益著將所備副本四十部由軍機處頒發各省廣爲刊布實力勸導以重正教而杜危言

二十五年 諭前據兵部右侍郎李端遇呈進安徽婺源縣已故生員汪紱所著各書當交南書房翰林閱看茲據閱訖呈覽汪紱學問淵博經術湛深所著易經論義易經如話書經論義禮記章句禮記或問六禮或問樂經律呂通統樂經事啟春秋集傳四書論義孝經章句或問山海經存策略戊笈談兵醫林纂要各書並遺書十二種著交懋勤殿以備觀覽

三十一年湖南巡撫龐鴻書奏建設圖書館略謂查東西各國都會莫不設有圖書館所以度藏羣籍輸進文明於勸學育才大有裨益湘省各屬學堂雖已次第建設然科學未備教員所編講義又皆各以意取亟應詳加校訂參酌通行教科書及東西洋已譯未譯各科善本萃成帙頒行通用以收一道同風之效其各省新編新譯與夫從前官私著述苟可裨益教育皆宜旁搜博引以備調查編輯之需建設圖書館萬不可緩前撫臣趙爾巽在省垣漢長沙定王臺册設由各紳捐置圖籍款項無多規模尙隘上年撫臣端方始委員赴日本調查並購求書籍延訂素有名望學識兼長者分任纂修各事飭善後釐金局籌開辦費銀一萬兩再撥常年款一千二百兩辦理甫有端倪適值交卸臣接任後疊與學務處司道籌商以定王臺原址狹隘非購民屋另造不足以壯觀瞻添撥開辦費五千兩造就藏書樓一所計三層縱橫面積四十丈閱覽四所縱橫二十四丈外更有買卷繳卷處領書處等屋見已一律告竣所購日本圖書亦經運到當飭編明書目擬定章程遴委監督以董其成添派分校繕校收掌提調各紳員薪水銀均由善後局核實開支刊發木質關防文曰湖南圖書館之關防俾昭信用湘省始基初肇仍應寬籌長款以圖擴充

又學務處奏據編書局監督翰林院侍讀學士黃紹箕咨稱查初等小學堂章程歷史輿地格致三科均就鄉土編課用意至爲精善謹照定章編成例目懇請 飭下各省督撫發交各府廳州縣擇士紳中博學能文者按月考查依例采錄地近則易詳事分則易舉自奉文日始限一年成書由地方官逕將清本郵寄京師編書局一面錄副詳報本省督撫庶免轉折遲延並令各省地方官先將本省通志及府廳州縣志郵寄編書局以資參考各處鄉土志輯稿送到由局員刪潤畫一呈請學務大臣審定通行各省小學堂授課等察核各節均爲編輯課本力求翔實起見謹附片具陳

又覆奏出使大臣孫寶琦摺略稱查籌辦小學堂定章每半年由督撫彙咨學務大臣以憑察核編書局纂輯中小學課本自監督黃紹箕接辦後重訂章程派員分纂所有各種課本初稿漸具其編輯大旨視學堂之程度爲課本之深淺以學堂之年限分課本之繁簡一再研求務適於用各省呈送編譯教科書亦經訂有審定專章酌量採用應請照章辦理毋庸另議

三十二年學部咨蘇撫審定陳志堅最新詳闡微積教科書爲參考用書三十二年安徽巡撫馮煦奏采訪皖省遺書略謂方今泰東西各國相競以智相勝以學不獨技藝專門確有心得即心理算術輿地歷史法律兵略亦多深造標新領異駸駸與吾國先民代相雄長圖書之館凡大都會所在有之夫泰東西之舉不過竊吾緒餘猶足頡頏一世而我國乃棄其典章文物會不愛重何其候也 謹揭斯義與皖之官吏士民相質證采先儒窮理之書以端本考歷代經世之書以致用政教相通千古不易矧皖省襟帶江淮苞絡瀟霍夙爲人文淵藪 國朝右文皖才尤盛性理若宣城施閏章婺源汪紱考據若婺源江永休甯戴震欽金榜凌廷堪績溪胡培翬歙正堂當塗徐文靖詞章若桐城方苞姚鼐涇朱琦包世臣算術若宣城梅文鼎暨其孫穀成欽汪未或綜貫遺經或闡明絕學凡所述作固已彪炳宙合其他抱潛德而弗彰守遺編以終老者尤不乏人以至金石之錄垂爲世珍諸史賴其折衷羣經得其通假是皆後學之津梁政治之鴻祕也網羅萃故闡發幽微官斯土者與有責焉 雖

迂愚不敢不勉當飭所屬凡有關於政學諸書及金石之已未著錄者先行彙集全編其孤行之本手鈔之書則錄副以上其收藏之家概出所蓄捐書多部彝器碑版多種者則舉名以聞所得既夥再選其尤者以備圖書館之用

三十四年學部奏編輯課本略稱簡易識字課本所以教年長失學之愚民與寒畯之家力不能入初等小學堂者之子弟期於日用尋常可以應用其文字淺深次序大致由單字進於短句短文所選教材無取精深即就倫常日用易知易行之事物教授之卒業以後能再入學校固善即無力深造亦可藉以謀生謹擬編為三種第一種課本凡道德知能之要素數名物之繁詳微約取備著於篇約三千二百字期以三年畢業第二種課本則於第一種中去其理解稍高深事物非習見者約減為二千四百字期以二年畢業第三種課本但取日用尋常之字目前通行之文約之再三定為一千六百字實屬無可再減期以一年畢業令小民自爲付度擇其力所能至者肄習之庶可免半途自畫之

譏漸致凡民入學之盛至於國民必讀課本較簡易識字尤爲重要敬輯 列聖諭旨及聖賢經傳以示標準擬編爲二種課本一種理解較淺範圍較狹徵引書史較少其天資較高者期以一年畢業遜者一年半畢業一種理解較深範圍較廣徵引書史較博天資高者期以二年畢業遜者三年畢業其編輯之法擬各分上下二卷上卷慎采經傳正文以大義顯明者爲主兼采秦漢唐宋諸儒之說以證明之正文之下附以按語凡羣經大義切於修身之要者前史名論益於涉世應事之宜者以及諸子文集外國新書於今日 國家法政世界大局有相關合者皆爲今日應用之知識均可擇要採取推闡發揮以淪其智慮下卷敬輯 列聖諭旨凡有關於制度典章之大者慎爲輯錄仿 聖諭廣訓直解之例敬附解釋俾易領會蓋有 聖訓及經傳大義以堅定其德性復有解釋發明以開濬其知識既合古人正德厚生之教更符近世德育智育之法一俟編輯成書先在京師教授數月如果士林稱便再由 部奏明請旨頒行各省一體遵用

又允東三省總督徐世昌黑龍江巡撫周樹模奏於黑龍江省建設圖書館

又允兩江總督端方奏於江甯省城勸立圖書館

又湖南巡撫岑春煊奏進前國子監祭酒王先謙所著尙傳參正一書奉 旨王先謙著加恩賞給內閣學士銜用示嘉獎宿儒

宣統元年陝西巡撫恩壽奏建置圖書館並附設教育品陳列所略稱藏書宗旨約分四類一曰收藏舊籍如經史子集之類二曰廣徵羣籍如近時名人著述之類三曰列邦新籍如東西譯本之類四曰吉金樂石如鼎彝碑版之類另附設教育器械標本分訂規條遴員管理

又頒給江甯圖書館圖書集成全部

又 諭孫家鼐等奏謹擬進呈講義事宜開單呈覽一摺著按照圈出各書另行分認撰擬

又山西巡撫寶棻奏設圖書館

又會議政務處奏開辦編訂名詞館略稱查各種名詞不外文實兩科大致可區六門一曰算學凡筆算幾何代數三角割錐微積簿記之屬從之二曰博物凡草木鳥獸蟲魚生理衛生之屬從之三曰理化凡物理化學地文地質氣候之屬從之四曰輿史凡歷史輿地轉音譯義之屬從之五曰教育凡論辨倫理心靈教育之屬從之六曰法政凡憲政法律理財之屬從之惟各種名詞繁隨或辨義而識其指歸或因音而通其假借將欲統一文典昭示來茲自應設立專局遴選通才以期集事擬暫借 部東偏考院作爲辦公之地名曰編訂名詞館即派嚴復爲該館總纂並添分纂各員分任其事由該總纂督率分門編輯按日程功其一切名詞將來奏定頒行之後所有教科及參考各書無論官編民輯其中所用名詞有與所頒對照表歧異者均應一律遵改以昭畫一又學部奏請賞給各學堂大清會典略謂 部直轄大學堂暨高等專門各學堂所授功課皆有 國朝掌故一門各學教員編纂講義學生考證功課均係遵照 大清會典講習伏查此次外務部石印會典除頒發外餘存尙多懇 恩賞給大學堂二部京師高等學堂八旗高等學堂滿蒙文高等學堂法政學堂譯學館優級師範學堂各一部以資參考而便肄習

又著歸化城副都統三多奏辦歸化圖書館略謂文教之昌明以圖書館爲津導神州奧區藝文淵藪奎章策府代有珍儲 聖澤涵濡通才輩出海通而後歐化東漸非洞達中西則才難應變非博通今古則用有所窮歸化城僻在西陲曠隔文教近雖推廣小學蒙智漸開然年格所拘向隅不免光緒三十四年將城東文昌廟餘屋修葺完整辦圖書館附設閱報社擬定章程派員專管計房屋十間藏書掛圖閱覽等室勉能敷用將舊有官藏書籍五千八百餘卷悉數陳列並調取浙江官書局書籍二千六百餘卷發交該館收儲另提前辦煤窰委員等充公罰款銀一千二百餘兩添購各種切要圖書分別度藏除科學圖書不計外共計經史子集一萬四千四百餘卷常年經費約需銀五百餘兩由 裁撤署前每年酬神演劇之外銷等款博節而出大略推輪規模粗具逐漸推廣俾成鉅觀似與保存國粹補助教育兩有裨益

又學部奏頒布小學教科書略稱督率編纂各員夙夕從事已編者照章修補未編者勒限趕辦總計初等小學完全科修身教科書十二冊簡易科修身教科書六冊完全科國文教科書二十冊算學教科書教授細案十冊珠算教科書八冊手工圖畫體操三種教科書共三十七冊通共成書九十三冊 等悉心校閱幾經簽改陸續付印頒布各省見已一律完竣又咨督學局略謂查簡易識字課本經本部於上年奏明編爲三種其第一種課本約三千二百字三年畢業第二種約二千四百字二年畢業第三種約一千六百字一年畢業俟編輯成書先在京師地方教授數月如果士林稱便再行奏請頒行各省一體遵用見在第一種第二種課本已經編成自應先在京師試驗應由督學局按照兩種課本程度設立簡易識字學塾數所分爲兩種辦法一收寒峻之家力不能入初等小學之子弟一招集年長失學之民人或分辦或會辦由局酌定均應選擇深明教育理法之教員以此項課本分別教授由教員自立日記簿一冊每教一課將教授方法如何學生是否領會以及此課文字是否淺深合度應否增減改易切實註明每一星期學生進境何如詳細備載七日報局一次由局派員會同圖書館原編此項課本之員隨時前

往悉心體驗情形詳晰報部備考不得含糊了事所有半日學堂亦可一律頒發此項課本爲國民教育之本源關係至爲重大本部期於通行無阻不厭求詳茲先將第一第二兩種第一冊課本各八十部咨行希即妥速籌辦詳細報部

又 諭都察院代奏員外郎黃允中條陳江甯新設圖書館請飭延訂通人編纂要籍呈一件學部知道

又學部奏編輯課本略稱編輯國民必讀課本分上下二卷上卷以發明立教本旨爲主凡古人五教七教之制六德六行之原雖世變百出而精理不刊見在異說潛滋尤應折衷名教以防淆惑下卷敬述 列聖諭旨以示標準而資遵循更輔以今世之制度時局之關係與夫國家富強之道國民應盡之責俾羣曉然大義之所在周禮以三物興民學校之內所教者六德六行六藝猶今之所謂普通學也至於凡民之不入學者又復因民之常而施十有二教焉十有二教之目前六者曰教敬曰教讓曰教親曰教和曰辨等曰教安皆人倫道德之事此上卷之所自昉也後六者曰以刑教中曰以誓教恤曰以度教節曰以世事教能曰以賢制爵曰以庸制祿皆法律制度因時用民之事此下卷之所自昉也竊以此項課本爲古今教法之匯歸全國人民陶成之定矩關係極重雖經承輯各員悉心編纂 等公同核閱凡有體例未合詞意未純者隨時飭令刪改並由承參各員逐條覆校茲經選定較深者一種較淺者一種以爲課本之用復另選一種文義廣博徵引宏富者以供參考擬即發交督學局就近試行一面發交各省提學使悉心察驗並廣徵 部諮議官各員意見如有未當之處仍應隨時修正至此項課本查照原奏區分畢業年期係專備各學堂暨簡易識字學塾之用惟於不能入學之人民尙未籌及伏維我 聖祖仁皇帝御製聖諭十六條 世宗憲皇帝御製聖諭廣訓先後 頒行天下凡士子歲科試敬謹默寫著在令甲久經遵行且有以白話演爲直解等書者與見錄國民必讀之意隱合擬俟試行之後熟察何種課本尤爲適用即演成通俗之文作爲定本發交各地方勸學宣講等所廣爲教授務使人人能明國民之大

義以植預備立憲之基礎

又奏呈簡易識字課本略稱簡易識字課本其編纂較國文尤難僅用單字既苦其枯寂盡用成文又恐近於高深轉失簡易通行之旨雖經承輯各員悉心編纂等詳細校閱增損修改至於再三而頒布之先尤以試驗適用為主茲經京師督學局呈報合用自應將第一二兩種按期頒行如嗣後各省學塾試用尙有未宜仍由部飭各省提學使遵照向章每三月彙報一次再由部蒐集衆議隨時修改以期完善

又山東巡撫袁樹勛奏東省擬設圖書館儲藏四庫善本兼收列國寶書並附設金石保存所凡本省新出土之品與舊藏精本一律收存

又浙江巡撫增端奏浙省擬建圖書館將官書局藏書樓歸併擴充並妥訂藏書及觀書章程以便多士觀摩

又兩江總督端方奏京師圖書館爲中外觀瞻所繫惟善本祕籍至爲難得東南文物萃之區常經購定浙紳姚氏藏書一千零十一種皖紳徐氏藏書六百四十一種計共十二萬九千餘卷送學部驗收書價共銀二萬兩由財政局籌給

又東三省總督錫良等奏吉林省城創設圖書館首儲四庫之書兼收五洲之本查省垣東北有初等小學堂兩所暫就該校略葺以資開辦亦足敷藏書及閱覽室之用並附設教育品陳列所如校具器械標本模型各物或自行仿製或略加採購至應用圖書未能週備應分年採辦遇有儲藏之家亦勸令捐置援案請獎

又署直隸總督那桐奏直隸圖書館業已籌設天津地便交通中外人士游覽日繁請頒給圖書集成一部

又學部奏籌建京師圖書館請賞給熱河文津閣四庫全書暨避暑山莊各殿座陳設書籍並飭撥淨業湖匯通祠各地址以便剋期興築又奏請飭內閣將宋元舊刻翰林院將永樂大典無論完闕破碎一併送部交圖書館儲藏又奏請飭禮部鑄造圖書館印信均從之

又諭陸潤庠等奏閱看汪宗沂所著經學書四種潛研古訓篤守師承洵屬經學卓越等語已故五品卿銜山西即用知縣汪宗沂著宣付國史館立傳

又學部奏京師及各省圖書館通行章程

又給事中張世培奏新出小學教科書荒謬蕪雜如戈登勸李鴻章謀反俾司麥與李鴻章言恢復祖國及修道之謂教率及釋迦牟尼巧言令色附會留聲機器並學部所設圖書館編纂之書亦無善本應請飭部嚴行釐訂慎編善本二年法部右侍郎沈家本等奏浙江湖州故紳郎中沈耀勳獨捐鉅資擬建工藝學堂圖書館懇飭學部咨行浙江巡撫先行立案

又修訂法律大臣法部侍郎沈家本奏爲京員恭纂書籍有裨掌故敬將原書進呈伏按 欽定皇朝文獻通考三百卷乾隆十二年奉 敕撰凡所紀述訖乾隆五十年而止近見三品銜候補五品京堂劉錦藻恭纂 皇朝續文獻通考凡三百二十卷起乾隆五十一年訖光緒三十年窮源竟委蒐採頗宏該員自序謂從乾隆五十一年以後所有內政外交一一詳求其得失之所在擇要恭錄詳閱原書尙非虛語竊維帝王制制顯庸有百世不變之大法詩所謂不愆不忘率由舊章是也有因時制宜之大用記所謂一張一弛文武之道是也即損益之成述窺 謨烈之精心於以知 列聖相承變通盡利固有非瑣瑣唐宋之規所可擬議者該員躬值 昌期從事編纂體例踵前門類增廣哀成巨帙上待 宸裁致力之勤可備掌故查近年內閣學士銜前國子監祭酒王先謙翰林院編修曹元弼均經臣工奏 進著作仰荷 先朝優獎茲謹援照將該員原書三百二十卷分裝六函恭呈 乙覽備蒙 綸音訓示足正私家載筆之謬得邀 天語褒嘉益勵下士潛心之業似於激勸學者不無裨益奉 諭著將所纂書籍交南書房閱看後再行請旨

又陸潤庠等奏爲遵 旨閱看覆奏事略稱劉錦藻所纂 皇朝續文獻通考三百二十卷其大旨以 欽定皇朝文獻通考斷自乾隆五十年而止該員此書廣續恭纂起於乾隆五十一年訖於光緒三十年自田賦錢幣以下爲考二十六門悉仍乾隆開 敕撰之體例其中子目略有增併良以近百年來庶政

繁興載筆纂言亦當應時通變復以列邦互市訂約通商環海往來聘問不絕
增外交考一門路電船郵蔚為四政 朝廷特設專部為富國利民之要圖又
增郵遞考一門綜觀該員此書於朝章國故博考詳稽條貫區分採采甚富其
關於因革損益者往往加以按語識見尚能闊遠持論亦頗明通惟是書係用
鉛字排印亥豕魯魚在所不免尙須加以校正至其全書大體洵如原奏所云
致力之勤可備掌故與王先謙曹元弼殫心著述同為有用之書堪以上備
乙覽惟如何 褒嘉之處非 臣等所敢擅擬伏候 聖裁奉 諭陸潤庠等覆
奏閱看京員恭纂書籍一摺書中有無訛舛尙須校正著南書房翰林再行閱
看覆奏

又 諭陸潤庠等奏閱看京員恭纂書籍校正訛舛之處逐卷加籤呈覽一摺
仍著劉錦藻按照南書房籤出之處更正妥協再行呈進

又候補五品京堂劉錦藻奏為恭纂書籍更正訛字遵 旨呈進略稱 臣京僚
濫膺掌故矧研發篋知歸私頌 帝堯之巍煥然藜生慕遠慚臣向之精勤纂
述舊聞上塵 睿覽迺以校刊之疏躬承 訓示之周詳 淵鑿無遺洞悉

全書之原委 玉音再降務勢完璧之瑕疵勞正字於詞臣 南齋珥筆待持
衡於 聖主北斗旋杓凡此逾格 恩施未敢期諸夢寐愧深思奮感極增惶
謹遵將籤出各條逐加改正寒燠既遷丹鉛始畢焚蘭膏以宵檢恐誤金根

經 芝殿之晨披便成寶笈事該本末異吳兢政要之分篇議附芻蕘比杜牧
罪言之憂世思 文武而重方策懼滋俗書三寫之訛贗 岱海而貢壤流竊
仿時政一編之例

又 諭前據沈家本奏進候補五品京堂劉錦藻恭纂書籍經南書房閱看將
謂舛之處逐卷加籤當即諭令劉錦藻更正妥協再行呈進嗣經更正恭進復

交南書房重加校閱茲據奏稱劉錦藻所纂皇朝續文獻通考一書搜採甚富
持論明通見均改正無謬等語劉錦藻著加恩賞給內閣侍讀士以示嘉獎

又學部奏 臣部第一次教育統計圖表辦理完竣總為表三百三十有三區為
三類一為學部暨京師學堂之統計一為各省總括之統計一為各省分列之

統計蓋各省學務進步之遲速生徒就學之多寡學務經費歲入之盈絀歲出
之豐約備載於總表分表之中又查萃各表揭其比較所得之數製為簡明之
圖係之以比例顯之以采色載諸簡端俾觀覽者始驗之於圖已略識其盈虛

既參之各表更詳知其究竟在進步速者因比較而程功可睹自當益勵其進
取之心而進步較遲者或以風氣之未開或因財力之不繼按諸圖表優絀顯
然相形之餘人情自奮必能急起直追力求進益

又賞廣西圖書館大清會典一部
又廣西巡撫張鳴岐奏建設圖書館懇 賞圖書集成
又浙江巡撫增韞奏籌建浙省圖書館請 賞給文淵閣旁隙地
又郵傳部右侍郎盛宣懷捐資籌建上海圖書館 賞御書扁額曰惠周多士
又學部奏呈進蔡錫勇所著傳音快字書略謂速記學堂教授科目以速記法
為最前聞日本速記學者熊崎健一郎曾著有中國速記術求得其書閱之係
就日本速記文字斟酌變通以為傳習中國語言之用惟中國尚無嫻習其書
者教授之人一時頗難其選嗣查原任湖北漢黃德道蔡錫勇前經隨使美國
於速記之學夙有研求所著傳音快字一書取曲直斜正粗細各綫為記音代
字之符其法等於美國人凌士禮而參以己意變化增損以適於用較諸熊崎
氏書形式雖互有不同而義例實大略相近該員以之傳授鄉里通曉其法者
頗不乏人記錄甚捷一時稱便以充 院速記教科之用似尙合宜奉 旨書
留覽

又覆奏直督陳夔龍奏時局岌危一摺略稱原奏稱東西游學生譯刊之書籍
報紙往往肆意譏評淆亂黑白雖經嚴飭查禁而輾轉傳播仍未能盡絕根株
人心世道之憂所關甚大請 飭學部將一切教科書籍精心審訂務期範圍
不過倫紀修明馴致夫君子愛人小人易使之成效凡有宗尙稍偏易滋流弊
者一律擴而弗取俾免習焉不察誤入奇袤至學生出洋游學嗣後非中學已
有根柢者概不准行以示限制仍責成各省督撫督率提學使將所屬學堂隨
時認真稽察剴切訓迪設法防範勿任濡染惡習致蹈匪彝等語查 臣部自頃

歲以來挈持綱領審慎圖維雖不敢謂措置咸宜然獨於扶植世教整齊學風則尤爲兢兢致意前於各省呈請審定教科書籍良楛錯出純駁不齊皆經派員悉心鈎校取其胚胎經史與闡發各種科學而不背畔道德者准予發版緊行以裨教授其有蔑禮敬教稍涉奇袤如平權之說種族之謬言自由結婚之歌詞惑世誣民之報紙凡若此類業已節次通飭嚴禁發行斷不任其淆亂人心貽誤來學至遺派出洋游學各生若根柢未完遽令出洋不惟耗費財力且易滋流弊臣部早慮及此曾奏明嗣後京外遺派游學生無論官費私費皆應切實考驗性行純謹具有中學畢業程度通習外國文字能直入高等專門學堂者始予給咨在案自無庸置議惟是臣部總司教育於教科圖書審查禁止責有專歸既經禁止之後其執行之權則恃封疆大吏以爲後盾蓋以京外幅員太廣耳目聞見難周臣部坐籌於內不過執居中統轄之權督撫分治於外乃克收就近防維之益應請 旨飭各督撫督飭提學使將所屬學堂隨時認真稽察剴切訓迪設法防範於歷次所奉 諭旨及臣部頒發章程均應切實照行勿稍弛縱遇有教科書籍非經臣部審定而宗旨歧異皆當嚴行禁遏無俾流傳其他項圖書不專備教科之用者臣部與民政部皆有查核之責遇有應行禁止發行者嗣後如由臣部發覺則咨行民政部禁其出版如由民政部發覺則由民政部自行辦理至報紙一項專隸民政部其有違背報律者應由民政部查照嚴禁臣部如有見聞亦隨時咨商核辦以維世道而正人心又奏預備立憲第三年上屆籌辦事宜略稱單開中學堂初級師範學堂及女子小學女子師範等教科書以至官話課本經臣等選員編纂陸續成書其初級師範學堂教授細目已行京師督學局及各省提學使編訂送部以備採擇至各種學科中外名詞對照表年底可以告竣各種辭典類別尤繁仍須廣續編譯用期早日觀成其應行頒布之高等小學教科書已經編印多種頒發各省照式翻印藉資普及其小學中學教授細目見飭趕緊編排并通行京師督學局暨各省提學使悉心甄采力求善本以資應用至各高等專門學堂講義除江蘇江西兩省業經咨部審定外其餘設有高等專門學堂各省迭次行催

一俟咨到卽爲審定其已發行之各種教科書由審定科各員修改較正者日有多軼其臣部則例本年續編奏咨輯要已刊印成書一俟裝訂整齊卽咨各省仍派專員分門別類廣續編纂至擬訂蒙藏回各地方興學章程粗具大致惟邊隅情勢與腹省不同尙須詳細調查始能規定妥善他若各省存古學堂見由臣部擬定變通辦法分別已設未設省分酌量設立其各省圖書館上年奏准章程業經通行在案見報部開辦者已有多省其未經設立省分當再咨行各該督撫一律開辦餘如派視學官分查各省學務派員查看華僑學堂意在整齊國內之學制提倡海外之學風均屬要政不容緩圖臣部擬卽次第辦理不誤期限

皇朝續文獻通考卷一百二

學校考九 學堂

日謹案文翁學堂始見漢書傳註自是武帝罷黜百家表章六經令天下郡國皆立學校官彬彬多文學士矣歷隋唐宋明以迄 國朝制科取士古意浸微禮失求楚鑒於歐美日本皆以學戰以故同治初元有同文館之設既有廣方言館之設大輅推輪爲我國學堂發軔之始迨光緒戊戌朝士昌言變法京師又有大學堂之設辛丑以還銳意興學且頒行奏定章程胡圖奉行未久十弊六害誠有如御史胡思敬所痛哭而陳者雖然普之勝法俾思麥至校中舉夏楚示人曰捷法者此也即日之勝俄亦歸功於學校乃列國以興學而盛我國以興學而衰則以有治法無治人也而 朝廷作育人材之厚意固有不可沒者爰列學堂門首學務總次貴由次八旗次大學附高等次中學次小學次師範次存古次譯學館次進士館附仕學館次法政次武學次巡警次實業次醫學次邊徼次僑民次公學次游學次簡字附速記次半日次幼稚次女學以便稽核焉

光緒二十一年御史陳其璋請推廣直省學堂下部議奏請 飭下沿江沿海督撫於已設學堂量爲展拓未設學堂擇要微行聽令官紳集資奏明辦理二十二年 諭前經降旨開辦京師大學堂入學肄業者由中學小學以次而升惟各省中學小學尙未一律開辦著各該督撫督飭地方官即將各省府廳州縣見有之大小書院一律改爲兼習中學西學之學校至於學校階級自應以省會之大書院爲高等學郡城之書院爲中等學州縣之書院爲小學其地方之義學社學等亦令一律中西兼習以廣造就至各書院需用經費如上海電報局招商局及廣東闡姓捐著該督撫儘數提作各學堂經費各省紳民如能捐建學堂准各督撫奏請給獎其有獨力捐鉅款者朕必予以破格之賞所有中學小學應讀之書仍遵前諭由官設書局編譯中外各書頒發遵行至於民間祠廟不在祀典者即著一律改爲學堂以節糜費而隆教育

隸州中學堂各州縣小學堂並蒙養學堂其教法當以四書五經綱常大義爲主以歷代史鑑及中外政治爲輔務使文行交修講求實學著該督撫學政切實舉辦

又山東巡撫袁世凱奏改設學堂酌擬教規試辦章程

又 諭政務處奏請飭各省速辦學堂等語建學儲才實爲當今急務惟近省學堂同時並舉財力或不逮查袁世凱所奏山東學堂試辦章程擬先於省城建立學堂一區分齊督課俾初學者易於造就漸有師資再行次第推廣其教規章程參酌中西善政務處即將該署督原奏並單開章程通行各省切實舉辦

二十八年兩江總督劉坤一奏籌辦江南各學堂情形

又直隸總督袁世凱奏籌設師範學堂暨小學堂章程

又管學大臣張百熙奏遵議學堂章程略稱古今中外學術不同所以致用之途則一 朝廷求才本之學校不能不節取歐美日本諸邦之成法以佐我國舊制第考其見行制度亦頗與我中國古時良法大概相同禮記載家塾黨庠序國學比之各國即所謂大學中學小學蒙學也等級蓋甚分明記又載小成大成即所謂大學中學小學蒙學之卒業期限也其科目則唐有律學算學書學諸門宋益以畫學醫學雖未及詳備亦與所謂法律算術習字圖畫醫術各學科不甚相殊自司馬光有分科取士之說朱子學校貢舉私議於諸經子史及時務皆分科限年以齊其業外國學堂有所謂分科選科者視之最重意亦正同大抵中國自周以前選舉學校合而爲一自漢以後專任選舉及陪設進士科以來士皆殫精神於詩賦策論所謂學校者名存而已故今日而議振興教育必以真能復學校之舊爲第一要圖雖中外政教風氣原本不同然其條目秩序固不必盡泥其迹亦不能不兼取其長以期變通而盡利也此次所擬章程謹上溯古制參考列邦擬定京師大學堂章程並考選入學章程暨頒發各省之高等學堂中學堂小學堂章程各一分又擬蒙學堂章程一分共六件一併開呈所擬籌辦情形一豫定辦法二添建講舍三附設譯局四廣購

書籍五寬籌經費其豫定辦法先設豫科分二門曰政科藝科設速成科亦分二門曰仕學館師範館其譯局由舊官書局改辦一設京師一分設上海其經費除華俄銀行五百萬外各省每年大省二萬中省一萬小省五千撥解常款又以前直隸冀州知州吳汝綸加五品卿銜爲大學堂總教習以湖南試用道張鶴齡爲副總教習候補五品京堂于式枚爲總辦編修李家駒工部主事趙從蕃爲副總辦

又翰林院侍讀寶熙奏請變通宗室覺羅八旗學校得旨歸入大學堂辦理二十九年管學大臣奏定重訂學堂章程略稱前因學務重要請旨添派臣之洞會同商辦伏查上年大學堂奏定章程實已深得要領惟草創之際規程科目稍從簡略徐待增補至各省初辦學堂管理學務者既難得深通教育理法之人而學生率皆取諸原業科舉之士未嘗經小學堂陶鎔而來故其言論行爲不免有軼於範圍之外者此次奉諭命臣會商釐訂期於推行無弊自應詳細推求倍加審慎數月以來互相討論並博考外國各項學堂課程門目參酌變通擇其宜者用之科目有過涉繁重者減之每日講學功課多亦不過六點鐘所授之學多亦不過六門皆計日量時以定之絕不苦人以所難至於立學宗旨無論何等學堂均以忠孝爲本以中國經史之學爲基俾學生心術壹歸純正而後以西學瀰其智識練其藝能務期他日成材各適實用以仰副國家造就通才慎防流弊之意計擬成初等高等小學堂中學堂高等學堂章程各一册大學堂章程附通儒院章程一册查外國蒙養院一名幼稚園茲參酌其意訂爲蒙養院章程及家庭教育法此就原訂章程所有而增補其缺略者也辦理學堂首重師範原訂師範館章程尙屬簡略茲另擬初級師範優級師範章程并任用教員章程各一册將來京城師範館應即改照優級師範學堂辦理此外如京師仕學館係屬暫設皆有職人員不在各學堂統系之內原訂章程應暫仍其舊至譯學館即方言學堂前經奏明開辦茲將章程課目一併擬呈其進士館係奉特旨令新進士概入學堂肄業此與仕學館意相近仕學館或歸併進士館或照進士館見訂課程改同一律容隨時酌察情形

辦理又國民民生計莫要於農工商實業興辦實業學堂最宜注重茲另擬初等農工商實業學堂章程附實業補習普通學堂及藝徒學堂各章程中等高等農工商實業學堂章程實業教員講習所章程實業學堂通則此皆原訂章程所未及而別加編訂者也又以中國禮教政俗與各國不同而少年初學之士胸無定識此時學堂辦法規範不容不肅稽察不容不嚴茲特訂立規條編爲各學堂管理通則並將設教之宗旨訂爲學務綱要各省果能慎選教員按照章程認真舉辦則民智可開人才可成決不致別生流弊至學生畢業升級入學考試亦經詳訂專章中學堂以下及收入高等學堂者由督撫學政會同考核高等學堂應升級者奏請簡放主考會同督撫學政考驗京師大學堂奏請簡放總裁會同管學大臣考驗以昭慎重而免冒濫其獎勵錄用之法比照奏准鼓勵出洋遊學生於獎給出身之外復請分別錄用亦經詳加斟酌擬有專章伏候聖明裁定將來如有應行變通增損之處大者仍當奏明辦理小者由管學大臣審定後通行各省照改奉諭方今時事多艱興學育才實爲當務之急前經諭令張之洞會同管學大臣將學堂章程妥議具奏茲據會奏臚陳立法尙屬周備著即次第推行其有應行斟酌損益之處仍著學務大臣會同張之洞隨時詳核議奏至所稱遞減科舉及將來畢業學生由督撫學政並簡放考官考試一節使學堂科舉合爲一途著自丙午科爲始將鄉會試中額及各省學額按照所陳逐科遞減俟各省學堂一律辦齊再將科舉學額分別停止以後均歸學堂考取屆時候旨遵行即著各該督撫趕緊督飭各府廳州縣建設學堂逐漸推廣無論官立民立皆當恪遵列聖訓士之規謹守範圍端正趨向務期成德達材體用兼賅以備國家任使有厚望焉

又奏學務一事實爲今日自強要圖必須全國舉行方有大效各國均設有文部大臣專司其事見在整頓京外大小學堂必須特設專員方能專心致志籌辦妥協查管學大臣既管京城大學堂又管外省各學堂事務日前振興學務經營創始條緒萬端即大學堂一處專任猶虞不給兼綜更恐難周况京城大學堂不過學堂之一其所辦是否全行合法師生是否一律均有成效亦宜別

有專司考核之大員方無窒礙臣之洞與諸臣商酌擬請於京師專設總理學務大臣以統轄全國學務其京師大學堂擬請另設總監督一員請旨簡派三四品京堂充選專管大學堂事務不令兼別項要差免致分其精力仍受總理學務大臣節制考核如是則全國之學務與首善之大學皆有專責得旨管學大臣著改爲學務大臣大學士孫家鼐兼充學務大臣大理寺少卿張亨嘉爲大學堂總監督

又學務大臣奏御史張元奇奏各省學堂宜嚴師範又本科進士入堂肄業可否酌爲變通各摺片查原奏所稱嚴選師範振興實業洵爲知本之論見已擬有初級優級師範學堂章程各省不難照辦京師見設師範館擬照優級章程辦理原奏又稱蒙學但課中文俟考入中學堂後再習西國語言文字所謂蒙學意即指初等小學而言臣等見擬小學堂章程即不令兼習洋文高等小學堂亦須斟酌地方情形辦理其可兼習者亦不准占讀經時刻與該御史所見正同至另片稱本科修撰庶吉士中書主事悉入學堂肄業博采衆論倘有不便擬請酌爲變通查此次奉旨凡新進士之授京職者一概令入學堂原欲使向業科舉之士增益普通學識講求政法方言以期通時務而應世變惟其中年齒較長有不能強就學堂程度者亦屬實在情形臣等擬定一格凡年在三十五歲以下者無論翰林部屬中書均令入進士館肄業並酌給津貼銀兩由各該進士本籍省分籌款解交大學堂按月轉給俾資旅費而示體恤年在三十五歲以上准其赴部呈明改就知縣分發各省其自願留學者聽似此量爲變通自可免遷就入學有名無實之弊

又直督袁世凱奏陳籌款開辦直隸學堂略稱直隸學堂經費無從措集臣焦思至再惟有將從前徵收糧租折價較多之州縣仍分別規復舊章即以溢出之銀提作學堂之費似尙於民情政體兩不相妨擬請將良鄉等四十六州縣廳案內糧價租價查照二十四年以前舊章原折制錢在二千四百文以上者仿照山東奏定之案改爲二千四百文徵收其不及二千四百文者悉循其舊一轉移間民間以錢完賦較之往時並未增多而公家得此贏餘亦可藉資周

轉以四十六州縣廳糧租計之但得中檢之年除去民欠蠲緩帶徵至七分以上約可提錢合銀十數萬兩以之接濟學堂經費洵屬不無小補

三十一年蘇撫陸元鼎飭派官紳調查通省學堂略稱蘇省學務處設有調查一科凡省城及外府州縣官立公立私立各學堂皆有檢查干涉之責教科之不完章程之未合生徒之缺額教員之濫等以至經費之支用無法辦事之任用非人種種弊端諒不能免學務處自宜隨時密派員紳切實調查或糾正其違失或補綴其缺疏皆須深察內容部分表別庶得淺深優劣藉爲獎勵之所憑合亟札飭該處迅即密派官紳各一員先就省城次及外府州縣會同前往調查一切即行通報查核

又蘇撫端方護撫奏陳蘇省學堂辦理情形略稱方今教育實業武備諸大政經畫宜先奴才端方自到蘇撫任後與奴才效會竭力籌議今先於蘇州省城設立兩級師範學堂已於十月開學俟明年講習科卒業再招初級本科以培養小學堂完全之教員俟速成科卒業再設優級科以培養中學堂及初級師範學堂之教員更附設模範小學堂以爲初級師範學生練習教授之地以光祿寺署正羅振玉爲該堂監督另於城中設立初級小學堂四十所將來即以卒業生承其缺乏俟立優級科後再以蘇州府中學堂附屬該堂以爲優級師範生練習之地如此辦理免致借材外國此設立省城師範學堂及初級小學堂之大略情形也至於蘇州原有中西學堂見已改爲高等學堂暫分爲豫備科及本科兩級務令學科完全俾得備京師大學堂學生之選其蘇州府中學堂並增添學科由蘇州府認真經理此又業經擴充高等學堂及中學堂之大略情形也若武備學堂必須遵照練兵處奏定新章悉力整頓方能望其英才日出以赴今日之急他若實業學堂則以蘇州工業素優農力亦頗勤勉擬分農工兩科此舉於國計民生關係甚大即當擇地建堂迅速舉辦此又見擬推廣武備學堂及工藝學堂之大略情形也此外如蘇屬之京口駐防人口日增生計日窘去歲該副都統設立中學堂秋開由奴才端方派員前往監察學務兼理旗民生計擬推廣舊有之中學堂兼增設實業學堂及蒙小學堂俾

教育均可普及其省外之松常鎮太各府州之學堂並當設法仗助速行開辦此又兼籌京口駐防及外府各學堂之大略情形也又教科各書急須編譯見在正在招聘通才擇要輯錄惟是諸務並舉需費較多奴才等再四商籌惟有就銅元盈餘極力樽節撥出定款以為興辦之用庶上不蠹國下不病民似不難加意講求俾臻完善

又奏陳蘇省學務略稱蘇省各項學堂迭經奴才端方嚴飭各屬竭力振興又因教員狎難其選故就蘇州省城亟設師範學堂以為成就教員之地更益以游學生畢業回國分布各府州縣庶教育可期得人奴才等深維強國之要必智其民欲智其民先普其學是設立蒙小學尤為今日第一要義此次奴才端方在兩江署任內於江甯省城分設初等小學四十所茲奴才端方回蘇與奴才效會商議即在省城分設初等小學四十所與江甯辦法相同督同官紳剋期開辦並將前定之編制管理各規條酌頒示學科一切仍按奏定新章不准少涉歧異

臣謹案朱子有言古者小學皆教之以灑掃應對進退之節愛親敬長隆師親友之道皆所以為修身齊家治國平天下之本而必使之講而習之於幼稚之時欲其習與智長化與性成而無扞格不勝之患朱子此言其於古者蒙養教法至詳且明矣今蘇督所奏其要旨即在強國之要必智其民二語但求民智而不知所以培養德性之方流弊所極遂陷於今日不可收拾之勢當時之號稱識時務之大臣僅以趨風氣為事秉國鈞者又毫無學術上倡下應趨危亡如箭射由於根柢之學不講遂至舉國猖狂壞盡青年子弟豈不深可痛哉

又湖廣總督張之洞奏略稱賠款一項湖北省灘派至一百二十萬兩民力漸不能支上年 明詔興學亟應於各州縣備設高等初等小學堂以普教育各屬紳民咸以籌繳賠款捐已屬萬分竭蹶更無餘力再籌興學之資臣以此項賠捐責諸民間本多勉強若將此款改留各州縣興辦學堂一轉移間名正言順當商定與本地正紳公同管理專備各種學堂之需自應奏明立案自此學

堂經費有著各廳州縣均能遵照奏定章程將高等初等小學及師範傳習所爭先舉辦並選派學生資送省城及日本學習師範專科以備各小學教員之用一洗從前觀望遷延之習

又陝西巡撫曹鴻勳等奏各學堂均附收客籍學生略稱東南各省均設有客籍學堂陝西官幕子弟附入高等學堂肄業非經久可行之道見擬仿照山西西學專齋辦法令其自納學費勿論高等學堂中學堂均准附收客籍學生至於講授課程暨畢業後之出身獎勵均一律辦理以廣裁成

又安徽巡撫誠勳奏籌辦學堂並請頒行學律略稱皖省高等學堂係就敬敷書院舊址拓地改建其創辦經費均經前撫臣王子春籌緝等暨奴才先後奏咨在案該堂見已工竣統計房屋二百八十餘間計額設本籍學生二百名客籍學生四十名教務長一員各科正副教習十七員見行功課首以人倫道德經學大義為根柢次則中國史外國史兵學法律理財體操理化英文法文東文測繪圖畫算學凡十七門復慮師範缺乏爰飭於省城籌款創

設初級師範學堂並先於高等學堂附設師範生一班以備中小學堂派充教習之用尙擬廣設師範傳習所以宏造就而備師資此皖省籌辦高等學堂情形也其各屬中小學堂為中材初級而設查安慶為人文淵藪勸諭紳商尙易為力因飭該府裕厚認真經理為通省倡共計通省已設初級師範學堂一所安徽公學附設速成師範學堂一所中學堂十三所高等初等小學堂五十三所蒙學堂十二所至省城農工學堂附設於見在中學堂內經前撫臣蒞綱榮附片奏陳奴才查實業為自強先務自應趕早興辦再照會該紳等妥議章程此皖省籌辦中小各學堂情形也再查學務處為全省總匯之區經臣於上年奏報如審訂考驗會計編纂各科見亦督飭員司仿照各省辦法正核辦開恭讀 諭旨立停科舉多建學堂仰見 聖謨獨斷銳意儲才抑更有請者朝廷立教首重倫常學子合羣輒騰異說相濡相染流弊難防擬請 旨飭學務處大臣明定學律頒行各省

又兩江總督周馥江北提督劉永慶奏改設江北學堂略稱臣等與江北各紳

士籌商以爲各屬之蒙小學堂均須次第添設查清江原設之高等學堂已歷數年當經臣永慶於三年年終大考後以程度較優者升送江甯高等正齋即就原有之校舍改爲江北初級師範學堂計可收師範生二百名飭兩江學務處會同淮揚海道總理其事慎選教員嚴定規則畢業後由臣考試給予出身令歸本籍充教員盡義務五年並於第二學期在堂中設附屬小學堂招生一二班令師範生輪班授課俾教學相長裨益更宏兼議於堂中附設高等預科其課程則參照中學堂章程務使畢業後有升入高等學堂之資格以爲將來各屬中學堂升送有人再隨時酌改高等專科地步

又順天學政陸寶忠條陳學務略稱數年來督臣袁世凱經營畿輔學堂爲各省之冠抑臣竊思見今學務似尙有急需整頓之處謹分舉陳之一設立文部並責成學政總理學務以一事權也見在學堂林立應有文部統攝自京師大學堂譯學館以下天下學堂皆歸文部管理設司分任各省學務均應責成學政主持學政衙門亦應仿文部分設數司統隸文部以歸畫一一文部既立宜編纂則例以便遵守也凡一部之立必有部章以資遵守應請 飭學務大臣編爲文部則例謹將管見所及條列細目如下一變通獎勵之法查原定章程獎勵各項畢業數十年後天下學人皆授以官而官又不能各盡其用於實際有何裨益竊以爲獎勵之法宜略爲變通凡學堂畢業皆嚴辨科級予以文憑及學士博士名號而毋庸授以官職 近見御史陳曾佑所奏變通學堂出身一摺應請 飭廷臣照該御史所陳悉心妥議使天下亦曉然於以學茂名高爲美不能以博官顯秩爲榮一各直省道府以下實缺候補人員責成各督撫甄別其失學者令入仕學館補習政治法律凡廕生均由學堂畢業始准引見量其所學分別授官除編入文部則例外並請 飭吏部定章辦理一宜設師範傳習所凡蒙學堂教習應由學政撥派教習分派各屬傳習師範生監督可入傳習所肄業數月畢業給以文憑俾充蒙學堂教習又如蒙學教科書目及教授規則凡鄉曲嚮學之士能購取自行研究熟諳教法亦准其呈明學政給予文憑充當教習一凡教授教諭學正訓導等學官宜由師範生選授查日

本學制師範生任職十五年或年在六十以上並無過誤自願乞退者國家給以全俸或半俸以贈之今宜略仿其意辦理凡曾充當師範十五年自願乞退者即分別授以教授教諭學正訓導等官此項學官即可派充管理學堂一學生冠服應由文部酌定除武備學堂常著操衣外其餘各學堂宜分三項禮堂操場講堂之衣應酌量改定服式一各省中學堂宜兼重漢文查各國學堂皆以國文爲重前次奏定章程小學堂本以國文爲基礎中學堂高等學堂亦有經史文學功課至大學堂又設經學文學專科用意至爲深遠各國文以俄文德文較爲難學然比之中國文其難易又甚懸殊地球以中國文字爲最難十三經周秦諸子史漢說文卽以文論淵雅樸茂實爲國粹近日爭習各國語言文字數十年後恐文字盡成鄙俚見在各省中學堂每偏重洋文應責成學政切實查考各學堂教習所注積分表凡國文及洋文不得偏重一中小學堂以上統宜繳納學費自備火食查東西各國學制學生鮮在學堂寄宿者亦無不繳納學費者凡中小學堂以上均酌定學費膳費其功課程度能達最優等合於日本所謂特待生資格者准破格免收學費於體恤之中仍寓鼓勵之意一陸軍水師學堂皆應由小學堂升入見在各省陸軍水師學堂凡小學堂學生如有軍人之資格皆可升入一宜令小學堂以上多設實業學堂如商學農學工學蠶學林業漁業之類務使通國學人於實業佔其多數人人亦皆能自養富國強兵實基於此一宜令蒙學堂以上多設尋常實業學堂其貧民無力或學生資質魯鈍不能入小學堂者皆令入此種尋常實業學堂如尋常商業蠶業工藝卒業後即能自求生計國無廢民胥由此道一獎勵公立學堂並改良私塾凡地方紳富有能獨力捐辦及鳩資倡辦學堂遵照文部教法辦理著有成效者由地方官稟知學政派員查驗分別奏獎虛銜封典學生卒業後准其一體按級升送其私家學塾或由有力之家各自延師訓其子弟或由各師招集生徒自成私塾若能遵照定章改良教法則不妨聽其並存但各屬教員須得有師範文憑方能充當一蒙學最關緊要凡七歲以上不入學者罪其父兄家長除編入則例外應請並飭修定法律大臣將此條增入新定法律飭各屬切實

遵辦一各省府廳州縣宜令多設幼稚園幼稚園與家庭教育相聯絡家庭教育有不足之處必須有幼稚園助之國民人格胥基於此一地方官辦理學堂之勤惰歸學政考察會同督撫三年甄別應設蒙學堂之多寡爲州縣殿最若有成績異常及廢弛太甚者並准隨時會同督撫分別舉劾一各學堂積分表冊平日由學員審注若至學期經主考試驗不符教員應有處分若至畢業經文部學政考驗不符主考者應有處分以上各節似可備文部編纂一請迅勅編定教科書並頒發教授詳法及教科書目以一指歸也見在各州縣蒙小學堂需用教科書甚急宜 飭部臣多選精通學務之員擴充編書辦法並通飭海內學人及出洋明達之士分編各科學粗淺教科書經呈文部鑒定速刊頒發各省廣爲排印分行各州縣至教授通法尤應迅速繕譯東西各國中小學生教授法專書參以中國見在情形由文部酌核定一併通行各省備發州縣遵辦一見在高等及中小學堂應請 通飭學政嚴行甄別以齊學級也從前學堂創辦伊始由高等以及小學堂名稱雖別學生程度無甚差殊見在應即切實考察如中學堂學生不合格者即令退入小學堂小學堂不合格者即立令退入初級小學堂其各省高等學堂由學政自行查考有不合格者各按其學級程度所至入該原籍中小學堂補習功課見在高等學堂合格之人極少應即暫改爲初級師範或高等豫備生俟畢業後再行舉辦高等學堂以符名實京師大學堂已奏請暫習師範及學豫備科請飭各省一律遵辦不得濫混階級迨三年之後大學堂改建落成分別專科教授各省高等學堂亦必實有成效然後由學政奏請 簡員會同考察咨送應於編訂則例內責成學政隨時認真清理各學堂學級以便升選不致再有參差

皇朝續文獻通考卷一百三十一

學校考十 學堂總考

光緒三十二年學部通行京外考覈學生品行略稱奏定學務綱要內開造士必以品行爲先各學堂考覈學生均宜於各科學外另立品行一門亦用積分法與各科學一體同記分數其法分言語容止行禮作事交際出游六項隨處稽察第其等差當此學風初開小學以上年齒較長之學生尤爲責望所歸觀聽所繫苟不自愛一人足爲全體之累一事足貽學界之羞毋以不遵約束爲伸張自由毋以聚眾滋事爲能結團體毋以攻訐教習爲程度高尚毋以破壞道德爲思想文明毋藉口衛生而滋閑於飲食毋吝惜腦力而騰議於科學毋自狃於褊淺之知識而侮慢老成毋自倚於學堂之聲勢而橫行市井衣飾宜儉樸毋華服奇製以自炫言動宜謹飭毋朋飲冶游以自荒宜求實學毋懷挾應考以自欺宜惜光陰毋藉端請假以自誤凡此諸端胥關品行此學生所宜猛省者也至於教員管理員身任教育關係尤重不惟自端表率並當研求學術以圖精進考察規制以求改良凡可以養成學生品格及其有妨損之處尤宜特別注意即如近日報章所載某處學堂有召集學生迎送官長祝壽宴客之事不惟有失體制亦於學生品格有關此教員管理員所當留意者也本部總攬學務所愛護所期望者在此多數之學生而所賴以相助爲理者則在身任教育之教員與管理員日本爲教育新盛之國其教育家亦斤斤以養成道德匡救青年爲言中國學堂初設新舊相爭外輸知識內固根本實在斯時願人人共喻此心其實在不服約束者立予斥退俾學生皆知束身自勵學務庶有振興之日

又 諭學部奏請將教育宗旨宣示天下一摺自古庠序學校皆以明倫德行道藝無非造士政教之隆未有不原於學術者即東西各國之教育亦以無人學爲歸實中外不易之理朝廷銳意興學設專部以董理之自應明示宗旨俾定趨向期於一道同風茲據該部所陳忠君尊孔與尚公尚武尚實五端尙爲提要總之君民一體愛國即以保家正學昌明翼教乃以扶世人人有合羣

之心力而公德以昭人人有振武之精神而自強可恃務講求農工商各科實業物無棄材地無遺利期有益於國計民生庶幾風俗醇厚人才衆多何患不日臻上理著該部即照所議各節速飭遵行所有京師及各省學堂師長生徒尤宜正本清源辨明義利不視爲功名祿利之路而以爲修齊治平之規於國家興學育才之意方爲無負該尙書侍郎等惟當整躬率屬行必踐言切實提倡認真查核懷時局之艱難思全國之關繫朕心倦倦實有厚望焉

又學部修改各學堂考試章程節錄凡學堂考試分五種一曰臨時考試二曰學期考試三曰學年考試四曰畢業考試五曰升學考試臨時考試者每月一次或開月一次由各教員主之學期考試者每半年一次由本學堂監督堂長會同各教員於暑假前行之學年考試者每一年一次由監督堂長會同各教員於年假前行之畢業考試者因學生畢業而授以文憑凡中學以下之學堂除初等小學畢業由本堂自行考試外高等小學畢業中學畢業概呈請所在地方官長會同學務官考試初等小學高等小學暨中學畢業既經考試之後由本學堂彙造學生姓名年歲籍貫二代分數清冊在京師者呈督學局備案在各省者呈由本管地方官詳提學使備案高等學堂畢業在京師者呈請學部考試在各省者呈請提學使轉詳督撫督同議長議紳督教育總會會長副會長考試遇有學部一等二等諸官學部副會長考試在該處之時可會同考試大學堂畢業在京師者呈由學部奏請 欽派大臣會同考試在各省者呈請提學使轉詳督撫將畢業學生咨送學部奏請 欽派大臣會同考試凡中學堂高等學堂畢業見行章程定有獎勵者既經考試之後除由本學堂發給分數等第文憑外呈由提學使詳請督撫咨明學部照章奏獎大學堂各分科選科畢業實科應比照高經考試後其應獎勵者由學部帶領引 見奏請 明降諭旨以示優異游學畢業考試准此惟非在外國大學堂及高等學堂高等專門學堂畢業者不得與試升學考試者本學堂既已畢業升入程度較高學堂以期循序深造初等小學畢業升入高等小學高等小學畢業升入中學中學畢業升入高等高等學業業升入大學概由所升之學堂自行考試分別去取以期程度齊一其畢業不

願升者均不必與升業考試

又學部奏湘省學堂與定章歧異奏請改正略稱湖南巡撫龐鴻書學政支恆榮會奏將校士館改為學堂奏稱學堂科目該括中西其於經史理學詞章各學皆未暇專精恐將來中學日微而中師漸絕查上年湖廣督臣張之洞曾將經心書院故址改為存古學堂河南撫臣陳夔龍學政臣王擢奏設尊經學堂皆仿大學分科之義查湖南舊有達材校士館擬改為達材學堂仿河南尊經學堂辦法專收舉人五貢入堂肄業成德校士館改為成德學堂仍取高材生入堂肄業景賢堂擬改為景賢學堂仍取通省中年以上生員入堂肄業又衡州府屬舊有船山書院為衡永郴桂四府州屬士子肄業之地程度與達材成德景賢相似亦令參照省城三處學堂規則專收該府州屬生員名為船山學堂各等語竊維興學之道普通專門躡等必無成功中學西學偏廢皆滋流弊定章高等學堂以下皆為普通教育其科目實中西並習未嘗偏廢普通既畢然後以次升入分科大學通儒院查專門分科四十有六經史理文為目十四於周知四國之中仍寓保存國粹之意在辦理人員守定章程自無原奏中學日微中師漸絕之慮今湘省改設之達材等四學堂專習大學分科經史理文各學以未習普通之生徒從事專門名實似覺不符先後亦未免失當就該省情形而論祇留一校為年長諸生肄習之所尚無窒礙原奏所稱之景賢學堂原係嶽麓書院舊址經前撫臣趙爾巽奏改為高等學堂在案擬令該撫等仍照原案辦理其成德船山兩學堂擬令改為師範學堂由該撫等按照定章迅速籌辦其達材一校應如原奏所請招考舉貢生員肄習經史理文各學惟須先行補習普通按照定章高等學堂第一類學科講授庶將來升入分科大學得以畫一學程再該撫等原奏疊稱仿照湖北存古學堂河南尊經學堂辦法湖北存古學堂未據咨報應俟另案核議至河南尊經學堂與湘省辦法大同小異應由臣部咨令改辦師範學堂以歸一律

又黑龍江將軍程德全奏辦理江省學務情形略稱江省係邊瘠之區初各旗舊習成以騎射為能驟議興學并格實多上年年底始先設小學預防凌蹙

之弊於是督責學務處提掣綱領悉心勸辦復飭善後局由荒價項下先行撥銀一萬兩預備省城各學堂購書置器等費至本年於省城四門分設初等小學堂十處復添設高等小學堂一處惟教育貴乎普及師範急宜養成四月間於高等小學堂內又設初級師範學堂簡易科分為兩班其學生飭由蘭綏兩府屬送考五十名先開一班照章純用官費半年畢業以應急需其教習督高等小學堂教習皆由直隸兩湖於師範畢業生內調取充當初等小學堂教習就地取材認真考充終若風氣未開急設官講兼閱報兩處分派員司宣講聖諭廣訓並演說新聞紙類又設圖書館採辦各種圖書俾供眾覽復於高等小學堂內附設同文學社講求日本語言文字專為造就游學之預備復選已習俄文學生七名奏明咨送俄國留學復又添派唐寶書一名統係籌給官費以期學成回江分任教務至開辦法政學堂尤為當務之急於閏四月間先設法政肆習所俾各員有所研究此籌辦省城學務之大概情形也至各城旗與新設改設各府廳州縣由省城籌撥開辦經費各一二千兩見據各屬陸續申報計呼蘭府已設初等小學堂四處綏化府已設高等小學堂一處初等小學堂二處其四鄉各區計改良私塾百餘處海倫直隸廳設有初等小學堂一處黑水廳附在省城除舊有俄文學堂一處計改良私塾十七處大賚廳設有初等小學堂兩處餘慶縣設有改良私塾兩處蘭西縣設有兩等小學堂一處青崗縣設有改良私塾十處拜泉縣設有初等小學堂一處巴彥州木蘭縣合辦高等小學堂一處距省城西南茂興等站及東北墨爾根等站均設初等小學堂六處東布特哈總管在博爾多站設有初等小學堂一處慶輝近亦創設初等小學堂一處惟呼倫貝爾及郭爾羅斯札賚特杜爾伯特各蒙旗其人不通漢語擬先設官話學堂並用滿文繙譯新書以冀逐漸開通此籌辦外城學務之大概情形也前飭學務處遵照學部新章參酌本地情形分別酌定俾各屬官立學堂有所遵循至於一切開支不得濫報

又蘇撫陳夔龍奏請撥款辦學略稱江蘇學務用款向恃銅元餘利自銅元停鑄餘利無著茲據提學使周樹模詳稱省城學務公所業已成立辦事人員亦

經奏派照委第常年所需款項應預算成數詳請籌撥俾資應用除向由司局認定經行放解各學堂以及大學堂學生津貼款約共銀八萬兩應照舊撥充不計外所有蘇省學務處隨時請撥之師範學堂經費初等小學堂經費及京師大學堂游學預備科各津貼並籌備擴充各學堂暨添購各儀器經費每年約計需銀十二萬四千兩皆係按期應放之款見在必須照放此外新奉部章東西洋游學經費均比原案加多約計每年需銀三萬六千兩學務公所經費司局原解每年二萬四千兩尚須添籌銀一萬二千兩通共計算每年除開非籌有的款十七萬數千兩不足以資應付自應查照部章凡係經理財政衙門局所合力通籌詳請酌量勻派分定期限飭自三十三年正月分起按期撥解遇開照加其向由司局經放之款照章仍舊撥充並請奏明立案准其作正報銷以期各無推諉查該提學使所陳預算需用各款按之學務處從前用項多係原有開支此次加增為數有限疊與司道一再籌商若非通力合作實無以濟要需而規久遠應自三十三年正月分起按照預算之數每年飭由江海關籌銀四萬兩鎮江關籌銀三萬兩蘇州關籌銀一萬五千兩蘇州釐局籌銀一萬五千兩其餘七萬數千兩均由蘇藩司竭力籌撥各司道庫局悉照派定數目按月分解遇開照加准其作正報銷其向由司局經放之款仍應照舊撥充以維學務而免委誤

又江督周馥奏辦理江南學務情形略稱大江南北人文淵藪自經前督臣魏光燾著督臣端方竭力提倡抵任後就原有之始基期教化之進步如原有之三江師範學堂易名兩江本年新建齋舍即可續設小學選該堂之畢業生往充教員以為實地練習原有高等學堂按普通預科辦法本年舊班各生冬開畢業以後改辦專門預科原有農工商實業學堂向就格致書院改設農經改造可收學生至二百人見擬將商科專歸商業學堂將原有實業學堂專課農工礦學增定規制俾速造就原有算繪學堂改為宵屬初級師範學堂以去年新設之師範傳習所歸併其內上年所開傳習所原有各生本年畢業擇其尤者已分派各縣為小學教習前設之蠶業公所去年歸併實業學堂本年畢

業擇其尤者派赴各縣巡迴教授以期普及見改名江南蠶桑學堂此外省城新增官立之學堂一為商業學堂教授普通中等學科專為造就各商子弟而設一為簡字半日學堂專為開通下流社會易習官音而設城內分設四所並通飭各屬推廣辦理一為四區高等小學堂及教育研究所於四城各設完全小學校一所以為小學模範一為旅甯第一女學堂本由官紳集資創設旋由司局月貼經費踵設者復有惠甯毓秀多枝亦皆整飭有法又幼稚園為小學之豫備經官紳開辦稍撥經費獎助以端蒙養之基此甯省改良新建各學堂之情形也其師範學堂在省外者江北則高等學堂改為初級師範附設高等豫科徐州由道籌設初級師範學堂海州泰州寶應高郵有師範傳習所其餘民間之自設師範研究會計共二十餘起又從前甯屬官立中學祇有江淮徐海四所見在續立者有淮安通州泰州高郵四所其在省會官助民立者有鍾英正誼達材三所民立者有湖南湖北浙江皖江江西各旅學及培元中學各一所各府廳州縣所設蒙小學堂綜計已有小學三百四十七所本年紳民呈請立案及徐州等屬冊報者共一千一百餘所私塾改良尚不在內此外府州縣分設各學堂之情形也學校林立考核宜嚴學務處派員分路調查自以江甯通州兩處成效為最著餘如徐屬之邳州睢甯以及海州各處俱能認真經理其有課程不完者為之整頓教習不當者為之改延學科不合者為之釐訂經費不足者為之另籌並飭各州縣紳耆開辦勸學所及傳習所一面酌派員紳分赴城鄉演說勸導啟發民智俾知興學之益此查考各學堂之情形也甯垣為南洋總匯負笈出洋之士絡繹於途從前派赴東西各國官費學生約計二百餘名去歲詳定分別文武陸軍學生歸督練公所經理文學生歸學務處經理學費由江屬籌防局及支應局按季籌匯其習日本師範者則由各州縣認解見有師範速成畢業學生十餘名及學習法政速成之官紳二十名均已分別任使本年選派赴日本學警察監獄十二人與北洋見派各生合為一班咨送東渡費由甯蘇皖分認又甯揚各州縣承辦學務管理需員曾通飭就地籌款選紳赴東考察以四月為限此外赴東自費各生照章考驗隨時咨送此

選派學生出洋之實在情形也惟是學制既定經費難籌從前學款由司局撥銅元餘利以爲挹注嗣限制鼓鑄利源遠絀上年設立籌款局抽收甯屬州縣牙帖捐輸賂資補助各州縣承辦學務只可飭令就地籌款以地方之公財謀地方之公益一年統計豫算不敷尙多欲圖教育之普及非收學費不能持久查東西各國除武備師範小學堂外凡入學校之士皆取學費蓋以堅嚮學之志而絕倚賴之心惟是從前已招官費生必待其畢業方能改章然非學部妥定章程通行各省誠恐難於定議又中學以上收費大都取於力足自贍之家有志向學之士至於蒙小學堂多係貧寒子弟不便收取學費外洋各國皆係紳富捐助學生仍納紙筆書籍小費而其強迫教育則在明定國律凡有子弟不學罪其父兄此制中國亦宜仿照初等小學畢業地方官應即表明旌異並將勸學紳耆酌獎總之此時興學非收學費不能普及而普及尤以小學爲要前准學部定章只有勸學一條而無酌收學費及向學與否勸懲各條只有高等小學堂畢業獎勵之條而無初等小學獎勵之條未免缺而不備應請

旨飭下學部會同政務處核議施行至江甯官立高等中學已酌收操衣書籍各費東洋留學生每年官助學費三百元其旅行醫藥書籍等費擬每人每年以百元爲限從前按月原領之贍家費當自本年暑假後一律停發惟西洋各生各國不能一律應由各駐使監督就近查明酌中釐定至出洋武備各生見在核給經費隨後應由練兵處詳查訂章不在此例

又黔撫岑春煇奏陳籌辦黔省學務略稱貴州目前要政以興學爲急與湖廣總督臣張之洞籌商酌撥湖北師範學堂優等畢業生並講求學務人員數名隨帶來黔以資教育考查各屬情形一由籌款不易一因師範無人省城雖設有高等學堂一區半日學堂數所而課程規則不合定章臣悉心體察在省城設立學務處派藩臬兩司爲總辦糧道爲會辦由鄂帶來之揀選知縣宗彝呂聯奎充坐辦兼辦文案咨請在籍翰林院修撰趙以炯照會內閣中書唐爾鏞任可澄充當參議隨時相與考校斟酌損益以期學科漸臻完善嗣奉 諭旨設立提學使仰見 聖明注重學務見在署提學使陳榮昌遵章將學務處裁

撤改爲學務公所由該署提學使將趙以炯等聘爲議紳宗彝呂聯奎等充課長此臣到任以後設立學務處嗣後改爲學務公所之情形也省城原設高等學堂本係大學堂改辦嗣又改爲豫備科功課年齡僅合高等小學堂之選與其名實相違何如循序漸進期收實效是以詳加試驗察其年齡合格之原增附生並另行招考合格百人設一師範學堂課以初級簡易科一年卒業並考選高等小學生五十人附設一高等小學堂即派由鄂帶來師範生分充教員兼管理員此臣辦理師範學堂及高等小學堂之情形也此外省城有新設中學堂一所係貴陽府知府嚴雋熙會同中書唐爾鏞等辦理尙與定章相符科學亦屬完全應令添籌經費設法推廣其原設之師範傳習所學生將次畢業准前學部電注重師範以養成府立師範管中學堂教習見議就傳習所改爲優級選科師範學堂與護撫臣興祿籌商即由興祿督飭提學使妥籌辦理至舊有蠶桑學堂一區半日學堂數所蠶桑雖課專門擬畢業後改爲農業學堂而種植亦可擴充半日學堂業已改辦初等小學堂並推廣多設以宏教育又

設藝徒學堂以冀工業之漸興各府學堂如鎮遠遵義等府或早經營建而規制未合其餘各屬學堂房舍係就書院改造據開辦情形規程課目合法者甚少臣因按照定章酌錄簡明辦法二十五條札飭切實改正旋又飭令先辦高等小學一所初等小學二三所務期合法以爲模範第見在教員不敷分派須俟派赴日本留學速成師範畢業生回國暨省城師範簡易科學生畢業後方足分遣教授庶通省學務可期漸有成效

又學部咨覆浙撫職員張震昌設學收教墮民子弟辦法略謂學務處詳稱山會二縣會詳職員張震昌等稟設學堂收教墮民子弟尙未定章可否准先開辦請示查墮民除籍出自臣朝覆育之恩雖以執業卑微不能自齒於編戶其中被濯舊汚有志向上者當亦不乏其人來咨於職員張震昌等稟設學堂收教墮民子弟以已否改業爲衡分別有無出身獎勵措置至爲允當惟是此項墮民前經浙紳盧洪昶等稟由商部奏請永遠刪除巧籍不准再沿墮民名目咨行有案是墮民名目本可蠲除果其改業有據自應准

入官私各學堂本不必有所歧視若如該職員等建設學堂而復標立收教墮民子弟名目則於比肩來學之人已令抱有歷久不磨之玷其非一視同仁之本意來咨所云墮民子弟甫經脫籍絃誦之濡染未深恐祇能從事於初等農商實業各學堂等語足見此外大小官私各學堂皆不收教墮民子弟致令猥賤之名永無可以湔除之日則所關於轉移風化者至鉅應由貴撫飭屬確查除見操賤業而子弟入學堂者應照倡優子弟不准報捐應試例辦理外其改業已久自知奮勉者各學堂亦應仰體 皇仁與民開子弟一律收容勿加箝制並轉飭該職員等於所辦學堂一律收取民開子弟毋得以收教墮民自限庶愚賤可以改良成見歸於渾化辦法較為持平

又奏請飭查湖南學堂利弊以資整理略稱查湖南一省本係忠義之邦自羅澤南曾國藩等皆以義理之學為根基文事武功光輝史策乃近年以來士風日變往往鼓其血氣之勇而不顧義理之安甚至輕視禮法蕩軼範圍若竟敷衍因循流弊不堪設想湖廣督臣張之洞辦理學務有年其學識足以鎮攝浮囂挽回風氣久在 聖明洞鑒之中湖南本該督臣兼轄省分相應請 旨電飭張之洞詳查湖南學堂利弊商同撫臣悉心經理庶使內外官吏咸知朝廷之待學生寬而有制

又御史王步瀛奏為陝西學務亟宜切實整頓略稱其舊有而必當改良者五其昔無而亟應舉辦者四一宜畫一辦法也一宜慎聘教習也一宜廣閱書報也一宜裁去津貼改為官費也一宜將省城客籍學堂畫開另辦也凡此五端皆由舊日之規模而加以改良一宜聲明定章一律遵守也一宜無論高等師範中小學堂均設附班也一宜注重師範以簡易科為入手之基礎也一宜仿照北洋設立半日學堂以開風氣也凡此四端皆屬創舉之大綱而不容稍緩以上九條利害判然 為陝西辦理學務急宜循名核實力新進步

又學部奏酌改考試畢業分數略稱查奏定學堂章程凡畢業考試以通計各門分數滿八十分以上者為最優等滿六十分以上者為優等滿四十分以上者為中等四十分至二十分止為下等二十分以下為最下等中國此時初辦

尚可從寬見在京外各種學堂逐漸增設其平日及年終考試分數不滿四十分之學生殆絕無而僅有將來畢業考試亦復如之則學生皆可列中等以上無復有出學之人且既分百分為極則而考得四十分者分數尚未及半即可邀獎反不足以示勸故上年山西大學堂畢業經撫臣奏請變通辦理須勻計分數在五十分以上者始准送部覆試升學給獎蓋有見及此也 等此次考驗游學畢業生公同商酌略仿外國學堂辦法凡通計八十分以上者列最優等七十分以上者列優等六十分以上者列中等體察情形寬嚴尚屬得中將來京外各學堂擬請按照此次分別等第辦法一律推行以歸畫一

京師勸學所試辦章程 奏定勸學所章程各省而設
茲依原文略加變通作為專章

- 一 總綱 見於正陽門外租借越中先賢祠特設公所一處為京城學務之總匯名曰京師勸學所
- 一 分定學區 見就內外城巡警總廳所屬分廳地段畫分學區內城計五學區外城計四學區
- 一 選舉職員 以督學局局長為監督設總董一員每區設勸學所員一人總董由督學局委派勸學員由總董選擇請由督學局委派學務董事作為名譽員
- 一 統合辦法 勸學員於本管區內調查籌款興學事項商承總董擬定辦法勸令各區公正紳士切實舉辦此項學堂
- 一 講習教育 各區勸學員應先於勸學所會齊開一教育講習所研究學校管理法教育學奏定小學堂章程管理通則等類
- 一 實行宣講 各區設立宣講所宣講首重 聖諭廣訓凡忠君尊孔尚公尚武尚實五條 諭旨為教育宗旨所在宣講時應反復推闡按條講說其學部頒行宣講各書概在應行宣講之列
- 一 詳繪圖表 勸學員應商各區學務董事繪成總分各圖註明學堂幾處齋室若干隨時報明勸學所其學生班次人數課程及出入款項分別造具表冊分期報明勸學所另造表冊送呈督學局

一定權限 勸學所總董與勸學員及各區學務董事不准於學務以外干涉他事

一明功過 勸學所各員辦理合法著有成效應隨時記功其有特別勞勩者記大功年終由督學局呈請學部給予獎勵其辦理不善者隨時稟撤

一推廣學務 勸學員平時宜合各家及本區紳士查有學齡兒童已屆入學之年隨時記册挨戶勸導使學務日漸推廣每年兩學期以勸募學生多寡定勸學員成績之優劣其辦法有五

一勸學二興學三籌款四開風氣五去阻力

又考察政治大臣端方戴鴻慈條陳學務略稱我國以二三學家創談學務已十餘年考覽未周遽為興辦而學部設立獨後一切聽民自為雖欲不致歧誤又安可得急起直追改良圖進其在於茲猶未晚也臣等查美國人格最高民風獨厚施行教育民間自有成法不煩政府之引繩至於俄義二國致力高等教育不少絕特出眾之才而於普及之方法未能周備故謀生險而乞丐尚多

奧丹瑞那荷蘭諸邦皆於義務之年加之強迫入其國境民俗皆整飭可觀德國則教育行政操乎大備專門之程度既高普及之教思尤廣故在歐洲既有學界管領之稱而日本學制專仿德國至今學士博士游歷調查絡繹相望多有著述以資改良炳焉同風遂為強國夫皮傳外國之法以辦中國之事其勢固有所不能導師具在猶復冥行索途紛歧百出欲事之治烏可得乎用敢就聞見所及斟酌條陳務在采他國之優良資實行之方法焉

又翰林院代奏編修許鄧起樞條陳釐訂學務略稱據許鄧起樞呈稱學堂開辦已閱五年而成效未著厥有二因一由管理之不得人一由教育之未合法查湖廣總督張之洞奏定學堂章程奉 旨准其隨時修改職不揣冒昧謹擬章程十條一學部宜亟設也科舉停罷以後非設立學部不足定統宗而資表率擬請設尙書一人侍郎二人左右丞二人左右參議二人屬設四司一曰考績司二曰甄選司三曰圖籍司四曰會計司其大學堂高等學堂中學校長教習均應設立專官以便歸學部節制至各省學政三品以上者擬請加學部

侍郎銜四品以下者擬請加學部左丞銜學政三年一任亦歸學部大臣考核如是則全國學務有所統轄而不致分歧矣一各省學務宜歸學政專理也各省學堂自辛丑開辦以來皆由督撫主持省會學務處總辦提調文案各員於學務多形隔膜今歲科考試已停學政奉 特旨專司考校學堂則各省學務處應請裁撤擬歸學政經理以一事權而專責成至省會高等學堂有應行修改宜奏明請 旨者則由學政會同督撫具摺以昭慎重一教官宜另行簡選也原當初設立教官之意本為育才而與學自後教官成為閒曹今日廣立學堂則府廳州縣宜各設學官一員管轄一方學務州縣雖有提倡之責而催科聽訟為日不遑更何暇留心學務惟有責成教官專司稽核學堂庶足新觀聽而資督率見在實缺教官應由學政擇其諳曉學務智識開通者准予留任嗣後教職應改歸外補不由吏部銓選專歸學政主持出缺補署由學政咨報學部覆核學政有進退教職之特權則奮勉者自多不致有濫竽之慮矣一學生畢業獎勵宜按所習科學給予官職也查奏定學堂章程大學堂分科畢業獎勵所用仍非所學與科學故轍何異今擬更定分科獎勵法如優於文學者用翰林院優於交涉法者用外務部優於商學者用商部優於財政學者用戶部優於法律學者用刑部優於兵學者用兵部優於工學者用工部其餘各科學之列中等者均可以知縣分發補用蓋知縣所治之事各科皆備至將來農工商各項實業京外尚須添設官缺即可備任用實業學生之階如此則所用與所學庶不相背又查大學堂附設之通儒院名實難副分科業經授職若再令入通儒院研習五年未免虛耗歲月轉妨實用應請裁去免成贅設一大學堂學課宜酌改也大學堂設有經學科一門國文學一門保全國粹用意深遠惟將來大學升入之學生皆由高等畢業而來高等學科原有經學大意中國文學兩門諸生於兩種科學經數年之研究當已深窺其義蘊大學堂為國家儲備任用之人才意在講求政事經學國文但應聽其自行溫習毋庸講堂課授又見在大學堂設有倫理學一門專尚理想空談似應裁去又高等學堂學科設有心理辨學一門亦宜刪去免妨學修一中學堂以上獎勵生員舉人進士

宜定額數也向來各省取中舉人各州縣取進士員皆有定額會試進士額按省分遠近人數多寡爲斷今查奏定學堂章程考試條內有云升學考試但所取之人數視其分數不限以定額夫升學不限以定額而但以分數爲衡則考官錄取必寬將生員舉人進士徧天下矣將來名器愈濫仕途益塞積弊將較科舉滋甚竊惟各省中學堂高等學堂獎勵生員舉人似宜仍照科舉原定額數取錄或就人數多寡酌量錄用亦可至見在各省學堂雖設立遲早不一惟據奏定章程大學堂豫備科與外省高等學堂通限三年畢業者照順天鄉試例屆期奏請 簡放主考則升學考試直省似應通定期限如鄉試值子午卯酉之例以歸畫一而免參差一各省中學堂高等小學堂學生入學年限宜稍寬也查袁世凱等請立停科舉摺內但爲舉貢生員計而未爲童生計也查各州縣童試多者至三四千人少亦有數百人大約年在二三十歲者居多甚有年在四十五十以後而尙戀戀於童試者今歲科考試已停年長之童生亦殊可憫查張之洞等前請試辦遞減科舉一摺舉貢生員三十歲以上至五十歲者可入師範學堂之簡易科擬仿照此法推及童生其二十五歲以上至四十歲者由地方官考驗分別送入中學堂高等小學堂肄業以廣造就而免向隅至四十以上之童生擬各州縣裁汰書吏後即由地方官考選年長童生充當寫生則寒畯不致有失業之嗟未始非體恤之一道也一各學堂宜推廣附學也見在各省學堂多就書院改建不能廣聚齊舍故人數不能多容計惟有推廣附學一法凡省會及府廳州縣學生之住居城市者朝夕往來學堂毋庸寄宿一律作爲附學以便騰出齋舍樓寓遠方學生如此計一堂可容百人者當可容二百人惟附學既不住堂應免收費以示體恤一派學生出洋宜限習專門實業也自辛丑以來各省派遣學生游學東洋者爲數不下數千人糜費不下數百萬其最無謂者曰速成師範曰政法速成論者謂東洋以此爲市道中國擲黃金於虛耗非過當也且見在留學東洋學生惑自由之邪說張民約之謬論聚黨結會妄議國事其爲後患何可勝言夫今當國勢危弱之際自宜首講富強故爲急則治標之計不外取長補短之謀日本之武備及農商工藝規

仿泰西成效昭著吾國就近取則所最宜注重者要不外此數大端嗣後各省遣派學生出洋應以陸軍工藝農政商業礦務各項專科爲準不得派學師範政法兩門敷衍塞責至見在東洋各學生應恪遵本月初三日 上諭講求實學專科分門肄業庶幾學成回國可得致用之成效也一捐納宜永停也科舉妨礙學堂然有妨礙更甚者莫如捐納若捐納不停則執袴市井之徒雖不入學堂仍有出身之望如是則學堂安有起色夫永遠停捐二十七年業經 降旨未及二年疆臣復以開捐爲請且近來捐輸亦成每末圖小利而昧大計非策之得者也應請 重降永遠停捐之旨俾天下曉然於 朝廷用人取士舍學堂外別無他途庶興學可期而育才有望又近來保舉甚濫亦應嚴立限制除軍營異常勞績外其餘概不准保獎官職則俾進無門學堂益見踴躍矣以上各條係爲釐定學務起見伏乞代奏 等公同閱看並無悖謬字樣理合恭摺代奏

又學部通咨京外徵收學費章程略謂准江督周咨開學堂收取學費爲東西各國通例奏定章程亦已採取其法著有明文誠以公家財力只有此數若事事仰給於官不獨力難爲繼抑且勢有所窮查徵收學費可以節省經費推廣學額免各省地界之爭堅學生向學之志誠爲今日切要之圖惟見在學務初興若收取漫無限制亦恐反阻進步茲由本部訂立章程通行各省查照辦理可也

又學部議覆大學士孫家鼐奏學堂經費不敷教難普及略稱原奏稱欲節省經費又不誤教育人材只須於京師立一大學堂立一中學堂立一蒙學堂以爲各省程式各省亦然以爲各州縣程式各州縣亦然以爲各鄉村程式入堂肄業者可令酌出經費不能出費者可令於其家塾自修將來選舉人材學堂家塾一律選用等語 臣等查原奏所稱京師及各省各州縣設立三項學堂以爲程式洵爲扼要之論惟大學堂經費浩繁各省恐難遍設尤非各州縣財力所及故奏定章程京師設立大學一所以爲之倡其各省不能建立大學者應先設高等學堂一所府設中學堂一所縣設兩等小學各一所均由官立以資

程式而中小學堂均准民間捐資自設並經奏定獎章以資激勵至所稱選舉之材學堂家塾一律選用一節查奏定章程凡人出資獨力設立小學堂者或家塾及塾師設館授業在三十人以上者名曰初等私立小學均遵官立章程辦理嗣後應申明定章凡家塾已改爲私立小學學科程度果與定章相符合者應與官立學堂畢業生同受試驗而升入官立程度較高之學堂得有畢業文憑准其一律選用此與原奏提倡私塾用意正復相同又原奏稱保薦人材先須擇公正紳董與以保薦之權嚴擇學堂及私塾中人品行端正學問優長者若干人薦之於州縣官州縣官試之賢則舉之於省由督撫提學使試之賢則因而用之等語意在沿用鄉舉里選之法使學堂畢業入官判爲二用意至爲深遠_臣等查三代學校庠序之設本以造士非以入官東西各國之學亦以敦品治生爲急而非使之盡入於仕途中國制舉取士相沿已久一變而爲學堂故從前所定獎勵實官章程不能不稍從優異惟見在捐納保舉仕途尙難畫一而獨新之於學堂中人亦非持平之論故上年御史陳曾佑請定學堂出身一摺_臣等審慎求詳應俟京外官制大定各省高等專門學堂設立漸多再由_臣部體察情形按照原奏所稱各節與各國入官試驗之法詳細定擬請旨辦理又查原片稱入學堂者多半急功近名之心未免偏重西學恐十餘年後經學漸荒綱常名教日益衰微擬請以後學堂畢業生呈請考試各分門類僅通語言文字者爲一科只供繙譯之用能習製造器用者當另設一項官職厚予俸薪但不畀以治民之權其予以治民之權者必中學貫通根原經史然後內可以任部院堂司外可以任督撫州縣如此區別則中學根源不至廢棄而藝成之學亦得見用於時此真老臣憂世之言_臣等竊維近者世界交通事變日急 朝廷罷科舉而興學堂然所罷者詞章帖括而已非並綱常名教而亦棄之也故立學要義首在發明經史大義以立修己治人之本進而講習格致製造之科學以爲因時濟變之用若偏重西學荒廢中學是爲棄根本而求枝葉之發榮也查奏定學堂章程自小學以至高等學堂凡修身倫理經史各學與理化博物等科皆分別肄習不容偏重其各學堂考試亦必兼重經史及

至升入分科大學又於格致農工商醫等科之外特設有經學一科學科愈進則中學愈深蓋精研科學與保存國粹並行不悖立法本已周密_臣等仍當隨時申明定章通行各省切實遵辦苟治民之官而能通質實之科學尤足以提倡實業開濬利源蓋格致農工無一不繫於民生國計要在因事任能量才器使而已又查原片稱東洋留學生近日已逾萬人以游學爲終南捷徑將來用非其人爲患滋巨等語_臣等查游學日本學生人衆品雜純疵互見其浮薄器張者誠所不免_臣等亦皆以爲深慮竊謂考試錄用固當從嚴而其選派之資格管理之規條更有不得不嚴者_臣部本年七月奏准嗣後京外派遣學生無論官費私費皆應考驗性行純謹具有中學堂畢業程度通習外國文字能直入高等專門學堂者始予給咨非由各部暨各省將軍督撫給咨者出使大臣概不送學等語業經通行各省不及格者不得濫派又_臣部奏定管理游學日本章程特設總副監督以盡愛護指導糾正扶持之責_臣等自當責成該監督等將游學生課業品誼隨時呈報分別等差明示勸懲又_臣部於本年八月奏請 欽派會考大臣試驗游學畢業生均由京外大臣臚列學行履歷備文咨送必在外國高等專門大學得有畢業文憑者方准與考其考試之法則以中外文學與專門科學分場命題詳細校閱統就各科評定分數不及六十分概不錄取自是以後每年舉行游學畢業生考試更當加密務令中文學術皆能闡明而斷不敢有所偏廢此與該大學士思深慮遠之意均屬相符者也三十二年學部會同禮部遵議學堂冠服程式略稱湖廣總督張之洞咨送冠服式樣並據稱在湖北試辦尙無窒礙_臣等酌核擬如原奏所訂各節將各等文學堂自大學以至中學之學生定爲三項服式一禮服一講堂服一體操及整列出行服其出學堂以外隨意游行之常服惟便帽長衫禁止短衣力戒華侈不另立定式至於高等初等小學及與此項同等之學堂皆係十五六歲以下之學童原章所謂年尙未冠應循童子不衣裘裳之義實爲確論均用一式以歸簡易至各學堂衣服材料必用本地產出之布取其質實價廉並啟愛重鄉土之意實於禮教綱維及國民教育之主義裨益非淺又原章載有學堂教

員管理員督率領隊之冠服仿練兵處頒發陸軍冠服圖式一節查操場演習及列隊出行學生既服軍衣則督率領隊之學務官自應概用軍服以示嚴整惟原章以學務官分爲五級比練兵處正副參領以下各官服式查各項學務員及各學堂教員管理員尙未立爲專官亦未定有品秩其本官職任互有等差若強爲比擬殊多窒礙應俟定有專官再行分別等級奏明辦理

又議覆御史陳驥條陳學堂弊端略稱原呈稱暑假前舉行期考諸生託辭天熱來請免考因酌擬每日卯時入考已刻散場初皆遵諾至五月初一日仍堅請免考退後即糾衆罷課自此連日聚衆禮堂登臺演說誹罵亂並逼令監督撤去考試之諭以致暑假亦竟不考而即散學聚衆之初同學有不願與聞者倡首諸人威逼萬端且更勒令入會其勢洶動會中首領印布會章名曰研究會而其實有報告員糾察員幹事員書記員等一堂之內嚴防密探儼成敵國其種種謬戾皆顯犯學堂禁令等語查閱該學生等先因自便私圖請停期考不允則聚衆罷課滋鬧復假研究會名目又別設報告糾察各員是該編修所呈各節自以此項爲最重查定章各學堂學生不准聚衆要求停課罷考及聯盟糾衆立會演說如有犯者除立行斥退外仍令分別輕重酌加懲罰該學生等謬妄情形實與定章悖違既經該編修在都察院具呈入奏應請 旨飭農工商部督同該監督教務長嚴切查明照章辦理至原呈稱嚴定學制凡功課一年不及二百四十日與專科畢業無製造成績可見者均不得給予出身一節查學堂假期本有定限凡例准假期之外不得無故停課並責成該監督堂長年終造送功課冊呈該管學務衙門以備畢業時計算在堂功課日期並核算實在鐘點與定章相符始准畢業至專科畢業本應注重製造成績定章高等工藝各學科目皆定有工場實習及實驗科目學理技術不容偏廢嗣後工業專科畢業均應考驗製造成績無成績可見者畢業考試不得列入中等以上又考試舞弊參照科場條例定章禁嚴或忱於立法之已重難於奉行轉啟徇隱之漸學堂考試自應略示區別應請凡臨時學期學年考試如有懷疑傳遞亂號槍替等弊一經發覺即時扶出不得應考停其升級其畢業及升

學考試關係較重如查出以上各種弊端應即斥革以示懲儆其有平時要求教員增加分數尤爲惡習均應嚴行禁止又糾衆罷考結黨立會照雲南懲辦之法辦理一節查雲南學生滋事經提學使電稱高等學堂學生因事與電報局局丁扭毀歸案審辦全體學生抗不上課當即斥革十九人並追繳學膳各費即係遵照定章辦理嗣後京外各學堂如有糾衆罷考結黨立會情事其爲首滋事之學生即行斥革抗不遵辦者即全體解散蓋道德與法律互相維繫不能遵守法律之學生斷不能有精深之學業而規條窳敗教科廢弛辦一有名無實之學堂滋長囂張之習患乃滋大此 臣部不敢稍有姑息遷就之見並以期諸辦事各員者也

又 諭奉 懿旨國家興賢育才採取前代學制及東西各國成法創設各等學堂節經諭令學務大臣等詳擬章程獎勵之途甚優董戒之法亦備如不准干預國家政治及離經畔道聯盟糾衆立會演說等事均經懸爲厲禁原期海內人士束身規矩造就成材所以勸望之者甚厚乃比年以來士習澆漓每不能專心力學勉造通儒動思踰越範圍干預外事或侮辱官師或抗違教令悖棄聖教擅改課程變易衣冠武斷鄉里甚至本省大吏拒而不納國家要政任意要求動輒捏寫學堂全體空名電達樞部不考事理肆口詆譏以致無知愚民隨聲附和奸徒游匪藉端煽惑大爲世道人心之害不獨中國前史本朝法制無此學風即各國學堂亦無此等惡習欲挽頹風非大加整飭不可著學部通行京外有關學務各衙門將學堂管理禁令定章嚴切申明並將考核勸戒辦法前章所未備者補行增訂責令實力奉行順天府尹各省督撫及提學使皆有教士之責乃往往任其僣越違道干譽實係戕賊人才即如近來京外各學堂糾衆生事發電妄言者紛紛皆是然亦有數省學堂從不出位妄爲者是教法之善否即分士習之優劣固已確有明證嗣後該府尹督撫提學使務須於各學堂監督提調堂長監學教員等慎選器使督飭妥辦總之以聖教爲宗以藝能爲輔以理法爲範圍以明倫愛國爲實效若其始敢爲離經畔道之論其究必終爲犯上作亂之人蓋藝能不優可以補習智識不廣可以觀摩惟此

根本一差則無從挽救並著學部隨時選派視學官分往各處認真考察如有
於其課程學功課荒棄罔又不習而教員不問者品行不端不安本分而管
理員不加懲革者不惟學生立即屏斥懲罰其教員管理員一併重處決不姑
寬倘該府尹督撫提學使等視學務士習爲緩圖以致育才之舉轉爲釀亂之
階除查明該學堂教員管理員嚴懲外恐該府尹督撫提學使及管學之將軍
都統等均不能當此重咎也其各懷違奉行俾令各學堂教品勵學以副朝廷
造士安民之至意此旨即著管學各衙門暨大小各學堂一體恭錄一通懸挂
堂上凡各學堂畢業生文憑均將此旨刊錄於前俾昭法守

又學部會奏呂海寰奏舉行新政宜防隱患一摺略稱原奏稱科舉停罷學堂
極爲鄭重請飭學部嚴定約束學生條律並責成各省提學使隨時稽查有
不遵守章程動以散學要挾者立予斥退等語查奏定學堂禁令內載各學堂
學生不准聚眾要求藉端挾制停課罷學等事遇有本學堂增添規則新施禁
令概不准任意阻撓抗不遵行犯者除立行斥退外仍分別輕重酌加懲罰等
語通行京外各學堂一律遵守仍當隨時考察倘學生有踰蕩行檢違悖禮教
謬論驚張糾眾挾制者必按章懲辦以端士習原奏又稱遣派學生出洋游學
成材固多然見異思遷者亦復不少即如行文紀年直書黃帝甲子雙耶穌之
名詞置正朔而不奉又剪髮改裝皆仿西制以爲便利夫正朔服制爲帝王行
政之大端倘各自爲政紛紛效尤紀綱安在若謂出洋游學不妨暫時易裝然
回華即應復舊擬請飭該管衙門安定章程如有倡言不用正朔無故改裝
之學生或諸色人等照違制律從嚴治罪查游學生人衆品雜其根柢太淺者
誠不免見異思遷良由旅居海外放言高論國法家教均所不及上年奏定管
理游學章程凡學生成績及在校外之行爲均須派員監察如果行文紀年不
奉正朔是昧授時之大義豈能稍事姑容應責成該管監督隨時剝查一經查
出即咨學部分別懲處至學生畢業回國已非游學可比若易服剪髮沿用西
裝被服不衷駭人觀聽應由該管地方官出示曉諭嚴行禁止至京外學堂學
生冠服尤宜釐定均應敦尙質樸不得徒襲形式非詳加酌核奏請 欽定未

敢經於定議至各學堂學生或係有職人員或係舉貢生監會典均有一定冠
服前經通行各學堂每逢 朝廷慶賀大典及開學散學春秋朔望一切行禮
日期均當恪遵 功令不得稍有違異至練習體操意在尙武見在各處學堂
均參仿陸軍部奏定服式尙以爲便其在講堂自習室准著便服應咨各省一
律遵行

又學部詳擬師範獎勵義務兩項章程略稱奏定學堂章程內訂有初級優級
各師範學堂畢業效力義務章程立法甚善惟優級師範獎勵章程所獎係國
子監官職見經裁併勢不得量爲變通義務章程亦有應行加詳之處查奏
定章程內開優級師範學堂程度與高等學堂同而略勝初級師範學堂程度
與中學堂同而略勝師範爲各種學堂之根源故獎勵不得不稍優各等語見
在師範獎勵既不能援用舊章惟有各按程度就奏定章程所定高等學堂中
學堂及程度相當之各項學堂畢業獎勵比照酌擬此外優級師範有選科一
項奏定章程僅舉其名而課目未備臣部曾於去年酌定課程咨行各省分別
試辦近來各省並有舉辦奏定章程所定之師範簡易科者皆爲振興教育急
於求師起見此項師範畢業生似亦宜略予獎勵以資鼓舞謹一併按照程度
分別酌擬至師範畢業應盡義務爲各國所同蓋必如是而後教成一入能得
一人之用教育乃能振興謹就原定師範畢業效力義務章程詳加修改明示
限制凡師範生得有獎勵必俟義務年滿始准服官其有心規避或遷延過久
不盡義務者即將應得獎勵撤銷其効力義務著有成效者仍比照奏定章程
教員五年屆滿之條酌給獎勵

又學部議覆中書黃運藩整頓學務略稱都察院代奏中書黃運藩整頓學務
請復科舉一摺到部查原呈內稱地方貧困不能多設完全學堂以資教育故
欲科舉與科學並行中學與西才分造並有取士之規誠無以易科舉與制藝
等語臣等竊維科舉取士相傳至數百年流極爲帖括詞章之學習非所用光
緒二十九年開學務大臣會奏議請遞減科舉注重學堂摺內聲稱科舉文字
每多剽竊學堂功課務在實修科舉止憑一日之短長學堂必盡累年之研究

科舉但取詞章其品誼無從考見學堂兼重行檢其心術尤可灼知是科舉之與學堂難易得失比較昭然今日停止科舉海內有志之士求為有用之學似已有人才興起之機茲該中書原呈慮及地方貧困不能多設完全學堂以資教育乃係初辦時為難實在情形惟溯興學以來京外官立公立私立學堂已屬不少較之未停科舉以前各處士民已多知設立學堂之有益捐資建校助費游學者絡繹不絕人心趨嚮亦略可見是在持之以久貞之以恆庶幾愈推愈廣教育可期普及若忽言規復科舉微特旋廢旋復無此政體即揆之事勢人情亦豈稱便况從前專重科舉制藝時各處書院每一省城每一府州縣城設立亦不能甚多且書院師生課程亦多有名無實較之今日各處建設學堂之數似尚不及安見一復科舉地方即不貧困教育即可有資耶至謂科舉與科學並行中學與西才分造尤非通論科舉得官可以微俸一試學堂則窮年累月從事於辛苦煩雜之科學舍易就難必非人情且中外政治藝術貴在得其會通庶可措之實用若中學與西才分造勢必各得一偏永無融會貫通之一日似非造就人才之本意要之時局危非人莫濟因乏才而思興學因興學而防流弊是在端正學術慎守宗旨整頓於學堂之中斷不能言造就於學堂之外

又川滇邊務大臣護川督趙爾豐奏設關外學務局略稱我朝威靈藏衛準噶悉臣燼境以西仍為外藩所難者文告不知語言未習非先從語言文字入手不易為功擬於燼城擇地設立學務局一所以為總匯凡籌撥學費考查規制採購圖書儀器延訂教習派員勸學一應事宜皆隸之見已照會在籍度支部主事吳嘉謨充當總辦其開辦經費即擬於邊務經費項下撥銀三萬兩備用茲擬一切文牘統由學務局擬稿送核看名曰學務局案呈似此辦理則樞紐較靈庶可省繁曠而歸簡捷其餘各項詳細辦法容俟督同該主事吳嘉謨次第籌定再行隨時陳明

又奏准都察院代遞候選道許珏條陳學務一摺略稱原奏稱學堂奏定章程非不重四書五經然多視為具文上年在里見十齡外幼童入學堂四五年尚

未讀四書者宜申明奏定章程凡十齡以前必讀孝經四書十齡以外仿從前專經之例許專讀一經等語查奏定章程由初等小學堂至中學堂所以勻配讀經鐘點至詳且備於學務綱要特注重讀經上年復通行各省調查各府州縣學堂課程今春直隸山西河南浙江廣西等省先後送到大致均照章程辦理其有偏重西學荒棄經訓以及墨守舊習科學不備均經隨時指駁至該道員所稱凡十齡以前必誦讀孝經四書十齡外許生徒專讀一經較之奏定章程限讀經書較為減少自係為兒童日力有限期於核實起見等語竊以為限制年齡不如就小學年限酌量分配約計兩等小學於孝經四書之外亦必須再讀一經惟兩等小學為教育初基關繫重要擬由部參酌見在情形酌量修訂原奏又稱中學堂以上不必人人盡習外國語言文字合各省中學堂以上人數苟十人中得兩三人兼習語言文字已足供國家之用陝甘等省當於原定章程中將外國語言文字分別裁減以求盡善等語查該道所稱係專備譯才之用前管學大臣係因時勢以造人才統中外而求優勝蓋鑒於當日能通洋文者往往居奇其稍點悖謬者則專採外國書報異乎中國禮法中國政體者割裂而繙譯之附以私意故為增損假令中國通洋文者多則此種荒謬悖誕之繙譯決無所施其伎倆故中學堂以上各學堂必令勤習洋文而大學堂經學理學中國文學史學各科尤必深通洋文而後其用乃大斯實為息邪說距詖行起見用意各有不同且定章中學堂外國文鐘點不過十分之三其餘修身讀經中國文學以及歷史地理均以中文授課實占十之六七果使咸守課程自無偏重西文之弊原奏所稱分別裁減之處擬俟中國科學大明承學之士各有專家一切專門學問皆能以國文授受再行酌議辦理原奏又稱西式操服必宜禁革查本年軍部會同陸軍部議覆呂海寰摺內聲明練兵處奏定新軍服式尚以為便學堂操服應仿照辦理是學堂操衣准用軍服並非准用西服洋呢洋布有乖於土物心臧之義應由部通飭各學堂一律改用內地自製土布以昭畫一

又湖廣總督張之洞奏定學堂冠服章程略稱近年來各省學堂冠服一端率

皆仿效西式短衣皮靴文武無別學堂以內多歲非聖無法之書於讀經講經功課鐘點擅自刪減以及剪髮膠髮諸弊層出實爲隱憂經詳加酌核各文學堂學生應定禮服爲一式講堂操場及整列出行服均同一式共分三項武學堂學生定禮服爲一式講堂操場及整列出行常服均同一式共分兩項高等初等小學堂學生冠服從簡只用一式當將酌擬冠服章程及製成冠服式樣咨送學部核定在案除督飭提學使將學堂內逆書謬說剪髮等弊隨時嚴禁及刪減讀經講經功課不習國文諸弊認真考核懲儆外謹將酌擬湖北各學堂冠服章程式樣分別咨送軍機處及學部聽候核定

又奏侍讀周爰誼奏稱蒙小學應設法普及以因爲創不爲無見夫以中國一千六百餘州縣每州縣數萬千之人民必待國家設學堂以教之不獨財力不繼且亦勢所不能誠不如改良私塾之爲愈前江蘇紳士呈到私塾改良會章程學部批令極力推廣切實辦理嗣加訪察未盡核實應由學部札知各省提學使詳細考察分別籌辦則小學堂與改良私塾亦可相輔而行惟期實能教育普及而又節省財力方爲至善如湖北奏設之存古學堂法良意美應請飭各省督撫參照湖北章程於省會量力建置但各省財力不同或另籌簡易辦法惟期保存國粹爲第一義

三十四年東三省總督徐世昌奏籌辦奉省學務略稱東省計前後辦成師範學堂師範簡易科師範傳習所體操專修科格致測算專修科全省實業學堂全省中學堂各一所接收營口日本創辦之商業學堂一所維城小學堂蒙文小學堂女子師範學堂各一所官立城鄉兩等小學堂十六所女子小學堂藝徒學堂蒙養院各一所草創經營規模粗具等語同提學使悉心考求迭加整頓查奉省師資缺乏自以注重師範爲第一要義舊有師範學堂僅係初級本科卒業需時而全省校生程度漸高不可不預爲籌畫因遵照學部章程增辦優級選科就師範學堂增建校舍改爲兩級師範學堂即於本科中挑取學行優美者照章授課已於去年年終畢業豫科爲之添延教習增置儀器照學部選科章程辦理其本科學生仍取各處中學程度較高者補其缺額見在實

有優級選科生一百五十名初級本科生一百五十名至舊設之簡易科傳習所命名雖殊功課相類卽爲之歸併一處姑先招集各鄉初等小學及私塾教員令其補習一面仍調取各城文理清通廩增附貢監肄業簡易科俾開風氣體操專修科除去冬畢業兩班外見仍遵章續辦爲之展延學期使圖畫算術諸科亦能兼任其格致測算專修科原係兩班分習查其課程則格致一班見與實業學堂相類而測算一班又於陸軍附屬爲宜且此項專修科本非學部定章所有因將格致班生歸併實業學堂而測算班生則改入陸軍測繪學堂卽將該科裁撤實業學堂歸併格致專修科後生徒增盛大約足爲工業專門之前驅於去冬畢業豫科一班中學堂則因各城設立較少升學者爭就省城見有生徒三百名去冬已爲增置校地一區俟籌有的款再議建築營口商業學堂亦於去冬加增校舍推廣名額並增設夜課使商家子弟得以暇時來校研究維城學堂係以舊有宗室覺羅官學歸併改辦詳加考察親見肄業各生多有入學未久而文筆斐然者天潢貴胄磊落多才實深慶慰去秋卽爲推廣名額增添教員今年更加築校舍業已落成計見在任校肄業者實有二百名之多將來按年增加可期普及蒙文學堂舊額止有一班等因蒙旗事務日益繁紛而譯才乏絕較之歐美語文通達尤罕等語於去年卽通飭蒙古各旗將王公台吉子弟選送來堂肄習漢文漢語兼習科學首由賓郡王選送其胞弟二等台吉瑞春及學生五名入堂肄業近據博多勒噶台親王選送台吉兩名學生四名其札薩克圖土默特均在陸續選送不難漸開風氣其舊有校生亦多有漢文清通而蒙文漸次嫻熟者將來溯源藏梵不至終古榛荒矣其他官立兩等小學蒙養院藝徒學堂女子師範女子小學年餘以來增校增班生徒加多約一千五百人方言學堂等於去冬飭司籌設今春業已開校計見設日俄英文三科其德法諸科擬以次遞及前准學部來咨有將各省方言學堂改爲中學堂之議以奉省士子通習外國文者闕無一二交涉繁夥而外情不通殊爲長慮當咨請免其改章以資深造想部臣體念時艱必當照准奉省圖書缺乏運載維艱等語於去年建築圖書館一所特派專員採買南省

新舊書籍備都人士之閱覽一面於教科各書寬爲儲備以便購買廉價代售以上各節經_臣等詳加計畫已得大端將來之開拓未可故步自封而久遠之規模已覺初基粗具案查前將軍臣趙爾巽於提學使呈辦各項學堂尙未專案奏咨實因章程尙未完密恐有隨時變通之處見在飭司逐加整頓隨時改良除將各項章程表冊分次咨部其所需經費歷年已將學務公所各學堂暨游學各費按次造具細冊咨報學部均係實用實銷其從前奏准之一二鹽釐暨牛馬稅溢收兩項通計不敷甚鉅自當於稅捐項下核實動支將來遞有擴充再爲隨時籌補此外府廳州縣中小各學並滿蒙漢各旗小學隨時督飭推廣見計有一千四百餘所生徒共四萬五千四百餘人均各屬各旗就地籌款公立

又學部通咨各省各項學堂皆歸提學使管轄考核略稱奏定學堂各項章程凡各項學堂皆應歸提學使管轄考核歷奉_旨允准在案茲據奉天提學使呈請法政學堂係由督撫憲派參贊爲監督並另派專員爲副監督不歸本司管轄此外森林農業各校均經延有東西洋專門教員教授各課均隸於勸業道管轄查法政學堂亦屬專門學堂光緒三十二年本部奏准學務官制並辦事權限章程內開專門課掌理本省高等學堂及各種專門學堂教課規程設備規則及關於管理員教員學生等一切事務是法政學堂之教科設備及用人管理諸事皆在提學使權限之內不應另派參贊或藩臬使專管致違定章至森林農業各校亦統歸於實業學堂之內上年本部會同農工商部議奏貴州開辦農工商總局以興實業一摺內開教課規程設備規則關乎管理員教員學生等一切事務及畢業考試事宜應稟承提學使酌核辦理並由該提學使隨時認真督察詳報學部以符定章奉_旨依議在案是森林農業各校管理員教員學生等一切規則本爲提學使職守所關斷難置之不問茲據奉天提學使來呈所稱實與迭次奏章不符除咨行東三省總督并飭行該提學使遵照奏定章程辦理外亟應重申定章通咨各省並飭各提學使凡關於專門教育實業教育之學堂事務皆

當責成提學使管理不得因設立學堂之經費籌自他處或學生畢業後應歸他處任用遂將該學堂管理之權畫歸他處庶與定章相符以收教育統一之效

又學部奏准各項學堂招考限制章程略稱自奏定章程頒行以後將及五年查各省學務情形大都省城則注重高等而中學或猶未備府城則注重中學而小學或僅數區州縣設高等小學堂而初等或竟未設不揣本而齊末如崇墉之無基學堂名目雖有等級之可分學生程度幾無高下之可別推求其故皆由辦理學務者但知援據變通招考而不問學生程度流弊所及則各處皆聚一方之財力設立一二名稱較崇之學堂於小學不復措意爲學生者亦不自揣其學力如何但冀考入以爲徵幸獎勵之地遇有高等學堂招考則中學堂全班學生爲之掣動循是遞推恐紛紜轉徙下級學生永無畢業之人越級躐升高等課程更多遷就之處英敏子弟無由深造普通教育無由振興貽誤後生妨礙學務非細故也_臣等以爲欲救此弊非立將高等以上學堂變通招考之例先行停止不可凡分科大學大學選科大學實科高等學堂高等農工商實業學堂優級師範學堂譯學館方言學堂以及未列專章之郵電路礦暨法政學堂正科屬於高等教育者著概不得招收未經中學堂畢業之學生以期深造至中學以下各項選科尙可略寬期限以待年長失學之人惟須明定資格增設豫科並由_臣部分別停止招考以求漸加嚴密庶幾數年以後普通畢業者漸多而高等學科乃有精深之望謹擬章程繕單呈_覽

又奏准畢業學生發給執照略稱查奏定章程自大學堂以至高等小學堂學生畢業後皆按其所學分別獎以進士舉人優拔歲貢廩增附生有差見在各省開辦學堂日見其多將來畢業請獎之生亦日見其衆若無徵信之具深恐別滋弊端今擬一律發給執照凡畢業請獎得有進士舉人貢生出身者皆由學部發給其僅得廩增附生出身者由部給執照式樣在京由督學局在各省由提學使刊印發給酌收照費明定數目列入報銷

皇朝續文獻通考卷一百四

學校考十一 學堂

宣統元年學部奏分年籌備事宜略稱前據憲政編查館資政院將議院未開以前逐年應行籌備事宜查部職司教育大綱分爲二端一曰普通教育一曰專門教育皆爲國家根本之計憲政切要之圖蓋立憲政體期於上下一心必普通教育實能普及然後國民之知識道德日進國民程度因之日高庶幾地方自治選舉議員各事乃能推行盡利而庶政公諸輿論始無虛別滋弊端此普通教育所以極宜籌備者也立憲之效必以富強爲歸富強之政斷非人才不舉中國大利未與百端待理患在專門之學未精專門之才太少若不研究高等之學術卽不能得應用之人才而富強之圖終鮮實濟此專門教育所以亟宜籌備者也部職守最爲重大部經費實爲支絀而教育爲憲政根本中之根本部應行籌辦至各直省情形不一籌備之事有緩急難易之不同應由部電咨各直省飭司妥速籌議限期報部核定惟是逐年辦理之事日增月益而部事多財絀恐有窮於因應之時擬隨時奏懇 飭下部臣體臣協力籌措以濟要需

又奏議覆御史張世培奏順天府尹破壞學務淆亂定章一摺旋據順天府屬紳士張錫光等九十九人呈請不願歸併等因經部行文順天府調取關係各項學務案卷並派司員前往順天東西南中學堂考查一切情形查順天四路中學堂創始於前順天府尹陳璧議由各屬契稅項下酌加五成專備四路中學堂之用東路設於通州城內南路設於大興縣屬之黃村每年款項均約六千兩西路設於蘆溝橋每年款項三千餘兩北路款項僅一千餘兩已另攤派各屬每年三千餘兩辦理初級師範學堂而東西南三路中學自開辦以來或三年或二年議者謂人數太少程度不齊遂有主歸併中學添設師範之說順天府尹凌福彭到任後札飭二十四屬各舉紳士定期會議開議之時主歸併者十有四人主不歸併者十人遂定於京師另立中學堂一所見在三中學堂學生之經費概行歸併而不主歸併之說者咸不免嘖有煩言此御史張

世培所以有破壞學務淆亂定章之奏也伏查此案順天府尹之主張歸併者實以三路中學堂程度不合學生太少虛擲款項未免可惜故擬歸併京師辦理而順天府屬紳士之意則以此款係屬百姓於正供之外加納之稅原爲四路辦學之用故仍願在四路辦理中學堂等共同商酌竊以爲款項之出自地方者自應留作地方之用一旦歸之於官實不足以饜紳民之望而學堂程度不合學生人數太少分設中學堂三所亦非核實辦法似應照該府原議先在京師設立一所分選各屬合格學生入堂肄業查從前順天府宛平小學堂校舍甚爲宏敞見在該堂移設外城其原有校舍擬作爲順屬中學堂其見辦之東西南三路中學堂學生併於此校肄業北路學生有合格者亦酌量選擇收錄以昭平允俟將來各路高等小學升學者漸多再行逐漸擴充以符四路設學原議所有擬辦之順屬中學堂常年經費自應豫先籌定以便即時興辦上年順天高等學堂經順天府派員整頓每年可有一萬餘兩若以此款撥節動支當可敷用如有不足之處擬請由順天府會商直隸提學使設法籌撥應用至見在所辦之東西南三路中學堂學生既已歸併則從前之校舍廢棄原有之經費慮懸未免可惜若將經費分給各屬辦學爲數無多收效不易自應別籌變通之法以期款不虛糜查順天府咨送各屬紳士會議案內本有籌辦完全師範學堂農業學堂二議據部查學司員稟稱東西南三路校舍甚大西路學堂將永定河道行轅大王廟兩處歸併改設講堂尙爲合式體操場學生寢室均應整理且東路附設之簡易師範生極守規矩專心向學已立師範之基南路學堂附近地畝便於農學實驗尤合農業學堂之用西路規模粗具略加葺治亦可敷用擬請將東路學堂改爲初級師範學堂南路學堂改爲中等農業學堂西路學堂改爲初級師範學堂北路已辦初級師範學堂自毋庸再議更張至改辦學堂經費東西南三路以原有經費核實支用當無不足惟西路經費較絀應否仿照北路各州縣攤款辦法以資補助之處應由順天府會商直隸提學使督同紳士核議辦理惟此次改定之後東西北三路皆辦師範學堂南路辦理農業學堂東西北三路不無願學實業之人南路亦需師範

之選應准彼此酌量選送惟須由各路互相籌給學費膳費以宏裁成而清款項

又都察院奏湖北舉人曹林呈請代奏整頓學務二十一條一學司援學政舊例親巡各府一畫分學司辦學的款不必仰給藩司一學司宜有黜陟地方官之責一慎選學務公所人員一考核議長議紳一教育會不得冒名一學員不得兼差一部章亟宜改訂一實業宜漸推廣一高小學以下學科宜更定一中學以上課程宜速編訂一初級以下之師範生勿限年歲一小學亟宜變通以期普及一公私學堂宜示優異一獎勵改加謹嚴一視學優加資俸一學生宜在堂住宿一堂員教員宜速定品秩一優重監學一嚴定學律一經費宜有限制

又 諭學部奏酌量變通初等小學堂章程並原有小學簡易科酌擬兩類辦法以期學徒日多教育漸臻普及所奏尙屬切實易行者各省督撫督率提學使無論官學私塾均當遵照此次定章分別地方情形切實舉辦並隨時派員認真考核嗣後辦學官紳如再有因循欺飾不遵章程者即由學部查明嚴行參處務期學校日興民智日啟

又奏變通中學堂課程分爲文科實科一摺略謂查新舊學制迭更之際必籌變通盡利之方始收整齊畫一之效此次更定學制自奉到 諭旨之日起所有中學堂及初等各小學堂添招學生均應遵照新章切實辦理其從前原有班次應仍照舊章接續教授不得中途易轍致啟紛歧至中學畫分文實兩科期在分途並進各具專長藉收樹人之效應由該提學使酌量地方情形熟籌辦法如財力充裕教員完備則一堂之內文實兩科不妨並設惟學生原習文科者不得改進實科原習實科者不得改入文科以歸畫一或財力不足教員缺乏變通專設一文科或專設一實科但期核實不務虛名惟文實兩途不得過於偏重致有顧此失彼之虞統限文到由該提學使將籌定通省中小學辦理情形咨部考核

又御史胡思敬奏陳學堂十弊六害並另籌辦法疏竊以學堂之議始於戊戌

成於壬寅自學部建立以來增置內外學員以萬計耗散公私金錢以萬萬計推其命意將以求明體達用之才乎抑令其各習一藝以謀生乎如欲求明體達用之才則當期其大受不責以小知本之四書五經諸子百家之說以通其理參之歷代典章法度 國朝掌故以明其制考之二十一朝成敗是非得失及東西洋歷史以釋其疑寬其登進之途而杜其奇衰之徑求十一於千百庶幾其一遇之如僅爲學藝謀生之計竟欲裂冕毀冠使天下君子盡化爲野人則此輩藝成之後亦當實事求是投之可以自見其長之地胡爲糅和中西另闢塗轍糜以部院州縣之職上下相誘以國事爲玩弄耶今內外黨徒既以學堂爲窟穴各州縣刁紳猾吏又據學堂爲利藪民間之杆杪已空天下之讀書種子將絕此亦厝火積薪賈生痛哭流涕長太息之時而內外臣工無一能抉其受病之根據實直陳者 臣備員臺諫粗有一隙之明謹先列十弊次陳六害末謀所以補救之法凡三大端何謂十弊 臣得畢陳之大學八分科格致農工商醫已不得謂之造士政法偏重各國財政警察監獄交涉亦西學也經科戴空名居首有岌岌不能自存之勢文科分爲八門各國國文歷史占其六其二門一爲中國史學一爲中國文學有經史而後有文既離析爲三則其所謂文者蓋亦取人已棄之糟粕浸水其中而自以爲酒耳今之大學即古之辟雍先朝尊崇孔子列之 大祀乃中學占科不及外洋藝業十分之一且又凌亂若此鄉村之家爲子弟延一蒙師尙知尊異其禮不使與瓦匠縫工並席而食一國之大竟無一曉事之臣本末精粗淆雜顛倒幾菽麥之莫辨是有心撕滅數千年禮教綱常後雖倡言存古自埋自擗自縛自解疾矢離弦悔之何及此一弊也科舉之失失在束書不觀而唯鄉墨會墨是求學堂之失失亦在束書不觀而唯講義是求講義者教員臨時抄掇成篇與科舉場屋之文亡異曩時武進人屠寄充大學堂教習其講尙書以黃帝爲黃種黎民爲黑種但欲投衆人之好遂覲然不顧義理之安在科舉本欲求讀書之才其馴至棄學而圖微倖者士之過也在學堂本欲廢讀書之法其相率較學而成棄物者非士之過也物必用久而後腐蓄久而後敗科舉行之千餘年始爲後世詬病學堂甫闢

初基人人皆言腐敗若再閱時歷日更將何所底止此二弊也師嚴而後道尊古之師有心傳有口說弟子北面終身既死尚爲之持服故雖兵戈擾攘之秋猶能患難相依守先聖一綫之延徐待興王之起今之教習顧視日影而定薪金或一人兼四五差輾轉奔馳有同市道學生既不認教習爲師或且閱堂以困之散匿名揭帖以毀之教習亦路人泛泛相視至乃設計籠絡以求全外洋工師藝徒本無所謂傳授或不以此爲嫌施之中朝國學何辱如之此三弊也古之人才未嘗不可效馳驅之用無忌者至謂三代以來政教不足治今日之民必學西文讀西書然後可窺西人之秘奧今內外學生能通洋文者不下數萬人能讀洋書者不下數千人彼族之祕鑰安在何竟無一人負曝以獻於朝者且內掌樞權外膺疆寄諸老無一能通重譯語言何不令其解組退休別援一二海外負笈來歸者取其位而代之伍廷芳學西文最早爲美國法律專家及爲侍郎不能閱刑曹之稿嚴復譯天演論發明物競天擇譯孟德斯鳩法意發明民權自由既已中毒於民後起者未必青勝於藍充其伎倆亦不過伍嚴之續耳乃學堂定章令中學以上皆以洋文爲主謀曠少年之時日錮子弟之聰明此四弊也古人幼學有起於樵牧者有爲人傭春者有寄食僧舍斷齋畫粥者今事事務爲侈觀學生初入學堂見宮室之美器物之精先已蕩其心志又僑伍衆多互相誇耀粵人之好尙未幾而吳人染之吳人之衫履未幾而楚人效之星期攜手出游酒館戲園客座充塞甚至爭津貼而結伴尋仇爭殺饌而噴飯大詢此五弊也入宗廟令人生敬入邱墓令人生悲入學堂人但知爲崇拜歐美耳一切規制章程既以外人爲法異服異言性質與之俱化其初不知有中國之學其繼且忘其爲中國之民雖不敢倡言毀聖廢經既取六經人倫道德與工商並列在當局本有弁髦之心在學生遂以狗狗相視持之又久必有內尊公輸白圭扁鵲外尊盧邊沁斯賓塞爾同享文廟之太牢躋而祀之四配十哲之上者矣此六弊也學堂之文憑重於公侯之告身點者百計購得棲集於達官貴人之門說求調用但憑一畢業生之名上者予以京卿下者予以部屬朝士通籍二十年反屈伏而處其下奔競黃綠之路寬而士林廉

恥掃地盡矣此七弊也海內老師宿儒凋喪殆盡即其存者亦閉門槁餓不出唯無數社會青年履聲囊橐今日甫受畢業之憑明日便擁皋比之席本人之欺己者又復出以欺人謬種流傳道聽塗說乞人牽駝賣藥安從詰其所授之方此八弊也教習屢易各掉弄筆舌以詭其長而學生之聰明亂矣學生屢遷各計其獎勵輕重以定去留無不請獎之學堂即無不畢業之學生而朝廷鼓舞之法窮矣又况京師招考而外省不知省會招考而外府不知各因處地不同而生集枯集苑之歎將來窮鄉僻壤必無一能登仕版之人此九弊也私馬肥而官馬瘦官田瘠而私田腴官不如私夫人知之人莫不愛子弟愛之切斯望之殷聞新政懸格以招才而不策勵以勉其至者非人情也奪之慈父嚴師之手而託諸不關痛癢之人縱技藝薄有所成而習染之性情先壞民之生也莫急於教養倉廩雖實不能集人人而養之文化雖開不能執人人而教之其理一也王者轉移風氣登高順風而呼之斯可矣人人仰給於上而代籌生計則餓死者必多人受約束於官而代督課程則荒廢失業者必衆此十弊也十弊既滋六害因之而起一曰壓抑寒峻之害自古人才起於寒門者十常七八起於膏粱執袴者十不及二三孟子謂天之將降大任必先苦其心志餓其體膚今學堂一味夸張則窮人之進取已絕計內地一學生費除公帛不計外取辦於私囊者有路費有學費有膳費有紙筆圖籍費有操衣費有旅費合計至少需二三百金夫力能辦二三百金資仗一人就學必家具萬金之產鄉村萬金之家寥寥可指數况子弟衆多即區區萬金亦必割宅棄田始足拚孤注之一擲下此更何望焉循此法不變必釀成貴族華族之局婚姻交游互爲吟域單寒孤姓將無稅駕之方日本明治以前之禍可鑒也二曰攪亂仕途之害執學商之人與以翰林而令其修史執學農學醫之人與以部屬而令其治文書理案履執學工學理化之人與以州縣官而令其臨民雖三尺童子知其不可然即取通習各國語言文字者歸之外務部其遂能辦交涉乎取農工商學畢業者歸之農工商部其遂能興實業乎取法律財政畢業者歸之法部度支部其遂能斷大獄通國計乎知其決不能也不惟不足以語此今試召一

農學專家予以一工藝局召一商學專家予以一官銀號歲責贏利若干能操券而獲乎亦知其決不能也 國家中興未五十年人才消乏至此不培養大木而唯蒸薪是求縱異時盡得歐美祕術能創設新機發明新理徒聚此無數攻金攻木攻皮設色刮摩擗埴之徒布列左右一朝有變其將誰與圖存耶三曰騷擾閭閻之害近時捐派繁重託之學務者爲多奸黨呼集醜類占公所一區冒學堂名目高張門榜呈報縣官縣官利其可入考成也欣然應之俄即憑藉勢力百計侵漁欺壓良善地方不勝其苦往往激而生變故東南各省皆有搗毀學堂之案當大學堂初興歲費二十餘萬是時有學生三百餘人計七八百金養一學生其後學生漸少學費亦漸減今猶不下四五百金養一學生農人胼手胝足終歲所獲不過二十金而止供三十農夫之力供給一學生而猶虞不足異時學生所望其報國者究亦不過爲農爲工爲商之術且半係紙上空談並不能造一機關一土操一埴把一犁與斯世通功易事而先使農者不安於田工者商者不安於市誰爲畫此策者當亦啞然失笑矣四曰摧殘士類之害乾嘉極盛時大縣應童子試者三四千人小縣二三千人庚子和戎以後四民皆亂儒業尤衰曩時風樞戰藝之人如水潦歸壑不知埋沉何所或曰改業矣或曰窮餓死矣或曰轉徙四方矣後起者觀法令更變無常莫敢殫千金而學屠龍之技貧者限於物力富者亦畏避風潮鄉井蕭條絃誦將絕然則曩時不費公家一錢天下出其文藝以應有司之求者如此之多今日講求教育普及巖擲千億萬於無何有之鄉三家之郵賣驢而能書券者反覺難能可貴汨亂江湖之水終日而不得一魚其故蓋可思矣才難之歎自古已然不於士乎求之而專重外洋工業以爲人才在是是猶博土爲弓折枝爲缶不愈求而愈遠歎五曰增長逆餒之害近聞東洋留學生黨派甚多鬼怪百出各省皆有領袖名曰代表潛相句引煽動四方以洪秀全楊秀清爲英雄以張汶祥譚嗣同徐錫麟爲義烈託之文字詩歌極口贊揚目無君父內地學生遙相唱和竟敢謀逐公卿把持官府論者至有學匪之稱此皆年少良家貴介而浸淫陷溺其中如窮邊瘴癘大作冥行衝犯毒遂內攻生非其時念之心惻夫水至弱

也匯衆流而爲一則有倒決氾濫之憂今之學生蓋亦壅積將決之時不設計疏洩反提倡民權之說以推其波罔民而陷誠何心乎六曰推廣漏卮之害學生所需者曰模範標本器具曰紙筆曰圖籍曰試驗機器曰藥料曰操衣皮屨無不從海舶而來聘一洋教習歲破五六千金送一出洋學生歲破七八百金一切建築工程悉召洋人包之自學務大興只日本一國每歲吸我膏血不下數千萬金未收蓄艾之功先受剝膚之痛在廷諸臣日日侈陳富強乃碌碌傍人釀成此極窮極貧之證其何說以解此以上所陳十弊六害激於一時孤憤遂不覺言之過當今擬急則治標妄貢愚見爲學部籌決三策先將中西二學畫分兩途以中學爲主西學爲佐各開基礎不相牽混中學則縣設小學堂府設中學堂省設高等學堂京師設大學堂各一所統歸學部考覈西學則各歸各部各設專門學堂農工商學歸農工商部鐵路電政學歸郵傳部財政學歸度支部醫學歸民政部兵學歸陸軍部法律學歸法部譯學館歸外務部商學括入財政格致學括入農工等科均不必另設專門外省或於省會或於通商口岸各體察情形酌設專門分學堂如船政則設在福州鐵路則設在漢口餘可類推除以上官立各學堂外一切公立私立學堂悉聽民間自便不給獎勵不入州縣官考成亦不准私行科斂其次將考升次第及畢業授官之法規爲定制縣學由提學使於本縣士子中考取若干名入堂肄業作爲廩生府學由提學使於本屬各學廩生中考升若干名入堂肄業作爲優貢省學由考官於本省優貢中考升若干名入堂肄業作爲舉人大學由考官會天下舉人考升若干名入堂肄業作爲進士凡畢業考升均三年一舉行進士畢業後奏請廷試予以翰林主事知縣等官未取者退出學堂俟下次附入新班再考以三次爲止各堂學額照向時科舉例酌量增減優貢出身者並准其考各衙門錄事舉人出身者准其考中書並揀發知縣其各省專門分學堂學生由縣學廩生考取入堂學習三年督撫考試拔其尤者予以博士資送京師專門學堂再三年畢業各予以官或留本部試用或分發各省辦實業其次再將中學課程改定分門按日閱書有札記有問答有會講有月課課卷有教習批評分甲乙

按月積分自大學以下均不用講義除參考各國歷史與地政法外各種科學
悉屏去之毋使亂其心志西學由教習自定課程不必限以一定之格洋文算
術為主課工學電學農學醫學兼習理化法律學財政學醫學仍以中學為根
本如恐改變之初不能同時遽行遞升之法則先從縣學辦起府學暫考錄舊
時生員省學暫考錄舊時舉貢大學暫考錄去歲畢業學生俟三年後一律照
章實行如此則道藝兼盡主賓秩然擬請 飭學部覈議採擇施行

又學部奏近來各省高等學堂暨各項專門學堂報部畢業經 臣部調取試卷
覆閱或調取學生到部覆試不稍寬假惟思高等專門各學堂皆為造就人才
之地 朝廷獎勵出身復予實官原為儲備真才冀收實用迺辦理學務者於
學生考試分數任意寬濫年限既滿不問合格與否一概畢業極其流弊必致
以公家之經費 朝廷之名器為見好私人之地此但就一學堂而論貽誤已
非淺鮮尤可慮者以名實不副之畢業學生或遠出膺民社或誤取為師資於
吏治學術為害尤大是非將高等專門各學堂畢業學生一律調部覆試並明
定辦學不實處分不足以挽回積習擬請嗣後凡各省高等專門各學堂每年
畢業學生經本學堂考試後均限於次年二月以前咨送到京 臣部於三月內
定期覆試其程度符合者將覆試所定分數與該學堂畢業分數平均計算酌
定等第再行奏請獎勵並准應分科大學升學考試不符者均不准畢業如程
度不符之人數至三分之一該省提學使及該學堂監督均由 臣部指名奏參
庶足以規實效而得真才

又奏選派本部參議等抽查沿江各省學務略稱視學官一差為教育行政之
樞紐責任極重條理極繁所有視學專章須由 臣部詳細妥議見離草創粗就
尙待加意推求奏派視學官須俟諸章程奏定之後而沿江各省風氣早開興
學較盛據各該省督撫學司所報告證以京外之傳聞程度不無參差士習互
有純駁設有名實不符或者別滋流弊轉礙教育進步自應遴派專員於視學
章程尙未奏定以前先行實地調查冀能得其實際見擬派 臣部右參議戴展
誠輕車減從前往兩江安徽江西湖南湖北各省無論省城外縣擇要抽查並

派督學局行走翰林院編修張濂內閣候補中書王祖訓隨同前往其河南一
省亦擬令其順道抽查每查一省即將該省辦學情形呈報 臣部以憑考核其
所需旅居夫馬之費均由 臣部給發不受地方官供給

又奏遵章陳明次年籌備事宜略稱憲政編查館會同資政院奏復核各衙門
九年籌備未盡事宜在案查 臣部原奏本部籌備事宜均已按單次第籌辦其
明年單開各項約分教科書籍為一類法令章程為一類督飭各省舉辦事項
為一類而教科書籍之中則又分編輯之書為一類頒布之書為一類謹將原
單預定實行辦法分別陳之查單開中學堂教科書初級師範學堂教科書及
初級師範學堂教授細目女子小學及女子師範教科書以致官話課本 臣等
於圖書局暨審定科各員擇其宗旨純正深明教育者分任編纂立限定程一
經脫稿先由圖書局長審閱再送 臣部丞參復核然後由 臣等詳慎檢覈以
臻周密至各種辭典並由 臣部審訂名詞館廣續編譯此編輯教科書籍之豫
定辦法也其應行頒布之高等小學教科書業於今年先期編輯核計成書已
逾十分之七其小學中學教授細目亦經京師督學局暨各省提學使飭令中
小學堂教員同時編訂年內送部考核一俟彙齊再當甄擇善本俾資應用已
於各高等專門學堂所送講義及 臣部已發行之各種教科書仍照章分飭審
定科及圖書局各員分別審定改正此頒布教科書籍之豫定辦法也又如檢
定中學教員初級師範教員及其優待等項章程擬定蒙蔽回各地方興學章
程悉宜博采成規熟權見勢期於斟酌盡善已飭令司員創具草案應俟 臣等
詳加察核奏明辦理並將前次奏准檢定兩等小學教員及優待等項章程屆
時切實遵行庶為中國師範導其先河此應頒法令章程之豫定辦法也至於
派視學官分查直省學務派員查看華僑學生與夫各省分畫城鄉之學區估
計籌備之經費其圖書館暨存古學堂並應按期舉行一律開辦蓋在在胥關
要政自汲汲不容緩圖必 臣部掣領持綱而後收脈絡貫通之效必各省應紘
赴節而後奏教育普及之功此 臣部督飭各省舉辦事項之豫定辦法也嗣後
如有變通之處及一時尚未籌及者應遵照館章於每年冬間先期聲明請

旨辦理

二年黑龍江巡撫周樹模奏整理江省各項學堂略稱查省城原有兩級師範學堂應設優級選科招足四班分爲理化博物算學歷史四類主課依期成立否由學部調派監督數員管理教授尙稱得法應改爲優級師範選科以符名實另添設初級師範學堂一所按年添班以爲初等小學及簡易識字學塾儲備教員其西北各城旗暨省南各蒙部漢語漢文均不通曉若不設法教導開化既屬無望外嚮尤爲堪虞上年設有滿蒙師範學堂今年畢業卽令各回本籍分充初等簡易教員明年仍由瓊瑋呼倫嫩江布特哈各學堂將滿蒙聰穎子弟考試升學以便廣續辦理各屬學款支絀師範學堂未能及時開辦惟呼蘭綏化海倫瓊瑋各府廳各設師範傳習所以備私塾改良至於女子師範擬俟省城幼女學校畢業卽行酌核升辦至各府應立中學以學生程度不齊未便遽設惟省城設中學一所凡各屬合格學生一律入堂肄業綏化呼蘭海倫三府巴彥蘭西餘慶各州縣所設高等小學開堂較早限令招足四班按年升入中學以資銜接至各屬幼女學校上年僅止四區本年增至十六區仍飭設法擴充以重女學其簡易識字學塾已飭龍江府設立二十塾各屬卽陸續籌設改良私塾則責成各屬視學員會同教育會各就該處情形切實核辦江省地廣物豐利源未闢實業亟待振興從前省城各路小學兼課實業均係豫科程級上年始授農工商本科本年南路農業學堂附設試驗場實行演習北路工業學堂試造紙簾各品頗有成績至各屬初等工業學堂呼蘭綏化兩府各設一區巴彥蘭西各州縣今年各設一區又於海倫府瓊瑋廳等處分立初等農業學堂各就地方所宜擇要舉辦漸次擴張於實業前途不無裨益至於高等專門各校應俟中學畢業學生可以升入再行分別添設

又會議政務處奏議覆御史趙炳麟奏學務急宜整頓略稱查原摺內議學務者兩等一爲變通學堂章程據稱數年以來各州縣祇立一兩等小學若不改革恐失教之民徧滿全國擬請自高等小學以下酌定若何年齡程度限一年內責令學部將高等小學以下按年分門編定畫一課本通行天下使窮鄉僻壤皆可購書官立一兩等小學以爲模範有購書在家教授者聽凡初等小學生三年由地方官定期集驗年齡與程度合格者給與畢業文憑准其升入中學堂其無力入中學者聽如是用款較省教育可以普及等語查教育之道有公共教育家庭教育兩派軍國民制度之國以公共教育爲宜家族制度之國以家庭教育爲便中國向爲家族制度重家庭教育今東西各國皆進於軍國民制度競尙公共教育中國亦不能故步自封故學堂章程採用公共教育之法然物力人材難於普及不可不以家庭教育助之奏定學堂章程自初等小學以至分科大學升學皆有資格階級乃公共教育本義因開辦之初及格者鮮暫定爲變通考選之法高等及中學高小學堂皆有考驗入學之條卽助以家庭教育之意惟原章定例於學堂開辦五年以後卽不行用光緒三十四年學部於酌擬各項學堂分別停止招考摺內將高等學堂以上停止招考而於中學堂高等小學堂仍各留考選一條中學堂條內有云其年在十五歲以上二十歲以下已讀孝經四書文理明順者亦可考選入學先入豫科二年補習高等小學之課程畢業試驗及格准其升入本科將來高等小學堂畢業學生漸多卽將此例停止高等小學堂條內有云其年在十歲以上十五歲以下已讀孝經論語略解文義者亦可考選入學先入豫科二年補習初等小學之課程畢業試驗及格准其升入本科將來初等小學堂畢業學生漸多卽將此例停止是中學堂以下仍藉家庭教育爲助與該御史所奏購書在家教授定期集驗年齡與程度合格者准其升學辦法大致相同惟學部前奏時各種課本尚未頒發故但以已讀某書及文理明順與略解文義爲考選之限今學部所編初等小學各項課本全已頒行高等小學各項課本已編者約在三分之一本年五月以後亦可陸續頒行應請 飭學部酌照該御史所奏擬定章程自初等高等小學各項課本編齊一律頒行之後聽人購書在家教授除讀經講經遵用奏定章程所定經書及注本讀講外其各門學科皆用學部頒行之本講授凡高等小學應授經書及各項課本教授齊全者准其考入高等小學堂本科其尙未齊全者列入豫科皆不給獎敘以示區別但各處中學堂不盡在

省城若悉由提學使集驗尚多不便應均由地方官親往各該學堂公同考驗惟須認真考校以昭核實第此係因窮鄉僻壤學堂一時未能備及變通辦理其力能舉辦之處仍應遵章設學不可安於苟簡又學部見擬酌訂補習學堂章程爲曾入學堂未畢業之學生及曾在私塾習過某種學科按諸奏章尙未完備者而設正在擬議俟奏准開辦後其在家教授而學科未備者即可令入補習學堂不必再入豫科矣二爲認真整頓學部圖書局及甄別提學使據稱學部圖書局挂名不作功課者頗不乏人是以徒耗薪俸課本多未編出其編出者又多詞句不順文理不通凌亂複雜擾人意請飭令處詳議章程嚴定按人計功之法每月每員必須編出課本若干冊方發薪水挂名人員立予裁汰編輯不佳者酌加懲罰各省提學使尤必嚴定甄別章程會同督撫辦理等語查學部圖書局本定有辦事章程等調取核閱局員辦事每日皆有一定鐘點不准曠功似不致有挂名不辦功課之弊編譯書籍須先按照書帙之繁簡難易酌計參考編竣時日開列豫計期限表由局長考核至多以三月爲限不得逾限不交自光緒三十二年四月開辦至上年年底止編譯成書計有七十餘種二百餘冊圖一百餘幅調書檢閱無詞句不順文理不通之處章程亦稱嚴密似可無庸另定章程惟徒法不能自行應請飭學部慎選通材認真督率毋任勤始怠終以符計功授祿之義至各省提學使學部奏定各省學務辦事權限章程內本有三年任滿由學部考察有無實效臚列奏聞及隨時考查不得力者即行奏請撤換之條見又定爲每年年終將任滿者考核密陳即與甄別章程無異惟在該部切實奉行自無庸另定科條

又學部奏派員查學事竣大概情形略稱各省學務應行整理改良之處甚多一曰專門教育查各該省高等學堂皆已設立然事屬創辦學生程度未能合格教科設備又不完全以不合格之學生入不完備之學堂雖襲高等之隆稱實不足爲大學之豫備是必嚴加整理將來始有成效至湖北江蘇之存古學堂意在保存數千年相傳文學然未免仍沿書院舊習其湖南之成德達材景賢三校雖冒法政學堂之名並未遵章辦理每校多者不過百人少者或數十

人徒滋糜費毫無實益此專門教育應行改良者一也一曰實業教育查湘鄂兩省農工商學堂漸次籌設然僅略具端倪江西有高等農業學堂一所江甯有高等實業學堂一所教科程度均未完善其他各省簡陋更甚經費固極困難而教員學生尤爲缺乏蓋由中國先少實業人才辦理不能合法以致設備則因陋就簡教科則沿訛襲謬外觀雖具成就無期此實業教育應行整理改良者二也一曰普通教育如師範學堂省會所在均已設優級選科繁盛府治亦開設初級完全科惟湖北之兩湖師範江甯之兩江師範規模宏遠成就較多至中學堂每府率各設一所惟湖北開封常州松江上海各中學教科較爲完備至初等小學本以教育普及及爲指歸就教授管理而論沿江各省所設者較勝於河南然而謀教育普及之效河南反較易於沿江各省者則以費用之樽節與浮濫而已蓋河南初等小學歲費不過四五十金多亦不過百金而止沿江各省初等小學歲費有逾千元以上者少亦須用三數百元兩者相衡難易較著至江甯蘇州官立小學特派道員或京官爲總理兩湖江西官立小學亦另設辦事機關冗費多而學生少未免與教育普及大有妨礙應令各省嚴汰冗員即將樽節之款以爲推廣之地此普通教育應行整理改良者三也以

上各節應由部按照情形認真整頓

又新疆巡撫聯魁奏辦理學務情形略稱師範爲教育之母新省客籍土著俱乏學有根柢之士招選師範無從措手該學司就原有師範詳訂規則作爲簡易科復選纏民中讀書識字者設纏師範甲乙兩班計自光緒三十三年冬至今師範畢業者共有五班歷經派赴各屬充當教員今年更續設一年簡易二年簡易師範各一班增廣師範乙班爲各屬續設學堂之豫備新省各屬學堂類多義塾改辦法未備前後詳定變通辦法屢遣省視學分赴各屬查視隨時詳請整理計自光緒三十三年下學期至今省立中學堂暨府廳州縣滿營回部所立高初兩等小學初等實業豫科並藝徒半日各項堂塾課程堂舍多已改觀其通省學生人數光緒三十三年祇一千餘名見已增至四倍有餘新省纏民既占多數語言不通教育安能普及該學司詳設漢語學堂擬訂章程

1. 2. 3. 4. 5. 6. 7. 8. 9. 10. 11. 12. 13. 14. 15. 16. 17. 18. 19. 20. 21. 22. 23. 24. 25. 26. 27. 28. 29. 30. 31. 32. 33. 34. 35. 36. 37. 38. 39. 40. 41. 42. 43. 44. 45. 46. 47. 48. 49. 50. 51. 52. 53. 54. 55. 56. 57. 58. 59. 60. 61. 62. 63. 64. 65. 66. 67. 68. 69. 70. 71. 72. 73. 74. 75. 76. 77. 78. 79. 80. 81. 82. 83. 84. 85. 86. 87. 88. 89. 90. 91. 92. 93. 94. 95. 96. 97. 98. 99. 100.

飭屬籌設以爲初等小學之豫備並期逐漸化除漢纏域計自光緒三十四年下學期起至今漢語學堂已有八十餘處後此仍擬逐漸推廣又查新疆自置省以來回民固於宗教向學者鮮纏民以入學爲當差多方避匿即少數漢民知學者亦復無幾勸學所之設誠爲緊要飭屬從速設立復於所內設教育講習科使入所各員曉然於辦學規章教育宗旨計自光緒三十四年上學期起至今具報成立者已有三十餘屬學額之增未始非得力於此

又學部奏聲明定章請飭各省考核學務略稱光緒三十二年_臣部附片奏明各省地方官員補署舉劾等事向由藩司會同臬司具詳見既添設學司擬改爲藩學臬三司會同具詳在案查閱原章於地方官吏舉劾補署大端提學司有會同具詳之責卽是以興學爲地方官考成乃數年以來各省督撫舉劾屬員以辦學功過爲殿最者頗覺寥寥若不聲明定章提學使雖有會同具詳名目恐隨同畫諾不免遂成具文地方學務安望日有起色擬請 飭各省督撫責成各該提學使務遵定章於地方官吏辦學功令嚴行考核其有辦學得力實著成效或玩視學務宕延不辦者准由提學使隨時查明詳請督撫辦理各該督撫應卽按照該司所詳切實考核分別舉劾以昭勸懲庶屬員知所儆懼教育可望振興

又雲貴總督李經羲奏滇省各府遵章設學唯人款兩絀籌辦甚難擬改用模範辦法將全省畫爲五區每區各設模範中學及初級師範各一堂所有各區學款學生均量地方公費之盈絀及人民進化之遲速分別攤派以收實效而維久遠

又學部奏檢定初級師範學堂中學堂教員及優待教員章程

又奏訂地方學務章程施行細則七章三十八條大致以原章爲根本以普及教育爲指歸

又奏進呈第二次教育統計圖表黃冊略稱見製比較圖十一學部表四京師學堂表十八直省總表二十三直省分表三百四十三都凡圖表三百九十有九查閱此次圖表與上次圖表兩相對照不無進步一各省學生人數上次統

計一百零一萬三千五百七十一人此次統計一百二十八萬四千九百六十五人計專門學生加多三千九百五十一人實業學生加多四千九百二十三人普通學生加多二十六萬五千六百四十四人以上三項共計加多二十七萬四千五百一十八人惟師範學生一項減少三千有奇考其原因實以興學之始各省因師資缺乏暫設師範簡易科及講習所傳習所實收學生迅速造就以應一時之需至光緒三十三年間此項學生畢業日多漸敷分布遂將簡易等科次第裁撤而注全力以辦完全師範故學生名額雖略減而學科程度則加深至京師學生人數上次統計一萬一千四百一十七人此次統計一萬五千七百七十四人約計加多四分之一此學生人數增加之大概情形也一各省學堂處數上次統計三萬五千七百九十七處此次統計四萬二千四百四十四處共計學堂加多六千六百四十七處雖參據別表不無異同而學堂增多要可概見至京師學堂處數上次統計二百零六處此次統計二百五十二處約計加多五分之一且上次所報學堂官立爲多此次所報學堂公立私立較官立爲尤多可見民智漸開教育易於推廣此學堂處數增加之大概情形也將來地方自治機關日臻完善學務經費日充就學兒童益衆當不難漸收教育普及之效

又奏定改訂籌備教育事宜略稱_臣部奏陳普及教育辦法係專爲注重小學力圖普及起見除改訂兩等小學課程訂定地方學務施行細則改訂勸學所章程三項業經奏請 欽定遵行外其餘最要次要各項應卽於明年次第趕辦以期進行至原奏應行籌備事宜按之見在情勢既有不同自不宜因循故轍致涉紛歧_臣等公同商酌將最要次要事項分年列單並將原單妥爲改訂有爲原單所無應行增入者有爲原單所有應行刪除者有就原定條文略爲更易者有就原定年限酌爲提前者總期與普及教育之本旨切合無閉並將各條分配宣統三年冀於議院未開以前計日程功擬自明年爲始卽按照此次改訂事宜逐條籌辦

又奏准改訂勸學所章程略稱光緒三十二年奏定勸學所章程在今日轉致

有權限不清之慮_臣等擬確定勸學所爲府廳州縣官教育行政補助機關其除佐理官辦學務之外在自治職未成立地方對於自治學務有代其執行之責其在自治職已成立地方對於自治學務有贊助監督之權謹擬改訂勸學所章程四章凡二十二條由部通行遵照辦理再查城鎮鄉地方自治章程第三節第五條將勸學所列入自治範圍之內與地方學務章程第一條所定府廳州縣勸學所名目性質既不相合且勸學所爲一種機關而列爲學務事宜之一尤屬未當查憲政編查館核覆府廳州縣地方自治章程摺內有城鎮鄉地方自治章程頒布在前其條文有涉及府廳州縣地方自治章程歧異之處由民政部另案更正等語見在勸學所既定爲府廳州縣補助機關應由_臣部咨行民政部另案奏明更正以免歧異

三年學部奏定各部設立之學堂畢業考試權限畫一

又出使大臣吳宗濂奏查日本學校設有國語一科以統一全國語言我國疆域較大人民衆多各操土音是以教育之普通未能速化擬請 飭學部通行內外各學堂無論官立民立一體添設國語科如日本辦法凡入校識字即令該教習等授以官音不得參用上語并飭有編成國語課本者准其呈由提學使咨請學部審定施行以期語言統一裨益非淺

又御史孫培元奏新政待興需才孔亟宜慎重學務以植人才一學務經費宜擴充不宜裁減一提學使所派視學員宜慎重選派一京師分科大學宜擴充生徒一聘請外國教員宜慎選擇一推廣學堂宜注重蒙小學一普及教育宜先順導而後強迫一宜仿設警備學堂一學堂規條宜明白宣示

又學部奏設中央教育會擬具章程略稱教育理法極爲博深教育業務又益繁重決非一二執行教育之人所能盡其義蘊日本會訂有高等教育會議章程上自大學下至初等小學公同討論文部省頗收集思廣益之效意美法良足資採取伏念 先朝詔備立憲海內人士莫不冀教育發達以覘人民程度自創興學堂以來分科大學及專門高等各學中外辦學衙門雖皆竭力籌設然以中學畢業學生尙少並困於教育經費一切規畫均未能驟期完備揆諸

近日情勢尙可徐爲籌議惟中學以下普及教育與憲政尤爲息息相關上年十月欽奉 明詔開設議院縮短期限是普及教育在今日實有迫不及待之勢中國幅員遼廓土俗人情又各自爲風氣措辦學務每多扞格其普及教育之推廣維持教授管理均須廣集經驗人員周諮博訪始足以利推行而免阻礙_臣籌思至再惟有酌采日本高等教育會議章程變通辦理訂定中央教育會章程十四條招集各項學務人員在京師設立會所由_臣部監督會議中學以下各事宜其中難解之疑問均可藉以溝通取便措注以爲_臣部教育行政補助之機關似於學務前途不無裨益

又奏定小學經費暫行章程略稱立憲國家以推廣小學教育爲急務而籌辦小學以規定學堂經費爲要圖上年_臣部奏改籌備清軍將規定小學各項經費程式列爲宣統三年應行籌備事宜查東西各國凡民間設一學堂其校舍用具各有一定之規程即經費多寡均有相當之標準中國有同一小學堂而鋪張揚厲者歲糜動輒千金其因陋就簡者則又講室湫隘校具不完猶似從前私塾設非酌定中數以爲準則殊不足以昭畫一而利推行茲由_臣部擬定小學經費暫行章程五章都三十三條將高等兩等小學所有開辦及常年經費分別規定除建築款項應歸另籌外其餘教員之薪額學生之班次員役之人數莫不立之準繩以力汰冗濫爲主務使裕饒之地不得過事虛糜即貧瘠之鄉亦尙易於籌措似於普及教育不無裨益

又奏高等中等各學堂畢業生覆試分數請明定限制略稱_臣等查京外覆試各項學生其核算分數之法向係將覆試所定分數與該學堂畢業分數及歷期歷年考試分數遞次平均計算蓋以覆試辦法在核學堂平日之成績非較學生一日之短長故不專就覆試分數以定等第之高下惟查各處辦學人員往往欲見好學生平日分數故意寬濫雖覆試分數已列下等而一經與該堂分數累次折算其所得分數依然中選查_臣部於宣統元年附奏學堂考試分數應從嚴核定一片於各學堂評定分數之法歷經嚴切申明擬請嗣後凡高等中等在部在省覆試之各學生其分數不滿四十分者無論該生平日所得

分數若干概不准其畢業查改訂考試章程內載不滿五十分者爲最下等則不滿四十分者更在最下等之後雖稍示限制並不爲苛而豫杜學生徼倖之心實於整頓學風不無裨益

又議覆吉撫陳昭常奏中學以上學堂請援奉天成案仿照陸軍練習辦法略稱查原奏內稱吉省同屬東省迥殊腹地其形勢之衝要人民之柔弱較之奉省爲尤甚似非注重軍國民教育不足以振國威而固邊圉見在奉天中學以上各學堂既仿照陸軍教練辦法吉省情事相同仰懇 俯准飭部援案辦理查臣部會奏議覆東三省總督錫良奏變通奉省中學以上各學堂兵式體操仿照陸軍練習打靶摺內稱此係因該省情勢稍殊特別量予變通吉林亦屬東省形勢衝要人民柔弱較之奉省尤甚誠有如該撫原奏所陳者地處邊陲自不能以腹地各省相衡 臣等公同商酌擬請准予變通所有該省中學以上各學堂均援奉省成案仿照陸軍教練辦法一律於每學期內揀定一星期日由各學堂監督教習督率學生於學堂之外擇地練習打靶以期作育邊材而振興士氣其一切詳細辦法統須遵照 臣等前次奏准成案慎重將事以免滋生事端惟是此項彈藥需款頗鉅該省自去歲疫癘繼以火災財政奇絀勢所必至應由該撫酌量情形倘財力稍有不濟即無妨暫從緩辦以省糜費而慎事機此不可不預先籌及者也

又奏擬訂單級教授二部教授辦法略稱單級教授之法與普通教授不同普通教授按年級相當之學生以分班次各班須各任一教員單級教授則合年級不同之學生若干班編爲一級一教員可兼教各班一則需員多而用費繁一則編制簡而效用廣歐西日本之教育大抵得力於單級教授爲多中國興學伊始地方財力既絀學童人數無多程度復不齊一欲謀普及舍單級教授別無審端致力之方至二部教授法則將全堂學生於一日之內由一教員分爲前後半日教授其編制之方則有單式二部及複式二部兩種單式二部得適用普通教授法複式二部須用單級教授法其在窮僻之鄉此項學堂尤宜多設蓋經費絀則教員不能多聘校舍狹則學生不能多容又或因通學道遠

而往返動費多時或因兼顧謀生而讀書易於作輟種種窒礙皆足阻教育之進行惟編爲二部則因材因地均得措置咸宜所謂一舉而數善備也

又御史蕭丙炎奏民閒求學維艱亟宜實行校外教育略稱 朝廷廢科舉興學堂設專部所以爲民造就人才也乃學堂未易徧興教育難言普及民閒就學之士視往昔且日減夫豈爲謀不臧哉亦因民之求學維艱有不得不速行補救者曩者家庭教育父誡其子師勉其弟人人有教授之法家家有從學之資今則舍學堂別無肄業之地進身之階家有神童不得小學一紙文憑不能立躋中學何論其他此限於學級而民閒求學維艱者一也學問之道原不以貧富分優劣究其成材膏粱文繡中居少數艱難困苦中居多數今則貧者裹足富者揚眉即就本國而論非歲糜數十金或數百金不能達願學之目的而遠涉重洋獲稱博士更無論矣此限於學資而民閒求學維艱者二也跬步之內必有芳草十室之邑必有忠信天之生才固不以地限也今則通都大邑閒官立公立私立學堂使附近居民往學焉而窮鄉僻壤之民礙於山川道路未便負笈裹糧雖欲求一日之學而不得此限於學地而民閒求學維艱者三也自古勤學之彥多在貧乏之中或採樵問道或約繩誦書蓋其自謀者切也今則齊集學堂舉凡授課聽講飲食起居悉依鐘點鐘點之外別無作爲彼寒畯之徒欲挾其暇晷以爲他項謀生計者其勢不能此限於學時而民閒求學維艱者四也人之智愚均由天授無關乎年齡之少長也今學堂招生必若干歲始入中學若干歲始入高等而各堂卒業又有三年四年五年之分不問其人之天資如何造詣如何但及歲而留堂焉及年而畢業焉於是生而知之者未許其捷獲敏而好學者轉阻其進行此限於學齡與學年而民閒求學維艱者五也凡此求學維艱之處俱係民閒實在情形見查學部新章有單級教授二部教授諸法未始非爲謀普及之方惟設想仍囿於校中籌思未及於校外不知日本近年極力講求校外教育之法其專門及中學皆頒行校外講義此法本創於英國厥後美國效之迄今德意諸國皆效之若中國仿而行之得校外教育法以補救之其裨益誠非淺鮮也擬請 飭學部速議章程通行京外實

行校外教育無論何項學堂均發校外講義聽民自擇習熟之後准民自行呈明而官爲之考驗懸格以待及格而取中而獎但獎學位不給實官授官之時另行考試而一切學級學齡學年之說皆可不拘至於編纂講義定教育之宗旨示爲學之門徑折衷古今中外之學說而歸於適用則責成學部講義之頒行風氣之開通體察各省情形而妥籌辦法則責成提學使臨時之考驗平日之勸導使民悅服而景從則責成地方官似此通力合作在上者有輕而易舉之能而幼學壯行在下者有樂於從事之概行見教育不難普及人才由此奮興而 國家之收效更速矣尙煩爲民謀建築籌經費斤斤於講堂宿舍閒哉

又學部奏准停止各省高等中等學堂畢業覆試將高等統歸部轄中等統歸省轄

皇朝續文獻通考卷一百五

學校考十二 學堂 貴州 八旗

光緒三十一年練兵處兵部等奏出使大臣梁誠奏請設立貴胄學堂一所專為王公大臣子弟肄武之區以示優隆而存體制特規模創始條目綦繁其開辦章程俟擬定後再行專摺具奏

又練兵大臣奏擬訂貴胄學堂章程約分六大綱曰總則曰職掌曰規條曰課程曰考試曰經費各依門類繫以子目附列課程表作為試辦章程暫擬就神機營舊署改建講堂學舍俾得剋期舉辦並懇 恩賞宏敞官所以為逐漸擴充之地見擬各條內如有應行變通修改之處開辦後察看情形隨時酌核具奏

學堂總則

一陸軍貴胄學堂設於京師隸於練兵處專考收王公世爵暨四品以上宗室見任二品以上京外滿漢文武大員之聰穎子弟教以普通學術及陸軍初級軍事學並入軍隊觀覽學習統計學期以五年為畢業

二王公世爵等各將子弟於奉 諭旨三個月期限內王公世爵用漢文見任滿員用旗文漢員用咨並開具簡明履歷送呈練兵處註冊聽候訂期遴選

三王公世爵等呈送子弟如逾三個月期限或延至開學以後者概不錄取四遴選學生以體質強健文理通順並無暗疾嗜好年歲在十八歲以上二十五歲以下者為合格其王公世爵子弟中閒有文理不能及格而體質尙與軍人格式相符可酌量從寬錄取令其補習漢文一年然後隨班肄業如資質過鈍與全無補習漢文之望者臨時剔退

五學生額數遴選時權取一百六十名俟入學三個月後嚴行甄別一次酌留一百二十名為定額
六權取之一百六十名學生須遵照練兵處臨時頒訂之入學章程同時會齊入學不得參差到堂致與教法有礙

七定額學生分為三班每班四十名各設講堂一律講授功課如名數不及定額或須逾額溢收俟臨時酌量再行核議

八學生在堂內無論何項官職均須恪遵學堂隨時奏定堂規禮節如有違背堂規及乖錯禮節等情當按所犯重輕照章核辦

九年長不合定格與充當差使之王公世爵雖礙難入堂受學而情殷尙武志切從戎者自應俟開學後體察情形隨時另訂專章奏請入堂聽講

十學生入堂後應用筆墨紙張課本軍衣飲食等項經費均由學堂一體支發

十一學生五年畢業大考考列優上中三等者應分別發往新軍學習初級軍官職務四個月期滿後由所隸新軍統將出具切實考語送交練兵處考驗分別等次發給執照並由練兵處開單奏請帶領引 見原有世爵官階者聽候 錄用分別優予出身以示鼓勵其有考列下等者應選擇尙堪造就之員酌留再習一年餘均退學酌留再習者如來歲復考下等亦即退學

十二在學堂肄業已及二年暨屢考優等並大考畢業各學生如有願赴外洋學習陸軍與入陸軍別項專門學堂研究高等學問者應由練兵處分別考驗遴選合格奏明咨送

十三學堂開辦五年期滿後如確辦有成效凡在事出力人員應由練兵處擇尤請獎

十四此項試辦章程係按照見在情形變通酌定俟將來各等陸軍學堂一律開設完備後應由練兵處隨時修改增訂

官員職掌

一此堂關係綦重在事各員必須熟諳學務明悉時事忠誠練達者方可派充堂內應設總辦一員監督一員提調一員普通學正副教員共六員兵學

教員三員第三學期內正醫官一員副醫官二員教員兼繙譯三員漢文正副教員各二員齋長六員學生一百二十名文案一員收支委員一員支應

司事二員司書兼印刷五名醫兵四名號兵二名差弁三名門丁夫役約四

十名如考收學生不及一百二十名則數目以下人等均須酌減

- 二全堂事宜均歸練兵處王大臣督理設總辦一員專司其事凡經理學務獎勵學生管轄在堂人員皆其責任俟見擬章程奉旨後即由練兵處開列素請武學大員銜名奏請 簡派以昭鄭重仍由練兵處王大臣隨時考核其章程內遇有應行變通之處並督同總辦籌議
 - 三監督用資深學粹確有閱歷之陸軍學生中選派專司核定功課考查學生及掛號請假等事並教授功課以補教員之不足
 - 四提調由通曉兵學教育人員內選派經理全堂庶務及約束夫役修造購辦等事凡用款較多者須估價開單稟請總辦辦理
 - 五教員專司教授功課考查學生普通學教員由優等師範學堂畢業生或由專門學業人員中選派兵學教員暫時聘用外國品端學粹之員正副醫官由北洋軍醫學堂精通中西醫學人員中選派教員兼編譯由出洋畢業生中選派
 - 六齋長擇宗室及旗漢人員老成練達明白教育者派充每員管學生二十名除講堂操場外凡學生在自習室齋舍及疾病事故並請假出門皆由該員監察隨時呈報監督如遇緊要事件稟承監督辦理
 - 七文案專司往來文牘及會議時記錄等事
 - 八收支委員專管出入賬目及堂內人員薪工餉項一切賬目均須按月按年呈堂考核不准有借支拖欠等事
 - 九支應司事專管購買物件備辦火食並收發器具及操衣靴帽等件
 - 十司書歸文案管轄專司鈔錄等事印刷歸監督管轄掌臚寫印刷之事
- 學堂條規
- 一學生到堂後應歸堂內各員管轄在講堂操場聽教員教授在自習室齋舍聽齋長監察在飯廳隨同食各員出入
 - 二學生均應住堂每週星期准其回府回宅一日此外不得率行請假惟兼有差使者臨時察看情形酌量辦理

- 三堂內各生均宜以正大拘謹互相勉勵如有聽信異說邪僻乖張有違禮法聖教者立予退學
- 四學內辦事各員及中外教員皆應遵守總辦命令如有違背章程或學不勝任者隨時撤退
- 五總辦命令凡有關於功課者交監督辦理凡涉於雜項者交提調辦理均由文案書於堂諭簿內傳知該管等員蓋章印押違即辦理倘有貽誤即惟該管員是問
- 六凡堂內員生均著軍服其便服等項一概不准攜用
- 七入堂出操均依號令屆時各生攜帶應用之書籍課本器械等件依限前往不得有逾定限
- 八學生除星期例假外不得無故請假如有必須請假事故稟呈總辦臨時查照定例變通辦理
- 九各員生不得在堂內飲酒燕會並不得私相饋遺
- 十堂內設講堂兩所專備教授功課操場一所專備教授操法自習室兩所專備溫習功課齋舍數所備各生住宿總辦辦公房一所各員辦公房各一所醫室一所養病室一所
- 十一堂內設會議廳一所每屆星期六日各員遵照臨時酌定時刻到廳會議堂內應辦各事如有臨時會議應由總辦核定隨時傳集
- 十二堂內設值日廳一所自提調以下除司事司書外各員均須輪流值日管理堂內一切事宜當值者以二十四點鐘為定限
- 十三堂內設會客廳三所總辦以下員生凡值辦公授課時均不得會見賓客有欲入堂觀覽者無論中外何項人等均須於前日知會值日員以便從優接待凡臨時申請者概不准行
- 十四堂內設飯廳一所總辦以下各員生除因操或因公外出不計外餘均同到飯廳共餐膳食
- 十五早午晚三餐俱有定時各員生除因操或因公外出不計外餘均按時

赴餐不得擅逾晷刻

十六堂內設行禮廳一所每屆元旦及開學放學 皇太后萬壽 皇上萬壽

壽 孔子誕日由總辦帶領各員生詣廳行禮以明尊君尊師之義

十七堂內齋室依次編號每齋門首釘木牌一方載明本齋諸生姓名

十八堂內各屋所用器具按數編號登記冊內每屋貼單註明器具數目每

月由提調督同收支委員查驗一次

十九堂內夫役按地派定各執其事發給號衣以憑識別每星期六日由

提調派弁點驗一次以免紊亂

二十辦事各員在堂祇准帶跟丁一名各發腰牌一面以便查考儻有過犯

卽照堂內夫役懲辦學生備有齋夫伺候周到不得自帶跟僕入堂

二十一每年各學生起居飲食等項由學堂隨時酌訂時刻飭令在堂各生

一律遵守

二十二堂門啟閉宜有定時查齋之後大門上鎖鑰匙交值日員收管非因

公事不得啟門

二十三管理員均宜隨時隨處飭夫役掃除房屋院宇以避疫癘

二十四每逢星期日及端午中秋冬至各節 皇太后萬壽 皇上萬壽

孔子誕日各放假一日年假約二十一日以內暑假約二十一日以內

二十五學生有病應由學堂所設醫官診驗分別留堂療治如時久不能應

課應操者酌送回府回宅以資調養

二十六藏書樓軍械庫馬廐等項開辦之初暫不建設嗣後察酌情形次第

創舉惟教育人員應用參考中西圖書典籍與授課相關之器械品物擇要

購備

二十七學生記功條目略舉於左 一恪守堂規始終如一者記大功 二

服從命令誠實不欺者記大功 三學業優異品行端正者記大功 四見

理真確不惑異說者記大功 五束身自好屏絕浮囂者記大功 六勸善

規過協和同學者記大功 七勤謹向學精進不已者記功 八緘默寡言

實心任事者記功 九趨向正大不偏不倚者記功 十願惜身名率履謹

飭者記功 如有與以上各條相反者應酌量分別記過其屢記大過與記

過多次而學業無精進之望者卽退學

二十八其餘管理細目應照學務處奏定學堂章程內管理通則變通辦理

功課程限

一本堂功課程限總計五年彙分四期習普通學三年爲第一期入軍隊歷

練專科兩個月爲第二期習軍事學一年半爲第三期入軍隊歷練各科軍

官職責爲第四期第一第二兩期內功課程限分別列表隨記概要按期授

課以培其體第二第四兩期入隊歷練所有功課程限臨時另訂專章頒行

二每年自開學後至暑假前爲前期自暑假後至年假前爲後期每七日爲

一星期按課目之緩急訂授受之先後普通學第一年每日平均授課五點

鐘第二年每日平均授課六點鐘第三年每日平均授課七點鐘是雖逐年

遞加亦可隨時酌改以臻美備

三第一第二兩期功課表內所訂鐘次均指在講堂與操場而言其餘均在

自習室溫習在講堂所授功課自習鐘次隨時釐定

四各項功課每學期所授項數及每期所習次數原可彼此增減前後挪移

惟至畢業時須符所限程度爲準

考試規則

一考試共分四等一曰月考二曰期考三曰年終考四曰畢業考每月由各

教員自行考試所授功課爲月考每屆暑假前後由監督歷試所學功課爲

期考每屆年假前由總辦歷試所學功課爲年終考每屆畢業由總辦稟請

練兵處奏明 派員考試爲畢業考

二考法分爲三種一問答二筆述並作文三操作問答評其口述筆述評其

試卷操作評其演習

三評定功課按北宋國學積分法每題以二十分爲度匯其總分數取平均

分數以定等第

四分數共分三種一功課分數二技術分數三品格分數功課及技術分數為承考各員歷次所定品格分數為監督同各教員齊長平日所定每屆期考年終考畢業考必合臨場及平日各項分數一併核算以定高下惟平日分數不得多於臨場分數以酌度適宜為要

五各項分數平均計算每課目得十七至二十分為優等十三至十六分為上等九至十二分為中等五至八分為下一至四分為不及等

六月考核定分數後須將本月內品格分數一同加入為總分數由各教員呈送監督訂定等第榜示

七每屆期考定分數後須將前屆期考分數或年終考分數及本期內若干次月考分數各取十分之一並本月品格分數一同加入為總分數呈總辦訂定等第榜示

八每屆年終考分數後須將前次期考分數及本期各月考分數各取十分之一並本月品格分數一同加入為年終考總分數訂定等第凡列優上中等者酌給獎稿

九每屆畢業考先期牌示停課十五日溫習舊課及考校核定分數後須將前次期考分數本期各月考分數各取十分之一並本月品格分數一同加入為畢業考總分數並由總辦督同堂內有關教育之員公同會議各生品學才識志趣及平日功過列為詳表與總分數參酌定等第由練兵處奏明照章辦理

十每屆期考如實因疾病及重要事故不能與試者准於半月內補考

三十二年學部會同吏部陸軍部議覆御史王步瀛請定蔭生入學期限略稱原奏稱漢文武蔭生於年二十以前應令在貴胄學堂或練兵處學習三年然後帶領引見等語該御史所陳向為當務之急擬請於五年之內應蔭者仍照例承蔭及歲者仍照例引見分別錄用後令入學堂俟學習期滿畢業照例銓選分發其年在四十以上者照吏部奏准免考試章程免其入學願入學者聽至五年之後自辛亥年為始應蔭者照例承蔭及歲者照例帶領引惟必由

兩等小學入中學曾受完全普通教育方准銓選分發升入中學時應免考試以仰體朝廷報功任子之意如中學畢業後願再習專門者由部檢其身體察其學業於文武兩途酌定相當學堂送入肄業果能有成即由部奏明請獎其未經入學之蔭生只准虛職榮身不能出仕滿蒙蔭生事同一律其難蔭生一項原奏雖未論及惟國子監既已歸併不能入監讀書亦應仿照辦理

三十二年學部右侍郎寶熙奏設法政貴胄學堂請飭軍機大臣會同學部妥議課程詳定規則自王以下奉恩將軍以上暨滿漢中之公侯伯子男等爵及宗室人等如有入學資格均令一體到堂肄業以儲憲政人才

三十四年署理歸化城副都統三多奏准選蒙古王公勳舊子弟送入貴胄學堂肄業

又陸軍部奏陸軍貴胄各生畢業出身暫行章程略稱查該堂開辦以來學生均專心向學見在時局艱難該生等能早日畢業則收用自可較速等擬以第二期學課分加於第二第三兩年之內將前定年限改為三年畢業於學程尚無妨礙惟見在畢業學期既經改訂等級及出身辦法亦量為變通俾資遵守該堂事當創始肄業各生職官較多所有畢業出身自不得不略示優異以廣登進謹將擬訂章程繕單呈覽

宣統元年 諭理藩部代奏喀喇沁郡王貢桑諾爾布呈請入陸軍貴胄學堂聽講並請留京當差一摺著准其入陸軍貴胄學堂隨班聽講

又憲政編查館奏遵設貴胄法政學堂擬訂章程略稱我朝宗學官學之制至為周備歷久弊深近改設宗室覺羅八旗高等以下各學堂並另設陸軍貴胄學堂已謀普偏教育之方尙少專治國聞之地擬仿日本學習院之意變通其制設立貴胄法政學堂一所凡宗室蒙古王公滿漢世爵及其子弟曾習漢文者皆令入學閒散宗室覺羅及滿漢二品以上大員子弟亦准考取肄業分為正簡兩科正科四年畢業簡易科二年畢業其業經從仕貴胄及滿漢四品以上官員另設聽講科一班專授法政大義查從前兩翼宗學考課本有分等教戒撤退章程等謹援成例明列條文共九章三十九條並豫算經費數目

擬請 特派王公一員二三品大臣一員分任該學堂總理監督之職以資督率奉 諭見正豫備立憲需才孔亟凡宗室外藩王公滿漢世爵若不豫為培植何以儲政才而裨治本應即設立貴胄學堂以廣造就著派貝勒毓朗充貴胄法政學堂總理農工商部左侍郎熙彥翰林院學士錫鈞充監督務宜認真辦理毋負委任至宗室王公賢其子弟實為滿漢及外藩世臣之表率如有及歲尚未入學與入學後半途退學或不守學規等事該總理等尤宜破除情面勸懲一切照章辦理至陸軍貴胄學堂最關緊要仍須認真勸勉廣儲干城又總理貴胄法政學堂貝勒毓朗等奏續擬貴胄法政學堂章程

右貴胄學堂

光緒三十年荆州將軍綽哈布等奏籌辦荆州駐防中小蒙養學堂並遴派監督提撥經費略稱荆州據長江上游駐防多動舊後裔人數多至四萬有奇非多設學堂不足以宏作育查該駐防舊有輔文書院一所八旗義塾十所官學五十六所輔文書院擬改為中學堂其學生以生監俊秀中學已有門徑者充選年限十五歲至二十四歲止四年畢業義塾十所擬併為小學堂四所其學生以秀良子弟能背誦經書者充選年限十一歲至十四歲止四年畢業官學五十六所擬歸併為蒙養學堂十所其學生凡八旗童蒙年七歲者皆入此學四年畢業查外國設立學堂多注重普通教育蓋以凡民之性中材為多有是學以立基址上焉者固深造無難其次亦資生有具而且省城設有高等學堂中學畢業應就近咨送省垣以資造就惟是興辦學堂經費為先凡諸建置疊經派員勘估約計需銀二萬餘兩而常年經費非一萬數千兩不辦各學舊有經費統計不過三千餘兩所短甚鉅荆防丁多餉絀無款可籌奴才端方竭力籌維查有已裁缺之荆州正左右三衛守備向有屯糧平餘一項每年共錢一萬吊內外屯糧見應改歸丁漕徵收分坐十二州縣奴才端方檄飭荆宜施道余肇康查明此項平餘約有錢一萬吊分飭各該州縣撥充荆州駐防各學堂常年經費奴才瑞興前在護理將軍任內即經與奴才端方往返函商奴才綽哈布道出武昌復得面加商榷意見相同見經督飭將應改各學堂趕緊興

工奉 硃批著即督飭認真辦理務收實效

三十一年杭州將軍兼署浙江巡撫瑞興奏改良滿營學制並添設省城學堂略稱查杭州滿營舊有梅青書院一區由前杭州將軍常恩於光緒二十八年改為八旗小學堂雜技一營改為八旗武備學堂均經陳明在案奴才見查得杭州駐防營兒童已及學齡者約三百人左右擬於營內設初級小學堂四區務令在營各幼童一律入學舊有小學堂學生肄業有年程度較高即定名為高等小學堂畢業後照章送入杭州府中學堂將來初級小學堂畢業生亦可升入本營高等小學堂若夫武備學堂尤關強國之要滿營改設而後尚不乏可造之選擬俟畢業酌送十名入浙江省城武備學堂合之原定省城高等學堂中留設旗籍十名之額庶兩途並重文武相資惟小學開辦經費核計總須洋銀一萬餘圓之譜高等小學堂常年開支每歲亦共需洋銀一萬圓之譜奴才曾與前撫臣聶緝槩屢次面商奴才見雖兼署撫篆要不敢以事屬滿營避嫌中輟擬仍飭布政使妥議籌撥以便開辦至於浙江省城除高等學堂及府縣所設之中小學堂外有初級小學堂十區高級小學堂一區擬再添設高等小學堂一區又查城外江干湖墅兩鎮為附郭之大市集其他僅各有初級小學堂一區應再各加設初級小學堂一區以為之輔

又四川將軍綽哈布都統蘇魯儀奏成都駐防改辦初等小學堂略稱一切費用皆奴才等一時權宜捐資籌辦應請免報

三十二年盛京將軍趙爾巽奏我 朝肇興東土其時從龍親賢無一非鎬京世祿之臣豐沛故鄉之士迨後名臣良將踵武代興初不料沿至於今東省人才之不振如斯將欲回復其本能非藉教育之力不可查奉省仕學館本屬不分滿漢一體肄業奈限於學舍學額因令另設一旗員仕學館所有實缺候補及在籍各員均准考入肄習購置儀器圖書延聘中東教習分授公法私法刑法民法政治理財商法地理歷史兵略體操東文各科以六箇月為一學期四學期畢業移會盛京副都統多文督辦該館事宜另派協領二員隨同經理惟興學之初自應懸格獎勵查直隸奏定法政學堂獎勵畢業學生章程其一二

三等各分別獎以繁簡各缺及要差等因奉省旗員仕學館事同一律惟陪京重地即稍加優異似於 國家體顧梓桑振興治理之道不無裨益
又御史慶斌奏八旗蒙小學堂宜附設工藝科略稱愚魯學生學習工藝雖學業無成不致終身廢棄見在商部已設藝徒學堂其宗旨頗合請 飭下學部妥議章程凡官立之蒙小學堂附設工藝一科庶幾栽培廣而旗困漸蘇矣
又江督端方蘇撫陳夔龍會奏京口駐防各學堂籌撥經費略稱 臣端方到任後派員考察學務京口設立之中學堂一所並習英文東語科目完全高等初等小學堂三所並習清文一科仍寓不忘根本之意皆有兩年程度又置桑傳習所一所規模粗具擬再加擴充隨營學堂一所於肄習武事之餘求有勇知方之略女學堂二所立家庭之模範為姆教之權輿皆有可觀漸臻進步惟是蘇省銅元停鑄經費無出再三綜核每歲非有的款一萬六千兩不能支轉前由常鎮道於鎮江關稅罰款內提撥三千兩見擬將該關罰款每年再請提撥三千兩所短尚在一萬兩之數疊經常鎮道詳請前來見飭上海常鎮兩道分認籌撥作正開銷庶幾勉力撐撐不致半途廢輟總期人無不學兵盡知書三十四年學部會同度支部民政部議覆 西陵承辦事務大臣奏修學堂估需用款七千六百兩請由部支領
又奏准京師設立滿蒙文高等學堂旗籍子弟中學畢業者升入此科其舉貢生監素嫻滿文蒙文者亦准附入肄習即漢民子弟中學畢業有志於滿蒙文者并准一體甄錄入學
又學部奏大學堂增設滿蒙文學一門略稱查奏定大學堂章程文學科大學分九門凡中外史學地理學中國文學及英法俄德日本文學無不分門研習獨於滿蒙文字僅註於地理學門中國方言之下殊覺缺而不備擬請文學科大學增設滿蒙文學一門列於中國文學之前務使滿蒙文字源流以及山川疆域風俗土宜講習愈精探討靡遺庶考古者得實事求是之資臨政者收經世致用之效其詳細課目應由 臣部妥定再行奏請頒行
又議覆駐藏大臣聯豫與學事宜略稱西藏地方實為滇蜀之屏蔽番漢雜處

文化未開亟宜隔之以經史訓之以忠孝既堅其內向之心并啟其謀生之路該大臣所籌先辦初等小學堂兩所收教番漢子弟初等小學堂畢業再辦高等小學堂以次咨送川省中學堂肄業洵為知所先務惟學堂僅止兩所應令該大臣督飭所司擇全藏扼要之地籌款建學切實擴充至學堂年限初等高等皆定三年畢業與定章不符似仍以遵照定章為宜如謂年限太長恐聞者疑阻有不得不變通辦理之處應由該大臣體察情形酌量改定俟風氣大開仍照定章辦理以歸一律
又會同理藩部議覆熱河都統廷杰奏喀喇沁札薩克郡王貢桑諾爾布呈請建設師範學堂及宣解講堂略稱查師範為教育根本宜講以勸化愚民蒙旗風氣未開本應即時辦理該都統咨到章程師範畢業以三年為期學科程度應按照初級師範簡易科辦理兩盟各旗選送學生似可酌量加增不必限定三名以廣造就其宣解講堂應改名宣講所按照奏定勸學所章程實行宣講至師範學堂宣講所用人員均應慎擇各省深諳教育明白宗旨之員分別聘用報部稽核
三十四年署伊犁將軍廣福奏改養正學堂為興文學校
又會議政務處覆奏據科布多參贊大臣連魁奏稱科屬地瘠人稀擬於所屬四部落各先設蒙文小學堂一所其舊有之蒙文學堂擬與見設之蒙文學堂一體擴充凡屬蒙旗子弟均從寬收錄查蒙民惑於宗教風氣閉塞與學實為要圖開辦之初先從蒙文入手俟有成效再行逐漸推廣
又允延祉等奏於庫倫地方設立蒙養學堂專教滿蒙漢語言文字
宣統元年理藩部代奏蒙藩王公等創建殖邊學堂略稱據御前大臣喀爾喀札薩克和碩親王那彥圖等呈稱蒙古遠在藩服藏衛僻處西陲其間山川物產歷史風俗非竭數年稽古之力以實地調查未能得其要領上年學部奏設滿漢文高等學堂本科修業年限五年學生成就稍遲似應設一專校以較短之時日養成多數之人才爰函商沿邊將軍都統督撫等擬在北京闢才胡同設一殖邊學堂堂中分蒙部藏衛兩科其蒙藏地理歷史就兩處古今沿革情

勢利害關係編爲講義並授以農工商各實業使知蒙藏有極大利源應從速規畫創始之際需款浩繁業經察哈爾都統庫倫辦事大臣認助開辦經費若常年經費有直隸奉天吉林黑龍江四川五省認助查該蒙古王公等首先提倡代籌鉅款洵屬熱心教育畢業之後如有學業出羣志趨超邁之士或由臣部酌量咨留或由沿邊各路將軍都統大臣督撫咨調量才器使亦可收得人之效

又學部會奏議覆科布多大臣錫恆奏阿爾泰開辦各項學堂酌擬簡章約估常年經費略稱查原奏稱阿爾泰地方蒙哈雜處習俗異宜哈夷則桀驁不馴蒙古則罷茶不振亟宜興修學校一以消其犷悍之俗一以鼓其頹靡之氣擬請設普通小學堂二處查閱所擬課程略與高等小學堂相似學生恐難領會自應先辦初等小學堂方爲有序又原奏請加言語專科一節查言語未通則教授無從著手應特設言語一科加意教授又原奏請寬展年限一節查邊境草昧初開原難以定章年限相繩應俟開學以後由該大臣督飭學堂教員管理員隨時體察學生程度擬定延長年限章程再行核定又原奏請教員由部揀派一節查邊疆腹地言語不通教授不免扞格應由該大臣遴選中學優長宗旨純正數員咨派來京由督學局派員與之研究教授管理諸法約三箇月即可遣回派充教員管理員較易收效其科布多武備小學堂哈薩克仍不收入武備學堂自應准如所請惟科布多武備小學堂應改爲科布多陸軍小學堂將來由小學而中學而兵官而專科大學庶與定章相符又原奏請設立學務處一節查阿爾泰地方甫設小學堂二所此項學務處應暫於所設小學堂內擇定一堂附設其中即由堂長兼理以節糜費至開辦與常年兩項經費其初等小學堂二所原估開辦經費湘平銀一萬二千兩常年經費湘平銀一萬一千八百八十兩遇閏加增較之內地小學堂經費數目相去不止數倍特是邊地風氣未開勢不能不稍示優異以資提倡自應准其開支其所設武備小學堂應如何考核稽查之處陸軍部查科布多陸軍小學堂額設僅止五十名事極清簡自不必別設考查人員處所應即由該大臣隨時派員稽核以資整

飭至撥款一節度支部令按照學部陸軍部核議各節切實核減再行籌撥又署歸化城副都統三多奏籌設土默特兩等小學堂略稱查歸化城土默特地方屏翊京畿襟帶直晉徒以邊防僻處文教未興前副都統文哲輝於光緒三十二年改歸化城文廟旁滯蒙官學爲蒙小學堂一所嗣改爲高等小學堂另在城東文昌廟內添設蒙小學堂一所該旗廣袤千里戶口繁衍調查學齡兒童不下二千人小學二所焉能普及因於光緒三十四年將高等小學堂學額增至七十名常年經費約需銀二千六百餘兩又將蒙小學堂改名第一初等小學堂增添學額並在城東關帝廟內添設第二初等小學堂一所常年經費各需銀四百餘兩又有距城三百里之包頭鎮地處要衝人煙稠密於光緒三十四年創設半日學堂一所本年改爲初等小學堂常年經費與城內初等小學堂相埒同時又在薩拉齊廳暨畢齊齊鎮察素齊鎮設立半日學堂三所以便貧苦兒童半耕半讀爲教育普及之嚆矢至經費一項除薩拉齊廳等半日學堂三所常年經費銀各二三百兩均由就地籌款外歸化城高等小學堂一所初等小學堂二所包頭鎮初等小學堂一所常年經費不敷其鉅擬由該旗煤炭審釐項下照案動支以濟要需

又東三省總督錫良奉天巡撫程德全奏創辦八旗滿蒙文中學堂

又塔爾巴哈台參贊大臣札拉豐阿奏見將塔城領隊衙門改爲養正學堂挑選滿漢察哈爾額魯特吐爾扈特哈薩克子弟酌擬章程擇期開學

又科布多參贊大臣溥綱奏准添設蒙小學堂

又學部奏遵設八旗學務處並遴員派充總理協理略稱會議政務處奏准議覆侍講阿聯毅缺司業蔭桓條陳學務擬請旨准其設立八旗學務處由學部遴選熟習八旗學務人員奏請派充總理協理又請飭度支部每年加撥八旗教育經費六萬兩仍歸學部按季支領並將內務府三旗等處各學堂酌量補助等語自應由臣部遵照辦理學務處設立之後凡關於八旗各中小學堂一應事宜回歸督學局者應移交該處經管惟學生畢業應由八旗學務處會同督學局考試至教授管理各事督學局仍可派員隨時抽查如有違背

定章情事應由督學局知照八旗學務處酌加改正所有經費即由八旗學務處呈請_臣部核奪開支以昭核實

又奏西安清文學堂應仿照京旗辦法

又度支部會奏議覆塔爾巴哈台遵設養正學堂擬籌常年經費略稱查前據塔爾巴哈台參贊大臣安成奏請徵收哈薩克房租仿照俄國之例上戶九兩中戶六兩下戶三兩每年應徵銀二萬六百餘兩經_臣部會議覆奏以徵收租賦惟中國為最輕今內地尚守永不加賦之制乃於哈族房租效外人章程未免過重應大加刪減旋據該大臣札拉豐阿奏稱前大臣安成於未奉部覆之先已將春季分租銀徵收足數據該台吉頭目等聲稱各游牧居處無定退還為難請仿照伊犁設立養正學堂即以此款還之款為開辦學堂之費其常年經費俟再另籌亦經 允准在案今該大臣奏請照租馬之例徵收牛羊駝租作為學堂常年經費自係為維持學務起見惟念哈薩克自乾隆年間准其游牧邊外歲納租馬百分取一而他無所取百餘年來相安無事今既減其房租而又取牛羊駝稅與未減房租何異原奏謂官私牧廠幾被哈薩克占盡查該處多係額魯特游牧之地自額魯特移往阿爾泰山一帶故哈薩克得居其地若額魯特求歸故地哈薩克即須退還其所以樂於輸將安知不以此相市亦恐異日轉滋轉轄該大臣前奏請仿照伊犁設學伊犁學費實取諸租馬變價塔城租馬雖不及伊犁之眾然與其牛羊駝租徵其所本無不如於馬租一項益其所固有嗣後應令整頓馬租藉充學費_臣等公同商酌擬令自奉文之日起收者姑准照收未收者即行停止以後除租馬及奏定減收房租外概不得有所徵取

餘兩學租項下歲撥銀五百兩為八旗工藝廠常年之費工藝亦教育所關撥定之數未便提還擬請在於開魯林西未放荒地內每縣各撥上則地十頃作為駐防學田飭由印房自行籌備牛糧籽種會同該兩縣招佃開墾歲收租項專充八旗學費不得挪為別項之用此項撥地應請撥案免交荒價並免升科以廣 皇仁

二年烏里雅蘇臺將軍堃岫等奏烏城所屬三札兩盟於漢語概不練習至所屬烏梁海素以打牲為業更難施以普通之學欲化除固陋應以廣設學塾為要見擬在烏城創建初級師範學堂一所調取三札兩盟聰穎子弟四十名學習滿蒙文兼習漢語漢文學有成效即令回旗教授並調取烏梁海學生教以滿蒙文字兼學蒙語以為漸授漢字漢語之基學成後亦令回旗轉授並飭令各盟長自立滿蒙小學堂一所並令各該旗均設蒙養學堂一所專收本旗子弟學習蒙字蒙文以植初基如有可造之才挑升滿蒙小學堂以備烏城調選似可為開通蒙智切實辦法

右八旗學堂

又學部奏核定京師滿蒙文高等學堂暨中學堂課程略稱_臣部奏設滿蒙文高等學堂詳細章程均責成該堂監督悉心酌擬該監督伊克坦將所擬滿蒙藏文中學科暨滿蒙藏文高等科各項課程先後咨送_臣部審定當令先行試辦見該學堂豫科各班將次畢業以前所擬一切課程於實地教授之際尙屬通行無礙自應將此項課程奏明立案以齊學制

又庫倫辦事大臣三多等奏挑選蒙養學生附入俄署學堂略稱庫倫屬地毗連俄境近來與俄國交涉事件日繁會案傳言僅憑通事偏聽堪虞見在駐庫俄領事設有俄學堂專習滿蒙漢文語擬由庫倫蒙養學堂挑取聰穎者附入俄署學堂兼習俄國語言文字俟領有畢業文憑選充繙譯實於交涉有裨

皇朝續文獻通考卷一百六

學校考十三 學堂 大學 附高等 中學 小學

光緒二十二年奏籌議 京師建立大學堂從刑部侍郎李端棻請也

二十四年 諭御史王鵬運奏請開辦京師大學堂迭經臣工奏請准其建立
見在亟須開辦其詳細章程著軍機大臣會同總理各國事務衙門王大臣妥
議具奏旋奏 臣等以事屬創始籌畫匪易當即查取東西洋各國學校制度暨
各省學堂見行章程參酌釐定尙未就緒旋奉 諭京師大學堂爲各省之倡
允宜首先舉辦迅速覆奏毋再遲延 臣等竊維今日中國亟圖自強自必以育
才興學爲要綜考各國富強之故實由於無人不學無事不學其學校每年所
需經費英至九百三十餘萬磅法至四百餘萬磅其餘諸國亦數百千萬不等
以故負笈之士成就遠大政治學術日異月新近人至以學校之多寡視國政
之盛衰中國當更新之始京師爲首善之區創茲鉅典必當規模宏遠條理詳
備 臣等廣集良法斟酌損益草定章程舉其要義四端一寬籌經費二宏建學
舍三慎選管學大臣四簡派總教習摺領提綱在此數者學堂養士數百購圖
書備儀器需款甚鉅非有額撥常年專款斷難持久見在經營伊始所費尤爲
不貲約計開辦經費需銀三十五萬兩常年經費十八萬兩有奇其數似多較
諸西國尙不及十分之一伏乞 飭戶部速籌專款並常年經費亦預先指定
如有不敷再由管學大臣臨時酌度見在開辦經費內得蒙撥給官地亦可稍
從節省然費舍未具尙須新築查日本開學之先皆權假邸舍以集生徒今事
當速舉似可權宜伏乞 皇上撥給公中廣大房舍一所暫充學舍命官選工
剋日興辦其大學堂仍應別撥公地另行購建學舍具矣而任事需人大學堂
爲各省表率一切制度均宜審度精詳非有明禮達用之大臣以筦攝之不足
以宏此遠謨况風氣漸開各省已設學堂近又疊奉 諭旨停試八股講求西
學各省向課制藝書院自應一律更改將來學堂日有增益而無所統攝必至
各分畛域其弊不可不防乞 簡大臣中之博通中外學術者一員管理京師
大學堂事務即以節制各省所設之學堂其在堂辦事各員統由該大臣慎選

奏派命官既須慎重而擇師尤關緊要今士人學無本原不通中國政教之故
徒襲西學皮毛豈能供國家之用欲轉移之非精選總教習不可苟得其人學
術正而道藝興苟失其人學術謬而道藝亦誤伏惟 朝廷孜孜興學尤宜慎
簡教習以收尊道敬學之效總教習司學堂功課非有學識中外之士不足
以膺斯重任非破格錄用不足以得斯宏才若總教習得人分教習皆由其選
派亦可收指臂之助其餘一切擬辦事宜悉具章程之內謹繕清單呈 覽
又 諭軍機大臣會同總理各國事務王大臣奏遵旨籌辦京師大學堂並詳
細章程繕單呈覽一摺京師大學堂爲各行省之倡必須規模宏遠始足以隆
觀聽而育英才見據該王大臣詳擬章程參仿泰西學堂綱舉目張已屬周備
即著照所擬辦理派孫家鼐管理大學堂事務辦事各員由該大臣慎選奏派
至總教習總司功課尤須選擇學識中外之人奏請簡派其分教習各員亦一
併精選中西並用所需與辦經費及常年款項著戶部分別籌撥所有原設官
書局及新設之譯書局均併入大學堂由管學大臣督率辦理此次設立大學
堂爲廣育英才講求實學起見該大臣務須督飭該教習等按照所定課程認
真訓迪日起有功用副朝廷振興實學至意
臣謹案當時西人之策中國者以中西人數比例而算謂大學生宜有十
六萬五千人每年宜費七千一百萬兩然據張亨嘉奏謂錄取僅五百人
學部奏懇由度支部分四年撥給開辦費二百萬兩人才與國用何一
如是也
又 特派工部侍郎許景澄爲京師大學堂總教習從孫家鼐之請也
二十七年 諭興學育才實爲當今急務京師首善之區尤宜加意作育以樹
風聲從前所建大學堂應即切實舉辦著派張百熙爲管學大臣將學堂一切
事宜責成經理務期端正趨向造就通才明體達用庶收得人之效應如何
定章程並著悉心妥議
二十九年 命湖廣總督張之洞會辦京師大學堂
三十一年大學堂監督張亨嘉奏開辦豫備科並招師範生略稱 任事以來

咨商學務大臣添建齊舍一面咨各直省督撫學政考選年齡合格品行端正之學生咨送來京並由_臣出示另場招考擇其學識較優者取錄三百六十餘人合計舊有之師範生已五百人房舍工程猝難完畢至十月中旬新班學生始行入堂並添聘英德日本教習遵章開學分班講授此京師大學堂添招學生大概情形也考各國小學皆重國文中學以上必兼習外國文字即以中國言之士大夫果精通外文必真知西政西學之本源不至惑於邪說_臣參考中外情形約分兩種辦法學生中年齡較長漢文較優者俾充優級師範其西文夙有門徑或年少易於練習者選入豫科而皆以志趣端正為要領師範者風氣之導也非重國文無以立小學中學之正鵠豫科者專家之儲也非明習西文無以通西學之奧窔此分別豫科師範各有注意之大概情形也更有進者古今論國是者必曰富強曰教化然富強之效實因教化為轉移教化不興非特其民愚也以數萬萬之人休戚不相關泛泛然如萍浮於江湖而適相值也以守則危以戰則怯故論學堂於今日雖堯舜當陽而孔孟為之佐亦無以易是說矣歐美諸國知其然也故其學校宗旨非欲人人為鴻博之才乃欲人人為忠孝之士竊謂中國教育宗旨智能必取資歐美而道德必專宗孔孟凡經籍所傳義理秦漢唐宋明以來儒家之論說必抉其精密切要者以立德育之本以為修己治人之法待其訓育薰陶道德之灌注於人心者既深而後忠義勇敢之風自勃然其不可遏焉秦東西與國之根源亦即中國轉弱為強之樞紐此酌定教育宗旨之大概情形也至於管理最重紀律教授端賴通才房舍之不合法度者更正之圖書儀器之用備實驗者購置之講習寢食皆為大同出入起居嚴定限制由_臣督率在事各員隨時釐訂規則並咨請學務大臣主持之

模用費動至千百萬計而中國財力拮据祇宜撙節徐圖推廣懇准由度支部撥給開辦經費二百萬兩分四年撥給每年五十萬兩俾可從容籌備

又奏大學分科明年必須設立以備高等學生升入之地查德勝門外校場地方蒙 恩准撥為分科大學之用派員繪具圖式以之建造經法文醫格致工商等七科均屬敷用惟農科大學應以附近林麓河渠之地為宜查有阜成門外望海樓地方葦塘官地約計十六七頃南北甚狹東西較長若就其地勢開濬溝渠可為農事試驗場附近民地亦可設法購買惟該地係歸 奉宸苑收租當經商明該管理王大臣堪以撥歸_臣部應用懇 恩允准賞給允之

宣統元年學部奏大學堂預備科改為高等學堂

又奏准大學堂總監督劉廷琛咨開大學分科業經開辦請電咨各省遴選經明行修具有根柢之科舉舉人保送來堂以備肄業經科至拔優貢兩項皆中學較深之士應著一併選送

又奏略稱學科除醫科須俟監督屆永秋到堂再行妥籌辦理計經科法政科文科格致科農科工科商科分門擇要先設職員查定章每科監督下均設教務齋務庶務等提調見科目既未全設教務或兩科設一員或以監督兼攝其庶務齋務均設總提調一員惟農科一項另於望海樓地方開辦兼設試驗場委員一人以資經理一教員見擬設經科八人法政科七人文科六人格致科五人農科三人工科四人商科三人又隨意酌設教員數人以足敷教授為限一學生見在預備科不敷分布優級師範及譯學館畢業學生願入者自應分別考選一校舍德勝門外校場地方奏准改建有案自應及時興築暫就內城馬神廟大學堂略加擴充先行開辦又奏各國大學外國人有程度相合而願入學肄業者無不一體收取擬先就經科大學准令外國人入學均從之

諭長霖京師大學堂沿革略 戊戌元月 詔開京師大學堂夏五月 命孫家鼐管理大學堂事務就景山東馬神廟前和嘉公主舊第稍購附近民房益之撥戶部撥存華俄銀行五百萬金為學堂經費刻期興辦維是非常之原黎民所懼壽州相國以師傅宿望維持其間適有 詔復八

股遂以時文性理論錄士得百餘名於十一月開學學生不及百人分詩書易禮四堂春秋二堂課士每堂不過十餘人春秋堂多或二十人兢兢以聖經理學詔學者日懸近思錄朱子小學二書以爲的每月甄別一次不記分數有獎賞分三等己亥秋學生招徠漸多將近二百人乃拔其尤者別立史學地理政治三堂其餘改名曰立本曰求志曰敦行曰守約蓋欲學者顧名思義洋勵品學且以閒執悠悠之口其初學生分三類曰仕學院曰中學曰小學小學午前讀經午後習科學如格致算術化學洋文等仕學院及中學生午前無功課但自習經史午後均習科學己亥改堂後中小學合併惟仕學院名尙在分隸史學地理政治三堂維時各省學堂未立大學堂雖設不過略存體制士子雖稍習科學大都手制藝一編佔畢咿唔求獲科第而已黃仲弢學士時爲總辦心知其非值衆喙斷斷不敢排羣議依違其間總教習許竹簣侍郎時薪有所匡正一日笑語壽州曰公辦學堂太偏於理學壽州乞病許公以總教習兼管理事務值拳亂將起人言鼎沸學堂懸懸不絕如縷庚子七月許公遂殉難迨 聖駕西巡學堂絃誦輟響者年餘辛丑冬 皇上返蹕迫於時變維新之論復起尋罷科舉試考錄海外留學十二月朔 詔張文達公百熙爲管學大臣翼日以同文館歸併大學堂壬寅春正月管學大臣奏陳籌辦大概情形一預定辦法二添建講舍三附設譯局四廣購書籍儀器五寬籌經費其預定辦法先設豫科分二門曰政科藝科設速成科亦分二門曰仕學館曰師範館其譯局由舊官書局籌辦一設京師一分設上海其經費除華俄銀行五百萬仍撥應用外各省每年大省二萬中省一萬小省五千撥解常款俱奉 旨允行以前直隸冀州知州吳汝綸加五品卿銜爲大學堂總教習以湖南試用道張鶴齡爲副總教習候補五品京堂于式枚爲總辦編修李家駒工部主事趙從蕃爲副總辦奏請動用華俄銀行存款免其造報補鑄關防曰欽命管理大學堂事務之關防時翰林院侍讀寶熙奏請變通宗室覺羅八旗學校奉 旨歸入大學堂辦理九月大

學堂招生錄取仕學生五十七名師範生七十九名十一月開學并議開辦速成科計原有齋舍一百四十餘間添蓋齋舍一百二十餘間又購西城瓦窖地方地一千三百餘畝奏請俟大工落成後除預備速成兩科外所有新奉 諭旨送大學堂肄業之進士並前附設之醫學館各處學生約計一千餘人擬一併遷入十一月奏陳同文館歸併大學堂變通辦法設英法俄德日本五國語言文字專科停止學生膏火酌收膳費并令助教人等於教授功課外編輯各國文典一部每年共費四萬餘金以候補五品京堂曾廣銓爲總辦再請由上海譯書分局附設印書局一所十二月副總辦趙從蕃辭職以曾廣銓兼充時總教習吳汝綸卒癸卯正月以前青陽縣知縣湯壽潛繼之以候補員外郎辜鴻銘爲副總教習湯壽潛不就三月曾廣銓以繙譯科及文典事繁辭副總辦以直隸試用道姚錫光繼之尋奏籌辦醫學實業館及中西藥房治病院閏五月奏請特派湖廣督臣張之洞會同商辦京師大學堂六月奏請改同文館爲譯學館分授英俄德法日本五國語言文字兼習各種科學購北河沿民房一區并請館北內務府之東驢圈館西光祿寺官地兩處撥入七月譯學館監督曾廣銓丁憂以江蘇試用知縣朱啟鈞繼之八月朔奏明大學堂用款共舊管新收銀百四十五萬九千八百七兩有奇用銀二十八萬三千六百八十三兩有奇共推除存銀百七十七萬五千四百餘兩有奇十一月奏派學生赴外洋游學凡往日本三十一人往西洋十六人湖廣督臣張之洞奏請京師專設總理學務大臣以統轄全國學務大學堂另設總監督一員專管大學堂事務奉 旨管學大臣著改爲學務大臣並添派大學士孫家鼐充學務大臣十二月以大理寺少卿張亨嘉爲大學堂總監督其學務大臣關防改稱 欽命總理學務大臣關防其總監督曰京師大學堂總監督關防自是以後學務大臣統轄京外各學總監督專管大學堂事務凡一切譯學館宗室覺羅八旗中小學堂進士館醫學館編譯局等咸直轄學務大臣而不隸大學堂略如小宗之別爲大宗矣甲

辰元月奏請添招師範生並開辦豫備科分咨各督撫學政咨送兼就京招考七月考生分三場在大學堂面試首場試中文一篇中國歷史地理各六問二場試東西文繙譯二篇外國歷史地理各六問三場試算術六問代數及平面幾何各三問物理學及無機化學各三問嗣後陸續補試共得士四百餘名於八月驗看挑取九月分爲豫科師範兩科十月朔開學分甲乙丙丁四班明年師範生分四類一類洋文二類地理歷史三類理化算術四類博物動植礦俱隸之預科分三類六級一類法文二類英文三類德文俱分甲乙級當時學生有錄取不到者有到堂不久辭退者有自備資斧出洋者有揀發授職去者有游宦去學及各部奏調者有因事開除者迄今僅存三百三十餘名十一月總監督定俸每月二百金乙巳十月因預科學生過少就師範生英文法文德文較佳者撥入三十三人時山西學政寶熙編修許鄧起樞請設學部順天學政陸寶忠編修尹銘綬請設文部政務處學務大臣會覆議行十一月奉 旨設立學部以榮慶爲尙書熙瑛爲左侍郎編修嚴修以三品京堂候補署右侍郎設丞參如各部明年四月改各省學政爲提學使司自後學部統轄全國學堂提學使管理全省學務京師大學堂又不歸學務大臣而直隸學部矣丙午春正月仕學館畢業初六日張亨嘉疏請開缺以奉天學政李家駒代之未到任以前以庶務提調曹廣權代理三月李到學視事四月初旬大學堂開運動會分二十二門曰犬牙門競走頂囊競走越脊競走二人三脚競走一脚競走掩月拾珠競走一百米突競走二百米突競走三百米突競走四百米突競走五百米突競走八百米突競走各科選手競走跳遠跳高擲鎚擲球拉繩算學競走越欄競走障礙物競走鹿角競走七月設分科監督以江瀚署師範館監督兼教務提調以教務提調張祖廉兼署預備科監督八月設附屬小學辦事處附屬生徒四十八人俱由內務府三旗高等小學丁班撥送丁未正月舊班師範生畢業最優等十八名優等六十一名中等二十一名下等四名考列最優等作爲師範科舉人

以內閣中書儘先補用並加五品銜考列優等作爲師範科舉人以中書科中書儘先補用考列中等作爲師範科舉人以各部司務補用其各生原有官職不願就畢業獎勵者准其呈明以原官原班用二月舉行畢業禮凡百有七人新班師範生暨預科生約同人爲記別圖攝影錄別文詞爛然成帙矣時江瀚辭職去遂罷師範監督不設三月京師官立各學舉行聯合運動會大學堂舉代表六人舉助理員五十四人並停課兩日以備練習五月學部奏大學堂增設滿蒙文學一門列入中國文學之前奉 旨依議附設博物物品實習科分製造標本模型及圖畫三類每類完全科三年畢業簡易科二年畢業擬先辦簡易科咨各省調送願習製造標本各學生六月命四類學生四十二人從南口叻噠嶺旅行是月李總監督奉 命使日本以山東提學使朱益藩代之學部奏改大學堂總監督爲實官秩視左右丞十二月准學部咨各學堂學生干預政事開會結社奉 嚴旨查禁應設法解散旋改朱總監督宗人府宗丞以學部右參議劉廷琛代之戊申總監督加俸定每月三百二十金正月劉莅學視事二月以朱子白鹿洞揭示及教員管理員學生規則榜示全堂籌辦大學分科學部奏准撥德勝門外校場地爲分科大學之用又奏撥阜成門外望梅樓地方葺塘官地約計十六七頃爲農工試驗場并購附近民地建築農科大學又奏派齋務提調編修商衍瀛算學教員學部專門司主事何燭時赴日本考察大學制度調查一切建築設備事宜某日四類學生再往南口叻噠嶺旅行九日期考優等學生分班接見頒獎各種書籍物品旋設籌辦分科處分科工程處十二月師範豫科諸生畢業附屬小學諸生咨回內務府三旗高等小學堂以上沿革其略有四一官制沿革二學科沿革三辦事沿革四是非毀譽之沿革夫官制可改學科可更辦事人可易惟是非生於人心譽毀本諸公論應無沿革之理茲乃一律沿革甚且有革無沿有心人觀於世道人心而未諗輿論之何日定也

右大學堂

光緒二十二年江蘇學政瞿鴻禨奏南菁書院雖隸縣治而入院肄業者爲通省人才所萃請照省會書院之例作爲高等學堂

三十二年學部咨覆豫撫高等學堂應添聘教員

三十四年學部奏酌定高等學堂豫科學生升學年限略稱各省高等學堂自本年六月以後自不得再行招考未經中等學堂畢業之學生入堂肄業亦不得再設預科各項名目惟原在高等預科未畢業之學生似宜明定辦法庶各有所遵守查從前高等學堂辦法大概遵照高等學堂考錄入學章程設立預科招收中學有根柢之學生入堂補學其畢業期限或一年或二三年不等見時高等學堂既非中等學堂畢業生不能升入此項未畢業之學生應否仍舊辦理尙無定議等以爲各省所設高等預科原係遵章辦理自不得以新章之年限相繩惟見時高等學堂升學程度既經限制其原定預科修業僅一二年者學力太覺參差亦非實事求是之道等公同商酌各省高等學堂在本年六月以前所設高等預科見尙未畢業之學生曾經報部有案者如原定修業期限不滿三年應一律展至三年准其升學不給獎勵其有改爲中學按照中學課程教授者肄業時期准其接續計算五年屆滿照章考試分別給獎如此酌中定議庶各省原辦預科可免解散之虞高等學堂辦法亦可漸歸於畫一

又奏議覆豫省客籍高等學堂擬辦預科畢業略稱歷屆辦理高等學堂預科按照中學畢業獎案皆以各該學堂設立章程未頒以前雖該生等肄業僅閱四年均經先後議准其不滿四年者准應升考試不給獎勵茲查河南客籍高等學堂係三十一年設立在奏章頒行以後原辦預科扣至今年十二月雖屬已滿四年祇應准其援案升學礙難議獎其改撥該學堂補習已滿八學期以上及僅有六七學期各生如程度果與原辦預科相符亦應一律辦理其僅歷五學期各生年限過短若與先入堂各生一體升入正科程度必有未足應俟肄業三年期滿果與五年度相符方准升入正科其四學期以下各生既經酌定照章五年畢業辦理尙屬覈實應即遵照中學課程教授五年期滿

方准畢業

宣統元年東三省總督徐世昌奏籌設奉天高等學堂略稱奉省爲豐鎬舊都祇緣風氣晚開迄今高等學校尙屬闕如省城中學堂開辦已四年餘錦州府及鐵嶺縣亦各有中學堂一年內外即有畢業升學之學生若不將高等學堂預爲籌設不足以鑿士林之望奉省方言學堂尙未奏咨有案臣悉心籌畫酌量變通即將該堂改爲高等學堂原有學生按照學年程度分班并將中學堂已修業三年四年之學生一併撥入肄業補習中學功課接續前資扣足五年考驗合格仍照中學請獎升爲高等嗣後中學堂畢業生日多即可源源升學此項辦法乃綢繆於事前之策與設預科而取巧者絕不相同且查省城各兩等小學高等小學堂生本年六月間已屆四年畢業者約三百餘人中學堂校址不甚寬宏必須另設中學以資升入今將中學堂甲乙各班學生撥入高等補習騰出空額即可爲高等小學畢業生升之地一轉移間兩有裨益又兩江總督端方奏江陰南菁高等學堂擬改設文科高等學堂以爲升入文科大學之預備懇飭部立案又奏陳明南洋高等商業學堂辦法並將原設之中等商業學堂合併辦法及動用款項懇飭部立案

又學部咨覆晉撫賈奏此次中齊甲班第二類應用法文畢業略稱查高等學堂第二類原爲入格致科大學工科大學農科大學之預備奏定章程所載第二類課程其有志入格致科大學之化學門工科大學之電氣工學門探礦冶金學門農科大學之各門者必選德語習之是第二類之外國語宜以英語爲主課德語爲兼習科惟該中齊甲班第二類學生兼用法文教授已歷五學期之久此時若令改習德文未免前功盡棄此次應准用法文畢業嗣後再招添第二類新班應仍照前咨辦理以符定章

又護理雲貴總督沈秉堃奏擬將雲南方言學堂改辦高等學堂略稱方言學堂之階級等於高等學堂雲南方言學堂係以東文學堂改設開辦於光緒三十三年奏咨有案上年學期考試前署學司葉爾愷當飭該堂監督率同教員認真甄別因程度未合一律改爲預科目前雲南高等學堂亟應遵照籌辦而

各堂學生求合高等預科二三年程度者尙難其選惟方言學堂預科生修業已逾三學期預算至宣統二年年底實符高等預科三年之期屆時升入高等本科較爲合格邇來奉天方言學堂已奏准改爲高等學堂滇省事同一律自當仿辦見經悉心籌畫以見在方言學堂改辦高等學堂即以方言預科學生改爲高等預科學生據該堂監督教務長等擬訂簡章二十三條造具學生名籍清冊核與定章相符用請立案

右高等學堂冊

光緒三十二年山西巡撫恩壽奏冊設公立中學堂籌助官款略稱查晉省自奉 詔興學以來各府廳州縣中小學堂皆由官立從未有民立者適有晉紳舉人馮濟川等公議籌銀三千兩借用省城貢院冊設公立中學堂並附設高等小學堂生徒濟集有二百數十人該堂組織方新經費不足不得不助以官款冀爲通省樹風聲因於學務處公款內撥銀一千兩爲購置圖書之用又於司庫外銷項下撥銀二千四百兩改建講堂及體操場以期合於規制並按年籌銀二千兩爲該堂經費不足之數由署臬司丁寶銓勸集自來事之興舉有開必先晉省冊此公立學堂實爲民學開風氣之始遠近士紳必有聞而興起者

又學部咨覆晉撫舉人馮濟川等公立中學堂應改爲五年畢業略稱該舉人等邀集同志熱心興學深堪嘉尚所分中學高等小學簡易師範各班量才教授尤屬切實辦法所擬章程大致周妥惟奏定學堂章程中小學係五年畢業原呈章程訂爲三年畢業學科既繁年限過促不足深造應飭改爲五年畢業師範簡易科亦不得比照初級師範學堂給予出身以符定章又奏議覆商約大臣呂海寰奏陳上海民立中小學堂漸著成效擬請立案並酌予獎勵

三十四年又奏改轄省方言學堂爲中學堂略稱護理江西巡撫沈瑜慶奏稱江西方言預備學堂以養成方言學生及派送西洋資格爲宗旨並日後擴充爲方言學堂養成辦交涉教譯學之員及能編譯書籍爲成效是以立名有豫

備字樣自署提學使林開蕃增廣名額擴充普通學科添聘德文教員悉按譯學館辦法稽查奏定譯學館入學章程學生應考取中學堂五年畢業者方爲正格本年聲明譯學館方言學堂應考選中學堂及與中學堂程度相等之學堂畢業學生升入肄業該省之方言預備學堂所招學生並未由中學堂畢業該堂中所授功課尙低今該署司以之驟升爲方言學堂作爲高等程度實不足以符方言學堂之名自非改爲中學堂斷不能收實效若改爲中學堂則分班不必分科於推廣學額整頓學科皆易爲力

宣統元年學部奏變通中學堂課程分爲文科實科略稱中學堂宗旨或令其博通古今以儲治國安民之用或令其研精藝術以收厚生利用之功於是文科與實科分焉馴至升入大學任以職官而其學業各有注重其成績各有專長查從前奏定中學堂課程凡十二門五年畢業普通學科大略皆備其不再升學之學生於普通知識道德當足應用有志升學者其所志既有殊異而所升學堂亦有文科實科之不同以分科大學言之則經科法政科文學科皆文科也格致科農科工科醫科皆實科也商科課程略與法科相似實業之近於文科者也以高等專門學堂言之高等學堂之第一類優級師範之第一二類高等法政學堂高等商業學堂方言學堂亦與文科爲近高等學堂之第二三類優級師範學堂之第三四類高等農業學堂高等工業學堂高等商業學堂亦與實科爲近學文科者當求文學之精深學實科者尤期科學之純熟果能於五年內二者兼通豈非甚善無如學生資性既殊志趣亦異沈潛者於實科課程爲宜高明者於文科學問爲近此關於天授者也志在從政者則於文科致力爲勤志在謀生者則於實科用功較切此因於人事者也近日各省中學堂學生畢業分數或文學優於科學或科學優於文學則以平日用功有畸重畸輕之故至若天資穎異各科俱優則一堂不過數人未可以常例繩之昔宋臣胡瑗之設教湖州也經義治事分齋授業弟子成就最多近世德國學術號爲極盛其中學堂之制文科實科係分堂肄習近者條陳學務者頗有以文實分科爲言者 等揆諸學堂情形亦以文實分科爲便擬將中學堂分爲文科

實科其課程仍照奏定章程十二門分門教授惟於十二門之中就文科實科之主要權其輕重緩急各分主課通習二類文科以讀經講經中國文學外國語歷史地理爲主課而以修身算學博物理化制理財圖畫體操爲通習實科以外國語算學物理化學博物爲主課而以修身讀經講經中國文學歷史地理圖畫手工法制理財體操爲通習主課各門授課時刻較多通習各門較少皆以五年畢業且文科主課之外仍以算學等科擴其知識實科主課之外仍以讀經等科培其根本即令畢業之後不再深求而於普通之道德知識實已完全無缺將來謀生更易爲無力升學之學生計當亦其便利也

又奏准各省中學堂畢業生嗣後均由提學使調省覆試

又貴州巡撫龐鴻書奏酌定通省公立中學堂辦法

二年學部咨覆直督陳夔龍中學考試辦法四則分別准駁略稱准直督咨開據直隸提學使詳稱奉學部節開各中學堂平日畢業考試由提學使覆試核定分數再行奏獎惟念各學堂考試方法以臨時考試總分數與學期考試總分數平均爲本學期分數以歷期歷年考試總分數與畢業考試總分數平均爲畢業分數然後分定等差其途密若足今乃以教學不相習之人憑一二時中三四問題之條答以定一學科之長短恐未易得其真相且中等學堂普通主要各科少者十餘門多者至二十餘門一省之中中學及中學程度相等之學堂其數又多至數十部限難以年暑假爲覆試期然揆度各堂情形有學科相同而可歸併覆試者如中學堂是也有學科不相同而不得不特別覆試者如中等實業學堂是也初級師範之普通各科雖與中學差同而主要各科則特異亦不得不另場覆試必按照各學堂所習之學科一一加以覆核日亦不足矣竊謂欲細核學生之程度兼顧司中之才力惟有於覆試時每堂均抽考數門臨場宣布則懷挾之弊自除嚴密監察則抄襲之弊自除而問題務從詳密時刻亦稍寬裕俾得流露所長以期權衡之準至抽考各門則注重主要科核定分數則合抽考各門之分數平均爲覆試總分數再與各學堂畢業考試之總分數相平均而爲畢業分數斯

衡鑒亦屬大公此擬請部示者一也初級師範學堂以實地練習爲最要中等實業學堂亦以實地練習爲最要學生學力有長於應用而短於記憶者亦有長於記憶而短於應用者若祇憑藉學科答案以定其短長恐影響所及人人燕踏空文而不求實際可否飭令各堂於畢業考試前一月將各學生實地練習之成績由管理員教員出具切實考語分別等差呈司備案至覆試時由司審核酌給底分以示鼓勵此擬請部示者二也向來各堂於舉行畢業考試之後即發給畢業文憑今既由司覆試則須俟覆試既畢方能發給惟念各學堂畢業之期未必皆與司中覆試之期相銜接各堂學生住居里籍散在四方當本堂一經考試之後司中尙未覆試之前不得不各歸家既已歸其故鄉至覆試時或因有事故或苦無資斧而不能到者必在所不免甘苦數年而未克得本堂一紙之文憑人非草木誰能無情是恐阻學生向學之心且實業學堂有於一校之中分設中等與高等者其升學之期每與畢業之期相接續使畢業於中等以未經覆試之故遂中止其高等之升階於辦學殊多窒礙其爲難既如此各中學生既經畢業凡有志上進者一聞各省專門高等各學堂有招收新生之信每卽束裝前來無遠弗屆若必限以覆試之後始准升學是未經覆試之學生從此遂永遭禁錮惟是各中學之學生頗多客籍有遠至數千里及萬里外者欲留待覆試乎則學堂難爲傳舍而無所棲身欲投考他學乎則畢業未得文憑而未由插足其不便又如斯恐遏學生上進之途可否准各堂於舉行畢業考試之後發給修業期滿文憑得此文憑者准與升學考試並使遇覆試之期實有事故不能投到者准於下年附入下班到司補試至發給畢業文憑則統俟詳獎後由司給發未經覆試者不給憑亦不請獎以爲之限誠如是則既不安予獎勵以獎名器而升學之去取其權又操之本堂亦不患濫竽充數於綜核名實之中量加體恤則學生必爭自濯磨感而思奮此擬請部示者三也部劄各學堂平日畢業考試由提學司覆核於畢業考試之外兼及平日爲奏章所未詳至如何覆核之法部節亦未明宣是否指各堂平日考試成績均宜一

一儲存備省視學之抽查及畢業時司中之調核言之此擬請部示者四也所有中學考試請示各緣由本部堂據此相應核覆本部查原詳所稱中等各學堂覆試時擬就主要學科抽考數門一節未始非扼要辦法惟定章學堂課程雖以主要為重但必須有通習課以資補助而後本科課程方為完備若僅就主課抽考恐巧於揣摩者將盡棄他科而專注於二三主課將來變本加厲各學堂之通習課必致有名無實成為具文既經調省覆試自以通考各門為正辦如虛門類繁多暑假內日期太短則各學堂相同之學科原可歸併覆試即其學科不相同者亦可同時考試分別命題當不致有日不暇給之慮原詳又稱初級師範中等實業最重實地練習擬酌給底

分一節除實業成績應由本部另案核覆外其初級師範應自第四學年起於各科學加入實地練習一門其分數與他門科學分數平均計算惟實地練習必須備有教授詳細節目及教授案等各成績至畢業時由本堂彙呈學司按其成績高下核定分數以與覆試時各科分數平均不得但憑本學堂空言考語即給底分以昭核實至所請各中等學堂畢業以後未覆試以前先給發文憑准應升學考試一節查此案近由本部酌定變通辦法凡中等各學堂學生修業期滿由本學舉行畢業考試其及格者分別等第先給予畢業文憑詳司報部備案惟不給獎勵其畢業後赴省覆試者俟覆試合格照章給獎如因道遠不能即時赴省應考者准其展緩一年未覆試以前並准先應升學考試以資策勵該省自應一律辦理至原詳所稱前奉部節中學堂平日畢業考試由提學覆核應如何核法一節查近來各學堂考試率多濫給分數往往學生成績平常而畢業考試尚列在優等以上殊屬名實不符應由提學使司嚴加考核如本堂平時及畢業考試分數甚多而覆試成績甚低與本堂畢業分數相差至二分之一除將該生從嚴降等外所有該堂監督教員等亦應一律處分以杜冒濫而重名器

又奏改訂中學文實兩科課程略稱 臣部於宣統元年三月具奏變通中學堂課程分為文科實科通行在案茲查定章中學教員養成於優級師範而學生

則取材於高等小學學科編制本屬息息相關前奏分科程度驟高上之則艱於得師下之則難資升學無造車之合有絕塵之嫌此程度之宜釐訂者一分科設備較舊加繁理化實驗消費尤夥必欲照章準備非惟財力不足且虞校室不敷况定章各府必設一中學而貧瘠之區尤難籌畫求全責備恐轉礙教育之進行此設備之宜變通者一分科制度仿自德國雖為漸進專門學問之基仍以養成國民常識為主前奏文實兩科因趨向之各殊致途徑之懸絕一經分類後日之轉學為難驟語專精普通之知識轉略此文實兩科之宜酌改者又其一經 臣等悉心籌畫分配適宜即由 臣部行知京外一律辦理

右中學堂

光緒三十二年直隸總督袁世凱飭學務處妥議各堂學生公費自費章程略稱查泰西各國惟法國普免小學生徒學費其餘各國令學生自出少數之資納於學校不足者由國家補助之若吾華及歲兒童皆資官費公家安有此力直隸各屬紳民捐資設學月有所聞又據正定府查學員稱行唐小學堂學生辭去津貼概歸自費全堂一致心實嘉之但各學堂學生依賴公家視為固有者所在皆是亟應詳訂公費自費章程以期推廣日本町村負擔學費據明治三十六年統計表已達四千餘元其小學之數官立與公立二萬六千六百五十九私立三百四十九民無橫征之怨家無曠學之人直隸前定各村分等籌捐章程即是此意各屬稟請隨糧加捐曾加駁斥亦以體 朝廷永不加賦之意恐開官吏書役隱射之門但以本地之財教本地之子弟富者所得既較多則其負擔亦宜重考斯密亞丹富稅四例曰平日信曰便曰數分等籌捐之制似乎信且便矣然所謂上中下三等者果能準其所得之確數乎此於平於敷之道未盡也竊謂紳民歲入在制錢三千以上者歲抽其百分之十或五為公立小學之費有不遵者除命盜重案外所有本戶財產之訟立案不行奏請著為新例但地方議會未與田野巡警未遍任其隱匿則不覈聽人告訐則又不平應如何折衷至當儼然可行或謂美國營業產稅一切聽民自占民自無欺但吾華人民程度能否及之

此公費之待商者也日本教育公報稱美洲聖路易之博覽會場車夫著一定之服詢之皆大學堂之學生以推車備錢爲學資其南部各大學多備於農家爲學資若語之吾華學生必岸然不屑然彼國人格之高國力之厚即由於此今雖不能企及亦宜令能任學費者人自出資斯密亞丹原富論幼民學校之費痛斥官資膏火爲學風不競觀夫行唐諸生之概改自費樂善之志人情所同苟查學勸學之員剴切引導豈讓一邑專美應如何酌定數目著爲章程其實在貧苦者或照西國貧民學校之例以教之此自費之待商者也總之新舊過渡之世非強迫無以蘇國民地方制度未備之時則立法又須防流弊仰該處分別擬定公費自費章程呈候飭辦

又學部議奏御史夏敦復奏請定私塾附屬章程略稱查奏定小學章程教授科目如私塾力能完備即可名爲私立小學倘學科未全斷不能與在堂學生一律卒業近年各省官紳興學多習爲敷衍而地方官藉此塞責致應辦之蒙小學堂永無廣設之一日實於教育本原大有關係該御史因各地方學堂未及普設思爲此取便蒙學之計亦具苦心查奏定初等小學堂章程凡一人出資獨力設一小學堂或家塾招集鄰近兒童附屬課讀人數在三十人以上及塾師設館招集兒童在館授業在三十人以上者名爲初等私立小學均遵官定章程辦理定章本意即慮官立公立各小學未能遍設故籌此推廣之法與原奏所陳用意相同而辦法較爲畫一應由各省州縣照章勸導切實施行又署黑龍江巡撫程德全奏建修高等小學堂附添講堂校室暨擬撥修各項學堂分別撥款情形

三十四年學部咨覆新疆巡撫聯魁轉提學司杜彤飭設模範高等小學並造具師範簡易科清冊報部略稱查教育之興小學爲急師範爲教育之根基關繫尤重該提學使擬由初等小學入手辦法甚爲切當師範畢業有人應即極力推廣初等小學惟查奏定學堂章程雖詳小州縣必應由官設立高等小學堂一所以爲模範該省雖風氣初開亦應於繁盛之區每處設立模範高等小學一所考選年齒較長中文粗通之學生入堂肄業有初等小

學則學齡較幼者可免失學之虞有模範高等小學則年齒較長者亦不至因循自廢該省高等附設之師範簡易科其畢業年限以及所習功課學生名冊應分別詳部以憑察核

宣統元年學部奏酌量變通初等小學堂章程略稱初等小學爲國民養道德開智識謀生計之根本必以易知易從爲合宜查奏定學堂章程本有完全簡易兩科初等小學堂完全課程科目凡修身讀經講經中國文學歷史地理格致算術體操八科五年畢業又載鄉民貧瘠之區不能不量從簡易以期多設應另定小學簡易科將來畢業儘可於高等小學堂補習又載初等小學堂建造務期樸實不致財力難於籌措外國鄉村小學率皆簡樸遷就故能村塾林立又載凡一人出資獨力設一小學堂或家塾招集鄰近兒童附課人數在三十人以上以外又塾師設館招集兒童在館受業在三十人以上者名爲初等私立小學均遵官定章程推原定章本意初等小學堂所以期設置之完全小學簡易科所以求推行之便利初等私立小學即將私塾教法包括在內就深就淺各有所宜本未嘗以詳章繁費徧責諸稚魯之兒童窮僻之鄉里近年以來稽諸各省冊報揆之地方情形大抵都會城鎮設立初等小學堂者尙多鄉僻之區學堂蓋寡即小學簡易科亦復寥寥蓋今日州縣官盡心教育者實罕其人但知襲其外貌姑設一兩學堂塗飾耳目足以搪塞上司之文檄並不詳解定章分別勸導而紳士往往但就見有學費任意開支亦不復爲節用求實之計村儒不釋奏章藉口觀望以致私學義塾蒙館之類亦遂日少子弟坐廢職此之由必應及時籌畫力圖擴充一年以來等詳加籌酌大抵小學之少固由於官紳之不力而其所藉爲口實者約有數端如經費少則立學甚難課程繁則師資不易讀經卷帙太多不能成誦國文時刻太少不能勤習以上各節其流弊不可不防亦不能不量爲變通謹擬將初等小學教育分爲三種一曰初等小學堂爲學堂統系之原始異日升入各學之初階其課程必求完備將來升學之時可以程度適合惟從前奏定初等小學堂課程分爲八科民間往往以科目過多師資難得經費難籌坐是因循疑沮以致小學教育未能普及見

擬酌量省併約爲五科曰修身曰讀經講經曰中國文學曰算術曰體操其歷史地理格致三科則編入文學讀本內教之並附入樂歌一科手工圖畫仍作爲隨意科目以存其舊似此酌量省併之後課程並不繁雜學生四五十人一人可以遍授不必多聘教員則經費自然節省與辦較易爲力其讀經一科原授孝經論語學庸孟子及禮記節本但有講解誦習不令學生默寫背誦見在體察中國學生情形兼博訪日本學堂辦法其學科中亦多須熟讀成誦之科擬將讀經一科定爲講解背誦回講默寫四項不得缺一惟原定各經卷帙較多未便一律責以成誦因學庸理解高深孟子篇幅太長恐其記憶較難見擬專授孝經論語及禮記節本三經緩授學庸孟子將來併入高等小學堂教之其國文一科原定授課時刻每星期四小時不敷教授見擬將國文一科鐘點格外加多較舊章約增數倍當不至有荒蕪廢古之慮至授課時刻原定每星期三十小時見擬自第二年爲始一律改爲三十六小時星期以半日溫習舊課半日休息暑假酌量各省地方情形量予縮短仍以五年畢業一日小學簡易科所以輔初等小學堂之不足課程較簡經費更省凡地方瘠苦不能多設初等小學堂者以及民間自立私塾不能仿照初等小學辦理者准其設立小學簡易科其必修課程約爲三門曰修身讀經曰中國文學曰算術其體操一科學堂設在城鎮者亦列爲必修科目學堂設在鄉村者見因體操教員缺乏暫作爲隨意科目手工圖畫亦作爲隨意科與初等小學堂一律辦理惟是小民力有不齊因之就學年限不能預定擬分爲兩類一類程度較深定爲四年畢業一類程度略淺定爲三年畢業聽民開自爲付度擇其力所能至者入焉授課時刻放假日期與初等小學堂相同惟年限略短其學生畢業之後欲再求深造者所缺功課可於高等小學堂補習之即無力深求者亦可藉爲正德厚生之資似此酌量變通有初等完全小學堂示以準的又有兩類小學簡易科爲之補助課本見已次第頒行教授亦應較易富庶之區固可以力求美備僻陋地方亦得量力擇辦兩類小學簡易科無論寺廟民家場圃村舍皆可爲學無論舉貢生監及學問較淺之寒儒既有頒發課本皆可爲師當不

至再設於財力不繼師資難得致礙教育前途

又 諭學部奏酌量變通初等小學堂章程并原有小學簡易科酌擬兩類辦法以期學徒日多教育漸臻普及繕單呈覽一摺所奏尙屬切實易行著各省督撫科率提學使無論官學私塾均當遵照此次定章分別地方情形切實舉辦并隨時派員認真考核務期學校日興民智日啟

又 甯夏將軍台布等奏甯夏滿營前設中小學堂見改爲高等小學初等小學各一區又設兩翼蒙學堂二區清文學堂一區

又 學部咨覆直督端方轉學司傳增湘迅將師範學堂屬小學各項表册送部核辦

又 咨浙撫增韞提督官立小學堂准予立案

又 東三省總督錫良奉天巡撫程德全奏擴充維城小學校名額

又 署歸化城副都統三多奏籌設土默特兩等小學情形

又 學部奏遵擬檢定小學教員及優待小學教員章程

又 奏京師試辦私塾改良辦法情形

二年會議政務處奏議覆御史趙熙奏檢定小學教員章程妨礙教育略稱檢閱部奏擬檢定小學教員章程以該御史所陳各節詳加考核如所稱直隸廣西因檢察師範城鄉小戶偶延一師在家縣官出差逮問費輒數百圓又地方官以官立學堂易入考成往往於私立者不加保護甚或摧殘之地方從此多事誠不免有此弊端皆官吏奉行不善所致並非章程之咎况教育期於普及且將多立公私小學堂並令私塾改良以冀漸推漸廣應由學部於前頒章程再行詳細申明飭令各省提學使嚴禁前項弊端以期興學日多力杜掇累至謂此次章程限定三年後無文憑者不得延聘是爲天下開無數訟根又謂限檢教員私塾勢歸撲滅不知此次章程三年後無文憑者不得延聘乃專指各處兩等小學堂而言私塾本不在內不致擾累民間有妨私塾也又如所稱各項科學皆須通曉乃可爲教員一省中舉貢生監通才幾人不得其人將令一般學堂全行解散是暗中直勒令人民廢學及教員既難中程勢將無人辦

學此項人民挾所學以尋生計日逼窮途尤爲世局大患查章程內檢定科目修身經義國文歷史地理皆舊日舉貢生監所優爲此外如算學格致其程度皆甚淺近期年數月即可涉其藩籬卽在家自行研習亦可通其大要其必不可能者又有專科教員以濟其窮初無強人所難之處兩等小學既定有各項科目則教員不能不有此知識卽不能不施以檢定兩等小學之外尙有三年簡易小學及簡易識字學塾其教員卽不在檢定之內但使文理通順略具普通知識者皆可取爲師資此項教員方慮其不敷分布斷不致無地位置則失業滋事之患可無慮也至所請將檢定小學教員章程暫緩通行俟師範普及教育大興再行舉辦查章程第十四條內本有見在教員缺乏凡風氣晚開之偏僻地方有略通經義文理明暢粗識歷史地理之大要及淺近算術者准由提學使司發給暫時准充教員執照俟風氣漸開然後實行檢定是已早經籌及無庸另議又請另將課本訂定頒行天下詳定私塾學生考驗之法等已於議覆御史趙炳麟條陳摺內酌擬辦法請旨飭行亦無庸再議惟所請於該章程後另加附條聲明此項檢定專指官立小學而言私塾不在其內一節查檢定章程本專爲兩等小學而設私塾原不在內但公立私立兩等小學之經官立案者亦應一律照辦不能專限於官立而原章未經指出或恐外省誤會應由學部補行聲明又中等查章程內應受試驗檢定資格有舉貢生監中文明通及通曉各項科學願充小學教員者一條向來各處塾師童生甚多不盡限於舉貢生監其中亦不乏明通之士今專以舉貢生監爲限似覺稍隘亦宜酌加變通應請飭下學部通行各省聲明檢定小學教員章程專指官立及經官立案之公立私立兩等小學而言三年簡易小學及簡易識字學塾並城鄉私塾皆不在內以免誤會又舉貢生監之外童生內有中文明通及通曉各項科學願充小學教員者亦准一體受試驗檢定以寬限制

又學部通咨督撫新設高等小學應添授學庸等書俾與初等課程相接其由三年簡易科初等小學畢業者應習孝經論語再應高等小學考試

又東陵守護大臣意普等奏添設高等小學堂

又學部議定改良私塾章程凡六章二十二條

三年又奏訂臨時小學教員養成所暨單級教員養成所簡章

臣謹案梁啟超之論幼學也謂春秋萬法託於始幾何萬象起於點人生百年立於幼學其教童子也先識字次辨訓次造句次成文不躐等也識字之始必從眼前名物指點不好難也必教以天文地學淺理如演戲法童子所樂知也必教以古今雜事如說鼓詞童子所樂聞也必教以數國語言童子舌本未強易於學也必教以算數百業所必用也多爲歌謠易於上口也多爲俗語易於索解也必習音樂使無厭苦且和其血氣也必習體操強其筋骨且使人人可爲兵也日授業不過三時使無太勞致畏難也不濫施夏楚使傷腦氣且養其廉恥也父母不得溺愛荒學使無棄材也其教法之簡易一曰識字書二曰文法書三曰歌訣書四曰問答書五曰說部書六曰門徑書誠使國家舉而行之蒙以養正聖功基之鄙野頑童馴致溫文爾雅豈不禱哉

右小學堂

皇朝續文獻通考卷一百七

學校考十四 學堂附師範 存古 譯學館 進士館

光緒三十年署江督張之洞會同蘇撫恩壽江蘇學政李殿林奏設立三江師範學堂略稱查各國中小學堂教員咸取材於師範學堂師範乃教育造端之地關係尤要兩江總督兼轄江蘇安徽江西三省此三省各府州縣應設中小學堂若未經肄業師範遽任以中小學堂教員必致疏漏凌躐且各學堂學派學程終難畫一臣等詳加籌度惟有先辦一大師範學堂以為綱領茲於江甯省城北極閣前創建三江師範學堂凡江蘇安徽江西士人皆得入堂受學查直隸督臣袁世凱奏建師範學堂定全省學額為八百名延聘日本師範教習十二人茲為三省豫備師範學額自宜從寬見擬江蘇省實屬定額二百五十名蘇屬定額二百五十名安徽省定額二百名江西省定額二百名共九百名其附屬小學堂一所定學額二百名開學第一年先招師範生六百名三年後再行續招足額前三年教小學之師範生約分三級一年速成科二年速成科三年本科以便陸續派赴各州縣充當教員第四年即添置高等師範本科以教中學之師範生備各屬中學堂教員之選見已延聘日本高等師範教習十二人專司講授教育學及理化學圖畫學各科並選派舉貢廩增出身之中學教習五十人分授修身歷史倫理學算學體操各科學堂未成以前暫借公所地方於本年開辦練習教員之法令東教習就華教習中國語文及中國經學華教習就東教習學日本文及理化學圖畫學彼此為學友東教習不得視華教習為弟子在日本語此法名互換知識俟一年後學堂造成中國教習於東文東語等學通知大略東教習亦解參用華語以教授諸生於問答無虞并於再行考選師範生入堂開學則不必盡借繙譯傳達可免虛費時刻誤會語氣該弊收效尤速其購地建堂經費擬江甯藩司籌撥常年經費由江蘇藩司於本年先協撥銀一萬兩以後每年協撥銀四萬餘兩令安徽江西兩省各按學生額數每名每年協助銀一百元稍資津貼不敷尚多查江甯銀元局銅元盈餘即以盈餘盈餘專供該學堂經費此舉為三省學堂根本教員得人起

見以仰副 聖朝興教勸學造就人材之至意

三十一年豫撫陳夔龍奏開辦初級師範學堂略稱 欽定學堂章程設優級師範以備中學教員設初級師範以備小學教員又初級師範分為完全科簡易科第論程度則以優級為高論需材則以初級為急河南通省共一百零七廳州縣即就每處設高等小學一所計之已需教員百餘人造就小學師資誠不容緩擬飭司道先於省城設立師範學堂一區考選學生一百七十名延聘教習刻期開校按照定章簡易科教授俟畢業後派充各小學堂教員以應急需堂中功課暨獎勵等項悉遵奏定初級師範學堂章程辦理並參仿直隸湖北奏定師範章程以期因地制宜查豫省風氣固於方隅開辦學堂得師匠易即使借才異地亦虛搜采無從自非設師範學堂無以覺後知而資先導惟是事屬創始條理萬端此開款絀用繁不敢不勉為其難切實整頓

又浙撫張曾敷奏全浙師範學堂擬就貢院改建略稱浙省地濱江海風氣早開自科舉停止公私學舍林立臣自去臘到任於全浙師範汲汲而謀其始惟是欲辦學堂須籌經費爰將舊存之敷文誥經學海三書院一併裁撤每年騰出膏獎等銀一萬餘兩又於司關向解臣衙門公費每年畫捐銀一萬兩以為常年經費又提還書院生息存本洋六萬圓並據前出使法國大臣孫寶琦捐助洋銀一千圓以為開辦經費經費粗定乃議創建查舊有貢院占地廣闊勢亦爽垲科舉既罷此為虛設就改學堂最為適宜且拆卸殿舍傾壁木石就加選用於開辦經費不無少裨並咨調浙紳陸桂星董理建築此臣籌辦師範學堂之大略情形也至學堂所需管理員教員得人不易容臣廣訪訂定俟學堂落成即飭各屬各送師範生屆時考驗入堂其學科程度悉遵定章辦理務期數年之後一省之教員足以敷一省中小學堂之用

三十二年直督袁世凱奏設立北洋師範學堂略稱臣自莅直以來即於保定設直隸師範學堂使畢業諸生充當各屬教員比年科舉停罷多士承流負笈京漢者接踵於道若內地多設完備學堂則各省可免贅道之煩學者亦無向隅之歎因於天津地方創建北洋師範學堂廣收直隸山東山西河南東三省

及西北各省旗學生分科肄業仍就目前情形察其緩急輕重畫爲三科以廣造就一曰完全科與辦伊始以應用爲急故不妨以簡易爲歸迨小學程度漸高則師範亦因而益上查奏定章程優級師範辦法先設公共科應選中學堂畢業生升入三年畢業惟各省中學畢業者尙屬寥寥不得不稍爲變通選取其程度較高者入學而展長其畢業期爲六年於招收學生之時雖似通融而以中學年限併計之仍復不相背戾一曰專修科查奏定章程優級師範學堂辦法得設專修科係審察各地中學最缺乏某種學科之教員因特置某種學科專修之以補其缺乏日本高等師範學校每於其國中初級師範及中學校教員缺乏之時特設專修科分門造就以濟急需今師其意先就直隸等各省酌定人數挑選中學校有根柢者分門肄習期以二年半畢業凡分科目爲五曰歷史地理曰博物曰手工圖畫曰數學理化曰文學教育而以心理學教育學教授法管理法國文體操爲必修科畢業後令各回原省爲初級師範學堂教員分之則各有專長合之則便成一校庶幾輾轉傳衍殊途同歸一曰簡易科小學必宜備設而教員往往乏才當此之時仍以養成小學教員爲急因選各省年歲少壯諸生肄習簡易科以兩學期畢業既有合格之師範自宜設相當之學堂以爲實行強迫教育地步此分設三科之大略也又查奏定章程優級師範課程分爲三類其第三類有法制及理財爲通習之科近東西諸國於中學堂添設此科者已屬不少矧奉 詔預備立憲則法理尤宜普及故於分設之三科中各置法制及理財一門以上皆就各省今日情形斟酌辦理俟二三年後畢業者多然後專辦完全以求美備初擬額收千人嗣以經費難籌暫以四百人爲限一俟籌有的款再行推廣

又吉林將軍達興奏吉省開辦師範學堂

又學部通電各省推廣師範生名額略稱各省將軍督撫鑒方今振興教育以小學堂爲基礎而教員亟須養成故師範尤要應請迅將省城師範名額盡力推廣至少設一年卒業之初級簡易科生五百人以養成小學教習并設二年卒業之優級選科生二百人選科中分四類一歷史地理二理化三

博物四算學每類學生五十人以養成府立師範學堂中學堂教習并須設五個月卒業之體操專修科授以體操遊戲教育生理教授等法名額百人以養成小學體操教習至如何籌辦先請電示其游學預備如未設立暫可從緩見在請以全力注重師範五個月內本部當派視學官分省巡視又咨閩督崇善師範學堂畢業時由提學使將學科成績暨派定義務詳悉報部略稱教育以師範爲始基而教授師範以實地練習爲應用閩省師範既以逐漸推廣附設小學所訂章程尤爲詳善於教育具有心得學堂圖式亦甚合法經營布置具見苦心該堂師範生既已身受教育練習教法畢業後分往各州縣辦理小學閩省學務必有起色至畢業年限較定章程稍短惟已增加鐘點自可量爲變通屆畢業時由提學使將該堂師範生學科成績暨派定義務詳悉報部

又咨陝陝撫曹鴻勳擬辦初級完全師範略稱初級師範用更番教授法自係體察該省情形切實籌畫所稱籌完全而實仍圖簡易籌減少而實仍籌宏大具見興學苦心揆之本部所定辦法雖略有變通而用意正復相合應即試辦至優級選科酌減額數亦無不可但當飭令認真辦理以期有成又咨廣西巡撫林紹年轉行提學使切實籌辦優級師範略稱廣西興學數年具有中學二年程度之學生應即廣爲考選不必定求之師範學堂至理化博物等之實驗室圖書室自應隨時籌款建築法理財之教員尤宜設法延聘優級師範所以預備中學堂及初級師範教員應與初級師範同時並設即一時不能遽開本科而豫科之設斷不容緩庶一年之後可以續辦本科俾中學及初級師範教員有所取資

又署兩廣總督岑春煊奏設兩廣優級師範學堂略稱辦學以師範爲先而造就師範之師範尤以優級爲重兩廣優級師範學堂爲兩省開辦初級師範學堂中學堂之根本 悉心規畫以科舉既停貢院無用即以其地作爲優級師範校址略仿日本師範學校成式計可容師範生五百餘人附屬中小學生約五百人所需經費即以裁改省城五大書院款項及查封長壽寺產業撥充詳

細規則章程應由新任總督周馥督同廣東提學使酌核辦理

三十三年豫撫陳夔龍奏辦第二師範學堂略稱豫省自光緒三十一年創辦師範簡易科上年添設完全科復就明道書院改設師範講習所嗣又添辦優級選科見在師範學堂簡易科畢業兩次傳習所畢業一次通計得一百六十人陸續派赴各州縣小學堂充當教員此外派赴日本及直隸學習師範者約百餘名額畢業回籍者亦屬寥寥教員不敷委用查省城貢院房舍今擬就其中偏東房舍略加修葺按照學堂形式酌量配置名為第二師範學堂招集自費生徒仍先從初級簡易兩科辦起分為五班以二班習完全以三班習簡易預為將來添派教員接辦優級地步一俟畢業期近再設高等小學一所為諸生等練習實事授業之區其常年經費即將裁撤師範傳習所原有之款九千餘兩撥用據署提學使孔祥霖擬定辦法洵於擴充學務造就師資大有裨益又江督端方奏籌兩江師範學堂經費略稱兩江師範學堂經前署督臣張之洞創辦為造就甯蘇皖贛各屬中小學堂教員之地章程完備規制精宏實關三省教育命脈所需常年經費奏准每年江蘇藩司津貼乃蘇屬議定抵撥之款自銅元改革後徒有協助之名並無抵撥之實至贛省應協之款僅於三十年據江西藩司報解龍洋五千元皖省則迄今五年絲毫未解而該堂經費不能半途而廢然以三省公共之學堂而令江甯一省獨任其費於理固屬不平於力亦有未逮疊據江甯布政使繼昌以該堂經費無款可墊詳請另行核撥惟有按照原案嚴飭蘇皖贛三藩司將應協各款按期報解通力合籌以期舉擊易舉倘再視為具文即行據實糾參以儆玩泄

宣統元年山東巡撫袁樹勛奏立優級師範選科學堂

又兩江總督端方奏皖紳安徽教育總會會長二品頂戴江蘇候補道李宗棠捐辦師範學校請立案

又署山東巡撫孫寶琦奏東省師範學堂改為優級師範

又吉林巡撫陳昭常奏裁撤方言學堂改設優級師範選科

二年直隸總督陳夔龍奏籌設完全初級師範學堂及撥款情形

又學部奏議覆山東改正優級師範學堂辦法

又陝甘總督長庚奏優級師範學堂預科畢業升入選科

臣謹案禮學記之言師道也教法謹嚴條理詳備瀛秦燔書坑儒欲習法令者以吏為師而師道壞其故揚子法言曰師者人之模範也模不模範不範為不少矣北宋孫明復胡安定起而振之程子朱子又繼之而後師道大明今者海道棣通習見夫歐美學校有高等師範中等師範日本變法之初首立師範文科教日凡九理科教日凡十五教之有本學之有序師與師相傳不思其不善也今吾國自天津以至各省廣設優級初級師範學校果能敦學相資如耕者植嘉穀而非種必鋤牧者去害馬而良驥斯得青藍冰水之喻斯亦吾黨所樂聞也

右師範學堂

光緒三十一年河南巡撫陳夔龍奏請就河南省城設立尊經學堂以保國粹三十三年湖廣總督張之洞奏湖北省城創立存古學堂以存國粹而息亂源略稱今日環球萬國學堂皆最重國文一門國文者本國之文字語言歷古相傳之書籍也即開有時勢變遷不盡適用者亦必存而傳之斷不肯聽其漸滅至本國最為精美之學術技能禮教風尚則尤為保護持名曰國粹專以保存為主凡此皆所以養其愛國之心思樂羣之情性東西洋強國之本原實在於此尚書云惟土物愛厥心臧聰聽祖考之彝訓蓋必知愛其土物乃能愛其鄉土愛其本國如此則為存心良善方能聽受祖考之教訓是知必愛國敬祖其心乃為善反是則為不善中國之聖經賢傳闡明道德維持世教固應與日月齊光即列朝子史事理博該各體詞章軍國資用亦皆文化之輔翼宇宙之精華豈可聽其衰微漸歸泯滅查光緒二十九年 欽定學堂章程內學務綱要第十一條即係重國文以存國粹 自前兩年回鄂以來體察各學堂情形所有見派監學及教員皆係 在楚所設經心兩湖兩書院中之都講高材分布各處該生等中學素有根柢人品向來端純深知宗法聖賢兼以博覽典籍故此大分派各學堂職業以及趕學速成師範補習普通派赴外洋游歷考察

學務均屬可用之材但通省學堂需人甚多且京師調取以及各省索取絡繹不絕外出太多不敷應用誠恐數年以後經心兩湖舊學生或仕宦登朝或有事外出需用教員管理員日衆舊日學生日稀將何以取資應用而中文中學向來義理精深文詞雅奧新設學堂學生所造太淺僅可爲初等小學國文之師必至高等專門學普通中學優級師範高等小學皆無教國文專門之教員儼高等以下各學堂之中學既微中師已斷是所國文之經史詞章無人能解無人能教然則將來所謂大學專門豈非徒託空言既無周秦傳經之名師安有兩漢立學之博士竊恐不免有經籍道熄網淪法教之憂言念及此不勝大懼查經心書院乃從前提學時所建專爲諸生通經學古而設茲將其故址改爲存古學堂屋宇量加修改務期合法建造書庫多儲中國舊學圖書金石名人翰墨前代禮器專聘通儒碩彥爲教員選取中學較優之生收入此堂肄業即專習此數門數門之中經學爲一門應於羣經中認占一部說文爾雅學音韻學亦附此門內史學爲一門應於廿四史及通鑑通考中認占一部本朝掌故即附此門內詞章爲一門金石學書法學亦即附此門內以上或經或史無論認習何門皆須兼習詞章一門而詞章之中但專習一種卽爲合格或散文或駢文或古詩古賦皆可兼習者聽博覽爲一門凡習經史詞章三門者後四年皆須同習博覽一門以學堂本應選取高等小學畢業者升入特以目前初等高等小學尙未造有成才應特就各學生員考選不拘舉貢廩增附皆可至監生童生皆不收錄惟總須年在三十五歲以下其課程雖與各學堂稍異至其與學堂同者則規矩整肅衣冠畫一每日兼習兵操皆與見辦文武器械體操兵式體操均應一體演練要之孔子所言溫故而知新一語實爲千古教育之準繩所謂故者非陳腐頑固之謂也蓋西學之才智技能日新不已而中國之文字經史萬古不磨新故相資方爲萬全無弊若中國之經史廢則中國之道德詞章俱廢國文既絕而欲望國勢之強人才之盛不其難乎今該學堂既以國文爲主卽宜注重研精中學至外國歷史法政格致及各項實業

等事只須令其略知有此各種切用學問卽足以開其腐陋化其虛憍固不必一人兼擅其長每一星期各講習一點鐘卽可若算學一門自應仍舊講習且數理精蘊儀象考成等書測算卽用西法自不宜墨守九章四元舊式地理及輿圖一門古來中學所重見諸正經正史况天地人大端要略既名儒者豈容茫昧不通今全球地圖幾於家有一本豈能畫分中外亦應兼習但算學地圖不必過於求精鐘點亦不宜太多俾其時刻較寬可以專力中學務造精深蓋前奏各學堂章程重在開通國民普通知識故國文及中國舊學鐘點不能過多此項存古學堂重在保存國粹故普通實業各事鐘點亦不便過多兩法互相補益各有深意不可偏廢畢業擬以七年爲限該堂監督一時難得其人凡學生平日功課由各門分教員按月考校填注分數送提調繼續提學使由提學使呈送臣衙門覆核取定榜示年終大考由臣親臨察試此項學生於課程外能有餘力加習洋文爲將來考究西籍之資爲用尤大本學堂附近設立外國語文學堂一所准其自行兼習畢業後可照高等學堂例奏請獎勵並准送入大學堂文學專科肄業其不習洋文者畢業後送入大學堂文學選科肄業凡畢業者將來備充各師範各普通中學高等學堂大學等學堂文學專門之師此項存古學堂肄業學生以二百四十名爲額分爲三班取錄以次入堂肄業該堂課程鐘點經臣殫心竭慮督同提學使及各學堂良師通儒往復商榷始克擬定大略總期多致心力於中國經史詞章之學庶國文永存不廢可資以補救各學堂之所不足而又略兼科學以開其普通知識俾不致流爲迂拘偏執爲談新學者所詬病此項人才將來上之則升入通儒院以供大用次之則以備文學侍從之選伏讀近年歷次興學諭旨惟以端正趨向爲教育之源一則曰敦崇正學造就通才再則曰庠序學校皆以明倫聖訓煌煌無非以崇正黜邪爲宗以喜新忘本爲戒夫明倫必以忠孝爲歸正學必以聖經賢傳爲本乃近來學堂新進之士蔑先正而喜新奇急功利而忘道誼至有議請廢罷四書五經者有中小學堂並無讀經講經功課者甚至有師範學堂改訂章程聲明不列讀經專科者人心如是習尙如是循是以往各項學堂於經學一

科雖列其目亦止視為具文至於論說文章尋常簡牘類皆捐棄雅故專尚新詞馴至宋明以來之傳記詞章皆不能解何論三代此如籍談自忘其祖司城自賤其宗正學既衰人倫亦廢為國家計則必有亂臣賊子之禍為世道計則不啻有洪水猛獸之憂此區區保存國粹之苦心或與世教不無裨益該學堂本年暑假後即行開學所擬章程試辦半年後如無窒礙即請 敕學部核定通行各省一律仿照辦理以延正學而固邦基再前見學部議覆湖南擬設景賢等學堂河南擬設尊經學堂摺內有疊稱仿照湖北存古學堂之語查該兩省學堂章程似與向來書院考課相仿與鄂省存古學堂之辦法判然不同湘豫兩省係屬誤會合併聲明

謹案曹元弼曰存古學堂所以維持聖道拯救人心培養師儒教忠孝邊逆亂者意至深遠存古者所以存道也所以存國也所以存民也存古學堂由突徙薪以防燎原也疏濬決排以救滔天也蓋經學存則人識君臣父子之綱家知遠邪歸正之路而逆源塞矣事親竭力事君致身仁為己任伊尹之堯舜君民孔孟之悲天憫人念釋在茲每飯不忘凡所以尊主隆民振衰禦侮之術無不精心遠志以學而人材出矣史學存則古昔明君良臣諸道修政之精論德刑之善制良將之方略循吏之條教以及制度之因革郡國之利病山川之險要物產之豐耗博觀盡識而知足以窮萬變慮足以防百弊矣辭章存則讀屈原枚叔劉子政以下諸人之文而忠君愛國之心勃然與起固結不解讀賈誼董仲舒韓退之以下諸人之文而輔世衛道之心毅然奮發卓然自立且也讀于令升之晉紀總論而知編解維絕之害讀庚子山之哀江南賦而知水火猿鶴之痛變雅哀音驚心動魄發聲振聵雖欲不道天未雨求免危亡力學猛進而有所不敢矣今環海各國政事藝能日新月異而皆有保存國粹之義互相師法而皆以本國語文為重是以其人之游歷他國者無喜新背本棄同即異之患蓋存古者古今之常道中國之通義况中國古學其大端皆所以法天明倫崇仁厲義尤粹之粹者西人且多論語尊孔子况中國士民乎

無如邇來喜新厭故非聖犯上之莠言學識未定之人多為所惑各省學堂自省垣外竟有顯背 欽定章程輕廢中文廢棄經書者充其類將使天經地義日就淪滅彝訓雅故莫能通曉諛淫邪暴煽動日易蔓延日廣人盡鬼魅家為亂賊謬種流傳必有橫決糜爛不可收拾之一日其故由於管理教授多不學無術躁妄之徒初不知人倫道德為何事聖賢傳為何用學術不明師道不立世禍亟矣此相國所以特立存古學堂不得已而為扶危防亂急救之良策也

三十四年江蘇巡撫陳啟泰奏准仿照湖北章程於江蘇省城設立存古學堂又御史李浚奏經學亟宜注重請設立存古學堂一摺略稱列強環峙智巧日新然彼之所長器數藝能治天下之所用非用以治天下者也治天下者君臣之義父子之倫捨經學其奚以為世尚新奇輒以儒學相詬病抑思修齊治平備載方策自秦漢以迄元明循之則治悖之則亂得失之林班班可考即近世迭遭變故卒能化險為夷人心固結而莫解者良由 祖功 宗德入人之深亦由經學昌明有以維持於不敝也見當科舉既停航航經生並無專席倘異日流風歇絕傳授無人尚復成何事體大學士臣張之洞前在鄂督任內奏立存古學堂保存國粹 以為存國粹即所以束人心維世教江蘇撫臣陳啓泰踵而行之該二省既已如此他省何獨闕如况 京師首善太學為造士之地擬請 飭學部各直省督撫於國子監地方及各省省城一體設立存古學堂以為倡始所有詳細事宜悉照湖北江蘇兩省奏定章程參酌辦理

宣統元年陝西巡撫恩壽奏遵設存古學校
三年學部奏修訂存古學堂章程略稱光緒三十三年前湖廣總督臣張之洞奏湖北設立存古學堂見已設立數年各省亦漸有仿照設立者惟章程迄未通行未免彼此歧異非將原章修訂通行不足以收整齊畫一之效查原章中於課程教法籌畫至為精詳而辦理情形今昔既略有不同故條文不無增益之處其管理規則亦為原章所未及並參照他項學堂章程酌量加入俾底定全吾國古學精深研究不易自應比照他項學堂定作中等五年高等三年以

資深造又此項修明古學之人即為將來經師大儒之選固貴精而不貴多
部前於籌備單內奏定各省一律設立存古學堂見在經費支絀自應由各省
體察情形其財力實在艱窘者暫准緩設或與鄰省合併辦理庶幾設立者皆
屬完備之學堂用副循名核實之意

右存古學堂

同治元年始設同文館於 京師從總理衙門王大臣之請也

二年 諭前據總理各國事務衙門奏遵議設立學習外國語言文字學館為
同文館因思總理衙門固為通商綱領而中外交涉事件則廣東上海為總匯
之所見據李鴻章奏稱上海已議設立外國語言文字學館廣東亦應仿照辦
理著庫克吉泰奏端書於廣州駐防內公同選閱擇其資質聰慧年在十四或
年二十左右清漢文字業能通達質地尚可造就者一併揀擇延聘西人教習
兼聘內地品學兼優之舉貢生員課以經史大義俾得通知古今並令仍習清
語厚其廩餼時加查考學有成效即調京考試授以官職此事為當今要務該
將軍等務當實心辦理不得視為具文

五年 允郭嵩濬請召生員鄒伯奇李善蘭赴同文館差委

六年 諭前據總理衙門奏請設同文館專用正途科甲人員學習天文算術
並擬章程六條呈覽當經降旨依議茲據御史張盛藻奏科甲正途讀書學道
何必令其習為機巧於士習人心大有關係等語朝廷設立同文館取用正途
學習原以天文算學為儒者所當知不得日為機巧正途人員用心較精則學
習自易亦於讀書學道無所偏廢是以派令徐繼畲總管其事不過借西法以
印證中法並非舍聖道而入歧途何至有礙於人心士習耶該御史請飭廷臣
妥議之處著毋庸議

又 諭前因天時亢旱詔求直言原計於國計民生有所裨益茲據都察院代
奏候選直隸州知州楊廷熙奏請撤銷同文館以弭天變一摺嗚呼數千言甚
屬荒謬同文館之設歷有年所本年增習天文算學以裨實用歷經御史張盛
藻大學士倭仁先後請罷前議疊經明白宣示茲據該知州所陳十條原可置

之不論惟有關於風俗人心者甚大不得不再行明示楊廷熙因同文館之設
並詆及各部院大臣試思楊廷熙以知州微員痛詆在京王大臣是何居心且
謂天文算學疆臣行之則可皇上行之則不可普天之下孰非朝廷號令所及
豈有疆臣可行而朝廷不可行之理又謂事在必行懇請將翰林進士科甲有
職事官員撤銷尤屬荒謬國家設立科目原期登進人才以備任使曾國藩李
鴻章均係翰林出身於奉旨交辦中外交涉事件從無推諉豈翰林之職專在
詞賦於國家政務概可置之不問乎至所稱西教本不行於中國而總理衙門
請皇上導之使行又專擅挾持啟皇上以拒諫飾非之漸等語更為肆口詆誣
情尤可惡推其原故總由倭仁自派總理衙門行走後種種推託所致楊廷熙
此摺如係倭仁授意殊失大臣之體該大學士與國家休戚相關不應堅執已
見著於假滿後即到總理衙門之任會同該管王大臣等和衷商酌共濟時艱
至楊廷熙草莽無知姑不深責恭親王寶釐請將楊廷熙所奏十條派大臣覈
議並請將該王大臣及見任各大臣均暫開總理衙門差使聽候查辦自係為
楊廷熙摺內有專擅挾持等語當此時事多艱該王大臣等當不避嫌怨力任
其難豈可顧恤浮言稍涉推諉所請著毋庸議

陳康祺郎潛紀聞 同文館者聘西人為教授凡中國搢紳至齊民家聰

穎子弟均許投牒赴館學習天文句股造船製器諸法月有課歲有會其
尤雋異者優其廩餼獎以清秩蓋官途之終南也當創議初樞府諸公擬
選各部翰林院五六品以下官送館肄業御史張盛藻疏奏謂天文句股
宜令欽天監五官正天文生擊究製造工作宜責成工部考校文儒近臣
不當崇尚技能師法夷裔奏入樞臣堅持初議時倭文端公方以首揆掌
院偶有違言遂疑倭公迂闊沮大計迺奏派公充同文館大臣公策蹇莅
任忽墮馬以足疾請假而部院庶僚亦自以下喬遷谷為恥迄今十餘年
尚無儒衣冠入館者嗚呼倭公誠理學名儒狂瀾砥柱在樞廷諸老或亦
深思熟計志在自強哉

十一年覆准上海同文館學生附生朱格仁等五名經總理衙門試有成效奏

給中書銜作爲附貢准其出學該生等上年歲考未及與試係因調取來京與有心誤考者不同免其補考

光緒二十一年直隸總督王文韶奏津海關道盛宣懷捐辦西學學堂從之

謹案光緒十二年津海關道周馥請設博文書院嗣因撥款與稅務司德璉琳意見不合遂輟至是盛宣懷卒成之夫稅務司我之雇傭也以撥款之故敢於撓我學務當始雇時未與畫清權限尾大不掉德璉琳其一人撓學務其一端耳烏能測其所既哉

三十二年學部咨粵督張之洞給事中陳慶桂奏廣州譯學館亟宜整頓略稱原奏稱廣州府城自同治初年設立同文館直接於總理衙門爲西學之權輿數十年來培養八旗子弟得人稱盛惟當開辦之始專習外國語言文字以備譯才此外僅有粗淺算學科學既不完全國文亦未講究上年因其舊制改名譯學館按之奏定章程仍未悉合尤須及時整飭謹酌擬數條一管理宜得人一教習宜精選一學生宜甄別一學科宜補習一學費宜預算

應請 飭令廣州將軍兩廣總督督飭提學使認真經理以期漸收成效旋據廣州將軍壽蔭等會奏議將廣州譯學館與兩廣游學預備科歸併爲一改爲兩廣方言學堂竊維設立學堂各有取義奏定章程譯學館意在通曉各國語文俾能自讀西書一以儲交涉之才一以備各學堂教習各國語文之選師範學堂意在使全國中小學堂各有師資其宗旨判然不同未可以爲性質相近該督上年奏辦游學預備科專爲造就高等師範而設並非聲明將來不得中輟本年 部電咨各省宜全力注重其游學預備科暫可從緩意在急於養成師資與該督專辦預備科專爲造就高等師範之本意正相脗合茲據會奏改爲方言學堂係爲節省經費起見惟游學預備科與譯學館立學宗旨既殊辦法自難強合不宜裁撤歸併始足以廣造就而育人才查見在游學日本者已逾萬人此項游學預備科應即改爲優級師範學堂養成優等教員以應各學堂之急需自與立學之意亦符至廣州譯學館即舊日之同文館創自同治初年專爲培養八旗子弟繙譯之才而設其學

科本未完全管理教授亦均未能合法給事中陳慶桂原奏所稱總辦以協領兼充勢難認真督率教習由稅務司代請率以關員濫充皆屬切中情弊自應切實整頓見在各省駐防學堂經 部奏定概歸提學使管轄自毋庸再以協領兼理所需教員應由提學使分別去留詳慎擇聘不得濫用關員教授課程務遵奏定章程力求完備至該館學生應由提學使甄別一次其年齒太幼中文未通者撥回中小學堂肄業並按照原奏准挑漢人入館酌定額數一律錄取入學惟奏定章程京師設譯學館各省設方言學堂該譯學館應即改稱方言學堂以符定制

又奏請派譯學館監督略稱原派監督翰林院侍讀學士黃紹基 簡放湖北提學使所遺差使當由 部照會該館齊務提調之翰林院庶吉士章棣接署並派 部員外郎張縉光幫同照料查章棣品端學粹於學務經驗最深於該館事宜尤爲熟悉接署監督數月措置裕如生徒翕然推服擬即派令專辦以資熟手而一事權

又咨覆譯學館添招丁級學生辦法略稱迭准咨開添招丁級學生所有此次取錄之學生應申貴監督於到堂後專派教習與之講求國文明示宗旨並切實考察其性行不良議論乖謬者隨時斥退三月期滿重加考試擇其率教者留堂肄業如有議論奇袤敢度經非聖者悉行屏除不得稍存姑息甄別既定再行體察學生年齡學力分隸本科預科按程教授較之但憑試卷以定等差必更切實原卷一併發還所擬預科課程亦頗周妥應即遵選教員屆時認真舉辦

三十三年川督錫良奏開設藏文學堂略稱川藏疆域毗連川滇內附各番族亦多習用藏中語文際茲經營藏衛整理邊務之時必須招集內地人士自行肄習藏文方足以備任使 於去年春開飭令打箭爐廳覓雇兼通漢番文字之人充當教習旋據遴選二人來省當經設立藏文學堂招考文理通順身體壯健之學生入堂肄業即飭所招番教習盡心教授仍由各科漢教員教以國文修身倫理諸科俾端其本

又江督端方奏創設南洋方言學堂略稱奏定學堂章程稱譯學為今日要需向來學方言者於中國文詞多不措意不知中文不深則於外國書精深之理不能確解悉達其成就必不能遠大誠以五洲交通譯才重要若使毫無根柢僅識西字不特於彼中兵刑食貨張弛治忽之大無從深求即文詞語氣輕重緩急之閒推算格物制器尙象之法亦不能得其本旨所在而閱其未譯之書變通辦理先招德文法文兩班學生各六十名其普通學之目九曰人倫道德曰中國文學曰歷史曰地理曰算學曰博物曰物理及化學曰畫圖曰體操專門學之目三曰交涉曰理財曰教育所有分年學科程度悉遵奏定章程辦理其英文一科因習者已多俄文一科因行用不廣俟財力稍充再行增設

三十四年學部奏各省方言學堂添招學生各辦法略稱查譯學館及方言學堂之設係承同文館及廣方言館之舊當時習外國文者鮮是以特設此項學堂以培交涉人才及外國文教員見在各處高等學堂無不注重外國文而各省法政學堂皆有交涉學功課外務部又特設儲材館此後外交專家不患無人等擬行各省凡方言學堂已奏咨有案者准其照舊設立惟以後添招學生必須考選中學畢業生升入若無中學畢業生即不必添招新班至見在求經設有方言學堂之省分擬令其注重高等及中學之各項課程將來自不乏精外國文兼習普通學之人才不必再立方言學堂以免紛歧

宣統元年東三省總督徐世昌奏奉省設立方言肄習所略稱陪都重地士大夫筮仕此邦多不諳外國語言文字情勢隔閡是涉獵方言為奉省政治上第一要義今於省城舊有瀋陽書院前圖書館內開方言肄習所一區派梁如浩錢能訓為該所監督以英日俄語言文字為必修科凡在省充差以及候補人員均准入所肄習分甲乙兩班按日於夜間輪課甲班兩年畢業乙班三年畢業

又兩江總督端方奏甯省方言學堂添設英文二年新疆巡撫聯魁奏新省籌設中俄學堂

臣謹案譯學之難莫難於譯書者之所學與著書者之所學腦合無間乃

可以語於是在昔 太宗開基以國書編成綱鑑 高宗四庫全書譯成西書四十一家悉予著錄 宣宗時俄羅斯進呈書三百五十餘部擇要繙譯度藏祕閣富於前代今譯學館之設得翰林院檢討章梈為之監督造就譯才由西藝以兼通西政庶免言之無文行而不遠之弊不徒若鳩摩羅什玄奘之於內典偉烈亞力李善蘭之於幾何原本僅僅以佛學算術畢乃事也

右譯學館

光緒二十八年 諭進士為入官之始尤應加意陶成用資器使著自明年會試為始凡一甲之授職修撰編修二三甲之改庶吉士用部屬中書者皆令入京師大學堂分門肄業其在堂肄習之一甲進士庶吉士必須領有卒業文憑始准翰林院散館並將堂課分數於引見排單內註明以備酌量錄用其未留館職之以主事分部並知縣銓選者仍照向章辦理如有因事告假及學未卒業者留俟下屆考試分部司員及內閣中書亦必須領有卒業文憑始准奏留歸本衙門補用如因事告假及學未及格必俟補足年限課程始準作為學習期滿其即用知縣簽分到省亦必入各省課吏館學習由該督撫按時考核擇其優者立與敘補其平常者仍留肄習再行酌量補用所有一切課程著責成張百熙悉心核議期收實效

臣謹案光緒壬寅諭新進士皆令入京師大學堂肄業嗣於太僕寺街別立進士館不隸於大學堂癸卯甲辰兩科進士入焉迨丙午大都派赴日本東京法政大學肄業者半去者半其留者則於丁未畢業後派赴日本游歷考察政治云

三十二年學部致電駐日本楊大臣進士館內外班學員分別送學略稱見經奏准進士館變通辦法甲辰科內班學員三十餘名均送入日本法政大學補修科其外班未經到館之學員均送入日本法政大學第五班速成科業由本部咨行該館並分電各省限於中八月十五日以前到東希即早為預備與該校妥商一切

又通電各省墊發進士館人員游學川資學費由本部匯交出使日本大臣給發略稱進士館出洋遊學人員每員給川資一百二十兩先由貴處墊發促令啟行其學費每員每年四百兩由本部匯交使臣給發

又咨駐日本楊大臣電匯出洋學費略稱查新派出洋進士及翰林學費已由正金銀行電匯八十分計京足銀八千兩合日金一萬一千九百七十五元三角八分嗣後此項學費均按每員每季二百兩之數匯寄除電復外相應咨請轉發

三十三年學部奏進士館畢業考列優等最優等各員准其呈請改外略稱奏定進士館獎勵章程考列中等者翰林部屬中書有自願外用知縣者准其呈明學務大臣均以知縣照散館班次即用先翰林次部屬次中書等查進士館各員肄習學科多係法律政治交涉各門用為地方行政官吏均屬相宜其中等者既准改外優等最優等亦不乏才堪外用之員擬請此次考列優等最優等各員如本員自願外用知縣者准其呈明本部衙門堂官比照考列中等人員自願外用之例移咨吏部照章辦理

又奏請派大臣會考進士游學畢業各員並酌擬考試章程略稱見在進士館留學補修科各員及由速成科畢業後再入補修科各員先後畢業回國呈驗文憑筆記聽候考驗其以前進士館學員在館及游學畢業未經考試者亦應准其一體與考查上屆進士館學員考驗畢業蒙 派大臣四員會同考試此次見擬於本月十五十七兩日舉行進士館游學畢業考試其會考大臣擬請先期 簡派屆期會同 等認真考驗並核定分數以昭慎重

又予進士館畢業學員修撰王壽彭等九十人獎勵有差

又予進士館游學畢業學員編修楊兆麟等獎勵有差
三十四年學部奏進士館游學畢業請照章會考略稱進士館出洋除入補修科之各員已於上年考試畢業外其入速成科各員見亦畢業先後回京自應定期考驗又進士館未經出洋之外班學員因人數無多擬難開堂講授經 部略為變通將舊外班所授之第四第五第六三期講義發給各學員自行

研究見在此項外班各員亦已滿六學期自應一體准其考試畢業 部見擬於本月二十八三十兩日分場考試上年奏准進士館游學畢業考試章程先期奏請 欽派會考大臣由軍機處開單請 簡其餘考試事宜亦擬悉遵奏准各章辦理

又予進士館游學及外班畢業學員黎湛枝等獎勵有差

又予進士館畢業學員陳雲誥等及游學畢業學員葉先圻等各獎勵有差

謹案歷科新進士以庶常用者在庶常館學習三年期滿散館黜陟有差自光緒二十八年奉 諭癸卯科為始新進士着在京師大學堂肄業於是癸卯甲辰兩科皆入進士館主事在本衙門當差者散發講義別為外班三十二年創游學日本之議癸卯科進士在本館畢業甲辰科進士盡派東洋歸國後庶常散館不在 保和殿朝考並與主事等書等在學部考試庶常考列最優等遇缺題奏優等加侍講銜中等授職編檢餘各獎勵有差其中未經 殿試朝考之貴州陳正猷授翰林院檢討即用知縣江西黃為基以郵傳部主事用尤為特獎云

右進士館

光緒三十二年學部咨進士館仕學畢業學員唐宗愈等五名派往日本游學略稱前准咨送仕學館畢業學員業經本部考驗內場評定等第查有唐宗愈吉祥蔣葵沈家彝梁載熊等五名堪以派赴日本入帝國大學法科肄業以期深造其游學年限以四年為期

又咨使日大臣派學員梁載熊鄭思曾赴日本習法政略稱茲查有仕學館優等畢業學員梁載熊鄭思曾堪以派赴日本入帝國大學法科肄業其游學年限除補習東語外以四年為期至所需學費每年給中國銀四百兩另給川資及整裝費中國銀一百二十兩相應給咨查照送學

謹案仕學館附屬於進士館別設一講堂其學員僅二三十人大都納粟入官若唐宗愈等請咨出洋仕優則學尚不負古訓云

右仕學館

皇朝續文獻通考卷一百八

學校考十五 學堂法政 監獄附 檢驗學習所附

光緒三十一年學務大臣議覆修訂法律大臣奏請設法律學堂並各省課吏館添設仕學速成科略稱原奏稱新律修定亟應儲備裁判人材宜在京師設一法律學堂考取各部屬員入堂肄習畢業後派往各省為佐理新政分治地方之用課程比照大學堂奏定學科酌量損益查奏定章程大學堂政治專科法律學門所列科目備詳中西法制見在預備甫設專科尚未有人伍廷芳所請專設法律學堂實為當務之急應即由該大臣等詳擬章程奏明辦理學員就部屬考取畢業後應請 簡派大臣會同學務大臣詳加考驗比照仕學館獎勵章程酌量辦理惟此項學員原為大學堂政法專科未備急需用人而設將來專科畢業人才日出屆時酌議歸併以節經費而符定章又稱請在各省課吏館內添設仕學速成科自候補道府以至佐雜均令入學肄業課程參照大學堂法律學門所列科目及日本見設之政法速成科畢業後由督撫將學員考試分數咨送京師學務處察核各省課吏館尚無專習法律一門近日直隸議設政法學堂科目頗為詳備與該大臣等所擬辦法相合於造就已仕人材佐理地方政治深裨裨益

三十二年又奏籌設京師法政學堂酌擬章程略稱相度進士館房舍於改設法政學堂最宜擬於明春開辦名曰京師法政學堂但法政為專門之學非普通各學夙有根柢未易遽言深造而各部院需才孔亟凡已未服官之人年力富強有志肄業尤應廣為造就以資任使 等語公同商酌其課程擬分為豫科正科及別科豫科兩年畢業升入正科分習法律政治兩門各以三年畢業別科一項則專為各部院候補候選人員及舉貢生監年歲較長者在堂肄習不必由豫科升入俾可速成以應急需又學部設有法政學堂凡各部裁撤及新分司員筆帖式並准其咨送學部分門學習此項人員概由咨送不由考取恐難繩以一律學科擬於法政學堂內附設講習科所有咨送各員均在講習科肄業其中國文學根柢太淺者應令專力補習一年再行升入其本科畢業者

擬比照高等學堂給予獎勵至別科及講習科應如何給獎將來酌量辦理

又桂撫林紹年奏開辦法政講習所並擬籌設學堂續請揀發州縣專習法政略稱疊准政務處學部咨會籌設法政學堂查得省城秀峯書院飭令修葺移課吏館於其中附設法政講習所參定章程額定法政講習員二百四十名官紳各半六個月畢業見在察核各員漸有門徑進境可期然非擴充辦理延長學期未足養成實用之材備舉行新政之任見值 朝廷釐定官制 愚以為必先有行政司法之人材而後官職不虞於虛設必先有通知憲法之學問而後累進不詭於殊趨廣西僻處炎陬見聞較狹官吏率由鈍樸競進本乏雄心紳民循守故常改良罕見捷步再閱歲月猶無自治之規模國民之資格此則地方有司之責也見將講習所逐漸擴充改辦學堂惟講習人員官少紳多將來舉行新政府州縣均應分設各曹需次人員萬不敷用擬請准照廣東成案由部揀發舉貢出身之候補州縣到省即入法政學堂肄業兩年畢業再行派委差缺並請援照直隸成案凡鄰近各省舉貢責任聽自行來桂入堂學習法政畢業後按照舉貢應得何項官階酌量差委庶人知法理戶解律文政治改良此為樞紐

又山東巡撫楊士驤奏陳籌辦法政學堂情形

又晉撫恩壽奏陳法政學堂開辦情形略稱晉省地處偏僻人才缺乏法政學堂不容緩設署布政使丁寶銓於學務條理尤見精詳當令籌辦就省城學署舊址改建教室齋舍一一如式章程規則參仿北洋考選晉省官紳先開簡易科定期一年卒業仍一面另招學生分豫科本科各三年卒業以養成專門之才暫定學額二百名開辦規模於焉粗備

又浙撫張曾敷奏浙省法政學堂開校情形並擬定章程略稱浙省向設有課吏館仕學堂洋務學堂雖亦略具規模學科未臻完備且分立三區既乏觀摩之益各支經費亦非樽節之方當飭司道將經費歸併按照奏定大學堂法政科大學科目並參取直隸法政學堂章程另行開設法政學堂擇定省城小米巷空閒軍裝局房屋改修校舍置備圖籍器具擬先辦簡易速成俟畢業後再

行添設正科進習專門錄取官紳兩班正取備取各生一體分班肄業

又豫撫林紹年奏設法政學堂

又學部咨覆蘇撫擴充法政學堂並將推廣情形詳細咨覆略稱蘇省法政學堂章程所定紳班學額僅二十人該省文風素盛舉貢生員人數極多僅此二十名之學額未免太隘亟應竭力推廣多招舉貢生員以符御史喬樹枏原奏又津貼一項乃係書院舊例該省法政學堂既係新設更不應有此名目應令革除以歸一律所省之津貼銀兩即移作推廣學額之用

又新撫聯魁奏改課吏館爲法政學堂略稱新疆課吏館改設法政學堂查新疆南路纏回居多地方官不通纏文纏語難免隔閡加派纏文教習一員此外一切課程規則悉照直隸奏定章程辦理懇准予飭部立案

又直督袁世凱奏准直隸開辦法政學堂略稱查法政學堂非有專門學問者不免輕重失當直隸試辦半年未敢形諸奏牘見復細加釐訂就原定學堂辦法與管理規則分爲兩編其關於學堂全體大綱不容輕易刪改者謂之學堂章程其堂中管理條項臨時可以酌量增改者謂之管理條規至其大要約分四端一曰學額原擬專招本省候補人員不拘班次大小但年齡文理合格者均得入堂肄業嗣後經臣奏明將安徽等省舉人揀發來直並令入堂畢業後分別奏留以供任使至本省士紳各署幕僚亦分別籌設學堂兼營併進二曰課程政治專門非資深造難收實效而著籍之士已逾學齡爲急就計先授豫科半年以植其基繼授正科一年又六月以廣其用律例會典成案約章先須注重其他民刑等法與夫憲法經濟等學皆當輯東西各國成法以廣甄採三曰管理向日課吏館不過如舊時書院今既改學堂自當悉遵通則寢興飲食歲修息游皆有定時總期在堂人員各知推崇公德自然確守規律四曰經費舊有課吏館歲需銀一萬四千餘兩今改學堂除活支外歲需額支銀三萬一千四百餘兩所短之數均由藩司撥補

又熱河都統廷杰奏請於熱河設立速成法政學堂

三十三年學部奏准修律大臣見辦之法律學堂仍責成沈家本照舊管理俟

三年畢業時請 簡派大臣會同 部考驗以符原案

三十四年鄂督趙爾巽奏籌辦法政學堂略稱湖北設立法政學堂籌定開辦大綱四條一學科照憲政編查館章程分爲長期速成兩班長期者爲專科三學年畢業速成者爲講習科三學期畢業二學額專科每一學年收一百人講習科第一學期收二百人第二學期以後每學期各收一百人專科除本省官紳外客籍官紳亦得附學惟取額不逾本省十之三講習科本省官班外附設紳班惟取額不逾官班十之四三經費每年需銀五萬兩應在司庫動支作正開銷四地址擬請將湖北省城裁缺巡撫衙門改設以省建築之費此籌辦之大概情形也學堂既立見已通飭在省候補之捐納保舉兩項人員嚴行考試即令入堂肄習以清仕途而端治本

又學部奏定法政別科講習科獎勵章程略稱查法政別科係三年畢業法政講習科係一年半或二年畢業見應明定獎勵章程以免歧異繕單呈 覽

宣統元年直隸總督楊士驤奏籌辦法政學堂略稱新政日繁亟賴講明中外律例廣儲裁判人才以資佐理直隸於光緒三十一年開籌辦幕僚學堂招考各署幕僚及本省士紳延聘中東教習授以中外法律及各國條約定限三年畢業更番補考入學分班授課自光緒三十一年秋開學至三十四年夏開三年屆滿照章舉行畢業考試經 發給文憑在案該堂設立之初原爲造就幕僚而就學各生多係舉貢生監及候選人員將來學業有成並具有佐治官員資格若僅以培植幕僚範圍較隘難以造就多才隨飭援京師法律學堂之例改名爲直隸法律學堂添招新生並於官費外招考自費生三百餘名以宏造就仍定爲三年畢業一切教授課目畢業獎勵悉遵學部奏定法律學堂別科章程辦理

又兩江總督端方奏兩江法政學堂辦法略稱該堂就江南織造處庫司衙署改用擴充校址另賃房屋爲學生寢息之所學生分正科別科兩項正科兼收甯蘇皖贛等省學生別科專收甯屬候補人員以及舉貢生監入正科者先習預科二年接習專科三年上年招考尙未接准部頒限制新章所取豫科學生

係查照京師法政學堂章程辦理其中有學堂畢業憑照者固爲合格其雖無憑照而中學具有根柢者亦得從寬取錄此爲新章未到以前招考豫科學生辦法本年夏季爲第二次招考之期自應查照新章以歸畫一別科原定二年畢業自部章展爲三年業已遵照改訂至附學一節如才前奏章程係爲別科額外諸生而設其有欲入正科限於額滿而年齡尙富文理較優者亦經仿照別科附課辦法一律繳費附入豫科

又廣西巡撫張鳴岐奏設法政學堂

又憲政編查館通行各督撫考核各省咨報法政學堂辦理情形略稱一畢業考試應遵定章辦理也本館奏定學期長期三年畢業速成一年半畢業各省爲造就法政通材計多照京師法政學堂章程設立學堂招考士紳入學肄習以長期適合別科學年速成適合講習科學年遂令應入長期各員附入別科教授應入速成各員附入講習科教授自可照准惟須別爲一班至於畢業考試概稱援照學部京師法政學堂獎勵章程辦理未免含混惟奉天咨報章程第十七條學堂卒業後獎勵方法學員照憲政編查館頒定章程辦理學生照學部奏定章程辦理茲特聲明原章應將入學各員於卒業時分別一三四等及不列等爲五項考列一二三等者分別給最優等優等中等卒業文憑四等者分別留學半年一年再行考試凡不列等者及留學考試仍不合格者應即分別奏咨開缺降補及勒令回籍一國文准其先行補習也本館定章應行考試各員其文理不通者即咨令回籍見在各省照此辦理者寥寥無幾與其姑容遷就不如曲爲裁成查河南省咨到法政學堂章程內載職官送來堂其文理通順者准即入各科肄業未通順者應由堂別開一班專習國文一年後始准升入茲特採其辦法令文理未通各員暫緩咨回由學堂特開一班專令補習國文一年期滿再行考試果能通順即分入長期一班肄習否則仍照原章咨令回籍一法政知識宜設法推廣也本館奏章爲澄清仕途起見故祇考試捐納保舉各員令其學習方今各省籌辦新政在在需材即由正途學堂出身及考試列入一二等人

員亦宜擴以新期收遠大之效查湖南法政官校附有自修一科編發講義俾校外各員自行修業無畢業試驗亦無學成獎勵用意良美今特採其意令各省除應入學堂各員仍分別入學肄習外其餘無論見任及有要差者均須領取法政學堂講義自行研究遇有疑義隨時函詢學堂答覆每屆一學期將所閱講義及研究心得作爲筆記並送學堂核驗如有曠廢由督撫分別記過此項講義由學堂擇必要學科編纂發給以三學期爲畢業若有自願入別科講習科肄業者由學堂考驗合格一併收入其卒業獎勵准其與本省士紳一律辦理

又咨覆豫撫增設法政學堂章程應各查照定章切實舉辦略稱河南增設法政學堂章程咨行本館內稱此次擬章係照學部奏定京師法政學堂章程辦理既經咨明學部全章應由學部覆核惟查該省章程擬以長期者入別科速成者入講習科官紳同班肄習又稱別科講習科員生畢業後謹遵學部奏定法政別科及講習科獎勵章程給予獎勵本館奏定法政學堂章程與學部奏定章程性質不同辦理難合學部定章爲造就人材而設故官紳皆可招考而獎勵亦可從優本館定章爲澄敘官方面設凡有月選分發各官俱應一律入學至於畢業考試即列一二三等者除准赴任差委之外別無獎勵其列四等者尙須分別留學不列等者且有開缺降補暨勒令回籍之條該省如爲節省經費計但令長期速成兩班附入別科講習科另爲一班肄習尙無窒礙至於畢業後官紳一同獎勵殊與定章不符礙難照准又該省章程內稱文理不通不能執筆者別開一班補習國文一年後始准升入查本館定章此項文理不通不能執筆者應即咨令回籍該省擬令補習一年升入各科於變通辦法之中寓曲予陶成之意尙無不可惟一年補習完竣如考試時文理仍未通順應即照章咨令回籍毋得遷就

又咨覆湘撫法政學堂肄業各員均須按章實行略稱湖南法政學堂所陳課目經費兩項係度支部學部飭核之件仍應由該兩部核奪惟本館前次奏定考驗外官章程凡應入學肄習各員所有考試學期及畢業後辦法均

須按章實行至附設自修一科係因校外各員研究法政藉開知識起見辦法尙無不合惟應入長期速成各員必須照章分別在學肄習不得藉口自修以致有名無實其係正途學堂出身不在考試之列者仍須多領講義自行修業以期法政知識漸能普及

又學部奏核議奉省法政學堂畢業請獎

又奏肄業京內外法政學堂人員免其投供扣資並咨繳憑照略稱見在京內外開設法政學堂俾已經筮仕人員及時求學以儲因時濟變之才非嚴其課程一其心志則學業難期精進擬請援照出洋游歷游學及免其投供派差各成案嗣後肄業京內外法政學堂人員係候選者免其投供如係實缺候補人員一律免其扣資並停派差使又凡領有憑照未經到省留京學習法政人員暫將憑照咨繳吏部核銷即以領憑之日作為到省日期俟畢業後再行咨領執照到省俾各屏去外緣專心向學

又廣西巡撫張鳴岐奏遵章設立法政學堂

又山東巡撫袁樹勛奏東省法政學堂通籌畫一辦法職員應一律正名學員應一體相待均已次第施行漸臻畫一惟考驗外官章程既除去正途出身及任要差者則誰肯投身於學問之途以淹滯其從政之歲月否則未必有能習法政之願力况考職及加倍舉行優拔之舉今屆適在舉行之年則凡紳士之可以習法政資格者亦皆見異思遷應如何為根本上之整齊再求枝葉上之畫一請飭憲政編查館及學部從長核議

又江西巡撫馮汝駉奏辦法政學堂情形

又學部會奏議覆熱河速成法政學堂學生畢業請獎

又咨護理直隸總督崔永安北洋法政學堂添設中學班應准立案略稱北洋法政專門學堂不再設預科應招收中學堂畢業生入堂肄業竊維升學辦法有二一曰招募他中學堂畢業生升入一曰堂內自設中學班畢業後直接升入惟就見在情形而論由前辦法蓋有二難查該堂開辦時立案章程內載日文日語為聽講所必需學生均當注重而京師法政學堂亦以用

日語為主要功課今中學堂功課但有英文或德文未有日文日語其畢業學生一旦收入法政正科用日語教授則扞格不通不用日語教授則於研究法政之學殊多缺點其難一也各省中學堂尙未備設每年畢業學生為數無多其畢業者不必皆能升學其升學者或志於其他專門或高等學堂以期升入大學其有志於法政專門者勢必無幾雖盡人收入不足成班其難二也查日本早稻田大學附有中學校期於循序漸升學派一致又本年學部奏定中學堂分文科實科章程內載外國語一科以英語或德語為主惟各省情形不同固有宜習他國語言者茲擬仿倣早稻田大學辦法於該堂內添設附屬中學班每年招考新生一二班上遵學部奏定章程專設外國語一門以日語為主擬於應課外國語時刻之內以三分之二授日語以三分之一兼授英語或德語一科其餘學科程度授課鐘點悉照中學文科辦理其畢業時即擬照中學堂畢業獎勵章程請獎如此辦理五年畢業後升入正科則素嫻日語既無聽講隔閡之虞純習文科亦得專門預備之效每年按級升進必可繼起有功查北洋法政專門學堂擬遵照本部奏定文科章程添設中學班其外國語一門以日本語為主課兼習英語或德語係為將來此項學生畢業時升入正科能直接聽講起見辦法尙屬妥善應准立案

又咨覆山西巡撫丁寶銓並飭行山西提學使該省法政豫科應按三年畢業然後升入本科至添收備取生是否中學畢業應報部核辦略稱查山西法政學堂豫科原定章程本係仿照北洋法政學堂辦法三年畢業嗣因奉到部章各省法政學堂均應遵照京師法政學堂辦理遂改豫科畢業為兩年惟京師法政學堂豫科學生本有中學三年以上之程度故在豫科兩年畢業計與中學五年畢業年限尙屬相合該堂原招學生是否有中學三年程度未據報告惟原章既自定三年畢業則所招學生未盡在中學肄業三年以上可揣而知且據該學堂申稱如虛日語未能直接聽講俟畢業後再補習半年以之升入本科似無不足云云是東文東語此時亦未必嫻熟與

其補習於畢業之後何如補習於未畢業之前見在北洋法政學堂及江甯法政學堂所有豫科均定三年畢業該學堂豫科自應一律照辦先按三年畢業然後升入本科以符定章

又咨江督蘇撫並節甯學江蘇法政學堂招考新班准照京師法政學堂辦理略稱查法政學堂本堂學生係屬高等專門程度自以東文東語能直接聽講爲最要上次京師法政學堂因所招中文畢業生東文根柢未深呈請變通辦法補習東文二年業經核准該學堂所請事同一律自可比照辦理至戊申六月以前各省所設之高等豫科三年以上畢業者本有升入高等學堂之資格法政學堂亦屬高等程度所請將高等豫科之三年或四年畢業者改入補習科一節係與部定章程相合自可照准

二年兩江總督張人駿奏開辦兩江法政學堂補習科略稱光緒三十四年前督臣端方參照京師法政學堂及直隸法政學堂奏定章程開辦兩江法政學堂分爲正科別科見復仿照京師法政學堂章程開設補習科補習東文東語二年以能直接日本教員聽講爲斷再行升入正科並因甯皖蘇贛四省中學畢業學生人數無多招難足額咨商學部核准將未奉部章以前高等學堂預科三四年畢業學生一律變通收考當經該堂招考並分移蘇皖贛三省提學使照額選送計共收蘇皖贛屬學生雖未足定額百名之數而新收之學生已有數十人之多勢不能不開班授課業於本年三月到堂開學所有開辦常年經費均由江南財政局支領伏維預備立憲已屆三年完全法政人材亟宜廣爲造就察核該堂課程均尙妥洽各項用款亦均核實

又浙江巡撫增韞奏法政學堂擬辦分科暨添設法律專科略稱擬辦法政分科將該學堂原有別科兩班先行變通辦理查部定京師法政學堂章程凡四科曰預科曰正科曰別科曰講習科預科兩年畢業升入正科分政治法律兩門別科則合政治法律爲一門講習科年限尤短浙省法政學堂僅辦別科講習科二科故政治法律未經分門見擬將別科學課所無如政治門之政治學經濟學財政學及社會學統計學法律門之裁判所構成法破產法及民事訴訟

訟法刑事訴訟法監獄學特別加入分班授課准學生分門肄習仍按各班年級扣足三年畢業一擬添設法律專科招收學生以廣培植審判廳之設立必得若干審判人才始足以敷任使自不能不預先籌畫經審判廳籌辦處查照憲政籌備清單逐年核計約至全省審判廳成立之時應用司法官當在二千人以外除今年省城商埠各級審判廳人員取材於審判研究所外餘如各州縣鄉鎮審判廳約需一千六百餘人自非特設法律專科另招新生預行培植不可惟浙省法政學堂基址狹隘見擬添築教室並建設大講堂兩所以能容一千六百人之數爲度不分官紳一律招考合格人員入堂肄業作爲法律專科學生統限三年畢業

又學部奏核議浙省法政學堂改辦法政法律各科課程略稱查奏定法政學堂章程內分預科正科別科講習科四項正科學生係由預科畢業後分政治法律兩門專習三年方予畢業其別科一項自入學至畢業時僅歷三年原爲造就從政人才以應急需此項學生畢業年限較短所有課程不能比照正科辦法分類精求自屬一定之理該撫所擬法政分科及法律專科辦法未免以別科之年限而責以正科之課程年期短而課日多按諸實際恐難收效且法政分科所擬增加之政治學財政學裁判所構成法及經濟學等本爲別科原章所有其社會學統計學各項則非主要必修之科該省既爲造就審判人才計自仍以按照別科章程辦理爲宜惟原章列有東文一項本爲隨意科目而該撫所擬增加之民事訴訟法刑事訴訟法破產法監獄學四門尙屬切要即減去東文鐘點加習此四門功課以收實效

又奏改訂法政學堂章程略稱從前所定法政學堂章程其應修改者約有三端一曰課程當訂章之際各種新律未頒故除大清會典大清律例之外更無本國法令可供教授今則憲法大綱法院編制地方自治章程等均經先後頒行新刑律亦不日議決奏請施行此後法政學堂此項功課自當以中國法律爲主此應改者一二曰年限舊章於正科別科均三年畢業講習科僅一年半畢業固爲應急需起見然法政學科甚繁正科既以求完全之學問三

年尚嫌其短至一年半之講習科所習無多斷難足用自非將正科延長一年講習科廢止不足以收實效此應改者三三曰分科舊章正科僅分法律政治二門而財政經濟等學科僅爲政治門所兼修並未專設見在中國財政亟需整理自非專立經濟一門不足以造就此項人才此應改者三三等斟酌見在情形參考各國學制擬具改訂法政學堂章程三十一條此後京外官立私立凡新開之班均照此次改訂章程辦理其別科一項係以應一時急需本年部議覆浙江巡撫增韞奏請准予私立學堂專習法政摺內曾聲明不得專設別科以趨簡易惟見在中學堂畢業生人數過少各處法政學堂之正科難以遽行成立自應變通准其先設別科以應急需俟將來中學堂畢業生漸多再將別科章程廢止又修律大臣設立之法律學堂其宗旨實與正科之法律門相同度支部設立之財政學堂其宗旨實與正科之經濟門相同嗣後該學堂添招新班一切辦法應令分別按照正科之法律門及經濟門辦理以歸一律又法部奏考試法官指定主要各科應用法律章程略稱查憲政編查館奏定法官考試任用暫行章程第五條內稱第一次考試科目凡五項一奏定憲法綱要二見行刑律三見行各項法律及暫行章程四各國民法商法刑法及訴訟法五國際法五項之中尤以第二至第四爲主要科目上月部具奏法官考試施行細則第一次考試第一場憲法綱要一題見行刑律二題見行各項法律及暫行章程二題第二場各國民商刑法及訴訟法各一題國際法一題論說一題竊維籌備立憲以來法律章程至爲繁瑣館章既以見行爲限若不將應用各項指定將泛涉者既與司法無關淺嘗者轉以空疏俾獲且考官命題亦必須有遵用之本海內乃得所率從當將館章所列逐類引伸除見行刑律尚未進呈應准暫用大清律例各國民法商法刑法訴訟法外所有各項見行法律及暫行章程等擇其有關於司法者一一標明種類暫爲法官考試之資

係私立而在省城之外惟其設立在新章頒布以前且曾咨部核准查東湖法政學堂設於紹興距省垣僅一水之隔交通便利稽察甚易甯波爲通商口岸按憲政編查館奏定逐年籌備清單省城及商埠地方等處各級審判廳須於第三年內一律成立則通商口岸須用司法人材實與省城同關緊要自應將私立法政學堂限於省會一節酌量推廣凡繁盛商埠及交通便利之地經費充裕課程完備者一律准予設立

又行文各省督撫學使擴充法政法律各學堂略稱查京外設立法政法律各學堂所以造就專門通才備設施新政之用茲准憲政編查館奏定法院編制法官考試任用司法各章程此項人員需用尤衆自應切實籌畫一律擴充

又咨覆法政學堂專選各省中學堂已習東文畢業學生選入本科略稱京師法政學堂呈稱本學堂於宣統元年開辦補習科因各省所送學生多未習東文即有習者程度亦淺非預備兩年不足直接聽講故所定課程即以兩年畢業爲度然此種辦法亦實有窒礙難行之處本學堂正科學生以中學畢業生爲限須由補習科畢業然後升入合計畢業年限前後共須五年若入高等學堂及其餘專門學堂則僅費三年之力而獎勵與本學堂等入本學堂則多二年之補習今大學堂已開辦即由高等學堂三年畢業升入大學堂亦三年畢業共計六年較之入本學堂由補習科升正科亦不過多歷一年而縮短見定年限則東語程度又不足以直接聽講此其窒礙者一去年遵章設補習科各省之考送來京者祇有八省此班定額本係二百名僅收至六十餘名本年又屆添班今已逾限一月祇有四川浙江山西三省考送二十一名尚未全到業經電催直奉豫魯鄂之近京者五省僅有三省電復竊維豫備立憲時代所需法政人材甚衆宜乎人情樂於肄習乃添班時竟如此寥寥者因年限較多兩年加以中學堂畢業生各省見尙無幾即有其人除徑升入本省高等學堂外如大學堂之預備科京外之優級師範科京師之財政學堂郵電學堂等科以及出洋之預備入高等專門科皆須

取諸中學畢業之人而入本堂者又照章自費每年每人共需銀二百圓左右如所歷學年較多其備費較鉅寒畯亦多有願而無其力此其窒礙者二因此反復籌思所有本學堂補習科辦法應請大部察酌情形量予變通始可推行持久謹擬變通辦法三種第一擬將考送之資格略為變通本學堂第二級豫科添班時原有在中學堂修業即許送考之章程擬請以後行文各省仍用此章既入本堂補習科則增為三年畢業因與在中學堂修業年前後核算共歷六年較諸中學五年畢業者尚多一年似此寬格相招或者選送學生易於合格第二擬將考送之程度向章汎取習各國文字者略為變通本學堂補習科所以必須補習二年者原為東文程度不足之故不如專選各省中學堂之已習東文畢業學生考入本學堂即徑入本科不必多歷二年各省學堂一覽表已申解到部請飭普通司將各中學堂之用東文教授者檢察有若干堂何年畢業以待酌核人數可能入班倘一時尚無多數之此項學生見數年內除已有之班照常接辦外暫行停辦補習科祇添辦別科俟各省習東文合格者漸多之時再行續開正科第三擬將設科之名目酌為變通補習科之原名非初定章程所有擬請改為法科大學預備科仍專取中學畢業生考入此科限以三年畢業其課程除習東文及法政普修功課外添習一國文字如英文法文德文聽學生自擇其一且既經中學畢業必已習過一國文字再加研究亦易為力俟三年畢業後即照大學豫備科給獎升入法科大學如用此辦法見在學堂之補科已先習一年似可改入此科以上三種辦法如蒙采擇施行海內聞風必視見兩屆之補習科較為踴躍庶可收漸次造成法政人材之實效據教務長江庸等再三酌擬相應咨呈大部察核奏定法政學堂章程正科學生必須以東文直接聽講上年因各中學堂畢業生多係肄習西文故招考入堂時仍須補習東文東語特為設科補習以致修學年限延長二年此次該學堂歷陳種種招生為難之處自係目前實情所擬三項具見籌畫詳除第一第三兩種辦法或於通行限制招生部章尚有窒礙或於原奏造就專門宗旨間有未符

惟第一種專選各省中學堂已習東文畢業學生選入本科一層最為合格見查直隸已有此項學生堪以考選如慮將來人數太少或致不能成班嗣後如有游學日本普通卒業東文已有程度學生准其一體考取入堂

右法政學堂

宣統元年廣西巡撫張鳴岐奏籌辦省城模範監獄先辦監獄學堂略稱監獄立於司法行政之開必兼備防閑於恤懲戒感化四義而後功用始全中國獄制見於見行律例捕亡斷獄諸條者類於防閑於恤之道言之綦詳至於懲戒感化之方闕焉未講流失寢久法制益乖防閑者時復疏虞於恤者轉滋酷虐道窮必變所當改良况監獄與審判相表裏省城及三商埠各級審判廳定於明年開辦臣悉心籌畫就省城地方創設模範監獄一所以作提倡先就模範監獄附設監獄學堂一所以資教養縷晰陳之一制度各國獄制大要有四一拘置監日地方監日假留監日集治監茲採集治監之制專收已決重罪人犯除距省寫遠之南甯太平泗城百色歸順上思等府廳州外其餘各屬軍流以上等犯隸之未建罪犯留藝所州縣滿徒人犯亦隸之各省發桂軍流等犯亦隸之監有分房雜居階級三種制度之別分房制最為完全雜居制流弊太多見在折衷於二者之間而取階級制度共建分房雜居監各一百零四間重罪者分房次罪者雜居初禁者分房禁久者雜居附設地方監假留監地方監足容百人專收臨桂縣已決輕罪人犯假留監監房二十間專收各屬未決招解人犯二建造獄制既定必建築得地營構適宜管理方能如法模範監獄坐落省城西清門孔明臺後東西七十丈有奇南北九十丈有奇雖傍城市頗類農村空氣既饒防守復便監獄畫分三部一切工程以質實堅固為主三員役制度建造固貴合宜員役編制尤宜周密必支配得法指臂相維然後可以百度具舉法部定章典獄官以下醫官書記等員由督撫量為增置查直隸章程典獄下分設書記會計考工看守庶務教誨醫官七項湖北之視直隸少會計一門奉天之視湖北更以庶務兼工業定為三課兩所茲因地制宜設典獄官一員看守長八員隸以看守六十人另分文牘會計工業庶務四科每科設科員

四人而以守長分攝各科科長之事教誨師二人醫官二人人工十人押丁二十人四經費監獄要政固非人莫舉尤非費不行建造及開辦經費需銀五萬餘兩常年經費銀三萬餘兩監獄學堂一年經費需銀一萬餘兩監獄成立之後按察使司獄桂林府司獄臨桂縣典史三缺均可裁撤每年節出俸薪各款銀一千一百餘兩應請提充監獄經費查直隸章程罪犯口糧悉取之原解各屬茲擬仿辦飭各州縣每解一犯每月隨解銀一兩不足之數由公款支發此籌辦省城模範監獄之大概情形也計模範監獄須設官吏百名其事至纖至悉至威至仁未容以未經教育之人濫充當就模範監獄先建官舍議事廳警衛室一部暫作監獄學堂本年工竣照會翰林院編修顏楷充當監督遴派校員於八月開學分高等看守兩科高等科選生一年畢業看守科選生六個月畢業選生之法以慈善端正靜默清潔為歸至監獄聚數百兇惡囚徒而以百十官吏防閑之非有禦侮技能不足以資鎮攝查各國監獄看守長看守日必佩劍以臨伍夜必持槍以巡行見定高等學科十六門看守學科八門除監獄學堂先講求外尤注重兵式體操步法槍法教練周詳用備守衛俟屆畢業考試及格分別等第派充練習看守長以下各員明年模範監獄工竣以後監獄學堂仍仿日本警監學堂辦法附設高等巡警學堂庶續辦理以期持久此籌辦監獄學堂之大概情形也 維監獄學堂為模範監獄之先聲模範監獄實為各屬改良監獄之標準惟有認真督率妥籌辦理俾速觀成

右監獄學堂附

宣統元年東三省總督錫良奉天巡撫程德全奏籌設檢驗學習所請將經費作正開銷略稱檢驗一門為刑事訴訟最初之關鍵近世文物發達事變日新生人致命之方既非一道官吏檢驗之學別有專科良以檢驗不實則審判難持其平各國司法刑部於此特加慎重中國勘驗刑場舊用作作不外洗冤錄一書即使技藝精良在今日藥毒種類之複雜未必備悉矧此輩係徒黨流傳私相沿襲求其通曉文義百無一人遇有相驗案件僅恃該作等當場喝報其不致於枉濫也幾何前督臣徐世昌曾在奉天府地方警察所內附設刑

作講習所造就吏役十二名分配各廳任使惟辦法簡單人數無多轉瞬全省地方初級各廳次第增設非預謀養成多數檢驗吏實不足以重民命而慎刑獄見擬遵照部章設立檢驗學習所一處以高等監察長監督其事額定學生一百名延聘專員教授以一年半畢業照章給予出身分廳任使實於慎重庶獄改良刑政大有裨益

二年貴州巡撫龐鴻書奏籌設檢驗傳習所略稱省城審判檢查廳本年冬間成立其最關緊要莫如相驗一事蓋民命所由係刑法所由成皆視乎此查相驗一事外國責之法醫中國付之作法醫係專門之學於生理解剖諸術洞悉靡遺故於檢驗能有把握中國作視為賤役承充者毫無學識一切作用但憑口授印洗冤錄一書亦未卒讀而求能辨傷痕於毫芒為命案之確據難矣見值預備立憲講求法理者恆以為重視民命為第一義若檢驗不精則情事難免冤抑判斷何能公允查光緒三十四年法部議覆東三省總督徐世昌請設檢驗學習所辦法改作作為檢驗吏給予出身黔省既籌設審判檢察廳自應遵照辦理見擬設檢驗傳習所飭令開學認真講習以裨實政

又聞浙總督松壽奏籌設檢驗學習所辦法略稱折獄莫重於人命斷罪必準諸屍傷檢驗一事為民命所由係最關重要外國付之法醫中國責諸作作作職淪賤役類皆推魯無學相驗尋常命案尙多未能了澈若遇開檢重案則更障目束手茫無把握矣方今實行憲政講求司法培養檢驗人材實為目前切要之圖擬先於高等巡警學堂內附設檢驗學習所因監獄學堂本附設在內管理較便見已聘定籍隸本省再在外國法醫學堂畢業領得文憑確有經驗者二人專司教導生理解剖諸術另延品學端優熟悉檢驗學術者一人專司講解洗冤錄兼擇其普通淺近關係檢驗者逐日教授悉心研究定期一年半畢業屆期嚴加甄擇合格者填給文憑發交各審判廳並繁缺各州縣充役遵照部章改名檢驗吏實地練習予以出身似此多方造就當必有合格人才出於其間用備任使於改良刑政矧恤庶獄大有裨益

右檢驗學習所附

皇朝續文獻通考卷一百九

學校考十六 學堂

謹案有文事者必有武備西國將弁類出學校月餘歲鍊漸底於成有本之學非可以貌襲也我國於光緒六年設天津水師學堂十一年設天津武備學堂嗣後南洋水師學堂福州水師學堂江南陸師學堂新建軍之同文礮步馬隊學堂一時雲起迨二十七年七月 諭建武備學堂於直省省會武科永遠停廢於時內外章奏有主張派員出洋考察者有主張派生出洋留學者是以日本振武學校專為中國學生而設而內地學堂則京省備設至不勝枚舉無非欲將有將學兵有兵學參謀有學軍醫經理軍械無不有學朝野上下競言尚武而所謂無人不學通國皆兵之說尤為當時所尚有警議者必罪以阻撓然變法以前上下一心自是乃漸有渙散之勢費帑數千百萬而內訌之憂反亟於外侮其道果何在耶

光緒九年直隸總督李鴻章奏 於光緒六年奏請於天津建設水師學堂先後請 旨飭派前船政大臣光祿寺卿吳贊誠分發補用道吳仲翔駐局總辦各在案迨七年學堂落成添招學生入堂授以英國語言繙譯文法幾何代數平弧三角八線級數重學推步測量駕駛諸學慮其或失文弱授之鎗俾習步伐樹之樞俾習升降猶慮其或鄰浮薄教之經課以文培其根本信賞必罰策其倦怠月枝季考稽其知能計自開堂以來甫及三年而駕駛頭班學生伍光鑑等三十名均已畢業堪上練船又課成肄業美國回華學生王鳳階等九名或充學堂幫教或經分派各船成效歷有可稽查廣東設立同文館課以西國語言文字每屆三年奏請給獎有案天津水師學堂所課西國語言文字特其一端此外諸學視同文館實相倍蓰在堂各員弁洵屬異常出力學生亦攻苦逾恆見已屆三年著有成效據總辦吳仲翔詳請援案奏獎前來懇 恩俯准給獎以資鼓勵

十一年直隸總督李鴻章奏查同治十年前大學士兩江督 曾國藩會同 奏請挑選聰穎幼童赴美國書院學習俟學成回華聽候派用分別奏賞頂戴

官階總理衙門核准覆奏奉 旨依議該學生等先後赴美於光緒七年分作三批回華分撥天津水師機器魚雷水雷電報醫館等處學習當差迄今又逾四年試以所習各藝均能融會貫通其習水師者內如魚雷一種理法最為精奧洋師每有不傳之秘該學生等於拆合演放修整諸事皆能得法此外水雷旱雷雷放靈捷駕駛測量講求精細其分赴各營教習者於外洋操陣陣法口令均臻嫻熟所教弁勇頗有成效其派值電報者傳遞緊要軍報密速無誤他如步算製造醫學諸大端均能申明要足供任使該學生等見有派充營哨各官及管駕教習官醫各項差使者亟應酌保官階給予頂戴以資策勵其天津所募學生在水師電報醫館各學堂肄習多年迭經考試其優者足與出洋諸生相埒自應一律保獎俾昭公允

又奏竊 上年遵 旨選雇德國兵官來津派往水陸各軍教練業經陳奏在案該兵官等皆由該國武備院出身技藝優長堪充學堂教師之選據總統前敵各軍週缺題奏提督周盛波總統盛軍湖南提督周盛傳等稟請仿照西國武備書院之制設立學堂遴派德弁充當教師挑選營中精健聰穎略通文義之弁目肆業經 批准照辦並令直隸提督李長樂廣東水師提督曹克忠署廣西提督唐仁廉四川提督宋慶總統銘軍記名提督劉盛休正定鎮葉志超通永鎮吳育仁大明鎮徐道奎皖南鎮史宏祖等各挑選弁兵送堂肄業前來查武備書院之設應建廠屋甚多需費甚巨目下經費支絀力求撙節 與津海關道周馥等籌商暫就天津水師公所安置生徒名曰武備學堂遴委德國兵官李寶崔發祿哲爾那珀博郎蘭士等作為教師並選派通習中外文字之員分充繙譯即於本年正月將各營送來弁兵飭該道等考取百餘名入堂肄業其中有文員願習武事者一併錄取數月以來各學生逐日按時進堂一月之中每開三五日由教師督率學生赴營演試鎗礮陣式及造築臺壘之法每屆兩月由 派員局試一次分別賞罰約計一年後於西洋後膛各種礮礮土木營壘及行軍布陣分合攻守各法必能通曉屆時擬將 批學生發回各營飭由各統領量材授事復挑二批弁兵百餘人送堂肄業分番迭進期無間斷

其優者或留堂作爲幫教習或回營轉教員弁數年以後北洋各營必全曉西洋近日行軍制勝之方矣獨是泰西武備之學皆從天算輿地格致而來欲造其極詣必先通其語言文字擬俟經費稍充另行建立書院以宏造就學成後再調營帶隊俾資歷練見時學堂經費除開支薪水外其餘學生飲食紙筆器具獎賞等項及添造住屋購買西洋兵事書籍圖畫測量儀器各種均擬在北洋海防經費內核實開支並擬將教習繙譯各員及屢考優等堪充教習之學生按照同文館成案二年奏保一次

十三年直隸總督李鴻章奏竊於光緒十一年在天津建設武備學堂據各營統領陸續挑選兵弁子弟一百數十人來堂肄業募雇德國兵官朝夕課導所習天文輿地格致測繪算化諸學戰臺營壘新法皆有實用並時操習馬隊步隊礮隊及行軍布陣分合攻守諸式仍兼習經史以充根柢兩年以來於西洋武備各學俱通門徑屢派司道大員月試季考勸懲兼施前月復親臨考驗各項操法一律嫻熟試以礮臺工程做法及測繪算化諸學無不洞悉要領因擇其屢考優等學生飭令回營轉相傳授次等者仍留堂學習並選新生入堂肄業庶幾成就更多收效更廣若不預以升階不足以資鼓舞而開風氣至教習繙譯各員有由出使外洋調回者有由總理衙門調用者其出力期滿之員自應擇尤一併保獎以示激勸相應將優等學生及教習繙譯尤爲出力人員開單懇 恩給獎

又兩廣總督張之洞奏竊惟外洋諸國於水陸兩軍皆立專學近年天津福州皆設水師學堂而天津兼設武備學堂以練陸師廣東南洋首衝較他省爲尤急光緒三年前督臣劉坤一捐銀十五萬兩奏明生息爲儲養洋務人才之用光緒六年前督臣張樹聲撫臣裕寬於省城東南四十里長洲地方就前款內撥銀建造學館用項取之前次息銀特以限於費絀學額較少此外有關兵事諸端未能肆及之洞到任後改名博學館於奏請籌辦閩粵兩省開設學堂各務摺內聲明在案等擬即就其地改爲水師學堂並須添購地段增建堂舍教習水師陸師均各額設七十名先挑選博學館舊生通曉外國語文算

法者三十名爲內學生再選曾在軍營歷練膽氣素優之武弁二十名爲營學生再擬業已讀書能文年十六以上三十以下之文生二十名爲外學生無論生監俱准就學其水師則學英國語文分管輪駕駛兩項管輪堂學機輪理法製造運用之源駕駛堂學天文海道駕駛攻戰之法其陸師則學德國語文分馬步鎗礮營造三項內學生取其繙譯已曉算法已諳營學生取其兵事已歷膽氣已壯外學生取其志向已定文理已通惟營學生外學生兩途年齒較長學習外國語文稍有不便應於洋教習之外添用華繙譯一名轉相解授其房舍則分爲水師講堂水師操堂陸師講堂陸師操場陸師馬步礮操場其規制課程略仿津閩成法復斟酌粵省情形稍有變通堂中課程限定每日清晨先讀四書五經數刻以端其本每逢洋教習歇課之日即令講習書史試以策論俾其通知中國史事兵事在堂者一律仍准應文武試以開其上進之程其營學生外學生兩途年歲不必甚幼庶可辨其志趣氣質不致虛養庸下之材語文但取粗通總期由粗入精必不使逐末遺本水師學成之後撥入練船另設練船正教習鎗礮帆纜教習測算教習四員皆用洋弁在船課讀即在中國沿海口岸游行一年後選才藝尤長者分赴外國學堂兵船學習其陸師則三年學成後擇尤出洋分赴各國學堂陸軍練習水陸均令每年九月在堂三月在船在營遇有外洋有事擬照西國通例前往觀覽以資考鏡實事見在購買地基添造學舍與築場廠約估需銀六萬餘兩每月員弁薪水華洋教習薪費學生膳費丁役工食約需銀五千兩按之津閩章程已屬節省除博學館原有每年息銀六千餘兩外應於海防經費項下開支惟事屬創始總辦者非有熟習大員未易勝任查有補用道吳仲翔才識沈毅前充福建船政提調十餘年船政始規皆其創辦嗣經北洋大臣李鴻章調赴天津委辦水師學堂亦著成效見在請假回籍經 臣等函邀來粵商一切相應請 旨將吳仲翔發交 臣等差委擬即委令總辦水師學堂事務至洋教習擬用三員水師駕駛洋教習一員查有福建船廠英員李家在閩期滿堪以調充陸師語文測算兼操練正洋教習一員粵省見有德弁歐拔次堪以充補其副教習一員由 臣等咨商德國

出使大臣向外外部選訂此外應設漢教習十一員水師則駕駛操演洋文各一員華文三員陸師則英文幫教二員德文幫教一員華文二員其稽查各堂及經管錢糧文案各委員酌用

二十年署兩江總督張之洞奏竊查南洋水師學堂經前督臣曾國荃創設光緒十六年開前督臣沈秉成奏明援照北洋成案二年保獎一次在案查該堂開辦以來已屆四年教習人等督率學生所習各種技藝據總辦江南水師學堂候補道桂嵩慶詳請保獎前來除該堂學生應照定章俟送練船考試中式後再請給獎外所有出力教習各員已歷四年應行兩案併保臣此次僅照尋常勞績擬保未敢過優繕單懇 恩俯准給予獎敘

又奏竊查江南省城原設有水師學堂今於儀鳳門內之和會街地方創設陸軍學堂已電託出使大臣許景澄延請德國精通武事五人為教習慎選年十三歲以上二十歲以下聰穎子弟文理通順能知大義者一百五十人為學生分馬隊步隊砲隊工程砲臺各門研習兵法行陣地理測量繪圖算術營壘橋路各種學問操練馬步砲各種陣法在武學中又列為專門約以二年為期二年後再令專習砲法一年又須略習德國語言文字以便探討圖籍大約通以三年畢業仿總署同文館章程請准擇尤保獎並分派各營任用所有建造房屋置備器具等費約需銀四萬數千兩擬在籌防局動款撥用其常年經費約需銀四萬餘兩又鐵路一項學有專門從前北洋亦經設有鐵路學堂其學業有成者業經臣調有數人惜不敷用今擬另延洋教習三人招集學生九十人別為鐵路專門附入陸軍學堂以資選貫約計常年經費亦須二萬數千兩共需六萬餘兩即在江海關新認加解每年四萬兩鎮江關新認加解每年七千兩共四萬七千兩一項動支計陸軍鐵路兩學堂經費尚不敷銀二萬兩查本年春會經臣委員會同江海關道常鎮道勸諭商店酌量認捐每年約可籌銀二萬兩以外不敷經費擬於此項湊足

二十一年陝甘總督陶模奏天津閩粵設立水陸師學堂本係因時制宜沿海萬里防不勝防必有海軍數大枝海口方能聯絡各岸防軍亦可酌減性駕駛

兵輪法至精密海口沙線固應熟悉尤須知算學力學乃可司機能測七政恆星乃可司舵擬請 敕各督撫督令水師學堂學生勤習天文海道御風布陣修造汽機演放水雷諸法期於能言能行每若干年奏派海軍提鎮率領學生駕駛練船遊歷外洋途中親試各生所學專門之技是否純熟分記等第到外洋時由駐洋大臣按名試以水軍兵法各論果能精通奏明作為水軍秀才送辦理海軍南北洋大臣再加考試擇其優者為水軍舉人並請 敕各督撫督令武備學堂學生勤習西國整散陣法測算遙擊挖溝交轟馬步起伏及明暗臺塹測繪地圖管理軍械各事每若干年奏派司道分內外場校閱技藝條對兵法果能精熟作為陸軍秀才送南北洋大臣再加考試擇其優者為陸軍舉人仍 欽派王大臣覆校水軍陸軍各舉人擇最優者作為進士如文理較長明白治體量授文職與文進士一體優待臣又查武備水師學堂章程本尚周密近聞有將少年不能讀書者濫行送入應由該管大臣嚴行遴選至舊有武科得人本少倘謂弓矢無益而改習火器則家家可置鎗砲流弊尤甚似應將舊例武科一律停止

二十三年湖廣總督張之洞奏湖北地據長江上游南北樞紐又將來鐵路所發端尤為用武之邦宜設武備學堂以儲將材而作士氣向來中國學堂所教多係幼童及各營兵勇文理既昧氣質亦粗斷難領會精要僅可充末弁兵勇之選無裨實濟大率外洋武備學堂分為三等小學堂教弁日中學堂教武官大學堂教統領學術深難易以此為差今中華為救時之計雖不能遽設大學堂而教武官之學堂則不可緩今擬專儲將領之材專選文武舉貢生員及文監生文武候補候選員弁以及官紳世家子弟文理明通身體強健者考入學堂肄業緣上項諸人皆科名仕宦中人上則可任帶兵征戰之事次亦可充營務幕府軍械局所之官此輩即或未能有衝鋒決勝之才然於考核弁兵籌備餉械整飭製造各局察閱砲臺營壘諸事固優為之古者學校中人先習射御與我 朝八旗文員兼習騎射之意相同而司馬法一書列入禮家故卿士大夫皆為軍官伍兩卒旅悉入鄉校春秋傳云雖有文事必有武備孔門諸賢

多能戮力行開執戈衛國唐宋以後文武分趨殊失古人教士良法美意泰西諸國民皆爲兵將皆入學頗於古義有合查武備學堂功課分講堂操場兩事講堂如軍械算學測繪地圖學各國戰史營壘橋道製造之法營陣攻守轉運之要操場功課如槍隊礮隊馬隊營壘工程隊行軍礮臺行軍鐵路行軍電綫行軍早市演試測量演習體操等事皆須次第講習經臣於上年電致出使德國大臣許景澄向德國兵部商派都司法勒根漢千總根次二洋員來鄂教習曾與德兵部議定到華後法勒根漢加給副將銜根次加給游擊銜令其體制較優以資表率管束並議定歸總辦道員節制惟學生百餘人教習僅止二人不敷講授疊據該洋員堅請添募數人見經電商兩江督臣劉坤一於江南自強軍洋員中調撥洋員三人來鄂乃法勒根漢挑選甚嚴僅留德守備斯忒老一員令入武備學堂隨同教習尙短一員允俟隨後再行訪募其餘何福滿賽德爾二員派入護軍營洋操隊教練弁勇其功課章程令洋教習酌議由臣核定課程餘暇即令誦四書披覽讀史兵略以固根柢趨向另派華教習經理考選學生百二十名並選派津粵學堂出身久充教習者十二名爲領班學生按照洋教習講說課程譯成華文華語轉述指授諸生入堂以後無論何項功名統爲學生除伙食操衣均由學堂供給外每月給贍銀四兩分定月課季課年終大課以考其優劣如學有成效擬請按照直隸江南奏定學堂年限章程請獎並擇委差缺以示破格獎勵茲於湖北省城東偏黃土坡地方購地建造武備學堂該堂未造成之先暫借鐵政局及該局附近暫賃房屋爲棲止之所派委署江漢關道湖北候補道蔡錫勇總辦該學堂事宜奏調分省知府錢恂浙江候補府聯豫充學堂提調經費擬暫在鹽務雜款及銀元局贏餘項下設法湊撥將來尙須籌定常款以期經久

又浙江巡撫廖壽豐奏奉 諭武備學堂能否於各省一律添設並著妥籌臣於上年電商北洋大臣咨送新建陸軍營內之優生二名來浙考驗課藝鎗礮均尙諳熟因即派充教習優給薪水就近在省城求是書院西偏添設武備學堂一所於各鎮哨長營書勇丁內挑選年二十五歲以下粗識文字身體結實者由臣面試先定額四十名到堂肄業每日內堂功課外場操演計畧分班次第指授並委防軍局司道兼該堂總辦各學生原營底餉即交委員核實領給其教習委員薪水及津貼學生飯食紙筆操衣巾靴並獎賞等項每年約需銀三千兩立學之始購書器一切雜費擬暫由外設法籌給不動正款於本年三月開辦

二十四年陝西巡撫魏光燾等奏前准兵部咨通行各省會將武備學堂如何建立如何教練妥議報部等因今擬在西安省城設立學堂一處此外則同州鳳翔及南山之漢中北山之延安各設學堂一處凡武舉武生武童願學者由各州縣各就近之處申送入堂認真教練查郡屬武童歲試自下屆始武童會試自光緒二十六年始一律改試鎗礮但童試爲鄉會之始基下屆武童歲考在光緒二十七年而鄉試轉在一年似嫌倒置擬請將陝西武童會試均暫停一屆於二十七年遵用新章開辦小考則技藝漸精而層次亦順至二十九歲武童仍取足兩科之額俾諸生知立法之意非盡棄故技精習鎗礮不能進身至練習考核之法臣等公同參議約有四端一曰去我所短仍宜留我所長兩軍對敵鎗礮先施於敵軍近偏大呼陷陣乃矛牌之利也敵人鎗礮既竭我亦馬軍突出橫擊直前洞穿背此又長矛之利也擬將武場刀弓石改爲刀矛牌刀矛仍用湘軍營操舊法牌則易藤爲鐵用以遮蔽子彈壯其膽氣蓋鎗礮取法於彼雖其精利僅足相敵必肉薄競進決命爭先方能制勝則刀矛鐵牌實與鎗礮同功一曰器械求新而規矩仍舊考試場期一仍其舊請將地球馬步箭改試馬步鎗礮爲一場刀弓石改試刀矛牌爲一場數適相當法無大變奉行者既不紛擾應試者更易遵循一曰器用西式而教用華人陝西地遠費絀勢難延聘洋員擬咨商北洋大臣無論營員學生擇其精西洋戰法兼通輿地測算諸學者酌派數員來素作爲教習每一學堂用正副教習各一員延訂十數人即敷分教數年以後今日之學生即異時之師長薪火相傳武風丕變一曰立法在考試之中而育材在考試之外查湖北武備學堂章程專選文武舉貢生員候補候選員弁官紳世家子弟考取入堂而單門下材不與

焉今爲武科改章而設自以成就通省武童武生爲主然果有官場子弟游幕
通材亦准其報名投考收取入堂作爲外課一體認真教授若有志觀光仍咨
送回籍應試蓋此輩聰明學業本加鄉曲武童數等降心來學其志必專收效
亦速不當以方隅限也

又大學士直隸總督榮祿奏查督練新建陸軍直隸臬司袁世凱自成軍以來
即規仿西制創設同文礮隊步隊馬隊四項武備學堂於所部各營內挑選官
兵作爲學生入堂肄習擬定條規兩年彙獎一次本年已屆二年期滿該堂月
領經費銀六百兩生徒共二百八十餘人所需薪水飯食及購置圖書儀器紙
筆雜費等項每月約二千兩不敷甚鉅均由該臬司設法籌措各教習薪資甚
薄亦各不辭勞苦認真課導著有成效而各員中以礮隊學堂監督段祺瑞尤
爲出力擬請按照天津武備學堂成案分別獎敘擇其尤爲出力各員及屢考
優等學生酌保十六員繕單呈覽

又山西巡撫胡聘之奏略稱晉省設立武備學堂咨調北洋學堂及新建陸軍
文武教習各二人來晉派令分司教練學生額數擬以一百二十名爲率歲需
銀約二萬餘兩於釐稅項下撥提

又安徽巡撫鄧華熙奏略稱皖省設立武備學堂開辦及常年經費由支應局
防餉裁節項下撥充

又兩江總督劉坤一奏略稱江南創辦陸師學堂見已三年畢業期滿懇 恩
給予德總教習駱博凱二等第三寶星以示優異

二十五年兩江總督劉坤一奏奉 諭水師學堂應增設學額添製練船講求
駕駛諸習風濤以備異日增購戰艦可期統帶得力 維江南水師學堂創立
之始原係駕駛管輪兩門各分三班招考生徒自英德語文而外凡句股算術
幾何代數平弧三角重學微積以及中西海道星辰部位駕駛御風測量繪圖
諸法帆纜鎗礮輪機大要皆當次第研求堂課畢業派登練船俾閱山海形
勢沙礁風濤更番巡歷以練膽識祇以各生學成登進不廣學額裁復無恆上
年冬間又因經費奇絀將三班學生四十名裁撤咨部有案見遵將原裁學生

暨教習員司人等招募添設一切仍照原數開支至巡練之船見有寬泰一艘
疊經督帶駕駛管輪頭班學生周歷海島諳習風濤再派赴各兵輪循章補用
即帶二班學生先後登船約計兩年船課均可畢業似此循環督練暫可不另
添船

又陝西巡撫魏光燾奏略稱陝省創建武備學堂總分教習已由新建陸軍延
調前來參酌津鄂兩學堂舊章擬訂簡章以資遵守經費需銀一萬二千餘
兩於裁減兵丁節省糧料變價項下開支

又吉林將軍延茂等奏吉林武備學堂原係旗民兼收練兵實效必先有諳練
之士廣爲訓迪當與十旗協領詳細籌議仿照邊軍武備學堂章程推廣辦理
於去歲校閱本省十旗秋操後未令遽散歸農即就其中之年富資穎者挑選
二百名擇地訓練名十旗武備學堂升任副都統全營翼長明順親軍統領軍
機處存記世襲三等子爵文福總理其事由戶部暫行籌墊津貼復調武備學
堂優等學生爲之教習又派委官分管各牌於考究武事之餘兼講忠孝大義

正開辦開奉 旨飭各省籌餉練兵伏思驟挑多兵餉項難籌多需時日不如
先就學堂勤加訓練遂飭總理各員認真督練見逾八月之久已有成效
往聞各操尙能整齊靈便遵 旨挑練武備軍一營由學挑充兵什至五十人
之多眾兵有所觀摩訓練較爲捷便惟邊軍武備學堂經費係由停演戲費項
下動支各營抽調學生亦皆隨帶原餉今試辦十旗學堂雖由戶部暫爲設措
籌墊津貼勢難持久查吉林全省釐捐經上年釐別整頓收數較從前暢旺異
常擬即由此項下指撥常年經費以資訓練而久遠

又安徽巡撫鄧華熙奏 署東偏原有演武廳一所爲平時校閱弁兵之區尙
有餘地就舊屋量爲修改再添造四十餘間即作爲武備學堂學生擬以四十
人爲額招考貢監生員及文武候補候選員弁以至官紳子弟性穎體壯者本
省人由地方官加結保送其外省人取具同鄉官印結保送考驗合格取入學
堂教授兵書一切市井蠹人不得投考擬咨請北洋大臣揀派由學生出身歷
練成才堪充教習並通曉西文及測繪之華士二人於來年正月到皖分充教

習另選深通史事兵書及曉測繪地圖者一人為漢文教習參酌南北洋教法訂立章程定期開學內堂課程外場操演各限畧刻分班指授派知府一員為總辦再派州縣佐貳二員分司稽查管堂支應各事教習如訓課成效昭彰應請由臣擇尤保獎學生月課季課年終亦由臣督同委員教習分別考校就學業淺深以定班次而行賞罰升降之差自由粗及精次第卒業請予照章獎敘量能錄用

又四川總督奎俊奏據日本國陸軍大尉井戶川辰三函稱奉本國政府之命來川請派文武官員選擇學生遊歷日本考察學制並稱該國練兵之期約在中歷九月請於七月遣員前往等語查川省中西武備各學堂建設未久學生驟難其選擬先酌派文武各一員咨送南洋將該國學制兵制詳細考究仍令回川以廣見聞而備採擇茲委道員沈翊清提督丁鴻臣定本年七月出洋前往每員給銀二千兩以為往返一切應用之費飭藩司王之春在本省釐金項下動支事後作正報銷

二十七年 諭武生童考試及武科鄉會試著即一律永遠停止所有武舉人武進士均令投標學習其精壯之武生及向經應試之武童均准應募入伍俟各省備立武備學堂後再行酌定挑選考試章程以儲將材

又 諭見在整頓兵制停止武科亟應於各省省會建立武備學堂南北洋湖北所設武備學堂及山東所設隨營學堂均已辦有規模應即責成李鴻章劉坤一張之洞袁世凱等酌量擴充認真訓練一切規制章程務須悉心核議斟酌盡善詳晰具奏請旨施行其餘各省即著該督撫設法籌建一體仿照辦理二十八年直隸總督袁世凱奏武備學術途徑紛繁須學習四年始可畢業既畢業後又須入營歷練二年再入大學堂肄業三年綜計須八九年乃能成材緩不濟急因在省城建立行營將弁學堂一區遴選曾經帶兵員弁粗識文字有志上進者作為學員酌訂章程選擇各種切要學術督飭肄業以八個月為卒業之期業成考選優等即可酌委軍事雖不若由武備學堂出身者學博詣精根柢深厚然曾經閱歷戎行而所學又皆切要適用亦堪備目下將弁之

選查有補用道雷震春饒有才略熟習營務堪充學堂總辦即責成督飭教習等加意訓迪剋期收效

總綱 一本學堂教授將弁以軍制戰法擊法為主並隨時就地實演有時需用兵隊准就近酌調 一堂內設總辦一員屬於軍政司管理全堂事務設提調一員管理一切雜務 一設總教習一員管理訂定課程並隨時修改監察各教習功課教習六員幫教六員各教授專門之學 一司帳一員 一書識弁目八名

選調學員 一員額暫設將領二十名哨官長四十名弁目六十名 一應選之員以才識明敏年力富強曾經帶兵者為合格 一第一班學員畢業即添調第二班入學就班接調 分立學課 一總教習分期酌訂課程請總辦核定頒發各教習遵行該教習各就六項專門之學商訂教法請總教習核准遵行 一教授六門

軍制門 建軍要說 兵學總論 戰爭原理 軍務總匯機宜 地方軍務機宜 步馬礮工各兵編伍說 陸軍餉務論 製造軍械及攤分子彈法 造就武官說 補充軍馬法 陸軍衛生論 陸軍築城法 將領等次責任 執法事宜
戰法門 編成步馬礮工各兵詳論 各兵操法教法規則 就地繪圖演習戰事
擊法門 用鎗原理 用礮原理 教鎗兵擊法 教礮兵擊法 鎗礮兵合用擊法 子彈綫路及初步火藥學
演練門 操場練兵指揮法 原野指揮兵隊法
實練門 估計遠近測繪形勢 就地講解兵理 就地布置戰法
試擊門 獨立擊法 指揮隊伍擊法交戰擊法
以上六項專門外隨造詣淺深添課戰學兵器學架橋學通信學測繪學及數化物理各學聽總教習酌加

教授三法 講義法闡明原理務求實際 問答法或口述或筆記 考驗

法查所學課程能否見諸實用

以上學員功課分數由教習按日記註每月由總教習查核考試轉申軍政司甄別優劣分別存記

限定學期 一學員八箇月畢業由軍政司督辦親臨監試或派員考驗擇

異擢用 一每日堂課不得在四點鐘以內場操不得在兩點鐘以內 一

就地講習每七日一次學習擊法每月三次原野操演每月一次

申明學規 一學員無論官職大小均聽教習訓示不准抗違 一學員均

穿號衣 一應用之圖書儀器各物由堂購置各學員如任意毀壞應令賠

補 一學員入堂不准告退遇大故疾病不能待至畢業者申請軍政司開

除 一在堂各員一切過犯均按軍律核辦

二十九年直隸總督袁世凱奏遵 旨建立陸軍武備學堂擬訂章程查北洋前設武備學堂成材甚眾自經庚子之亂該堂業已鞠為茂草掃地無餘而

所統武衛右軍會設隨營學堂數年以來訓練陶鎔亦頗不乏成材之士臣

直以後添募新軍揀派將弁教習以及分應各省調遣每取資於其中今值

朝廷振興戎政飭令各省籌建武備學堂臣體察今日中國情形參考東西洋

各國章制謹將學堂分爲三等曰小學堂曰中學堂曰大學堂合計通籌以十

二年爲卒業程度見在中國風氣初開根柢尚淺中學大學規模雖不可不備

而階級斷難以驟躋祇可從緩建立爲今之計惟有趕緊興辦小學以爲造端

之基並擬別設速成學堂一區以爲救時之用謹擬訂試辦章程繕單呈 覽

懇 敕政務處嚴議施行至建造學堂以及學堂各經費爲數不貲俟籌有的

款一再奏明立案

又著閩浙總督崇善奏略稱准江督咨准外務部電開奉 旨外務部呈遞魏

光祿電據稱查有上海創立愛國會社倡演革命諸邪說已飭查禁密拳等語

朝廷銳意興學方期造就人才儲爲國用乃近來各省學生潛心肄業者固不

乏人而沾染習氣肆行無忌者正復不免似此猖狂悖謬形同叛逆實爲風俗

人心之害著沿海沿江各督撫務將此等敗類嚴密查拏隨時懲辦所有學堂

條規併著督飭認真整頓力挽澆風以期經正民興勿誤歧趨是爲至要等因

伏查設立學堂振興教育當以端正心術爲根基講求學術爲階級武備培植

將才尤宜感發其忠義之氣福建自上年設立武備學堂至本年五月正屆速

成學生一年畢業之期如才親往學堂考驗各學生類皆恪守規矩於兵法戰

守各術亦知領要尙無囂競惡習惟去年事經創始選取學生入堂肄業祇就

講堂操場兩事擇要編定功課其分科按年遞進等級尙未詳備見奉 旨整

頓學堂應加嚴密當飭總辦武備學堂孫道仁認真整頓茲據該員詳稱近來

東西各國兵力精強其培養出於學堂而教練之方在於先定規則嚴明精密

務使人咸服從懍然於尊親大義奉飭實力整頓惟有於計日分年課程詳加

釐定其日課之法定列課表分爲學術兩科每日限定時刻受課畢仍歸自習

所考驗本日所授科學不准涉獵浮濫書報以杜邪思晨興夜宿各有定限無

故不得請假出堂與外交接其年課按期分科循序遞進每年冬夏兩季考試

甄別一次分別等第以定去留仍明定堂規犯者分別輕重隨時懲罰不少寬

貸學生分正科速成兩班正科三年畢業教授普通軍事速成一年畢業教授

大概軍事原定正科速成各六十名惟每年正科中必有因病因事退學者及

資質不宜肄習正科學術應撥入速成者擬添正科三十名分年續補則每年

皆有畢業之生頭班速成畢業後第二年再添速成六十名其正科撥入者另

由營補餉一同教練二班速成畢業後即不再添速成按年另添小學堂學生

一班畢業升入正科以期與北洋小學堂升中學堂章程相合將來正科畢業

後即擬附送北洋大學堂肄業俾資歷練儲爲將材至委員職司因費絀勉爲

歸併力求撙節另添漢文教習一人編核教科書並添巡查委員一人專司稽

查學生假期出外使知有所警惕又仿日本士官學校區隊長之制分置學生

隊長約束較爲周密密容俟二年期滿遵照上年奏准之案擇尤請獎庶幾勸懲

有資人思奮發

三十年練兵處新定陸軍學堂辦法二十條

又練兵處奏准軍機處鈔交出使日本大臣楊樞奏稱日本陸軍經營數十年成效最著中國似宜添派學生來東專送入陸軍各學校以期成就遠大惟是學陸軍者每歲所費較多文科者數倍似宜以官費培植之雖各省督撫亦有派學生東來然爲數有限恐不敷干城之選應否 飭各督撫將軍於世家宦族內遴選文武兼資之少年學生添派來東分定班數人數送陸軍各學校肄業以廣將才而資錄用等語 臣查見時文科各生業經學務大臣奏派三十餘人前往武科似較文科尤急凡陸軍學堂之事本與軍事相爲表裏擬即由 總理其事所有各省各旗每處應派學生額數若干每年應籌學生經費若干挑選時學有淺深應憑何格選取否送時路有遠近應限何時送齊以及留學在東應派定何人司其約束學成回國應考授何職予以登庸一切應辦事宜均須明定章程方足以免紛歧而資信守 等公商繕單呈 覽如蒙 俯賜准行即分別咨行各省督撫及京外各旗欽遵辦理自本年起將第一班學生一律於七月初旬送到 臣處以便考驗遺送出洋得 旨允行

又河南巡撫陳夔龍奏遵 旨舉辦武備學堂於省城南關地方建造落成遴委藩臬兩司常備軍翼長道員袁世廉爲督辦札派候補道吳封總辦該學堂事宜其監督總教習提調各員分別次第檄委招考學生暫以八十名爲額內分招考學生四十名由本省民籍駐防旗丁挑選隨營弁兵四十名由常備各軍挑選原支餉項畫歸學堂按章同招考學生一律發給是謂官費生此外如有願備資斧來堂肄業者無論土著客籍作爲附額二十名同正額學生一律教授是謂私費生該學生等均以三年期滿屆時察酌是否卒業分別辦理如得有優等文憑或援案咨送並擇委差使以示鼓勵惟本省練兵伊始在在需材就其中資秉殊異曾經閱歷戎行者擬選擇各種切要學術督飭肄業如能考取優等亦可隨時酌委軍事至常年額支約需銀二萬數千兩一切活支各款及異時延訂洋員之需尙不在內擬先由糧道庫撥銀一萬六千兩釐稅局撥銀六千兩作爲籌定常款不敷之數容再設法通融湊撥目前章程大致參仿北洋湖北山東成案暫行試辦一俟練兵處咨到詳細章程容再次第遵照

酌辦期與各省整齊畫一
又兩江總督端方奏江南雖設有水師學堂而於風濤沙線行船駕駛之法均未親身閱歷非選派出洋游學不能切實研究見與英領事商允該國水師提督電稱中國水師學生准即挑選由駐滬英國水師總兵分派各船學習等語業於江甯水師學堂中挑選合格學生六名前往學習暫以兩年爲限所有學費即於通州紗廠官本利息項下分年籌給

皇朝續文獻通考卷一百十

學校考十七 學堂 武學

三十一年練兵處兵部奏籌擬陸軍小學堂章程一册計總則二十七條編制四條選驗格式十二條各員職任十一條規條三十二條課程八條考試十三條經費九條教授規則一册共十四條學長規則一册共十九條學生規則一册計訓言五條軌範九條講堂九條操場三條自習五條考試三條禮節七條齋室六條飯廳四條請假四條病院五條服物十條書籍三條出入五條

又直隸總督袁凱奏略稱臣於二十八年開奏設將弁學堂奉 旨飭令河南山東山西各省選派將目赴堂學習操練現均先後畢業惟查練兵處奏定陸軍學堂辦法各省應於省垣設立講武堂又於近畿各省先立速成學堂挑選各省武備學生入學肄業備補隊官排長是此後各省將弁就地取材無虞既乏北洋前設之將弁學堂自應俟各班畢業後分起逐班停止以符定章至辦理學堂出力各員擬援照各省武備學堂暨武衛右軍隨營學堂成案分別議獎

又熱河都統松壽奏添設熱河武備學堂經 臣才咨商北洋大臣即在保定將弁學堂選調教員來熱為總教習即以畢業學員之優者接續入堂肄業兼副教習並擇地於強勝中營內添建講堂校舍操場惟熱河邊瘠之區物力與內地懸殊所屬情形亦異 臣才苦心經畫為速化旗兵計不得不參仿隨營為推廣公益計不得不兼收蒙部於參用北洋定章外援照練兵處通行講武堂暨創設蒙古學堂體例另訂特別章程十條

又直隸總督袁凱奏武備各學堂外區設專門各學堂曰軍醫學堂以儲正副軍醫官軍醫長之選曰馬醫學堂以儲正副馬醫官馬醫長之選曰經理學堂以儲正副軍需官軍需長之選曰軍械學堂以儲正副軍械官軍械長之選又湖南巡撫端方奏倡設陸軍速成學堂歲需銀五萬兩由善後局隨時籌撥又兩江總督周馥奏擬遴選普通德文之學生十名赴奧國加習馬步工輜等項武備以為行陣儲材所有學費及約束等事即由駐奧使臣就近照料

又練兵處奏定陸軍畢業學生考試授官章程十條

又 諭派慶親王奕劻選派宗室出洋學習武備

又兵部奏八旗王公扈從侍衛酌改舊制謹擬辦法分條開列一今王公大臣子弟肄習兵學業經練兵處奏准開辦貴胄學堂並於章程內聲明其年長不合定格與充當差使之王公世爵礙難入學受學而情殷尚武者俟開學後另訂專章奏請入堂聽講以示優遇等語應即照章於學堂內設一貴胄講習所以便王公世爵隨時到堂研究兵學詳細章程由練兵處擬奏一綠營引 見人員前經兵部奏准一律改習鎗礮赴部時分期考驗惟京外各旗及東三省旗員王公門上護衛各項仍考驗騎射隨時帶引今奉 明諭所有引 見人員著毋庸持弓擬請嗣後京外各旗及東三省旗員赴引均照陸營成案一律辦理倘考驗時施放不能如法發回原處勒限一年學習限滿仍不如法者革職至王公門上護衛等項即由各王公選合例人員徑行咨送該旗帶領引 見毋庸考驗其各旗營比較箭支挑補官兵等事應即停罷又定例點驗旗員以及兵丁軍械久成具文亦請一併停止一恭遇 聖駕出入扈從各官應佩弓矢屬鑿鑿者一律改為佩刀前引之先後扈之次請以宿衛 禁廷之陸軍各執新式鎗械由統領統帶等官恭率翊衛京城以內應酌派步隊兩隊分列前後護衛京城以外應酌派步隊一營馬隊兩隊分列前後左右護衛遇有 謁 陵行圍差使屆時奏添隊數此外一切儀注仍照舊章敬謹預備其舊設善射等員與弓箭置備等項均即裁撤一守衛 官禁為親軍營前鋒營護軍營專責乃歷年既久窳惰廢弛恭溯國初定制上三旗皆 天子所自將出任征討入供宿衛今宜按新軍章程另行設立扈衛軍於京外各旗及各省已編成鎮諸軍內慎擇品學兼優之官長操法純熟之兵丁調取編練出則扈從入則守衛歸 御前大臣管轄其一切編制應由練兵處會同 臣等詳細籌議續行具奏一親軍前鋒護軍等營兵擬請 特派大臣分別考驗其年力富強之官員撥入陸軍學堂肄習仍給原俸體質精壯之兵丁分送各鎮陸軍挑選教練仍給原餉三年後或撥歸扈衛軍或回旗以應補缺分錢糧升補改補屆時

核其程度分別辦理此外不合格者官員對品以旗員改補兵丁撥旗以馬甲坐補分年遞裁期以十年裁盡逐年騰出底餉由戶部節存以備編練巡衛軍之需舊設之獸袋弓箭應即裁撤一親軍前鋒護軍等營遞裁以後屆衛軍未經編設以前凡例裁守衛 禁門傳籌啟閉稽查出入各差使應酌調見經編練之陸軍官兵與未經裁撤之親軍等營官兵一併酌量分定章程各專其責俾資遵守仍出各該管大臣隨時認真稽察以昭慎密惟此項兵丁宿衛 禁廷關係甚重見任川北洋留駐之陸軍一俟京旗陸軍調撥來京如何分派更換屆時再行奏明請 旨一侍衛為近 御差使品秩清嚴見值振興武備尤宜特重其選擬請嗣後挑取侍衛陸軍各鎮著有成績之軍官及至陸軍學堂優等畢業之滿漢世爵世職人員一體與選由各該管大臣出具切實考語咨送 御前大臣領侍衛內大臣公同考驗相符者帶領引 見請 旨補放仍仿古者番上宿衛之意以二年為一班班滿之日軍官發回本鎮以應升之缺補用世爵世職發往練兵處以應升應補之軍職酌量補用頭班期滿咨取二班以次更代如有材猷出眾勞績卓著者准由 御前大臣等奏留恭候特恩簡用挑升禁衛峻秩俾昭激勸見在當差之侍衛除貴胄已另設學堂照章分別入堂及隨時講習外其餘均由該管大臣擇年力富強資質聰敏者咨送陸軍學堂肄習凡侍衛及親軍等營課程應由學堂將會典所載宿衛事宜及日本等國衛兵諸制擇要編輯作為一科與各項科學並授肄習三年期滿回京常差升等補用其年齒已長不能受學之員仍令照章供職惟不得挑升等第以示限制一挑選旗兵擬一律改用鎗枝並試以文字惟快鎗係屬利器初習者稍有不慎恐致失誤且平日演習子彈所費尤屬不貲近來中國工匠類能仿造洋式氣鎗瞄準命中與各式鎗枝無異擬暫令各營就近購備在原設箭場演習遇挑補缺分時兵丁以發鎗中數及識字多少為比較均責成該管大臣秉公較閱按格挑補自奉 旨之日起即將所出缺分扣留凡例應挑補兵丁勒限三個月演習氣鎗限滿即行考驗各省駐防一律辦理嗣後擬由 臣部參仿各國教練新兵及體育操快鎗章程另定簡易妥善辦法咨令各

旗營駐防遵行以收實效至於各項漢兵募補往往有籍貫不清及逃亡之弊請 飭練兵處妥議徵兵辦法奏明施行一定制旗員揀選月缺每年扣副將一缺參將二缺游擊一缺都司三缺為大揀補缺此外直隸山西陝西甘肅四川松潘一鎮遇有副將游都守應用旗員缺出亦扣歸揀補為小揀補缺均由兵部行文八旗侍衛處及鑾儀衛內務府步軍營等處咨取合例人員於次年二月內奏請 簡派大臣會同兵部公同揀選取其騎射優嫻讀例明晰者帶領引 見請 旨補授今既一律改習鎗枝若仍舊舉行殊非盡一武備之道擬請嗣後小揀補缺即行停止將直隸等省向歸旗員揀補各缺均改為提補之缺其大揀補事例 臣部無庸先期扣缺暫歸外補其例應咨取人員由部發給執照送陸軍學堂肄習三年期滿由學堂將該員功課分數造具清冊分別等第咨回其程度合格者由部註冊遇有各省部選缺出屆時當釐定輪缺章程將此項人員擬選帶領引 見請 旨補授惟各處咨取人員向以五十五歲為限今擬改四十歲為限倘所學程度未能合格任缺勿濫此係暫行辦法俟綠營遞裁官缺遞減後即分別停止一各項滿漢世爵世職奏准承襲後無論已否赴部帶領引均應入陸軍學堂肄習其學課仿照侍衛及親軍等營咨送學堂章程辦理三年期滿擇其列入優等堪膺宿衛之選者咨送考驗倘學課精進能與陸軍學堂同班畢業即照學員授職章程另行辦理凡未入學堂者雖已襲職祇以減半給俸不准補官以示區別如係世職佐領應於出缺時由本旗揀員暫署仍將應襲之員送學堂肄習年滿回旗再行請襲以上各條係就暫行之法及經久之規統計兼籌約舉綱要所有未盡事宜仍由 臣等分別妥議隨時具奏

又練兵處奏請嗣後凡宗室及滿漢侍衛等員在各省將弁學堂肄業年滿經練兵處考驗准予卒業後即發往各軍隊量材器使與在營各員一體任用以資歷練而廣裁成

又兵部奏籌擬陸軍速成學堂試辦章程

學堂總則

一按照練兵處奏定陸軍學堂辦法第八條陸軍部應設陸軍速成學堂一所造就初級軍官備各省軍隊之用

二陸軍速成學堂隸於陸軍部專收各省旗未畢業武備學生及按選驗格式考取文理清通良家子弟教以普通學並軍事專科學術以速成爲主使各省旗武學兵制操戰各法均歸一律如有各省旗舉貢生監願入學堂肄業者亦可按格考收

三本堂學生分爲兩班凡考選各生如有普通學程度者歸第一班習軍事專科一年半畢業如普通未全及全未肄習者歸第二班先習普通學一年再習軍事專科一年半共二年半畢業兩班畢業後均入隊充學習官三個月原奏速成學堂辦法係二年畢業再入隊充學習官六個月今爲教育完善起見故稍事變通如各省需用不急充學習官期滿後准其回堂加習功課半年

四各省旗所送學生擇其資質尤爲聰穎者於應習軍事專科或習普通學時兼授各國語言文字爲預備科俟畢業入隊充學習官期滿後將來各省旗凡遇應送出洋游學之學生卽於此項學生內選派不得另自選送

五學生照章定額八百名今爲各省旗多植人材以資應用起見每年考收學生照奏定選派陸軍游學生名數酌增十倍以一千一百四十名爲定額計京旗八十名直隸江蘇湖北四川廣東各六十名順天奉天山東河南安徽江西浙江福建湖南雲南各四十名山西陝西廣西甘肅貴州新疆吉林黑龍江各三十名江甯杭州福州荆州成都廣州綏遠城熱河察哈爾九處駐防各十名密雲青州西安三處駐防各八名甯夏駐防六名共合一千一百四十名

六本堂亟須舉辦不及另建房舍擬就保定陸軍學堂開辦

七各省旗選送學生不得濫取充數如有不及額或邊遠省旗礙難選送者須預先咨明陸軍部於附近省分學堂及京旗學堂按格考選以足其額畢業後仍遣回原省任用

八各省旗選送學生須取其各生簡明履歷清冊並印甘保結及所歷學堂

肄業程度表隨文咨送如各省旗有選不及額應由陸軍部臨時考選者須聲明漢文及別項學業臻何程度均於開學前一月一律送到以便考試逾期者不收

九本堂常年經費照奏定選派陸軍學生游學章程辦理由各學生原省旗認解五成由陸軍部籌給五成計學生每名每年約需學費銀二百六十兩各省旗按照定額每名每年解交銀一百三十兩各旗內如有實係無力籌給五成者由陸軍部設法籌備

十本堂開辦經費及建造堂舍購辦圖書器械馬匹等費均由陸軍部籌備十一咨送學生川資由各旗自行籌給其有不合格式礙難留堂者回籍川資亦由各該省旗自給

十二本堂開辦之前六個月由陸軍部咨行各省旗並刊發考選格式各該省旗必須按格認真選取咨送並於部文到後能送學生若干名先行電復十三新生入堂後應由本堂總辦監督教員隊長等隨時考查如有行止不端及不堪造就者隨時別退倘有質地稍遜而向學甚殷者仍酌寬限期學習

十四學生倘有故生事端希圖出堂及私自逃逸者卽由本堂總辦稟報陸軍部咨行該生原省旗由各該督撫將軍都統行知各該州縣佐領勒令該生家屬保人賠償所費公款並按軍律治以應得之罪

十五學生膳食及應用書籍課本筆墨紙張軍衣靴帽被褥等項統由學堂備給

十六學生入堂後每名按月給月費銀二兩俟三個月季考後分別等第再行照章發給月費別退出堂者由總辦稟請陸軍部酌量墊發川資任其回籍已發之書籍令其帶去惟將所發軍衣靴帽被褥等件繳回

十七學生最忌隨時增收新舊參差難於施教考齊入堂之後祇准隨時別退不准續補各省旗均須依限送到遲則不收

十八學生畢業時由陸軍部派員蒞堂考試凡程度及格者派送入京續附

近軍隊充學習官歷練官長職司三個月後由該管協標營官出具切實考語擬定分數列表呈該鎮統制申送陸軍部覆核給與執照上中等照章補授軍官次等不補官階均咨回原省原旗酌量委用凡考試程度不足者展限六個月在堂補習補習期滿後仍派入軍隊充學習官三個月均照前一律辦理

十九學生畢業入軍隊服官後在本堂列入上中等者凡年力富強有志上進願入兵官學堂之生無論有何差使均准報名覆考合格者仍就本科入堂肄業

二十本堂設立後保定所設之直隸陸軍速成學堂當即停辦所有該堂執事人員均由本堂酌量委用

二十一速成辦法原為權宜應急之舉俟各正課學堂即小中兵辦有成效此堂即行停辦所有在堂人員由陸軍部查考辦理

二十二本堂每屆二年半辦有成效即由陸軍部查明學堂辦事尤為出力之員援案請獎

學堂編制

一本堂學生額數既多又期速成軍官資格即應參照軍隊編制設隊官排官以資教練

二第一年學生一千一百四十名按各生所考程度普通學較優者定為軍事學專科班其餘均歸普通學班教員並管理各員亦按第一年應用人數擬定至第二年學生額數仍按一千一百四十名考收教員人等臨時按科添派是以此項編制先就第一項臚列

三全堂設總辦一員正副監督各一員正副提調各一員洋教習就第一
年學生一千一百四十名約計應設國文正教員二員副教員八員歷史地
理圖畫等科正教員各一員副教員各五員算學正教員一員副教員七員
英法德俄等洋文教員各一員日文正副教員各一員擊刺體操馬術正副
教員各一員助教員各十員五科科长各一員十隊隊官各一員十隊排官

各三員十隊正學長各一員副學長各二員醫官兼衛生學正副教員各一員醫士四員馬醫官兼馬學正副教員各一員一等書記官一員二等書記官三員收支正委員一員副委員三員管馬正委員一員副委員三員支應管庫司事六員管藥司事二員司書生十六名差弁十六名號目正副各一名號兵十名醫目一名醫兵八名修械兵四名刷印匠六名差夫二百名馬夫目十名馬夫百二十名輜重車二十輛駕車兵二十名各隊騾馬五百匹四速成學生以一百二十名為一隊每隊分三排上講堂時每排為一班歸隊官排官學長管轄

五預備科學生習英法德俄等文者以一排為限習東文者以三排為限每排五十名至少亦須在三十名以上

員司職守
一總辦節制全堂員司綜理一切事宜凡得失利弊悉心考查遇有應行損益改革事件隨時稟承陸軍部辦理

二正副監督總司全堂教育凡核定功課考查員生及申明約束傳發號令並准放假期等事皆其專責

三正副提調總司全堂庶務凡清釐帳目約束夫役購辦器具查驗庫儲等事皆其專責

四科長聽監督指揮督率本科教員隊官排官整理內堂外場各教務分教兵學並應訓育兼施以盡責任

五教員專司教授功課務在有以振作其精神激發其志氣使諸生樂而忘倦凡學生優劣立冊記錄每月彙呈監督轉呈總辦查核其每日所授課程簽明功課簿內以備考查

六隊官督率本隊排官學長使之各盡職守並隨時激勵各生以堅其向學之志講堂功課亦應分教兵學一二項以補教員之不足至操練各法皆其專責遇有應行損益改革事件商承監督辦理

七排官補助隊官管轄教導本排學生使各守紀律遇事商承隊官辦理並

將各生品格隨時記錄以便擬定分數

八學長幫同排官專司稽查本排學生舉止動作寢興疾病衣履被服並帶領進堂上操請假等事齊室內外亦歸稽查有聯合同學勸善規過之責務須懇摯和平不可侮慢迫脅倘各生有爭執估過情事不能開導者隨時報知值日排官辦理

九醫官專司醫治各員生疾病兼授衛生功課考查醫院藥料並食物等事學生因病請假須診明真偽不得一味寬縱致曠功課或量給假期或祇給操假均須按病情酌定填註病表存驗病單由隊官核准轉報監督倘無學長帶領赴診概不准假

十馬醫查驗馬匹療治病馬兼教馬學功課

十一管馬委員經管夫馬草料及廄內一切事宜凡關於軍馬衛生諸務須會商馬醫妥善料理在廄馬匹應編立號簿分定馬步職工輻重相宜匹數以別種類如有重要事件須請監督核定辦理

十二書記官專司堂內往來文牘及會議時記錄等事

十三收支委員專司出納款項凡額支各項呈明提調照章頒發活支各項稟請提調詳細籌議呈總辦核定方准動支各項帳目須按月按年造報四柱清冊堂內員生夫役人等薪工等項均不准徇情借支如有私自預借經提調查出即責成該員照數賠補

十四支應司事專管廚房膳食購辦物件等事應購諸物預具清單由委員呈請提調辦理

十五管庫司事專司收存一切新舊器械書籍軍衣靴帽等件收發日期新舊件數均須造冊登記每季送呈提調查驗一次並宜隨時飭令夫役晾曬擦拭以免損傷汗朽如有應修理之件稟知提調辦理

十六管藥司事專管藥房病院及藥料器具事宜並幫助醫官調和藥劑所有藥料造冊登記按月呈報一次如有應行添購之件稟請提調辦理
十七司書生歸書記官管轄專任鈔錄等事

選驗格式

一年齡限十八以上二十五以內

二品格須性情端樸素無過犯

三出身須有切實保結除舉貢生監外確係良家子弟

四志趣須誠心向學別無嗜好

五學業須國文溝通能作淺近論說

六身長須五尺以上此按工部尺計算外國尺一尺合六寸四分

七胸圍須在身長四成五以上如身長五尺者胸圍須二尺二寸餘量時用皮帶尺或腰圍尺較小之繩繞胸之周圍以齊乳下前後適中為度

八體重須一千二百六十兩以上此按湘平計算外國一磅合四兩

九肺量須按胸圍漲縮差二十分之一以上如胸圍三英尺一吋之吸氣須在二千五百立方生之密達以上

十手力須左右手各能提五十斤齊跨者如用日本所製之未習武者二十度亦合

十一目力須相距二丈能辨識七分之楷書字如用日本所製之日力表在十度以下

十二五官須端正四肢須靈活體質須強健器宇須軒昂言語須清楚喉音須宏亮耳力須靈捷

學堂條規

一堂內任教育各員必須通曉武備志趣純正能為諸生表率者方可派充其餘各員必須敦品勵行勤慎耐勞方與斯選如有才不勝任之員隨時黜退

二總辦由陸軍部遴選熟悉武備之員委充學堂開辦後由部派員隨時考查倘有失當之處及犯別項條規由陸軍部分別輕重核奪辦理如其自行請退須於兩月以前呈請部示聽候准駁

三自監督以下人員均由本堂總辦遴選呈請陸軍部考選委派監督應由陸軍出洋學生內遴選教員應由陸軍出洋學生及各專門學生內遴選或

延聘外國專門之員充當隊官排官學長等應遴選畢業武備學生在營會充當官長或未充官長而閱歷較深者分別委派

四自監督以下均應遵守總辦命令如有才不勝任及犯大過者由本堂總辦查核辦理除監督提調須稟明陸軍部撤差外以下人員准其一面稟明一面撤換俾一事權

五學堂開辦三月後應由總辦造具員司簡明履歷學生年籍清冊呈送陸軍部存案

六每屆年終由總辦出具各員司切實考語並核定考績分數表及學生功課程度清冊呈送陸軍部備核

七總辦命令凡關係於功課條規者交監督舉行凡涉於雜項事項者交提調舉行均由書記官書於命令簿內知會承辦之員畫押蓋章遵即照辦倘有違誤惟承辦人員是問

八提調以下各員職事雖分均有維持學務之責務須互相匡助倘有貽誤專任者固責無旁貸同事者亦咎有難辭

九總辦因公遠出堂內諸事歸正監督兼理倘總辦正監督俱出歸副監督及提調兼理

十堂內立會議廳一所自總辦以下按每星期六日均聚集會議並擬定下星期詳細課程如平時有應議之事由總辦隨時傳集

十一堂內設全堂值日房一所各隊官排官輪流值日管理全堂事宜各隊各科亦設學長值日房一所各學長輪流值日管理本隊各生事宜當值者均以一星期為限刻不容離即因公他往亦須倩員暫代凡值日各員星期均不放假

十二各員非星期日不准無故請假教員亦不准無故停課

十三各員告假須據情繕單呈請總辦批准方准他往

十四各員如患重病或有婚喪大故准其請假回籍惟至多不得逾三個月倘逾限不歸即行開缺

十五各員不得在堂內飲酒讌客並不准與學生私有餽贈讌會等事

十六各員在堂辦公只准用堂內夫役如在宿舍准帶跟丁一名應與夫役號衣一律並給腰牌以憑考查倘犯堂規亦照堂役懲辦

十七堂內設員司學生會客廳各一所除總辦隨時會客外如有訪見各員及學生者先由門役引入客廳再行通報如值辦公習業之時均不得會客應告知暫候倘各員欲引外客入堂觀覽須先稟知監督若在授課之時並須告知當時授課教員然後引入學生則概不准引客入室

十八堂門按時啟閉查號以後大門扇鎖夫役起更鑰匙交提調收管次晨吹興起號前半點鐘由司開領鑰匙門各員晚出凡在十二點鐘以前回堂者尚可領鑰放入過限一概禁止

十九各官長學生均須常著軍服便服等項一概不准攜用

二十恭逢 皇太后 皇上萬壽聖節 孔子誕日及元旦由總辦率領各員生衣冠詣禮廳行三跪九叩禮元旦禮畢後全堂行團拜禮

二十一每年開學之日總辦帶領各員生衣冠詣禮堂謁 聖行三跪九叩禮禮畢以後學生向總辦監督教員以及執事各員行軍禮總辦策勵員司訓諭學生於各人應辦之事應盡之任曲為講說講畢退班開課

二十二堂內各員司學生平日相見均按奏定陸軍禮節

二十三學生犯有尋常過失本隊官長分別罰站或罰休息稍重則稟請監督罰津貼或記過犯過再重者由監督稟明總辦核奪罰禁思過室如所犯過重則革除追繳在堂經費倘有聚眾脅制官長及橫起風潮等事應按軍律治以應得之罪其舊日軍營棍責等刑一概禁用

二十四恭逢 皇太后 皇上萬壽聖節 孔子誕日及端午中秋各節堂內員生放假一日星期亦放假一日年節放假二十日暑假日期由總辦監督臨時酌定以三星期為限

二十五年暑假假期內除司事司書生外其餘各員在堂者均輪流值日以十二點鐘為限

二十六堂內設立飯廳數所自總辦以下均分赴各廳與學生同食不得自食於私室亦不得同食異餐

二十七堂內設自習室數所自習之時除總辦監督提調及各官長外不得擅入

二十八堂內設沐浴室兩所各員司學生按所定時刻輪流沐浴並設立學生櫛沐髮盥漱室數所每日晨起俱赴此室理髮洗面不得在堂院齋室以期整潔

二十九堂內設養病室一所除員司學生外不得入此養病

三十外堂設馬廄一所廄內馬匹日有專差除官馬須豫稟監督傳知備用外餘者不准隨意乘騎

學堂功課

一速成學生年限迫促應將所擬功課豫定若干次教完屆時如無故不完即為教習之咎每次功課雖能如期教完而學生領悟記憶必須有一半能過六成者否則亦為該管學各員是咎

二堂內功課由陸軍部擬定課目表以為規則其前期後期分課細目學術時限及各隊官教員輪疊教授之時刻均由總辦監督商訂至所教各項功課均於兩月前呈由陸軍部核定再行講授凡季考大考並應將每季教育實施之細目並所考學績表呈陸軍部彙核

三馬步礮工程輜重各專門責任不同各項功課亦應分別輕重第二年開學之先總辦須傳集監督教員隊官公同會議斟酌施行

四兩班學生畢業後加習半年者教以實施勤務即軍內各勤務應用學業即兵棋野戰法實地演習等並溫習功課或補習功課由總辦監督擬訂課程表呈陸軍部核定

學堂考試

一考試除各教員平時課試以外尚有月考期考年終考畢業考錄用考平日各教員於授課時節次考問按諸生所學各定分數是為學業分數每至

月終各教員統匯一月所授功課分科命題以判諸生之等差是為月考由教員列表上呈監督轉呈總辦每上半年於暑假前由監督會同教員臨場考試是為期考每屆年終於年假前由總辦督同各員考試是為年終考畢業時由總辦稟請陸軍部派員考試是為畢業考在軍隊充學習官三個月後由該鎮列表呈請陸軍部覆核是為錄用考

二考法共分三種一問答二筆述並作文三實行問答聽其口述筆述作文評其試卷實行驗其操作並指揮軍隊之能力

三評定功課按北宋國學積分之法每題以二十分為最每項功課按題取平均分數並匯為總分數以定名次

四分數有三種一功課分數二技術分數三品格分數功課及技術分數為歷次考試各員所定品格分數由監督與科長教員隊官排長學長參合所定每至月考期考年終考畢業考必合臨場功課技術平日功課技術品格各項分數一併核計惟平日分數不得多於臨場分數務須酌訂適宜

五各項分數平均計算每課目得十七分至二十分為優等十四分至十六分九為上等九分至十三分九為中等五分至八分九為下等四分九以下為劣等考列下等者分別予限學習劣等者酌令退學凡在堂考試均分優劣由總辦見習來京考驗時分上中次三等

六凡平日課試考問如不能答或所答不能詳盡則將原題另試他生倘歷試數人皆不能答教員須再詳細講解各令筆記

七每屆月考核定分數後須取本月學習分數十分之一及本月品格分數一同加入為月考總分數

八每屆期考核定分數後須將以前各月考總分數取十分之一加入為期考總分數以次列名榜示考優上中等者按見考等第領月費其餘按第五條辦理

九每屆年終考由總辦豫訂日期總一年所習功課逐項考試核定分數後須將本年前次期考及期考後各月考總分數取十分之一一同加入為年

終考總分數以次列名榜示考優上中等者按等升班分習各專門功課其餘按第五條辦理

十每屆畢業考須先期十日牌示講堂俾令準備期前七日一律停課仍按時到堂由教員隊官監視溫習功課考畢核定分數後將前次年終考及本年前次期考並期考後各月考總分數取十分之一一同加入為畢業考總分數以次列名榜示考優上中等者由陸軍部發給畢業文憑造冊存案分派軍隊充學習官餘按第五條辦理

十一每屆畢業考後宜列表呈報陸軍部存案

十二每屆錄用考由所在協標統營官評定各畢業生在軍隊閱歷深淺學問高下才識短長分等編表按名出具切實考語呈由統制申送陸軍部復核是為錄用考據其等第分數列上中次者發給畢業執照並照定章奏補軍官發回各省旗以隊官排長等缺備補

十三每屆期考如有因病及因他故不能與試者由學長查明實無規避情節稟明本隊隊官月考則知會教員期考則稟明監督年終考則稟明總辦畢業考則由總辦稟明陸軍部始准補考

學堂經費

一經費分額支活支兩項額支按季由學堂總辦出具印領呈送陸軍部批發活支則隨時酌量請領惟銀數在五百兩以上者須呈陸軍部核定

二薪丁火食雜費等項為額支按年查照定數支用如有應須增減之處呈明陸軍部核定

三修造房屋購置軍衣靴帽圖書儀器器具藥料等項為活支總辦須督飭各員隨時樽節不得稍涉虛糜

四無論額支活支每屆年終支應委員須將收發款目於封印前分造四柱清冊並將各項憑單領據發票收條核對明晰並同原簿呈送總辦提調查核具報陸軍部核銷

五無論額支活支等項均由陸軍部籌定的款由總辦具領照發

六自總辦以下各員司支領薪水以每月十五日為定期由支應委員照定數繕冊派支應司事按名送交以簽押蓋章為據發畢送呈提調查閱

七每月下旬支應委員應將學長學生夫役人等花名分造清冊呈總辦提調查閱後即將應發餉項工食分別秤足各包書明數目姓名學長學生由監督點名發給餘由提調查應委員點名發給

八茲將開辦額支活支三項經費約估未估各項詳列於左

三十二年山西巡撫張人駿奏晉省遵章改武備學堂為陸軍小學堂委候補道胡元泰充該堂總辦並按學生定額二百一十名分作三年收足所有第一年學生七十名已於武備生內並各廳州縣及太原駐防先後送省者按格選收足額即以舊有之武備學堂地方添建堂舍足敷居住業於二月開學在堂員司並開支薪費學生規課悉遵練兵處定章辦理

又江西巡撫胡廷幹奏江西省武備學堂改為陸軍小學堂按第一年學額酌展十名共選取學生八十名附課學生二十四名一律入堂開學均照練兵處章程辦理其開支經費就武備學堂原有之款撥充

又署兩廣總督岑春煊奏設隨營醫院及隨營軍醫學堂經電商出使日本大臣楊樞代聘日本醫學士一人充隨營軍醫學堂總教習及隨營病院診察長別雇助手一人藥劑師一人以為之副先後到粵當於光緒三十一年七月設立隨營病院為調治病兵之地八月開辦隨營軍醫學堂招取學生專習醫學為療治軍隊傷病之用當春夏疫癘盛行染病官兵得以在院醫治救痊甚眾又雲貴總督丁振鐸奏滇省武備學堂二班學生畢業即遵章改為陸軍小學堂初年額設一百名約計武備新生兩堂舊生及地方官之所申送各得其半均於本年開學

又陸軍部奏陸軍小學堂各省旗一律舉辦見計展限已閱年餘辦法先後頗多參差若不同時並舉剋日觀成恐將來程度不一年限不齊於此後續辦陸軍中學堂之舉殊多窒礙請旨嚴飭各將軍督撫等切實辦理其尚未開辦者並限於三個月內一律辦齊

三十三年又奏吉林遵章設立陸軍講武堂爲全省軍官研究武學之地額定學生六十名由各營官佐抽調分班輪流到堂講習每以三個月爲一學期周而復始以次遞推務使全省各營無一不學之軍官即無一不學之兵士

又陝甘總督升允奏甘省創辦武備學堂經前督臣崧蕃奏咨在案嗣因開辦陸軍小學堂查照河南陝西等省辦法就原設武備學堂改編惟以甘省武備學生肄業將及三年各屬體操教習需才不得不展辦數月以期畢業始於光緒三十二年四月選合格之學生一百名爲第一班學生十二月復加考覈將最優之學生數十名派充各屬體操教習領班餘悉撥入陸軍學堂並調取各屬小學堂合格學生共足百名之額作爲第二年第二班學生遵照奏定章程參酌本省情形見擬大綱八日建置日總則日職任日經費日課程日考試日儀節日規則立課程之目亦八日修身日國文日外國文日歷史日地理日算學日格致日圖畫訓練之目三日訓誡日操練日兵學擇聘各教員分別講授惟就武備學堂編改未能悉照部頒圖式重加建置祇將禮堂講堂飯廳客廳儀廳浴室藏書室自習室養病所閱報所及委員教習學員居止之處修理完備

又陸軍部奏光緒三十年練兵處會同兵部奏陸軍學堂辦法聲明常備兵額約需三十六鎮見在陸軍人材缺乏准於各項正課學堂外由部專設陸軍速成學堂明定各省學額按年考收二年半畢業以期三五年後造成多數初級軍官俾供軍隊任使應即以各班學生畢業回省之日爲該省新軍陸續添練之期計應編之三十六鎮惟近畿之數較多其餘均按各省情形分別編配仍核明該省額設鎮數已編兵數及應行添練多寡分定年限統於限內一律編練足額謹將所擬章程繕單呈覽

又荊州將軍松淮等奏光緒三十二年荊州開辦陸軍小學堂定額九十名並經部頒奏定學堂章程一本堂舍圖式一分飭令遵章開辦照式建造因旗營向來不能籌款一時未能按格修造是以暫就新軍營內隨營學堂稍加擴充遵章挑選合格兵丁三十名權行試辦開學日期暨籌撥經費奏咨在案嗣因

添招二班學生營中地勢有限禮堂講堂暨各種室舍均不完全亟宜按照圖式修葺當經咨商大學士前湖廣總督臣張之洞由省籌撥銀一萬兩解荆以資修建見在工程完竣二班學生均已按格招齊與第一年學生分班授課即於八月開學

三十四年陸軍部奏定軍醫馬醫經理各學堂畢業生擬照章補官凡考列上等者准補同副軍校中等者准補同協軍校

又伊犁將軍長庚奏設伊犁武備速成學堂兼弁目學堂挑選伊犁兩滿營錫伯索倫等營學生一百名學兵三百名先教以普通軍事學次教以步馬

輻各科專門兵學期以二年畢業已於九月開學

又直隸提督馬玉崑片奏才捐廉提倡創設武衛左軍隨營學堂一所借本軍講武公所原有房屋開辦就各營弁勇內挑考學兵一百名入堂肄習軍事初級科學以二年半爲畢業期限一切教授諸法按照陸軍部奏定陸軍速成學堂章程辦理所需各項教員擬呈陸軍部分別調用堂中額支活支各費悉由本軍自籌不請部款將來該學兵等畢業之後如果確有成效再由才咨送保定陸軍速成學堂加習功課六個月照章轉請陸軍部考驗給憑發回本軍酌量錄用其辦事尤爲出力之員並擬援案請獎

又駐藏辦事大臣聯豫奏西藏先設陸軍小學堂暨速成科咨調四川武備將弁兩學堂畢業生計十四人見俱抵藏擬先設一陸軍小學堂就制營及衛隊中兵弁選其年少識字而聰敏者約得二十餘人並調漢屬之達木三十九族十人歲番十人又廓爾喀亦求送四人一同入堂肄業才擬定爲速成科一年畢業使各人略明戰術於邊境不無裨益一俟前調之徐方詔到藏即當督飭該員及各畢業生先練一營將來若能添練則隊長排長亦可敷用至於印書局之經費仍由藏中籌畫無煩公帑其陸軍小學堂擬將舊有扎什城之演武廳稍加修葺可爲教習等寢室再於東西兩旁添造講堂及學生寢室食堂等屋核實計算修建房屋購置各種器械以及學生之火食操衣等統計約不過數千金擬由新撥款項下開支將來再行開列清冊送部核銷

又東三省總督徐世昌等奏擬設東三省憲兵學堂並訂試辦章程誠以練兵之道固貴乎紀律之嚴明紀律所存尤貴有隨時之糾察蓋無紀律則威令無自而伸無糾察則紀律亦有時而墜此東西各國軍事警察之制所由設也中國新練軍隊教育既未嘗普及程度即不免參差使無法律以相維持誠恐私怨睚眦不免血氣匹夫之勇而軍人之資格又非尋常警察所能干涉見在日俄兵隊均設有憲兵以爲糾察軍人實行保護之計而我國尙無此項預備遇事無所遵循於軍事尤多缺陷等再四籌維自應設立憲兵主掌軍事警察凡關涉軍紀風紀職務履行隨時皆得任其檢閱庶可以肅觀瞻而嚴節制惟是此項兵弁斷非僅諸操練未嘗學問之士所能自非籌立學堂不足以資造就等因於本省舊有之練兵公所房屋修葺改設並遴選監督教習執事等員由調東第三鎮第一第二兩混成協去歲奉天新編步隊一標附職隊一營吉林原有步隊一協各營內挑選下級官長及優等目兵分爲正副兩課正課定額二十名以下級官長充之名爲學弁副課定額二百名以優等目兵充之名曰學兵各帶原薪原餉入堂肄業學期暫定一年畢業惟奉省見在百物昂貴日用維艱擬將學員月加津貼銀各一兩五錢學兵月加津貼銀各一兩以示體恤

又奏遵章設立東三省講武堂並酌擬試辦章程查東省陸軍除由關內調來一鎮兩混成協之外吉林原有步隊一協奉天續成步隊一標職隊一營綜計大小官長爲數漸多程度差等不同若欲妥籌畫一之規舍創立講武堂無從入手況三省防軍新經編練各營將領尤少深諳兵學之人亦必須宏教育之方爲他日改編之計等公議東三省軍政貴乎純一而講武堂課程重在整齊必須三省合力經營方可易於收效故去年設立督練處時即以奉天陸軍小學堂房舍勻借爲籌設三省講武堂之所酌聘教員分訂功課輪調各軍官長到堂講習兼酌調防營將士隨同授學以冀進步而示觀摩本擬擇購局勢合宜之地另建房舍以規久遠嗣因地基價值與估修房屋工料等費需款過鉅籌措維艱不得不暫事權宜遂將奉天省城東門外營房重加修理並添造

堂舍九十八間共計三百八十八間暫作開辦該堂之地惟是講武堂各省雖多設立而定章尙未頒行所有該堂經費課程必須釐定備章暫行遵守伏查講武堂由北洋首先遵章設立規模有可取材並陸軍部所定他項學堂章程亦可用爲比擬謹督飭在事各員擬訂東三省講武堂暫行章程三十六條繕單呈覽惟是東省地居邊徼物力奇艱所有開辦以及常年各費難與內省相提並論計開辦一切購置器具圖書修造房屋約共用藩平銀六萬五千餘兩均係格外樽節省無可省之款此項銀兩業由奉天度支司於京部協濟銜餘項下騰挪動用應准作正開銷其常年額支活支經費擬由三省共籌均按照學員額數暫仿天津講武堂辦法並體察東省物價情形分別辦理核實具報其吉林講武堂已飭停辦以一事權再等所擬係屬暫行章程一俟陸軍部頒有定章再當遵照參核更正又講武堂應行附設之學兵營見亦籌設合併陳明

又陸軍部奏等派員考查各省陸軍小學共計十一省一駐防舉凡章制之奉行職員之任事學生之功課衛生之講求學舍之建築軍械之保存經費之籌備以江蘇直隸兩省爲優山西荆州山東江西四川雲南湖南貴州等省旗次之陝西河南兩省又次之惟優者究不無小疵次者亦仍有可取而重視軍學力求進步則各省旗所同當經等飭司將改良之法分別開單咨令各該省旗將軍督撫督飭切實遵辦在案竊維陸軍小學堂爲造就軍官始基將來遞升入中學堂及兵官學堂全國將校皆求材於此倘辦理未遵完備則異日成效難期關礙軍事殊非淺鮮茲謹分別列表擬請飭各將軍督撫按照部前咨改良各節嚴飭在事人員實力遵行

又湖廣總督陳夔龍奏准部咨前督臣所辦陸軍小學堂造端宏大具有成規惟與部章尙未盡符應改名爲陸軍特別小學堂再按定章另設陸軍小學堂一所所以資兩利當將陸軍小學堂改爲陸軍特別小學堂咨部在案一面即按照部章另設陸軍小學堂一所查有荊州駐防正藍旗滿洲協領恆齡才具優長辦事實心檄調來省充當該堂總辦並以督練公所兵備處總辦候選知

縣鐵忠夙精兵學趨公勤慎兼充該堂監督堂內各員應領薪水照章開支見已將頭班學生招考足額暫借普通學堂校舍開學均遵照陸軍部奏定章程辦理

又駐藏辦事大臣聯豫奏藏中設立漢文傳習所又設印書局一區派滿漢番員會同經理

又錫恆奏辦阿爾泰普通武備各小學堂

東三省政略紀各營教練暨隨營學堂 略稱今之陸軍盡革防陸各營舊習無論鎮協標營各有講堂每日兵丁早晚兩次習操習操之外按三分之一早晚輪班上堂聽講其所習者於常演之械擊技擊攻守援應外凡山川道里紆曲危險之遭際調馬拳旗馳突超距之精神靡不據事實施鼓其勇氣其所講者於應授之槍學圖學兵略戰術外凡古今中外名臣名將之事蹟兼弱攻昧取亂侮亡之往轍靡不反覆剖晰濟其心思而步馬礮工樞五種兵隊復各從其類立專門課程以授之隨營學堂則又專為培成下級官佐之地各就本營設堂遴選識字敏捷之目兵編為學兵其額協選一百二十人標選六十人營選二十人擇下級官佐之曾由學堂畢業者為之教習

設提調一員綜其事學兵入堂三月考試甄別列優等為甲班次為乙班各食原餉每三月考試一次是為季考年終大考參以季考分數分別等次擇尤給賞二年畢業以排長司務長記名升補統陸軍鎮協標營及巡防隊均一律辦理其課目則按學兵程度與駐地所宜擇要分定循序漸進修訂更易又在後之審酌焉

又紀講武堂 略稱東三省之有軍學始於奉天將軍依克唐阿武備學堂之設庚子之役蕩然無存嗣奉吉兩省立速成將弁學堂而學僅普通員數不逾百體式未具初班畢業後裁撤光緒三十三年吉林將軍達桂奏設講武堂於吉林為軍官研習學術之地世昌於是年蒞東遼陸軍部定章創立東三省講武堂於奉天調三省陸防各營將校入堂肄業吉林原有之堂奏明裁併是時堂舍未建假奉天陸軍小學堂以開辦之初設普通科至三十

四年畢業者八十餘人新舍落成另調新學員二百餘人分兩科第一科為新軍官弁暫定額一百名半年畢業每年招集二次由各鎮協標分班輪送第二科為防軍官弁暫定額二百名一年畢業每半年考取一次每次續取一百名由各防營平均攤派更番調選其課目曰學科曰術科學科之目凡十日戰術曰軍制曰兵器曰地形曰築壘曰交通曰衛生曰馬學曰服務制要曰軍用文牘術科之目凡五日各兵科操練曰野操曰劍術曰馬術曰射擊以東西洋戰術戰史日新月異未可株守舊冊復審擇學員程度隨時搜求編譯以資教授而學員程度不齊防營各員尤屬蒙荒初啟未能踴躍而升又就所定課目的量簡易之法需用之馬匹鞍轡等項照購齊備其餘軍械均由東三省軍械局借撥應用不另籌置以節經費云

又紀陸軍小學堂 略稱陸軍小學堂為培成陸軍將校初基經練兵處兵部奏定章程奉天吉林黑龍江於光緒三十二年次第設立考選格式教授課程悉遵部章惟額數奉天初收七十五名吉林一百名黑龍江七十名略有參差是為頭班學生三十四年奉天續招二班宣統元年三省又續招第三班學生黑龍江地居邊遠材多樸陋先後所招各生程度不齊教育殊多窒礙因飭嚴加甄別將班次酌量升降擇其資質靈敏確有一年以上程度者作為頭班次者作為二班最下者革除以便齊一教育吉林頭班各生間有年齒稍長不盡合格者畢業後礙難升送中學將來或於最後學期內另送軍事學堂再加深造俾免向隅至堂內各科課程均照章豫定三年等次各項講義及每星期課程各由本科教員編纂先期呈由總辦監督等核定所用課本更飭教員就各項課目中擇尤編輯以為啟迪之資總期循序而進毋躐等毋延忘其所以備干城而明武義者固無取夫赴赴之野夫也

又紀憲兵學堂 略稱憲兵者所以主掌軍事警察兼為地方警察之輔助東三省陸軍新立外軍來者日眾非嚴其糾察不足以肅軍容則憲兵之設不可緩而憲兵職守之重條規之密固非教之於先不能恃以為用尤非深明軍法理與巡警法國際公法融會而貫通之不能措施悉當則設學堂

以養成憲兵人材爲益亟矣北洋先已設立東三省略仿其規於光緒三十三年立憲兵學堂於奉天就各鎮協標營遴選下級官長二十員優等目兵二百名入堂肄業三十四年畢業編爲憲兵第一營分撥三省是年續選優等目兵二百名爲第二班以五十名爲一區計分四區其教授約束之法均如初制約計二班畢業後人數足以敷用此堂即可停辦或裁汰員司減收學兵改爲憲兵傳習所以備隨時補充至堂中所授教科書如陸海軍刑法治罪法野外勤務均北洋憲兵學堂日本繙譯官金政德所編繙譯員石靈所譯雖係善本而閒有繁冗處因飭教員參酌修改一以文字簡明義理通達教者易於講解學者易於領會爲主北洋課程無外事警察刑事偵探東三省外軍紛糾憲兵職務難保無與外人交涉此又未可忽者頭班學科未臻完備見於二班添授此兩門俾研習精熟以維持平和秩序

皇朝續文獻通考卷一百一十一

學校考十八 學堂

宣統元年新疆巡撫聯魁奏新疆遵設陸軍小學堂自應遵照奏定章程辦理惟新省邊遠與內地情形難以強同不能酌量變通如定章陸軍學生應由各州縣高等小學堂按格挑選新疆漢民居十之七蒙哈布同居十之二漢民僅十之一回纏迷信宗教不樂讀書漢民皆僑商無志進取各屬小學堂甫經開辦尙無程度較優之學生可以選送是以前次考取各生無論土著客籍但有年齡體質合格曾經讀書識字之子弟即從寬收錄照章新省每年應收學生七十名三年應收學生二百一十名上年開辦之初自秋迄冬幾經搜羅始收七十名之額本年暑假後即應續收第二班除由省城招考外復經通飭各屬一體挑選計申送者間有一二而以無人應選申覆者居多蓋風氣未開視嚮學爲畏途勢難強迫見在二班收考久已逾期應者寥寥將來合之第三班能否湊足七十名尙不可知陸軍小學堂功課係屬普通必中學先有根柢乃可徐求進步新疆陸軍學堂各生就地取材國文既未明通則於奧地歷史兵學格致及外國語文斷難一律依限畢業體察情形必須各屬小學堂辦有成效而後照章挑選乃有合格之學生至開支一切經費新疆係受協省分尙未籌有的款暫由司庫撥用不能不量加撙節通計第一年年額支經費合委員教習薪水學生伙食津貼及各項人役工食實需湘平銀一萬四千四百五十八兩其餘建築齊舍購置圖書器藥物藥品等項尙不在內至邊地學生甚少自應略爲變通任缺毋濫見仍飭隨時收考如一時實難足額俟各屬小學堂辦有成效再行按格挑選補足

以立基礎其開辦及常年各經費均由軍界人等提倡捐集嗣後如果建築房舍添購圖書需費過多不敷支給自應酌撥官款以資補助而圖擴充

又浙江巡撫增韞奏設陸軍小學堂暫就原有武備學堂酌量改設該堂學生於光緒三十三年畢業即行停止所有經費堂舍器具悉數移作陸軍小學堂之用其第一期學生業經各州縣按格選送考取正額學生七十名附課學生二十名復於三十四年添籌經費續招二班取定正額生七十名附課生十八名一律進堂肄業本年尙須照章添招第三班學生所有需用款項將來統歸釐餉局列案造銷

又軍諮處奏軍官學員續選辦法略稱查該堂學員定章由成軍各鎮選送用人之途不免稍隘見擬推廣由京外各軍隊及陸軍各局處堂所之軍官內挑取定額爲一百二十員惟應考人員均須在本國武備學堂及其相當之各學堂畢業或在東西各國士官學堂畢業均領有文憑品行純正者方可與選至該堂向分速成深造兩科速成科一年半畢業深造科三年畢業竊以該堂原爲造就高級軍官之所精深之旨似非短少日期所能研究此後該堂學員擬仍分兩班概限以三年畢業以昭畫一

又護理兩江總督樊增祥奏江南水師學堂本爲培植海軍人才之用宜改爲南洋海軍學堂該堂章程規條暫仍循舊辦理俟將來海軍基礎成立由部擬定海軍畫一章程再行遵辦

又東三省總督錫良奏中學以上學堂兵式體操應仿照陸軍教練略稱據諮議局呈稱奉省僻處東陲實行軍國民教育爲計尤急擬將中學以上各學堂酌減隨意科目勻出時間加授軍學戰術又定章所授兵式體操應仿照陸軍實行教練並習打靶以期養成軍人之能力藉振尚武之精神事關變通定章應請奏咨辦理學堂教授之要著原以德育智育體育三者並重今中學以上各校體操一門均習兵式而比之陸軍教練相去懸殊不足以養成果毅堅卓之人才應請准如所議量予變通定章實習打靶

又御史溫肅奏東三省總督錫良奏請奉省中學以上學堂兵式體操仿照陸

軍教練用意至爲深遠吾國積弱之故實由文武分途此議若通行各省三年之中可得十萬將官弁目之才自強要圖莫切於此請 飭學部將隨意科刪減而增多兵式體操鐘點並安定打靶章程刻日頒行庶復文武合一之規且成舉國皆兵之效

又陸軍大臣蔭昌等奏請飭明訂軍國民教育東西列邦立國多用軍國主義德以軍國民政策雄視歐西日本以武士道訓其國人稱霸東亞其餘各國皆以重兵尙武列爲學堂普通科學是故國民勇健奮發早養成其英銳不屈之精神等語參戎政慨念時艱以爲欲激勵國民尙武之思唯有採取東西洋教授成法各普通文學堂課程悉令注重軍國民教育詳慎編訂俾朝夕提警深入人心將來培養陸海軍人自當收事半功倍之效除陸海軍學堂課程由臣部遵照訂定外其京外普通各文學堂課本規則請 飭學部按照軍國民教育宗旨特爲編訂隨時商由 臣部審酌參定再行頒發一體通用以振積弱而圖自強

又陸軍部奏考試江南陸師等學堂畢業生照章補官摺略稱查上年迭准兩江總督咨送江南陸師學堂第四期各科三等畢業學生一百十五名蘇撫咨送江蘇陸軍速成學堂步兵科三等畢業生六十名來京考驗經 臣部先後派員照章分場考試均按所習分學術兩科各依門類詳加考驗除因病未能入考者外其餘各生均經核定分數分起發往近畿直隸各鎮試充軍職嗣見習期滿據各該鎮統制官將該生等在軍隊見習分數列表申送到部復經 臣等各按學科術科試充軍職三項彙核分數列定等第並傳集各該生面加訓勉按名發給執照各在案查定章各省陸軍學堂畢業者爲三等畢業生考列上等准補副軍校中等准補協軍校歷經遵照辦理又上年軍諮處奏定嗣後陸軍官佐應按所習科目冠以陸軍某隊字樣等語此次考試江南江蘇陸軍學生係在該省學堂畢業應作三等畢業生計江南陸師學堂考列上等李文匯等五十四名中等廖秩晉等五十九名江蘇陸軍速成學堂考列上等倪天爵等十六名中等徐潮等四十四名謹照章按科分擬應補各隊官階繕單呈

覽

又署兩廣總督袁樹勛奏廣東歷年籌辦陸軍警察學習所續招新班略稱見復挑選入營二年以上兵士六十名直從本科入手縮短學期限以一年畢業並擬擴充房舍陸續招足學兵一百四十名以備成鎮時一營兩隊之用惟警察學習所第一二屆辦法第一隊成立之時係因暫行試辦章程規則均未組織完備是以未經咨部立案見在學兵入所學習業已辦至三屆警察營隊亦已成立自應參酌各省成法分別訂章以資遵守

又涼州副都統恩志奏整頓涼防軍營隊略稱查滿營經前副都統 臣玉崑奏設陸軍靖遠步隊一營額定官弁兵夫計六百五十一員名數年訓練雖略具規模惟管帶各官皆係協佐兼充戰法不知講求教習仍自本營揀選操課更有所未諳以致步伐多未整齊精神尤形散漫見擬嚴加淘汰去弱留強其中不及格者另行挑選補充期歸一律至應習操法戰術均照陸軍部所訂新章分門教授由淺及深必先開其智識增其材力日異月新以振尙武精神並仿北洋講武堂章程設一兵學研究所俾管帶以下各官佐輪流入所研究新理新學

又陸軍部奏擬訂陸軍警察學堂暫行辦法暨學員授職章程竊 臣部於九月附奏游學陸軍警察經理等科畢業生考試授官辦法片內聲明中國自設之陸軍警察等學堂容另擬具奏在案查陸軍警察專司監視軍人維持軍紀關係至鉅而責任至嚴 臣部管轄之陸軍警察學堂卽爲造就該隊官長之地所有員生資格必須認真遴選始能收成效於將來故專由各省調取陸軍學堂畢業會授軍職人員及各軍隊中學術最優之下級官長入堂肄習授以警察專科卒業後分派各省編練警察隊稽查軍紀報告 臣部藉資改良惟各省軍隊駐紮之區既由 臣部分設警察隊則此項學堂卽應歸 臣部直轄辦理各省毋庸設立以免教育紛歧此擬訂陸軍警察學堂辦法之大概也至於軍官執掌各有專司步馬各科均按其所學分別任差軍諮處奏定陸軍人員補官章程中等以下各官均於官名上冠以某隊字樣其附表內列有陸軍警察隊等

官警察學堂學員其由他項陸軍學堂畢業者曾補各科軍官此次既調歸警察隊自應改屬各科以明職守所有已補軍官之學員擬請按其畢業試驗等第以警察隊應升之階分別照章擢補其由各領選錄之下級官長未經授職者擬請援照陸軍速成學堂辦法按其考試等第以警察隊副協軍校由部奏明補用此擬訂學員授職章程之大概也更有請者陸軍警察為軍隊之楷模今日學校之員生即他日營隊之官長一切教育必須加意整頓以端表率而勵人材部此項學堂係由前北洋憲兵學堂接辦章程規則應加釐正者尚多

又 諭御史廣德奏興復海軍亟宜籌設學堂一摺著籌辦海軍大臣知道

又 諭派載濤段祺瑞那晉考試陸軍游學畢業生

又陸軍部奏北洋陸軍講武堂學兵營警察電信各堂隊畢業在事人員請獎辦法竊據前督辦陸軍各項學堂學隊事宜副都統段祺瑞咨稱陸軍講武堂自光緒三十二年五月開辦學兵營於是年閏四月開辦扣至宣統元年六月該堂營員兵畢業之期計講武堂學員前後六班共七百四十員學兵營學兵前後三班共一千一百二十四名憲兵學堂今改名警察學堂於光緒三十一年八月開辦三十二年十二月畢業共學員四十員學兵一百零一名電信學隊於光緒三十一年五月開辦計學員一員學兵八十三名三十三年十二月畢業所有各該堂營隊在事人員按照政務處會同吏部兵部奏定各省武備學堂請獎章程造具履歷分別異常尋常核減請獎復准直隸總督咨同前由部具奏各因查北洋講武堂學兵營警察學堂電信學隊畢業員兵人數均屬相符其在事人員任差年分亦均報部有案自應分別核辦惟部辦理學堂保案向以政務處奏定武備學堂獎章為衡此次講武堂學兵營畢業各班員兵實係額多期短三年之閒積累而成與他項學堂學生不同是以成就獨多若仍援照定章以畢業人數在六七十人以上核算給獎未免漫無區別雖經該前督辦減額列保究屬為數尚多而各該員始終勤奮自應明定辦法酌加獎勵擬請將講武堂學兵營人員任學已滿三年成就學員在六百名以

上學兵在一千名以上擇尤分獎異常二員尋常十二員以示變通而昭限制至警察學堂電信學隊造就員兵與講武堂學兵營有別其成就人數本無庸一律扣算惟該堂隊頭班員兵畢業其中任差各員均尚未滿三年與歷辦成案不符此次礙難給予獎敘見查各該員任事出力率已留差接辦應俟下屆畢業併案核議

三年陸軍部奏查光緒三十年政務處會同吏部兵部奏定武備學堂在事人員請獎章程內開各省武備學堂均應俟學生畢業成就在六七十人以上咨送到京考驗相符方准請獎每案文武併保不得過十六員尤為出力者准照異常勞績酌保二三員其餘均按尋常勞績給獎其在事人員先期咨部立案並於開保時敘明各該員在堂年分造冊咨部歷經遵辦在案惟定章之初因各省武備學堂未經普設成就人材為數無多不得不寬予限制以策方來見在各省陸軍中小學堂以及各項武備學堂漸次成立學生畢業每案不下數百人在堂出力人員若照向章給獎年限既無一定獎額亦覺太多殊不足以昭核實自應因時制宜嚴加核定除向章所定立案考驗各節仍照辦理外謹按政務處會奏武備學堂請獎章程及學部奏定學務綱要內載學務員紳保獎章程酌酌損益釐訂暫行章程七條繕單呈覽

又軍諮處奏處自接收軍官學堂以來於該堂舊日規模再為擴充其一切應行改良之處亦隨時悉心妥籌飭該堂人員切實辦理惟查該堂原為籌辦陸軍大學堂基礎名為軍官學堂似於設學本意尚有未符且與陸軍部所設之兵官學堂名目亦嫌相混等公商擬改為陸軍預備大學堂以示區別而符名實復將章程課程重加修改以儲高等將領之材而為將來陸軍大學之基礎一俟兵官學堂各項專門學堂學生畢業堪充陸軍大學學員之時再行奏明改為正式之陸軍大學堂庶可循序遞進以免尙虛名而無實際又該堂從前學員畢業係由部派員考試後會同陸軍部奏請分別給獎查部處測繪學堂畢業會奏請 欽派大臣蒞堂考試給予舉人貢生等出身軍官學堂為造就高等將材之地自較測繪尤為重要擬請仿照辦理

右武學

光緒三十四年民政部奏定巡警學堂章程略稱各省舉辦巡警學堂直隸首設四川繼之奉天山西等省設立學堂者計有二十餘處查閱所擬章程編制課程多未一律自應擬定章程通行各省俾資遵守當就京師見辦高等巡警學堂辦法參之各省奏明章程詳為核擬所有各省會未經設立者限三箇月內設立已設者應按照此次奏明章程更定並令一律更名高等巡警學堂至各府廳州縣應設教練所當由各督撫督同地方官按章設立以臻完密宣統元年雲貴總督錫良奏略稱滇省警察學堂前督臣丁振鐸奏明在案查原設學堂專係造就警官因於省城設立巡警營挑選士著良民及原設警兵電調四川得力警員來滇管帶教練畢業之後分段站崗巡查警兵程度太低將原設警察學堂停辦改巡警營為警士學堂提高資格於是投考者類皆文理通順之人省城內外畫分九區區設巡官二員司法一員庶務長一員又分設派出所六十三處每所用長巡六名即以畢業警士派充各該警士分區當值之後多能勤供職務掃除積習頓改舊觀因將省城所設警士學堂改為高等巡警學堂另行設立教練所招選學生以備巡警之用滇省風氣未開不能不略寬成格稍展限期見有警官不敷派用擬先辦高等巡警學堂應行附設之簡易科暫定學額五十名俟選有能合高等程度之人再行開辦三年畢業之完全科至於省城巡警見在警士學堂二班學生亦經畢業合之頭班僅共四百八十餘名人數無多若待新設教練所畢業實屬緩不濟急擬請於省城教練所招足百名先開一班暫以六個月畢業以後即行遵章辦理惟省外各廳州縣財用拮据有不能不量予變通者滇本瘠區經費竭蹶擬請於各府直隸州先設教練一處調集所屬合格學生教練其直隸廳即酌量送至附近府州附習開辦之始亦請暫勿拘定一年畢業之限俾得因地制宜以廣造就又山東巡撫袁樹勛奏東省高等巡警學堂照見行章程分為正科簡易兩班並在省城先設巡警教練所一處

又兩廣總督張人駿奏設省城高等巡警學堂略稱粵省經前督臣岑春煊飭設警察學堂維時前巡警局以警務需才先開速成科定六閱月畢業業將各該生分別考試給予文憑嗣該局續辦高等中等兩科參酌南北洋巡警學堂章程先就速成科畢業生挑選百名為初等畢業補習班另招本省官紳二百名為新班復招選自費生兩班綜計高等科中等科已於三十三年開學迨上年准民政部奏定各省巡警學堂章程分兩種一高等巡警學堂各省城須設一處一巡警教練所各府廳州縣須設一處又高等巡警學堂得附設簡易科據該學堂將章程學科遵章更正查該堂高等科原定三年畢業與定章合其原定中等科二年畢業者定章所無即改為簡易科一年畢業特該生等入學已及一年而證以部定課程不免互有同異見擬略為變通俾再補習一學期冀符程度此外一切辦法與新章相同所有考取高等科各生均係貢監生員已備中學資格者仍當督同該道飭該監督教習等各勤厥職教授務在精詳考校務臻嚴密以成就完全警察之人才至府廳州縣應設巡警教練所已令趕速設立一律核辦

又直隸總督楊士驤奏遵章改設巡警學堂暨各屬設立巡警教練所略稱天津巡警學堂名曰北洋高等巡警學堂學員以二年畢業學兵以一年畢業省城巡警學堂分高等普通兩班用速成教法高等學生一年畢業普通學生六箇月畢業即以學資高下派充各廳州縣教員巡官區長等差見查畢業學生暫可敷用即飭寬定學期俾資深造當於省城天津各學堂添設完全高等警察一班定期四年畢業此後應遵章將限期課程一律更定其各廳州縣向設巡警傳習所改為教練所應習科學及畢業限期亦一律遵辦

又四川總督趙爾巽奏設高等巡警學堂略稱警學為內治樞紐川省警務需人孔多光緒二十八年冬前督臣岑春煊奏設警務學堂挑選文武員弁入堂肆習期在造就速成警員旋定為一年畢業茲設高等巡警學堂擬即就警務學堂遵章改設查章程高等學生以本省舉貢生員及曾在中學堂以上畢業者考選蓋恐入學之程度弗高即警學之精微莫究第各屬中學畢業學生尙少勢未能應額以待即舉貢生員向於各種科學未經研究亦虞陶冶積時查

川省紳班法政學堂其學生皆本省舉貢生員其素習科學亦與高等巡警學科大半相同見查該堂學生具有兩年成績自願改習高等巡警者殊不乏人擬即考選此項學生作為高等巡警學生限一年內將部定高等巡警學堂三年學科一律補習完竣按照高等本科三年畢業辦法一轉移間即獲完全警才並與部定三年學級仍相符合嗣後如有中學畢業之人再遵章辦理

又浙江巡撫端方奏省設立高等巡警學堂仍於該堂附設巡警教練所又東三省總督錫良吉林巡撫陳昭常奏遵章改設高等巡警學堂及教練所略稱吉省經前將軍達桂奏設巡警學堂一所維時需材孔亟先開簡易科分爲學員學生兩班以期畢業後分充警官警兵之用迄今三年先後畢業分發任使先是簡易科畢業後曾開完全一科增訂課程兩年畢業業臻完備適奉部頒章程所有省城應設之高等巡警學堂應即以舊有巡警學堂改設惟定章高等巡警學堂應以本省舉貢生員及中學以上畢業學生考選吉省地處邊陲開化較晚此項合格學生驟難招集再四酌核即就完全科學員改爲高等班學生按照部定課目教授三年畢業如此變通辦理庶於部定章程與本省情形兩無違礙其原有之簡易科本爲急培警政人材起見仍應附設即改稱爲教練所俾廣造就而資任用至府廳州縣應設之教練所業已遵辦

又閩浙總督松壽奏閩省改設高等巡警學堂略稱閩省警察學堂光緒三十二年開辦當時分高等普通兩班先後畢業旋因警務改良需才孔亟經該堂另招巡士學生先後招考四期教授畢業送警務局分派省會城廂各處站崗因查北洋警察著有成績又酌派高等普通兩班畢業生前往京津一帶參觀回閩分別委派教練所充當教習警務所充當課員巡長暨分派各府縣充當教習其前經派赴日本學習警察學生先後畢業歸國分別留堂送局委用三十四年續招第二期普通科學生適奉部頒章程所有省城應設之高等巡警學堂自宜即以原有警察學堂改設隨招考高等學生以三年畢業先將第二期之普通科學生改爲簡易科學生各項科學均按新章教授開亦有參酌情

形略爲變通者閩省各府語言互異於警政上殊形未便特添設國語一科又本國法律警務學生所當共曉高等科科學既有律例一門而簡易科亟應增入較爲完備至省會應設教練所若由府縣分設需費較繁業經附設該堂教練以省糜費

又廣西巡撫張鳴岐奏籌辦巡警並酌量變通高等巡警學堂略稱桂省籌辦巡警自應從籌款培才入手培才之法則遵章趕辦高等巡警學堂及巡警教練所是矣籌款之法則擬學堂經費及省城巡警經費省城巡警教練所經費均由公家任之各屬巡警及巡警教練所經費應令就地自籌不得請撥公款而各屬向有仰給公款者亦飭一律停支至查照部章有應變通者三事一部章指定教授英文或東文查桂省緊接越南邊界綿長至一千九百里國際警察尤關緊要需用法文之處較英文東文爲多所有外國文一科擬即改授法文以資實用此應請變通者一也一部章高等巡警學堂學生以本省舉貢生員及曾在中學堂以上畢業者考選查桂省舉貢生員經歷年辦學考職及考優拔搜羅殆盡各屬中學堂見時尙無畢業之人似不得不於入學資格中加

入一條凡有與中學程度相當無論本省外省均許考選以期足額此應請變通者又一也一部章每廳州縣應設一巡警教練所每所名額至少百人爲力求完備計此數本不爲多惟查每百名之教練所年需經費至少亦約七八千元廣西地方貧瘠異常一屬能歲籌常費七八千元者實難多覓九年以內如籌辦自治推廣教育等事均係憲政要端無一不需經費正當留其餘力俾各項要政得以平均發達且查民政部奏定逐年籌辦巡警期限各城治巡警限於宣統二年辦齊各鄉鎮巡警限於宣統三年後陸續成立是第一期所應籌辦者僅以廳州縣之城治爲範圍桂省各廳州縣多半山城斗大百名巡警亦覺供過於求體察各屬貧富衝僻情形擬區爲五等第一等省城及有商埠之廳州縣定額百五十名第二等定額百名第三等定額八十名第四等定額五十名第五等定額三十名其名額較多財力較足者令其遵照部章自設一教練所其名額較少財力較艱者令其合數屬共設一教練所通計全省共

設教練所十四處俟第一期畢業後仍按屬派定名額令其廣續辦理以爲設立城鎮巡警之豫備如此分期教練合併設所要政不致延誤民力亦可稍紓此應請變通者又一也見在高等巡警學堂正在建築約九月竣工即將高等簡易兩科同時開辦各處巡警教練所亦飭限八月開辦

又山西巡撫寶棻奏遵章改設高等巡警學堂

又甘肅新疆巡撫聯魁奏設高等巡警學堂并簡易科

二年安徽巡撫朱家寶奏開辦高等巡警學堂

又陝甘總督長庚奏設高等巡警學堂統籌全省警政情形略稱遵照民政部咨行巡警學堂章程先於省城建立高等巡警學堂通飭各屬選送學生復由本省候補同通州縣佐雜等官考取文理通順年力富強者四十員先辦簡易科以一年畢業派充省城總分各局警員及發往各屬充當教練所教習其學堂辦事員及各科教習均於省城官紳中選有警務經驗及曾在東南等省與日本肄習警察畢業學生承充並擬於巡警學堂內附設城關巡警教練所由各局巡兵中酌提四十人入所肄習不約定一年畢業之期此因甘省財力維艱急爲目前粗具規模而設必欲研究警學則警官應接辦三年高等之完全科城關巡警應有一年畢業之教練資格仍當接續籌辦輪班補習以期完備其各廳州縣之應設教練所亦飭遵章籌辦統限年內將一切辦法教練人數出入經費詳細列表申報此統籌全省警學之實在情形也至於全省警政頭緒紛繁擬就總局改照警務公所辦法設總務行政司法衛生四科酌派科長二員科員八員分理其事庶幾綱舉目張責無旁貸臬司陳燦兼充警局督辦所詳各節尚有條理 臣飭該司將所設高等學堂務遵民政部頒發章程慎選教習俾宏造就

又民政部會奏酌擬巡警學堂教授管理各員獎勵辦法略稱 臣部奏設京師高等巡警學堂及督催各省照章設立省城高等巡警學堂並優與學生獎勵等給出身送經奏明在案惟教授管理各員應如何獎勵尙無定章前以創辦之初各省於學生畢業獎勵之時有將辦學人員臚列陳績隨案奏保者率皆

酌核情形分別辦理見在警政推行日廣各省巡警學堂大都依限成立將來警學日興辦學獎案自必不可少不得不籌畫一辦法以示實事求是慎重器之意擬請京師及各省辦理巡警學堂出力人員獎勵查照學部成案凡教授管理三年以上確有成效者按尋常勞績請獎其五年以上者照異常給獎至各省辦理學堂人員應由督撫預將履歷清冊送部立案

右巡警學堂

皇朝續文獻通考卷一百二十一

學校考十九 學堂 實業 財政附 交通附

光緒三十年 諭商部奏浙紳所建農工小學堂收教墮民懇恩除籍浙江墮民雍正年間已准除籍自乾隆年間議准本身改業下逮四世清白自守者准其報捐應試見在該紳議設農工小學堂俾營實業以廣造就著照所請至畢業後應如何給予出身著學務大臣查照辦理

三十一年江准巡撫恩壽奏准籌改江北實業學堂

又署貴州巡撫林紹年奏准於貴州省城設立蠶桑學堂

又商部奏學務處會同 戶部議覆御史王金鎔奏請添設藝徒及初等中等各學堂略稱京師各項中小學堂建設尙少貧民子弟未能普及教育工藝一無所能遂至窘於生計該御史注重工業為教育貧民子弟起見自應次第

興辦雖查奏定學堂章程工業祇有高等中等而無初等蓋以初等工業即包括藝徒學堂之內 戶部上年奏設高等實業學堂而中等及藝徒學堂限於款

項未能同時並舉飭 部右丞紹英悉心籌議據稱藝徒學堂擬即作為初等

工業學堂附屬高等實業學堂內辦理考取藝徒分科教授並於其中遴選聰

穎藝徒二十名資遣北洋等處工廠學習學成調回備充班長教授藝徒尤有

裨益其中等工業學堂遵章由各處高等小學堂咨取考驗合格學生所籌辦

法尙屬周妥見在紹英派赴外洋考察政治 等飭該員將各國工業學校規

則詳細調查俟回京時再行酌擬章程以期周備

三十二年商部奏籌辦藝徒學堂酌擬簡明章程略稱此項學堂注重工業以

教育貧民子弟造就良善工匠為宗旨既蒙 特頒帑項自應妥籌興辦見據

左丞紹英酌擬藝徒學堂簡明章程十五條查閱所擬辦法如暫招藝徒三百

人分爲速成完全兩科速成科注重實習半年至二年畢業完全科學理實習

並重三年至四年畢業又教授課目亦分通修專修兩科通修科分修身算法

博物理化歷史圖畫體操國文唱歌習字十門專修科分金工木工漆工染織

密業文具六門分別速成完全兩科酌定肄習課目他如教員管理各項規則

均遵奏定章程並參考日本工業學校規則酌訂

又學部通行各省舉辦實業學堂略稱教育大旨厥有二端曰高等教育所

以培養人才曰普通教育所以陶鑄國民曰實業教育所以振興農工商諸

實政教養相資富強可致中國地利未盡工藝未精商業未盛推求其故由

於無學本年奉 諭明示教育宗旨以務講求農工商各科實業詔告海內

查奏定章程學務綱要中有各省宜速設實業學堂之條高等中等初等農

工商實業學堂實業補習學堂藝徒學堂皆經分別訂有章程又訂有實業

教員講習所章程並於初級師範學堂章程內訂有農工商各科課程爲此

通行各省一律籌設各項實業學堂按照地方情形先設中等初等實業學

堂及實業補習普通學堂此外尤應多設藝徒學堂招收貧民子弟課以粗

淺藝術俾得有謀生之資應轉飭各府廳州縣無論城鄉市鎮皆酌量籌設

預備教員尤關重要應於各省城先立實業教員講習所漸次推行飭各府

廳州縣設法分立以廣師資至初級師範學堂農工商諸科原係酌量加習

今擬改爲必修科令師範學生各自認習一科亦可備將來初等實業學堂

實業補習普通學堂藝徒學堂教員之選

又奏明湘省民立學堂增設高等商業略稱湖南京外紳士於光緒二十九年

議立民立普通學堂一所曰明德學堂由原任刑部左侍郎龍湛霖首出私財

獨力倡建學生潛心向學成就可期因集眾議擬增設商業專科以廣造就查

日本慶應義塾係以民立學堂自小學以迄專門無所不備而學科注重商業

實爲商業學堂擬即仿照辦理特開高等商業專科仍附設中學小學並擬增

設商業教員養成所以儲師資開辦商品陳設館以資商界之考察再明德學

堂經升任巡撫端方批准由善後局每月籌撥銀七百兩見擬增設商業專科

爲費甚大懇照月撥官款成案咨行湖南巡撫每月加撥銀三百兩爲增設商

業專科之費 等詳核所呈均係實情伏思言教育者必曰普及而官力有限

非多設民立學堂萬難普遍未設者亟應竭力提倡已設者尤當加意維持興

學之責官紳共之湘省明德學堂成效昭著久爲各省所稱道茲擬添設高等

商業專科以爲普通畢業學生升入之所辦法具有條理應由臣部咨行湖南巡撫照案補助俾資擴充

又咨院撫恩銘實業豫科學堂應增科目略稱皖省開辦農工實業豫科學堂遵照奏定章程辦理其注重理科之處亦屬切實可行惟定章實業豫科學堂課程有修身及中國文學二科該堂未經列入事爲定章所關且爲國本所係應即增訂以期完備又英語東語兩科兼習深恐多而不精應令先習一國語言文字俟其有成再行兼習

又御史王步瀛奏請飭辦河北實業學堂略稱大江以南各省提倡實業湘鐵鄂鐵大著成效閩浙粵贛皆有多數學生留學各國路礦此外若湖南奏設實業學堂湖北創設兵工廠江南製造局附設學堂海州實業附設學堂上海商部實業學堂類皆痛念危局亟圖補救惟瀕黃河諸省寂然無聞長此貧弱何以善後爲今之計惟有會同直隸山西山東河南陝西五省速在河北合立一實業學堂直隸督臣袁世凱以之辦理此事必可成效在握况法政學堂曾經

直隸督臣奏准山東山西河南陝西等省舉貢肄業應請援照成案統籌大局與辦實業謹臚舉六條一曰擇地查河南懷慶府地方水土甚美氣候溫和以言交通則南瀕河流直達黃海且爲運河鐵路貫穿繁澗之域其利便特甚以言試驗則西臨太行互數千里森林礦產異常盛旺易於查考以言距離則左齊右秦北連燕晉接壤四省其爲適中之區自昔然也備此三善位置頗宜二曰籌款擬由直督酌提鐵路餘利凡河南以北之鐵路以及汴洛陝西已辦未辦之路綫將來路工告竣凡有餘利可提者均酌提出數成令五省按年撥款協濟不得推諉三曰聘師除算數體操二門中國有人選充外其他學科宜遴聘西人爲是俟各國留學生卒業回國其程度如果足爲師資然後辭退外人以節費用四曰招生由各州縣選送本省再由本省咨送來堂以五省面積之廣欲敷分布至少須足千人至各省咨送之數亦宜分配均勻務使偏僻小縣無不有人肄業爲準方台立學宗旨五曰學科擬分學科爲九學年爲三以二年習普通一算學至代微積二化學至性量分析三博物學四物理學五動植

礦物學六地質文學七英法德語言文學八幾何畫九體操第三年當習實用化學汽機學機械學森林學農學鐵路學礦學電氣學建築學以爲入外國專門學堂之預備六曰畢業學堂課程既已兼營並進三年後實已備高等資格應列其成績咨商學部頒給相當文憑或充本省初等實業學堂義務教習三年或在本省設立各項工廠以開風氣均聽其便若有志趣遠大學力精敏之士當資遣出洋留學以斬大就以上六端如荷 允行從此黃河流域實業發達頡頏東南日臻美善然觀外人之研究實業品彙至不可勝計而可括之以三曰動物曰植物曰礦物更可約之爲二曰有機曰無機其致力之途不外博物物理化學而三學者實以算學爲之基故欲改良工藝必使人人知學唐景星之辦漠河金廠開平煤礦一人之力利賴靡窮近日如唐天佑之辦鐵路各省爭相延致其明效大驗彰彰耳目今若廣招俊又中資者既各拮一藝以導蜚氓上焉者復經練習而蔚爲專家十年以後實業雲興商務日盛而富強如操左券矣

又學部通行各省處輝祖在上海奉天設立科學儀器館並附設理科講習所准予立案略稱理科知識於人生最爲切要爲普通教育所不可缺本部遣派游學應具中學堂畢業程度招中曾聲明中學堂之理化博物等科向多求之外國者尤應力求完備以饜士民求學之心誠以此等學科非及時講究則小學教員之資格必多欠缺國民之普通知識亦難期完備處輝祖創立科學儀器館自製理化器具博物標本既足以補助教育杜塞漏卮而所立理科講習所已畢業五次近更在奉省設分館及理科講習所並擬推行各處以冀理化實學逐漸風行實與本部提倡此學之旨相合應准予立案

又院撫恩銘咨送農工實業豫科略稱農工實業學堂爲研究培植土產原料法及製造土產原料法而設以養實業界之才考日本農業工業學校有豫科有本科有專攻科綜而言之凡關於研究農工實學之材料殆無一不在理科範圍之內今日實業教育急宜講求而高等小學尙乏卒業之人理科既未入

門自宜先設豫科以植實業之基礎按農工諸實業既皆以理科為根據似宜豫科中注重理科乃為切實有用今中國亦競言興實業矣而設一工廠曹達硫酸輒購之於東瀛螺釘機輪更索之於西販鴛於實業之美名而不知講求理科之實學失計莫甚於此見擬就皖省奏設農工實業學堂先設豫科分課物理化學數學動物植物礦物英語東語圖畫體操等科限二年畢業升入本科分習農工本科諸課目限三年畢業屆時或選入專攻科或遣赴東西洋或派充實業公司之技師其在豫科畢業者更可派出為初等中等實業學堂實業補習普通學堂藝徒學堂之講師洵所謂大用則大效小用則小效也

又學部咨度支部籌撥設立農工商各實業學堂款項略稱御史趙啟霖奏請飭學部農工商部合力籌辦京師高等實業學堂令度支部嚴籌大宗款項查實業教育為今日之急務本部體察情形至少宜於京師首先立高等農工商業學堂各一所以為全國模範並附設各項實業教員教習所及農工試驗場以為造就師資及實習應用之地規畫務求精詳課程務求完全惟造端既大需款亦繁見經再三酌核力求樽節擬將高等農業學堂獨設一所高等工商業學堂併設一所統計開辦經費銀四十一萬六千兩常年經費銀二十九萬七千五百兩應請貴部查核如數籌撥以便開辦

又商部奏改南洋公學為實業學堂略稱上海為通商巨埠商務最盛前由督辦鐵路大臣盛宣懷於光緒二十二年就招商電報兩局捐款設立南洋公學前年改為高等商務學堂若歸部興辦藉以造就商才洵有神益當經函商該大臣旋准復稱該學開辦雖久無所附麗茲值商部設立實業學堂應請隸入商部管理庶幾聯屬一氣名實相符並請派員接收既經請歸部管理應即改為上海實業學堂專課商學與京師實業學堂規模雖同一律造就各有專長該學常年經費前係就招商電報兩局撥銀十萬兩並因增設譯書院東文學堂復歲就招商局續撥銀二萬兩電報局續撥洋二萬元嗣以招商電報兩局改章該學入款驟減僅恃續撥兩項統計每年不過三萬餘兩譯書院東文學堂雖已裁撤而常年開支暨游學經費總需銀七萬餘兩之譜既經改設

實業學堂整理擴充亟須另籌的款擬仍咨商北洋大臣轉飭招商電報兩局酌撥常年經費嗣後學生畢業應即酌量先儘該兩局任用仍一律按照京師高等實業學堂優予出身以資策勵

又農工商部奏議覆出使義國大臣黃誥奏請飭各省廣設機器學堂略稱原奏稱此次會場所賽物品就其最精者言之有鐵路所需各物品有戰船所用各物品有農務漁業蠶絲應用各物品有機器製造各物品之數者各國或設學堂或立公會研究甚精各國之所由富強在於振興實業而實業中以機器為尤要會場中曾開機器會評議優劣實行改良誠以機器之為用累世窮年不能盡其巧妙各國其為注意廣設學堂藉以造就人才我國各省所設機器局僅造軍火等類所有工匠不過仿照規模罕有專門之學請飭各省廣設機器學堂俾多得人才所造機器日新月異庶於實業大有裨益查機器一項誠為製造百物之權輿尤屬中國目前之要務所請設立學堂自是富強之本等會於光緒三十三年就京城奏設高等實業學堂先習普通練習專門擬分設四科曰機器學曰礦學曰電學曰化學皆實業根本之謀惟部經費有限祇能就京師切實辦理以為各省之倡其各省能否籌款廣設應請飭各省實力籌辦以儲專才而廣實業

三十三年護理川督趙爾豐奏設川省實業學堂章程略稱外洋各項工業無一不與理化算學相關係故必有通於各種科學之人材然後可圖進步否則摹仿一物必假技師而所得有限留學外洋僅成手工而所造未精即欲調查工廠亦苦無識門徑之人具此種種困難工業之前途實難望其發達即就川省言之二十一萬方里之面積原料非不富也手工向稱精美民智非不強也設勸工廠以養之勸勸業會以鼓勵之提倡非不力也然而數年以來一二摹仿外洋之品類皆得粗遺精刻鵠類鴛日用普通之物則精者所值甚昂僅供少數富人之玩具粗者無資抵制徒奪尋常工人之利權地利如此其優勝人力如此其經營而效果如此其微末推求其病則因無學堂以養成實業之人材而從事實業者又皆無專門學業之故夫學生之與學徒性質大有區別

獲相承學徒之事也理想獨闢學生之事也程度迥殊教法自異故欲造成完全之實業人才非亟籌設立專門學堂不可川省提倡實業尤以商礦爲注重要點擬即附商礦局創辦實業學堂一所酌定簡章十九條所擬章程內載實習四科皆就川省固有之原料而訂一曰鑿業三十二年會由商務局派人前往醴陵景德鎮調查知此業改良尙易當經帶同學生入醴陵實業學堂學習見在速成科卒業者已有數人重慶商民設有一廠已著微效再求精深則非藉資學力其奚以濟一曰染織外洋於染織一業精益求精近年輸入之品日新月異人競趨之漏卮甚鉅日本西京染織最爲著名染織學堂亦復林立考其絲質未佳於我核其價值乃廉於我所能勝我其一在花樣精新則善織之故一在光彩奪目則善染之故蓋世界愈過文明則服物愈趨華美於人情之取舍考商業之盛衰則川省絲業之前途非亟求改良染織不可一曰採冶川礦之富各國豔稱自奉部文改設調查局以來注重查礦鍊礦二事不知先無採礦之學未發見者固不能查先無冶金之學已發見者更不能鍊寶藏惟有坐夫鉅款惟有虛糜此對於全省礦而採冶學之不容稍緩者也一曰理化化學一科爲用最廣大雖各種普通學校莫不兼列此科而一則與以普通之智識一則教以應用之精微外洋工業分科化學常獨占一部故於此校亦列專科以上四科實業所關原不止此但因地制宜不得不先其所急耳

又山東巡撫吳廷斌奏稱高等農業學堂先設中等農林蠶三科三年畢業升入高等

又學部奏先後由內閣鈔出河南巡撫張人駿奏擴充河北中等蠶桑實業學堂學額又奏榮陽縣趙村公立中等蠶桑實業學堂先立案畢業年限仍照定章

又奏獎湖南高等實業學堂豫科畢業生

三十四年學部議覆閩浙總督松壽奏請籌款興辦實業學堂略稱原摺稱南北地勢適中交通最便可各設高等工藝學堂一所每學堂容學生千人開辦經費約五六十萬金常年經費約各二十萬金查奏定學堂章程學務綱要稱

各省實業學堂宜各就地情形審擇所宜亟謀廣設如通商繁盛之區宜設商業學堂富於出產之區宜設工業學堂富於海錯之區宜設水產學堂餘可類推若如所請數省之財力僅設一堂集數省之學生遠赴一校不惟辦理失因地制宜之旨學生有遠道就學之艱更恐各省藉詞推諉不復自辦實業學堂舉偏遺全窒礙滋甚至原摺所稱日本高等商業高等工業各學校收容中國學生名額有限有校外預備累積年月尙難直接入校者查近來游學日本學生人數雖多都不能升入高等學校實因程度不及並非盡爲名額所限應及時籌辦中等以下各項實業學堂將來逐漸畢業在本國可遞入高等實業學堂即派赴外國亦可直入高等學校無校外預備費時糜費之虞臣部前經通行各省籌設中等初等各項實業學堂每府應設中等實業學堂一所每州縣應設初等實業學堂一所每所應收學生百名由臣部嚴催認真辦理庶各省實業得以逐漸振興

又東三省總督徐世昌奏奉省設立工藝傳習所暨造磚廠官紙局官牧場

又兩江總督端方奏江南改設農工實業學堂附設農事試驗場

又東三省總督吉林巡撫會奏吉林省創設實業學堂

又學部奏增訂初等工業學堂課程並增訂初等實業學堂畢業獎勵

又貴州巡撫龐鴻書奏辦貴州農林學堂附設農業公司

又東三省總督徐世昌奏奉省設立農林學堂種樹公所

又以奉省漁業公司改歸商辦另設官局專辦保護

宣統元年學部咨陝甘總督升允農業礦務兩學堂一切章程咨部

又兩江總督端方奏各州縣應設實業學堂請俟賽會後推行仿辦略稱中國農工商業各界無不恪守成法故步自封良民終歲勤動尙可以自謀其生莠民專好游閒不覺流而爲匪誠非由直省各府州縣一律開辦實業學堂不足以廣造就而阜民生所難者中國實業一途向無專門之學近年經管學大臣奏定高等農工商實業學堂章程商部首先開辦嗣經前督臣魏光燾就甯省原有格致書院奏改實業學堂計分農工礦諸科奴才到任後察視該堂學科

多未完善程度更覺參差即行督飭改良如農科之農具土壤作物及農用工學電科之電氣瓷氣及電氣工學礦科之化學實驗地質學測量學及野外演習各項功課一律改習專門增多授課時間併將各科學生確切考驗礦科一班多格致書院舊生於各種普通科學均有根柢皆能直接聽講英文其農科電科兩班於入堂第一第二兩學期內因兼習專門普通學業未足即令補習普通一學期一面酌定各科所需之器具藥品書籍擇要購備以為實驗之用見經學部考核簽明以該堂課程皆知注重實習科目採用圖書亦見精擇較之他處學堂自屬優勝惟學堂未經訂明等級農電礦及應用化學各科課程揆之定章不免闕略所關各科應即遵章補授此外如高等中等商業及蠶桑學堂省城均早經設立其外府州縣祇鹽城縣設有民立蠶桑學堂一所至中等初等各項實業學堂近來各府州縣明達官紳見省城各項實業學堂辦理已有成效頗思仿行惟風氣未盡開通教育尚難普及必須乘時設法提倡使人人知實業之利可以挽回貧弱爭進富強自能踴躍從事俟南洋賽會舉行之後再飭各州縣參酌省城實業學堂辦法會商公正紳董切實妥籌仿辦又學部奏遵議直隸高等農學堂畢業生應改照中等實業學堂給獎又農工商部會奏京師藝徒學堂課程較高擬請改為中初兩等工業學堂又咨桂撫張鳴岐略稱查實業教員講習所為實業師資應由各省斟酌地方情形及時設置咨到章程大致周妥惟實業見在待興甚急應由簡易進規完全並應按照本部前咨督飭各府州縣如限籌設中等初等各種實業學堂以廣造就

格嫌與初等工業學堂入學資格相妨應即改正並應督飭各府州縣設立中等初等各項實業學堂以廣造就又咨覆直督楊士驤高等工業學堂本科准予立案其附屬化學園繪專科應展長學期又兩江總督端方奏陳南洋高等商業學堂辦法並將原設中等商業學堂合併辦理略稱高等商業學堂分豫科本科該堂除開辦專修科外並遵章開辦豫科查上年部頒各學堂招考限制章程載高等學堂自戊申六月為始不准招考未經各中等學堂之學生此項豫科生係由中等商校撥入其入中等商校本科係在戊申正月應請以入中等本科之年月作為入高等豫科之年月所有原定之豫科一年見飭遵照部章展至三年以厚根柢又查部章實業教員講習所有商業一種並就該堂附設商業教員講習所以為將來推廣中等商業及初等商業之豫備此辦理高等商業學堂之情形也光緒三十年署督任內會飭由商務局撥款設立中等商業學堂一所先辦豫科二年畢業升入本科三年畢業見查以商學之階級言之則高中兩等均有需用之途以本省之情形論之則高中兩校應以合併為便當將南洋高等商業學堂與江南商務局原設之中等商業學堂合併辦理定名為江南高中兩等商業學堂校舍但稍事增添管理則倍形利便分科講授循序推升學生亦易形感奮此高中兩等商業學堂合併辦理之情形也惟江南當揚子流域之衝民物殷繁舟車便利互市以來實為各國商人貿易必爭之點以華商墨守舊習故步自封遂致生計日艱利權外溢若不及早研求商學懼無以操勝算而杜漏卮此事為與商根本無論如何艱窘未可置為緩圖覆核預算表各項均係核實應懇作正開銷實於興商育才大有裨益又兩江總督端方江蘇巡撫瑞澂奏籌辦工科大学先置校舍略稱富國之本莫亟於勸工近年商務疲敗民生困窮尤宜以振興工業為當務之急查工科大学見經學部奏設京師首善既已肇啟宏規而南洋係工商業最盛之區似應及時建設就南洋之轄境計之廠場機械之富江海交通之利教習易於物

色學生便於觀摩莫宜於上海查有上海縣治小南門外前設中國圖書公司自造之西式房屋工料堅實光綫通明極合校舍之用基地尙多將來添設各項應用場廠亦便分布且與上海製造局中國公學距離均不過遠於參觀升學各事諸形便利當經議定價銀十二萬兩飭由財政局陸續籌撥其常年經費即於前奏設南洋大學請盈餘鹽款內提充

又農工商部奏湖南醴陵磁業學堂准予立案並撥經費略稱查該學堂經臣部商務議員熊希齡自光緒三十一年起肇始經營三四年間漸著成效呈送表均經察核准予立案其常年經費向由兩江湖廣四川湖南四省協助之款均以三年爲限自明年起扣至宣統三年各省協款均已陸續停止應請飭該四省督撫仍照原允協款數目接續遞解作爲該學堂常年經費以裨實業又湖南巡撫岑春煇奏高等實業學堂豫科改辦高中兩等路礦本科

又學部咨復湖南巡撫岑春煇並札行湖南提學使吳慶坻核准高等實業學堂開辦中高兩等路礦本科並限制豫科學生不得改入他項學堂略稱查湘省礦產殷富路工待興自應及時養成礦路人才以備應用奏定學堂章程高等中等實業學堂皆設有礦業一科鐵路學科性質與土木科相近定章學務綱要載明鐵路礦務亦實業之一端自應並准設立路科專教建築亦屬當務之急甲丙兩班學生所習礦科用英文教授與定章高等工業學堂應授英語辦法相符至路科因乙丁兩班學生素習法文遂用法文教授近於遷就將來遞升分科大學不免窒礙惟既經肄習在前課程表並經聲明兼習英文應准變通辦理嗣後續招中等學生均應肄習英文續辦高等路科亦應改用英文教授以歸一律其乙丙丁戊各班學生既經分習路礦兩科功課將來畢業應照中等實業學堂獎勵章程給獎惟從前所習普通各科學畢業時仍當一律考試續招已班中等豫科學生應將名冊報部表載各科課程及擬用書籍均屬妥協中等礦科坑內實習礦山測量演習據表稱於暑假內行之尙屬可行丙班礦科於畢業後行之雖與定章未

符該班學生畢業在即自不得不變通辦理册開職員教員多係曾入學堂及游學畢業之員亦屬得人該堂此次所籌辦法極有條理文册亦甚詳明課程及擬用書籍審配詳慎足見實心整頓用人得力辦理實業不可濫亦不可惜費用款既鉅設備必甚完全果能認真經理宜有成效可期至該堂甲班學生前據咨明一律就升學獎勵應升入高等本科不得改入別項學堂丙丁戊己各班生亦應各按學級遞升不得改入他項學堂以資深造

又閩浙總督松壽奏查霞中學堂改名官立中等工業學堂略稱該堂路電兩科自光緒三十三年將該生等編爲路電兩班肄習三十四年接授路電兩功課由天津大學堂鐵路工程科學生高善美臺灣電報學堂畢業生陳起彪分科教授本年增聘美國高尼大學鐵路科畢業生武德美國滄浪渡大學電氣科畢業生范納斯接授各項科學學生直接聽講查該學堂既名中學又附設路電兩科參照中等實業學堂辦法性質頗難混合體察情形擬請改辦中等工業學堂先將路班改爲土木科電班改爲電氣科並將中學各班改爲中等工業豫科其畢業年限擬仍照奏定中等實業學堂辦理並請照章給獎又學部咨東三省總督錫良奉天巡撫程德全實業學堂豫科應改辦中等工業並擬具分年課程報核略稱該學堂既已正名爲高等實業學堂擬辦工科中之一二科其原有豫科學生應遵本部奏案改照中等工業學堂功課分科教授其分科辦法應以該堂將來開辦高等本科擬辦何科爲標準於中等工業各科中擇定一二科分班肄習將來升入高等本科尤爲銜接肄業年限扣足五年畢業准其援照中等實業學堂章程請獎課程辦法應將定章中等工業學堂各科課程及該堂各班學生原習豫科課程互相參照切實教授並就各班年限深淺分別擬具分年課程詳表報部核定其各班學生到堂年月亦應按名造册報部

又湖南巡撫岑春煇奏籌撥鄂省礦業學堂經費又奏設中等工業學堂

又陝西巡撫恩壽奏開辦農工中等學堂

又廣西巡撫張鳴岐奏廣西開辦中等農業學堂先設預科以農林試驗場併

入學堂

又順天府奏設中等農業學堂並改立大宛兩縣兩等模範小學堂

又學部奏浙江蠶業學堂應改為高等農業學堂並增設中等初等實業學堂略稱浙省創設蠶學館已歷十年當正名為蠶桑學堂見擬以蠶桑學堂改為高等查奏定章程蠶業一項惟中等實業學堂設有此項專科而高等實業學堂則蠶業功課包在農業科科目之內未經分列專科良以蠶業只係一端學理較簡高等學識宜求貫通該省既籌巨款將蠶學館改為高等學堂應即改為高等農業學堂遵照定章辦法就農林學獸醫學各科中酌設一二科以期完備但蠶桑為該省大利宜有專門研究之人可於高等農業學堂中多選學生肄習蠶業科遵照奏定中等蠶業科課目教授俾資深造原摺又稱浙省中等實業見祇蠶桑學堂一處既改為高等除將中等畢業生升入正科外擬在本堂先設補習科飭各府中學堂保送畢業學生入堂補習再令本堂未畢業之蠶桑學生補習普通中學如此互相補習一年後考驗合格併歸正科查該學堂以中等畢業生升入本科並飭各府中學堂保送畢業學生先行補習再入正科自屬核實辦法惟該省中學堂畢業學生見尚無多不敷升入高等農業之選可查照中等農業章程於蠶業科外就農林業獸醫學水產業各科中酌設數科以廣造就上年部議覆閩浙總督松壽奏請籌款興辦實業學堂聲明兩年之內每府應設中等實業學堂一所每州縣應設初等實業學堂一所允准在案該省中等實業見祇蠶桑學堂一處亟應切實籌辦庶有振興之日

又江蘇巡撫瑞澂奏蘇省開辦中等農業學堂添開試驗場五處並創設植物園及陳列所以為諸生實地研究

又閩浙總督松壽奏閩省設立農業中等學堂及農事試驗場

又湖南巡撫岑春煊奏擴充農業學堂略稱湖南農業學堂原係農務試驗場改辦爰就舊開場址改用新法種植分全場為二圃四科曰花圃曰菜圃曰園藝科曰普通科曰工藝科曰蠶桑科俾學生聽講餘暇率同園丁分類講習並

於場內建設肥料場氣象臺守望亭實習講堂及會議管理接待諸室以資應用至學堂係以中等農業標稱程度當占優勝科目當求完備議定於原有蠶桑之外添設農林兩科農科業已開班授課林科已將南關外嶽麓山官荒闢為森林試驗場設局培秧以為林科學生實習之豫備

又廣西巡撫張鳴岐奏開辦第二中等農業學堂蠶業科

又學部咨覆江西巡撫翁同龢奏江西提學司高等農業本科林業豫科中等農業本科各項分年課程改擬報部查該學堂本科分設農業森林兩科添設中等森林科以為遞升高等之豫備招選學生應准照辦開辦課程表但列分年學科鐘點未注分年程度並未注明擬用何項課本頗屬疏略即以表載分年學科鐘點言之農科第一學期列動物生理學一項查動物學不應專授生理應改為動物學而以應授事項分注於下園藝土壤兩項原表惟第一學期有之每星期授課不過二鐘此兩項科學非一學期所能詳盡應於第二三年接續詳授第四年表列課程全係蠶學查定章高等農業學堂課程僅列養蠶學一門蓋以農科學生但知蠶學大意已足應用毋庸多占鐘點轉妨主要之課程即遵照將蠶學應授事項併入養蠶學一門而以原表第二三年功課勻配於第四年庶農科主要科目得以詳細教授森林豫科功課每星期僅授國文一鐘查森林本科既無國文功課則豫科國文鐘點必須酌量加增日英兩國文並習勢難兼精應裁去日文以勻出之時間精習英文俾足應用中等森林本科課程所列學科大致尚妥惟一學科包含多種事項應將第幾年第幾學期擬授何種事項詳細註明所謂分年程度也並應另將擬用課本列表開報乃能就所授事項及所用課本之詳簡豫計授課時間之能否敷用此授課鐘點之由定也該堂高等中等各項本科正在開辦之初必須籌定於事前免致更張於事後應選擇深諳農學之員將本科分年課程再行詳細編擬從速報部以便開辦

又咨覆山東巡撫孫寶琦並翁同龢奏使煙臺水產小學堂暫准照辦應另辦中等並將見設小學課程改訂略稱光緒三十一年煙臺設立漁業

公司惟欲求漁業之發達必須於水產衰旺之由漁學精微之理實心研究得其要勸導漁戶令其知所從事始足以立發達之基蓋水產小學校之設實為公司切要之圖查奏定章程水產一科惟中等農業學堂有之並無水產小學之名惟漁業亟待振興煙臺地屬海濱乃應講求水產之地該公司辦理漁業招集漁戶子弟設立此項學堂亦屬因地制宜立法尚善其見有學生入堂已久應准暫照原擬辦法切實辦理俟豫科二年本科三年畢業之後按章給獎以資鼓勵該學堂並當一面招取高等小學畢業學生遵照定章中等農業學堂水產科課程教授或選年在十五歲以上二十歲以下曾在高等小學肄業二年之學生編入中等豫科按照定章中等農業學堂豫科功課教授二年畢業再入中等水產本科庶學理漸進精深漁業可期發達該學堂水產學科僅水產學漁業法規兩項殊屬簡陋應參照定章中等水產科課程酌量改訂就漁撈製造養殖各項事宜擇一二科分別教授以期核實

又咨覆貴州巡撫龐鴻書農林學堂入學規則及各科課程尚有應行修改之處另單簽明應飭照改

二年學部奏籌議實業教員講習所畢業獎勵辦法略稱奏定學堂章程訂有實業教員講習所章程其立學總義章第一節設實業教員講習所以養成各實業學堂之教員為宗旨以各種實業師不外求為成效第二節實業教員講習所分為農業商業工業各教員講習所三種入學次序章第一節各講習所入學之講習生須在初級師範學堂中學堂或與同等以上之實業學堂畢業者始為合格實業學堂管理通則實業教員講習所即實業之師範學堂為實業師範所資見在實業教員缺乏非及時造就無以立興實業之基各項學堂皆經訂有獎勵而實業教員講習所擬即定為四年畢業准其比照優級師範學堂畢業獎勵章程分等給獎准其充當中等實業學堂教員庶幾師資有藉各種實業學堂得以逐漸設立各種實業得以日漸振興

又咨浙江巡撫增韜節浙江提學使袁嘉毅甯波育德初等工業學堂章程

科目尚應增改並將學生名冊呈報學使存案

又浙江巡撫增韜奏浙省附郭設立高等農業學堂經費作正開銷

又四川總督趙爾巽奏機器學堂仍舊接辦

又學部奏增訂實業學堂實習分數算法

又奏釐訂實業學堂畢業年限分別辦理查奏定學堂章程各種實業學堂畢業年限既有參差辦理自難一律等詳查高等農業學堂農學科課程講授課目通計四十六科自非四年不能肄習完備見將豫科一年奏裁其本科年限自應仍舊高等商船學堂航海一科此等專科既須深求於學堂並當注重於實習擬將航海一科改為四年畢業前三年教授講堂功課後一年派赴船舶實習機輪科亦比照辦理中等農業學堂畢業年限奏定為三年初等農業學堂應並限定三年畢業不得節縮至初等商船學堂等級甚低此項學堂定章以初等畢業學生升入二年畢業以學齡計之畢業學生不過十三四歲以之從事航海管理機輪斷難勝任請將此項學堂緩辦其已設立者改為初等商業學堂免致有名無實

又奏各等農工商實業學堂所有外國語文功課一律定為英文其應兼習他國語者仍照章兼習其原定課程無外國語文功課者一律加入外國文一門其以外國語文列為便宜加設之科目者一律改為必修科以便各學堂有所遵守將來升學不至因文字歧出有所窒礙各高等實業學堂續招學生所授之功課其關係實業之學科一律用英文課本畢業後送京覆試用英文考試

又飭覆廣西提學使籌備實業各學堂應分別提前辦理略稱實業教育一項有籌畫養成各項實業教員之大概辦法有籌辦初等以下各項實業學堂之大略有籌辦高等實業學堂之大略查原表就地方財力盈絀將各府廳州縣分為甲乙丙三等以便分設各項實業學堂辦法尚屬扼要欲興實業先裕師資原表所擬辦法先從實業教員講習所入手亦屬有序表載中等工業學堂遲之二年始行招收豫科學生再遲五年始行籌畫各府分設中等工商業學堂實未足以廣造就並應於五六年開籌設高等工業學堂

以資深造

又咨覆浙撫增韞紹興職商稟設商學會准照辦所有研究會傳習所應將詳細辦法呈提學使報部

又咨甘肅新疆巡撫聯魁飭新疆提學使中等實業學堂應提前設立初等實業藝徒實業補習普通各學堂均應多設實業門教員講習所

又咨湖南巡撫楊文鼎並飭湖南提學使實業教員講習所應照奏章辦理並將各科課程授課鐘點從速報部備核略稱據署湖南提學使吳慶坻詳稱湘省實業學堂辦法必亟設實業教員講習所一規定校地查定章實業教員講習所立學總義章內載實業教員講習所應附設於農工商大學或

高等農工商學堂之內各省應暫設一所養成實業教員以爲擴張實業學堂之基見在農工大學各省均尚未立湘省雖已設有高等實業學堂一所方挾全力以辦礦路本科別無餘地可資附設查湘省農工學堂均經設有

官立專校見雖尙居中等階級不久即須升辦高等該兩校教授管理均尙認真農校已授農林蠶三項本科工校已授金工圖繪兩項本科實業場廠均尙完備各科教員均係慎選敦聘而來見擬將農業教員講習所即附設

於農業學堂工業教員講習所即附設於工業學堂庶器械既可通用教員亦可兼授惟商業尙無官立專校擬至宣統三年辦理此擬請示遵辦者一也一考錄資格查定章實業教員講習所入學資序章內載各講習所入學

之講習生須在初級師範學堂中學及同等以上之實業學堂畢業者始爲合格此時初辦難得此等合格學生應變通選年在十七歲以上二十五歲

以下文理明通者先補習一年普通學科再入正科湘省初級師範及各中等學堂畢業生爲數本不甚多見擬變通選中學堂初級師範學堂修業五

六學期諸生及兩年以上簡易師範畢業未經給獎諸生從嚴考錄入學此項學生於普通學識皆已素具較之定章補習一年者爲優入學後自可直

授正科又省垣中等農業學堂之蠶科速成生中等工業學堂之豫科生均已先後畢業該生等平日本習普通科目而實業知識較他項學生爲優如

有願充實業教員者擬亦准其一併考錄此擬請示遵辦者二也一修業年限實業教員講習所定章分農工商三種其學習年數農商均以二年爲限

工業簡易以一年爲限完全科以三年爲限湘省見在設所講習先辦農工兩類以備教才俾各屬實業學堂得以剋期成立倘工業講習年限較農業

遲速不齊兩年後各屬設校請派教員屆時屬於農者服務有人屬於工者成才尙早似無以赴事機而杜支展查工業教員講習所課程完全科共分

六科其中金工染織兩科尤爲湘省所急需見擬先講習此兩科如合格學生無多即先擇辦一科延聘專門教員酌增鐘點加功授課與農業講習生

同以二年畢業必期學力完足始派往各屬充任教員至簡易科所造較淺不足以供教授司中鑄辦表內業經聲明專辦完全不辦簡易以免教學兩

困之弊與大部節文用意相符惟變通畢業年限前表未經詳述自應聲敘理由仰候核奪此擬請示遵辦者三也一畢業獎勵實業教員講習生即實

業之師範奏定章程載有服務年限而獎勵未著專條該教員等一經畢業即須宣力義務自宜酌予獎勵查此項講習生均由初級師範及各中等學

堂選撥而來已有兩三程度再加入所後講習二年通計前後修業實近五年畢業時擬即比例官立學堂修業兩年以上之簡易師範生畢業獎章

酌量辦理此擬請示遵辦者四也以上四條均係循繹奏定章程審察就地情形酌擬辦法期合通變制宜之用本部院查實業教員講習所爲實業師

範所資關係至爲重要該省擬將農業教員講習所附設農業學堂工業教員講習所附設工業學堂應准照辦至學生資格修業年限畢業獎勵本部業經

籌定辦法奏准有案

又咨貴州巡撫龐鴻書並飭貴州提學使催將中等實業各學堂辦理情形報部並將中等工商業學堂提前設齊

又咨河南巡撫寶棻並飭河南提學使胡鼎彝鄧州蠶業學堂准作爲中等蠶桑科指出各節應由提學使飭改補報

又咨覆安徽巡撫朱家寶並飭行安徽提學使吳同甲阜陽縣初等農業學

堂不得援引節縮期限辦法學生年齡准變通辦理

又新疆巡撫聯魁奏籌辦農林工藝情形略稱新省本西域游牧之邦欲期農牧並務必以興學爲先在省城北門外勘購民地一區作爲通省農林試驗場並擬添設實業講習所以備模範迪化縣另有農務研究所見並籌設農學堂以外吐魯番廳阜康縣焉耆府皮山縣和闐州均有農林試驗場吐魯番並有水利公司焉耆皮山並有農林講習所皮山並有初等實業小學堂蠶桑局和闐並有蠶桑實業學堂庫爾喀喇烏蘇廳有農學堂溫宿府有農林講習所並購買地段試種桑秧疏勒府有初等實業學堂以上各項場所辦法不必盡同要皆以明於農業林業之人分赴各鄉考察教導審明籽種肥料五穀瓜果桑棉雜木分別試種實地練習焉耆暨喀喇烏蘇尙在組合農會南疆向來產桑頗多土人但取甚代糧或備藥料置省後廣興蠶業頗著成效惟蠶種須購自外洋久成漏卮自上年設蠶桑局講求養蠶資繭繅絲密種諸法漸益詳備森林造端宏第以林業論天山南北雖未到成林而天然之樹亦各屬皆有測驗氣候土性南路較甚北路南種白楊榆柳之外尙有桑松桃杏沙梨等樹北路則白楊榆柳居多綜計栽種成活之樹已不下數百萬株此歷年籌辦農林之大略情形也工藝一項論灌輸盈虧則在抵制外貨交易便利則補助農商新省創辦工藝局廠並有陳設所藝徒學堂各屬則繁庶之區組綬較早伊犁溫宿疏勒莎車各府和闐州吐魯番廳哈密廳口楚州于闐拜城洛浦等縣已設藝徒學堂和闐並有勸工所洛浦並有工藝局庫爾喀喇烏蘇廳有工藝會皮山縣有織造局其辦法皆就本地物產所有擇其日用要需分別教授酌量製造其辦有起色者如皮毛爲新省物產之大宗祇以本地工藝太絀行銷不旺外人賤值購去製貨轉售中國竟得厚利見省城工藝廠皮革各料所出貨品漸已不讓內地和闐洛浦向出絨毯頗佳近亦競巧爭新市肆暢銷石油一類向專取給俄國近飭勸工廠由庫爾喀喇烏蘇暨綏來各處出產石油地方撤取油質先用土法提練略備抵禦嗣後改用西法開洞取質並廣招學徒入廠肄習當可精進此歷年籌辦工藝之大略情形也維農林

爲天地自然之利工藝爲改良土貨之圖以新省開闢未久荒地多屬腴區土貨亦極充初因勢利導本可藉手有爲第以交通不便計非軌路大通未易遠言發達惟有電勉以圖期於規模略備

三年郵傳部奏擬設商船學校大概情形略稱翰林院修撰張謇願將上海吳淞口漁業公司地基並所領官款六萬元呈送部辦理商船學校又浙紳李厚祐報效甯波益智中學堂一所奏明預備部商船學校之用當即派員前往吳淞甯波兩處履勘地址籌擬辦法據稱吳淞江面寬闊各國商船絡繹往來地居南北之中交通至便毗連滄浦局船澳建築船校爲天然適當之區甯波益智中學堂左帶甯波江海船時至校舍崇閣占地爽塏兩地均堪備用果能於吳淞甯波同時並舉規模愈遠成材愈多洵爲盛事惟商船學理深遠程度極高擬併力先辦吳淞一處查部上海高等實業學堂於路電兩科外已設立高等船政專科擬即就此擴充添招學生名數以爲商船學校之基礎其甯波益智學堂將來或改爲商船中學當視日後之款項人材以爲進退至學科辦法前經咨商出使大臣調查各國船校見辦章程以資仿效並查考留學商船之學生預備任使見已陸續咨復到部應即參酌損益輪派委員辦理

又直隸總督陳夔龍奏裁北洋師範學堂改設高等商業學堂分別歸併辦理又兩江總督張人駿奏茶葉爲土貨出口大宗皖贛等省向運甯滬出洋銷售甯垣爲南洋適中之地擬設茶務講習所專收茶商子弟及與茶務有關係地方之學生延聘專門教員教授學科計分二級先習普通科一年再入本科二年學生以一百二十名爲限額定甯蘇三十名皖贛各三十名其餘省分三十名開辦及常年經費均由皖南茶稅局撥支學生畢業以農工商部之藝師藝士等職分別委用考列最優等者獎以一等藝師以備派赴外國商場調查考列優等者獎以二等藝師以備經理內地新法製茶廠之選考列中等者獎以一二等藝士以備派充產茶州縣周巡講授

右實業學堂後附財政稅務交通傳習所
宣統元年度支部會奏設立財政學堂酌擬章程略稱財政爲專門之學非普

通各學夙有門徑兼習過各國語言文字未能究其精邃財政學堂既屬高等教育則入學程度自應以中學堂畢業生爲限但各處中學多未畢業_臣等再四等商財政與實業相近如銀行稅務等科皆有實業性質擬仿實業學堂辦法於校中先設中等科課以歷史地理算數語文理財等學以植其基三年畢業然後升入高等科俾肆財政各科及與財政有關係之法律政治等學以盡其蘊仍以三年畢業就一校之內爲遞升之階俟他日中學畢業人數已多屆期亦可招收以謀普及其已未服官之人年力富強有志向學者尤應廣予甄陶擬於校中另設別科專選京外候補候選人員及舉人五貢學有根柢者在堂肄習選課財政各學三年畢業如此辦理一則求速成之效以應急需一則循漸進之方以期深造於國家財政前途實有裨益至獎勵一項中等科擬照中等實業學堂高等科擬照高等實業學堂俟將來酌量情形再行辦理又稅務大臣奏開辦稅務學堂

宣統二年郵傳部奏創設交通傳習所開辦情形略稱創立交通傳習所以養成管理人材爲宗旨所分科目有二曰鐵路科曰郵電科鐵路科分爲兩班高等班三年畢業簡易班一年畢業另設津浦簡易班兼習德文以爲津浦路局之用郵電科亦分設兩班高等班二年半畢業簡易班一年半畢業畢業後各按程度酌派差委凡該所見在生徒即將來各局員司所自出職務固分高下學問自有淺深路科學生已於上年冬季授課郵電科見在招考准三月間一律入堂共計生徒六百餘人其郵電合爲一科者蓋以郵電二事均爲通信機關東西各國往往以郵政與電報電話合爲一局已爲世界通例是習電術者必嫻郵政規章學郵政者須具電術知識以備將來郵電合併又查貸款各路或用英文或用法文幾成習慣郵政自稅司代辦其高級管理員大半借材異地通行文牘亦以英文爲多是以該所鐵路班分招英法文已優之學生入堂分授科學並令英文生兼習法文法文生兼習英文以收互用之效而郵電班亦招英文程度已高者兼習法文俾易接洽實主客交遞之機關亦政學溝通之至計凡此數端皆爲路政電政郵政各局所他日致用起見總期於實業多

培一班人材卽爲國家多保一分權利需用款項除開辦經費陸續用款三萬餘兩外預算常年經費約需銀八萬兩從前_臣部辦學款項均係由鐵路公費項下支銷見在_臣部學務力求擴張派遣出洋學生名數亦漸推廣鐵路公費已不敷用業由京漢京奉兩路餘利項下酌量撥支

皇朝續文獻通考卷一百十三

學校考二十 學堂 醫學館 通微 醫民 小學

光緒三十二年學部咨醫學館考試畢業應照新章五年畢業略稱查醫學館章程於二十九年具奏是年學務大臣會同湖廣總督奏定釐訂學堂章程學務綱要中列有專條京外各學堂俱照新章以歸畫一醫學館係照中學堂辦理應照新章五年畢業且醫科關係重要而學理又至繁隨不獨難於深造亦不易言普通若學問未精遽令充當官醫及醫員等實恐難免貽誤本部詳細酌核意在妥籌造就如學生研習醫學具有根柢可期深造應即加習二年以符新章中學堂五年畢業之例其獎勵亦即可照章辦理所有加習課程應博採東西各國醫學科目咨部核定

又咨醫學館課程辦法從速見覆略稱前學務大臣奏設醫學館原為振興醫學起見自光緒二十九年開學迄今已屆三年前准咨開應舉行畢業考試經本部咨覆加習二年以符新章中學五年畢業之例所有加習課程應咨部核定其不願留學者由館中考驗給予修業文憑在案見距暑假後開學已久課程已否增加辦法已否酌定希速見覆以憑考查

又學部奏議覆中西醫學分科肄習略稱御史徐定超奏中西醫派確有不同造士不能合併中醫多幻想西醫憑實驗中醫主述古西醫貴求新其詣力獨到之處各有不同思議之精微學者各專一門已苦難於精到必欲兼營並獲心力更有不遑等維中西醫術各有獨到之處奏定醫科大學章程於中西醫學必令兼營未嘗偏廢惟中西醫理博大精深融會貫通必俟諸已入分科大學之後下此則兼營並獲學者輒以為難誠有如該御史所陳者查京師設有醫學館擬即改為京師專門醫學堂中西學分科肄習各以深造有得切於實用為宗旨其應如何補習普通編設課程酌定年限由部遴員詳議具奏又奏議復升任湖廣總督張之洞附奏湖北軍醫學堂畢業學生擬照京師醫學館畢業成案給獎

宣統二年又奏醫學研究會准其立案略稱翰林院侍讀學士惲毓鼎奏京城

創辦醫學研究會設立宗旨意在使業醫之人於診察餘暇研究學術使理論與實驗二者並進用意至善自應准其立案查該會係借用惜字館房屋成立地勢甚隘不合學堂之用設備亦未能完全至其所招生徒均未經中學堂畢業與醫學堂章程尚多不符應先令其肄習普通學五年俟合中學堂畢業程度再進習專門醫學以符定章

右醫學館

光緒三十一年伊犁將軍馬亮奏擬設養正學堂並酌派出洋游學略稱伊犁士風譚陋師道浸微滿營辦事人員通曉滿漢蒙回文意者固不乏人然兼通俄國語言文字者習交涉事務者究難其選平時既未備通才臨事更何資肆應上年索倫營隊大臣志銳於會辦司牙收時曾與俄參議官潘特索福商擬派生出洋肄業旋據覆文照辦才察度諮詢僉以肄業洋學開設學堂事可並行當飭滿漢營務處妥議所議學生出洋擬以距伊一千八百里之阿拉穆圖地方俄堂肄業取其就近易於詢察其洋學以十人更番往返以三年為卒業本地學堂挑選滿蒙子弟四十人入堂肄業定以四年為期堂名即擬額曰養正以示蒙學之義數年之後於伊犁辦理中外交涉事宜冀可先收實效宣統元年直隸總督楊士驤奏塔城設養正學堂開辦日期略稱塔城僻居邊遠文教未興前經奏請仿照伊犁設立養正學堂挑選滿漢蒙哈子弟延聘滿蒙漢俄回塾師分班訓課以五年為畢業并請將大臣安成已征哈薩克房租銀四千二百兩作為經始之費因與前領隊大臣榮昌商議塔城偏於極西東路地方遼闊與俄國察罕鄂博邊疆相近且係察哈爾額魯特十蘇木游牧之地該處額勒勒河適中扼要並無兵隊駐守後路實慮空虛前大臣富勒銘額即有領隊隊留駐額勒勒河之奏以防後路而顧運道於光緒二十三年奏准見將安成已征哈薩克房租作為學堂經始之費不如將本城領隊衙門酌量修改作為養正學堂所餘銀兩即作為修理額勒勒河領隊衙門之用如此變通辦理不特塔城後路藉可無虞即察哈爾額魯特十蘇木亦可就近照料不致顧此失彼况該處久駐重兵見尚有中外商民數十百家實屬後路往來要

道該大臣亦頗以爲然因派員將該大臣衙門修改借用延定各項教師挑選滿漢察哈爾額魯特吐爾扈特哈薩克子弟酌議章程擇期開學

又督辦川滇邊務大臣趙爾豐奏推廣學務添撥經費略稱光緒三十三年奏設關外學務局擇關外適中之巴塘地方暫租民房派員徧歷巴裏二塘及鄉城鹽井稻壩中渡貢葛嶺各處曉諭開辦之初番民滋疑因首於巴塘裏塘兩處選漢塘商兵民及蠻頭人子弟年齡及格者招之入堂從淺易入手先教以漢語官話及中國淺近文字並優待學生使蠻民藉資觀感去年春番民等見學堂未徵學資而子弟能知漢語有事可與漢官直接又見給予冠履衣服加以禮貌疑慮漸釋復經勸學員等帶同繙譯赴各處開導始皆忻悅願將子弟送學一年之間關外即成立男女學堂三十餘校該蠻民等知設學有益於彼近來稟請立校者日見其多今年復由川調藏文畢業生七十餘名出關派充教習惟關外蠻語方言各自不同即繙譯亦多遷地弗良特令該畢業生等在學務局補習師範及各方言語半年之後始行派充教習查關外設學將屆三年而蠻民歸順之誠已有變夷爲夏之勢迎機利導卽爲將來開設行省之基礎

右邊徵學堂

光緒三十三年廣西巡撫張鳴岐奏廣西慶遠思恩南甯太平鎮安上思百色歸順等府廳州所轄土州縣州同巡檢凡四十三缺綜其疆域幾佔全省四分之一幅員既廣其地勢爲政治上最要之區其物產亦實業上可爲之地誠能得人而理不難臻富庶而固邊陲各屬土官多皆賦性昏庸罔知禮法其無能者則冥冥昧昧如睡如夢四境之事懵然不知其不肖者則任性妄爲魚肉土民暴戾貪婪靡所不至雖將不職土官隨時撤任改委官員署理或委漢員彈壓而土屬情形仍不能稍有起色擬飭各該管府廳州督同州縣就土官兄弟子姪中擇其年齡資質略合高等小學程度者按年選送四人或六人來省就學近支無人再擇旁支所需學費責成土官籌解並飭提學使特立一學堂專教土族小學畢業升中學中學畢業授以法政一科擇其最要者教之不怠者

略之其要旨在使有普通之知識有政治之思想有道德之觀念各級畢業年限較定章稍短將來各屬土官卽以畢業最優等者分別承襲其支派之嫡庶服屬之親疏皆請勿論其任事之期以及遞年畢業各土生應如何分派職事屆時妥議章程奏咨辦理所有見在各屬土官其已病故而未請承襲者凡二十缺均停止請襲其已承襲而因案撤任者凡十三員均不准回任一律暫由漢員彈壓將來各土生畢業後擇賢請襲以免再誤地方

宣統元年護理雲貴總督沈秉堃奏雲南土民學堂辦法略稱滇省沿邊土司地數千里往往因語言習尚不同與內地人民隔閡非先之以教育不爲功查滇邊土目轄境惟永昌順甯普洱三府暨滇邊直隸廳緊接外域今以興學爲安邊計自以從三府一廳辦起第土民混沌未鑿卽授以初等小學恐亦難入應設簡易識字學塾以此開化較爲適宜既以同化爲宗旨自應以國文爲主科先之以音讀講解習問繼之以抄寫默寫終之以綴字成文其補助科目則以習禮談話算數體操唱歌農業六者爲限前三者改良其習慣語言鍛鍊其心思腦力後三者俾其服從規律陶淑性情增益智識而尤在隨時覺以尊親之大義作鞏固國防之用至身任土目者雖年長難學而宗族子弟可教惟土司於土民其分素嚴沿邊土民學塾土目之宗族子弟必不樂入不得不另籌辦法省會學堂較外郡規級略備令其附學量其程度令入相當班次來學則優遇之畢業歸則照章獎勵更獎扁額附學必置之會垣俾略瞻軍界政界之設施習聞通人正大之言論以激發其忠愛惟學非時不辦沿邊土司有限其宗族子弟來學者由公家供膳食操衣書籍甚或增教員開新班費屬無多至三府一直隸廳土民學塾需款甚鉅若責土司就地籌措勢必騷擾擬照川滇邊務大臣關外學務局成案由司庫邊防要需項下按年提銀二萬兩以作經費得旨所奏甚是卽當認真籌辦

右土民學堂附邊

光緒三十二年學部會同商部巡警部奏議覆出使韓國大臣會廣銓奏設訓練警察暨方言商學等科學堂略稱原奏稱漢城等埠向無學堂會奏陳設立

商會設堂訓練警務並擬舉辦商學見暫假使館學習學堂課程先習韓日英等國語言後授警察商務伏思我國華商之在東西洋各國集資興學時有所聞茲寓韓商民創辦學堂培植警務商學人才雖課程止是速成辦法而初基既立可圖擴充創自韓城推諸各埠實於保商育才均有關係將來學生畢業凡送回內地者准其一體考試按照程度酌量升學至該學堂詳細章程及管理教授均責成駐韓領事隨時呈報以備查考

又商部咨檳榔嶼紳商創設中華學校請查核立案並聲明刊發鈐記略稱本部考察外埠商務大臣太僕寺卿張振勳於三十年間與檳榔嶼紳商創設中華學校教育華商子弟暫借閩粵紳商設立之平章會館先行試辦是年賞給御書扁額及圖書集成均經祇領合嶼商民歡欣鼓舞復借參贊南洋商務事宜商部郎中時寶璋邀集同志紳商江西補用道張鶴南等籌集經費十數萬元購就本嶼港仔唇地方建立學校落成即行遷入茲擬就本校暫行章程三十二則咨請照准轉咨學部立案並奏給關防查該嶼以海外僑商設中華學校具見不忘祖國所擬章程及總協理員額各項核與章程雖多不符惟區域既與內地不同辦法自難強於畫一所謂量予變通亦係為因地制宜起見應將章程清摺各一份咨行貴部察核至所請奏給關防一節查檳榔嶼係商辦學堂與官立學校不同應由本部刊發鈐記毋庸奏給關防

又閩督咨明閩紳陳開學往查爪哇各島閩僑學務略稱萬荷閩商注意教育組織學堂各埠聞風響應圖謀公益深堪嘉尚惟該地風氣初開必須德望素著品學兼優之本籍巨紳親履視察始足以資感奮茲查前內閣學士陳紳寶琛望隆學粹久為閩省人士所欽服見值前往南洋勸辦鐵路股份之便應由司移請陳紳將荷埠爪哇各島閩僑學務順道詳加考察廣為勸導庶可以聯絡海外僑民愈堅其愛國之心而副朝廷興學育才之意又學部札派知府錢恂舉人董鴻禕前往爪哇等處調查華僑學務情形略稱南洋各埠華僑如荷屬之爪哇英屬之新嘉坡檳榔嶼均極繁盛近來創

辦學堂本部早已有聞亟欲謀維持保護之法頃據新嘉坡總領事孫士鼎申呈應新學堂章程又准兩廣總督岑電見於爪新檳三處各設勸學所一區南洋興學情形已見梗概該僑民等久居海外而能堅心內嚮歷久不移忠愛之忱出自性生實深嘉許若因其性質所在而以經史大義訓練之以世界知識陶冶之祖國文明必益光大民生事業從此振興惟各埠學堂既漸設立而人情渙散統一為難教授管理亦未必盡如法度欲謀維持保護之法必遴派妥員周歷考察乃克有濟查該守久歷外洋才識卓著該舉人曾游南洋深明教育仰即會同前往爪哇新嘉坡檳榔嶼等處調查華僑學務應如何聯絡羣情勸勵紳董整理學規培養師範均應因地因勢詳議通籌務期認真考察毋負委任

又江督端方奏爪島僑民就學金陵略稱南洋查學委員錢恂等電稱爪島學生可接中學程度者約三十人志切歸國讀書選地南京以該僑民篤志內嚮自宜因勢附循查爪島僑民流寓遠方不忘歸國派生內渡就學金陵洵屬愛國情殷極堪嘉許自當官備食宿妥為照料當經電飭錢恂等尤為照料囑其傳語華僑益相敦勉札飭江甯提學使俟該生等來甯即查詢志願分送各學堂肄業嗣後南洋各島及檀香山舊金山等處僑民如有願送子弟來甯就學並當一律收取以宏教澤而繫僑情

又粵督岑春煊奏請獎南洋辦學紳董教習及捐助學費各員略稱出洋華僑數百萬人旅居外埠百數十載遠離宗邦聲教莫及近年迭奉 朝旨敦促興學並准出洋華僑子弟與內地一律出身海外嗚呼聞風興起上年經 臣派員前往南洋視學據稱周歷英荷兩屬各埠徧視華僑學堂已成立者二十七所收受生徒約數千人創辦紳董約數百人捐集鉅款約數十萬所有學級課程均遵奏定章程辦理查該紳商等僑居海島不忘祖國各奮血誠擴張教育實屬深明大義自非優予給獎不足以示鼓勵謹將得力紳董仰懇分別給獎以昭激勸

又學部奏旅日華商創建學堂懇予嘉獎略稱准出使日本大臣楊樞咨據神

戶領事申稱商董麥瑞圖等稟稱僑居日本神戶歷有年所僑民子弟衆多不
乏英俊日本所立學堂偏重東文於中學不甚講求乃創立同文小學校延聘
中東教習專教華商子弟於今六年略著成效仰懇咨部立案學生卒業一律
升入中學堂肄業中國教員其能盡心教育滿三年五年者分別請獎查該校
分爲高等初等兩級小學堂學科課程修業年限授課時刻均與定章符合自
應准其立案一律升學教員請獎一節亦令按照定章辦理惟是該董等僑居
海外眷念宗邦學科以國文爲先學制與定章無異本其忠愛之忱創辦學校
逾千萬興辦學堂教授子弟所在多有上年荷蘭屬埠學堂會經總理學務大
臣奏請獎勵今同文學校事同一律且能注重國文尤爲罕觀如蒙 錫以扁
額懸諸校中俾生徒誦之餘仰瞻咫尺 天威則忠義之心當益固結矣
三十三年江督端方奏設暨南學堂略稱據南洋各島視學員護送爪哇華僑
學生二十一人判審查該學生等流寓遠方不忘中國情殷內渡志極可嘉惟
該生等初回內地語言難合一應選聘教習補習國文國語及各項科學一
年再行考驗程度查詢志願分送各學堂肄業且聞內嚮方殷來者日衆非爲
特開一校不足以敷教育而繫僑情當飭署江甯提學使陳伯陶奏調直隸候
補道王崇烈並籌撥經費擇度校舍延訂教習分科教授派員管理統合畫一
名曰暨南學堂所有支用各項見飭由江海關籌撥節節動用
又閩督松壽奏爪哇閩僑視學員暫派粵省視學員汪鳳翔兼管略稱前據荷
屬爪哇閩僑華商徐博興等以閩籍僑商集資在哇設立學堂教育子弟稟請
派浙江留日畢業生陳華來哇監學照章改爲總視學員旋值閩紳前內閣學
士陳寶琛前往南洋各埠勸辦路股之便咨請將荷埠爪哇各島閩僑學務順
道考察廣爲勸導俾臻周妥茲准陳寶琛面稱陳華赴哇於該處情形未盡熟
悉辦理學務亦欠得力擬即將陳華先行調回其所遺視學事宜應請札飭粵
省派委駐哇之視學員候補知縣汪鳳翔暫行兼管
宣統元年兩江總督端方奏甯省暨南學堂向分中學及高等小學兩級惟華

僑子弟嚮學情殷隨時內渡數難豫定來學各生年齡不一程度參差擬限定
額數五百名將來改成中學當力求畫一辦法名額推廣經費增添擬請由閩
海粵海江海各關分任籌撥至該堂學生中學畢業應如何從優給獎並就學
西洋酌派官費之處懇飭部核覆施行
又學部奏議復江督奏暨南學堂籌定畫一辦法添撥經費略稱原奏添廣學
額一節與奏定中學堂章程中學堂定額五百人之數相符見在暨南學堂所
收華僑學生程度不齊暫分中學及高等小學兩級自係體察見在情形因時
立制原奏從優給獎一節查奏定中學堂獎勵章程本係一氣銜接如將中學
堂獎勵加優即豫佔高等學堂大學堂獎勵地步將來轉致無可加獎 臣部於
華僑子弟期望甚殷深願循序漸進不欲令其一得自封若於中學獎勵加優
轉非提倡鼓勵之道應請無庸置議原奏學力較優各生選送西洋留學酌給
官費其自費生之貧乏者亦請酌加津貼查華僑子弟生長在外洋於泰西語
言文字學習有素本較內地學生爲優將來中學畢業之後中國舊學既有門
徑普通知識亦漸完全此時再赴西洋留學成就較易應准其擇尤選送此項
官派留學生學費暨自費學生津貼之款擬請均由南北洋大臣暨原籍各督
撫分任籌給原奏將來添足學額五百名每年須六萬餘兩建築校舍添置校
具須另爲籌撥請由閩海粵海江海各關分撥應由 臣部與度支部會同核議
右僑民學堂
光緒二十二年大理寺少卿盛宣懷奏設南洋公學於上海如議行
三十二年學部咨粵督岑春煊嘉應五屬公學章程飭令照定章改正略稱
前潮州中學堂教習歲貢生陳松等邀集同志組織嘉應五屬公學會暫借
嘉應州城謝道祠爲會所該貢生等熱心學務向堪嘉尚惟所訂章程當遵
照本部教育會章程悉行改正
又咨江督周馥查明王敬芳稟請撥地建設公學的核辦理略稱該生等憫
本國教育之未興嗷嗷寄人藩籬之非計糾集同志建設學堂毅力熱誠遠超
流輩外國學風之所由盛實由士民奮發皆能自堅其力自善其羣該生等

力屏浮囂立約自治尤見深於學旨志趣不凡所稱南京山川明秀爲築建學校最適之區請商兩江總督量撥官地籌款建築及商各省資助各節仰候咨行兩江總督查明辦理

三十三年江督端方奏籌撥中國公學經費略稱上海中國公學自光緒三十二年開辦旋據該公學留日學生張邦傑王敬芳等稟稱生等自去冬由日歸國鑒於我國留東學生流品不一士氣囂張亟思救弊補偏挽回積習糾合同志建立公學爲全國游學之豫備高等大學之階梯嚴課品行注重德育開辦以來各省來滬入校者絡繹不絕究爲經費校舍所限不能再事擴充具呈學部蒙批獎見在辦法約有兩端一則擴張規模一則維持現狀當由才派員前往詳查茲據復稱該公學學生凡三百十八人業經逾額計設高等普通豫科兩班中學普通四班師範速成一班理化專修一班其意注重完全高等普通爲直入東西洋大學高等學堂而設雖師範理化兩班不無欲速之弊然其教授管理嚴肅整齊極能得自治之精神守純一之宗旨查該公學辦法皆與部章相合所呈課程各表雖須稍事改良然使整理得人必可日臻進步其建築校舍之費見因財力不及一時未能代籌至於常年經費不能不設法維持爲養成游學人材之計已飭財政局撥款作正開銷

又奏籌撥復旦公學經費略稱上海復旦公學自光緒三十一年開校係考取中學堂較深之學生以英文教授高等普通科學能使直入歐洲專門爲宗旨查往歲各省派遣學生游學歐美大半先在校外豫備英文耗費財力殊屬可惜若使英文全通高等普通畢業再行送往歐美直入專門大學可收事半功倍之效該公學開校兩年辦理尙爲合法據呈各班教科所用書目皆係英文課本若再改良進步成績必有可觀查有候選道嚴復淹貫中西學識闡達已派充該公學監督管理教授一切由其主持見在江南財政支絀異常建築校舍力有未逮至於常年經費爲養成游學人材起見不能不勉籌的款已飭財政局每月籌撥作正開銷

南洋大學堂挑選學生除甯蘇皖贛皆爲兩江轄境照例甄收外如鄂湘閩浙川廣學生均可貼補學費定額考取仿京師大學堂先教豫備科畢業後再照分科大學辦理見就各岸准鹽督銷酌扣盈餘每年籌有的款四五萬金並擬將貢院房舍拆卸什物變賣收地租以資補助竊維教育爲當今急務大學爲學問完備之區欲使全國之學術進步自非多設大學堂不可該督籌設大學洵屬遠大之見而甄收學生不限省界先教豫科俾免躐等尤足以廣造就惟挑選學生最關緊要教於到學之後尤貴慎於到學之初必擇其性行端謹中學根柢已深曾經中學堂畢業者方足以期大成而資實用至所請將貢院開作市場及變賣什物以助經費並酌提准鹽督銷盈餘均爲亟於興學籌款起見應由該督酌擬辦法咨明度支部辦理

宣統元年又奏山東青島設立特別高等專門學堂並商訂章程認籌經費略稱前准外務部咨稱出使德國大臣孫寶琦咨稱准德外部照稱近年中國士子講求西學不遺餘力德國政府擬在青島建立學堂一所培養中國子弟並使有志留學而財力不逮者可在本國內肄習泰西各種新學擬先建大學一所內分四科一工程製造科二醫科三政治法律科四農林科並設豫備一科先籌常年經費七萬五千馬克開辦經費三十萬馬克深望中國政府竭力贊助遣派合格學生並承認在堂畢業之憑照兼爲該生等籌將來之出路止核辦開旋准使德大臣函稱德國政府議在青島設立學堂用意甚善且遣派能通華語專員來京商定章程具徵睦誼似應力爲贊成並由山東歲籌津貼之款查臣部應辦成案凡外國人在中國設立學堂者一概不與立案蓋以外國學堂宗旨既迥然不同課程自難一致故不准立案惟此次德國在青島設立學堂係其政府之意與私立不同而且籌定巨資遣派專員來華商定章程亦非私立學堂可比因與外務部籌商擬定俟其專員來華由臣部派員與之開議查其宗旨不悖課程皆符能由中國派員駐堂稽察自應准其立案擬酌籌開辦常年各經費以酬答與國之情並爲實行考核之地與外務部甫經商定嗣德國所派專員福蘭格來華遞呈草章由外務部轉咨前來臣等詳加察閱

大致學堂分爲兩級一爲豫備科一爲高等大學學堂監督各員皆爲德政府選派並不由中國派員考察每逢考試僅由中國學部派員監視學生畢業則請獎以進士出身均與_臣部章程權限有礙惟申明學堂嚴禁傳教課程兼重中學實爲外人在中國設立學堂所無是所望雖不無稍奢而宗旨尙無差異_臣等公商竊以爲大學名稱未便輕予假借學生功課學堂章程若不由中國派員駐堂稽察久必漸成具文學生入堂之始若不由山東提學使選送誠恐以中學毫無根柢者充數學生畢業之時若不由中國派員會同考試誠恐以程度未能適合者濫升至學生畢業或准升大學或酌量任使已足以示殊異礙難議及出身凡此數端關係極爲重要若不豫爲訂定必致流弊滋多因即派員推本此意與議旋據該員等與之反復磋商始議定學堂名稱定爲青島特別高等專門學堂學生入堂肄業皆由山東提學使考送中學教員由山東提學使選擇薦舉考試由學部派員會考管理各項章程皆照奏定學堂章程辦理並由_臣部派總稽察一員常川住堂考察學堂辦法與章程是否符合並稽察中學教員學生品行不歸監督節制其學生畢業俟考升中國大學堂肄習畢業後再行給獎不願升學者得由中國官府酌量任使以上各節詳細覆核與_臣部章程權限均無妨礙且可爲教育前途之助並足以聯絡邦交即令轉告福蘭格青島學堂章程果能按照此次所議辦理學部極願贊成即由學部認籌開辦經費四萬馬克常年經費四萬馬克以十年爲限嗣由德使改訂章程十八條由外務部咨到_臣等再加詳核實係照議改定即由_臣部核准立案咨外務部照會德使查照見准外務部咨准德使照稱青島特別高等專門學堂擬於本年開辦合將章程十八條呈覽至認籌經費一節其開辦費四萬馬克由_臣部籌撥其常年費四萬馬克因_臣部款項支絀電商直隸總督山東巡撫每年_臣部認籌一萬馬克直隸山東各認籌一萬五千馬克均經各該省電允按年籌撥見值開學在即開辦經費即由_臣部匯寄山東巡撫轉交該學堂收領常年經費以今年爲始按期匯寄以重學務而善邦交又兩廣總督張人駿奏據香港英總督盧嘉函稱擬在香港設立大學校注重

實業以便內地人士就學因所需經費較多商請設法籌助並刊送章程聲明無分種族無限宗教並援青島德國學堂曾蒙資助開辦爲言又據僑港華商聯名具稟請予維持見由司道設法湊集先行撥助銀洋二十萬元一面勸諭紳商量予捐助藉資聯絡外情

右公學

皇朝續文獻通考卷一百十四

學校考二十一 學堂游學 函字附述記 半日 幼穉園 女學

光緒二十七年 諭交涉事宜最為重要見在振興庶政尤應博採所長出洋游歷人員若能於各國政治工藝潛心考究切實講求庶幾蔚為通才足備國家任使近來各省士子留心時務多赴各國學堂肄業惟宗室八旗風氣未開亟宜廣為造就著宗人府八旗都統遴選各旗子弟年在十五歲以上二十五歲以下志趣正大資質聰明體氣強壯者造冊開送軍機處進呈聽候派員覆核挑選給資遣赴各國游學藉資歷練而廣見聞

二十八年 諭欽奉 懿旨前經降旨飭令各省選派學生出洋游學以資造就聞近來游學日本者尚不乏人泰西各國或以道遠費多資送甚少亟應廣開風氣著各省督撫選擇明通端正之學生籌給經費派往西洋各國考求專門學業務期成就真才以備任使

又外務部奏陳遵議出洋學生章程略稱奉 諭呂海寰奏出洋肄業學生宜防偏重以杜流弊學生出洋肄業原為儲才起見若如所奏近來學生出洋沾染習氣流弊滋多殊非慎重名器之意著外務部按照所陳防弊及考課保送各節詳晰妥議 旨等遵即恭錄 諭旨抄錄原奏分咨出使各國大臣核議茲准前任出使英義比國大臣羅豐祿會同出使德和國大臣蔭昌出使法國大臣裕庚出使美日祕國大臣伍廷芳出使俄國大臣胡惟德出使英義比國大臣張德彝等咨稱近年出洋學生多不習外國語言學問辦理未能一律廢時糜費莫此為甚方今參酌中西政要擇善而從宜於未派出洋之前先通中學將派出洋之時務畢普通之學既派出洋之後精求專門之學而後中西可以貫通成就可期遠大使館辦理應分三項一曰貴胄學生凡王公大臣子弟皆是各國均有一定優待之例執業時與同班學生一體肄習迨出學堂之門換去號衣則仍待以貴胄之禮中國如有此項學生應仿照日本暹羅王子辦法送入高等學堂如英國伊敦夏魯學堂之類恪守堂規隨班受課不得有挾貴挾賢之意一切稽察調考仍歸出使大臣辦理如不安分咨送回華免傷國體

見暹羅世子由該國駐法大臣照料管束視同子弟是其明證至學堂限晷講書解說恆慮不周最好自延教習一二人即任寓於其家每日由堂回寓即將學堂所授功課詳細講解尤易精進一曰官派學生如京師大學堂及各省督撫學政暨各大臣所送者皆是應於各學堂中擇其已畢普通學之業而又中西學優長者字純粹年在三十歲以下者略照同文館奏派諸生辦法學生功課行為由該監督隨時稽察每年大考一次由使臣親自考校其季考三次即委令該監督代考並面加訓迪助以忠孝廉節要旨曉以綱常倫紀大經俟專門畢業由使臣定期面試即將該生人品學問咨覆原送大臣並報明外務部轉咨管學大臣存案飭監督預備歸裝送回中國聽候覆試至服色一節仍宜示以限制如水師陸軍學生准用該船該營一色號衣以便操演學習礦路製造諸生亦准便服以利工作惟該項緇金號衣非學生所能自辦應照船政成案官為製備隨時給發其餘諸學生不必更換服色以昭制度其原送大臣業將所送學生指在某屬埠肄習專門者與使館相距太遠由使臣飭該埠領事充當監督照前辦理如附學之埠無中國領事官應飭該生於給假游歷期內親赴都城謁見使臣面陳功課以憑考察一曰游學學生如民間自備資斧出洋者皆是該生等既係自籌經費自不必限以年歲欲附民間何學聽其自擇惟欲入官學堂肄業者應稟由使臣考校合式即為咨送其造詣有成並欲游歷官廠以資印證者亦即據稟照請至專門畢業倘稟呈所得文憑求為過考者亦即示期調考如果相符與官學生一律咨部又專門學問精微奧妙各有不同如學礦務製造者須四五年學政治理財律例者須三四年方能畢業况出洋伊始恆須先練口耳或一年或半年聽講時方免枘鑿舉其大略非六年不為功若夫繙譯各員誠能於中國典章法度沿革源流風土人情利弊所在強弱所分得失機宜胸中悉了而又兼通中外語言文字者誠為後選第全材難得必求其選則堪供繙譯者曾有幾人更如出洋之日兼習中文非不甚善無如外洋學生每日授課四五點鐘聽講之時受之以耳鈔之以手已無間難之隙回至私寓必引伸體會考驗測算夜以繼日尚恐不足何暇兼習中文

使臣交涉事繁自難親爲督課卽派監督一員爲之師表地遠人多亦難兼顧調其來學有妨西學之課程置之署中更無多士之廣度故宜以專習專門之學爲斷至謂學生出洋竟有疑三綱五常爲無足重輕一節查各局官派出洋學生及同文館奏派各生尙無此種弊習且歷考外國哲學羣學各書陳說道理皆與中國之聖經賢傳相表裏是第忠學生之不真通西學耳果使眞通哲學羣學則忠孝之心方且油然而生又何有蔑視綱常淆亂倫紀之慮譬如中國讀書不成流爲鄉曲無賴是仍由學誼之未精未可歸咎於識字也英人理雅各所譯四書五經風行外國學生倘時加溫習不獨不忘中國之經傳且於繙譯虛字等訣領略取法受益無窮各國藏書樓所存中國書盈箱累帙聽人鈔譯更何有偏重洋文之弊要之未出洋之前中學清通而普通學又已畢業者出洋印證更習專門固自易否則學無根柢沾染習氣是皆不善學西學者也應請准由使臣查出實情嚴行斥革以除流弊見在 國家求賢若渴激勵戡成如華生願與洋生一同赴考外國之文中秀才武中千把之類應由使臣隨時咨明外務部立案以便將來從優獎勵惟專門學問日異月新應請選派諸生源而來以求新得抑更有請者學堂教習及私請之教習其束脩應由使臣隨時酌定蓋學生之功課逐漸遞進則洋師之束脩亦宜漸增以示鼓勵其有虛應故事者應立時辭退另行聘請如此賞罰嚴明則教習可期實心任事學生亦必益加奮勉會同咨覆前來查該大臣等所議各節均屬切要可行嗣後如有派赴歐美各國肄業生徒其一切辦法應請 旨飭出使各國大臣暨京師管學大臣各省將軍督撫一律遵照妥爲辦理至日本較歐美爲近見往該國游學各生實繁有徒業經奉 旨特派總監督專司其事應將此次議定各章飭行該監督參酌變通以期周妥

家之費師能自得免借異地之才一切尙覺周妥可見施行果能辦理認真將來成就者衆學堂不難普設人才益見蔚興應請 旨允准

二十九年管學大臣奏派學生前赴東西洋各國游學略稱上年百熙於召對時曾蒙 慈訓深以教習乏才爲念當經奏陳京師大學堂宜派學生出洋分習專門以備教習之選計自開學一載 等隨時考察益覺咨遣學生出洋之舉萬不可緩誠以教育初基必從培養教員入手大學堂教習尤當儲之於早以資任用查日本明治八年選優等學生留學外國至明治十三年畢業歸國多任爲大學堂教員迄今博士學士人才衆多六科大師取材本國此其用心深遠可爲前事之師 等思中國大學分科照目前物力士風而論求其規制完備程度高深恐非三四年所能猝辦而仰窺 聖明垂意之殷環顧舉國屬望之切精神所注終底於成亟應多派學生分赴東西洋各國學習專門以備將來學成回國可充大學教習庶幾中國辦理學堂尙有不待借材之一日及今不圖後將追悔見就速成科學生中選得三十一人派往日本游學十六人派往西洋各國游學該學生志趣純正於中學均有根柢外國語言文字及各種普通科學亦能通曉大凡置之莊獄假以歲時決其必有成就日本學費輕省故派數較多頗慮其沾染近時游學惡習 等仍當嚴定規條豫防流弊於學生臨行時以忠愛大義學成致用誦誦勉學期約以七年爲率西國十六人統計需費十萬餘兩日本三十一人統計需費九萬餘兩川資等項尙不在內爲培才起見自當勉爲籌畫擬在大學堂實存項下按年提撥開單奏銷又奏近年自備資斧出洋游學學生多年少未學不明事理之人於時局實在情形辦事艱難之故毫無閱歷故器然不靖流弊甚多若已入仕途之人類多讀書明理循分守法如內而京堂翰林科道部屬外而候補道府以下等官無論滿漢擇其素行端謹志趣遠大者使之出洋游歷分門考察遇事咨詢師人之長補己之短用以開廣見聞增長學識則實屬有益無弊其能親入外國學堂留學者尤善職官出洋與本國游學生漸相稔習灼知其品誦才識何人爲學行兼修之士何人爲乖張不逞之徒異時以類相求黑白確有明證且力持

正論之人日多則邪說詞勢自孤而不敢學生囂張之氣亦必可默為轉移且游學校游歷為尤有實際最為成就人才之要端歲月較久勞費尤多如宗室勳戚以及王公之子弟暨內外職官無論實缺候補能自備資斧出洋游學由普通而達專門考求實在有用之學得有彼國學堂畢業憑照者回國後尤宜破格獎勵其游學西洋者道遠費重應格外加優竊謂照此辦法則不煩國家絲毫經費而願出洋游學者必接踵而起矣

又外務部節日本游學生監督自備資斧學生不准入士官學校三十年練兵處奏定選派陸軍學生游學章程十六條

又鄂督張之洞奏定約東出洋學生並鼓勵章程略稱前奉 懿旨以出洋學生流弊甚多飭籌防範之法當經面奏學生在外國境內中國法令難行必須先商彼國政府尤為協助事始有濟旋晤商駐京日本使臣內田康哉與籌辦法使臣以兩國律法不同頗有難色繼經告以出洋學生如不妥籌約束聽其浮游廢學任性妄為犯義干名陷於罪戾則此後有志之士不復敢遠游求學

往取師資其先已在洋篤志力學者亦且懼為牽累廢然思返永無成就通才之日為害不可勝言該使臣始聘如有妥善辦法亦願電彼政府贊成此舉惟必須中國於安分用功學成回國之學生予以確實獎勵使各學生有歆羨之心并使彼國學堂確見中國有勸學求才之實意始於不安分學生有助我約束之法屬先酌擬章程再為商辦當即酌擬約東游學生鼓勵畢業生章程各一通疊次與日本使臣往返商榷復由該使臣轉達其政府與各學校校長公同會議於中國學生有裨而於彼國法權無礙酌再四日來始克議成計擬定約束章程十款鼓勵章程十款又另擬自行酌辦立案章程七款凡所以嚴防範考察之方廣鼓舞裁成之道綱領粗具於是此後游學生護符逃藪失所憑依已往者常知斂戢續往者亦有範圍上以示 朝廷彰瘴之公下以昭學術邪正之辨庶足挽橫流而宏造就

又閩浙總督魏光燾奏遣生留學日本略稱福建最近東洋乃官費生最少前者督臣李興銳僅選派十五名臣念福建為理學名邦從前文教昌明英賢輩

出土風較東南各省頗推樸茂然當此時局變遷時艱日亟固不能不存舊學以端士習亦不能不參新法以育通才因飭藩司提款萬餘圓豫交半年學費以後陸續籌寄當此需才孔亟之時蓄艾療疴尙慮緩不濟急師範為國民教育根本尤非速儲教員不能望教育之普及也

又駐比使臣楊兆璽奏請遣生游學比國略稱歐洲各國學校如林立國雖分大小為學之道則一即以比利時論其路礦製造諸學見重列邦自設使臣以來華生就學者日衆旅學二費亦較他國為廉比廷相待與本國學生無異比外部文部兩大臣悉心會議擬再多派學生分入各學堂即歸比政府經理自初學以速有成凡若干年計各費每生需比銀歲約一千六百佛郎以視近年江鄂諸省派一學生歲需銀一千六七百兩廉至三分之一同此學費而於彼培植一人於此可培植三人為數愈多收效彌廣請 飭各省將軍督撫按照所擬章程酌定人數慎擇清才遣送來比由臣妥商比文部循序教授漸底於成

三十一年出使日本大臣楊樞奏請遣派留學日本法政速成科略稱中國與日本地屬同州政體民情最為相近若議變法之大綱似宜仿效日本選者學務大臣暨各省督撫陸續選派學生來東就學綜計人數已逾三千然習法政專門者尚少緣日本各學校授此等專門之學皆用本邦言語文字中國學生從事於斯者須先習東語東文方能聽授講義約計畢業之期總須六七年今與東京法政大學校總理梅謙次郎商議於該學校內特設法政速成科專教中國游學官紳經日本文部認可一面分咨各省大吏請選派官紳資遣來學見在京師學務處暨直隸江蘇安徽福建浙江湖南廣東等省督撫均經照議選派統計來學官紳已有三百餘人其教授大旨約分四科曰法律曰政治曰理財曰外交每日講義各教習以東語口授而令通譯人以華語傳述之又以東文譯出漢文編印成帙分授各學生隨時研究此外尙有實地體驗法舉凡司法行政各衙門及官私所設物業有關於政治之學者俱由各教習隨時率領本科學生前往參觀藉資考證第外國法律條緒紛繁所謂速成科者係將

法理之所以然及各國法律之得失互相比較擇其適於中國之用者則詳加講授其餘姑置不論見在中國興辦鐵路礦務商標銀行等事均須參用外國之法查日本從前法律與中國同而與歐美異故通商各國亦向日本索有治外法權日本頒布憲法後通商各國方允將條約更正可見修改法律乃今日切要之圖況各省教案多因本地官紳不諳外國法律以致釀成交涉中國惟有將法律修改庶可查照近年中英通商條約第十二款中日通商條約第十款所載與各國公議將治外法權一律收回不受外人挾制是科之設不習日語日文便可進講專門之學校之入他學以六七年之功修始得一完全之科學者事半功倍

又 諭各省選派學生出洋游學該督撫已陸續遵照辦理惟所有派出學生皆應講求實學專科以期致用毋得避難就易徒託空言著各視其性之所近責令分門肄習殫心研究務底專精畢業回華考試合格優予出身用備器使見在留學東洋者已不乏人著再多派學生分赴歐美俾宏造就各該學生遠涉重瀛將為國家效用朝廷深為嘉許各出使大臣皆有監督之責當視學生如子弟無論官費自費如能堅苦嚮學志正品端應一體愛護其資斧不繼染患疾病者即酌量體恤如有不守範圍亦即嚴加約束冀廣成才

又 諭慶親王奕劻選派宗室出洋學習武備
三十二年學部奏出洋學生非具中學程度概不咨送略稱查東西各國選派游學大都取之大學堂畢業生其自費游學者亦皆學問大成更求精進之士見在與學伊始雖不能過高其格自隘其途而根柢未完遽令出洋不惟耗費財力且亦易滋流弊擬嗣後京外派遣游學生無論官費私費皆應切實考驗性行純謹具有中學堂畢業程度通習外國文字能直入高等專門學堂者始予給咨所有中學堂之理化博物等科師範學堂之教育學論理學心理學及法政學堂之政治法律各科向多求之外國者尤應聘請專門教習力求完備能於本國養成專門學業始行取資海外似於興學之道較為切實
又政務處議奏給事中陳慶桂奏請 飭各部院遴選科道部曹出洋游學游

歷略稱科道為獻替之官部曹有辦事之責於各國政治尤應講求且新設之商部學部巡警部以及交涉工程法律軍事皆當整頓若不認真考究何以措置裕如應請各部都察院堂官遴選科道部曹派其出洋游學游歷一切章程照翰林院辦理查臣等前經會同學部議准袁世凱奏請選派翰林出洋游學游歷係為培養人才廣興教育起見此次該給事中原奏最為推廣用意正同惟以百人為額此外更有情殷嚮學之人乃復向隅 國家造就人才自宜統籌辦法應由學部設立法政學堂作為遊學預備凡各部院人員情願肄業者悉數報名收考三年畢業擇其志趣正大程度較深者由學部咨送出洋肄習專門則費省功倍收效更宏至各衙門舉辦要政必須出洋調查應准各該堂官遴選派往以期擴充學識為恢張新政之需至游歷一節上次張之洞會同管學大臣奏定學堂堂章程所有自費游歷獎勵辦法仍應照章辦理

又學部奏酌擬管理游學日本學生章程略稱出洋諸生稽查之法向未有畫一章程見在出洋游學者以日本為最多亟應先行設法管理查日本各種學校完備固居多數而專為中國學生設立之學校學科參差辦法遷就者亦所不免此學校之宜指定者也求學之道宜恆宜實游學日本各生以無人稽查之故所入之校視如傳舍認定學科意為遷移甚或但往應考而平日潛行回國借鈔講義而本人並不上堂此功課之宜查察者也學生既多性行不一輕年子弟見異思遷僑寓他邦家教不及其以行檢不修貽笑外人者時有所聞此品行之宜匡正者也各省所發學費向無定數多少懸殊或因補額而時起紛爭或因求多而互相藉口經理既多不便濫費亦所不免此學費之宜釐定者也有此數端管理事宜至為繁雜而各省所派監督不相聯絡辦法參差似非特設員額不足以專責成非一其事權不足以資約束再三酌議擬就出使日本大臣署內設管理游學日本學生監督處設總監督一員由使臣兼任設副監督一員由臣部會商使臣奏派其應有分課辦事及分校監察等員概由總監督委派各省原派監督一律撤回似此辦理各省經費無所增而事權畫一管理較為切實

又議覆翰林院撰李文傳元請令游學之士補習中文略稱此項畢業生考試後經部詳加察核其曾習經史品行謹飭者頗不乏人聞有青年出洋中文尚淺者然科學頗有所長亦足應一時之用見當世變紛乘需才孔亟如兵農工商路礦諸要政尤非專門之選不足以資贊助且該畢業生內其學業精進有足誦頌外人者若既經專門學成出任兵工路礦之事又復令其補習中文三年實屬緩不濟急惟於辦公之暇仍令留心講求中文兼習公牘以資實用似於造就人才之意仍相符合至部奏定遣派出洋學生章程聲明非具有中學堂程度者不准給咨則嗣後出洋畢業學生亦不致有中國學問素未窺見之弊部分咨各省於選派學生慎加選擇總期重根柢而育真材

又練兵處訂陸軍學生游學歐美暫行章程

又學部通行京外議定游學歐美學費數目英每月十六鎊一年一百九十二鎊法每月四百佛郎一年四千八百佛郎德每月三百二十馬克一年三千八百四十馬克俄每月一百三十五盧布一年一千六百二十盧布比每月四百佛郎一年四千八百佛郎美每月八十圓美金一年九百六十圓美金每年學費均照西歷計算此係按照入大學專門之學費計算若新派學生尚在學習豫備者每月可減去五分之一京外各處匯寄學費應將中國銀兩按數合成金鎊佛郎馬克盧布等由外國銀行匯寄

三十三年學部奏官費游學生回國後皆令充當專門教員五年

又外務部等奏准貴冑游學章程十二條度支部妥籌的款遣使貴冑學生出洋歸出使大臣稽查一切游學事宜應由外務部妥為經理

又學部奏派蒯光典為歐洲游學生監督並陳辦法三條

又會議政務處覆翰林院侍讀周爰諷奏請整頓學務略稱覆核所奏蓋有鑒於新學流弊致有近日亂黨之禍因思補救之方用心良苦惟於奏定章程及學部歷年辦法尚未盡悉中國論學於人倫道德最所注意其餘專門各科學向以為曲藝小道不屑講求處此競爭之時不能不遺留學東西洋者勢也願留學西洋其費不貲所以留學東洋無非為節省起見官費生則由各省遴選

資遣自費者人數較眾其中浮薄少年不免惑於邪說致有悖逆之詞應飭駐使監督隨時訪察勸導漸除惡習其宗旨純正有志向學者未可一概而論其畢業回國有中學粗淺者別出補習未始不可若概限三年轉涉苛待即擬用鄉官亦必擇而後任若悉予屏斥阻其進身之路更驅之入亂黨而信邪說其害尤甚至學堂奏定章程本不准購閱謬報逆書應由學部重申禁令責成管理之員隨時稽察

又學部奏議覆閩浙總督松壽奏陳普通速成游學生流弊略稱十年以來京外遴選學生分赴各國游學日本地近費輕去者尤夥當時風氣未開需才孔亟故各省多有派遣速成之舉其始也選擇較嚴中學尚有根柢畢業歸國其中不乏具有心得之士各省興學之初頗資其力迨後考送之格漸失之寬願游之人日眾甚至有應入小學之學生亦支官費習速成者該督所論普通速成之弊洵不為過部有鑒於斯曾於上年奏准習法政師範速成者嗣後概不咨送至考試一節部於咨各省考驗游學畢業生每年八月舉行一次專指在東西洋各國大學及各種專門之高等學堂畢業者而言其餘中學以下及各種速成學堂畢業者均無庸來京考試

又出使日本大臣楊樞密陳學生在東情形及籌擬辦法略稱日本普通學堂專為中國學生設者如成城學校等三四處尚稱完備然不完備者則不下十餘處有以三個月畢業者有以六個月畢業者甚至學科有由學生自定者迎合學生之意學生即喜入之而不能禁此普通學生之不可恃也日本高等專門學校皆有定額中國學生年增數倍而學額不能增屢商日本文部皆有難詞即能增額亦難容此數千之眾况後來者尤難豫計此高等學堂之不能容也學生在未習普通者以兩年半畢業此兩年半內僅習日本語文猶慮不足其他學科往往有名無實近並兩年半畢業者亦寥寥其人此普通學之不可信也日本學生自小學起每試驗皆合格至入大學亦須十四年若是其難而中國學生到東年餘在本省又多未豫備其或國文亦未盡曉遂俾入大學三年畢業一試獲雋出其強不知以為知之學說以應世用其貽害可勝思耶故

雖大學及高等畢業者亦未可盡信也所入之校屢遷所習之業無定爭學費則一省以一省爲例補學額則一府與一府爲仇甚至姦竊之案亦不一見貽笑外人莫此爲甚清源正本惟在慎選擬請 飭學部嚴定選派學生出洋留學章程一在本省學堂須有五年資格者一豫備日文日語兩年以上者一如學生到東有不法行爲及倡異說者惟原咨送官是問一指定學生學科應入何校到東以後不得更改各省將軍督撫既慎選擇於前 復嚴加甄別於後庶學界可以少安

三十四年農工商部郵傳部會奏議覆御史俾壽奏請派子弟出洋學習工藝略稱欲圖富強在重實業從前 之洞奏訂學堂章程聲明國民民生計莫要於農工商實業與辦實業學堂郵傳部於上海設立高等實業學堂唐山設立路礦學堂蓋冀人材之日出而圖實業之振興惟此種專門之學皆以普通學爲始基非先於普通算學理化博物圖畫等已具根柢者不得入專門近來各省派往東西洋之游學生未經中學堂畢業普通學不完備出洋以後見夫法政等科可不必習普通學而躐等以進於是紛紛請習法政以致實業人才愈見其少今該御史所奏工藝爲富強之要圖選派子弟分送東西洋使各專一藝洵爲扼要之論擬嗣後京師及各省中學堂以上畢業之學生擇其普通完備外國語能直接聽講者酌送出洋學習實業並令此後凡官費出洋學生概學習農工商各項專科不得改習他科又以前自費出洋之學生非入高等以上學堂學習農工商致三科者不得改給官費其認習實業已給官費之學生亦不准中途改習他科如此量爲限制庶幾實業人才可以日出

又學部奏酌定自費游學生考入官立高等以上實業學校補給官費辦法略稱近日游學日本入官立高等以上學校者漸次增多各省每因限於財力未能盡給官費惟農工商致有富強要圖不可不亟事提倡况近日游學諸生大都趨重法政願習實業者少尤應特示鼓勵擬由 部咨行日本游學生監督處除官立五校係與日本定有特約仍應照舊辦理外其餘各省官費學生查明見有人數作爲定額嗣後自費學生考入官立高等以上學校習農工商

致三科者遇有官費缺出准其揆補又醫科一項學理精奧游學生習之者更妙而斯學爲民命所關亦應亟於提倡此項學生擬准照農工商致三科學生辦理

又奏酌改管理日本游學生監督處章程另設游學生監督一員

又御史葉芾棠奏赴美游學生請按省分派

宣統元年外務部奏美國減收賠款業於本年實行則選派學生出洋即應舉辦非徒酬答與國實乃推廣育材 等擬在京師設立游美學務處管理考選遣送稽查等事並附設肄業館選學生入館試驗隨時送往美國肄業以十分

之八習農工商礦等科以十分之二習法政理財師範諸學專派監督駐美管理學生學費功課起居等事至於學生名額案照各省賠款數目勻給其滿漢蒙藏亦酌給名額以昭公溥

又學部奏酌擬考試畢業游學生章程一考生資格二查驗文憑三豫行甄錄四分門命題五考試日期六分等給獎七分職掌八嚴密關防

又外務部奏擬建游美肄業館懇請給西直門外清華園地畝以便興築而隆作育

二年學部奏禁止游學生與外國人結婚略稱近來東西洋游學生時有與外人結婚之事此事在尋常僑民本可不必禁止惟在游學生則當修業之際家室之累重即學問之念輕一弊也外洋女子習尚較奢而游學生之學費有限

瞻養既多耗費即學費亦致不給二弊也游學生既娶外國婦女易有樂居異域厭棄祖國之思則雖造就成材而不思歸國效用亦復何裨時艱三弊也查

東西各國結婚之期皆在學成以後未有學未畢業先求家室者况中國派往游學生尤當刻苦求學豈容遽求晏安 部見擬咨行東西各國出使大臣嗣後游學生未畢業時均禁止其與外國婦女訂婚及結婚違者畢業時不給證

明書官費生追繳學費以戒怠荒而勵進修

又外務部會奏第一次遣派學生到美入學情形略稱委派外務部主事兼充游美學務處會辦唐國安於上年八月護送學生出洋見據游美學務處轉據

唐國安回京復稱奉委即督同學生四十七名出都於十月初一日安抵美京旋率諸生往士普令飛魯分入各埠學校適值該地學校學期業已過半且各生程度不一勢難概受同等教育其優者固宜直入大學俾無廢時之患其次者亦必及時豫備循序漸進方無躓等之虞當會同駐美監督容授將學生金濟等分別送入科乃魯各大學暨羅蘭士各高等學校並親往詳查所有教授管理諸法均甚相合諸生亦皆安心向學竊維遣生游美就學於中國教育前途大有關係此次倉猝考試雖未足百名之額而所派學生四十七名程度均有可觀年齡亦皆合格學務處辦理尙屬妥洽因材授學既未凌節而施殊途同歸足收樹人之效

又直隸總督陳夔龍奏整頓北洋派往游學辦法並籌撥學費略稱北洋先後派赴各國游學生內計日本一百五十名美國五十一名歐洲英比德法四國共二十四名而考核選派各事宜日本學生多由提學使經理美國學生向由津海關道經理歐洲學生向由海防支應局見併入財政總匯處經理以留學一事分隸各處各不相謀漫無考察竟有出洋已七八年仍未在專科畢業或仍在中學肄業者尙有專門早經畢業實練亦有經驗惟以官費之故仍以練習藉口竟不聲明還國日期者若不加整頓深恐游學各生皆將習爲荒嬉遺棄祖國其爲虛糜公款之害猶淺其爲貽誤心術之害實深教育前途何堪設想擬將以後遣派游學生事宜統責成提學使經理將見在游學各生切實查明其多年尙未升學及畢業久不回國者分別停費遣還詳請另派並由該司另訂考選咨送管理交代各辦法以歸畫一至留學經費統計北洋每年約達十六七萬兩除提學使應發之二萬餘兩外其餘均係臨時騰挪並未指定之款游學爲儲才至計經費所需皆與外人交接道里遼遠匯寄需時稍有虧欠動關 國體見當清理財政之際此項經費自應 飭該司道處妥擬辦法又出使義國大臣吳宗濂奏財用日絀宜興工藝實業懇 飭部會議通行各省每省各籌款三萬餘金派遣學生來義肄習工藝以裕利源倘虛庫款支絀之省不克實行莫若令各省本業巨商集款派生出洋學習本業較爲便易並

請 飭農工商部通飭各省工商總會各業公司酌量籌議

又學部奏籌設游學日本高等五校豫科略稱光緒三十三年 臣部奏准與日本文部省定約每年於東京第一高等學校高等師範學校高等工業學校山口高等商業學校千葉醫學專門學校添收中國學生一百六十五人開辦三年前後考收學生共計四百六十餘人近據游學日本監督處呈稱見在留日學習普通人數減少普通畢業者有不敷高等五校考選新生名額之慮自應先事豫籌辦法惟我國中學堂畢業各生所學外國語文英文爲多日文甚少若以之派往日本仍須在該處豫備日文日語不能遽進高等各學校爲節省經費計不如考選中學畢業生先在本國授以日文日語期以一二年期熟再行派往日本庶幾用費省而收效速擬在京師設立游學日本高等五校豫科每年由各省選取中學堂畢業生送京考選先入豫科肄業俟程度合格再行送往日本應考高等各校至於此項豫科所需常年經費擬飭日本游學生監督將五校經費及監督處經費切實摺節並由 臣部會同度支部嚴催各省將認定欠解之五校經費迅速解清此後所解五校經費及監督處經費計可略有盈餘即以之撥充設立此項豫科之用以免另行籌款追加豫算之煩

三年外務部奏准游美肄業館改名清華學堂訂立章程開學

又學部奏前擬籌設游學日本高等五校豫科見在亟須開辦茲擬具章程十三條即於本年秋開考選學生入堂肄業

右游學

宣統元年候補四品京堂勞乃宣奏請於簡易識字學塾內附設簡字一科並變通地方自治選民資格略稱憲政逐年籌備事宜內開第二年頒布簡易識字課本創設應州縣簡易識字學塾頒布國民必讀課本第四年創設鄉鎮簡易識字學塾第七年人民識字義者須得百分之八第八年須得百分之九第九年須得百分之十又稱學部奏編輯簡易字課本擬編三種第一種課本凡道德知能之要象數名物之繁詳徵約取備著於篇約三千二百字期以三年畢業第二種課本則於第一種課本中去其理解稍高深事物非習見

者約減爲二千四百字期以二年畢業第三種課本但取日用尋常之字目前通行之文約之再三定爲一千六百字實屬無可再減期以一年畢業令小民度其力所能至者肄業之又民政部謂五年地方自治成立之年爲選民者必須二十五歲以上能識文字之人而目下各省鄉民識字者甚少往往闖村無一識字之人即闖村無一人合選民資格自治何從辦起補救之計奈何一在變通簡易識字辦法一在變通地方自治選民資格歐美之字以二十六字母拼合而成習此二十六字母明其拼法即可識字字少易識故識字者十人而九日本文化本出於我與我同文用我漢字而漢字之外則有五十假名拼音達意以爲補助上焉者高深之學必用漢字而愚賤之人但識假名即能達口中之語言明目前之事理是以村農野老販夫走卒皆能觀書作字地方自治不勞而舉我國自古以來專用漢字別無此項易識之字以爲補助故惟上等之人乃能識字國民教育難於普及愚氓近年中國各處有志教育之士有鑒於此創造易識之字者不一而足而以京師拼音官話書報社所定官話字母爲最善其法以五十母十二韻四聲轉輾相拼得二千餘音京師語音皆能包括識此數十字明其拼法無須通曉文義即能以白話達意閱書報作函札無乎不可無論性敏者數日可通即極鈍之資至遲兩三月無不解者京師直隸奉天等處推行其廣光緒三十一年前署兩江總督周馥設簡字學堂於江甯省城即以此譜爲本而酌增母韻期合方音定其名曰簡字奏明立案奉旨允准行之數年畢業多人流播於江浙各屬成效昭著今復考古今聲韻之源流參合南北方言之同異訂爲簡字全譜一編包括中國各處語音而仍以京音爲主又別輯各等譜錄共爲五種恭呈 御覽下學部考核議奏竊謂此項簡字易識易解允堪爲漢文之補助若於簡易識字學塾內附設一科並令能識此簡字者一體准爲地方自治公民實足爲變通補救之道擬請 飭民政部學部會議比照簡易識字課本先在京師地方教授數月辦法將前所呈簡字譜錄亦先教授數月如果易識易解確有成效即由學部勒爲定本令各省凡設立簡易識字學塾之處皆附設簡字一科若極貧者若老老者若幼童皆

令識此簡字並將國民必讀課本編成白話簡字令其講習遠者三五月近者一兩月即可畢業其能識漢字之人亦令兼識簡字每星期酌加簡字功課一二小時一年畢業綽然有餘仍由民政部通行各省將地方自治選民資格略加變通凡不識漢字而能識簡字之人一體得爲選民此字傳習極易畢業之後即可轉授於人以一人授五十人計之一傳而五十人再傳而二千五百人三傳而十二萬五千人四傳而六百二十五萬人一邑人口至多不過百萬不待四傳教育即可普及若每一州縣蒙小學塾附設簡字一班不待兩年可使天下之人無不識字而選民資格到處易於得人蒸蒸日上有不與東西立憲諸國齊驅並駕哉

勞乃宣讀音簡字通譜自序 略曰余主張母用京音簡字之十九母而加以疑微爲二十一母韻用京音簡字之十二喉音而加以支微齊魚虞爲十六攝聲用京音簡字之四聲而加以入聲爲五聲符號用漢字省筆拼法用一母一韻兩拼而左右橫列乃京師讀音統一會所定之譜爲母二十四介音三韻十二聲號四細按之二十四母中見溪曉各增一副音泥之副音別增孃母影之齊合攝分爲介音并其所增所分則仍爲二十一母也十二韻外加以介音三韻及齒音母之開口本讀支韻則仍爲十六攝也四聲號外加以不記號之上平則仍爲五聲也是余所呈讀音統一意見書不啻全經採用矣惟符號用漢字獨體之筆畫本少者拼法則用一母一介音一韻三拼而上下直列不無小異平心而論符號用獨體完全漢字有本有原較之省筆實爲古雅而三拼則不如兩拼之易知易能既用三拼自不得不以直列爲便矣嗣聞部中謀教育普及將設注音字母傳習所於京師實行此字逐漸推廣於全國因論及與簡字之異同及推行之利弊皆謂部定讀音與簡體皆同其小異之處稍事變通即可推行無弊乃草讀音簡字母韻對照表一篇母韻符號一依部定而以簡字之條理疏通之其三拼之難知者按簡字之母用介音豫爲拼定以便初學於部定原本仍無違異今閱傳習所注音字母國語講義一冊其教

授之法亦先以介音拼母然後拼韻與鄙意不謀而合足徵心之有同然矣夫普通教育之道以文字易知與語音統一爲兩大階級簡字授受之規程以易知爲初步統一爲進步而讀音開會之宗旨則以統一爲正義易知爲旁義蓋命意各有在也然以傳習所講義觀之既將介音先爲拼定以期易學矣又必純用京音不先授以部定之國音是仍以易知爲初步以會中所指之旁義爲正義也即此可見先學方音後學國音爲不得不然之定法矣顧我國語音不止一類必各處皆有方音之譜方周於用此統一會進行程序中所以有按照等韻原則盡我國五方所應有之音更定閩母若干附於音表之後之例也余前作簡字全譜定有京音宵音吳音閩廣音各譜足以包括吾華全國之音簡字行已有年各處習者不少即以此爲藍本定爲閩音之譜事半功倍因按京音等四類各取讀音之字不足者益以簡字釐爲閩音四譜各附方言一則以讀音簡字分注左右以爲舉例列於對照表之後俾便於學者名之曰簡字通譜以備

教育普及之助部定之譜雖未愜心貴當而略加參酌即足以變通盡利余竭一得之愚或爲舊時同志當代明達之所不棄也歎

又山東巡撫袁樹勛奏創設簡易識字學塾略稱國民程度取決於識字人數之多寡學堂課程繁重未易普及惟簡字學塾之設事易舉而效亦速然非推暨於僻壤遐陬則立教不溥非先之於通都大邑則取法無由擬就簡字學堂試辦章程刊印多張札發各府州縣飭令分投勸辦先於省城設立十處以爲之倡應需簡字課本擇其淺近簡明者約三千餘字暫備講授藉應急需俟學部頒布簡易識字國民必讀各課本再行遵用以歸一律

又河南巡撫吳重熹奏豫省籌設簡易識字學塾略稱擬先在省城暫設二十處並飭各廳州縣統於年內就地籌款每屬倡辦二十處分設城鄉以爲模範所需章程課本見尙未奉學部頒發即由該司酌定簡章二十條復採擇尋常通用之字都一千六百由單字進於短句編輯成書分發各屬以爲暫用課本一俟學部將此項課本章程頒發到豫再行遵照改用

又學部奏遵擬簡易識字學塾章程

二年貴州巡撫龐鴻書奏設簡易識字學塾

三年學部奏報改訂簡易識字學塾章程爲補助小學推廣教育之用

右簡字學塾

宣統二年資政院奏速記學堂開辦情形略稱原定章程速記學堂學生分
院招取及各省咨送二項其由
院招取者業已如額取錄惟此次投考人數
至二百餘名之多錄取定額僅十二名未免過隘因於正額外酌設附取備取
各十二名其附取各生准令一律入學備取各生聽候出缺傳補其各省咨送
學生計奉天順直江蘇安徽江西浙江湖北湖南山東河南山西等省先後經
各該省督撫咨送到院者已有四十餘名擬將此項學生及
院招取各生併
爲第一班督飭各科教員按照課程認真講授其餘邊遠省分一時未到者仍
咨催該省督撫迅速咨送以便續行辦理

右速記學堂附

光緒三十一年給事中劉學謙奏請飭設立半日學堂略稱各省設立學堂能
入學者多係富家子弟其貧寒子弟急待謀生者大半難得入學擬請
飭各
將軍督撫令各州縣廣籌經費立半日學堂專收貧寒子弟不取學費不拘年
歲使之無所藉口無所畏難延請教習勤爲講解俾略識道理漸能養成人格
似於風俗大有裨益且此項學堂愈多愈善無論城鄉每二三百家即應設一
處庶嚮學者衆教育可以普及

三十三年安徽巡撫馮煦奏多設半日學堂略稱皖省風氣漸開凡高等學中
學小學均粗有規模搢紳子弟與凡民之秀異者莫不彬彬向學爭自濯磨然
而偏遠之鄉孤寒之士或困於生計無入學之資或迫於時間無入學之暇其
柔者安於愚賤爲董戒所不及其強者外於名教且暴棄以自甘
怒然憂之
查半日學堂因鄉鎮之社會有學堂之規條無論士農工商下至廝養之役凡
有餘力皆可乘隙入學或兼習補習卜晝卜夜各適其宜爲時暫則無玩愒之
虞爲用省則無籌措之苦法既不煩事亦易舉凡鄉鎮僻陋爲教育所不及者

極宜因地制宜酌量設立俾有觀摩若何分配學區畫一教科遴選教員或概歸官理或獎勵民立安定章程一律開辦

右半日學堂

光緒三十三年閩浙總督松壽奏創辦幼穉園略稱查閩省各學均已照辦惟幼穉園尙付闕如殊不足以資保育擬就省城借用光祿坊玉尺山房改建閩省公立幼穉園凡三歲以上至七歲幼孩由幼穉園隨時保育令老成識字之婦人爲保姆以教之務使發育其身體漸啓其心志以求合於良善之軌範

右幼穉園

光緒三十年 命南海內設毓坤會

謹案

孝欽顯皇后允裕庚京卿之女公子之奏在南海創設女學賜名毓坤會命王公貝勒之福晉格格及京員三品以上之命婦女子均著報名入會學習東西文字即派裕女公子主其事夫女學之成就卓卓中國則有郝懿行妻之梁端汪遠孫妻之王照圓西國則有摩哈默德之母侯失勒約翰之姑今在會女學生果能仰體 懿旨淹貫中西體用兼備豈不甚善乃僅僅研究語言文字以備賜宴各國公使夫人之時爲之通譯似於立會之宗旨猶未窺見其大者也

三十三年學部奏議覆御史張瑞蔭奏請豫杜女學弊端略稱原奏稱女學設立漸多恐滋流弊春秋運動會不宜排隊入場江南賑捐不宜躬自賣物登臺演唱均係別嫌明微之意惟查京師學堂運動會並無女學生排隊入會之事

臣部仍當通飭禁止以慎防維其江南籌賑女學生在會執事業經禁阻

又署黑龍江將軍程德全奏創設江省幼女學校

又會議政務處奏議覆都察院代遞候選道許珏條陳學務略稱原奏稱女學堂宜遵守中國禮教不可參用西俗近日學部奏定女學堂章程學齡以七歲至十四歲爲限似已深知各省女學之弊惟此輩好新尙異多視功令爲弁髦即如外城有女學傳習所其招考學生告白顯與定章相背近復有婦女藉口江北賑災屢次開會出賣茶座列肆售物女學生登臺唱歌此等亟宜嚴禁並

申明女子學齡即女教習亦必年過四十方許充當並乞將 御纂內則衍義命儒臣敬謹校刊 臣等查女學關繫至重東西各國亦以踰閑蕩檢爲可憂本年奏定女學堂章程凡東西各國成法其合乎中國禮俗有裨於教育者則仿之於禮俗不宜者則罷之蓋於啟發新知保存禮教權衡至熟本年南城開女學慈善會以江北賑災列肆售物令女學生在會執事於中國禮教不合經督學局曉諭禁阻並咨民政部會同示禁嗣後京外女學堂凡與此次奏定章程相抵牾者均由管理學務人員及地方官隨時糾正以杜流弊至原奏所稱女教習必年過四十始許充當見在女學教員缺乏若過於限制轉恐遷就似宜查其性行未便過拘年歲女學與辦伊始修身一科莫要於涵養德性恭讀御纂內則衍義允爲化民成俗之要典擬由 臣部敬謹刊刻頒發京外女學堂隨時宣講以端教化之原

又奏議覆侍讀周爰諷片裁抑女學堂并撤回留東洋女學生查各省女學生出洋未經官派皆係自費風氣所趨殊難強禁近時惟兩江督臣端方有咨送者嗣後非確查其家世性行不至稍滋流弊者不輕予官派其男女之自行擇配政治之集會演說則學部奏定女子師範學堂章程業經嚴切屏除苟管理得人此等流弊自少矣

及奏頒女子師範學堂章程三十六條女子小學堂章程二十六條

三十四年學部覆奏御史黃瑞麒請設立女子師範學堂略稱原奏稱各省官立女子師範學堂均未開辦私立者寥寥無幾擬請 飭學部先於京師由官設立女子師範學堂以爲提倡並轉飭各省提學使按照定章於省城府城速立女子師範學堂以爲振興女學之地 臣部曾詳訂女子師範章程以啟發知識保存禮教爲宗旨是女子師範宜速籌舉辦查北洋早經設立畢業一次其餘各省專教女師範者尙少該御史所稱在京設女子師範學堂明示準繩自是要義應即由 臣部妥籌設立以爲模範

又奏設立女子師範學堂於京師暫招簡易科學生學習

宣統元年又奏遵擬女學服色章程

二年東三省總督錫良奏撥款修建八旗女工傳習所

又學部咨陝西巡撫恩壽該省女子師範學堂規則照辦其所需經費應准立案

臣謹案顏氏家訓曰教兒嬰孩就傅以前性質志量皆已略定少成若性長則因之若是乎子之成立也全賴母教而母教必自與女學始中國女學萌芽伊始即有九江女子康愛德遇美國女士吳格矩挈之至美由入小學而中學而畢業於墨爾斯根大學吾國二萬萬女子才力智慧度亦不甚相遠也聞風興起何至讓康女士爲麟角鳳毛乎誠能遍設女學繩之以禮教獲其益而弊不叢生將見大戴禮保傅篇所言胎教之法亦首基於此未始非保種強國之要道也

右女學

皇朝續文獻通考卷一百十五

賜進士出身頭品頂戴前內閣侍讀學士 劉錦藻恭纂

職官考一

臣謹案周六官三百六十屬各有職掌而百事具舉後世設官猥多賢者苦於掣肘而不得盡其長不肖者便於推諉而藉以分其謫事之舉者轉少 昭代龍興其制度不知於周官何似要觀元明則遠過之乾隆五十年復加釐正滿漢並用內外相維一代閱規聚乎大備前考紀載翔實百餘年來無甚出入光宣開變更官制但易名稱不知任官惟賢不惟名匪特尚書令在漢為小吏唐屬官校尉在漢為要職宋極冗賤即大學士品級 國初祇正五品康熙五年改為二品雍正八年始定正一品亦可見崇卑之無常矣其不敷其實紛紛然何為者然其建置之始除授之略不能不搜采以備參稽官數品級固已寓乎其中無庸復贅若夫東三省近開行省臺灣已非吾土西藏設官迥殊則援前考新疆之例另立一門至土官世職職秩封階仍依次附後續職官考

官制

臣謹案前考於內外職官沿革統入官制後分文武具詳職掌茲編首載通論次列在京文武官所有事例悉隸本職之下次則直省官員文自督撫武自提鎮亦各分別一官一缺之量移裁設以類相從非敢更體例也聊便檢查爾

嘉慶四年 諭自古六卿分職各率其屬原未嘗有總理之名致啟專權之漸見在所以令成親王永理總理戶部者因川省軍務將次告竣軍需銷算事務殷繁自應仍行總理俟軍務奏銷事竣即不必總理戶部事務至儀親王永璇乃係宗人府宗令領侍衛內大臣正紅旗滿洲都統並管理武英殿御書處樂部及雍和宮中正殿各處事務既繁職任較多恐難兼顧著不必總理吏部事務

道光十一年 諭朕恭閱康熙五十九年 聖祖仁皇帝實錄內載吏部等衙

門會議各督撫題裁閒冗官三百三十六員應照所題裁汰奉 聖諭口北道缺不必裁餘依議欽此復據吏部查明開單雍正年間共裁二百五十餘員乾隆年間共裁三百三十餘員嘉慶年間共裁二十餘員道光年間裁汰二員朕詳加披閱仰見我朝 列聖相承澄敘官方剔除冗濫至為詳慎國家設官分職原以保乂民生必使閭閻獲益方收指臂之效若任令冗員充數本任既無事可辦而各員一切公用不能盡出己資勢必取之民間多設一官百姓反多受一官之累朕心慮保赤非為節省俸糈起見總期有裨民生官不虛設著直省督撫及各河督鹽政悉心覈議於所轄文職閒員如有可裁者酌量裁汰奏聞請旨用副朕慎簡官僚勤恤民隱至意

臣謹案漢光廢四百縣而下民業定隋文廢五百郡而天下政行類以官不用多而在乎得賢政不在煩而貴乎省事也 國朝鑒明代官制冗蕪屢加裁省而印紫綬綬若若者尚有吏多於民之慨廓而清之豈徒沾沾焉為節省經費計哉

道光十二年御史馮贊勳奏請復設巡察官觀風整俗一摺得 旨著大學士軍機大臣會同吏部都察院妥議具奏尋議奏該御史請照雍正年間設巡察官循行各府專司巡察其地方呈詞督撫已審結而翻控者准其親提審訊惟各省督撫悉由灼知慎簡受恩既深歎歷亦久若盡委其任於巡察是未示信任於重臣而專寄耳目於新進設奉使非人私謁苞苴皆所不免是委以糾劾官吏之權適足開餽遺逢迎之漸所請應毋庸議

臣謹案雍正四年 詔議仿唐貞觀中置觀風整俗使巡省天下觀風俗之得失先浙江福建廣東等省次之後俱停罷今部議謂委任巡察恐啟苞苴之漸亦專就不肖者言之耳

十三年 諭國家設立營伍專以嫻習弓馬為事操防騎射是其本分總在平日習勞不許稍耽安逸自將軍副都統提鎮以至將備宜如何振刷精神無事則士盡干城有事則人思敵愾方為無忝厥職從前乾隆嘉慶年間因將弁偷安坐轎並不乘馬節節頹廢 諭旨嚴行禁止煌煌 聖訓自應永遠欽遵朕

臨御以來諄諄誥誡猶前志也即如原任福建提督許松年身在行間乘坐肩輿特降旨革職懲辦不少姑息仍恐日久生懈不可不防其漸總在督撫大吏嚴行查察有犯即參方可整飭戎行日成勁旅夫身為武員而憚於乘騎必致開驕惰之端而啟廢弛之漸安望其整軍而經武乎著通諭各直省將軍副都統提鎮將備等除高山峻嶺逼仄崎嶇或稻田水曲不能乘騎者准其乘坐肩輿其餘均不准坐轎喧耀街衢遠例乘坐該督撫即行查參毋稍瞻徇經此次訓誡之後仍敢陽奉陰違將來科道參奏或經朕別有訪聞除本員照從重治罪外定將該督撫嚴行懲處決不寬貸

咸豐三年戶部侍郎王慶雲奏略稱竊思理財之方首在節用節用之要首在省官今耗蠹最甚宜分別裁併者莫如河工漕運兩衙門河工耗國漕運耗民而因以耗國然其弊總由於官多如山東河南既有兩巡撫兼管河務而又設河東河道總督專管黃運兩河此河督之冗也沿河道員皆有管轄應汛之責皆應管理錢糧而又設河庫道司其出納此河道之冗也自河夫改為河兵沿河設營統以裨弁平時駐宿河干熟諳水性者弁兵也搶險防護雲梯礮築以性命與水爭者弁兵也乃廳官專管錢糧汛官分司工段以冒支多寡為缺分肥瘠求其識水性之平險諳修守之機宜者百無一二此廳汛文員之冗也至漕糧為天庾正供凡有漕各督撫及各糧道孰不當盡職掌而專設漕運總督此漕督之冗也各省押運有糧道有丞倅每幫領運千總二人本屬人浮於事且候補多人但圖委署委催以資養贍此幫弁之冗也漕糧取民有定額出運有定數經此層層剝削幫弁取之州縣州縣取之百姓以致兌運不前倉儲未裕所謂耗民而因以耗國也溯查康熙年間裁冗官三百三十六員雍正年間裁二百五十餘員乾隆年間裁三百三十餘員嘉慶年間裁二十餘員見於道光十一年 諭旨所謂官不虛設始足以臻上理者聖言至為剴切是冗官本應裁汰況今日經費支絀已極若非大加改併終不免病國病民 臣稽之成案參以時宜特將河漕各官應行裁併各事宜謹擬六條

一河東河道總督擬援案裁併兩巡撫管理也 國初設河道總督一員駐

節濟甯兼管東南二河事務康熙十六年移駐清江將河南工程奏歸巡撫管理康熙四十四年奉 上諭山東河道照河南例各巡撫就近料理至雍正二年始設副總河於武陟兼管山東河務逾年升為總河伏思雍正以前東河並未專設總督而黃運歲報安瀾竊以為總河兼管兩省兼管河不如巡撫各司一省稽察既便呼應亦靈況河南山東兩巡撫本係兼管河務情形亦無虞不熟擬請遵照康熙四十四年 諭旨裁河東河道總督一缺令山東河南兩巡撫分司本省河務以專責成如有交涉事件仍令會商辦理前者雍正年間設直隸河道總督乾隆十四年裁歸直隸總督管理此實裁併總河之成案再查道光十一年兩淮鹽政裁缺案內奉 上諭陶澍奏恭繳養廉裁減浮費一摺所奏甚是見鹽務改歸總督管理總督養廉優厚足敷辦公所有鹽政應支養廉銀兩著歸入節省項下解交戶部充用至鹽政衙門浮費較多統計前後裁減每年費用十六萬兩有零其外支浮費著查明一併刪減今河督改歸巡撫與鹽政改歸總督事同一律所有關節養廉費用各事宜應由各該撫詳細查奏至江南既有河道總督其兩江總督即無庸兼管河防庶事權專一平時既免牽掣有事亦無可推諉

一南河河道宜徑行裁汰也雍正八年始於清江設河庫道專管收放河工錢糧外此別無職掌查東河河庫係運河道兼管淮揚道與總河同駐清江原可仿照管理即謂南河錢糧較多亦應歸揚徐海三道分司收放伏思多一庫道即多一庫官且多無數庫中胥役而各屬支領報銷仍由該管道駁轉誠屬無益有損擬請 旨將南河河道一缺即行裁汰其所管收放錢糧或應歸淮揚道兼管或應歸揚徐海三道分管併請 敕下廷臣集議施行

一東南兩河冗缺應遵 旨裁撤并請將修守事宜歸營經理也道光二十八年奉 上諭河工各廳員冗缺甚多著兩江總督山東河南巡撫會該河督等公議裁撤旋經南河奏裁揚運一廳東河奏裁泉河歸河兩廳其餘均未裁撤 臣愚以為兩河修守事宜必須裁廳歸營乃可以省費而得力查河

營之設始於康熙年間 聖祖仁皇帝巡視河防而河臣如靳輔于成龍輩參襲創制立營設兵使民免召募之煩工有修防之益立法實爲盡善其時應員不過十餘人經費取諸額徵無多估撥百餘年來官則愈設而愈多費則愈增而愈濫糜帑誤工不知伊於何底此 宣宗成皇帝裁撤冗員 諭旨蓋留未竟之緒亟有待於 聖人之繼述者也伏思裁應歸營實有數便廳員侈靡成風一宴破中人之產一擲盡千金之貲不如河弁之習於艱苦局面小而用度無多也廳員善於酬應巧於開銷不如河弁之粗拙無文可冀工歸實用也廳員來從外省修防機宜須臨時學習不如河弁生長其間熟諳水性於工之平險不待講求自了然於心目也廳員深居簡出但憑探報不如河弁風晨雨夜親歷河干沾體塗足素耐勞苦也且廳員於上游聲息聯絡平日既已分肥臨事安能執法而河弁一有失誤輕則棍責重則枷示無情面之瞻顧則諸事皆可認真也夫河工設立弁兵本應以軍法從事乃使文員牽掣武弁亦不得盡其長殆漸失立法之本意矣應請 旨飭廷臣集議將東南兩河廳員盡行裁撤所有修守事宜改歸河營紳弁經理其收支錢糧卽由各營詳報該管道數轉一切購料雇夫毋令地方官干預惟責任既專處分亦應從重出納所寄廉俸亦應從優至於廳屬各汛雨夜梭巡險工搶護無一不藉弁兵之力其專汛佐雜實屬贅疣應併請 旨裁議裁汰

一河員既定議裁汰則經費可亟籌節省也河工之浮冒人人知之而不能力行樽節者恐工員藉口因而工程不固耳 愚以爲工程之固與不固不在乎經費之多與不多卽如南河歲修搶修嘉慶十二年以前額定五十萬兩嗣因料價昂貴增至一百五十萬兩是三倍於舊也購料雇夫皆係用錢昔時價銀每兩不及千文今且加倍查近年南河歲修搶修約需一百五十萬兩若以錢計是六倍於舊也昔之歲工用錢五十萬兩而不免於決口今之歲工用錢三百萬兩仍不免於決口然則多費之無益可知矣又如歷屆大工有用至千餘萬者有用至二千餘萬者上年豐工僅用四百萬業已合

龍及走占之後尚有存工料物何其懸殊至此卽以復堵工程而論卒工復堵用銀五百萬號爲節省今豐工復堵據該河督奏稱僅用銀一百五十餘萬前後數年之閒五百萬而合龍百餘萬而亦合龍以此見工員之非盡無良而工程之無難敷實特以積習相沿但使有款可以支銷則亦無人肯從節省耳見在議請裁應歸營止可從此崇儉黜奢擬請以後東南兩河工用皆大加節省南河歲料以五六十萬爲率大汛工需以七十萬爲率另案一切不得過百萬東河歲工以二十萬爲率另案不得過七八十萬皆除去額解再行請撥總之東南兩河爲宇宙兩大漏卮非不知員缺驟裁經費驟減實衆情所大不便然 臣部職主度支不能飽工員之所欲而致有意外之虞 臣責無可道不敢減往日之所需而致無可撥之款 臣亦罪無可逃兩者相衡不如裁定錢糧而使力圖節省果肯掃除積習自能料實工堅不至有意外之虞

一裁缺及候補各員請嚴加甄覈分別改補留省咨回也道光十一年裁撤兩淮鹽政案內奉 上諭兩淮鹽政見經裁撤至鹽務各官額缺甚少候補之員人數太多著該督另議變通或改歸地方或回籍候調至見任人員卽照州縣之例量爲調換仰見 聖慮周詳於裁汰冗濫之中兼寓愛惜人才之意今擬裁撤河員事同一律惟查前屆奏裁河廳因係實缺人員請俟出有河缺照例卽補見擬將各廳撤行裁撤無缺可歸應由吏部按案酌覈奏明辦理至河工候補人員應遵照道光十一年 諭旨由各該督撫會同該河督嚴加甄覈擇其材堪造就者改歸地方或留省差委或回籍候調詳晰妥議請 旨遵行總期無冗官亦無棄材以仰副 聖主澄敘官方之至意

一漕運總督請裁併江南河道總督管理也治河本以爲漕我 朝定鼎燕京仰給東南粟米因明制設漕運總督責綦重矣然 嘗考前代都燕者如遼如金皆於京師設都轉運使在外設各路轉運使則今漕道之職也元時河海兼運而江淮濟州設兩都漕運司亦與今之漕道等明初以侍郎都御史督運總理河漕兼提督軍務後乃以淮揚巡撫兼漕運總督見於 欽定

歷代職官表是前代都燕者皆未嘗專設總漕也臣嘗竅其職掌如簽弁造船派單兌運本可由有漕各督撫就近督辦押重趨空疲勦漂沒督追漕欠亦應由各糧道分任責成今專屬之總漕徒使各督撫得以委卸惟過淮盤掣催趨重運必須總漕然使盤掣足憑何以回漕難禁催趨得力何以頻歲愆期蓋近年之總漕幾同虛設而與地方督撫動輒齟齬事雖繁而實冗權雖重而實分徒使幫弁吏胥依爲城社擬請將漕運總督一缺卽行裁汰所有過淮盤掣催趨重運事宜查總河駐節清江兼管黃運應卽歸南河總督兼理其餘總漕所管簽弁造船派單兌運各事卽改歸有漕各督撫督率各該糧道分任責成其應行裁減養廉公費等項亦著照道光十一年裁併兩淮鹽政成案辦理查淮南爲淮北要衝今擬裁漕督應改設專鎮武職大員歸總河節制以資控馭所有漕標弁兵統歸該鎮管轄過淮水手卽督率弁兵彈壓其總漕所領 王命旗牌應就近歸總河收管以重事權至催重趨空總漕之職在此幫丁之累亦在此查道光六年奉 上諭漕委各員往往藉催重趨空爲名任意添派員數太多難免婪索殊爲幫丁之累各省軍船行走沿途催趨稽走辦理已屬嚴密何必增添多人徒加紛擾著楊懋恬酌定派委員數開單奏明立案總期可省毋得多派致滋擾累伏思派委之多總由於候委之多衝干總一項捐納尤多其調劑所取資悉出於軍民之膏血并請 敕下各督撫將見任幫弁及候補人員嚴加甄別毋留庸茸之員以增漕務之累

五年 諭軍機大臣大學士會同吏部兵部議覆侍郎沈兆霖奏將暫設皖南巡撫一摺安徽甯池太廣五屬介在江南當此軍務繁多恐該撫鞭長莫及自應專責文武大員俾資督率該侍郎原請暫設巡撫既屬窒礙難行著卽照軍機大臣等所議將安徽甯池太廣道暫改爲徽甯池太廣道加按察使銜並添設皖南鎮總兵一員暫照臺灣鎮道之例准其會銜專摺奏事所有該四府一州地方軍務緊要機宜均著責成專辦俟軍務告竣道員仍歸舊制總兵卽作爲額缺以重地方而符定例至該處距兩江總督安徽巡撫駐紮處所較遠所有見在協防籌餉事宜仍著浙江巡撫不分畛域暫行督辦其餘應辦事宜著該督撫分別妥擬迅速具奏

十年 諭前據御史薛書堂侍郎宋晉御史福寬等奏請裁汰河員並改設漕運總督節員駐守各摺片當交御前大臣軍機大臣會同該部議奏茲據載垣等奏遵議裁汰河工文武官員酌改操防營伍各事宜開單呈覽江南河道總督統轄三道二十廳文武員弁數百員操防修防各兵數千名原以防河險而利漕行自河流改道舊黃河一帶本無應辦之工官多闕冗兵皆疲惰虛費餉需莫此爲甚所有江南河道總督一缺著卽裁汰其淮揚淮海道兩缺卽即裁撤准徐道著改爲淮徐揚海兵備道仍駐徐州所有淮揚淮海兩道應管地方河工各事宜統歸該道管轄廳官二十員內豐北蕭南銅沛宿南宿北桃南桃北外南外北海防海阜海安山安十三廳均係管理黃河見在無工又管理洪湖之中河裏河運河高堰山盱揚河江運七廳見在工程較少均著一併裁撤惟中河等七廳有分司蒞著宣洩事宜所有裁撤之運河中河二廳事務著改設徐州府同知一員兼管裁撤之高堰山盱二廳著改設淮安府同知一員兼管裁撤之裏河廳著改爲淮安府督捕通判兼管裁撤之揚河工運二廳著改歸揚州府清軍總捕同知兼管至裁撤黃河無工十三廳原轄各工段汛地卽著落各該管州縣官管轄不得互相推諉各廳所屬之管河佐雜人員除揚莊等廳官十員專司啟閉毋庸裁撤外其宿州等管河州同五缺高郵州等管河州判三缺東臺等管河縣丞十九缺高良湖等管河主簿二十一缺阜甯等管河巡檢十六缺均著一併裁撤清江地方緊要著添設總兵一員作爲淮揚鎮總兵駐紮該處俟軍務平靜再行改駐揚州原設河標中營副將一員著卽裁撤改爲鎮標中軍游擊駐紮蔣壩其淮徐游擊一員駐紮宿遷所有鎮標中營員弁並右營廟灣洪湖佃湖等五營游擊以下官五十四員馬步守兵共二千五百餘名原屬操防悉仍其舊至蕭碭等營所屬修防兵六千九百餘名著一律改爲操防將二十四營改設蔣壩宿遷蕭碭豐沛桃源安東山阜高郵葦蕩左右等十營除酌留游擊以下八十一員外其餘六十一員悉行裁撤以上各

營官兵均歸新設淮揚鎮總兵統轄著即裁汰老弱簡選精壯認真操練以資戰守見在江南軍務未竣該省督撫勢難兼顧所有江北鎮道以下各員均著歸漕運總督暫行節制

馮桂芬汰冗員議周禮設官分職鄭註謂各有所職而百事舉有是官斯能舉是事無是官即不能舉是事而後是官不可廢不然者皆冗員也國家多一冗員不特多一糜廩祿之人即多一腹民膏之人甚且多一債國是之人亦何苦而設此累民累國之一位哉今之冗員多矣不冗於小冗於大不冗於閒冗於要不冗於一二冗於十百試備言之一漕運衙門夫南漕三百餘萬石耳彼富商大賈挾數百萬之資致數千里之遠險山涉淵艱難險阻有數倍於運道者曾不假尺寸之勢什伍之衛而不思不達矧煌煌然天庾正供耶脫無漕督以下各官經過之地有郡縣有營汛有河員莫非王臣將袖手而聽其不達耶朝廷之力乃不富商大賈若耶天下有非常大事而於理不可通者此類是也今制漕督以少司馬令行臺開府握兵符控制七行省豈不巍巍然大官哉夷考其職不知何所爲也考漕營始於明隆慶開漕撫方廉爲備倭患而設厥後因而不刪久乃忘其所自始漕督所轄衛弁三百標兵二千煖衣飽食安坐無事將約束水手耶萬艘緜延千百里鞭長不及將做備不虞耶不足以當怯篋探囊之盜矧其大者復有旗丁一項然則費糜國帑需索漕船之外無餘事是爲一最大冗官至糧道一官於公事無私毫之益歲一臨倉責州縣陋規取盈而去州縣倚爲護符彈壓生監恫喝平民以爲陋規之酬然則所謂公事者助旗丁索勒州縣助州縣魚肉小民而已今河運不可復漕督糧道更無所用此外又有督糧同知管糧通判主簿之類皆坐食清規不與漕務此漕督下一切官弁兵丁之必宜全裁者也一河務衙門兩河歲修五百萬實用不過十之一二耳其餘皆河督以至兵夫瓜剖而豆分之聞馴謹河員常以十之三辦公貪冒者遞減甚有非搶險不使一錢者夫既不辦公自以併歸地方爲便至河兵之制創自國朝初設時

其人皆諳習水性持土石與波濤爭勝合龍下埽不失尺寸故辦工不調民夫今皆不然是河兵亦毫無所用此河督以下一切官弁兵丁之必宜全裁者也一各關監督體統與督撫均糜費繁多故視道府兼管之關徵收倍絀織造公事更簡故諺謂之喫飯官至各口監督稅課更少能如另議概撤各關大善即不能儘可歸督撫委員兼理康熙十六年以王此監督織造之必宜全裁者也一鹽務衙門鹽鐵置使由來已久運使固不可省至鹽政領之督撫已足至運同運副提舉等官或有或無毫無深義大使似州縣非州縣亦兩歧惟各場遼闊不可無官可移吏目巡檢駐節兼理鹽事但存運同或運副一人爲運使之屬驅策奔走可矣此鹽務中同副等官之必宜量裁者也一督撫司道考郡縣之始守令而已令準古大小侯守準古方伯連帥其官重矣後世始設監臨官守權漸輕至有道司有督撫而守令等於輿臺非重親民官之道也督撫始於明不常置後乃改爲專官總督多至十二人巡撫至二十九人國朝多并省而例亦不一督撫或並設或偏設並設者不必治偏設者不必不治是督撫可省其一

大省督兼撫如直隸等省小省撫兼督如山西等省爲便各直省以布政司爲主又設按察司掌刑名按劾之事而刑名不過視成按劾久無其實可併之布政又各道本布按之副兵巡鹽糧各分一職無非贅疣折中之法酌以三四府設一員兼兩司各道之事而上其成於督撫至郡縣皆以各設一副爲限制此督撫司道以下各官之必宜量裁者也一京官六卿九列後先奔走備員品而壯觀瞻帝者常儀固不能概從簡陋且從古已然宜仍舊貫惟東宮不設安用官屬詹事府可併歸翰林院以副名實科道爲耳目之官宜多不宜少然今制八十人之中仗馬寒蟬居大半何取乎具臣不如減額之半而許科甲出身之中書以上及外任司道言事殆不啻八十人之效也有可采耶固拾遺補闕之攸資無可采耶亦詢事考言之一法其餘閒曹亦減其半內務府糜費更多必應大減康熙二年裁苑馬寺三十七年裁上林苑編檢在二十名外者部曹五年內不

能補缺者概令回籍充山長一以廣教化一以示體卹爲兩得之術此京官之必宜量裁者也一內外武職王公將軍都統之外提督十三人總兵六十二人亦大官太多又如準部回部新疆各官亦太多率多養尊處優惡勞好逸能糜帑不能殺賊宜無論大小皆減其半此內外武職之必宜量裁者也恭考會典內文武官共二萬七千餘員其編檢庶吉士侍衛以及準部回部官無定員者不與焉我朝設官於古不爲多而大官之多爲漢以來所未有國家鼎盛之時物力豐盛雍容揖讓無形之弊人所不覺今則自微而著有不能不大加芟蕪者而節費固其小焉者也

光緒元年吏部奏定各衙門見任人員有因勞績出力保奏及各官照例議敘以某官作爲候補者無論是否應升之階卽令其在所保之項候補將該員底缺以奉旨之日卽行開缺另行銓補毋庸俟補缺後再行開缺至保奏以某官升用補用並無作爲候補字樣如係應升之缺不必先開底缺俟補用升用之後再行將原缺開缺另行銓補若非應升之階仍應先開底缺以崇體制

又直隸州知州薛福成應詔陳言疏略稱一曰重京秩自古設官重內輕外漢汲黯出守淮陽至於流涕唐班景倩入爲大理喜若登仙此古帝王居中馭外鼓舞豪俊之微權也我朝頒祿因明舊制京員俸薄不逮漢唐十分之一又自耗羨歸公之後外官有養廉而京員無養廉人情益重外輕內然其初升轉猶易京外兩途互爲出入故供職者不以爲苦近日京員盼幕外放極不易得恆以困於資斧告假而去絕跡京華其留者衣食不贍竭蹶經營每於國家之掌故民生之利病不暇講求此京秩所以愈輕也查乾隆二年增京官恩俸法良意美度越元明似宜略仿前謨酌爲推廣別籌恆款普加京員養廉等款之法宜取諸節省之餉項方今滇黔關隴次第肅清勇營大半凱撤將來所節餉需合計不下一千餘萬應查各省停撥之餉酌提十分之一二飭令每歲解部以備京員養廉之用所費於國計者甚微所裨於治體者實大至若清要之選當課以經世之具勿專尙小楷試律俾獲講求實用其各部院保舉人員在 聖明鑒衡不爽隨宜超擢以勵其氣中外迭用以練其才庶舉世重

外輕內之見可以默轉於無形百年樹人之計在此舉矣一日設幕職查雍正元年 世宗憲皇帝命督撫保舉幕賓以彰激勸 諭旨有云今之幕客皆微辟功績果著卽拜表薦引彼愛惜功名自不敢任意苟且 臣按我朝名臣若方觀承嚴如煜林則徐近年如大學士李鴻章左宗棠始皆託幕僚洞悉中外利病故能卓著忠勳可否略仿漢唐宋遺法仰承 世宗鼓勵人才之盛心准令各督撫奏辟幕僚自京外官以至布衣如有才守出羣者許卽專疏保薦視其本職計資論俸一體升轉無職者量加錄用行之稍久必有閎駿之士出乎其閒此亦造就之一法也自來吏治之升降視乎牧令之賢否牧令之黜陟由乎大吏之考察大吏果賢則吏治不患其不肅也伏讀 皇太后慈旨諭令各直省督撫秉公舉劾任用賢能 臣愚以爲方今激勸牧令又有兩端一在清其途一在勵其氣何謂清牧令之途 國朝捐輸之例向因不得已而設我

宣宗 文宗御極之初首停捐例當時以爲美談嗣因髮捻肇釁餉需浩繁始議推廣捐例然收數未見贏餘仕途益形龐雜 臣常考乾隆年間常例計每歲捐監捐封捐雜職等項收銀約三百萬兩今捐例既從折減以示招徠而每歲戶部收銀轉不及百五十萬是何也名器重則虛銜彌覺其榮雖多費而有所不惜名器濫則實職不難驟獲雖減數而未必樂輸人情大抵然也自頃軍務告竣餉需大減如謂國家闕此百數十萬之經費 臣有以知其不然矣况今甘捐皖捐黔捐等局所得無幾所傷實多該省既已肅清尤宜亟行停止今欲議停捐例宜於各省鹽課洋稅項下均勻指撥合成鉅款以抵京銅局之所入其捐輸常例但留捐監捐封捐級與捐雜職等項概收實銀人人知名器之足貴則戶部收數亦必不至於過絀 國計無纖毫之損吏治有澄清之益轉移之機非細故矣何謂勸牧令之氣東漢縣令往往入爲三公唐世凡官不歷州縣不擬臺省宋制非兩任州縣不得除監察御史自明以後行取知縣皆入爲御史及主事得人最多我朝康熙年間名臣如郭琇彭鵬陸隴其朱軾皆由縣令入爲京員理學經濟震耀一時康熙四十四年御史黃秉中疏言知縣考選科道殊覺太驟 廷議停止乾隆初年又以主事人多缺少凡行取知縣改以

知州揀選在當日酌更成法原所以協一時之宜然行之百年州縣無望於清華漸乏循良之績京員未膺夫繁劇或少練達之猷吏治與人材不免兩爲減色今欲整飭吏治陶鑄人材莫如復 聖祖初年行取舊制或稍變通其意州縣兩途並予行取凡科甲出身保舉卓異之員知州行取授御史知縣行取授主事庶銜缺亦足相當而上司操此爲激揚牧令羨此爲清貴吏治必有振興之一日或謂近日京員壅滯而復參用外員恐愈失疏通之意不知康熙以前京員練習民事上而督撫下而道府莫不起自京員方今 聖朝知人善任若果摩厲京員俾與外員互爲出入正所以疏通京員也京外兩途無扞格不通之患而後部治可期矣夫既清其途復勵其氣然後責大吏以考課雖中材之牧令將自奮於功名然尤有宜治其本者則養廉坐支各項減成不可不復也查各省文職養廉向支錢糧耗羨同治八年部議廉俸復額必須各省錢糧耗羨徵收足額始可抵放此亦本末兼權之意惟是州縣養廉大者無過千兩蓋與坐支各款均屬辦公不可少之費今皆減成發給其公私之用必至竭蹶欲其不妄取於民不可得也州縣無清廉之操欲其課農勸撫字善催科不可得也且錢糧之不足額半由民欠半由官虧與其靳數成之發款而虧無限之公帑似不如全復舊額而嚴覈官虧可以昂官常即可以裕 國計馭吏之本莫先乎是若夫勸懲之具表率之資是在大吏平時之措注非一朝一夕之故 之所願肅吏治者此也

校爲儲才之地欲正人心宜端士習教官職司訓迪非學行素優之員不足以資矜式著該督撫學政隨時訪察賢者量加保獎不賢者即行參處俾士林知所觀感各省兵燹以後民困未蘇地方各官自應妥爲撫恤該侍郎所奏正供之外浮收勒折民不聊生積案拖延永無了結甚至縱容蠹役魚肉鄉民一役下鄉數家破產此等情形實堪痛恨著各該督撫等嚴飭所屬痛瀆積習倘有不肖之員玩視民瘼任意擾累即行嚴參懲辦

五年 諭戶部奏遵旨停止捐輸一摺肅清仕途自以停止捐納實職官階爲要該部業將京捐局銀捐等項及各項實官並常例未載條款火器營章程均行停止即著有捐省分各督撫將銜餉事例條款概行停止

又 諭內閣代奏中書王保建條陳各省分發人員請飭該督撫酌留幾成飭令回籍聽候咨調並暫停各省分發等語著該部議奏所稱京外學習試用期滿各員請由該管上司認真甄別等語京外人員學習試用期滿自應從實考核以定去留嗣後各該堂官督撫等於屬員期滿務宜認真甄別如有闕冗無能之員即行參劾毋得率行出考虛應故事

十年吏部奏擬不准保舉十條一五六品京堂一翰詹坊缺及遇缺題奏一庶吉士免散館授職編修檢討一選用京職一道府以上官職請 旨記名 簡放一外官從四品以下加本管上司銜一增生附生選用教職一新班遇缺先新班遇缺分缺先用分缺開用及自創各項名目一免捐免保舉免考試銀兩一在營丁憂人員未經先行奏留他省人員未經先行奏調從之

又 諭御史汪鑑奏各部例案疏舛必應釐定畫一用資遵守倘彼此兩歧前後互異辦理未能允協必至流弊滋多該御史條列疏舛各例案著詳細查明妥議具奏此外如有未能盡一之案並著悉心釐定嗣後各部院纂修例案司各官務當詳加考訂折衷至當垂爲憲典

二十四年 諭國家設官分職各有專司京外大小各官舊制相沿不無冗濫近日臣工條奏每以裁汰冗員爲言雖未必盡可准行而參酌情理實亦有亟當改革者朕維授事命官不外綜核名實見值開創百度需款孔多度支歲入

有常豈能徒供無用之冗費致礙當務之急需如詹事府本屬閒曹無事可辦其通政司光祿寺鴻臚寺太僕寺大理寺等衙門事務甚簡半屬有名無實均著即行裁撤歸併內閣及禮兵刑等部辦理又外省如直隸甘肅四川等省皆係總督兼管巡撫事惟湖北廣東雲南三省督撫同城原未畫一見在東河在山東境內者已隸山東巡撫管理河南工由河督專辦彼此情形多有不同著將督撫同城之湖北廣東雲南三省巡撫並東河總督一併裁撤其湖北廣東雲南三省均著以總督兼管巡撫事東河總督應辦事宜即歸併河南巡撫兼辦至各省漕糧多由海運河運既屬無多應征漕糧亦多改折准鹽所行省分亦各分設督銷其各省不辦軍務之糧道向無鹽場僅管疏銷之鹽道亦均著裁撤歸併各藩司各巡道兼理此外如各省同通佐貳等官有但兼水利鹽捕並無地方之責者均屬閒冗即著查明裁汰除應裁之京外各官本日已降諭旨及裁缺之巡撫河督京卿等員聽候另行錄用其餘京外所有應裁文武各缺及一切裁減歸併各事宜均著交大學士六部及直省督撫分別詳議趕辦仍將所議情形迅速具奏內外臣工即行遵照切實辦理不得藉口體制攸關多方阻撓並不得以無可再裁敷衍了事至各省設立辦公局所名目繁多無非爲位置閒員地步薪水雜支虛糜不可勝計迭經諭令裁撤乃竟置若罔聞或任聽奸員劣幕舞文一奏寒責殊堪痛恨著各督撫遵前旨將見有各局所中冗員一律裁撤淨盡並將候補分發捐納勞績等項人員嚴加甄別裁汰限一個月辦竣覆奏似此實力剔除庶幾庫款漸裕得以宏振新規則不准瞻徇情面陽奉陰違致干咎戾當此國計艱難朕宵旰焦勞孜孜求治詔書敦勉動以至誠爾在廷諸臣及封疆大吏等具有天良尙其仰體朕懷力矯疲玩積習一心一德共濟時艱庶幾無負委任若竟各挾私意非自便身圖即見好僚屬推諉因循空言搪塞必當予以重懲決不寬貸

臣謹案晉王彪之議曰職事之修在於省官朝風之澄在於并職官省則選清而得久職并則吏簡而俗靜近者仕途日益龐雜其係保舉勞績捐納出身者亦幾乎爛羊頭續狗尾莫得而竟其數矣非銳意更新舉內外

不急之曠官掃除而廓清之吏治無蒸蒸日上之期也

又 諭詹事府通政使光祿寺鴻臚寺太僕寺大理寺等衙門見已裁撤所有各該衙門一切事宜當併歸內閣六部分辦著大學士六部尙書侍郎即行分別從速妥議限五日內具奏

又大學士李鴻章等覆奏竊維裁併官職誠爲今日當務之急然各衙門承辦多年另改舊規非取其素有交涉者以類相從不足以臻妥善謹案會典內載詹事府掌文學侍從擬請歸併翰林院通政司掌納各省題本擬請歸併內閣光祿寺恭辦典禮及燕勞薦饗鴻臚寺掌朝會燕饗擬請歸併禮部太僕寺掌牧馬政令擬請歸併兵部大理寺掌平天下刑名擬請歸併刑部惟歸併之後事既更張有同新創其中頭緒繁多非倉猝所能遽定應由各該衙門移取職掌文卷悉心校閱體察情形酌量辦理另行詳議具奏庶名雖改而實猶存不至冒昧從事致滋貽誤

又奏再通政司歸併內閣 擬派滿蒙漢侍讀學士並滿漢侍讀中書數員專司其事其通政司設有登聞鼓擬請移都察院設立幫同批文之通政使李端遇李培元衙門已經裁併擬請於漢內閣侍讀學士內揀員派充大理寺業已歸併刑部內閣所票三法司簽支擬改法司以昭允當又所有裁汰之應升應轉各員應由吏部查明照例題奏聽候 錄用其各項屬員亦由吏部酌量分別補用以免向隅已裁併之各衙門地址應留作中小學堂及各項公所依議行

又 諭見在裁撤各衙門業經分別歸併所有各衙門裁撤各官未便聽其閒散見當振興庶務詳畫久遠應於鐵路礦務總局酌設大小官數缺以備將來量能任使著總理各國事務王大臣會同吏部妥速議奏

又 諭係家翁奏遵議翰林院侍讀學士徐致靖請酌置散卿一摺古有侍從之臣皆遴選才能以議庶政見當朝廷振興百度自應博采衆論廣益集思以期有裨政治著照所議酌置三四五品卿三四五六品學士各職遇有對品之卿缺並翰林院衙門對品缺出即由吏部一體開單請旨錄用以供獻納仍著

按品給予俸祿應如何詳立條款著爲定例著該部議奏

又 諭前降旨裁撤詹事府等衙門並諭大學士六部各督撫將其餘京外應裁各缺及一切裁減歸併各事宜分別詳議籌辦迅速具奏見在已裁各衙門歸併事宜由各該衙門遵照辦理其餘各衙門應裁文武各缺尙未據將籌辦情形具奏應再申諭該大學士六部尙書侍郎及各省督撫等慎遵前旨將在京各衙門閒冗員缺何者應裁應併速即切實籌議外省道員以及同通佐貳等官及候補分發捐納等項人員認真裁併並嚴行甄別淘汰其各局所中冗員一律裁撤淨盡本日據戶部代遞主事吳錫嵩條陳內稱漕督所轄衛所各官既係武職並無管帶漕標之兵名實殊不相符所有軍田可以撥歸各州縣徵收等語此項人員本在應行裁併之列即著該督撫等妥速議辦並漕督一缺究竟是否應裁亦著兩江總督江蘇巡撫一併詳議具奏至京外已裁實缺候補各員應如何分別錄用及飭令回籍候缺著妥議條款請旨辦理該大學士尙書侍郎督撫等務當從速籌辦不准稍事遷延尤須破除積習毋得瞻徇情面

又 諭朝廷振興商務籌辦一切新政原爲當此時局冀爲國家圖富強而爲吾民籌生計並非好爲變法棄舊如遺此朕不得已之苦衷當爲天下臣民所共諒乃體察近日民情頗覺惶惑總緣有司奉行不善未能仰體朕意以致無識之徒妄相揣測議論紛騰即如裁併官缺一事本爲沙汰冗員而外間不察遂有以大更制度爲請者舉此類推將以訛傳訛伊於胡底若不開誠宣示誠恐胥動浮言民氣因之不靖殊失朕力圖自強之本意所有見行新政中裁撤之詹事府等衙門原議將應辦之事分別歸併以省繁冗見在詳察情形此減彼增轉多周折不若悉仍其舊著將詹事府通政使大理寺光祿寺太僕寺鴻臚寺等衙門照常設立毋庸裁併

二十七年 諭奉 懿旨捐納職官本一時權宜之政近來捐輸益濫流弊滋多人品混淆仕途尤雜實爲吏治民生之害見在振興庶務亟應加意澄清嗣後無論何項事例均著不准報捐實官自降旨之日起即行永遠停止統限一

箇月內裁數報部毋得奏請展限其虛銜封典翎枝貢監及見行常例准捐各項究竟有無妨礙著該部核議奏明辦理

臣謹案是時江督劉坤一鄂督張之洞會奏以捐納有害吏治有妨正途請永遠停罷以作士氣而清治源 朝廷乃從其請也

三十年政務處議覆各督撫裁汰冗官略稱迭准軍機處抄交直隸總督袁世凱奏議裁官缺及酌裁教職安徽巡撫誠勳奏擬裁官缺河南巡撫陳夔龍奏酌裁佐貳教職河工官缺各摺又御史夏敦復奏直隸教職請免裁併一摺均奉 旨政務處吏部議奏查京外各項差缺奉 旨飭令裁併朝廷綜覈名實並不論官階大小惟期各勤職事除冗濫而勵官常今該督撫等將直隸等省應裁各缺先後奏到等詳加察覈直隸擬裁霸昌道一缺據稱所轄僅西南北三廳無審轉案件可歸併通水道管轄等語查本年陝西巡撫升允奏請裁糧道一缺奉 旨允准霸昌道事務較簡應照所擬准其裁撤見任道員穆特賀請 旨另簡至直隸等省擬裁同通以下等缺查同知通判乃京官升選之途滿員如各部院筆帖式漢員如內閣中書等十七項及國子監學正學錄等官或京察奉 旨記名或俸滿截取始得註選該員等在京當差多年似不能不予以出路俾資歷練各項州同州判爲舉人五貢就職本班上年學務大臣奏定章程各學堂畢業獎勵並有以州同州判儘先選用之條亦應酌留額缺以勵上進近日山東巡撫周馥以河防較前喫重請將沿河各府州縣同通佐貳等缺移駐河干助州縣照料所不及即如該撫陳夔龍以許州所轄之繁城鎮鐵路開通請將同城之州判移駐該鎮就近稽查彈壓是缺分繁簡因時轉移即開散徵員用當其職亦足以資佐理應令該督撫等再行詳覈奏明辦理安徽河南擬裁各缺該管事宜如何歸併原奏未據聲敘並由該撫詳議奏覆至教職一項直隸擬凡係二缺裁一安徽河南擬裁復設各缺其意相同惟查見在各省府廳州縣均應設立蒙小學堂方須廣置教員以資訓迪若將京師大學堂及各省所取之初級師範生由學務大臣考驗合格保送教職歸部銓選則一轉移間將來各省學官即兼充各該處學堂教員尤爲名實相符尤於

學校有益擬毋庸裁撤

三十一年吏部奏准將書吏裁去一切事宜均飭司員親手經理

又兵部奏請將武職捐輸實官虛銜及捐復銜翎 封典一切捐項一律停止從之

又 諭恩壽電奏准撫裁撤清江人心惶惑城內外有罷市聚眾情事著周馥仍遵前旨迅速前往妥為彈壓至該處紳士等所稱提督武職恐於江北州縣呼應不靈等語著周馥恩壽悉心妥籌奏明請旨

又 諭周馥等電奏請特設江淮臬司等語江北地方重要既經裁撤巡撫改設提督自宜有精強得力之大員以資統攝昨已有旨簡派劉永慶署理江北提督並令節制江北文武所有從前清督所辦事宜均著該署提督接辦並著將標防各營認真整頓切實訓練按照練兵處定章辦理先成一鎮俾衛地方其淮揚海道仍遵前旨兼按察使銜清理訟獄所請特設按察使應毋庸議恩壽著俟劉永慶到任後再行起程

又政務處奏准裁撤各省復設教職

三十二年政務處議覆舉人拔貢優貢充考騰錄當差期滿由該堂官擇尤奏請改用七品小京官在部行走已就揀選舉人准令報捐分發免交補班銀兩查定例舉人近省三科遠省一科以上者皆准就揀選以知縣註冊擬請嗣後各省舉人不必限定三科均准以揀選知縣註冊並由吏部酌定班次選用其中式已過十年者即准分省試用貢生就職照此辦理截取舉人毋庸再用教職查直隸州州同及各項鹽庫大使或為舉人應得之官或為大挑知縣借補之職擬請嗣後截取舉人除用知縣外兼用直隸州州同鹽庫各大使已奉旨以知縣用者准其隨時分發至恩拔副貢生向例准以直隸州州判就職註冊而歲優兩貢不與未免向隅且直隸州州判額缺甚少並請量加推廣凡五貢均准一體以按察鹽運使經歷散州州判經歷縣丞分別註冊選用並分省試用生員考職均於考優貢之年准令各州縣會同教官遴選保送由各督撫會同學政考試酌定先期飭遵取定咨送吏部一等以巡檢用二等以典史用

分別註冊並分省試用

又編纂官制大臣奏略稱此次釐定官制遵 旨為立憲預備應參照君權立憲國官制釐定以符 聖訓而利推行惟古今各國變更官制條理至繁非一朝所能完備見擬就行政司法各官以次釐定此外凡與司法行政無甚關繫各衙門一律照舊概不提議以清界限一釐定官制因舊制精意浸失名實不符或事無專責致生推諉或人無專事致多廢弛此次釐定要旨總使官無曠位事有專司以期各副責成盡心職守一立憲國通例俱分立法行政司法三權各不相侵互相維持用意最善立法者議院公議全國通行之法律而奏請君主裁定頒布之事也行政者閣部按法律命令而施行國家之政務也三權分立而以君主大權統之見在議院遲難成立先從行政司法釐定當採用君主立憲國制度以合大權統於朝廷之 諭旨一 欽命官閣部院大臣京卿以上各官作為特簡官遇有缺出恭候 簡放各閣部院所屬三四品人員作為請簡官遇缺由該管長官擬保三人商同總理大臣請 旨簡放各閣部院所屬五品至七品人員作為奏補官遇缺由該管長官查明才資相當者擬定奏補八九品人員作為委用官由該管長官量才錄用咨明內閣備案一釐定官制之後原衙門人員不無更動或致閒散擬在京另設集賢資政各院妥籌位置分別量移仍優予俸祿凡三品以上遇有相當行政司法各官缺出開單請 簡其四五品京堂各官有才堪外用者候 旨簡用五品以下各京官由各部長官分別考選錄用有願就外職者准其呈請改用實缺人員照本官加一階以外官用額外候補人員各以對品外官用所有應行分發人員均優列儘先班次以示體恤

又總核大臣奏釐定京內官制奉 懿旨前經降旨宣示立憲之預備飭令先行釐定官制特派載澤等公同編纂悉心妥訂並派慶親王奕劻總司核定候旨遵行茲據該王大臣等將編纂原案詳核定擬一併繕單具奏披覽之餘權衡裁擇用特明白宣諭仰惟 列聖成憲昭垂法良意美設官分職莫不因時制宜今昔情形既有不同自應變通盡利其要旨惟在專責成清積弊求實事

去浮文期於釐百工而照庶績軍機處爲行政總匯雍正年間本由內閣分設取其近接內廷每日入值承旨辦事較爲密速相承至今尚無流弊自毋庸編改內閣軍機處一切見制著照舊行其各部尚書均著充參預政務大臣輪班值日聽候召對外務部吏部均著照舊巡警爲民政之一端著改爲民政部戶部著改爲度支部以財政處併入禮部著以太常光祿鴻臚三寺併入學部仍舊兵部著改爲陸軍部以練兵處太僕寺併入應行設立之海軍部及軍諮府未設以前均暫歸陸軍部辦理刑部著改爲法部責任司法大理寺著改爲大理院專掌審判工部著併入商部改爲農工商部輪船鐵路電線郵政應設專司著名爲郵傳部理藩院著改爲理藩部除外務部堂官員缺照舊外各部堂官均設尚書一員侍郎二員不分滿漢都察院在指陳闕失伸理冤滯著改爲都御史一員副都御史二員六科給事中著改爲給事中與御史各員缺均暫如舊其應行增設者資政院爲博采羣言審計院爲核查經費均著以次設立其餘宗人府內閣翰林院欽天監鑾儀衛內務府太醫院各旗營侍衛處步軍統領衙門順天府倉場衙門均毋庸更改原擬各部院等衙門職掌事宜及員司各缺仍著各該堂官自行核議悉心妥籌會同軍機大臣奏明辦理此次斟酌損益原爲立憲始基實行豫備如有未盡合宜之處仍著體察情形隨時修改循序漸進以臻至善總之時局艱危事機迫切非定上下共守之法不足以起衰頹非通君民一體之情不足以申疾苦所有新簡及原派大臣責無旁貸惟當顧名思義協力同心盡去偏私直任勞怨務使志無不通政無不舉庶幾他日頒行憲法成效可期倘仍視爲具文因循不振不能爲爾等寬也

臣謹案我朝設官分職沿前明舊制因革損益垂二百餘年上下相維民懷吏畏自光緒戊戌變法內則裁併詹事通政大理光祿太僕鴻臚各衙門外則裁併湖北廣東雲南三省巡撫並河督等官一時海內騷然幾釀巨禍旋仍復舊迨庚子拳亂而後改總理衙門爲外務部衙門駐京各使所要請也厥後商部學部巡警部皆次第設立一時內外臣工主張仿照東西各國改變官制者章奏紛陳朝廷莫衷一是因命載澤等五大

臣分赴各國考察政治至是澈底更張舊制僅存一二從茲三權鼎峙政出多門而君上大權則潛移默矣

又論此次裁缺之堂官均著以原品食俸聽候簡用其裁缺衙門之實缺候補司員筆帖式或由他衙門調用或分別班次分發外省補用著吏部即行議奏

又諭嗣後大學士尚書侍郎均著毋庸兼管都統副都統事務又吏部奏准見添各部辦事必須人才若專恃各衙門調用恐不足以供任使等酌擬辦法查民政部設有警務學堂度支部設有計學館陸軍部設有兵學館法部設有法律學堂商部設有實業學堂工部設藝學館今歸併農工商部以上各部一律擬籤分發由該堂官令其先入各館各學堂肄業專門之學仍按學習期滿其學能及格者由該堂官奏留補用不及格者或再分別學習酌量奏留或咨回部再學部設有法政學堂凡各該部裁撤及新分司員筆帖式並准其咨送學部各按所分部分門學習俟畢業後由該部考試分別等第酌量辦理此外理藩部仍應照舊籤分吏禮二部滿員向不論出身一律籤分漢員向惟進士出身之部屬及拔貢小京官方准籤分見在科舉已停既無進士出身者分部由舉人五貢廩生出身者酌配簽支分發

又奏定各部司員補缺輪次又裁缺衙門司員筆帖式改用班次又裁撤小京官及筆帖式改用內外官階班次又特旨分部人員補缺班次又載取揀選舉人選補班次又釐訂各衙門司員缺額並奏調人員一律歸吏部查核

三十三年總核官制大臣奏訂外省官制略稱直省官制注重之處不外兩端一曰分設審判各廳以爲司法獨立基礎一曰增易佐治各員以爲地方自治基礎惟各省地方風俗不齊人民知識未濬若必同時並舉其勢有所不能竊以東三省根本重地經畫宜先此次官制辦法擬請從東三省入手除實與內地情形不同者應聽其量爲變通餘令查照此次通則酌核辦理俾爲各省之倡直隸江蘇兩省交通較便風氣已開亦宜及時舉辦其餘各省分年分地逐漸推行由該督撫體察情形酌辦惟須於十五年內一律通行

各省官制通則

第一條一省或數省設總督一人總理該管地方外交軍政統轄該管地方行政事宜 第二條每省設巡撫一人總理地方行政統轄文武官吏惟於該省外交軍政事宜應商承本管總督辦理其無總督兼轄者即由巡撫自行核辦總督所駐省分不另置巡撫即以總督兼管 第三條督撫於各部咨行籌辦事件均有奉行之責但於地方情形窒礙難行者可咨商各部酌量變通或奏明請旨辦理 第四條督撫衙門各設幕職佐理文牘分科治事 第五條幕職員數職掌如左一祕書員一人承督撫之命掌理機密摺電函牘凡不屬各科之事皆隸之二交涉科吏科民科度支科禮科學科軍政科法科農工商科郵傳科參事員各一人承督撫之命就主管事務掌理各項文牘但各科參事員有事備不必備設者由該督撫酌併以一人兼任三科以下之事其辦事章程由督撫訂定三祕書員參事員不作爲官缺統由督撫自行徵辟無庸拘定官階大小每年將各員銜名及到差年月分別奏咨存案其辦事得力之員得隨時保薦四祕書員參事以下應酌設助理及繕寫等人員均由督撫酌定毋庸奏咨 第六條各省督撫應於本署設會議廳定期傳集司道以下官會議要事決定施行如有關地方之事亦可酌擇公正紳與議 第七條除東三省均置三司布政司東三省改爲度支司 提學司提法司 第八條各省布政司設布政使一人受本管督撫節制管理該省戶口疆理財賦考核該省地方官吏 第九條布政司所屬經歷理問都事照磨庫大使倉大使等官由吏部會同民政部度支等部另訂改置 第十條各省提學司設提學使一人受本管督撫節制管理該省教育事務兼督各種學堂學會 第十一條提學司所屬職員按照學部奏定章程行之 第十二條各省提法司設提法使一人秩正三品即以原設提刑按察司使改設受本管督撫節制管理該省司法上行政事務監督各審判廳並調度檢察事務各省於審判制度未經更改以前暫仍按察使舊制惟所管驛傳事務毋庸兼管 第十三條提法司所屬經歷知事照磨司獄等官由

法部擬定職掌改設按察司職掌未改省分暫仍舊制 第十四條各省除右列三司外應設兩道一勸業道專管全省農工商業及各項交通事務並將按察司舊管驛傳事務改歸該道兼管一巡警道專管全省巡警消防戶籍營繕衛生事務 第十五條兩道每省各設一人應設屬員分科治事其細則由農工商民政郵傳部訂之 第十六條各省除右列各司道外得視地方情形酌設司道各員鹽運司鹽法道或鹽茶道其鹽法道有原兼驛傳字樣者一律撤去督糧道或糧儲道糧道除江蘇浙江兩省督運應留外其餘由各督撫酌量裁併以歸一律關河道 第十七條右列各司道除主管事務外不得兼管地方行政事宜所有管理地方之守巡各道一律裁撤如距省較遠之地必須體制較崇之大員以資鎮懾者可仍留道缺即名兵備道或一員或二員專管督捕盜賊調遣軍隊事務應由各該督撫酌察辦理 第十八條各省鹽運司所屬運同運副運判監掣官鹽課提舉鹽課大使鹽引批驗大使倉大使倉大使經歷知事及右列各道所屬庫大使倉大使等官應如何裁併酌改由各該督撫核議奏明辦理其守道巡道原有屬官應與道員同時裁撤酌量改用 第十九條各省原設各項局所見既分設幕職應視事務繁簡裁併由該督撫核辦 第二十條各省所屬地方得因區畫廣狹繁簡分爲三種曰府曰直隸州曰直隸廳 第二十一條各府設知府一員承該長官之命監督指揮所屬州縣各官處理境內各項行政 第二十二條各直隸州設知州一員承該長官之命處理所治州境內各項行政並監督指揮所屬各縣 第二十三條各省原設之直隸廳有屬縣者一律改爲直隸州其無屬縣者仍設同知一員承該管督撫之命處理所治境內各項行政 第二十四條各府所屬地方分爲二種曰州曰縣 第二十五條各直隸州所屬地方曰縣 第二十六條各州設知州一員受本管知府監督指揮各縣設知縣一員秩正六品受本管知府或本管直隸州知州之監督指揮處理各該州縣境內各項行政 第二十七條各府原設之同知通判有轄境者一律改爲州縣其無轄境而主管事務如河南之

河防各省之海糧捕盜等同知通判均由各督撫擇其緊要者一律作為同知撤去通判名目別於各級審判明定責成以資治理若不關緊要各缺應與各府所屬佐貳雜職一併酌改作為知府佐治員缺由各該督撫體察情形奏明辦理 第二十八條各州廳及各州縣應酌設佐治各官分掌事務如左一警務長一員掌消防戶籍巡警營繕及衛生事宜二視學員一員掌教育事宜三勸業員一員掌農工商及交通事宜四典獄員一員掌監獄事宜五主計員一員掌收稅事宜此員應俟該州廳縣官俸公費確有定數實行支給並將從前平餘名目一律剔除後再行設置其從前各州廳及各州縣所有佐貳雜職一律裁撤酌量改用 第二十九條各州廳及各州縣佐治各官如因地小事簡不必備設者准以一人兼任二職但警務長及視學員不得以一員兼任他職 第三十條各州廳及各州縣佐治員缺應由司道各就本科考取國文通暢科學諳習人員凡佐貳等官舉人五貢及中學以上畢業生均可與考詳請督撫委用視學勸業二員並可參用本地士紳由州縣採訪輿論舉其賢能端正者一律詳請與考委用仍分咨各部存案其考取用詳章由考察政治館會同各部議訂通律 第三十一條各州廳及各州縣應將所管地方酌量分若干區各置區官一員承本管長官之命掌本區巡警事務其原設之分局巡檢應即一律裁撤酌量改用 第三十二條各府州廳縣均設 文廟奉祀官一員秩正七品至從八品掌釋奠灑掃事宜仍聽本管官統轄考核應以原設教職酌量改用 第三十三條各省應就地情形分期設立府廳縣議事會董事會其細則由民政部議訂奏定後通行辦理 第三十四條各省應就地情形分期設立高等審判廳地方審判廳初級審判廳_{即原設之審判廳}分別管理各項訴訟及上控事件其細則另以法院編制法定之

督撫酌量變通奏明請旨此外直隸江蘇兩省風氣漸開亦應擇地先為試辦俟著有成效逐漸推廣其餘各省均由該督撫體查情形分年分地請旨辦理統限十五年一律通行至一切辦事權限各項詳細章程有應由各部及各衙門核議者著即分別妥擬畫一辦法奏定陸續頒行其有未盡合宜之處仍著隨時修改以臻美善當此改革伊始舉凡用人行政在在均關緊要一有不慎百弊叢生該督撫等務當督飭所屬振刷精神力求實際毋尚虛文總期上合政體俯順輿情朝野聯為一氣君民得以相安為實行憲政之豫備 又憲政編查館議覆御史孫培元奏請凡留學生未經考試者無論內外大臣不得率請調用一摺擬請嗣後京外各衙門人員除由考試錄用及照章分發到部到省者應各按向章辦理外其奏調人員如原係實缺候補者准令以原官或改以對品及相當官缺分別奏補原係學習試用者應令於奏調後接算前資扣足年限奏留補用其未經分發僅係候選者應自奏調到差之日起概令當差一年後分別以原官或改以對品及相當官缺留部留省習學試用仍俟期滿後奏留補用其未經考試原無官階之畢業學生如確係在專門及高等各學堂以上畢業得有文憑者應由奏調衙門將該生文憑咨送學部勘驗合格後再將該員奏調到差日期咨行吏部存案自到差之日起扣足二年在京各衙門准其分別保以主事或以七品小京官學習行走在外各衙門准其保以知縣試用仍俟學習期滿甄別後奏留補用此外僅有虛銜各員及文憑不合格會入高等以上學堂未經畢業之學生准由各衙門隨時考選以九品官委用除照章升轉外不得踰級奏保以示限制 三十四年吏部議奏略稱據河南巡撫林紹年奏請通以下各官概免迴避原籍一摺正在核議間御史吳緯炳又奏請准佐貳服官本省并變通道府同通州縣製簽章程一摺詳閱所奏大致不外體恤人情及熟習風土二義擬請兼採兩奏之說而酌分三類一佐貳中缺分之較多者如府經歷縣丞州吏目縣主簿巡檢典史六項請嗣後准其添配本省之簽與近省各簽統製如製得本省仍不得在本府本州當差及補署距本籍三百里以內之缺或該員呈願

迴避本省即專以近省掣分一佐貳中缺分之較少者如直州同直州判以下迄於各項從九品未入流請嗣後准其專掣近省之簽如近省中無該員相當之缺再以遠省配掣一佐貳中體制之稍殊者如同通首領等官請嗣後准其無論有無老親但聲明願歸近省者即專配近省之簽未經聲明即仍以遠近省統掣以上凡應行分別掣簽之人不得於掣定後復又呈請改掣以杜趨避如自願捐指一省並捐離改指他省者均聽其便所有近省中距本籍三百里以內之缺亦不得輒請補署有應行迴避之人仍令迴避其祖籍商籍及遊幕經商省分概請勿論至州縣兩項雖係正印惟寒賤居多且近年報最之法已異於前使人地過於生疏不無扞格亦應如吳緯炳所議准照見定同通等官辦理道府所轄較廣此外河工鹽務各官省分本有限制均應仍照舊章暫從緩議又銓選與分發稍有不同所有候選之同通州縣以下各官按照上開簽分之法如豫行聲明願選近省本省之缺者自應一體照准未經聲明仍按遠近省統選以免壅滯

又奏准變通滿蒙漢軍分發京外人員略稱滿洲蒙古及漢軍專缺京員如有老親停其升選保送外缺外官自藩臬以至州縣如有老親准其呈明改補京職並無告近之例見值化除滿漢之際嗣後滿蒙漢軍升選保送外任人員同通以下有願歸近省者無論有無老親准其具呈聲明與漢員一律辦理所有京旗人員應以直隸及界連之山東山西河南掣分各省駐防人員應以駐防省分及界連各省掣分至漢軍人員向例京官迴避順天直隸及北河員缺併為變通均准一律掣分

又御史齊忠甲奏請少設缺額摺略稱我朝京外之官較前朝為尤多自舉行新政既將開署酌量歸併乃所添之數更多於所裁之數京官之實缺已無事可作又設行走諮議檢察等名目歲糜巨款位置冗員民脂民膏理應愛惜外官之制自遼東改設行省設官尤濫既有總督復有巡撫復有左右參贊復有五司兩道每司尚有僉事及科員甚眾額外之津貼者尤眾並於無人煙之地添設州縣見又議設農官矣徐世昌不知官多徒以擾民一味張大其事於

是廣調多人厚給公費東省元氣剝削已盡亟宜認真淘汰以恤民艱若內地改官再如東三省之濫恐十九行省無一繁富之區况自治諮議各局均已籌辦紳民亦有應盡之義務何必治絲而棼此極宜留意者也

臣謹案官之有品也自曹魏始也品之有從也自元魏始也皆衰世之制也陸世儀云三代以官為治事之司故其制簡而清後世以官為賞人之物故其制繁而亂大說言乎本朝官制沿前明而較明為多自行新政設缺尤多東三省鋪張更甚殆近於繁而亂矣直省不致效尤此忠甲一奏之力也

宣統元年吏部奏請推廣部屬簽分辦法略稱尋常分發除外務部毋庸配簽外其餘無論滿漢異途出身人員准添配民政部農工商部郵傳部等簽正途出身人員再添配學部一簽其大理院衙門無論何項出身均一律掣分即按照該院所設階品及舉貢改用之法按品改用筆帖式司務二項亦應就已設各級錄事書記等官衙門分別發往改用司員之法一律辦理尤之

又奏選議酌減考取小京官年限略稱見在各部官制既未畫一即補缺辦法尚難一致惟有照見行章程略加釐定擬請嗣後考取小京官如籤分戶政郵傳法部設有額缺各衙門學習三年期滿奏留准與各項人員一同酌量才具及較資補用補缺後歷俸三年准其題升主事其未經設有額缺各部量予縮短年限查小京官主事均扣學習三年係屬通例無可核減惟小京官歷俸多係捐免並無實歷俸次之員應即酌減俟學習期滿之日無庸再扣歷俸三年准作額外主事其游學畢業 廷試分部小京官亦擬照此辦理至奏調人員奏留補缺仍按照定章核辦如非正途出身應照捐納人員定例補缺後於歷俸外另扣試俸三年不准捐免以示區別庶考驗人員不形壅滯而畢業調用各員亦免凌職

二年 諭君臣為千古定名我朝滿漢文武諸臣有稱臣稱奴才之分因係舊習相沿以致名稱各異恭讀 高宗純皇帝諭旨奴才即僕僕即臣本屬一體嗣後凡內外滿漢諸臣會奏公事均著一體稱臣 祖訓煌煌尤宜遵守况當

此豫備立憲時代尤宜化除成見悉泯異同嗣後內外滿漢文武諸臣陳奏事
件著一律稱臣以昭畫一而示大公

又 諭內外滿漢諸臣陳奏事件著一律稱臣昨已有旨通諭矣嗣後武職各
員引見口奏履歷仿文職例應稱臣者稱臣不應稱臣者稱名滿員仍稱阿哈
又浙江巡撫增韞代奏在籍編修邵章條陳官制略稱立憲政體必以立法司
法行政三種分任統治機關立法機關近今各國皆委之於議會不待言矣而
司法機關與行政機關既屬截然異制即司法官與行政官於釐定官制必宜
畫分惟行政之範圍較廣即行政官之配置宜詳各國於司法行政大率別
爲內務外務軍務財務而行政官之中又有中央與地方之別地方行政之中
又有官治與自治之殊竊謂官制愈繁即釐訂匪易今宜略採日本親任敕任
奏任委任之制釐定官等爲四第一等曰特簡官第二等曰請簡官第三等曰
奏用官第四等曰委用官必有官等之資而後得授官等之位置必有官等之
位置而後得受官等之報酬故關於此通義有三一曰官級二曰職級三曰俸
級而要義可舉者亦有三一曰任用宜重出身二曰升調宜嚴限制三曰處分
宜議變通三通義而外更綜此三要義自是而釐訂京外官制乃有整齊畫一
之規而無牽制參差之弊

又御史胡恩敬奏請釐定新設各官任用章程並嚴杜倖進略稱竊維 祖
宗用人之法其始進也限以四途曰科舉曰蔭典曰勞績最後乃有捐納舍此
四途之外雖以宰相之力欲安置一人於部院不能也其升擢也吏部軍機處
將例應開列人員進單請 旨雖以天子之尊欲駁拔一人寵以非常之祿位
三百數十年間不數數見也大凡古今治亂樞紐一言可決曰公私而已循
祖 宗之法以用人則公不循 祖 宗之法以用人則私公則紀綱肅人心
正且趨於治私則詭詭邪僻作日趨於亂自古開創之君莫不立法以示子
孫及其衰也多不能守如漢之西邸唐之斜封宋之內批明之傳奉皆濫以爵
祿予人者也竊縱未久而亂即隨之小者宮妾弄權宦豎專政大者兵禍積數
十年不解其有倖免者乎然此猶人主之私也若夫內外大臣皆得援引私人

布居要地相習以爲固然此漢以來未有之變局規國者固知其必出於亂恐
一旦不諱勢且危殆而瀕於亡 臣謹冒死擇其大者數端爲我 皇上陳之冀

時四五品京卿體制最隆時得進見備顧問盧蔭溥以光祿少卿入爲軍機大
臣頗被寵任左宗棠收復杭州以郎中加太常卿銜當時稱爲異數今卿寺既
裁各部添設丞參丞三品參議四品與昔之京卿無以異也 陛下不自簡擢
而任其奔走私門以求一紙之薦達終身感其濡煦之恩退以司曹自處其能
執一詞以爭是非者蓋鮮况望其出位而籌邦國大計乎夫 朝廷多設京堂
聽其優悠養望各予以獨立之權不令有所統屬平時若無所事事一旦國有
大奸封疆有大變皆得奮其精神直言無忌分一人宵旰之憂所謂百足之蟲
至死不僵也自改制以來百事紛更 廟堂之上所恃以濟緩急者不過十尚
書二十侍郎其餘三品以下一任碌碌傍人門戶而成不甚愛惜之官當多難
之秋處寡助之地國勢之孤蓋可知矣且水再遷而得尚書參議再遷而得侍
郎其去大學士只三階耳抑之太卑而升之太驟 觀各部保列丞參多者數
十人少者十餘人調入丞參上行走多者五六人少亦二三人指納道府司員
皆踴列其中使倖而獲用援例報效多金轉瞬即登卿貳不亦異體而貽羞
當世之士乎擬請承員缺用參議升參議員缺照向時四五品京堂例將應升
人員資深者二十人帶領引見候 旨簡用前所保記名人員應否撤銷請
旨辦理 所謂新設各官之宜釐定者此其一也 院行走人員由吏部掣籤分
發此天下之至公無可議也差之至要者莫如軍機處事之初創而極棘手者
莫如總理衙門軍機之設章京也咨取閣部人員親試之其資淺不及三年者
尚不得與總理衙門亦然無敢言奏調也而部初興猶循用此法至丙午改制
民政部學部郵傳部接踵而興皆門大開身手強脚力健者乘隙遽擁而入唐
紹怡爲郵傳部侍郎引用鄉人最多人稱爲粵東公司陳璧繼爲尙書人又稱
爲福建會館其時各署調用人員見諸奏報者虛銜有五六品功牌有書吏有
漢奸有木廠工匠甚至無官而冒稱有官者有小官而冒稱大官者有之上
者得參事郎員次亦不失爲推事典籍進士通籍二十年或反致歎積薪屈伏

而出其下下競爲傲倖之行而上無以收策勵之效斯兩敗之道也於是衙署既可互調員缺又可借補崇獎便給巧佞之才而壓抑廉靜有爲之士一骨投地羣犬猖獗強者爭門齕弱者昏夜乞憐而士大夫廉恥喪矣今日之司員卽異時之道府彼登進既不以正則周身理脈皆邪出無數蠅營狗苟之徒責以整躬率物之任而各省之吏治又壞矣擬請各部院司員悉遵舊制歸吏部籤分補缺時並歸吏部核准帶領引 見其前調各員令堂官大加甄別冒濫者卽之外務部除籤分外准其開數年考錄畢業生一次如章京例 所謂新設各官之宜釐定者此其二調用司曹之弊既貽天下以口實彼學部之保提學使民政部之保巡警道農工商部之保勸業道其分尤尊其精尤厚遂能盡出於公平講讀積俸一等 記名而放知府編檢不論資地一保而得使司利祿所在誰不爭趨 臣不敢以小人之心度君子之腹卽盡出於公以 朝廷用人大柄盡讓諸臣下之手尾大不掉恐亦非防微杜漸之道也我 朝鑑前明之失裁割吏部之權還之君主三百年來遂無倒持之患乃前明總之一部者今復散而分之數部轉使政出多門爲害滋甚浸而司法獨立提法使移歸法部財政獨立布政使移歸度支部如是則黨附攀援百僚濟濟盡成私室家臣天子孤立於上環顧內外無一親信可恃之人言念及此誰不寒心不第此也彼度支提學提法三司巡警勸業兩道既各樹一幟內倚部臣爲援無論崇卑不相統轄一省之中已成華離破碎之象上之則督撫號令不行下之則州縣疲於奔命數年之後官吏充塞必無一安居樂業之民可決而知也擬請提學使員缺應開列何項人員規爲定制提法使仍照按察使例請 簡勸業巡警兩道一次歸外揀補一次請 旨簡放其業經保薦 記名人員自學使下應否撤銷請 旨辦理 臣所謂新設各官之宜釐定者此其三使車四出侵奪外吏守土之權其初不無小利其繼必且大擾唐宋之已事可鑑也唐初只有都督府其後增設諸使由於開元天寶之興利元結言到官未五十日各使征求符牒二百餘封其弊如此宋初只有轉運使其後增設諸使由於熙寧元豐之行新法蘇軾謂使者四十餘輩事少員多人輕權重其弊又如此 國初各道

御史皆有出巡之責後恐其擾民也而罷之巡鹽巡漕以次俱廢兩害相形則取其輕誠不得已也今度支部設監理財政官四十餘員或選自曹郎或拔自試用道府或起自廢黜或薦自苦塊之中說者謂 陛下不信親節之督撫而信一二暴起領事之小臣固已啟天下之疑矣且若輩銜命以出沿途擅作威福釀人命凌壓道府使司報章騰說屢有所聞其事爲武斷之事其人非安靜之人蓋可知也故撫陳啟泰劾一上海道事下兩江密查未遽加罪也部臣聽監理官一面之詞遽將藩司毛慶蕃奏革不數日而甘肅冊報至矣既欲恢張權力毋乃形迹太露乎論我 朝官制道府以上皆由 特簡監理官乃部臣指名奏派內不請 訓外不專摺言事一朝得志遂蹇然以 欽使自居如是則躡其後者學部已派員視學矣法部又將派員稽察監獄審判矣民政部且派員查警察陸軍部且派員查新軍矣各憑藉京朝勢力百計苛求言辭不遜貪者固利強者逞威命令二三不相關白上損疆吏之威嚴下亂地方有司之耳目伏機督於弊中而影覆其上忠有不可勝言者擬請酌定監理財政官體制權限正監理與三司並行副監理與道府並行不稱 欽差不辦供應二年限滿撤回自此大遣使之後各衙門不得援例以請一切新政均責成疆臣督辦 臣所謂新設各官之宜釐定者此其四夫大臣不受小臣之私謁而後在位無黨援小臣不受大臣之私恩而後立朝有風骨漢時三公以下雖得徵辟庶僚然不受祿於官不注名於銓部合則留不合則去仍與今之幕職無異也資格用人之法一以遇小人之躁進一以磨鍊君子而老其才宋太祖之於張齊賢明太祖之於方孝孺蓋嘗師用其意矣今顧反而行之格既大破雖賢者不能峻辭絕物以拒親故之要求况以不賢者居之而行私納賄其閒庸有幸乎抑 臣更有請者中國積弱之故非因官制之不善乃任官者不得其人今卽遠慕唐虞改從舜之十六相十二牧伯其任事之人猶夫人也今卽近法鄰邦改從日本之十卿二十輔後先疏附之臣仍不能取材於異域也丙午變亂六官添設無數冗員生事擾民坐糜廩祿已成不可收拾之勢若復蹈循前轍如近時道路所傳亂數千年已成之局予奪任意以徇一二人之私上下百官

皆存席不暇煖之見 聖明在上豈宜有此 愚不知忌諱區區獻曝微忱是
否有當伏乞 聖鑒訓示奏入不報
又劾憲政編查館妄擬行政綱目壞亂官制摺竊維我 朝舊制以疆事責之
督撫而受成於六部部臣遵守例案請 命而行無敢專擅國有大疑集廷臣
會議朝有闕失許言路利彈卿寺翰詹皆儲才要地假以暇日使得研究古今
中外政治得失不徒責以簿書期會之勞用意至為深遠去歲憲政編查館所
擬行政綱目聞出自提調李家駒一人之手並未與同僚商酌該提調一意阿
時情不曉事徒襲東洋皮毛將官制分爲四級機關一曰直接官治二曰間接
官治三曰地方官治四曰地方自治所列表文如治絲而棼立說至爲紕繆自
綱目刊行之後人情洶洶有謂翰林院禮部皆將裁撤者有謂吏部將歸并新
內閣者有謂都察院將改爲行政裁判院者有謂各衙門長官自辟僚屬三品
以下皆不由 朝廷 簡任者詎言日興內外百官皆惴惴不自保賢者引身
而思退不肖者求捷徑而先趨拙者遇事推諉而存五日京兆之心巧者遇貨
貪婪而爲日暮途窮之計蓋不待新制實行而亂機湊泊已儼然如不終日矣
夫所謂直接官治者即中央集權之說所謂地方自治者即民權之說前說行
則督撫無可察之吏後說行則州縣無可牧之民 臣曾於去歲兩次痛陳其弊
前史所載若漢之王莽宋之王安石蔡京皆以輕變官制致亂然勢異時殊事
遠且勿具論丙午之役袁世凱挾兵入京用二三小人倉卒起草百端恫喝欲
傾翻政府而代其位潛擬疏稿授已故尙書張百熙保己爲總理大臣由是立
憲議起而籌備軍出遂成今日不可收拾之勢此 監國攝政王所親見也今
袁世凱雖能憲政編查館起草各員如汪榮寶吳廷燮章宗祥等何一非丙午
遺孽又益以楊度使實行革命於政治之中故彼黨談新政者皆言變法當從
官入手蓋官制既亂傾去舊臣援用私黨使布居要地乃得盡逞其謀戊戌康
黨之變擬設十二制度局暗奪軍機六部之權即此術也自古用人之法無有
公於我 朝資格未破之先雖樞府大臣敢有安置一私人於司曹者乎自六
官變爲十一部內而承參外而提學提法巡警勸業鹽務各官半由黃緣而得

參事以下一經奏調輒數十員胥吏工賈雜出其中屢見廷臣參奏用人
如此行政可知民政部號令不出一城以親貴重臣而下侵地方有司之職已
屬可笑農工商部坐食無聊則設計而謀捐賄郵傳部事權盡萃於鐵路一局
其餘半屬閒曹學部徒覈獎勵獎勵停而部職廢矣古兵部之職總核天下兵
馬錢糧非欲驅之行陣也陸軍大臣應昌歸自海邦剪髮易服作西裝入朝則
戴假辦變卿貳爲統領全署司曹將盡成武弁實千古未有之奇至海軍捕風
捉影無一可恃之艦無一可守之港則亦徒供玩弄耳近數年來新設各署利
害之灼然可見者如此誰與畫此策者不念國救反警議銓曹詞館爲外洋所
無之官妄欲有所處置盜憎主人不亦顛倒太甚乎外洋雖皆立憲官制亦各
不同日本事事規仿泰西而我又事事步趨日本尾道旁行乞之人沾其餘瀝
其所獲幾何則亦愈趨愈下矣 陛下所恃以立國者曰民所與治民者曰官
蓋自新刑律成而民亂於下新官制成而官亂於上下交亂彼等狼狽爲奸
引進海外黨魁將 陛下爲孤注之一擲 陛下高拱深宮其果能收萬世一
姓之效乎 臣愚以爲新官不可濫設舊官不宜盡裁起草應用正人頗行當采
衆議擬請乾綱獨斷嚴飭館臣不得援引日本法規悞亂大局實爲天下蒼生
之福
又直隸總督陳夔龍奏釐定直省官制略稱督撫宜裁參預政務大臣銜分布
政使爲度支民政兩司裁巡警道升勸業道爲司合交涉提學提法爲六司鹽
河糧關應設專官暫仍其舊留知府以統各屬專辦行政事宜裁廳州縣缺而
以其銜署爲地方審判分廳下憲政編查館知之
又 諭憲政編查館奏官制未定官俸章程擬釐訂請將頒布官制及試辦
年限提前頒布官俸章程及實行年限展後一摺著依議
又吏部奏變通裁缺人員補缺班次略稱嗣後裁改候補滿漢各司員與本銜
門候補各員合爲一班遇序補之缺輪用資深時統較資俸先後輪用勞績時
分別班次統較奉 旨日期先後酌題之缺亦酌量才具擬補如有未經得缺
之裁改實缺人員仍照原章相開序補俾免向隅除度支部禮部法部業經先

後自行奏訂新章外所有未經改革之各衙門應遵照此次奏章一律辦理惟從前已積缺輪各部差差不齊應自此次奉 旨之日起另行積缺遇有缺出均作為第一次酌題以歸畫一

三年兩江總督張人駿奏參酌外省官制遵陳管見略稱查地方官制東西列國不同其大別有二一曰中央集權一曰地方分權大抵各因其地勢國情歷史沿革而異衡之我國情勢均未洽合中國疆域之大為各國所無俄之大乃兼蓄服言之本土實小於中國且各國交通便利故可純用中央集權中國則不能若全國千餘州縣皆直隸京師勢必渙散無紀是中央集權不可行也至西國聯邦制度各邦自有政府上國僅同盟主純乎地方分權中國仿行之將如唐末藩鎮有尾大不掉之虞是地方分權亦不可行也我 朝督撫專封疆之任而一切行政各部有監察制裁之責司道府縣節制於督撫而仍考核於部內外相維上下相應法至善也今將實行立憲亦祇宜量加損益不可過事更張竊謂今日釐訂外官制所宜申明者約有數端一曰督撫權限我國疆域廣遠疆 事不能直達必致貽誤事機今應申明一切具奏事件悉仍舊制通則所擬軍政仍責任督撫然有為中央集權之說者欲將外省軍政直隸內部將領不歸督撫任用節制一旦有事緩不濟急今應申明督撫有調遣兵隊節制進退將領之權至外交雖統屬於外部然通商游歷傳教皆在外省遇有事端若在外了結可免國際交涉今應申明督撫有辦理本省外外交之權二曰司道分合外省之有會議廳猶內閣也司道各本署猶京各部也事關全局不能不諮而合議事屬專司不能不退而考求今應申明司道於全局之會在會議廳合辦專司之事在本署分辦三曰道府存廢通則無守巡道有府州縣而其第十七條云如距省較遠之地必須有大員鎮攝者可設兵備道專管督捕盜賊調遣軍隊事務是道亦酌留也見在附府首縣業已奏裁令知府自理民事今應申明裁去守巡道遼遠者酌留一二府理民事仍兼管所屬州縣四曰審判辦法鄉民習知州縣衙門為其本管若別設法庭易滋疑慮如建洋式房屋尤予藉口竊謂地方審判廳皆宜以原有州縣衙署改設別給州縣官以

屋舍至州縣為地方行政官雖不應干預司法權而有地方治安之責若兼任檢察一職既可省費亦以安民此又當申明者也五曰地方自治實行監督近日鄉民多因自治與士紳為難仍賴地方官平情判決以習於信嚮故也查自治章程地方官為監督有糾正檢察解散撤銷罰辦治罪之權又有執行之權此又當申明者也得 旨內閣會議具奏

又候補侍郎陳寶琛奏略稱立憲政體內閣必負完全責任使君上不當政治之衝親貴得保尊榮之位君民同範於法律之內國家常指於磐石之安今者用人行政無一治於民心平居則離忠無形臨事則補牢無策此皆閣臣應負之咎責而卒致攝政王獨當其衝者則以閣制雖新尙襲承旨書諭之舊加以事權歧出究詰無從侍門競開各無忌憚夫親貴與政不獨為立憲政體所不宜即徵之往史探諸 祖制亦不常見今國務大臣十三人而親貴居其五軍諮府兩大臣則皆以親貴為之其中或積有資勞而暮氣太甚或勇於任事而閱歷未深其習於酣養率為汰侈者更無論矣此皆足以累攝政王之仁智而貽天下以口實者也 愚以為宜由攝政王下教自責以為大臣引咎之倡立即簡擇剛正廉明足係人望之大臣任以總協理令其另行組織內閣參照各立意國通制俾負完全責任其軍諮府海陸軍大臣非有精於兵學更歷軍事者概行撤換以重責成而符名實如此則政本既清以與民更始者見改革之真心即以至公無私者破種族之謬說攝政王為 宗 社計為中國計即為滿族計皆不能不急急於此庶可以收已去之人心而祈天永命也

又大學堂總監督劉廷琛奏略稱大局危殆在眉睫急宜從根本挽救竊自武昌變起 即慮各省響應前奏請下詔罪己亦明知虛言無濟特以已變者固宜征勤未變者速宜安輯非朝廷有悔過之誠不足收已散之人心而使之不叛也不意旬日之間長沙西安九江相繼告變設憂延日廣立致危亡自古變亂未有若是之迅且烈者推原禍始在人心離散人心離散由黨徒煽惑以二百餘年覆冒之民而一經煽惑即從亂如歸則朝廷所以失民心而貽口實者必有在矣比歲綱紀破壞政出多門賄賂公行昌言運動軍政財政操於一

二貴人之手立法議法出於三五少年之私措置乖方民情怨結官吏乃藉端
廢制發運權門四海日益困窮朝貴日增豪侈大興土木羣肆酣嬉水旱盜賊
而不爲憂天怒人怨而不知懼天下皆知大亂將至黨徒乃得肆言鼓簧應謗
乾綱獨攬節操忠正夙望之大臣另行組織內閣以救危亡之局面而作方新之
氣至親貴秉政本非 祖制各國憲政親貴均不列國務大臣今各部大臣親
貴幾居大半此爲革匪藉口之大端亦卽人心離散之根本監國攝政王不欲
圖存則已知欲圖存惟上邀 祖制近擬憲法用人惟賢一示大公閣部大臣
不使親貴與乎其列庶黨徒無可藉口而人心不致煽惑矣疏入均不報

皇朝續文獻通考卷一百十六

職官考二 京文職 宗人府

臣謹案宗人府始於明 國朝因明宗人令改爲宗令三代小宗伯所掌也左右宗正宗人皆始於明府丞始於元漢宗正丞也宗室仕途除府中各缺外侍衛定有額缺十五善射與八旗一例挑選六部理藩院 東西陵郎中員外主事及御史亦有定額遇三庫倉差稅差一體保送盛京城守尉例以宗室放補其科目有宗室鄉會試一體 殿試覺羅仕途並照八旗滿洲例設族長以申其教誠優其賞恤讀嘉慶十三年 御製訓詞所以期之者至矣員數職掌已詳前考茲就乾隆五十年後有關官制者錄焉

乾隆五十三年奏准於本府筆帖式二十四人內揀選四人作爲委署主事五十四年議准凡宗室官員降調後前歷之俸不准接算其已照所降之級補官者前任內所得加級紀錄仍准隨帶五十六年 諭向來定例兼將軍副都統之宗室王公等遇有案件應與同事大臣降調者每降一級俱加倍罰該管職任俸四年抵銷第念同事大臣既行實降王公等僅於兼管職任內罰俸抵銷並不降級仍行留任未免稍有袒護殊失平允嗣後凡兼職之宗室王公等遇有案件應與同事大臣降級調用者均將所兼職任實行議降其加倍罰俸抵銷之例著即停止嘉慶四年 諭向來宗室人員止在宗人府供職陞轉科道其途亦屬稍隘嗣後各部院司員准以宗室補用其如何酌定額缺之處著吏部會同宗人府議奏欽此遵 旨議定宗人府額設理事官四人副理事官四人主事六人經歷二人計十六缺照宗人府司員額缺之數於六部理藩院滿洲司員內撥出十六缺作爲宗室額缺郎中以副理事官陞用員外郎以經歷主事陞用經歷主事以委署主事及兩翼宗學之總管陞用均由宗人府論俸擬定正陪帶領引見補授

五年奏准宗人府效力筆帖式缺出先用議敘二人次用考取一人議敘內如舊班有人先用舊班一人再用新班一人各按議敘考取名次先後挨次補用十一年定宗室文進士奉 旨以部屬錄用者歸於宗人府及各部額外主事上學習行走又定宗室繙譯進士奉 旨以主事即用及額外學習行走者亦以宗人府各部院主事分別辦理又定宗室文舉人繙譯舉人專以宗人府筆帖式補用道光二年奉 旨嗣後宗室王公等護衛停止軍政六年奉 旨嗣後考試王公子弟應封宗室著將管理宗人府王公子弟一體揀選帶領引見咸豐二年宗人府會同吏部兵部奏議推廣宗室升途文職准用道府武職准用各省城守尉並分別支派遠近請自 高宗純皇帝位下之宗室均爲最近未便補用其餘各旗無分遠近一體酌量外用七年議准宗人府副理事官題選理事官各部宗室員外郎選升本部郎中准其合併計俸其餘別衙門選補者均自升授理事官郎中之日起扣滿六年方准帶領引見同治元年 諭宗人府奏恩詔內應行查辦廢生品級請旨遵行等語不入八分公以下鎮國將軍輔國將軍及宗室內爲一二品大臣者均准給廢會典所載例有明文不入八分公嫡出子與鎮國公嫡出子均係應封輔國將軍品級亦屬相等惟不入八分公嫡出子與鎮國公嫡出子均係應封輔國將軍品級次查辦廢生均無辦給成案亦無因何不行給予明文此次辦理恩廢若不一體給予未免向隅所有不入八分公嫡出子著准其按照鎮國將軍應廢品級給予七品廢生以昭平允此旨並著纂入宗人府則例永遠遵行光緒五年定宗室官員因事革職雖無餘罪不准報挑騎射六年宗人府奏增設宗室郎中員外郎主事各一缺允之三十三年宗人府奏工部裁缺宗室實缺候補各員應以他衙門分別位置改歸各部宗室員缺嗣

後遇有缺出仍照舊例辦理惟各部宗室員缺無多擬請添設吏部禮部宗室郎中各一缺陸軍部理藩部宗室主事各一缺俱作爲宗室額缺一切銓補班次仍照例與原設宗室額缺一律辦理又議覆法部添設宗室七品小京官之缺與七品筆帖式品級既屬相同自應如其所議以原設宗室七品筆帖式世奎改補宗室專缺七品小京官一缺嗣後遇有缺出仍由衙門照例銓補其餘一缺作爲該部添設宗室八九品錄事應升之階至八九品錄事擬由衙門遴選四品宗室考取咨送法部當差

又吏部覆奏宗人府奏疏通宗室升途一摺略稱查原奏內稱國初宗室子弟分茅錫爵體制崇隆迄今二百餘年蕃衍殆八千餘人而身登仕版百無一二其中不乏可造之材若不加意培養殊爲可惜嗣後由衙門選擇年力精強者咨送陸軍部入營練習文理通順者咨送民政部酌量差委理事官等缺共計六十四實缺候補不下一百三十餘人嗣後無論衙門暨各部院宗室見任候補各員按照吏部截取章程准其截取外用或援照外務部奏准調用人員新章擇衙門事理通達者咨送各部院學習行走其各部院原設宗室專缺仍照定例分別選補盛京裁缺主事候補主事以直隸州知州分省補用

本由奉天將軍趙爾巽奏准京內實缺候補宗室請照裁缺成案其保送外用各等語查所請各條除開散宗室咨送陸軍部入營練習暨民政部酌量差委之處應由宗人府徑咨陸軍部民政部辦理外其繫於外用者一曰照章截取一曰援案保送竊維截取爲漢員專例而保送則該衙門自有專章其始天潢體制本極優崇故必遺支始准外用且有僉止俸滿外用與京察記名人員同以道府由軍機處請旨簡放初無內選外補之法亦更無保送道府以下之官之法今支派日以蕃衍而差缺復多裁併僅此請一途實不足以資

敷歷惟是京員外用向以職任俸次爲衡原奏意在不爲限制與部章成案既屬抵牾而截取尤多望擬自不得不統籌熟計仍就保送分別等差庶名實不致混淆而滿漢亦較畫一計宗室翰林見已無多委署主事筆帖式亦有保送御史之途以及近支人員例不外用均應仍照舊章辦理外僅將宗人府暨各

部院五六品宗室選補道府等官辦法分別酌定繕單呈覽至原奏所請照外務部調查章程將宗室人員咨送各部院學習行走一節嗣後各部院需材任使自可隨時向該衙門指名調取再由各該堂官酌定期限分別奏留補用若未經調取遽由該衙門咨送學習核與各項人員到部之例均屬不符應請毋庸置議

又奏核議宗室選補章程三十四年宗人府奏准疏通宗室仕途擬請在左右翼各設高等小學堂及初等小學堂一所其課程辦法均仿照學部定章辦理所需開辦及常年經費由度支部按季撥給至附設法政研究所查照定章令實缺候補各員分班肄業又在經歷司添設理事官副理事官各二缺如遇京察於理事官副理事官添保一等一員筆帖式添保一等一員其理事官副理事官保列一等者按照此次吏部奏定章程如蒙恩記名即與各項人員一律進單以道府恭候簡用筆帖式保列一等者照例升用倘無堪勝一等人員任闕勿濫又漢府丞之次仿照各部新章添設宗室左右丞參議各一員於實缺人員內擇其熟習府務者開單預保存記亦與各部無所窒礙其由丞參升轉以內外用者應按照軍機處吏部奏定新章辦理如所議行

宣統二年宗人府奏酌擬疏通筆帖式升途略稱擬請嗣後遇有衙門各缺經歷主事暨各部宗室各缺主事缺出輪至論俸銓選之時倘委署主事內均無合例應選人員仿照各部滿洲筆帖式升用主事之案先由衙門七品筆帖式人員內較俸銓選一人再到選班時由禮部宗室贊禮郎讀祝官人員內較俸銓選一人輪流開用如委署主事內有合例人員仍照舊例辦理

三公三孤
謹案師傅保皆虛銜無職掌亦無員額凡大臣宣力中外勞績懋著者則奉特旨加銜或爲贈典以示優寵焉
內閣

謹案大學士始於唐非宰相也宰相稱大學士實始於明宏治時

朝又有協辦之稱唐之尚書參掌機事宋之參知政事也內閣學士兼禮部侍郎因明掌誥勅學士兼禮部侍郎也侍讀學士漢丞相府長史侍讀為宋中書檢正典籍為宋三省架閣官皆始於 國朝中書為明誥勅房制勅房中書舍人 國朝但稱中書王以中書省為中書舍人今但稱中書是以古名為官稱矣中書科中書舍人始於明宋官誥院主管官也自好事者厭故喜新創行憲法有所謂責任內閣者瑟調而妄更絲治而益紊誰生厲階至今為梗矣

乾隆五十五年奏准內閣侍讀學士滿漢缺出由五品京堂及科道各保送一員引 見補授一次各部郎中各保送一員按依部分引 見補授一次五十八年 諭本朝設官分職品秩釐然如大學士職居正一品何用復兼從一品之尚書虛銜為耶著交吏部詳細查明將內外文職似此無關職任兼用虛銜者分別刪除酌擬定議具奏以示循名責實之義嗣議各部院衙門所有兼攝虛銜一體裁汰

嘉慶四年奏准滿漢侍讀學士缺出由通政司參議光祿寺少卿鴻臚寺少卿開列一次由科道論俸開列一次由郎中論俸開列一次如輪開參議時俱有不合例事故即行過班若僅一員合例即將科道郎中統行繕單請 簡七年 諭內閣為經綸重地大學士均應常川到閣閱看本章其中有在軍機處行走者每年春夏在圓明園之日居多散直後勢難再令赴閣視事至在城之日偶值樞務稍簡朕仍令其赴衙門辦事即應閣部兼到若不在內廷行走之大學士則票擬給音是其專責豈可稍涉閒曠是以保寧到京後雖兼領侍衛內大臣朕不令其在園居住以便赴閣辦公無曠職守嗣後在軍機處行走之大學士值朕進城諭令到衙門辦事時著先赴內閣再赴所管之部院衙門其不在內廷行走之大學士俱著常川到閣閱本以重輪扉而崇體制道光十四年奏准滿漢侍讀學士缺出京堂科道到班時仍照見行例全行開列其理事官郎中到班時改為保送引 見補授十九年奏定滿漢侍讀學士缺出輪用科道班時亦改為引 見補授

咸豐十年奏准嗣後有闕科場月選緊要本章照舊先一日送閣外其尋常本章俱改前二日送交內閣前一日齎交批本處次早隨摺奏事件進呈同治元年 諭御史劉慶奏各省題本到閣後每多積壓請申嚴進本限期一摺各省督撫具題本章先由通政使司轉送內閣俟票籤進呈奉旨後各部始能覈覆辦理近來內閣呈進各省題本每多積壓稽延甚或移前抽後百弊叢生至外省官員補缺題本內閣接到後並不依限進呈以致吏部無從題覆往往應補人員有經年累歲等候部覆不能到任者其餘各項本章積壓正復不少內閣為諸曹總匯之區似此因循玩愒積弊相沿殊屬不成事體著大學士嚴飭承辦各員嗣後各省督撫題本到閣按照日期編立冊檔後即挨次繕寫呈進其各部院題本或清漢字樣偶誤亦即立時更正進呈如仍前積壓或移前抽後不按到閣日期呈進致滋弊端即行查明嚴參懲辦光緒二年吏部奏定內閣蒙古侍讀學士缺出帶領應升人員引 見時將翰林院侍讀侍講司經局洗馬國子監司業列於科道郎中之先

三十二年編纂官制大臣奏定內閣官制

內閣以內閣軍機處改併 內閣政務大臣共十四人均輔弼 君上代負責任 總理大臣一人秉承 聖謨翊贊機務平章內外政事凡用人行政一切重要事宜均由該大臣承 旨施行除立法司法各官外所有行政各官該大臣均有表率之責並有督飭糾查之權 左右副大臣協同總理大臣平章內外政事 外務部民政部財政部陸軍部海軍部法部學部農工商部交通部理藩部吏部等大臣十一人分任本部事宜與總理大臣副大臣均為內閣政務大臣參知政事閣臣外如因事繁奉 特旨添派人員入閣議事或協同辦事均無定額 內閣各大臣均不得兼充繁重差缺或一時需人暫攝亦祇以一項為止總理大臣副大臣仍逐日入對各部大臣按五日入閣會議一次遇有本部重要事件即日呈遞膳牌隨同總理大臣副大臣入對面奏並得隨時請開閣議各部大臣如有緊急事件亦可隨時自請入對大臣遇有事故以該部左副大臣代行 內閣各大臣奉 旨皆有

署名之責其機密緊急事件由總理大臣署名其關涉法律及行政全體者由總理大臣副大臣及部臣連銜署名其專涉一部之行政事務者由總理大臣副大臣會同該本部大臣署名 內閣各大臣具奏事件其關涉行政全體者由總理大臣副大臣會同部臣連銜具奏其關涉數部變更者由總理大臣副大臣會同部臣連銜具奏其關涉一部行政變更者由總理大臣副大臣會同該部大臣連銜具奏其專屬一部行政事務者由該部大臣單銜具奏 凡遇重要事件由各大臣開閣議請 旨定奪開議時以總理大臣為議長議決之應議條目如左 一政府交集議院公議之法律草案及出入之預算決算事件 二軍國重要事件 三外交條約及重要之外交事件 四奉 旨飭交集議院之公議事件 五集議院送呈臣民陳請事件 六關係官制變更及法律施行之請 旨事件 七奉 旨交議奏補以上各官之任免黜陟事件 八彼此兩部有爭執時應由總理大臣判決事件總理大臣在其職司所屬事務內得發布開示 內閣屬員官制 提調承總理大臣左右副大臣之命恭擬 諭旨草案暨管理電摺文電並提調內閣庶務進退委用各官 副提調協同提調處理事務 書記承內閣總理大臣副大臣及提調副提調之命掌事務如左一繕發 諭旨二收掌 諭摺原本三謄寫及發還 硃批奏摺四草擬文牘及檢查收發文牘之事五監印六本閣之會計七收掌奏補以上官冊八編纂本閣記錄之事九管理本閣應用圖籍及編製目錄 錄事承以上各員之命料理庶務

內閣提調以下員數如左 提調一人 副提調一人 一等書記一人 二等書記二人 三等書記三人 錄事無定員 內閣設局五均直隸本閣 制誥局所掌事務一傳抄明發 諭旨二頒發 恩詔條件三頒發 誥勅及撰擬文字四請用 御寶五尊藏 實錄六進呈賀表賀本七繕譯國文 蒙文 職員如左 總辦一人 幫辦一人 書記四人 譯員四人

錄事四人 總辦管局中一切事務監督本局職員本局奏補官之進退由總辦呈請總理大臣副大臣行之委用官之進退由總辦專行之幫辦協同處理局務 總辦遇有請假離任時幫辦代理 書記承總辦幫辦之命分任局中事務兼收掌一切文件 譯員掌繕譯事件 錄事承各官之命料理庶務及謄寫文件 庸勅局所掌事務一開列請簡員缺差使各名單二收錄奉 旨存記各冊三開列宗室及外藩請 旨封賞單四擬進封爵名號及巴圖魯勇號五開具王公大臣應得 恩賞保項六開具王公大臣應得卹典條項七擬進王公大臣諡號八辦理寶星事件九外國寶星領受佩帶之存案註冊等項 職員如左 總辦一人 幫辦一人 書記四人 錄事四人 總辦幫辦權限及書記官以下職掌同制誥局 本局附設文官考試處辦理奏補官考試事宜及臨時奏請 簡派考官並稽核各衙門委用官考試事宜 編制局所掌事務一承總理大臣副大臣之命擬訂各項行政法規草案二考核各項行政法規遇有應行增刪修改事項可條列意見呈請閣議裁決三審議各部大臣提交閣議之法規草案條列意見呈送內閣四若內閣總理大臣副大臣有所諮詢應條列意見隨時申覆 職員如左 總辦一人 幫辦一人 參事十人 書記四人 錄事四人 總辦幫辦權限及書記以下職掌同制誥等局 參事承總理大臣副大臣及本局總辦之命審議起草 統計局所掌事務一整理畫一行政各衙門之統計二編製不專屬於行政各衙門之統計三刊行關涉各項統計之冊報四聯絡各衙門統計員並籌辦統計各員集議事宜 職員如左 總辦一人 幫辦一人 纂修六人 書記四人 錄事四人 總辦幫辦權限及書記以下職掌同制誥等局 纂修官掌編纂審查 印鑄局所掌事務一編撰內閣官報二編輯法規全書及文武緝紳錄三管

理官報等之印刷發行四恭辦鑄造 冊 寶及鑄造內外衙門印信關防
 五擬定內外衙門文書憑照等格式並頒布樣本 職員如左 總辦一人
 幫辦一人 纂修一人 書記二人 工師四人 錄事六人
 司工無定員 均委 總辦幫辦權限及書記錄事職掌同制誥等局 纂修
 掌編纂事宜 工師承總辦之命監理工務 司工承工師之命料理工務
 凡有未盡事宜隨時由本衙門續議核定奏明增入 書記以下各員應
 夜事之繁簡隨時酌量增減

臣謹案是年尚有集賢院審計院行政裁判院官制雖經編纂大臣奏陳
 迄未成立不復登載

三十三年奏准內閣實錄典籍中書俸滿截取內用作候補主事

三十四年吏部奏准內閣學士缺見定辦法 略稱應請將三品不分正從定
 為應升人員四品不分正從定為其次應升人員其辦理銀行造幣巡警審判
 檢察之三四品各官職守稍殊定為另單開列人員

宣統二年吏部奏漢內閣學士缺開列人員請 旨遵辦略稱查定例漢內閣
 學士缺出將翰詹各官分別品級開單請 簡又由翰林升轉部院之員如遇
 應升之內閣學士員缺將翰林轉補部院之太常寺卿以下大四品京堂以上
 一併開列正四品之太常寺少卿太僕寺少卿鴻臚寺卿順天府府丞係
 小四品均不開列近改官制以來京堂已多裁撤新設之三四品各缺尚未明
 定升階前次滿內閣學士缺出經 臣部分別品級將開列辦法奏明遵辦在案
 惟滿缺不扣出身自四五品京堂給事中御史以上全行列單漢缺則專用翰
 林並限至大四品而止辦法不同今漢內閣學士一缺除舊例應開各員並新
 設之從正三品各官應照滿員均行開列外至新設正四品之各部左右參議
 國子丞掌印給事中法部京師高等審判廳廳丞京師高等檢察廳檢察長大
 理院推丞遇有翰林出身之員是否一律開列又小四品中見止有順天府府
 丞一項奉天府府丞亦尚有裁缺人員該員等應升之階均經裁撤此外別無
 出路可否准其一併開列抑或與新設之四品各官均無庸開列得 旨准其

開列

又奏遵議御史陳善同奏請變通內閣中書舊制 略稱查內閣典籍中書截
 取內用例應在任候升主事並無分發嗣因主事停選經 臣部奏請援小京官
 定例准其捐足三班分部扣滿半年以主事題補又於議覆御史趙炳麟奏請
 疏通中書摺內議准凡考取到閣者無庸捐足三班以主事分部學習捐納到
 閣者仍令捐足三班始准分部是中書一官業經兩次變通然於實缺考班之
 員尚只能以主事分部學習於實缺捐納之員仍須捐足三班始准分發今該
 御史奏請以到閣滿三年及六年以上者分別作為額外主事或候補主事是
 較原定實缺人員班次反為過優辦理殊多窒礙但所稱內閣壅滯亦係實在
 情形既欲於候補人員亟求疏通並應於實缺人員寬籌出路擬請嗣後凡實
 缺典籍中書俸滿截取內用者係考班人員准以主事分部候補無庸再扣學
 習係捐納人員亦准以主事分部扣滿半年題補無庸再捐三班分發其候補
 考班人員俟一年甄別准其隨時改就小京官係捐納人員必須扣實資三年
 方准其改就依議行

三年內閣奏接收吏部印信文件分別歸併酌擬暫行章程十條繕單呈 覽
 一京官不分滿漢一律酌補一州縣以上外補缺酌量變通一佐雜各缺一律
 酌補一停止京外各項選班一 陵寢各缺應盡歸內務府一丁糧等項處分
 宜畫一辦法一命盜彙奏案件宜暫行停辦一丁憂起復更名復姓歸宗過繼
 改籍等項分別畫歸敕官局民政部辦理一封典廢襲議卹家擬印模等項分
 別畫歸敕官局禮部印鑄局管理一學治館宜歸併學部接辦
 又內閣奏敕官局酌擬減收公費 略稱查吏部收費舊章按之近時情勢不
 同即如補缺公費向以缺分之繁簡定收費之多寡同一道府州縣而相去懸
 殊近來各省官缺將次酌給公費已無缺分優劣之分自非酌量變通不足以
 昭平允 臣等公商將吏部收費舊章刪減其有稍涉繁瑣者概予剔除
 又御史歐家廉奏內閣官制將屆頒布請 飭憲政編查館詳慎定擬預防流
 弊並將此項官制草案發交各衙門臣工會議以免專擅而危大局

又 諭設立內閣總理大臣一員協理大臣二員以慶親王奕劻爲總理大臣以那桐徐世昌爲協理以各部行政長官有應同負國務責任改各部尙書爲大臣以梁敦彥爲外務大臣善耆爲民政大臣載澤爲度支大臣唐景崇爲學務大臣蔭昌爲陸軍大臣載洵爲海軍大臣紹昌爲司法大臣溥倫爲農工商大臣盛宣懷爲郵傳大臣壽耆爲理藩大臣所有內閣總協理大臣及各該大臣均爲國務大臣

又 諭本日業經降旨設立內閣所有舊設之內閣軍機處會議政務處著即一併裁撤在內閣屬官制未經奏定以前以上各衙門舊設之章京侍讀中書等項人員著暫由總協理大臣督率辦理日行事件其內閣官制內未載之應行改併各衙門有應照內閣暫行章程辦理事宜均著暫行遵辦其未經規定事項暫仍其舊其餘無關行政各衙門均照常辦理

又 諭見已降旨裁撤舊設內閣所有大學士協辦大學士仍著序次於翰林院並著該衙門於釐定翰林院官制時妥擬章程其內閣學士以下裁缺各員均食原俸聽候分別改用

又憲政編查館會奏略稱責任內閣在各國視爲成規在中國實爲創舉溯自籌備憲政以來凡請開議院者皆以設責任內閣爲急務見參考各國折衷我國政治之宜謹將遵擬內閣官制敬舉要義詳細陳之查各立憲國內閣在負國務之責任而對於何者應負責任各國立法又復不同恭釋 欽定憲法大綱統治之權屬諸君上則內閣官制自以參仿日德兩國爲宜日本憲法各大臣輔弼天皇任其責以國務大臣責任關於輔弼之任務而生故對於君主負責任而國務大臣任免黜陟君主皆得自由與英法之注重議院者不同與德意志宰相對於其君負責任非對於議會負責任者則相類我國已確定爲君主立憲政體則國務大臣責任所負自當用對於君主主義任免進退皆在朝廷方符君主立憲宗旨議院有彈劾之權而不得干黜陟之柄庶皇極大權並臻鞏固輔弼之地愈著恪恭此應陳明者一也又考各國內閣之制總理大臣責任重在確定方針統一政權凡所規定皆以防權任之游移杜政令之歧

出誠以政柄所寄即安危治亂所從生治內有遞進之規模對外有惟一之政策必能堅持不敝而後基業可固富強可臻否則百舉百廢一無成立宋以宰執不協致紹聖靖國之紛更明以樞輔不和致疆事兵禍之日棘今內閣之制萃一國行政大臣於一署分之則各專所職合之則共秉國鈞皆以利國利民爲歸是以各國責任內閣成立以後預算行政皆有匯歸緩急先後謀定而動洵足以挽散漫隔膜之失見在萌芽方始外交內治艱棘尤多苟非統一政權何由望有成效此應陳明者又一也或者謂內閣權重近於非宜然家宰本總百官丞相實長卿尹歷代置相用意實與各國責任內閣無殊而彼則無議院之對待無弼德院之贊襄故有時或失之專恣今則互相維繫加以兵柄別有專司法權又歸獨立凡歷代強臣之弊皆預遺於事先且唐宋三省之長尙書以下幾若屬僚行文論事多用申狀今則各部之長皆爲敵體孰甘附和此皆無可顧慮者也惟見在政治機關皆未完備而設立內閣又屬萬不可緩謹擬內閣官制十九條以立憲政始基並擬內閣辦事暫行章程十四條以爲過渡辦法至內閣屬官官制已由臣館草擬就緒俟酌妥後即行照章會奏請 旨辦理奉 諭上年降旨飭將官制釐訂提前頒布試辦並即組織內閣旋經憲政編查館奏擬修正籌備事宜清單經朕定爲宣統三年頒布內閣官制設立內閣所以統一政治確定方針用符立憲政體茲據會奏朕詳加披覽所擬內閣官制採取各國君主立憲之制參酌見在時勢之宜審慎規定尙屬周妥又因閣制甫經創辦必須以漸而進作爲籌畫試行並擬內閣辦事暫行章程宜損益均屬可行曾經召見會議政務處王大臣等面加垂詢意見僉同著將內閣官制頒布遵照此項欽定閣制設立內閣並即照辦事暫行章程先行試辦除弼德院官制同時頒布外所有內閣屬官制京外官制各項官規仍著遵照修正籌備清單妥速擬訂陸續奏聞候朕頒布施行用副朝廷進行憲政力量自強之至意

內閣官制 第一條內閣以國務大臣組織之 第二條國務大臣以內閣總理大臣及左列各部之大臣爲之外務大臣民政大臣度支大臣學務大

臣陸軍大臣海軍大臣司法大臣農工商大臣郵傳大臣理藩大臣 第三條國務大臣輔弼 皇帝擔負責任 第四條內閣總理大臣一人爲國務大臣之領袖秉承 宸謨定政治之方針保持行政之統一 第五條總理大臣於各部大臣之命令或處分視爲實有妨礙者得令暫停奏請 聖裁 第六條總理大臣就所管事務對於各省長官及各藩屬長官得發訓示 第七條總理大臣就所管事務監督指揮各省長官及各藩屬長官於其命令或處分如有認爲違背法令或逾越權限者得令暫停奏請 聖裁 第八條總理大臣依其職掌或特別之委任得奏請頒發閣令 第九條總理大臣得隨時入對各部大臣就所管事件得隨時會同總理大臣入對或請 旨自行入對除國務大臣外凡例應 召見人員於國務有所陳述者由國務大臣帶領入對其蒙 特旨召見及法令有特別規定者不在此限 第十條關於國務之具奏事件其涉各部全體者由國務大臣會同具奏專涉一部或數部者由總理大臣會同該部大臣具奏除國務大臣外凡例應奏事人員於國務有所陳奏者由國務大臣代遞其法令有特別規定者不在此限 第十一條法律敕令及其他關於國務之 諭旨其涉各部全體者由國務大臣會同署名專涉一部或數部者由總理大臣會同該部大臣署名 第十二條左列事件應經內閣會議一 法律案及敕令案並官制二 預算案及決算案三 預算外之支出四 條約及重要交涉五 奏任以上各官之進退六 各部權限之爭議七 特旨發交及議院移送之人民陳請事件八 各部重要行政事件九 按照法令應經閣議事件十 內閣總理大臣或各部大臣認爲應經閣議事件 第十三條內閣會議以國務大臣之同意議定之會議以內閣總理大臣爲議長 第十四條凡關係軍機軍令事件除 特旨交閣議外由陸軍大臣海軍大臣自行具奏承 旨辦理後報告總理大臣 第十五條總理大臣臨時有事得奏請於國務大臣內 特派一人代理 第十六條各部大臣臨時有事得奏以他部大臣代理 第十七條本官制第二條所列國務大臣外有因臨時重要事件奉 特旨列入

內閣者爲特任國務大臣但不在常設之列 第十八條特任國務大臣所有入對具奏署名均以臨時事件爲限仍依本官制第九第十十一條之例會同總理大臣辦理 附則 第十九條本官制奉 旨頒布之後如有應行變通之處隨時恭候 特旨裁奪 謹擬內閣辦事暫行章程 第一條內閣總理大臣一員協理大臣一員或二員均候 特簡各部大臣均候 特簡爲國務大臣總理大臣如因事未能到閣協理大臣得代爲辦理 第二條內閣設政事堂爲國務大臣會議之所按照內閣官制應經閣議事件由內閣總理大臣協理大臣召集各部大臣會議 第三條內閣官制第三第九第十一條之規定內閣協理大臣均適用之 第四條總理大臣每日入對各部大臣分班值日如有 召見及因事請對者得會同總理大臣或協理大臣入對其關於各部主管事件應由該部大臣加班入對者得隨時會同入對除前項會同入對事件外各部大臣仍得請 旨自行入對 第五條內外新官制未經一律施行以前按照向例得蒙 召見人員於國務有所陳述者由總理大臣或協理大臣帶領入對其 御前大臣領侍衛內大臣軍諮處海軍司令部宗人府內務府各大臣弼德院院長資政院總裁及其他蒙 特旨召見或法令有特別規定者如八旗都統前鋒統領副都統領事官等官若 不在此限各省將軍督撫除請 安請 訓及奉 特旨召見外其於國務有所陳述者應先商明內閣總理大臣協理大臣或主管各該部大臣會同入對 第六條關於國務陳奏事件在內外新官制未經施行以前凡例應奏事人員及言官奏劾國務大臣仍得自行專摺入奏候 旨裁奪凡關於一部之具奏事件其重要者應會同總理大臣協理大臣具奏其尋常例奏可逕由該部大臣具奏仍鈔稿咨送內閣查核前項重要事件及尋常例奏事件應由總理大臣協理大臣會同各部大臣分別規定奏請 聖裁 第七條按照內閣官制第十四條由陸軍大臣海軍大臣自行具奏事件應由該衙門具摺呈遞毋庸送交內閣 第八條內外行政各衙門應奏不應奏事件除

陸軍部海軍部外由總理大臣協理大臣會同各部大臣另擬章程奏請
聖裁前項章程未經奏定以前所有內外循例具奏事件照常具奏候 旨
裁奪其關緊重要應行籌議事件仍應具奏候 旨交付閣議決定後由總
理大臣協理大臣請 旨裁奪遇有緊急事件不及付閣議者由總理大臣
協理大臣隨時請 旨辦理 第九條除總理大臣協理大臣每日入對外
其值日之各部大臣每週星期及按舊例推班之期應行推班但有最關緊
要事件不在此限 第十條除各部分班值日外其餘各衙門應否照舊值
日由總理大臣協理大臣妥酌請 旨辦理 第十一條各衙門帶領引
見暫仍照舊如有應改者隨時候 旨施行至驗放事宜應由內閣總理大
臣協理大臣分別酌擬奏請 聖裁 第十二條此項章程施行之日所有
舊設內閣及辦理軍機處內閣會議政務處一律候 旨裁撤 附則 第
十三條官制及官未經改訂施行以前所有文武官員關於 特旨簡放暨
記名請 簡奏補咨補及文武爵職襲封各項事宜均仍照見制由內閣
會同主管衙門分別辦理關於職官參劾及議處事宜亦照前項辦理 第
十四條此項暫行章程與內閣官制同時頒布將來應撤銷之時仍奏明恭
候 聖裁如有應行變通之處隨時候 旨裁奪
又 諭見在設立內閣所有各衙門值日次序自應另行更定著自本月十四
日起暫行照單開次序辦理每週星期遞推一日遇有重要事件仍照例隨時
加班具奏

職務局長有事故時由副局長代理 第七條 承宣廳掌事務一頒發 諭
旨及法律命令二典守 諭旨及法律命令三收發呈遞摺奏事件四閣議事
件五請用 御寶六收掌閣印七本閣公牘文件八本閣會計庶務九編纂本
閣檔案十管理本閣圖籍 第八條 制誥局掌事務一進擬 徽號及 尊
諡 廟號二恭進尊藏 實錄三進擬 制誥誥敕四進呈賀表賀本五勳封
藩封世爵世職之封賞承襲事件六恩賞封贈卹廢諡號勇號事件七頒賞勳
章寶星事件八外國勳章寶星受領佩帶事件九庸勳會議事件 第九條
敘官局掌事務一內外簡任奏任各官履歷稽核存儲事件二內外簡任各官
開單請簡事件三內外奏任各官資格審查事件其條目加左一關於任用事
項二關於升轉事項三關於俸給事項四關於品級事項內外委任各官冊報
及履歷存儲事件五關於文官考試事件六關於文官處分事件 第十條
統計局掌事務一統一各部統計事件二辦理不屬各部統計事件三刊行統
計年鑑及報告事件四交換各國統計表事件五統計會議事件 第十一條
印鑄局掌事務一官報及法令全書職官錄之編輯發行事件二官報等及
其他官文書印刷事件三冊寶印信關防圖記等鑄造頒發事件 第十二條
僉事承閣丞及廳長局長之命分任各廳局事務 第十三條 藝師承局長之
命辦理印鑄事務 第十四條 藝士承上官之命辦理印鑄事務 第十五條
錄事承上官之命繕寫文件辦理庶務

謹擬內閣法制院官制 第一條法制院直隸內閣總理大臣掌事務如左
一法律命令案撰擬事件二法律命令增刪改廢事件三各部所擬法律命
令案審查覆核事件四見行法律命令解釋事件五各項法規編纂整理事
件六其餘關於法制統一事件 第二條法制院設官如左一院使 二副
院使 三參議 四參事 五僉事 六錄事 第三條院使承內閣總理
大臣之命管理院務並監督指揮本院各官 第四條本院奏任官以上之
進退由院使具狀陳由內閣總理大臣辦理委任官之進退院使專行之
第五條副使佐院使之職務院使有事故時由副使代理 第六條參議及

參事承院使及副使之命掌第一條所列事件 第七條僉事承院使及副使之命掌文牘會計及一應庶務 第八條錄事承上官之命繕寫文件辦理庶務 附則 第九條憲法未頒以前按照籌備清單關於憲政編查館承辦事件一律歸併內閣法制院辦理

又 諭內閣會奏酌擬內閣屬官官制暨內閣法制院官制繕單呈覽一摺朕詳加披閱尙屬妥協着先將此兩項官制頒布除應簡之開承各員另行簡補外著仰遵照設立內閣承宣廳及制誥敘官統計印鑄各局應設之內閣法制院亦即同時並設所有憲政編查館吏部中書科稽察欽奉上諭事件處批本處等衙門著一併裁撤其所管事項與已經裁撤之舊設內閣軍機處會議政務處所管事項凡應併入內閣辦理者統即分別接管舊隸軍機大臣之繕書房著改隸於翰林院至各衙門應行畫入事項及應畫歸各衙門事項均著妥慎交接以清權限而專責成餘著照所擬辦理此外各項官規及京外官規仍著遵照修正籌備清單妥速擬訂陸續奏聞候旨頒布施行俾臻完善

又內閣奏酌擬京外各官停送辦法六條 一候送京官准予分發也 一候送准帖式分別給予分發也 一未經投供之道府各官應令補交班次銀兩也 一佐雜等官應令報捐分發也 一候送教職分別辦理也

又奏內閣法制院有核訂全國法令之責加以修正憲政籌備清單內所列各項或起草或覆核見就應辦事宜分四類官制官規議院法令爲一類各項法典律例爲一類行政法規及其他憲政籌備事項爲一類各項財政爲一類每類以參議領其事以參事分任之其庶務及文牘會計以僉事任之至憲政編查館原奏設之考核專科係爲考核京外籌備憲政事宜原奏明纂辦之光緒政要亦與見經奏准飭各衙門纂輯行政法規相出入均應接續辦理參事重在編核法令自須用專門法政人才僉事亦宜慎選人員謹將前在憲政編查館當差留院辦事及酌調來院人員開單呈覽如蒙 俞允由 臣等酌定額缺等第此次留院各員俟補缺改官後再開去原官原差 又奏改設內閣官報以爲公布法律命令機關酌擬條例十二條繕單呈覽

又奏各部則例久未纂修亟應修訂見行法規見正遵照內閣辦事暫行章程將應奏事件分別規定另擬章程然欲澈底盡清必整理例案釐爲法規使辦法各有一定此關於內閣辦事章程之實行者一也行政審判院行將設立審判事件應以法令指定若法令尙未規定則評定無所適從此關於行政審判法之編訂者二也法令之形不完必至憲法行而舊日奏案難於適用窒礙因以環生此關於憲法之施行者三也請飭各衙門編纂見行法規各就主管事務酌量分類冠以各項法令名稱又擬請嗣後京外各衙門除見應循例奏報事件外所有關於法令性質應具奏請 旨者無論新定辦法或改定辦法係特交內閣會議事件及內閣主管事件或內閣總協理大臣認爲應以法令規定事件由內閣法制院撰擬其屬於一部主管或他部兼管者由各該部分別擬具草案逐款臚列定爲條文冠以法律條例章程規則等名稱咨送內閣由法制院審查覆核具奏

又奏內閣屬官一廳四局前因開辦伊始於裁併各衙門見有人員酌量留用復添調各項人員試辦三月尙無貽誤查承宣廳所管事項原係舊日軍機處職掌又益以辦理會議及全閣文牘會計從前章京員額無多勢難再減此外添調計學人員一員專辦會計制誥局敘官局原係舊日內閣吏部職掌均酌留舊員十分之二制誥局又有吏部外務部陸軍部畫撥事項隨送人員亦分別酌留統計局印鑄局原係舊日憲政編查館職掌統計局原有兼差人員多已回原衙門所餘員數不敷分布不能不量予調用印鑄局除原有十數員外酌量添調並留有禮部隨事撥送數員總計留調人員尙資得力擬請留開任用再行酌定額缺分別等第奏明辦理此次調用各員俟補缺改官後開去底官

又 諭慶親王奕劻等奏奉職無狀請立予罷斥載澤等奏國務重要請另簡賢能以符憲政而資治理鄒嘉來等奏時局艱危政務重要請准辭職以定國是而正人心各一摺所奏甚是均著照所請慶親王奕劻開去內閣總理大臣大學士那桐徐世昌開去協理大臣鎮國公載澤鄒嘉來等均各開去國務大

臣袁世凱著授爲內閣總理大臣該大臣見已前赴湖北督師著將應辦各事略爲布置即行來京組織完全內閣迅即籌畫改良政治一切事宜袁世凱未到京以前此數日閒仍著慶親王奕劻等照舊任事內閣組織未成以前並仍著載澤等鄒嘉來等照常辦事均不得少有諉卸

又 諭袁世凱面奏組織內閣推舉國務大臣著命梁敦彥爲外務大臣趙秉鈞爲民政大臣嚴修爲度支大臣唐景崇爲學務大臣王士珍爲陸軍大臣薩鎮冰爲海軍大臣沈家本爲司法大臣張謇爲農工商大臣楊士琦署郵傳大臣達壽爲理藩大臣梁敦彥嚴修王士珍薩鎮冰張謇未到任以前外務大臣著胡惟德暫行署理度支大臣著紹英暫行署理陸軍大臣著壽勳暫行署理海軍大臣著譚學衡暫行兼署農工商大臣著熙彥暫行署理

又 諭內閣袁世凱面奏見在官制尙未以法律規定所有昨簡之各部副大臣暫照海陸軍成案改設一俟官制釐定再行降旨

又 諭內閣奏鹽政大臣應由國務大臣兼任著度支大臣暫行兼任鹽政大臣
又 諭袁世凱面奏內閣見在業已成立嗣後所降諭旨凡關於某部事項即著該國務大臣隨同總理大臣署名

又內閣總理大臣面奏關於奏事入對暫行停止事項謹按見在完全內閣業經組織各項制度尙未規定除各衙門辦事仍暫照舊外所有與立憲制度抵觸事項擬請暫行一律停止一除照內閣官制召見國務大臣外其餘召見官員均暫停止俟定有章制再行照章辦理總理大臣不必每日入對遇有事件奉 旨入對並得隨時自請入對一除照內閣官制得由內閣國務大臣具奏外其餘各衙門應奏事件均暫停止所有從前應行請 旨事件均咨行內閣核辦其必應具奏者暫由閣代遞凡無須必請 上裁事件均以閣令行之其關於皇室事務如宗人府內務府鑾輿衛欽天監等衙門暫仍照向章具奏統由內務府大臣承 旨署名具奏後仍即時知照內閣但所奏以不涉國務爲限一各部例行及屬於大臣專行事件毋須上奏其值日辦法應暫停止一向

由奏事處傳 旨事件均暫行停止內外摺照題本舊例均遞至內閣由內閣擬 旨進呈再請鈐章其謝 恩請安摺件及進呈貢物仍暫由奏事處照舊呈遞

又 諭資政院奏內閣應負責任國務大臣不任懿親一摺懿親執政與立憲各國通例不符我朝定制不令親貴干預朝政 祖訓著有明文實深合立憲國家精義同治以來國難未紓始設議政王以資夾輔相沿至今本年設立內閣仍令王公等充國務大臣原屬一時權宜之計朝廷本無所容心茲據該院奏稱皇族內閣與立憲政體不能相容請取銷內閣暫行章程實行內閣完全制度不以親貴充當國務大臣等語所陳係爲尊皇室而固國基起見朕心實深嘉納一俟事機稍定簡賢得人即令組織完全內閣不再以親貴充國務大臣並將內閣辦事章程撤銷以符憲政而立國本

皇朝續文獻通考卷一百十七

職官考三 京文職
政務處

臣謹案歐西官制均設立責任內閣日本亦如之雖天皇不負責任也內閣大臣或與議院抵牾則率各部長而退似合漢時天下多故策免丞相之遺意議者曉曉競思步武而不可無監督之人於是始立政務處繼改資政院為上下議院之基礎開各省諮議局之先聲又有考察政治館憲政編查館錯綜其間紛議新法詳載憲政考茲輯初定章程列內閣後

光緒二十七年 諭上年因變通政治力圖自強通飭京外各大臣各行所見剴切敷陳以待甄擇近來陸續條奏已復不少惟各疆臣多未奏到此舉重大條件繁多奏牘紛煩務在體察時勢抉擇精當分別可行不可行並考察其行之力不非有統匯之區不足以專責成而聚綱者設立督辦政務處派慶親王奕劻大學士李鴻章榮祿崑岡王文韶戶部尚書鹿傳霖為督辦政務大臣劉坤一張之洞亦著為參預各該王大臣等於一切因革事宜務當和衷商榷悉心評議次第奏聞俟朕上稟 慈躬隨時更定回鑾後切實頒行示天下以必信必果無黨無偏之意其政務提調各官該王大臣等務擇心術純正通達時務之員奏請簡派勿稍疏忽此事予限兩個月見已過期其未經陳奏者著迅速彙具奏

政務處開辦條議

向來軍機處為政事統匯今別設政務處以軍機大臣領之並添派王大臣領之事體重要天下觀風在事之員皆當力任其難勿勞勿怨變法宗旨具見上年 諭旨果能內外一心實事求是則轉貧為富轉弱為強皆於是乎在若辨之不明行之不力私心不化積習不除雖有良法仍無實濟遠有熙甯之前鑒近有戊戌之前車所當深思熟計也辦事不當畏難不可不知其難立法豈能徇眾不可不謀於衆思廣益公爾忘私其根本也渾化中西折衷至當其指要也端不輕發令出惟行其措施也知人善任透視厥成其

歸宿也茲當開辦之始略具條議如左

一木處王大臣以下應設提調二員京京八員或十員欽遵 聖諭以心術純正通達時務者充之朝官自京堂以下外官自監司以下迄於布衣均可選充首論心術兼取才望不拘成格其堂司相見之禮亦較各部院衙門優加禮紀蓋政務重大非其人不得預既用之須重之也

一政務千端萬緒約而言之興利除弊而已大利當興而不興者非常之原黎民所懼可與樂成難與圖始也積弊當除而不除者弊弊之人窟穴於斯衣食於斯一人革之而眾人撓之也今既奉 旨舉辦當首破因循瞻顧之習事無輕發發則推行不惟反其阻撓者以溺職論先事示立木之信乃可次第收破竹之功書曰允執厥中又曰惟斷乃成兩言盡之矣

一政務處之設略仿宋三司置條例司遺意而變通之王安石之變法舉青苗保馬方田水利諸政與其資僚謀之一室失詢謀僉同之意故天下以為不便今則欽奉 明詔俾中外大臣各行所見各竭所知以俟 聖明裁擇

大哉王言遠邁前古各官章奏均交政務處詳審分別可行與不可行開辦之初首在細心閱看其不可行者暫從開置仍條列其難行之故呈堂候核至其可行者分別緩急量為刪增其或一人言一事而可取其意善矣其辦法未必精到也當斟酌損益期於盡善其或數十人同言一事而可取者則當彙萃羣言去其重複補其未備講 旨施行政務二字包舉萬端今之上言者不及百人有利當與有弊當革而中外巨工未經言及者則當由政務處自擬辦法斟酌妥善將來奉 旨舉辦之事勒為成書即是一部政典

故此事斷非一手一足之烈亦非一朝一夕之故亟當旁求俊乂協贊嘉猷若仍照各衙門事例凡當行之政於各奏疏中抽取一條由政務處辦一通行由各省辦一復奏有名無實有始無終則與變法自強之本意大謬矣一政務股繁各官章疏別擇以後當區分門類各認各股專心辦理類如官制學校科舉吏治財政軍政邦交商務工藝刑律舉辦雖有緩急考訂不容疏漏而每門之中又分子目如官制則有文員武職裁併添置諸事學校則

有國子監府州縣學以及各省書院學堂而報館譯書局方言測繪天算均隸之科舉則有小試鄉會試特科諸目吏治則有清訟催科荒政保甲巡捕諸目財政所包最廣如農田水利屯墾畜牧關稅賦役礦務鐵路錢幣銀行鹽法漕運倉儲捐餉棉桑紡織諸局皆隸之軍政則有水師陸師操法戰術餉章營制軍械礮臺營壘以及調防裁汰諸事邦交則外務出使洋稅教堂游歷以及條約公法皆屬之商務乃財政之大端別爲一門用昭鄭重工藝則有關製造者皆屬之刑律一門似應與公法參訂互證以辦民教交涉之案而商律附焉每舉一事各歸各股由該管章京妥議辦法再由提調覆核商訂參議公同斟酌呈堂審定然後奏請 聖裁

一變通法制大綱有二一則舊章本善奉行既久弊竇叢生法當規復先制認真整理一則中法所無宜參用西法以期漸致富強法當屏除成見擇善而從每舉一事宜悉心考求凡中國政書及上海所譯各種西書皆當購存公所東洋與我同洲變法未久遠臻強盛此尤切近可師者當咨由日本出使大臣將彼國變易各大政行之已有實效者概行鈔錄齎送並備咨出使各國大臣將各國財政軍政商務工藝諸大端擇其尤要者分別錄送以備稽核

一政務處之設爲自強計中國之弱由於貧列國之強由於富是救貧又爲自強之始基然變置之初斷斷不宜從理財入手方今中國一絲命脈惟在人心而匪黨蔓延時相誘煽若此時先事搜括天下將謂千利百病一無興除所變者特厲民之法耳從此人心一失雖有良法亦難措置當先取天下所甚疾者剔除一二事所甚願者施行一二事使天下之人曉然於 朝廷變法實爲吾民興利除害人人有悅服之忱而事事有求實之意則此後下令如流水矣前之洋債未清今之償款又迫每年二千餘萬於何取償夫理財祇有兩途曰開源曰節流開源之事或緩不濟急或放利多怨不如自節流始節流之法不外汰冗兵以節餉汰冗官以節祿汰無益之局廠以節經費餉也祿也經費也皆天下之民之膏血也既取其膏血而虛糜之今爲時

世所迫凡虛糜者一切如故而別事敲骨吸髓以應外人之求不惟民心不甘 朝廷亦決不忍出法當盡裁冗費以付償款再有不足然後取之於民庶可篤祐而對天下矣

一上年 諭旨嚴禁新舊之名以渾融中外之迹而申之以去私心破積習此即政務處簡明切要之宗旨也同爲 大清臣子而自分新舊苟爲異同隱患中於國家黨禍及於士類維新之極而有康逆之亂守舊之極而有拳匪之亂 朝廷吁食薄海搜心列國所譏亦中華之恥也今當盡化偏私恪遵 聖訓迂謬之論一切屏除惟是崇尙西法者往往不揣本末銳意更張則亦賢智之過今言變法動引日本爲例殊不知日本幅員非廣風氣齊一號令易行且以外國學外國醫猶楚學齊語不其懸殊故事易舉而效甚速中國地方四萬餘里歷代相承二千餘年從不知西學爲何事東南諸行省風氣已開者語以西法尙不驚疑若西北之民質性忠樸耳目未廣驟令變革何異龔俗鳴球修陵蒂藕乎故欲變法斷難以通行之文告處四海之齊民法當因地制宜因勢利導且即以西法論有西政西藝之不同今學西法欲學其事先學其心西人之心公而中人多私西人之文飾而中文太繁西人之事實而中事多虛西人之言信而中人多僞本原大異而徒取則於事爲文貌之閒雖累萬人不爲功累百年難求效也自同治初年以來非不講求洋務局廠如櫛船廠如雲積三十年有何成效所以然者西人作事千人一心共利其國國利而身亦利中人作事百人百心各利其身身有利有利而國則決無一利此所以股票不售公司換羣凡西人有利之事中國效之皆賠錢之事必先正中國之人心乃可行西人之善法正本清源匪異人任矣

一破除陋習先自政務處始近年方略會典諸館三年一保釐等選除名器不尊適長奔競今奉 上諭以純正通達見待則在事者已結 主知自毋庸以三年列保以免希冀速化者視爲捷徑競事資緣其供事諸人則照軍機處例優予出身以示鼓勵

一舉行政政其事體重大須考訂精覈商榷者應俟 恩鑾以後悉心詳議 其有芟除積弊有益民生可以立見施行者應由 行在政務處奏請 特旨即日分別興除以慰天下之望

一爲政在人千古不易政務處無論立法如何詳密要須中外大臣實心實力破除因循敷衍之習始能望成功而收明效此處乃天下政治之管轄當廣集英賢資其策力非其才不當徇情面得其人不當限資格 朝廷用人一秉大公當自政務處始

三十一年政務處覆奏御史黃昌年奏各衙門具奏奉 旨准駁之件須令各衙門皆知一摺略稱查創行新政增益舊章條目綦繁自以刊錄摺件爲要務嗣後具奏摺件除事關慎密及照例核覆之件毋庸鈔送外所有創改章程及議定事件皆於奉 旨後咨送政務處陸續發刊以廣傳布

又 諭前經特簡載澤等出洋考察各國政治著即派政務處王大臣設立考察政治館延攬通才悉心研究擇各國政治之與中國治體相宜者斟酌損益纂訂成書隨時進呈候旨裁定所有開館事宜著王大臣妥議具奏

三十二年改政務處爲會議政務處
三十三年改考察政治館爲憲政編查館所有軍機大臣大學士參預政務大臣會議事宜改由內閣辦理仍設提調二員即以原派之提調改充
又憲政編查館奏請分設編制統計兩局各派局長及科員等分理其事而以提調總司其成

又奏遴選京外人員派充諮議官略稱編纂憲法必先調查而所辦事項內而各署外及各省無不息息相關擬遴選各部院衙門中諳熟典章通達治體之員與各省官員中學識精博物學允孚者俱派爲 館諮議官不必到館遇有疑難隨時咨詢詳復庶得廣集衆思共襄盛典

又奏遵議翰林院侍講景澗奏敬陳管見 略稱 臣等詳閱所陳設立憲政籌備處八利大都爲注重職守免致遲誤起見擬請如該侍講所請令京外各衙門一律設立憲政籌備處在京由各衙門堂官責成承參在外由各省督撫責

成司道督率承辦各員辦理其從前已設督催總核考核等處即由各該衙門改易今名籍昭畫一又稱各衙門於奏報成績後另繕清單將分辦此項人員咨送憲政編查館以備諮詢嗣後凡京外各衙門派在憲政籌備處人員應令開單咨報 館以便遇事互相商榷至所請將十月十三日 上諭令各衙門恭懸一節應請 旨一併照准恭書懸掛以勵進行

資政院

臣謹案甲午日高之役創鉅痛深始議變法庚子以後朝野一聞咸借立憲以欺耳目是丹非素如墮五里霧中當時惟出使義國大臣許珪考察憲政大臣于式枚斬斷致辨罪以阻撓謗書盈篋不揣其本而齊其末陽以立憲爲名陰收攘權之實削趾就履舉國若狂儉人乘之遂至大亂資政院其初枕也因系政務處改設特連類及之

光緒三十二年編纂官制大臣奏釐定資政院官制謹按資政院設立之意卽爲將來立憲預備恭釋 諭旨大權統於 朝廷庶政公諸輿論仁至義盡中外同欽惟輿論究以何者爲標準採取輿論究以何者爲樞機此各國所以有議院選舉之法爲國民代表也吾國三代時國民議政之事最多如盤庚之誕告有衆咸造王庭周禮小司寇致萬民於外朝而詢國危國遷之類至兩漢以後大意寢亡雖廷臣會議有議郎博士等微員參與其閒而庶民不與焉西國當吾東周初年已開民會事必經民會議定始行近世文明日進議院林立與周書謀人之意符合日本叻之明治二年設集議院凡上有所創必付議院行下有所陳亦由議院達以故君民一體上下同心有戰則人盡當兵有費則人願加稅富強之故有由來也中國此時程度誠不能早設議院但 諭旨明示預備立憲則必博採輿論以宣 上德而通下情若仍用保舉徵辟之法與原設政務處無異卽與 諭旨公諸輿論之意不符且國民義務以納稅爲大宗見在財政艱難舉行新政何一不資民力若無疏通輿論之地則抗糧鬧捐之風何自而絕日本明治元年歲入銀三千三百八萬餘元至明治三十年歲入已二萬三千八百七十餘萬元三十年中增加七八倍而民不怨中國歲入銀

八千餘萬兩一言加稅阻力橫生對鏡參觀其故安在此不能不採輿論者一也見擬官制內閣設總理大臣一人左右副大臣各一人言官彈奏多以政府權宜為詞不知東西各國內閣祇總理大臣一人從無專權之事因有議院持其後輿論所是者政府不得非之輿論所非者政府不得盡是之不得已而解散議院惟君主大權可行雖政府無權焉安有前明閣臣自作威福之事乎此不能不採輿論者一也近日民智漸開收回路礦之公電告訐督撫之公呈紛紛不絕若聽其漫無歸宿致人人有建言之權時閱數年政府將應接不暇惟專設一輿論總匯之地非經由資政院者不得上聞使院當輿論之衝政府得安行其政策而民氣疎達亦不致橫決難收保全甚大此輿論之不能不歸於資政院者又一也仰承 諭旨俯察人情謹擬資政院官制伏乞 鈞定

第一條資政院選京外才智之士採取輿論以通達下情條陳治理為預備立憲 第二條資政院總裁一人即為本院議長以王公大臣簡放 第三條資政院副總裁二人即為本院副議長以曾任尚書侍郎督撫及出使大臣簡放 第四條資政院參議員以 欽選會推保薦之法定之共合一三十人其分類如左一王公世爵勳裔之已滿三十五歲者 欽選十人二京員已滿三十歲者會推五十四人三各省官紳士商已滿三十歲者由督撫保薦六十六人 第五條除上條所定員數外其有勳德聞望之紳耆或富商報效巨款至五萬金以上者均得奉 特旨欽派為額外參議員 第六條王公世爵待選之法由宗人府內閣查明合格之人繕具全單奏請 欽選 第七條京員會推之法由各該衙門查明合格人員造冊咨送本院由總裁副總裁刊印名冊並選舉票先期知會本人令各書所推一人鈐印封送本院投函定期公開並咨請集賢院大臣監視 第八條督撫保薦之法由下開各項處所先行公舉以被推人數最多者定之並將得舉票數榜示一學務公所及教育會二商會三地方自治各局所 第九條下開各項俱不得為本院參議員一陸海軍人員及軍人二司法各官三巡警各官四收稅各官五審計官六行政裁判官七學堂肄業之學生八小學堂教員

九管理選舉事務各員 第十條督撫保薦之參議員奉天吉林直隸山東山西河南陝西甘肅新疆四川湖北湖南安徽江蘇江西浙江福建廣東廣西雲南貴州等二十二省合成六十六人應視各省人數之多少程度之高下由總裁副總裁會同民政部指定每省應保幾人先期電知辦理 第十一條每年正月二十日至四月二十日為開院之期由總裁副總裁請 旨特派親貴大臣到院行開院式宣布應議事宜 第十二條資政院應議事件開列於左一奉 旨飭議事項二新定法律事項三歲出入之預算事項四稅法及公債事項五人民陳請事項 第十三條前條人民陳請事項苟有學務公所及教育會商會地方自治各局所介紹者本院亦得酌量批駁 第十四條資政院所陳事件由總裁副總裁咨送內閣請 旨施行若內閣總理大臣以為不可行須臨本院或派員陳明已見本院不得強政府施行 第十五條資政院於政治得失關係重要事件經本院議定後總裁副總裁得聯銜封奏並得請 旨入對 第十六條資政院會議事件如由內閣交議者應會同內閣總理大臣左右副大臣聯銜具奏 第十七條資政院會議分通常臨時二種通常會議之期日於一個月前文電通知並刊布官報 第十八條資政院非全院人員三分之二以上列席不得開議 第十九條資政院開議時由總裁副總裁咨請民政部選派巡長巡警聽候議長指揮 第二十條總裁有事時副總裁代理之 第二十一條資政院開議時參議員中有違背規則擾亂秩序時議長有戒飭禁止之權違者扶出院外 第二十二條資政院開議時如全院有擾亂秩序情形議長得飭令暫行停議 第二十三條資政院各員於議事範圍外不得語涉侵侮及攻發陰私如有以上等情被辱之員得呈請議長懲處不得私相報復 第二十四條遇有上項懲處時本院得於參議員中選派一臨時審查員定懲處之法由議長決之其懲處事項一語言誹謗二飭該員當場謝過三停止列席若干日四黜退資政院黜退者須以全院三分之二以上人數決之 第二十五條遇上黜退時如為王公世爵勳裔等人應請 旨辦理 第二

十六條資政院參議員如原有專摺奏事之權於本院見行開議之事不得陳奏 第二十七條資政院有行提議事件非有參議員三十員以上同意者不得開議 第二十八條資政院會議之事以參議員過半人數同意時定之若可同數則由議長定之 第二十九條資政院用抽籤法分參議員為數科每科置科長一人由科員中公推其科目由總裁副總裁定之 第三十條資政院有調查事件時可特設調查科員調查其事呈報總裁副總裁 第三十一條內閣交議事件不經調查科之調查不得議決但事務緊急時不在此例 第三十二條由內閣交議豫算事件本院應選派調查科員於一個月內調查明確方得開議 第三十三條資政院遇特派調查科員時應咨明內閣政務大臣查照 第三十四條資政院議定事件由總裁副總裁咨明內閣政務大臣再議時得重行開議但以三次往復為止 第三十五條資政院參議員得三十人以上同意呈遞說帖經總裁副總裁咨商內閣候覆 第三十六條資政院於第十三條陳請事件公議許可時應時遞說帖咨送內閣候覆 第三十七條凡閱涉司法及行政審判之陳請事件資政院不得收受 第三十八條資政院議事日記由總裁副總裁咨送內閣政務大臣查照 第三十九條資政院於開院期內除內閣政務大臣外不得與他種衙門文書往復 第四十條資政院不得向人民發貼告示及傳喚人民 第四十一條資政院參議員除見犯罪案外當開院時期有未經總裁副總裁許可者不得逮捕 第四十二條資政院參議員公務上之言論行為他人不得加以誹謗侮辱或囑託迫脅如有以上等情該員得據實呈控其規條另於釐訂各項法律時定之 第四十三條資政院應設院正院副各一人常川駐院監督秘書廳事務由參議員公推正副各三人呈由總裁副總裁開單請 旨簡派 第四十四條資政院置秘書廳設書記官長一人書記官數人承總裁副總裁之命編纂議事日記及各種文件兼理會計庶務 第四十五條資政院書記官長為請簡官書記官為奏補官 第四十六條資政院人員以二年為一任任滿時奏

請 欽選並舉行公推保薦其任滿仍被推薦者仍得連任惟連任以二次為限 第四十七條資政院人員遇有被檢舉不合資格時由總裁副總裁選派調查科員查明議決 第四十八條資政院參議員請假時不得逾十日如逾十日者必經總裁副總裁許可惟不得請長假 第四十九條資政院參議員非確有正值先期呈明總裁副總裁核定者不得臨時託故不到 第五十條資政院參議員以外不經總裁副總裁特許者不得入座旁聽 第五十一條資政院秘書廳辦事章程由總裁副總裁自定之 第五十二條資政院制視人民進步之遲速每年開院前變通增減奏請施行 三十三年 諭設資政院派溥倫孫家鼐充該院總裁 宣統二年 諭前奉 先朝諭旨設資政院為上下議院基礎迭經降旨將該院暨各項選舉章程釐定頒布切實籌辦本年九月初一日為第一次開院之期所有單開各項欽選議員自應先期召集以備舉行著以本年八月二十日為召集之期均即遵照定期一律齊集該議員等須知此次召集資政院為中國未有之創舉即為將來成立國會之先聲務期竭盡忠誠恪守秩序克擔義務代表輿情用副朝廷實行立憲循序程功之至意 三年 諭資政院院章前於光緒三十四年由資政院總裁會同軍機大臣具奏復於宣統元年經資政院會奏續擬院章並將前奏各章改訂頒布施行見在案閱兩年時勢又有不同核與新頒法令未盡脗合亟應修改以免窒礙著資政院總裁副總裁會同內閣總理大臣悉心斟酌改訂具奏候朕欽定頒行 改訂資政院院章兩章督續訂八章 第一章總綱 第一條資政院欽遵 諭旨以取決公論豫立上下議院基礎為宗旨 第二條資政院總裁二人總理全院事務以王公大臣簡充 第三條資政院副總裁二人佐理全院事務以三品以上大員簡充 第四條資政院議員以 欽選及互選之法定之 第五條議員於院中應有之權一律同等無所軒輊 第六條會議期分為二種一常年會一臨時會常

年會每年一次會期以三個月為率臨時會無定次會期以一個月為率

第七條 開會閉會均明降 諭旨刊布官報 第八條資政院開會之日 恭請 聖駕臨幸或由 特派親貴大臣代行開會禮宣布本期應議事件 第二章議員 第九條資政院議員由左列各項人員年滿三十歲以上者 選充一宗室王公世爵一滿漢世爵一外藩 王公世爵一宗室覺羅一 各部院衙門官四品以下七品以上者但審判官檢察官及巡警官不在其 列一碩學通儒一納稅多額者一各省諮議局議員 第十條資政院議員 定額一由宗室王公世爵充者以十六人為定額一由滿漢世爵充者以十 二人為定額一由外藩王公世爵充者以十四人為定額一宗室覺羅充者 以六人為定額一由各部院衙門官充者以三十二人為定額一碩學通儒 充者以十人為定額一由納稅多額充者以十人為定額一由各省諮議局 議員充者以一百人為定額 第十一條資政院議員 欽選互選之別一 宗室王公世爵滿漢世爵外藩世爵宗室覺羅各部院衙門官碩學通儒及 納稅多額者 欽選一各省諮議局議員互選互選後由該省督撫覆加選 定咨送資政院 第十二條資政院議員 欽選及互選詳細辦法照另定 選舉章程辦理 第十三條議員以三年為任期任滿一律改選 第三章職掌 第十四條資政院應行議決事件一國家歲出入豫算事件 二國家出入決算事件三稅法及公債事件四新定法典及嗣後修改事件 但憲法不在此限五奉 特旨交議事件 第十五條前條所列第一至第 四各款議案應由軍機大臣或各部行政大臣先期擬定奏請開會時交議 但第三款所列稅法及公債事件第四款所列修改法典事件資政院亦得 自行草具議案 第十六條資政院於第十四條所列事件議決後由總裁 副總裁分別會同軍機大臣或各部行政大臣具奏請 旨裁奪 第四章資政院與行政衙門之關係 第十七條資政院議決事件若軍機 大臣或各部院行政大臣不以為然得聲敘原委事由咨送覆議 第十八 條資政院於軍機大臣或各部行政大臣咨送覆議事件若仍執前議應由

總裁副總裁及軍機大臣或各部行政大臣分別具奏各陳所見恭候 聖

裁 第十九條會議時軍機大臣及各部行政大臣得親臨會所或派員到 會陳述所見但不列議決之數 第二十條資政院於各衙門行政事件及 內閣會議政務處議決事件如有疑問得由總裁副總裁咨請答覆若軍機 大臣或各部行政大臣認為必當秘密者應將大致緣由聲明 第二十一 條軍機大臣或各部行政大臣如有侵奪資政院權限或違背法律等事得 由總裁副總裁據實奏陳請 旨裁奪前項陳奏事件非有到會議員三分 之二以上之同議不得議決 第五章資政院與各省諮議局之關係 第二十二條資政院於各省政治 得失人民利病有所諮詢得由總裁副總裁節行該省諮議局申覆 第二 十三條各省諮議局與督撫異議事件或此省與彼省之互相爭議事件均 由資政院核議議決後由總裁副總裁具奏請 旨裁奪前項核議事件關 涉某省者該省諮議局所選出之議員不得與議 第二十四條各省諮議 局如因本省督撫有侵奪權限或違背法律等事得呈由資政院核辦前項 核辦事件若審查屬實照第二十一條辦理 第六章資政院與人民之關係 第二十五條各省人民於關係全國利害 事件有所陳請得擬具說帖並取具同鄉議員保結呈送資政院核辦 第 二十六條前條陳請事件應先由議長交該管各股議員審查如無違例不 敬之語方准收受其經審查後批駁者在本會期內不得再行投遞或另向 他處投遞 第二十七條資政院於人民陳請事件若該管各股議員多數 認為合例可採者得將該提議作為議案其關於行政事宜者應咨送各該 衙門辦理 第二十八條資政院不得向人民發貼告示或傳喚人民 第 二十九條資政院於民刑訴訟事件概不受理 第七章會議 第三十條資政院會議時由總裁為議長副總裁為副議長 議長有事故時由副議長代理 第三十一條資政院常年會自九月初一 日起至十二月初一日止其有必須接續會議之事得延長會期一個月以

內 第三十二條資政院臨時會於常年會期以外遇有緊要事件由行政各衙門或總裁副總裁之協議或議員過半數之陳請均得奏明恭候 特旨召集進行 第三十三條議員於召集後應以抽籤法分為若干股每股由議員互推一人為股長 第三十四條資政院會議非有議員三分之二以上到會不得開議 第三十五條會議以到會議員過半數之所決為準若可不同數則取決於議長 第三十六條資政院自行提議事件非有議員三十人以上之同意不得作為議案 第三十七條資政院於豫算法典及其餘重要議案應先由議長交該管各股議員調查明確方得開議 第三十八條資政院會議應由總裁副總裁先期將議事日表通知各議員並咨送行政衙門查照 第三十九條議員於議案有關繫本身或其親屬及一切職官例應迴避者該員不得與議 第四十條資政院議員如原有奏事之權者於本院見行開議之事不得陳奏 第四十一條議員除見行犯罪外於會期內非得本院承諾不得逮捕 第四十二條資政院議員於本院議事範圍內所發言論不受院外之詰責其以所發言論在自行刊布者如有違犯仍照各本律辦理 第四十三條會議不禁旁聽其有左列事由經議員公認者不在此限 一行政衙門咨請禁止者 二總裁副總裁同意禁止者 三議員三十人以上提議禁止者 第四十四條資政院議事細則分股辦事細則及旁聽規則另行釐定

第八章紀律 第四十五條議場內應分設守衛警官及巡官巡警聽候議長指揮其員額及守衛章程另行釐定 第四十六條議員於會議時有違背院章及議事規則者議長得令其退場或令其退出旁聽人有不守規則者議長得令其退出其因而紊亂議場秩序致不能會議者議長得令暫時停議 第四十七條議員有屢違院章或語言行止謬妄者停止到會其情節重者除名 第四十八條議員無故不赴召集後無故不到會延至十日以上者均除名 第四十九條議員有以本院之名義干預他事者停止到會其情節重者除名 第五十條議員停止到會以十日為限由

總裁副總裁同意行之除名以到會議員三分之二以上決議行之 第五十一條議員有應行除名者如係 欽選人員應由總裁副總裁奏明請旨辦理 第五十二條資政院有左列情事得由 特旨諭令停會一議事踰越權限者 二所決事件違背法律者 三所議事件與行政衙門意見不合尚待協商者 四議員在議場有狂暴舉動議長不能處理者停會之期以十五日為限 第五十三條資政院有左列情事得由 特旨諭令解散重行選舉於五箇月以內召集開會 一所決事件有輕蔑 朝廷情形者 二所決事件妨害 國家治安者 三不遵停會之命令或屢經停會仍不悔改者 四議員多數不應召集屢經督促不到會者

第九章秘書廳官制 第五十四條資政院設秘書廳掌本院文牘會計記載議事錄及一切庶務 第五十五條資政院秘書廳設秘書長一人秩正四品由總裁副總裁選保相當人員請 旨簡放 第五十六條資政院秘書廳設一三三等秘書官各四人一等秩正五品二等秩正六品三等秩正七品由總裁副總裁選保員奏補 第五十七條資政院秘書廳附設圖書室一所掌收藏一切書籍之事圖書室設管理員一人即以秘書兼充 第五十八條秘書廳秘書長承總裁副總裁之命監督本廳一切事宜 第五十九條秘書官承秘書長之命分掌各科事務 第六十條秘書廳分為四科一機要科一議事科一速記科一庶務科 第六十一條秘書廳應設書記及速記生等員額由秘書長酌量事務繁簡稟承總裁副總裁酌定 第六十二條秘書廳辦事細則由秘書長擬訂呈由總裁核定施行

第十章經費 第六十三條資政院經費款目一總裁副總裁公費二議員公費及旅費三秘書廳經費及守衛經費四雜費及豫備費 第六十四條前條所列各款經費數目另行奏定 第六十五條資政院經費由度支部每年歸入豫算按數支撥

又 諭資政院奏續擬院章並將前奏各章改訂開單呈覽一摺朕詳加披覽

該院自職掌以下八章與見定諮議局章程實相表裏即為將來上下議院法之始基所擬尙屬周妥著京外各衙門一體遵行其各項細則章程仍著迅速籌擬奏請宣布餘依議

弼德院

臣謹案大學士為宰相兼職如唐集賢院崇文院大學士宋昭文館觀文殿資政殿大學士類皆品望清峻非曾任執政者弗除參稽務備顧問自昔為臣僚華選特未設專署耳日本明治二十一年立樞密院班在內閣之上顧問大臣資格須年逾四十練達國務由君主特簡或有退休而充任者位極崇高弼德院之設殆同此意因與內閣處對峙之地并列於後

宣統三年憲政編查館會奏略稱查籌備事宜清軍宣統二年釐定弼德院官制三年頒布竊維弼德院制度昉於東西各國之樞密院參事院與閣初議政處及漢之中朝官唐之翰林明初內閣略同所以上備顧問參議國務密翊君上維艱之謀隱匡政府措置之用為國家重要機關亟宜成立者也當飭在事人員詳慎擬訂職將官制要義詳細陳之我國豫備憲政以欽定憲法為依歸查日本憲法規定緊急命令獨立命令皆為各國所無而皇室事項外交事項歐洲必經由議院者日本皆列之於君主大權與憲法大綱正相符合故日本樞密院權限皆有審議及解釋上列各端重要事件之規定實為弼德院所宜仿見擬該院權限所及凡關於皇室及憲法附屬法令並外交條約內治重要者皆由該院擬議則任寄優崇範圍寬廣朝廷獲諮詢之益政府收補助之功此應陳明者一也國務大臣皆任行政而謀議或慮其僭疏宗人府內務府皆分任皇室職權亦未便使其不豫計畫其尤要者自院長以至顧問大臣皆為專任自可從容討論決擇大政之宜而各國務大臣與宗人府內務府長官皆得兼顧問大臣亦可收聯絡之效無隔閡之虞此應陳明者又一也日本樞密院大臣多用曾任政府及立功受爵諸人蓋取其勳望懋著經驗素優是以漢之功臣每與朝議宋之舊相多列經筵其職任或有不同而用意則如一致見於顧問大臣皆特重其資格參日本之新制即合歷代之成規而於應議

諸端皆可酌損益之中祛新舊之失尤於憲政裨益實多此應陳明者又一也總之立憲官制其相與維繫補助者皆有精意存乎其間缺一有所不可弼德院可以近依帝座朝夕論思凡上下應達之機縱與操縱內治外交之扁輪股肱元首左右閣臣皆於該院寄之是又立憲初基所必宜注重者也謹擬官制二十四條繕單恭候 欽定頒布奉 諭上年修正籌備清單經朕定為宣統三年頒布弼德院官制設立弼德院茲據憲政編查館會議政務處會奏遵擬弼德院官制一摺朕詳加披覽除酌改外餘尙妥協見在已經降旨設立內閣該院權限與內閣相為維繫所關重要必須同時並設用備顧問著將此項官制一併頒布即行設立弼德院以重憲政始基

弼德院官制

第一章編制 第一條弼德院為 皇帝親臨顧問國務之所 第二條弼德院設顧問大臣院長一人副院長一人顧問大臣三十二人 第三條顧問大臣均以著有勳勞及富有政治上學識經驗者任之 第四條見任國務大臣及宗人府內務府大臣均候 旨兼任弼德院顧問大臣內閣總理大臣協理大臣不得兼弼德院長及副院長 第五條弼德院設參議官十人以富有政治上學識經驗者任之 第二章職掌 第六條左列事件應由弼德院議決具奏一按照 皇室大典屬於弼德院權限內事二憲法及其附屬法令之審議及解釋三憲法未頒以前按照憲法大綱關於 君上大權第八第十十一第十二項所列事件四條約及重要交涉事件五弼德院官制改正事件 第七條前條所列各款外如有臨時顧問事件得由弼德院議決具奏 第八條議奏事件公布時應敘明該事業經弼德院議覆 第九條弼德院於議奏事件不得干預主管衙門之施行 第三章會議 第十條弼德院會議非顧問大臣半數以上不得開議 第十一條會議時以院長為議長院長有事以副院長為議長副院長有事以顧問大臣位次居前者為議長 第十二條議長有整理議場秩序之權

第十三條會議時顧問大臣均得列席共同議決 第十四條會議取決多數若可否同數則取決於議長 第十五條會議時參議官得列席發議但不列議決之數 第十六條會議時關於顧問大臣主管事件得由各大臣派員到會說明事由但不列議決之數

第四章院務 第十七條院長總理全院事務所有奏咨事件由院長行之 第十八條副院長佐院長之職務院長有事由副院長代理 第十九條審查擬議事件由參議官辦理 第二十條設秘書廳掌本院文牘會計議事紀錄及一切庶務 第二十一條設秘書廳設秘書長一人承院長副院長之命總理本廳事務 第二十二條設秘書廳設秘書官若干人承院長副院長及秘書長之命辦理本廳事務

附則 第二十三條弼德院議事及辦事細則由院長定之 第二十四條憲法頒布以後本官制有不適用之處應候 特旨交議更正

又內閣會奏擬訂弼德院參議官任用章程略稱弼德院之編制有顧問大臣及參議官兩項均為該院組織之要素顧問大臣與國務大臣地位相同應由特簡至參議官所以資助顧問大臣與閣議應作為簡任官與閣部參議相等查各國通例簡任以下各官任用之法另有高等文官任用章程為各項官規之一見官規尙待釐訂而弼德院係奉 旨即行設立則參議官任用章程自應先行釐訂以資遵守弼德院官制第五條參議官以富有政治上學識經驗者任之是資格已定其任用詳章應按該院職掌所列各款分別酌定庶於應議事件可期悉合機宜又查參議官為顧問大臣之輔佐顧問大臣既有專任及兼任之分則參議官亦應酌設兼任人員惟閣部行政各官係執行事務之員未便兼任其參議一職與弼德院參議官均係專掌撰擬審查事件性質相類茲擬弼德院參議官亦得以閣部參議兼任但不得逾四人之數至參議官之請簡應如何規定恭釋四月初十日 諭旨該院權限與內閣互相維繫等因是弼德院之地位務當保其獨立不受內閣之支配擬由院長副院長酌擬相當人員加倍開單咨送內閣請 旨備任蓋以選保之權委諸院長副

院長既不失弼德院獨立之本指以請簡之事歸諸內閣又不悖行政統一之良規庶與官制相符見在各章程尙待釐訂此項參議官擬請照內閣屬官及法制院各官辦法暫以原品治事並由院長副院長酌定公費奏明辦理以資辦公從之

又弼德院奏遵議辦事及議事細則三十七條繕單呈 覽第一章總綱五條第二章審查六條第三章會議十七條第四章擬擬二條第五章具奏一條第六章程等三條第七章附則二條

又弼德院奏事章程 一均由面奏或用奏片不具正摺二以 特旨諮詢事件為限三均不登載官報

又 諭陸潤庠為弼德院院長榮慶為副院長 簡參議六人各部院參議兼任弼德院參議四人秘書長一人

又御史范之杰奏為閣臣兼任弼德顧問窒礙多端請明定限制以清職守略稱我國創設弼德院既云採取日本而閣臣復得兼任顧問似又參用英制然日本樞密院議長得與國務大臣同列內閣而國務大臣初不必與樞密院議長同列樞密院至英之見任國務大臣亦得同列樞密會者以閣臣本由會同選出且顧問機關本為榮譽之職亦必經君主指定方能列席內閣而該會之設不過虛名絕無顧問之實其性質與各國樞密院元老迥異是以閣臣兼任弼德顧問衡諸我國古制既弗能及證以外國今制亦不可行窒礙一弼德院顧問者憲法上之機關也憲法不廢則弼德顧問亦不得廢而國務大臣者為對於 皇上完全擔負責任者也將來憲法頒布議院宏開難保無如各國推倒內閣之舉若仍備員顧問斷難行其政見而影響且及於弼德院是我皇上處於孤立之地位所謂密翊帷幄之謀者能有幾何窒礙二院制第二條顧問大臣三十二人第十三條顧問大臣均得列席計見任國務大臣及宗人府內務府大臣之得以兼任顧問者十六人已居半數若會議時有一顧問大臣之贊同即得多數取決是閣臣之兼任者終居戰勝顧問大臣之專任者勢

必末由匡正窒礙三閣制有總理大臣得隨時入對各部大臣就所管事件得隨時會同內閣大臣入對或請旨自行入對之條是皇上已得向各該大臣從容顧問矣即使再令閣臣到院以備顧問先後主張萬無歧異既足鈐轄議政之範圍更適蹈唐末左右僕射兼兩省侍郎之覆轍所謂顧問者殆成虛文無濟實事且占定額以蔽賢路窒礙四內閣弼德院各為獨立機關不相統轄不相侵害即如內閣總協理大臣不得兼任弼德院長及副院長立法精意備極謹嚴今以閣臣兼任弼德顧問姑無論以負擔重要國務之資格參加密議重要國務之地位自議之而自行之既失隱匡政府措置之義久之必成不能堅持官守互相阿縱之風所謂股肱元首左右閣臣者安在窒礙五有此五大窒礙則閣臣之不可兼任也明甚為今之計能將院制第四條第一項及第十二條取消者上也次則兼任大臣定為額外將第二條第三項追加專任二字文曰專任顧問大臣三十二人夫以俄之十二部參議院尚有六十八人之九部樞密顧問官尚有二十五人荷之七部樞密院尚有常設顧問官十二人豫備顧問官三十人我國近立十部各府院即設專任顧問官三十二人亦不為多並將第十三條與第十六條併為一條文曰會議時關於本官制第四條所列顧問大臣主管事件得由各大臣列席或派員到會說明事由但均不得列議決之數如此則與簡充各顧問大臣之諭旨既符且無變更院制全部之煩而內閣與樞密院位亦從此穩固矣

又御史陳善同奏弼德院官制及其參議等官任用章程闕文殊多慮滋流弊擇要指陳請飭核改略謂弼德院與內閣係處於對峙之地國務大臣布化於廟堂之上顧問大臣運籌於帷幄之中憲政編查館奏擬弼德院官制所稱股肱元首左右閣臣皆於該院寄之者此物此志也願臣有不能已於言者凡一法之立必各有精神之所在弼德院制之精神奈何曰須令不失其完全獨立之性質而已請條舉該院見制之闕失一見任國務大臣均兼任顧問大臣也夫弼德院既為親臨顧問國務之所則顧問大臣一面對於君主得效贊畫之益一面對於政府隱具匡正之能閣議以為可者君主疑焉決之院議而見為

否則亦從而否之閣議以為否者君主疑焉決之院議而見為可則亦從而可之故其迹似相制而其用實相維今令國務大臣兼顧問大臣其數已足抵專任顧問大臣之半而總理大臣地位居國務大臣首領勢足以操縱同僚難保專任顧問大臣不仰承意旨隨聲附和則凡已經閣議臨時諮詢之事件兼任顧問大臣固仍占優勝易得多數之贊成恐閣臣之意見即大臣之意見將來院議對於閣議必有是而非有順而無違欲以收聯絡之功反以長扶同之弊不可者一也二參議秘書等官之請簡奏任分屬內閣且參議半以閣部參謀兼充之查日本樞密院制本無參議官所有纂擬審查等事均屬之書記官我國弼德院事屬創始溝通新舊自不得不引富有學識經驗者以相補助參議之設宜也惟所不可解者該院本直隸於君主並非行政衙門即不能受內閣之支配該院用人自當自行具奏豈容內閣越俎今參議秘書等官選保監督之權屬之院長而請簡奏任之事歸之閣臣是不啻為內閣添一附屬之廳局所謂院長者全喪其自主之權不過如廳丞局長已耳又焉用是張皇另設一署為也至於閣部參議性質雖與該院參議相近然究不得謂之非行政官彼此既可以兼任則列席發議及辦理纂擬審查事件於各衙門權限不免互相侵越於該院職務又無以專其責成其流弊有較之兼任顧問大臣更深者其不可又一也總之我國今日立憲官制參酌中外之情力祛新舊之失必須有一定之宗旨而不可稍涉於苟且內閣既立國會將開皇上神聖首出亦決不可無一二獨立機關為之效忠納誨朝夕論思以疏通上下心志之隔閡以轉運外交內治之樞機如必欲盡所有而納之一範圍中則皇上勢成孤立彼既有所偏重此必在所偏輕恐終非國家福也應請飭下內閣弼德院將弼德院官制及其參議秘書等官任用章程詳慎核改所有兼任顧問大臣之各國務大臣必須該院會議事件在其職務權限以內方許到會與議其兼任參議四員一律改為專任嗣後院內用人無論請簡奏任應由院長自行具奏以清權限以保該院之獨立疏入不報

皇朝續文獻通考卷一百十八

職官考四 京文職

軍機處

臣謹案軍機大臣於滿漢大學士尚書侍郎京堂內 特簡無定員有大

臣及大臣上行走大臣上學習行走之別其屬曰章京創於雍正七年

皇朝通考未載殆以其兼差而非實官歟光緒三十二年各項章京開去

底缺作為實官宣統三年併入內閣茲遵會典例列內閣之後

軍機大臣掌書 諭旨綜軍國之要以贊 上治機務日直 禁廷以待召

見凡 諭旨明降者既述則下之於內閣 諭軍機大臣行者不由內閣

廷寄通交兵部轉 諭旨既述則封寄焉

軍機章京滿漢各十有六人分爲二班每班滿漢各八人各以一人領班曰

達拉密其額外漢章京無定員

凡章京豫期考取以引 見記名傳補以其次滿章京以內閣中書六部理

身者兼充三品京堂以上及外官京堂以上之職子弟皆選其補御史者

即不充章京者亦升任京堂至通政使

乾隆五十六年 諭國初以來設立議政王大臣彼時因有議政處是以特派

王大臣承充辦理自雍正年開設立軍機處之後皆係軍機大臣每日召對承

旨遵辦而滿洲大學士尚書向例俱兼議政處銜無應辦之事殊屬有名無實

朕向來辦事止崇實政所有議政空銜著不必兼充嗣後該部亦無庸奏請

王親軍機處題名記 軍機處蓋古者知制誥之職其制無公署大小無

專官直廡始設於 乾清門外西偏繼遷於門內與 南書房鄰復於

隆宗門西供夜值者食宿其大臣惟尚書侍郎被 寵眷尤異者始得入

然必重以宰輔其屬例用內閣中書舍人舍人改庶吉士則不復入改六

曹御史給事中遞遞卿寺至都察院副都御史內閣學士入直如故惟摺

侍郎亦不復入閒有以資以蔭爲郎得預者率大臣子弟爲然而張公若

鶴鄂公容安又以庶子侍講入直蔣公炳程公巖又以巡撫罷還京入直

皆奉 特旨行非故事也先是雍正七年青海軍事興始設軍機房領以

親王大臣子銀印印藏內奏事太監處有事請而用之後六年 憲皇帝

晏駕 上諒閣改名總理處三年喪畢王大臣請罷之 詔復名軍機處

其時大學士爲鄂公爾泰張公廷玉徐公本蔣公廷錫尚書爲海公望每

被 旨各歸舍繕擬明日授所屬進之後大臣避專橫名乃令所屬具草

視定進呈自是擇所屬益精慎至大位者益衆而 上賜亦異於庶僚紗

緞餅餌果蔬時 賜嶺暮 賜魚鹿肉諸物率以爲常以故 上所遊幸

無不從其職奉在恭擬 上諭及內外臣工所奏有 旨敕諭者審其可

否以聞又外臣章奏書爲副以藏之蓋 本朝諭旨誥命其別有四凡批

內外臣工題本常事謂之旨頒將軍總督巡撫學政提督總兵官權稅使

謂之敕皆由內閣撰擬以進凡南北郊時享祝版及祭告山川予大臣死

事者祭葬之文與夫后妃宗室王公封冊皆由翰林院撰擬以進然惟軍

機處恭擬 上諭爲至要 上諭亦有二巡幸上陵經筵編賑及內臣自

侍郎以上外臣自總兵知府以上黜陟調補暨曉諭中外謂之明發上諭

誥誠臣工指授兵略查核政事責問刑罰之不常者謂之寄信上諭明發

交內閣以次交於部科寄信密封交兵部用馬遞其內外臣工所奏事經

軍機大臣定議取 旨密封遞送亦如之然內而六部各卿寺暨九門提

督內務府太監之敬事房外而十五省東北至奉天吉林黑龍江將軍所

屬西南至伊犁葉爾羌將軍辦事大臣所屬迄於四裔諸屬國有事無不

綜彙且內閣翰林院撰擬有非常又下軍機處審定故所任最爲嚴密繁

鉅

趙翼軍機處述 軍機處本內閣之分局 國初承前明舊制機務出納

悉關內閣其軍事付議政王大臣議奏康熙中 諭旨或有令南書房翰

林撰擬是時南書房最爲親切地如唐翰林學士掌內制也雍正年開用

兵西北兩路以內閣在太和門外僕直者多慮漏洩事機始設軍需房於

隆宗門內選內閣中書之謹密者入直繕寫後名軍機處地近宮廷便於

宣召爲軍機大臣者皆親臣重臣於是承旨出政皆在於此矣直廬初僅板屋數間今上特命改建瓦屋然擬旨猶軍機大臣之事先是世宗憲皇帝時皆桐城張文和公廷玉爲之今上初年文和以汪文端公由敦長於文學特薦入以代勞乾隆十二三年間金川用兵皆文端筆也國書則有舒文襄赫德及大司馬班公第蒙古文則有理藩院訥公延泰皆任屬草之役迨傳文忠公恆領揆席滿司員欲藉以爲見才營進地文忠始稍假之其始不過短幅片紙後則無一非司員所擬矣文端見滿司員如此而漢文猶必自己出嫌於攬持乃亦聽司員代擬相沿日久遂爲軍機司員之專職雖上亦知司員所爲其司員亦不必皆內閣人凡部院之能事者皆得進焉而員數且數倍於昔此軍機前後不同之故事也軍機處有廷寄諭旨凡機事慮漏洩不便發抄者則軍機大臣面承後撰擬進呈發出即封入紙函用辦理軍機處銀印鈐之交兵部加封發驛馳遞其遲速皆由軍機司員判明於函外曰馬上飛遞者不過日行三百里有緊急則另判日行里數或四五百里或六百里並有六百里加快者即此一事已爲前代所未有機事必頒發而後由部行文則已轉播人口且驛遞遲緩探事者可雇捷足先驛遞而到自有廷寄之例始密且速矣此例自雍正年間始其格式乃張文和所奏定也軍機印藏大內需用則請出用畢即繳進自用兵以來軍報旁午日或數起難於屢請屢繳故每請印出則鈐就封函數百以便隨時取用軍機大臣同進見自傳文忠公始上初年惟訥公親一人承旨訥公能強記而不甚通文義每傳一旨令汪文端撰擬訥公惟恐不得當輒令再撰有屢易而仍用初稿者一稿甫定又傳一旨改易亦如之文端頗苦之然不敢較也時傳文忠在旁竊不平迨平金川歸首揆席則自陳不能多識恐有遺忘乞令軍機諸大臣同進見於是遂爲例諸臣咸感和衷之雅而文忠實亦稍釋獨記之勞然上眷倚有加每日晚膳後閱內閣本章畢有所商榷又獨召文忠進見時謂之晚面云往時軍機大臣罕有與督撫外吏相接者前

輩嘗言張文和公在雍正年間最承寵眷然門無竿屣禮有價值百金者輒卻之訥公親當今上初年亦最蒙眷遇然其人雖苛刻而門庭峻絕無有能干以私者余入軍機已不及見二公時傳文忠爲首揆頗和易近情矣然外吏莫能登其門督撫皆平交不恃爲奧援也余在汪文端第凡書牘多爲作答見湖撫陳文恭伴函不過矜錦二端閱撫潘敏惠公同年也餽節亦不過葛紗而已至軍機司員吏莫有過而問者軍機非特不與外吏接也即在京部院官亦少往還余初入時見前輩馬少京兆環管正襟危坐有部院官立階前輒拒之曰此機密地非公等所宜至也同直中有與部院官交語者更面斥不少假被斥者不敢置一詞云

臣謹案軍機處寄信直省將軍督撫向例於恭錄諭旨前一行用滿漢居首大臣掛銜嘉慶二年阿文成公卒九月太上皇召見樞臣於萬壽山諭和坤曰阿桂宣力年久且有功汝隨同列銜事尙可行今阿桂身故單掛汝銜外省無知必疑事皆由汝甚至稱汝師相汝自揣稱否詞色甚厲嗣後遂止寫軍機大臣不列姓名著爲例自較掛大臣銜爲得體矣

嘉慶四年諭本朝自設立軍機處以來向無諸王在軍機處行走五月初開因軍機處事務較繁是以暫令成親王永理入直辦事但究與國家定制未符成親王永理著不必在軍機處行走見在軍機處大臣人少傅森著仍在軍機處行走

臣謹案自成親王退直以後至恭忠親王歷咸同光三朝疊奉恩綸直軍機處領班最久醇賢親王禮親王慶親王先後入直樞要之地必以親貴莅之不第眷倚優隆亦所以昭慎重也然膺其責者治亂係之矣

又諭部院各衙門文武大臣及直省督撫藩臬凡有奏事之責者及軍營帶兵大臣等嗣後陳奏事件俱應直達朕前俱不許另有副封關會大臣處各部院文武大臣亦不得將所奏之事豫先告知軍機大臣即如各部院衙門奏章呈遞後朕可即行召見面爲商酌各交該衙門辦理不關軍機大臣指示也何得豫行宣露致啟通同扶飾之弊耶

又 諭軍機處爲機密要地向來行走章京未定額數俱由軍機大臣挑補並不帶領引見因思各衙門各旗官員印筆帖式驍騎校護軍校等微員無不由引見補授軍機章京職事較重豈有轉不帶領引見之理嗣後滿漢章京各定爲十六缺由內閣六部理藩院堂官於司員中書筆帖式等官內擇其人品端方年力富強字畫端楷者交軍機大臣帶領引見候朕簡用其記名人員遇有缺出按次陸續充補此次應挑之滿漢章京即照新例辦理

又 諭從前和坤意圖專擅用印文傳知各省抄送摺稿因此帶有投遞軍機處另封事件業經降旨飭禁並隨摺批諭今和坤伏法所有隨帶文書當永遠停止倘經此番飭禁之後尚有仍蹈前轍者必當重治其罪決不姑貸

又 通政司副使錢澧請 飭軍機大臣進止仍循舊章摺伏祝我 朝設立軍機處向來大臣與其職者皆萃止其中用以集思廣益仰贊高深地一則勢無所紛居同則情可共見即如司員咨事畫稿亦得有定所而無殊歧誠盡善不易之法也乃觀近日惟大學士阿桂一人每日止軍機處大學士和坤或入止於 內右門內舊許大臣暫止之慮或即止於 隆宗門外近造辦處之慮大學士王杰則入止於 南書房尙書董誥同之尙書福長安則止於造辦處每日惟 召見時聯行而入退則各還所處雖亦有時暫止軍機處而事過輒起一切咨事畫稿司員未免趨步兩歧以我 皇上乾行之健離照之明大小臣工戴德懷刑決不至因此啟角立朋黨之漸然行之萬世無弊莫過於率由舊章況 內右門之內相近 禁寢向來因有 養心殿帶領引 見之事須先一刻豫備 恩加大臣不令與各官露立是以設慮許得暫止不應於未辨色之先一大臣入止而隨從軍機司員亦更出更入爲日既久不能不與內監等狎熟萬一有無知如高雲從者雖立正刑辟而所絀已多自宜及早至 南書房以備 幾暇顧問俟軍機事務既畢入未爲遲若 隆宗門外直廡及造辦處則各色應差皆得覩聽於外大臣於內辦事亦屬未便請 敕諸大臣仍照舊規同止軍機處庶匪懈之忱各申五夜協恭之誼共勵一堂其 四明園辦事亦同一體近日和坤福長安止於 如意門外南順牆東向之慮王杰董誥

止於 南書房之處並請 敕禁止

五年 諭袁行簡已補授太僕寺少卿著仍在軍機章京上行走嗣後軍機章京有升任至通政司副使大理寺少卿者即著軍機大臣奏明不必在軍機章京上行走

又 諭向來軍機大臣出差隨帶軍機章京原以堂司統屬故令帶往辦事乃年來出差及簡放外任大員如阿迪斯長麟等並非軍機大臣亦在朕前率意請帶軍機章京殊屬非是大臣等奉派出差各有屬員可以隨往何必將素非所屬之員帶往辦事至簡放外任向無隨帶京員之例況軍機章京見有定額若出差大臣俱請帶往軍機處安得有如許人員且難保無軍機章京向出差大臣營謀前往沿途倚仗軍機處虛張聲勢此時軍機大臣實皆小心謹慎不敢作福作威章京等亦皆奉公守法若屢派出差恐小軍機之故態復萌沿途又受苦累是朕並非欽派各大臣出差竟係派軍機章京出差矣嗣後出差人員除軍機大臣仍准其隨帶軍機章京外其餘如有率行奏請者即將該大臣治罪另行簡派

又 諭軍機處爲辦理樞務承寫密旨之地首以嚴密爲要軍機大臣傳述朕旨令章京繕寫均不應稍有漏洩自去年正月以後軍機處頗覺整飭嚴肅開雜人等亦覺稀少近日又覺廢弛軍機處臺階上下窗外廊邊擁擠多人藉回事畫稿爲名探聽消息摺稿未達於宮庭新聞早傳於街市廣爲談說信口批評實非政體必應嚴定章程以昭法守此後軍機大臣止准在軍機處承寫本日所奉上諭其部院稿案不准在軍機處辦理本管司員不准至軍機處回事軍機章京辦事之處不准閒人窺視自王貝勒貝子公文武滿漢大臣俱不准至軍機處同軍機大臣談說事體違者重處不赦自今日始每日著都察院科道一人輪流進內在隆宗門北首內務府官員直房監視軍機大臣散後方准退直如有前項情弊即令直班科道參奏候旨嚴懲若科道曠班或推故早散亦准軍機大臣指名參奏再此後有通諭王公大臣之事俱在乾清門下階下傳述不准在軍機處傳旨此旨通諭中外各衙門敬謹遵違者不恕特諭

七年 諭御史王甯焯奏請重軍機大臣責成以肅論言一摺自雍正年開初設軍機處於大學士各部院尚書侍郎中遴選數人在內行走本爲籌辦軍務而各直省寄信事件以及在京各衙門遇有應降諭旨勢不能紛紛令羣工承繕是以俱由軍機處擬寫交發令事有統彙以昭畫一是軍機大臣承旨書諭並非將臣工切實之職盡責之此數人也內外滿漢大臣俱經朕特加擢用誰不宜盡心匡弼必專責之軍機大臣則其權過重若承奉諭旨之事軍機大臣得以力阻不行則外人又將以攬權指摘矣況我朝 列聖相承乾綱獨攬 皇考高宗純皇帝臨御六十年於一切 諭旨宣布無非斷自 宸衷從不令臣下阻撓國是即朕親政以來辦理庶務悉遵 皇考遺訓雖慮懷延納博采羣言而至用人行政令出惟行大權從無旁落朕初閱該御史所奏以爲必有指陳時務臚陳切要者及詳閱摺內乃專指上年停止前往盛京一節謂 陵展敬爲登極後應行大典朕彼時明降諭旨於六年秋孟啟行事關禮制豈臣下所可阻止嗣因御史沈琨張鵬展等以軍務未竣懇請展期交王大臣等會同妥議以爲應如所請是以降旨暫行停止即上年春閒曾有旨巡幸木蘭後因夏閒雨水過多亦停止秋獵此皆朕臨期酌度豈軍機大臣能於春閒即逆料夏雨情形豫爲阻止耶至該御史稱鑾絡所經地方官早爲備辦永平一帶糜費已多不能開銷等語謂 陵諭旨係五年十一月初二日頒發至六年正月二十七日降旨停止爲時無幾且距七月啓鑾之期又遠地方官有何豫辦不能開銷之處乎至該御史所奏前諭已發復行改擬不敬於先遂至不信於後等語試思前史所稱爲詔令不信者如恩旨已降或應行錫貸而實未均霑或業已豁免而仍行科斂我國家會有此等事乎至於明發諭旨有經朕再四思維尙有未盡周妥之處或臣工陳奏未便因而復行停止者此正欲事盡善故不厭反覆精詳若必迴護前旨固執己見勢將文過飾非蹈言莫予違之習豈古帝王從善如轉圜之道乎又所稱軍機大臣昧於大體不當僅於語句筆畫小誤始行自請議處所論亦屬非是臆言諛旨難係章京之責但軍機大臣於進呈事件當審校既既有錯誤自應請議况朕亦時加寬免何嘗僅

於細務加之責備耶國家設立言官原期於國計民生指陳利弊近日科道陳奏其略有確據者朕無不立加根究即如朕擢用明安因御史汪鏞奏關鴉一案經軍機大臣會同刑部審出明安聽情受賄情節請旨解任當即將明安革職至定擬時承審大臣奏請發往烏魯木齊又經特旨改發伊犁而汪鏞即予升擢何嘗不獎言路以宏采納但其數奏毫無指據者亦安能概予施行見在邪教餘匪未淨科道等並未將如何設法緘緝如何籌及生計及功竣後如何辦理善後事宜即外省地方倉庫如何積貯充實等事一一酌籌切實奏而直隸州縣被災居民節次發帑設賑及散給綿衣以工代賑近日京城附近地方飢民領賑者至二萬五六千人見又於城外增添飯廠亦從未有御史一言奏及其曉曉瀆奏者如用平恕則王蘇以爲不應復任江蘇學政用黃永沛則游光釋以爲不應僅循資格用人黜陟爲朝廷大柄該御史等於諭旨既發後尙欲奏請撤回而王甯焯於應行改撤之旨轉以爲不宜更易若國家用人行政其是非得失悉聽諸言官臆說勢必假公濟私把持朝政如明季科道劣習亦豈能於朕前嘗試耶王甯焯所奏謬妄著將原摺擲還嗣後科道等遇有應行陳奏者仍直言無隱毋得似此率意妄陳自干咎戾

十六年 諭軍機處爲樞密重地滿漢章京趨公執事先以謹慎爲本從前御史吳邦慶條奏大員子弟不准充補軍機章京經軍機大臣議覆自道員以上子弟皆令迴避其有行走先者並隨時請旨定奪茲據慶桂等奏新授南轅道查清阿之子誠端應否迴避朕思謹慎與否總視乎其人而防閑之道亦必當定以限制嗣後文職京官三品以上外官臬司以上武職京官副都統以上外官總兵以上其親子弟均不准在軍機章京上行走其行走先者亦無庸隨時具奏即令照例回本衙門當差誠端係道員之子無庸迴避

又 諭方維甸前任陝西巡撫時曾迎養伊母在署辦公之餘克資孝養迨節放閩浙總督之後伊母因道途遙遠於南方風土未習難於就養方維甸當經具摺陳奏一面將伊母送歸江甯原籍自赴閩省任事上年秋閒伊到熱河陛見時朕施恩詢及伊復瀝陳忱悃朕念伊母高年患病方維甸孝養情殷兩地

際遠殊增戀慕若將伊調任兩江庶可就近侍養而又係伊原籍應行迴避祇得令其開缺回籍養親此朕不忍拂人子至情曲為體恤也方維甸自回籍以後承歡侍奉伊母自己日就安健見在大學士戴衢亨因在臺灣偶患時症不意為醫藥所誤遽於昨日溘逝朕心悼惜此時軍機漢大臣人少樞務至重朕於中外諸大臣遍加遴選惟方維甸性情公道在軍機章京上年久熟請時務人地相宜今特簡用為軍機大臣將來補放尚書用資倚畀伊母從前本在京邸久住於北方風土素能習慣即此時在江甯居住亦未必如在京邸之服習伊若奉母來京於散直之餘朝夕侍奉豈不公私兩遂即遇巡幸亦不令伊隨往朕於方維甸母子之閒所以優加體念者實為無所不至今當辦事需人方維甸亦當仰體朕用人不得已之苦衷勉思報效

二十五年 諭從前軍機處滿漢章京皆由軍機大臣於內閣等衙門傳取嘉慶四年改由內閣六部理藩院保送引見嗣將保送人員先令軍機大臣考試分別去取帶領引見其記名者挨次傳補立法至為允當惟大員子弟設有迴避之例殊可不必防弊之道初不在此如大臣子弟有挑入軍機處者藉以學習教政未嘗不可造就人才嗣後保送軍機章京著無庸迴避大員子弟其軍機章京有升通政司副使大理寺少卿及補授科道者即回本衙門行走著仍照舊例行

道光三十年軍機大臣大學士祁雋藻等奏遵 旨酌擬軍機處章程九條
一軍機處應立用印簿於用印之日滿漢章京內輪派一員監印登簿畫押用過數目詳細核對 一字寄中遇有機密查辦事件於承旨後派章京一員在堂上繕寫密封呈遞發下後仍由堂上用印封交兵部領去將底稿押封封記俟查辦事竣再行拆封登檔如有漏洩查明繕寫之章京嚴參一逐日改定草稿應責成每日該班章京與領班章京公同檢齊焚銷 一每日明發諭旨同奏摺交內閣發鈔寄信印封夾板交兵部驛遞速議事件交各該衙門領去應嚴飭各衙門仍遵照舊有堂諭承領事件人員未到傳

領時不得到軍機直房違者參處並嚴禁各衙門人員不許在軍機堂並章京直房階外附近處所站立竊聽 一方略館值宿章京佩帶請印金牌接收各處文書關繫較重應責令稽查館上庫上一切事務不得曠班貽誤 一軍機堂章京直房蘇拉人等由堂司隨時稽查其方略館供事蘇拉廚役應責令滿漢提調收掌各員認真稽查毋許任意出入滋生事端仍密訪如有串通在外閒人將補授官員等事爭先送信報喜者即行革役究辦 一隆宗門內軍機章京直房後身另有小門空院恐供事等於此傳遞漏洩息應請將此門封閉以昭慎重 一軍機冊檔二分一存方略館一存圓明園該章京等在內該班不及兼顧園中直房應片行圓明園八旗直宿官兵小心守護如有應行取用檔案開單交片提取派員領回從之

咸豐元年 諭軍機處為絲綸重地滿漢章京繕寫諭旨尤宜慎重考選嘉慶年間疊奉 仁宗睿皇帝諭旨令各衙門堂官於司員中書筆帖式擇其人品端方年力富強字畫端楷者出具切實考語保送並限其額數又明定濫保處分 聖訓煌煌永垂法守見當保送軍機章京之時著各該堂官認真揀選必須先取人品並察看年力文字照例咨送勿許徇情濫保軍機大臣傳集考試著將試卷彌封公同校閱擬定次第帶領引見候旨記名如該員等充補之後忘情不職即咨回原衙門當差倘查有舞弊營私劣蹟即著該大臣等據實嚴參朕必寬其失察之咎如徇隱姑容經朕察出惟該大臣等是問並將濫保之各衙門堂官一併議處該章京等內廷供職向例覈其勞績甄敘從優當如何砥礪廉隅以圖報稱嗣後各宜倍加謹飭於一切交遊書札均須慎密毋得仍蹈積習致干重罪

光緒十年奉 懿旨據左庶子盛昱右庶子錫鈞御史趙爾巽等奏醇親王不宜參預軍機事務各一摺並據盛昱奏稱嘉慶四年 仁宗睿皇帝聖訓本朝自設立軍機以來向無諸王在軍機處行走 聖謨深遠允宜永遵惟自垂簾以來揆度時勢不能不用親藩進參機務此不得已之深衷當為在廷諸臣所共諒本月諭令醇親王奕譞與諸軍機大臣會商事件本為軍機處見辦緊要

事件而言並非尋常諸事概令與聞亦斷不能另派差使醮親王奕讓再四堅辭碰頭懇恩當經曲加勉勵並諭俟皇帝親政後再降懿旨始暫時奉命此中委曲爾諸臣豈能盡知耶至軍機處政事委任樞臣不准推諉希圖卸肩以專責成經此次剴切曉諭在廷諸臣自當仰體上意毋再多瀆盛昱等所奏應毋庸議

三十二年軍機處奏准將本處各項章京開去底缺以原官充補其領班章京准食三品俸秩視三品幫領班章京准食四品俸秩視四品如能得力八年期滿領班章京遇有提學按察鹽運三司缺出開列進單幫領班章京遇有鹽糧關道缺出開列進單其餘各章京係實缺者准食原官全俸原係候補者自補額之日起三年期滿作為實官准食全俸每屆京察年分每六員保送一等一員與各衙門人員一律辦理至領班幫領班章京體制較崇毋庸保送京察嗣後新傳人員以原官在額外行走暫不開去底缺試看一年奏留如不相宜即咨回原衙門行走

三十四年定軍機處領班章京為從三品幫領班章京為從四品

臣謹案出納詔命魏以來皆屬中書故六朝時中書令極貴必以重臣為之而中書令官尊不常親奏事多令中書舍人入奏於是中書舍人亦最為權要地唐初猶然高宗時始分其職於北門學士元宗時又移於翰林學士於是中書門下之權稍輕迨唐中葉以後宦者操國柄設為樞密使之職生殺予奪皆由此出而學士及中書俱承其下流是以樞密一官極為權要昭宗時大誅宦官宮中無復奄寺始命蔣元暉為之此樞密移於朝臣之始地居要津人所競羨故宣徽使孔循欲得其處輒請元暉於朱全忠而殺之朱梁改為崇政院以敬翔為使後唐復名樞密以郭崇韜為使明宗時重誨為使晉高祖以樞密使劉處尚不稱職乃廢此職歸其印於中書而樞密院學士亦廢出帝時桑維翰復之再為樞密使周世宗時王朴為之是五代時之樞密院即六朝之中書其於唐則國初之中書中葉之學士末季之樞密合而為一者也至宋金則樞密使專掌兵事與宰

相分職當時謂之兩府而他機務不與焉元時軍國事皆歸中書省明太祖誅胡惟庸後廢中書省不設令六部各奏事由是事權盡歸宸斷然一日萬幾登記撰錄不能不設官掌其事故永樂中遂有內閣之設批答本章撰擬諭旨漸復中書省之舊其後天子與閣臣不常見有所諭則令內監先寫事目付閣撰文於是宮內有所謂秉筆太監者其權遂在內閣之上與唐之樞密無異矣 本朝定制宦寺不得預政 世祖章皇帝親政之初即日至票本房大學士在 御前票擬康熙中雖有南書房擬旨之例而機事仍屬內閣雍正以來本章歸內閣機務及用兵皆軍機大臣承旨 天子無日不與大臣相見無論宦寺不得參與即承旨諸大臣亦祇供傳述繕撰而不能稍有贊畫於其間也

總理衙門

臣謹案咸豐十年特設總理各國事務衙門初止恭親王桂良文祥三人副乃增至八九人不等其屬章京豫期考取以次傳補章京以內閣侍讀外主事保送漢章京同惟須進士舉人投貢出身分五股以理各國交涉事務考試時並不指定一經傳補則視其所素識之人以入股與東西國終始外交以資熟手者有別始設人尙鄙夷之後率據為升除之捷徑迨光緒二十七年改為外務部又重訂新章矣

總理各國事務親郡王貝勒特大臣以承領大臣上行走內閣部院

均無定額
總辦章京滿漢各二人以分辦掌承發庶務之總綜理文書與度支出人之數王大臣有教令則下總辦而達於所司稽舊章以權準則凡舊章之志於冊者曰清檔

幫辦章京滿漢各一人以掌掌贊佐總辦之職兼領所司以時承其乏而替直
章京滿漢各十人額外章京滿漢各八人掌各股之事以分日更代直宿京

英國股掌英吉利奧斯馬加二國交涉往來之事凡各國通商各關權稅均隸焉

法國股掌法蘭西荷蘭日斯巴尼亞巴西各國交涉往來事凡保護民教及各島招工諸務皆隸焉

俄國股掌俄羅斯日本兩國交涉往來事凡陸路通商邊防疆界諸務皆隸焉

美國股掌米利堅合眾德意志祕魯意大利瑞典那威比利時丹麻爾葡萄牙各國交涉往來事凡設捕保工諸務悉隸焉

海防股掌光緒九年設南洋海防之事凡長江水師沿海礮臺船廠購置輪船鎗礮藥彈製造機器電線鐵路及各省礦務皆隸焉

司務廳 領辦二人掌稽察一切事務 收掌四人掌收發往來文牘之事 每日值班二員 請送印鑰四人掌呈遞摺件監視關防及請送印鑰事 每日值班一員

清檔房 提調二人掌稽察章京修檔校檔及供事繕寫清檔之事 督修五人掌督催承修校對清檔之事 承修五人掌編輯檔案 校對五人掌校勘檔案 軍機處兼行八人掌交涉事務檢查機密文移及校理清檔之事

同文館管理大臣 於本衙門大臣掌通五大洲之學以佐 朝廷一聲教考選八旗子弟與民籍之俊秀者記名入冊以次傳館設英法俄德四國語言文字之館 天文化學算學格致醫學共八館 提調二人掌經理訓課及督察生徒勤惰之事

南洋大臣一人 以兩江總督兼充 掌中外交涉之總務專轄上海入長江以上各口其閩粵浙三省則兼理焉

北洋大臣一人 以直隸總督兼充 掌北洋洋務海防之政令凡津海東海山海各關政悉統治焉

出使大臣掌往來聘問採訪風俗之事以聯邦交 頒給國書奉以將命

交總理衙門辦理各國事務 遇重事則 授以全權有舉劾參貳之責董察游

咸豐十年 諭惠親王等奏會議恭親王奕訢等奏辦理通商善後章程籌議各條均係實在情形請照原議辦理等語京師設立總理各國通商事務衙門著即派恭親王奕訢大學士桂良戶部右侍郎文祥管理並著禮部頒給欽命總理各國通商事務關防應設司員即於內閣部院軍機各司員章京內滿漢各挑取八員作為定額毋庸再兼軍機處行走輪班辦事侍郎銜候補京堂崇厚著作為辦理三口通商大臣駐劄天津管理牛莊天津登州三口通商事務會同各該將軍督撫府尹辦理並頒給辦理三口通商大臣關防毋庸加欽差字樣其廣州福州廈門寧波上海及內江三口潮州瓊州臺灣淡水各口通商事務著署理欽差大臣江蘇巡撫薛煥辦理新立口岸除牛莊一口仍歸山海關監督經管外其餘登州各口著各該督撫會同崇厚薛煥派員管理所有各國照會及一切通商事宜隨時奏報並將原照會一併呈覽一面咨行禮部轉咨總理各國通商事務衙門並著各該將軍督撫互相知照遇有交卸轉案移交後任其吉林黑龍江中外邊界事件並著該將軍等據實奏報一面知照禮部轉咨總理衙門不准稍有隱飾

又 諭恭親王奕訢等奏遵籌新設衙門未盡事宜酌擬章程十條開單呈覽並覆奏章京司員等兼行走各一招所有單開各條經朕詳加披覽尙屬妥協惟內酌籌經費一條所稱心紅紙張等項銀兩擬於天津上海酌提關稅起解部餉款內按各口提用數目均勻酌提銀兩由各該將軍督撫府尹監督解總理衙門以資辦公等語此項銀兩亟資辦公恐各口酌提一時未能應手著即按照所定每月支領銀兩數目徑由戶部開支將來各口解到酌提關稅銀兩統交戶部毋庸解交總理衙門如有不敷之處奏明由戶部支領至各省機密事件應照例奏而不咨如事關總理衙門者即由軍機處隨時錄送知照亦甚便捷著毋庸由各口先行咨報總理衙門以歸畫一其軍機章京於滿漢各員內挑取各四員作為總理衙門額外行走專管交涉事件及檢查機密文移責

內挑取各四員作為總理衙門額外行走專管交涉事件及檢查機密文移責

內挑取各四員作為總理衙門額外行走專管交涉事件及檢查機密文移責

內挑取各四員作為總理衙門額外行走專管交涉事件及檢查機密文移責

內挑取各四員作為總理衙門額外行走專管交涉事件及檢查機密文移責

內挑取各四員作為總理衙門額外行走專管交涉事件及檢查機密文移責

內挑取各四員作為總理衙門額外行走專管交涉事件及檢查機密文移責

內挑取各四員作為總理衙門額外行走專管交涉事件及檢查機密文移責

內挑取各四員作為總理衙門額外行走專管交涉事件及檢查機密文移責

內挑取各四員作為總理衙門額外行走專管交涉事件及檢查機密文移責

內挑取各四員作為總理衙門額外行走專管交涉事件及檢查機密文移責

內挑取各四員作為總理衙門額外行走專管交涉事件及檢查機密文移責

任綦重雖不必常川到衙門而該章京等在兩處行走恐日久有互相推諉之弊其應如何酌定章程以免曠誤之處著再行妥議

又恭親王奕訢等奏再陳見辦情形得旨見在總理衙門既有軍機大臣兼領似亦可飭章京往返查覈要件各部司員既請毋庸在本衙門當差禮兵兩部接發文件似亦可令該部兼行司員專司其事該部堂官亦當預聞若如所請軍機處兼行章京兩處行走應歸何處查覈勤惰並保舉參劾應如何辦理以上數層著再行覆奏

十一年諭總理衙門挑取滿漢章京前經降旨毋庸再兼軍機處行走嗣據恭親王奕訢等奏請在額外行走專管交涉事件復諭令再行妥議茲據酌定章程具奏著照所請所有滿漢軍機章京每班挑取各四員在總理衙門額外行走仍照常軍機處值班毋庸常川到署

又恭親王奕訢等奏參將長善等請留總理衙門得旨均免其迴避然事屬創始尙可權宜辦理嗣後應迴避者仍照例迴避又請將長善改用京職批總理衙門辦理俱係外國事務自與別衙門不同然格於成例若所請必允則各衙門必將效尤長善既熟悉情形所請改就京職尙屬可行長善著仍留二品頂帶以本旗參領遇缺即補若再行瀆請斷難格外施恩

同治元年設辦理通商事務大臣統轄江楚蘇浙閩粵六省口岸駐紮上海又將粵海福州廈門寧波上海五口通商大臣移紮內江所有上海及長江一帶中外交涉事件以通商大臣爲專管各督撫爲兼管按通商大臣於七年九年設於三年奏准嗣後保獎章京之年如郎中等員有堪勝表率者准保四五品京堂照軍機處例酌覈奏留衙門辦事

光緒元年奏准滿漢章京外任丁憂回旗百日孝滿仍在本衙門當差又奏准南北洋大臣及各省督撫等各舉所知堪備使才者恭候簡用又奏准在京王大臣等如真知有熟悉洋務洞澈邊防兼勝出使之任者具疏保薦又奏准出使駐英法一員副使一員參贊二員又設新加坡總領事一員原設改今又出使駐美日秘三國一員副使一員參贊三員

二年奏定出使各國大臣分爲頭二三等名目以三年爲期此次辦理伊始所有見在業經派出各國大臣擬請均作爲二等所帶參贊領事翻譯等員應由該大臣酌定人數開列姓名等項知照衙門查核各該員亦隨同出使大員以三年爲期從之

又奏准出使大臣頭等一二品充二等三品充三等三四品充三年裁駐英副使

又奏准出使外洋隨帶各員每屆三年查其勤能奏請獎敘照異常勞績辦理准保免補免選以應升之階選用補用不得越級不准保京堂京職及無論題選咨留班次並海關道花翎

四年奏准章京有傳補御史者註銷御史仍留本衙門當差又奏准非實任一二品大員及應辦緊要事件毋庸加全權字樣

是年出使駐英法二國一員無副使又出使俄國一員又設日本國神戶大坂正理事一員長崎正理事一員橫濱築地正理事一員

五年設金山總領事一員古巴總領事一員領事一員嘉理約領事一員馬丹薩領事一員檀香山領事一員

六年奏准漢軍章京丁憂所補該部漢缺由部照例覈辦本衙門查照滿員之例穿孝百日毋庸開章京之缺

是年出使駐英俄法三國一員又停派駐美日秘三國副使七年奏准見任科道子弟暫停補本衙門章京

是年停派駐日本國副使十年咨准章京到署資淺在部資深即開去本署差使專辦部務又議准章京出差銷差俱應知照本部

是年出使駐英俄二國一員

十二年咨准本衙門此次考試滿章京專考漢文不考繙譯又咨准步軍統領衙門筆帖式毋庸與考

是年出使駐俄德奧和四國一員參贊二員

十三年設大坂副理事一員築地副理事一員箱館理事一員

十五年 簡派同文館大臣二員

二十四年 諭向來沿海沿江通商省分交涉事務本煩及內地各省亦時有教案應行核辦各省將軍督撫往往因事隸總理衙門不免意存諉卸總理衙門亦以事難懸斷未便徑行以致往返轉折不無延誤嗣後各省將軍督撫均著兼總理各國事務大臣仍隨時與總理衙門王大臣和衷商辦以期中外一氣相生遇事悉臻妥洽

又 諭御史徐士佳奏要差不宜兼任請變通舊制將軍機大臣設為額缺一摺我朝自雍正年間設立軍機處凡充軍機大臣之員皆係由閣部大臣特簡二百年來垂為定制從未聞以兼差本任稍形窒礙至於總理各國事務衙門專辦中外交涉事件亦不得不取材於部院豈不能辦理部務者轉得以交涉擅長耶至謂兼差之所以多多益善由於百物翔貴各大臣念私計之難是以無或一辭並擬變通舊制優給津貼試思大臣受國厚恩何得竟以身家為重所奏語多失體姑念該御史本有言事之責是以不予懲處嗣後言官論事務須切實可行毋得摭拾浮詞徒涓觀聽

又 諭內閣學士準良奏疆臣兼攝總署易滋貽誤一摺前因沿江沿海通商省分交涉日煩內地各省亦皆有教民及鐵路礦務事件往往事機緊要刻不容緩總理衙門王大臣實有不能遙制之處各該疆臣於所屬地方耳目切近是以明降諭旨令各直省將軍督撫均宜兼總理各國事務大臣以便遇事及早料理朝廷權衡審慎意在專責成其有關係重要必須商明總理衙門方能定議者仍應隨時據實電咨和衷商辦茲據該學士奏稱此局一定無望於裨益之實輒請收回成命於朝廷辦事之苦衷尙未領會至謂辦理交涉存乎其入彼既無因應之方予之以名適滋貽誤持論亦屬過當外吏苟因應無方即不加意以總理各國事務之名亦豈能免貽誤總之總理衙門諸臣與各省疆臣同辦一事要在一氣聯絡相助為理既無畛域之見自無推諉之私該學士所奏著無庸議

外務部

光緒二十七年 諭從來設官分職惟在因時制宜當重定和約之時首以邦交為重一切講信修睦尤賴得人而理從前設立總理各國事務衙門辦理交涉雖歷有年惟所派王大臣等多係兼差恐未能殫心職守自應特設員缺以專責成總理各國事務衙門著改為外務部班列六部之前簡派和碩慶親王奕劻總理外務部事務體仁閣大學士王文韶著授為會辦外務大臣工部尚書瞿鴻禨著調補外務部尚書授為會辦大臣太僕寺卿徐壽朋候補三四品京堂聯芳著補授外務部左右侍郎所有該部應設司員額缺選補章程並堂司各官應如何優給俸精之處著政務處大臣會同吏部妥速核議具奏又政務處大臣等奏略稱總理衙門改為外務部設立專缺辦理交涉事務實為因時制宜慎重邦交之要義除總理會辦王大臣左右侍郎由 特旨簡放外其餘一切章程 等因商皆以交涉事宜關緊要必令該司員等專精練習切實講求不致營情他途分其心力舊有滿漢章京四十八員認真得力者固不乏人濫竽充數者實亦不少當此改設專缺之時亟宜嚴定去留任缺毋濫庶可挽回積習策勵人才擬請 飭下該王大臣從嚴甄別其不得力者即咨回原衙門當差毋稍遷就從前總理衙門由軍機處揀派滿漢章京各四員兼該衙門行走以備專抄機密事件見在改設外務部所有原派軍機章京各員擬請照舊兼行毋庸開支養廉銀兩

一分設四司一曰和會司專司各國使臣 覲見會晤請 賞寶星奏 派使臣更換領事文武學堂本部員司升調各項保獎一曰考工司專司鐵路礦務電線機器製造軍火船政聘用洋將洋員招工出洋學生一曰權算司專司關稅商務行船華洋借款財幣郵政本部經費使臣支銷經費一曰庶務司專司界務防務傳教游歷保護債值禁令警巡詞訟此外未盡事宜各以類從 一每司設郎中員外郎主事各二員均應作為題缺無庸咨選每司各定額外行走六員嗣後傳到者無論郎中員外郎均先借補主事書小京官亦准借補主事均扣試俸二年 一設左右丞各一員正三品左右

參議各一員正副品即充總辦職掌左右丞缺以左右參議開列奏請 簡放參議缺先儘郎中次用員外郎由該部堂官保送請 旨錄用均備出使大臣之選遇有該部侍郎缺出先儘左右丞開列該部既設丞參四缺所有郎中例應保送四五品京堂員缺即無庸開列 一左右丞參議備出使之選郎中員外郎主事即備參贊領事隨員之選丞參奉使請 旨派員署理毋庸開缺郎中以下奏調出洋即應開缺回署作為應補三年期滿准由出使大臣保獎該部升階惟不得保至參議亦不得保遇有應升之缺開列在前等花樣郎中准保道員員外郎准保知府主事准保直隸州均專發沿江沿海各省補用 一新設各缺先儘得力實缺人員改補如有人餘於額即作為候補先開去原衙門底缺若不願聽其呈請回原衙門此項人員僅因不諳交涉咨回一切升轉保送各途應仍准一律辦理以免向隅 一司員保送考試仍照總署舊章辦理惟必須慎選人品端正學識通達並年力富強者方得保送每次考取 記名請以二十員為度遇有額外缺出挨次傳補 一新設左右丞參議既充總辦職掌各司掌印擬兼充幫辦每司設掌印一員幫掌印二員均照六部之例同文館設提調一員以各司幫掌印揀員兼充幫提調二員以七品繙譯官選充 一設司務廳司務二員以繙譯官揀補司務保正八品其以七品繙譯官揀補者仍照舊例三年期滿准作為額外主事一體序補 一分俄德法英日本五處每處設七品八品九品繙譯官各一缺由同文館學生及各省學堂高等生揀補遇有該部主事缺出應五缺後准升補七品繙譯官一人其派充同文館幫提調當差扣滿三年即准升補主事 一該部司員既備出使參隨之選自應專意講求以資任用較之各部司員體例不同除 京察仍照例辦理外所有保獎關道截取保送及部員應得例差概應停止 一供事仍照總署舊章兩年保獎一次武弁聽差蘇拉各項亦擬照章分別奏咨給予獎敘 又外務部奏酌擬改設事宜 一原擬各司員養廉以郎中員外主事分別多寡查見定各司額缺係照各

員原有官階請補與按次遞升者不同各項差使自須因才酌派養廉亦應視差使繁簡量分等差方足以昭激勸擬每司設掌印主稿各一員照支郎中養廉幫掌印幫主稿各一員照支員外養廉幫掌印幫主稿上行走各一員照支主事養廉均就實缺人員分派於原定養廉數目並無出入而可收得人之效 一原擬郎中以下奏調出洋即應開缺查各衙門奏調出洋人員向不開缺斷俸未便兩歧擬嗣後隨使出洋各員均毋庸開缺所遺差使派候補人員接署該員在洋既支薪水本部養廉應即停止其暫時出差者不在此例候補司員派署差使應照實缺養廉減半發給 一原設司務廳司務二員以繙譯官揀補查司務廳收文監印職掌亦關緊要繙譯官以洋文為主用非其長擬將司務二缺在候補主事內揀補仍留主事原階遇有主事缺出仍與候補主事一律酌補 一原設繙譯官由同文館學生及各省學堂高等生揀補查見在得力繙譯各員均已洊保副都統道府郎中等項官階較大礙難借補擬仍不拘額缺由 臣等酌量選派留部差遣三年期滿仍照向章給獎其同文館繙譯諸生學業尚淺各省學堂甫設一時無可揀補應俟數年後再照原議辦理奉 硃批依議 又 諭前因各省辦理交涉事務殷繁特令各將軍督撫均兼總理各國事務大臣之銜見在該衙門已改為外務部各將軍督撫即著毋庸兼銜惟交涉一切關繫甚重皆地方大吏分內應辦之事該將軍督撫等仍當加意講求持平商辦用副委任 又 諭見在總理各國事務衙門已改為外務部特設專官簡派重臣其前在該衙門行走之崇禮桂春那桐溥興均著毋庸兼差 臣謹案外務部之職掌重矣哉措注一不審全國之危亡係之匪第全國也列強均勢大率視中國為重輕彼復百出機謀或以金錢餌我或以兵威脅我非得瞻言百里之才與之周旋於其間恐鮮有不墮其術中者地球且從此多故矣此則不可不慎也 二十八年外務部奏請簡派義比奧三國使臣

又奏准駐美使臣兼充出使古巴大臣

三十年奏准派員駐墨國保護華僑並將駐日國分館改歸駐法使臣兼理

又奏准派南斐洲英國屬地保護華工總領事

三十一年奏請 簡派和蘭保和公會公斷衙門議員以伍廷芳充選

又奏請駐紮法日使臣兼使葡國

又奏請 簡派駐和蘭使臣兼辦保和公會事宜

三十二年奏准撤回駐韓使臣改派總領事駐紮

又奏准 臣部司員既經停止保送考試嗣後司員缺出新調人員與舊有人員一體酌量序補各國使署參贊領事隨員繙譯應專用 臣部所調人員充補又

各省交涉日繁大都設局辦理俟 臣部所調人員造就之後准各省將軍督撫隨時奏調又於本署設立儲才館一所凡有調用人員及凡與有關涉之事均由該館經辦

儲才館簡章 本館由本部堂官直轄設提調一人就本部司員中選派總理館事幫提調一人佐提調辦理館事設文案一人辦理文牘支應一人辦理經費收支事宜庶務一人辦理雜務並照應一切事宜聘講員一人以歐洲公法專家充之書記生無定額視館事繁簡為增減

三十三年外務部議覆出使法國大臣劉式訓奏請變通出使事宜略稱查各國頭等公使代表本國君主秩同外部尚書二等公使代表政府秩同外部侍郎擬請嗣後 簡派各國二等公使定為二品實官屆時將歷充參贊隨員多年及通曉外國語言文字之合格人員開單請 簡三年一任期滿回國候旨簡用如辦理交涉得力接充聯任晉秩俾俸終身於外交一途以盡其才

參隨以下得力者三年任滿亦准給假回國假滿回任俾得久於其職駕輕就熟又參領各缺應由 臣部及儲才館中合格人員調充其所遺部中各缺即由各館中調部人員補授各館人員均不得由使臣任意調用三年保獎舊例一律停止其餘原奏所未及者亦擬設立定章一曰俸薪使臣至書記官定為表額分別給發參領以下各員如任職三年著有勞績而未及升轉者准照表額

加給以資鼓勵一曰員缺查見在設館派使者東西共計十國設立分館兼使辦理者共計五國內英法德俄美日本六國通商既久擬設立參贊通譯書記商務委員共七人至所屬應設之總領事交涉商務委員領事副領事等仍照舊例與義比和四國交涉稍簡擬設立參贊通譯書記商務委員四人至日葡古墨秘五國見設分館擬請設立參贊通譯書記各一人設有領事副領事者由部酌派分館人員兼理不足再行酌添以後遇使臣更換所有各員必須熟習公事及諳曉所駐國之通用語言文字如一時未能足額以部中諳練公事人員前往試署俟遴有合格人員再行抽換至所派武員應由陸軍部奏定酌派

又奏定變通出使章程 頭等出使大臣秩一品 二等秩二品 三等秩三品 頭等參贊秩三品 總領事二等參贊均秩四品 頭等通譯官領事各館商務委員三等參贊二等通譯官副領事一等書記官均秩五品 二等書記官秩六品 三等書記官秩七品 英法德俄美日本六國通商日久擬每館設二等三等參贊各一人二等三等通譯官一等二等書記官各一人商務委員一人共七人至所屬應設總領事副領事仍照舊例 英南斐洲總領事新加坡總領事檳榔嶼副領事 俄海參崴交涉商務委員 美金山總領事呂宋領事紐約領事檀香山領事嘉里約領事 日本韓國總領事元山領事以上總領事仍照舊例領事館擬設二等通譯二等書記各一人事務繁者准酌添三等書記一人副領事館擬設二等通譯二等書記各一人 奧意比和四國交涉稍簡擬每館設二等參贊一人二等通譯一人一等二等書記二人

西班牙葡萄牙古巴墨西哥秘魯五國皆由兼使辦理設立分館每館擬設二等參贊一人代辦使事二等通譯一人二等書記一人如設有領事副領事者即由部酌派通譯書記兼理不足由部臨時酌添 商務委員各使館專派一人稽查外國商務及金銀市價隨時稟報本部農工商部 醫官由本部咨取各醫學堂卒業生酌量派往或由使臣自選帶往 供事由使

臣向本部查取派往 以上二項三年期滿准由使臣酌保外官不得保本部及使館各官職

三十四年又奏變通司員外用章程略稱 臣部實缺郎中員外郎之掌印主稿各員在部當差已滿八年者如能得力請以海關道開列進單依議行

又議覆山東酌設洋務商稅專員查東省原有洋務局應責成該局員稟承辦理所請暫緩置議

宣統元年奏設駐紮巴那瑪總領事各官員缺
二年奏請添派海牙公斷院裁判員

三年奏設和屬爪哇島總領事一員泗水蘇門答臘正領事各一員
又朝鮮新義州添設領事

又奏准駐法使臣兼轄巴西駐俄使臣兼瑞典駐荷使臣兼丹馬
稅關監督

臣謹案會典於總理衙門列監督蓋新關也常關稅務監督除京師外有由道兼者有部派司員者向屬戶部者崇文門左翼右翼坐糧廳淮安濟聖揚州蕪湖西新鳳陽江海天津臨清九江贛北浙浙海關海太平粵海山海等關張家口殺虎口歸化城共二十四處屬工部者龍江蕪湖宿遷南新等關臨清甌版開共五處時有裁增不克備載茲將常新兩關分省彙登稅務本應歸度支部以事例無多併附於後

| | | |
|-----|-----|-----|
| 天津關 | 山海關 | 張家口 |
| 龍江關 | 濟聖關 | 揚州關 |
| 蕪湖關 | 蘇州關 | 江海關 |
| 鳳陽關 | 鎮江關 | 瓜儀關 |
| 九江關 | 福州關 | 廈門關 |
| 福州關 | 北新關 | 浙海關 |
| 杭州關 | 甌版關 | 南新關 |
| 鎮江關 | 蕪湖關 | 宿遷關 |
| 臨清關 | 甌版關 | 版開關 |

北湖 荆州關 宜昌關

南湖 長沙關 岳州關

東山 臨清關 東海關 膠海關

西山 殺虎口 歸化城

甘肅 嘉峪關 關

四川 重慶關 關

廣東 粵海關 潮海關 北海關 瓊海關 九龍關 三水關

廣西 梧州關 鎮南關 南甯關 太平關

雲南 蒙自關 思茅關 騰越關

監督奉水陸通商貨稅之職或隸南北洋大臣或隸本省督撫有將軍兼理有專設監督有關道分理之別

總稅務司一人掌各海關徵收稅課之事其各口稅務司均以洋員代充有幫辦有稅務司無定額

乾隆五十八年改杭州織造為鹽政所有南北二關稅務均歸巡撫經理
嘉慶二年奉 旨左翼右翼著歸併一人管理

四年又定嗣後左右稅差均簡派二人
二十四年 諭鳳陽九江兩關監督期滿俱無庸題請更換每屆該道出缺時即以新任道員接管

道光元年裁浙江鹽政改杭州織造兼管南北新關稅務
十九年奏准廣東韶州設立東西二關歸南韶連道管理

咸豐十年設總稅務司一員雇英人為之

臣謹案道光季年五口通商始有管理稅務官員維時主權在我廣東歸粵海關監督福州廈門歸福州將軍上海歸蘇松太道甯波歸甯紹台道迨咸豐三年粵賊劉麗川陷上海官吏星散課稅停頓於是英法美三國

領事勸在租界徵稅設管理關稅委員會三國各派一人遂啟外人干預之端八年天津約成改組會章九年江督何桂清任李國泰英領事官為總稅務司滙關成立繼及粵關由總理衙門節委同治二年上海總稅務司署移至北京英據津約第十款邀請英人幫辦稅務一語歷任總稅務司遂被占據全國關稅為所把持夫延外人為顧問尚恐話嫌及米令主政內攪黜陟大權外與監督兩大未有能掉尾者光緒二十年日本開釐俄法責言還遼覬覦此席英使向政府要求保障以對華貿易超過他國為條件如他國勝英總稅務司不任用英人當時尚無日員自馬關約定乘勢伸張其權力日貨益盛日員益增利益均沾積重難返可勝痛哉

又裁撤長蘆鹽政改設天津登州牛莊三口通商大臣

十一年浙江甯波府設新關歸甯紹台道監督

同治元年奏准沿海沿江各監督道員以下均歸通商大臣統轄又各新舊口岸稅銀並出入口船隻數目一切情形均由監督道員按結呈報管轄之通商大臣稽察

大臣稽察

二年山東登州府煙臺地方設東海關移登萊青道駐紮監督

三年福建臺南地方設打狗口海關歸巡撫管理

又湖北設江漢關歸漢黃德道監督江蘇設鎮江關歸常鎮通海道監督

九年 諭三口通商大臣一缺著即裁撤其登萊青道所管東海關奉天奉錦道所管牛莊關均歸直隸總督統轄另設津海關道管理新鈔兩關稅務

十年廣東設北海新關仍歸粵海關監督經理

十二年廣東設潮州瓊州各新關仍歸粵海關監督經理

十三年浙江溫州府設甌海關歸溫處道監督

光緒二年安徽設蕪湖新關歸徽甯池太廣道監督

三年湖北設宜昌關歸荆宜施道監督

四年翰林院侍講張佩綸奏請閩海關權稅改歸總督經理閩浙總督何璟疏陳體察情形未便更張略言閩海關監督始於康熙二十三年其時僅將南台

廈門兩處口岸報部雍正七年始將南台等二十處口岸報部其初或由巡撫兼管或由監督專管本無一定乾隆元年歸福建總督管理三年總督兼轄閩浙始以關務改歸將軍七年由督撫題定徵稅口岸共十九處 列聖於此幾經詳慎比較而後垂為定制率由因循督臣任兼兩省案牘紛繁加以臺防緊要既不能躬親瑣務仍須委員前往句稽與派協佐領等官亦復何異若派大員分駐總口誠恐收數未增耗費轉鉅倘章程不能畫一稽查偶有未周或初年竭澤而漁而來歲難乎為繼或一時損下益上而日久百弊叢生喜事紛更效略可觀更而滋擾抑又何裨疏上遂不果行

七年甘肅嘉峪關設關徵稅歸安肅道監督

十三年奏准福建滬尾打狗兩海關稅務改歸臺灣巡撫監督

十四年廣西龍州鎮南關設關徵稅歸太平思順道監督

十五年奉 懿旨頭品頂戴花翎總稅務司赫德久辦洋稅精明切實事事盡心近來收數逐年加增確著明效歸政伊邇允宜特加褒獎以勵成勞赫德著賞給三代正一品封典

臣謹案自咸豐十一年李國泰回國赫德即代理總稅務司同治二年實

授光緒三十四年告老返英舉其戚副總稅務司裴世楷自代英政府未能贊同宣統二年改派漢口稅務司安格聯繼其任三年赫卒於英飾終之典至優且渥赫握中國稅權幾五十載歷仕三朝至晉尚書銜太子太保倚畀之重夫豈戈登瓊威漢納根輩得望其項背哉

又雲南設蒙自關歸臨南開廣道監督

十七年四川設崇慶關歸川東道監督

二十七年各常關亦以稅務司稽征

三十年裁淮安關監督 諭該關應辦事宜著移交兩江總督辦理近來淮安關徵收奇絀而商民且多苛擾有煩於民無益於商朝廷銳意裁撤交該督經理著將該關見在情形確切查明妥籌徵收善策詳細具奏總期積弊一清稅收核實商民不擾是為至要

三十二年派鐵良充督辦稅務大臣唐紹儀爲會辦大臣所有各海關華洋人員統歸節制

臣謹案各關監督與稅務司權限向未規定至遇放行官物及豁免捐稅等事各行照辦而海關未奉總稅務司令文不即實行蓋大權久已旁落例行公事惟恐報告造冊及印發護照而已此次政府欲挽回海關主權外人大肆非難謂關稅擔保外債不能任意變更制度英國提出抗議政府不得已聲明內部並不更動此改革之計畫遂於無形中消滅矣

三十三年閩海關稅務歸閩浙總督兼管

稅務處

督辦大臣一員會辦大臣一員提調一員分設四股每股總辦各一員幫辦各五員收發處委員二員雜務委員一員

第一股管理洋關稅機器製造各貨稅礦稅催提出使經費稽覈關埠章程綜覈稅司經費查覈各關收數比較考察各口岸貿易情形

第二股管理常關稅查覈關物免稅稽查借賠還款兼管稅司代收鹽貨釐存票抵稅考校進出口稅則查察杜漏防弊事宜

第三股管理土藥稅洋藥稅採買土貨三聯報單洋貨入內地運照查察內河行輪船應設立燈塔浮橋稽查船鈔罰款研究各國稅務

第四股管理郵政事務調補稅司稅司請獎辦理奏咨調員本處官員升遷事宜稽考清書勤惰編錄各國華洋人員冊表查覈本處收支經費

收發處管理蓋用關防收發文件電報奏事遞摺遞牌尋常稿簿送堂閱畫請送印鑰掌守檔案領交片閣鈔

海關職員表

稅課司爲徵課關稅及管轄海關之主要部見制因區別華洋人員分爲六項實祗三科茲不分別

徵稅科內總稅務司一人稅務司四十三人署稅務司十四人底缺爲副副稅務司三十人署副稅務司十九人以上均洋班幫辦一百五十七人內

分超等特班前班後班頭二三四等前後班華幫辦一百五十一人上級全

特班雜項二十三員醫員四十八人又華員同文供事亦分超頭二三稽查科即外總巡驗估驗貨鈔子手均分超頭二三四等前

後班雜項四十五人又華班鈔子手分頭二三四巡緝科管駕管輪分正副前後班均又司機火夫等均

海政局 巡工科巡工司一人副二人巡江工司二人副五人巡段江工司

四人巡江員副管駕均分前班中班後班測量司一人監事二人雜項七人

以上俱供事繪圖繪工各七人俱理船科理船廳五人總巡兼理船廳

事二十五人幫辦三人指泊所分一二三等海洋測量師一人副一人供事

一人巡江吏二十四人以上俱頭二三等供事俱燈塔科巡燈司一人

值事人分超頭二三等上下班俱華值事人五百四十一人 運輸科管

駕官五人正四人副分前後班管輪正五人副分前後班巡艇弁四人以上

員 華員班四百三十七人巡查兵 工程局 營造科總營造一人營造司一人副一人建築司二人副三人

員 圖畫科華班幫辦一人供事繪圖繪工俱 督工科工師十一人匠

董七人華員班十三人 總稅務司署設總稅務司一人綜理全國關稅行政與關員任免事務管轄

五科三處 總務科職至重要宣統二年裁副總稅務司後所有常關均歸

此科管轄設正副主任各一人均更調悉由總稅務司裁決呈報稅務處備

案華幫辦若干人無定額 機要科專司機要文件設正主任一人向有副

員任免選設正副主任各一人華幫辦供事無定額 造冊處設於上海
 管理編製及印刷統計供給紙張文具設正主任一人副主任二人一華一
 洋華員為署缺幫辦供事無定額 駐外辦事處設於倫敦掌探辦海關用
 品招用投效人員接洽償付借款支付關員來華旅費設正主任一人幫辦
 若干人 內債基金處設於北京與總署分立專司政府委辦之內債基金
 設正主任一人漢文文案一人華幫辦供事若干人均由稅課司調用 各
 海關設稅務司一人管理全關行政雖事務繁簡不同而辦事約分六課一
 總務二秘書三會計四統計五監查六驗查一三三四課以內班洋幫辦為
 課長五六課以外班洋幫辦為課長有於總務課設分課者有事繁收旺之
 區設副稅務司天津廣東設二名以上上海尤多各關人員分內外兩班
 內班稅務司副稅務司小口洋幫辦小口華幫辦供事無定額華員文案司書
 錄事有定額 外班總巡兼理船應驗估驗貨華洋鈐子手俱無定額依辛丑和約
 協定各通商口岸之常關移歸海關管理稅旺事繁之地得設獨立常關以
 副稅務司為主任通例於海關內設常關課以洋幫辦為課長

臣謹案海關行政長官為稅務處督辦會辦總稅務司應歸節制乃大權
 旁落各關人員悉由其任免政府無從干涉高級職務半屬英籍其餘列
 強均占位置甚至無約之國亦有延用者獨華員僅任中下級俾聽指揮
 人數雖多而俸薪反細喧賓奪主未有若斯之甚者也 內班華員約五千三百餘人外班華員約一千二百餘人俸薪約四百餘元

皇朝續文獻通考卷一百十九

職官考五 京文職

吏部

臣謹案秦置尚書令尚書僕射尚書丞但掌通章奏而已漢武宣後稍稍委任光武始分六曹唐始為六部侍郎郎中員外主事皆始於漢吏部尚書始於魏殷太宰周家宰天官太宰卿也左右侍郎始於隋天官小宰中大夫也 本朝都沿明制謹續 皇朝通考著於編

嘉慶四年以親王總理吏部裁員外郎主事各一人六年以大學士兼理部務

臣謹案自順治元年停員勅總理部務始改承政為尚書至是復以親王總之旋即停止若以大學士管部則已肇端於雍正元年矣

同治二年 諭吏部奏請將漏未移付之司員嚴議一摺前因平瑞奏前任烏魯木齊都統法福禮奏寶迪局銜額加增請獎出力人員各案尚未接准部覆當經降旨令戶部迅即查覆茲據吏部奏稱查戶部議覆原文兩次知照考功司應由該司移付文選司呈堂辦理乃該司員等僅將遺戍釋回之員先經辦結而於應行議敘各員漏未移付以致事隔年餘尚未議覆實非尋常疏忽可比請將經手遺漏之司員嚴加議處等語各衙門交議案件曾經諭令妥速辦理逐日清釐毋任積壓此案吏部考功司員於戶部議覆烏魯木齊請獎原文時閱年餘並未移付文選司覈辦雖據聲稱並無別項情弊實屬遺漏疏忽所有經手遺漏之司員著交都察院查取職名嚴加議處以示懲儆因思各衙門應辦案件似此等遺漏之處仍必不少著各衙門堂官督飭司員悉心查覈趕緊清釐倘仍前因循玩誤或為書吏蒙蔽不能認真整頓必當從重懲處

臣謹案 國家設官以待天下之賢者茲一切不問而委之於吏部吏部又不得以己意與其開但求其應格者而授之雖以五尺之童子亦可掣籤而畢乃事宋楊萬里已謂吏部之權不如一吏至聽命於籤直并一吏之不若然則必省事省官眾共眾棄錢政之平庶有日乎

三年 諭御史富稼奏吏部銓政紛歧恐滋弊竇並臚陳辦理歧異各條請飭查覈一摺據稱前任河南考城縣知縣鄭榮禧本係例應歸選人員該部准其仍發原省調補河南商邱縣知縣朱焜前在內鄉縣任內已有四參起限處分該部未據實指駁即准調任江蘇海州運判一缺本應陳照補授而以沈炳擬補河南候補知縣王簡山東候補知縣任敬均應補交捐免保舉銀兩而辦理兩歧各等語吏部總司銓選必須細查成例恪守定章況近來月選較繁稽查尤宜嚴密若如該御史所奏准駁淆亂蒙混遂就何以懲奸蠹而叙官方所有該御史指陳各條著該部詳細查奏如有吏胥舞弊等情即著嚴究懲辦此外有無辦理歧異之處並著該部堂官督率司員等隨時稽覈以肅銓政

光緒六年議准添設宗室筆帖式一人

十三年奏准文選司添設滿漢郎中各一人員外郎各一人主事各一人奉諭此外各衙門不得援以為例

三十一年吏部奏擬籌公費化私為公辦法六條

一書吏宜裁汰也書吏之盤剝把持皆從來司員不能任事漸至權柄下移弊端百出不可窮詰今擬將書吏裁去一切事宜均飭司員親手經理竭力經營 一書吏宜給予出路也查定章凡役滿書吏以從九品未入流掣簽候選多因缺分遲滯改就他業今既永遠裁撤似可略予從優以示體恤擬請擇其恂謹無過當差最久者以鹽庫各項大使註冊其年分稍淺者以府經歷縣丞州吏目等項註冊與各項應選人員相開輪用 一公罪宜寬免也部書約以數百計司員計百數十人其確能任事者不過數十人以數十人辦數百人之事已屬竭蹶而又甫經交替端緒紛繁恐有無心錯誤偶爾疏漏之處擬請寬免公罪六箇月該司員等倘有私索舞文等弊查出立即嚴參 一賞罰宜明定也賞罰為鼓勵人才之妙用事既分任責有專歸辦理數月優絀立見擬擇司員之勤能者每月酌給津貼銀兩始終不怠確有理繁治劇之才者專摺保奏優給班次升階其庸惰不堪造就者遵照上年奏定章程分別以原官休致或以他官降補臨時酌奏明辦理 一繕寫

宜用士人也奏各稿件即飭各司員親手擬辦查例查案註冊管卷亦飭各司員自行經理惟繕寫摺奏文移登記簿等事尚須有人已於今歲正月將筆帖式傳集面考擇其字畫端整者派司學習仍不敷用擬再招考騰錄專用滿漢舉貢生員出身者每月酌給薪食三年擇尤保獎一次如仍不能得力當分別開除究辦 一辦事無須引案也部案浩繁最易為上下舞文之具今擬一切事宜均照例及奏定章程辦理以前成案盡行封儲無須援引遇有例章未備之件詳細奏聞請 旨遵辦如議行

三十三年吏部以部務殷繁奏准添設文選司郎中員外郎主事各一缺考功司郎中員外郎主事各一缺不分滿漢揀選當差得力之員一律酌補又吏部奏定變通小京官選補辦法又議覆限制應補知縣選班又定明保人員准其接連選用

三十四年吏部奏定本部漢京堂主事缺酌題序補班次即按照滿主事章程辦理

宣統元年吏部奏設八九品錄事請以年滿騰錄擬補並分別留部略釋 臣部先於本年奏設八品錄事二十缺九品錄事三十缺以期滿騰錄充補其充補之員則以平日當差及書法兩項皆列最優等者為限仰蒙 俞允在案計自三十一年裁撤書吏改招騰錄以來其當差久者已歷四年有餘茲據先後報滿共一百五十七名經各該司員分別得力不得力逐一加考 臣等復傳齊面試拔取最優等七十四名應即查照定額將在前之員先行敘補各缺在後之員照章令其候補其中見有事故及不願留部呈請降改次等者均依次扣除繕單呈 覽俟奉 旨後由 臣部知照度支部照各衙門錄事例一體給予八九品職俸資祿養如各該員補缺留部後有始勤終怠及不守官箴等情事仍應由 臣等隨時撤參或實有練習已久為 臣部必不可少之員將來再屆期滿應外用者亦當破格保留酌予京階以示優異

三年設併內閣 巡警部

臣謹案巡警以詰姦宄衛地方即古保甲遺意州縣皂役多或逾千團營巡勇所在皆是汰弊改良未嘗不可不必設專官也乃徒襲歐美皮毛鋪張門面利無一二弊且什伯不旋踵而改隸民政此可見當時秉國鈞者宗旨無定無怪乎其莽如亂絲也

光緒三十一年 諭巡警關緊要迭經諭令京師及各省一體舉辦自應專設衙門俾資統率著即設巡警部署兵部左侍郎徐世昌著補授該部尚書內閣學士毓朗補授左侍郎直隸候補道趙秉鈞著賞給三品京堂署理右侍郎所有京城內外工巡事務均歸管理以專責成其各省巡警並著該部督飭辦理該尚書等務即悉心統籌力任勞怨嚴定章程隨時切實稽核期於內外靖謐黎民又安用副委任一切未盡事宜即由該部妥議具奏

又巡警部奏請設左右丞各一員左右參議各一員分設五司十六科隸焉又將京師工巡局人員改定額缺設內外城廳丞各一員並參事知事各官

臣謹案是年七月以內城工巡局辦有條理實力推廣即將五城練勇改為巡捕均照內城辦法並巡視五城及街道御史一併裁撤至是設巡警

民政部

臣謹案民為邦本政貴有恆虞周司徒實掌邦籍魏晉民部皆列尚書固屬中華自古之成規亦為環球列國所兼重謹詳員司職掌而以警察附焉

三十二年改巡警部為民政部

又民政部奏詳釋總司核定王大臣奏定民政部官制參之各部通則就原設巡警部分司職掌原有者量為合併原無者分別增入如民政之地方行政地方自治移民僑民暨戶部分入之保息賑救墾理工部之營繕此皆為巡警部原設司科所無者也各項警察行政司法教練暨整飭風俗禮教戶籍保安營繕工築衛生編譯等項此皆為原設司科所有者也此外設承政廳以左右丞督理設參議廳以左右參議總核仍設五司另定職掌而將原設各司所分別

歸併擬按各司繁簡酌設額缺巡警部原設郎中五缺員外郎主事各十六缺小京官四缺一二三等書記官每司限以十缺今職掌既繁員缺自應改置擬參照原設郎中八缺參事二缺員外郎十八缺主事二十缺七品小京官九缺仍遵設八九品錄事將原設一三三等書記官裁撤其各司增設之七品小京官一缺兼可爲八九品錄事升轉之階民政原包巡警應有專司稽核之員查周禮本有司稽一官漢魏司徒各曹亦有督查專職京城警衛責任重要巨部見轄各廳局堂所人員事務極繁前巡警部曾設有稽查處爲稽查警衛 蹕路及各廳局之用擬仍照前設立又查內外兩城巡警兩廳官制亦應酌議變通擬將兩廳丞員缺升爲從三品參事改爲僉事並添設司法處辦理司法警察見均酌按事宜改定各處官員名稱職掌品級以符名實而便升轉並推辦外城巡警移設分廳以期布置周密

民政部官制

一原設巡警部專管全國巡警事今改爲民政部職權範圍自應推廣除京師內外城巡警總廳仍由本部直轄外其直省民政等官本部皆有統屬考核之權 一設承政廳以左右丞各一員任一部總匯之事凡承辦機密考核員司編存文卷審核經費各事皆屬焉擬設員外郎主事七品小京官各四缺原設之警務司及警政司之考績科統計科及機務所均歸併辦理 一設參議廳以左右參議各一員任一部謀議之事凡議訂本部法令章程等事皆屬焉設參事二員位正五品並就司員內每司選派一人在參議廳行走協同審議另設編譯員掌編譯各國關於民政之各種書籍不作額缺 一照巡警部舊有職掌增新併舊仍設五司 一民治司掌稽核地方行政地方自治編審戶口整飭風俗禮教核辦保息荒政移民僑民各事擬設郎中二缺員外郎四缺主事五缺七品小京官一缺原設之警政司戶籍科事務歸併該司辦理 一警政司掌核辦行政警察司法警察高等警察及教練巡警各事擬設郎中二缺員外郎四缺主事五缺七品小京官一缺原設之警政司行政科警法司司法科國際科警保司保安科營業科及警學

司課程科所掌事務均歸併辦理 一疆理司掌核議地方區畫統計土地面積稽核官民土地收放買賣核辦測繪審訂圖志各事擬設郎中員外郎主事各二缺七品小京官一缺 一營繕司掌督理本部直轄土木工程稽核京外官辦土木工程及經費報銷並保存古蹟調查祠廟各事擬設郎中一缺員外郎主事各二缺七品小京官一缺六七品藝師各一缺原設之警保司工築科事務歸併辦理 一衛生司掌核辦防疫衛生檢查醫藥設置病院各事擬設郎中一缺員外郎主事各二缺七品小京官一缺並設六七品醫官各一缺原設之警保司衛生科事務歸併辦理 一習藝所原設有員外郎一缺主事二缺錄警法司今擬就警政司內仍設員外郎一缺主事二缺專辦習藝所事宜即以原補各員改補 一巡警部原設一三三等書記官及司書生均不定額缺今照各部官制通則擬改設八九品錄事由尙書侍郎酌量委用 一巡警部原設之豫審廳訊斷刑民案件俟司法部大理院奏定裁判階級定期實行後會同妥議辦理至尋常違警罪犯應仍由分廳訊結 一巡警部照商部顧問官之例設一三三等採訪官偵訪要務今擬仍用舊名選員酌派探訪關繫民政警務一切事宜 一巡警部原轄之路工局應仍歸本部直轄候路工告成酌量歸併 一巡警部原轄之教養局習藝所巡警學堂消防隊協巡隊均仍歸本部直轄如有應行改隸之處由尙書侍郎酌核辦理

內外城巡警廳官制

一內外城擬仍設巡警總廳各一曰內城巡警總廳曰外城巡警總廳總理京師內外城一切警務 一內外城總廳原分總務警務衛生三處見民刑事訴訟既歸大理院辦理原設之內外城豫審廳俟地方裁判所成立後理應裁併所有搜查逮捕護送罪人及處置違警罪等事擬添設司法處以分理之又警務處名稱太渾擬改爲行政處以專辦行政警察事務 一內城原設五分廳外城原設四分廳今分廳之下既分設各區則分廳不必多設擬內城併爲三分廳曰內城中分廳內城左分廳內城右分廳外城併爲二

分廳曰外城左分廳外城右分廳各歸內外城巡警總廳直轄其內外城原設各區即由兩總廳酌量撥隸各分廳 一京師四郊警察亦應推廣與辦應分設廳區若干由兩總廳酌辦 一內外城總廳原設廳丞各一員位正四品見擬仍名廳丞位從三品管理地面一切事務 一內外城總廳原設之參事官與各部參事名稱相混擬改稱參事惟警務費用專門人才必須依次升轉方致應練而免凌躐見擬升廳丞為從三品而原設知事參事皆係五品於升轉不便擬改設總務處僉事一員位從四品為廳丞屬官領袖不得比照京堂仍改設行政處司法處衛生處僉事各一員位正五品承廳丞指揮命令分理一切事務 一內外城總廳各設五六七八九品警官若干員分隸各處執行各項事務由兩總廳酌定額缺申請奏明立案 一內外城分廳仍各設知事一員位正五品辦理本管廳區事務知事以下仍各設六七八九品警官若干員由兩總廳酌定額缺申請奏明立案 一每區設區官一員以六七品警官充之承該管分廳知事之指揮管理本區地面事宜區副一員以八九品警官充之協理本區事務 一各廳應設八九品錄事由廳丞酌委申報本部

又奏部廳權限略稱迭次奏准廳丞等專任京城警務 臣部惟司督察所有應分權限自應詳籌重為釐定竊惟漢之警署隸於諸卿唐之巡使直達端省凡夫權寄之重統率之加皆所以密考查而責實效見部廳改章伊始有應酌為變通者如專辦 踴路警衛整理地方於所轄境內有完全警察之權與各衙門文牘直接等是也有仍照奏定章程者如丞參准令照京堂奏事及分廳不得申部皆須稟總廳並巡警學堂習藝所教養局消防隊等皆歸部轄之類是也至考查民政宜派專官慎簡實能預備器使

民政部及巡警廳權限章程

一丞參及內外廳丞准照京堂例專摺奏事惟關部廳應行奏請事件仍由 臣部具奏以重職守 一丞參及廳丞均由 臣部奏保請 簡簽事知事由 臣部奏補其五六七品警官由廳申部奏補八九品警官由廳丞申由 臣部

委用 一廳丞於所轄境內有完全執行警察事務之權得發布巡警廳命令於管轄區域之內其事關各署須會銜出示者仍由 臣部領銜核議刊發 一廳丞遇所屬各知事各區官之措置有違法令侵權限者得撤銷或停止之其廳丞有辦理未盡善者 臣部亦有撤銷停止之權

又奏釐定內外城各廳界域職掌員缺略稱京師為根本重地巡警尤治忽所關見在改革伊始尤宜詳細推求逐一釐定茲據內外城巡警總廳申送界域職掌員缺章程大端有三 一曰畫分界域凡改隸原分內外城各區及新推廣外坊擬設各廳界址屬之一曰申明職掌凡各總廳改設總務行政司法衛生各處承辦事項歸併原設各股及內外城坊分廳擬設總務等課分辦事項屬之一曰設立員缺凡總廳各分廳各區應設正副管股幫管股正副課長課員正副區官各差缺及選用警官擬設錄事等屬之測考魏之衛曹備分倉法唐之街使亦別里坊各國京地巡警設官尤多蓋非畫清地面不足以專責成非設立官缺不足以資維繫職掌重在分明員數貴數任使京師警政繫中外之視聽雖具規模宜求進步庶有以副 朝廷講求民政之至意

又吏部奏准各項警官由進士分部主事及實缺小京官調用者照章只扣歷俸其各項出身之五品警官照員外郎試俸人員實歷俸次五年六品警官照主事實歷俸次六年七品警官仍照小京官實歷俸次六年無論曾否經過京察所有試俸歷俸一律不准豁免至僉事知事設有額缺與各項警官漫無限制者不同即照郎中核其出身分別試俸歷俸並准豁免

又奏魏晉以來始設民政部唐時改民為戶相沿及今見改戶部為度支部掌財政畫疆等項歸入 臣部上年會同軍機大臣奏定 臣部官制內設疆理一司以審議地方區數核辦測繪圖志伏維各省地勢今昔變遷新政推行府縣區域之增折裁併者所在多有非有新繪之圖新修之志不足以資考證 臣部見正籌辦測繪學堂冀以廣儲人才為將來測繪地圖之用擬先調取京外邊腹各省原有圖志以為參核編輯之資請 飭各將軍督撫就近詳考疆域核界綫分別繪圖貼說列表造冊咨送 臣部以備查核至於變通官制增改郡縣近

日如有奏改及新設府廳州縣者應請 飭下 臣部核議以昭慎重土疆之意
三十四年奏准本部見擬暫設八品錄事二十缺九品錄事三十二缺

又奏遵設統計處並定章程設總核一員提調二員科員十員

又奏定考核巡警官吏章程略稱京師自巡警總廳廳丞以下各省自巡警道
以下所有辦事成績均由 臣部定期核辦分別殿最請 旨勸懲

又奏 臣部會同軍機處奏改部廳官制章程擬升廳丞為從三品而原設知事
參事皆係五品於升轉不便擬改設總務處僉事一員位從四品為廳丞屬官
領袖不得比照京堂等語查總務處僉事有襄佐廳丞執行警務綜理地面之
責雖聲明不得比照京堂然究與行政司法衛生三處僉事秩視郎中者不同
見屆京察之年應請列入四品附入廳丞冊內以便考績又查五品以下京員
例得截取保送此項總僉事既非京堂之比又無截取保送之例是歷資較深
任事較重之員轉無一定升途殊非鼓勵人才之道擬請嗣後凡內外廳總僉
事歷俸已滿三年者由 臣部出具切實考語將銜名咨送軍機處遇有各省巡
警道缺出與預保人員一體請 簡下吏部議奏

又 諭民政部奏廳員職司警衛事繁重擬請援照部員京察一律辦理著
吏部議奏

又奏接收禮部移交事項酌擬畫分暨用款辦法

又奏添收營繕司員外郎主事各二缺

宣統元年奏酌改廳區制度略稱從前奏定京師內外城巡警廳區制度立法
之初意圖規制之完全不嫌組織之過密而設官既衆需人自多積久相沿不
無濫竽充數 善者到任後體察情形擬設法淘汰當就部內設立法政研究
所嚴定課程飭令兩廳人員輪班講習以畢業之等差為委用之先後又於上
年諭飭內外廳丞酌將內城原設之二十六區併為十三區外城原設之二十
區併為十區藉資節省查東西各國首都警廳官制奏任以上之官大抵不及
百員見在警務甫漸擴充而用人已兼數倍又總分廳區遞為管轄層累既多
徒見文書往復之煩轉欠命令統一之效再四籌商與其多設廳員不如多設

巡警擬請將京師內城中左右三分廳外城左右二分廳一併裁撤其內城各
分廳原轄之十三區外城各分廳原轄之十區概歸總廳直接管理所有裁缺
之各分廳知事及以下各員分別調歸 臣部酌補任用內外總廳除廳丞總僉
事僉事員缺悉仍舊制及每廳原設總務行政司法衛生等四處仍由總僉事
分領外每處各設科長科員分別以五六七八九品警官充之計每處五六七
品警官各一員八九品警官各二員每處限定七員每廳四處共二十八員兩
總廳共五十六員內廳轄十三區外廳轄十區每區各設區長一員區員一員
分別以警官充之計內外城二十三區共四十六員統計內外城廳區員缺除
廳丞二員總僉事僉事共八員外所有五六七八九品警官員缺內城五十四
員外城四十八員共一百零二員作為定額至各廳區巡官長警應按照地方
繁簡市街形勢酌量分布如有不敷隨時增設

內外城巡警廳官制章程

一京師內外城設巡警總廳各一總理京師內外城巡警事宜 一巡警總
廳設職員如左廳丞內城一員外城一員秩從三品 簡任總僉事內城
一員外城一員秩從四品奏補僉事內城三員外城三員秩正五品奏補五
品警官內城四員外城四員奏補六品警官內城十員外城九員奏補七品
警官內城十一員外城九員奏補八品警官內城十四員外城十三員奏補
九品警官內城十五員外城十三員奏補 一廳丞承民政部尚書侍郎之
指揮監督總理該管一切事宜 一總僉事僉事及警官承廳丞之指揮監
督分理本管一切事宜 一巡警總廳分設各處如左總務處行政處司法
處衛生處 一總務處以總僉事領之以奏補警官三員咨補警官四員分
充科長科員 一行政處司法處衛生處各以僉事一人領之每處以奏補
警官三員咨補警官四員分充科長科員 一巡警總廳分設各區如左內
城分設十三區外城分設十區 一巡警分區各設區長一員以奏補警官
充之區員一員以咨補警官充之 一巡警總廳各得設司書生至多不得
過三十名分區各得設司書生至多不得過三名

又奏陳明核實整頓應區辦法略稱內外城分廳裁撤一面就總廳命事各員內揀員調部分司練習而將裁缺分廳各知事及通曉警察會經游學畢業者分派兩廳署理命事各缺所有應區差缺即責成兩廳丞署署命事等就原有實缺候補各警官及應區行走委員內按照此次奏定額數妥選派充旬日以來迭撥兩廳擬具員名由途前來當飭暫行試辦以免曠廢應區職務一面酌定甄別去留辦法擬先將此次未經點派差使人員定期傳集試以警察人員應行通曉之學科試畢後再將見在派差各員一併傳集如法試驗俟兩次考試完畢由臣等評定甲乙分別等差將考列優等者留應任用中等者照吏部奏定裁缺司員改用章程酌辦下等者即行開去差缺或送入巡警學堂肄業或聽自謀生計報聞

又奏改定消防隊習藝所警官缺額略稱臣部所轄之消防隊習藝所創辦數年漸著成效除消防隊總管理習藝所監督由臣部遴派兼充習藝所員外郎主事各缺已設定額外其消防隊所設之二大隊二處及軍樂隊習藝所所設之五處二科人員向係借補內城巡警總廳警官之缺見在兩廳額缺既經釐定該二處亦應另設專缺以免向隅擬於消防隊設五品警官三缺六七品警官各六缺八九品警官各八缺習藝所設五品警官二缺六七品警官各三缺八九品警官各四缺於該隊所各項人員內擇其辦事勤奮學識較優者陸續請補如無當選人員任缺勿濫一切升轉截取等項均按照巡警總廳警官章程辦理其從前借補缺額即可盡還警廳於公務不無裨益

二年奏設立圖志館略稱查大清一統志成書越二百餘年各省通志乾隆後半未續修而嘉慶道光一統志均未頒行近來私家著述更覺善本方輿所關至為重大亟應準今酌古繼軌重編臣部職司攸分前經奏明調取各衙門行省圖志並頒發地理表式飭令詳報在案茲謹督率司員悉心纂述嚴定體例分門編輯並隨時調取各衙門案卷藉供參考以為續修一統新志之預備所需圖籍大半由省調取館員悉司員兼充所費無多事半功倍一俟成效可觀再行請旨辦理

警察

光緒三十年政務處議覆鴻臚寺少卿毓衡奏辦理警察案先期丁試辦略稱警察乃內治要政且是專門之學自奉旨飭辦應由各督撫先後奏到創辦章程並請先設學堂挑選年輕質敏者認真教練其經費多由裁減制兵撥節籌備締造頗為艱難原以保衛地方必須具有學識方能得力未便拘於一格該少卿所陳係為駐防生計起見查調署兩廣總督岑春煊在四川署督任內會同著成都將軍蘇瞻信奏辦滿城警察亦係就旗人挑選專管滿城地方此外各省駐防處所自可仿照辦理其有外府州縣駐防旗丁較少之處亦可挑選合格者令入警察學堂學成後即歸入各處備用於旗丁出路不為無益

三十一年 諭巡警為方今要政內城見辦工巡局尚有保運巡應實力推行所有五城練勇著即改為巡捕均按內城辦理著派左都御史壽者左副都御史張仁黼會同尚書那桐通盤籌畫認真舉辦以專責成原派之巡視五城及街道御史著一併裁撤陳壁亦著毋庸管理一切未盡事宜及裁撤五城御史後詞訟案件應如何督飭審理之處著那桐等妥議章程迅速具奏

又直隸總督袁世凱奏略稱查外國警察之制上通政府下達窮鄉就地抽捐以取諸民者仍用諸民故官無籌款之勞民無橫征之怨臣督飭天津巡警總局道員趙秉鈞先從天津四鄉辦起以為各屬模範所需經費以地方本有之青苗會支更費及賽會演戲一切無益有餘之款酌提充用暫定巡警七百二十四名月餉由村董酌定支給官不經手其總分局區官弁薪工馬匹雜支由官發給以示體恤開辦之初先從清查戶口入手酌定禁令務去民害犯者名曰違警由巡官受理即警察廳有之司法權也此外命盜戶婚田土等案仍歸地方官管理即地方官固有之裁判權也但使實力奉行總歷歲月不獨鄉曲愚民漸明公理汛兵衙役亦可以次裁撤催科傳案則一呼即至無擾累之虞募兵退伍則有籍可稽無頂替之弊一切與學清賦推行新政有事半功倍者

三十二年政務處兵部會奏議覆裁撤綠營一律改為巡警略稱光緒二十七年

年奉 諭飭練巡警各省多就綠營設法比年辦法參差且有雖經具奏並未實行者請飭各督撫將見存馬步戰守各兵挑選年力富強體量合格粗識文字別無嗜好者改編巡警慎選廉明武職管轄通警察人員督率教練不得以原有制兵改易巡警名目空文塞責每年騰出餉項儘數撥作巡警要需先於省會及商埠設巡警學堂徵募士民肄業一面將由綠營挑選之警兵更番派入學堂教以淺近警法逐漸分別去留實於警政大有裨益等語查綠營久稱寇敗巡警亟應振興見在 朝廷特設專部整理京外警務以爲保民要政各省與辦巡警需費頗鉅自應將綠營挑改巡警化無用爲有用該尚書等所請各辦法均尚妥協擬請 飭下各督撫查照該部原奏認真辦理

又署兩江總督周馥奏上海爲通商要口中外商人之懋遷於此者紛至沓來近年旅居尤倍於前匪類因而溜跡租界以內雖由工部局設立巡警自爲保衛而租界以外之華商一無戒備上年據前升道袁樹勛請將向駐之滬軍親兵改爲巡警分派城廂內外站街巡警以資保衛詳經奏明在案乃地廣兵少顧此失彼況上海從前本駐有 標奇兵撫標滬軍滬軍親兵忠字信字等營總計約有二千二百餘人嗣經陸續裁撤見在分防城外及各鄉鎮者僅有撫標滬軍五百名奇兵營所改之巡防步兵四隊計兵夫五百六十名不及從前兵數之半設遇有事不敷調撥見擬添設巡警五百名營制餉章照南北洋巡警章程辦理原查有駐滬軍親兵及見存之撫標滬軍餉銀向在關稅項下開支此次再添五百人請仍在關稅內動支如仍不敷分布再由官紳商民設法籌解

又民政部奏設京師高等巡警學堂略稱招集京外人員及舉貢生監並原充各項巡警考試共有六千餘人之多復派精通警學各員嚴加甄錄由 等校核計挑入正取二百四十名副備取三百名先將取列正取者飭令肄業計分三科一曰正科授以高等警察及各項法律分六期畢業凡挑取舉貢以下及巡警入之一曰簡易科授以簡易警察以應急需分二期畢業凡挑取各官員等入之一曰專科授以必修警察俾見有差各警員可及時來學分二期畢業

凡各廳隊警官以下入之延聘中外各科教習酌定課程以資講授遴員分派總理總核並提調以下各員酌設司書生夫役名額其經費等項飭令核實樽節開支業已開辦至京師學堂爲各省標準見因款項支絀僅就財力能及者辦理嗣後仍當籌款擴張以期學業日精成材日衆

又 諭御史俾壽奏陳各州縣差役肆擾情形著督撫嚴飭各屬速辦警察將所有差役人等分別裁撤並妥議章程以除積弊而惜民艱

三十三年奏准通飭各省酌裁民壯募練巡警

又奏准推行警政略稱見在各省府廳州縣及鄉鎮地方舉辦警察有循保甲之規制而變其名者有以團營巡勇鄉勇改者有以綠營兵改者有以鄉鎮原有之巡夫人等改者有專用巡警者粉飾因循在所不免查州縣原有民壯捕役等項每縣額設不過百名而皂役之數多且逾千平日於緝捕盜賊遞送公文全無實際惟日以生事擾民爲業時至今日不得不議更張前山西撫臣趙爾巽籌辦首省巡警奏准裁汰捕役等項改募實壯丁作爲巡警各省仿照推行自無窒礙請 飭下各省督撫將軍通飭所屬府廳州縣查明民壯捕役等項額設若干工食若干舊有練勇人數若干籌給餉項若干詳報 臣部一面嚴飭酌量裁汰改設巡警增給餉薪各設警務傳習所更番訓練以應急需至地方之繁簡形勢之險易民俗之馴悍經費之贏絀各處情形不同應如何增減變通之處由地方官酌量辦法稟明督撫將軍酌核奏咨以期逐漸擴充又兩江總督端方奏准上海推廣巡警辦法四端一建造總局一分設學堂一擴充區局一添練馬巡估計開辦經費需銀八萬兩於江海關稅項下動支又民政部奏定違警律草案總則一章罰則七章附則二條總則爲施行違警律之本凡所犯之應坐罪與否及拘留罰金之等差并審判之法皆隸之罰則以保持國家政務公共危害爲先而關於往來通信秩序風俗衛生財產等皆著之請 飭憲政編查館核定頒行

又奏准外城添募巡警由度支部每月撥經費銀二萬五千兩

三十四年憲政編查館奏核定違警律草案略稱見在民政既設專官警政正

待擴充則違警律亟宜析出單行檢閱該律草案釐爲七等並分總則國家政務公共危害交通郵電秩序風俗身體衛生財產爲十章共四十四條又附則兩條酌量刪併修改擬將該草案定爲十章四十五條繕單呈覽伏乞 欽定頒行京外一體遵守

又奏定參照陸軍成案酌擬巡警服章

擬定違警律

第一章 總例 第一條凡犯本律各款在本律施行以後者均按本律處罰 第二條凡本律所未載者不得比附援引 第三條本律所定罰例分爲七種如左一十五日以下十日以上之拘留或十五圓以下十圓以上之罰金二十日以下五日以上之拘留或十圓以下五圓以上之罰金三五日以下一日以上之拘留或五圓以下一角以上之罰金四十五圓以下十圓以上之罰金五十圓以下五圓以上之罰金六五圓以下一角以上之罰金七各本條所指充公停業及勒令歇業等處分 第四條凡拘留者拘留於巡警官署 第五條凡按本律處罰金者限五日內完納若逾限無力完納每一圓即拘留一日其不滿一圓者亦以一日計算 第六條凡見犯本律各款者巡警人員雖不持傳票亦可徑行傳案見犯者若係職官而確有公事在身者不在此限 第七條因犯本律之嫌疑經官傳訊者須於三日以內到案若逾期不到可徑行判斷如有應得之罪按律處之 第八條凡犯本律各款者其呈訴告發期限以六箇月爲斷按本律定罪逾六箇月未辦者作爲豁免 第九條凡同時犯本律二款以上者各按應得之罪分別處罰其拘留期限長至三十日爲止罰金數目多至三十圓爲止 第十條唆使人犯本律各款者以正犯論 第十一條凡曾犯本律各款於罰辦完結後六箇月以內在同一管轄地方再犯者加重一等 第十二條犯本律各款者若情有可原得酌量減輕一二等 第十三條犯本律各款而於未發覺以前向巡警官署或被害人自首者得減輕一二等或代以申飭其各本條有專例者不在此限若受申飭者於六箇月以內在同一管轄地方再犯

時加重二等 第十四條凡按本律拘留者若確有悔悟情狀於拘留期限過半後不俟期滿亦可釋放 第十五條有心疾人犯本律各款者不論第十六條未滿十五歲人犯本律各款者巡警官署申飭後告其父兄或撫養人自行管束若未滿十五歲人經前項處分後六箇月以內在同一管轄地方有再犯者科其父兄或撫養人以五圓以下一角以上之罰金若無從查悉其父兄或撫養人者八歲以上之幼童由巡警官署送入教養局未滿八歲者則送入育嬰堂 第十七條凡爲人所迫無力抗拒致犯本律各款者不論 第十八條犯本律各款未成者不論 第十九條凡本律所稱一等者指各本條所定拘留期限罰金數目四分之一而言加重與減輕准其相抵因加減之故拘留有不滿一日罰金不滿一角者准其豁免 第二十条本律所稱以上以下或以內者俱連本數計算 第二十一條凡犯左列各款者處十五日以下十日以上之拘留或十五圓以下十圓以上之罰金一無故布散謠言者二於官吏辦公處所聚眾喧嘩不能禁止者 第二十二條凡犯左列各款者處十日以下五日以上之拘留或十圓以下五圓以上之罰金一因曲庇犯本律之人故意藏匿或湮滅其證據或捏造偽證者若於該案未判定前自首或係犯人親屬代首免其處罰二誣告他人犯本律各款或偽爲見證者若於該案未判定前自首者免其處罰三毀損或除去官發告示者 第二十三條凡犯左列各款者處五日以下一日以上之拘留或五圓以下一角以上之罰金一違背章程營商工之業者二違背章程開設戲園及各項遊覽處者三凡死出非命未經呈官相驗私行葬埋者 第二十四條凡犯左列各款者處五圓以下一角以上之罰金一遷移婚娶生死不遵章程呈報者二未經官准擅興建築或修繕或違背官定圖樣者三旅店不將投宿人姓名住址及其職業呈報者於六箇月以內犯本款至三次以上者應令停業至十日爲止若屢犯不改則勒令歇業 第三章 關於公眾之危害犯警罪 第二十五條凡犯左列各款者處十

五日以下十日以上之拘留或十五圓以下十圓以上之罰金一違背章程搬運火藥及一切能炸裂之物者二違背章程儲藏火藥及一切能炸裂之物者三未經官准製造煙火或販賣者四於人家稠密之處點放煙火及一切火器者五知有前三款之犯人而不告知巡警人員者若係犯人之親屬免其處罰六發見火藥及一切能炸裂之物而不告知巡警人員者七於人家近傍或山林田野濫行焚火者八當水火及一切災變之際由官署令其防護而抗不遵行者九房屋勢將傾圮由官署督促修理而延宕不遵者第二十六條凡故縱瘋人或狂犬及一切危險之獸類奔突道路或入人家宅者處五日以下一日以上之拘留或五圓以下一角以上之罰金

第四章 關於交通之違警罪 第二十七條凡犯左列各款者處五日以下一日以上之拘留或五圓以下一角以上之罰金一於私有地界內當通行之處有溝井及坎穴等不設覆蓋及防圍者二於人多聚集之處及灣曲小巷馳驟車馬或爭道開車不聽阻止者三乘自行車不設鈴號者四夜中無燈火疾驅車馬者五以木石堆積道路不設防圍或疏於標誌點燈者六以瓦礫或穢物及禽獸骸骨投擲道路或投入人家者七未經官准於路旁河岸等處設開店棚者八毀損道路橋梁之標誌及一切禁止通行或指引道路之標誌等類者九渡船橋梁等曾經官署定有通行費之處而於定數以上私行加索或故阻通行者其浮收之款概行充公不得援第十三條減輕之例 第二十八條凡犯左列各款者處五圓以下一角以上之罰金一於渡船橋梁等應給通行費之處不給定價而通行者二於路傍羅列玩具及食物等類不聽禁止者三濫繫舟筏致損毀橋梁隄防者四將騾馬諸車橫於道路或堆積木石薪炭等類妨礙行人者五並牽車馬妨礙行人者六並舟水路妨礙通船者七將冰雪塵芥投棄道路者八受官署之督促不灑掃道路者九於道路遊戲不聽禁止者十疏於牽繫牛馬等類妨礙行人者十一於諭示禁止通行之處而通行者十二消滅路燈者

第五章 關於通信之違警罪 第二十九條凡犯左列各款者處十五日

以下十日以上之拘留或十五圓以下十圓以上之罰金一妨礙郵件或電報之遞送情節較輕者二損壞郵政專用物件情節較輕者三妨礙電報電話之交通情節較輕者

第六章 關於秩序之違警罪 第三十條凡犯左列各款者處五日以下一日以上之拘留或五圓以下一角以上之罰金一於私有地界外建設房屋牆壁及軒楹者二毀損路上植木或路燈者三由官署定價之物而加價販賣者其浮收之款概行充公不得援第十三條減輕之例於六箇月以內犯本款至三次以上者應令停業至十日為止若屢犯不改則勒令歇業四於官地牧放牲畜不聽禁止者五於禁止出入處所濫行出入者六潛伏無人之屋內者

第七章 關於風俗之違警罪 第三十一條凡犯左列各款者處十五日以下十日以上之拘留或十五圓以下十圓以上之罰金一游蕩不事正業者二僧道惡化及江湖流丐強索錢物者三於私有地界內發見屍體不報官署或潛移他所者四無故攜帶兇器者五暗娼賣姦或代媒合及容止者六唱演淫詞淫戲者 第三十二條凡犯左列各款處十日以下五日以上之拘留或十圓以下五圓以上之罰金一污損祠宇及一切公眾營造物者二毀損墓碑者 第三十三條凡犯左列各款者處五日以下一日以上之拘留或五圓以下一角以上之罰金一於路傍為類似賭博之商業者二於道路高聲放歌不聽禁止者三於道路酗酒喧噪或醉臥者四於道路口角紛爭不聽禁止者 第三十四條凡茶館酒肆及各項遊戲處所主人或經理人於巡警官署所定期限外聽客逗留者處十五圓以下十圓以上之罰金於六個月以內犯本款至三次以上者應令停業至十日為止若屢犯不改則勒令歇業 第三十五條凡犯左列各款者處十圓以下五圓以上之罰金一於巡警官署所定期限外逗留茶館酒肆及各項遊戲處所者二當眾罵詈嘲弄人者犯本款者非經被害人呈訴不論 第三十六條凡犯左列各款者處五圓以下一角以上之罰金一於道路裸體者二奇裝異服有

礙風化者三於廁所外便溺者四未經本主允許輒於人家牆壁貼紙或塗抹者五深夜無故喧嚷者六凡車夫馬夫船夫及一切傭工人等豫定備值而事後強索加給或雖未豫定而事後訛索者犯本款者若屢犯不改應勒令歇業

第八章 關於身體及衛生之違警罪 第三十七條凡犯左列各款者處十五日以下十日以上之拘留或十五元以下十元以上之罰金一加暴行於人未至成傷者二未經官准售賣含有毒質之藥劑者於六個月以內犯本款至三次以上者應令停業至十日為止若屢犯不改則勒令歇業三於城市及人煙稠密之處開設糞廠者 第三十八條凡犯左列各款者處十日以下五日以上之拘留或十元以下五元以上之罰金一偶因過失污穢供人飲用之淨水致不能飲用者二違背一切官定衛生章程者 第三十九條凡業經懸牌行術之醫生或穩婆無故不應招請者處十圓以下五圓以上之罰金 第四十條凡犯左列各款者處五圓以下一角以上之罰金一毀損明暗各溝渠或受官吏督促不行浚治者二裝置糞土穢物經過街市不施覆蓋者 第四十一條凡犯第三十八條各款第四十條第二款六個月以內至三次以上者如係營業之人應令停業至十日為止若屢犯不改則勒令歇業

第九章 關於財產之違警罪 第四十二條凡犯左列各款者處十日以下五日以上之拘留或十圓以下五圓以上之罰金一違背章程損傷森林樹木者二解放他人所繫牛馬及一切獸類未至走失者三解放他人所繫舟筏未至漂失者 第四十三條凡犯左列各款者處五圓以下一角以上之罰金一無故毀損人第宅題誌店鋪招牌及一切合理告白者二在官地或他人私地內私掘土塊石塊情節較輕者三採食他人田野園圃之菜果或採折花卉者四踐踏他人田園或牽入牛馬者

第十章 附條 第四十四條本律自 欽定頒行文到之日起限三個月所有各省一律施行其各地方有巡警制度未經設立完備者得由各該省

督撫酌量情形另定期限奏明辦理 第四十五條本律所載之外各直省督撫得因地方情形酌定違警章程變通辦理惟不得與本律相抵觸 核定報律四十二條

第一條凡開設報館發行報紙者應開具左列各項於發行前二十日內呈由該管地方官衙門申報本省督撫咨明民政部存案一名稱二體例三發行人編輯人及印刷人姓名履歷及住址又發行所及印刷之名稱地址 第二條凡充發行人編輯人及印刷人者須具備左列要件一年滿二十歲以上之本國人二無精神病者三未經處監禁以上之刑者 第三條發行編輯得一人兼任但印刷人不得兼充發行人或編輯人 第四條發行人應於呈報時分別繳保押費如左每月發行四回以上者銀三百元每月發行三回以下者銀一百五十元其專載學術藝事章程圖表及物價報告等項之彙報免繳保押費 第五條第一條所列各款發行後如有更易應於二十日內重行呈報發行人有更易時在未經呈報更易以前以代理人名義發行 第六條每號報紙均應載明發行人編輯人及印刷人之姓名地址 第七條每號報紙應於發行日郵送該管地方官衙門及民政部各一分存查 第八條報紙記載失實經本人或關係人聲稱更正或送辨誤書函應即於次號照登如辨誤字數在原文二倍以上者准照該報普通告白例計半收費更正及辨誤書函如措詞有背法律或未著姓名住址者勿庸照登 第九條記載失實事項由他報轉抄而來者如見該報自行更正或登有辨誤書函時應即於本報次號照登不得收費 第十條訴訟事件經審判衙門禁止旁聽者報紙不得揭載 第十一條豫審事件於未經公判以前報紙不得揭載 第十二條外交海陸軍事件該管衙門傳諭秘密者報紙不得揭載 第十三條密旨密摺未經官報公佈者報紙不得揭載 第十四條左列各款報紙不得揭載一詆毀宮廷之語二淆亂國體之語三擾亂治安之語四敗壞風俗之語 第十五條違第一二三四條及第五條第一項與違第六七條者該發行人科三元以上三十元以下之

罰金 第十六條呈報不實者該發行人科五元以上五十元以下之罰金
 第十七條第四條末項所指各彙報其記載有出於範圍以外者該編輯人科五元以上五十元以下之罰金 第十八條違第八條第一項及第九條者該編輯人科三元以上三十元以下之罰金第十九條第八條第一項及第九條所指之事項如係私事非經被害人告訴不論 第二十條違第十條者該編輯人科十元以上百元以下之罰金 第二十一條違第十二條及第十四條第三四款者該發行人編輯人科二十日以上六個月以下之監禁或二十元以上二百元以下之罰金 第二十二條違第十四條之一二款者該發行人編輯人印刷人科六個月以上二年以下之監禁附加二十元以上二百元以下之罰金但印刷人實不知情免罪 第二十三條違第十二條及第十四條第三款者得暫禁發行 第二十四條暫禁發行者日報以七日為度其餘各報每月發行四回以上者以四期為度三回以下者以三期為度 第二十五條違第十四條第一二款者永遠禁止發行 第二十六條違第十二條及第十四條第三四款致釀生事端者同照前條辦理 第二十七條呈報後延不發行或發行後中止逾兩月者如不聲明原委即作為自行停辦 第二十八條禁止發行及自行停辦者准將保押費領還註銷存案 第二十九條違犯本律所有應科罰金及訟費逾十日不繳者得將保押費扣充不足再行追繳 第三十條凡於報紙內撰發論說紀事填注名號者不問何人其責任與編輯人同 第三十一條報紙以代理人之名義發行時即由代理擔其責任 第三十二條除第一條第三款前兩條所指各人外所有報館股東及雇用人等均應無涉 第三十三條凡照本律呈報之報紙除本律所定禁例外准其有言論自由之權 第三十四條凡照本律呈報之報紙外所有郵費電費准照章減收即與郵送遞發 第三十五條凡論說紀事確係該報創有者得注明不許轉登字樣他報即不得互相抄襲 第三十六條凡報中附刊之件他日足以成書者得應有版權之保護 第三十七條凡在外國發行之報

紙犯本律應禁發行各條者禁止其在本國頒布 第三十八條凡違犯本律者不得用自首減輕再犯加重數罪俱發之例 第三十九條凡違犯本律者其起訴告訴發期限六個月為斷 第四十條本律自奏准奉 旨文到之日起限兩個月各直省一律通行 第四十一條本律施行前發行之報均應於六個月內遵章補報並按數補繳保押款 第四十二條本律施行以後所有前訂報館暫行條規即行作廢
 又陝西巡撫恩壽奏陳巡警經費略稱陝省改設巡警道遵照奏定官制應設警務總署一所就省城地方置分署七所畫為二十一區所有需用員司薪水雜役口食辦公經費等項核計歲需庫平銀三萬二千二百餘兩應准作正開銷
 又江西巡撫馮汝駮奏陳贛省警區以舊設之城內外五分局地段畫分行政警區計城內東西北各三區共十二區城外四區即以各區分隸於分局以分局直隸於總局各分局長皆責成兼管第一區事以節糜費此外十一區皆各設區官分別駐區擔任區務每分局各配置長警四十人每分區各配置長警三十三人各隊局區以下所設巡官巡長巡警三項概分一二三等階級以便升轉見定一總局四隊五分局十六區以及衛生公所警務學堂七城門共設員弁長警夫役一千一百八十一員名總計每月額支薪餉暨活支經費共銀九千一百八十七兩六錢五分統由藩司籌撥濟用核實支銷

皇朝續文獻通考卷一百二十

職官考六 京文職 民政部

宣統元年東三省總督徐世昌奏奉省各級審判檢察廳遵章退還司法巡警略稱審判廳爲預備立憲重要之圖按照年限添設不容遲緩若每廳必須專用司法巡警匪特款項支絀力難籌辦且所用人數有限亦決不能舉地面搜查逮捕之事並願無遺誠不若警察之布滿城鄉較爲周至是以司法巡警事務皆應以行政官廳任之毋庸於巡警中特標司法之名亦毋庸於司法中另立巡警一部此各國之成規部院之所由取則也查警察一官有代表 國家保護公益之責職務甚繁決非少數之檢察所能盡其事故必以行政官廳爲補助自各廳撥用巡警以來巡警局之巡官長警於此中權限職守未必盡人皆知或以爲司法既有專官則緝捕非復已事恐習焉不察將至行政官以放棄而溺職司法官因乏助而鮮功設不及時變通勢將兩受其害夫司法警察權本係法部監督而委任檢察廳以執行檢察廳爲司法巡警之長官故有指揮巡警及印佐弁兵之權蓋檢察巡警實有息息相關之誼東三省試辦審判檢察各廳實爲各行省司法分立之先聲若以輔助之未良致使推行之寡效影響所及關繫匪輕擬將各廳撥用巡警悉數還之警局而使各巡官長警遵章擔任司法警察事務受法司之委任承檢察之指揮庶畛域不分而訴訟易理所有對於巡警局辦事章程均經遵照法部民政部奏定章程辦理從前奉省咨部之檢察廳對於巡警局辦事簡章概行廢止

又兩江總督端方奏上海巡警擬請加撥經費續籌推廣略稱上海華界創辦巡警始於光緒三十一年其時僅就所裁滬軍親兵營挑選壯丁改充巡士先就城廂內外站街巡察所需經費即以親兵營底餉撥用旋因南北市相距遼遠不能兼顧奏准添募巡警五百名歲需餉銀三萬八千兩在關稅項下動支三十三年因北市與寶山交界處市廛日闢浦東一帶匪類滋多又添招巡警二千餘名每月添撥關稅銀一萬兩均經奏咨在案惟該處警局所轄地跨兩

縣與各國租界處處毗連近來僑寓商民日有增益雖已加添崗位無如撥款有定往往有必須改良之處輒以豫算不足因而中阻以視租界內之財力雄厚日事擴張者不免相形見絀况上海爲通商要埠警政乃治權所關若仍因陋就簡即不免予人訾議必須急起直追力求精進第轄界寬廣建設紛繁又非寬籌經費無所措手見經督飭關道局員籌商擬就所管地界畫分四路以城內爲第一路浦東爲第二路北市縣長剖其東北爲第三路西南爲第四路每路設分局一分區五共計二十區普設巡警站崗並另設騎巡隊分駐浦東北市兩處晝夜梭巡以補站崗巡警之不逮又設消防隊以救災偵探隊以犯添巡警學堂以儲弁記警長之選又因黃浦江與蘇州河交通之處商船帶集宵小潛藏增設水巡警局一所購製舟楫雇募水手畫分河道常用巡緝又慮華洋隔閡易啟紛爭擬仿北洋警章選用洋員以便交涉所有額支經費樽節估計如薪餉公費工食馬乾等項常年約需規銀二十萬零六千兩學堂經費需銀一萬二千兩辦水巡薪餉養船等費約銀一萬兩其活支項下製辦軍裝衣褲靴鞋及緝捕卹賞醫藥等費約銀二萬六千七百兩統共需銀二十五萬五六千兩前次奏定指撥關稅銀十五萬八千兩及親兵營底餉銀一萬二千餘兩共銀十七萬兩出入相抵尙短銀八萬餘兩除前定撥款外每月至少加撥銀六千兩遇閏照加方敷布置擬請仍在江海關稅項下照撥以濟要需

又浙江巡撫增韞奏籌辦巡警情形略稱一創設全省警務處以爲總攬機關浙江從前開辦巡警限於省城一隅各府州縣從無籌議非等普及辦法獨立總攬機關不足以利推行見飭於省城設浙江全省警務處選派通悉法政警務人員分科辦事業於上年開辦將舊有之警察總局改爲省城巡警總局專辦省城巡警事宜以爲各府州縣模範仍受警務處節制一全省保甲事宜均歸警務處主持以昭畫一浙省各屬如瓶窰鎮黃湖鎮餘東關大嵐山等四處保甲向歸臬司管理而甯波府屬南田保甲則向歸藩司委員前往辦理又省城水旱各城門委員亦係臬司派員辦法紛歧查各處保甲及城門稽查均在警務範圍以內見將全省保甲及稽查各事宜統歸警務處管轄應派之員

1. 續修四庫全書 史部 政書類 2 反E句

亦由該處主持一附設警務研究所浙省原有巡警學堂招考學生百餘人於光緒三十四年畢業即行停辦畢業學生投閒置散殊為可惜見飭於警務處附設警務研究所令從前畢業生先赴省城各巡警局區實地練習兩個月後調入該所補習一切課程於本年正月間一律派赴各府廳州縣充當巡官教習見在續招畢業學生入所研究以備將來續派一畫分各府廳州縣區域分期舉辦各屬創設巡警若令城鄉同時舉辦籌款為難且巡警職務非身受教育難保不藉端擾民見擬分期辦法先就各府廳州縣城廂辦起為第一期考選合格巡警入教練所一面量予教練一面實地練習俟略有程度再行舉辦鎮埠巡警為第二期其第二期考選之巡警仍調入教練所即以第一期已受教育之巡警派分各鎮埠作為模範其第三期四鄉巡警辦法以此類推一遴選公正紳士充當巡董協籌經費籌辦警務人材既虛缺乏經費又苦支絀各府廳州縣創辦警務係為地方保持治安起見自應就地籌款見飭各屬除巡官教習由警務處札派警務畢業人員充當外即以各府廳州縣官為該管巡警總辦並飭公舉紳士充當巡董協助就地籌款各事宜此外關於水上警察如內河水路巡警沿海水路巡警自應陸續舉辦浙省內地河流交通極為繁盛船舶往來絡繹不絕沿海島嶼計八百餘處海綫綿延千有餘里水上警察誠不容緩見在內河水路巡警已飭分浙西浙東為兩路先行擬定規章表式札發各屬於該管境內可設區域據實填報派員往查其沿海水路巡警擬俟內河巡警辦有端緒續行擴充

業較部定簡易科已屬加增其學程稍優其人材數用所有簡易一科自可暫不附設湖北舉辦警政始自光緒二十八年其時新募警勇率多不諳警章因先派警務學生赴日本學習警察二十九年回國三十年復選派文武員弁四十七員赴日本入警視廳學習一年旋改入警察學校三十三年畢業回國又於三十二年春考選候補正佐各官三十一員入省城警察學堂學習定兩年畢業至三十年冬省城警察學堂甲乙丙丁四班一律畢業計先後派赴日本畢業回國者凡兩次本省官班及學生畢業者凡兩次均經分別錄用因議擴充辦法先就畢業各生中選赴各屬以為先導上年派荆州襄陽兩府學生本年續派漢陽德安陸宜昌施南鄖陽各府及荊門州鶴峯廳各處學生並補派武昌黃州兩府學生計大縣二人中小縣一人通商大埠及華洋雜處之區如荆州之沙市光化之老河口襄陽之樊城宜昌府等處加派五六人三四人不等見已一律派竣據各廳州縣稟告已具規模者計五十一廳州縣其設立巡警在一百名以上者六縣八十名以上者四縣六十名以上者三縣五十名以上者三縣四十名以上者四縣三十名以上者五縣二十名以上者十一縣十名以上者五縣其餘十八廳縣甫經籌設尚未具報見擬辦法總以派遣學生為推行警政之基礎各屬需用警員以此應辦巡警教練所需用教員亦以此稟報到齊再行奏陳

又陝西巡撫恩壽奏改設高等巡警學堂專辦完全一科略稱陝省巡警學堂簡易一科業經開辦三年畢業六次計得學生六百餘人見遵章將學堂改為高等毋須再添簡易新班自應專辦完全一科造就優級學員以備將來任事其課程擬於警察法律各科學外酌加國文以培根柢學生額數本年先取一百名作為甲班嗣後每年續取五十名分為乙丙等班甲班畢業再招丁班遞相推植三年以後每年均有畢業人員可用矣

又山西巡撫賈奏遵章改設高等巡警學堂略稱晉省自前護撫臣吳廷斌奏設警務學堂先後考取官學生兵學生共一百四十名分為初等中等高等三科以次遞升合計三年畢業嗣因需材孔亟若候遞升錄用深恐緩不濟急

其時初等已屆畢業因擇其程度較優者派赴各屬試辦警務復變通章程將初等改爲速成科六箇月畢業自三十年起至三十三年止速成科畢業六次適高等亦屆畢業計兩科共得三百餘名均經考驗給憑派充省內外警務長及巡官區官等項以資實驗並將高等各生繕造成績表冊奏咨給予出身旋因本省警員足敷分布上年春閒訂章續辦裁去速成科專辦高等額設學生一百名酌定課程門目以三年六學期爲畢業開辦數月適奉部頒章程即遵改高等巡警學堂惟高等學生照章應以本省舉貢生員及中等以上畢業各生考選晉省風氣初開此項合格學生難招足數而在堂各生肄業已及半載若散去另招未免可惜即就原招各生令照部定課目改習並擇其程度稍優者六十名作爲甲班自上年暑假後起至年底止爲第一學期其稍次者四十名作爲乙班自本年正月起至暑假前止爲第二學期均以屆滿三年爲畢業期限其高等附設簡易一科本爲警官需人起見晉省警員既暫敷分派自毋庸再設此科至府廳州縣應設巡警教練所業經通飭各屬如有設立傳習所及警務學堂者均改爲教練所其尙未設立者均令遵照定章就地籌辦以期畫一

又兩江總督端方奏江甯省城改設高等巡警學堂仍附設教練所略稱江甯省城前於光緒三十一年開辦巡警設有警察學堂在堂官兵各生早分兩班畢業嗣因各區巡警教育未能普及程度不免參差飭將警察學堂改爲江南巡警教練所督同總監各員酌擬章程學生額設二百四十名常年經費需用銀二萬二百餘兩奏明在案見照部章甯省應設高等巡警學堂自應即就巡警教練所酌量改設庶幾因仍舊規可以剋期成立且與部臣原奏已有者按章更定之意相合見擬立江南高等巡警學堂暫設學額五十名招生肄業仍於該堂附設巡警教練所將原定學生額數減爲一百五十名並參照部章妥擬各項章程遴員充當該堂監督其餘提調學監舍監教習各員均擇深通警學之人分任其事計學堂教練所兩項需用常年經費均在奏准巡警教練所經費項下動支復經切實核減暫定額撥各款每年實需銀一萬六千六百兩

有奇較前定二萬二百餘兩之數可節省三千餘兩由財政局照數撥用按年核實報銷至省外府廳州縣均應遵設教練所已通飭各屬遵照辦理又駐藏辦事大臣聯豫幫辦大臣溫宗堯奏江孜亞東既開商埠亟設巡警庶英國衛隊可期如約撤退免貽口實但漢人無多暫用番民爲便計常年費約二萬餘兩請飭部籌撥以便持久

又 諭郵傳部奏統籌添設護路巡警一片著該部安定章程咨商有路各省切實辦理

又陝西巡撫恩壽奏遵設警生教練所略稱陝省山河四塞風氣之開後於東南各省在各屬繁庶之區士民拘於成見招考尙多觀望其北山一帶戶口凋零財力困乏欲足額數誠有未能當經通飭迭催與其拘守定章延時廢事曷若暫予通變徐圖擴充因將名額建築兩項酌量變通其名額計分三等上缺六十名中缺五十名下缺三十名各量地方財力以定學生名額照章一年畢業合計全省一年以後警生畢業當不下二三千名似已略敷分佈並令陸續添招新班接替教練至於堂舍暫不建造各就本地社廟公所室宇閱啟者修改借用以期漸臻完備

又湖南巡撫岑春煇奏遵辦高等巡警學堂見辦警政情形一省垣巡警之成立二外屬巡警之狀況三水面巡警之組織

又廣西巡撫張鳴岐奏籌辦巡警情形略稱桂省巡警擬從籌款培才入手惟查照部章有應變通者三事一部章於學堂教授外國文一科指定英文或東文見擬改爲法文二部章高等巡警學堂學生以本省舉貢生員及曾在中學堂以上畢業者考選見擬凡有與中學程度相當無論本省外省均許考選三部章每廳州縣應設一巡警教練所每所名額至少百人見擬區爲五等或自設一所或合數屬共設一所計全省共設十四處

又閩浙總督松壽奏改設高等巡警學堂及附設教練所

又湖南巡撫岑春煇奏省城巡警教練所業經遵章改辦惟各廳州縣地方衝僻不同經費盈絀不一不得不量予變通暫定分等教練之法一等額定百名

以上二等七十名三等五十名四等三十名每屬各設一所一面認真教練一而實力推廣務期名額程級悉能適合定章

又浙江巡撫增韞奏籌辦巡警事宜略稱浙江省自上年冬間設立警務處派員分至各州縣調查今夏全省城關巡警俱已辦齊商埠市鎮人煙稠密之區亦成立過半省城各屬模範辦理最早成效可觀浙西東各屬雖名額多寡不同截至本年六月俱已成立至各屬之巡警教練所編定違警律略釋警察實務等書頒行傳習不准以未經教練之游勇更夫羈雜充數

又湖廣總督陳夔龍奏湖北水陸巡緝隊一營係沿江督捕下游巡緝兩營奏明合併改編本年准陸軍部咨該營與陸軍及巡防營章制未合偵探線勇等名目皆係地方警察事宜應否按照警察章程編改等因查該營本為巡緝而設偵察最關緊要今以舊有奏設之巡緝隊改編充作巡警之用以水隊改為水面警察陸隊改隸武昌巡警駐探及行緝線勇兩隊改為偵探隊各就原有名額餉數開支於款目既無出入與部議亦屬相符

又御史麥秩嚴奏各省開辦警察以來惟天津武昌兩屬頗著成效其餘大都敷衍塞責藉口款絀然廣東房捐等項歲充警費七十餘萬而命盜等案層見疊出一省如此他省可知是非款絀之政能籌款而不能用人之弊也今各省主持警務如民政司巡警道等官非明定選任章程不足以得人才請飭民政部援照法學兩部成案切實保薦並將民政司巡警道選任章程妥速編定奏准頒行如各省果有歷辦警務成績卓著之員准由該督撫送部考驗毋庸由督撫奏保以示統一

又江西巡撫馮汝駉奏籌辦贛省巡警略稱將省城內外畫為六大段分正副十六區析為一百二十七崗以會辦警務得力之正佐各員充任區官統計巡官長警司書生消防清道夫役共一千三百三十餘員名薪餉仍照原定之數巡警以保安地方為專責而彈壓緝捕亦屬當務之急亟應加操練見經按月抽調教以陸軍新操並將原設之巡警學堂照部章釐訂課程改為巡警教練所分班招考俾資造就省城道路溝渠年久失修於交通衛生均有障礙派

員督匠疏通修治並設立施醫院附種牛痘以惠窮黎九江為通商口岸華洋雜處最關緊要見於府城內援照安徽蕪湖成案改設巡警公所派員辦理浮梁縣屬之景德鎮新建縣屬之吳城鎮清江縣屬之樟樹鎮鉛山縣屬之河口鎮均屬工商薈萃之區已一律遴委諳習警務人員為專辦並加派警察畢業學生相助為理其餘各廳州縣巡警俱已稟報成立巡警教練所據報設立者計二十四屬見仍檄飭已設之處加意整頓未設之處勒限籌辦

又度支部奏酌撥民政部整頓京城警務經費略稱本年民政部奏交豫算出入表內計入款一百三十八萬一千餘兩出款一百六十八萬九千餘兩綜計不敷三十萬餘兩臣部以度支奇絀籌補為難當經咨商該部將支用各款核實樽節以舒財力今該部既議整頓警務則原有入款自屬不敷京師警政關係治安不得不於萬分竭蹶之中量為籌措等再三商酌此項常年經費必須指有的款接濟查膠海關洋稅項下每年原撥民政部經費銀二十萬兩近來該關所收稅項於支解各款外稍有存餘擬再於四成洋稅項下撥銀十萬兩六成洋稅項下撥銀十萬兩每年共計二十萬兩作為民政部整頓京城警務常年經費自明年起按年籌解以資應用雖較該部所請數目尚屬不敷惟庫儲艱窘此外實無從設法懇飭該部即就此款樽節動用量加擴充依議行

又民政部奏准京師高等巡警學堂學生畢業請將最優等胡宗沂等三十七員以七品警官記名優等寶賢等三十員八品警官記名中等文樸等七員九品警官記名

二年河南巡撫吳重熹奏陳整理豫省巡警略稱遵章改設警務公所分設總務行政司法衛生四科遴派熟諳警務人員分司職掌以為全省警政總機關所有省政巡警區畫向分五區其編制餉章重加釐訂計五區長警共六百二十名以區官巡官等為之督率仍受成於公所此外消防隊探訪隊清理道路取締營業講求衛生調查戶口均已次第設施至鐵路巡警見歸巡警道統轄裁去統帶幫帶各員改總巡官總稽查各一員並慎選委員將駐守協緝事宜

竭力整頓至各屬巡警據報一律辦齊仍由巡警道不時委查期臻完備至省城巡警學堂見由巡警道參照奏定章程悉心更訂惟省城及鐵路巡警多係舊時營勇屢經淘汰仍須設所教練茲議就巡警學堂內設教練所一處招選學生以備將來補充及抽換長警之用

又東三省總督錫良等奏安奉鐵路沿綫一帶縣巨六百餘里尙無相當警察業經督飭交涉使悉心籌議由省城警局挑選巡警三百八十九名設立總局另設分局四處派出所三十處於去年十二月一律成立所需經費應請作正開銷

又吉林巡撫陳昭常奏吉省辦理警務情形略稱吉林舉辦警務實較各省爲難全境七十萬方里幅員遼廓往往百數十里曠無居民即有一二繁盛村屯亦復零星散漫安能互相保衛其難一吉省開闢較晚設治未久墾戶商民或設聯會以資守望立法未善然日久弊生不免私作威福自改練鄉巡舊習稍除而公舉巡長仍多舊日兵練會中紳董未盡確守規章且或時滋擾累其難二吉省林密管深易滋伏莽且邊外股匪時有流竄陸軍防隊分布難周充當警兵者必須素嫻技擊方勝搜捕之任既具有軍隊性質即不免越警察範圍其難三困難如此非就地方情勢通盤籌畫無以定次第設備之方一實行考察以資整頓各屬警務皆設局而以地方官爲監督於去歲飭試署民政司謝汝欽親赴各屬考察獎其已能勉其未至並將劣迹顯著之員弁長警分別斥革此後仍由該司擇要往查務令從事者咸知盡職冀有成績可收一釐訂通則以歸畫一各屬巡警本就地方情形先後舉辦或僅安簡陋或稍事鋪張參差不齊自爲風氣飭司編定規則以地方之繁簡民力之舒耗分爲上中下三等員額多寡薪水厚薄各依等次爲衡其餘一切職權章制亦皆勒爲通章俾資遵守一注重教練以培人才吉省原有巡警學堂畢業各生分派各警局效用嗣於省城附設傳習所挑集各警兵分班傳習旋奉部文將該堂改爲高等巡警學堂並於堂內附設教練所節經遵辦在案惟全省二十二屬需才既衆如僅由省會教練所分委任使未免緩不濟急爰遵部章飭

屬各設教練所一處以本地人民按格考選入所肄業再令實地練習俟盡義務一年給發文憑務使人具專門不至用非所學一組織商埠巡警以保主權警察權限原爲我所固有前次督辦邊務即經舉辦邊務巡警見在長春商埠業已創辦吉長線路行將開工省城商埠一切正在籌辦事關交涉尤當注意已飭民政部交涉司西路道妥爲組織務使權限分明藉保治安而免侵越一編練豫備巡警以資補助吉省地處邊隅盜風素熾巡警職在防衛實兼捕盜重以各鄉村屯戶口星稀距離遠僅恃額定巡警仍恐保衛難周惟有寓警於農之意於鄉巡各區內另編豫備巡警平時就各村壯丁挑選編冊分班訓練聞警則聚而捕盜無事則散而歸農體驗民情僉以爲便其餘衛生消防山林水道各項警察亦均照章設備以期日臻完善至各屬見設警局之數計城局二十三處鄉局二十四處分區二百四十五處分所三百十四處均分設於舊有官治其新設之缺見始分別派員試署設治自應飭令逐漸增設以求周密警政爲內治根本尤爲吉省根本中之根本無論如何爲難自當悉心籌辦力求推廣

又陝西巡撫恩壽奏籌辦陝西全省警務情形略稱就省城設總署一分署七分區二十有一崗位一百六十有六以警學畢業人員配置警官以教練速成學生選充營弁並於巡警學堂附設豫備班隨時更換見在長警六百餘名大半仍受教育各署仍分班訓練按期會操此外設馬巡隊以資偵緝設清道夫以重衛生設消防隊以禦火災設菜市場以興市集其考覈官警違警及工商營業各章程均遵照部章參酌情勢先事覈定省外各屬警務頻年次第興辦其始多以團練改充或竟以差役兼任此輩既不知巡警爲何事甚且轉以擾民節經飭令改良並購發警察職守事宜問答等書分飭講習規章必期熟悉保衛乃可責成迨上年開辦教練所即責令休息之暇隨班聽講並將省城巡警簡易科畢業生發往各屬與地方官相助爲理第以地方腴瘠不同故辦理後先各異附郡首邑及衝要之區較爲完善其餘各廳州縣亦粗有規模惟北山地太偏僻一城煙戶或僅數十人口或僅百餘故雖嚴催通飭仍未能一律

改觀惟巡警爲專門之學非不學者可以充數矧明年推行鄉鎮尤當有養成自治機關省城高等巡警學堂學額一百名中學畢業生尙少其學生係就舉貢廩附擇其學有根柢者取送入堂教授管理悉遵部章各屬應設之教練所飭令分辦酌量地方情形變通學額業經奏准在案查陝省九十一廳州縣見報成立者已有九十處統計學生二千五百餘名均經頒發課本切實訓練以

後籌辦鄉鎮巡警不患無人

又江蘇巡撫寶棻奏籌定警務員薪經費略稱豫備章程二冊計分四章一總綱二名額三職掌四經費其內務辦法公所自總辦以下擬設秘書官一員視察員四員總查官一員巡查四員繙譯收發各一員分總務行政司法衛生四科每科設科長副科長各一員科員三四員不等指定名稱事項各專責成其外務辦法擬將蘇省城廂分爲八路每路畫分四區路設區長一員區設巡官一員弁記各一名巡長五名巡警五十名伙夫五名清道夫四名并設河巡騎巡消防偵捕四隊以補崗巡之不足每隊除隊官弁記外以事務繁簡酌定人數多寡綜計薪餉加豫算活支等款每月共需洋二萬八千一百餘元蘇省巡警並未籌有專款全賴司局零星湊撥每月僅得經費洋一萬六千三百元尙有巡警學堂暨城門守衛員弁薪資約計洋七百餘元取給於此按諸豫備章程不敷甚鉅見在因事制宜復就員薪名額兩項之中酌量節減按照進款數目支配統計額支活支兩項每月共約需洋一萬五千九百餘元定爲見行薪餉章程按之豫備章程僅河巡一隊暫從緩設其餘大綱仍屬備具一俟籌有的款即行擴充

又法部會奏詳訂檢察廳調度司法警察章程略稱司法警察爲補助司法之機關無論何等官廳但執行此項事務時即得稱爲司法警察而指揮調度之責則在檢察廳誠以檢察廳代表國家保護公益事務至爲繁賾職任至重是以此項章程就司法警察言之有職務上之規定就檢察廳言之有權限上之規定兩方並舉規畫宜周原章名稱稍嫌掛漏等正擬改定適上年憲政編查館奏定法院編制法清單內係稱爲檢察廳調度司法警察章程名義較爲

該括自應遵照改易以符名實查原章奏准奉行業屆兩年惟事屬草創於事實上未盡愜合此次修改大致特就原章體察地方之情形參酌各員之經驗斟酌損益以期可行其有爲原章所未備者補苴其罅漏有原章辦法窒礙者改絃而更張總期脈絡貫通化除畛域於司法得呼應靈便之機關於行政得相助爲理之效力計分八節都凡八十條繕單呈覽至營翼地方辦事章程專爲步軍統領而設自應仍照原章辦理其各省營汛有關於司法警察事務者均照此項章程辦理

又民政部奏准巡警道屬官任用章程略稱推行警政先在培養人材臣部上年奏擬各省巡警學堂章程即訂明此項畢業生准充各省巡警道屬官各地方警務長及各區區官按照另定任用章程辦理等語比年以來各省警政粗有規模各省巡警學堂學生計亦次第畢業所用任用辦法自非特定章程無以杜濫竽而昭詳慎謹就學科程度警官階級別爲兩種考驗分期舉行其在他項學堂畢業或會辦警務著有成績或有教練所畢業成績最優經派充巡長確有經驗者亦准分別與考計釐定爲十三條請飭下憲政編查館照章覆核奏請頒行

第一條本章程所稱巡警道屬官指左列各員而言一本道警務公所科長副科長及科員二各廳州縣警務長及各分區區官 第二條巡警道屬官以考試合格者分別奏咨補用 第三條巡警道屬官考試分爲二種如左一高等考試二區官考試 第四條有左列資格之一者得應高等考試一在高等巡警或法政法律學堂三年以上畢業得有文憑者二曾辦警務著有成績三年以上者其在京師法政大學或法政專門學堂畢業經學部考試給出身者得免其考試視與高等考試合格者同 第五條高等考試應行試驗科目如左一憲法綱要二大清遠警律三法學通論四警察學五奏定各種警察章程六地方自治章程及選舉章程七各國戶籍法大意八統計學前項第一至第四款爲主要科目應全行試驗第五至第八款爲揀擇科目得

由應試者任擇一二先期報明主要科目分數有不及格者餘科分數雖多不得錄取 第六條高等考試由巡警道主試詳請督撫派員監試並遴選深通中外法學教員爲襄校 第七條應高等考試合格者由巡警道按照成績及原有官階出身詳請督撫分別派署科長副科長或廳州縣警務長俟一年期滿再由巡警道出具切實考語詳請督撫奏補並將履歷咨行民政部存案若合格人員逾定額時由巡警道按照前項規定詳請督撫分別以科員或警務長記名俟有缺出再行派署 第八條科長副科長科員及警務長奏補後仍留原官原銜每屆三年由巡警道查驗該員辦事成績出具切實考語詳請督撫奏請分別升黜並咨行民政部存案其有辦事實在不能得力者由巡警道隨時詳請督撫撤換另補分別奏咨辦理 第九條有左列資格之一者得應區官考試一在高等巡警學堂附設簡易科或中學堂以上畢業得有文憑者二照各省巡警學堂章程第二十條規定經派充巡長在任一年以上者 第十條區官考試應行試驗科目如左一本國法制大意二大清遠警律三警察要旨 第十一條區官考試由巡警道率同各科長或派員會同警務長舉行之 第十二條區官考試合格者得由巡警道按照考試成績及原有官階出身分別派署區官滿一年後果係稱職再行補實均由巡警道詳請督撫辦理並將履歷咨送民政部存案若合格人員逾定額時應以區官記名俟缺出候傳區官補缺後仍留原官原銜每屆三年甄別一次其辦事實在不能得力者由巡警道隨時詳請督撫撤換 第十三條本章程以奏定頒行文到之日爲施行之期嗣後如有應行變通之處隨時酌量增改具奏其施行細則由巡警道酌訂詳請督撫核定咨部辦理

數較多接續開辦 又兩江總督張人駿奏改巡緝隊爲探訪隊略稱前督臣端方等奏請設立江南巡緝隊派委已革都司米占元爲統帶另派司令官一員以資督率 到任後因該營紀律不嚴兵長半多降匪時有滋擾情事即將統帶米占元撤換另行派員接帶嗣准陸軍部咨以巡緝隊既係專探匪蹤與巡防隊章程性質不同應否照民政部章程改爲探訪隊抑仍編爲巡防隊應察核地方情形照章改定等因查該隊原訂章程統帶之外復設司令官事權歧出餉分五級數目參差自須酌量裁汰茲照民政部章程參酌地方情形改爲探訪隊就原有隊伍去其桀驁汰其老弱共留官弁兵夫二百零八員名並裁去司令官名目歸江甯巡防統領統俾期整頓又金陵巡警水師舢板二十艘名爲巡警而分段駐紮防守居多亦飭裁去十船均自本年二月爲始照新章起支薪餉被裁弁兵發給恩餉兩月以示體恤以上兩項隊伍均與巡警性質相近擬請改歸民政部管轄期於名實相符

又陝甘總督長庚奏甘肅邊設高等巡警學堂並於學堂內附設城關巡警教練所其各廳州縣之應設教練所亦飭遵章籌辦至全省警政頭緒紛繁擬就總局改照警務公所辦法設總務司法行政衛生四科添造崗亭購置消防器具增設游民習藝所此外路政警務亦均妥籌辦理並將部頒章程警察要旨地方自治諸書暨各省見行警察之可資取法者一併排印給發

又河南巡撫寶棻奏省城巡警年內應添各費如擴充警額月餉及置備冬期服裝等項擬於漕折軍需項下如數撥充

三年 諭黑龍江巡撫周樹模電奏各屬經常豫備巡警統令一律防勦匪徒應用各款請作正開銷等語著該衙門知道

臣謹案警察亦新政之一端自光緒二十八年後 朝廷銳意變法擬裁五城司坊各署創立工巡局仿外洋巡警之制盡用警官警兵分段站崗以代兵役此警察所萌芽也嗣後大加充擴先改工巡局爲巡警部又立警察總局畫舊日五城地面分爲內外左右二十區每區設一警官均歸

警部統轄繼飭各省府縣一律做照京師設局招警並設巡警道以專責成又立警察學堂招考舉貢生員等學習以備委任又於刑律外另編警律四十五條以資引用外觀似覺整肅而核其實際仍不出舊法範圍也考外國巡警即吾國保甲遺意同以詰姦禁盜除暴安良爲主不過名目不同耳保甲始於周官歷代迭有變更法令周密我朝仍沿舊制郡縣均行保甲輔以巡役省會繁華之地增設巡兵巡捕京師設巡城御史五缺輔以五營禁兵法至善也無如相沿日久官吏奉行不力遂至弊端叢生並非立法不良今不察其致弊之由從根本上補救而一概剷除舊制盡用洋法平空添出許多衙署許多官缺許多名目而軍裝餉械衣服冠履等費專就京城論每歲增出四五百萬之多益加小民負擔亦胡爲者然果能衛民弭盜尙爲費不虛糜乃行已數年姦盜更甚於前京都 輦轂之下白晝公然搶奪外省可知於此見從古無不弊之法而在行法之人苟得其人古法亦可治今不得其人良法反爲秕政即警察一端而兵刑農商諸如此類昔宋臣李沆嘗論爲治之道第一在不用新進喜事更張之八善哉言乎可爲萬世龜鑑矣

皇朝續文獻通考卷一百二十一

職官考七 京文職

戶部

嘉慶四年以親王總理部務

又諭自古六卿分職各率其屬原未嘗有總理之名致啟專擅之漸見在所
以令親王總理戶部者因川省軍務將次告竣軍需銷算事務殷繁是以仍行
總理俟軍務奏銷事竣即不必總理戶部事務
是年停親王總理部務又裁滿洲郎中一人員外郎二人改設宗室郎中一人
員外郎二人

臣謹案戶部尚書始於唐夏殷司徒周地官大司徒卿也侍郎亦始於唐
分左右始於明地官小司徒中大夫司會中大夫也總督倉場侍郎亦始
於明秦漢治粟內史也 國朝順治八年以王貝勒管部九年即停至是
以軍務銷算事繁復有是 命未幾仍停所以重度支而防專擅者亦嚴
且慎矣

十一年以大學士兼理部務

光緒六年議准浙江司添設宗室主事一人又添設宗室筆帖式一人

二十四年 諭翰林院奏代遞庶吉士丁惟魯請將歲入歲出表頒行天下
摺戶部職掌度支近年經用浩繁左支右絀見在力行新政尤須寬籌經費以
備支用朕維古者家宰制國用量入為出以審府庫之盈虛近來泰西各國皆
有豫籌用度之法著戶部將每年出款入款分門別類列為一表按月刊報俾
天下咸曉然於國家出入之大計以期足用豐財蔚成康阜朕實有厚望焉

臣謹案治國猶家也盛時不撙節方其敝也即損之又損已無補於帑項
此惟統豫算決算一一剴心於平日而有以開其源繼毫之出入與天下
人以共見有不及者由 國家力任保護百姓足君孰不足卒無以易於
昔賢之言若以羅掘為開源以剋減為節流仰屋之歎亦何益也中國地
大物博劉晏謂如見地上錢流在司農自為之耳

二十八年 諭御史吳鴻甲奏請裁併三庫並陳銀庫積弊及庫吏需索解費
情形各摺片著戶部議奏尋管部大學士榮祿等議覆請將庫書庫丁悉數革
除銀庫郎中等缺裁撤歸部派員經理並將顏料緞疋兩庫一體裁併

倉場

咸豐元年 諭吏部等衙門奏遵議慎保倉員一摺各倉監督有整頓倉務之
責果能釐剔弊端著有成效自應優予升途以示鼓勵嗣後各監督期滿保奏
到部即照此次部議酌予升途該監督等既膺甄敘自當知感知奮益加勤勉
而各該衙門之堂官尤應慎選其人不可開奔競之風除貪婪枉法將原保堂
官從重懲處外至所議原保之上司於未經發覺之先協同訪聞參辦仍照免
議等語亦應候旨定奪不可為例

光緒二十八年倉場侍郎榮慶等奏竊 臣查舊例在京各倉或都統或副都統
各派員專任稽查與御史同至乾隆五十九年始將都統副都統查倉之例停
止道光年間銀庫虧案發覺將查庫御史裁撤各在案見在整頓京倉事求
其核實倉厥既經併歸漕運亦已改章米數無多稽查較易隨時由倉臣就近
責令監督各員遇事盡心自可漸除積習如有花戶人等仍前舞弊則監督責
無旁貸一經部臣倉臣與科道各員訪聞確實人人可以奏參較之以確查之
任專責之查倉御史一人者更為有益 臣等於本年業經奏請將 簡派抽查
漕糧御史二員撤回茲復將各處倉厥酌量歸併所有擬定裁撤之通州中西
兩倉城外儲濟本裕兩倉又擬暫不裁撤之城內北新海運兩倉及留為南漕
米棧之城外太平一倉目前既不儲米自應請 旨將各倉稽查御史撤回至
見擬留用之祿米南新富新興平舊太豐益等六倉 臣等體察情形亦無須專
派御史惟事關更改舊例可否將祿米等倉抽查御史一併撤回並准此後停
止 簡派

三十二年改戶部為度支部

度支部

三十二年度支部奏為釐定職掌事宜及員司各缺並擬添設承參略稱奉

鑄旨戶部著改爲度支部以財政處併入竊維度支之稱始於魏晉歷代沿革
閒與戶部迭爲主名然其職掌初未或改也 本朝沿明代之制以省分司於
廣東等十三司外增設江南一司爲十四司銅關鹽漕以及後來添設行省別
以司之事簡者兼領之此外如南北樞房俸餉處見審處并田科飯銀處減平
處捐納房司務廳督催所寶泉局錢法堂則例館計學館等因時設立多由各
司派員兼理平時循章辦事已屬艱於肆應庚子以後國債頓增整理之方實
稱繁要嗣又將三庫事宜統歸戶部管理近更設立銀行創置造幣總廠以及
辦理土藥統稅籌議畫一幣制經緯萬端其繁難十倍於曩昔又工部既經歸
併其所管之工關各項事務概由農工商部奏明移交戶部專管職掌既繁舊
時之以一清吏司領一布政司者揆之事勢殊難允愜自不能不因時變通求
爲執簡御繁之法謹擬添設承政廳左右丞各一員參議廳左右參議各一員
綜核部務每廳均酌設郎員以下各缺以資襄理所有各司擬從新釐定以事
名司今統十四司職掌及新增各項要政以類相從列爲十司分配繁簡各以
類附惟司減事增每司仍令設科分股各專責成舊有司務廳擬併督催所改
爲收發稽察處酌設員缺附於承政廳寶泉局向係兼差應請暫行照舊三庫
向設官缺六十員自改歸戶部專管將額缺全裁由戶部派員兼理數年以來
體察情形頗緩兩庫事務略簡仍可歸司辦理銀庫關繫既重職務極繁自應
量設專員以重職守原設捐納房擬改爲暫設核捐處仍派員兼理其南北樞
房俸餉處并田科督催所飯銀處減平處錢法堂等所有應辦各事既分別併
入廳司應與舊有十四司名目一併裁撤至應議員缺查戶部向設滿郎中十
九員員外郎三十九員主事二十二員筆帖式一百二十員漢郎中十四員員
外郎十四員主事十四員滿漢司務二員小京官無定額今擬承政參議兩廳
各設郎中三員員外郎四員主事三員十司每司郎中三員田賦軍餉兩司員
外郎各六員其餘八司每司各四員主事十司每司各三員金銀庫設郎中一
員員外郎四員主事二員收發稽察處設員外郎一員主事二員小京官原無
額缺應與筆帖式均請仍派各司處行走將司務二員裁撤作爲候補主事其

候補司務作爲七品小京官學習司務俟學習期滿作爲七品小京官由他衙
門司務裁缺簽分到部者亦請一律辦理計兩廳十司金銀庫收發稽察處共
郎中三十七員員外郎五十七員主事四十員比之舊有額缺計裁司務二缺
增設郎中四缺員外郎四缺主事四缺此外尙應酌調專科畢業學生以藝師
藝士分別等級奏補以期實效

謹擬職掌員缺章程恭呈 御覽

第一條 戶部綜理全國財政管理直省田賦關稅權課漕倉公債貨幣銀行
及會計度支一切事宜監督本部特設總分各局廠學堂並可隨時派員調
查各省財政 第二條 設左右丞各一員佐理財政及機密特別之件審定
全國通年出入款目實刑事項兼核奏咨稿件經理本部職員進退升轉註
册存案稽核各司人員辦事功過督理本部出入經費核定豫算決算統計
報告等項知照各司派員輪流監視堂印當月值宿赴內閣鈔件兼管收發
稽察處譯電所各事宜 第三條 設左右參議各一員佐擬本部則例及一
切章程草稿會同各司籌擬各項奏咨變通章程擬覆 交議特別事件奏
章審議各司重要事務 第四條 設十司其目如左一田賦司二漕倉司三
稅課司四筭權司五通阜司六庫藏司七廉俸司八軍餉司九制用司十會
計司 第五條 田賦司掌各省直省地丁正耗完欠奏銷新增地丁隨糧各捐
規復徵額差徭籌議墾務及清丈田畝改正地租升科定則並稽核內務府
八旗莊田地畝稽核賜復免科除役錢賦緩徵並稽核州縣交代各事宜
第六條 漕倉司掌各省直省漕糧漕折漕項等奏銷考成春秋撥册及臨時蠲
緩等款稽核京外各倉積儲支放及各省兵米穀數籌備賑撫各事宜 第
七條 稅課司掌稽核常洋各關收支各直省商貨統稅及當雜各稅籌計各
省新增稅項煙酒雜捐機器製造各貨稅發給各省田房稅契貨商牙帖及
一切印花考核進出口稅則發給關單執照考核官物質新法製造應否免
稅等項查核各關出入口貨稅收數比較各事宜 第八條 筭權司掌各省
鹽法稽核引票課釐租稅規羨雜款加價折價場課鹽課井課賦稅各項考

成奏銷春秋撥冊貢鹽京餉帑利飯銀紙硃各款盤查運庫道庫鹽屬各官交代更換總認辦引岸兼管茶引茶課羨截土藥統稅及籌議專賣各事宜 第九條通阜司掌稽核各省所有金銀銅鉛礦務雲貴等省銅鉛運務籌鑄金銀銅各種貨幣核議製造紙幣代造商家銀行行使憑票訂正總分銀行總分造幣廠各章程籌畫全國流通貨幣辦法調查全國需用貨幣數目稽核銀行造幣廠印刷造紙等廠局報告核計各省購買銅鉛各事宜 第十條庫藏司掌稽核國庫出入款項各直省報解京餉各項經費收放顏緞兩庫物料核定折價核議蘇杭兩省織造奏銷盤查銀緞顏三庫稽核各省司道庫儲新舊案減平銀冊兼管本部飯銀出入各事宜 第十一條廉俸司掌稽核京外王公百官廉俸各處駐防官兵半俸半餉養贍紅白事賞及各衙門經費事宜 第十二條軍餉司掌稽核全國海陸各軍長江水師在京各旗及各處駐防各省綠營官設營兵餉項並各省報解協餉各事宜 第十三條制用司掌籌撥京協各餉稽核各項工程領款及一切例支雜支衙庫事宜並各處河工海塘歲修款項暨路礦郵電本利福建船廠經費報銷及一切官有財產出入各事宜 第十四條會計司掌綜核全國歲入歲出款目編列豫算決算表式彙纂各部各省財政統計頒布各項簿計法式核定各項特別經費特別報銷籌計頒布國家公債核算賠還洋款核辦各省春秋冬撥冊各事宜 第十五條收發稽核處掌收發京外各項公文函件經理本部公置什物及一切雜項事務並督催各司已未辦結文件查核銷號各事宜 第十六條金銀庫收掌全國金銀銅錠條及各種錢幣並出納事項收藏紙幣及銷燬事宜籌備國家銀行本金存置紙幣兌換本金收掌直省商家銀行請發紙幣之押金各事宜 第十七條寶泉局掌鼓鑄制錢收發銅鉛各事宜 第十八條暫設核捐處掌核辦各項捐輸請獎各事宜 第十九條新辦各項京師總銀行天津上海漢口山東奉天營口庫倫張家口各分行其餘各處應設分行見擬次第籌辦天津造幣總廠各省造幣各分廠土藥統稅總局各省土藥統稅各分局計學館 第二十條見

擬籌辦各事印刷局造紙廠財政研究所財政調查處編譯所財政學堂三十三年度支部奏准設總銀行造幣廠各設總監督一員秩視左右丞作為實缺

三十四年度支部奏裁缺分部人員與本部資深人員一體較資補用

清理財政處

又憲政編查館奏核議度支部奏遵擬清理財政章程略稱臣等謹就該部擬訂章程詳加覆核所請由部設清理財政處各省設清理財政局並由部派監理二員充任其事皆為實行清理起見其調事方法以列款調查為入手以分年綜核為程功以截清舊案為刪除轉轄之端以酌定公費為杜絕瞻顧之路以畫分國家地方經費為清理之要領以編定豫算決算清冊為清理之歸宿提綱扼要條理井然切實周詳均可照辦惟查所派各省清理財政局監理二員與該局總會辦司道辦事權限尚未明定當此財政久困之後人心積玩之餘臣等竊以為課功不憚其嚴而要勿掣辦事之肘防弊不嫌其密而要勿失任事之心所有各省清理財政局事宜自應責成司道切實籌辦部中所派監理人員祇任稽察督催而主持綜攬所有職任均照該部原章所定辦理庶使職掌分明以免諉卸抵牾之弊况部臣原奏本已申明此舉不為搜括之謀更無吹求之念既往之弊不加追究查出之款仍可存留且且之言原堪共信部臣既示以誠真疆臣更何所疑慮從此公忠共矢內外一心勿貳勿猜協同辦理財政清明庶幾可望

又諭前據憲政編查館奏議覆度支部奏清理財政章程當以財政關係重大不厭求詳仍飭度支部妥酌具奏茲據度支部奏稱該館擬覆章程增益條文益加周密妥善可行等語方今財政艱難內外交困必以廓清積弊確定豫算為先全賴部臣疆臣和衷共濟各飭所屬共矢公忠按照所擬章程實力奉行認真辦理

宣統元年度支部奏定清理財政處章程

第一章 總則 第一條遵照奏定清理財政章程第三條所定職任專辦

清理財政事宜

第二章 設員分職 第二條設提調幫提調總司清理財政事宜設總辦幫辦分管清理財政事宜一切呈由堂官核奪 第三條分科一總務科掌稽核各項清理財政章程頒發調查條款彙錄各項說明書及各處豫算決算報告冊編成總冊二京畿科掌核辦在京各衙門各旗營順天府屬及直隸熱河察哈爾等處出入款項之按年按季報告及豫算決算報告三遼瀋科掌核辦奉天吉林黑龍江三省之報告四江贛科掌核辦江蘇安徽江西三省之報告五青豫科掌核辦山東河南兩省之報告六湘鄂科掌核辦湖南湖北兩省之報告七閩浙科掌核辦福建浙江兩省之報告八粵桂科掌核辦廣東廣西兩省之報告九秦晉科掌核辦陝西山西及庫倫綏遠歸化烏里雅蘇台科布多阿爾泰等處之報告十甘新科掌核辦甘肅新疆及伊犁塔爾巴哈台西甯等處之報告十一梁益科掌核辦四川雲南貴州及西藏等處之報告十二收掌科掌收發公文呈遞摺件管理案卷編輯目錄並經理雜務以上十二科各設總核一員坐辦行走無定員分理本科事務除收掌科外各科總核坐辦行走以通曉算法及熟悉所管省分財政情形者為合格其在總務科者以明曉財政學理者為合格 第四條設書記員無定員掌各種繕寫事件以善書為合格 第五條設諮議官無定員以明達財政學理及熟悉各省財政情形者遴選派充以便諮詢籌議 第六條遇有重要事件由提調會同幫提調總辦等邀集諮議官協同妥商辦理 第七條提調總辦幫辦各科總核應以每星期六為會議常期有要事則開臨時會議以領銜提調為議長由議長約訂二員為記錄提議事件以多數贊成為議決記錄員退擬節略以備核奪如遇領銜提調因事不能與議即以其次提調幫提調為議長 第八條分別各員差事酌給公費以資辦公提調幫提調總辦幫辦諮議官原係有公費者概不再支其各科總核坐辦行走及書記員如係原有公費人員兼充者照章減半支給

第三章 職務及權限 第九條應辦事項以奏定清理財政第三條所定

職任為範圍凡不在範圍內者仍由各司辦理大要如左一凡關係清理財政一切新章均由清理財政處核訂二在京各衙門及各省清理財政局造送光緒三十四年出入款項報告冊暨宣統元年以後出入款項按季報告冊及說明書均由本處核辦三自宣統二年起京外各處造送次年豫算報告冊又自宣統四年起京外各處造送上年決算報告冊均由本處會同核辦至奏定章程第七條所稱自光緒三十四年至宣統二年年底止各省出入款項見行案報銷冊應由各司辦理冊到時即行移知本處按照所管各季報告冊彼此核對以免歧異各省清理財政局未成立各局報告冊未送到以前所有光緒三十四年見行案報銷冊業已到部者由各司先行核辦仍於核覆後知照本處備案 第十條各該司應於五日內聲覆如有款項較多應詳細核算者於十日內聲覆其必須酌展期限者商明本處酌辦仍不得逾二十日本處查核各司事件亦同

第四章 附則 第十一條開辦之初事務尙簡應暫行先設總務收掌二科總核各一員總務科坐辦四員收掌科坐辦二員行走無定員書記員六員其京畿等科均俟事務加增時酌量派員至該科未經派員以前所有各處造送之報告冊均暫由總務科核辦 第十二條宣統五年試辦全國豫算案成立日再行酌量情形奏明裁改

又奏定各省清理財政局章程

第一章 總則 第一條各省清理財政局遵照奏定章程專管清理各該省財政事宜由度支部會同各省督撫督飭辦理 第二條有稽覈全省出入確數改良收支方法及調查該省財政一切沿革利弊之權

第二章 設員分職 第三條設總辦一員主持該局一切事宜以藩司或度支使充之會辦無定員協同總辦管理該局一切事宜以運司關鹽糧等道及見辦財政各局之候補道員充之 第四條設正副監理官各一員稽察督催該局一切應辦事宜由度支部遴員奏派以二年為任期任滿後亦可酌量留任監理官在任期內該省不得派充他項差事期滿後該省督撫

亦不奏留各衙門局所出入款項有造報不實而該局總辦等扶同欺飾者並該局有應行遵限造報事件而該總辦等任意遲延者准監理官逕稟度支部嚴辦度支部於各省財政遇有特別事件經飭監理官切實調查如各衙門局所有抗延欺飾者照清理財政章程第九條辦理 第五條分科一編輯科掌編訂各項收支章程及各項說明書並各項簿式票式冊式二審覈科掌稽覈各衙門局所送各項出入款項清冊及各項報告冊並彙編全省按年按季報告總冊全省豫算決算各報告冊三庶務科掌該局一切出入款項及公牘案卷各事宜以上三科各設科長一員科員無定員稟承總辦會辦監理官辦理該局一切事宜由該局遴派該省會習法政人員充之 第六條設書記專司繕寫由該局按事繁簡酌定名數以舉貢生員充之不得參用胥吏 第七條設議紳無定員以備諮詢由該局遴聘通曉該省財政情形之公正紳士充之 第八條會辦須有一員常川駐局監理官如由部派各省分銀行總辦造幣分廠會辦等人員兼充不能駐局者須常川到局其不駐局之總辦會辦應隨時到局會同駐局會辦及監理官考察辦事人員賢否勤惰暨商榷該省財政一切興革辦理議紳不必常川到局但須隨時聲覆諮詢事件並陳述該省財政一切事宜其於各衙門局所出入各款確知其中情弊者得隨時指實具報候局查覈 第九條總辦會辦監理官應每月會議數次每年開特別會議數次以總辦為議長會議時總辦會辦監理官均須與議但會辦各道之駐紮省外者可於特別會議時到局 第十條左列事項須經總辦會辦監理官議決後由總辦執行一議決該省財政一切應興應革事宜二覆核各衙門局所各項按月報告冊及按年出入款項清冊三審訂一切財政新章四審訂全省豫算決算報告總冊五核辦各議紳陳述具報各項事宜

辦理總以確實詳明為主 第十二條遵照章程第十一條自宣統元年起造送該省各季出入款項報告冊其清理財政未成立以前各衙門局所出入款項一律查明遵章造冊補報開辦時應由督撫督同該局總辦會辦及監理官親莅司道局庫盤查一次將存儲實數查核明確造冊報部 第十三條遵照章程第十條將該省財政沿革利弊編訂詳細說明書送部查核 第十四條遵照章程第十四條第二十三條造送全省豫算決算報告總冊依限到部前項預算報告冊應遵用度支部頒發冊式並須於每類附上年出入數目以為比較 第十五條遵照章程第四條第四項擬訂該省藩運道局各庫及旗庫收支章程並各項收入支出流水簿式收入支出總簿式收支對照表式及各庫收支票式丁漕鹽課關稅釐金各種雜稅征收票式前項收支章程及各項簿式票式由局擬訂後送部覆核咨由督撫頒行各項征收票除存該署及給納稅人收執外應以一聯繳局備查 第十六條調查該省各項征收慣例擬訂丁漕鹽課關稅釐金及其他雜稅等項改良征收章程前項征收章程應酌該省情形逐條詳加按語送部核定奏請頒行 第十七條照部頒豫算決算報告冊式分別編訂各項出入款項冊式呈由督撫發交各衙門局所按式填送每類附上年出入數目以為比較 第十八條遵照章程第二十七條調查各衙門局所公費等級表並附各項規費多寡表送部查覈

第四章 權限 第十九條遇有重大事件除隨時詳報該管督撫外得由總會辦會同監理官逕稟本部 第二十條各衙門局所對於清理財政局調查事件有抗延欺飾者按章程第九條辦理任意逾限者按章程第三十條第二項辦理 第二十一條各衙門局所造報出入款項到局如查有虛捏情弊確據由局將該管官員詳請督撫從嚴參處

第五章 獎敘及懲罰 第二十二條如辦理有成效該局總會辦由度支部會同督撫奏請優獎局中辦事各員亦得分別異常勞績酌保其部派監理官由度支部按照異常勞績奏請獎敘各局辦理成效以出入款項調查

明確造報事項無誤限期者爲斷應遵籌備憲政年限於宣統三年度支部彙查全國歲出入確數後將各該局辦事人員保獎一次再於宣統五年試辦全國豫算案成立後保獎一次第二十三條應行造報事件任意逾限者除遵照章程第三十條將總辦之藩司或度支使由部據實奏參外其會辦司道一併參處若監理官督催不力輕則撤換重則奏參第二十四條造送各項報告冊如有不實者查有確據由部將該局總會辦據實分別參處若監理官扶同弊混查實嚴參

第六章 經費 第二十五條辦公經費由該省司庫籌撥准其作正開銷第二十六條總會辦及議紳均不支薪水監理官薪水川資及出省調查費用由本部給發科長科員及書記生應給薪水由該局於辦事細則內自行酌定

第七章 附則 第二十七條辦事細則由該局擬訂呈請督撫核准施行報部備案

又 諭度支部奏酌擬清理財政處各項章程一摺清理財政爲豫備立憲第一要政各省監理官又爲清理財政第一關鍵所有正監理官自丞參以下開單請簡俾昭慎重其副監理官著卽由該部奏派餘依議

鹽政院

宣統元年 諭度支部奏陳明准浙鹽務大概情形一摺朕詳加披覽深悉各省鹽務糾葛紛紜疲敝日甚非統一事權修明法令無以提挈大綱維持全局著派貝子銜鎮國公載澤爲督辦鹽政大臣凡鹽務一切事宜統歸該督辦大臣管理以專責成其產鹽省分各督撫本有兼管鹽政之責均著授爲會辦鹽政大臣行鹽省分各督撫於地方疏銷緝私等事考核較近呼應亦靈均著兼會辦鹽政大臣銜該大臣務當和衷共濟通盤籌畫尤須體恤民艱一切事宜隨時奏明辦理

二年督辦鹽政處會同度支部奏定暫行章程

第一章 總則 第一條督辦鹽政大臣總理全國鹽務事宜 第二條凡

管轄產鹽省分之督撫均兼會辦鹽政大臣 第三條凡管轄行鹽省分之督撫均兼會辦鹽政大臣銜

第二章 劃分權限 第四條凡收發引張動撥款項核覆奏銷考成交代等事均由度支部辦理 第五條凡鹽務一切因革事宜由督辦鹽政大臣主持 第六條凡鹽務內用行政均由督辦主持 第七條凡鹽務與地方關係事件由督辦會商督撫辦理 第八條各督撫於該省改良鹽法得隨時咨商督辦核辦 第九條凡緝私各營統歸各督撫管轄仍由督辦節制

第三章 鹽官職務 第十條運司鹽道專管所轄區域內一切鹽務 第十一條司道及經管鹽務之各總局向應詳報鹽政衙門者應詳請督辦核辦 第十二條司道及各局應將一切利弊隨時考查及所辦成績按年編報告書詳送督辦查核 第十三條司道及各局應將該處產銷及課釐加價數目分別造冊按月詳送督辦查核 第十四條各場官應巡視產鹽各地按旬申報該管官查核 第十五條各場官及各關卡局所應將產銷及課釐加價數目按旬申報 第十六條未設鹽務專官省分由兼管地方官照本章程第十二條至十五條辦理 第十七條運司鹽道及各局應擬訂辦事章程詳候督辦批示遵辦

第四章 任用官吏 第十八條運司鹽道由督辦大臣遴選員豫保遇有缺出請 旨簡放各督撫得選員咨商督辦豫保如應行派員署理者會奏派署 第十九條運使鹽道須諳悉鹽務或辦有成效方爲合格 第二十條各關棧局所總辦由督辦大臣選諳悉鹽務人員奏咨派充各督撫得選員咨商督辦委派 第二十一條運司鹽道以下各項人員由該管司道將銜名履歷詳送督辦暨該省督撫擇尤豫保缺出由督辦奏咨酌補 第二十二條司道以下各官其任用資格須才優守潔者或辦事勤敏者

第五章 各官考成 第二十三條凡例定各項考成均照舊辦理由該管官詳報督辦 第二十四條凡運使鹽道年終密考由各督撫先期密咨督

辦司道及各官大計甄別由各督撫咨明督辦由督辦會銜具奏 第二十五條凡行鹽省分各州縣有關係鹽務事項每年終由運使鹽道分別功過詳報督辦辦理

第六章 各官交代 第二十六條運司鹽道以下凡有關鹽務人員遇有更替應照造詳細交代冊結兩分一由督辦大臣存案一由督撫查核

第七章 各項奏銷 第二十七條凡例定各項奏銷照舊辦理由司道詳由督辦加具印文送度支部查核

第八章 撥解款項 第二十八條各省鹽務款項由司道及經管各員詳請督辦咨部候撥外省不得擅動其先經奏咨核准有案者得詳請照舊撥解其向係捐助義舉等款應報明督辦查辦 第二十九條在外官公費未定以前所有鹽務規費仍由司道及各總局詳明督辦酌量辦理

第九章 附則 第三十條京師設立督辦鹽政處遣派人員分廳治事詳章另訂 第三十一條司道及各總局遇事得逕行詳稟督辦其向由司道核轉者照舊辦理 第三十二條司道應行報部事件詳由督辦核轉 第三十三條鹽務官制如有應改之處由督辦請 旨辦理 第三十四條本章程有應改之處由督辦請 旨辦理 第三十五條凡鹽法為本章程所未載仍照舊辦理

又奏定督辦鹽政處辦事章程

第一條督辦鹽政處按照章程管理全國鹽務事宜 第二條本處設提調一員幫提調二員秘書官一員參事官九員稟承督辦鹽政大臣辦理一切事宜 第三條前條所設各員如將來事務殷繁不敷任用時應酌量增派以資襄理 第四條本處分設八廳其職掌如左一鹽務總廳掌籌議改良鹽法審定各項章程撰擬機要文牘考核鹽務官吏並總核一切事宜一奉直一路東一兩淮一兩浙一閩粵一川滇一庶務廳掌鈐用關防收發文件及本處會計事宜並一切雜務 第五條鹽務總廳以提調幫提調兼領綜理廳務秘書官一員管理機要文牘參事官二員專理一切廳務坐辦二員

一二三等委員無定額分司一切廳務 第六條奉直以下各鹽務分廳以參事官一員兼領總理廳務坐辦一員一二三等委員無定額分司廳務 第七條本處附設譯電所一處專司譯電事宜繕寫房一處專司繕寫及圖表事宜均隸屬於庶務廳譯電所繕寫房各設書記官書記生無定額 第八條凡兼領各分廳之參事官均隸屬於鹽務總廳幫同辦理總廳事宜 第九條奉直以下各鹽務分廳遇有重要事件商同總廳辦理 第十條本處設諮議官無定額以熟悉財政通曉事體者選充籌議各項鹽政事宜 第十一條本處得隨時派員巡視各省鹽務調查利弊 第十二條本處設會議所一處遇有應行會議事件隨時由提調約集各員到所會議會議時以提調為議長幫提調秘書官參事官諮議官為會議員 第十三條本章程如有應行增訂之處隨時酌量修改奏明辦理

又督辦鹽政處會奏略稱查各省鹽政向係專差御史巡視嗣歸督撫兼管如長蘆兩淮兩浙福建河東山東等處辦理鹽務事件均仍鈐用巡鹽御史舊印其廣東四川雲南等處則係鈐用督撫關防辦法不一律見在奉 旨各省鹽務一切事宜統歸 督辦管理產鹽省分各督撫均 授為會辦鹽務大臣行鹽省分各督撫均 兼會辦鹽政大臣銜該督撫等遇有應辦鹽務事件自應一律鈐用督撫關防其直隸等省督撫所管巡鹽御史舊印應請 旨飭各督撫送部繳銷以符名實

又 諭錫良等電奏督辦鹽政大臣原奏章程於用人行政諸端不無窒礙請酌量變通等語鹽政關係重要必須內外相維著督辦鹽政大臣會商該督撫詳議具奏

又 諭督辦鹽政大臣載澤奏遵旨會商一摺朝廷慎重鹽政特派大臣督辦原令直接管理以一事權而資整頓惟因疏銷緝私關涉地方故命各督撫會同辦理前據錫良等電奏鹽政章程諸多窒礙當經諭令該大臣會商各督撫詳議具奏茲據覆陳會商各節朕詳加披覽該督等擬將用人行政悉歸會辦之督撫是與從前督撫兼管鹽政無異朝廷何貴有此特舉耶所有鹽務用人

行政一切事宜仍著照奏定章程辦理

又雲貴總督李經羲奏滇省鹽務改壞擬籌設鹽政公所派藩司鹽道爲總辦另委坐辦提調兩員

又督辦鹽政大臣會奏江西鹽法道移駐萍鄉專任分巡擬請將所管鹽法事宜歸併藩司兼管

又奏准將四川渝城鹽釐改由四川鹽茶道徵解以一事權而符名實

又奏請將雲南鹽提舉三缺鹽大使七缺一併變通補署不拘文法並將咨選之缺扣留外補

又奏整頓四川官運鹽務請裁撤滇黔計岸兩總局統歸鹽道管理即在署內設立鹽政公所作爲幕職分科治事俾專責成

又奏裁撤兩江駐宜加抽川鹽釐局併歸湖北川鹽總局辦理

三年內閣奏今日鹽務難於整理者有二一在各省自爲風氣不能祛官與商弊竇一由各省自保藩籬不能謀國與民公益是以銷數則彼此懸殊引地則動成爭執自非改定鹽政官制設立專員不可舊制設官皆注重於產運銷三項故長蘆山東兩淮兩浙兩廣各運司河東四川雲南各鹽道以司產運河南陝西甘肅湖北湖南兩江兩廣各鹽道以司岸銷皆受成於鹽政軍興以後各省多設督銷局官運局運司之權既分而鹽道尤成虛設故河南江西陝西各鹽道均經奏裁以藩司及巡警道兼之湖北湖南兩廣各鹽道則名存實去甘肅甯夏道平慶涇固化道原兼管鹽法而見在並不知有鹽法之職務即江南鹽巡道亦僅管江甯食岸銷數至各省督銷總辦多係一年瓜代賢者循例奉公不肖者侵蝕虧累外此官運各局及分銷以下各員司品流糶糶職事叢脞弊更不可究詰尤甚者湖南之川粵鹽捐湖北之川鹽釐金江西之粵鹽口捐河南之潞鹽東鹽加價均由行鹽省分派員設卡徵收而主管產運之運司鹽道及督銷局不能過問他如陝西甘肅所收花馬池等處鹽釐鹽捐加價或歸藩司或歸統捐局並無專管經理竊思國家徵稅同治以前不過一千一二百萬兩光緒季年增至二千八九百萬兩及試辦宣統三年豫算各省

鹽務收入乃增至四千餘萬兩與地丁錢糧相埒夫丁糧則有二十餘藩司督徵於上千數百州縣經徵於下而鹽務官乃散漫至此自非酌定官制特設京外鹽務專官統一事權明定責任不爲功臣等公同酌議擬請將督辦鹽政處改爲鹽政院設鹽政大臣一員管理全國鹽政統轄鹽務各官設鹽政丞以襄理釐網廳長以承宣政令參議參事以佐擬法制會事錄事以執行事務其在外省則於產鹽區域設正監督於行鹽區域設副監督各置屬官分司權政此京外鹽官編制之大略也全國鹽務必須提挈綱領以總其成分畫區域以專其任擬於鹽政院設總務廳及南鹽北鹽兩廳總務廳掌機要銓敘會計收發並籌擬鹽法編訂章程即以督辦鹽政處原設之鹽務總廳及庶務廳改設南鹽廳掌准浙閩粵鹽務即以原設之兩淮兩浙閩粵三廳改設北鹽廳掌奉直潞東鹽務川滇附之即以原設之奉直潞東川滇三廳改設其長蘆山東兩淮兩浙兩廣及新設之奉天改設之四川各運司均改爲正監督河東福建雲南各鹽道直轄場產一律改爲正監督淮南之鄂湘西皖四岸暨淮北各督銷局並湖北宜昌川鹽釐局均改爲副監督江南鹽巡道原管江甯食岸督銷而金陵下關又爲掣驗鄂湘西皖四岸鹽船之地勢頗爲扼要擬將該道改爲淮南江岸副監督管理江甯食岸督銷並大通以下揚子棧掣驗緝私事宜粵鹽由廣西至湖南貴州雲南等處地方遼闊擬將桂平梧道所管鹽法畫出另設廣西副監督管理廣西湖南等處粵鹽督銷緝私事宜滇黔官運川鹽事繁款鉅擬另設四川滇黔邊計副監督管理滇黔官運川鹽事宜陝甘之大小花馬池等處產地甚多銷路甚廣擬特設副監督以資管轄惟事關創舉應俟調查明確再行請設所有湖北武昌湖南長寶廣西桂平梧甘肅甯夏平慶涇固化各鹽法道均撤去鹽法字樣河南江西藩司陝西巡警道亦均無庸兼管鹽法其河東福建雲南兩江兩廣等鹽道原兼分巡兵備船廠稅關清軍水利事宜應由該省督撫奏明另歸實缺司道兼管以免牽混此又京外鹽官規定職掌及見時改設之情形也當此官制未頒等級未定京外鹽官擬暫以原品視事惟正副監督擬暫定爲正三品正四品均視京秩以重事權以原有之差缺酌設實

官以原有之薪俸勻定公費事權既一責任以專謹將擬訂鹽政官制繕單呈進經此次改訂後凡關於鹽政用人行政均屬鹽政大臣專責各督撫毋庸再兼會辦鹽政大臣及會辦鹽政大臣銜惟鹽務與地方關繫事件仍由各督撫飭屬辦理再此項官制內丞及廳長以次名稱地位及簡任奏任各官辦法俟各部官制通則頒布後如有歧異均改歸一律以重憲政得旨前因各省鹽務疲敝特派大臣督辦以資整頓惟事體重大頭緒紛繁非設立專官無以收挈領提綱之效著即將鹽政院官制頒布以鹽政處改為鹽政院全國鹽務均歸管理以一事權而專責成

又奏兩廣鹽政公所為加承新餉而設係官督商辦機關與尋常局所不同擬請暫行酌留將原設正副監督改為總辦幫辦以示區別其山西省北鹽局開拓廢岸區域遼闊淮南揚子總棧當內河外江之交為准鹽總匯之地擬請將原設該局該棧總辦暫仍其舊俟將來察看河東兩淮正監督能否兼顧再行歸併辦理至陝甘花馬池等處鹽務見既緩設監督所有徵收鹽釐加價等項事宜應由鹽政大臣委該省藩司或統捐局暫行兼辦仍專案報明鹽政大臣查核庶於變通辦法之中不失統一事權之意

又 命度支大臣載澤兼任鹽政院鹽政大臣

宣統二年度支部奏定造幣廠章程略稱造幣廠歸度支部管轄鑄造國幣設總廠於天津設分廠於武昌成都雲南廣州四處並暫設奉天分廠一處其分廠統歸總廠直轄總廠設正副監督各一員由度支部開單請 簡管理總分各廠一切事宜各分廠各設總辦一員幫辦一員總廠設坐辦一員副坐辦一員均由正副監督遴選委員呈部核准奏派秉承正副監督分理各該廠一切事宜總分各廠應設工務長一員由正副監督遴選委員呈部核准派充其餘藝師藝士及各員由各廠酌定員數呈部核定

又奏幣制調查局改為幣制局並擬分股辦事竊 臣部正在擬議詳細辦法復奉 諭盛宣懷著赴郵傳部右侍郎任並幫辦度支部幣制事宜欽此 臣宣懷

遵即赴部與 臣載澤等公同商酌若非特設一局居中以馭使邊疆內地皆若一堂幣廠銀行均歸一氣斷不能課其殿最實程功查 臣部原附設有幣制調查局擬請即將此局改為幣制局以資統一除由 臣等隨時到局督率籌辦外其幣制局中擬設提調一員幫提調二員以提挈全局事務其辦事各員擬分為四股一調查股以調查局未竟之事如東西各國見在辦法各省各埠官民交接商業習慣凡關於幣制事宜應如何參酌改良等事屬之一籌辦股以籌備改鑄新幣資本規畫全國應用新幣約數見設總分各廠每月能出各種新幣若干廣設分所收兌舊幣以及籌辦關於幣制一切之事並文牘等類屬之一稽核股以稽核造幣總分各廠收買生銀舊幣改鑄新幣撥給各處數目並研究其成色分量歸於一律以及總分各銀行收受各種新幣發行各處之情形所出紙幣準備金及各證券之成數所得利益之實數並考較部廠製造紙幣之辦法及分別稽核各項表冊等事屬之一編譯股以上三股所辦之事有應編譯發行各處並彙為成書者屬之每股各設總辦一員幫辦及委員各數員再設庶務處以司全局雜務其與各省各行事件仍由 臣部通阜司行文均用度支部印信以昭鄭重此後若須添派諮議各員再由 臣等隨時酌定

造紙廠

三年奏定造紙廠章程略稱造紙廠歸度支部管理專造各種有價證券及官用普通紙張設總辦一員幫辦一員坐辦一員設營運監造文案支應庶務五科分理一切事務科各分所營運科設採辦所核議所發行所轉運所監造科設清理所調劑所分晰所澆造所整理所管繕所器具所圖畫所文案科設函牘所繕譯所支應科設銀錢所質料所雜儲所統計所庶務科設稽查所守衛所診察所雜務所各科設科長一員由總幫辦等遴派各所視職務之繁簡責任之重輕分別派人管理或一所數員或一員數所由總幫辦等督同科長隨時斟酌選派

皇朝續文獻通考卷一百二十一

職官考八 京文職

禮部

臣謹案禮部尚書始於隋殷大宗周卷官大宗伯卿上宗大宗宗人也侍郎亦始於隋分左右始於明春官小宗伯中大夫少宗也會同四譯館郎中周象胥上士掌客上士也總理樂部大臣周大司樂中大夫樂師下大夫也神樂署署正周大胥中士署丞周小胥下士皆始置於國朝順治八年以王貝勒兼理禮部九年停之雍正元年復以王大臣管部相沿以迄於今矣禮部漢堂官不由科目者僅三人一吳恭定紹詩以諸生保舉歷巡撫晉大宗伯一葉侍郎存仁以監生洵升布政使司內用晉小宗伯一李大司馬世傑以吏員出身嘗為禮部侍郎近六七十無不由科甲中入惟張蔭桓以監生任侍郎言官參劾隨之即調去蓋禮部有修明典禮釐正文風之責故非儒臣不得濫竽其閒也

嘉慶四年裁滿洲員外郎主事各一人改設宗室員外郎主事各一人

光緒六年議准添設宗室筆帖式一人

二十四年以光祿寺歸併禮部十月仍復舊

三十年禮部奏遵旨議覆摺略稱奉 慈旨京外各項差缺有應裁汰歸併者著各部院堂官及各省將軍督撫破除情面認真釐剔等因欽此竊臣等恭查會典 國朝六部官制吏禮兵工均設四司而禮部舊定員額滿蒙漢共得四十餘缺較之三部特為減少上年復將所隸之四譯館監督並通館大使序班各員缺奏明陸續酌裁在案該行走司員平時即署浮沈久形滯設再將本有員數量加裁汰在公家無毫末裨益而日暮途遠旅進旅退益無以廣功名之路而策其奉公勤事之心臣等體察情形討論數四署內員缺委屬礙難議裁至於秩宗典禮局所名目亦無多然故事因仍物窮而變其有今昔異宜名實相素者審其輕重量其勞逸自應及時釐定期於通久臣等懷遵 聖訓謹就見在情形擬有可歸併者二事一督催所宜併於司務廳也查督催所承

辦三月奏 聞摺件向派掌關防二員事太清簡司務廳收發文移稽查衙署除掌印司務尚有兼差行走人員見擬每屆三月整齊四司文件數目改歸廳員辦理其督催所舊頒關防一顆向不開用應令繳銷存庫以省歧出一漢本房宜併於滿檔房也查漢本房承辦漢文題本額設堂主事筆帖式等員自改題為奏空名僅存滿檔房亦司承遞牌件摺奏為閣署筆帖式行走之處見擬即將漢本房改題事件歸併辦理以類附亦屬相宜臣等悉心商酌意見相同誠使量為變通庶幾名實相符而於事仍無窒礙其餘各司廳局均有分任職掌應即一如舊制

三十二年禮部奏准本部向設四司曰儀制曰祠祭曰精膳曰主客今既併入三寺自應酌量變通以鴻臚寺暨主客司併入儀制司以光祿寺併入精膳司更名曰光祿惟太常寺擬設專司名曰太常至祠祭司擬設專司以仍其舊分設四司而外仍設司務廳印鑄局統計本部擬添九缺擬改十缺擬裁三十二缺均不分滿漢

禮部官制 一尚書改為一人左右侍郎改為二人 一丞政廳設左右丞各一人秩正三品總核全署司員升轉兼理出入經費及各司重要事務參議廳設左右參議各一人秩正四品審議各司重要事務總核徵收地租草價等項一切公產兼理堂司俸銀俸米以主事四人分隸丞參兩處仍司掌守繕寫並督率筆帖式遞牌各事宜原有滿檔房即行裁撤分設四司 一儀制司掌恭辦 尊號 徽號 實錄 玉牒等項關於典禮一切事宜兼管舉貢考試優拔朝考出繼歸宗旌表等事向設滿郎中二缺漢郎中一缺滿員外郎三缺漢員外郎一缺滿主事一缺漢主事一缺今歸併鴻臚一寺主客一司擬添設員外郎一缺 一祠祭司掌恭辦 壇 廟等處 親行祭祀遺官典禮兼管頒朔耕桑配饗從祀賞卹祭諡封號陵寢醫官僧道等官升補各事宜向設滿郎中二缺漢郎中一缺滿員外郎三缺漢古員外郎一缺漢員外郎一缺滿主事一缺今仍其舊 一太常司掌恭辦 壇 廟親行禮節 齋宮應備各項盛京 三陵香蠟等項兼理神樂署各事宜

向設滿郎中一缺蒙古郎中一缺漢郎中一缺宗室員外郎一缺滿員外郎
 一缺滿主事一缺漢主事一缺今歸併太常寺全署事務添設郎中員外郎
 主事各一缺主客司原有郎中員外郎主事各員俱改為太常司郎中員外
 郎主事印信並應改鑄 一光祿司掌恭辦 壇 廟酒醴 陵寢奶酒
 奉先殿 壽皇殿應備各祭品及各項筵宴並賜祭品物各事宜向設滿郎
 中一缺漢郎中一缺滿員外郎二缺宗室主事一缺蒙古主事一缺漢主事
 一缺今歸併光祿寺事務添設郎中員外郎主事各一缺精膳司原有郎中
 員外郎主事各員俱改為光祿司郎中員外郎主事印信並應改鑄 一司
 務廳掌開用印信收發文件傳鈔摺件稽察閹署人役向派本部司員督理
 額設司務二人擬均仍舊 一鑄印局掌鑄造寶印及京外各文武印信關
 防圖記條記鈐記向設漢員外郎一缺主事職銜一人以筆帖式兼充漢大
 使一缺今職掌員缺擬均仍舊
 又奏准太常光祿鴻臚三寺員缺添改裁併

一光祿寺舊署改為禮部禮器庫存儲太常寺祭器光祿寺筵宴一切器具
 及兩寺簿冊等件並添鑄庫印設郎中一缺員外郎一缺總司庫儲及修理
 添製一應事宜設簿正四缺以光祿寺署正改充秩仍從六品分掌庫儲收
 發陳設各事宜設典簿四缺三缺以太常寺博士典簿改充秩仍正七品一
 缺以光祿寺典簿改充秩仍從七品典簿守庫儲簿冊 一設司庫二缺
 以太常光祿兩寺原有司庫承充秩仍正七品典守各庫並稽核庫使點驗
 庫兵 一太常寺原有寺丞二缺秩正六品一兼贊禮郎一兼讀祝官今改
 為六品贊禮官六品讀祝官 一禮部太常寺光祿寺鴻臚寺原設筆帖式
 共七十三缺今額設五十五缺分派四司廳庫各處其餘十八缺應行裁汰
 一太常寺原有贊禮郎讀祝官鴻臚寺原有鳴贊序班等官今併入禮部
 均應仍舊 一祠祭署神樂署各員兼隸樂部 壇 廟官 陵寢讀祝官
 贊禮郎亦各有專司其職掌員缺均仍其舊 一太常寺原設博士三缺典
 簿二缺共五缺今改禮器庫典簿三缺計裁二缺光祿寺原設署正八缺今

改禮器庫簿正四缺計裁四缺原設典簿二缺今改禮部庫典簿一缺計裁
 一缺太常寺原設司庫一缺光祿寺原設司庫二缺共三缺今改禮器庫二
 缺計裁一缺見改之六品贊禮官讀祝官簿正典簿及原有之贊禮郎讀祝
 官司庫鳴贊序班各員其一應升轉皆按原官辦理

是年秋改定官制議裁禮部刑部山西司郎中陳毅呈請保存略稱恭讀七月
 十四日 諭旨令王大臣更定官制公同編纂仰見 睿懷奮越與民更始之
 至意豈勝頌歎比聞編纂之制已有端倪凡屬駢枝悉予省併此在綜覈名實
 道固宜然惟聞禮部將併入卿寺更名為典禮院所掌僅太常光祿鴻臚三寺
 之事 竊惑焉而為之說者其詞甚辨一曰禮部有名無實不必虛留二曰各
 國無禮部我國何必獨設三曰禮部非以行政不必設部雖然法之目固盡美
 矣而法之意 則以為未盡善也伏思治平之術舍禮末由自積身成家積家
 成國迄積國以成天下是為大學絜矩之道是為東西各國憲法之精意即所
 謂禮也夫禮之設職肇自古初唐虞曰秩宗掌天事地事三禮周曰大宗
 伯掌吉凶軍賓嘉五禮五禮其目三禮其綱其意蓋貫注乎君臣民之間非若
 近今禮部之僅司儀文而已蓋禮部而至於僅司儀文是禮臣之淺失其官非
 禮官之本無所事也自禮官既失禮化漸衰後世遂無有能述禮部所職者惟
 宋朱子能知之故所撰儀禮經傳通解一書範圍乎國事民事者為最廣家有
 家禮鄉有鄉禮學有學禮邦國之際王朝之上莫不有禮通五禮之目而仍類
 別為五所以辨等差至嚴也所以畫權限至晰也準諸大學之絜矩其揆有若
 合符定官制於茲當熟悉古今中外情形取禮綱禮目之具於歷代禮書者列
 為司曹就舊部所有官屬而釐正之而擴充之而尊寵之汰彼冗闕任以鴻碩
 而專其責成斯於明詔尊崇秩序一言日日得見諸實行無往不可以仰合則
 謂禮部有名無實者非也自來君相之制治以損益為因革所貴相師其法之
 意不貴徒襲其法之形中外立國本不同即據外國而言美之官不能同於英
 日之官不能同於德今日而泥守舊法誠頑固矣然行新法而必泥乎日本亦
 不得謂之非頑固況日本職制其君民開設官等級之精密實隱合乎禮意所

異者彼未標禮以爲部耳本無禮部之職闕之原無傷既有禮部之名去之適爲害自中邦以禮立國禮亡斯國亦必隨之俱亡烏可以日本無禮專官併我立國本原而廢之以貽削足適履之誚也且禮於我國所以爲教猶各國之有宗教也其性質與學部相近而實不同雖各國之設官文教皆併爲一部然波斯新制文部之外實特立一教部我國既以禮教治天下且值新定官制之際自當視新變法者而損益之何必奉各國文教合部爲定章又何必援俄國文部及教院之舊規而改禮部以爲院也希臘突厥之戰起於兩教之競存人之保教至出重兵巨餉以相持而我之禮教乃因一少年新進之言遂弁髦而棄之以此效列邦恐轉爲列邦豪傑所笑則各國無禮部我不應獨設之非也子貢欲去告朔之餼羊孔子曰我愛其禮孟子見時臣泄沓其言曰上無禮下無學賊民興方今之時強鄰四環大局危岌革命之說騰於士林哥弟道友會匪之徒蔓延於長江流域所在不少巨豪大猾及流離失所之士吏然而不敢比附匪黨者固由刑法足以懾之實亦禮教所以漸漬而維繫之者深耳時勢至此度禮極矣夫 國家去一禮部不足惜竊恐海內以爲 朝廷輕禮相率以趨於亂是乃大可懼也周諸侯去禮籍遂有戰國之禍晉士大夫去禮法遂有五胡之禍唐藩臣脫略不守禮遂有五季之禍衣冠塗炭人禽混一言念及此可爲寒心 本刑曹原不應越職以言禮惟思 本朝法度刑律一原夫服制服制者禮也無禮則刑無所麗無刑則法無所施蓋立官之初諸部所司皆以勸事爲主獨禮刑二部所司以齊俗爲主俗爲政本齊俗即所以行政歐陽修之言曰三代而上朝聘射饗師田學校下至凡民之事一出乎禮是謂治出於一三代而下以簿書訟獄兵食爲急曰此爲政至於禮樂歲其名物時出而用之廟朝曰此爲禮是謂治出於二治出二斯政禮分治出一斯政禮合則持禮官非以行政之說者亦非也且禮之齊俗制人於未犯法以前刑之齊俗治人於既犯法之後春秋並職互相爲用意至深也今刑部擬更名法部且將躋於學部之上矣而禮部轉不能存揆夫更定官制之初心毋乃南轅而北其轍或者曰禮之爲部專掌朝儀等事更名曰院正援翰林都察之例以尊貴之非

輕禮也不知翰林乃儲材之地都察爲言責之職本無官守故不妨示異於各部若禮部則有官守者也更名爲院又所掌僅 朝儀等事臣民之禮不復過問將臣民無所綱紀而君禮亦同虛懸久而久之其閒散視今日太常諸寺無以異後且有人議裁之矣復何尊貴之有哉或又曰外使之禮掌於外部藩屬之禮掌於藩部學校之禮掌於學部人民交接之禮掌於內政部分部以專其責正以重禮而示其可尊其說似矣然而銀行關稅之輪納非商業乎何以不專屬商而仍繫之於財政輪船鐵路電綫之製造非工藝乎何以不專屬工而別標之曰交通財政交通不爲要政則已如其爲要政而後立斯部也則禮之不得爲部也果輕之非重之也且 聞之日之興也以變法埃及之亡也亦以變法德之強也以改政波蘭之覆也亦以改政法非不可變政非不可改要必審乎所當變所當改之故而後可與言變可與言改耳戶兵等部雖重猶衣食也可改變者也禮部則猶衣衣食之精神也不可改變者也約而言之禮部必不可改變而其曹屬則當依儀禮通解五目以更定之曰王禮司凡 萬壽 巡幸祠祭皆掌焉曰邦禮司凡外國觀聘藩部朝貢皆掌焉曰學禮司凡升學名籍相見儀節皆掌焉曰鄉禮司凡建專祠禁淫祠吉凶服飾及釋道回耶諸教皆掌焉曰家禮司凡民間宗族婚姻及節孝請 旌皆掌焉上二司專主國事下二司專主民事中一司兼主國民事事伴君得率臣民一範乎禮而莫之敢越而其部之位置則應與法部對立次於內外二部後而冠於各部前舉各部及上下閒凡關乎禮者令禮部得監察之如此雖隸總理而其尊其貴視不隸總理爲有加庶幾禮法益崇刑法益明四海皆知有 朝廷無敢懷犯上之意而宗社民業乃可以長治而久安矣

臣謹案當時奏請保存者尙有數人皆下編定官制大臣核議卒未裁撤至宣統三年改設典禮院夫禮不可廢我國略識文字者皆知之乃至季世凡外國所有者即以我國未有爲大辱外國所無者即以我國固有爲無謂黑白顛倒遂至於亡傷哉

三十三年禮部詳訂三寺員缺升階清單

一太常寺寺丞今改禮部六品讀祝官六品贊禮官查吏部品級考由本衙門博士典簿讀祝官贊禮郎司庫筆帖式等官揀選題補應升各部院員外郎今輪選停止該員別無升途擬請奏升本部員外郎 一光祿寺署正今改禮部禮器庫簿正查吏部品級考光祿寺署正由二品廕生除由太常寺博士典簿光祿寺署丞典簿鑿儀衛經歷布政司經歷理問州同等官升轉應升各部主事都察院都事同知等官今吏部奏定新章 特用及正途出身者以主事改用擬請正途出身人員奏升本部主事其非正途出身者如截取內用應否送吏部籤分各部補用 一太常寺博士典簿光祿寺典簿今均改為禮部禮器庫典簿查吏部品級考太常寺博士典簿光祿寺典簿均由三品廕生子爵廕生除由各衙門筆帖式翰林院典簿知縣直隸州州判等官升轉應升都察院都事光祿寺署正同知通判等官是太常寺博士典簿光祿寺典簿三項人員均有光祿寺署正升途擬請奏升本部禮器庫簿正 一裁缺光祿寺署丞查吏部品級考光祿寺署丞例升署正今裁缺署丞谷鎬呈請留部當差擬請以本部禮器庫簿正升補 一裁缺鴻臚寺主簿查吏部奏定新章鴻臚寺主簿以各部司務改用今裁缺主簿瑞連呈請留部當差擬請以本部司務改補 一九品漢鳴贊查吏部品級考應升鴻臚寺主簿又吏部奏定新章鴻臚寺主簿以各部司務改用今主簿缺裁本衙門別無升途擬請以本部司務升補 一禮器庫簿正四缺典簿四缺司庫二缺擬請照吏部奏定新章一律改為題缺由部揀員奏補以一缺按官階班次酌量才具擬定正陪以一缺分別資勞輪班序補至六品讀祝官六品贊禮官及讀祝官贊禮郎滿鳴贊序班等官應仍由部揀選奏補 一讀祝官贊禮郎滿鳴贊司庫序班品級班次均未更改前經奏准一應升轉皆照原官辦理應均仍舊

三十四年禮部奏定變通裁缺人員補缺章程並各項烏布變通辦法
宣統元年禮部奏准儀制司為典禮司各衙署之儀門改為宜門

禮學館

光緒三十三年禮部學部覆奏據岑春煊奏請開館分門編訂變政後士庶通行之禮以養成民德等語查邇來風會日新自由平等之說昌言無忌誠如該督所云方如橫流不可遏抑本擬遴選通才遵照會典通禮暨書儀家禮五禮通考等書斟酌損益釐訂朝野士庶通行之禮與該督所奏大致相同所請徵儒開館之處擬由禮部附設禮學館詳慎編纂至開館事宜容悉心籌議隨時具奏以昭慎重

謹擬禮學館章程恭呈 御覽

一本館欽奉 諭旨設立必須慎選僚屬得人而理擬遴派禮部官充當提調司提點館中一切事宜並採訪京外各官不拘資格惟以精於禮學夙著聞望者奏調到館充當總纂分纂其員數期於足敷編輯不豫定額此外又設總分校各員仍以禮部官任之 一本館專為修明禮教而設造端宏大應將全書凡例先行編出擬即奏調京外各官深通禮學者數員到署分門別類妥訂凡例以後仍應隨時修改以求斟酌盡善 一本館編輯宗旨一以 列聖欽定各書為主其歷代禮志以及唐宋元明 國朝諸儒所輯禮書旁及各衙門則例成案各省志乘風俗均應博考遐搜折衷一是庶幾近遵 王制遠亦不悖古義 一本館編輯之始必網羅古今萃衆說排比鉤稽以求至當至成書體裁則貴簡要期於易知易行 一本館擬採訪京外各省官紳有識解宏通熟精禮學者仿照學部商部之例奏派為修明禮制顧問官遇事咨詢期於至當 一本館在事人員除提調校對係禮部官屬本有廉俸外其餘各官亦不能多給薪水俟全書告成擇尤奏保酌予獎敘此時擬仿京師各學堂教習之例酌給薪水統計編纂校對官十餘員人數既少責成乃能專一年限有定款項不致虛糜 一本館總校分校均於開館後一年到差敬謹校對進呈 御覽毋得舛謬其繕寫全書人員擬屆時考取舉貢擇其文理優長字體端潔者在館當差將來照各館錄例給予議敘 一禮學館即在禮部附設原冀稽察易周兼可樽節經費以期核實

又民政部奏自來民俗之興衰實以禮教之隆替爲消長 高宗純皇帝令廷臣訂通禮一書頒行天下其時上自王公下至草野家喻戶曉幾於道一風同時移勢異精意浸微沿及至今標新領異中外紛歧往往人各異製家各異俗紛紜外謬歧之又歧實於風俗人心大有關係修明廢墜責在禮臣擬請 旨飭下禮部將通禮一書凡關民人通用之禮如冠婚喪祭與服之類或重爲申明或量爲修改或演爲論說或編爲課本總期酌古準今揆情度勢去其繁重歸於簡易使天下之人咸曉禮教爲淑世福民而設非徒以飾觀瞻也俟禮部釐定後由 臣部頒行京外各直省責成地方官隨在監察逐漸推行而後禮教大興即民政無不舉矣

又禮部奏 臣等奉 命設館派員編纂謹以通禮爲宗其門目仍以吉凶賓軍嘉五者爲綱至外務部陸軍部學部之所掌無論已未奏行均由 臣部咨行鈔案送館擇其可爲典常者依類編入見在開館伊始擬請 明降諭旨以肅海內觀聽茲擬擇本署偏北隙地建築禮學館所有起造房屋購置器用一切開辦經費擬實估計銀二萬兩常年經費需銀三萬兩請 飭下度支部分別撥給以便開辦此後分期請撥其修書年限計以三年爲率奉 上諭安上治民莫善於禮我朝 列聖皆以修明禮教爲先乾隆道光年間疊經纂修通禮海內遵行見在學禮軍禮賓禮既應因時制宜即民閒喪祭冠婚器物與服亦應一律釐正前據禮部奏設禮學館茲據將籌議辦法開單呈覽著即照所議行該部堂官務當董率在館人員參酌古今詢查民俗折衷至當奏請頒行三十四年會議政務處奏議覆御史履晉奏禮學館宜專派大臣管理與法律館同商訂以維禮教而正人心略稱 臣等以爲古之制治以禮爲本以刑法爲末孔子曰禮樂不興則刑罰不中刑罰不中則民無所措手足降至漢世儒者猶知此義其記禮曰婚姻之禮廢則夫婦之道苦而淫辟之罪多鄉飲酒之禮廢則長幼之序失而爭鬪之獄繁此言禮教既廢而民之麗於法者衆也故尚書大傳稱孔子曰古者有禮然後有刑是以刑省今也無禮而齊之以刑是以繁也書曰伯夷降典禮折民惟刑謂有禮然後有刑所謂經正則庶民與

庶民與斯無邪惡禮教之原當在於是然則禮者當舉全國之人無貴無賤而盡納於軌物之中與法律一門僅禁止其非理行爲者其範圍之廣狹固自不同即其修訂之條目諸多歧異該御史所請禮學館會同修律大臣詳細商訂一節揆諸情事似多窒礙查禮學館設立以來業由禮臣奏陳辦法延聘各省顧問官紳與到館纂修各員次第辦理在案自應責成禮部博訪通儒參酌古今分設科員督飭認真妥慎修訂不得視爲緩圖延閣不辦似無庸另派大臣管理禮學館以免諉卸其有疑義則各省官紳不乏明通之士皆可隨時咨訪得所折衷似不必仿東西國議院立法之例別舉人員來京與議至禮刑兩事一防於未然一禁於已然均爲治民大端道齊之效雖有等差弼教明刑理實一貫近日修律大臣多采外國法律於中國禮教誠不免有相妨之處除學部曾經條奏奉 旨飭修訂法律大臣會同法部再行詳慎斟酌修改刪併外京外各衙門亦多有指摘查方今教育之責注重學部應請 敕下學部擇其有關禮教倫紀之條隨時咨會法部暨修律大臣虛衷商榷務期宜於今而仍不戾於古庶幾責任不紛可以收補偏救弊之益

宣統元年禮部奏禮學開館酌擬凡例十九條開單進呈一修明禮教以大清通禮爲主其有因革損益於篇末概加後案一通禮詳載 廟朝之禮而略於士庶又不載圖說今責成 臣部修明禮教移易風俗則修書宗旨自應於民禮加詳於吉凶軍賓嘉五禮外增入曲禮一門遵照會典則例並新修法律憲法將屬於民事之軌物法度斟酌釐訂其敝俗有亟宜裁革者即纂輯各家正俗之說附後並載明禮器圖表服圖等期便民閒誦習踐行一遇疑義有非臣下所能擅擬者皆具奏請 旨以昭 天子議禮之盛一科舉既經停止如古禮之資興釋褐嘉禮之鄉會試燕諸禮已不復舉而外務部奏定之儀禮陸軍部奏定之軍禮學部奏定之學禮又皆因時制宜爲通禮所無擬增設廢禮新禮篇目各自爲卷附通禮之後一道光禮有一時疏誤亟當改正者即以吉禮言之早潦祈報徹饌之時乾隆禮皆有樂章道光禮改之報有樂而祈無樂然則徹饌之樂章並刪徹饌之禮節則刪除之未當也又如祀先醫篇乾隆禮在祀

真武後故於設樂條下注云器數見真武篇道光禮既升先醫於真武前此注尚仍不改則注釋之未當也似此之類悉詳加校正一道光禮有依據古制而與今不合者如今人居室之制堂不必有東西階士大夫不盡有廟雖有廟多與宗族共之行禮皆於寢不於廟他如廟見之名加景之用凡引據未確者皆爲更正一原書內執事官屬自光緒三十二年釐定官制所有業經裁撤歸併各衙門自當改書見在官名而於其下附注原作某官以備稽考其吉禮臨雍釋奠之陪祭官嘉禮臨雍講書之進講官舊爲祭酒司業今當臨時請 旨改派暫以陪祭官進講官稱之仍附注原作祭酒司業於其下一乾隆禮未載堂子祭禮至道光重修始據 皇朝文獻通考爲元日調拜立杆致祭二篇而於大內祭神之禮尙未及詳謹依大清會典補載大內祭 神於後一乾隆道光禮均載 皇帝東巡闕里親釋奠於 先師孔子之禮而無春秋闕里釋奠之禮似尙疏略應由 臣部各行衍聖公開列禮節編入闕里祇告之後其顏曾孔孟四氏學從同一自道光四年修定通禮以後屢更兵事凡各省名臣忠節諸臣奉 旨建立專祠春秋致祭者並應載祀典編入吉禮一直省專祠之祭乾隆禮只有九神道光禮又增四十四神其中或竟無姓名或僅有姓而無名殊不足以重祀典擬行文各省詳查始末凡係不經之祀悉行釐正一光緒年開 皇帝萬壽 皇太后萬壽大慶遇駐蹕頤和園舉行朝賀筵宴典禮應遵大清通禮所載圓明園綺春園朝賀禮敬謹增入一乾隆通禮於親王昏禮云將及冠道光通禮於民公以下昏禮亦云將及冠而喪禮又有已冠未冠之差恭讀乾隆四十七年 上諭嗣後著將王貝勒貝子公子嗣及閑散宗室年已及歲者俱照蒙古王公台吉他布囊之例分別給予冠頂其宗室見在當差職分較小者准其與閑散宗室一體照例換給冠頂等因是我朝冠禮載在典章而 皇朝通典不著錄者當時纂修諸臣或以 祖宗家法不立 皇太子不能如開元禮之冠禮託始於皇太子加元服耳不思冠義言天子之元子猶士也就經義言之則皇太子用士冠禮親王以下可知今擬稽度古禮尋繹 祖宗給予及歲王公宗室冠頂之意補冠禮一品冠相見乾隆道光兩通禮略同

然見行官制多與會典不符今修明禮教應補會典所未備分王貝勒貝子與品官相見鎮國公以下與民公侯伯品官相見其品官分平行官非屬官屬官內官與外官文官與武官致仕官與見任官見任官致仕官與士各相見禮稱謂拜揖迎送坐立皆爲之定式致仕官未仕官與庶民分別服親非服親亦爲之秩序以維禮教其見行相見禮有卑亢失體者悉奏請更正一八旗通志載康熙九年十一月順天府奏鄉飲酒禮滿漢均循奉 旨依議並載康熙二十四年十月至雍正十三年正月舉行鄉飲賓介姓名雖乾隆道光通禮於順天鄉飲未載八旗直省鄉飲未載駐防而以前事證之則鄉飲爲滿漢通行之禮節今滿漢更無分畛域而典禮所在不宜偏廢謹於本條後案詳之一通禮恭載 列聖 列后忌辰於吉禮 陵寢篇內查雍正四年十一月 聖祖仁皇帝三年大禮已滿 世宗憲皇帝諱禮部曰朕追念罔極親恩欲於 皇帝忌辰每歲遵照三年內祭禮舉行朕終身永慕豈三年所能限制欽此祭義所謂君子有終身之喪忌日之謂也願與 陵寢同列吉禮似非 祖宗追孝之意且 陵寢篇內所載 皇帝親詣 列聖 列后陵寢以至 皇子謁 陵諸大禮並無素服舉哀者列諸吉禮似亦未安考宋史禮志於上陵祭均列凶禮謹仿其例恭錄 列聖 列后忌辰 皇帝 皇后以次謁奠 陵寢諸篇均移居大喪之後一三年喪服 國初因旗兵額少且日從金革故滿洲蒙古漢軍守制舊例不便離任遠同漢人見在迭奉 明諭化除滿漢畛域飭修畫一禮制近又變通旗制尤與 國初旗兵可援金革無避之禮訓者不同自應毋論滿漢官員士庶均爲父母持服三年服官無論京外均離任終制以厚風俗一乾隆道光禮皆有冠服通制儀衛通志依例修補並於喪禮內增入五服喪服圖以便省覽一坊民之禮條理極繁將來書成應將關涉士庶禮制條目另刊頒布以便單行

又奏禮學館辦理情形並詳擬分年辦法略稱擬先以一年期內詳校通禮原書集在館纂修人員分任篇卷凡新禮廢禮應增損諸條目逐一考訂各抒見解又復互相參校以衷一是除事體重大應行奏明請 旨外其有衆說從

同疑義已晰則擇善改正繕寫時黏簽標明於下以備恭呈 御覽次擬以一年期內纂修民禮凡自士大夫以下民間之婚喪祭禮及與服用宮室之類必應明秩序而辨等威者又自禮訓而外 本朝之法律會典則例暨見修政書之屬所以正風俗而彰軌物者昔爲通禮原書所未備今當博採慎取而補編則亦廣集詢謀蒐羅羣典以求詳贍其婚喪各禮惟當仰體 朝廷整齊民物期於滿漢皆可通行之 諭以定宗旨限以一年草創一年潤色統計不出三年期內增訂通禮原書與續輯民禮各編一律告成見自開館以來館員按照規程已將通禮原書次第五校參以論說所有更正之處經總理臣陳寶琛分別彙核簽識頗明陳寶琛前因事請假回南據奏稱館中續繳功課均經攜帶行篋隨時敷辦不致有所曠誤

又覆奏御史趙炳麟奏滿漢服制飭催速議略稱查原奏內稱前奉 上諭以滿漢服官守制及刑罰輕重參差不齊飭議畫一章程奏明辦理等語 臣等自奉 詔後夙夜考求竊以爲服制一層原與刑罰不同刑罰重輕所異者罪名自無難折衷酌改服制隆殺所關者倫紀斷不能輕率依違況習俗相沿諸多窒礙議章程則易求實行則難苟遷就而顯悖禮經懼貽憂於世教或定議而終虞扞格抑何取於部章 臣部自奏設禮學館以來與館員商訂凡例辯論疑難不厭往復近始粗有端緒旋奉 上諭責成 臣部修明禮教移易風俗 臣等復思今日大勢欲收修明移易之效其宗旨必先正人心正人心必先厚民德厚民德必先定喪服而喪服以三年之喪爲最重伏查見行事例漢員無論內外大小文職遺喪皆去官守制扣足二十七個月不計閏起復旗員文職京官遺喪者穿孝百日進署當差其外官遺喪則去官回旗穿孝百日滿後道府以下回原衙門行走惟漢軍任漢缺者丁憂始行照漢官例開缺終喪旗漢既屬分歧即旗員亦未能畫一今該御史奏請準情酌理求其可以通行者欽奉 諭旨飭催議覆竊維通行之法不外使旗員悉從漢制或漢員改從旗制而已近年以來新政繁興需材孔亟京外各衙門多咨調丁憂人員差委論者或持因時通變之說謂不妨使漢員概從旗制謹按中庸九經四曰體羣臣朱

子釋之曰體謂設以身處其地而察其心也會子曰人未有自致者也必也親喪乎公羊傳曰三年之喪疾矣非虛加之也古者臣有大喪則君三年不呼其門所以然者君察臣之心而使之平哀也記曰夏后氏既殯而致事殷人既葬而致事周人卒哭而致事夫殷周待至既葬卒哭者非謂前此可兼營職事也正以其心專乎哀雖致事猶未遑顧及是以優游以待之也君能使臣以禮臣故克盡其哀所謂體之以察其心者莫有大於此也後世道衰金革之事有弗辟者然公羊傳稱閔子要經而服事既而曰若此乎古之道不即人心夫以服事爲不即人心則可知以致事爲即人心矣自漢迄今治亂相乘歷世久遠喪服輕重閒有異同獨親喪去官著在令甲未之或改若因一時之權制而變易千古之經常無解作備之識有虧同倫之治此不敢輕議者一也三年問三年之喪何也曰稱情而立文因以飾群別親疏貴賤之節而非可損益也創鉅者其日久痛甚者其愈遲三年者稱情而立文所以爲至痛極也斬衰苴杖居倚廬食粥寢苦枕塊所以爲至痛飾也是則父母之喪創鉅痛深必積久而後能釋聖人順乎其情由殯而葬而虞而卒哭而小祥而大祥而禫推而即遠翼孝子之哀思以漸而減所謂立文也飾群據鄭注群謂親之黨親疏有別情有厚薄其服即從三年而遞降於是期年者九月者五月者三月者所謂親親之殺也若親喪以穿孝百日爲準則期功以下幾同無服而喪服一經可廢此不敢輕議者二也論語記宰我問三年之喪期已久矣君子三年不爲禮禮必壞三年不爲樂樂必崩孔子斥其不仁繆約以爲爾時三年之喪不行宰我欲放假時人之謂啟憤於夫子義在屈己以明道也其曰期可已者即齊宣王欲短喪公孫丑以爲期之喪猶愈於己之意乃孔子若不相諒而直責予之不仁且決其無三年之愛於其父母何也蓋必其心先以三年之喪爲可已故言發諸口而無疑使誠有愛於其父母先視天下事宜無有大於親喪者而何禮樂崩壞之足憂乎今之丁憂當差者亦未嘗不有說以藉口而天性之愛豈盡泯滅若使明著法令百日之後徑許釋服從仕食稻衣錦相習而安既非伯禽之有爲而爲將同墨氏之以薄爲道實與今日崇尙孔教之宗旨不符此不敢輕

議者三也漢人於期功之喪尚多去官降至魏晉猶或行之若夫固極之哀本無窮已今功令丁憂起復斷以二十七個月者三年間所謂立之中制耳史稱宋海虞令何子平母喪去官八年不得替葬晝夜號哭常如袒括之日梁殷不佞母卒江陵陷不得奔赴及陳受禪始迎喪歸不佞居處禮節如始聞喪如是者又三年以六朝之兵禍相尋風俗頹靡而士大夫敦篤內行猶能自行其志如此矧在 聖明之世明代張居正奪情起復吳中行趙用賢之徒抗疏力爭至於廷杖謫戍而不悔此特一人之事爾若居官者皆在奪情之例其不肖者或因爲利而賢者豈遂俯從設使海內通儒執古義以相難臣部職司風化何所逃責此不敢輕議者四也我 朝以孝治天下官員士子丁憂有膝混匪喪者斥革禁錮定例禁嚴律例載凡居父母喪身自嫁娶若作樂釋服從吉者皆有常刑恭讀 高宗純皇帝聖訓有曰夫事親孝故忠可移於君使其人本仁孝而強奪其情則優然不能終日必至愉悅昏迷廢弛公事若以爲安則忍戾貪冒之人也國家安所用之而所治士民亦安能服其政教乎大哉 王言所以教孝立極凡屬臣子皆當感激涕零豈可輕改彝章顯乖 祖訓此不敢輕議者五也伏惟 聖朝定鼎之初各旗生齒未繁四裔尙多不靖政務緊要人少缺多故令八旗人員百日孝滿後照常當差當時立法自有深意今則天下家人才輩出旗丁休養生息蕃衍日滋大都託業詩書者居多迥非日從金革之情形可比前者迭奉 詔旨令滿漢婚姻弛禁衙門員缺不分近復 特派大臣變通旗制獨服制一事依違不決畛域顯分似非所以昭一道同風之盛治也昔元臣烏克遜良楨上言國俗父母死無憂制夫綱常皆出於天而不可變議法之吏乃言國人不拘此例是漢南人皆守綱常國人不必守綱常也名曰優之實則陷之外若尊之內實侮之所以待國人不若漢南人之厚也其言至爲沈痛道光年間江蘇按察使裕謙奏請終喪起復滿漢一律一疏謂急公奉上之誠漢員應不後於旗而創深痛鉅之私旗員豈獨薄於漢率土臣民幸際禮明樂備養生送死莫有遺憾惟旗員遭喪獨不能盡禮伸情揆以同心難免隱痛所奏雖未議行亦可見毛裘之愛有生所同旗員之於親喪非不

欲自同漢制特以格於成例耳歷稽會典 列聖皆嘗欲行三年之喪卒以臣工額懇勉從所請持服百日仍素服二十七月康熙六十一年十一月 世宗憲皇帝並有持服一節乃天子第一苦衷轉不如臣庶之 諡此次承辦喪禮百日之內遇元臣冬至及 萬壽聖節服色臣部援案上請皆奉 旨仍服縞素孝思作則允堪垂範來茲會子所謂慎終追遠民德歸厚者轉移風會端在今日臣等公同商酌服制一事斷自禮經行之千載欲求畫一之法別無通融之方中庸稱非天子不議禮不制度魏徐幹中論復三年喪篇謂事行之後永爲典式臣等學識庸陋何足以仰贊高深可否恭請明降 諭旨凡內外各衙門丁憂人員無論滿漢一律離任終制扣足二十七個月不計閏起復永著爲令以彰初政之美而垂萬代之型如蒙 俞允所有一切喪服事宜由禮學館詳細編訂奏明辦理

典禮院

三年內閣會奏酌擬典禮院官制摺略稱典禮事宜至爲隆重自唐至元皆曾設立專院特命大臣以司厥事唐曰禮宜使宋曰知院元爲太常禮院使品秩亦崇均稱清要所以隆朝會郊廟之典協沿襲損益之宜任至鉅也伏惟晉之常寺特先諸卿唐之禮使必選儒宿蓋以典領朝會虔肅明禮垂爲鉅典今則合歷代禮院禮曹爲一官併太常光祿鴻臚於一署較之前代禮院尤爲崇闕是以設官特爲詳備此又尊崇 昭代創制顯庸之微意也謹酌擬官制二十四條伏候 欽定頒行

典禮院以禮部改設凡內閣民政部職掌之分涉典禮職掌者及樂部之神樂和聲兩署皆併入之禮部原管之鑄印事宜畫歸內閣頒時憲書稽核人民遊行禮制風教並地方祀典神祠方術事宜畫歸民政部貢舉學校及 文廟祠祀事宜畫歸學部分給外藩王公喇嘛食物事項畫歸理藩部另由各衙門詳訂職掌章程辦理

第一條典禮院掌 朝廷 壇 廟 陵寢之禮樂及製造典守事宜並修明禮樂更訂章制 第二條典禮院設官如左掌院大學士特簡副掌院學

士特簡學士簡任直學士簡任廳長簡任署長奏任僉事奏任簿正奏任典簿奏任司庫贊禮郎奏任讀祝官奏任鳴贊奏任序班委任庫使委任錄事委任 第三條典禮院掌院大學士一人總理本院事務監督廳署 第四條典禮院副掌院學士一人佐掌院之職務 第五條典禮院學士八人承掌院大學士之命討論典禮參訂章制 第六條典禮院直學士八人承掌院大學士之命襄同學士討論典禮參訂章制 第七條凡關於典禮差使均由掌院大學士副掌院學士直學士以下承充不行取行政各衙門人員銜名其扈從巡察等差及特別大典不在此限其典禮院人員不敷承充時得行取翰林院人員襄同辦理 第八條典禮院具奏不經內閣遇本院所管事務有應行曉諭軍民人等者可分別咨札該管衙門辦理 第九條典禮院設總務廳其職掌如左一恭閱祭告祝文及繕寫祝版事項二恭繕壇廟 陵寢 園寢 神牌事項三本院補官考績事項四文牘事項五典守院印事項六本院經費事項七本院庶務事項八奏派咨取各衙門關於典禮執事人員事項九不屬各署事項 第十條典禮院設四署禮制署祠祭署奉常署精膳署 第十一條禮制署職掌如左一朝會事項二尊崇事項三慶賀事項四大婚事項五經筵事項六巡幸事項七耕藉事項八親蠶事項九乘輿服物之因時進御具奏事項十皇子成婚公主釐降事項十一冊立冊封事項十二進書頒賞事項十三更改釐定本院禮制事項 第十二條祠祭署職掌如左一壇廟典禮事項二陵寢典禮事項三大事典禮事項四恭擬 山陵園寢名號及神祇封號事項五備辦一應典禮之兩簿禮仗綵棚器具事項六關於典禮行取各項工料事項七吉安所禮節及備辦應需器物並王公大臣外藩王公祭葬立碑事項八恭辦製造神牌及入祀牌位事項 第十三條奉常署職掌如左一親行禮節事項二齋戒事項三閱祝版事項四贊引讀祝事項五典守 壇廟各事項六兼理神樂署和聲署各樂舞事項 第十四條精膳署職掌如左一筵宴事項二備辦一應祭品事項三稽核各項典禮應用之酒醴牲牢庶羞等名數事項

第十五條總務廳廳長一人承掌院副掌院之命管理廳務 第十六條署長每署一人承掌院副掌院之命總核本署事務 第十七條僉事分一二三等承掌院副掌院之命分任總務廳及各署事務 第十八條錄事承廳長署長之命繕寫文牘 第十九條簿正典簿司庫庫使隸屬總務廳經理所管事務 第二十條鳴贊序班隸禮制署讀祝官贊禮郎隸奉常署分任所辦事務 第二十一條壇廟 陵寢各官承掌院副掌院之命掌典守之事務 第二十二條典禮院僉事以下各缺由掌院副掌院酌量事務繁簡擬定奏明辦理但不得逾禮部原設司員之數 第二十三條神樂署和聲署各員及 壇廟官 陵寢讀祝官贊禮郎各有專司所有職掌員缺均仍其舊不另立表 第二十四條此項官制如有應行變通修改之處由內閣會同該院奏明候旨裁奪辦理

又 諭典禮事宜至為隆重亟應設立專院恪恭將事著即將典禮院官制頒布以禮部改設典禮院所有禮部舊管事項關於行政者均畫歸各行政衙門管理其衙門舊管之關於典禮無關行政應歸該院辦理事項即畫入該院管理著內閣會同各部及該院詳細釐定具奏

學部

臣謹案光緒二十九年改管學大臣為學務大臣至是始設學部

光緒三十一年 諭政務處學務大臣會奏議覆寶熙等條陳一摺前經降旨停止科舉亟應振興學務廣育人才見在各省學堂已次第興辦必須有總匯之區以資董率而專責成著即設立學部國子監印古之成均本係大學所有該監事務著歸併學部該部創設伊始興學育才責任綦重務當悉心考核加意培養期於敦崇正學造就通才用副朝廷建學化民成俗之至意 三十二年學部奏請設左右丞各一員左右參議各一員參事四員分設五司十二科郎中員外郎主事各缺視事之繁簡為缺之多寡此外視學官暫無定員諸議官不設額缺又國子監業經歸併請設國子丞一員仍隸學部 學部官制職守清單

一擬設左右丞各一員秩正三品佐尚書侍郎整理全部事宜並分別各司事務稽核五品以下各職員功過 一擬設左右參議各一員秩正四品佐尚書侍郎嚴訂法令章程審議各司重要事宜設參事官四員秩正五品視郎中佐左右參議核審事務 一擬設五司曰總務司曰專門司曰普通司曰實業司曰會計司每司分設數科總務司郎中一員總理司務機要科員外郎一員主事二員掌理機密文書撰擬緊要章奏及關涉全部事體之文件函電各司專件仍歸各司辦理稽核京外學務職官功過及其任用升黜更調並檢定教員掌理僱聘外國人及高等教育會議學堂衛生等事務可暫聘精通學校衛生之醫士爲顧問案牘科員外郎一員主事一員掌收儲各種公文函電案卷冊籍編類編號又編纂統計報告兼掌管各省學務報告等事審定科員外郎一員主事一員掌審查教科圖書凡編譯局之已經編輯者詳加審核頒行並收管本部應用參考圖書編錄各種學藝報章等事除常置員司外可酌派本部他司人員或各學堂教員之熟悉科學者助理之專門司郎中一員總理司務專門教務科員外郎一員主事一員掌核辦大學堂高等學堂及凡屬文學政法學術技藝音樂各種專門學堂一切事務並稽核私立專門學堂教課設備是否合度及應否允准與官立學堂享有一律權利或頒公款補助等事專門庶務科員外郎一員主事一員掌保護獎勵各種學術技藝考察專門學會考察者德宿學研精專門者應否錫予學位及學堂與地方行政財政之關係又凡關於圖書館博物館天文臺氣象臺等事均歸辦理並兼海外游學生功課程度及派遣獎勵事等普通司郎中一員總理司務師範教育科員外郎一員主事二員掌優級師範初級師範學堂盲啞學堂女子師範學堂教科規程設備規則及關於管理員教員學生並學堂與地方行政財政有關係之一切事務又凡通俗教育家庭教育及教育博物館等事務均隸之中等教育科員外郎一員主事一員掌中學堂女子中學堂教課規程設備規則及關於管理員教員學生並學堂與地方行政財政有關係之一切事務又凡與中學堂相類之學堂事

務均隸之小學教育科員外郎一員主事二員掌小學堂之設立維持教課規程設備規則及關於管理員教員學生並地方勸學所教育會學堂與地方行政有關係之一切事務又凡蒙養院及與小學堂相類之學堂事務均隸之實業司郎中一員總理司務實業教務科員外郎一員主事一員掌農業學堂工業學堂商業學堂實業教員講習所實業補習普通學堂藝徒學堂及各種實業學堂之設立維持教科規程設備規則及關於管理員教員學生等一切事務實業庶務科員外郎一員主事一員掌調查各省實業情形及實業教育與地方行政財政之關係並籌畫實業教育補助費等事會計司郎中一員總理司務度支科員外郎一員主事一員掌本部經費之收支報銷及本部歲出歲入之豫算決算及教育恩給事管理本部所有財產器物核算各省教育費用建築科員外郎一員主事一員掌本部直轄各學堂圖書館博物館之建造營繕並考核全國學堂圖書館等之經營建造是否合度可暫聘精通建築之技師爲顧問司務廳司務二員掌開用印信收發文件值日值宿遞摺傳鈔摺件並管轄本部各項人役及不屬於各科雜項事件皆隸之兼派本司員督理其事 一擬每司及司務廳設一二三等書記官秩七八九品按司之繁簡酌設不定缺額學部不用書吏酌設書記生若干員考選士人充補 一擬設視學官暫無定員約十二人以內秩正五品視郎中專任巡視京外學務其巡視地方及詳細規則當另定專章 一擬設諮議官無定員不作爲實缺不限定常川在部仿商部顧問官之例分爲四等一等視丞二等視參議均由學部奏派三等視郎中員外四等視主事均由學部委派凡學部有重要籌議之件隨時諮詢該員於教育有所建議均得隨時分別函呈以備採擇 一擬設編譯圖書局即以學務處原設之編書局改辦其局長由學部奏派其局員均由局長酌量聘用無庸別設實官並於局中附設研究所專研究編纂各種課本 一擬設京師督學局置師範教育中等教育小學教育三科每科設長一人其局長由學部奏派其局員由視學官內派充別設譯官數人以任繙譯以上各局長由原官

兼充體制視左右丞左右參議 一擬設高等教育會議所屬本部尙書侍郎監督其議員選派本部所屬職官直轄各學堂監督各省中等以上學堂監督及京外官紳之學識宏通於教育事業素有閱歷者充任定期每年會議一次遇有重要事件可臨時招集會議諸議員均奏請派充其議長則就議員中公選其應議事項議員資格及會議規則當另定章程又所中設庶務員二人掌理所務即由本部酌派司員兼理 一擬設教育研究所延聘精通教育之員定期講演以教育原理及教育行政爲主本部人員均應按時聽講應設庶務員一人編輯員一人即由本部酌派司員兼理 歸併國子監事宜改定額缺章程

一擬設國子丞一員秩正四品總司 文廟 辟雍殿一切禮儀事務其體制視參議由_臣部奏請 簡任 一擬設典簿四人秩正七品分掌關於祀典及 臨雍視學案牘兼經管廟戶 殿戶 一擬設典籍四人秩正八品分掌廟內祭器樂器碑刻 殿內 御用寶器及一切品物 一擬設 文廟廟七品八品九品奉祀官各二人掌預備祭器一切事宜 一擬設 文廟正通贊官二人秩從七品副通贊官二人秩從八品掌行禮引贊事宜 一擬設二等書記官三人秩正八品三等書記官三人秩正九品 一典簿以下各官皆不分滿漢一體任用其升轉皆比照舊設之官如係滿蒙人員照漢員例一律准其截取七品視監丞八品視學正九品視舊典籍擬請就見任監丞等官酌量對品奏請改補俾照見定品級並酌加津貼所職掌之繁簡爲差 一舊設實缺官自監丞至九品筆帖式五十二缺除酌量對品留補外其餘裁缺各員及候補人員情願留部留差者均作爲額外行走人員裁缺者照裁缺之例候補者各按班次分別到署日期以新設典簿等官候補其情願改官及未經到署之候選人員應由_臣部咨送吏部照上年兵馬司指揮裁缺人員例由吏部另定章程奏明辦理 一典簿以下各官缺出嗣後均由_臣部酌量奏補如此次額外人員用竣之後應就各省辦理學務人員及本部司務書記官書記生調補升用

又學部禮部會奏畫定學禮兩部辦事界限摺略稱此次奉 諭學政專司考校學堂事務毋庸再隸禮部恭摺 諭旨之意似專指學堂而言其從前之考試等事應隸何部未奉明文各省因章程未定文電交馳紛紛請示率皆分咨學禮兩部若不畫定界限竊慮承辦各員無所率從公事轉多貽誤且冊檔文卷均在禮部往返咨查既延時日若全移交學部新舊紛歧尤多不便_臣等公同會商擬請將從前之貢士舉人恩拔副歲優貢並廩增附生例貢監生考試引見解卷行文以及改籍更名就職報捐一應事宜統由禮部至由學堂出身之進士舉人優拔副歲貢廩增附生暨出洋遊學畢業生並國子監歸併學部後在學部領照之監生考試引見解卷行文以及改籍更名就職報捐一應事宜統由學部如此畫定界限庶承辦者有所遵循而事情亦不致歧誤 三十三年學部奏請將大學堂總監督一員作爲實缺秩視左右丞三年爲一任內以_臣部左右丞外以各省提學使爲應調之缺遇有正三品應升之缺一律開列

宣統元年學部奏准游學畢業生廷試錄用中書准其改就小京官知縣又奏准變通本部官制擬將視學官改爲差使即以原設之十二缺分設郎中員外郎主事各缺

一總務司添設郎中一缺機要科審定科各添設員外郎一缺案牘科審定科各添設主事一缺 一專門司添設郎中一缺專門教務科添設員外郎一缺 一普通司添設郎中一缺小學教育科添設員外郎一缺中學教育科添設主事一缺 一實業司添設郎中一缺 一會計司添設郎中一缺 又奏定視學官章程

一視學區域 第一條視學區域分爲十二區一奉天吉林黑龍江二直隸山西三山東河南四陝西四川五湖北湖南六江蘇安徽江西七福建浙江八廣東廣西九貴州雲南十甘肅新疆十一內外蒙古十二青海西藏 第二條每區視學官應派二人其視察區域由部臨時指定 第三條視學官按年派遣每年約視察三四區每三年視察一周 第四條三年之內每區

必須視察一次除內外蒙古西藏暫行緩派外此外遇有應特行視察之件得由部臨時加派視學官前往視察

一視學資格 第五條視學官以宗旨正大深明教育原理者為合格 第六條每區所派視學官須有精通外國文及各種科學者一人以便考察中學以上之教法

一視學職任 第七條視學官不設定員以部中人員或直轄學堂管理員教員職分相當者派充 第八條視學官除駐劄省城視察外並須出省視察外府縣或鄉鎮之學務情形凡鐵路輪船交通最便省分各府直隸州縣城均均可抽查 第九條視學官應視察之事件其要目如左一各省學務公所各廳州縣勸學所勸學區教育行政情形二各種官立公立私立學堂教育情形三學堂衛生情形四學堂經費情形五各項學務職員教員辦事授課情形六各項學堂學生之風紀七有關教育學藝諸種之設施八特受部示之事件 第十條前條所列各項細目視學官於每次巡視時豫為詳細酌定並呈部核准遵照辦理 第十一條視學官於應視察之事件如有所見應於巡視之前撰具節略呈部核定 第十二條視學官於巡視以前應將所查省分業經報部之學務冊籍摘要記錄以為巡視時徵實之據

第十三條視學官由部刊發鈐記一顆文曰學部視學鈐記為鈐印函牘之用以資信守回京時繳存 一視學權限 第十四條一凡部議所已決定及特受部示之事件視學官應向該省學務人員申述意旨勸導辦理 第十五條凡各省學務公所有與章程不合或未能實行者視學官應妥商該省提學使改正整理 第十六條凡各廳州縣勸學所事務有與章程不合或未能實行者視學官應詳告辦事人員令其改正整理並通知該府廳州縣官隨時留心考察 第十七條凡各勸學區事務有與章程不合或未能實行者視學官應詳告辦事人員令其改正整理並通知該府廳州縣官及勸學所總董縣視學隨時留心考察 第十八條凡各學堂事務有與章程不

合或未能實行或所授教課於學科教授訓練之次序方法未能合度者視學官應詳告該學堂監督堂長教員令其改正整理並通知該省提學使及省視學或府廳州縣官及勸學所總董縣視學隨時留心考察 第十九條凡視學官所視察之學堂其管理員教員如實有不能稱職及曠假太多虛糜經費等弊視學官得詳具事由商由提學使即行撤換 第二十條凡視學官巡視地方遇有關繫教育事務之爭端如官紳攻訐及四學次爭訟等事得將情由移交提學使或該管地方官辦理 第二十一條凡各省學務公所各廳州縣勸學所勸學區及各學堂所存之案卷簿冊視學官得隨時調取閱看 第二十二條凡視學官視察某處得商令該處辦事員隨同視察並可向該員詳詢事由 第二十三條視學官視察各學堂為考驗學問程度起見得隨時考試學生並調取講義稿本或圖書目錄查閱 第二十四條凡視察某學堂毋庸預期通知 第二十五條視學官每視察一府或一直隸州廳畢即將視察情形具呈報部如別有條陳得隨時呈遞聽候部核 第二十六條視學官每次巡視應約會該省議長議紳教育會長或省視學縣視學籌議各項教育改良擴充辦法遇有地方教育會議之時視學官亦應前往聆其議論並可自陳所見以期互相裨益

一視學日期 第二十七條視學官每次巡視除途中往來日數不計外每一省視察之日至少以八十日為度年假暑假日期不得合算以昭核實 第二十八條視學官奉派之後得於一月內在部設視學事宜研究會各司人員應輪流到會俾該視學官得考詢討論各地方學務及風土人情並研究教育行政法教育學教授法管理法視學規制方法及東西各國教育情形以為視學之預備 一視學經費 第二十九條視學官自由京起程之日起至回京之日止應給月薪一百六十兩夫馬費一百四十兩其視察川陝兩廣雲貴甘新四區者每月加給夫馬費四十兩 第三十條視學官二人應隨帶書記生一人月給公費銀二十兩沿途舟車等費由視學官發給回京時報部核銷 第

三十一條視學官沿途食宿均須自備不得受地方官供應惟巡視所至得借宿於該處之學堂內仍將每日膳費照數發給
一視學考成 第三十二條視學官如有收受地方餽送及干預權限以外之事者經部查實立即分別撤參 第三十三條視學官如有敷衍瞻徇視察不能認真報告不能切實者經部查明立即撤換

皇朝續文獻通考卷一百二十三

職官考九 京文職 兵部

臣謹案兵部尚書始於隋夏殷司馬周夏官大司馬卿也侍郎亦始於隋分左右始於明夏官小司馬中大夫也相沿及今光緒三十二年乃改爲陸軍部以練兵處太僕寺併入嗣又設海軍部軍諮府紛然不可究詰矣嘉慶四年裁滿洲郎中員外郎各一人改設宗室郎中員外郎各一人七年以大學士兼理部務

謹案順治八年以王貝勒管部九年停之雍正元年以大學士兼理遂爲永制然非額缺不常兼也

光緒六年議准添設宗室筆帖式一人

二十九年 詔特設練兵處總理親王一人會辦一人襄辦一人提調一人軍

政司軍令司軍學司各正使一人副使一人委員無定額

三十一年兵部奏准分發裁缺人員辦法略稱近年各省改練常備續備各軍

此項人員既無標營可歸閒有給咨赴選而部大選久停無憑核辦擬援照

奏定章程凡實任副將參將無論由提督總兵借補及本班請補如遇裁缺各

督撫未經奏留即給咨該員由部帶領引見請旨發往歸裁缺即用班

插補至實任游擊都司守備裁缺係該員原籍即照武進士掣發鄰省之例發

往若非原籍給與驗票令回原籍省分投標歸裁缺即用班插補

又練兵處奏定陸軍軍官軍佐任職等級

上等第一級陸軍正都統職任總統官第二級陸軍副都統職任統制官第

三級陸軍協都統職任統領官總參謀官職隊協領官 中等第一級陸軍

正參領職任統帶官正參謀官工隊參領官總軍械官護軍官陸軍同正參

領職任總軍需官總軍醫官總執法官第二級陸軍副參領職任教練官一

等參謀官正軍械官中軍官陸軍同副參領職任正軍需官正軍醫官正執

法官總馬醫官一等書記官第三級陸軍協參領職任管帶官二等參謀官

副軍械官參軍官陸軍同協參領職任副軍需官副軍醫官正馬醫官二等書記官 下等第一級陸軍正軍校職任督隊官隊官三等參謀官查馬長軍械長執事官陸軍同正軍校職任軍需長軍醫長稽察官軍樂隊官副馬醫官三等書記官第二級陸軍副軍校職任排長掌旗官陸軍同副軍校職任司事生醫生司號官軍樂排長馬醫長書記長第三級陸軍協軍校職任司務長陸軍同協軍校職任司號長醫生司書生 以上所列係專按軍隊見設軍職擬定軍官軍佐係以相當之官任相當之職如無相當之官亦可變通辦理至練兵處各司科及各省應設之督練處暨陸軍各等學堂軍械製造糧餉軍醫馬醫等局所用人員皆屬軍職非日一項上承軍官指揮下爲兵丁領袖亦應分別階次附於軍官之後

又會同兵部奏略稱此次更定之官制其宗旨要有二端一以砥積輕之習使文武漸歸同科一以挽越次之風使名實不甚相遠故職秩視前較異而限制視前較嚴各國軍隊章程官與職亦分爲二大率以實授之官任相當之職中國自軍興以來保舉冗濫或以記名提鎮降充末弁或以候補千把驟膺統將官職既太懸殊名器不無淆雜今方整飭營伍宜以官配職俾無參差於整齊畫一之中寓鼓舞變通之意計軍官自正都統以下九級各任其職以類相從非由陸軍學成及會帶新軍資及三年通曉兵事者不得與選除授補者各有限制至軍官之外經理餉械醫務法律等軍佐所司事務重要且繁必各有專門之學始能勝任與軍官事同一體其品秩官階亦應相似惟於官名之首冠以同字以示區別擬按見設軍職之大小分別授以同正參領以下各官惟不得管帶營隊界限既清庶可各專職務

又奏定陸軍人員補官體制 一新設陸軍三等實官必須由陸軍學堂出身管帶新練隊伍資及三年通解兵學人員方准補授 二見在供職人員或由陸軍學堂出身久帶新練隊伍之文官或久帶新隊粗通文理之武官均能及格者准其按見充軍職授以新制相當之官次者遞降補授以二級爲止再次者祇給相當或降

級之官銜如久帶新除職字無多之武官只可給予官銜不得授以實官若能補習文字俟經考驗後方准補實如在陣前異常出力亦准破格請補三見在供職人員原有文武官階崇於見充軍職不欲改補新官者均仍其舊 四新設官階永無候補名目或帶領軍隊或辦理各項兵事一經奏補均為實任按其官階給以官俸按其軍職給予薪公除因案斥革不計外其供職年久例應退休人員亦得食減成俸餉章程另奏定 五立功出力人員有應按新制保獎者尋常勞績准保以應升之級記名遇有應升官階儘先補署 六正參領以上各官由練兵處會同兵部查取應補應升人員擇尤開單請飭副參領協參領正軍校等官由督練各督撫擬補具奏俟練兵處會同兵部復核後再給咨赴處報到考驗轉咨兵部帶領引 見請旨補授副軍校協軍校等官由各督撫咨明練兵處會同兵部彙案奏補 七上等第一級第二級軍職均由練兵處會同兵部請 旨簡派自上等第三級至中等第二級各軍職由督練各督撫具奏暫行委充俟練兵處考核相符再行覆奏准補中等第三級以下各軍職由各督撫咨明練兵處委充山處彙案具奏咨報兵部 八各項軍職均應以相當之實官准以大於軍職一級之實官借充如無人始准以小於軍職一級之實官及有應升記名加銜相當者補署俟陸軍學堂開辦既久畢業學生選補實官已敷新軍之用其祇有職銜無實官者即不准補署軍職如見照新章編制新隊或照新章改編舊隊而各項軍職無新軍合格之員可選者暫准以舊制官員補署 九協都統以上各官如獨當一面專任征討均准專摺奏事實授正參領以上各官均准仿城守尉以上例呈遞例摺祇有正參領銜者不得援引 十應行引 見人員如遇操防緊要軍務吃緊准其奏請展緩事定補行實授後再行給劄 十一實授協都統以上各官如有職任既久勳望卓著且諳治理者准由督練各督撫列事實摺奏請 飭練兵處兵部會核相符者請 旨下軍機處存記遇有京外對品文職缺出與應升人員一併開單候 簡 十二實授正參領以下各官在營供職計足十五年後倘筋力

漸差不便行伍而學術優裕其精神尚能任事者准由督練各督撫咨明練兵處兵部會同考驗如堪任使准以對品文職分別請 簡祇有職銜者不得援引 十三此項軍官無論實授署任實有統轄之權者照堂屬禮節接待其餘文武對品者均屬平行 十四實授軍校各官在營啟稟公事照軍禮立白凡見文武各大員均照文武官公見燕見禮節所有舊營披執唱銜跪謁之儀一律刪除 十五軍佐中等各官由督練各督撫擬補具奏給咨赴處考驗帶領引 見請 旨補授下等各官由督練各督撫彙案具奏惟同正參領不得仿城守尉例跪 安遞摺 十六同正參領以下各官由學堂出身暨文職改用者准補實官此外祇准加銜其餘體制一切與軍官相仿如在營年久積有資勞者可酌增俸餉以資鼓勵

陸軍部

三十二年 諭兵部著改為陸軍部應行設立之海軍部及軍諮府未設以前均暫歸陸軍部辦理 三十三年奏定官制並酌擬辦法摺略稱見將練兵處太僕寺歸併 部自應分司治事以重職守擬設軍衡軍乘軍計軍實四司分掌兵部原設武選車駕職方武庫四司舊管例行等事而將練兵處原設考工器械兩科並由工部畫撥 部之應辦事宜分別併入以歸畫一此外則以練兵處所掌新軍應辦各項分晰門類設立軍制軍需軍學軍醫軍法五司其太僕寺應管事務及新軍馬政擬併設軍牧一司共設十司惟 部設官自應與軍隊一氣貫通以免隔閡查光緒三十一年由練兵處奏定陸軍補官任職章程係以三等九級之官任領協標營各等之級擬即略仿其意所有兵部向設郎中員外郎主事等官並練兵處奏設之三等九級等官是皆為應設之官此次擬設各司均各設司長一員其各司之中分設各科均設科長一員又於司科中分設科員譯員司法官繪圖員醫師承發官藝士錄事等員是皆為應分之職惟每司既各設司長官與職殊所有郎中以下等官自難再繫以司祇可統屬以部即稱為陸軍部郎中員外郎主事其原有各缺悉仍舊額以存階級至三等九級等官自應

與文員一體訂設額缺俾歸一律各司既分職掌仍不能無總匯之區擬設承政參議兩廳原設之司務廳等處即歸併其中庶十司皆有所統率至應設之軍諮府海軍部遵旨暫歸軍部辦理擬將軍諮府暫名曰軍諮處設五司以掌要務海軍部暫名曰海軍處設六司以理庶政此兩處均設正副使各一員以比陸軍部承參管理全處事務又於軍諮處五司內暫先設三司兼攝其餘二司海軍處六司內暫先設三司俟各該處事務日增再照原擬司科分別次第添設查陸軍部及軍諮海軍兩處員司自丞參正副使以至錄事所有人員數逾各部實以兵部練兵處太僕寺三衙門合併而成綜核軍政馬政軍謀軍學四大端事類殷繁勢不得過從簡略至軍部原有一應實缺候補人員自應慎選詳察如有庸惰不職者奏明撤退以資整飭

陸軍部官制

一尙書一人左右侍郎二人 一承政廳設左右丞各一人秩正三品左丞專掌祕書典章兩科事項右丞專掌庶務收支兩科事項每科設科長一人一二三等科員二十人一二三等譯員五人錄事十四人承發官二人正副從事官各一人專爲堂官傳宣詞令 一參議廳設左右參議各一人秩正四品左參議掌核議本部及軍隊學堂局廠章制等事右參議掌稽察本部及軍隊學堂局廠章制等事分設一二三等諮議官一二三等檢察官無定額錄事十二人承發官一人 一軍衡司設司長一人承發官一人分遴材任官鑾旌旗榜四科各設科長一人共設一二三等科員三十二人錄事十二人 一軍乘司設司長一人承發官一人分驛傳銷算配成三科各設科長一人共設一二三等科員十八人錄事十二人另設捷報處總辦一人辦事官六人錄事二人又馬館監督一人錄事二人 一軍計司設司長一人承發官一人分考績策勳卹賞議罰四科各設科長一人共設一二三等科員十人錄事十二人 一軍實司設司長一人承發官一人分製造保儲二科各設科長一人共設一二三等科員十六人繪圖員藝師藝士各一人錄事八人 一軍制司設司長一人承發官一人分搜簡步兵馬兵職兵工兵

輻重兵臺壘七科各設科長一人共設一二三等科員二十六人繪圖員藝師藝士各一人錄事十二人 一軍需司設司長一人承發官一人分統計糧服建造三科各設科長一人共設一二三等科員十五人錄事十二人 一軍學司設司長一人承發官一人分教育步隊馬隊砲隊工程隊輻重隊要塞砲隊七科各設科長一人共設一二三等科員三十四人錄事十二人另設編譯局總辦提調收掌編纂譯述及應用各員隨時酌設不定員額 一軍醫司設司長一人承發官一人分醫務馬醫二科各設科長一人共設一二三等科員八人錄事六人 一軍法司設司長一人一二三等司法官六人錄事六人 一軍牧司設司長一人承發官一人分均調蕃殖二科各設科長一人共設一二三等科員六人 一軍器司設司長一人一二三等司法官六人錄事六人 一軍牧司設司長一人承發官一人分均調蕃殖二科各設科長一人共設一二三等科員六人 以上二廳十司於定額外如應添用科員辦事官譯員繪圖員藝師藝士錄事等隨時酌派均不作爲定額

陸軍部見行辦法

一新設各員除左右丞左右參議係請簡外自司長以下均定爲陸軍部職任以各項文武官員充任俾與各軍隊官職區分之制不相歧異 一陸軍部擬用之陸軍人員應補軍官軍佐遵照前練兵處奏定章制郎中以次等員應補官階仍循舊例辦理至見定之司長以下各職係屬差缺即仿照各部舊章點派各司掌印主稿等差之例由陸軍部堂官按照此次奏定充補章程遴員派充 一兵部向設滿漢郎中十八缺員外郎十六缺主事十四缺太僕寺向設滿蒙員外郎四缺主事四缺共郎中員外郎主事三項五十六缺見在除部司務主簿業由吏部奏請裁撤外擬將兵部太僕寺原設額缺變通併改擬定郎中爲十六缺員外郎爲十八缺主事爲二十二缺仍符五十六缺之數又兵部向設筆帖式九十四缺太僕寺向設筆帖式十六缺茲併爲筆帖式一百十缺其各項額缺擬統爲陸軍部全部文武員缺不繫以司並不分滿漢額缺其截取保送等項及遇京察年分均照定章辦理 一所有郎中員外主事筆帖式均以原有官階分別補充各應司職

任如有所充職任係辦理軍事各項願改就軍官軍佐者應由陸軍部堂官
考果能勝任再行奏明辦理 一軍官軍佐在既與郎中員外主事筆
帖式同任陸軍部職務即屬陸軍部部員與在行營充任軍職者不同應一
律訂定額缺以歸畫一 一擬比照郎中員外主事額數定為正參領八缺
同正參領四缺副參領十二缺同副參領六缺協參領十八缺同協參領八
缺共五十六缺又擬比照七八九品筆帖式額數定為正軍校十八缺同正
軍校八缺副軍校二十四缺同副軍校十二缺協軍校三十二缺同協軍校
十六缺共一百一十缺統為陸軍部官佐員缺 一此次擬訂充補章程應司
各項職任內有應以官佐派充者惟名器宜慎此項官佐一時未能全行奏
補擬請暫以曾任練兵處職務之得力人員按其原充差缺之資格酌量派
充 一各廳司應用錄事暫由兵部太僕寺見有之筆帖式外郎及練兵處
見用之清書內分別選充如有不敷擬酌調候選八九品官及各項學堂畢
業生並八旗外郎考充

海軍處見行辦法

一海軍部遵 旨暫歸陸軍部辦理謹擬暫名為海軍處 一海軍處管理
全國海軍政務將練兵處軍學司原設水師科及工部畫出船政等事宜統
行併入 一海軍處凡關海軍釐訂章制考究教育節制海軍人員監督造
械及造船廠塢並擴充辦法等項事宜皆屬焉 一凡海軍應辦事件及人
員補官黜陟皆由海軍處酌擬呈請陸軍部堂官核定奏咨辦理 一海軍
處暫設正使一員管理全處事務副使一員幫同管理承發官二員錄事四
員分別經理文牘及一切庶務凡不關涉各司科之件均歸職掌 一海軍
處擬設六司 一機要司掌海軍規制器械駕駛輪機等項事宜區為制度
籌械駕駛輪機四科擬設司長一員承發官一員每科科長一員一二三等
科員十二員錄事六員 一船政司掌修造建築等項事宜擬不分科設司
長一員承發官一員一二三等考工官共五員藝師一員藝士二員錄事六
員 一運籌司掌籌畫海戰事考核教育及應行測繪等項事宜區為謀略

教務測海三科擬設司長一員承發官一員每科科長一員一二三等科員
共六員藝師二員藝士三員錄事六員 一儲備司掌海軍收支經費製購
裝服存儲軍糧及一切品物等項事宜區為會計服用屯積三科擬設司長
一員承發官一員每科科長一員一二三等科員九員錄事六員 一醫務
司掌海軍衛生治療傷病製配醫藥等項事宜擬不分科設司長一員承發
官一員一二三等醫官五員錄事六員 一法務司掌海軍一切法律等項
事宜擬不分科設司長一員承發官一員一二三等司法官四員錄事六員
一以上六司定額外如應添用科員考工官醫官司法官藝師藝士錄事
等隨時酌派均不作爲定額 一海軍處開辦伊始職務尙簡所有此次擬
設六司見尙無庸統設擬先設前三司後三司暫從緩設 一海軍處正使
秩視陸軍協都統擬暫由陸軍部堂官選員照陸軍部丞參缺具奏請 簡
副使秩視陸軍正參領擬由堂官選擇二三員開單奏請派充 一各司科
人員應全用海軍出身之人惟目前擇材爲難暫擬參用京外文武人員酌
補俟數年後人才敷用專用海軍出身人員以歸畫一 一從前海軍人員
係按奏定海軍章程照綠營官制充補見擬仍舊辦理嗣後當比照奏定陸
軍三等九級官階並設置官佐額缺另訂章制續行奏明請 旨遵行
三十四年奏定各省將軍督撫奉 旨簡放他省不准奏調原省陸軍人員
又禮部議覆御史沈潛奏請飭令陸軍部改漢員離任守制略稱查原奏內三
年之喪自周秦迄今二千餘年未之或易一旦改革究非古制如果得力人員
有經手要件未便遽易生手似不妨援奪情之例奏明辦理各等語查三年之
喪古今不易陸軍部不考定制藉口該部改爲陸軍與軍營情事相同遽更丁
之舊制殊失教孝教忠之意請 飭下陸軍部仍即改從舊制以植綱常至該
御史所稱奪情一節竊以爲奪情本非常見或重臣身繫安危與國家誼均休
戚云就有關大局奪情與否 朝廷自有權衡非臣下所能擅請若陸軍部司
員擬稱得力未必全無替人何須輕議奪情應請毋庸置議
又陸軍部奏請議官請兼以各省人員遴選派充

一陸軍管帶以上及參謀官督練公所參議總辦有學識明通兵略優裕者均由陸軍部選擇以原職兼充諮議官 一各省兼充之諮議官仍照定制分爲三等由部派充 一凡關於陸軍營隊學堂局所事宜該諮議官等均得各抒所見提議稟部酌奪 一關於參考各事准由諮議官前往考查明確報部酌核 一新章頒省後推行能否盡利有無應增應改之處諮議官均得詳考利弊據實稟部以資考訂 一部中規畫事項有須體察各省情形者可開列事由飭知該諮議官詳復以憑裁決 一部中飭查或諮議官提議之件有應面詢情形者由部咨省調取該員赴部詢問以期詳盡 一各省兼充之諮議官對部言論對省辦事應各盡其職毋稍牽混以清權限均支原職薪公不另加薪費倘其條議報告果於軍事多裨由部酌獎

宣統元年又奏議覆御史石長信奏請製造諸工量予實職摺略稱自古勸工令典惟有日省月試既虞稱事之文故論秀書升皆爲士族而設周禮考工記所列造作兵器之函人矢人廬人弓人及冶氏桃氏凡在三十工之屬制無可考揆其文義半皆董理工作之官與虞廷工虞水火禮樂兵農各司一職世守其官相類並非舉審曲面執諸工概予名器惟古時貴士故德成爲上藝成爲下今時尚實故士不得獨貴工不得獨賤且古時之工簡今時之工繁古時之工樸今時之工精往往製成一器有關繫天下國家之重士大夫均賴其器以程功予以實職不惟足資鼓勵實屬情理之平西洋各國軍械製造局廠首領以次各官多與我國副協都統參領軍校諸秩相埒東瀛規仿泰西其兵工兵器各廠自廠長以次亦均以將佐尉充之其騎轡輻重各兵工長以外又有技師技手並准士官下士判任文官等各分階級按次遞升是前日之工即異日之官前日之微曹即異日之顯秩而要皆本自兵工學堂或別項陸軍學堂出身從未有僅屬工人徑授諸職我國製造軍械設立學堂較少尙鮮成材將來造就有成自應仿照各國成規於各局廠內分設工官以供驅策且上年臣部奏定陸軍各學堂學生畢業考試出身授官摺內業經聲明凡軍醫馬醫經理測繪及各級學堂考試辦法容詳擬續奏是此後兵工學堂學生考試授官等

項亦賅括在內應照原奏辦理並非該御史所稱小京官一項所能包舉至未設學堂以前各局廠取用本國工匠雖不能科學完全亦未必無專精一藝並能通曉各國語言及文理明白者亟應精拔其尤俾授一職得與士齒以示招賢自隗之意見請 簡派大員前往各省局廠考察擬俟該員周歷完竣考察明確如實有工藝最優者商明 臣部暫仿日本技師技手名目或各兵工長及准士官下士判任文官各等級量予實職由 臣等酌核具奏

二年又奏擬將本部應歸各衙門掌管事宜酌量畫分

一挑補鑾輿衛更夫事宜核與軍事無關擬畫歸鑾輿衛自行辦理 一鑾輿衛請領更香及黃布挖單等項事宜亦與軍事無涉擬畫歸鑾輿衛自行分咨辦理 一陵差鑾輿衛香取校尉車馬及武備院應用夫役水缸事宜核與軍事無關擬嗣後此項車馬應由鑾輿衛徑行直隸總督順天府一律雇備 一東陵 西陵香取運送祭品夫票事宜按此項夫役向由 臣部馬館雇用擬改由該承辦衙門咨行直隸總督順天府雇辦 一內務府致祭泰山轉行山東巡撫事宜擬嗣後改由內務府徑咨該撫辦理 一俄員回國請領勘合及每年寄遞恰克圖箱隻事宜擬請由外務部照會該使館嗣後均由西比利亞鐵路行走寄遞以蘇台因 一欽天監頒發東三省時憲書事宜由該監督徑行該省文報局辦理 一轉送蒙文事宜擬咨明各將軍等徑送理藩部辦理 一馬田租稻事宜按他省驛站夫馬支用米麥料豆均歸度支部辦理此項馬田報銷事屬田賦擬畫歸度支部核辦 一各省墾務報銷事宜按非軍需之款擬即畫歸度支部核辦 一東陵 西陵大差車夫脚價報銷事宜按與軍事無涉擬即畫歸度支部核辦 一廣東海防案內魚雷水雷局夫馬報銷事宜按雷艇各項已畫歸籌辦海軍處核辦該局夫馬一款亦應畫歸辦理 一廣東海防案內電報局一切經費報銷事宜擬即畫歸郵傳部核辦 一各省電報費信資號費各款報銷事宜除軍用電報仍由 臣部核銷外餘應畫歸郵傳部核辦 一各省匯費報銷事宜除匯兌軍用銀兩仍由 臣部核銷外餘應畫歸度支部核

辦 一各省銷案內造報官員出差川資事宜按官員出差應給盤費及兵丁川資向來均歸度支部核辦擬將此款亦歸度支部以昭畫一 一恭遇 皇上巡幸調用差馬差竣解回原牧事宜與軍事無關擬嗣後恭遇巡幸由隨圍官兵各該衙門徑行咨行內務府分別調取 一奏派監收監放馬匹大臣並副都統稽察交馬事宜均核與軍事無涉調馬一項既擬畫歸內務府此條自應一併畫歸辦理 一承辦隨圍官兵領交馬駝並奏補不敷馬匹事宜均核與軍事無關擬請畫歸內務府辦理 一承辦 圍差馬駝賠補定限併馬匹疲瘦變價事宜調取馬駝既擬畫歸內務府此條自應一併畫歸辦理 一武備院等處駝馬倒斃分數事宜核與軍事無關應即畫歸內務府併入調用馬駝案內辦理 一恭遇 陵差調用馬駝並馬匹折價各項事宜擬嗣後畫歸內務府轉行度支部給領 以上各條係應行畫歸內務府事件查察哈爾左右兩翼牧羣馬匹經 臣部於宣統元年奏准專備軍用復於本年奏准改設北軍馬分監豫備供給近畿東三省各處十九鎮軍馬供給之所將來如遇以上各項及其他非關軍事調用馬匹應請統由察哈爾都統所轄之兩都達布遜諾爾馬羣撥用其兩翼牧羣馬匹一律免調備差以符奏案 一承辦察哈爾牧場所屬喇嘛更換家譜度牒劄付事宜擬嗣後徑由察哈爾都統或左右兩翼牧羣統轄總管行文理藩部辦理

又憲政編查館奏陸軍部畫歸各衙門事件其俄員回國請領勘合一條應照舊辦理以重約章其轉送蒙文及廣東海防報銷案內應照見制改稱東三省督撫海軍部以符名實此外均屬妥協請照原單所擬辦理

又陸軍部奏陸軍官佐改正名目酌擬辦法略稱查各項陸軍畢業學生補官者見已不下二千餘員此次改正名目擬請凡係陸軍學堂畢業其從前肄業分科者均照所習科目改正未分科者皆以步科為主均加步隊字樣又從前直隸陸軍速成學堂會分軍械一科其中以礮學為主凡係該堂畢業生均加礮隊字樣其由勞績得保補官係學堂畢業者亦照前項辦理未畢業者按見

在供職隊分由本人呈明該管長官考核報部辦理

又奏援案給與軍事機器製造局工匠實職擬協軍校以下添設司務長上中士下士各階俟製造人材自司務長下能以礮隊人員兼任即行停止

又奏軍實軍牧兩司請暫行照設俟新制完備再行畫分

又憲政編查館軍諮處陸軍部會奏釐訂陸軍部暫行官制大綱略稱陸軍籌備事宜均應提前辦理而尤以組織中央軍政機關為入手辦法見經參照各立憲國中央行政機關編制釐訂暫行官制大綱期與將來各部新官制體例相符於軍事性質融合其名稱地位等如有歧異之處統俟釐訂新官制時再行酌歸一律繕表呈候 欽定此次 臣等所擬係採取各國軍署編制務使階級較少事類相從一洗從前牽掣推諉之習陸軍部長官總持軍政責任宜專擬設陸軍大臣陸軍副大臣各一員統轄全國陸軍行政事務所有原設之尙書左右侍郎左右丞參均擬一併裁撤並將舊設之兩廳十司各處職掌事宜酌核歸併另設承政等八司審計一處其軍學院未經專設以前並擬暫設軍學處掌管陸軍教育事宜遴派司長等員分任經理奉 諭所擬各節尙屬周妥所有尙書侍郎左右丞參各缺著即裁撤改設陸軍大臣一員副大臣一員當此整軍經武之際該大臣等務當認真整頓切實進行

又御史陳善同奏見在近畿陸軍各鎮歸陸軍部直接管轄本畫一教育嚴肅紀律之要策惟分紮直隸山東東三省之各鎮遇有調遣必須由該督撫等電商軍諮處陸軍部奏請辦理按之見在情形實有大可慮者各國軍事行政所以專責之部臣者以輪船鐵道處處可通緩急足恃也若直隸山東東三省除傍鐵道及海口各地方交通尙稱便利外其較遠之處近或數百里遠或千里以外事變之來瞬息萬狀以散在各地地方駐紮之兵星火赴調尙虞不及若必商請時日周轉不免失機債事此可慮者一電線分布各處多人守之而不足一人毀之而有餘萬一竿絲中斷消息不通為督撫者束手待縛星不滅倏忽燎原此可慮者二督撫於各鎮既無直接調遣之權平時不受約束臨事即無服從之義務情誼不能相聯進退何能如志稍有齟齬變端百出此可慮者

三見在外患內憂禍機四伏厝火積薪有觸即發各該省等係腹背重地不可不慮遠思深以利策應而資拱衛臣以為平時之訓練自宜直隸於中央而有事時之調遣不可不分寄於督撫應如何權宜變通請飭軍諮處妥議具奏又陸軍部會奏釐定陸軍補官任職考績章程略稱臣等酌參中外總期切近易行一為陸軍補官章程上年自軍諮處奏定暫行章程十一條大要已釐然具舉惟見在陸軍官佐其所加字樣既各異其名稱則實授官階雖強同其辦法況除升轉改各項頭緒甚繁條目各別必須詳加釐訂始克推行盡利此次擬訂補官章程區分六門曰總綱曰除補曰升補曰轉改曰獎敘曰分伍凡有關於軍官事項者皆隸焉一為陸軍任職章程官之與職一經一緯名異而實同以相當之官任相當之職各國軍政大率相同補官章程既經續訂則任職一切規制亟應及時籌改庶幾表裏同符此次擬訂任職章程區分五門曰總綱曰補職曰升職曰轉調曰職分凡有關於軍職事項者皆隸焉一為考績表章程陸軍官職成績所判非考課無以周知而成績之優劣官職之升轉因之則表與章程固查察屬員之準的亦補官任職之規繩是以於補官任職外擬具十條附列二表以臻完密而專責成

又會奏陸軍補官擬請於定章外暫定權宜辦法略稱此次擬訂陸軍軍官補官任職等章程內有除補一門限制頗嚴誠以軍人分位至為尊榮倘補授官階稍涉通融即無以勵成材而重名器惟查見在軍隊以及衙署學堂局所人員有官與職太相懸殊者有以他項官階任陸軍之要職者且有陸軍學堂畢業尚未考試授官已充上中級之軍職者參伍錯綜猝難一致推求其故非限於編練之時期太促即限於學堂之成就無多任用不敷以致多所遷就目今補授官階如概照定章辦理誠恐紛更太驟不無窒礙難行臣等再四諮商擬請於規定之中略參權宜辦法舉凡見在軍隊及衙署學堂局所各員或官職懸殊或以他項官階任職或華業尚未考試已充上中級軍級以上數項應由臣等詳加考察果程度相符實在稱職者應酌量補授陸軍實官仍令其署試見充軍職其詳細權宜辦法另案奏明辦理俟補授一律齊全應即停止以

後照章升補則官職相當不難計日而待若其餘任職人員所有除補仍應照章分別核辦不得援引以免弊端而期整飭

又會奏嗣後請飭及奏補陸軍各級人員均歸陸軍部具奏

三年奏定陸軍任職期內暫行加銜辦法

第一條凡陸軍軍隊等處前經派定職任人員均給與陸軍相當之銜嗣後有應行加銜人員均照本章辦理 第二條上等各級職任較崇如係應行加銜具奏聲明請旨辦理 第三條中次兩等軍職繁多所有加銜均擬毋庸聲請以免煩瀆 第四條凡充任軍職應行加銜各按等級分列如左 上等一級應加正都統銜上等二級應加副都統銜上等三級應加協都統銜中等一級應加正參領銜中等二級應加副參領銜中等三級應加協參領銜次等一級應加正軍校銜次等二級應加副軍校銜次等三級應加協軍校銜 第五條此項加銜專為尊崇體制整飭軍容起見所有加銜人員凡在軍隊等處任職期內於軍禮服軍常服時方准戴用餘均不得戴用 第六條凡在任職期內得有加銜人員將來升轉自應換給相當之銜 第七條以上各條係權宜辦法俟軍隊等處人員官職相當之後即應停止

又會奏遵議陸軍部暫行官制略稱見在陸軍部一切職掌凡與軍事行政無涉者已逐漸盡撥管理全署機關務極簡括方合立憲國軍署編制疊經集議擬分設承政軍制軍衛軍需軍醫軍法等六司並陸軍審計一處暫設軍牧司軍學處為將來改建軍馬總監及軍學院基礎此外設參事檢察專官參訂一切法律章制檢察軍隊局廠學堂並設部副官以備使令分派調查員駐紮各省隨時監察報告均直接大臣各專責任至舊設之軍實司前經奏明應併入軍制司辦理舊設之捷報處馬館事涉驛站亟應一併畫分擬俟新舊事項辦有端倪即奏明裁併至從前廳司事務繁雜員額較多今職掌既多歸併自宜實力核減當督飭各司處長酌擬員額一再減削計全部應設員司實較舊設減少三分之一將來各司應行剔出事項逐漸盡清尚可再行刪減各司處長以次職員應以何項官階補充亦經按照陸軍官佐等級分別擬訂謹繕單列

表呈覽

陸軍大臣陸軍副大臣管理全國陸軍行政事宜統轄陸軍軍人軍屬 參事官掌參訂一切法律章制並本部諮詢事件及特交參議各事宜 檢察官掌陸軍軍隊學堂局廠等處檢察及大臣副大臣特命檢察一切事宜 駐紮各省調查員掌調查各該省軍人軍事報告本部事宜 部副官供大臣副大臣隨時差遣及傳達命令

承政司掌本部文牘收發軍費出入各官差缺功過並全部庶務凡不隸他司及應會同各司辦理事項皆歸管理分設四科曰秘書曰典章曰庶務曰收支 軍制司掌全國陸軍制度編制徵調補充及軍械製造交通建築等項事宜分設七科曰蒐節曰步兵曰馬兵曰砲兵曰工兵曰輜重兵曰臺壘

軍衡司掌陸軍官佐補官任職旗幟防營員弁升調及敘功議過卹賞並陸軍官佐各項武職難應行帶引驗放等項事宜分設四科曰任官曰賞賚曰考績曰旗務 軍需司掌經理全國陸軍營隊學堂局廠之出納會計及軍需人員教育等項事宜分設三科並附設銀庫曰統計曰糧服曰建築

軍醫司掌全國陸軍衛生治療醫藥器具及軍醫教育升調等項事宜分設二科曰衛生曰醫務 軍法司掌全國陸軍司法刑罰陸軍監獄等項事宜不分科 陸軍審計處掌監督陸軍署軍隊學堂局廠等處所用軍費確數實行會計檢察並覆核各項豫算決算在陸軍會計法未普行以前本部舊管之銷算事宜並歸稽核分設二科曰綜察曰核銷 軍牧司設於軍馬之購運補充孳生牧養醫馬醫等項事宜分設二科曰均調曰蕃殖 軍學處設於學堂學堂各項軍隊訓練各項陸軍學堂教育學術並研求成績等項事宜分設六科曰教育曰步隊曰馬隊曰砲隊曰工程隊曰輜重隊

陸軍部職員表

陸軍大臣 參事官四 檢察官八 駐紮各調查員 部副官四 錄事二 承政司 司長一 科長四 科員二十八 錄事二十 正都統 軍制司 司長一 科長七 科員三十六 錄事二十 軍衡司 司長

一 科長四 科員四十 錄事二十六 陸軍副大臣 軍需司 司長
 一 科長三 科員三十 錄事三十 軍醫司 司長一 科長二 科員十四 錄事十 軍法司 司長一 一等司法官二 二三等司法官初級司法官十二 錄事十 正都統副都統 審計處長一 科長二 科員二十八 錄事十六 暫設軍牧司 司長一 科長二 科員十 錄事十 暫設軍學處長一 科長六 科員三十四 錄事十四

一各職司均應以陸軍官佐充任見因陸軍人員尙形缺乏擬暫以階級相當著有成績之各項文官酌量參用 一參事官檢察官分爲一二三等以正參領以次之軍官及相當之文官遞充調查員部副官以正參領以次之軍官派充 一司處副官以正副軍校及相當之文官遞充 一暫設之軍牧司軍學處爲將來改建軍馬總監及軍學院基礎是以表內附於陸軍審計處之後 一舊設之軍實司擬俟籌議就緒即奏明實行裁併是以表內未經列入

又頒陸軍部暫行官制改陸軍部大臣爲陸軍正都統副都統以蔭昌爲正都統壽勳爲副都統

皇朝續文獻通考卷一百二十四

職官考十 京文職

海軍部

宣統元年 諭海陸兩軍立國之要前因釐訂官制奉 先朝諭旨海軍部未設以前暫歸陸軍部辦理嗣有旨派載洵薩鎮冰充籌辦海軍事務大臣復派載洵等前赴各國考察一切籌辦漸有端緒茲據載洵等會同憲政編查館王大臣奏擬訂海軍部暫行官制大綱列表呈覽一摺詳加披閱尙屬周妥自應設立專部以重責成所有籌辦海軍處著改爲海軍部設立海軍大臣一員副大臣一員該大臣等務悉心規畫實力經營以副朝廷整軍經武之至意至應設之海軍司令部事宜著歸海軍部兼辦

又籌辦海軍大臣載洵等奏擬訂海軍人員官階職任請照陸軍奏定三等九級新官名目品位自正都統至協軍校皆冠以海軍字樣以示區別而專任使惟海軍用人更視陸軍選擇宜密非閱歷有素肆習有年者弗勝斯選查陸軍部奏定陸軍補官任職摺內聲明凡學堂出身游學畢業諸習武備帶領新軍者分別除授見擬海軍官制任用辦法亦請以曾在中外海軍水師各學堂畢業及管帶海軍著有成績者分別除授如人材資格實在不敷仍當隨時另擬變通辦法以免窒礙

二年籌辦海軍處奏重訂各司職掌略稱 臣等於上年奏設參贊廳專設參贊一員廳內分設秘書庶務兩司掌管文牘庶務並設一二三三等參謀官以海軍學生出身人員充當此外暫設第一第二第三第四四司嗣又奏添醫務司各等因均蒙 俞允欽遵在案見在辦理諸務漸有端緒各司名目職掌自應詳加釐訂以符名實所有原設之第一司擬名曰軍制司掌海軍規制考績駕駛器械輪機等事第二司擬名曰軍政司掌修船造艦建築工程等事第三司擬名曰軍學司掌海軍教育訓練謀略等事第四司擬名曰軍防司掌銓衡各省水師將弁並偵測等事醫務司擬名曰軍醫司掌海軍衛生療傷醫藥及軍醫教育等事參贊廳內原設二司一爲秘書司今擬名曰軍樞司掌全處人員

升遷調補差缺機密公牘函電及承發文件等事一爲庶務司今擬名曰軍儲司掌海軍經費暨服裝軍糧等事此兩司原擬專辦 臣處署內一切文牘庶務故隸屬參贊廳茲因機要事件日繁各艦除煤糧服用亦須籌畫亟宜分別撥歸該兩司經理與從前專辦署內事件不同擬請毋庸設於廳內俾得與各司分任職掌惟一二三三等參謀官擬請仍舊留廳以資佐理此外尙有海軍軍事裁判掌風紀法律等事亦關重要擬請另設專司名曰軍法司以上八司各分職掌遇有應辦事件仍照原奏均由參贊廳承 臣等安定後督飭承辦至各司分科辦事細則容飭令參贊督同各司詳議

又 諭載洵等會奏擬訂海軍部暫行官制大綱一摺詳加披閱尙屬周妥自應設立專部以重責成所有籌辦海軍處著改爲海軍部設立海軍大臣一員副大臣一員該大臣等務當悉心規畫以副朝廷整軍經武之至意至應設之海軍司令部事宜著暫歸海軍部兼辦

又海軍部大臣載洵等奏海軍部已經成立惟官制未頒所有辦公廉費是否仍照籌辦海軍處原支數目暫領抑應如何變通得 旨仍照從前數目分別暫時支領

又奏請定海軍大臣品秩擬視尙書副大臣擬視侍郎

三年 諭海軍大臣具奏載洵著補授海軍正都統海軍副大臣譚學衡著補授海軍副都統

又海軍部會奏遵擬暫行官制 略稱查官制大綱原表所列軍防司分設偵測銓衡兩科其銓衡一科掌管各省水師人員補缺事項與原表軍制司考核科所掌水師人員考績事項實屬相承今擬將銓衡科改隸軍制司以歸簡括所餘偵測一科查其掌管事項與外國之水路部大致相同水路部係獨立機關惟見時中國海軍規模尙待推廣自不必仿其獨立之制致涉鋪張然測海製圖實爲海軍重要事件亦不可不預立基礎以圖擴充今擬將該科軍學司所有一切偵測事宜照舊責令經營並隨時察看情形添置測量海道器具印刷圖籍機件以期逐漸推廣俟規模粗有端倪再行奏請設立局所專司偵測

事宜銓衡偵測兩科既分隸軍制軍學兩司則原設之軍防司自應裁撤又原表軍學司調查科所管事項多與謀略科相承今擬將調查科裁撤所有原管事項歸併謀略科辦理又原表軍制司器械科所管事項多與製造有關今擬將該科改隸軍政司此外各司處既分科任事復設司長計長等員以總其成則原表所列司副計長等員亦擬一併裁撤以一事權至海軍司令部查係掌管國防用兵等事務責任綦重臣等自當懷遵 諭旨督飭所屬人員認真籌畫切實經營以仰副 朝廷整軍經武鞏固海疆之至意茲將各司長以次職員及其職掌事項分別擬表繕單呈 覽

海軍部職員

海軍大臣 海軍副大臣 正都統副都統 參謀官六員 參事官二員
 秘書官六員 司電員二員 藝師二員 藝士二員 錄事二員 軍制司 司長一員 科長五員 科員十四員 錄事十員 軍政司 司長一員 科長三員 科員八員 錄事四員 軍學司 司長一員 科長五員 科員十四員 錄事八員 軍樞司 司長一員 科長三員 科員十員 錄事八員 軍儲司 司長一員 科長三員 科員十員 錄事六員 軍法司 司長一員 一等司法官二員 二等司法官三等司法官學習司法官八員 錄事三員 軍醫司 司長一員 科長二員 科員四員 錄事三員 主計司 計長一員 科長二員 科員八員 錄事六員

附記 一表列各職司均應以海軍官充任見因海軍人員尙形缺乏擬暫以階級相當著有成績之各項文官酌量參用 一參謀官分爲一二三等均以海軍學生出身人員充任 一參事官秘書官均以資格相當之軍官文官遞充 一司電員藝師藝士均以階級相當之海軍官佐及文官學生等酌量錄用 一錄事以文官學生及額外軍官以下各級人員錄用 一表列員司各職雖有一定官階如無相當人員得以次級官試署 一表內各司長計長如將來循資累積致所補官階高於原定品級者司長仍得以

副都統充任計長仍得以協都統充任 一表列各司處科員以下員額均就見在情形暫行設定如將來部務較繁隨時奏明添設

軍諮府

光緒三十二年編纂官制大臣奏釐定軍諮府官制摺略稱按周官大司馬掌九伐即當今各國參謀部之職唐之諸道元帥府五季宋之樞密院金之都元帥府皆與兵部分置專掌兵事今各國如日德皆以國君總元帥之任誠以兵馬大權宜總之於上今擬設軍諮大臣即仿唐諸道元帥宋都元帥用舒王梁王之意宜請 備宗親重臣爲之我 朝咸豐同治年間畿甸征勦粵捻各匪皆以惠親王恭親王統督諸軍此近事之可證者又軍諮副大臣主贊助大臣指揮軍事職任亦重擬不限正副都統皆得 簡用即如唐之諸道副元帥則爲郭子儀李光弼李晟渾瑊諸人金之左右副元帥則爲完顏昌完顏希尹諸人皆以勳望居之此副大臣選擇宜慎階級宜崇之證也

軍諮府

軍諮府 司併入本府
 第一條軍諮府爲上承 詔命襄贊軍謀之地凡經武要略之政皆匯焉
 第二條軍諮府設軍諮大臣一人恭候 特簡掌贊畫全國軍務爲全府之長官 第三條軍諮大臣凡軍事之計畫命令均由其奏擬隨時入對請旨飭下陸海軍大臣或督兵大臣辦理其有應商之內閣及陸海軍部者亦准請開閣議與總理大臣左右副大臣及陸海軍部大臣會同入對 第四條軍諮大臣統轄陸海軍各參謀官監察軍事教育凡陸軍大學堂測繪學堂使館武隨員等皆隸之 第五條軍諮大臣掌考核各軍隊成績並承旨調遣全國陸海軍隊以及訂立行軍條規各事於在京各衙門及各將軍督撫關涉事件可隨時咨行辦理 第六條軍諮府設軍諮副大臣一人恭候 特簡贊助軍諮大臣整理全府事務考核政屬各員功過 第七條軍諮府分設五司其目如左第一司第二司第三司第四司第五司 第八條第一司 司以軍令司運籌科所 掌擬發文電擬辦奏咨批檄章程及各項稿件管理庶務及本府出入款項第二司 司以軍令司運籌科改設 掌籌度戎機考核軍隊實

在成績事項第三司以軍令司測繪掌測繪地圖考核方輿險要形勢及兵路運道事項第四司以軍令司測繪掌測繪地圖考核方輿險要形勢及兵路運道事項第四司以軍令司測繪掌測繪地圖考核方輿險要形勢及兵五司掌探訪購置軍用圖冊畫器及經理文庫事項 第九條每司設司丞一員掌理司務 第十條每司分設各科每科設科長一員辦理科務並於第一司設秘書官副官會計官書記官第三司設藝師藝士第五司設司庫官每科酌設一三三科員襄理科務每科分設各股酌用一二等股員以資分理各司科均設錄事以供繕寫 第十一條各司司丞由軍諮大臣軍諮副大臣酌擇相當人員三人開單請 簡 第十二條各科科長第一司之秘書官副官書記官會計官第三司之藝師由軍諮大臣軍諮副大臣奏擬相當人員帶領引 見請 旨補授 第十三條各股一二等股員與第三司所設藝士各司科錄事均由本府札補 第十四條軍諮府請簡奏補札補各員有應行懲處或罷斥者由本府大臣商同副大臣定議後分別奏咨參撤 第十五條軍諮府司科各員應全用陸海軍出身之人惟創設伊始擇材為難暫准以京外文武人員擇其於本府事體相宜者酌量借補俟數年後人材敷用仍專用陸海軍出身人員 第十六條軍諮府司科各員廉俸由本府酌擬奏定 第十七條軍諮府應需經費由本府於每年九月預估奏請飭下財政部照撥 第十八條軍諮府詳細條例應俟奉 特旨簡定軍諮大臣後由該大臣另行酌議奏明辦理

軍諮府職官表

軍諮府大臣以親郡王貝勒貝子副大臣以陸軍正第一五司司丞及正副官以陸軍正第一五司司丞用文第二三四司司丞以正協都統各科科長以正副都統第一司秘書官以軍用文官充副官以副都統書記官以軍用文官充會計官以軍用文官充各科一等科員以副都統二等科員以副都統三等科員以副都統一等股員以副都統二等股員以副都統三等股員以副都統藝士錄事以副都統

三十三年軍諮處奏設官制

一軍諮處暫設正使一人秩視陸軍協都統管理全處事務副使一人秩視

陸軍正參領幫同管理承發官二人錄事四人分設五司 第一司掌第一第二第三第四等科事宜設司長一人每科設科長一人一二三等科員十人一二三等譯員五人錄事八人 第二司掌第五第六兩科事宜設司長一人承發官一人每科設科長一人一二三等科員四人錄事六人 第三司掌第七第八第九第十第十一等科事宜設司長一人承發官一人每科設科長一人一二三等科員十人錄事八人 第四司掌第十二第十三第十四第十五等科事宜設司長一人承發官一人每科設科長一人一二三等科員九人錄事六人 一測地司掌陸路測量繪圖及測量人員教育並測繪學堂等項事宜設司長一人承發官一人分設三科每科科長一人一二三等科員六人藝師四人藝士八人錄事八人以上五司定額外如應添用科員譯員藝師藝士錄事等隨時酌派均不作爲定額

宣統元年 諭設軍諮處著貝勒毓朗管理軍諮處事務應如何定擬籌辦事宜即著妥酌奏請施行

又 諭派派郡王銜貝勒載濤提督薩鎮冰管理軍諮處事務俟以後釐定軍諮府官制時再候諭旨

又軍諮處奏軍諮處開辦事務極繁次第經營統計開辦費約銀六十萬兩常年費約銀一百十八萬九千兩擬懇飭度支部照預估銀數速籌的款其常年一項並按年撥付以資應用

又軍諮處奏定軍諮處暫行章程摺略稱查原設之軍諮處奏定章程暫擬設五司內先設三司兼攝其餘兩司事宜今職務倍增原設司缺已難包舉應先分設各廳以重職守擬首設總務廳一置軍諮使二員凡不隸各廳事務歸其辦理此外分設第一第二第三第四第五及海軍等六廳各設廳長一員統理全廳事務又於各廳分設各科每科設科長一員管理全科事務再分設一二三等科員以資助理並分設錄事以供繕寫總計全處共設七廳於見時應辦事宜足資分理

軍諮處暫行章程

第一條軍諮處為贊助 皇上通籌全國陸海各軍事宜之所凡關涉國防用兵一切命令計畫胥由本處擬案奏請 親裁飭下陸海軍部 設以前海軍部 欽遵辦理 第二條軍諮處統轄陸軍大學堂 設以前海軍部 陸地測繪學堂駐節各國使館武官陸軍文庫並海陸軍參謀等官及考覈該參謀等成績事宜 第三條軍諮處籌畫事宜 諭由管理事務大臣妥酌具奏恭請 頒發遵行 第四條此次係遵 諭為先行籌辦軍諮處之暫行章程俟隨時修改逐漸擴充再行請 旨設立軍諮府以垂久遠 第五條分設總務第一第二第三第四第五及海軍等廳 第六條總務廳以次所管職掌另案奏明辦理 第七條總務廳設軍諮使二員稟承管理軍諮處事務大臣統轄各科辦理所管事務凡不隸各廳之事皆匯焉 第八條其餘各廳均各設廳長一員並酌設副官經理各廳庶務 第九條各廳應設科數及軍官軍職額缺另案奏明辦理 第十條各科設科長一員並酌設一三三等科員經理科務一三三等錄事以供繕寫 第十一條軍諮使及各廳廳長均由管理大臣擬定人員請 旨派充科長以下各員遴員委派按期彙奏 第十二條軍諮處應補軍官軍佐人員均由管理大臣奏請補授 第十三條軍諮處人員應全用陸海軍軍官承充惟總務廳第四廳第五廳科長科員及各廳之錄事均可參用文官其章程另案奏明辦理 第十四條各廳額設人員如見在人才不敷未能全數設置任缺毋濫 第十五條此次所擬各廳員缺均屬從簡編制推行以後如有應行增設之處管理大臣體察情形隨時奏明辦理 第十六條軍諮處經費勿論額支活支按年分別預算請 旨飭部照撥 第十七條軍諮處附設顧問官員額無定由管理大臣遴選品端學粹者請 旨派充 附錄擬訂軍諮處職官清單 軍諮使 以副協部統 各廳廳長 以副協部統 各 科科長 以正副 各科一等科員 以副協部統 及各科二三等科員 以副協部統 及同協部統 副官 以副協部統 正副軍校 以副協部統 又軍諮處奏遵擬各項各級軍官特簡奏補及委充章程摺略稱奉 旨飭軍

諮處妥擬章程自應就原奏補官各條逐加釐訂著為定章擬遵乾隆五十一年 諭於陸軍官佐品級內增入正一品一階以為武職大員晉秩加銜之地查會典內載順治十二年鑄大將軍將軍印又載大將軍將軍以王貝勒貝子公及都統親信大臣充之見在日本亦以武官最高之級特加元帥稱號今擬稍事變通遇有正都統之積有勳勞者 賜以大將軍或將軍名稱並 賜以封號作為正一品既與文官品級無所差池按之舊日 賞加官銜辦法亦相符合此宜酌定者一向例鹽運使以上文官皆係 簡放道員分 簡放部選外補三項直隸州通判知縣均係奏補縣丞以下各官均咨補各項軍官軍佐補官等差自應照文官品級辦理擬請嗣後中等第二級以上各官佐均歸 簡放中等第三級各官佐及次等一三三級各官佐照道員以下部選例均歸 軍諮處會同陸軍部奏補額外軍官軍佐均歸咨補以免文武有所偏重此宜酌定者二各國陸軍官制中等以下各官分掌警察步馬礮工輜各隊事務悉於官名上冠以各隊字樣所以明職守示區別用意精考今擬仿此制自正參領以下各官均就所習之科目標以名稱此宜酌定者三又原奏所定凡軍佐均於官名上加一同等字示與軍官有別竊維軍佐職掌各有專司門類不能一致僅於官名上加一同等字亦嫌界限不清今擬仍照軍官辦法自副都統以下各官均就所習之科目標以專門之名稱以示區別惟軍佐辦理軍事責任綦重體制應與軍官一律此宜酌定者四此外如額外軍官及軍事之類各有專司亦當分別階級釐訂職名附於軍官之次俾歸完備 又奏定陸軍人員補官暫行章程 一此項陸軍官佐補官辦法均照文官例辦理 二嗣後陸軍各項官佐必須由陸軍學堂出身人員方准充補 三中等第二級以上各官佐由軍諮處會同陸軍部查取應補應升人員品學勞績擇尤預保存記開單候 簡中等第三級及次等一三三級各官佐由軍諮處會同陸軍部擬補具奏帶 領引 見請 旨補授 四中等第一級以上各官佐均准專摺奏事中等 第二第三級各官佐均准呈遞例摺謝 恩 五額外軍官軍佐及軍士須

受軍士完全之教育者方准補充見在此項人材缺乏暫准以見充弁日人員酌補 六額外官佐及軍士由督練各部統將軍督撫大臣外補否報軍諮處陸軍部 七額外官佐如能再入兵官學堂各項專門學堂畢業者准其升補軍官軍佐 八額外官佐如在戰時異常出力而具官佐學識者亦准升補軍官軍佐 九新設此項官階永無候補名目或帶領軍隊或辦理各項軍事一經奏准補授均為實任官除因案斥革不計外其供職年久例應退休人員亦得食減成俸餉至俸餉章程容專案奏定辦理 十各級官佐及軍士均准以京外對品文職酌量改用 十一從前已經補授之正參領以下各官均應按照所學科目冠以陸軍某隊字樣同正參領以下各官亦應按照所學科目改為各項軍佐專官以符新定章制 以上各條為見行章程如有應行損益變通之處仍由軍諮處考核具奏請 旨遵行 又奏定陸軍參謀章程略稱查參謀官關係軍事極為重要自應參仿各國成規釐定參謀章制以資遵守

第一條參謀官輔佐統兵大員籌畫國防及用兵機務兼掌練成軍隊事宜其他特別任務悉依各項專章所定施行 第二條各參謀官均直隸軍諮大臣 第三條參謀官以正軍校以上有左列兩項資格者方可充當一曾經陸軍大學堂軍官學堂以前畢業或游學各國陸軍士官學校以上各學堂畢業且均在軍隊任職一年以上經軍諮大臣認為能勝參謀之任者一材能出眾深曉軍事之軍官經軍諮大臣歷試不爽者 第四條凡參謀官每進一級至少須在軍隊服務一年 第五條各參謀官差缺可令彼此互調以期熟習 第六條參謀官每年可令任擇兵科一門在隊兩月服習隊中勤務

二年又奏 臣處有籌防用兵之責各省參謀既未備設而地方邊關經費奇絀遇有事故消息不靈前經商准郵傳部札派各處電局委員為本處通信員不另支給薪津遇有關地方重要事件即由該電局委員先行直接電稟本處以備參考而期迅速查近來湖南山東民變事起迭據各通信員陸續電稟得以

探悉軍情於 臣處籌防計畫裨益非淺擬請嗣後各通信員有能報告迅速不誤戎機者由 臣處酌請獎勵

又奏准設立軍事官報

又奏准未設軍事參議院以前暫設軍事會議處

又奏略稱軍事司法人員 臣等於遵議補官辦法時深以關係重大未便率行擬定當經與陸軍部詳細咨商見准該部復稱軍事司法於軍事上有重要關係擬於陸軍補官任職章程內將司法人員比照軍需軍醫等官階級分別補用列為軍佐等因到處 臣等查立憲之國軍人皆直隸君上不能受法律家之制裁遇軍人犯罪時特開軍法會議仍以軍官為主任司法但充顧問而已是司法人員於軍事裁判時應立於贊佐軍官之地位今陸軍部所擬將此項人員比照軍需軍醫等官列為軍佐與立憲國制贊佐軍官之意尚屬相符自應奏明請 旨將軍事司法人員所有軍官額外軍官軍士各級官階均冠以軍法字樣比照軍佐一律辦理

三年改軍諮處為軍諮府所有軍諮府官制一切事宜由該衙門妥擬奏聞裁定施行

又 諭郡王銜貝勒載瀾貝勒毓朗均著授為軍諮大臣

又奏事章程

第一條軍諮府奏事均由面奏或用奏片不具正摺 第二條軍諮府奏事以軍機軍令為限 第三條軍務報告均經由督師大臣會同軍機大臣奏報 第四條軍諮府奏事均不登載官報 第五條本章程於海軍司令部奏事適用之

皇朝續文獻通考卷一百二十五

職官考十一 京文職

刑部

謹案刑部尙書始於隋夏殷司寇周秋官大司寇卿也侍郎亦始於隋分左右始於明秋官小司寇中大夫也官制雖有沿革舊章罔不率由自改刑部爲法部設審判廳檢察廳號司法之獨立增無數之枝官歷朝成憲漸滅幾盡可慨也

嘉慶四年議定裁滿洲郎中員外郎主事各一人改設宗室郎中員外郎主事各一人
是年以大學士兼理部務

臣謹案順治八年以王貝勒管部九年停之至是以大學士兼理嗣後或兼或停並無定制惟上意所嚮而已

十二年 諭前因御史德祥條奏刑部各司印鑰多有令主事管帶者殊於體制未協當經降旨令刑部明白回奏茲據該堂官覆奏稱各司揀派掌印原應先儘職分較大之員惟郎中員外內有捐納得缺及由各衙門推升到部者於刑名例案一切未能嫻習不得不量爲調劑見在各司以主事掌印者止有四員實因一時乏人始行揀派並非意爲凌職等語自係該衙門實在情形本日召見韓崧亦據奏伊前任司官時即見各司印鑰多有派主事管帶者是該部相循已久並不始於今日但思國家分職授官體制皆有一定不容任意撓越致紊階級即如各部院堂官滿漢俱有數人而歷來各衙門印鑰皆係滿尙書佩帶凡以班次優崇俾資統攝也見在刑部各司掌印爲管理一司事務之員自應儘職分較大之郎中員外責令管帶即此中有甫經部選得缺人員於例案未能嫻習該堂官自可留心試看如其才識實不勝任即當據實指參開缺另選若止於部務生疏尙堪供職者應責令隨時學習並揀派該衙門熟諳司員幫同辦理則既可造就人才而公事仍亦無誤又何必因仍陋習致滋物議乎嗣後該衙門掌印司員總當於郎中員外內遴選管帶所有見派主事掌

印之四司著該堂官撤回另行委員接管以符體制

定制錄直省獄囚曰秋審錄刑部獄囚曰 朝審歲以八月刑部會九卿詹事科道於 天安門外金水橋西公閱其爰書而覈定之初以四川廣西兩司分掌案牘雍正十二年始別選司屬滿洲漢人各二員主其事曰總辦秋審處尋佐以協辦者四員歲滿則交替乾隆十九年以後凡核直省審冊辨實緩矜疑之當否以白於長官皆以總辦司員任之先後增至十六人學習者無定員其職雖出堂官掄派而專司秋讞所繫甚重至如三法司會議凡刑部重辟囚先以御史大理左右寺官會刑曹察其辭辨其死刑之罪而要之曰會小三法司及致辭於長官都御史大理卿迺詣刑部與尙書侍郎會聽之各麗其法以議獄曰會大三法司迨三司合議而後上之

光緒六年議准雲南司添設宗室員外郎一人又裁滿洲左右翼筆帖式各一人改添宗室筆帖式一人

二十八年 諭見在通商交涉事益繁多著派沈家本伍廷芳將一切見行律例按照交涉情形參酌各國法律悉心考訂妥爲擬議務期中外通行有裨治理俟修定呈覽候旨頒行

法部

三十二年九月改刑部爲法部

十二月奏定官制 略稱理刑一官關係重大見今易名法部範圍更廣 欽定大清律例一書原有吏律戶律兵律工律名目精深閱遠無不賅第時代既易商律路律諸端尙未議及近今東西各國則有公法私法行政法國際法以及民法民事訴訟法刑法刑事訴訟法類皆萃全國議會之精神參以百年民情之習慣斟酌妥善都歸畫一司法衙門乃總匯而實行之 臣等深維今昔之事勢熟審中外之機宜謹據所陳之一在申明權限也比者法部專任司法大理院專掌審判 明諭煌煌固已釐然悉當凡司法官吏之進退刑殺判決之執行廳局轄地之區分司直警察之調度皆係法部專政之事應由 臣衙門

隨時奏明辦理至於直省刑事稿件原議官制法部及大理院均有覆核明文擬由各省分達部院經大理院覆判後咨部核定請旨施行如有情罪未符仍咨回大理院自行駁正一在分定職掌也刑部向設十七司分掌各省刑事原議改爲六司恐滋竭蹶茲擬遵設承政參議兩廳綜轄部務設參事四員襄理外設八司每司設郎中三人員外主事各四人按省按事酌量分股各專責成其繁雜難以類從者設一收發所以包括之至應設之七八九品京官錄事除由部筆帖式考選改充外量才委用一在廣行調查也日本明治初政注意於法律之改良分遣賢能徧遊歐美歸而釐定法制驟進富強中國此時舉辦新政若禁刑訊若重證人各直省獄局之積習若何各地方監獄之內容若何擬選明達司員委令回籍分行查察擇尤派歷東西各國察短較長取彼所優補我不足以宏探討而備觀摩一在彙訂法律也各部院改定官制舊時法律互相抵觸者在所不免且航路電礦工商律日有發明若不求畫一之規則受治者將無所適從舞文者得任意出入查美國官制各部皆有法官協同經理立法誠善中國法學尙鮮專長不必慕其名而在師其意且與律例一書有吏戶兵工諸律之旨相合擬請飭下各部院衙門將見行則例全咨法部由吏部派員詳細稽核如有牴牾之處會同該部院堂官酌改以歸統一

法部官制

一尙書一人左右侍郎二人 一承政廳設左右丞各一人秩正三品稽察各司重要事務總辦秋 朝審兼核恩赦減等各事掌所轄京外各職員進退並區畫各審判廳轄地調度檢察及司法警察等事宜設參事二人襄理廳務選派司員會同辦理不作額缺 一參議廳設左右參議各一人秩正四品審定各司重要事務編纂條例詳核駁議稿件暨律師注冊等事設參事二人襄理廳務選派司員會同辦理不作額缺 一審錄司掌 朝審錄囚覆核大理院各審判廳局暨直隸察哈爾左翼兩廣雲貴案件 一制勘司掌勘定秋審實緩宣告死刑暨四川河南陝甘新疆烏里雅蘇台科布多案件 一編制司掌減等編發暨奉天吉林黑龍江山東山西察哈爾右翼

綏遠城歸化城案件 一宥恤司掌恭辦 恩旨 恩詔條款清理庶獄暨江蘇安徽江西福建浙江湖南湖北案件 一舉敘司掌各司升補官缺暨京察奏留及考驗法官律師法律畢業各員等事宜 一典獄司掌直省監獄習藝所罪犯名冊衣糧編纂規則統計等事 一會計司掌本部出入經費豫算決算款項贖金罰金及充公贓物財產並各項報告統計等事 一都事司掌繕譯謄繕遞鈔摺件典守堂印等事 一收發所掌收發一切事件暨閩署工程設員外主事各二人原設宗室郎中一缺員外郎二缺主事一缺於額設八司員缺外作爲宗室專缺附於八司一所並添設宗室七品小京官八九品錄事各二缺原設宗室七品筆帖式一缺改爲此次添設之宗室七品小京官另設小京官二十六缺八品錄事五十三缺九品錄事三十缺分隸兩廳八司一所原有司庫一缺司務二缺司獄一缺一併裁撤司庫一項以會計司錄事兼充司獄一項以典獄司七品小京官兼充曰正管守長以八九品錄事兼充曰副管守長舊有提牢廳一差共兩員改以典獄司員外郎主事兼充曰總管守長不另設缺司務一項係都事司應辦之事無庸添設

京師高等審判廳廳丞一人秩正四品推事刑科民科各六人秩正五品典簿二人秩正七品主簿四人秩從七品錄事六人 內外城地方審判廳廳丞二人秩從四品推事刑科民科各二十四人秩從五品典簿四人秩從七品主簿八人秩正八品錄事二十人 初級審判廳推事十人秩從六品錄事十人

京師高等檢察廳檢察長一人秩正四品檢察官四人秩正五品錄事二人 內外城地方檢察廳檢察長二人秩正五品檢察官八人秩正六品錄事四人 初級檢察廳檢察官五人秩從六品錄事五人

三十三年政務處奏據御史趙炳麟奏稱司法人員皆定爲終身官令其久於職掌可以伸公理而雪民冤等語查法學人員見在多未畢業一時實難辦到應俟各項專門學生畢業以後再行照此任用至所謂各司員希冀多設額缺

以爲京察截取外轉道府地步等情查見在各署新設之缺過多往往以雙月候選人員率請補授要缺一經捐俸卽予以道府之階不可不防請 飭下法部大理院堂官將見在該衙門額設員缺若干將來如何升轉開單咨由吏部會同_臣等覆覈

又法部奏改補員缺辦法略稱伏維_臣部爲法權總匯事體殷繁決難釋疑全在得人而理茲當改補之初尤宜慎之又慎查向來差與缺分實缺之員不盡辦事並有常不到署者虛名徒寄遷就滋多今既分職掌而專責成欲杜濫竽難拘成轍謹將各項辦法觀縷陳之

一此次改司併缺必須爲事擇人如必拘守部章事理實多窒礙茲擬不分題酌通補一次俟補齊額定各缺後再有缺出遵照吏部新章辦理 一由本部實缺候補司員筆帖式擬請升補新設各司缺及由候補改爲實缺或由候補郎中員外借補員外主事人員均先作爲試署俟三月之後考驗果能勝任奏請實授 一由京外人員奏調_臣部行走者到署之後將履歷咨送吏部先行奏留俟有相當之缺酌量試署 一_臣部實缺人員以大理院奏調爲尤多大理院職司審判創立伊始不能不取材於法部但令仍占原缺則以本部之員辦他署之事勢必多數派署與明定職掌之義不符擬請凡經各衙門奏調實缺人員一律開去原缺仍留資俸咨送奏調衙門差遣將來補缺之日一體接算以昭平允 一此次開缺人員曾經上年具奏安置司員辦法如情願外任者由_臣部咨送吏部照例辦理外其願留本部者作爲候補仍留原俸其有別項記名者照舊辦理以示體恤 一實缺人員充當倉場熱河及奏調出洋等項差使者其例案熟悉與_臣部職掌相宜之員仍改補司缺未回任之前暫行派署餘均開缺作爲候補仍留資俸俟差滿之日分別酌量補用 一參事郎中員外郎主事七品小京官遵照奏定官制開單奏補八九品錄事由_臣等委用 一_臣部原有候補額外學習之郎中員外郎主事筆帖式各員除願改外任者咨送吏部外餘俱按照班次照舊供職分隸八司行走由舉敘司分別注册並咨送吏部存案

又法部奏准裁缺分部人員與本部人員一體較資分班補用又議准變通熱河司員章程並酌加獎勵

又修訂法律大臣奏設法律館情形 略稱憲政編查館原奏內稱分派提調纂修等員及延聘東西法律名家應由該大臣等擬章奏辦等語提調二員已開單奏請 簡派其奏准任用之纂修等員擬分設二科三處曰第一科掌關於民商律調查起草事宜設總纂一人纂修四人協修四人曰第二科掌關於刑事民事訴訟律調查起草事宜設總纂一人纂修四人協修四人曰譯書處掌編譯各國法律書籍設總纂一人譯員無定額曰編案處掌刪訂舊有律例及編纂各項章程設總纂一人纂修協修各二人曰庶務處掌文牘會計等事設總辦一人庶務委員無定額就各員量才分理而以提調總司其成其諮議官調查員另奏派充

又法部奏准京師審判各廳成立以後凡巡警分區營翼地面所以保治安而司緝捕者皆有息息相關之誼見定內外城總廳所管司法警察職務及兩翼營汛地面辦事章程當飭知該管廳一律遵照

又法部奏定司法警察職務暫行章程_{新要}

第一節總綱 凡司法警察人員以巡官巡長巡警充之有協助檢察廳執行事務之責檢察廳需用司法巡警時知照巡警廳轉飭辦理 第二節逮捕人犯 審判衙門發印票由檢察廳備文送交警廳轉飭司法警察執行凡見行犯巡警得逕行逮捕除違警各項帶區判決外其餘解由總分廳派送檢察廳辦理但宗室覺羅職官外國人軍人等須報告本管長官處分 第三節搜查證據 凡審判廳需查取證據時由檢察廳知照警廳轉飭司法警察會同檢察官前往或經本管長官許可得逕行搜查 第四節護送人犯 凡除重要人犯外護送至檢察廳有一定時刻隨到隨收發給收據未收以前有脫逃情事由原解巡警負責 第五節取保傳人 凡審判廳應行傳集人證質訊者由檢察廳知照原送警廳飭區辦理候訊者由警廳區取具鋪保或印結無保仍送交原審衙門管收 第六節檢驗屍傷 司

法警察各員候檢察官到場會同辦理凡路斃及非命死於家宅者由該管區電告檢察廳派員檢驗 第七節接收呈詞 凡命盜案件警區得接受呈詞移送檢察廳辦理民事不理 第八節附則 一凡案件由他衙門送交者其搜查逮捕護送取保等事由原送衙門自理一凡決囚由廳區派警彈壓照料其護決差使仍歸營縣辦理

又 諭各省審判廳著東三省先行開辦此外直隸江蘇兩省亦應擇地先為試辦其餘各省分年分地請旨辦理統限十五年一律通行著各部各衙門妥擬畫一辦法奏定陸續頒行

又各級審判廳試辦章程 第一章總綱 凡審判案件分民刑二項因訴訟而審定罪之有無者屬刑事審定罪之曲直者屬民事登記事件由該管初級檢察廳照章行之

第二章審判通則 第一節審級凡民刑案件由初級廳起訴者如有不服可遞經地方廳高等廳控至大理院為終審由地方廳起訴者亦然 第二節管轄各級廳管轄案件依法院編制草案第二章至第四章辦理初級廳管轄刑事以杖罪為限數人共犯從罪重者之管轄 第三節迴避審判官承審案件如於自身有利害關係及與訴訟人為家族或姻親者應行迴避

第四節廳票分傳票拘票搜查票三種刑事廳票由檢察官指揮司法警察官執行之民事廳票由承發吏執行之見行犯不待廳票可行逮捕 第五節豫審地方廳第一審刑事案件之難者應行豫審見行犯事關緊急者同不准他人旁聽 第六節公判凡訴訟案件經檢察官或豫審官送由本廳長官分配後審判官得公判之公判單獨制以審判官一人開庭合議制以三人開庭用語以官話為準對於外國人得用翻譯官審判方法無限制

但不得非法凌辱審判之評議意見各異時可合本廳各庭長公同議決 第七節判決之執行刑事之判決徒罪於上訴期滿後執行流罪以上遵定章於核准後執行民事之判決於上訴期滿後照左列方法執行一查封物產勒限完案二管理查封物產收息償欠三拍賣查封物產抵償欠款如因

理曲人家產淨絕不能依法執行者得將理曲人收入教養局作工一月以上三年以下對於軍人如須照上判決辦理時得知照其所屬長官行之 第八節協助審判廳或檢察廳遇有捕拿罪人搜查證據及護送或拘留罪人等事須他審判或檢察廳代為辦理者得請求協助遇有交涉案件及於外國管轄區域內逮捕搜查或照上節民事判決辦理者申部行文外交官知照外國公署辦理

第三章訴訟 第一節起訴 第二節上訴 第三節證人鑑定人 第四節管收 第五節保釋 第六節訟費 此章無關於官制職務僅錄其目

第四章各級檢察廳通則 檢察官統屬於法部大臣受節制於其長對於審判廳獨立行其職務其職權如左一刑事提起公訴二收受訴狀請求豫審及公判三指揮司法警察官逮捕犯罪者四調查事實蒐集證據五民事保護公益陳述意見六監督審判並糾正其違誤七監視判決之執行八查核審判統計表凡屬檢察官職權內之司法行政事務上級檢察廳有直接或間接監督之權凡刑事雖有原告概由檢察官用起訴正文提起公訴其未經起訴者審判廳概不受理如檢察官妄為起訴致他人無辜受害者依懲戒處分規則行之檢察官應由法部發給執照遇有見行犯事關緊急時得指揮巡警兵弁搜索逮捕凡審判婚姻親族嗣續等事檢察官必須蒞庭監督否則判決為無效各級審判統計表非經各該檢察廳查核不得申報 第五章附則 本章程自各級審判廳開辦施行俟法院編制法及民刑訴訟法頒行後即停止施行

又法部奏設京師高等審判廳一廳地方審判廳一廳初級審判廳五廳各級均附設同等檢察廳

又奏略稱高等地方各廳均已妥慎布置惟京畿地方遼闊統轄難周見定於內城設初級三廳外城設初級二廳擬請查照民政部所分內城二十六區外城二十區凡於區內有民刑控訴事件悉隸歸各該廳按級審判其營汛分轄地面尚未設廳者旗民人等在該管衙門呈控者笞杖由該衙門議結徒流以

上罪名送交地方審判廳訊辦至順天府轄境尤寬凡在民政部所分區內涉訟無論民刑各事胥歸新設各廳辦理大宛兩縣均應停止審判此外該縣所轄四鄉地方與順屬該管州縣應如何分別設廳之處由順天府會同直隸總督隨時咨商部核辦其未經分設以前應由該府尹於大宛轄地不在內外城區內者先行的派審判官專理詞訟一切審判事宜仍暫照部定試辦章程辦理京師自裁撤五城御史後凡民事訴訟及刑事稍輕案件均改歸內外城豫審廳審辦本係一時權宜之計今各廳既已成立所有豫審廳未結之案自應一併接收第恐案卷繁多若不分期交代必致紛擾立形擬由民政部飭行該廳所有承審各案凡易結者從速清釐不能速結之案無論民刑事件均由該廳檢齊卷宗造冊送交地方審判廳接收核明民事刑事應歸何廳收審者即轉知該廳逐起分期行文提收並由豫審廳點驗犯證出具清單分別交代統限於本月底接收清楚其大宛兩縣見審係在內外城區內者亦即照此辦理此外大理院承辦之案已隸最高裁判擬請毋庸移交以省繁複

又奏京師各級審判廳見經成立辨護士合格之人應請毋庸置議各級審判官果有貪贓枉法及請託情事故出入人罪者自應照例論罪其在上級復控之件有改易下級之處斷者與平反冤獄不同應請免其置議至尋常因公錯誤之事懇 恩准援大理院開辦成案暫予寬免六箇月公罪處分以示體恤一俟部詳定法官懲戒章程再行奏明辦理

又法部遵議御史俾壽奏請派御史陪審以資監督一摺略稱從前刑部舊例遇民命重事本有都察院大理寺會鞠之條然亦僅施之大辟案件並非事事得而會審之也上年九月間欽奉 諭旨刑部改為法部大理寺改為大理院司法分權釐然獨立是以部與大理院會奏暫緩交代摺內聲明罪應新絞重案即照覆核各省彙奏定章毋庸會同法司辦理等因仰邀 俞允在案茲據該御史奏稱審判廳甫經成立擬請添設御史陪審等語查陪審之制始於英國嗣法德諸國遞相倣效已嫌流弊之多蓋其人非盡諳法律強以蒞庭陪審勢必各持意見窒礙滋生是欲取各國之長即不必沿各國之短如謂各廳

甫經開辦監審無人慮其營私情弊不知審判廳制自下級以至上級本互相維繫而各廳檢察各官復專為稽察定讞而設果有枉縱自當據事理以糾正之果有冤抑又得因陳訴而平反之節節防維慎之又慎况部實有監督各級審判之責更可隨時考察執法勤懲似定制不為不密果如所奏以御史居陪審之員權限既涉於紛歧體制亦嫌其糅雜且各級審判分庭不下二十餘處更番研鞠往往至夜未休而御史止六十四人一人而蒞一庭既苦太勞一庭而置數人尤虞不給揣情度勢均有未協要之臺諫之設固以監察為職然當盡者糾彈之責不可侵者官守之權若於改良審判之初即為妨礙法權之舉揆諸司法獨立殊有未符該御史所擬應請毋庸置議至中國法學尙少專門之材原奏稱有立律而無行律之人洵係實在情形等惟有因材器使並督率各廳秉公持法以仰副朝廷矜慎庶獄之至意

三十四年法部奏變通提牢章程酌加獎敘摺稿部南北兩監向設滿漢提牢二員上年新定官制將提牢廳一差改以典獄司員外郎主事兼充日總管守長不另設缺業經照辦惟近來京師地面獄訟日繁大理院及各級審判廳審定罪名送部監禁人犯日多見值監獄改良凡囚犯聽講習藝稽察防範在在均關緊要若無專管之員實不足以專責成無破格之獎亦不足以資鼓勵等悉心斟酌仍擬參用提牢章程量為變通查向例滿漢提牢缺出於司員內各揀選二名擬定正陪請 簡一年期滿勤敏無過即行奏獎今擬將總管守長改兼充為專差於各司實缺員外主事及候補郎員主三項班內擇其留心律例尤為勤謹者不分滿漢揀選四員先儘正途如不敷參用各班擬定正陪遵照新章各行內閣驗放請 旨簡用二員管理兩監事務改為二年期滿庶員經 特派責有專歸每屆期滿仍由 等具奏移咨吏部係實缺人員即以應升之缺升候補人員准其即補實缺倘有誤公弱職亦即分別撤參以專責成而資懲勸至司獄一項前經裁撤以典獄司七品小京官兼充日正管守長八九品錄事兼充日副管守長今亦擬一律改為專差揀派各司實缺小京官二員八九品錄事六員仿照司獄章程分派兩監輪流值班住宿三年期

滿果能勤奮當差由總管守長出具考語呈堂分別奏咨辦理各以應升之缺升補

又奏略稱請將總檢察廳暨京師各級審判檢察等廳所有推事及檢察各官比照部院五六品官之制一體舉行 京察其典簿以下各官亦視部院七八九品官遵例入考以重大典而昭激勸惟各廳開辦甫及年餘若即照吏部新章六員准保一員各廳多才長資淺之員轉有失三載考功之意擬於此處京察先儘_臣部實缺人員調往各該廳補授員缺者計俸量能保薦一等其候補人暨各衙門實缺候補調陞各廳員者本屆均列入二等如此略為限制庶於鼓舞之中仍寓慎重之意

又修訂法律大臣沈家本等奏請以各省見任提法使按察使兼充_臣館諮議官

宣統元年憲政編查館奏定法院編制法_{節要}

第一章審判衙門通則 審判衙門共分四級一初級審判廳為獨任制二地方審判廳為折衷制三高等審判廳為合議制以推事三員行之四大理院為合議制以推事五員行之掌審判民刑訴訟案件但關於軍法或行政訴訟不在此限合議以庭長為審判長權限及辦事方法按照訴訟律及其他法令所定辦理

第二章初級審判廳 本廳視事之繁簡酌置推事一員或二員以上有管轄第一審民刑訴訟案件並登記及其他非訟事件之權一員由該管地方審判廳廳丞或廳長監督之二員以上以資深者一員為監督推事

第三章地方審判廳 本廳在京師者置廳丞一員各省置廳長一員視事之繁簡酌分民刑庭數並置二員以上之獨任推事各庭置庭長一員除廳丞或廳長兼充外以該庭推事充之第一審掌民刑訴訟案件之不屬初級廳權限及大理院特別權限內之案件第二審掌凡不服初級審判廳所判決而控告者各省因地方情形得設分廳於所管之初級審判廳內

第四章高等審判廳 本廳置廳丞一員總理全廳事務視事之繁簡酌分

民刑庭數各庭置庭長一員以該庭推事充之掌審判凡不服地方審判廳判決之案件而控告者及不屬大理院之宗室覺羅第一審案件各省因地方遼闊或其他不便情形得設分廳於地方審判廳內

第五章大理院 大理院為最高審判衙門置正卿一員少卿一員總理全院事務置民事科刑事科視事之繁簡酌分民刑庭數各科置推丞一員監督該廳事務並定其分配各庭置庭長一員除推丞各兼充外以該庭推事充之掌審判不服高等廳所判決而上告之案件及依法令屬於大理院特別權限之案件各省因距京較遠或交通不便得於該省高等審判廳內設大理分院

第六章司法年度及分配事務

第七章法庭之開閉及秩序

第八章審判衙門之用語 以中國語言為準原被告及中證人有不通中國語言者由繙譯傳譯案牘用中國文字如恐兩造爭執得附錄外國語言及各省土語存案

第九章判斷之評議及決議 判斷之評議概不公開評議判斷時該庭員須各陳述意見由審判長總司其事判斷之決議以過半數之意見定之若推事意見分三說以上不能得過半數者將諸說排列金額以多寡為序刑事以不利被告之重輕為序以居中之說為過半數大理院民事科刑事科及民刑兩科總會須有各該科推事三分之二以上方能開會決議以列席過半數之意見定之

第十章庭丁 法庭酌置庭丁開庭時與本案有關係者均由庭丁引至法庭聽審

第十一章檢察廳 各審判衙門分別配置檢察廳一初級檢察廳置檢察官一員或二員以上二地方檢察廳置檢察官一員檢察官二員以上三高等檢察廳置檢察官一員檢察官二員以上四總檢察廳置廳丞一員檢察官二員以上檢察官之職權遵照刑事訴訟律實行搜查處分提起公訴實

行公訴並監察判斷之執行又民事訴訟律及其他法令所定爲訴訟當事人或公益代表人實行特定事宜管轄區域與各該審判衙門同但檢察官遇有緊急得於管轄區域外行其職務法部及提法使得命初級檢察廳所在地之警察官及城鎮總董鄉董辦理該廳檢察事務各檢察廳檢察官得照法部會奏章程調度司法警察權限及辦事方法本法所未定者按照訴訟律及其他法令辦理

第十二章推事及檢察官之任用 推事及檢察官應照法官考試任用章程經二次考試合格始准任用凡法政畢業經學部考試給予進士舉人出身者以經第一次考試合格論凡法政學堂領有畢業文憑者得應第一次考試合格者分發地方以下審判廳檢察廳學習以二年爲期滿復經第二次考試合格者准作爲候補推事候補檢察官分發地方以下審判廳檢察廳候補用領有文憑充京師及各省法政學堂教習或律師歷三年以上者得免考試作爲候補推事候補檢察官遇缺即補惟須先補初級逾三年以上者不在此限大理院正卿少卿爲 特簡官總檢察廳丞大理院推丞高等審判廳廳丞高等檢察長京師地方審判廳廳丞俱爲請簡官各地方審判廳廳長檢察廳檢察長及各推事檢察官俱爲奏補官補高等審判廳推事及高等檢察官者須接續計算任推事或檢察官歷五年以上及充京省法政學堂教習或律師五年以上而任推事及檢察官者補大理院推事及總檢察官者須照前二條資格歷十年以上

第十三章書記官及繙譯官 各審判衙門分別置左列各項書記官掌錄供編案會計文牘及一切庶務一初級審判廳置錄事二地方及高等審判廳置典簿主簿錄事三大理院置都典簿典簿主簿錄事初級置錄事二人以上時以資深者一人爲長地方及高等廳以典簿一人爲長大理院以都典簿爲長均分配其餘各員之事務並監督之都典簿典簿主簿爲奏補官錄事爲咨補官京師及商埠地方審判廳以上審判衙門得置繙譯官由法部及提法使酌量委用

第十四章承發吏 初級及地方審判廳置承發吏須經考試始准錄用任用章程由法部定之掌發送文書及承命執行判斷及沒收之物件

第十五章法律上之輔助 審判衙門辦理訴訟事宜應互相輔助

第十六章司法行政職務及監督權 大理院卿高等審判廳廳丞地方審判廳廳丞或廳長初級審判廳監督推事或獨任推事總檢察廳廳丞高等

檢察廳檢察長地方檢察廳檢察長初級檢察廳監督檢察官或檢察官按照本法分任法部及提法司司法中行政之職務法部堂官監督全國審判衙門及檢察廳大理院卿監督大理院各省提法使監督本省各級審判廳

及檢察廳高等審判廳廳丞監督該廳及所屬下級審判廳地方及初級各長官准此總檢察廳廳丞監督該廳及各級檢察廳高等檢察廳以下各廳長官均監督本廳及所屬下級檢察廳分院分廳均準此例

宣統元年法部奏定京師審判檢察各廳員缺任用升補章程

第一條審判廳開辦之初用人甚多其各廳得力之員又時爲外省奏調以後如不敷用擬准隨時由 部奏調京外諳習法律人員及法律畢業生以資任使 第二條調用人員仍遵照憲政編查館學部吏部奏定新章辦理

以各廳推事檢察官所長所官典簿主簿等官分別改用惟各廳正六品官只有檢察五缺如法部實缺主事由進士拔貢分部主事已有法政畢業文憑者應請變通以五六品推事檢察官補用內閣中書知縣兩項較各項七

品佐雜不同如係正途出身或法律專長者并准以六品推事檢察官補用此外相納佐雜各員仍不得援以爲例凡調用人員除原係實缺候補者照

章錄用外其原係學習試用應行扣足年限原係候選應令當差一年始行奏留者仍照館部奏定辦理如遇有增庭或增初級審判廳時不能懸缺久

待者擬由 部聲明酌改 第三條奏調法律畢業學生仍照館部辦理如在高等法律學堂以上畢業奏調到差後扣足年限由 部察看確係學識

優長援照館部奏章准保主事七品小京官例分別保以初級推事檢察官

及所長所官典簿主簿學習行走其學習期限如在增庭或增初級審判廳

九品正 地審廳錄事十四缺九品從 地檢廳錄事二缺九品從 初審廳錄事十缺九品從 初檢廳錄事五缺九品從 以上錄事共四十三缺均照章酌補又法部奏地方審判廳內增設民刑兩庭略稱臣部總持法權有監督裁判之責自改訂官制議設四級裁判隨於光緒三十年酌擬京內外各級審判廳職掌事宜會同軍機大臣大理院奏定地方審判廳於重罪為始審於輕罪為第二審取外國合議制以三承審官主之舉一人為之長並聲明於 京師內外城各設一廳每廳設廳丞一人分立民刑各兩科科各二庭每庭設推事六人內外城各二十四人掌審理民刑案件復以創辦伊始經費待籌擬請權設一廳略增庭數各等因當經奉 旨允准嗣於是年冬僅將內城地審廳設立分民刑兩科每庭遵設推事六人若以原定內外兩廳額缺計之祇得其半見查該廳開辦以來每月審案不下二百餘起其間管轄區域之廣受理詞訟之多不獨視初審廳為最繁劇即較之高審廳與最高裁判之大理院亦實有日不暇給之勢臣等統籌全局深懼案牘繁多致滋貽誤自以添設外城一廳為要義願籌款維艱一時究難猝辦竊以案件既日增而月益設廳又事鉅而費難擬請仍遵前奏略增庭數辦法即於內城地方審判廳內增設民刑各一庭每庭暫設推事三人以一人為之長承審民刑各案件每庭設錄事二人藉供繕寫而地檢廳內亦擬暫設檢察官一員分理庭監察事宜庶幾各專責成俾免延誤俟外城審廳建設即將增庭員缺分撥如額以符定章如蒙 俞允臣等遵即慎選明於法律長於聽斷之員派赴該廳任事如果實在得力再行遵章奏請試署

又奏定法官考試任用暫行章程

第一條法官考試京師及各省統由法部堂官主其事京師由法部奏請 欽派通曉法律大臣會同考試距京較遠交通未便省分由法部將通習法律人員開單奏請 簡派前往各省會同提法司考試 第二條法官考試應以左列各項人員為襄校京外皆由法部奏派一在京師法科大學法政法律學堂或各省官立法政學堂充當教習或曾充教習者二在京師法科

大學法律各學堂正科畢業及在外國法政大學或法政專門學堂畢業得有文憑者 第三條考試分為二次 第四條凡得應第一次考試者除法院編制法第一百七條第一項所定資格人員外所有左列各項人員准其暫行一體與試一舉人及副拔優貢以上出身者二文職七品以上者三舊充刑幕確係品端學裕者 第五條第一次考試科目一奏定憲政綱要二見行刑律三見行各項法律及暫行章程四各國民法商法刑法及訴訟法准由各人自行呈明就其所學種類考試但至少須認二類五國際法右列各款以第二至第四為主要科分數不及格者餘科分數雖多不得錄取 第六條第一次考試分筆述口述二種筆述及格者再令口述口述科目以主要科為限筆述除第五條所定各格外應再令擬論說一篇以主要科命題 第七條考試合格者應行實習照章分發初級審檢廳作為學習人員但開辦之初准其暫以考試成績最優者分發高等以下審檢廳學習 第八條學習期滿照法院編制法第一百八條所定准其應第二次考試 第九條第二次考試仍照第一條辦理 第十條第二次考試以查驗實習優劣為主仍分筆述口述二種筆述以實地案件為題應詳敘事實理由擬定判決以對口述以第五條所載主要科為限 第十一條考試合格者照章作為候補先補各初級審檢廳之缺但開辦之初在高等以下審檢廳學習者准暫以考試成績最優者分別酌補高等以下審檢廳之缺 第十二條不及格者仍發往原廳學習一年期滿再行考試仍不及格者應即罷免 第十三條京師暨直省高等審檢廳推事檢察官如見無合法院編制法第一百八條之資格人員應補者京師由法部外省由提法司呈請按照本章程第十一條辦理大理院推事總檢廳檢察官如見無合法院編制法第一百十九條之資格人員應補者推事由院卿就該院見有候補人員內揀定咨由法部分別奏請補署總檢察官由廳丞揀員報由法部核定分別奏請補署 第十四條本章程與法院編制法同時施行其施行細則另由法部定之

又奏定司法區域分畫暫行章程

第一條大理院設於京師以全國爲其管轄區域其大理分院管轄區域由大理院核明咨送法部奏定 第二條高等審判廳京師及各省省城各設一所其管轄區域京師以順天府轄境各省以各該省轄境其有總督巡撫及邊疆大員駐所併距省會遠遠之繁盛商埠得設高等審判分廳 第三條地方審判廳京師及直省府直隸州各設一所但府州詞訟簡少者不設地方審判廳於該府直轄地面或首縣及該州初級審判廳內由鄰近府州地方審判廳分設地方審判分廳直隸廳有屬縣者與直隸州同 第四條京師地方審判廳以京師內外城及京營地面爲其管轄區域直省府直隸州地方審判廳以各該府州轄境爲其管轄區域 第五條順天府各州縣及直省各廳州縣應設地方審判分廳其詞訟簡少者得合鄰近州縣共設一分廳其距府州最近者即由該府州地方審判廳或分廳管轄之不必另設 第六條各廳州縣地方審判分廳以各該廳州縣轄境爲其管轄區域 第七條初級審判廳順天府各州縣直省廳州縣各設一所以上其僅設一所者管轄區域與該地方審判分廳管轄區域同府有直轄地面者與廳州縣同 第八條順天府及直省得酌擇著名繁盛鄉鎮設初級審判廳若干所 第九條所有本章程內各級審判廳未定區域順天府所屬由該府核明外省由該省提法司酌擬呈請督撫核明分別送部奏定 第十條本章程與法院編制法同時施行其施行細則另由法部定之

又庫倫辦事大臣延祉等奏庫倫刑案日多擬照熱河都統辦法添設理刑司員一員由法部揀選咨理藩部發赴其差限資俸及差滿甄別獎留均照理藩部司員筆帖式等辦理

又 諭憲政編查館奏訂法院編制法並另擬法官考試任用司法區域分畫及初級暨地方審判廳管轄案件各暫行章程一摺朕詳加披閱均係參考列邦制度體察中國情形斟酌釐定尙屬周妥立憲政體必使司法行政各官權限分明責任乃無諉卸自此次頒布後所有司法事務著法部認真督理審判

事務著大理院以下審判各衙門各按國家法律審理從前部院權限未清之處即著遵照此次奏定各節切實畫分其籌辦各級審判廳並責成法部會同各督撫督率提法司切實籌設應需經費著該部會同度支部籌畫以期早日觀成至考用法官尤關重要該部堂官務須破除情面遵章舉辦嗣後各審判衙門朝廷既予以獨立執法之權行政各官即不准違法干涉該審判官吏等遇有民刑訴訟案件尤當恪遵國法聽斷公平設或不知檢束或犯有贓私各款一經覺察必當按律治罪以示懲儆而維法紀餘著照所議辦理 二年法部奏 略稱 臣部前設編查處設提調一員總纂一員纂修六員庶務一員行走五員均慎選明習法律通曉新政人員派充分任並以 臣部左丞曾鑑總理其事

又奏法官任用須經考試依議行

又奏酌擬法官考試任用施行細則摺略稱古者理官獨以士稱士師而下鄉士遂士縣士非明義理通經術者不得爲之自是以來宋有嚴試法官之制金有律科取士之條而前明制科士子試判五道必詳明律意方許進身沿及國初尙承其舊今外國登用試驗判檢各官亦多定爲專章極形鄭重誠以人民生命財產所寄多在法官法官賢愚繫乎考驗古今中外其理一也本年爲直省省城商埠各審判廳成立之期需用法官亟待考試自應迅擬細則通飭施行謹就館臣原章推闡其義略加補綴大致以輪船鐵路可通之省均定爲赴京考試其距京較遠交通未便省分即在該省考試如四川廣西雲南貴州等省各爲一路新疆地處邊徼擬暫會考於甘肅省城共爲一路此外應行規定各條曰職掌曰與考資格曰第一次考試曰授職曰學習皆就原章所已及者而分晰之曰關防曰報考曰考期曰核定分數曰經費並就原章所未及者而補定之連同通則附則計十二章都凡五十一條均取裁於今昔考試規制以期簡要可行考試經費一節無論京外地方均應力從減省不得緣從前科場舊例致滋糜費惟需用實數見難預算除派考省分由各該督撫核實籌辦外其在京考試經費及各省考官襄校人員應如何籌給津貼川資之處容

臣等詳核會商度支部以便臨時請撥至錄取員數既採用計分之法自應以考試及格爲準未便預定名額致有抑置俾獲等弊其錄取各員分發各省應如何均勻配置及變通成法之處均應與憲政編查館會商另由臣部定章奏請施行依議行

刑部十二卷

又奏定法官考試任用暫行章程略稱京外第一次考試錄取人員以正七品推事或檢察官用分發各廳學習其文職七品以上人員暫以原官分廳學習俟第二次考試合格再以品級相當之推檢奏留候補直省開辦之初得由提法使擇其成績最優者暫行委署仍分報法部並督撫衙門備案

又奏變通廣西法官考試提前辦理請 欽派該省提學使就近會同按察使考試並請 旨派該撫爲監臨

又奏本年舉行法官第一次考試遵章請 旨簡派四川雲南貴州甘新等省考官每省二員前往各省會同提法使遵章考試

又奏酌擬法官分發章程略稱查本年憲政編查館會同臣部奏定各省法官變通迴避辦法摺內稱凡各省地方審判檢察廳以下推事檢察各官只令迴避本管府州及本籍三百里以內鄰府鄰省皆可任用誠以司法各員以清釐訟獄爲專務而求能各舉其職自以熟於風土人情語言之士爲宜臣等此次所訂各條亦即原本此義俾廣登用而利推行擬請嗣後凡與法官考試錄取人員及法院編制法第一百七條及一百一十二條之免考人員應分發京外各審檢廳學習或候補者得照館章由該員自行呈請准其分發本省仍以地方以下各廳爲限此外各員應由臣部仿照吏部分發直州同直州判各項人員之例專分發鄰近省分以資便利其各該員果係風土人情熟悉語言亦不隔閡均聽自行呈請經臣部考驗准予發往其各省高等審檢廳及分廳之推事檢察官應仍照憲政編查館會同臣部原奏迴避本省以示限制

又奏定法律學堂畢業學員改用法官辦法

第一條原係京官者仍以京師各級審判衙門品級相當之法官分別改用惟中書科中書無品級相當之法官可改擬仿大理院虛級升轉之法改作

正七品推事檢察官候補三年期滿轉候補從六品推事檢察官後以相當之缺補用如員外郎自願改大理院從五品虛級推事主事自願改大理院正六品虛級推事者亦聽 第二條原係京官自願改外者照本部分發章程發往就各該省所有品級相當之法官加一級改用惟郎中員外郎並無相當之法官可改擬暫行借補從五品推檢官仍留原官原銜郎中候補缺滿二年後員外郎滿三年後果係才能卓著准提法使出具切實考語詳由本部查核屬實奏請以各省高審廳廳丞高檢廳檢察長在任候補其知縣一項雖品秩較卑然係正印官與尋常七品佐雜不同擬分別變通辦理此次考列最優等優等者准其以從六品推檢官改用考列中等者仍以正七品推檢官改用其府縣縣丞照例應改作正八品虛級法官惟本部奏定法官考試施行細則凡應第一次考試錄取人員以正七品推檢官用擬即仿照變通辦理將府縣縣丞兩項改作從七品推檢官候補三年期滿轉正七品推檢官後以相當之缺補用 第四條原係外官自願改內者亦得各就京師所有品級相當之法官降一級改用其州同知縣府縣丞等既無適當之法官可改自應各按本級遞降仍用虛級升轉之法惟本部奏定法官考試施行細則凡應第一次考試錄取人員以正七品推檢官用即擬援照變通辦理直隸州州同散州州同知縣均一體作爲正七品推檢官候補三年期滿轉候補從六品推檢官後以相當之缺補用府縣縣丞作爲從七品推檢官候補三年期滿轉候補正七品推檢官再三年期滿轉候補從六品推檢官後以相當之缺補用 第五條原係司法官者不必議改其以行政官由吏部分發

大理院者以司法官論如各員自願呈請外用得照前第二條例各按原品加一級改用其原係五品推事者亦得准第二條郎中員外郎改外例辦理第六條以上各員之分發不拘法院編制法第一百八條之限制京師自大理院以下各省自高等審判廳以下均一體分發第七條各員分發到署到省後作為候補其本班補缺先後除借補各員應儘先補用外餘則依考試等第為先後等第同者依花樣為先後

又奏京師舉行法官第一次考試請 欽派監臨官一員考官四員襄校官十六員內外場監試御史各二員內外場提調官各一員內收掌官四員外收掌官三員彌封官二員

又奏定監獄專修科畢業學員委用章程

一凡考列最優等優等中等者均照以後各條酌量委用 一本部郎員主各員如見在並無烏佈者准其呈請改派典獄司當差到司後果能得力再以相當烏佈派充 一各廳候補推事各員如願補行政官者遇有對品所長缺出准由廳丞酌量呈請錄用 一各廳錄事准由廳丞考驗得力以所官酌署 一各廳候補錄事俟補缺後亦准由廳丞以所官酌署 一原係各衙門候補人員准其呈明札派各廳當差俟考驗得力再行奏留 一已分省候補之考列中等又未分省之考列最優等暨優等各員均准呈明願就京職者札派各廳當差俟考驗得力再行奏留願歸外用者由本部咨行各省督撫轉飭提法使分別以原官辦理監獄看守事宜 一原無官階僅有拔貢附生出身者准其呈明札派各廳以錄事候補俟考驗得力補缺後再行酌派看守之差 一以上各項願就京職者亦可酌派模範監獄之差 一酌量委派均應按照原試驗等第名次先後委用 一考列下等各員生均令聽候有相當之差再行酌用

又奏本屆舉行法官考試暫擬推廣與考資格略稱擬請將京外凡留學外國法政速成畢業在本省充當法政教員三年以上者及本省法政二年以上畢業領有優等文憑者均暫准其於此次收考以廣登進而免偏枯又凡在審判

研究所接續有二年程度畢業領有優等文憑者亦准其與第一次考試僅以此次為限

又奏新疆法官考試實多窒礙擬照廣西成案請 派該省提學使會同鎮道兼提法使銜各員考試其襄校人員亦照廣西辦法由該撫遴選合格人員二三名電咨 臣部一併奏派

三年法部奏釐定法院書記官承發吏考試任用章程略稱書記官以錄供編案會計文牘及一切庶務為職務承發吏以發送文書執行判決沒收物產及經當事人申請實行通知催傳為職務兩者皆為法廷行政上補助機關東西各國並建此職其所處之地位既優而選之必嚴其格養之務厚其饋往昔我國問刑衙門案牘寄之吏奔走責之胥用不得人遂滋弊竇及今釐正司法自應矯正而更新之當飭司員遵照館章悉心擬議旁采方今通行各國之例遠師在昔參用士人之法定書記官考試任用暫行章程三十條承發吏考試任用章程二十八條期於法不滋弊事俾易行

又奏請將參事各員援案裁取略稱各部院司員向有論俸截取之例自改定官制以來員缺時有增益顧名稱雖殊而品級無異 臣部改章之始新設參事小京官八品錄事等缺嗣又增設監醫正一缺參事秩視郎中均正五品一切升階自應照郎中辦理從前分部七品小京官祇拔貢一途並無額缺故可按年遞升見在 臣部小京官以二十六缺為定額而優拔保送游學畢業各項以小京官撥分人員及以七品筆帖式到部改用小京官者源源而來若不寬籌外用之升途難免後來壅滯且各部小京官與內閣中書係屬對品中書有截取小京官獨無亦不足以昭平允八品錄事及監醫正與從前司務品秩從同本年郵傳部援前吏部奏案請將三年俸滿之八品錄事比照八品司務截取定章辦理奉 旨允准懇將參事比照郎中小京官比照內閣中書各按俸期截取知府同知並核其出身准分別捐免試俸應俸以符向章其八品錄事及監醫正擬即援照郵傳部奏案應俸三年期滿准比照八品司務截取定章辦理

又內閣學部法部會奏 廷試法政科各生改就法官辦法略稱憲政編查館
奏准法院編制法內聲明凡習法政科之游學畢業生經學部考試合格奏請
給有舉人進士出身者皆可免第一次考試是習法政科之游學畢業生但應
學部考試合格即可免第一次考試其已應 廷試之游學畢業生如願改就
法官應如何辦理原章中未經規定惟查京師法律學堂甲班畢業學生曾經
法部議准改就法官者併免第二次考試此項游學畢業生所學各科成績比
之京師法律學堂甲班學生固有過無不及且於學部考試之後又應 廷試
一次該生等改就法官若令併免第二次考試與法院編制法所稱凡法官須
經考試二次合格准呈任用之條亦尚符合

又法部會奏京師高等以下各廳經二次考驗合格人員中有原官不及六品
者臣部奏設京師高等以下各廳推事檢察官員缺以六品爲止此項人員實
無相當官缺可以改用臣等公商擬請設七品推事檢察官虛級經第二次考
驗合格人員除正印各官仍照宣統元年臣部奏定各廳員缺任用升補章程
議改外其佐職各員不及六品者均改爲七品虛級推檢官俟候補三年期滿
轉候補六品推檢官後以相當之缺補用以示限制而昭慎重

又奏准總檢察廳添設從六品典簿一缺高等檢察廳添設正七品典簿從七
品主簿各一缺地方檢察廳添設從七品典簿從八品主簿各一缺又總檢察
廳向設九品錄事四員升轉殊形隔閡改爲八品錄事九品錄事各二員又高
等審判廳添設正六品所長一員從八品所官一員

皇朝續文獻通考卷一百二十六

職官考十二 京文職

工部

臣謹案工部尚書始於隋夏司空共工殷司空周冬官大司空卿也侍郎亦始於隋分左右始於明 本朝因之相沿不改自談變法詔維新由是而商而農工商數年之中紛更官制舉棋不定濫竽益滋已

嘉慶四年裁滿洲員外郎主事各一人改設宗室員外郎主事各一人十年以大學士兼理部務

臣謹案順治八年以王貝勒管部九年停之雍正元年以親王郡王大學士兼理至是專以大學士兼之

道光十六年議定營繕司滿員外郎漢主事作爲管理鉛子庫專員都水司滿員外郎虞衡司漢主事作爲管理硝磺庫專員

光緒六年增設屯田司宗室郎中一人又增設宗室筆帖式一人

商部

二十九年 諭見在振興商務應行設立商部衙門應辦一切事宜著該部尙書等妥議具奏

臣謹案商部之設從貝子載振請也

又商部議奏本部設左右丞各一員正三品左右參議各一員正四品分設四司曰保惠司曰平均司曰通商司曰會計司每司設郎中員外郎主事各二員設司務廳司務二員額外司員每司以二員爲率設立律學館設總纂官二員纂修官二員設立商報館設提調官一員均以本部司員兼充

又奏定章程略稱懋遷作又商政權與周之泉府司市漢之平準均輸大抵因時制宜爲設官之本義方今中外互市商務實爲利權所繫見當創設之初必當明定章程妥籌良法然後可期經久綜其要旨約有數端一曰通下情一曰定官制一曰立課程一曰嚴賞罰當此振興庶務使中外人民咸曉然於國家設立商部之本意要在保護開通決不與商民爭利必痛除隔閡因循之

習始克盡整齊利導之方擬就章程十二條繕單呈覽

覽八條

一擬招商設立鐵路礦務工藝農務各項公司先行試辦如一時官本籌集不易全係商股承辦者應由臣部隨時維持保護所有商股獲利或虧耗等事臣部除獎勵及飭追通欠外其餘概不與聞並不用官督商辦名目亦不派監督總辦等員以防弊竇如係官商合股及官助商辦則須視股本之多寡辦事之難易隨時訂定章程 一臣部員缺既照外務部定章不能不慎重其選以期一人得數人之用除已經奏調各員外所有額設各缺若照六部簽分學習誠恐不盡得人擬酌照外務部章程咨行內閣六部等衙門於滿漢司員中擇其品正才優通曉商務者出具切實考語保送考試引見記名先行傳到若干員酌派差使試看三月後再按原階酌補傳到後無論郎中員外侍讀均先以原階借補主事仍隨時察看如不得力即咨回原衙門至各省候補道府同通州縣中不乏熟諳商務之人除奏調各員外嗣後如有歷練精詳辦事切實者准由各督撫出具考語咨行臣部考試錄取差委補用 一取士之法事舉言揚原不必拘成格商人素習懋遷若考以掌故政治課以文牘其勢固有所不能然商情所在若不加以聯絡商務焉能起色嗣後如有在中外商埠充當商董之人因事到京委係行誼誠實熟習商務擬即派充臣部委員遇有考察華洋各項商務事宜酌量委用毋庸支薪倘有異常勞績准保獎臣部郎中員外郎主事各職銜如商董中已經得有官職品望較著者應作爲顧問官自四等至頭等爲止由臣部奏明派充不必在部當差亦不支給廉俸至外埠商董子弟捐納京外各官者經臣部奏調差遣毋庸考試亦不拘以文牘之事藉示鼓舞且收因材器使之效 一通商各埠出產銷場一切情形臣部無從周悉加以商情渙散已久求其合力團聚斷非易事此中樞紐要以招商爲第一要務擬派丞參一二員帶同得力司官前赴上海等處招集商董並考察商務沿途編纂日記勒爲成書以資考覈至各省各屬土產及製造所出之貨若干類又各關各埠出口土貨若干類進口洋貨若干類並各處有無設立工藝局院學堂及沿江沿

海省分所設機器仿造絲紗布煤油火柴各廠除由該丞參等考察詳記外
應由各該省將軍督撫先將情形詳晰咨部查覈 一臣部宗旨要在通上
下之情所有商人求見或投遞稟牘及面訴商情自當輪誠款待破除京外
各衙門關吏阻隔之弊惟風氣初開品流尚雜又不得不略加審慎擬於署
中設接待所一處如有商人求見即導至司務廳由值班司員先行接見詳
詢蹤迹察其情偽然後延入接待所由丞參各員等分別接談隨時隨事酌
酌辦理蓋詢察之權不寄諸關吏既無內外阻絕之嫌亦免良莠紛投之慮
一臣部事務殷繁各司員等自應照外務部例逐日到署親手辦稿呈堂
閱定發並輪流住班期無曠誤見擬設日計表月計表各一冊將每日所
辦何事隨時登記各司員名籍列於後即督飭逐日標註考其功課即以察
其才能至於儀文一切宜從簡便以除壅蔽查各部向章司員上堂回事立
而不坐堂官亦起立答話即有商酌每苦不能盡言臣部擬於堂上另備長
桌多設坐位遇有要事即同丞參及各司員環坐一堂從容討論務使人人
各抒所見各盡所言勿蹈脂韋趨附之習庶收集思廣益之功 一臣部既
擬優給各司員等養廉並聯絡商董予以職銜獎勵之法已屬詳備然必須
勤懲互用方能揚激人才見擬懲戒之款約分三等延擱公事為一等宜洩
密件為一等招搖撞騙舞弊營私為一等司員輕則記過罰俸重則咨回原
衙門委員則撤銷職銜如有招搖舞弊等事一律嚴參懲辦 一事務重要
假手吏胥易滋弊竇擬請額設供事四十名分班入值律學館擬設供事八
名俾供鈔寫之役由各館各取考試取定以次傳補惟既資其力不能不予
獎勵應照外務部成例兩年擇尤保獎一次所有薪工亦酌量優給以昭激
勸至武弁聽差蘇拉亦按照外務部例兩年分別奏獎

農工商部

三十二年 諭工部著併入商部改為農工商部

又農工商部奏定官制略稱工部併入於臣部亟應更定職掌俾清權限除舊
隸工部各事宜另行奏請分隸他部外擬改平均司為農務司其舊隸戶部之

農桑屯墾畜牧樹藝等項自應改隸臣部而舊隸工部之各省水利河工海塘
隄防疏濬事宜並應歸併該司辦理改通藝司為工務司查路輪郵電等事業
經移交郵傳部管理而招商承辦及保護獎勵之方仍當核實循名不弛責任
改保惠司為商務司以舊隸會計司之賽會詞訟各項屬之改會計司為庶務
司以舊隸保惠司之員缺升補等事屬之舊設之司務廳擬即裁併另設承值
所酌派員司專管收發文件監用印信等事即隸該司辦理至各司員缺每司
舊設郎中員外郎主事各二缺司務廳設司務二缺見在二部既經歸併所有
員缺自宜分別增裁以專責成擬請農工商三司每司添郎中一缺員外郎主
事各二缺庶務司職事較繁擬請添郎中一缺員外郎二缺主事四缺並先行
奏補十數員舊設之司務廳司務二缺應即裁撤其候補人員仍視各司事務
之繁簡隨時酌定至舊設商標局商律館奏辦之農事試驗場及見擬籌設之
權衡度量局化分礦質所皆須專門人材惟有酌調專科畢業學生擇其試用
有效者奏留酌補並酌設一二等藝師藝士各專官以資實用

一尚書一人左右侍郎二人 一承政廳設左右承各一人秩正三品參議
廳設左右參議各一人秩正四品皆綜核各司事務並可隨時派赴各省考
察農工商務分設四司 一農務司掌農田墾牧樹藝蠶桑水產絲茶等事
並各省河湖江海陸岸開墾港道工程歲修核銷事宜統轄京外農務學堂
公司局廠兼管本部農事試驗場 一工務司掌工匠製造料品礦政等事
統轄京外各工藝製造礦務學堂公司局廠兼管本部實業藝徒勸工等各
學堂局所 一商務司掌商業等項各事及農工商各公司保護獎勵調查
禁令事宜統轄京外各商務學堂公司局廠兼管本部商律館商報館公司
註冊局商標局 一庶務司掌本部收支款項報銷經費各司員升補俸精
閩署各項雜務 一等藝師秩正六品二等藝師秩正七品一等藝士秩正
八品二等藝士秩正九品均無定額其原設之顧問官議員礦務議員商務
議員隨員仍依舊制

三十三年 諭奉 懿旨從來求治之道養民為先古人重府事修和外國亦

最尚實業方今中國生齒日繁庶而未富生財大道亟應講求國家特設農工商部綜理一切乃數年以來風氣尚未大開則官吏提倡之力勸導之方有未至也著各將軍督撫迅飭所屬於興學各業極力振興凡有能辦農工商礦或獨立經營或集合公司其確有成效者即各從優獎勵果有一廠一局所用資本數逾千萬所用人工至數千名者尤當破格優獎即爵賞亦所不惜應如何分別等差該部即妥議具奏並逐年如何增進列表以聞朝廷於大小官吏亦即以此課其殿最予以勸懲敢有意玩因循保護不力定行嚴處不稍寬貸總期地無曠土境無游民馴至富強有厚望焉

是年奏准歸併工部辦法略稱工部一職兼古之水火工虞如河工海塘水利船政度量權衡礦冶之利山澤之材其事多與農工商相表裏皆應併入工部以一事權京外土木工程舊隸工部此次原定民政部官制清單內特設專司管理土木建築事宜責有攸歸工部即毋庸兼管此外如木稅船政事屬財政宜畫歸度支部軍械兵艦事屬武備宜畫歸陸軍部至典禮一門凡禮器法物乘輿服御一切製辦供張之具 壇 廟 陵 寢 宮殿等處整理陳設之事擬請以 內廷典禮事宜併入內務府恭辦 外廷典禮事宜併入禮部恭辦庶足昭誠敬而示尊崇所有庫存祭器陳設等件應由內務府禮部派員分別點交接收至各衙門行取之物大都照例折價不若聽其自行採辦較為簡便工部款項每年由度支部支銀七萬兩木稅項下每年收銀一萬餘兩又寶源局每年收錢十萬串是為正款係備各處行取採辦物件及一切正項開銷之用此外有水利飯銀二款及各項銷費每年約共銀四五萬兩是為另款光緒三十一年工部奏明化私為公作閩署津貼今工部製造採辦各事均已他隸所有前項正款銀兩自應剔除其存庫正款即撥歸度支部接收由各處酌定用款多寡自行奏明立案逕向度支部支領其另款各項應請 飭下各省督撫分別照案解交 臣部撥充添設官缺之用見在存庫另款應歸併 臣部接收至工部裁撤人員為數較多除由 臣部調用外餘均開單咨送吏部按照新章分他部及外省補用

三十四年又奏議覆東三省總督徐世昌奏請設立農官以興地利略稱農官之設始於周制至漢則有農丞魏則有典農以及宋之勸農使元之勸農官類皆職有專司官無虛設東西各國凡農局農會之成立皆有專官以董理之奉省幅員遼闊地脈豐腴實為農業天然隩區特非董以專官則鄉愚罔資提倡非因材器使則氣類莫由感孚該督深維本計按古設今於奉省土地人民思至熟此次請設農官專以宗室覺羅滿蒙漢八旗子弟及在籍紳士充選就地擇人學成致用誠為握要之圖應准如擬辦理 等詳閱所擬章程分為建設編制職任三節條分縷析均屬簡易可行第一節內稱府廳州縣擬各建農政廳農署內應設農務總會四鄉各設分會一所等語核與 臣部奏定農會章程第二條內開各省應於省城地方設立農務總會於府廳州縣酌設分會等語微有不符擬仍查照定章各府廳州縣作為農務分會四鄉作為農務分所其農務總會應於省城設立一併歸勸業道管轄以免紛歧至此項農政應選派農官應由該督將設立年月日及派出銜名隨時咨部備案並將任內每年所辦成績列表咨報以資考核

宣統元年奏籤分到部各項小京官應照吏部新章三年學習期滿一律作為額外主事至奏咨札調人員向係按照各該員原有官階所習科學以郎中員外郎主事藝師藝士奏留見擬藝師藝士以俟專科之士補充其前項奏咨札調人員除以郎中員外主事奏留補用外並酌擬以七八品小京官委用又奏籌辦畫一度量權衡見與各省合力統籌應請 飭各將軍督撫等實力奉行並由 臣部訂購機器以備設廠製造

郵傳部

謹案部轄船路電郵事例極繁另詳郵傳攷茲僅就官制錄之光緒三十二年設立郵傳部專掌輪船鐵路電報郵信四政三十三年軍機大臣等議准郵傳部統轄船路電郵四政遵官制通則共置左右丞各一人左右參議各一人僉事四人郎中十人員外郎十二人主事二十四人七品小京官十四人並設八九品錄事不定額缺船路電郵四政均係專

門之學應有專科之書擬設圖書館一區分咨各國出使大臣購寄各種圖書度焉並設講習所俾各部人員得於暇時研究練習其餘應行附設之考工通譯各局所再當陸續籌辦此外應酌設顧問官議員選於四政素有經驗及著有名譽之京外官員紳商充之

郵傳部官制

一尚書一人左右侍郎二人 一承政廳設左右丞各一人秩正三品掌承辦機密考核司員籌辦經費典守部庫各事宜設僉事二人秩正五品七品小京官二人以資佐助 一參議廳設左右參議各一人秩正四品掌考訂章程覆核文稿檢查事例提議交議各事宜設僉事二人秩正五品七品小京官二人以資佐助 一船政司掌關於船政航業等事及建設埠頭廠塢審議保險運費各事宜設郎中二人員外郎二人主事四人七品小京官二人 一路政司掌關於路政等事及籌還借款提倡商辦井工程購料各事宜設郎中二人員外郎三人主事六人七品小京官二人 一電政司掌電政官商局則例海陸線規章萬國電政聯盟條款及電話電燈各事宜設郎中二人員外郎三人主事六人七品小京官二人 一郵政司掌郵遞方法匯兌包裹郵票款式郵盟條約等事設郎中二人員外郎二人主事四人七品小京官二人 一庶務司掌各司員升補典守堂印收發文件並會計購辦等事宜設郎中二人員外郎二人主事四人七品小京官二人設八九品錄事繕寫文件酌量委用不定額缺並設額外繕寫錄事不列品級設一三三四等顧問官一等視丞二等視參議三等視郎員四等視主事不作爲缺額凡京外官員紳商及於輪路電郵四項素有經驗者慎選奏派以備諮詢又設議員圖書館講習所考工局通譯局除上海實業學堂外設立鐵路商船電報各學堂而以車務工廠船戶工廠電務工廠附焉部外各局分設總理協理總辦幫辦總監督由部擬定階級奏派

又郵傳部奏改提調處爲鐵路總局改提調爲局長

宣統元年御史劉顯曾奏郵傳部分設四司已有路工司鐵路總局之設實爲

重複請將鐵路總局歸併路工司以節經費而一事權

又郵傳部奏裁併廳司員缺略稱部原設庶務一司掌理一切雜務內分鈐敘支應綜覈三科核其所辦事宜與承政參議兩廳會計考績各科多近重複案牘紛歧人員冗濫尙非核實之道見擬裁撤庶務一司歸併兩廳辦理以昭統一惟部奏定兩廳分科章程原係四科今既併入庶務司三科之事擬增設兩科以資辦公至庶務司既裁則原設之郎中二缺員外郎二缺主事四缺七品小京官二缺自應一併裁去但承政參議兩廳每廳祇設僉事二缺小京官二缺此外並無郎員主等缺見在廳制更張需才較衆擬參酌度支部民政部承政參議兩廳辦法除原有僉事小京官各缺照舊設立外請於承政廳添設員外郎二缺主事二缺參議廳添設員外郎二缺主事二缺兩廳共添八缺較之所裁庶務司額定十缺尙少二缺如此辦理職掌既有專歸員缺亦無冗濫

又奏振興四政鼓勵動能擬給獎牌摺略稱參用各省功牌之例設第一級至第五級獎牌給予五品至九品頂戴並仿民政部巡士肩章辦法製成服章書明等級遇有實心任事卓著勞績未便奏保官階者酌量賞給以示優異

三年奏部各廳司差額係光緒三十四年奏定郵政一司因開辦時事簡設司長一員副司長暫缺酌分兩科將來部務增繁如有須添差缺之處再行奏明近因郵政業經接辦所有上年奏定分年籌辦郵政清單內推廣郵路局所擴充匯兌儲金暨編定郵律與辦郵船等事均屬交通要政已陸續加派司員幫同經理見又接管驛站擬歸該司辦理頭緒益紛前定差額不敷辦事應即補設副司長一員增設二科所有科長暨二三等科員各一員按照部各司等差一律辦理

理藩部

謹案理藩院始於國朝尙書漢大鴻臚典屬國也左右侍郎周禮大行人中大夫也初屬禮部順治十八年以官制體統應與六部相同理藩院尙書照六部尙書入議政之列溯太宗時設立即以院名數百年相

承恪守自興新法改院為部名雖異而實則同朝三暮四徒事紛更耳

嘉慶四年裁滿洲郎中員外郎各一人改設宗室郎中員外郎各一人

光緒六年裁滿洲左右翼筆帖式各二人

三十二年改理藩院為理藩部

又理藩部奏核議大概情形略稱理藩部與各部情形不同謹撮其大要一丞參尙難遽設一殖產邊衛兩司事宜擬暫行緩辦一處所量為歸併一蒙古學堂宜量為擴充一原設六司擬仍其舊

三十三年奏定理藩部官制

尙書一人左右侍郎二人領辦處為閩署公務總匯之區設領辦二人以郎中員外郎充之幫辦二人稽核文移二人總看奏摺四人以郎中員外郎主事充之委署主事四人正繕寫四人副繕寫八人以筆帖式充之調查局編纂局分股任事以郎中員外郎充正管股以郎中員外郎主事充副管股以郎中員外郎主事筆帖式擇其繙譯優長者充繙譯官此兩局暫不預定額缺俟添設殖產邊衛兩司再行酌定旗籍司設掌印一人以郎中員外郎充之幫印二人主稿二人以郎中員外郎主事充之委署主事四人正繕寫四人副繕寫四人以筆帖式充之典屬司設掌印一人以郎中員外郎充之幫印一人主稿二人以郎中員外郎主事充之委署主事四人正繕寫四人副繕寫四人以筆帖式充之王會司設掌印一人以郎中員外郎充之幫印二人主稿二人以郎中員外郎主事充之委署主事三人正繕寫四人副繕寫四人以筆帖式充之柔遠司設掌印一人以郎中員外郎充之幫印二人主稿二人以郎中員外郎充之委署主事三人正繕寫四人副繕寫四人以筆帖式充之徠遠司設掌印一人以郎中員外郎充之幫印一人主稿一人以郎中員外郎主事充之委署主事二人正繕寫三人副繕寫三人以筆帖式充之理刑司設掌印一人以郎中員外郎充之幫印一人主稿一人以郎中員外郎主事充之委署主事二人正繕寫三人副繕寫三人以筆帖式充之司務廳設掌印一人以郎中員外郎充之幫印一人以郎中員外郎主事充

之委署主事四人正繕寫四人副繕寫四人以筆帖式充之

又奏准設立調查編纂局附入領辦處揀派司員分股任事暫不豫定缺額至原設各司處之郎中員外郎主事筆帖式及司務司庫等共一百六十二人除宵夏等處十一差及烏里雅蘇臺西甯熱河庫倫各差所人員不計外見在考選等第僅敷分佈將來設立殖產邊衛兩司時員缺應否添設尙須酌量情形奏明辦理所有理藩部原設各缺擬請免其裁撤其見在歸併處所之原隸各缺擬即歸入領辦處分任其事

又 諭我朝撫綏藩服恩義素孚內外臣工凡有管理藩務之責者均當仰體朝廷覆育至意勤宣德化乃近聞藩部積習其重弊竇繁多殊非所以示懷柔而敷聲教著責成該部尙書侍郎等認真整頓將從前所有銅習迅與革除淨盡另訂妥善條規通飭所屬員司實力奉行如有把持舞弊人員卽由該尙書等據實糾參從嚴懲治倘仍瞻徇朦蔽一經覺察定惟該尙書等是問其東三省督撫及西北路將軍都統大臣於藩服尤為切近應一併妥籌撫卹嚴禁滋擾並將所籌辦法隨時具奏

又奏裁內外館監督按按察內館外館監材二人向由科道各部司官內委

又御史黃瑞麒奏理藩院自上年釐定官制改為理藩部原欲仿各國殖民大臣及英國印度特設專部之意改院為部列於行政之官以期實力經營各蒙旗回部西甯西藏及附近土司諸地禦外侮而實邊疆除原有職掌外凡移民開墾練兵興學諸事皆須精心籌畫遊才佐理見在該部仍守舊章僅有蒙滿員缺似非整頓部務之意擬懇 飭下理藩部破除成例遴選熟悉邊情通曉殖民政策人員不分滿漢一體任用所有堂司各缺悉予變通庶幾邊圉日有起色

宣統元年伊犁將軍長庚奏妥議怡勒奇等處辦法略稱由新疆省進赴伊犁時途次接署伊犁將軍廣福塔爾巴哈台參贊大臣札拉豐阿先後咨開准舊土爾扈特北部落盟長札薩克布彥圖親王鄂羅勤莫札普咨呈譯漢內開准科布多辦事大臣照會奉 旨將敝部落三札薩克屬下十四牛泉歸

其節制等因部下人等正深詫異適聞安大臣奉 旨交伊犁將軍妥議具奏
衆情始安查敵親王鄂羅勒莫札普之六世祖策伯克爾多濟於乾隆三十六
年蒙 恩錫封布彥圖親王 賜收霍博克薩里爲舊土爾扈特北部部落盟長
自此恪守藩服所部三旗向隸塔爾巴哈台參贊大臣兼轄歸伊犁將軍節制
所有承襲爵職補放官缺年班入 覲領俸比丁等事暨游牧內一切命盜案
件向皆呈報伊犁將軍塔爾巴哈台參贊大臣察核奏咨百數十年未嘗少異
今分隸阿勒台節制則本部公事赴何衙門呈請辦理況敵部落緊連俄境
遇有邊事應聽何衙門指示遵辦且恐科屬各哈薩克僉入本境雜居生事與
本游牧蒙衆實多不便部下阿勒巴圖素皆寒苦向當塔城差使今又兼當阿
勒台山差使力有未逮等情呈請核辦前來 奴才與塔爾巴哈台參贊大臣扎
拉豐阿在庫爾喀喇烏蘇會議安插蒙哈之時據扎拉豐阿面稱塔城疆域自
同治三年分界以後惟霍博克薩里舊土爾扈特親王游牧之地尙在域中今
若畫歸阿勒台節制則塔城僅贖額魯特察哈爾牧地並哈薩克見住之巴爾
魯克止及赴庫爾喀喇烏蘇一綫之路此外再無餘地勢孤力薄實難自立等
語查濟木乃地方在額爾齊斯河之南如因阿勒台設防緊要請將該處改隸
阿勒台亦祇能就薩里山畫分爲界以山陰畫歸阿屬其山陽仍應屬塔爾巴
哈台管轄若將霍博克薩里舊土爾扈特親王牧地全境畫歸阿屬則塔城疆
域過蹙不足以資禦侮惟哈勒奇茨一帶實係在土爾扈特親王先世蒙 恩
賜牧境內該部落貧戶賴該處種田鋤口而哈薩克每歲於該處租地過冬由
來久矣一旦畫歸阿屬該部落失地失租情實難堪據親王鄂羅勒莫札普呈遞
接准科布多辦事大臣錫恆照會內開光緒三十二年奏明阿勒台山之哈薩
克前在薩里山陰過冬每年出給舊土爾扈特親王水草租牲近年並未出給
該親王安設台站出力應示體恤請於每年所收租馬四百匹內提出一分賞
給親王俟哈薩克呈繳此項租馬時由該親王派員照數呈領等語又據呈遞
該親王咨呈錫恆文稿譯漢內稱光緒三十二年應領所屬薩里山陰地方住
牧過冬阿勒台柯勒依哈薩克所繳水草租牲內賞發馬四十四匹親王札薩克

等接收此項馬匹已酌分各游牧窮勒巴圖等以度命備文呈覆等語 奴才詳
釋錫恆文該親王呈覆文各執一詞詢問扎拉豐阿即據檢送塔爾巴哈台交
割阿勒台山借地卷宗閱看查卷內有錫恆會同前塔爾巴哈台參贊大臣徐
忻並扎拉豐阿等電致軍機處懇請代奏原稿內稱此項哈薩克冬窩大半在
土爾扈特蒙古游牧薩里山居住惟此山係該親王數百年封地見已定期前
往交收並與蒙古親王哈目等三面籌熟將來定局哈薩克冬窩如仍住薩里
山應否輪租屆時詳核督令持平辦理等語又有錫恆咨覆徐忻接收阿勒台
山咨文內稱查薩里山係土爾扈特親王封地該哈薩克在彼過冬有年自難
絕其生路除仍准其前往過冬外應籌辦法以恤蒙艱等語又徐忻奏阿勒台
山交割完竣摺稿內稱扎拉豐阿會同錫恆前往阿勒台山舉辦交割事宜該
處原借地界並哈薩克戶數均經派員帶同哈目征斯罕等隨文送交錫恆收
管至冬窩仍住薩里山會與哈目酌定章程量爲出租而該親王亦欣然慨諾
俾昭公允而恤蒙艱等因是出租一節錫恆等於舉辦接收之始即已議及不
過以出租爲充賞名稱稍異耳於此亦見該部落之貧苦可憫實情查柯勒依
哈薩克前隸塔爾巴哈台管轄時因其佔用阿勒台山水草會經科布多參贊
大臣會奏令該哈薩克每歲與科布多之烏梁海蒙部出租以資幫補奉 旨
允准在案今柯勒依哈薩克改隸科布多管轄每歲在薩里山陰度冬佔用霍
博克薩里親王境內水草仿照辦理庶幾兩得其平其出租數目即照錫恆奏
案於每年所收租馬四百匹內按一成之一提出四十四匹作爲給與霍博克薩
里克舊土爾扈特三旗水草之租俾該親王札薩克等得以分給該三旗各貧
窮蒙戶以示體恤而免爭競在公家於每歲所收租馬內提出十分之一爲數
無幾而於邊局顧全實多至於挑兵查阿勒台山原係科布多所轄烏梁海七
旗游牧之地向歸烏里雅蘇台將軍節制塔爾巴哈台所屬之舊土爾扈特親
王三旗向歸伊犁將軍節制載在理藩院則例前准科布多參贊大臣連魁駐
紮阿勒台山辦事大臣錫恆咨稱擬將科布多所屬迤西附近阿勒台山之烏
梁海左翼散秩大臣一旗副都統一旗總管二旗右翼散秩大臣一旗總管二

旗新土爾扈特郡王一族貝子一族霍碩特扎薩克台吉一族共計三部落十旗撥歸錫恆就近管理已經理藩部議奏奉 旨依議欽遵查撥在案是阿勒台山挑兵自應在此三部落十旗之內挑選如或不敷科布多所屬杜爾伯特儘可挑選調用蓋阿勒台山本杜爾伯特舊駐之地該部人素強健其驍勇爲科布多所屬各旗之冠其部落見居阿勒台山後與烏梁海毗連調用甚便無須隔境挑選塔城所屬霍博克薩里親王之人俾得專顧塔城邊防亦可爲阿勒台山西南屏蔽而於塔城阿勒台兩有裨益又錫恆前與安成咨商於霍博克薩里親王境內安設驛站安成咨覆令錫恆自行設立所見亦謬去歲商議時扎拉豐阿即已承認嗣後霍博克薩里親王境內台站應由塔城參贊飭令親王所屬三旗派撥官兵駐台供差接至新疆綏來縣所屬驛站爲止遞送往來摺報公文以重郵政在台官兵應支鹽菜口糧由塔按月給發免累鄰封如才函商錫恆覆稱霍博克薩里親王境內驛站前已具奏每驛修房一所旋經派弁會同舊土爾扈特蒙員領款承修今已就緒若改歸塔城管理易驛爲台其工費似難中止等語查台與驛其名雖異而遞送文報則同各驛所建房屋既已就緒所用工費懇 恩准由錫恆報銷俾免賠累其房間交該管驛遞之舊土爾扈特官兵妥爲經理嗣後歲修費即由塔城支給以免轉轄又理藩部奏教漢扎薩克郡王出缺無嗣亦無親兄弟應行遴選承襲謹照例繪請開單請 旨奉 硃筆圈出已領度牒之台吉喇嘛棍布扎布

又科布多辦事大臣錫恆查明阿爾泰十二鄂拓克戶數並擬定大小哈目員額清單
公爵征斯罕所屬四十七戶又附管四十二戶共八十九戶 台吉扎奇爾雅所屬一百一十七戶 台吉姜納伯克所屬八十二戶 台吉阿岱所屬九戶 以上公爵台吉所屬哈戶向係自行管理不設哈目 比阿哈拉克齊邁救所屬一千七百四十七戶擬設副阿哈拉克齊一員札蘭四員章蓋十二員昆都十二員 比阿哈拉克齊蘇喀爾拜所屬一千二百九十八戶擬設札蘭三員章蓋八員昆都八員 比阿哈拉克齊加克普所屬一千二

百三戶擬設副阿哈拉克齊一員札蘭三員章蓋八員昆都八員 比阿哈拉克齊巴特達拉所屬一千九十五戶擬設副阿哈拉克齊一員札蘭二員章蓋七員昆都七員 比阿哈拉克齊珠旺罕所屬一千一十六戶擬設札蘭二員章蓋七員昆都七員 比阿哈拉克齊佈拉泰所屬八百七十二戶擬設札蘭二員章蓋六員昆都六員 比阿哈拉克齊額爾泰所屬八百三十四戶擬設札蘭二員章蓋六員昆都六員 比阿哈拉克齊達佈所屬七百四十戶擬設札蘭二員章蓋五員昆都五員 比阿哈拉克齊博特木齊所屬七百二十九戶擬設札蘭二員章蓋五員昆都五員 比阿哈拉克齊阿布達爾哈瑪所屬七百一十三戶擬設札蘭二員章蓋五員昆都五員 比阿哈拉克齊阿克拜所屬五百二十二戶擬設副阿哈拉克齊二員札蘭三員章蓋五員昆都五員 以上阿爾泰十二鄂拓克哈薩克共一萬一千五百一十六戶除公爵一員台吉三員外從前大小哈目毫無一定額數有無比阿哈拉克齊而有副阿哈拉克齊者有無昆都而有委章蓋者名目既紛紛歧員數亦甚繁冗即就圖魯雅噶爾所屬而論戶僅四百有奇章蓋多至十員他缺仿是固因牧地緊連俄界管理需人不能衡以通例然究覺太過限制茲已詳核情形酌量裁減此外各鄂拓克內均按該管戶數酌定總期無濫無缺爲準每五百戶設札蘭每一百五十戶設章蓋昆都各一員見在釐定比阿哈拉克齊共十二員副阿哈拉克齊共五員札蘭共二十八員章蓋共七十八員昆都共七十八員綜計員數有減無增俟奉 旨後造具花名清冊咨部
又理藩部奏遵議科布多哈薩克戶數酌定哈員摺略稱覆駁科布多所屬哈薩克見經該管大臣查清共一萬一千五百一十六戶擬請按照戶數酌定員額以資鈐束除公爵一員台吉三員所屬哈戶自行管理不設哈目外其十二鄂拓克各設比阿哈拉克齊一員以次之副阿哈拉克齊札蘭章蓋昆都各員額數皆量戶數之繁簡分別酌設其圖魯雅噶爾所屬僅四百六十九戶而設

副阿哈拉克齊二員札蘭三員章蓋昆都各五員既據該大臣聲稱牧地緊逼俄界管理需人不能衡以通例然較原有哈目額數已經裁減應准變通辦理其餘所擬大小哈目員額尚非浮濫遇有缺出由該管哈目在本鄂拓克內公舉驗補亦屬平允並核與伊塔兩城哈目名稱雖殊秩序無異庶於維繫哈目政策斟酌相當自應准如所請恭候 欽定 命下之日即由臣部行知科布多辦事大臣錫恆欽遵辦理并將釐定大小哈目員額花名年歲及轄境戶口詳細造冊報部立案

又署歸化城副都統三多奏時勢日急外患更深整頓蒙旗萬難再緩擬請將蒙地分建四部以東四盟為一部而設治所於洮南西二蒙為一部察哈爾土默特並套西之阿拉善附焉而設治所於綏遠土謝圖車臣為一部而設治所於庫倫三音諾扎薩克圖為一部科布多塔爾巴哈台並額濟納之土爾扈特附焉而設治所於烏里雅蘇台並擬各設蒙部大臣一員仿東三省總督兼將軍之例而於其下分設總務調查警政墾地勸業財政編練文化裁判交通交涉諮議十二局以綜理庶務其籌蒙經費除開辦每部籌撥一百二十萬兩外每年遞減二十萬兩五年一律減盡以蒙財治蒙地當可安中夏而禦強鄰下會議政務處議尋奏分設四部大臣事鉅費繁難以猝舉擬請責成各路將軍大臣等先將蒙旗情形實地調查

二年理藩部奏遵設憲政籌備處

又奏酌設諮議官
又奏察哈爾游牧理事官出缺不敷考試酌議變通辦法摺略稱擬將此次正紅旗蒙古所出察哈爾游牧理事官一缺暫照公缺例各取各部院各旗人員考試嗣後如出缺旗分無人送考及否送人數不敷考試即擬照此辦理若有合例應考者仍照舊章按各該旗專缺之例辦理

又科爾沁親王阿穆爾靈圭等奏請將辦理新班值年大臣裁撤以一事權三年理藩部奏清釐積弊以恤藩情略稱一日採買戰馬各直省採辦戰馬向就各蒙旗選購近來軍用日多弊竇漸起據車臣汗盟長車凌呢瑪報稱連年

荒歉牲畜損傷土瘠草稀馬匹尤難合格先將各本旗台吉等所有官馬結數供應不足則向他部落出重價購買迨選齊送驗經購馬委員揀選十分之五六餘均撥回另購又以軍務緊要不能久待勒令將所欠馬額折銀以償似此挑選誅求受虧太甚嗣後軍用戰馬恐不能預備等語此等呈懇雖屬一面之詞而承辦各員之借端騷擾亦可概見一日台站差徭查各站額設章京頭催馬甲烏拉齊等員名向由各蒙旗比丁當差並額設駝馬廐羊以資供應近據喀爾喀圖什業圖汗阿囊達瓦齊爾呈稱歷年遭災牲畜倒斃丁壯減少懇請將所缺丁差移勻他部落充當等語蓋緣近來內地官吏及各路屬官其奉差到旗者任意需索甚有折價貸見等弊不滿慾壑復以威脅從事即祭差及各項差徭亦不免此等流弊以致應差者不堪其累噴有煩言一曰供應官署查各路衙門大小差使修署添物及新舊交替之鋪墊等項向由所管各旗供應頗有假公濟私勒攤派情弊近惟庫倫大臣三多奏定公費將隨時修理衙署及傳用器具由大小各員自行籌備奉 旨允准在案其餘各衙門尚未議及則各旗之擔負漫無限制可知聞西路各處陋規尤夥遇有詞訟等事輒句結通事上下其手從中生利迨至三年換班則已飽載而歸凡此諸端積弊均足為猜嫌怨讟之媒是以偶有設施動遭疑懼即如臣部上年奏請變通舊例將民人出邊墾地及漢蒙結婚通用漢字漢文等禁酌予刪除欽奉 諭旨允准通行乃據錫林郭勒盟長楊桑等呈稱該盟旗地多沙岡土帶城性嚴寒冰雪耕種則獲利無多且有礙牧放蒙古崇信佛法敬重喇嘛誓不改變習俗不願學習漢語漢文及與言語不同之人結親等情推原其故雖由各蒙風氣未開習慣難變亦緣平日撫綏無術滋擾時聞往往新例未行而流弊已見 朝廷縱有體恤蒙艱改良藩政之意而該藩等轉若不勝其驚恐者長此因循隔閡竊恐強者滋事弱者生心為患何可設想 臣等再三審度擬即通行各路將軍都統大臣及沿邊督撫將 國家懷柔藩服力祛弊端之宗旨剴切宣布所有以上情事均應切實稽察如有弊端報明 臣部指名嚴參務令從前因循隔閡之習逐漸轉移庶幾將來經營布置之方較易措手

皇朝續文獻通考卷一百二十七

職官考十三 京文職

都察院

臣謹案明初始置都察院設左右都御史二人秦漢之御史大夫也又設左右副都御史秦漢之御史中丞也給事中始於漢分六科始於明御史

始於周爲宗伯之中士下士此小臣之傳命者厥國稱受其任職掌文書

後又使監郡於是職司糾察漢初因之遂爲風憲官分十三道始於明巡城亦始於明兵馬司指揮

始於元吏目始於明 本朝多沿明制謹續前考

乾隆五十五年 諭都察院奏六科給事中十五道御史所辦事件俱係筆帖

式代爲呈畫惟京畿道偶有上堂之時其餘六科並不進署其十四道雖同進

署並不進署到任一載認識尙未周徧茲奏新例漢科道截取道府均應

出具考語並須甄別賢否若一年不過見面數次優劣究未深知嗣後科道分

日進署上堂等語所言却是向來京察保送等事皆由該堂官考覈近又將科

道俸滿四年者截取道府其堪勝外任與否亦責成該堂官出具考語若不上

堂見面認識難周其才具優絀更無從知其底蘊至科道本有奏事之責原許

條陳利弊倘內外大臣及都察院堂官舒常等果有不法之事亦可列之

彈章所言者實朕當加之優獎將被劾者治以應得之罪並不因上堂接見之

例遂致壅塞言路若因定此例有復行瀆奏自爭身分者必當重治其罪或以

此奏係舒常主見將來藉端糾劾意圖報復亦斷難逃朕洞鑒也

嘉慶四年議准漢給事中閱俸三年即行截取光緒十年又改閱俸二年即行截取

又議准宗室額設御史四缺向由正副理事官引 見補授今部院增設宗室

郎中員外郎遇保送御史時准一體保送遇有宗室御史缺出由宗人府與應

升人員論俸帶領引 見補授

十一年奏准嗣後考選御史請 旨於條內增入廕生一項准其一體考選

十六年 諭國家設立都察院堂官六科各道凡內自王公大臣外自督撫藩

臬以至百職庶司如有營私欺法辜恩負職者言官據實糾彈立即按款嚴究

執法重懲我朝 列聖相承綱紀肅清力除蒙蔽之弊朕祇遵 成憲太阿在

握懲勸奸亦從不稍事姑息然事必嚴實斯罰不妄施乃近年言官中竟有

懷挾私怨陽沽鯁直之名陰施報復之計以巧試其術者其初列款上聞浮言

聳聽及查明毫無證據若將言官懲罰過重似杜敢言之路而被劾之大臣一

登白簡雖辨明心迹誣責不加究以枉受誣讒使在廷之議謂其會遭指摘不

免中懷畏歆損其精白之衷且君臣之閒亦不若無此芥蒂益乎股肱心膂之

義也卽如原任大學士戴衢亨果於任事惟性急語直每遇部院公事判別是

非或從或違安能盡協人意因此爲怨者所詆前被給事中花杰封章奏指

稱伊與貢士洪瑩交往情密拔置一甲一名又黃旭試卷行楷相開濫置二甲

經朕密取殿試各卷加封呈覽特將洪瑩帶至上書房命二阿哥監看令其默

寫試策惟時距殿試已閱兩月有餘洪瑩所默試策與原卷悉相符合不過數

虛字閒有異同其黃旭原卷末數行稍欠工整並無一筆行書當卽明白宣示

剖分曲直本年己巳科庶吉士散館朕料洪瑩黃旭二人文義必應考居前列

若抑置在後非有心屏黜卽衡校未當及閱卷大臣公擬進呈折閱彌封洪瑩

黃旭同列一等設戴衢亨尙在派令閱卷必謂其徇情拔取卽不與閱卷之列

亦或疑其轉相囑託今戴衢亨已故可見文章自有定評豈同列諸大臣至今

日尙曲爲附和乎戴衢亨蓋棺論定心迹已明應含笑泉下矣花杰從前憑空

捏造誣陷大臣是誠何心姑置勿論嗣後諸言官務當各矢天良遇有不公不

法之事必求確據直列彈章不可因有此旨緘默不言若以毫無影響之談誣

人名節 天鑒難逃國法具在懷之慎之

二十二年 諭國家設立臺諫任以言責期於明目達聰職至要也爲科道者

必實有忠君愛國之心遇政治之闕失臣工之險詖者誠動於中直陳無隱此

真忠言讜論朕所樂聞而願望者也近日科道章奏未爲不多而能有所建白

者實少或止於申明舊例而泛爲鋪敘或輒議更張成法而斷難施行此皆志

存塞責意在見長爲私而不爲公朕洞燭其情猶以其諫官而優容之不意竟

有以奏事爲利媒藉以竊弄威福私納財賄者壞法亂紀莫此爲甚此實臺諫

中之敗類朕不能不執法懲治矣蓋忠佞邪正判然兩途嘉言裨國與考言亂政其利害關於國家者甚鉅朕特製諫臣論一篇著發交都察院自堂官以及科道每人照錄一通嗣後初任言官者到任之日亦令照錄一紙俾各觸目驚心各科道經朕剴切訓飭務各屏除私念力矢公忠凡政務之關繫國計民生及內外臣僚營私欺法者仍據實直陳不可妄生疑懼自甘緘默惟不得假公濟私變亂是非用副朕求治納言之至意

道光九年 諭御史何輝綬奏請定保舉御史章程一摺所奏甚是御史爲風憲之官必當慎選此次保送內兵部郎中李煥曾任湖北荊州知府因才不勝任改用今職刑部郎中錢學彬前在福建泉州知府任內有意規避請改京職部議革職旋經捐復員外郎蒙混截取繁缺知府部議降調又捐復郎中此等人員何得濫行保送御史李煥錢學彬均著該部即行扣除嗣後各部院堂官於所屬司員內凡因私罪降補京職及不勝外任特旨改用人員不准保送御史並不得截取外用

十五年 諭科道爲朝廷耳目之官責任至重凡政治利弊攸關如有真知灼見俱應據實上陳直言無隱近來科道中馮贊勳金應麟黃爵滋曾望顏等平日遇事均屬敢言開有指陳亦皆明白曉事其有關繫國是切中事宜者無不量加採納立見施行是以將該員等擢任京卿所以風勵言官卽是廣開忠諫之路該員等益當仰體朕意遇事敢言一切毀譽榮辱之念俱不應存於中惟於國計民生實有裨益或除奸剔弊確有見聞均當剴切直陳毋稍隱諱倘謂既非言官遂甘緘默則是以建言爲梯榮之具驟得升階卽圖保位似此沽直聲於前而思緘口於後不幾與朕用人圖治之意大相刺謬耶嗣後務當屏除私見盡心盡職不避嫌怨力矢公忠不特政務關繫民生國計及牽涉內外臣工者仍應據實指陳不可妄生疑懼卽朕用人行政之際稍有闕失亦當隨時進言以資採納朕總理庶政一秉大公卽聽言一節深望諸臣切實敷陳不憚再三諫誡期以察天下之治忽非徒博納諫之虛名其有徇隱姑容前後易轍者尤當深以爲戒言行相顧始終不渝朝廷收讜言之益國家著直臣之效朕

實有厚望焉

吳敏樹書謝御史事 略稱湘鄉謝蕓泉先生當乾隆末宰相和珅用事權焰張有寵奴常乘和車以出人避之莫敢詰先生爲御史巡城遇之怒命卒曳下奴答之奴曰汝敢答我我乘我主車汝敢答我先生益大怒痛笞奴遂燒其車曰此車豈復堪宰相用耶九衢中人聚觀譁呼曰此真好御史矣和珅恨之假他事削其籍珅復官部郎以卒道光癸巳河南裕州知州謝興曉以卓異薦入都裕州御史之子由翰林改官者引見時上問曰汝湖南人作京語何也對言臣父謝振定歷官翰林御史臣生長京師 上忽悟曰爾乃燒和珅車謝御史之子耶因褒獎興曉家世勉以職事明日 上語閣臣朕少時聞燒車事心壯之昨見其子來甚喜未幾擢興曉絳州府知府

又給事中曹一士奏查給事一官自漢以來相沿已久以其有事殿庭則曰給事中以其出入環闈則曰黃門給事以其統於門下領於侍中則與中書同謂之省前代之中書門下卽今內閣大學士職皆居禁垣號曰兩省而御史則謂之臺臺省異地故科道分曹至今目科道曰兩衙門明非一衙門官屬也遠明初始分六科以省知六部之事而糾其弊誤時罷門下省不設而六科獨主封駁以補關拾遺雖與御史同爲言官而御史職在監察百司故居於外六科職在宣行制敕故居於內所以重王言尊國體內外秩然不可易也 國朝會典開載該科所奉 旨意有灼見未便之處許封還執奏部院督撫本章有情理未洽者俱得駁正題參至於朝政得失百官賢佞或特疏或公本奏聞是立制之初惟在慎重命令別白是非專責以言不任他事俾得從容謀議以殫其心朝夕論思以盡其職是天下民生休戚吏治臧否皆得之於退食之餘廣諮博訪以便入告而裨廟堂耳目之所未及此我 國家立制本意參酌歷代而無弊者也雍正元年以六科內陞外轉一事奉 旨著都察院管乃一時權宜之法然自此以後臺臣循照臺例一切城倉漕鹽等差與御史一體開列於是六科各員奔走內外朝夕不遑或遞相署理至有本科祇留一人者本章到科匆

勿過目即以付部不及詳細審讀又其甚不得已則閱閱雀鼠之贖雜進於內朝簿書期會之吏接述於禁鑿判署紛紜重倒置非所以欽崇 綸綍整肅綱常也 臣請敕下在廷考正六科之制一切悉還其舊則臺自爲臺省自爲省給事中之名既正而後專責以言執政不職思其居竭誠盡慎以仰報 國家者乎至於內陞外轉會典舊例各科將條陳參劾本章造冊移送吏科序俸開列題請 欽定是則資之淺深言之當否 御覽昭然原無待他屬而後定也且 國初以來臺省未嘗合一不聞差遣之員倘以城倉鹽漕等差事屬緊要人數未敷則但當增置御史之員不必更分給事之任抑 臣更有請者會典開載凡內閣交出密本由各該科掛號即將原封送各該部取職名附簿備查是從前密本未有從內閣徑下者即前代中書門下兩省更互校驗之意也今 臣到任以來見所發各科本章祇有紅本而密本並未一見至 皇上諭旨徑由內閣發部者 臣等遲至浹旬始得從邸鈔一讀如此則雖欲有所論列或已無及於事似非設立科臣之初旨也嗣後請聽 臣等派出本科筆帖式二員每日輪班赴閣恭抄 諭旨併所發各臣條奏密本既省掛號轉發之煩 臣等亦可不待邸鈔即得預聞 旨意備見奏章庶幾隨時論列以仰贊 高深於萬一

二十三年裁稽查崇文門稅務滿漢御史
三十年五月 諭通政司副使扎克丹奏請仍設巡漕御史一摺科道巡漕舊例久經停止道光十九年該員御史任內曾經奏請復設欽奉 皇考宣宗成皇帝諭旨此項差使裁撤已久著毋庸議扎克丹以必不可復之事又行陳奏實屬不知事體見今河漕諸臣本屬不能和衷共濟然操縱之權惟朕持之何得輕議紛更沽名市譽況省事不如省官徒滋流弊著不准行
咸豐元年 諭嗣後各城指揮等官如能查拏鄰境要犯方准量予鼓勵若僅於該管地面訪獲尋常案犯不得濫行請獎
四年定滿漢巡城科道不准交司坊手條將被押人發保
又河南巡撫英桂奏請將在籍給事中陳壇被參情節覆審另擬具奏 諭陳

壇身任給諫又係奉旨回籍辦理團練乃如此喪心若不從嚴懲辦何以勸各省出力紳民著迅速奏來斷難任其避就欺罔俾逃法網

同治二年 諭漢員保送御史例須考試滿員向不與考殊非慎簡言官之道以後保送滿御史著各衙門堂官認真考試擇其通曉清漢文字品行端謹者出具切實考語保送候簡以期臺諫得人除積習

光緒八年 諭前因雲南報銷一案牽涉言官降旨將御史李郁華解任傳質茲據都察院奏李郁華爲要案牽涉並風聞平日行止不端似此劣員豈可置廁臺諫李郁華著即行革職以示懲儆科道爲朝廷耳目之官職司糾劾膺是選者宜如何束身自愛期於無玷臺班嗣後著都察院堂官將科道各員隨時認真考察如有不知檢束聲名惡劣者即行據實糾參用副整肅臺綱至意

十一年 諭國家廣開言路原期各抒忠諫俾得集思廣益上有補於國計下有裨於民生諸臣建言自應審時度勢悉泯偏私以至誠剴切之心平情敷奏庶幾切中事理言必可行上年用兵以來章奏不爲不多其中言之得宜或立見施行或量爲節取無不慮衷採納並一一默識其人以備隨時器使至措詞失當從不苛求即陳奏迂謬語涉鄙俚者亦未加以斥責若挾私妄奏信口詆彈既失敬恭之義兼開攻訐之風於人心政治大有關係恭讀 高宗純皇帝聖諭中外大臣皆經朕簡用苟其事不干大戾即朕亦不遽加以斥置御史雖欲自著風力肆爲詆訕可乎又恭讀 仁宗睿皇帝聖諭內自王公大臣外自督撫藩臬以至百職庶司如有營私飲法辜恩負職者言官據實糾彈立即嚴究重懲若以毫無影響之談誣人名節 天鑒難逃國法具在等因欽此 訓諭煌煌允宜遵守如上年御史吳翰參劾閣學銘目爲漢奸編修梁鼎芬參劾李鴻章摭拾多款深文周內竟至指爲可殺誣謗大臣至於此極不能不示以懲儆吳翰梁鼎芬均著交部嚴加議處總之聽言行政一秉大公博訪周諮惟期實事求是非徒博納諫之虛名爾諸臣務當精白乃心竭誠獻替

十三年議准嗣後滿科道各官如有父子胞叔兄弟胞姪升三品以上京堂並外任督撫者即照漢員迴避例一律辦理至各衙門保送宗室滿蒙御史

如有應行迴避者亦照漢御史例一概不准保送其業經奉 旨記名後如有應行迴避者由該員自行呈明本衙門堂官知照本部暫緩引 見俟毋庸迴避時再由該衙門知照本部遇有御史缺出再行帶領引 見

二十四年 諭御史文倬奏言官黨庇誣罔熒聽請旨飭查一摺據稱御史宋伯魯楊深秀前參許應騷黨庇熒聽恐啟臺諫攻擊之漸等語該御史所奏難保非受人唆使向來臺諫結黨攻訐各立門戶最爲惡習該御史既稱爲整飭規範起見何以躬自蹈此文倬不勝御史之任著回原衙門行走

二十八年裁抽查漕糧御史二員並各倉稽查御史從倉場侍郎榮慶請也

三十年 諭御史爲朝廷耳目之官必須學識明通方足以資獻替嗣後宗室滿蒙御史均著照漢員之例一體考試惟滿員五品人數不敷自應量爲推廣所有各衙門六七品實任京官著各該堂官擇其品端守潔者切實保送其內務府五品以下滿蒙人員如有堪膺此選者准其一律保送考試

三十二年 諭都察院在指陳闕失伸理冤滯著改爲都御史一員副都御史二員六科給事中改爲給事中與御史各員缺均暫如舊

是年裁查倉御史巡城御史查旗御史

又 諭嗣後保送御史著各部院大臣於京官實缺五品以下至中書外官實缺四品以下至州縣各舉所知將該員志行事蹟臚陳切實保薦不得以籠統之辭漫爲推許如或徇情濫保將原保大臣一併從重議處該給事中御史等即著照此次奏定章程統司糾察凡內外各衙門如有用人不當辦事不實均准奏參仍著該堂官等隨時察核不稱職者據實甄核爾大小臣工務當精白乃心實事求是用副朝廷集思廣益之至意

又軍機大臣等會奏議覆都察院官制略稱科道各員缺定自 國初多沿明制前奉 上諭六科給事中著改爲給事中與御史各員缺均暫如舊 臣等悉心斟酌科道各缺有應再行增設者有應略從裁減者如各御史向係按省分道當初行省不及今日之多是以分道較簡今設二十二行省自應按省增設以符名實原置京畿道係掌道二缺協道二缺東三省爲根本重地謹擬仿京

畿道例增設遼道以重 陪都亦設掌道二缺協道二缺其餘各省均從初制

祇設掌道不設協道原設江南道擬照省分爲江蘇安徽各設掌道二缺原設湖廣道擬照省分爲湖北湖南亦各設掌道二缺浙江江西福建河南山東山西陝西四川廣東廣西雲南貴州等省均各設掌道二缺甘肅新疆兩省擬各增設掌道二缺責成各該御史於所掌各道訪求利病凡有關國計民生者均應據實臚陳給事中既奉 旨撤去六科之名於部務已非專司新設各部亦本無稽查專責擬請酌裁四缺原設科道共八十缺今擬共留六十四缺共裁十六缺仍擬暫請緩裁以後出缺不補給事中御史各員於內外各衙門如有用人不當辦事不實均准奏參所有各部及各衙門即無庸派專員稽查以昭核實原擬都察院草案有設僉都御史之議查 國初曾設漢僉都御史一缺嗣於乾隆初年議裁自應毋庸再設

又奏 臣院額設筆帖式四十二缺公同面試酌留三十員作爲額缺六科原設筆帖式八十缺從前各科皆有題本科抄用人較多見改題爲奏又無稽查事件繁簡迥不相同公同考試酌留三十缺兩項人員缺出扣補扣選裁至額缺爲止見裁汰之員如有願在額外行走者仍聽其便

謹擬整頓變通章程

一六科既經歸併所有應辦事件如吏兵科之畫憑刑科之秋審 朝審覆奏與一應事宜均由給事中公同辦理不分畛域 一給事中出缺向由吏部按資挨序雖屬公平而不足以資激勵嗣後請由 臣等精加甄擇擬定正陪請 旨擢用 一伸冤理枉通達下情係都察院專責故京控案件向歸辦理惟步軍統領亦准呈控所以防壅閉也餘如京畿道之會辦京察大計軍政河南山西道會同吏兵部製籤各科道之派驗看月官事關防弊應請仍照舊章 一查旗各差前經裁撤所有稽察宗人府內務府等差應請一併裁撤以歸畫一 一滿缺給事中御史出路較隘擬請准其三年俸滿保送道府 一在京各衙門都察院均有稽查之責近年陸續添設之外務部農工商部學部民政部郵傳部等衙門辦理事件並不關報都察院無從稽

察查各衙門緊要事件必須陳奏嗣後請將京外各衙門章奏凡關涉用人行政舉措損益者概行發抄俾給事中御史等悉心考究如有未協隨時糾正不必拘定何衙門歸何科何道稽察 一各道按省分設責成各該御史於所掌各道訪求利病擬令各省於州縣以上之補署內外各局之所增減以及兵制財政學務農路礦警察諸大綱按年立表咨送都察院以憑考察 一設立研究所添購各種書籍及京外報紙以爲糾察行政及裁判行政之基礎由堂遴派提調二員編譯二員專司其事 一經歷都事滿漢各一缺向章一咨一留見請一律改爲留題之缺 一御史爲 朝廷耳目之官秩最清要宜申明舊例非進士舉貢廕生出身人員不得保送此外非學堂卒業人員不得保送以清流品而絕奔競至滿御史仍照舊例辦理 一設立收發文書處由經歷都事筆帖式內酌派數員輪班值日 一蒙 恩賞每年津貼銀四萬兩照翰林院例堂官分四成之一其三成按給事中御史員數均勻每季分放以免偏枯

三十三年考察政治館等議覆御史趙炳麟奏請改給事中爲殿中侍御一摺擬請於各給事中內升設掌印給事中二人秩正四品內以三四品京堂爲升轉之階外以三品員缺聽候 簡用新設掌印給事中二缺照科道輪升四五品京堂成例略爲變通由都察院堂官秉公保送給事中六人各道御史六人各由吏部帶領引 見恭候 簡定嗣後遇有缺出即照此次定章辦理其原設給事中員缺應定爲十八員給事中出缺仍照舊咨由吏部以全班御史帶領引 見

又 諭陸寶忠奏科道人員向例不准奏調等語嗣後臺諫各員各省督撫不得率行奏調其有願設效外省及赴各衙門當差者著即開去底缺以符定制 又 諭前經降旨外官實缺四品以下至州縣均准保送御史茲據兩廣總督岑春煊奏稱外省實缺各官恐地方相需甚殷未能悉以充選擬請稍寬一格等語嗣後保送御史著准其兼擇候補人員之曾任實缺及曾經署事確係聲望素孚政績卓著者加具切實考語一律保送仍著懷遵前旨不准以籠統之

詞漫爲推許每人所舉至多不得過二員以杜冒濫倘所舉之員不稱臺職或日後有徇私賄貨情事一經發覺定將原保大臣從重懲處不貸 又政務處議覆都御史陸寶忠奏請改都察院爲國議會以立下議院基礎一摺查都察院職司風憲係獨立衙門爲 國家廣開言路煌煌 祖訓著在臺規該御史等所請應著毋庸置議

三十四年奏請續定臺規分門輯訂

宣統元年 諭朕御極以來勤求治理於嘉言直諫凡有益於國計民生者固不虛衷採納見諸施行即由該長官代奏者亦必詳加披覽酌核辦理惟近來建言諸臣其直言敢諫披瀝忠忱者固不乏人而懷挾私見及毛舉細故不知大體者亦嘗有之否則毫無建白緘默偷安甚負朕殷殷求言本意自此申諭以後朝廷寬其既往嚴其將來其有言責諸臣暨代奏抒誠進言者果能關懷時局爲國爲民條陳得當朕不但立准施行且加以獎敘倘敢如前不悛任意嘗試亦必予以懲處不貸

三年大學堂總監督劉廷琛奏立國以通華蔽爲要義機關不厭其多近議官制者恆視他人之有無以爲斷不知人所無而我獨有雖各國通儒碩彥深達治體者亦莫不推爲最善之制則都察院是已查該院爲 朝廷耳目之官司風憲之任凡 主德之隆替時政之得失百官之邪正民生之疾苦皆得隨時上聞故歷代推爲峻秩我 朝 列祖 列宗尤加優重豈博納諫之名誠以言官職在糾察爲 朝廷整肅紀綱使貪官墨吏大奸巨惡有所嚴懼惕息而不敢肆也宋蘇軾曰姦臣之始以諫官折之而有餘及其既成以干戈取之而不足故汲黯在朝淮南寢謀唐有李勉朝廷始尊睿宗比糾彈爲鷹犬也擬職任爲風霜誠知其重也 天子深居九重宜廣置耳目以助其明多設爪牙以資其衛裁撤言官是自蔽耳目去爪牙勢必使聰明塞網紀蕩然此其大不可者也或謂憲政成立有國會以監督政府宣達下情似無庸設此駢枝不知國會成效尙難預必且其職在議法勢不能多所糾彈又每年開會不過三月平時行政官保無貪恣壞法必須隨時糾察者言官設有專職可補議院

所不及或議改都察院爲行政裁判所不知裁判所係判斷於罪狀已發之後都察院則糾察於事情未發之先其性質既迥不相侔其收效亦未可同日語也或又謂都察院無事可辦不知朝廷設立言官原不責其辦事假以寬閒之時地養其嚴重之威稜所以使之博稽利病彈劾官邪其期望於言官者甚大豈以簿書期會造就胥吏之材哉是又未深明治體矣光緒三十二年該院擬裁額缺臣具呈指駁請翰林院代奏仰蒙先朝採納遂未允行茲聞新官制所擬該院在被裁之列竊所未安朝廷勵精圖治原欲改官制之不良者而使之良都察院本數千年相傳之良法外人所共稱豈可廢諸一旦比歲士氣不振直言敢諫者誠不多觀願朝廷導之使言以激揚風氣勿視爲無用以陷壞紀綱故該院有當整頓之端而斷無可議裁之理臣愚謂言論機關以多爲貴都察院允宜與議院並存仰懇朝廷俯賜主持飭下憲政編查館會議政務處詳慎核議毋使良法遂廢天下幸甚

通政使司

臣謹案通政使昉於宋之通進使與進奏院唐虞之納言周太僕下大夫也副使卽周小臣上士參議卽周御僕下士皆始置於明立法之初未嘗不善卒以事權太重流弊滋多國朝鑒有明秕政悉更規制名雖沿而實則異光緒二十四年歸併內閣十月復舊二十八年裁撤蓋向來專管題本見已改題爲奏故特裁之

大理院

臣謹案大理寺卿及少卿始於北齊而大理之官實始於秦陶尚矣平反重辟以貳邦刑向與刑部都察院爲三法司迨大政大獄與六部都察院通政司稱九卿會議焉乾隆五十年以來官制無變更茲就改寺爲院後詳敘之

光緒二十四年覆准以大理寺歸併刑部十月復舊

三十二年諭大理寺著改爲大理院專掌審判

又大理院奏略稱設官必先分職實務在循名昔宋神宗時詳定官制一切領空名者皆加釐正條理精密史冊著稱蓋必先專其責任然後可課其成功也茲承諭訓改寺爲院儲裁判獨立之精神爲憲法執行之基礎臣等前請申明審判權限仰荷聖明洞鑒惟查總司核定官制王大臣咨送法部及院草案秋朝審均隸法部則慮因清獄當由法部主持其各省審判死罪案件兩處草案皆載有覆核字樣原統平反參核會聽三事總貫於覆核之中將來如何核定俟與法部商妥再行會奏此就見在情形所當酌議歸併者也定例京外永遠枷號人犯向大理寺專司稽查年終彙奏奉行既久幾等具文溯查此項人犯始於乾隆初年至嘉慶後漸少迨光緒二十二年僅有太監永祿卽宣增泰一名由內務府遵旨發往黑龍江永遠監禁迄今十年京外並無此項人犯卽無大理寺之稽查亦不慮其枉縱況此係司法中行政之事而非裁判上應有之權臣院既以審判爲專司似不應兼及行政致使權限不分見署順天府尹孫寶琦條奏廢除枷號已蒙飭交法部核議應俟法部覆奏後辦理所有稽查彙奏之例應請停止

又奏開辦情形略稱方今環海交通強鄰逼處藉口於我之裁判法制不能完善日謀擴張其領事裁判權故欲進文明之治則大理院之設誠爲要政願事關刑舉經始爲難考東西各國皆以大審院爲全國最高之裁判所而另立高等裁判所地方裁判所層累遞上以爲輔翼其大審院法庭規模嚴肅制度崇閱監獄精良管理有法不惟國人無敢玩忽卽外人亦生敬憚用能民志益奮主權不撓今欲仿行則法庭宜先設也監獄學宜講求也高等裁判所及地方裁判所與獄局宜次第分立也裁判人材宜預爲儲備也臣院爲全國最高裁判之地海外列強將於此屬耳目竊謂開辦之初以調用人員建立法廷爲亟而籌款尤爲先著舊日大理寺常年經費祇六百金際此釐訂官制期於規復國權斷非敷衍因循所能蒞事一切經費自應另籌有當與法部會商者有當由臣院自辦者容俟續陳除裁判人材見已設有法律學堂俟畢業後分別甄

錄外所有員司津貼書記雜役工食等項樽節計算約需銀二萬兩懸 飭下
度支部照數撥給以便開辦
又奏定審判權限等級略稱查閱總司核定官制王大臣奏定法部節略內開
各國審判之級大都區爲三審其裁判所大都分爲四級英美德法諸國均取
四級裁判所主義日本裁判制度仿效德法而亦分爲四等即區裁判所地方
裁判所控訴院大理院是也區裁判所承審輕罪案件地方裁判所爲第二級
裁判凡區裁判所不能承審之案皆得承審之即爲區裁判所之第二審控訴
院承審不服地方裁判所判斷之案即爲區裁判所之終審大理院承審不服
控訴院判斷之案即爲地方裁判所之終審故輕罪案爲區裁判所所管轄者
訴止於控訴院重罪案爲地方裁判所所管轄者始得上控於大審院等語
等證之各國法制德意志及日本刑法均分違警罪輕罪重罪爲三項犯違警
罪者警察廳得而懲治之犯輕罪者得於區裁判所赴訴而不能越控於地方
裁判所犯重罪者得於地方裁判所赴訴而區裁判所不得受理控訴院則承
受不服地方裁判所之審判者而並無始審之案大審院則承受不服控訴院
之審判者而自理之案以皇事官犯及國事犯爲斷是以大審院不必俯侵控
訴院之權地方裁判所不能兼理區裁判之事分權定限實有攸歸中國行政
司法向合爲一今者 詔以 臣院專司審判與法部截然分離自應將裁判之
權限等級區畫分明次第建設既變通日本成法改區裁判所爲鄉獄局改地
方裁判所爲地方審判廳改控訴院爲高等審判廳而以大理院總其成此四
級裁判所之制也 臣等公同商酌大理院既爲全國最高之裁判所凡宗室官
犯及抗拒官府並 特交案件應歸其專管高等審判廳以下不得審理其地
方審判廳初審之案又不屬高等審判廳判斷者亦准上控至院爲終審即由
院審結至京外一切大辟重案均分報法部及大理院由大理院先行判定再
送法部覆覈此大理院之權限也高等審判廳則不收初審詞訟凡輕罪案犯
不服鄉獄局並不服地方審判廳判斷者得控至該廳爲終審凡重罪案犯不
服地方審判廳之判斷者得控至該廳爲第二審其由該廳審判之案內則分

報法部及大理院外則否執法司以達法部至死罪案件並分報大理院此高
等審判廳之權限也地方審判廳則自徒流以至死罪及民事訟案價值二
百兩以上者皆得收審訊實後擬定罪名徒流案件在內則徑達法部並分報
大理院在外則詳由執法司以達法部死罪案件在內在外俱分報法部及大
理院此地方審判廳之權限也鄉獄局則答杖罪名及無關人命之徒罪並民
事訟案價值二百兩以下者皆得收審訊實以後逕自擬結按月造冊報告在
內則分報法部及大理院在外則詳執法司以備考核此鄉獄局之權限也權
限既定則高等審判廳以下必須次第建設方有專司除各直省審判衙門應
俟官制釐定由法部咨商各督撫次第籌設外其京師詞訟自以地方審判廳
爲重要鄉獄局次之擬於內外城設立地方審判廳凡刑事徒流以上民事二
百兩以上者俱以該廳爲始審則重罪案件有所歸宿矣京師鄉獄局擬正名
爲城獄局循巡警分廳之舊於內外城分設九所凡刑事無關人命之徒罪以
下民事二百兩以下者俱以該局爲始審則輕罪案件有所歸宿矣至高等審
判廳外國俱與大審院相附麗應俟 臣院擇定衙署後再行斟酌定議此設裁
判所之次第也 臣等承乏大理知入手之初非確定各審判官之事權則責無
所屬非預籌各審判所之區域則事無所歸謹擇急需籌辦者先行奏聞
三十三年法部大理院奏核議大理院官制略稱 臣院專司審判一切組織機
宜必符各國立憲之精神乃成一代完全之制度查閱官制清單於院卿以下
設推丞推官書記錄事附司直一廳設總司直及司直原擬員司名缺大抵遠
師德法近仿東瀛其官稱則參以中國舊制惟加以考核尙有應行增改者查
推官之名雖自有唐歷代皆屬外僚不繫京職宋時大理有左右推事之稱擬
改推官爲推事司直官稱亦緣古制第名義近於臺諫尙與事實不符擬改總
司直爲總檢察廳丞改司直爲檢察官庶核實循名人人易知其職守書記即
古之記室日本取之爲各衙署之通制中國各部院並無此官近日民政等部
奏設三等書記品秩亦不相同似應酌行變通考明初大理寺有都典簿一官
簿罪簿囚皆簿記事也近翰林院有典簿從前太僕鴻臚皆有主簿其制俱古

擬改一等書記官為都典簿二等書記官為典簿三等書記官為主簿既得還中國之舊觀亦免襲外國之職制臣院掌最高審判民刑訟案自應酌量分庭查原單刑科推官擬設十四人臣民科推官擬設十人自係取外國合議制度竟以民刑各分二庭刑事以七人為一庭民事以五人為一庭也然同辦一院之事各庭人數不一未免參差且刑事本視民事為繁僅擬分立二庭亦虞人不敷用擬分刑事為四庭民事仍用二庭各設推事五人秩視各部之郎中其第一庭則各以推丞為之長至見審案犯若未定罪名而又未便取保者必須有羈禁之所宜設一看守所酌設所官以司其事

大理院官制

一設正卿一人秩正二品掌總理全院事務監督刑事民事審判廳各事宜少卿一人秩正三品佐正卿總理全院事務及監督一切事宜 刑科推丞一人秩正四品掌第一庭刑事審判事務並調度刑科事宜 民科推丞一人秩正四品掌第一庭民事審判事務並調度民科事宜 刑科推事十人秩正五品分庭任事以五人為一庭民科亦如之第一庭掌審判 特交及國事犯案件並詳核京內外大辟重案以推丞為之長第二庭掌審判宗室及官犯案件第三庭掌不服京師高等審判廳判決之院控案件第四庭掌不服直省高等審判廳判決之院控案件 民科推事九人第一庭掌宗室民事詞訟及不服京師高等審判廳判決之院控案件以推丞為之長第二庭掌不服各省高等審判廳判決之院控案件 都典簿一人秩從五品掌總理文牘會計及庶務監督典簿以下各員 典簿四人秩從六品掌分任文牘會計及庶務並監印 主簿六人秩正七品掌錄供編案譯電及督同錄事繕寫文件 錄事三十人正八品十八缺正九品十二缺掌繕寫文牘承辦一切庶務

附設總檢察廳官制

一設總檢察廳廳丞一人秩從三品掌總司大理院刑民案內之檢察事務並調度司法警察官吏監督以下各級檢察廳 檢察官六人秩正五品分

任檢察事務 主簿一人掌一切庶務 錄事四人掌繕寫文件承辦庶務 附設看守所官制

一設看守所所長一人秩從五品掌羈管見審人犯總理所中一切事宜 看守所官四人秩正八品掌所中一切事宜 錄事二人秩正九品掌繕寫文件

又奏擬請專司核稿差使略稱查各行省每年斬絞案件統計立決監候兩項不下一千六七百起從前刑部核覆分隸各司其情罪不符者則交由律例館議駁事權分故案無留牘比例熟故法無異歧今改由臣院覆判司法分權責無旁貸而自定章後各省供勘咨送到院者已不下數十百起日後紛至沓來勢必更形擁擠查民刑各庭員缺較少若責以覆核讞牘不惟分其訊斷之力抑恐繁劇難勝轉滋枉縱出入之虞擬仿從前律例館之制於臣院設一詳議處擇各庭推事中之詳悉例案者派為總核或分核專司覆判外省死罪案件其應行駁審者亦由該處擬稿此項即作為臣院差使不增缺額俾刑名總匯之區得以從容核擬庶責成有專而人命益昭慎重矣

三十四年又奏酌擬推丞升階略稱推丞係正四品其品級與法部參議相同可否比照法部參議遇有法部左右丞及臣院附設總檢察廳廳丞缺出時一體開單恭候 簡用

又奏添設看守所協理差使並酌擬保獎片略稱看守所事繁責重民政部步軍統領衙門奏送案件大都強盜搶奪等項為多其人類屬不逞之徒拘繫一隅尤應嚴於防範所官四員僅如從前之司獄循環值班所恃為全所督率者第有所長一人實屬不敷分布查從前刑部提牢額設滿漢二員輪流當差始足以節勞逸而重刑獄臣等略仿其意擬添設一看守所協理不作額缺擇院內相當人員專派差使與所長分治事務即與所長分肩責任至從前刑部提牢之制充當一年限滿奏保陞階臣院事同一律擬將年限酌量變通此後如看守所長當差二年勤慎無過者擬保陞推事協理擬保陞看守所長俾任事者不至向隅庶足激厲羣材各盡職守

又奏就司法權限法部原擬清單加具案語

一大理院自定死刑之案咨送法部核定將人犯送法部收監仍由大理院主稿會同具奏其秋後人犯於定案後移送法部監禁 朝審冊本由法部核議實緩再由法部及 欽派大臣覆核 黃冊專由法部進呈

謹案各國裁判制度皆以大審院為全國最高審判之地定擬各案惟死罪送交司法大臣執行如情罪或有可原則由司法大臣奏請減免並無駁審之權即釐訂官制王大臣奏呈法部節略所稱法部祇能監督裁判處理其司法上之行政事務不能干涉其裁判權是也若大理院自定死刑之案猶須咨送法部核定似與原定官制節略及各國辦法均不相符竊恐貽笑外人而治外法權之收回迄無效果 臣等見擬通融辦法凡 臣院審定死罪之案鈔錄紅供奏底減等項恐需時日擬於供到後以二十日為限咨送法部覆奏若由 臣院駁正者仍須會銜具奏

一大理院官制因檢察廳隸於法部及請 簡請補員缺皆須會商即應會同法部具奏其推丞及總檢察由法部會商大理院請 簡推事及檢察由法部會同大理院奏補

謹案光緒三十二年欽奉 懿旨大理寺改為大理院專掌審判原擬各部院等衙門職掌事宜及員司各缺仍著各該堂官自行核議會同軍機大臣奏明辦理 等業經核議竣事今謂應會同法部具奏顯與 慈諭不符似應仍遵原 旨由 臣院會同軍機大臣奏明辦理至檢察總廳職掌實與審判相關蓋各國之有檢察官藉以調查罪證搜索案據其宗旨在護庇原告權利與律師之為被告辨護者相對立而監督裁判其一端該檢察官應大都附設於裁判衙門故大理院官制清單列入檢察各官職是故也至推丞推事等官今開辦伊始應由 臣院請 簡奏補以一事權而免貽誤異日法學材多法部編制法纂定頒行自可部院會商公同奏請若檢察廳丞及檢察官職任雖與審判相維繫而所司為行政事務應俟官制奏定後會同法部請 簡奏補奉 旨著與法部會同妥議和衷商辦不准各執意見

宣統元年又奏定員司補缺章程略稱嗣後 臣院擬補推事及推事以下各缺按照一酌一序輪次移咨吏部及法部遵行

二年法部奏大理院為最高審判衙門其推事各官非精通法律經練有得者不能勝任查吏部每次京官分發時有簽分大理院之員此項人員未經法官考試於任用章程不合請嗣後無論何項出身人員均無庸簽分大理院統俟 臣部詳訂考試任用細則奏明請 旨施行如該院有需用審判人材時應隨時咨商 臣部照章辦理此後凡全國任用法官等項均歸 臣部總理主持

三年又奏大理院刑科四庭民科二庭每庭以推事五人分理民刑維時開辦伊始京外高等以下各廳未立大理院兼辦見審故刑科員缺獨多見京外各級審判廳均已舉辦上訴案件日增而宗室覺羅民事訴訟又復統歸民科審判事繁缺少大理院請將刑科第四庭改設民科第三庭俾敷分布

又奏擬請援照上年奏設直省省城商埠檢察廳典簿主簿各員缺成案於總檢察廳添設從六品典簿一缺又總檢察廳向設九品錄事四員每遇升轉殊形隔閡擬請改為八品錄事二員九品錄事二員

又奏大理院總檢察廳以下審檢各級廳官員除推檢各員及地方廳看守所所長業經奏明准各按俸次照章截取保送外其大理院之都典簿看守所所長典簿主簿看守所所官八品錄事總檢察廳之典簿主簿八品錄事高等地方各廳之看守所所長所官典簿主簿等按從前升補章程皆可遞升推檢自法官考試任用暫行章程施行後不能仍照前章遞升推檢若不別予升階積久益形壅滯擬請將大理院從五品之都典簿看守所所長照員外郎例准以知府保送正六品之高等審判廳看守所所長從六品之大理院典簿總檢察廳典簿比照地方審判廳看守所所長截取辦法准照主事例以直隸州知州截取正七品之大理院主簿總檢察廳主簿高等審檢廳典簿地方審判廳典簿從七品之高等審檢廳主簿地方檢察廳典簿正八品之大理院看守所所官及大理院總檢察廳八品錄事從八品之高等地方審判廳看守所所官地方檢察廳主簿一併請援七八品小京官截取舊例

皇朝續文獻通考卷一百二十八

職官考十四 京文職

翰林院

臣謹案翰林之名本於揚子雲長楊賦蓋謂文學之林爾今之掌院學士即明翰林院學士周禮內史中大夫也侍讀學士侍講學士始於唐開元十三年周外史上士也侍講始於後漢桓榮廡門下生侍講非官名其以侍講名官者始於東吳侍讀始於梁其為翰林院侍講侍讀則始於明周外史中士也唐稱史館修撰金稱翰林修撰與編修檢討皆為周外史下士唐有檢討官宋有史館編修元有翰林國史院編修明始有翰林院編修檢討庶常吉士見於書經翰林院庶吉士始於明典簿即明之典籍孔目始於宋待詔始於唐 國朝始置經筵講官宋崇政殿說書明經筵進讀官也日講起居注官亦始於 國朝漢武帝時已有禁中起居注魏亦有掌起居著作郎即周之左史右史記言記動者也 國朝以來官名雖多沿襲員缺時有增裁謹續前考如左

乾隆五十八年議定翰林院掌院學士毋庸兼禮部侍郎

五十九年奏准嗣後掌院學士如奉 旨開列以科甲出身之大學士各部尚書侍郎都察院左都御史繕單進呈

嘉慶五年奏准嗣後侍講缺出將洗馬中贊一體開列中允缺出司業與贊善較俸開列

六年奏准編檢保送御史仍照舊例部屬記名無人保送部屬翰林記名無人即保送翰林陸續分班不相運待

八年 諭開坊翰林由大考降職者閱舊例按原俸接算近數次大考降補人員均不准接算前俸是以俸深各員一經左遷資格轉居最後此例始自何年著吏部查明具奏 旨議准嗣後翰詹除因事降調及改補別衙門者不准接俸外其因大考降調人員仍接算前俸但須定以限制如少詹學士降庶子講讀止准接庶子講讀以前之底俸其少詹學士任內之俸不准接算中允贊

善降編修檢討亦如之前由編檢撰講讀者今降中允贊善從前並無應俸止令接編檢之俸遇有缺出論俸開列凡考試等第仍列於各員名下

十四年 諭滿少詹讀學士及祭酒缺出仍著將應升之員通行開列註明俸次具題其庶子以下坊缺仍照舊例擬定正陪帶領引見

道光二年 諭國家設科取士首重翰林之選居是職者自當願惜廉恥敦篤名義苟且僥倖之事豈學者之所當為即如今歲考差真才實學者固不乏人乃竟有洗馬陳玉銘於宮庭考試膽敢懷挾詩文既經敗露豈能不按律治罪稍從末減耶若翰林等官不知自愛動輒身罹法網遠繫囹圄豈僅失朕之望乃不忍行之政也爾科甲出身者皆係刻苦自勵有志於學之人斷不可心隨境轉行與言違凡修身敬事之道克己慎獨之功以馴致乎俯仰無愧可不時加省察乎試思若陳玉銘者界以考試之任尙可望其選拔真才秉心衡文乎授以牧民之責又能望其盡心民事奉公守法乎言念及此可憂可恨今而後必當激勵品行勉勵學業三畏四勿豈不知者永矢勿忘以為士習表率

二十五年奏定翰林院額設筆帖式四十員分隸東西兩廳繕寫章奏文移就中擇其繕譯清通行走動慎者充補委署廳官及掌稿各缺遇有應行繕譯事件即在署繕寫親行呈閱其有懈弛者仍即撤歸散班督令學習

二十七年議准翰林院侍讀侍講中允贊善中各分一缺作為繕譯專缺專以繕譯人員升補洗馬一缺以文進士與繕譯進士相開輪用庶子講讀學士不論文進士繕譯進士通行論俸升用

咸豐七年奏准保送御史合例者人數寥寥請將未經記名人員一體保送

同治元年 諭翰林院奏前經撤銷御史人員應否再行保送請旨等語編修彭瑞毓曾經考取御史因在南書房行走撤銷茲屆保送御史之期著准其保送一體考試

又 諭各部院堂司各官皆有公事日相接見因以知其人之才具惟翰林院掌院學士終年不與翰林相見奚由辨其賢否嗣後編檢講讀各官除內廷行

六年 諭開坊翰林由大考降職者閱舊例按原俸接算近數次大考降補人員均不准接算前俸是以俸深各員一經左遷資格轉居最後此例始自何年著吏部查明具奏 旨議准嗣後翰詹除因事降調及改補別衙門者不准接俸外其因大考降調人員仍接算前俸但須定以限制如少詹學士降庶子講讀止准接庶子講讀以前之底俸其少詹學士任內之俸不准接算中允贊

八年 諭開坊翰林由大考降職者閱舊例按原俸接算近數次大考降補人員均不准接算前俸是以俸深各員一經左遷資格轉居最後此例始自何年著吏部查明具奏 旨議准嗣後翰詹除因事降調及改補別衙門者不准接俸外其因大考降調人員仍接算前俸但須定以限制如少詹學士降庶子講讀止准接庶子講讀以前之底俸其少詹學士任內之俸不准接算中允贊

八年 諭開坊翰林由大考降職者閱舊例按原俸接算近數次大考降補人員均不准接算前俸是以俸深各員一經左遷資格轉居最後此例始自何年著吏部查明具奏 旨議准嗣後翰詹除因事降調及改補別衙門者不准接俸外其因大考降調人員仍接算前俸但須定以限制如少詹學士降庶子講讀止准接庶子講讀以前之底俸其少詹學士任內之俸不准接算中允贊

八年 諭開坊翰林由大考降職者閱舊例按原俸接算近數次大考降補人員均不准接算前俸是以俸深各員一經左遷資格轉居最後此例始自何年著吏部查明具奏 旨議准嗣後翰詹除因事降調及改補別衙門者不准接俸外其因大考降調人員仍接算前俸但須定以限制如少詹學士降庶子講讀止准接庶子講讀以前之底俸其少詹學士任內之俸不准接算中允贊

走外每十人爲一班每十日進署一次掌院與相接見講論正學藉得窺其人
之底蘊以備薦舉有無故不到者掌院據實奏聞
又 諭翰林以爲儲材之地詩賦亦係古雅頌之流乃近來積習相沿專以此
揣摩爲進身階無裨實用著自明年癸亥科起散館改詩賦爲策論准直隸所
見毋避忌諱

二年 諭翰林散館歷科皆用詩賦考試因近來積習相沿專於研揣聲律不
求實學前經降旨自癸亥科起庶吉士散館改詩賦爲策論原期講求實用培
育真才茲據御史陳廷經奏稱歷代取士法制屢更行之既久莫不有弊惟在
用法得人不必遽改定制庶常散館嗣後仍請用詩賦等語翰林院爲人才淵
藪膺是選者平日於古聖賢經史性理諸書果能講明切究身體力行自然學
問優長體用兼備發爲策論既不同陳言勸襲作爲詩賦亦不徒競尙聲華該
庶吉士等必應兼擅其長始爲名實相副著自此科爲始嗣後遇散館之年該
衙門於先期一月具奏請旨於詩賦策論兩項內不拘何項出題考試該庶吉
士等仍當本末兼賅俾詞章經濟相輔而行用副朝廷樂育英才至意

四年議定翰詹各官如在外省出力保奏無論何項勞績不准保升坊職及遇
缺題奏又庶吉士無論何項勞績不准保免其散館授職編修檢討
光緒五年議定嗣後翰詹無論何項勞績不得保舉開列在前如尤爲出力人
員止准保以應升之缺升補遇有缺出仍按原名次開列將保案於本員名下
註明出力稍次各員止准保舉議敘加銜加級封典不得保獎升階除 實錄
館保獎外無論何項勞績不得保遇缺題奏

二十八年 諭翰林院爲儲才重地在館各員自應講求實學通達古今以備
朝廷任使乃近日風氣專以詩賦小楷爲工敏精神於無用而經世時務或轉
不暇考求殊非造就人才之意茲當變通政治之初尤宜首先整頓嗣後編檢
以上各官應專課政治之學以大清會典六部則例爲宗旁及古今政書直省
通志凡有關經濟者皆當究心他如條約公法以及天算格致諸書聽其分門
肄業其有願赴南北洋學習者亦准其在本署呈明咨送前往著掌院學士酌

定課程每月呈送筭記擇其議論切實確有見解者選錄進呈量予獎勵其批
繆不正有害士習者分別參劾凡散館大考考差均應一律變通著掌院學士
妥擬章程咨送政務處王大臣覆核請旨辦理朝廷側席旁求冀得通儒碩彥
朝夕論思用恢治道其各爭自濯磨以副朕求治作人之至意

臣謹案禮親王囑亭雜錄曰唐宋優重詞林最爲清祕凡制誥草麻外一
切機務皆與商榷明代設翰林院於東長安門外與部院等坐耗俸貲毫
無一事惟以爲入閣之階大拜後不嫻政事動爲胥吏所欺如周道登不
識情面二字鄭以偉誤認何况二字安問變理之道也 本朝自 仁廟
建立南書房於 乾清門右階下揀擇詞臣才品兼優者充之歷代魁石
鴻壘磊出其中木天清祕洵乎儲才之地矣

二十九年政務處吏部會議覆奏給事中熙麟摺翰林院補設學士滿漢各一
缺秩正三品其升轉開列比照詹事升侍讀學士爲正四品升侍讀爲正五品
增設侍讀侍講滿漢各一缺補設撰文滿漢各二缺秩正六品滿缺比照中允
贊善辦理漢缺由編檢升轉其開列比照中允原有撰文差使即名爲撰文處
行走祭酒仍復爲從四品遇有侍讀學士缺出與侍講學士較俸開列其滿侍
讀一項仍照新章比照開列庶子之例用內班二次輪用外班一次

三十一年 諭翰林院奏酌籌經費興辦實學一摺翰林院本爲儲才之地研
求實學培植成材實爲當今要務所需購置儀器等費著各省督撫按照所請
酌定數目逐年籌解以資興辦原摺著鈔給閱看將此各諭令知之

三十二年吏部奏國子監司業員缺裁缺撰文爲翰林升任初階應否照開坊
例引 見補授

三十四年會議政務處覆奏御史徐定超請變通翰林院官制略稱原奏各節
大都以翰林院爲儲才之地 國家定例本較他曹爲優年來官制屢更各部
自爲升轉而翰林院轉虛沈淪本策勵英俊之心爲添設階級之請並遞及於
五經博士等缺職廢靡遺所陳不爲無見惟 臣等以爲翰林院官制自 國初
以來迭次更訂近年臣工條奏亦復加詳屢經廷臣議定未敢率爾更張況值

新政創行練才尤亟若徒爲疏通人員之計增設官缺而不爲之開出路定課程誠恐無關實際且慮疏通於下級轉滋壅積於前途亦屬於事無濟爰就該御史原奏所已及並原奏所未及而爲_臣等所見及者引伸其說詳定規制一查掌院學士本有品級向以大學士尙書兼充並無望礙應請仍照舊制一查翰林院學士係光緒二十九年甫經添設二缺逕升內閣學士未便復行更改今擬請遇有侍郎缺出由軍機處將內閣學士副都御史翰林院學士與各該部左右丞分別列單請_簡若遇有巡撫缺出則將內閣學士副都御史翰林院學士與該省布政使分別列單請_簡一查侍讀學士係於光緒二十九年升爲正四品未便遽改今擬仍從舊制而遇有內閣學士缺出與翰林院學士內閣侍讀學士翰林院侍讀各照從前應升及其次應升人員之例一併開列并酌增順天府尹缺出仍照舊章將翰林院侍讀學士侍講學士開列並將翰林院侍讀比照從前庶子開列之例一體繕單請_簡至藩學臬三司缺出除提學使向由學部將翰林院侍讀學士以至編檢各員密保外其布政使按察使缺出應查照順治十二年定制詹事少詹事以布政使用侍讀學士以按察使用及近年各部丞參三四品京堂_簡放藩臬等官之例將侍讀學士侍講學士與翰林院學士及各部丞參京堂由軍機處分別開單請_簡一查翰林院侍讀係於光緒二十九年升爲五品未便復行更改惟既將侍讀升爲正五品嗣後由侍講轉侍讀應即改爲升任一查翰林院撰文係光緒二十九年奏設四缺定正六品未便復行更改惟自裁撤詹事府國子監後員缺較少擬請酌增翰林院秘書郎四缺定爲從六品以便遞轉一查見在翰林院學士正三品侍讀學士侍講學士正從四品侍讀侍講正從五品撰文正六品益以新添從六品之翰林院秘書郎一階已屬完備修撰編檢各員品級應仍其舊一查翰林院編書局本年即將告竣擬令專辦講習館事宜所有侍讀學士以下各員除兼有要差及已調各部外其餘人員俱令入館肄業就各部所需之政學取其於平日學問相近者專習一門由掌院學士認真考察擇其成績最優之員每二年密保一次每次每部不得過二人任缺勿濫以備各部丞參之用

其各部奏保及先行調部行走者仍聽其便一查截取保送等例節經奏定有案自應照舊辦理惟翰林院近年員數較多擬請遇有_{京察}年分除_{內廷}供奉之合例人員一律保薦外其餘各員請以六員計額以廣其途一查見在自翰林院掌院學士以下品級俱未更動其五經博士至孔目等官應亦悉仍舊制以上各條係就該御史原摺逐一覈議至另片所稱編書處與學部編譯圖書局制度相復請酌量裁併以編書處改爲_{顧問處}等語_臣等竊以爲侍直_{鑾坡}備員_{講幄}俱爲_{朝廷}侍從之臣_{聖明}如有咨詢隨時可以入對見在編書處既將截止似毋庸另設一處抑_臣等更有請者新學固宜研究國粹尤應保存此後中國學堂畢業及留學東西洋畢業諸生獎用編檢庶吉士者應仍遵光緒二十九年學務大臣督上年憲政編查館會同學部先後奏定章程認真考核冀拔真材而免倖進又吏部奏准翰林院升補並祕書郎辦法略稱定例漢侍讀由侍講轉侍講缺出由洗馬中允司業升任無人方以翰林院修撰編檢檢討升任又滿右中允缺出先儘內班編檢升補之贊善擬正陪升用無人將外班應升人員擬正陪升用又奏定章程翰林院補設六品官滿漢撰文各二缺滿缺比照中允贊善辦理漢缺開列比照中允嗣以司業裁撤撰文爲翰林院升任初階奏明照開坊例引_見補授又雙通翰林院漢軍升轉章程嗣後滿撰文缺出滿蒙內班無人先儘漢軍人員借補各等語今翰林院侍讀既經改爲升任除滿員本係引_見升補應仍照舊辦理外遇有漢侍讀缺出將侍講撰文祕書郎列入應升俸深編檢列入其次應升漢撰文缺出例照開列中允舊例以祕書郎列入應升俸深編檢列入其次應升均開單請_旨簡用新設之祕書郎係翰林升任初階將俸深編檢引_見補授其滿撰文應即比照中允祕書郎應比照贊善分別內外班辦理至舊章漢軍編檢借補撰文之處應請改爲祕書郎缺出如蒙滿編檢無人以漢軍人員借補以免紛歧又翰林院奏官階升轉宜定限制摺略稱_臣院官階向係按資升轉除試差學

差外實無在外升轉者學務公所議長由學部奏派統籌全省學務自非他項外差可比嗣後除學務議長一員准其不停升轉餘概不得援照

又奏據學士許澤新等三十六員開具說帖略稱署中階級升轉向係按資遞補除試差學差外從無在外升轉之例自編修王同愈充江蘇學務公所議長經江蘇巡撫奏請免扣資俸復經學部奏請不停升轉等語原以議長責任較重不能不從優辦理此後各省有以學堂監督學務議紳奏請者且有以學堂庶務長及襄辦新政等差者本署此項人員見有七人似此漫無限制將來不知凡幾應請嗣後各省充當議長之員准其不停升轉其辦理各學堂及襄辦新政並學務公所議紳各差祇准不扣資俸不得一律不停升轉即已奉旨允准者於升轉後照例兩月後來京供職逾期不到應請開缺另簡見查本署在京供職編檢約一百五十餘員若在外供差與在京供職人員略無軒輊誠恐同籍謀差者日多於本署職守大有關係等語臣等查臣院官階向係按資升轉其已升轉者出京開缺回京收補除試差學差外實無在外升轉者誠以職守不能久曠故例限不能從寬學務公所議長由學部奏派統籌全省學務自非他項外差可比若一律照請恐出外者愈開奔競之風在京者不免向隅之憾

宣統元年吏部奏准變通翰林院漢孔目用法略稱各衙門裁缺之小京官改以翰林院待詔候補候選者人數頗形擁擠所有孔目一缺擬請專以待詔借選仍照原銜食俸升轉即比照待詔辦法一次咨選一次留補

又會議政務處奏遵議內閣侍讀學士延昌請變通翰林院舊制略稱近日庶政維新文化日進非紀載加詳無以昭茲來許原奏請令將政治各史編輯審定並精要與圖搜集刊印均為信今傳後起見所論自屬可採惟查會典翰林院職掌多有與內閣會同辦理者如國史館纂修等官為翰林院專責而內閣滿洲侍讀亦有兼充提調者至於校對各官則俱以中書充之文淵閣領閣事二員係大學士或掌院學士兼充直閣事四員係內閣學士及翰林院讀講學士兼充校理八員係以翰林讀講修撰編檢及科甲出身之內閣侍讀

等官兼充檢閱六員係以內閣中書兼充武英殿纂修等官雖有翰林額設員數而蒙古字長方書籤並各體印文皆由內閣蒙古房繕出繕寫歷經簡補遵照辦理在案是修史之職雖屬於翰林而要非該衙門所能賅括擬請旨飭下大學士會同掌院學士查照舊例於翰林院各員應行編纂之責妥訂課程認真稽核以冀養成遠到之材藉備他日任使之用原奏升品級一節查翰林院學士添設二缺秩正三品以內閣學士為升階若升作二品則與閣學同級名為優予品級實則轉陞升途似以仍舊為宜惟編修檢討人員較多非積資十數年不能升至侍讀侍講而讀講學士尤非資深年久者不得與焉擬請准將侍講學士升為正四品侍讀侍講升為從四品至撰文秘書郎修撰秩俱六品與見升從四品之侍讀侍講未能直接升轉應請一併升為正五品其編修檢討各員向雖定為七品而一切京察截取保送等章程均比照各衙門五品官辦理應請升為從五品以符名實而重儒臣

又翰林院奏升品之後辦事讀講各官請照舊章變通辦理略稱查辦事翰林官充補後升至讀講例可兼充至侍講學士始行開差今經會議政務處奏請將讀講升為從四品授之舊例似應開去辦事差使惟見在滿蒙編檢無人見充辦事各員均係讀講等官邇來撰擬文章頗多繙譯校對在在需人未便拘於成案以致貽誤要公擬請嗣後滿漢辦事各官讀講以下人員仍准兼充升至侍講學士再行開去差使於舊章稍事變通於公事不無裨益

二年吏部奏釐定翰林院各官辦法摺略稱翰林院各官品級既改升轉斯殊內外分班缺輪宜定以及漢員抵補一切事宜均須詳加釐訂方足以資遵守查定例翰林院滿漢侍讀學士由侍講學士轉侍讀由侍講轉又滿庶子缺出將內班升用二次外班升用一次中允贊善缺出先儘內班內班無人始用外班嗣以翰詹衙門員缺裁改品秩更張迭經奏定侍讀學士侍讀作侍講學士侍講升階撰文作為秘書郎升階滿洲侍讀比照庶子秘書郎比照贊善歷經遵辦在案臣等參酌例章悉心商榷見在侍讀學士侍講學士侍讀侍講撰文秘書郎缺離六項品祇三階概名應升實有未符擬請將同品各官改歸轉

補滿洲庶子費善本有內外班名目擬仍參照其制略加變通於侍講秘書郎兩階各定爲內班一次外班一次輪補抵補即照原奏辦理無論滿蒙漢軍及升用之外班抵補之漢員一經升補合爲一班應升應轉統較俸次先後惟滿漢較俸之法向各不同應令各較本任之俸以昭平允漢缺較俸仍如其舊至漢員抵補之後一切升轉專歸滿缺無庸調還惟將來升補滿學士缺即須歸併漢員班內遇有滿內閣學士缺出不得復行開列以示限制

又翰林院奏官制新訂臣院職掌亟宜擴充人材未可閒置翰林一秩歷代稱爲華選實爲學成待用之材我朝自開國以來德行政事氣節文章之臣多出自翰林中興之功尤以駱秉章胡林翼曾國藩李鴻章稱最即近日佐理新政考察憲法詞臣較筆較盛他途比年以來派遣留學考察政治臣院人員十居八九遊學考試大學畢業拔其尤者始用翰林若必畫出憲政之外轉失朝廷用人之初心若強隸入皇室之中亦非祖宗設官之本意夫一國官制當本一國之沿革風尚不能盡相仿襲天子優待儒臣於試功任事之先令其供奉內廷俾論思獻納以備顧問蓋以侍從之職養其望非以侍從之職終其身也今議者動謂臣衙門不負行政責任不知國家意在儲才原不責以簿書之執掌使之迴翔清秘得以博觀政治之原整飭風裁留爲有事折衝之用即徵之東西各國如德之博士院英日之博士會學士會院皆所以儲才備用其制度實與我國翰林院之制相仿故最高官吏往往以學士博士任之學養重斯識見閱也日本之興志士名臣大半出於舊學倘徒襲各國之迹象而遺其精神嚙吾國之良規而失其美意養之百年棄之一旦竊意朝廷必不出此也即以職掌論承諭旨知制誥國初舊制本與內閣相聯侍講筵掌秘書顧問近臣實與弼德院相似至會典記制度沿革之要國史正萬世是非之公何一非國家政務所關故一國之行政匯於新內閣一國之紀載匯於翰林院未可偏廢也應請旨飭下會議政務處核議令翰林院行政審判院審計院等同爲特立衙門俟新內閣弼德院官制既定議以一定缺額爲翰林遷轉之途俾與政界聯合以符名實其京外各員缺有爲臣院人

員所曾講習者亦當相閒任用臣非爲人材籌出路實爲國家惜人材若謂外國官制祇能由長官調用不能有一定缺額則干求者騰達自愛者沈淪長奔競之風挫志士之氣流弊所及國家承之此尤臣等所兢兢慮者也

馬其昶曰始翰林爲朝廷儲材地負清望不勞以吏職歲除月遷卒致位公輔自國勢再挫天下憬然知實學之足重詔罷科舉立學堂翰林之選輕矣舊以文學居是職者既無能一當而游學東西國習工商醫礦雜業懵然不知綴辭屬文爲何事泊返國部試則寬假之幸得上列亦畀以翰林之職歲增數十人皆冀用新知識等超進饋遺造請汲汲無少暇其所已學曠日不復理又皆怠忘廢棄韓非有言所養非所用非所養此所以亂豈獨科舉時然哉

經筵日講起居注

乾隆五十八年奏准講官奉差將應署之員繕籤進呈恭候 欽定

嘉慶八年 諭日講起居注官滿員向止八缺較漢員減少四缺每遇侍班及舉行典禮不敷勻派准增設滿講官二員作爲額缺該衙門即帶領引見候朕簡派

道光二十三年 諭向例臨御經筵畢後各官在太和門外行禮嗣後著改於文華殿院內行禮

三十年三月 諭便殿日講爲求治之本我 聖祖仁皇帝登極之初即命儒臣逐日進講無間寒暑朕紹承丕業夙夜孜孜景仰 前徵勉思繼述著於百日後舉行日講所有應行事宜著各該衙門查例詳議以聞

咸豐元年 諭朕念深典學御極之始即欲舉行日講禮臣以乾隆嘉慶間兩朝訓諭皆以此事易滋流弊徒尙虛文俱奉 旨停止是以斟酌未行然朕心未嘗不念茲在茲也儒臣進善於君援古即以證今紛紛論列時事恐啟挾私逞臆之端轉失講道沃心之義朕幾務餘閒將於翰詹諸臣中輪流選派親命題目各擬講義分日進呈在朕既以古爲鑑且以觀諸臣器識學問爲量能授任之資庶幾上下交勉用副朕集思廣益崇實黜華至意

同治三年 諭朕奉 兩宮皇太后懿旨從來致治之原端在以古為鑑凡用人行政之要治亂得失之源載在簡編足資法戒前於皇帝御極之初命南書房上書房諸臣采輯前史事蹟纂輯成書進呈備覽賜名治平寶鑑其中援據往事推闡敷陳尚稱切要若將此書講貫發明於治理尤有裨益著於本日起每日輪派一人由議政王帶領進講瑞常等於進講時務當剴切敷陳言必盡意毋得稍有避忌用副集思廣益至意

光緒三十三年派孫家鼐榮慶陸潤庠張英麟唐景崇寶熙朱益藩輪班進講經史及國朝掌故以裨典學而資治理

詹事府

臣謹案詹事始於秦歷朝因之惟元改名儲政院院使後仍稱左右詹事少詹事始於唐武德初漢詹事丞也庶子始於秦左右庶子始於隋左右

春坊庶子始於唐周諸子下大夫中士也中允始於漢左右春坊中允贊

善始於唐時稱贊善大夫至金始稱左右贊善洗馬始於周王洗馬為吳

始於秦漢書其稱司經局洗馬始於唐主簿始於晉詹事府自漢迄明

皆為東宮官屬 國朝沿明舊制名實本不相符第為翰林敘進之階留

備詞臣遷轉而已

乾隆五十四年 諭本日閱洗馬周瓊呈請代奏謝恩摺內有補授司經局洗馬兼翰林院修撰字樣修撰係一甲一名進士專銜何用假借兼攝所謂名不正也因思詹事府衙門自詹事庶子中允贊善等官亦俱兼翰林院學士侍讀

侍講編修檢討等銜此係相沿前明舊例詹事等官即各有專銜嗣後無庸再兼翰林院虛銜以昭嚴實

五十八年 諭前會降旨所有詹事等官嗣後毋庸再兼翰林院虛銜但此外各衙門大小官員皆有專銜何用假借兼攝而仍兼列虛銜者尚復不少此皆

沿襲前明舊例殊屬無謂即如大學士前明止係五品往往以翰林等官除授其後因任以機務復晉秩侍郎尚書等官是以有兼銜之制本朝設官分職品

秩釐然如大學士秩居正一品又何庸復兼從一品之尚書虛銜為耶著交吏

部詳悉查明將內外文職似此無關職任兼用虛銜者分別刪除酌覈定議具奏

嘉慶元年翰林院奏查講官缺出凡少詹事讀講學士均引 見充補惟詹事職分較大向係指缺奏補但未明立奏案應請 欽定奉 旨詹事府詹事准

照翰林院學士之例坐充日講起居注官著為令纂入會典

二年 諭詹事府衙門事務均著翰林院掌院管理

五年 諭從前和坤管理翰林院掌院時將詹事府衙門奏明歸入翰林院兼管究非體制嗣後詹事府京察及一切應辦事宜翰林院掌院不必兼管

光緒二十四年 諭裁詹事府衙門大學士等覆准歸併翰林院旋於是年十月復舊

二十八年 諭詹事府著歸併翰林院昨日將吏部請簡漢庶子兩缺摺件留中嗣後出有該衙門滿漢各缺均著扣除毋庸奏請簡補通政司著一併裁撤各官缺出照詹事府辦理該衙門官署著留為改建翰林院之用所有未盡事宜各衙門妥議具奏

二十九年軍機大臣奕劻等議復給事中熙麟奏請復詹事府摺 略稱該給事中稱壅滯窒礙各節自是實在情形定例翰林院詹事府兩衙門迭為遷轉自三品至六品品級俱備既奉 旨停補詹事府各缺則自編檢至開學中

閒遂少三品六品兩階於是翰林院有品級斷缺之疑吏部有開列變通之請

臣等上年會同吏部議請以祭酒升為三品以備遷轉但由七品至五品由四品至二品員缺不少僅此祭酒司業兩缺升階不敷遷轉况成均課士之職與文學侍從職掌本不相同又繙譯各員向無開列祭酒司業之例至滿缺讀講

學士之升開學向列京堂之後外班傳補向有庶子洗馬中允贊善各缺今則僅留侍讀一官疊議變通仍多窒礙 臣等博採眾論詳考舊章擬請於翰林院

補設三品官滿漢各一缺增設侍讀侍講滿漢各一缺補設六品官滿漢各二

缺查自詹事至贊善停補者滿漢共十八缺見在請復設者滿漢僅十缺編檢本是實官不過增加品級與別衙門添缺者不同如此則名次既得疏通開列

亦無望礙

太常寺

臣謹案太常寺卿始於北齊周大宗伯卿也少卿亦始於北齊周小宗伯中大夫也我國家教崇祀典列聖相承無不敬天尊祖肅奉明禮凡遇郊廟大典率躬行課獻以昭慎重至樂官祀丞之屬初沿明制概用道流迨乾隆七年奉詔禁止凡充太常樂員者毋得仍習道教祀事益修明云

乾隆五十八年 讜恆傑離已陞任通政司副使但通政司衙門事務本簡恆傑仍著留兼太常寺少卿

嘉慶四年增滿洲禮祝官一人贊禮郎二人漢司樂二人道光元年增滿洲贊禮郎二人讀祝官一人漢司樂二人咸豐二年增滿洲贊禮郎二人讀祝官一人漢司樂二人光緒十三年增滿洲寺丞一人三十二年裁併禮部

太僕寺

臣謹案太僕寺卿始於北齊夏牧正股牧師周太僕下大夫校人中大夫也少卿亦始於北齊總國之馬政由來舊矣

嘉慶十三年停兼管寺事大臣

臣謹案太僕寺初附兵部武庫司雍正二年始建本寺乾隆四十四年派大臣兼管著為例至是停之

光緒二十四年覆准歸併兵部十月仍復舊三十二年裁併兵部

光祿寺

光緒二十四年覆准以光祿寺歸併禮部十月仍復舊三十二年裁併禮部
臣謹案光祿寺卿始於隋周膳夫上士也少卿亦始於隋周膳夫中大夫下士也惟王不食說經者疑之不知當時九式掌於冢宰人主自不得恣其耗費用有定式正不必以有司之法會之後世汰奢漸萌至明嘉隆間

歲用逾四十萬廚役多至四千一百餘名光祿寺直成奸蠹之藪我朝自康熙初定制錢糧悉歸戶部光祿以時行文支取樽節動用歲止支銀二萬兩此詎非三代以來未有之儉德乎

鴻臚寺

乾隆五十九年增設滿洲學習鳴贊四人漢學習序班八人

嘉慶十九年增鴻臚學習鳴贊官二人

光緒二十四年覆准以鴻臚寺歸併禮部十月仍復舊三十二年裁併禮部

臣謹案鴻臚寺卿始於北齊周大行人中大夫也少卿亦始於北齊周小行人下大夫也我朝順治元年十八年兩以寺事歸禮部乾隆十四年又以禮部滿尚書兼管寺事是歸併禮部固有成例可援已

國子監

臣謹案祭酒始於隋周師氏中大夫保氏下大夫大司樂中大夫也其名始於戰國史記荀卿三為祭酒是司業始於隋周小師氏下大夫也監丞亦始於隋博士始於秦典籍始於明助教始於漢學正學錄始於宋趙翼陔餘叢考云古時同輩之長皆曰祭酒蓋飲食聚會必推長者舉酒以祭示有先也後漢百官志博士祭酒一人本僕射光武改為祭酒蘇竟傳竟以明易為博士講書祭酒博士十四人皆六百石博士祭酒亦六百石可見其官同但以之為長耳後世國子監祭酒實防此蓋漢博士即太學師儒也本朝國初隸禮部嗣歸本監雍正二年派大臣管理監事皇上親詣釋奠向稱視學乾隆四十八年建辟雍始稱臨雍五十年落成舉行典禮嘉慶道光咸豐三朝疊舉鴻臚自元明以來未有若斯之盛也嘉慶十六年 諭多山等奏國子監漢博士自嘉慶十四年歷選外府教授均以告病告休各部開缺續選之員亦久未到任員缺久懸等語漢博士缺向由外省府教授推升而府教授多係論俸升轉資深年老之員往往不能赴京供職應如何更定選法俾人缺得宜不致曠官著吏部議奏嗣議助教既由學正學錄升任其博士輪用京升時亦應由學正學錄論俸推升其由教授推升博

士之員倘有無故遲延逾限在三月外者即開缺另選

咸豐二年奏准學正學錄考取人員照考取中書例先行到署行走准其呈請分發學習期滿日期無論考取捐納與報捐分發之助教一律扣滿三年方准奏留

四年奏准助教學正學錄各項俸滿載取如有初任人員於到任後將歷俸捐免者扣除半年再由吏部行文本監分別保送

又諭國子監奏肄業生程祖慶呈進太白陰經十卷當交南書房翰林閱看進呈字畫尙屬工楷校對亦頗詳細程祖慶著賞給贈錄官

同治元年停漢助教管俄羅斯館

光緒七年奏准漢助教缺出如無應補及新進士分部期滿奏明以助教改補人員投供驗到暨見任學正學錄亦無合例題升之員即比照外省正從對品借補之例以候補監丞借補即積助教留補之缺仍照原銜食俸升轉

十二年奏准國子監舊藏書籍漸行散失今蒙 頒列聖聖訓方略並咨取各省新刻各書見在南學有書五萬一千四百餘卷除由監臣捐資購寫外應咨各省學政曉諭舉貢生監如家有藏書情願捐送卷數較多者奏請 賞給監屬虛銜少者量給扁額以資鼓勵

二十八年升國子監祭酒爲正三品以備翰林院遷轉嗣補設翰林院學士爲正三品祭酒仍復爲從四品

三十一年裁併學部

欽天監

謹案監正始於明夏養和太史令周太史下大夫日官日正也監副亦始於明周太史上士也我 朝康熙四年八年雍正六年乾隆十年先後定以西洋人爲監修監正監副惟其法不惟其人大矣哉 列聖天地之量也

乾隆五十三年 諭欽天監衙門應行引見人員向隨吏部帶領嗣後著該堂官自行帶領並先期向吏部查覈如此既可以杜絕弊端而該衙門堂官隨時

接見亦可觀其材器量加鑑別以便任使

嘉慶二年覆准滿洲蒙古天文生十六缺以八缺作爲滿洲額缺以四缺作爲滿洲左翼二缺右翼二缺餘四缺作爲蒙古左翼二缺右翼二缺

又覆准蒙古博士二缺以一缺歸蒙古筆帖式內題補一缺歸額設蒙古天文生四員內較俸升用

道光元年奏准滿洲算學生中式文舉人照乾隆十年定案舉人算學生以博士補用嗣後遇有博士缺出由欽天監酌量與應升人員揀選升用

三年議定算學生中式繙譯舉人照筆帖式中式之例食七品俸在任候升不得違以博士補用

六年定見在並無西洋在京當差之人仍定爲滿漢監正各一人滿漢左右監副各二人

同治十一年奏定候補筆帖式借補天文生歷升靈臺郎其並未入考素不諳天文數理者暫停升轉俟學習三年與算學生一體考試擬定名次咨部註冊後照常升用

太醫院

謹案太醫院使始於金太醫院院使始於明周醫師上士也 國朝置

左右院判周疾醫中士也御醫始於明周醫師下士也吏目亦始於明醫士醫員皆始於 國朝初設十一科御醫吏目醫士醫生各專一科曰大

方脈小方脈傷寒婦科瘡瘍鍼灸眼目口齒咽喉正骨痘疹後痘疹歸小方脈咽喉口齒共爲一科見設九科夫醫之爲道至微需講習尤需經驗

雍正元年 諭九卿督撫各省各舉年老醫生亦云須得老年經歷多者今萃聚若干官士於本院未免講習多而經驗少毫釐千里辨之不可不早矣

乾隆五十八年 特簡大臣管理院務

嘉慶五年奏准各項醫官暨八九品吏目共額缺四十五員內有通曉醫理當差勤勉者值京察年分由院擇其優者量保三四員作爲一等咨送吏部過堂

奉 旨後將一等者註冊毋庸帶領引 見遇有應升缺出先儘補用其殘庸不能稱職者奏請黜革以歸覈實

道光二十三年裁御醫二名吏目四名食糧醫員二十名

同治五年議准八九品吏目食俸六年無過准其歸部候選八品吏目升按察司經歷州判九品吏目州判府經歷縣丞定為應升之缺俟到任後扣實歷俸由該堂官出具切實考語保送到部由部註冊以應升之缺歸於俸滿即升班內與各省佐貳六年俸滿即升人員較俸升用如遇俸深到班亦准論俸升用至俸滿人員中有脈理精通熟諳治法者准該堂官奏留如已銓選軍務及邊遠省分不准臨期奏留以杜規避如醫理生疏雖屆六年不准充數

六年議准復設醫學館派教習應三人按春秋二季考試醫士恩糧肆業各生列定等第按名頂補每屆六年本院會同禮部堂官除院使院判暨 內廷傳值御醫毋庸考試外其八九品吏目醫士恩糧肆業等員一律考試素專何科預期報明由本院堂官覈其文理醫學分別去留列定等第封送禮部覆勘到院填榜咨行吏禮二部註冊其未經錄取及醫學荒廢之人仍發教習廳課讀下屆考試仍准入場

又議准考取一等者按名儘先擬補一等用完將二等之差務勤能者分別續補三等者停升轉不列等者革除

又御醫八九品吏目缺出將應升人員按考取名次酌其差務勤惰擬定正陪奏補醫士恩糧缺出按名次酌勤惰擬補效力醫士先儘正取名次擬補再以次取名次續補不取者革退錄取各員如差務懶惰醫學荒疏停其升轉遇缺將其次應補之人擬補停升後勤慎學習由本院出具考語咨送吏部准其升轉

光緒十三年議定 西苑壽藥房本院官每日二員值宿藥庫庫掌筆帖式切造生等遇差傳喚 乾清宮御藥房本院官大小方脈每日二員直宿進 御宣統元年會議政務處奏遵議繼祿代奏張仲元等呈請變通太醫院官制略稱查太醫一職昉自周秦周官醫師以上士為眾醫之長漢太醫令屬太常少

府秩千石唐宋以來或隸門下殿中諸省元始獨為一署我 朝官制悉本前明而以內務府大臣兼充管理猶有古義方今東西各國醫學日精大抵不重官資而重學位日本侍醫局為宮內省屬官而陸海軍醫總監則位比中將少將而不以為嫌至升遷一途醫學既屬專門則遷轉不離本署同治年間曾議太醫院吏目食俸六年准以按察司經歷州判等項分別升用原為疏通鼓勵而設迄未照章選補者誠以用非所習窒礙殊多見民政部醫官亦並無升階可指將來釐定官制供奉 內廷與行政各官截然為二固品秩之殊途亦古今之通義也惟如該院使等所呈官微任重各節自為慎重差起見按定制御醫七品許用六品冠帶掛數珠侍直有勞並得加銜給賞是在舊章已早蒙優異之施在新制不妨定變通之例向來京堂品級本有三四五品不同內務府官如上駟武備奉宸三院卿秩皆三品舊制鴻臚寺卿及今隸學部之園子丞秩皆四品所有太醫院院使一缺較秩論資應同一體惟應升作三品或升作四品之處伏候 欽定施行得 旨太醫院院使著定為四品餘依議

又奏續議太醫院遞升官制摺略稱恭查 欽定歷代職官表暨會典諸書太醫院院使暨左右院判職當古之太醫令丞御醫以下歷代或稱侍醫或稱醫師或稱奉御醫師雖名號不同而職掌則一 國初原設御醫十人吏目三十人嗣後互有增損茲據繼祿原奏聲稱院使以下左右院判二缺秩均正六品御醫十三缺均為七品八品吏目十三缺九品吏目十三缺以下醫士恩糧皆食餉之員等語見當豫備立憲內外官制應一律詳加釐訂除院使一缺業經奉 旨定為四品所有左右院判二缺為升院使之階擬請升為五品御醫升為六品八品吏目為七品九品吏目為八品醫士向無品級今擬升為九品其恩糧一項仍照舊制食餉

皇朝續文獻通考卷一百二十九

職官考十五 京文職 內務府

臣謹案內務府官皆始於 國朝總管大臣殷六府周家宰宮正宮伯內
宰也堂郎中主事周宮正宮伯各下士也上駟院卿周校人中大夫也堂
郎中主事校人上士下士也奉宸苑卿漢水衝都尉郎中等官周圉人中
士下士也武備院卿即元武備寺卿漢武庫令也郎中主事漢武庫丞也
自內府既立以其職歸之士大夫夫人主日與相處清明在躬奄暨消阻立
法之善無逾於是

乾隆五十一年奏准府屬郎中員缺係董率辦事之人責任綦重嗣後各該處
缺題及三院裁缺升用之處概行停止如郎中缺出由府院各處員外郎內管
領內會同該管大臣一體揀選升用由內務府帶領引 見

又定內務府員外郎五十九缺今仍作為公缺主事十二缺今擬堂主事二改
題缺餘仍作公缺委署主事十一缺今擬委署堂主事改題缺餘十缺仍作公
缺

又奏准造辦處員外郎二缺主事一缺委署主事一缺俱係公缺六品庫掌六
缺內定為公缺三本處題缺三凡有應行帶領引 見及京察官員送內務府
帶領引 見

五十三年奏准嗣後茶膳人俱由內務府三旗官員子弟及護軍執事人內揀
選帶領引 見補放

五十七年奏准慶豐司事務繁多郎中一人不敷辦理於造辦處郎中三缺內
以一缺作為慶豐司額缺

嘉慶五年議准六庫郎中向係揀選引 見仍照舊外嗣後遇三庫郎中及六
庫員外缺出仍由總管大臣於七司三院郎中員外郎內保舉數人引 見恭
候 欽定仍於三年期滿更換

六年奏准凡請納員外主事由戶部咨送到府會同稽察內務府御史當堂掣

籤將各員名次註冊俟應補缺出升用三人後按班挨名題准一人如有呈請
學習者止分各司各處行走仍令守候本班挨補

七年奉 旨茶膳房章京侍衛等逐日豫備茶膳是其專責非門上侍衛營員
可比况伊等亦實無暇操演所有茶膳房章京侍衛等著施恩不必入軍政

十二年議准於暢春園內撥給廣儲司筆帖式一人都虞司筆帖式二人
二十五年 諭內務府司員向無迴避親族之例與翰林院詹事府理藩院鑾

儀衛等衙門不迴避者一體嗣因廣興奏請迴避部議遇所屬內有應迴避之
員即於三院三山等處籤掣對調三院三山皆歸內務府大臣統轄豈一經迴

避調補即可引嫌杜弊廣興妄議更張殊屬無謂嗣後內務府大臣所屬官員
仍照舊例毋庸迴避

道光二年奏定盤山黃新莊湯泉三處 行宮總管如京察列一等或恩俸已
滿保送以內務府應升之缺升用者准其歸入一等俸深班內與在京應升人

員一體揀選升用
七年奏准嗣後各司處印鑰郎中內如得其人仍派郎中佩帶不得人即派兼

司郎中佩帶或由員外郎內擇辦事認真者令其佩帶以專責成
十二年奏准各處鹽政織造鈔關差期已滿並無降調處分奉 旨令其回京

當差者均毋庸計缺俟該員到京後即以原銜對品遇缺補用如有降調者仍
歸降調班六缺後補用因案罰處分回京者按三缺後補用

二十三年奏准本府及三院等處郎中員外郎奉 旨簡放熱河正副總管戶
部三庫庫差九江關監督係兼道員者均照例開缺其有補放江南蘇州杭州

三處織造粵海關准安關監督者仍留底缺委員署理應領俸銀米石即行停
領俟該員回京仍歸本任當差再支銀米准其接算前俸

咸豐元年奏准嗣後郎中員外郎缺出先將應升人員升用二人次將應補人
員補用一人其應升人員仍以一等者升用二班俸深者升用一班

二年撥給慎刑司員外郎二人又於慶豐司管理三旗銀兩莊頭處額設員外
郎內撥給慎刑司四員

六年奏准掌儀司額設贊禮郎十七員擇能讀祝者揀派四員令其讀祝即作為額缺

同治十一年奏准郎中員外郎班次仍照道光十七年成案改爲升用一班補用二班主事班次亦即照辦其候補人員均歸補班分班輪補概不准截補升班

光緒三年奏准實缺人員因出差開缺差滿回京遇有缺出無論何項勞班即行截補如遇京察後仍用一等開班升補

五年奏准嗣後堂主事缺出先將從前保獎人員補用竣後無論何項勞績概不准保獎堂主事如有違例者概行奏駁

二十九年裁江甯織造

臣謹案江甯蘇州杭州三處織造暨粵海等關監督均於三院卿堂郎中內簡用各帶原銜品級今織造次第裁撤而各關監督亦多歸督撫兼管不復派府中司員矣

三十年政務處遵議裁併內務府司員差缺略稱內務府原設郎中二十八員除歷年分撥裁撤外見僅二十四員分隸十三處查郎中爲司員表率差務較繁每處原係三員曾經裁撤一員今擬毋庸再裁又查原設員外郎六十員歷年撥補添裁見共設六十一員分隸十五處惟各司處差使繁簡不同今擬於會計司裁一員掌儀司裁二員慶豐司裁一員慎刑司裁四員營造司裁二員共裁十員又查原設主事十三員分隸十二處歷年並無增裁堂主事僅二員各司主事每處僅一員今擬毋庸裁撤又查原設委署主事十四員分隸十三處雍正十二年吏部奏准各部院衙門停其委署主事至乾隆二十二年由內務府奏明復設委署主事差使較簡今擬全行裁撤又查廣儲司六庫額設六品司庫共十二員查六品司庫係每庫二員差務較簡今擬每庫裁撤一員又查原設造辦處六品庫掌十員於雍正年間原設六員嘉慶年間增設四員今擬裁撤四員又查掌儀司見設六品司俎官五員順治年間原設四員康熙年間增設一員今擬裁撤一員查內務府所屬 咸安宮官學額設官學生一

百十名前經奏准歸入學堂肄業其漢教習均照期滿例帶領引 見錄用尙

有弓箭及清文教習四員擬俟出缺即行裁汰其專管學務大臣及派充總管之司員等擬請一律裁撤該處原設筆帖式一員暨領催蘇拉等仍擬酌留看守官學房閒及庫存書籍該學印信一顆擬封交廣儲司銀庫收存嗣後該處遇有應辦事宜即歸併內務府辦理內務府堂上原設立督催所專爲督催各司處奏銷文移及核計功過等事差務較簡擬將該處事務歸併堂上辦理督催所即可裁撤查內務府三旗額設內管領三十員副內管領三十員查近年內務府生齒日繁戶口增多該管領等管理本甲喇旗務有添裁稽核人丁戶口承辦官兵俸餉之責差務繁要擬毋庸裁撤又查張家口牛羊羣值年委署主事一員查該處值年僅只委署主事一員筆帖式一員擬仍其舊內務府所屬熱河總管二缺向於郎中員外郎內 特旨簡放查熱河設有苑丞苑副千總等官專司看守 園庭及外廟等處差使正總管雖有兼管喇嘛額魯特事務之責事亦較簡擬請將熱河正總管副總管二缺裁撤所有 園庭及各該處事務並所屬官兵等統歸熱河都統管轄

宣統元年 諭內務府掌儀司著改爲掌禮司

上駟院 武備院 奉宸苑

乾隆五十一年奏定上駟院員外郎四缺向係題缺今酌留題缺二改爲公缺

二武備院員外郎八缺酌留題缺四改爲公缺四主事二缺酌留題缺一改爲公缺一六品庫掌八缺酌留題缺四改爲公缺四奉宸苑員外郎四缺酌留題缺二改爲公缺二委署主事一缺向係題缺今改爲公缺六品庫掌一缺向係題缺今擬於應升人員十二缺酌留題缺六改爲公缺六六品庫掌一缺向係題缺今擬於應升人員閒用一人其餘南苑 寶壽宮 中正殿 御茶膳房 圓明 清漪

嘉慶四年奏准奉宸苑 樂善園南苑三處公缺員外郎三缺主事一缺委署主事二缺苑丞六缺庫掌一缺俱照舊改爲題缺員外郎仍按三缺得一輪班升用應升人員嗣後均由各該處自行帶領引 見

和園

清漪

圓明

御茶膳房

中正殿

寶壽宮

南苑

樂善園

奉宸苑

嘉慶四年

奏准

應升人員

嗣後均由各該處自行帶領引

見

輪班

員外郎仍按三缺得一輪班

主事二缺苑丞六缺庫掌一缺俱照舊改爲題缺

六年奏准堂上向無阿敦侍衛嗣後亦照左右司例於阿敦侍衛內派令兼管與司官一體辦事

又 諭樂善園事務甚簡有直年官員管理其原設郎中一員著即裁汰遇有內務府郎中缺出另行補用至所奏奉宸苑請給六品俸苑丞四員九品俸苑副四員未免過多著加恩賞給六品俸苑丞二員九品俸苑副二員該堂官於當差勤慎各員內揀選引見補用

十二年奉 旨 天壇齋宮向係太常寺管理僅派奉祀壇戶在內照料不足以昭慎重著交奉宸苑管理應如何設官著妥議具奏嗣議定派奉宸苑郎中一人兼理員外郎一人直年管理撥給苑丞二人苑副二人所有 齋宮門內地面交該苑丞等管理分爲兩班在內直宿每屆十日更換一次

光緒七年 諭前據已革上駟院郎中德生呈訴被參情屈一案當諭令都察院堂官查訊茲據奏稱逐層研訊光緒五年辦理圍差派出兵丁該革員原畫之稿係八百名後經覈實定稿僅七百八名意存浮冒情節顯然其私行補放牧丁一節所有幼丁名單雖經該堂官批定挨補而補缺時並未按名回堂原參擅補亦難辭咎查明並無屈抑德生業經革職著即毋庸置議

三十年遵議上駟院裁委署主事三員阿敦侍衛六員牧長三員武備院裁弓匠固山達一員委署弓匠固山達一員備箭固山達一員委署備箭固山達一員亮鐵作八品催總一員 奉宸苑裁 奉宸苑委署主事一員 南苑委署主事一員 圓明園裁委署主事一員六品庫掌一員六品苑丞一員七品庫掌一員七品苑副一員八品苑副二員委署苑副三員 頤和園裁六品苑丞二員六品苑丞銜七品苑丞二員八品苑副四員委署苑副四員

太監

臣謹案有明一代瓊禍最烈方太祖立鐵碑禁內官與政乃旋命轟慶童使河洲成祖雖有私役工匠之禁而感其迎戴李興鄭和紛紛四出彼二君者豈忘其言而自蹈之哉蓋要結有其術委任有其漸誠習而不覺耳我 朝宮中則例內監犯罪特從重典 列聖不稍假借遵守家法歷二

百餘年而勿替尤爲史冊所罕有 皇朝通考於裁十三衙門裁萬善殿漢教習均入官制竊以爲疑會典內務府附太監事例蓋本掌禮司所屬也今遵之彙錄焉

乾隆五十一年 諭向來親王郡王固倫公主和碩公主門上總管首領太監俱無給與頂帶之例原以此等太監在親王等門上服役非承直內廷者可比是以向來雖有總管首領名色並無官職但親王郡王爲宗潢屏翰公主係皇帝親女其諸達太監總管首領太監內即酌量給與頂帶一人尙不爲過分從前親王郡王公主家太監亦有特恩賞給頂帶者嗣後親王郡王固倫公主和碩公主太監內各准給八品頂帶一人將姓名報禮部內務府備查不得私自增益

五十二年 諭朕恭閱 世宗憲皇帝實錄內載直隸州縣太監之父兄弟姪在地方不無生事令該州縣詳報總督具題并交內務府約束懲治又內務府大糧莊頭並諸王大臣莊頭等滋事梗法之處分別嚴懲二條煌煌 聖諭實萬世所當遵守我朝 家法相承太監祇備內廷灑掃供役不令干與政事從無似前代內監假竊威福任意妄行之稅政即內務府莊頭及王公大臣屬下莊頭人等均知畏法設有不肖亦皆有犯必懲實與編氓無異經我 皇考復加整飭官府肅然朕御極以來守而勿替方今綱紀修明各內監等皆敬謹守法其父兄弟姪自不致藉端滋事而總管內務府大臣及諸王公等身荷重恩於伊等屬下亦必嚴行管束不致倚勢招搖是目今實無此等事但奉行既久或恐視爲泛常積久生玩防範稍疏於政體甚有關係著交直隸總督嚴飭各州縣實力查察倘有太監家屬及各莊頭等在外生事輕則隨意懲治重則參奏辦理不得因見在尙無此等弊端稍存玩忽以副朕祗承 前訓杜漸防微之至意此後著直隸總督十年一奏永爲例

五十六年 諭朕偶閱嘉靖年間所刻文獻通考其序文內有命司禮監重刻以傳之語文獻通考一書於列代制度典章采摭綜覈鑄板以傳原屬表章之道但此應交與儒臣詳校精覈付諸梨棗庶於稽古崇文較有裨益乃竟付諸

奄豎之手率行承辦書內句讀及所別四聲多有舛誤即此可見嘉靖年間惟知溺志焚修耽心齋醮於政治朝綱廢弛不講此書自不值特加論說重爲校正著將此旨錄存首冊以示朕崇實黜華至意

嘉慶元年 太上皇帝勅諭內閣曰此次朕與嗣皇帝恭謁 兩陵所有隨從執事太監等原祇須照常通融承應儘足敷用毋庸添派多人即或稍有零星什物需人隨帶亦祇須酌量少增乃總管太監等喜事鋪張擬派過多已將張進喜等分別懲治至此後隨朕同行皆用此例如嗣皇帝經朕命獨往何處不與朕同行之時則執事太監等自應酌添派往著交敬事房存記屆期將此次硃筆清單題奏候朕酌定

十年 諭本日朕恭閱 皇考高宗純皇帝實錄乾隆四十一年欽奉 諭旨養心殿太監等遇有零星活計輒傳喚造辦處各項匠役整理漫無稽覈殊屬非是圓明園等處亦然宮殿重地遇有應行修整之事應告之總管內務府大臣派員放匠不當任聽太監等專擅徑行昔 皇祖時曾有 諭旨飭禁載在宮史今相沿日久太監等漫無顧忌著交總管內務府大臣嚴行禁止嗣後如有必須放匠修整活計之事但令呈明該總管大臣派員查點仍將某處放進次數於年底彙摺具奏欽此仰見 皇考祇循 成憲訓誡詳明允宜實力奉行日久勿懈朕前曾疊次降旨申嚴門禁原以宮廷重地本非外人所可擅進其應行進內者如豫備召見引見人員及內廷行走大臣官員各有職司又有奏事太監帶領立法原屬周備至匠役等人數混雜豈容漫無查考必當派員帶領出入方符體制今原立章程久而廢弛每歲年底並未見該管大臣等彙奏不可不重申 舊制加之整頓嗣後禁城及圓明園等處遇有應行放進匠役修整活計等事著太監呈明總管太監總管大臣呈明總管內務府大臣派員查點明晰將某處放進次數按月具摺彙奏毋許太監等任意傳喚擅自出入以昭嚴肅所有乾隆四十一年二月內原奉 聖諭及此次所降諭旨均著該館敬謹纂入宮史垂示久遠遵行勿替

十一年 諭本日拉旺多爾濟於站班伺候引見後忽撞頭陳奏伊向有腿疾

從前蒙 高宗純皇帝許令太監扶掖行走昨見丹巴多爾濟令太監將朱珪昇出內廷被參獲咎太監亦不敢將伊扶掖等語朕即詢之總管太監等實係拉旺多爾濟不令伊等扶掖欲俟奏明候朕特降恩旨殊屬非是朕前日所以議處丹巴多爾濟朱珪並將太監等懲責者原以其在內廷用木凳擡昇實屬大乖體制並非因扶掖朱珪之故若祇因步履艱難出入令太監扶掖國家優禮大臣體制原應如此朕豈肯加之責備拉旺多爾濟久直內廷均係太監等扶掖即御前乾清門侍衛等亦有將伊攙扶之時朕每日目覩從未加以指斥何目前故爲恭謹復有此奏乎嗣後年老大臣步履不便者進內時仍准令太監扶掖即侍衛等該班直宿需用鋪蓋亦許令太監代爲取送該太監等分居下賤原以備使令之役如有不聽指使者准大臣等據實奏參

十九年 諭蘇楞額等奏審擬太監小劉進喜向書吏於漢索取款料並順義縣辦差給與各太監他坦食物錢文一摺朕每遇巡幸禁止太監等向地方官需索屢經嚴諭至再至三乃猶有太監書吏彼此交涉散給供應之事據於漢供南石橋三家店學醫山三處係順義縣承應密雲瑤亭子等處係密雲縣承應近年均有折給四執事他坦十三處搭鍋臺豫備民夫水桶錢文及雞肉糞米等項業將太監等治罪並書吏於漢問擬杖徒著那彥成即查明近五年以內濫給太監供應之知縣先行革職指名嚴參交涉之書吏均照於漢之例問擬杖徒失察之總督藩臬奏明交部議處本年八月開祇謁 東陵著那彥成先期嚴行飭知所屬各州縣嗣後踴躍路經過地方如有太監需索之事即稟明總督據實奏聞懲辦若隱匿不奏或私行給與經朕查出必將該州縣及該督一併治罪不貸懷之

又 諭朕恭閱 皇考高宗純皇帝實錄內載乾隆五十年欽奉 諭旨進宮太監由內務府派撥當差如其人桀驁不馴或言語支離即應行文原籍查其有無別故另行辦理此事全在總管內務府大臣隨時查看方能妥協宮禁森嚴所關匪細著諭令總管內務府大臣嗣後於太監甫經投進者必當二三人同看務宜留心驗看查訊明確再行交進當差毋得濫收致有弊混等因欽此

是時禁闈無事我 皇考駐蹕熱河於 幾暇特降是旨仰見先幾燭照 垂訓周詳實當萬年遵守近總管內務府大臣於進宮太監並不詳細查驗一經人數缺少率將投充應募之人濫收撥用而諸王府於交進太監時尤不慎加選擇祇圖充數塞責以致奸徒得以溷迹其中上年九月內被林清勾結謀逆之太監共有七人內劉得財為首傳教劉金率先與謀餘五人由該二犯轉相糾約是以特廷訊劉得財劉金盡法懲治此二犯從前即係王府所進朕不為已甚彼時未加深究今亦不復追論但此後不可不嚴立禁令上年臣工等條奏稽察太監條款甚多因其動有窒礙未經允行太監給使內廷古今通例與其於進宮之後多為防禁不如慎之於進宮之始較為得要嗣後進宮太監其自行投充者著總管內務府大臣等公同詳查驗問來歷行文該地方官查明實因家道貧苦在籍並無為匪不法情事結報到日方准收進派撥當差其由諸王府交進者著該本王自行詳擇必須給使已逾三年察其馴謹樸實實可放心者方准交進如其居心行事不敢具保者不許濫進充數設有疏忽弊混惟原驗之總管內務府大臣及該本王是問

道光五年 諭我朝家法嚴明從不准太監與外人交結至差往各省之事尤屬從來所未有此內外諸臣無不知者前據張師誠等於游擊關盤獲在逃太監馬長喜竟敢假冒頂帶捏寫奉旨進香黃旗標插坐船並經軍機大臣同英和等究出該犯行至丹陽住宿公館令該處家人代雇船隻官為給價似此招搖恣肆更非潛蹤溷迹者可比尤屬可惡沿途文武各員何竟毫無聞見若非游擊關盤獲竟令長途供頓任意妄為尚復成何事體見已將該犯按律治罪其失察過境之地方官此次姑免深究著通諭直省各督撫嚴飭所屬凡遇通緝在逃太監務當認真緝拏若有捏稱奉差等事無論已未犯法立即鎖拏奏聞懲辦毋稍疏縱倘再失於查拏將來別經發覺定將該犯經過之地方官嚴懲不貸

咸豐元年 諭朕每日御殿召見內外大小臣工詢事考言固以通上下之情尤當防漏洩之漸 皇考宣宗成皇帝前曾特頒 硃諭飭令豫備次起召對

之人及奏事處帶領之總管首領太監等俱著在廊下候候不准擅進明殿聖訓昭垂寓有深意上年因冬令嚴寒諸臣分起進內待召需時暫令在懋勤殿旁屋祇候以示體恤惟思該處係裏邊太監執事之所語言交接易啟屬託之漸若輩行為何所不至所關非淺著內務府於乾清宮西階下之西添設板棚一座嗣後豫備召對之大小臣工即在棚內憩息藉避風雨於挨次召見亦可不致遲誤並著御前大臣軍機大臣等隨時留心查察凡召見官員人等概不准與太監接談交涉在諸臣各知自愛當不至故違訓誡自蹈愆尤倘太監等有不遵約束者即著該大臣等指名奏參加等治罪此旨著軍機處奏事處上書房各存記一道

禮親王覽亭雜錄 世祖肇前明閣宦之弊立鐵碑於 交泰殿戒內官不許干預政事官不過四品皆隸內務府總管歲時謁見如堂司制有周官冢宰統攝之義 純廟防駁尤嚴有高雲從者稍干涉外事 上遵

章廟制立時磔死和相雖貪黷然制內官嚴軍機隨侍嘗有背呼梁文定公名者和聞之奮然曰梁為朝廷輔臣汝輩安可輕之立杖數十命與梁叩謝乃免近日內務府大臣多由僚屬驟遷又無重臣兼領故故事房總管輩多與大臣分庭抗禮無復統轄之制至蘇大司空榜額曾對眾曰今日尚未見吾都堂雖一時謔語亦可觀風氣矣

陳康祺郎潛紀聞 純皇帝幸灤陽有隨侍太監某滋擾民間時熱河巡檢張若瀛者桐城相國文和公族子也撫以善言太監愈咆哮若瀛乃呼役縛之立加大杖直督方恪敏公閱之大驚曰張某瘋矣亟上章劾奏上察其情謂侍臣曰非太監恣行不法若瀛安敢爾其人殊有家風朕甚嘉之因 特旨越七階擢同知而太監遣戍畿輔民庶歡聲若雷按若瀛綏弱勤疆其職直出恪敏公上百僚之底乃有斯人亦足傳也

同治三年 諭朕奉 慈安皇太后 慈禧皇太后懿旨御史賈鐸奏風聞內

務府有太監演戲將庫存進貢緞疋裁作戲衣等語庫存緞疋有數可稽非奏准不能擅動茲事可斷其必無惟深宮耳目難周著該大臣隨時查察責成總管太監嚴禁所屬嗣後各處太監有似此恣意妄行在外倚勢招搖等事並著步軍統領一體察辦總管太監不能舉發定將該總管太監革退從重治罪八年 諭丁寶楨奏據德州知州稟稱有安姓太監乘坐大船捏稱欽差織辦龍衣船旁插有龍鳳旗幟攜帶男女多人沿途招搖煽惑居民驚駭等情當諭令直隸山東江蘇各督撫派員查拏即行正法茲據丁寶楨奏已於泰安縣地方將該犯安得海拏獲遵旨正法其隨從人等本日已諭丁寶楨分別嚴行懲辦我朝 家法相承整飭宦寺有犯必懲網紀至嚴每遇有在外招搖生事者無不立治其罪乃該太監安得海竟敢如此膽大妄為種種不法實屬罪有應得經此次嚴懲後各太監當益知儆懼仍著總管內務府大臣嚴飭總管太監等務將所管太監嚴加約束俾各勤慎當差如有不安本分出外滋事者除將本犯照例治罪外定將該管太監一併懲辦並通諭直省各督撫嚴飭所屬遇有太監冒稱奉差等事無論已未犯法立即鎖拏奏明懲治

十一年 諭御史袁承業奏近聞太監在京城內外開列多舖並蓄養勝春奎戲班公然於園莊各處演戲等語我朝網紀嚴肅從不准太監任意妄為若如所奏實屬大干例禁著總管內務府大臣步軍統領順天府五城一體嚴行查禁嗣後如有前項情事立即據實奏明從嚴懲辦經此次訓諭後倘有太監在外生事別經發覺除將該太監嚴辦外並將該管大臣及地面各官懲處不貸十二年 諭御史文明奏稱本月十三日祭祀禮成還宮之先突有衆太監騎馬爭馳自正陽門起擅走各門中洞並廝役等亦騎馬由中路跟隨衝越儀仗直至午門外始行下馬各門官兵並不向前攔阻請旨嚴禁等語乘輿出入凡扈從各官皆宜慎遵步行若如所奏該太監等越禮馳行實屬不成事體亟應嚴行禁止著總管內務府大臣飭總管太監嚴加約束不准恣意妄行並嚴飭各門章京督率官兵等每遇乘輿出入各路如再有太監及廝役等擅走御道不聽攔阻者立即稟明該管大臣奏請從嚴懲辦

光緒十二年御史朱一新奏略稱我 國家懲前明之失為正本清源之計取宦寺尤嚴 世祖章皇帝立鐵碑於 宮中更億萬年昭為法守 聖母垂簾之初安得海假采辦出京立置重典 皇上登極之初張得喜等情罪尤重請配為奴是以綱紀肅然罔敢恣肆乃今夏巡閱海軍之役聞有太監李蓮英者隨至天津道路謗傳士庶駭愕意 深宮或別有不得已之苦衷匪外廷所能喻然宗藩至戚閱軍大典而令刑餘之輩廁乎其間將何以詰戎兵而崇體制矧作法於涼其弊猶貪唐之監軍豈其本意積漸者然也 聖朝法制修明萬無慮此而涓涓弗塞流弊且不可勝言杜漸防微固 聖朝所宜垂意者矣抑區區之愚匪特此也從古閱宦之流巧於逢迎而昧於大義往往引援黨類播弄語言使宮闈之內疑貳漸生而彼得私售其小忠小信之為以陰竊夫作福作威之柄此前代之積弊皆史冊所昭垂我 皇太后 皇上明目達聰洞燭萬里豈有跬步之地而或敢售其欺願事每忽於細微情易溺於近習侍御僕從罔非正人尤辨之宜早辨也

臣謹案此摺上 懿旨令明白回奏一新上疏略謂四月間命醇親王奕誼巡閱北洋海口復令該太監隨行夫內監賚送固優禮近屬之常經巡閱海師實經武整軍之大典今親藩遠涉內侍隨行在 朝廷為曲體宗親在臣庶則以為冊見羣情過慮不免驚疑風聞北洋大臣曾以座船迎醞親王王弗受也該太監遂乘之沿途辦差者誤為王舟已至駭人觀聽眾口喧傳 臣恐事或失真未敢遽塵 聖聽第念該太監一不謹慎流弊遂已至斯萬一踵之以行為害何可勝道 臣所為反復思維而不能已於言也疏既上以主事降調竊念道光五年張師誠在許墅圖盤獲太監馬長喜同治八年丁寶楨在泰安縣拏獲太監安得海均奏明正法蓋我朝定制太監不得出國門一步違者置諸重典茲乃命親王閱軍已製督臣之肘復命宦寺隨行更背 列祖之訓況李蓮英擅乘醞王座船其騷擾地方當不在馬長喜安得海下一新侃侃力爭抉出 朝廷不得已之苦衷既非轉喉而觸諱必使藉口而不言遂以各省所解海軍經費充願

和國土木之工而諫臣曠若寒蟬甲午中日之役全艦覆沒始歎親王巡閱徒博虛名內監隨行尤干家法一新兩疏能燭幾先惜乎不信仁賢則國空虛讓者徒抱杞憂而已

二十七年粵督陶模奏為請除數千年相沿弊政以光盛治謹陳管見仰祈聖鑒事竊維國家之興衰繫乎主德自古人君未有親君子而不致治者未有親小人而不致亂者治亂之機不可不察也夫以人民之衆事幾之繁遠而外國近而宮廷悉待治於一人之身位則至尊而事實至難誠知其難雖日進正直明智之士討論於前猶懼未足以應萬機而乃以小人閉之則天下之不危者幾何蓋小人者豈必皆大姦大惡但使不讀經史不識道理惟何人主之喜怒為向背則朝夕侍側即足以損君德於無形夫廷臣雖有不肖人主無由而近之其得以常近人主者惟宦官而已人主與宦官日近必與賢士大夫日疏德之不明過之不聞內外之相隔上下之不通莫不由此是以宦官干政之禍史不絕書至其有關君德者其幾甚微而為害尤烈我朝家法嚴明二百餘年從未有內監預聞政事邦治之盛往古所無然臣謂除弊如除莠留其芽葉終恐發生不若絕其根株永無滋長在 皇上春秋鼎盛 聖德日新豈至習於近侍而為億萬世計似有應煩 聖慮者伏思前代之用宦官蓋由妃嬪衆多之故我 皇上後宮減少左右使令本有宮女至 內廷各項差使悉可改用士人不必定須內監今者 乘輿西幸扈從內監其數尚多 愚以為宜及此時大加裁酌留忠謹者二三十人餘悉遣散 回鑾之後請 旨飭下王公大臣公同籌議定官府一體之制永不再選充內監則是數千年相沿之弊政至我 皇太后 皇上而始除非惟一時之盛事亦千古之美談方今外侮紛乘事機危迫誠如 聖諭欲求振作當議更張惟興革之事本非一端中外臣工當已陸續上陳 之意竊謂事有似細微而實重要者宦官是也此等弊政若不早除何以為變法自強之本且環球各國均無內監獨中國尚仍舊習彼中人恆相譏議若改此制則風聲所播各國傾心於樽俎折衝之事不無關係 臣備職外臣不慮妄言內政惟受 恩深重未報涓埃冀竭愚忱以仰神

聖治於萬一

臣謹案 世祖登極鑒明代衰頹之禍裁宦官設內務府順治十年 諭曰朕稽考官制唐虞夏商未用寺人自周以來始具其職所司者不過關關灑掃使令之役未嘗干預外事秦漢以來諸臣不能防患迺委以事權加之爵祿典兵干政流禍無窮歷觀覆轍可為鑒戒 聖祖嗣統裁十三衙門誅內監吳良輔庶幾防患於先矣嘉慶十八年林清之變太監閻進喜等止以崇信邪教敢為內應 仁宗立命正法 祖訓峻厲昭示萬世外考歐西之美制內遵 成憲以固愆此事在反掌聞耳

順天府

臣謹案府尹始於宋周鄉師下大夫漢右內史京兆尹也府丞始於明漢京兆丞也治中始於魏宋之推官也通判始於明周應人 中士也崇文門副使始於明宋臨安府財賦司也 本朝職掌具載前考不贅

乾隆五十八年議准順天見設學政府丞僅止申送所屬州縣童生其入學仍歸學政辦理

又議准府丞毋庸兼提督學政虛銜

嘉慶五年奏准順天府府丞缺出漢軍人員一體迴避

光緒元年議准順天府治中奉天府治中 改為由府尹於順天府屬及直隸各屬通判知州及京縣知縣揀選題補

宣統三年 諭兼管順天府府尹事務一差著即裁撤

又 諭順天府奏擬裁大宛兩縣並酌裁霸州密雲二州縣歸併四路廳直轄一摺著內閣議奏

盛京五部

臣謹案盛京無吏部五部各設侍郎一人雍正八年設滿洲尚書一人以總五部事務之

嘉慶四年停巡視盛京御史 按乾隆十二年定巡視 光緒四年增設戶部宗室郎中一人兵部刑部宗室員外郎各一人禮部工部

宗室主事各一人

五年署盛京將軍岐元奏盛京宗室禮部工部各添主事一缺報可

三十一年裁撤盛京五部侍郎歸將軍兼管

又趙爾巽奏奉 命兼管五部事務到任以後悉心考察愈服 聖斷之明蓋

自前將軍崇實奏定將軍一缺兼管兵刑二部並管帶金銀庫印鑄稽核戶部

其餘各部事務均令與將軍商辦事權已屬將軍徒以名目尚在界限顯分歷

任將軍部臣雖亦力圖挽救無如積重難返事權不專百弊叢生胥根於此若

仍循舊辦理則 奴才今日之兼管與往年崇實之兼管無殊不予革除難言整

頓此中利弊又在 聖明洞鑒之中固無俟多瀆惟其中有關係重要者如禮

工兩部所管典禮工程等事自應敬謹妥籌有頭緒紛繁者如戶兵兩部所管

租稅驛站等事自應詳細稽考其餘部務素亂居多如欲裁撤非先行歸併不

可見飭文案處人員按照部務分股辦事選五部諸悉公事明白大義之司員

數人檢齊則例檔案來轅以備顧問而資接洽 奴才躬親督飭逐項清釐當裁

者裁當改者改當併者併擬定辦法分別具奏請 旨施行一俟諸務清理就

緒即將五部衙門員缺分別留撤改用

又政務處議覆盛京將軍趙爾巽奏戶部六品官二缺請免其滿漢兼揀作為

本屬外郎升補專缺又裁撤戶部管理喇嘛丁銀委六品官一員及戶禮工三

部郎中以下各員缺咨部改用又兵部所設驛丞二十九員改歸州縣管轄驛

丁事務暫由驛巡道經理原設之正副監督及兵部郎中以下各缺一律裁撤

驛巡道請兼按察使銜承轉通省刑名案件刑部司員概行裁撤分別咨部改

用從之 原奏向有各員裁併 三擬總理 事務衙門互參守議 設擬官

宣統元年東三省總督錫良等奏查裁撤奉天五部所有部缺人員均經前將

軍趙爾巽奏准分別改為外用惟從前 盛京將軍署設有堂主事一員筆帖

式十一員外郎六員 興京金州錦州各城城守尉尉守尉等署共設筆帖式

三十餘員均未議給出路該員等既無職守差委又無別項升途缺雖未裁實

同慮設其候選補用人員更係並無效用之處自應將前項員缺請 旨裁撤

另行妥籌以資疏通查軍署主事與五部主事品級相同擬請比照五部裁缺

主事成案以直隸州知州分省補用各該署滿蒙漢軍筆帖式亦請比照五部

裁缺筆帖式成案均以知縣分省補用筆帖式如係應補七品缺者擬請降等

改以府經歷縣丞分省補用應補八九品缺者改以主簿從九品分省補用裁

缺外郎向以州同分省補用其候選補用外郎擬請比照實缺外郎降等改以

未入流雜職分省補用各員如有保准補缺後升用官階者俟改官後應准仍

留原有升階以資升轉

奉天府

臣謹案奉天係我 朝陪都 皇朝通考列入京職茲遵其例自光緒三

十三年改設總督巡撫畫歸外省以清界限

嘉慶六年 諭奉天考試若設學政所轄止二府與體制未協不若悉遵其舊

仍著奉天府丞專管惟府丞在任日久與該處生童熟識未免易滋流弊著將

此缺三年更換一次該部於各省學政年滿時將在京對品京堂開單進呈候

朕簡員對調

九年議定奉天府丞在任未滿三年之內凡遇應升缺出照舊例開列請

簡如蒙升用即將應升人員開列請 簡若三年內並無升遷事故遇各省學

政更換之期將在京對品京堂開單請 簡

十九年定奉天承德縣係正六品京縣該省無對品可調之員應定為保題之

缺以應升人員升用

道光七年定岫巖鳳凰城海防通判先由見任理事通判調補如無人准於見

任滿漢知縣內升補

同治三年改昌圖理事通判為邊海撫民同知

五年奏准新設奉錦山海關道員加按察使銜 詳載外 官各道

又定營口設同知一人作為海防要缺同知

六年定昌圖地方添設同知經歷一人分駐八家鎮地方作為沿邊調補要缺

添設訓導一人作為經制之缺

九年定奉天岫巖廳添設訓導一人作為經制之缺

光緒元年奉天將軍崇實奏變通府尹事權略稱察吏安民府尹最重本與兼尹相助為理惟兼尹向屬戶部而旗民交涉旁牽於刑部之會訊稽留往復清理良難各州縣申詳此等案情亦遂紛而無主甚至苞苴爭納徑竇互開多一兼管衙門即多一需索地步此弊之在上者健訟成風意存拖累原告方控於府尹被告又控於刑部而部中司員復不遵定章任意收呈隨處提案問官亦有偏袒胥吏因而作奸審結無期互傳不到其中命盜重案竟使待質囹圄多至一二十年微論瘼死紛紛無從呼訴而挾仇勒賄被害尤深至於會驗屍傷每以索費久稽動輒數月此弊之在民者擬請 旨將奉天府府尹一缺加二品銜兼右副都御史行巡撫事旗民各務悉歸專理便與將軍相承一氣不致兩歧以此安民先免拖累以此察吏方有稟承通省紀綱斯為樞紐

又 諭茲據軍機大臣六部九卿會議奏稱該署將軍等所陳係屬實在情形均請照准等語即著照所請五部侍郎即照此次所奏恪遵例案各專責成奉天府治中一缺著即行裁撤改為奉天驛巡道該處各廳州縣等缺准其照熱河之例滿漢兼用州縣各官均加理事同知通判銜所有旗界大小官員祇准經理旗租緝捕盜賊毋許干預地方公事奉天為陪京重地從前扭於故習積弊已深經此次變通章程崇實等務宜實力奉行認真整頓所有陋習等項悉數革除地方文武各員並著該署將軍隨時稽查核實勸懲如有不肖之員仍蹈故轍者即行據實嚴參其未盡事宜仍著隨時酌度情形奏明辦理

又定昌圖廳邊海撫民同知加四品銜管同知事作為題調最要缺於奉天同知通判州縣內揀員升補送部引 見恭候 欽定昌圖廳梨樹城照磨額勒克巡檢二缺均作為沿邊調補要缺

又改興京理事通判為理事同知
又定奉天各廳州縣等缺照熱河之例滿漢兼用州縣各官均加理事同知通判銜

二年定鳳凰城增設直隸廳同知一人改巡檢一缺為孤山口分防巡檢岫巖

撫民通判為理事通判管知州事隸鳳凰廳設訓導一人吏目一人

又改奉天理事通判為軍糧同知以正途人員補用
又大東溝增設安東縣知縣一人巡檢管典史事一人

謹案光緒元年盛京將軍崇實等奏籌辦大東溝木稅及地畝升科各種善後事宜就緒請設同通或州縣官二三員清理詞訟徵收錢糧廷議允行至是始設縣治

三年改奉天岫巖通判為知州隸鳳凰廳管轄

又增設鳳凰城邊關兵備道一人設寬甸懷仁通化三縣知縣各一人巡檢各一人寬甸安東兩縣及岫巖州統隸鳳凰廳鳳凰廳設教諭一人兼安東寬甸兩學懷仁通化兩縣隸興京廳興京廳設教諭一人兼通化懷仁兩學

又設寬甸縣長甸河縣丞二龍渡巡檢各一員通化縣柳樹河縣丞帽兒山巡檢各一員懷仁縣通溝口四平街巡檢各一員

又盛京將軍崇厚奏略稱奉省北邊外昌圖廳地大事繁亟須添官增兵藉資治理擬請將該廳升為府治做照熱河承德府之例仍管地面詞訟各事即康家屯地方亦可歸其自理移設八家鎮經歷於康家屯分防再移梨樹城照磨於八面城駐紮均照舊請加六品銜分司緝捕土匪並勸諭命盜各案並將照磨巡檢一員升為府司獄訓導一員升為府教授此見擬升設昌圖府之情形也八家鎮梨樹城兩處原設經歷照磨各一員分防佐理該兩處均係扼要之區政務殷繁措置非易該經歷等職小權輕勢難整頓擬將梨樹城改為廳治添設通判一員名曰奉化廳另添巡檢一員管理監獄八家鎮改為縣治添設知縣一員名曰懷德縣另添典史一員管理監獄並均添設訓導各一員以興學校該廳縣應照章請加理事同知銜以便蒙民兼理此見擬添設廳縣教佐各官之情形也惟是該處地廣民頑盜風未息東北直接吉林邊防尤難鬆緩擬於該府廳縣另添捕盜營馬兵二百名交昌圖分撥調遣以專責成以上升設添設各員如蒙 俞允請 旨飭部頒發印信關防以昭信守

奉天府屬軍糧同知經歷司獄各一人承德興仁海城蓋平開原鐵嶺六縣

知縣各一人典史各一人遼陽復州知州各一人吏目各一人金州廳同知一人倉官巡檢各一人遼陽倉官海城牛莊巡檢牛莊倉官蓋平金州開原倉官各一人 新民府知府一人經歷兼司獄一人鎮安彰武二縣知縣各一人鎮安典史彰武縣丞巡檢兼典史各一人營口廳同知一人 海龍府知府一人經歷兼司獄一人東平西豐西安柳河四縣知縣典史各一人 錦州府知府一人倉官經歷各一人錦縣中廣寧三縣知縣各一人甯遠義州二州知州各一人錦縣天橋巡檢典史中巡檢兼典史廣寧倉官典史各一人甯遠吏目義州倉官吏目各一人 昌圖府知府一人照磨司獄各一人懷德奉化康平三縣知縣典史各一人康平主簿一人遼原州知州一人吏目兼典史一人 鳳凰直隸廳同知一人經歷兼司獄巡檢各一人興京同知一人經歷兼司獄一人迪化臨江懷仁輯安四縣知縣各一人迪化巡檢一人巡檢兼典史一人臨江典史一人懷仁巡檢一人巡檢兼典史一人輯安巡檢典史各一人 洮南府知府一人經歷兼司獄一人靖安開通二縣知縣各一人巡檢兼典史各一人

四年奉天設分巡東邊道一員豐盈庫大使一員從盛京將軍崇厚請也

又吉林將軍銘安奏略稱吉林省自威遠堡門東至俄界不下二千餘里北至黑龍江交界南至鴨綠土們兩江源又不下二千餘里司牧之官惟省城西北一隅設有三廳三廳之理事同知通判向由京秩旗員揀放歷練未深往往茫無所措至阿勒楚喀三姓甯古塔等處命盜戶婚就理於協佐等官但習騎射不惟不諳吏治且多不通漢文歷任將軍止重武事吏治多未講求民怨沸騰擬而走險近年以來民愈窮而愈悍賊愈勦而愈滋峻法嚴刑人無畏志是皆不揣其本而齊其末也擬請以所屬尤為衝要之區酌中設立廳縣佐雜等官並將吉林廳升為府治長春廳通判改為同知將來地錢糧旗民詞訟專歸該廳州縣管理其協佐防校等官止准管理旗務防勦盜賊不准仍預地方詞訟以示限制而一事權

五年黑龍江設呼蘭廳學正一員

六年吉林設賓州廳撫民同知一員巡檢二員五常廳撫民同知一員經歷一員巡檢二員於阿克敦城地方置敦化縣設知縣等官又於賓州廳五常廳敦化縣設捕盜外委各一員

又奉天置康平縣裁康家屯經歷改設知縣典史等官

又盛京將軍岐元等奏請奉天添設圍場總管一缺應請作為滿蒙漢公缺並加副都統銜兼練兵統帶官又添設通判巡檢等官得 旨圍場設官添兵等事係屬創始該將軍等所奏自為因時制宜起見均著照所議辦理

又奉天設圍場地方撫民通判一員加理事同知銜並巡檢兼司獄一員

七年吉林將軍銘安奏略稱查雙城堡地方距省四百餘里為省城東北之門戶商賈輻輳事務殷繁懇請仍照前奏設立撫民通判一員名曰雙城堡另設巡檢兼司獄事一員管理監獄訓導一員振興學校拉林分設巡檢一員歸廳統屬其雙城堡原設總管一缺改設協領專司緝捕及一切旗務此雙城堡拉林擬設廳官教佐各員之情形也又查伊通距省二百餘里為省西最要咽喉向歸吉林廳管轄地方遼闊治理難周請在伊通設立知州一員名曰伊通州該州舊有吉林分防巡檢一員改為吏目管理伊通監獄添設訓導一員振興學校磨盤山分設巡檢一員即歸伊通州統屬此伊通磨盤山擬設正印教佐各官之情形也舊設三廳亦應變通盡利政教庶免兩歧擬請將吉林廳理事同知一缺升為府治改設知府名曰吉林府新設之伊通州歸其統屬原設吉林巡檢一缺升為府司獄管司獄事學正一缺升為府教授以符體制至伯都訥廳理事同知一缺改為撫民同知加理事銜長春廳理事通判一缺請改為撫民通判加理事銜農安地當衝要生聚日繁請添設分防照磨一員歸長春廳統屬靠山屯地方民戶無多該廳可以兼顧毋庸另設分防經歷此吉林舊設三廳擬請升改各官之情形也以上添設升改正印教佐各官如蒙 俞允請 旨飭部鑄造關防印信鈐記以昭信守

八年吉林設分巡道一員統轄吉林府伯都訥長春五常賓州雙城五廳伊通一州置吉林府設知府一員裁吉林廳理事同知一員改設府經歷一員升廳

學正為府教授又改伯都訥理事同知為撫民同知長春廳理事通判為撫民通判均加理事銜又添設雙城廳撫民通判一員巡檢二員訓導一員又設伊通州知州一員訓導一員改伊通河巡檢為伊通州吏目一員又設雙城廳伊通州捕盜外委各一員

十年奉天府康平縣設訓導一員

又吏部奏准奉天東邊道缺出由將軍等咨會北洋大臣直隸總督於奉天直隸兩省見任道員中各保一堪任邊疆要缺熟悉洋務之員請 旨簡調

十一年黑龍江北團林子地方設綏化廳理事通判一員管獄巡檢一員呼蘭廳城添設分防經歷一員歸同知管轄餘慶街添設分防經歷一員歸通判管轄

又吉林將軍希元奏略稱長春一廳案牘最繁號稱難治原設通判所駐之寬城為吉林赴奉天通衢大道實省城西北門戶擬請將通判一缺升為府治改設知府名曰長春府於寬城正北相距一百二十餘里之農安城分設縣治名曰農安縣歸府統屬至靠山屯一處雖已畫歸農安而相距尚在百里以外擬請將農安原設分防照磨移設該屯以資巡緝長春原設訓導改升教授原設巡檢改升經歷兼司獄事並於農安縣添設訓導巡檢各一員巡檢管理監獄以專責成

吉林府知府一人倉官經歷管司獄各一人伊通州知州一人州同拉林倉官吏目各一人盤石縣知縣一人巡檢兼典史一人雙城廳同知一人拉林巡檢巡檢兼司獄各一人伯都訥廳同知一人巡檢兼司獄新城巡檢各一人 長春府知府一人分防照磨經歷兼司獄各一人農安縣知縣一人主簿巡檢兼司獄各一人 賓州直隸廳同知一人巡檢兼司獄一人長壽縣知縣一人巡檢兼典史各一人 五常廳同知一人經歷巡檢巡檢兼司獄各一人 敦化縣知縣一人巡檢兼典史一人 延吉廳同知一人分防經歷巡檢兼司獄各一人 綏芬廳同知一人分防知事巡檢兼司獄各一人黑龍江呼蘭直隸廳同知一人經歷巡檢倉官各一人 綏化直隸廳通判一

人經歷巡檢兼司獄各一人

十二年吏部奏定京縣知縣准升順天府治中

十四年裁吉林廳盤山分防巡檢設伊通州廳盤山分防州同一員從吉林將軍希元請也

十五年吏部議覆吉林將軍希元奏請裁長春廳撫民通判設長春府知府一員升廳訓導為府教授升巡檢為府經歷添設府照磨一員又置農安縣設知縣一員並設訓導巡檢各一員

三十年政務處議准設黑龍江分巡道一員兼按察使銜總司通省刑名驛傳事務管轄黑水大賚兩廳又設分守綏蘭海兵備道一員管轄呼蘭綏化海倫三府廳並設庫大使一員升呼蘭廳為府移治呼蘭城升綏化廳為府仍治綏化各設知府一員不設首縣自理地方原設巡檢各升為府經歷兼司獄事添置海倫直隸廳設同知與經歷兼司獄各一員添置黑水廳設撫民同知一員添置大賚廳設撫民通判一員各設巡檢兼司獄一員添置巴彥州設知州吏目各一員添置蘭西縣暨木蘭縣均歸呼蘭府轄各設知縣一員巡檢兼典史一員改綏化廳餘慶街經歷為餘慶縣歸綏化府轄設知縣一員巡檢兼典史一員添置青岡縣設知縣一員巡檢兼典史一員以上添設同通州縣等官均加理事銜滿漢並用

三十一年 諭奉天府府尹兼巡撫事一缺著即裁撤所有府尹原管事務均著責成趙爾巽經理

又 諭各省學政專司考校學堂事務會同督撫經理改奉天府府丞兼學政為東三省學政裁撤奉天府府丞一缺

又政務處議覆盛京將軍趙爾巽奏請裁奉天府軍糧同知改設奉天府知府一員歸驛巡道兼轄金州一廳遼陽復州二州承德興仁海城蓋平開原鐵嶺六縣悉歸該府專轄定為衝繁疲難請 旨揀調要缺

又議准署黑龍江將軍程德全奏請裁撤黑龍江副都統七缺曰齊齊哈爾曰黑龍江曰墨爾根曰布特哈曰呼蘭曰呼倫貝爾曰通肯

三十二年奉天設法庫門撫民同知一員畫開原及附近康平鐵嶺三界地方併歸管轄設同江廳河防同知一員專司交涉緝捕設江家屯撫民通判一員畫錦州迤西各邨莊併歸管轄設遼中縣知縣一員畫新民遼陽海城三處地段併歸管理設鎮安縣屬小三家子分防縣丞一員復州屬水門子巡檢一員從盛京將軍趙爾巽請也

又奏准江家屯撫民通判更名爲錦西撫民通判

又政務處議覆御史顧燮奏請設鄉官由奉直兩省先行試辦

又議覆署吉林將軍達桂奏請設依蘭府知府一員隸於哈爾濱江關道並設府經歷兼司獄一員設臨江州知州一員設湯源縣知縣一員大通縣知縣一員均加理事銜併隸依蘭府屬各設巡檢兼典史一員又升改伯都訥撫民同知一缺爲府曰新城府設知府一員仍統屬於吉林分巡道并設府經歷兼司獄一員升訓導爲教授設榆樹縣知縣一員兼理事銜隸新城府原有巡檢兼司獄仍舊教職由府教授兼攝

又署黑龍江將軍程德全奏請裁呼蘭左翼協領一缺留右翼協領爲呼蘭協領刪去右翼字樣裁通肯協領三缺以正白兼正藍旗協領爲通肯協領毋庸分旌裁布特哈協領四缺設東西布特哈總管二缺

皇朝續文獻通考卷一百三十

職官考十六 京武職

鑾輿衛

臣謹案鑾儀衛官始於 國朝掌鑾儀衛事大臣夏車正周大駉戎右戎僕各中大夫明領錦衣衛都督等官也鑾儀使周巾車太僕齊右齊僕各下大夫即明錦衣衛使左右中前後所各官即明各指揮使但不司緝探之事耳漢侍衛無定員每科武進士 簡拔侍衛者以十之四撥衛行走升轉仍視侍衛 皇朝通考列入武職內有主事經歷筆帖式等文員仍隸吏部選授

乾隆五十七年鑾儀左使右使各一人復改爲鑾儀使二人罷漢冠軍使陪祀增設拜褥管理漢治儀正一人左所中所漢侍衛各一人前所漢侍衛二人五十九年裁拜褥管理漢治儀正一人

嘉慶六年改總辦堂務協辦堂務滿冠軍使各一人爲總理七所事務滿冠軍使二人增設協理七所事務滿雲麾使二人仍以各所及旗手衛滿冠軍使雲麾使兼充

又 諭嗣後恭遇 大祀著鑾儀衛揀選熟習擡昇正身校尉充當並添派職官四員頭役六名小心照料其職名先期咨送禮部太常寺嚴加查覈倘敢撓雜外人或人數不敷致禮儀不肅著該部寺據實參奏

七年奏准鑾儀衛額設鳴贊四員恭逢 升殿及傳臚諸大典贊鳴鞭者三員三員其陪立三員向不敷用以雲麾使充當嗣後請增設學習鳴贊二員由八旗閒散人員內揀選備補鳴贊費用襄典禮

同治十三年奏准鑾儀衛滿冠軍使保送揀選各城守尉
光緒元年鑾儀衛奏准鑾儀衛遇有缺出按次先以本衛勤慎之員升補三缺後再將外保之員揆補一缺

三十三年會議政務處議准酌裁鑾儀衛員缺清單 冠軍使額設宗室缺一員滿缺七員漢軍二員擬酌裁二員餘缺八員作爲定額內留宗室專缺一員

其餘不分滿漢一體酌補被裁之員查其年力強壯請以大門頭等侍衛用年老者咨回本旗以對品旗員遇缺即補 雲麾使額設宗室缺二員滿缺十八員漢軍八員擬酌裁八員餘缺二十員作爲定額內留宗室專缺二員其餘不分滿漢酌補被裁員年壯者請以大門二等侍衛用年老者咨回本旗以對品即補 治儀正額設宗室缺四員滿缺十八員漢軍二十員擬酌裁十員餘缺三十二員作爲定額內留宗室專缺三員其餘不分滿漢酌補被裁員年壯者以大門三等侍衛用年老者咨回本旗以對品即補 整儀尉額設宗室缺四員滿缺十五員漢軍十員擬酌裁四員餘缺二十五員作爲定額內留宗室專缺三員其餘不分滿漢酌補被裁員年壯者請以大門藍翎侍衛用年老者咨回本旗以對品即補 上三旗蒙古布拉器拜唐阿額設三十名擬全行裁撤查其年力精壯明白識字者酌留數名以整儀尉候補餘咨送侍衛處以三旗親軍補用

又奏議覆整頓鑾儀衛辦法略稱如裁汰冗員一節查該衛額設宗室滿洲缺六十九員漢軍缺四十員今請裁汰二十四員嗣後滿漢差缺一例充補其裁缺人員酌量分項補用應請 恩准並 飭下該衛按照清單辦理至於漢軍人員既同當 禁近要差並請一體 賞戴翎枝以符體制其布拉器拜唐阿一項見在久無差遣自可全行裁撤以節餉精如加籌經費一節查該衛差使重要公費無多雖前經奏撥銀二萬兩近年物力艱難發放各款已形竭蹶至當差人員俸精微薄不免有衣履垢敝之情翼衛森嚴觀瞻所繫應請 恩准飭下度支部每年撥給經費銀四萬兩以一萬兩補助署中公用以三萬兩津貼各員藉資鼓勵至該衛向章常年承差什物旗民校尉四季冠履等件自工部裁後改由內務府咨取成做嗣後此項物件均擬自行採辦以及署庫歲修各所零用均歸所請經費項下開支惟 儀駕兩簿乘駕衣樓毯等項照例仍向各衙門行取以符定制所請將鑾儀衛一員作爲該衛專缺查漢鑾儀使缺出向由兵部以漢軍冠軍使及各省漢軍漢員見任總兵開單請 簡惟歷來辦理久無總兵銜名開列應如所請遇有漢鑾儀使缺出無庸咨行陸軍

部即由該衛將所有見任冠軍使不分滿漢全行帶領引 見請 旨簡放至於 上用轎乘上套墊繩絆等項活計向例行文工部轉行度支部等處各取物料成做送交該衛備差去年工部裁後此項改歸內務府辦理轉咨行徒費時日不如由該衛逕行各該衙門各取自行招商成做等語此為辦公迅速起見應如所請以後轎乘上各項物料即由該衛逕行度支部撥正庫顏料庫內務府各取應用

宣統元年 諭鑾儀衛著改為鑾輿衛鑾儀使改為鑾輿使治儀正著改為治儀正整儀尉著改為整宜尉

領侍衛府

臣謹案領侍衛內大臣始於 國朝周宮正漢衛將軍唐侍衛馬步軍都指揮使五季殿前都點檢明掌領侍衛伯也內大臣周官伯散秩大臣後周左右小宮伯皆始於 國朝又置 御前乾清門侍衛漢虎賁中郎將也一等侍衛周虎賁氏下大夫二等侍衛周虎賁氏旅賁氏各中士也三等侍衛周旅賁氏下士藍翎侍衛漢五官郎中左右署郎中也

無常以師兵為營衛是侍衛之制始於黃帝而其名始於唐

乾隆五十二年 諭本日兵部帶領武職人員引見內承襲伯爵之趙曰泌一員係趙良棟之五世孫見在陝甘督標學習期滿此項世職人員向來學習年滿後或發往該省或留部皆當以副將補用副將係武職大員且可護理總兵設遇徵調即有專帶兵弁之責今趙曰泌尚屬年輕未曾諳練若遽以副將補用於地方營伍不能整飭倘致貽誤轉非所以保全其祖父立功之意伊等爵秩較大又不便改補微末將弁嗣後此項承襲公侯伯子男世職人員於學習年滿帶領引見後應令在侍衛上行走俟三年後領侍衛內大臣看其才具如果能勝武職大員出具考語咨送兵部帶領引見再以副將等官補用如才具中平難期勝任仍令在侍衛上行走若能始終勤慎無過即以散秩大臣補用亦無不可

嘉慶十九年 諭散秩大臣並無辦事之責嗣後無論正委如有擢至都統者

俱無庸兼散秩大臣著為令

道光元年增設滿洲主事二人

二十二年 諭向來京外大員子弟每屆五年查辦一次挑取侍衛拜唐阿嗣後如遇挑取侍衛年分所有大員子弟著無庸挑列

咸豐元年 諭從前內外見任大員之兄弟子孫五年一次挑取侍衛拜唐阿當差挑取後尤須學習清語技藝騎射以為差使得人起見自道光二十六年查辦以後迄今已逾五年又屆應行查辦之期惟思該大員子弟內或身體軟弱馬上平常或自幼讀書未能及時學習騎射此輩即使挑為侍衛拜唐阿又焉望其得力耶自應量為通融辦理嗣後在京文職自三品以上武職自二品以上外任文職自總督以至按察使武職自將軍提督以至總兵該大員之兄弟子孫內如有年已及歲於侍衛拜唐阿差使相當遇五年查辦之時情願挑取者著該大臣等仍照從前呈報該旗由該旗造冊咨送軍機處彙奏經朕指出者帶領引見倘有身弱殘疾抑或騎射平常不能挑取侍衛拜唐阿著該大臣據實呈明該旗轉行軍機處聽其自便該旗亦不必指名催取以示朕普育旗僕量材器使之意

臣謹案 國初以八旗勦旅戡定大勳正黃鑲黃正白三旗皆 天子所自將爰掄其子弟隨侍宿直命曰侍衛宗室之秀及外藩之侍子亦得輪直 殿庭其後拔武進士以選預環列周廬千楯設戟百重以視權移宦豎輸付非人早有以慎於始而防其漸矣

八旗都統

臣謹案晉太元十九年有河西大都統是都統之名始於晉唐乾元元年李昶除都統淮南江東西節度使是都統之官始於唐 國朝置八旗都統周鄉師遂人遂師軍將也副都統周鄉大夫遂大夫師帥也參領周州長縣正旅師也副參領周黨正副師卒長也佐領周族師閭晉鄭長里辛兩司馬也驍騎校周比長鄰長也 朝先定四旗尋增為八旗其後蒙古漢軍各編八旗合為二十四旗在內則有親軍前鋒護軍驍騎步軍之

分在外則有各省駐防之制以旗統人即以旗統兵無僉派召募之煩而有腹心干城之效洵足邁越近代特孳生日衆口糧不敷不能無賴於與時變通之 聖哲矣

乾隆五十五年鑲黃旗漢軍增設驍騎校佐領各一人

嘉慶九年鑲黃旗漢軍裁佐領驍騎校各一人

前鋒統領

臣謹案 國朝置前鋒護軍統領周宮伯掌舍司隸也參領等官漢衛士令丞諸屯衛候司馬也又置提督九門步軍巡捕五營統領周司門下大夫漢執金吾也左右翼尉周司門上士漢執金吾丞也八旗協尉漢執金吾司馬也副尉周司門司隸各中士漢執金吾候也步軍校漢執金吾千人也城門領漢城門司馬也城門吏漢十二城門候也巡捕五營副將參將游擊漢左右京輔都尉也五營都司守備秦中壘校尉也宿衛警蹕何等森嚴自衛尉監門存其名而不紀其實往往一夫夜呼禁門雲擾至於喋血我 朝分旗授職操練以時制度詳明抑豈前代所可比擬哉

乾隆五十四年奏准 避暑山莊添設戴翎前鋒校十人八旗滿洲每旗各補用一人八旗蒙古每翼各補用一人 此項前鋒校仍歸入前鋒數內每月派銀一兩每季派米一百五十五升

護軍統領

嘉慶四年 諭護軍統領及管理各營大臣等俱有跟班之親隨原為辦理公務代該大臣傳事傳話而設非同家丁之供應趨使自應於兵丁內各選二人跟班見在皆由驍騎校護軍校內挑取作為親隨殊屬不合伊等職雖微末俱係職任之員各有應辦事件若令舍其公事跟隨大臣成何體制嗣後護軍統領及管理各營大臣皆由前鋒護軍內挑取每人只准挑選二名作為親隨跟班其挑選驍騎校護軍校之例永遠禁止著為令

臣謹案 啟躡回鑾計程前引皆總統之責凡 御營及頓營看營衛導亦有專任雖無定員無額缺而責成鉅要揀派時宜如何加之意哉
提督九門步軍統領

嘉慶四年步軍統領衙門添設左右翼總兵各一人

又 諭步軍統領衙門司員不敷當差奏請添設郎中著照所請准其添設郎中一員坐辦本署事務以專責成

又 諭兵部議處步軍統領定親王蘇恩護軍統領公晉昌不能實力稽察該營員等嚴加管束以致恆謹於 皇后出神武門時並不敬謹迴避衝突直行請將蘇恩晉昌降三級調用毋庸查抵一摺因思步軍統領從前原係二品副因職任較重於一品大員中派令管理亦未有親王兼攝此職者況步軍統領有夜閒巡查堆撥之事於親王體統實非所宜蘇恩著不必兼管其步軍統領事務著布彥達實管理凡遇巡幸毋庸伊扈隨往以專職守至朕出入禁城前鋒統領例應在門前帶刀侍立蘇恩係屬親王亦於體制未協所有伊前鋒統領員缺著貝勒蘇德補授正白旗領侍衛內大臣員缺著成親王永理補授布彥達實所管事務較多其正黃旗領侍衛內大臣員缺著丹巴多爾濟補授丹巴多爾濟不必兼管護軍統領其缺俟朕另行簡放至步軍統領為九門總鑰統轄京營總司緝捕一人獨理不特事權過重兼稽察難周自應另設佐理之員以資分任即如八旗設立都統駐防設立將軍俱有副都統綠營設立提督即有總兵今步軍統領衙門亦當照此設左右翼總兵各一員候朕於八旗副都統內揀員充補不必再兼副都統本任遇有一切公務步軍統領與總兵同堂坐辦既可杜一人專擅之漸而於巡察諸事亦更為周密嗣後本衙門官員引見即令步軍統領與總兵同帶無須步軍翼尉帶領著兵部載入條例永遠遵行晉昌疏於管轄實屬咎所應得見在恆謹已革去王爵晉昌所管鑲黃旗護軍統領亦著開缺另簡兵部摺內請將蘇恩晉昌職任降調之處俱毋庸議

又 諭昨已降旨將步軍統領衙門添設左右翼總兵二員並簡員補授矣今思該衙門既經添設大員有正副之分其品級官階及應得養廉並管轄營制升轉開列均應定立章程以示區別而專職守向來步軍統領係正二品今照各省提督之例改為從一品其左右二翼總兵俱定為正二品每年各給該總

一第 冊 賣 參 四 車 全 書 第 8 反 正 句

兵養廉銀八百兩以資辦公至八旗步軍向係提督專管今著兩翼總兵一同管理其巡捕五營事務著將中營作為提標副將作為提督中軍仍令管理圓明園一帶五汛其餘參將四員分營之南北左右四營共十八汛南左二營參將等官並所轄之十汛歸左翼總兵管北右二營參將等官並所轄之八汛歸右翼總兵管再嗣後八旗都統及各省提督出缺俱准將兩翼總兵開列兩翼總兵缺出即將八旗副都統及京營副將開列候朕簡用即著將此旨載入兵部則例

九年奏准添設副翼尉二人由八旗協尉內補放三品虛銜幫同翼尉辦事仍食協尉原俸

光緒十二年步軍統領衙門奏准添設滿洲員外郎一員主事一員筆帖式二員

三十年覆准步軍改仿警察從肅親王善耆之請也

火器健銳虎槍營

臣謹案康熙中特置火器營以習槍礮設虎槍營以格猛獸乾隆己巳始以雲梯勝兵立健銳營於香山歲時簡閱有勇知方信乎儲才豫而收效遠矣

乾隆五十三年健銳營增設番子防禦一人番子驍騎校一人

同治十一年奏准火器營額設翼長營總參領等官嗣後遇有各項城守尉缺出分析旗分與京旗各營應放人員一併咨取揀放

守護 陵寢官

臣謹案守護各官有文有武會典文員載內務府武員載兵部 皇通考列八旗都統之後殆以總管大臣均武職總兵兼欵今依次續焉

昌陵 嘉慶八年設總管一人翼長二人防禦十六人驍騎校一人掌關防郎中員外郎主事各一人尚茶正尚膳正尚茶副尚膳副內管領副內管領各一人筆帖式二人道光元年添設尚膳正一人
昌陵妃園寢 嘉慶八年設防禦八人驍騎校一人設主事副內管領各一人

昌西陵 咸豐二年設防禦十六人驍騎校二人三年設掌關防郎中員外郎主事尚茶正尚膳正內管領各一人筆帖式二人光緒二十二年設尚茶副尚膳副各一人

慕陵 道光十五年設總管一人翼長二人防禦十六人驍騎校二人設掌關防郎中員外郎主事尚茶正尚膳正內管領副內管領各一人筆帖式二人三十年添設尚膳正一人光緒二十二年設尚茶副尚膳副各一人

慕東陵 咸豐六年設防禦十六人驍騎校二人設掌關防郎中員外郎主事尚茶正尚膳正內管領各一人筆帖式二人七年添設副內管領一人光緒七年設尚茶副尚膳副委署副內管領各一人二十二年改增尚茶副尚膳副委署副內管領各一人

慕東陵妃園寢 咸豐六年設防禦八人驍騎校一人光緒十九年設尚茶副尚膳副委署副內管領各一人

定陵 同治四年設總管一人翼長二人防禦十六人驍騎校二人設掌關防郎中員外郎主事內管領副內管領尚茶正尚膳正各一人筆帖式二人

定陵妃園寢 同治四年設防禦八人驍騎校一人光緒三年設副管領委署副內管領尚茶副尚膳副各一人

定陵 光緒五年設防禦八人驍騎校一人七年添設防禦八人驍騎校一人設掌關防郎中員外郎主事內管領尚茶正尚膳正各一人筆帖式二人
惠陵 光緒四年設總管一人翼長二人防禦十六人驍騎校二人五年設掌關防郎中員外郎主事內管領尚茶正尚膳正各一人筆帖式二人

光緒三十一年政務處議覆盛京將軍趙爾巽奏請以盛京守護大臣改為兼管 三陵承辦事務衙門大臣又禮部讀祝官八員贊禮郎十六員戶部六品官二員禮部六七品官各一員工部四五品官各一員改隸 三陵總理事務衙門兼管不必冠以各部舊稱又戶禮工外郎二十缺請裁十一而留九缺以見任外郎九員改隸 三陵總理事務衙門作為領催升階此項額缺由將軍會同守護大臣選補又戶禮工四五六七品官屬有領催三十五員改隸

三陵衙門並守護大臣兼管三年無過照裁缺部員例改用
宣統元年禮部會奏遵議 東陵守護大臣載瀛等奏稱吏部查 善陀峪
定東陵禮部應設員外郎二員令該大臣於 東陵見任各員內選補遺缺交
吏部補放其工部員外郎一缺應照 普祥峪 定東陵成案毋庸添設一切
工程俱歸併石門工部辦理至原奏稱禮部添設牛吏二名應准添設由 臣部
選補陸軍部查 善陀峪 定東陵於光緒五年設防禦八員驍騎校一員領
催披甲四十名養育兵四名今請再添防禦八員驍騎校一員領催披甲四十
名養育兵四名核與 普祥峪 定東陵額設兵數相符自應照准由該大臣
照例選補內務府查照例添設郎中員外郎主事內管領尙茶正尙膳正各一
員筆帖式二員請於 東陵見任各員內揀選咨送引 見補放禮部查應設
讀祝官二員贊禮郎四員半由見任熟諳人員內調補半由揀選補放
又馬蘭鎮總兵恩霖奏略稱恭備 善陀峪 定東陵奉祀內務府應添設郎
中員外郎主事內管領各一員茶膳正各一員筆帖式二員茶膳香燈拜唐阿
十四名領催閒散拜唐阿三十名埽院人一名樹戶四十名均擬預先揀補足
額以備承值除已挑補領催閒散拜唐阿樹戶等五十六名外尙應挑茶膳拜
唐阿領催閒散拜唐阿二十九名嗣准總管內務府咨稱所有恭備奉祀事宜
應援案奏撥尙膳正尙茶正各一員膳房拜唐阿七名茶房拜唐阿五名卽由
該衙門就近派充
又 西陵守護大臣奎英等奏略稱嗣後遇有香燈拜唐阿缺出各於本處閒
散拜唐阿內擇穩練者充補如該處官員之子有支食閒散拜唐阿錢糧者仍
照舊章儘先充補均以年至十八歲爲限允之

皇朝續文獻通考卷一百三十一

職官考十七 世職

臣謹案世職 皇朝通考列武職而公侯二爵未載襲次茲特詳具於前

次及事例俾易明晰云

公爵 一等二十六次二等二十五次三等二十四次

侯爵 一等二十二次二等二十一次三等二十次

伯爵 一等十八次二等十七次三等十六次

子爵 一等十四次二等十三次三等十二次

男爵 一等十次二等九次三等八次凡加一等

輕車都尉 一等六次凡加一等二等五次三等四次

騎都尉 兼一雲騎尉者三次不兼二次

雲騎尉 合兩雲騎尉者二次亦一次

恩騎尉 係前項承完改給者因替非得自陣亡止傷亡不給

乾隆五十七年兵部奏准漢世職應用參將游擊都司守備千總員弁除留部選用者照例辦理外其發回原省題補各員弁統以到營學習之日起扣滿五年如果弓馬人材可觀各按到營先後挨次題補拔補如有始勤終怠及庸劣無能者勒令回籍

嘉慶二年吏部題准捐職投效人員照實任官議給世職

四年奏准嗣後有奉 特旨賞給公侯伯等爵襲次越十五次以上者若無世襲因替字樣仍按次數承襲

又奏准凡軍功賞有世爵官員其原立官襲職後又以軍功賞有世爵准其合併一爵承襲

如奉 特旨晉封之爵照晉封承襲即將原爵註銷如承襲祖父世爵又因軍功賞有世爵亦准合併二爵承襲

如奉 特旨晉封之爵仍准其合併一爵承襲

又奏准效力軍功所得世爵原立官或傷殘或病廢願將世襲告退統與子孫承襲其子孫病故襲次已完而原立官尚在者給予全俸由該旗請 旨定奪

五年 諭向來綠營世職子弟承襲引見時皆發本省督撫標下學習該員等

雖皆係本省之人但原籍距省遠近不一嗣後各員除距省較近仍隸督撫標

下學習外其遠者就原籍附近各標營交該鎮將等官勤加訓練每年該督撫

調省考驗一次期滿後照例給咨送部引見酌加錄用以示體恤

又兵部奏准漢輕車都尉係三品世職學習期滿引見時聲明請 旨以參將

游擊分別錄用騎都尉又一雲騎尉係四品世職以都司對品補用

又奏准立爵人員犯枉法婪贓侵盜錢糧等罪不准再襲如係子孫轉承即

遇犯前項重罪除本人子孫不准承襲外另簡立爵人子孫承襲無次房

支派准立爵人兄弟伯叔子孫承襲

六年 諭乾隆六十年先經軍機大臣等將在京八旗從前殉節諸臣具奏補

給恩騎尉世職茲又據各省陸續咨到從前殉節諸臣各該員子孫均著加恩

補給恩騎尉世襲因替該世職等除情願入標學習當差者仍照舊例支給俸

餉外其有願應文試者即以本職頂戴作為文生員願應武試者亦如之准其

一體應試

八年奏准雲騎尉三年期滿責成該管大臣察其弓馬嫻熟營伍諳練方准保

送如弓馬稍可營伍未諳即聲明展限再學習三年仍不堪造就勒令回籍將

世職俸銀裁汰

十年奏准恩騎尉世職缺出其應襲止有一人已經襲有別爵或先經襲有恩

騎尉者准其一人兼襲俟有應分襲之子嗣仍准其分襲

又奏准滿洲蒙古漢軍承襲恩騎尉人員如本係文武生員承襲後情願考試

者准其照例考試仍隨旗當差給予世職俸餉其本非文武生員情願呈改文

武生員應考者准其呈改一體考試不給俸餉

又奏准內外各官承襲世職郎中等官承襲輕車都尉員外郎等官承襲騎都

尉主事等官承襲雲騎尉小京官承襲七品官均係班聯相等應令其兼襲其

有世職品大文職品小除奉 特旨准其兼襲不必開缺外餘俱在世職上行

走庸遺員缺另行銓補至承襲世職人員內有不嗣弓馬原就本身文職查與

世職品級相當者准其兼襲若品級大小懸殊令其呈明督撫驗看給咨送部引 見將可否以原官承襲之處恭候 欽定此內有願試文場者亦令督撫咨兵部具奏請 旨

又奏各省承襲雲騎尉人員如係文武生員呈請考試者准其應試給予俸銀其本非文武生員於未經發標學習之前呈請考試者止准其以雲騎尉頂戴應試不准食俸其由捐納貢監生應襲世職呈請考試者亦不准食俸如發標學習未經期滿引 見者亦准其一體呈改其有應試數次仍願入標學習者俟其入標時照例給俸至期滿引 見後世職人員不准呈改

又奏准各省承襲恩騎尉人員除情願入標學習當差者仍照舊例支給俸餉外其有情願呈請考試如本係文武生員襲職者給予俸銀其改為文武生員應試者不給

十一年奏准承襲恩騎尉之人病故或因公罪革職並無餘罪者所出之缺准令出缺之子孫承襲或因公罪革職後尚有餘罪者所出之缺另簡原立官親子孫承襲若犯貪婪一切重罪者雖有立官人之親子孫俱不准承襲

道光三年 諭嗣後有世職旗人如過繼本旗為嗣方准其承襲世職其以另戶異姓親屬之人過繼為嗣者不准承襲著八旗都統等一體遵照辦理

五年 諭嗣後凡世職人員有因犯賊之案革職並無餘罪者其子孫俱不准承襲著為令

十三年 諭會典內載皇后母家例俱應封公爵其不係嫡后及誕聖推恩所封侯承襲時請旨等語若是轉致參差不能盡一且無限制嗣後嫡后之父及誕聖推恩所封者俱著封為三等承恩公其不係嫡后者著封為一等承恩侯皆世襲罔替

二十五年奏准各項世職有呈改水師者列名報部隨帶出洋考驗如不宜外海隨時甄別撥回原營當差無營分者仍回原處將改用水師之名註銷免其處分如咨留保題暨得缺後查有不諳水性將該員咨回原處照蒙混具呈例議處

二十八年奏准滿漢京外文職各官兼襲世職除奉 特旨兼任外二品以上文職准其兼襲公侯伯爵三四品文職准其兼襲子爵男爵或先經兼襲嗣緣事降調查其所降之官非世爵所應兼者應否仍兼文職抑令專在世爵上行走之處奏明請 旨辦理五六品等官准其兼襲至輕車都尉七品等官及七品筆帖式准其兼襲至騎都尉八品等官及八品筆帖式准其兼襲至雲騎尉九品以下等官及九品筆帖式准其兼襲至恩騎尉如非所應兼者即專令在世職上行走員由堂官奏明不請可馬願就文官如原由考取生員承襲輕車都尉以下世職例准應試人員准其應試保道光十六年奉 旨後經中式文進士繙譯進士分別錄用者或改庶吉士散館授職者或因大考改補各項官職或拔貢 朝考錄用或已襲輕車都尉以下世職原無文職嗣奉 旨以何項文職用者均係 特旨錄用改補無論與世職是否相當均准兼任如先經中式進士引 見以各官錄用或先經奉 特旨賞給文職各官後經承襲輕車都尉以下世職亦無論品級均准兼任至進士歸班後呈請改教及教習期滿舉人大挑拔貢詢問就職就教者並廕生捐納議敘及各項候補候選人員承襲世職應否准兼文職之處均按品級分別覈辦至京外文職各官先經兼襲輕車都尉以下世職後緣事降調查其所降之官品級非世職所准兼者即令專在世職上行走所降之官停其銓選如續又開復原官仍准按班選補至滿員外郎等官補授世管佐領應否仍兼部院行走之處照見任文職補授佐領之例覈辦至宗室人員承襲王貝勒貝子各爵無論先有何項文職係何項出身亦無論品級均將文職職任開缺如承襲領國公輔國公不入八分領國公輔國公其未襲之前已有二品以上文職仍准兼任如係三品以下文職應即開缺毋庸兼任至領國輔國奉國奉恩各將軍如在承襲或授封之前已經得授文職奉有 特旨無論見襲之世職與見有之文職品級是否相當均准一體兼任至由四品宗室得授贊禮郎並宗學總副管等官後經承襲世職均將職任開缺令專在世職上行走如由文舉人繙譯舉人承襲奉國將軍奉恩將軍世職後准其一體會試如經中式文進士繙譯進士後奉 旨以何項官職

錄用及由庶吉士散館大考改補人員並鎮國將軍至奉恩將軍世職承襲後
奉有 諭旨賞給何項差使均係 特旨錄用之員即無論品級俱遵 旨准
其兼任如由見任文職官員已經兼襲鎮國將軍以下世職後緣事將職任降
調或其所降之職任與見有之世職品級尚應兼者仍准其兼任若已非應兼
之職任即專令在世職上行走宗室覺羅騎都尉及恩騎尉世職遇有缺出向
由該旗行知該衙門查照旗員之例辦理其鎮國將軍及奉恩將軍世職在未
經承襲之先已經得授武職職任者仍查照向例辦理

咸豐二年奏准未經就職之舉人恩拔副歲優貢生及廩增附文生員並報捐
之貢生監生如隨同官兵打仗陣亡奉 旨從優議卹者均照外委陣亡例議
給雲騎尉世職襲次完時給予恩騎尉世襲罔替如係奉 旨照例議卹舉人
恩拔副歲優貢生廩增附文生員其由優等附文生員數員均照官員傷亡例
議給雲騎尉世職襲次完時毋庸給予恩騎尉其由優等附文生員數員均照官員傷亡例
議給 如係自衛村堡並非官派打仗仍毋庸議卹

十一年十二月 諭吏部具題推封外戚以光盛典一本后族承恩世爵敬查
乾隆年間 諭旨俱改為三等承恩公道光十三年 諭旨嫡后之父及誕聖
推恩所封者俱封為三等承恩公其不係嫡后者封為一等承恩侯皆世襲罔
替 聖訓昭垂尤宜遵守惟朕兢兢在疚皆賴 母后皇太后 聖母皇太后
親裁大政 撫育藐躬 宵旰恩勤莫能殫述若拘泥成典於推封之例稍有
區別朕心實有未安迺 母后皇太后謙抑為懷援據典章力辭至再經我
聖母皇太后申明願復恩勤與誕育無異推恩典禮毋得參差朕思禮宜酌古
尤貴因時 懿旨諄諄權衡至當况朕以子臣而推恩外戚其間準情酌理與
道光年間所降 諭旨原非一致天下臣民當無不共諒朕心除 孝德顯皇
后母家業於道光三十年奉 旨照例追封承襲公爵外 母后皇太后 聖
母皇太后母家均著按照乾隆四十三年成案推封公爵以示尊崇之至意
同治二年 諭正白旗滿洲奏世爵病故無嗣應否仍准承襲開具家譜請旨
一摺據稱該旗三等子爵鄂素病故無嗣經該族查吏部當據覆稱應以那

彥成長子容安之子孫承襲惟容安前係獲咎之員鄂素所出子爵應否停襲
抑或照吏部覆文將容安子孫帶領引見等語鄂素之曾祖那彥成前於嘉慶
年間因親督兵勇攻復滑縣城池勦勞懋著奉 旨賞給三等子爵准予世襲
見在鄂素病故襲次未完所有此項三等子爵著仍准其承襲即由該旗將容
安之子孫揀選帶領引見

四年 諭前據降調通政使王拯奏參安徽巡撫喬松年請飭會同藩察看當
經諭令會同藩據實具奏嗣據覆奏喬松年門丁常杏洲捐納官階迹涉招搖
後還本姓名曰楊樹當降旨將楊樹即常杏洲斥革並諭令喬松年將其驅逐
出境不准在署逗遛茲據喬松年奏稱查明楊樹係原任江南提督楊捷之後
因應募為書手變姓名為常杏洲該撫會履令繕錄文件並未充當門丁後仍
用原名加捐官職並准部覆承襲楊捷輕車都尉世職今既經指參奉旨斥革
業將楊樹逐令回籍不准逗遛其所襲世職懇恩另揀合例人員承襲等語楊
樹既係楊捷之後應募備書亦非賤役何以輒更易姓名致招物議且據會國
藩查有招搖情事予以斥革實屬咎有應得惟原任提督楊捷於康熙年間曾
著勳績功臣後裔自應仍留世職以示矜全楊樹所捐之同知銜知縣著一併
斥革其所襲楊捷之輕車都尉世職著兵部查明如實係應行承襲該部覆准
有案即著無庸斥革

十年 諭鑲黃旗滿洲奏承襲恩騎尉世職請旨辦理一摺據稱該旗世襲恩
騎尉一缺見應揀選富綿擬正該員見任貴州知州可否仿照各省駐防調取
來京承襲等語富綿所出恩騎尉一缺即著該旗奏請承襲富綿著毋庸調取
嗣後外省官員遇有恩騎尉及雲騎尉世職應行承襲之處即照此次諭旨奏
請承襲俟該員因公來京或例應引見時再由該旗帶領引見以示體恤
又 諭正白旗滿洲奏已故大學士官文之子榮綵年未及歲應否進講承襲
請旨遵行一摺榮綵應襲官文所遺一等伯爵著於百日孝滿後由該旗即行
進講奏請承襲毋庸補行帶領引見
光緒七年吏部奏准文職官員陣亡有奉 特旨指明照何項官銜議卹應即

欽遵辦理如奉 旨交部議卹按照陣亡例議給世職俟襲次完時給予恩騎尉世襲罔替如奉 旨從優議卹仍照例議給應得世職襲次完時給予恩騎尉世襲罔替從優再照官階議給贈銜其有欽奉 特旨加等議卹者係四品以下未入流以上各官例應議給雲騎尉者則加等議給騎都尉加一雲騎尉正從一品各官例應議給騎都尉兼一雲騎尉者則加等議給三等輕車都尉襲次完時各給予恩騎尉世襲罔替如由臣下奏請加等議卹並非欽奉 特旨仍照定例分別議給世職再照從優例給予應得贈銜不得按世職以次遞加傷亡人員奉 旨交部議卹例應議給世職襲次完時毋庸給予恩騎尉世襲罔替如奉 旨從優議卹者仍按品級議給世職襲次完時毋庸給予恩騎尉世襲罔替從優再給予贈銜如陣亡從優議卹各員其已奉 特旨追贈或已賞給何項官銜者即毋庸再議加贈

又奏准各省奏請予卹人員凡聲明陣亡字樣並各省有地方職守人員守禦城池城陷遇害無論實缺委署均照陣亡例議卹其聲明巷戰身死或打仗被戕或在營人員奉差遇賊被戕或奉委率團助勦被戕者亦照陣亡例議給卹典如並非軍營差遣亦非奉委辦團助勦於別城被害雖明係被賊戕害慘殺或被焚赴水自殺等項查無戰仗情形均照殉難例議給卹典不得援照陣亡辦理

十一年吏部奏准滿漢官員軍功所立之爵原立官係陣亡者除奉 特旨賞給本爵世襲罔替外其按次數承襲者俟襲次完時給予恩騎尉世襲罔替其非陣亡所立之爵毋庸議給恩騎尉若因軍功或傷亡減等 特賞恩騎尉者則襲一次

又奏准世襲各官亡故所遺之缺與其親生子孫承襲若無親生子孫有應繼之親姪過繼為嗣者准其承襲如無可繼之親姪方與其親弟兄承襲如無親姪過繼嗣者十七年諭旨准與親如接襲官身故即與接襲官之子孫承襲若接襲官並無親生子孫仍准其親弟兄承襲如均無其人亦無原立官本支之人可繼可襲准其擇族中之姪男姪孫為嗣承襲若無則將 誥敕繳銷如原

立官本支尚有應襲之人雖與出缺之接襲官行輩不符亦准承襲其另戶異姓之子過繼為嗣不准承襲

又奏准世爵之姓名及承襲之子孫均彙書於 皇冊歲終合計一歲承襲之爵應行填寫由吏部會同宗人府同日奏 聞行文內閣並內務府轉行總管太監處謹將 皇冊領出送呈 保和殿吏部滿右侍郎帶領司員會同內閣學士帶領繕寫清字中書將八旗外藩蒙古漢世爵襲替爵秩會同宗人府將王公覺羅二冊一例朱墨分書增註存者朱書歿者墨書告休黜革廢員一併朱書

又奏准八旗世職 皇冊每屆十年其中有襲次已完及篇幅漸滿者應行奏明修輯一次

又奏准騎都尉輕車都尉及公侯伯子男世職應襲之人係六品以上見任文職請兼襲者令該督撫將該世職宗圖冊結咨送由兵部帶領引 見或照例承襲或以原官兼襲恭候 欽定其七品以下文職微員呈請兼襲雲騎尉世職者亦照例將宗圖冊結咨送查覈兵部查係合例應襲之人應令請咨赴部引 見可否准其兼襲之處恭候 欽定其品級相沿者仍照例毋庸送部

又奏准候選文職各官及議敘保舉職銜人員如因陣亡議卹均照實任官各按品級議給世職其品級相沿者仍照例毋庸送部

又奏准革職人員陣亡奉 旨照例議卹者議給恩騎尉一次從優議卹者議給恩騎尉世襲罔替如奉 旨開復原官者仍照原官數議給其品級相沿者仍照例毋庸送部

又奏准文職陣亡傷亡人員例應給予世職者由兵部查明該世職應襲子嗣題請承襲後知照吏部造具夾片移送內閣撰給襲職 敕書頒發

又奏准各省漢世職人員出缺該督撫將出缺緣由並世爵 誥敕送部由吏部查明承襲次數並應行銷減之處覈定後咨送兵部題請承襲奉 旨後吏部將襲職 誥敕揭送內閣添寫用 寶給發

又奏准各省世職人員於缺出時恭繳 誥敕應令該督撫黏貼印花委員敬謹解送吏部查覈辦理如 誥敕內語句並所用 御寶之處有磨損者除原

繳 誥敕移送內閣換給外將襲職之員咨送兵部議處如解送之員不慎以致磨損者亦照例議處

又奏准各省漢世職人員應領襲職 誥敕該督撫於接到部文之日起限六箇月出具印領赴部請領交該世職敬謹收藏以昭慎重如逾限不領即發交駐京提塘承領解送並查取承辦遲延職名送部議處

十三年奏准承襲世職不必拘以年限其請襲之員責成地方官認真查察如確係應襲之人取具族鄰甘結詳細支派宗圖及故員出身履歷加具印結送部查覈倘有不實除襲案撤銷假冒之人從嚴懲辦外應將出結不實之地方官查取職名議處

三十一年議准各項滿漢世職奏准承襲後無論已否赴部帶引均應入陸軍學堂肄習其學科仿照侍衛及親軍等營咨送學堂章程辦理三年期滿擇其列入優等堪膺宿衛之選者咨送考驗倘學課精進能與陸軍學堂同班畢業即照學員授職章程另行辦理凡未入學堂者雖已襲職祇以減半給俸不准補官以示區別如係世職佐領應於出缺時由本旗揀員暫署仍將應襲之員送學堂肄習年滿回旗

三十二年兵部奏定請襲世職畫一章程 又奏准世爵世職犯罪條例略稱嗣後滿漢世爵世職及世管佐領等官凡犯罪革職有餘罪者均不准其子孫承襲並不准援引並非枉法婪贓侵盜錢糧舊例希圖蒙混請襲至犯賊革職之案雖無餘罪亦不准其子孫請襲以重名器

又咨各省世職作為文生應試見在科舉已停願以何項改請迅速報部核辦宣統元年湖廣總督陳夔龍奏湖北左路巡防隊管帶虎雲湘前因嗜好太深諸事廢弛奏請撤銷世職不准再赴各處軍營投效查該員係陣亡總兵虎坤元之子家無次丁遽將襲職停止似不足以慰忠靈見察該員深知愧奮尙堪造就懇准仍襲騎都尉兼一雲騎尉世職並銷去不准投效字樣以全勳裔得 旨虎雲湘是否戒斷仍著查明具奏

臣謹案 國朝崇尚武功錫封世襲至為優渥其臨陣衝鋒尙有賜巴圖魯勇號者巴圖魯乃清語猶漢文稱勇士諺云好漢也

魯勇號者巴圖魯乃清語猶漢文稱勇士諺云好漢也 元史稱汝都拔突魯勇號者巴圖魯乃清語猶漢文稱勇士諺云好漢也

始膺賜號屠爾漢 太祖養以為子居五大臣之列 賜號達爾漢 不言巴圖魯省文也 準塔 以攻陷大同賜薩木哈圖以小卒立時賜號有奪有復也 褚庫 以攻陷大同賜薩木哈圖以小卒立

大功賜特木德以膂力絕人賜赫爾巴爾巴圖魯武達禪 以攻 城先登賜勞薩 均於崇德六年賜速順治康熙時都爾瑪 珠習禮 均於崇德六年賜速順治康熙時都爾瑪

占巴圖魯 均於崇德六年賜速順治康熙時都爾瑪 蘇祿邁巴圖魯 均於崇德六年賜速順治康熙時都爾瑪

拒王師即先會賜號其人不足道矣雍乾嘉道咸五朝十四人海蘭察 塔什巴圖魯 均於崇德六年賜速順治康熙時都爾瑪

勒登保封威遠侯和隆武巴圖魯德楞泰封公繼勇巴圖魯楊芳官提督
 封果勇誠勇巴圖魯王錫朋官總兵守定海銳勇巴圖魯塔齊布官提督
 哈屯巴圖魯李續賓官布政使三河趙景賢官提督額爾德木
 巴圖魯粵稽天命迄咸豐二百餘年賜號僅三十三人而同治一朝就吳
 中平寇記共百淮軍平捻記六十中樞備覽七十所載都計二百四十人
 其未見載籍者不知凡幾如平粵平浙諸書不載則號中樞備覽雖值
 多事之秋宜廣酬庸之典然聲名卓著者實屈指可數盱衡今昔頗不相
 侔昔皆滿人嘉道開始及漢人今則滿員惟英翰者貴二人餘均漢籍昔
 屬武臣咸豐時閒有文臣今則文員至十二人巡撫英翰侍講劉秉璋
 等府萬國順吳乘權知州余恩包賜號者昔多賜諡今祇程學啟
 等國廷部增翰同知劉登瀛鮑灼賜號者昔多賜諡今祇程學啟等
 數人至降賊周有才洋人畢乃爾亦均賜號更為前所未有又有換給勇
 號者如周盛波先號卓勇後換法福齡阿潘鼎新先號敢勇後換瑚松額
 李長樂先號尙勇後換博奇等多不勝紀殆號分等級猶錫爵之晉封歟
 而前此未聞也光緒時之賜號更不可悉數捐例開而官盡冗員勇號濫
 而人咸蔑視有識者於斯覘世運焉 國初於巴圖魯外尙有巴什克魯
 克素墨爾根蝦諸賜號若范文程文 希福 文 達亥 文 德爾你 文
 索尼文 均賜號巴什克魯 文 費揚古之曾祖掄布 太祖賜號魯
 克素定西將軍李國翰賜號墨爾根蝦此後來所罕見者勇號雖非
 世襲因同為軍功所賞附記世職之後談掌故者可以附考云

一第... 冊... 17 反三下

皇朝續文獻通考卷一百三十一

職官考十八

總督巡撫

臣謹案總督二字始見漢書西域傳曰明嘉靖始設總督大臣一員控制薊遼保定等處地方周州牧州伯方伯漢州牧晉都督諸州軍事唐大總管大都督節度使經略使也宋亦稱節度使元復稱總管總漕之名始於明太祖之命吳楨總河之名始於明成祖之用陳瑄至巡撫二字始見晉書劉琨傳曰唐狄仁傑為河南巡撫大使宋真宗令巡撫使傳諭張詠皆未定為巡撫官也明永樂遣雷瑱巡撫廣西為巡撫所自防各省置巡撫乃在宣德時我朝督撫都因明制沿革具詳前考光緒開新設總督一省山東巡撫四省除東三省新疆均另立一門不重錄外謹就乾隆五十年後著於篇

乾隆五十八年 諭浙江鹽務向係巡撫兼管遇有出納之事無人稽察巡撫得以任意動支易滋流弊嗣後應將杭州織造改為鹽政兼管織造事務其鹽道本無分巡地方之責著改為運司巡撫既不兼管鹽務則鹽政運使於錢糧出入如有侵挪等弊該撫即可隨時糾察據實劾參該省織造見改鹽政所有南北三關稅務難以兼顧著歸巡撫管理呼應較靈

嘉慶七年 諭據砥柱奏署直隸總督熊枚請將御史費錫章隨往在署幫辦事務殊屬冒昧請嗣後嚴飭在京大臣奉命署理督撫者不得援以為例等語所奏甚是御史係屬言官本非大臣可以隨帶之員前熊枚面奏懇將費錫章隨往朕即覺其所奏未協因伊係署任暫時姑允所請嗣熊枚到任後旋據奏稱先令費錫章回京供職業經批諭該署督奏請帶往原屬冒昧並令費錫章即行回京今砥柱適有此奏與朕批諭正相符合國家設官內外各有體制督撫身任封疆自司道以下皆係幫同辦事之人至署中一切案牘自有幕友整理若由部院簡放督撫者皆得各帶所屬司員前往辦事恐司員等揣知該堂官堪膺外擢豫為趨奉一經簡放督撫即可帶往辦事補用道府易啟屬官營

求之弊亦不可不防其漸嗣後在京部院大臣除有兵差審案等事仍准隨帶司員外其餘放督撫及署理督撫者不但不准請帶御史即所屬官員亦均不准奏請隨帶如有違例陳請者即當交部議處以肅政體而杜弊端

八年 諭安徽省向設有壽春鎮總兵一員歸江南提督節制因思提督駐節松江距該省較遠一切控制稽查極長莫及自應量為變通或將該省巡撫加提督銜節制營伍或另有更置之處著交兵部將安徽省營制通行查覈如何於地方有益詳悉議奏嗣議定安徽巡撫兼提督銜節制安徽省營伍十一年 諭各省巡撫中兼提督銜者有節制各鎮統轄圍鎮營員之責前會准令戴用花翎以資表率見在山東巡撫長齡河南巡撫馬慧裕俱先經賞戴花翎其江西巡撫張師誠安徽巡撫初彭齡山西巡撫成甯均准其戴用花翎嗣後此五省巡撫簡任時即准其照例戴用如調任他省有旨賞戴亦准其戴用

又 諭戴均元自上年派往工次與鐵保徐端籌議宣防俱能悉心妥辦且駐工將近一載見在修補高堰各工及一切疏濬事宜正資經理從前南河原設有正副總河督二員後經裁撤見當河工喫緊之時自可仍復舊制戴均元著授為江南河道總督徐端授為副總河惟當努力協心集思廣益方為不負委任所有應支廉俸及衙署印信有無應行酌辦之處著各該部查照舊例奏聞辦理

十二年 諭朕恭閱 皇考高宗純皇帝聖訓內載乾隆十四年 聖諭直隸河道事務近以總督兼理不過於伏秋汛至之時往來率屬防護工程已穩所有直隸河道總督不必設為專缺即於總督關防敕書內添入兼理河道字樣等因是永定河道事本總督兼管止於大汛時往來稽察近年總督每遇伏秋汛至之時常駐工次動輒累月地方應辦事件均由郵封寄達屬員稟商公務亦須赴工謁見畿輔重地總督職司統轄事務殷繁驛遞往還未免遲滯嗣後直隸總督於永定河大汛時止須酌量往勘毋庸久駐工次轉難兼顧其河工事宜責成該道妥為辦理申報該督具奏庶於地方政務不致積壓

十四年 諭嗣後凡遇以二品頂戴為總督者均著兼侍郎銜俟加恩給與頭品頂戴吏部再行奏請兼兵部尚書銜著為令

十五年 諭徐端補授江南河道總督毋庸另設副總河

道光元年浙江裁鹽政一人歸巡撫兼理

八年 諭朕恭閱 皇考仁宗睿皇帝實錄內載嘉慶七年 聖諭嗣後簡放督撫及署理督撫者所屬官員均不准奏請隨帶仰見我 皇考整飭官方杜絕貪緣之至意必當恪遵 聖訓永遠奉行因思上年蔣攸銜簡放兩江總督奏請隨帶刑部司員王端徵前往江省差委候半年後遇有相當知府缺出酌量奏請補用彼時雖准所請究與 皇考前降 諭旨不符且人才隨地皆堪任用豈必需隨帶之員方足以資治理王端徵著即撤任回京仍在原衙門行走嗣後在京部院大臣簡放督撫及署理督撫者俱著遵照舊章不准奏帶所屬官員以符定制

十年 諭前因兩江總督兼轄江西相距遙遠恐有鞭長莫及之勢降旨令大學士九卿會議具奏茲據托津等奏不歸總督兼轄並無格礙曹振鏞等奏請將兼轄之處仍循其舊松筠並於會議摺外另摺具奏朕詳加披閱所議均屬明晰惟江西地方武備尤為緊要曹振鏞等查明兩江總督兼轄三省兵額幾及七萬巡撫專任江西合撫鎮標營兵額僅止一萬二千數百名除留防省城及各府州縣倉庫各標營防汛外兩鎮可調官兵不過數千名倘遇應行水陸分道並進實慮兵力不敷總督若不兼轄該巡撫必須一面具奏一面咨調鄰省官兵臨事耽延時日所關甚鉅兩江總督兼轄原為控制以期聯絡聲勢徵調官兵呼應較靈所有江西一省著仍循其舊統歸兩江總督兼轄毋庸另議更改

十一年以兩淮鹽政歸併兩江總督管理

二十七年 諭兩江總督向來有兼轄河務之責自道光二十二年起因他務未能兼顧嗣後仍著該督兼管以符舊制

咸豐八年 諭裁南河道總督

十年 諭前因恭親王奕訢等奏請將長蘆鹽政一缺裁撤歸直隸總督兼管等語當交戶部議奏茲據奏稱長蘆鹽務改直隸總督統轄可期全綱整飭等語長蘆鹽政一缺著即裁撤所有督辦運課事宜統歸直隸總督管理即著恆福會同崇厚將正雜已收未收之款逐細盤查交代清楚其餘未盡事宜著該督詳細妥議具奏嗣後長蘆鹽務是其專責著即督飭鹽運使認真經理於應支正雜各款及各衙門帑利官租等項銀兩實力催徵完解務期年清年款不得稍有帶欠其原設鹽政衙署及養廉銀兩並著改歸新設辦理三口通商大臣以資辦公天津關稅並著該大臣兼管分晰造報

同治二年 諭前因御史劉其年奏裁減河工經費並請將河東河道總督一缺裁去降旨交張之萬詳細妥議具奏茲據奏稱河東河道總督一缺兼轄兩省黃運河工關係非輕未敢率議裁撤俟詳加體察再行奏請惟南岸所屬四廳北岸所屬三廳河道均已乾涸各廳員一無所事均可裁撤所有山東所屬之曹河曹單二廳著山東巡撫酌量辦理其河南所屬之南儀儀儀儀商虞曹考五廳著照該撫所請即行裁撤並著該部按照河南裁缺成案查議具奏又河督喬松年奏略稱河南山東河道總督一缺從前事體煩重因黃河經由河南山東兩省所轄黃河隄工共十四廳而又有運河六廳且全漕數百萬石種船絡繹北上人夫衆多宵小易於滲洩濟甯為山東門戶亦須大員彈壓是以設總河駐濟甯專治兩省黃河又治運河兼催漕運事固煩劇非巡撫能兼迨咸豐初年河決銅瓦廂之後河南黃河工裁去五廳山東黃河工全行裁汰是黃河工惟有河南見在之七廳其運河工惟以捕河所屬自戴廟至張秋鎮一段為最要因彼時河臣防河駐於豫省捕河運道遂改歸山東撫臣辦理併為成案是運河之事亦大減於昔年矣河運之米不過十萬石親從前祇三十分之一船小而人亦無多無復有匪徒藏匿則彈壓亦不須大員矣是以河臣常駐開封誠以黃河工為重也然黃河即在開封城外距城祇二十餘里河南撫臣極可兼顧且撫臣本有兼理河務之責若將河南河工交河南撫臣兼辦山東河工交山東撫臣兼辦於事理極為允協臣初履任時即思維及此時因

東省方有治河之議果其興工則事關兩省誠須有大員督辦是以未敢請兼
今既未舉大工莫如裁汰以期省費省事同治元年御史劉其年有請裁總河
之奏二年親王僧格林沁亦有此奏奉 旨交議經前河南撫臣張之萬以詳
加體察再行覆奏 旨之萬之意亦祇因山東河勢未定撫臣或不能兼顧耳
今又閱數年目前東省臨黃皆係民堰已無官工並運河皆可歸巡撫兼管豫
省黃河距省極近亦可由巡撫兼管山東撫臣丁寶楨署撫臣文彬皆在山東
多年於河工極熟河南撫臣錢鼎銘講求河務利弊已及三年與 臣同心併力
克奏安瀾以之兼辦運河黃河皆綽有餘裕斷不至於貽誤縱慮將來山東仍
有黃河工程或非巡撫所能兼管顧其事尚遠目前總可暫裁但關防不必銷
毀封存藩庫如果數十年後情形又復不同仍設總河亦甚易也 臣去年曾有
添設泉河通判之請今乃請裁總河兩事似為不類因泉河分隸十七州縣散
而無紀必須有專員以責其成是以增設通判黃河運河本分兩省公事少於
昔年改由兩省撫臣兼辦洵為簡易是以擬請裁汰總河皆係酌度事宜不敢
逞其臆見

五年廣東巡撫郭嵩燾奏為 國家設官督撫同城急宜酌量變通事竊查明
永樂初潯桂柳三府蠻亂遣給事中雷瑱巡撫廣西為巡撫之名所自始景泰
三年潯梧搖亂廷議以兩廣宜協濟應援乃設總督是總督巡撫二者皆肇端
於兩粵終明之世以十三布政使為定員而總督巡撫或分或併或設或罷大
率與兵事相始終成化以後建置日繁如京東北一路有前遼總督保定總督
宣大總督又有順天巡撫永平巡撫保定巡撫遼東巡撫宣府巡撫大同巡撫
天津巡撫密雲巡撫開府相望然考其時督撫駐紮地方從無同城者保定添
設總督而保定巡撫別駐真定宣大分設巡撫而宣大總督別駐陽和至兩廣
督撫沿革其初分設巡撫而後改設總督天順二年遣右僉都御史葉盛巡撫
兩廣則又稍易其名成化元年又以總督兼巡撫嘉靖中添設廣東巡撫總督
祇兼巡撫廣西由梧州移駐肇慶隆慶三年又添設廣西巡撫總督改兼巡撫
廣東是兩廣總督巡撫明時亦未嘗兼設 國朝以來總督巡撫著為定制中

聞小有裁併而親明世紛更變易規模固遠勝矣其督撫同城者三日福
建日湖廣日雲南本不同城而後移駐會城遂成定例者一日兩廣推原立法
之始地方吏治歸各省巡撫經理節制於總督而總督專主兵是以河南山
東山西專設巡撫即不復設提督為不欲使武臣主兵而巡撫又不得統轄提
督故為巡撫兼銜直隸四川甘肅專設總督仍兼巡撫銜大致以兵事歸總督
以民事歸巡撫此 國家定制也而巡撫例歸總督節制督撫同城巡撫無敢
自尊者於是一切大政悉聽總督主持又各開幕府行文書不能如六部尚書
侍郎同治一事也而參差枘阻之意常多道光之季兩廣蘊孽已深叛匪一起
亂民從之如歸蔓延徧及東南而皖豫之捻匪陝甘之回匪乘之以逞為亂者
皆民也則各省撫臣之失職多矣額設營兵多或六七萬人少亦萬餘人竟不
得一兵之用鎮將參游循資超擢任為將帥者更無一人所用以轉戰者皆勇
也而兵為虛設積久又益加累糜糜錢糧千餘萬相與處之怡然則各省督臣
之失職尤甚矣而自軍興以來江忠源胡林翼羅澤南李續賓及今劉長佑曾
國荃劉坤一劉峽昭等皆以司道主兵或積功至督撫兵權日分總督僅守虛
名而例定分年查閱營伍考覈將弁均係總督專政出巡之日為多兩省情形
亦資周覽軍興數年此典竟廢同治元年兵部議奏御史陳廷經變通營制一
摺奉 旨江蘇浙江安徽江西陝西湖南廣西貴州等省各鎮協武職陸續調
補暫由巡撫理千總以下徑由巡撫咨報部所有校閱營伍考覈將弁並本
省籌辦防勦即專責成巡撫經理其總督兼轄省分軍政考覈徑由巡撫就近
署考會同具題至巡撫同城者仍照舊章辦理等因查一省千餘里之地能考
求其利病周知其情狀已難其人至於兼轄省分原不過奉行文書周旋應付
稍求整頓隔閡必多所以議歸 臣等擬請將兩省各鎮協武職陸續調
省之巡撫軍政民事一聽主裁與總督同城之巡撫軍政既不得與聞民事又
須受成總督一則虛列其銜一則兩操其柄是從前督撫同城名存而實去者
僅一巡撫自頃數年則督撫之名實兩乖而巡撫乃尤為失職 臣請析其得失
利病為我 皇上陳之傳曰天下之動貞乎一者也惟其一也故能齊百姓之

耳目而定屬吏之從違宋置監州而兵以弱明置巡按而政以嚴知道者借之然於政之所出猶未有分也督撫同城愛憎好惡之異情寬嚴緩急之異用同爲君子而意見各持同爲小人而講張倍出如舉一人也此譽之彼毀之則是非淆劫一人也此遠之彼近之則趨避易徒令司道以下茫然莫知適從其君子透進退以求兩無所忤其小人居閒以遂其私 國家定制錢糧及陸調缺員總之藩司刑案總之臬司督撫專任其成本不易有所設施而又水火交攻戈矛互進是 皇上設官以求治也而督撫同城乃萬無可言治今使一縣而置兩令一郡而置兩守必不能以安矣此理勢之固然者也 自道光二十七年通籍假歸過武昌目擊吏治之偷氣習之深心憂其將亂其後五年而亂作前後督撫殉難三人伏誅二人被劾四人賴胡林翼開立規模風氣爲之稍變雲南之亂則既成矣前督臣張亮基每言及撫臣徐之銘牽掣情形輒至慨歎而各直省吏治人心之敝閩粵爲尤甚細究其由來數十年瞻顧因循釀亂保姦實以督撫同城之故以言其事既如彼以言其效又如此歷來同城督撫互懷猜忌相爲敵讎獨至於公事一切雍容坐視求免於嫌怨承平日久循例守職亦庶幾可以寡過處多事之時承積疲之俗而多所牽掣苟安無事謂之和衷 朝廷獨焉賴之自古中材多而賢人少 皇上委任疆吏但使中材足以自守其閒一二賢者弛張以時自可相維於不敝督撫同城則賢者永不得有爲中材亦因以自廢此 臣所謂急宜變通者也近年雲南督撫皆浮寄境外一無憑藉 臣愚以爲雲貴總督一缺宜暫停罷責成巡撫勦賊以一事權其閩浙兩廣總督則或援照明制兼併一員福建情形 臣不能知其詳廣東督撫兩標及兩署書吏分別裁併營政吏治關稅鹽務四者未嘗不可整飭權分則情多乖責專則事易集不獨於地方補益甚鉅其有裨於 國家之經費亦多伏見明臣韓雍在兩廣總督任內疏言兩廣地大事殷請裁總督東西各設巡撫當時立見施行韓雍請分其責於兩省今 臣請重其任於專城義取因時事亦同按 臣撫粵兩年於地方利弊源流知之頗悉以切身之閱歷求及時之變通用敢推明得失利病之原上備 聖明採擇

臣謹案督撫同城事事掣肘兩賢相得豈易言哉中材互相推諉亦互相水火不肖互相攻訐亦互相掩覆吏治民生益壞爛不可救藥廣東巡撫於光緒二十四年裁撤多十月復舊今竟罷之昔者郭嵩燾之言驗矣薛福成敘督撫同城之損 國初總督不常設值其時其地用兵者設之軍事既平遂不復罷俾與巡撫互相稽察所以示維制防恣橫也然一城之中主大政者二人志不齊權不一其勢不得不出於爭若督撫二人皆不肖則互相容隱以便私圖仍難收牽制之益如乾隆閒伍拉納浦霖之事可睹矣若一賢一不肖則以小人恭君子力常有餘以君子抗小人勢常不足即久而是非自明賞罰不爽而國計民生之受病已深如康熙閒噶禮張伯行之事可睹矣又有君子與小人共事不免稍事瞻徇者如乾隆閒孫嘉淦許容之事可睹矣若督撫皆賢則本無所用其牽制然或意見不同性情不同因而不能相安者雖賢者不免曾文正公與沈文肅公葆楨本不同城且有推薦之誼尚難始終浹洽其他可知矣郭侍郎嵩燾於去廣東巡撫任時疏陳督撫同城之弊謂宜酌量變通言甚切至茲姑就見聞所逮者述之吳文節公文裕總督湖廣時粵賊勢方張爲巡撫崇綸所齟齬迫令督師出省而隱掣其肘軍械糧餉皆缺文節由此死殺武昌旋陷厥後惟胡文忠公與總督文恭公官文相處最善爲天下所稱誦文忠既沒文恭劾巡撫嚴樹森去之威毅伯曾公國荃爲巡撫又劾去文恭曾公亦不安其位以去迨伯相合肥李公總督湖廣爲巡撫者本其屬吏諸事拱手受成李尙書瀚章繼之一循舊轍又在位日久自此巡撫幾以閒散自居而督撫無齟齬政權無紛撓矣郭侍郎之巡撫廣東也適故相瑞麟以將軍選總督頗貲貨賣官治軍尤畏憲侍郎心弗善也上疏微糾其失以無與援罷去蔣果敏公益澧爲巡撫英銳喜任事瑞麟心憚之嚴劾蔣公去職因愈專橫無顧忌其後英翰爲總督以允闈姓繳捐事爲巡撫張兆棟所劾罷近張尙書之洞總督兩廣與歷任巡撫皆不相能朝廷至今兼攝巡撫以專其任則督撫同設之無益亦可概見矣咸豐同

治開徐之銘巡撫雲南爲叛回所脅制復倚回寇以自固殺升任陝西巡撫鄧爾恆於境上張尙書亮基爲總督至引疾求退以速出滇境爲幸潘忠毅公鐸爲總督方圖以回攻回之銘洩其謀忠毅遂遇害光緒初年總督劉嶽昭與巡撫岑襄勤公毓英不相能輿論皆不直總督寢至罷黜潘鼎新巡撫雲南盛氣陵總督劉武慎公長佑頗蔑視之劉公鬱鬱上疏求去朝廷罷鼎新慰留劉公此皆督撫不能相容之明證也福建督撫之外又有將軍及船政大臣政令歧出尤不能畫一自巡撫移臺灣復裁船政大臣而總督兼理船政及巡撫事未始無裨於政體余謂湖北廣東雲南三行省皆可廢巡撫而以總督兼理如福建之例不特此也各省之道府同城者皆可廢知府而以道員兼理庶幾紛爭之毀可弭民生吏治受益多矣竊考宋代節度安撫稱使皆兼知一府故雖使相亦稱大府此誠意美法良非近制所及者也夫尊如督撫尙可兼知一府然則以總督兼巡撫以道員兼知府事尙何不可之有

九年 諭前據總理衙門奏遵議尙書毛昶熙請撤三口通商大臣條陳當諭令李鴻章妥籌應辦各事宜茲據該督酌議章程具奏天津地方緊要自宜因時變通三口通商大臣一缺著卽行裁撤所有應辦各事宜均著歸直隸總督督飭該轄道員經理卽由禮部頒給欽差大臣關防用昭信守並著該督於每年海口春融開凍後移紮天津冬令封河再回省城倘遇有緊要事件必須回省料理亦准其酌度情形暫行回省專竣仍赴津郡以資兼顧其山東登萊青道所管東海關奉天奉錦道所管牛莊關均歸該督統轄惟中外交涉事務較繁自應添設道員管理著照所請准其另設津海關道一缺專管中外交涉各事件及新鈔兩關稅務並責成該道督飭府縣悉心妥辦仍隨時稟請該督酌覈辦理嗣後津海關道缺出著由直隸總督揀員請補其餘未盡事宜著李鴻章迅速妥議具奏

光緒二十四年六月 諭裁河東河道總督所有舊管之山東運河著歸山東巡撫就近兼管以專責成

又七月 諭裁雲南廣東湖北三省總督同城之巡撫

又十月 諭前因湖北廣東雲南三省巡撫並河道總督應否復設先後諭令軍機大臣吏部會同妥議具奏茲據詳加擬議會奏請旨辦理各摺片各省總督巡撫國初以來屢經裁移改設本已斟酌盡善見在應行整頓諸大端不在裁減職官而在綜核名實總督專重兵制巡撫專重吏治誠能各盡其職自可相得益彰倘使坐擁封圻辜恩溺職同城則各執意見專任則益形叢脞徒事更張無裨實際甚無謂也所有湖北廣東雲南三省巡撫仍著悉仍舊制勿庸裁併湖北巡撫著會銖補授廣東巡撫著鹿傳霖補授雲南巡撫著丁振鐸補授至河道總督一缺專司防汛修守事宜亦非河南巡撫所能兼顧並著照舊設立任道鎔著仍回河道總督之任該督撫等務當體念時艱實事求是毋負朝廷慎重設官之意又片奏復設雲南糧道各缺等語督撫既未經裁併其餘各員自應一仍其舊雲南糧儲道並南關同知二缺均著毋庸裁撤嗣後除各局所冗員仍應認真裁汰外其實缺地方各員不必輕議裁撤以重職守

二十八年 諭政務處會同吏部兵部奏遵議河東河道總督錫良奏陳河工變通事宜一摺黃河改道以來直隸山東兩省修守工程久歸督撫管理錫良原奏所稱漕米改折運河無事河臣僅司隄岸撫臣足可兼顧等語該河督身親目擊自屬確實可憑所有河東河道總督一缺著卽行裁撤一切事宜改歸河南巡撫兼辦另片奏宜裁宜留及分別緩急各節均著照所請行仍責成錫良將裁撤各事宜一手經理俟諸事辦有頭緒再行奏明請旨至裁汰各員弁及應裁兵丁著吏部兵部隨時查核辦理至見既裁撤總督請將沂曹濟道移駐濟甯分管營運事務並河防城守營運河道屬各河營弁兵應否裁留及此後運河修濬事宜著山東巡撫察酌地方情形詳議具奏

三十年林紹年奏裁雲南巡撫從之併裁湖北巡撫其廣東巡撫俟廣西軍務平議裁

又政務處議覆擬將漕運總督裁撤改爲江淮巡撫仍駐清江以江甯布政使及所轄之四府二州全歸管理與江蘇巡撫分治仍歸兩江總督兼轄改漕標

副將爲撫標參將以淮揚海道兼按察使銜所有江甯六屬刑名由該道勸詳
巡撫奏報奉 諭政務處奏議覆裁改漕運總督一摺江北地方遼闊宜有重
鎮順治年間改設漕運總督原兼管巡撫事見在河運全停著即改爲江淮巡
撫以符名實而資治理即以原駐地方爲行省江甯布政使所屬之江淮揚徐
四府暨通海兩直隸州全歸管理仍著兩江總督兼轄各專責成
是年調恩壽爲江淮巡撫以陸元鼎爲江蘇巡撫

臣謹案時修撰張謇以徐州宜建行省條陳江督端方代奏御史周樹模
復以裁撤漕督爲請 詔下廷議如所請行

三十一年左都御史陸潤庠等奏江淮江蘇若合爲一省則名實不符昔有控
扼兩省設爲重鎮者如 國初偏沅巡撫之例至一省兩撫向所未有見在湖
北雲南本有之巡撫甫經議裁而江南一省忽然添缺未免政令紛歧蘇淮若
分兩省則要政首在定界自古經畫疆里必因山川扼塞以資控制溯自蘇皖
分省已非復舊時形勝而蘇省跨江尚有徐淮得力據上游之勢今畫疆而治
江蘇僅存四府一州地勢平行形勝全失幾不能自成一省較唐之江南道統
州四十二宋之江南路統州十四亦復懸殊惟南宋浙西一路僅有三府四州
此偏安苟且之圖非 盛朝所宜取法至巡撫藩司專管地方之事例駐省城
今設省清江舍臨江扼要之名城就濱河一隅之小邑似亦未甚得勢也 國
朝經制分省三等蓋因戶口之多寡亦視幅員之廣狹各行省中惟山西貴州
兩小省幅員最狹今蘇淮分省江淮地勢較寬僅及中省江蘇則廣輪不足五
百里較山西貴州殆尤褊小勢不能再稱大省若改爲小省則一切經制俱須
更改而籌餉攤款尤多窒礙且漕運總督所委漕務人員皆係地方官吏又有
屯政軍政多與地方相附麗定例兼管巡撫事者所以重其事權初不責以吏
治况淮徐之去江甯遠者僅數百里不爲鞭長莫及而三府二州之地特設兩
道一鎮固已控扼要區布置周密其地方要政向由藩司稟承總督以爲治理
歷久相沿未聞有所叢脞今之改設似出無名若江甯辦事悉仍舊貫則江淮
巡撫孤懸虛寄徒多文移稟報之煩無裨吏事軍政之要竊謂江蘇跨江立省

定制已久疆宇安官吏無闕 朝廷本無分省之意江督亦無廢事之虞願
以裁漕督而添巡撫因設巡撫而議添行省辦法既疑乎倒置定章必歸於遂
就伏查同治三年御史陳廷經條陳變通疆輿奉 旨交前兩江總督曾國藩
酌度形勢妥籌具奏會國藩援據古今則切上議有謂疆吏苟賢則雖跨江淮
而無損於軍事吏事之興廢苟不賢則雖畫疆分治而無補於軍事吏事之
廢此等大政似不必輕改成憲等語其時江南甫定政多興革而特詳慎於此
者仰見 廊廟之慮懷老臣之深識前事不遠可備參稽見在設官分省雖由
政務處議准而辦理章程尙待部臣督臣議覆似事局未爲全定謹考政務處
奏定會議章程七條其第二條內開查內政之關係者如官制裁改新設行省
等類由各衙門請 旨會議或 特降諭旨舉行此次興革大政適相符合立
法期於必行更制亦求盡善可否按照新章恭請 飭下廷臣會議並沿江督
撫一體與議覆奏請 旨遵行俾見 朝廷有博採羣言之美無輕改成憲之
疑下政務處按照奏定章程會議具奏尋議覆江淮設立巡撫否行各衙門會
議咨送說帖主蘇淮不必分省另設大員者四十二件主專裁淮撫者三十二
件主蘇淮仍議分省暨復設漕督者共七件正在覈議開復准軍機處鈔交著
兩江總督周馥奏蘇淮分立行省詳陳利弊一摺查 國朝前議改設江淮巡撫
原因淮徐一帶民情強悍既裁漕督必須改設大員方昭周妥見據各衙門說
帖內謂改設巡撫諸多不便擬改設提督駐紮者居多周馥所奏亦以分設行
省不如改設提督駐紮爲合宜擬請即如所請改准揚鎮總兵爲江淮提督文
武並用節制徐州鎮及江北防練各營仍以淮揚海道兼按察使銜凡江北泉
賊重案應即時正法軍流以下人犯歸其審勘毋庸解蘇以免遲滯舊有漕標
官兵作爲提標以資鎮懾其餘未盡事宜應由兩江總督江蘇巡撫悉心酌議
分別奏咨辦理奉 諭政務處奏覆會議蘇淮分立行省於治理既多不便著
毋庸分設江淮巡撫即行裁撤所有淮揚鎮總兵著改爲江北提督以資鎮懾
臣謹案明置偏沅巡撫以撫苗半年駐沅州半年駐偏橋關爲黔楚之重
鎮 國朝改設湖南省移偏沅巡撫於長沙

又 諭見在江淮巡撫既裁江北地方緊要兩江總督責無旁貸刻當改革章伊始一切亟須布置該處伏莽素多人情浮動見無責任大員在彼彈壓著周馥即日前往督率該處文武將吏治海防河工捕務一切事宜分別籌畫辦理至見設提督究係武員該督每年應於何時前往巡察整飭之處著妥籌具奏又裁廣東巡撫以兩廣總督兼巡撫事宜

三十三年安徽巡撫馮煦奏設幕職各員略稱分設幕職佐理文牘分科治事就所知者自行徵辟不拘官階大小凡秘書一員助理秘書一員交涉科以下參事七員科之簡者一人兼兩科繁者設助理一員繕寫文牘稽核卷宗仿學部例為書記員量其材之高下事之繁簡以等別之又設一會議廳凡分六班七日一周甲見任司道及交涉以下各科總會辦各員乙交涉各科提調監督各員丙在籍各紳及列於學會商會者丁戊兩日與甲乙同己武職各員每會議自辰至午為率凡地方行政有應決議者則各衙門局所先開一事由複雜者用說帖單簡者用標目所議政策有當時決議者則立二簿記之一存撫署一存藩署以待實行有當時未決者記其往復辨難之故於簿中以再議再議不決則博訪通材旁稽舊案俾得折衷至第七日則舉六日所議者斟酌損益次第施行

臣 謹案直省督撫遵章各設幕職立會議廳紛紛奏報大同小異錄此以見一斑其餘可概矣

宣統元年 諭朝廷簡任疆臣畀以用人重寄近來辦理新政遇有奏調人員無不俯如所請惟念該督撫等果能於本省屬員認真考察何至一省之中無員可用必須借材他省方收臂指之資雖其中為事擇人者在所常有而引用私人者亦難保必無嗣後除邊遠省分於舉辦要政准其酌量調用外其餘省分所有差委事宜務須先儘本省人員擇能委用不准任意奏調致滋紛擾又陸軍部奏將各省督撫所兼之陸軍部尚書侍郎銜一併裁撤從之二年河南巡撫吳重熹奏改設河防公所派委大員管理略稱伏查前河臣許振紳奏改新章由南北各廳自設八廳公所經理歲修工款並另設河防局辦

石防險分派同通等員管理規定各項用款積弊為之一清嗣經前河臣任道鎔奏請將河防局歸併八廳公所到任後詳加稽核將必不可省之款撙節核定可減可裁之款切實刪除復將歷年積存及已銷未用之款悉數奏明發交銀行生息並請此後用款概從實報不准再有融銷以期款不虛糜工歸實際溯自上年十月初一日起所有河工用款悉照減定數目支發數月以來尚無窒礙惟查八廳公所為全工款項總匯之處責任甚重僅派同通一二員管理不足以昭慎重自應改派大員管理查開歸河北兩道均有河務專責應即派為總會辦由開歸道就近督率各員切實辦理遇有重要事件咨商河北道詳由臣核示飭遵該公所本係八廳河員自行設立其管理之員亦由各廳公請札派今既改派大員已非八廳公舉舊例應即改為河防公所以符名實

學政

臣 謹案舉士之制歷代不一宋諸路設監司一員提舉學校或置或罷元世祖設各道儒學提舉司正副二員明太祖使宋濂王禕為江南江西儒學提舉又以梅殷提督山東學校亦偶然之事迨正統元年始設各省提學本朝因之初制督學道帶按察司僉事銜惟順天江南浙江為提督學政周禮大司馬有治國之文為名所均用翰林餘省以部郎為之學政自明而後其職乃今之國子監與學政異稱提學道雍正四年一體稱為學院三年簡任體制極崇迨光緒三十二年改提學使遂為督撫屬官矣府教授始於宋州學政縣教諭訓導始於元 國朝大略相同自學堂興而教職盡廢茲遵會典例附列焉

乾隆五十八年奏准京官出差學政如遇陸京職仍照舊例請 旨如推陸外任無論何項員缺即將學政開缺

嘉慶二年改貴州平越府為平越直隸州裁府學教授設州學學正一人六年改四川蓬州為綏定府改州學學正為府學教授

七年 諭給事中陳昌齊條奏各款俱不可行據稱各省督撫並無稽查之人行止難免專擅請加學政以稽察之銜遇督撫遲延等弊隨時舉奏等語各省督撫如有貪劣實蹟及地方事件辦理不公學政有奏事之責原准其

據實奏聞候朕裁辦若竟以稽察督撫之事委之學政則學政之權豈不重於督撫乎國家設立學政原令其校士衡文若如該給事中所奏倘各省學政有稽察督撫之名因而於地方公事動輒干預遇有私意不合任情毀譽又豈不開挾制之漸設該學政有營私舞弊之事又令何人稽察乎况督撫俱係一二品大員至各省學政往往有由編檢主事等官簡放者品秩較小若以之稽察督撫亦非朝廷體制前明設立巡按最為有名無實該給事中奏請加銜豈非於督撫之外又設一巡按乎陳昌齊所奏迂謬原摺著擲還

八年奏准查各省府廳州縣共一千七百餘學以每大學前列十卷及小學不滿十名者儘數一體解送計算約共一萬餘卷擬以奉天順天山東山西河南陝甘六省作一次磨勘以江蘇安徽浙江江西福建湖北六省作一次磨勘以雲南貴州四川廣東廣西湖南六省作一次磨勘庶卷少則易於詳審其磨勘之員查磨勘鄉會試卷原係翰林科道之事凡學政係見在翰林及京堂部曹曾由翰林出身者交都察院派科甲出身之科道磨勘學政係見在科道及京堂之曾任科道與學政係六部司員者俱交翰林院派員磨勘以杜同官瞻徇之弊其由翰林改用科道者兩衙門俱應迴避則部派司員辦理所派之員均令迴避本省俟磨勘完竣三衙門各自具奏

十六年改貴州普安州學正為普安廳同知教諭
十七年議覆侍郎彭齡等奏湖南學政徐松考試勒索並發賣書籍漁利等情一案此案已革學政徐松考試出題割裂文義並違例濫取份生不派教官監場失察家人書役轎夫勒索喜錢散賣熟食搶拾箭枝並令優等生員出錢刊刻試卷各款或咎止降罰或贓非入已均屬輕罪其將書籍分派教官轉令童生購買除去工本銀兩外計得利銀四百七十六兩依律罪止杖一百流三千里惟該學政賣書漁利種種失察又復任意派令家人查號割裂出題以致士論沸騰實屬猥鄙不職應請 旨發往新疆效力贖罪再該侍郎等奏稱紅案陋規已奉 諭旨飭禁雖不敢公然勒索但學政家人書吏藉稱喜錢名色索要錢文亦恐日久弊生復踵故轍請即嚴行申禁有犯立懲以期永絕弊端

等語應令該撫嚴切申禁毋滋弊竇

道光二年 諭御史趙柄奏請慎嚴改教以重學校一招所奏甚是國家教化之興由於勸學各省教職得一品端學裕之員盡心化導於士習民風均有裨益近日各省甄別州縣凡才具平庸不諳吏治年力就衰各員率請改教此等衰庸之員即令司鐸安望其實心化導克稱厥職乎如該御史所奏或因誤公虧項避重就輕或因替人騰設法量移特借出身名目藉以見好市恩騰缺量移事無確據亦不可空言妄論而避重就輕市恩見好之處在所不免溯查乾隆五十一年欽奉 聖諭各省知縣已經得缺到任數月後不勝民牧者即以原品休致概不准復行改教等因欽此煌煌 聖訓永當遵守勿替嗣後各省督撫於才不勝任之知縣如未經得缺將該員品學尚堪秉鐸之處切實聲明仍酌量奏請改教其實缺人員履任在半年外者才不勝任即概予休致不得因其正途出身率請改教該督撫務各秉公甄別尤不得因有此旨將聞肯各員一味姑容轉致貽誤地方也將此通諭知之

又議准雲南元江鎮沅二直隸州學正雲州學正訓導他郎廳訓導甯洱縣教諭等六缺比照兩廣邊缺之例定為在外揀選

十二年裁陝西延安府學沔縣學府谷縣學訓導

咸豐二年改雲南甯洱縣復設教諭為普洱府復設訓導

同治九年改廣東陽江直隸州為直隸廳改州學正訓導為廳教諭訓導

光緒二年廣西置恩隆縣設訓導一人又置百色直隸廳設學正一人作為煙瘴調缺

又增設甘肅省學政一員

臣謹案甘肅歲科試本由陝西學政兼理新疆則用包封元年左宗棠奏

與陝西分闈鄉試故學政亦增設云

三年甘肅設甯靈廳教授一員

四年廣西設奉議州學正一員作為煙瘴調缺

六年改甘肅鎮西府訓導為廳訓導

又雲南裁馬龍州訓導移設安平廳爲復設訓導裁開化府復設訓導移設文山縣爲復設訓導裁廣南府復設訓導移設寶甯縣爲復設訓導裁江川縣訓導移設巧家廳爲訓導裁羅次縣訓導移設會澤縣爲訓導裁雲州復設訓導移設思茅廳爲復設訓導裁元謀縣訓導移設威遠廳爲訓導裁普洱府復設訓導改爲他郎廳復設訓導設甯洱縣學以普洱府學兼管裁嶺南縣訓導移設恩安縣爲訓導並將大關魯甸二廳學歸恩安縣學兼管設緬甯廳學以順甯縣學兼管設中甸廳學以麗江府學兼管設維西廳學以麗江縣學兼管裁南安州復設訓導移設龍陵廳爲復設訓導

八年甘肅甯夏府設教授一員

十三年廣東置防城縣移欽州訓導爲防城縣訓導

十七年陝西改甯羌州訓導爲留壩廳訓導

三十年議裁各府廳州縣衛學教諭訓導之復設者以御史夏敦復言不果

又直隸裁學正一員教諭四十四員訓導八十四員

三十一年吏部奏准教職逐漸停選略稱嗣後遇有復設教職缺出卽行停選

若遇經制教職缺出卽以本學復設教職移補仍照原銜升轉

又政務處奏准裁撤各省復設教職

又 諭前已有旨停止科舉及歲科考試飭令各省學政專司考校學堂事務

嗣後各該學政事宜著卽歸學務大臣考核毋庸直隸禮部以昭畫一

臣謹案直督袁世凱請立停科舉以廣學校報可

宣統二年四川總督趙爾巽奏准改瀘衛州九姓鄉訓導爲古宋縣訓導

皇朝續文獻通考卷一百三十三

職官考十九 各司

臣謹案政布使及理問倉庫大使皆始於明經歷都事照磨皆始於元

始見毛詩梁沈約齊昭王碑文謂之通稱非今之布政也按察使唐宋

已有均主巡察唐宗以轉運使為按察使遼聖宗命劉京等分路按察

刑獄此按察為刑官之始金章宗改提刑司為按察使司元世祖又改為

廉訪司今稱臬司為廉訪本此泉字始經歷照磨始於元知事始於金司

獄始於明都轉鹽運使元明皆稱運鹽使鹽道始於明唐權鹽使也運同

運副運判始於金提舉始於元大使始於明今敘各司均以所屬官分附

除布政按察運使詳前考外新設提學提法交涉三使俱誌其職掌至民

政度支旗務蒙務等司係奉天特設歸入東三省茲不贅云

布政司

宣統元年 諭度支部奏各省財政宜統歸藩司以資綜核而專責成一摺各

省財政頭緒紛繁自非統一事權不足以資整理嗣後各省出納款目除鹽糧

關各司道經管各項按月造冊送藩司或度支使查核外其餘關涉財政一切

局所著各該督撫體察情形予限一年次第裁撤統歸藩司或度支使經管所

有款項由司庫存儲分別支領即由各督撫飭藩司等將全省財政通盤籌畫

認真整頓仍飭度支部隨時考核分別勸懲以副綜核名實之至意

又度支部奏各省藩司請實行由部考核略稱憲政始基以清理財政為急務

又值用款浩繁之會倘未能隨時考核即無從消息盈虛等再四籌思各省

藩司非實行由部考核財政終無振起之望見在各省藩司雖未及遍改度支

使然財政萬緊藩司固責有專歸擬請照提學使等官直接由部各省凡關涉

財政稍為重大事件除詳報該管督撫外一面巡報部以資考核經此次申

明之後各省藩司均應切實遵行不得視同具文其辦理得力者由部奏請獎

勵倘仍前玩泄即由部據實奏參

又裁廣西布政司經歷

又陝西巡撫恩壽奏陝省財政統歸藩司擬照分科辦事之法編為六科曰總
務曰吏治曰田賦曰軍需曰釐稅曰糧務遴委科長科員專司其事定名為藩
署政務公所

二年浙江巡撫增韞奏請改設道庫大使專缺裁布政使理問

又裁撤雲南布政司濟用庫大使員缺

又浙江巡撫增韞奏浙省各司道試辦分科治事略稱藩司為統一財政機關

事較繁重分設六科曰總務曰田賦曰釐稅曰俸餉曰銷算曰主計原有經歷

照磨理問等官應行裁撤

又閩浙總督松壽奏閩省督糧道裁改勸業道倉庫銀米各款歸併藩司接收

交代

又江蘇巡撫程德全奏統一財政開辦度支公所略稱江蘇夙稱財賦之區丁

漕以外關涉財政局所除籌款所業於上年裁併裕蘇官銀錢局本隸藩司直

轄無庸更張此外向有蘇省釐局滬滬釐局善後局房捐局四局其歲出歲入

款項紛繁自應一律裁撤統歸藩司職掌即就藩署設立度支公所分設五科

曰總務曰田賦曰筭權曰典用曰主計五科以下分設十三課曰機要曰文書

曰庫藏曰庶務曰稽征曰勘數曰蘇釐曰滬釐曰稅捐曰經理曰支放曰稽核

曰編製分委科長科員並於筭權科加設總稽查二員督同經理

又署湖廣總督瑞澂奏略稱裁撤局所歸併藩司擬設度支公所區分六科曰

機要曰行政曰田賦曰稅捐曰俸餉曰會計屬機要科者五課屬行政科者三

課課設一長課員無定額科長科員以下各設書記員繕寫生

又貴州巡撫龐鴻書奏歸併黔省釐金善後兩局由藩司經管

又開缺河南巡撫吳重熹奏略稱先後奏請將糧鹽道缺並釐稅局籌款所

分別裁撤所有事務皆歸藩司經理惟該司政務日繁不得不籌設專所當在

署內建設財政公所舊設之專款所比較所交代局一併隸入分設三科科復

分課由該司訂定辦事細則

又安徽巡撫朱家寶奏略稱除鳳陽蕪湖兩關仍遵由皖北道皖南道監督土

膏牌照捐局由巡警道勸業道經收飭將經管各項造冊移司彙核此外各公所局處一律裁撤統歸藩司辦理其支發米釐兩差亦均改由藩司詳委擬定統一辦法設立財政公所

又山東巡撫孫寶琦奏裁併各局籌設財政公所略稱去年裁撤糧餉局歸併善後局墾務局改由勸業道管理其餘關涉財政尚仍舊貫者僅有河防籌款善後籌賑四局亟應遵限一律裁撤統歸藩司職掌就署西設財政公所分立五科一曰總核科掌覆核各科收支款目冊籍核定後由藩司判行蓋印再節庫分別收支並附設統計處掌統計各科收支報告表冊以備預算決算二曰田賦科掌全省地丁漕糧墾務押荒歲租以及鹽務一切款冊均歸稽核三曰權算科掌全省稅契釐金雜稅及試辦印花稅一切款項其關稅常稅及賑捐各款亦暫附屬四曰俸餉科掌行政大小文武官員俸廉公費暨滿綠各營巡防新軍餉需以及京協各餉五曰庶務科掌教育巡警河工外交工賑各項支款及不隸屬於各科一切雜支事宜田賦權算兩科專司支出截然畫清不許絲毫牽混一洗往日套搭糾紛等弊惟總核一科總司出入與各科相為表裏聯絡一氣俾獲眾擎易舉之效而收分曹治事之功

又兩江總督張人駿奏設立財政公所辦理情形略稱理財之法必須事權專一而後可以收劑理之功故昔年定制內則隸於戶部外則屬於藩司職任既專條理易密自軍興以後捐款日繁名目既多支用復雜於是始有局所之設沿至今日而糾紛愈甚自非統一財權難期整理江南財政局所與他省情形稍有不同昔日之籌款支應籌防三局前已合為財政局上年復裁營房工程局及工料所以其事隸入財政局嗣以木幣局併入釐捐局藩署原設之煙酒捐處亦由藩司直接辦理茲將以上各局所一概裁併設立江南財政公所統歸藩司經管分設三科一曰總核科凡籌辦稽核統計報銷文牘庶務之事隸焉二曰驗收科凡收款如釐捐雜捐及協助移撥之款屬於收入之事隸焉三曰核放科凡放款如薪餉工程購製及解協京外之款屬於支出之事者隸焉分派科長科員各治其事由藩司督率以專責成

又閩浙總督松壽奏統一財政籌辦情形略稱查閩省糧道業已裁撤歸併藩司管理臣衙門兼管監督之閩海常洋關與夫鹽道經管款項近來清理財政亦已遵章按月造報此外善後稅釐濟用三局改併為財政局於是款項出入以該局為總匯之區而賑捐局交代局復附設局內事權不一名目糾紛當督同藩司悉心籌議將以上各局一律裁撤責成經理即在該司署內改設度支公所分總務田賦糧儲釐捐官廉軍需制用七科每科設科長一員酌派科員分任其事並設總科長一員以藩司總其成所有款項由司庫存儲以藩庫大使司入款布都事司出款各立專簿將各款名目動支事項逐細登記惟歸併伊始頭緒紛紜藩司綜核庶政事至繁隨擬遴選熟悉財政之候補道一員幫辦以期精密而臻完善

又山西巡撫丁寶銓奏晉省藩署設立財政公所共設吏治制用釐稅三科每科各設科長一員科分數股視事務之繁簡定股員之多寡另派員總司稽核以資董率提綱挈領藩司實總其成

又湖南巡撫楊文鼎奏統一財政設立公所略稱查湖南糧道早經裁撤歸併藩司經管此外尚有湘省牙釐局及附屬於善後局之籌賑墾務官運報銷各所自應一律裁撤統歸藩司以總其成擬就藩署設立財政公所分設六科一曰總核科一曰田賦科一曰筦權科一曰會計科一曰行政科一曰庶務科一曰雜書科一曰收掌科一曰統計科一曰地丁漕糧科一曰交代科一曰釐捐科一曰雜稅科一曰稽核科一曰俸廉科一曰餉需科一曰收支日報銷科一曰庶務科一曰銓敘科一曰民事分委科一曰科員及書記切實奉行

又浙江巡撫增韞奏請將藩司衙門主計科改為審計科

又湖南巡撫楊文鼎奏裁布理問

又署兩廣總督袁樹勛奏財政公所成立各房書吏分科隸屬經藩司甄別裁留照新設司道衙門改充書記生及錄事為府廳州縣先聲

又江西巡撫馮汝驥奏贛省歸併財政局所於藩署設立公所分設六科一曰總務科一曰銓敘科一曰田賦科一曰制用科一曰稅務科一曰會計科即將稅務局田賦稅契支應局一概裁撤遴委科長科員分司其事田賦稅務制用三科歸併之始須資熟手督同

候補道員會辦其辦公處所就司東偏改建因管轄事宜兼綜用人理財之責即稱布政公所

又雲貴總督李經羲奏滇省藩庫歸併大清銀行經理請裁撤藩庫大使員缺又直隸總督陳夔龍奏請將海防支應局准軍銀錢所練餉局籌款局印花稅局一併裁撤在天津設立財政總匯處派藩司為總辦運司為幫辦設海防糧餉股以海防支應局款項隸之設准軍糧餉股以准軍銀錢所款項隸之設練軍糧餉股以練餉局款項隸之設籌款股以籌款局經理之煙酒兩稅隸之印花稅局事務尚簡應即歸入籌款股併辦每股仍各派坐辦一員幫坐辦一員其從前原派員司即分別裁節以昭核實

交涉使

宣統二年浙江巡撫增韞奏浙省交涉日繁請設專司員缺略稱浙江本為沿海省分風氣早開迄今商埠交通輪軌四達與外人交涉日多事極繁重自非設立交涉專司不足以修敦睦而保主權查奉天吉林雲南三省均已設有專官浙省地居衝要似應仿照辦理其舊有之洋務局既設專司應行裁撤凡關洋務均由交涉司辦理俾專責成

又東三省總督錫良奏請裁撤奉省交涉司僉事從之

又浙江巡撫增韞奏略稱浙省交涉司衙門設立三科分為通商教務庶務與舊日洋務局無少差異

又會議政務處奏覆外務部奏請設各省交涉使員缺略稱近年各省口岸迭開商埠林立中外交涉日繁因應少失其宜輒誤事機而生枝節從前各口岸關道及省會所設洋務局或官由兼任或事隸局差責成不專辦理每多歧異自非遴派專員無以一事權而資考覈原奏謂奉天等省擬設交涉一司頗稱利便除奉天吉林浙江雲南業已設立外直隸江蘇湖北廣東福建交涉繁要應先一律設立安徽江西湖南廣西四省均歸兼轄總督省分之交涉使兼

辦此外如黑龍江山東山西河南陝西甘肅新疆四川貴州等省交涉較簡擬暫緩設其各省舊時所設洋務局所即行裁撤其經費統歸併交涉司至交涉使任用之法仿照學部奏保提學使之例在於該部所屬及曾任交涉人員開單預保聽候 簡放等語審度緩急次第推行實於外交有神應如所奏辦理原奏章程十八條酌訂職權量籌經費以及任用考成各辦法無非參照成案斟酌時宜均可照章試辦此後如有增刪修改之處應由該部隨時體察情形奏明辦理

各省交涉使章程 第一條 凡有交涉省分每省設交涉使司交涉使一員辦理全省交涉事務 第二條 見在安徽江西湖南廣西等省暫不專設交涉使所有各該省交涉事件除由本省巡撫督飭關道辦理外應與兼轄總督會商者即由該督所駐省分之交涉使稟承辦理 第三條 交涉使擬定為正三品位在布政使之次提學使之前 第四條 交涉使任用之途擬以外務部所屬人員及各省曾任交涉之實缺道員由外務部揀選預保存記候 簡各督撫亦可將辦理得力人員出具考語咨送外務部一體預保 第五條 外務部丞參及出使各國大臣遇有交涉使缺出亦可因材 簡任惟丞參使臣原係 特簡大員擬無庸由部預保 第六條 交涉使由外部丞參出使大臣實缺道員 簡放者作為實授由出使大臣改任請仍留原銜其原官為郎中候補道員者擬照從前編檢充提學使之例一律作為以道員署任 第七條 交涉使照各省藩學臬三司例為督撫之屬官歸其節制考核一面由外務部隨時考查不得力者奏請撤換 第八條 交涉使所辦事件除隨時詳請督撫咨報外務部外仍於年終造冊報部以備考核如遇重要事件一面稟報督撫一面報部 第九條 交涉使自到任之日起每三年作為俸滿屆時督撫將其平日所辦事項詳細咨部由部查核分別殿最臚列奏 聞 第十條 就所駐地方設立交涉公所督率委員每日訂時入所辦事公所分設兩科曰秘書曰繙譯由交涉使酌擬細則詳准督撫施行並報外務部立案 第十一條 交涉司酌設

委員分隸兩科其員數事繁省分不得逾七八員事簡省分不得逾四五員

第十二條 交涉司委員應用歷辦交涉及通曉各國語文人員以業經

到省及由外務部發往差遣者為合格由交涉使遴選詳請督撫札派亦可

不拘原官品級酌量差委仍將各該員履歷詳報督撫咨部備案其應領薪

水酌照該省舊時洋務人員薪水詳請督撫核定 第十三條 交涉使除

支俸銀外每年額支養廉公費及外交經費應由督撫酌擬奏定此外建修

衙署公所及所屬員役薪工公所費用等項均由督撫酌籌的款以規久遠

第十四條 交涉司委員之下應設書記生其人數視事之繁簡為定皆

開支工薪不作缺底公役亦宜限定人數 第十五條 各口岸交涉向歸

關道辦理者本為交涉司職任一切仍舊惟所有上詳督撫之件均應分

咨交涉使查核 第十六條 所有舊時由藩學臬三司會詳督撫之件交

涉司應一體會詳並一切關於各司通例者均與各司一律 第十七條

各省俟交涉使 簡放到任後所有原設之洋務局即行裁撤將一切案卷

移送交涉司以其經費併入 第十八條 以上各條將來如有增刪之處

隨時察度情形請 旨辦理

又 詔設直隸江蘇湖北廣東福建交涉使

提學使

光緒三十二年 諭政務處學部會奏遵議裁撤學政請設直省提學使一摺

見在停止科舉專辦學堂所有學政事宜自應設法變通著即照所請各省改

設提學使司提學使一員統轄全省學務歸督撫節制一切詳細官制及辦事

權限章程仍由學部籌議具奏所有各省學政一律裁撤均著回京供職各該

省學校事宜暫由各該督撫督飭學員妥為經畫餘著照所議辦理

又學部奏定各省學務官制

一每省提學使秩正三品在布政使之次提法使之前總理全省學務考核

所屬職員功課其舊有之學務處俟提學使到任後即行裁撤以專責成

江蘇應於江蘇省城設提學使一人江蘇省城設提學使一人照布政使

管轄地方例管理學務其吉林黑龍江新疆三省均添設提學使各一人

一各省提學使員缺由學部以京外所屬學務職員開單請 簡 一提學

使初設需員甚多由翰林院人員通達事理及曾經外洋確有心得并京外

究心學務素有閱歷之員不拘資格一體擢用其見任各省學政暨學務處

總辦果係辦事認真者由學部奏請改任或補或署以資熟手 一提學使

自到任之日起三年俸滿各督撫將其平日所辦事項詳細咨部本部證以

三年內派出視學官所切實考察者臚列奏 聞或留或升或調他省或回

本部請 旨遵行 一提學使由四五品京堂及實缺道員 簡任者升轉

與臬司同其由他項人員補授者應俟三年俸滿列入升轉由他項人員署

理者俟實授後扣足俸滿年限列入升轉 一提學使照各省直省藩臬兩司

例為督撫之屬官歸其節制考核一面由學部隨時考查不得力者奏請撤

換 一地方學務提學使當督飭地方官切實舉辦其有延宕玩視者提學

使可詳請督撫分別記過撤參其有辦事實心卓著成效者亦可詳請優獎

年終分別所屬府廳州縣興學考成出具考語申詳督撫辦理 一通省學

務應用之款應會同藩司籌畫詳請督撫辦理 一每學期及年終將學堂

辦理情形詳報學部如有重要事件仍得徑達學部 一遇有應行出省考

察事件須先期電達學部允准方可出省不得受地方供應 一提學使衙

門可仍用舊有之學政衙門舊日吏役概行屏除其學政向不與督撫同城

者均應改歸一律至各省業經裁撤之學務處即改為學務公所提學使督

率所屬職員照章限定鐘點每日入所辦公所有學政衙門案卷學務處公

牘均移送提學司以便稽考 一學務公所設議長一人議紳四人佐提學

使參畫學務並備督撫諮詢議紳由提學使延聘議長由督撫咨明學部奏

派 一學務公所分為六科 總務科掌辦理機密文書事件收發一切公

文函電案卷冊籍編纂報告關於學務各項並考核所屬職員功過任用升

黜更調暨核定規則章程及一切雜項事務 專門科掌理高等學堂及各

種專門學堂教課規條及關於各職員學生等一切事務並保護獎勵各種

學術技藝及海外游學生事務 普通科掌理本省優級初級師範學堂中

等學堂女子師範學堂女子中學堂小學堂教課規程及關於各職員學生等一切事務又凡通俗教育家庭教育博物館及中小學堂相類之學堂均歸辦理 實業科掌理關於實業各學堂實業教員講習所之教課規程及關於各職員學生等一切事務並考察本省實業情形 圖書科掌理編譯教科書參考書審查本省各學堂教課圖籍編譯本署往來公文書牘集錄講義經理印刷並管圖書館博物館等事務 會計科掌理本所收支報銷核算省會及各府廳州縣教育費用並稽核各學堂建造營繕之事 一各科設科長一人副長一人其員視事之繁簡酌派少則一人多則不得過三人 一各科長副長科員以曾在中學堂以上畢業或曾習師範並曾充學堂管理員教員積有勞績者充任此時創辦應予變通暫就本省官紳辦理學務積有閱歷者由提學使詳請督撫札派 一提學使以下設省視學六人由提學使詳請督撫札派巡視各府廳州縣學務以曾習師範或出洋游學並曾充學堂管理員教員積有勞績者充任 一科長副長省視學如有官者均給予職銜科長五品副長及省視學均六品其有資深勞著者准以京外相當之學務員調用 一科長副長省視學及各科員每年由督撫彙奏彙咨一次 一各省提學使養廉均照學政原有之養廉支給其署任人員若署無人之缺養廉全支均加給公費其數自由督撫奏定所有學政舊有之規費供給等項名目一概禁絕 一科員以下設司事書記其人數視事之繁簡爲定開支工薪不作缺底公役尤宜限定人數 一各廳州縣均設勸學所按定區域勸辦小學由提學使嚴督地方官限期速辦實力推行並於勸學所內定期約集學會紳衿宣講教育宗旨 一各廳州縣勸學所設縣視學一人兼充學務總董選本籍紳衿由提學使札派充任即常駐各廳州縣城由地方官監督辦理學務並以時巡察各鄉郵市鎮學堂給以正七品虛銜其辦理有效者准其擢充科長副長 一各省設教育官練習所由督撫監督由提學使選聘本國或外國精通教育之員講演教育教授管理諸法及教育行政視學制度每日限定鐘點自提學使以下所有學務職員

至少每星期須上堂聽講三次 又奏准提學使權限章程略稱提學使選用僚佐旌別屬官以及管理駐防學務聘用外國教員各事宜爲前次章程所未備者見經酌定十一條通行各省一律遵照辦理再興學爲地方要政久已列入考成實與錢穀刑名並重查各省地方官員補署舉劾等事向由藩司會同臬司具詳見既添設學司擬改爲藩學臬三司會同具詳庶地方人員各顧考成於興學育才不無裨益 又會議政務處議覆署河南提學使孔祥霖考試視學官略稱查原奏內稱視學官既非額缺又乏俸薪往往濫竽充數以各省高等學堂豫科及中學堂畢業生暨見任候選教職考充但須於教育行政及教授管理法實有心得者一體選錄所有考取委用詳細章程請 飭速議頒行等語查學部奏定各省學務官制清單本有提學使下設省視學六人各廳州縣勸學所設縣視學一人兼充學務總董選本地紳衿品行端方曾經出洋游歷或曾習師範者由提學使飭派委任一條又勸學所章程選舉職員一條亦稱總董由縣視學兼充薪水公費多寡各就本地情形酌定近聞各省已有由督撫提學使選擇節派之處大都國文通暢科學講習及曾充管理員教員之人辦理尙無不合該署提學使所奏亦係慎重學務起見惟見在各省高等學堂中學堂學生已經咨報畢業者尙少各省教職人員人品亦頗不一若僅以考爲憑或多遷就調劑之弊不如暫由各省提學使慎選無論爲士紳爲教官爲學生但查明實係品學俱優熱心教育均准札派委用將來學堂畢業人數漸多再由憲政編查館會同學部另訂考試視學官專章奏請通飭遵行 三十三年政務處議覆署河南提學使孔祥霖奏請將新設佐治各員概免迴避等再四商權應請嗣後添設之佐治各員除視學勸業兩員准由州縣官採訪輿論參用本地士紳外其餘各員雖不必限制省分仍應一律迴避本府宣統二年學部奏酌擬學務公所人員獎勵辦法略稱擬請將學務公所人員比照各省學堂教員管理員辦學請獎成案其有實心任事不辭勞怨者屆滿三年有職人員准照尋常保舉加銜無職人員參酌定章由 臣部咨明吏部給

千六七品職銜如供差又至五年之久不論有無官職一律均照異常勞績請獎

又學部奏准改訂勸學所章程略稱府廳州縣城治設勸學所佐府廳州縣長官辦理學務該所設勸學員長一人稟承該管長官辦理勸學事務得兼充縣視學設勸學員其員額由該管長官申請提學使核定該所遇有必事情形得置臨時學務員但其任期至多以三個月為限量事之繁簡設書記一人至三人勸學員長及勸學員原無官職者得分別給予七八品職銜均以三年為任滿任滿仍連任者加給月薪

提法使

道光元年 諭御史譚言藹奏請飭催各省臬司駁案積壓一摺臬司為刑名總匯緣情定讞必須明慎而不留獄方免冤濫拖延之弊若任聽幕友挾私駁斥往返稽遲必致累月經年案懸不結且劣幕盤踞日久點吏附會招搖州縣改供迎合其端皆由此而開著通飭各省臬司振刷精神於所屬申詳案件必親加考察以定准駁不得藉口詳慎任聽幕友舞文苛駁任意拖延並隨時稽察如本署幕友有與州縣勾通推薦親友以准駁案件擅作威福者立即嚴行究辦執法重懲以挽澆風而清庶獄

三年陝西裁按察使照磨一人

光緒三十年議以淮揚海道兼按察使銜

宣統元年廣西巡撫張鳴岐奏裁廣西按察司經歷分科治事略稱查奏定各直省官制章程內載各省提法使司應設屬員即以按察司所屬經歷知事照磨司獄等官由法部擬定職掌酌量改設按察司未改省分暫仍舊制等語查本省提法司制度尚未改設見行肅清傳事務舊有職掌非一旦所能清而審判檢察諸制端宏大頭緒紛繁自本年起以迄宣統七年逐年均有應籌辦應成立之處至改良監獄尤須同時並舉組織方得完全當茲新政相乘百端待理應在司署先行分科治事酌設三科曰總務曰審判曰典獄凡按察司司獄一官俟明年省城樓範監獄成立即行裁撤

又憲政編查館奏遵 旨考核提法使官制略稱憲政之初基莫要於司法而司法之統一尤莫重於設官自釐定官制改按察使為提法使並另設高等審判以下各廳專理詞訟是提法使一官名為提刑所改實乃法曹之分司其制雖為各國所無而其集權中央之旨則一也 臣等檢閱原奏並清單十八條蓋本東三省總督所定官制酌加損益其中應行斟酌者尚有四端原奏擬設總務民事刑典獄四科以定該司之職掌查總務綜理全省法官之補署升降及收發文牘稽核度支典獄職司全省監獄之改良及工作之成績均責任繁重自應各設專科至刑民事大政以備編輯訴訟統計為主與舊日臬司之必應逐案勘轉者不同且中國民事案件甫經分析事本簡略茲擬合併一科與總務典獄共為三科以節虛糜而昭核實又原奏所稱應行變通一節擬釐正各科僉事品秩並刪除科員司書等官以杜濫冒查從前臬司所掌事宜僅止刑名一端既改今制分設各科職守較繁各科僅置僉事一人深慮不敷任使如以書記承乏其閒鈔胥末秩不足以勝重寄至僉事之名本明以前舊制用以定提法使之屬官名實克副第創建伊始一則恐無合格之人一則見行事例有須由經歷而知者如預為限定其名稱恐將來變更非易應否定為實官之處俟明年釐訂直省官制時再行核辦茲擬暫仿新設官署科長科員之制將僉事改為科長並於科長之次酌設一二等科員數員分理其事惟此項人員究與普通行政官吏不同既須明其責任更宜課以專長並參用陸軍部官與職分之意暫不作為實官而定為實職凡一切補署概須奏報立案仍將任用資格嚴行釐定免各省蹈常習故率以尋常需次人員濫充考各國任用官吏均先之以試驗今另定考用提法司屬官章程所有新設各科員額悉令遵照考驗以副 朝廷鄭重司法之至意又原奏所稱應兼銜一節擬以按察使舊有經歷照磨知事司獄等官改補典簿主簿及初級推事檢察所官錄事查經歷等官舊本開曹如以主簿典簿所官錄事對調自無不可至推事檢察司審錄乃人民生命財產之所寄必須明允之員方克勝任雖屬初級不過為訴訟階級之分初非有爵秩尊卑之別即 朝廷設官本意所以滌新吏

治非爲位置冗員擬請將經歷等官由各督撫詳加甄別或以所官錄事或另以相當之職調用至改補推事檢察應請毋庸置議又第十三第十四兩條關係司法官之登用一爲法律畢業員充補書記一爲書記徑升審判檢察廳相當之官並未指明何項則推事檢察自在晉擢之列查各國通例司法官之資格最爲尊崇非修法律專科在大學畢業受判檢事登用試驗者不能得司法官之資格即在中國從前刑部之時凡籤分到部必須讀律有年曾任秋審提調坐辦者方能保薦 京察一等其重視資格略與各國相同今以書記爲儲養法律人材之地更以推事檢察爲書記晉級之階揆之中外均屬未符應由臣館另定司法官登用章程請 旨遵行至原奏應行增置一節詳定獄官品秩查監獄官吏職繁重際此改良監獄之時斷非例文數條所能賅載擬請析出由該部會同修訂法律大臣詳考各國成規另輯監獄法奏交 臣館考核請 旨頒行以資遵守釐定章程十八條並附考提法司屬官十條繕單呈覽

提法使官制

第一條 各省照奏定直省官制通則以原設提刑按察使司改爲提法使司設提法使一員承法部及本省督撫之命管理全省司法之行政事務並監督各級審判廳檢察廳及監獄 第二條 分設三科 一總務 二刑民 三典獄 第三條 總務科掌本司及各級審判廳檢察廳監獄各員之補署陞降保獎處分收發文件編纂檔冊及刑民典獄兩科以外各項統計本司各級審判廳檢察廳豫算決算並一切雜項事宜 第四條 刑民科掌草擬見行各項法律疑義之解釋請示各級審判廳之設立廢止及管轄區域更改編纂刑事民事及註冊等項統計稽核檢察事務及司法警察辦理秋審 恩赦減等及留養事宜死罪案件備繕供勘及軍流以下人犯彙案申報以上兩款如在各級審判廳未立以前所有招解勘轉事宜仍照向章辦理 第五條 典獄科掌改良監獄推廣習藝所等項稽核罪犯工作成績及編纂監獄統計 第六條 每科設科長一員承提法使之命綜

理本科事務 第七條 每科由提法使酌量事務繁簡設一等科員一員二等科員一員至四員 第八條 每科酌設書記以五員爲額受科長科員指揮繕寫文件辦理庶務 第九條 科長秩視五品一等科員秩視六品二等科員秩視七品均以諳習法政人員照章考試合格者由提法使詳由督撫咨達法部奏補書記官秩視八九品由提法使以照章考試合格者詳請督撫酌量署補並咨法部存案 科長科員書記考試任用之法照另定考用提法司屬官章程辦理 第十條 各級審判廳檢察廳有疑義不能決者得詳擬解釋申報大理院核示 第十一條 死罪案件應備繕供勸詳由督撫咨報法部存案 第十二條 全省各級審判廳檢察廳均得隨時親往視察或派員前往其赴外屬各處時可詳明督撫往巡事竣除報督撫外仍將細情申報法部 第十三條 各級審判官檢察官補缺後如須更調應詳由督撫咨報法部核辦不得任意更調 第十四條 籌辦司法一切事宜除申報督撫咨報法部外仍於年終造冊列表報部查核其有重要事件得一面申報督撫一面巡達法部核辦 第十五條 提法司經費數目由督撫酌定其舉辦各級審判廳檢察廳需用款項應由督撫籌給每年編入豫算照度支部奏定清理財政章程辦理 第十六條 各省監獄事宜由提法使按照監獄法督飭辦理 第十七條 各省侯提法司改設後所有原設按察司屬官應一律作爲裁缺仍照章考試始准任用 第十八條 提法司辦事細則由該司酌定其各級審判廳檢察廳及監獄事細則由各該廳及該管官酌定經該司覆核後仍分報督撫及法部由部彙集各省司廳規則酌中損益編定通則以昭法守

考用提法司屬官章程

第一條 提法司屬官應按照奏定官制以考試合格者分別奏咨補用

第二條 科長科員由左列人員內考試合格者奏補 一在法政法律學堂三年以上畢業得有文憑者 二舉人以上出身者 三文職七品以上

者 四舊充刑幕確係品端學裕者 其在京師法科大學法政學堂正科畢業及在外國法政大學或法政專門學堂畢業經學部考試給予出身者得免其考試即予酌量分別署補 第三條 考試科長科員應備左列各款科目 一奏定憲法綱要 二大清例律 三見行各項法律 四各國民法商法刑法及訴訟法外國法律則不同惟由各人自行呈明其所學考者 五國際法 左列各款以第二第四為主要科分數如不及格餘科分數雖多不得錄用 第四條 考試科長科員由提法使主試并詳請督撫派員監試暨遴派深通中外法學者數員為襄校 第五條 考試合格者由提法使詳請督撫按照考試成績及原有官階出身分別派署一年期滿再由提法使出具考語詳請督撫咨法部奏補並將履歷咨部存案 若合格人逾定額由提法使詳請督撫記名俟有缺出照辦 第六條 科長科員奏補後仍留原官原銜每屆三年由提法使查驗各該員辦事成績出具考語詳請督撫咨法部奏請分別升黜以示勸懲其有辦事實在不能得力者由提法使隨時詳請督撫撤換咨部另補 第七條 書記官由提法使就左列人員內以考試合格者酌補 一在中學堂以上畢業得有文憑者 二凡生員以上出身者 三文職八品以下者 第八條 書記官以文理清順繕寫整齊者為合格其科目由提法使臨時酌定 第九條 書記官考試合格者由提法使按照考試成績及原有官階出身分別派署滿一年後果係稱職再行補實均詳請督撫辦理並將履歷咨送法部 若合格人逾定額應作為記名俟缺出候傳 書記官補缺後仍留原官原銜每屆三年甄別一次其辦事實在不能得力者由提法使隨時詳請督撫撤換 第十條 本章程與提法使官制同時施行所有細則由提法使酌訂詳請督撫核奪並咨明存案 二年湖廣總督瑞澂奏改設湖北提法使略稱按察使一官即古之外臺御史故其職掌提點與案劾並重實司法而兼行政之官也迺者豫備憲政已歷三載省城商埠審判廳限於本年成立用符三權並重之制兼固九年籌備之基不特司法與行政不能混淆即司法與司法之行政亦應區別自非先設提法

使總理司法行政樞紐則法曹分治之機關不備即審判獨立之權限不明當督飭臬司將應改應設事宜逐一規畫有關於提法使本職者如按察使兼管之驛傳事務照奏定勸業道官制應歸勸業道管理即由臬司移交接管其應辦上年驛站奏銷仍由臬司造報以清界限有關於屬吏者按察司經歷司獄二員作為裁缺詳加甄別以所官錄事及相當之職調用有關於書役者司署既設書記足供繕寫原設書吏應盡裁革有關於附設之局所者司署設有積案統計籌辦審判廳三種局所核其所辦事宜皆屬於總務刑民兩科之職掌應一併裁撤各歸各科辦理惟發審局為各屬解勘翻供及提省審辦重要案件而設見在各屬審判廳尚未遍設未便遽裁應暫改為督審處仍由提法司督率審理 又 諭法部奏請改補見任按察為提法使一摺前奉 先朝明諭預備憲政本年為改簡各省提法使之期除東三省湖北業經改設外直隸齊耀琳江蘇左孝同安徽吳品珩山東胡建樞山西王慶平河南惠森陝西錫桐甘肅陳燦福建鹿學良浙江李傳元江西陶大均湖南周儒臣四川江毓昌廣東俞鍾穎廣西王芝祥雲南秦樹聲貴州文徵均著補授提法使其各省道員有兼按察使銜者均改為兼提法使銜 又浙江巡撫增韞奏浙省臬司分設總務民刑典獄三科與部頒提法司屬官之制相符原有經歷照磨司獄等官應分別裁改仍留刑幕一人專辦招解勘轉事宜下該衙門知之各省奏報大略相同茲不具載 又法部奏各省按察使業經 臣部奏請改補提法使所有驛傳事務自應遵章移歸勸業道管理其未設勸業道之山西江蘇甘肅新疆黑龍江等省所有驛傳事務仍著該省提法使或兼提法使銜之道員暫行管理 三年陝甘總督長庚奏請將按司獄改茶庫大使歸勸業道管轄略稱原設司獄一員自應按照官制清單裁撤另行錄用惟此缺向兼茶庫大使凡甘司引茶採運到省由該大使驗明儲庫看守陸續發往各處分銷所司諸務較繁見在茶務援從前蘭州道之例均歸勸業道管理其查驗守衛自應有所屬專官

經理茶課茶捐爲甘省一大進款關係匪輕倘因司獄裁撤而將所兼之茶庫大使亦一併議裁經理無人不免於官茶有所遺誤擬請將裁缺按司獄改爲茶課大使隸於勸業道管轄應支廉俸等項仿照各省道庫大使辦理俾專責成

又 諭法部奏熱河改設高等審判檢察廳並請將熱河道暫加提法使銜一摺熱河道准其暫加提法使銜

又法部奏准編訂提法使司辦事畫一章程八十五條

又吏部奏酌擬按察司屬官裁缺人員辦法略稱見各省提法司業已改設所有按察司經歷並知事照磨司獄等官見候補候選人員爲數衆多擬請按照裁缺人員辦法惟查按察司經歷秩正七品外官對品者只有知縣一項係正印官不得改用應以從七品之鹽運司經歷州判改用其恩拔貢副貢出身之員准以直隸州州判改用以示區別

又會議政務處議覆四川總督趙爾巽等奏設康安分巡兵備道兼提法使銜

審判檢察廳

宣統元年法部奏定各省城商埠各級審判檢察廳編制大綱

一凡省城商埠同在一處者設高等審判廳一所凡首縣各設地方審判廳一所初級審判廳一所或二所其省城商埠各在一處者省城設高等以下各廳商埠不設高等審判廳餘俱如省城之例其商埠大而事繁或距省城過遠者得酌設高等審判分廳由廳丞於推事中保任一人爲推事長代行廳丞職務仍由廳丞隨時指揮監督 二凡高等審判廳各設廳丞一人民科一庭刑科一庭每庭設合議推事三人每廳設典簿一人主簿二人錄事四人或六人高等審判分廳除不設廳丞外餘俱如高等審判廳之例 三凡省城商埠之地方審判廳設推事長一人暫設民科一庭刑科一庭每庭各設合議推事三人每廳設典簿一人主簿一人或二人事務較簡之地可不設主簿以錄事兼行其職務設所官一人錄事四人多至八人 四初級審判廳每庭各設單獨推事一人或二人書記生如推事之數 五各級審

判廳俱各設同等之檢察廳其廳所即附於各審判廳之內 六凡省城之高等檢察廳設檢察長一人檢察官一人錄事二人商埠之高等檢察分廳設檢察官一人錄事一人或二人地方檢察廳設檢察長一人檢察官一人其商埠事務較簡者或即以檢察官兼檢察長錄事一人或二人初級檢察廳設檢察官一人書記生一人或二人 七以上應設各官其品級職務權限查照本部奏定京外各級審判廳並附設檢察廳官制及高等以下各級審判廳試辦章程辦理再有未詳者法院編制法草案亦可參照 八以上應設廳數庭數員數俱係最簡之辦法各省城商埠不得再行減縮其繁劇之處量宜增置不必拘守此限惟須奏咨立案 九各廳應各設候補員俾爲補助且資練習但其數不得逾定員於之數其以推事候補者得辦理豫審及代理迴避各推事之辦任惟理豫審時不得有判決之權 十各廳應有之承發吏庭丁酌量地方情形設定額數其職務權限參照法院編制法草案辦理 十一凡檢察廳俱有指揮司法警察之權一切暫照本部奏定章程辦理至應用人數由各省酌定此外地方官吏營汛地保均有協助之責應由各省督撫率屬訂章通飭仍將章程咨部立案 十二此項編制大綱係爲權宜代用而設將來法院編制法頒布如有規定異同之處應即改歸一律

又奏定各省城商埠各級審判廳籌辦事宜略稱內外審判檢察各廳屬於本部直轄所有一切官員請簡奏補委用之權均應歸宿本部以與各行政官區別京師既已實行各省自應一律惟初辦之始法官考試任用章程未實行以前宜略予變通今擬辦法如左 高等審判廳廳丞高等檢察廳檢察長由本部擇員豫保臨時請簡各督撫亦得就近遴選或指調部員先行咨部派署不得徑行請簡 推事檢察官各員由督撫督同提法使認真遴選品秩相當之員專門法政畢業者舊係法曹出身者曾任正印各官者會歷充刑幕者或指調部員俱咨部先行派署典簿主簿所官錄事各員由督撫督飭提法使考試就見候補各員及刑幕人等拔取資格程度相當者分別咨部派署委用

以上各員除請簡者應由本部奏請 簡用外凡明年成立之省城商埠審判檢察各廳一切應行奏補員缺在法官考試任用章程未實行以前均應作為署任俟實行後考核成績再行分別奏補又各省城高等審判廳管轄全省訴訟各府廳州縣地方審判廳管轄全境訴訟當各鄉鎮初級審判廳各府廳州縣地方審判廳未遍設之時擬定訴訟管轄之權限如左 省城商埠初級審判廳之轄境不必但以城垣商場為限應酌量形勢戶口如附近之地實為該審判廳力所能及且勢宜兼及者即畫定為該廳管轄之界凡界內訴訟事被告有一為界內人或皆非界內人而由界內者皆屬當指令自赴該廳或移送該檢察廳赴訴其界外詞訟案件仍暫歸府廳州縣官照常收受審理 地方審判廳轄境內之鄉鎮其詞訟雖暫歸府廳州縣官受理有不服時仍可依照試辦章程就該地方審判廳上訴該檢察廳於收受訴狀時應按試辦章程第六條各級審判廳管轄案件之區別查其應以本廳第二審者即照章歸本廳審判以高等審判廳為第二審者民事令自赴該廳起訴刑事移交高等檢察廳辦理未設地方審判廳之府廳州縣依法遞控到省之案向歸臬司或發審局審理者俱應向省城高等審判廳起訴由該廳按照前條區別應以本廳為第二審者判決之後許其照章向大理院上訴應以本廳為終審者判決時并宣告該案無上訴於大理院之權惟此項案件係專指依法遞控曾經該地方官判斷有案且未逾上訴期限者而言如並未在該地方官署呈控之案一概不與受理並不許向督撫及各司道衙門越訴仍飭回該府廳州縣聽候判斷 非照新章上訴於大理院之京控案件由京師發回原省審訊者由該省高等審判廳照前條區別第二審終審判決後呈明督撫及提法使分別奏咨結案

又熱河都統廷杰奏擬裁併理刑司設高等以下審判三廳

二年法部奏各省籌辦省城商埠審判各廳擬請俟考試法官後一律成立

又憲政編查館會奏酌擬各省法官變通迴避辦法竊維理民之要莫重於審判而尤以廣儲人才取便聽訟為改良審判之本定例外官須迴避本省見各

省開辦審判奏准實行考試疊接湖北浙江等省先後電咨本籍人員應否迴避並迴避本府及三百里以內等因查州縣各官分發及迴避舊例迭經中外臣工奏請變通有謂宜多用鄰省者有謂宜不迴避本省者吏部於光緒三十四年議覆河南巡撫林紹年御史吳緯炳摺內於府經歷以下六項則令不迴避本省惟本府州及距本籍三百里以內之缺仍不得補署於同通首領及州縣各項則准聲明願歸近省於直州同直州判各項則令專掣近省均經奉旨允准通行徵之古制漢唐郡縣諸職多在其鄉宋代用人率取近路是任官一法自以取風土人情語言皆便習者為合宜明之迴避有類於漢季之三互法早為當代所譏今京城審判各廳與從前之刑部非無本京人在內亦未見有請託瞻徇之弊此又實事之可證者也見在各省審判開辦伊始人才之難經費之絀情事皆同自應酌定用人辦法以利推行而免窒礙查各省審判廳檢察廳如地方初級等廳皆有專管區域擬令本省人員迴避本管府州及本籍三百里以內與各省人員一體任用揆其緣由厥有數便本省人員於風土人情語言習俗均所熟諳審判易以盡職一也羈離遠宦人情所苦今令就近任職則川費一切皆可從省用度易敷節廉自勵二也近來各省士紳習法政者較多可酌令在本省任用以視專用候補實缺人員者取材為寬三也至各省高等審判檢察廳分廳及提法司屬官其區域或係管轄全省其職任或為司法行政擬仍照舊制不用本省人員其書記官以下並無訴訟職掌應准以本省人員分別任用如此辦理則本籍不令決事既免戚族難處之虞本省皆令服官可收聽訟盡情之效庶於改良審判不無裨益至東西各國成法雖無服官迴避本籍之例而於臨時臨事迴避條例則甚周密有由上官令其迴避者有由本官自請迴避及由當事人指請迴避者多與我國審案迴避舊法用意相合請 飭修訂法律大臣於釐訂訴訟律時詳加規定以示防制

又會奏遵議變通府廳州縣地方審判廳辦法摺略稱查袁樹勛原奏內稱九年期滿清單第四年籌辦府廳州縣城治各級審判廳第五年籌辦鄉鎮初級審判廳是每府廳州縣至少必設地方審判廳一所初級審判廳一所鄉鎮平

均計算每處必在四所以上以此例推則每一州縣必有地方審判廳一所初級審判廳五所又初級審判廳須置一員或二員以上之推事初級檢察廳須置一員或二員以上之檢察官是每一廳州縣之初級審判廳須設官二十員左右地方審判廳既分民刑兩庭又兼用合議制合計推事長庭長推事檢察長檢察官總在十員以上俸給太少則不足以養人之廉即不能責人以事若平均計算每員歲以六百兩計則俸薪一項每一廳州縣歲費已在二萬兩左右加之典簿錄事書記承發吏庭丁檢驗吏各項俸薪與其他辦公費用至少亦須萬金是一廳州縣當歲費三萬兩左右合吾國二十二行省各府廳州縣計之歲費約以五千萬兩計而建築等費尙不在內既慮國家無此人才抑亦斷無此財力變通之法宜於府直隸州設立地方審判廳一所而於有轄地之府及廳州縣設立初級審判廳一所或二所似此轉移於事實既無窒礙而全國經費可銳減十分之九又稱初級審判廳祇能審判二百兩以下之民事監禁一年罰金百元以下之刑事今既於有轄地之府廳州縣但設初級審判廳則案情稍大者勢必遠涉該管府直隸州拖累遲延民情必不甚便而府州之地方審判轉有日不暇給之虞宜將初級審判廳權限略與擴張民事以五千兩以下爲限刑事以十年以下監禁爲限趙爾巽原奏內稱准法部咨行外省省城商埠各級審判廳籌辦事宜第四款內開省城商埠初級審判廳之轄境應酌量形勢畫定該廳管轄之界凡界內訴訟事件地方官不得管理其界外詞訟案件仍暫歸府廳州縣官照常收受審理地方審判廳轄境內之鄉鎮其詞訟雖歸府廳州縣官管理有不服時仍可依照試辦章程就該地方審判廳上訴其應以本廳爲第二審者即照章歸本廳審判應以高等審判廳爲第二審者民事令自赴該廳起訴刑事移交高等檢察廳辦理又查編制大綱第三條內開凡省城商埠之地方審判廳設推事長一人暫設民科一庭刑科一庭每庭各設合議推事三人第六條內開地方檢察廳設檢察長一人檢察官一人各等語是地方審判檢察兩廳各設五六品官九人而於一縣轄境之內又僅能審判已設初級審判廳區域民刑重大事件之第一審及鄉鎮民刑輕微

事件之第二審其鄉鎮第一審大小詞訟事件仍歸地方官管理不獨一縣內有治理兩歧之嫌且事少員多 朝廷亦何必虛糜此廩祿至於初級審判廳見雖不能設及鄉鎮然其管轄區域不妨及於鄉鎮擬以城治初級審判廳酌增推事員額轄及縣治全境於人民向來訴訟必至城治習慣亦不相妨又稱事經升任山東巡撫袁樹勛所奏陳該督亦夙與同意各等語 臣等查該督撫等所奏皆因審判廳設官既多所費至鉅請變通辦理袁樹勛則請於府直隸州設立地方審判廳一所而於有轄地之府及廳州縣設立初級審判廳一所或二所將初級審判廳權限略與擴張民事以五千兩上下爲限刑事以十年以下監禁爲限趙爾巽則請以城治初級審判廳酌增推事員額轄及縣治全境當此財力艱難之際誠不能不擇節辦理但向來各州縣命盜重情皆歸州縣官審辦民閒遇有命盜案件皆赴本州縣城治控告聽審從未有遠赴郡治者若州縣城治僅設初級審判廳即將其權限擴至以十年以下監禁爲限命盜案件亦不能管理命盜案件爲民閒所常有若皆令赴郡城控審貧窶小民斷無此力量案證人等亦皆拖累無窮殊非恤民之道是以 臣館上年奏進司法區域分畫暫行章程特將各府廳州縣附設及共設地方審判分廳辦法分別詳悉規定早於因地制宜之中寓有省節財力之意嗣後省城暨各府直隸州之有同城州縣者應照章共設一地方審判廳或一分廳其各廳州縣之詞訟簡少者照章又得合鄰近州縣共設一分廳是已與袁樹勛所謂每一州縣必有地方審判廳一所者不同至鄉鎮應設初級審判廳一節定章僅酌擇各該省繁盛鄉鎮依限成立各該廳州縣如無繁盛鄉鎮儘可照章設初級一廳是每處並不必在四所以上則歲費自不致如袁樹勛約計之多所有地方審判廳及分廳並初級審判廳各該管區域章程內業經一一訂明則袁樹勛所謂遠涉遲延之弊趙爾巽所謂治理兩歧之嫌已屬見制所無不必斤斤過慮至於地方初級審判廳既已各殊即權限當有一定若令獨任審判之權太廣實於慎重獄訟之旨有乖况兩級附設一處已無道途奔走之勞宜取輕重適均之制是以 臣館上年奏進初級暨地方管轄案件暫行章程特將民刑案件各

該管轄嚴重規定俾得量案情之大小分審級之高低原為預防流失起見查以上兩種章程業奉 欽定頒行京外即應一體遵辦該督撫所請變通設廳暨擴張初級權限及轄境各節自應毋庸置議總之細核該督撫原奏持論雖各有異同而其總總然以官多費鉅為慮則一見在籌備憲政凡百需財若不斟酌時宜自難免日形竭蹶惟司法制度為人民休戚利害所關直省籌辦審判各廳固不應多置冗員致糜薪俸亦未便過從省略有礙推行查法院編制法所定法官數應視事務繁簡為衡並載明推事檢察官員額由法部奏定等語應請 旨飭下法部迅將直省應設高等以下各審判檢察廳及分廳各應酌設推事檢察官書記官等各若干員通盤籌畫奏定遵行務以量事設官為主不得於法定若干員以上過於冗濫庶人才不虞消乏而要政可冀進行其司法經費一項關係尤重既據袁樹勛約計歲費反覆奏陳自應統籌兼顧恭讀上年 諭旨籌辦各級審判廳責成法部會同各督撫督率提法司切實籌設應需司法經費著該部會同度支部隨時妥籌規畫以期早日觀成等因仰見 聖明注重審判獨立之至意查司法經費見應分開辦及常年二種開辦之費以建築為大宗常年之費以薪俸為大宗然建築究不過籌撥於一時而俸給則實應規畫於久遠亟宜審量財力以為逐漸擴充之地應請 旨飭下法部迅將全國應需司法經費咨查直省籌擬辦法統俟據報到部後即行按照度支部試辦預算冊式分類臚列遵 旨會同該部妥籌規畫奏明辦理至法官官俸本包於文官官俸之內 臣館於核覆各衙門未盡事宜清單業已聲明該部所訂各章程應令作為暫行辦法惟見在審判各廳亟須依限籌設則法官官俸自不能不提前酌定查法官獨立執法責成甚重限制復多其考用之法既如是其嚴則待遇之方即不宜過薄應設員額固須多寡適中而應需官俸亦應豐齊各當應由法部遵照 臣館奏進法院編制法原奏所陳俸給等項詳細辦法商明度支部從速酌中釐訂作為法官官俸暫行章程奏交 臣館覆核請 旨遵行此外法官章服體制及司法衙門文書程式均應及時釐定以便遵循容由 臣館另行核議依議行

又奏查本年係各省省城商埠各級廳成立之期需用法官既多且亟見在京外法官第一次考試陸續完竣錄取各員不敷分佈且新取法官初登仕版蒞庭聽訟尚無經驗雖經奏准將律學館畢業學員隨時派往然畢業之員有限需材之地甚多擬於此次京師各廳員補行考驗後擇其平日辦理審檢各事著有成績者遴選數員分往各省派充廳長監督推事及庭長各缺俾收駕輕就熟之效而新取法官亦得有所取資至京師法律學堂甲乙兩班學員多係職官法律研求有素擬並遴派分往各省補充以資熟手

又奏定直省省城商埠審判檢察廳廳員額分別表略稱分庭治事固司法獨立之要端任官惟人尤審判改良之先務雖直省緣財力之故各地以制宜而 臣部集中央之權當折衷於一是查 臣部上年奏定編制大綱十二條固屬單簡辦法即法院編制法內亦無定額明文見在考試已次第告竣各廳當依限成立謹就各該省咨報核議酌酌增減期適於中計各省高等以下審判廳及分廳等共應設一百七十三廳而附設之各級檢察廳數亦如之其推事檢察書記各官共設二千一百四十九員而高等審判廳廳丞高等檢察廳檢察長不與焉此外所官職掌原屬獄官範圍然監獄官制未頒布以前自不妨暫照京師各廳辦理其他繙譯官醫官等項本非額缺其原報已設省分應予照准俾資任使既明定整齊畫一之方未可各為風氣即隱寓撙節制裁之意要非自狹規模謹繕表冊呈 覽

直省省城商埠各級廳廳數表
高等審判廳 二十二行省各一 高等檢察廳同 高等審判分廳 直隸二 高等檢察分廳同
地方審判廳 吉林八奉天六江蘇新疆湖北廣東各四直隸浙江各三安徽山東福建江西四川廣西各二黑龍江山西河南陝西甘肅湖南雲南貴州各一
地方審判分廳 奉天直隸福建各一廣東二 地方檢察分廳同
初級審判廳 吉林十五奉天九直隸江蘇廣東各七浙江五新疆福建湖

北各四山東江西四川廣西各三安徽陝西甘肅湖南各二黑龍江山西河南雲南貴州各一初級檢察廳同

各級廳庭數表

高等審判廳民庭 二十二行省各一 刑庭同

高等審判分廳民庭 直隸天津府承德府各一 刑庭同

地方審判廳民庭 奉天奉天府二營口商新民府又安東縣又遼陽州又

鐵嶺縣又各一 吉林吉林府二長春府商延吉府又賓州府農安縣濱江

府商綏芬府依蘭府各一 黑龍江龍江府一 直隸保定府天津府承德

府各一 江蘇蘇州府江甯府鎮江府商上海縣又各一 安徽安慶府蕪

湖縣商各一 山東濟南府煙臺商各一 山西太原府一 河南開封府

一 陝西西安府一 甘肅蘭州府一 新疆迪化府塔城商甯遠縣又疏

附縣又各一 福建福州府廈門商各一 浙江杭州府甯波府商溫州府

又各一 江西南昌府九江府商各一 湖北武昌府漢口商宜昌府又沙

市各一 湖南長沙府一 四川成都府重慶府商各一 廣東廣州府

澄海縣商合浦縣又瓊山縣又各一 廣西桂林府梧州府商各一 雲南

雲南府一 貴州貴陽府一 刑庭同

地方審判分廳民庭 奉天撫順縣一 直隸張家口商一 福建南臺商

一 廣東新會縣商三水縣又各一 刑庭同

各級廳員額表

高等審判廳員額 二十二行省每省設廳丞一推事六典簿一主簿二錄

事四 天津熱河二分廳員額除以資深者一員為監督推事不設廳丞外

餘同惟各設繙譯官一員 山西添設所官二員

高等檢察廳員額 二十二行省各設檢察長一檢察官二典簿一主簿一

錄事二 天津熱河二分廳不設檢察長以資深者一員為監督檢察官餘

同

地方審判廳員額 奉天奉天府推事十一繙譯其廳長典簿主簿錄事所

官員額各廳均同後詳營口商埠商一新民府商埠商安東縣商埠商遼

陽州商埠鐵嶺縣商埠 吉林吉林府推事十一長春府商延吉府商埠商

賓州府農安縣濱江府商埠商綏芬府商依蘭府商黑龍江龍江府

直隸保定府天津府承德府 江蘇蘇州府商江甯府商鎮江府商埠

商上海縣商埠商安徽安慶府蕪湖縣商埠 山東濟南府煙臺商

埠 山西太原府 河南開封府 陝西西安府 甘肅蘭州府 新疆迪

化府塔城商埠甯遠縣商埠疏附縣商埠 福建福州府廈門商埠 浙江

杭州府甯波府商埠溫州府商埠 江西南昌府九江府商埠 湖北武昌

府漢口商埠宜昌府商埠沙市商埠 湖南長沙府 四川成都府重慶商

埠 廣東廣州府澄海商埠合浦縣商埠瓊山縣商埠 廣西桂林府梧州

府商埠 雲南雲南府商貴州貴陽府 以上五十六廳每廳設廳長一

員推事五員除奉天吉林外餘均同典簿一員主簿二員錄事四員所官一員

繙譯官未經規定各省原報共十五員註明各醫官奉天雲南各一員

地方審判分廳員額 奉天撫順縣 直隸張家口商埠 福建南臺商埠

廣東新會商埠三水商埠 以上五分廳每廳設推事六員典簿一員主簿

二員錄事四員所官一員廳長照高等分廳例不設

地方檢察廳員額 廳數均同審判廳編制大綱第五條各級審判廳俱各

之內計共五十六廳每廳設檢察長一員檢察官二員典簿一員主簿一員

錄事二員

地方檢察分廳員額 廳數同審判分廳共五分廳不設檢察長餘均同上

初級審判廳員額 奉天承德縣第一廳第二廳第三廳營口商埠新民府

商埠安東縣商埠遼陽州商埠鐵嶺縣商埠撫順縣 吉林吉林府第一廳

第二廳長春府商埠延吉府局子街商埠商六道溝外六道溝商頭道

溝商埠汪清溝商埠和龍縣春廳賓州府農安縣濱江府依蘭府綏芬府

黑龍江龍江府 直隸清苑縣天津縣第一廳第二廳第三廳第四廳承

德府張家口商埠 江蘇長洲縣元和縣吳縣上元縣江甯縣丹徒縣商埠

上海縣商埠 安徽懷甯縣二推事 蕪湖縣商埠二推事 山東歷城縣二推事 濟南城外商埠煙臺商埠 山西陽曲縣二推事 河南祥符縣二推事 陝西長安縣二推事 咸陽縣二推事 甘肅皋蘭縣第一廳第二廳 新疆迪化縣塔城商埠甯遠縣商埠疏附縣商埠 福建閩縣侯官縣南臺商埠廈門商埠 浙江仁和縣二推事 錢塘縣二推事 拱宸橋商埠二推事 郵縣商埠二推事 永嘉縣商埠二推事 江西南昌縣新建縣德化縣 湖北江夏縣二推事 漢口商埠三推事 東湖縣商埠二推事 沙市商埠二推事 湖南長沙縣善化縣 四川成都縣二推事 華陽縣二推事 巴縣商埠二推事 廣東南海縣番禺縣新會縣商埠三水縣商埠澄海縣商埠合浦縣商埠瓊山縣商埠 廣西臨桂縣第一廳二推事 第二廳二推事 蒼梧縣商埠二推事 雲南昆明縣二推事 貴州貴筑縣第一廳二推事 第二廳二推事 以上八十八廳每廳設推事一員錄事二員有設二員三員者

註明各廳之下

初級檢察廳員額 奉天九廳吉林十五廳黑龍江一廳直隸七廳江蘇七廳安徽二廳山東三廳山西一廳 河南一廳陝西二廳甘肅二廳新疆四廳福建四廳浙江五廳江西三廳湖北四廳湖南二廳四川三廳廣東七廳廣西三廳雲南一廳貴州二廳共八十八廳每廳設檢察官一員錄事一員

凡設初級審判廳之地方即並設初級檢察廳故舉每省共廳數不再敘述

臣謹案孟子云徒法不能自行吾國之不振由於用人之失常未可盡咎法制之不善也自新政行而紛誇變法刑律幾全覆舊章直省疆臣奏報開辦大都言人才之乏財力之艱千篇一律綜觀各省法官約添二千餘員每縣歲費約需三萬餘兩合全國計之至少添官五萬員費銀五千萬殊駭聽聞議者方謂周官大司寇佐邦刑而分設鄉士掌國中遂士掌四郊縣士掌野以各聽獄訟與司法獨立相符不知良法美意須隨地制宜墨守成規官禮亦足誤人夫書史所載制度損益皆效於前以時曠邈而異變尙未可泥况拾遺陔異域風俗之殊絕者而一概施之可乎哉不審國中之情勢而專襲域外之章程詭譎然號於眾曰此新法也字內

驟然莫敢非議是自速其亡而已嗚呼痛哉

三年法部奏熱河改設高等審判檢察廳略稱據該都統電稱熱河蒙民雜處命盜訟獄繁過內地若謹設一高等分廳專權遙制於總廳直轄相距遠分廳位卑權輕必多窒礙矧熱河蒙民交涉案件刑司既裁若無大員坐理不足以鎮服蒙旗自應仍照上年原奏設立高等審判廳並加熱河道提法使銜以資審轉方於大局有裨臣部當否憲政編查館旋准覆稱館奏司法區域分畫暫行章程第二條第二項邊疆大員駐所設高等審判分廳係指各該邊疆駐所大員向不勒轉刑名其司法審判仍歸本省管轄者而言故分廳與本廳仍得同隸一省熱河所屬旗蒙民刑事件向歸都統管理是其司法權限早已畫分且以數千里廣漠之地數百萬撫綏之衆僅以一普通推事坐鎮其間而監督之權遠在直隸殊有鞭長莫及之勢該都統所請擬設高等審判廳之處自應變通奏案准予設立並准其將熱河道暫加提法使銜兼掌司法行政事宜由部奏明咨行該都統遵辦等語查臣部上年奏令設立高等分廳原為慎重官守樽節經費起見惟該都統電商各節亦係實在情形自應欽遵辦理又大理院奏各省高等審判廳成立應將大理院分院事宜提前籌設擬請於甘肅省設一分院而以陝西新疆屬之四川省設一分院而以駐藏大臣轄境屬之此外雲貴合設一分院兩廣合設一分院仍就總督轄境以為管轄俟司法區域另行畫分之後再行隨時酌量變更至分院官制編制法除由本院選任外係由高等審判廳兼任二庭以上置監督推事一員其品級之高下法部原定司法官制並無明文竊謂分院對於下級審判雖無監督之權而於解釋法律聽斷訟獄實握最高之樞紐究與高等及地方之分廳體制不同際此新陳遞遷階級觀念未盡剷除且高等審判廳丞秩係四品如以普通推事承之其間恐各級易生輕玩似應量予變通擬請各省大理院分院設置推丞一員並加少卿銜以別等級而肅觀聽其餘推事仍照編制法辦理在臣院推丞職守本係兼一庭長實言之實簡任之推事揆諸編制法並無不符以上各節事關官制請 飭憲政編查館照章核議其分院應辦事宜俟擬定後會商法部辦

理得 旨著憲政編查館核議具奏

又民政部會奏行政司法分權聲明地方官責任略稱查司法制度頒行未久直省已設審判廳地方往往有因地方官不明司法行政分權之故於應負責任亦復諉卸每遇命盜重案或以應歸審判為詞或以照例飭緝了事近年直省迭告偏災民力窮困搶劫之案時有所聞此等作奸犯科實緣捕務廢弛而起各該地方牧令前既疏於防範後又疏於查緝人民生命財產益將不可究詰體察情形非聲明地方官應負責任不可查司法獨立既以審判為範圍則地方有司即以行政為專責就刑事案件言承審屬於司法承緝屬於行政雖各異義實相聯州縣係地方印官巡警歸其管理如果巡警得力則地方官有執行警政之權即巡警未能完備而督飭應捕人員協同營汛兵弁俱不難負補助司法之責擬請嗣後直省已設審判廳地方凡直轄地面之府廳州縣遇有命盜重案及一應刑事案件審判檢察各廳及地方官均應各按承審承緝權限互相維持以期共濟其刑事人犯不論司法衙門移緝或巡警官署發覺之案事犯在逃即責成該府廳州縣督飭巡警督捕人員分別協同地方營汛兵弁勒限查緝捕獲後移送該管檢察廳起訴由該管審判廳按律訊辦緝捕責任既定則處分之法不可不嚴在文官懲戒章程未經頒行以前所有該府廳州縣例得疏防承緝各處分自應暫照見行律例分別參辦惟處分所以懲既往而考核所以勵將來嗣後該府廳州縣應將該管境內命盜重案及一切刑事案件分別已未捕獲兩種按月造具案由清冊報由該省民政司或巡警道查核詳由督撫按季咨民政部查考如有任意不報或報而不實不盡者即由民政部暨該督撫查明參處其未設審判廳地方除承審事宜查照館部奏案分別辦理外其所出刑事案件亦均遵照此次奏案分別詳咨以憑查考總之司法甫立根基地方之習慣人民之信用皆重在州縣必須於兩方關涉事件和衷商榷使司法行政交益而不相礙在州縣於承緝各項固不得少有諉卸致誤地方而審判各官亦宜於承審各項悉心研鞠凡逮捕搜索等事須有確據方可知會地方官辦理萬不宜兩莽滅裂強州縣執行見在改良伊

始深慮舊日之州縣因循固多新設之法官經驗尙少業由法部行文誥誡互任責成以冀司法行政交有進步以上辦法係為斟酌時宜而設俟新定外官制暨刑事訴訟律頒行後屆時再一律欽遵辦理

又憲政編查館會奏議上海商埠增設高等審判分廳

又憲政編查館會奏查司法區域分畫暫行章程第四條載直省直隸州地方審判廳以各該府直隸州轄境為其管轄區域等語本條所稱該府直隸州轄境字樣係指府之有直接轄境暨直隸州之直接轄境而言其直接轄境以外之所屬州縣應照本章程第五條酌設分廳并非以一地方審判廳而轄及該府州所屬州縣全境也見在直省籌辦各廳於該地方審判廳管轄區域範圍多因解釋章程間有疑義咨詢到館自應詳悉聲明擬請凡府直隸州有直接轄境者即以其直接轄境為該地方審判廳管轄區域凡無直接轄境之府有屬縣二縣同城者即查照奏章共設一地方審判廳而以各該縣轄境為該廳管轄區域其縣治不在府城而以各該縣轄境為該廳管轄區域此外廳州縣或專設一地方審判分廳或合鄰近州縣共設一分廳或距府直隸州最近者即由該府直隸州城治所設地方審判廳管轄均照定章辦理至共設一地方審判廳或分廳之各府直隸州廳州縣地方應如何分別酌設初級審判廳一所以由該省提法司照章程第九條酌擬呈請督撫核明分別咨部核辦如二縣同城已共設有地方審判廳者分設初級審判廳之處應即同時籌辦以利推行而免歧異至府直隸州審判廳已經成立地方其屬縣之未設初級審判廳及地方審判分廳者一應初審案件仍暫歸地方官照例辦理其上述案件暫照部前次奏定省城商埠各審判廳籌辦事宜管轄專條所載遇有經州縣判決不服案件即就該地方廳直接上訴當收狀時由檢察廳查明該案係應以本廳為第二審者即歸本廳審判應以高等審判廳為第二審者應分別民事刑事令自赴該廳赴訴刑事即由該廳移交高等檢察廳辦理一俟各該州縣地方審判分廳陸續成立該管上訴事宜即行畫歸管轄如此分別規定揆諸法理既屬相符按之事實亦無窒礙

又法部奏准頒行編定京外各級審判檢察廳辦事章程

又內閣會奏 略稱振興司法籌費爲先改定官制汰冗爲急查修正籌備清單各省府州縣審判廳均限於宣統四年成立見在各省庫款皆屬奇絀除省城商埠外多未舉辦惟憲政根基重在區分司法行政若因固於款項致觀成無日實於預備憲政大有關礙再四酌度自以裁汰府城首縣提取原有款項籌設各府地方審判廳爲合宜查東三省新疆南路新設各府皆無首縣熱河舊設之承德府及貴州之思州等府向皆自管地面與各省直隸州相類刻下籌備憲政重在設一官得一官之用向者有首縣之知府止監督所屬不親民事但司勸轉例行各件循名責實不得謂非閒冗見在釐定官制須先妥籌辦法以明官無冗濫事無曠廢裁併各府首縣證之新舊法制揆之地方治理實無窒礙且有數便各省知府以不親民事少所體驗與利除病多有隔閡今令兼治民事則地方蠢弊民閒疾苦皆易周知其便一也近論治者每謂外官大則督撫小則州縣最爲重寄稱職爲難知府一官易於充位若分任地方於振興民治甄覈人才皆有所益其便二也各府廉俸而外公費幕脩大都派之各屬而首縣陋習相沿幾專以供應本府爲事見在清理財政期於用無虛糜今裁去首縣予以民治則支出者爲必要之需供應者絕承奉之本各首府縣向來迎送過往差使伺應院司之習亦應禁絕其便三也惟各府首縣例定廉俸爲數均少向資以辦公者多在錢糧平餘消餘及規費等款除見已報明度支部者外均令和盤託出不得稍有隱匿以免裁缺之後應提之款又歸無著而此大宗款項即可撥爲設立審判廳之用其首縣衙署亦可騰出建設法庭庶各府地方審判廳即可依期成立以飭民治而重司法

鹽運使

乾隆五十五年廣東裁東莞場大使實缺將博茂委缺改爲實缺
五十六年四川裁三臺縣葫蘆溪大使改設三臺縣鹽捕縣丞一人駐葫蘆溪
五十七年河東裁鹽運使鹽運同鹽經歷鹽知事鹽庫大使解鹽東場大使中場大使西場大使各一人

五十八年 諭杭州織造改爲鹽政兼管織造事其鹽道本無分巡地方之責著改爲運司

嘉慶二年增設福建運河鹽場大使

十二年山西復設鹽務衙門以分守河南兵備道兼管鹽法裁甯武府鹽捕同知改設河東監掣同知一人添設鹽經歷鹽庫大使河東礮口鹽運判礮口鹽大使東場大使西場大使中場大使吉蘭泰大使河口鎮批驗所大使各一人十七年山西裁礮口鹽運判礮口鹽大使吉蘭泰大使河口鎮批驗所大使各一人設黃甫川大使一人

又福建裁漳浦東場鹽大使改設福興場鹽大使一人

十九年改雲南香鹽井大使爲抱香井大使

道光十二年裁長蘆滄州運判興國場大使山東膠萊運判登臨場信陽場大使各一人

又裁雲南彌沙井鹽大使一人

咸豐二年移雲南抱香井大使駐石膏井爲石膏井大使

同治十三年裁雲南瓊鹽井提舉改爲石膏井提舉

光緒三十年山西裁鹽巡檢三員四川裁鹽大使二員直隸裁鹽大使一員鹽知事一員

宣統二年 諭督辦鹽政大臣會奏請將四川鹽茶道改爲鹽運使等語四川

鹽茶道著改爲鹽運使

又兩廣總督袁樹勛奏擬於廣東省城設立兩廣鹽政公所仿照稅差監督之例置正監督一員會同兩廣運司整頓該省鹽務並置副監督二員以佐之又鹽政處奏請停止分發兩准鹽官

皇朝續文獻通考卷一百三十四

職官考二十
各道

臣謹案直省守道巡道始於明景泰時 國初設布政使左右參政參議
曰守道按察使副使僉事曰巡道無定員類因事因地而設之如柳德水利

法之類 乾隆十八年裁去參政等銜定為正四品職分乃專關道自設
洋關始巡警道勸業道由改官制而始按年彙編如左

乾隆五十一年裁江西九江道屬九江關協造二人

五十七年改湖北分守安襄鄖兵備道為分守安襄鄖荆兵備道兼管水利

五十八年改浙江鹽道為兩浙都轉鹽運使

五十九年裁陝西分巡驛驛道改設分巡鳳邠道

嘉慶元年改陝西鹽法道為鳳邠道移駐鳳翔

四年 諭雍正年開道府同知等員俱准封章奏事因思各省道員職司巡察
與在京科道有言責者相等况科道之條陳糾劾尚多得自風聞何如監司大
員身任地方目擊本省政移民情者較為真知灼見耶嗣後除知府以下等官
仍不准奏事外其各省道員均著照藩臬兩司之例准其密摺封奏以副兼聽
並觀集思廣益至意

又改湖北漢黃德道為鄖陽兵備道

五年改陝西分巡漢興道為分巡陝安道加兵備銜

七年議准江蘇淮徐道原管之桃南桃北兩廳及桃源一縣改歸淮揚道管轄

淮揚道原管之江防揚糧兩廳改歸常鎮道管轄淮徐淮揚兩道兼巡之海州

並所屬沐陽贛榆二縣改歸淮揚道管轄

十一年奏准山西河東兵備道兼管鹽法甘肅夏兵備道陝西分巡鳳邠道

均兼管鹽法

十二年山西復設鹽務衙門以分守河南兵備道兼管鹽法裁實武府鹽捕同
知改設河東監掣同知一人

十六年議准江南蘇松糧道兼巡蘇州府屬事務改歸松太道分巡以專責成

二十四年罷安徽鳳陽關江西九江關監督以道員管理

二十五年移四川成縣龍茂道駐成都兼管水利鹽茶道專管鹽茶

咸豐三年江蘇裁河庫道一缺其所管收放錢糧即歸淮揚淮海徐各該道
分管

五年 諭軍機大臣大學士會同吏部兵部議覆侍郎沈兆霖奏請暫設皖南
巡撫一摺安徽廣池太廣五屬介在江南當此軍務繁多恐該撫鞭長莫及
自應專責文武大員俾資督率該侍郎原請暫設巡撫既屬變難行著照所
議將安徽廣池太廣道暫改為廣池太廣道加按察使銜並添設皖南鎮

總兵一員暫照臺灣鎮道之例准其會銜專摺奏事俟軍務告竣道員仍歸舊

制總兵即作為額缺以重地方而符定制

七年議准福建延建邵道加兵備銜作為分巡延建邵等處兵備道

八年改河南選缺南汝光道為調缺加兵備銜

十年江蘇裁淮揚淮海二道各一人

又改淮徐道為淮揚海道仍駐徐州其淮揚淮海二道所管地方河工各事宜
統歸該道管轄

同治四年 諭軍機大臣會同吏部兵部議覆兩江總督曾國藩等奏請添設
安廬道等缺准其添設一員分巡安廬廬州二府滁和兩直隸州即著作為安

廬滁和道其原設之鳳廬穎道著改為鳳穎六泗道分巡鳳陽穎州二府六安

泗州兩直隸州仍兼鳳陽關監督以重職守咸豐五年會同軍務將廣池太

廣道暫加按察使銜並添設皖南鎮總兵准其會銜奏事見在皖南安謐所有

暫加按察使銜著即撤銷亦不必與該鎮會銜奏事用符舊制雒河集濱臨泗

河地當衝要並著照該大臣等所擬添設泗陽縣治藉資彈壓鳳臺縣與壽州

同城著即將縣治移於下蔡鎮俾沿淮要區得所控扼宿州之龍山地關緊要

並准其添設游擊一員仍歸壽春鎮節制一切應辦事宜仍著該督等奏明辦

理

又 諭前因會國藩等奏准徐揚海道轄境遠闊請仍設准揚道缺嗣據給事中福寬奏請將江蘇揚州府改歸常鎮通海道管轄毋庸仍設准揚道員諭令議政王等一併會議茲據會同各該部悉心酌覈奏明請旨會國藩等請復設准揚河務道員係爲因時制宜起見著准其復設管理准揚兩屬其海州一屬巡道應管事件仍歸徐海道管轄作爲徐海河務兵備道所有前經奏明統歸准徐揚海道管轄之淮安府同知徐州府同知淮安府督捕通判揚州府清軍總捕同知四屬應將何屬撥歸准揚道何屬撥歸徐海道管轄暨應否於准揚河務道轄境添設移撥武弁官兵之處並著會國藩等分別奏辦至福寬所奏請將揚州府改歸常鎮通海道管轄准揚兩屬應派員弁仍屬無所稟承殊未盡善著毋庸議尋會國藩等奏准淮安同知淮安通判揚州同知皆隸准揚境內歸准揚道管轄徐州同知所屬河務汛地歸徐海道管轄以專責成准安通判所管汛地移歸改設之淮安同知專管駐紮清江浦其同知所遺汛地多在山陽境內即改歸淮安通判兼管向歸淮海道專管之蕞蕩左右兩營樵採蕪柴近年柴款變價催徵等事奏明專派大員經理今既復設道缺應改歸准揚道專管以符舊制至准揚道轄境操防各營見又添設准揚鎮標應毋庸另議移改其修防官弁俟河運復興再行體察嚴議

五年 諭前因總理各國事務衙門奏請撤山海關監督改設道員專以旗員補放請飭盛京將軍奉天府府尹三口通商大臣妥議嗣據該將軍等覆奏復降旨令該部速議茲據吏部等衙門奏稱請將沿海之金川廳岫巖城復州海城蓋平縣地方官員及所屬佐雜悉歸新設道員管轄並於奉天省候補雜職內揀派二員交該道差委即於營口直班其餘各府州縣遇有中外交涉稅務事件由該道檄飭遵辦金川廳等處錢穀刑名事件統歸督催稽查其命盜等案解勘仍照舊例辦理蓋州城守尉尉牛莊防守尉二員毋庸歸該道節制如有需兵勦捕之處准其移行該城守尉尉調撥該口所收常洋各稅令每月詳報三口通商大臣由該大臣分咨覈報其徵收稅項仍遵舊定關期辦理以杜牽混山海關所轄水旱碼頭共三十餘處仍令照則徵收無論直隸奉天等處口岸

均由該道覈實稽徵並將監督原管之海口一併歸其管理海城蓋平二縣仍照舊輪往營口任班倘遇中外交涉緊要事件准該道專摺奏聞

九年奏准廣東分巡羅道添管陽江直隸同知

又直隸設津海關道一人專管中外交涉各事件及新鈔兩關稅務

又奏准凡直隸於中外交涉事件統歸關道管轄其附近天津府並所屬滄州天津靜海鹽山慶雲各州縣永平府並所屬灤州樂亭縣遵化州豐潤縣及順天府所屬之青河縣俱係沿海地方均歸關道專轄口岸稅務照舊稽徵其專轄府州縣尋常命盜錢糧案件仍由各該管道飭辦

十年移甘肅平慶涇道駐平涼府城

光緒三年改江蘇准揚道爲准揚海道徐海道爲徐州道從兩江總督沈葆楨請也

十三年 諭岑毓英前奏布置邊防有蒙自爲通商要津之語見准設立領事

開辦通商正相脗合至蠻耗係保勝至蒙自水道必由之路准其分設領事屬員與中國分設之稅司互相稽察議定蒙自設立領事官時必於數月前先期照會以便駐紮關道安設稅司尋奏准添設臨安開廣道一缺駐紮蒙自將池

南道屬之臨安池東道屬之開化廣南三府畫歸管轄兼管關務並設道庫大使一員兼管照磨事

又兩廣總督張之洞奏請設廣西太平歸順道一員駐紮龍州廳以左江道屬之太平府南甯府屬之上思州鎮安府屬之小鎮安隸之並設道庫大使一員

升歸順州爲直隸州改小鎮安爲鎮邊縣加通判銜屬於歸順州

又撥廣西鹽法道所轄鬱林直隸州改屬左江道管轄

二十四年裁雲南糧道十月復舊

又湖廣總督張之洞奏請移沙市口監督荆宜施道並江陵縣知縣駐沙市地方

二十五年湖南巡撫俞廉三奏請將湖南岳常澧道移駐岳州兼管岳州關隘

督事務

二十八年外務部吏部議准雲貴總督魏光燾奏請將原駐大理府之迤西道移駐騰越廳城兼管關務並添設庫大使一員兼管照磨事

臣謹案騰越為英緬入滇第一門戶地處極邊幅員遼闊與緬界犬牙相錯防務界務均極繁難時開關互市交涉尤為緊要非駐監司難資控馭

二十九載陝西糧道
又裁湖北糧道增設施鶴兵備道管轄施南鶴峯作為苗疆最要缺改鶴峯州為直隸廳同知作為苗疆要缺並改州判為廳經歷駐紮劉駕司州訓導為廳訓導州吏目為廳司獄從湖廣總督張之洞請也

臣謹案湖北施南府屬境地本係苗疆界連巴蜀其宜昌府屬鶴峯州亦苗疆舊地遠接湖南距湖北省城一千九百八十餘里其開山深林密伏莽繁多民風喬野教案迭出非設監司督察鎮撫不足以靖邊圉而輯民生故督臣因以為請

三十年直隸裁巡道一員
又議以淮揚海道兼按察使銜
又裁陝西糧道缺從巡撫升允請裁直隸霸昌道缺從總督袁世凱請
又改登萊青道為登萊青膠道

臣謹案德國租借膠澳開辦膠濟鐵路膠州為首站東為即墨西為高密皆鐵路所經之地其開交涉繁重非品秩較崇之員難資鎮壓

三十一年政務處吏部議覆署兩廣總督岑春煊奏請裁撤廣東督糧道添設廉欽兵備道駐紮欽州管轄一府一州定為衝繁難邊遠要缺由外升調揀補以糧道原轄廣州府佛岡赤溪二直隸廳改隸肇羅道移駐省城以原屬雷瓊道之雷州府原屬肇陽羅道之陽江直隸廳連同高州府歸高廉道管轄更名高雷陽道仍駐高州原設之雷瓊道更名瓊崖道仍駐瓊州又升改瓊州府屬崖州知州為直隸州以感恩昌化陵水三縣及萬州改設萬縣均歸管轄定為衝繁難邊要缺

三十三年署山東巡撫吳廷斌奏請裁撤山東督糧道騰出經費增設巡警勸

業兩道

三十四年憲政編查館奏考核直省巡警道官制細則略稱民政部擬訂直省巡警道官制一摺內稱巡警一端為防患保安之要各省雖已先期而行編制各殊章程互異不獨精神未能統一即形式亦復參差遵即按照釐定官制王大臣奏定外省官制並參酌學部奏定各省學務官制章程擬成巡警道官制及分課細則十五條請 飭下憲政編查館核奏請頒行等語 臣等詳加考核為統一警務起見應如所奏通行各省增設巡警道一缺原奏第二條所稱由部奏請及督撫咨送一節自應酌改以符體制第八至第十條警務公所分設四課課長秩視五品副課長秩視六品查各部分司俱以郎中領職各省提學司提法司所屬各課課長亦均以五品為限警務公所既為道屬品秩自應略降以示區別 臣等考核原奏各條酌為改併益以第十一條之巡警學堂一項以期養成警務人員

巡警道官制並分課辦事細則

第一條 各省按照奏定官制設巡警道一員歸本省督撫統屬管理全省巡警事宜 第二條 各省巡警道須諳習警務並熟悉地方情形遇有新設此項道員或原有巡警道出缺由該省督撫在實缺暨本省候補道員內遴保二員奏請 簡放或先行試署民政部亦可預保存記遇有缺出由軍機處開呈候 簡 第三條 巡警道自到任日起三年作為俸滿屆時各該省督撫將平日所辦事宜有無成效詳咨民政部由部查核分別最殿奏 聞 第四條 巡警道受督撫考核仍由民政部隨時考查如有任事日久實在不能得力者即行據實奏參 第五條 舉辦一切事宜隨時申報督撫仍於年終彙造冊表申報民政部查核如遇重要准一面申請督撫一面報部 第六條 督飭各廳州縣按照奏定官制通則各就所管地方分區舉辦巡警並稟明督撫隨時履查或派員視察即將詳細情形稟報本省督撫並申民政部備案 第七條 各省舉辦巡警款項由巡警道隨時稟請督撫撥用按年所用各款除稟由督撫照例奏銷外仍由該道彙造清

冊申報民政部查核 第八條 就所治地方設立警務公所督率所屬每日入所辦事公所分設四課 一總務掌公所總彙之事凡承辦機要議訂章程考核屬員分配官警編存文牘收發經費統計報告及巡警學堂各事項 二行政掌行政警察高等警察國際警察之事凡整飭風俗保護治安調查戶口籍貫稽核道路工程及消防警察各事項 三司法掌司法警察凡預審探訪督捕拘押及處理違警罪各事項 四衛生掌衛生警察凡清道防疫檢查食物屠宰考驗醫務醫科及官立醫院各事項皆屬之 第九條 每課設課長副課長各一員其課員額缺由巡警道酌量事務繁簡定之但每課至多不得過三四員 第十條 課長秩視六品副課長秩視七品課員視八品均以中外警務學堂畢業生及會辦警務得力人員稟准督撫分別任用但開辦之初不拘原官品級酌量差委仍將各員履歷申報督撫咨明民政部備案 第十一條 巡警有保衛地方監察人民之責非品格高尚於警政學研究有素不能勝任各省用人較多應先從辦理巡警學堂入手分派各廳州縣務使畢業人才足用為度不得以舊有弁勇胥役人等改編充數致滋流弊 第十二條 各廳州縣設警務長一員並區官若干員均受巡警道及該地方官指揮監督區官以下有巡官巡長巡警等名目均按照民政部定章辦理 第十三條 各廳州縣每屆年終將該處警務製成統計冊表申報巡警道查考 第十四條 巡警道得量地方情形督同所屬酌擬辦事細則稟准督撫施行並申報民政部立案 第十五條 各省侯巡警道到任後所有原設之總理巡警事務等局與巡警道職掌重複者一律裁撤歸併辦理

又憲政編查館奏定直省勸業道官制

第一條 設勸業道秩正四品歸本省督撫統屬管理全省農工商礦及各項交通事務 第二條 勸業道就京外應升人員遴選曾充農工商礦及交通各差或提倡公司局廠或曾在農工商部郵傳部供差確有經驗者 第三條 勸業道由各省督撫在實缺暨本省候補道員內遴保二三人奏

請 簡放或先試署農工商部郵傳部亦可會同預保存記遇有缺出由軍機處開單候 簡 第四條 勸業道自到任日起三年俸滿屆時該督撫將辦事有無成效詳咨農工商部郵傳部會同查考分別最殿奏 聞 第五條 勸業道受督撫考核仍由農工商部郵傳部隨時考查如有實在不能得力者據實奏參 第六條 各省興辦農工商礦各實業及推廣船路郵電等事由勸業道隨時調查呈明農工商部郵傳部及本省督撫設法籌辦 第七條 關於實業及交通之學堂公司局廠除由農工商部郵傳部及督撫奏派大員辦理者外均由勸業道隨時考察 第八條 各省所設農會商會等項有勸導稽查之責其各省原設之招商鐵路電報郵政等局及商辦鐵路公司該道應會同商督飭保護 第九條 農工商部郵傳部在各省特設專局由勸業道兼轄者應按照定章切實籌辦 第十條 所辦各事按年詳列表冊報部以備統計 第十一條 辦公經費由本省督撫籌撥並由農工商部郵傳部分別缺分繁簡每年酌給調查費二千兩以內分兩季詳請照數撥給 第十二條 設立公所督率各員每日入所辦事公所分設六科 一總務掌承辦機要議訂章程考核屬員編存文牘收發經費統計報告及實業交通學堂各事項 二農務掌農田屯墾森林漁業樹藝蠶桑及農會農事試驗場各事項 三工藝掌工藝製造機器專利改良土貨仿造洋貨工廠各事項 四商務掌商業商勸業會保險及商會各事項 五礦務掌調查礦產查核探礦開礦聘請礦師及礦務公司各事項 六郵傳掌航業鐵路輪車電綫及測量沙綫營治埠頭廠塢考查路線稽核通運行車並電話電報郵政各事項 第十三條 每科設科長副科長各一人其科員額缺酌量事務繁簡定之惟總務郵傳每科不得過四五人其餘每科不得過二三人 第十四條 科長秩視六品副科長秩視七品科員秩視八品均以中外高等中等實業或路電等項學堂畢業生及會辦實業或交通事務有經驗人員稟准督撫分別任用 第十五條 各廳州縣設勸業員一人受勸業道及該地方官指揮監督掌理該廳州縣實業及交通事宜

其勸業員得參用本地士紳由地方官詳請督撫考取委用 第十六條

各廳州縣年終應將所辦實業及本境交通情形製統計表冊報勸業道查

考 第十七條 勸業道得酌量地方情形督同所屬酌擬細則稟准督撫

施行並申報農工商部郵傳部立案 第十八條 原設農工商礦各局所

到任後均歸管理惟該道於各項實業未遑周悉應擇擅長者歸併專任

又陝西巡撫恩壽奏請將鹽運道改為巡警道仍兼理鹽法水利各事

又貴州巡撫龐鴻書奏請將貴州糧儲道及分巡貴西兵備道缺裁撤改設巡

警勸業兩道均如所請行

又裁撤四川分巡成縣龍茂道缺改設巡警道勸業道

又吏部等議准安徽甯池太廣道改為皖南道鳳穎六泗道改為皖北道二道

均兼關務皆為兵備道裁撤安廬滁和道一缺以安慶府分隸皖南道以廬滁

和三府州分隸皖北道甯池太廣道係請 旨衝繁難要缺鳳穎六泗道係

請 旨衝繁疲難最要缺今改為皖南皖北二道所有缺目毋庸更改

又湖南巡撫岑春煇奏遵 旨增設巡警道勸業道兩缺遴員試署

宣統元年江西巡撫馮汝駉奏裁撤糧道籌議巡警勸業各道略稱江西鹽法

兼巡瑞袁臨道移駐萍鄉改兼兵備道責重事繁鹽局津貼既停應籌定經費

以資辦公 臣查照湖北成案每年撥給巡警勸業兩道公費銀各一萬兩鹽法

道兼分巡兵備道仿照吉南贛甯道撥給公費銀一萬兩巡費銀二千兩又查

湖北巡警道巡費係在警察經費內開支擬暫仿照辦理俟勸業道由農工商

部支領津貼調查銀二千兩之日起亦按年在警察經費內動支銀二千兩以

昭畫一所需巡警勸業兩道衙門及警務勸業公所即以舊有糧道鹽道衙署

修改各道均係正四品照例每年應支俸銀一百五十兩養廉照鹽法道例每

年支銀三千兩各役工食亦照鹽道衙門役食例每年支銀二百三十兩一錢

查糧道俸薪役食歷在豐城縣地丁銀內坐支與巡警道應支俸銀及各役工

食數目相符見糧道裁撤擬即將原編豐城糧道俸銀役食撥歸巡警道其勸

業道俸銀役食即在南昌縣地丁銀內坐支各該道養廉均由司庫於各屬解

到地丁耗羨銀內動支所有糧道分巡之南撫建三府審度地勢南昌官改隸

鹽法道撫建宜改隸廣饒九道俾便統轄一面派員前赴萍鄉估建鹽巡兵備

道衙門俾得早日移駐以重職守

又山西巡撫賈奏裁撤雁平道缺改設巡警道

又廣西巡撫張鳴岐奏添設巡警道

又浙江巡撫增韜奏增設巡警勸業兩道

又河南巡撫吳重熹奏擬裁糧鹽道缺增設巡警勸業兩道略稱豫省開歸陳

許鄭道彰衛懷道均兼管河工責任較重應仍其舊其南汝光道河陝汝道距

省寫遠地屬要衝須有大員鎮攝未便輕裁惟糧鹽道一缺豫濟久已停運所

管鹽務事不其繁擬即行裁撤所有糧鹽事務歸藩司兼理該道向未設道庫

大使由開封府經歷兼理見既裁撤應將該經歷兼理道庫大使名目撤銷照

續訂官制增設巡警道一員將全省警政悉歸巡警道辦理其舊有之巡警總

局改為警務公所又增設勸業道一員將實業交通專歸勸業道辦理裁缺糧

鹽道所轄水利歸勸業道兼管舊有之商務農工商礦政調查各局併焉

又東三省總督錫良奉天巡撫程德全革職直隸總督端方奏道員缺分雖改

職掌仍舊請照定例辦理略稱查天津煙台營口三處關稅從前本歸三口通

商大臣管理嗣於同治九年奉 諭毛昶熙請撤三口通商大臣著照所議即

行裁撤所有洋務海防事宜歸直隸總督經管照南洋大臣之例頒給欵差大

臣關防其山東登萊青道所管之東海關奉天奉錦道所管之牛莊關均歸該

大臣統轄東海關每結洋稅向由北洋主政會奏其山海關洋稅常稅均歸北

洋奏銷不會奉天督撫之銜該道遇有升遷事故應委署理人員向由奉天按

次輪派迄今四十年又查吏部銓選則例載奉天東邊兵備道作為題補最要

缺夏間駐紮東溝秋後駐紮頭道江冬末再回鳳凰城遇有缺出山該將軍等

咨會北洋大臣直隸總督於奉天直隸兩省見任道員中各保一員請 旨簡

調如奉天直隸兩省候補道員及見任知府內確有人地相宜堪勝邊要者准

由 盛京將軍直隸總督各保一員請 旨簡著俟試署一年期滿再請補請

陸誠以該道接壤朝鮮缺關重要合兩省之道府各班道員請 簡本年准內閣會議政務處咨升任東三省督臣徐世昌奏改奉錦山海關道爲錦新等處分巡兵備道兼山海關監督仍治營口專隸奉省又改東邊道爲興鳳等處分巡兵備道仍治安東該道員缺由奉省循章擇員保奏請 旨簡補已由政務處核准惟奉錦道仍收直隸境內之稅東邊道例有直隸會保之條 臣端方到任後檢查原奏適 臣錫良 臣德全亦以事關兩省慮有窒礙咨商到直 臣等會同籌議奉錦道移駐營口歷年已久非因前駐直境山海關始歸北洋統轄見改爲錦新等處分巡兵備道不過於錦州府外加一新民府原管海關既仍舊貫駐地亦未遷移是其職掌并無改易且近年直屬奉王島開埠設關凡出口土貨與夫進口洋貨均由該道派員權稅其所設常關實在直屬臨榆縣境不便遽改舊章專隸奉省東邊兵備道本係邊疆要缺自光緒三十二年安東縣設立海關以該道兼充監督仍令兼管中江稅務并將大東溝爲該關附設分卡歸其兼轄奉天向無分發人員奉直壤地相接調往尤多定例東邊道遇有缺出由奉直兩省保員請 簡實爲邊材難得慎重要缺起見未可輕議更張 臣等但期於公有益決不敢稍存私意奉錦道改爲錦新道東邊道改爲興鳳道既由政務處核議覆准自應遵照辦理惟錦新道監督之山海關本係北洋三關之一擬仍令兼受北洋管轄監督安東關之興鳳道例保奉直兩省之員擬循章辦理庶辦事不致隔閡

二年雲貴總督李經羲奏滇省道府同通州縣各缺奏限屆滿惟是時局日艱需才更急不循資格尙難爲地擇人若守例章勢必多方遷就懇請 俯念邊陲緊要准仍將各缺變通補署否選各缺並准扣留外補展限兩年俟第二屆限滿再復舊制

又閩浙總督松壽奏裁福建糧道增設巡警勸業兩道

又議准裁撤山西冀甯道改設勸業道員缺

又督辦鹽政大臣載澤奏江西鹽法道移駐萍鄉專任分巡請將所管鹽法事宜歸併藩司兼管

又民政部奏定巡警道屬官任用章程

第一條 本章程所稱巡警道屬官指左列各員而言 一 本公所科長 副科長科員 二 各廳州縣警務長及各分區區官 第二條 巡警道屬官以考試合格者分別奏咨補用 第三條 巡警道屬官考試分爲二種 一 高等考試 二 區官考試 第四條 有左列資格之一者得應高等考試 一 在高等巡警或法政法律學堂三年以上畢業得有文憑者 二 曾辦警務著有成績三年以上者 其在京師法政大學法政學堂正科或高等巡警學堂正科畢業或在外國法政大學或法政專門學堂畢業經學部考試給予出身者得免其考試視與高等考試合格者同 第五條 高等考試應行試驗科目 一 憲法綱要 二 大清違警律 三 法學通論 四 警察學 五 奏定各種警察章程 六 地方自治及選舉章程 七 各國戶籍法大意 八 統計學 前項第一至第四爲主要科應全行試驗第五至第八爲揀擇科得由應試者任擇一二先期報明 主要科分數有不及格者餘科分數雖多不得錄取 第六條 高等考試由巡警道主試詳請督撫派員監試並遴派深通中外法學者爲襄校 第七條 考試合格者由巡警道按照成績及原有官階出身詳請督撫分別派署科長副科長或廳州縣警務長俟一年期滿再由巡警道出具考語詳請督撫奏補並將履歷咨行民政部存案若合格人逾定額時由巡警道詳請督撫記名俟有缺出再行派署 第八條 科長副科長及警務長奏補後仍留原官原銜每屆三年巡警道查驗該員辦事成績出具考語詳由督撫奏請分別升黜並咨民政部存案其有辦事不能得力者隨時詳請督撫撤換分別奏咨辦理 第九條 有左列資格之一者得應區官考試 一 在高等巡警學堂附設簡易科或中學堂以上畢業得有文憑者 二 照各省巡警學堂章程第二十條規定經派充巡長在任一年以上者 第十條 區官考試應行試驗科目 一 本國法制大意 二 大清違警律 三 警察要旨 第十一條 區官考試由巡警道率同

各科長或派員會同警務長舉行之 第十二條 考試合格者由巡警道按照成績及原有官階出身分別派署區官滿一年後果係稱職再行補實均由巡警道詳請督撫辦理並將履歷咨送民政部存案 若合格人逾定額時應以區官記名俟缺出候傳 區官補缺後仍留原官原銜每屆三年甄別一次其辦事不能得力者由巡警道詳請督撫撤換 第十三條 本章程以奏定頒行文到日為施行之期嗣後如有應行變通之處隨時酌改具奏其施行細則由巡警道酌訂詳請督撫核定咨部辦理

又兩江總督張人駿奏查憲政編查館奏定章程勸業道應就所治地方設立公所分設六科督率所屬各員辦事又各省原設農工商礦各局所均歸勸業道管理如不便概行歸併應將舊有總辦得力者仍舊分任局所事務改為會辦坐辦由該道總司查察辦理查江南原設商務局係在勸業道所管六科之一應將該局裁撤改為勸業公所照章分選科長科員由該道督率辦理又裕甯官銀錢局本係營業性質電燈官廠及公園亦為實業所關該局廠未設總辦俱應歸勸業道經營尚有江南礦政局甯省鐵路管理處南洋印刷官廠事務較繁各有專員經理均屬未便裁併應將總辦改為會辦照舊任事又勸業會事務所因甫經開會端緒繁多亦應仍舊設立俟勸業會閉後再將事務所裁撤歸併勸業公所所以節經費

又農工商部等會奏查憲政編查館奏定勸業道官制細則內僅有督飭地方官切實奉行考察勤惰之權而無實行考核糾舉之責若不稍為變通重其職掌恐不足以資督率而利推行查勸業道一職管理全省農工商礦及各項交通事務較新設之巡警道職掌尤重擬請照民政部巡警道職權辦法凡已設勸業道各省遇有關於地方官員補署舉劾等事一律會詳

臣謹案巡警勸業均轄全省應稱司不稱道惟司屬三品非部曹應升之階抑之為道可以簡放改官制專為京員謀出路可議者此其一端也

又會議政務處奏議覆四川總督趙爾巽等奏請於登科府治設分巡兼兵備道一員名曰邊北道作為邊疆要缺一切事務歸邊務大臣統轄以圖治理而

資控馭

三年議准四川設康安分巡兵備道一員兼理刑名加提法使銜又直隸總督陳夔龍奏查憲政編查館奏定直省勸業道官制細則嗣後按察使改為提法使時應將驛傳事務盡歸該道管理等語查直隸按察使業於上年改補提法使所有驛傳事務自應移歸勸業道管理

皇朝續文獻通考卷一百三十五

職官考二十一

府廳州縣佐雜

臣謹案知府始於宋周鄉大夫遂大夫秦郡守漢太守也同知始於明

知二字非官名元史張德同知轉運使余闕同即遼金元之同知府事秦

長史漢治中後周之郡丞也通判始於宋漢別駕隋通守唐司馬也

非郡守之丞乃兵之官郡丞有丞有長史刺史下有從事按史皆無司

馬也魏晉以降除刺史者必加將軍軍部將軍軍事故魏有司馬之名隋

因以同馬為部以此今經歷照磨始於明知事始於元司獄始於金直隸州

知州始於國朝唐州刺史也州同州判始於明州吏目始於元知州始

於宋周州長漢刺史也知縣始於宋周縣正邑宰秦漢令長隋縣令也秦

為縣置令丞史記商則縣丞始於戰國然秦漢以來皆稱丞其稱縣丞實

始國朝主簿始於漢巡檢始於金典史始於元驛丞始於明州縣置醫

官始於唐開元十一年茲分府廳州縣佐雜三目彙編於後

乾隆五十六年吏部議准兩廣總督公福康安奏廣西太平府龍州緊接安南

地界見在開關通市稽查商民所關尤重通判職分較小難資彈壓查潯州府

同知附郡事簡應請改為通判龍州通判改為同知

又議准設甘肅貴德同知一人

五十七年議准改湖北安陸府同知移駐鍾祥縣屬白口地方

嘉慶二年 諭貴州南甯府係由應改郡本年春開神苗滋事府城被圍將及

半載昨據勒保奏攻解圍城後查明城內紳士民人等隨同官員守禦晝夜不

懈且有捐助薪米召募鄉勇者已降旨賞給頂戴免錢糧矣今思該郡紳民

深明大義被圍日久固守無虞允宜特錫嘉名用昭勸勵南甯府著改為興義

府

又改貴州平越府為平越直隸州裁知府等官改銅仁府松桃同知為松桃直

隸廳同知添設經歷一人

四年議准改山東曹州府管糧通判為糧河通判改曹單同知為曹河同知

十年改江蘇松江府董漕同知為川沙撫民同知

十一年陞廣東南雄直隸州為南雄府陞嘉應直隸州為嘉應府各設知府通

判經歷等官

十三年改安徽鳳陽府南平集撫民同知為鳳陽潁州二府分防捕盜同知

十五年改湖北襄陽府清軍水利同知為鹽捕廳同知改黃州府武穴鎮同知

為武黃同知

十六年議准改廣東嘉應府為嘉應直隸州裁知府通判經歷各一人裁惠州

府通判以通判歸惠州府同知管轄於大埔坪地方添設佛岡直隸廳同知一

人並所屬照磨司獄各一人

又議准雲南東川一府在省城東北東鄰貴州西北與四川接壤廣延千有餘

里五方雜處案件甲於各府該境內北界巧家地方距城四百里向分駐經歷

一員但係佐雜例不勘驗命盜案件添設同知一人駐巧家地方即以原設經

歷為同知首領大理府同知一人又他郎廳通判向未設有首領該處民夷

雜處添設知事一人

道光二年改雲南騰越直隸同知為永昌府同知

又添設直隸遵化州理事同知裁州同知

又改雲南開化府同知為安平同知

又移江西贛州府通判駐大湖江

二十年添設雲南邱北縣知縣恩樂縣知縣移師宗縣訓導為邱北縣訓導

恩樂縣典史為邱北縣典史改鎮沅直隸州知州為鎮沅直隸廳同知駐恩樂

縣改邱北縣丞為鎮沅廳分防經歷鎮沅學正為教授吏目為司獄恩樂縣教

諭為鎮沅復設訓導移臨安府捕盜同知駐阿迷州雙水塘

二十二年 諭訥爾經額奏請大沽設立海防同知一員作為題缺稽察入口

出口船隻查驗照票有無夾帶違禁貨物及兵民強買盜買漏稅等弊准理兵

民客商詞訟其命盜重案仍歸縣辦照海疆三年例滿本例升轉即於本省簡

僻同知通判內酌裁一缺等語著照所議辦理所有善後經費該督請於蘆綱

加價銀內酌撥二十五萬兩以五萬兩作為購備商船建造衙署之用以二十萬兩發商生息以八千兩陸續歸本以一萬六千兩作為歲費如有盈餘年終報查盡存天津道庫歸入交代等語准其酌撥籌辦

又改江蘇揚州府總捕同知為糧捕同知通州糧河通判為運河通判

二十五年改廣東惠州府海防同知為廣州府虎門屯防同知廣州府永甯通判為惠州府海防通判

咸豐元年浙江裁台州府通判一人

二年移雲南省雲南府同知駐南關裁該府南關通判

五年山西裁平陽府同知歸該府知府兼管

又甘肅裁鎮西府知府改為撫民直隸同知兼管滿營事六年改江蘇淮安府

桃源安濟中河通判為同知海阜北岸同知為通判

八年江蘇裁徐州府睢南同知歸宿南通判管理裁邳北通判歸宿北同知管理

十年江蘇裁豐北蕭南銅沛宿南宿北桃南桃北外南外北海防海阜海安山安等廳同知十三人又裁管理洪湖運河之中河裏河運河高堰山盱揚河江

運等廳同知七人改設徐州府同知一人淮安府同知一人

同治五年改浙江台州府同知駐家子家子在海門西十里管理海門巡防海口事宜移原駐海門之臨海縣丞於花橋黃巖縣丞於烏巖甯海縣丞於亭傍分

司緝捕

七年改廣東佛山同知為簡缺裁瓊防同知增赤溪同知

十年添設江蘇堰圩同知駐長隄改揚州府總捕同知為河務同知

又改甘肅甯夏水利同知為甯靈撫民同知

光緒二年吏部等遵議會覆廣西巡撫劉長佑奏請廣西土田州改土歸流於所屬燕崗地方置恩隆縣隸思恩府駐土知州一員設知縣訓導典史各一員並設縣丞一員駐防上田里平馬墟設下隆里上恩里篆里巡檢各一員設恩隆營守備千總把總各一員分駐百色屬恩隆城隸右江鎮統轄又升苗疆百

色廳同知為百色直隸廳同知設學正一員照磨一員又改奉議州為流仍屬

鎮安府裁土州判一員設奉議州知州一員並吏目一員

又移湖北江夏縣黃巡檢駐均州孫家灣以夏縣縣丞移駐許黃專司水利

又直隸設承德府圍場廳同知一員並司獄一員於所屬西圍設巡檢一員

六年直隸移大名府同知駐高村南隄適中之地移大名縣漳河縣丞駐上游

李連莊又移開州呂邱店州判駐下游黃莊

又改貴州長寨同知為羅斛同知又裁奉天甯海縣設金州廳海防同知一員

又改貴州羅斛州判為定番州州判駐長寨

又部議准直隸總督李鴻章奏請改直隸張家口多倫諾爾理事同知為撫民

同知

八年改山西歸化城薩拉齊豐鎮三廳理事同知為撫民同知加理事同知銜

改甯遠清水河和林格爾托克托城四廳理事通判為撫民通判加理事通判

銜嗣後於實缺候補同通內不分滿漢揀選調補

十三年改廣東欽州屬防城司為防城縣設知縣等官

十六年升廣東廉州府屬之欽州為直隸州知州

十七年雲貴總督王文韶等奏准雲南永北直隸廳屬北勝土州同屬境改土

歸流請添設經歷一員分防永北直隸廳華榮莊

又吏部議覆兩廣總督李瀚章廣西巡撫馬丕瑤奏請將上思州知州升為直

隸廳同知不隸太平府仍歸太平歸順道統轄改州吏目為廳照磨兼司獄事

二十年吏部等議覆湖南巡撫吳大澂奏改湖南岳州府管糧通判為南洲直

隸廳撫民通判駐紮九都地方歸岳常澧道管轄並將武陵縣大龍驛巡檢改

為南洲廳巡檢兼司獄事移安鄉縣復設教諭為南洲廳教諭撥移澧州營左

哨千總駐烏嘴為駐防南洲廳專汛北汛協防外委駐九都為南洲廳協汛

臣謹案光緒十六年湖南巡撫王文韶奏言洞庭湖為東南巨浸納南條

百川之水而司其蓄洩急則受諸衆河徐而還諸大江吞吐有權以能容

為量實為湖南北兩省水利樞紐自荆江南岸藕池潰口江水橫決而南

挾泥沙以趨洞庭沙沈淤積西湖一帶漸以成洲見合龍陽華容安鄉三縣轄境計之廣袤幾二百里土人名之曰南洲貧窮私墾豪強爭佔蟻聚蜂屯五方雜處納汗藏垢訟獄滋多此皆近年情形臣初次撫湘時尙不至此然此禍患之顯著者也惟洲地愈積愈寬則河面愈狹容水之區日偏必致橫溢四出湖北則荆江大隄受其害湖南則濱湖州縣被其災蓋湖中之水既漸變而爲田則湖外之田將盡變而爲水此必然之勢也臣上年到任後察悉情形以爲湖南之大患無有過於此者明知已成之洲萬不能再事剔除俾復全湖之舊然救敝補偏亦正岌岌不可終日滿擬俟今年秋後水落遴委講求水利實心任事之員周歷重湖詳加查勘或培官隄以禦汎漲或開支渠以導衆流或將荒溜裁灣取直以引溜而刷沙總期於辰沅資澄諸江水入湖之口不致壅遏不通激成氾濫之勢並申明定例嚴禁私築隄垸私墾官荒凡有淤洲苟無礙水道亦祇准官爲招佃不准民間指請升科即有昔爲湖業今成陸地之處亦祇准豁除漁課不得藉水佔地仍於南洲地方添設水師一營常川駐紮巡防無令寇盜因以爲資致陷宋楊么明陳友諒故轍此皆臣私憂竊計而亟思設法補救者惜恩惠瓜代未及見諸施行惟念臣兩任湖撫湘人安臣之教令有過尋常臣既無德於湘人而並此地方利害所關亦未能及早措置冀弭巨患於方來此尤臣所夙夜疚心而不能自己者也後於光緒十八年繼任撫臣張煦委員勸丈會同督臣張之洞以移設官吏爲請至是撫臣吳大澂續陳其事始設廳治然湘鄂兩省水利未之計及是以貽患於今爲烈矣

二十五年總理各國事務衙門會同吏部奏准山東登州府同知移駐威海作爲海防同知要缺

二十九年政務處吏部議覆山西移太原府同知駐歸綏道屬豐鎮廳治之二道河改名興和廳撫民同知加理事銜移汾州府同知駐歸綏道屬薩拉齊廳治之大奈太改名五原廳撫民同知加理事銜移澤州府同知駐歸綏道屬歸

化廳治之翁浪城改名武川廳撫民同知加理事銜移蒲州府同知改甯遠廳仍名甯遠廳撫民同知加理事銜移甯遠廳撫民通判駐歸綏道屬甯遠廳治之科布爾改名陶林廳撫民通判加理事銜改二道河科布爾原有巡檢二缺兼管司獄事甯遠廳原有通判司獄一缺改爲同知司獄武川五原二廳各設同知司獄一員

又議覆兩江總督魏光燾奏請將江西贛州府分防觀音閣通判改爲虔南廳撫民通判即以原轄龍南縣屬大龍鎮三堡信豐縣屬楊溪等四堡之地撥歸管理移改龍南縣教諭爲廳教諭贛州府照磨爲廳照磨兼管監獄事信豐縣原設楊溪堡巡檢改隸通判統轄

三十年吏部議准河南移許州糧捕水利州判駐繁城鎮

臣謹案繁城鎮地方濱臨潁河界連數縣水陸交衝素爲商賈會萃之區自鐵路通後領境尤關緊要

又河南裁通判四員州判二員縣丞六員巡檢一員復設教諭五十七員復設訓導四十七員又山西裁同知一員通判二員州判二員照磨一員縣丞三員主簿一員巡檢十二員驛丞四員鹽巡檢三員又四川裁通判三員州判一員縣丞二員驛丞三員鹽大使二員

又政務處議准升改山東膠州知州爲直隸州知州定爲衝繁難外調要缺以卽墨高密二縣隸之仍歸登萊青道管轄並改州同爲直隸州州同

又河南巡撫陳夔龍奏見他處漢鐵路南北將次銜接開封東西枝路亦經興工鄭州居中爲之樞紐將來商旅絡繹華洋輻輳衝劇繁難數倍曩昔該州距府治一百餘里其北榮澤其西榮陽汜水皆鐵路經行之地距府治愈遠自非酌量分撥另設官階較崇之員就近控制不足以聯聲氣而赴事機擬請改河南鄭州知州爲直隸州知州定爲衝繁疲難外調要缺以榮陽榮澤汜水三縣撥隸州屬隸開歸陳許道統轄並改州判爲直隸州州判政務處議覆准行

又直隸裁理事同知二員地方同知三員河工同知二員理事通判一員地方通判三員布理問一員直隸州州同二員直隸州州判五員地方州判一員河

工州判五員地方縣丞四員河工縣丞十員地方主簿二員河工主簿十員地方巡檢二員河工巡檢三員府倉大使一員倉大使一員開官二員

三十一年政務處議准江蘇江安糧道一缺仍舊設立蘇州海防同知一缺移駐太平洲改為太平廳撫民同知蘇州府管糧通判一缺移駐洞庭西山改為靖湖廳撫民通判青浦縣主簿移駐黃渡鎮滬縣主簿移駐梧梧山廉俸等項仍舊支給

又移廣西慶遠府理苗同知駐思恩縣屬五十二峒

又政務處議准河南南陽府浙川撫民同知改為直隸廳同知毋庸再隸南陽府兼管

三十二年政務處覆奏署兩廣總督岑春煊奏廣東惠州府地當東江之衝非熟悉情形之員難期得力擬請變通辦理將該府改為題調要缺由外揀補等語查惠州襟控海疆地方重要既據奏稱民俗強悍盜風素熾非情形熟悉者未易措置裕如惟該府向係請旨簡放之缺今昔情形不同自應量為變通擬請援照江西贛州府廣東潮州府各缺成案嗣後缺出應請旨飭該督於通省知府內揀員調補遺缺仍備員補授庶於例章無礙而該省亦收因地擇人之效

又議覆廣西巡撫李經羲奏請以桂林同知移駐雒容縣屬中渡地方改為中渡撫民同知定為繁難題調要缺初次揀補但期人地相宜不拘丞倅州縣酌量揀補一次以後升補兼行並設照磨兼司獄一員其駐中渡原隸雒容縣之平樂司巡檢移駐平山城更名平山司巡檢改為中渡同知管轄

謹案中渡地方為桂柳二府之關鍵扼四十八崗之咽喉所轄地面計二千七百九十里

又添設法庫門撫民同知同江廳河防同知各一缺江家屯撫民通判一缺遼中縣知縣一缺分防縣丞分防巡檢各一缺

又議准廣東虎門屯防同知改為捕盜同知仍兼管屯防事宜分轄東莞香山兩縣捕務

又政務處吏部議覆署兩廣總督岑春煊奏請改陽江直隸同知為直隸州知州以肇慶府屬之陽春恩平二縣撥歸管轄仍隸高雷陽道並裁該廳原有之復設教諭縣丞司獄三員改訓導為直隸州學正設直隸州州判吏目二員原設太平司海陵島司兩巡檢均歸管轄又廣東惠州府改為題調要缺由外升調揀補

三十三年 諭翰林院侍讀吳士鑑奏江西義甯州萍鄉縣鄰近湘省轄境太寬請析疆分治一摺著端方張之洞瑞良岑春煊體察情形會同議奏尋議覆請加江西鹽法道兵備銜移駐萍鄉縣城改義甯州銅鼓營同知為瑞州府銅鼓廳撫民同知以排埠司巡檢屬之移袁州府同知於萍鄉縣上栗市為上栗市廳撫民同知復設萍鄉縣新店巡檢改為大安司巡檢仍駐新店

又考察政治館等議覆山西巡撫恩壽等會奏秦晉邊界郡王札薩克兩旗之板素壕地方擬設撫民理事通判一員地在前明為東勝城即名曰東勝應以山西汾州府積口通判移駐管理並以汾陽縣冀都巡檢移駐積口改名積口巡檢

又議准兩廣總督張人駿奏請將廣西平樂府岑嶺同知移駐賀縣信都改為信都廳撫民同知並將賀縣原設之信都司巡檢改為廳照磨兼司獄

三十四年浙江巡撫增韞奏准將捕盜同知移駐錢塘縣瓶窰鎮

又考察政治館議准張人駿奏請將廣東雷州府海防同知及曲江高要海陽歸善等縣縣丞即行裁撤

又議准岑春煊奏請以長沙府督捕水利同知移設株洲改為株洲撫民同知並將湘潭縣黃茅驛巡檢移駐名為株洲巡檢

又改四川敘永直隸廳同知為永甯直隸州知州管轄古瀘古宋二縣

又議准升雲南鎮雄州為直隸州

又奏定變通補員缺章程熱河蒙旗添設開魯林西綏東知縣三缺升赤峯縣為直隸州知州改赤峯縣典史為州吏目

宣統元年陳夔龍奏查宜昌府通判移駐東湖縣屬鴉雀嶺地方係為因地制

宜藉資控馭起見一切事宜雖視從前職任較重然比之衝繁要缺尙屬有閒
應請仍作簡缺

又廣西巡撫張鳴岐奏議裁柳州府通判鬱林州州判布經歷按經廳各府經
歷知事各土州土縣州同州判吏目典史龍勝廳龍勝司巡檢等三十缺下所
司議尋憲政編查館奏裁撤各缺均屬可行

又浙江巡撫增韞奏浙江甯波府屬南田兀峙外海貼近三門與甯海定海玉
環等廳縣相爲犄角誠爲東浙屏蔽南洋要衝近來擊剛漸廣生齒日繁自非
專設文武員弁不足以資治理擬請設一廳治名曰南田撫民廳以甯波府水
利通判移駐定爲海疆衝繁要缺仍歸甯波府管轄並擬添設管獄官以向駐
郡城兼甬東巡檢事四明驛丞隨通判移駐卽爲南田巡檢兼司獄官四明驛
丞作爲裁缺所遺驛丞巡檢事務就近改歸甯波府經歷兼管各專責成至武
職員弁擬請以提標左營游擊移駐南田適中之樊巖與撫民廳統轄水陸全
境原駐郡城守備千總二員移設龍泉鶴浦兩塘分駐巡防把總一員隨同游
擊駐紮樊巖作爲城汛凡原隸左營駐紮郡城外額各弁以及水師巡洋戰守
兵丁一律隨同改駐南田各舉仍歸提標統轄

又廣西巡撫張鳴岐奏信都撫民同知改設官潭地方略稱查前撫臣林紹年
原奏請設信都廳治於舖門係因土名深沖地方素稱蔽垢納汗舖門對岸爲
入深沖總口可扼形勢今據詳加查勘所謂總口者不過因沖內之水至舖門
上之北塞合流而出大河非捨此無出入深沖之路訪之輿論匪徒每由開建
懷集僻徑踰嶺入沖橫竄蕩蕩三基等郵墟攔截賀江劫掠貨船蕩蕩等處距
舖門遠而官潭近保商防匪官潭實爲適中之地煙戶商務視舖門繁盛於辦
理民事較爲靈便亦洽輿情應請卽將信都廳治設於官潭以資治理

又湖南巡撫岑春煇奏請改長沙府州撫民同知爲衝繁要缺
又閩浙總督奏興化通判職司糧捕兼理甯州縣轄水利實無多事應請裁撤
以節虛糜額徵糧米七千九百五十石零自本年上半年上忙裁撤後統歸甯州縣徵
解其水利事宜亦歸該縣辦理所有該廳例銷廉俸書役工食各項一概裁節

提解司庫另儲造報至平海縣丞先經移駐笏石地方嗣因海防嚴緊飭令仍
回平海近年又駐笏石查平海距縣稍遠自應仍飭該丞回駐平海酌給津貼
以重職守

二年直隸總督陳夔龍奏准改圍場廳撫民同知及司獄各缺仍定爲要缺
又湖南巡撫楊文鼎奏查湖南常德府同知長沙府通判衡州府通判布理問
按照廳長沙縣縣丞善化縣縣丞七缺均與本管長官同城位屬閒曹缺亦清
苦又寶慶府長安營同知桃花坪通判桂陽州州同三缺名雖佐理分防實則
無所職掌又鳳凰廳得勝營知事晃州廳涼傘巡檢茶陵州視度巡檢武岡州
石門巡檢湘陰縣大荆巡檢瀏陽縣丞永安巡檢攸縣鳳林巡檢甯遠縣九疑
巡檢宜章縣赤石巡檢臨湘縣桃林巡檢沅陵縣馬底巡檢會同縣堡子巡檢
十三缺地方僻陋缺瘠事簡其地均與各印官相距非遙考察情形今昔繁簡
互異應請分別裁撤以歸核實

又護理廣西巡撫布政使魏景桐奏擬裁廣西平樂府鍾山通判潯州府木梓
通判太平思順道庫大使按察司司獄桂林府司獄五缺
又議准四川打箭爐廳同知邊缺緊要照越嶲等廳改缺成案變通酌補
三年江西巡撫馮汝霖奏准贛省銅鼓廳撫民同知責定分治界址改隸南昌
府管轄

又雲貴總督李經羲奏請將雲南府南關水利清軍同知裁撤改設江外直隸
同知駐紮王布田定爲夷疆煙瘴要缺其蒙自建水文山江外各土司地方均
歸管轄經徵糧稅審理民刑訟訴直隸臨安開廣道定名靖邊直隸同知其猛
丁經歷撥爲分防添設知事一員專司典獄

又直隸總督陳夔龍奏開場撫民同知並該廳司獄議仍定爲要缺
又四川總督趙爾巽等奏會籌邊務開辦章程略稱擬改巴塘爲巴安府打箭
爐爲康定府裏塘爲裏化廳三壩爲三壩廳鹽井爲鹽井縣中渡爲河口縣鄉
城爲定鄉縣稻壩爲稻成縣以裏化一廳河口稻成二縣隸康定府以三壩一
廳鹽井定鄉二縣隸巴安府貢噶嶺設縣丞一員隸於稻成縣裏化廳設同知

一員三壩廳設通判一員以上各缺悉由邊務大臣奏請由外補用惟康定府會同四川總督遴員請補尋會議政務處覆奏請准依議行

又四川總督趙爾巽等奏德格春科高日三土司改土歸流建置道府州縣設治章程略稱擬於德格春科高日交界之登科地方設知府一員名曰登科府擬於德格適中之襲亞設知州一員曰德化州德化之北與俄洛西甯毗連之雜渠卡設知縣一員曰石渠縣於德化之南與巴塘相連之白玉設知州一員曰白玉州德化之西與乍了察木多連界之洞普設知縣一員曰洞普縣德化之東與麻書孔撤土司連界之處暫歸德化縣管理兩州兩縣皆隸於登科府所設各員均請作為邊疆要缺由邊務大臣於奏調到邊資格相當之員及四川實缺候補人員中擇能奏請調補三年俸滿准予奏保在任候升下會議政務處議奏尋覆奏該督奏陳均係按切地勢擇要經畫實為川藏中樞必不可緩之舉應請准如所奏添設各缺分管地方錢糧詞訟監獄一切事務歸邊務大臣統轄所擬補缺升途各節及俟教育普及蠻民能習漢語漢文再行仿照內地飭辦地方自治及審判事宜亦為因地制宜之要並請准奏辦理所擬設治章程十八條各府州縣均有管理地方之責係照見行東三省設治辦法府縣屬官不設經歷吏目典史而設佐治員亦係斟酌變通均可照准

又廣西巡撫張鳴岐奏請裁撤木梓鍾山兩通判桂林府司獄
又吏部會奏遵議四川總督趙爾巽奏夷地緊要請將巡檢改升廳治略稱原奏稱甯遠府屬鹽源縣轄境遼闊嘉慶年間於所屬阿所拉地方添置巡檢以輔縣治所不逮當時夷患未滋不難收輔車之效今則夷強漢弱匪特漢民受夷陵害即漢民自行離離亦多弱肉強食巡檢職權輕防捕亦等虛文鹽源縣又苦糧長莫及茲擬援改親邊縣丞為通判之案就阿所拉巡檢升改為撫夷通判定名曰鹽邊廳仍隸甯遠府管轄等語查阿所拉地方漢夷雜處近接滇疆非事權稍重不足以資鎮撫該督奏稱各節為整飭地方慎固邊防起見原奏擬置太坪岩以上屬鹽源縣岩口以下隸新設之鹽邊廳係因地勢區畫便於分轄應如所請辦理其毗連西昌會理暨雲南華坪各縣雖據界址早定

然地關邊要應即一併繪圖籌辦

又內閣會議覆蘇撫程德全奏廳縣區域不便行政亟應量為變更略稱原奏內稱蘇屬移設之靖湖廳一缺駐紮洞庭西山舊隸吳縣距城較遠該處四面瀆湖與太湖廳之東山對峙時有梟匪出沒而命盜詞訟各案又向歸太湖廳審理民多不便光緒三十年間以蘇州府管糧通判改為靖湖廳撫民通判移駐該處原係因地制宜惟時異勢殊太湖泉患自經痛勦漸就平息其民刑詞訟見又籌設審判不歸行政官訊辦與移設廳治時情形有異擬請將靖湖廳歸併太湖廳又武進丹陽泰興三縣合轄之福興洲地方見正辦理自治必須三縣會同監督泰興遠隸甯屬文牘往返動致經旬該處洲地屬武進者十之七屬丹陽泰興者十之一二以地勢論擬請改歸武進縣專轄等詳加查核擬准如所請

右府廳

嘉慶元年省山西樂平縣改為樂平鄉馬邑縣改為馬邑鄉各裁知縣等官
十七年省廣東保昌程鄉二縣裁知縣典史等官

道光元年 諭親民之官莫如州縣州縣賢否惟道府知之最真民隱之能否上達州縣之上亦惟道府實扼其鍵近日有於道府衙門控告州縣及控吏胥而牽涉本官者該道府往往以一批了事仍發回本官辦理以致逼勒認誣私押釀命弊竇叢生冤抑者無路求伸刁健者任情挾制牧令肆恣職此之由不可不加以振刷著通諭各督撫嚴飭各道府屏除積習於所屬被控之案務即親行提訊辨別曲直秉公剖斷不得仍發回本州縣辦理並責成各該督撫留心察看如該道府有審斷不公者隨時駁正若惟知袒護屬員罔恤民實即行嚴參懲辦

三年四川仍復太平廳為縣設知縣典史各一人
十二年省直隸新安縣改為鄉裁知縣典史等官
十五年 諭御史岳鎮南奏請飭禁濫委佐貳佐雜等員署理州縣一摺州縣為親民之官在民行政均關緊要豈容濫行署理致滋流弊茲據該御史奏稱

近來各省代理知縣每委府經歷縣丞及州判等官甚至終年累月並不更換鄉試年分例准代理廉缺惟此項人員非正途出身尚少懷芳履潔委以重任往往巧取民財任縱家丁差役弊端百出至同知通判在省候補多謀好缺署理州縣剝民利己且有已補本班因缺瘠苦暗求調劑上司曲徇動謂人地相需俾署州縣嘗有部選知縣到省該上司令其在省學習不肯遣使到任等語若如所奏是瞻徇情面不拘資格致啟貪緣奔競之漸於吏治官常大有關係嗣後各直省督撫府尹等務當破除積習一秉至公遇有州縣缺出惟慎選賢能之員署理不得濫用佐貳佐雜署理州縣即開有州縣出差之缺正印中乏人委署不得不暫令佐貳佐雜人員代理亦當慎加遴選概不准以聲名平常者濫竽以致貽害地方尤不可設法調劑見好屬員至部選到省後當留心察看如果才堪造就即飭該員任事不得概稱留省學習暗為調劑他人之計經此次諳諭後該督撫府尹等儻仍狃於積習不知後改復有前項弊端經朕查出或經科道糾參定將該督撫府尹等嚴懲不貸

十六年 諭申啟賢奏恭刊 御製人臣儆心錄 欽定訓飭州縣規條頒布通省官員一摺所見甚是州縣為親民之官果能各盡其職天下自無不治膺是職者宜何如精白乃心勤求民事以副朕愛養元元之意若如該撫所奏州縣在任之始不問地方利病先問缺分肥瘠凡前人所不敢存諸寤寐者今則直言無作一切公事委諸幕友任之書役以故營私作偽徇利曠官積習相沿恬不為怪夫吏治之廢弛全在各大大員設法化導多方振作使知愧勉自可力挽頹風該撫刊刻書函俾各該州縣實力講求消除銅習洵為正本清源著照所奏辦理因思晉省如此各直省想亦不免所有雍正八年 欽定訓飭州縣規條一書其中條列州縣事宜尤為牧令法守著各該督撫遵照刊刻頒發所屬俾得細心究習據為準則儻有陽奉陰違執迷不悟者即著該督撫據實參劾

十七年 諭給事中黎榮鑄奏州縣命盜案件多不親往勘驗請嚴行飭禁一摺州縣案件命盜最重一有命案馳往相驗罪名輕重無難立辨至竊盜重案

亦應親勘迅速繩緝庶兇犯不致遠颺若如所奏近來外省州縣往往擅委佐雜代驗代勘或親自前往又復任意宕延顛預了事愚民無所申雪以至紛紛上控即如上年廣東前署東莞縣知縣吳毓鈞於已完糧戶葉省之橫被差役鎖禁索贖在押病故含糊勒結致釀鉅案又如浙江孝豐縣已革職員施錦心呈控伊媳屍棺被竊一案該縣延不往驗致令肆行誣賴拖斃多命似此尋常命盜之案遷延日久諸弊叢生總由地方官積習相沿不肯親自勘驗所致此等惡習不獨二省為然若不亟行整頓何以挽積弊而清訟源嗣後著通飭所屬州縣凡遇命案必當迅速親驗即或因公出境應照例交鄰封代驗遇有盜案亦應親自勘驗儻敢濫委佐雜或託故遲延即行指名嚴參以儆疲玩至州縣下鄉跟役書吏人等勒派夫馬供應使費小民既負冤抑又遭橫索尤為向來惡習著一併嚴行申禁嗣後務須輕騎簡從約束胥役不准向民間需索分毫如敢有心徇庇或失於覺察即著該督撫據實參處其一應官員因公過境概不准多帶丁役稍有滋擾

二十三年改浙江定海縣知縣為定海廳直隸同知

咸豐五年省甘肅宜禾縣裁知縣典史等官

十年江蘇裁高郵州泰州邳州管河州同各一人高郵州邳州管河州判各一人

同治十三年以關內道路疏通改甘肅安敦玉三州縣仍歸總督節制

光緒元年改設河南衛輝府屬之考城縣仍隸歸德府

二年兩江總督沈葆楨等奏知縣缺分繁簡今昔不同請 旨酌定下部議奏六年貴州巡撫岑毓英奏湖廣省明代始入版圖從前苗多漢少既有土司彈壓又設重兵鎮撫民事不多在州縣可以遙制今則漢苗生齒皆繁幾有鞭長莫及之勢而梵淨山周圍六百餘里界連四川湖南附近該山之黔境向歸銅仁思南鎮遠松桃等屬所轄均距城二三百里或三四百里不等平時有司徵錢糧驗命案皆因地方寬遠往返需時而查緝奸宄尤為耳目所不及至逆匪盤踞六年生靈塗炭今夏 臣往勦肅清周歷其山揆度形勢似非移縣治

於適中之區不足以資控制查松桃鎮遠兩廳縣皆地要事繁礙難更移惟銅仁府之銅仁縣思南府之安化縣俱係附府首邑尚可移置蓋黔省郡縣制度與他省不同如知府一職不但表率屬僚兼與州縣分管地方皆係理事收糧所以與義府之興義縣另駐要隘並未附府而定石阡思州等府亦無同城知縣今移銅仁安化兩首邑擇要駐紮仍與知府分界而治核與黔省制度亦不相背當飭各屬官紳妥議並與司道悉心籌畫查銅仁縣屬之大江口舟楫可通商販雲集距府城九十里距梵淨亦九十里若將銅仁縣移駐大江口即不至顧此失彼又查安化縣屬下五里之大堡距府城七十里附近沿河可接壤四川為沿岸川鹽入黔要路距梵淨尚不甚遠該處人煙稠密商賈輻輳若將安化縣移駐大堡不僅於下五里沿河一帶有益即控制梵淨山亦覺稍易三十二年熱河都統廷杰奏請熱河添置建平阜新二縣各設知縣一員均作為繁難題調要缺移朝陽縣鄂爾土板巡檢改為阜新縣巡檢兼典史事添設建平縣巡檢兼典史一員尋部議覆准

臣謹案建平地居平泉建昌二縣之間北為敖漢旗南為喀喇沁東旗地極廣阜新與奉天接壤管轄東土默特五旗尤為邊要

又奉 懿旨方今民生重困皆因庶政未修州縣本親民之官乃往往往隔閡諸事廢弛聞閩利病漠不關心甚至官親幕友肆為侵欺門丁書差敢於魚肉吏治安得不壞言念及此深堪痛恨茲當改定官制州縣關繫尤重見在國民資格尙有未及地方自治一時難以遽行應如何酌核辦理先行預備或酌改佐治員缺並審定辦事權限嚴防流弊務通下情著會商各督撫一併妥為籌議必求斟酌盡善候旨遵行

三十四年兩廣總督張人駿奏准裁撤南雄州州同及三水縣三水司巡檢兩缺

又熱河都統廷杰奏請於阿魯科爾沁東西札魯特三旗地方添置一縣曰開魯縣於巴林左翼地方添置一縣曰林西縣以原有之赤峯縣升為直隸州知州兼轄新設兩縣其原設赤峯縣典史改為州吏目以符體制並准於小庫倫

所屬庫街地方建立一縣益以奈曼一旗名曰綏東仍歸朝陽府統轄其東土默特喀爾喀二旗則仍隸阜新縣管理以便分權限

又吏部奏遵議熱河赤峯縣縣丞改升為赤峯直隸州州判移駐烏丹其原治大廟地方改設巡檢一員

又護四川總督趙爾豐奏請以瀘州分州升改為縣擬名曰古宋縣應置知縣典史等官將州判缺裁除該處毗連敘永遠距瀘州相地之宜自以改隸敘永為便並擬改敘永應為直隸州改永甯縣曰古閣縣即以一州管轄兩縣其古閣巡檢改為兩河口巡檢

又 諭國家根本惟在民生養民教民州縣最為重要凡撫字催科聽斷緝捕悉萃於牧令之身一邑數十萬生靈於斯託命加以各項新政待舉僅以班次資格為定衡大失量能授官之本意邇來保舉捐納冗濫甚多即係正途出身於吏治亦尙乏體驗豈能措置裕如此等人員專憑年資入選一旦任事大率聽命幕友縱容丁胥百弊叢生民受其害聞各省選缺州縣驟膺外任不諳吏事者十居七八該管督撫格於部章不能不使之到任及到官債事雖加撤參

地方元氣已傷其為害於國計民生者甚鉅嗣後州縣兩途著將部選舊例限三個月後即行停止所有各班候選州縣由吏部分別查明會同軍機大臣速擬章程具奏凡改選人員到省後督撫率同三司量其才性試以吏事或派入法政學堂肄業並須勤加考察除有差人員隨時接見外其餘每兩箇月必須傳見一次三司按月傳見一次詳細考詢能否造就有無進益如有糊塗謬劣不通文理或沾染嗜好或年力就衰等情均即咨回原籍扣除本班其應補人員該各督撫務須一秉至公認真甄核總期歷經試驗習治理一洗開茸

宣統元年兩江總督端方江西巡撫馮汝駿奏查九江府之德化縣原係衝繁難要缺該縣為通商碼頭水陸交衝華洋雜處近年交涉日繁治理尤為不易而見在繁缺人員格於定限不能調補未免取徑稍窄擬請改為衝繁疲難最要缺俾得為地擇人查有廣信府屬之玉山縣原係衝繁疲難最要缺該縣並

為浙江入境首站自長江通商以來繁盛較遜於昔應請改為衝繁疲難最要缺

資治理又袁州府屬之萍鄉縣原係衝繁中缺近年煤礦大開工人日衆五方雜處並將鹽法兼巡南瑞袁臨道移設該處非肆應之才不足勝任擬請改爲衝繁難調要缺查有贛州府屬之信豐縣原係衝繁疲難調要缺該縣雖人民强悍不過與同府之會昌縣相等應請減繁難中缺歸入輪補

又民政部會議熱河擬設隆化縣並移縣治略稱查承德府轄境東西相距一百三十三里南北相距自尖帽山至中關二百八十八里中關以北橫隔豐寧縣屬地一百三十三里又有府轄坡賴村至石片子四十里形同甌脫而豐寧縣南北距二百二十里東西距五百二十里管理頗形不便應於該府縣毗連之開增設一官以資治理前經調任熱河都統錫良奏明添設隆化一縣設縣治於張三營地方茲據熱河都統廷杰按案奏請畫撥承德府屬之石片子張三營等處計三保二十四甲及豐寧縣屬之燕窩梁心神廟等處二百二十四牌合爲隆化縣屬境隸於承德府管轄計該縣轄地周圍一千零七十七里承德府尙有二十一保八十四甲周圍一千二百三十四里豐寧縣尙有二百五十四牌周圍一千一百三十四里雖經畫撥數處計其轄境尙足以敷治理且與原案相符應請准其畫撥其請移縣治於毗連圍場之唐三營地方自係因地制宜其以該處裁缺圍場總管衙門就作縣署尤爲省便應即照准並請將承德府屬之張三營巡檢改爲隆化縣巡檢兼管典史事並將郭家屯黃姑屯兩巡檢改隸隆化縣管轄亦應一併照准該三巡檢均係要缺今雖移駐改隸仍應定爲要缺遇有缺出查照舊例辦理所有該縣畫分界內應征地丁錢糧旗租及各項雜稅均應改撥清楚造送詳細冊籍先行咨部立案以備考核

二年四川總督趙爾巽奏交脚舊汛據夷中心此次用兵收復擬請增設照覺縣治以收控制綏遠之效如所請行

又諭御史陳善同奏直省州縣調委紛紜妨害吏治請申明定章以資整頓一摺州縣爲親民之官必須久於其任方足以專責成查見在各省調委各缺其爲地擇人者固時有其爲屬員調劑規避亦難保必無嗣後該督撫等務當遵章調委不得過資缺十分之二仍於每季彙奏聲明毋得視爲具文如

實有人地相需者准其體察情形分別改調俾得各理各任以重地方

又雲貴總督李經羲奏鎮康改流請添設知州巡檢各缺略稱鎮康居永昌府東南一隅爲滇西屏蔽東至雪山山與順甯交界西至潞江與龍陵交界南至勁線嶺與耿馬土司交界北至一碗水與灣甸土司交界東西五百餘里南北二百餘里山深箐密煙瘴最盛自前土州刀悶錦圖被匪戕害其妻子相繼亡故土族互謀吞噉構亂有年漢夷受虐民不聊生自經改流土民悉獲安枕惟查該處德黨係爲鎮康適中之地形勢較勝煙戶繁庶猛朗小猛統兩處均爲上下扼要之區見在改流就緒自非添設流官分司治理不足以專責任而固邊圍擬請添設知州一缺名曰永康州知州駐紮德黨永昌府如各州縣之例管理刑名經征錢糧並兼管監獄緝捕暫不添設吏目定爲極邊煙瘴題調要缺三年俸滿撤回候升並添設巡檢二缺一駐猛朗名曰永康州分防猛朗巡檢一駐小猛統名曰永康州分防小猛統巡檢均定爲極邊煙瘴咨調要缺

又民政部會議山東巡撫奏移駐州同改爲分防略稱查原奏稱登州府孤懸海上三面凌空自煙台開埠威海議租以後所屬十州縣門戶洞開華洋雜處海濱沙磧類成繁盛之區近如濰州之萊山鎮在福山海陽棲霞三縣之間地當衝要洋人通道往來行旅既多每生事故雖有正佐各官居開控駁奈相去太遠照料難周欲保治安非專設一官不可查濰州州同糧糧海防州同向駐州城有名無實堪以移駐萊山鎮改爲分防州同等語等查沿江沿海地方開埠通商華洋雜處自非設官分治不足以保又安該撫所奏係爲因時制宜起見應即准如所請將濰州州同移駐萊山鎮改爲濰州分防州同

又兩江總督張人駿奏略稱江蘇江甯府屬之江浦縣本係衝字簡缺近因興築津浦鐵路以該縣爲南段首站與滬甯鐵路之甯省車站隔江相望遂爲南北通衢水陸交衝將來商旅往來五方雜處不獨巡防喫重且恐交涉日繁似未便仍循資格拘定選留班次銓補擬請改爲衝繁二字調缺俾得爲地擇人惟查定例應歸月選之缺改爲題調要缺必須於本省題調要缺內的改簡缺

互換查有淮安府屬之桃源縣本屬衝繁難三字調缺該縣雖係沿海地方惟自各處軌道交通其地已非衝要措置尚易為力且民情樸實訟獄無多較同府之阜甯安東等縣三字調缺繁簡攸殊應請改為難字簡缺足資治理至江浦縣治去江岸較遠見既請改繁缺應否將治所擇地改設容俟察看情形另行奏明辦理

又熱河都統誠勳奏新設阜新縣治擬勘地移建略稱查新設阜新縣治當委員試辦之時原定於鄂爾士板地方東北之庫倫正北之奈曼兩旗均歸管轄故設治尚稱適中嗣又添設綏東一縣將庫倫奈曼兩旗亦均撥隸綏東按其地勢舊署所在過於偏西雖設治已逾五年街市人民未增繁盛今將修建衙署與築監獄若不另擇縣基遷移改設不特紳民不便抑且無裨治理茲據勘得水泉地方地處沃衍山水環抱形勢極優且係往來通衢商賈雲集富庶景象甲於全境該縣界連奉省與彰武鎮安廣甯義州及熱屬之朝陽建平綏東為熱河東路門戶關係綦重而水泉又為阜境適中之區距離七屬邊境均在一百餘里洵為衝要之地移設縣治與地方政治民情均有裨益由該縣姚致遠稟經前升任都統臣廷杰飭據該管知府會同旗佐切實查勘繪圖貼說稟准移設其原設之鄂爾士板巡檢兼阜新典史見在縣治既遷自應隨同前往以重典獄

三年民政部奏撥案裁併同城州縣
又會議政務處奏議覆署兩廣總督袁樹勛奏縣治改隸窒礙情形擬請仍復舊治略稱從前恩平改隸陽江係因陽江濱臨洋面島嶼紛歧改設直隸州定為海疆要缺在當時畫撥二縣亦為便於控制起見今如原奏內所稱恩平紳民道赴州治必須經過州屬之那龍合山尖山等處水陸險阻盜藪出沒行旅視為畏途且言語性情習慣種種不便自不得不亟籌變計事經該省諮議局議決該管司道分別查明會詳衆論會同應如該署督所奏仍以恩平一縣復隸肇慶府屬以從民便至陽春一縣既距陽江州甚近且民風俗尚均無歧異自應仍隸陽江州屬無庸輕議更張陽江專轄陽春一縣與該省南雄連欽等

直隸州管轄一縣制度正同亦無庸另議改撥
又兩江總督張人駿奏裁併同城州縣略稱甯屬之知縣同城者四缺蘇屬之州縣同城者十九缺地狹而官多應將同城州縣即予裁併江甯省城元甯二縣擬留上元以江甯縣併入之蘇州省城長元吳三縣擬留吳縣以長州元和兩縣併入之揚州府屬之甘泉縣併入江都蘇州府屬之昭文縣併入常熟新陽縣併入崑山震澤縣併入吳江松江府屬之婁縣併入華亭常州府屬之陽湖縣併入武進金匱縣併入無錫荆溪縣併入宜興太倉州屬之鎮洋縣併入太倉州計裁十二缺尋會議政務處覆奏准如所請

右州縣

乾隆五十四年山東裁淄川縣縣丞改設禹城縣縣丞一人

五十六年裁湖北江陵縣郝穴鎮監利縣朱家河巡檢改設主簿各一人

嘉慶十三年湖北裁黃州府司獄改設黃岡縣倉子埠巡檢一人

道光元年移福建霞浦縣杯溪巡檢駐三沙

十二年裁江蘇華亭縣主簿江甯府鎮江府照磨金壇縣巡檢揚州府檢校

又裁陝西鄜州州同蒲城縣巡檢甯羌州襄城縣驛丞

二十三年 諭前據署英等奏改設巡檢移駐附近香港之九龍地方稽察出入牌照朕以香港為傳貨總匯若僅責成巡檢稽查恐立法尚未周密令該大臣等再行妥議茲據署英奏稱體察情形不在驗照官之大小全在行之以實所有前赴香港之船既由給照口岸按月報明粵海關業已互有稽考九龍巡檢不過查其已到未到並無稅銀可收似可無虞偷漏等語著照所議辦理所有祁損等前奏廣東新安縣屬之官富司巡檢請移駐九龍地方改為九龍巡檢作為海疆要缺即照所請至該巡檢雖無徵收稅課之責而稽查出入務令相安斷不可任吏胥勒索別生事端

咸豐二年江蘇裁鎮洋縣縣丞山陽金壇二縣主簿各一人浙江裁山陰縣主簿一人

又湖北裁石首公安蕪水三縣縣丞各一人

八年江南裁碼山縣主簿銅山縣北河主簿各一人桃源縣三義鎮巡檢一人
同治二年 諭王憲奏邊陲地方緊要請將隴西縣丞仍改爲漳縣知縣一摺
甘肅鞏昌府屬之漳縣於道光九年改爲隴西縣設立縣丞歸併隴西縣管轄
原爲因時制宜起見茲據王憲奏稱漳邑原設縣治距隴西七十里西南接洮
州岷州東南接岷州甯遠延袤三百餘里毗連皆係邊要地方遠隔自裁併隴
西改設縣丞後書役刁詐盜賊出沒土棍強橫有非縣丞所能治理且該處舊
有鹽井課項攸關甘省回逆倣擾河州狄道等處均與漳邑舊治相去非遠尤
非縣丞所能籌辦各等語隴西界臨邊復近回氛練勇籌防在在均關緊要
該藩司籍隸漳縣於該處地勢情形所籌尙爲明晰見值滿目兵燹地方彫敝
之際所有改官定制苟於時事有裨不妨量爲變通著照於到省後詳察情
形妥議具奏

光緒五年廣西設奉議州巡檢一員駐作登墟

又廣西裁恩隆縣篆里下隆里巡檢二員移恩隆縣知縣駐平馬墟縣丞駐燕

崗又改廣西陽萬州爲流裁土州判設恩陽理苗通判駐紫祿豐城管理陽萬
二里及下田里之四都地方

六年改甘肅鎮西府經歷爲廳照磨兼司獄事

八年江蘇巡撫衛榮光奏太湖廳所轄之洞庭東山孤峙湖中地方本極散漫
該處後山下之下楊灣村爲江浙水道通衢匪徒最易潛蹤民情亦屬強悍自
非駐紮一官不足以保衛閭閻今既據該司道等飭查明確東山司巡檢堪以
移駐應請即將該巡檢分紮下楊灣村俾資巡緝而重地方

十一年浙江巡撫劉秉璋奏請永康縣丞駐入保山地方改爲永仙分防縣丞
十七年改廣東靈山縣林墟司巡檢爲欽州林墟司巡檢欽州州判改爲防
城縣縣丞裁欽州防城司巡檢改爲防城縣典史改欽州如昔司巡檢爲防城
縣如昔司巡檢

宣統元年湖南巡撫岑春煇奏長沙府茶陵州州判瀏陽縣縣丞二缺均與州
縣同城並無應管公事永綏廳茶崗知事乾州廳河溪巡檢兩缺原爲巡緝崗

苗而設自咸同以來崗苗涵濡教澤悉化循良卽無佐貳在彼彈壓亦不虞生
事澧州直隸州順林巡檢桃源縣鄭家巡檢二缺所駐之地與州縣相隔匪遙
俱屬地瘠事簡均擬一併裁撤照章分別改用

又四川總督趙爾豐奏准添設清溪縣黃木廠巡檢

二年吏部奏議覆熱河都統等奏添設開魯縣等縣典史各缺略稱據熱河道
徐士佳以新設三縣地處邊漠漢雜居治理非易其最不能緩者莫如典獄
員與縣令相助爲理亟宜添設開魯林西綏東三縣請各添典史一員擬照口
外章程作爲巡檢兼典史事遇有缺出擇熱河候補佐雜中精明穩練熟悉邊
情者暫行試辦等語 臣等查司法官制見時尙未釐定督捕之事自應仍循舊
制責之典史一官熱河新設各縣業經奏奉 俞允責疆分理非添設典史員
缺實不足以專責成該都統請於開魯林西綏東三縣添設典史兼巡檢事各
一缺自應准如所請定爲要缺

又四川總督趙爾豐奏四川省寧遠府屬之四昌縣轄境遼闊其西南普濟威龍
兩土司地方與縣治相去二百餘里鞭長莫及擬添設巡檢一員名曰普威巡
檢管理漢夷獄訟暨興學屯墾各事宜如所請行

又民政部會奏議覆熱河都統奏赤峰直隸州烏丹城州判大廟巡檢管理事
宜略稱原單開烏丹城州判分防烏丹招蘇兩約東與建平接壤西與多倫爲
鄰南界大廟巡檢地面北界林西縣地面東西三百八十里南北三百二十里
畫爲該州判轄境其大廟巡檢分防公主陵翁牛府兩約東與桃萊圖約毗連
西至圍場廳界南與喇嘛柵子約毗連北至烏丹城州判界東西四百一十一里
南北一百二十里畫爲該巡檢轄境並仿照趙州州判經管州境河道疏濬等
事自係畫疆分治各專責成前經吏部議准有案均請照准俾資治理並請
飭該都統飭各屬繪具開方紀里詳圖填造地里報告表戶口清冊咨送備案
三年四川總督趙爾豐奏添設古宋縣典史一員改叙永廳照磨爲永寶直隸
州吏目

又奏議覆山東巡撫奏稱登州府孤懸海上自煙台開埠威海議租所屬十州

縣門戶洞開華洋雜處近如黃縣之龍口已有英商設立行棧商輪開亦下碇地當衝要往來行旅每生事故照料難周查蓬萊縣縣丞向駐府城近似開散堪以移駐龍口改爲分防縣丞等語_臣等查沿江沿海地方開埠通商華洋雜處往往舊日荒僻頓成繁庶之區自非設官分治不足以保乂安該撫所奏係爲因時制宜起見應卽准如所請將蓬萊縣縣丞移駐龍口改爲黃縣龍口分防縣丞由_臣部更改缺冊一切未盡事宜應由該撫籌議分別咨部核辦

又諭御史黃瑞麟奏各省候補人員擁擠請將新章以前分發之府經以下各員有願改歸本省候補者呈請督撫咨明吏部給咨逕回本省免繳捐離改指銀兩等語著會議政務處議奏尋覆奏擬請將新章以前分發之府經歷以下各員其曾經捐指省分願改回本籍者准其就近呈請督撫咨明吏部註冊卽由該督撫給咨逕赴本籍省分候補毋庸捐繳離省改指等項銀兩其新章以前分發人員未經捐指省分者如願改歸近省准其呈請督撫咨明吏部以本省與近省統掣不得指明專改本省如願改歸本省仍應照繳捐離改指銀兩以示區別

右佐雜

皇朝續文獻通考卷一百三十六

職官考二十二 直省土官

臣謹案土官世職惟四川廣西甘肅雲貴等省近多改土歸流前考列外
官文職後今遵之

乾隆五十六年 諭據成德奏金川河東土守備丹比西喇布病故所遺員缺
請令伊子郎爾結承襲並將所賞丹比西喇布之翎頂廉俸移賞郎爾結等語
所奏斷不可行其守備員缺著郎爾結承襲一次但丹比西喇布著有勞績且
伊母年邁著賞結都司半俸以終餘年俟郎爾結成立時如果奮勉再加恩施
將此傳諭鄂輝成德等嗣後如遇此等事件留心辦理

嘉慶四年 諭台布覆奏廣西土司典出地畝未便即令備價回贖請開設官
當以濟土司緩急並土境客民另編客籍一摺所奏殊屬非是前因成林條奏
開墾廣西空閒地畝招徠客民耕種一事將原摺發交台布閱看台布接奉諭
旨後原不妨據實覆奏今既查明漢民占種土司田畝為日已久如概令備價
回贖則土司疲憊無力若欲分別查辦悉數追還則漢民資本全虧必致失所
是成林所奏斷不可行朕前交台布查勘之意恐台布意存拘泥特將種種未
便之處詳悉諭示俾其得有主意乃台布支吾其辭為開設官典編造客籍之
奏試思客民占種土司地畝重利準折尚干例禁今乃欲官為開設官典豈非
朝廷欲貪土司之利而為此盤剝之事乎且漢土相安已久即土司疲乏無力
亦祇可聽其自為生計又何必官為過問乎各省陋習於地方典當往往勒索
當規今台布欲於土境開典自係地方官欲藉此需索典規因為利而台布
為其所愚輕於聽信至編造客籍一事內地編查保甲日久懈弛倘且有名無
實何况行之土境覺察難周有何裨益前此成林所奏已屬無謂今台布乃欲
於土境創設從來未有之官當種種擾累土民較之成林尤為紕繆著傳諭嚴
行申飭

又 諭貴州巡撫馮光熊黔省苗民甫定宜嚴禁土司橫徵科斂并漢民重利
盤剝等事若土司不知體恤窮苗誅求無已奸民加利放債算及錙銖是上困

於本官下困於漢奸進退維谷有不激而生變者乎此皆朕所深知汝應留意
焉

十三年設四川囉囉長官司長官一人麻里土百戶一人

十六年 諭據豐紳常明奏嶺夷向化改土歸流一摺據稱嘉定府峨邊廳通
判所屬十二支嶺夷自嘉慶十三年夷目約烈等率眾投誠奏准即令約烈等
充當頭人管束十二支夷眾認納糧石茲該夷人約烈等以川省所轄各路土
司向有改土歸流之例情願一心向化永作盛世良民並請升科納糧更名易
姓一體當差等語著加恩准其改土歸流所有戶口冊籍及升科納糧數著該督
嚴明分別題咨辦理

二十年設四川上郭羅克革自塘寨土百戶一人

道光七年設四川魚通長官司長官一人

十四年設四川撒角木須松坪夷長一人夷目一人

人越焉廳夷長一人夷目二人

又 諭阮元等奏查辦思茅土職滋事始末情形撤回兵練並已革土職遠逃
未獲另擇承襲一摺雲南思茅廳所屬已革車里土司刀繩武因輕聽奸徒播
弄屢次集練向其叔土舍刀太康閱諭令解息藐抗不遵前據該督等奏明
業降旨將刀繩武土職革嗣因其不知悔罪仍復勾結猥夷始終抗玩經內
地派弁兵攻捕卡破練散帶印潛逃見據該督等飭令該鎮道委員分飭兵練
追蹤緝拏諒已革土司遠逃邊外不能再滋事端自不值令兵練深入窮追祇
須責令沿邊隘口留心偵查去路密為購緝其所遺車里土司世職其子照例
不准再襲茲據該督等奏請承襲准其以土舍刀太康之長子刀正宗繼與刀
太宗為嗣承襲車里土司世職以專責成著該部照例辦理

十五年設四川峨邊廳土千戶一人土百戶二人

咸豐五年 諭長齡等奏緬甸國王遣送車里土司刀繩武進關籌酌辦理一
摺普洱府思茅廳屬車里土司刀繩武於道光二年被緬目誘往孟良經該國
王令將刀繩武送回茲據該督等奏稱該土司訊因奸夷召土鼎挾嫌播弄又

以叔姪夙隙心生疑慮尙非有心逗留該土司年力正壯近支又無土幹堪以承襲之人著仍飭刀繩武回任以觀後效並根查刀太康下落使叔姪敦睦如初免滋毀端其土司印信已據呈驗著仍給該土司鈐用其在逃逃犯召士鼎嚴緝務獲照例懲辦

光緒元年吏部議覆雲貴總督劉長佑奏請將土田州改土歸流摺查思恩府屬之土田州一缺原係土人岑氏後裔承襲今據該撫等奏土知州岑乃青病故無子族眾支分爭襲分黨仇殺土民流離轉徙日不聊生來營泣訴苦狀均願歸流官管轄不願復爲岑氏土民應請將土田州革去職其地改設苗疆知縣一員其思恩府屬百色同知與鎮安府屬奉議州判二缺酌量升爲苗疆直隸廳簡缺知州以資治理等語自應准如所請並令該督通籌全局奏明辦理

二年改廣西土田州所屬燕崗地方置恩隆縣裁土知州一人

又改廣西奉議州爲流設奉議州知州裁土州判一人

四年覆准改土歸流奉 旨賞給該土官子弟頂戴田產存留奉祀者准該後裔承襲由督撫查照世襲定例嫡庶不得越序取造宗圖冊結具疏請襲由部

覈明題請給予頂戴准其承祀轉飭遵照毋庸發給號紙

定例土官承襲由部給發號紙世系於

五年改廣西陽萬州爲流裁土州判設恩陽理苗州判駐紮祿豐墟管理陽萬

二里及下田里之四都地方

十一年改甘肅岷州林口堡土司所轄四十餘戶歸岷州管轄

十六年雲貴總督王文韶雲南巡撫譚鈞培奏略稱查雲南永北直隸廳屬北

勝土州同章天錫擅勢橫行積年擾害逆迹昭彰謹將添兵勦辦悉首就戮地

方一律安靖改土歸流緣由會摺奏報奉 諭所請將北勝土州同屬境改土

歸流一節著該督撫妥議章程奏明辦理

三十年 諭有人奏西藏情形危急請經營四川各土司並及時將三瞻收回

內屬等語著錫良鳳全體察情形妥籌具奏

三十三年廣西巡撫張鳴岐奏整頓土屬必先造就土官擬飭各該管府州廳督同承審州縣就土官兄弟子姪中擇其年齡資質略合高等小學程度者按年選送四人或六人來省就學並飭提學司特立一學堂專教土族小學畢業升入中學中學畢業授以法政一科後取列最優等優等者分別承襲

三十四年雲貴總督錫良奏請將雲南鎮康土知州改土歸流至該土州授官分土相沿已數百年應請留原銜作爲承祀官擇其稍近之支族准予世襲不

理民事仍酌量撥給莊田俾資養贍尋部議奏准

又護四川總督趙爾豐奏瀘衛分州升改爲縣查九姓長官司世襲其職已五

百餘年自移駐州判後夷民改漢俗者十居八九土司統轄較少而錢糧仍土

司代征盜案猶土司開參亦鎮羊僅存耳今改爲縣田賦刑名學校緝捕皆縣

令專責土司自難贅設擬仿照廣西州縣土佐雜世襲之例量改歸縣統轄每

歲仍籌給款項以示體卹

又廣西巡撫張鳴岐奏准裁忠州南丹江州萬承龍英太平思州七土州州同

憑祥向武兩土州州判思陵結倫都結都康下雷五土州吏目忻城土縣典史

倪蛻土官說 邊徼多土官子孫世守當漢唐宋時無分流土而其銓敘

轉遷稍稍殊焉自元及明分流判然矣漢土官大小俱備漸就裁改所存

無幾而世每謂土官家爭殺淫縱之爲悉屬邊蠻瘴氣天固不與之以善

性者芟剝而刈殺之宜也雖然世祿之家鮮克由禮春秋二百四十二年

左傳所載諸侯卿大夫家事豈不有甚於今日土官家所爲者齊魯鄭衛

豈是邊蠻其驕淫殺奪無所不有蓋非太公康叔貽謀之不善亦封建世

官之流弊必至於此極者也故譏秦之廢封建而立郡縣爲非計者誠迂

儒矣然而雲南內地土官消磨亦易橫暴不法者參劾而去之老病死

者停襲而免之苟有賢者薦而達之與流官一體陞遷如此二十年而土

官皆可以盡既不利其所有而起意驅除又不坐之無名而恣情斬殺春

秋代謝一循天則之自然又何有恩怨之得生於其間哉獨是相隣交緝

各司仍須羈縻繫屬不宜輕有改更亦非謂其尾大不掉而虞之也特以

地居荒遠瘴癘特甚設流官不諳風土立防兵難免瘴病運糧米又恐勞民卽其渠帥而用之此固諸葛武侯經營簡易之宏模也

藍鼎元論邊省苗蠻事宜書 楚蜀滇黔兩粵之閒土民雜處曰苗曰獠曰僮曰仡佬皆苗蠻之種類也其深藏山谷不籍有司者爲生苗附近郡邑輸納丁糧者爲熟苗熟民與良民無異但性頑嗜殺或與漢民有睚眦輒乘夜率衆環其屋焚而屠之白晝出鄉井五里則惴惴憂其不還是以亦畏漢民而尤懼官長此可以教化施恩法令馴服者也但土民之頑順惟視土司司多冥頑不法坐縱其行兇殺奪而因以爲利卽使事迹敗露大吏督責無辜罰處分之加乎其身是以無所忌憚而致於無所不爲也由民受土司荼毒更極可憐無官民之禮而有萬姓奴僕之勢子女財帛總非本人所自有愚聞黔省土司一年四小派三年一大派小派計錢大派計兩土民歲輸土徭較漢民丁糧加多十倍土司一日爲子娶婦則土民三載不敢婚姻土民一人犯罪土司縛而殺之其被殺者之族尙當斂銀以奉土司六十兩四十兩不等最下亦二十四兩名曰玷刀銀種種陵削無可告訴聞昔年有閩卹離散呈請地方大吏改土籍歸流官管轄遂有更生之慶曾未幾時而土司輩賂關說又復改還土屬丁壯舉家屠戮妻子沒賣爲奴其他土部不得不吞聲飲泣忍受摧殘然其望見天日願如漢民沾被 皇恩則千萬人如一心四五省如一轍也愚以爲苗獠羶黎均屬 朝廷赤子當與漢民一例軫恤教化惟在地方大小吏加意綏輯使知孝弟禮讓奉公守法自然不敢行兇殺奪倘土司暴虐太甚或其民有行兇殺奪俱將該土司照漢官事例參罰處分第漢官有罰俸降級革職而土司無俸可罰無級可降革職則子孫承襲仍舊爲太土司得以暴虐其民愚以爲惟有削土之一法可令土司畏懼請題定削土則例照所犯重輕削奪卹落里數以當罰俸降級所犯重大至革職者相其遠近強弱可以改土爲流卽將土地人民歸州縣官管轄勿許承襲併土民有不甘受土司毒虐願呈改土籍爲漢民者亦順民情改歸州縣其深山

窮谷流官威法所不及之處則將所削之土分立本人子弟爲衆土司使其地小勢分事權不一而不能爲害將來教化日深皆可漸爲漢民至山中生苗責成附近土司招徠嚮化一體恩撫如此數年之閒生苗可化爲熟苗熟苗可化爲良善豈僅五六省地方享寧靜和平之福而已哉

劉彬永昌土司論 天下惟滇夷最多種類色目殆數十餘而附於永昌者居其大半其先皆各居其地自相君長或有仇殺亦以夷陵夷未敢犯我中華自元明命劉深擊八百媳婦無功而還外國始有輕中國之心於是燒案贖掠百姓終元之世討緬者再討八百媳婦者再僅能分設宣慰邊境巽安而已明時桀驁尤甚思可思任思機刀幹孟罕拔岳鳳莽瑞體思仁丙側莽應鯉等先後釀禍擾我疆土屠我城池殺我將士逞兇肆毒了無顧忌卒至勞師動衆財殫力竭數征之而後定嗚呼蠻夷之禍自古有之接厥所由非激於誅求卽逼於陵虐或有姦酋妄動狡焉啟疆始則防禦不愾繼而勦撫失宜熒熒不滅遂至燎原此皆已然之勢論者固未可執一而觀治者尤當因時而變何況今日夷困於陵削日益貧窮習於風氣日益刁詐更非向日之彝可比不獨一永郡爲然也余以纂修永志姑卽永郡之彝論之有內地之彝有外地之彝有沿邊之彝有雖在沿邊而實同於內地之彝內地者如永平之上縣永平之土縣永平之潞江安撫司此皆地界通衢境連郊邑井閉相望阡陌錯與漢人雜處而居者也沿邊者如鎮康灣甸芒市遮放蓋達猛印千崖隴川是也此則環永騰西南北鄰江域奉節制供差發者也其西北之沿邊者漕澗上江此外卽爲茶山里麻古勇野人等彝雖有節制之名而已非我部屬儼然外地野人則並非控制赤髮野人又在野人之外矣雖在沿邊而實同於內地者如騰越之南甸司保山之十五喧二十六寨是也其境界相連田里相雜猶夫永平之土縣丞土驛丞保山之潞江安撫司是也外地者如威遠孟連耿馬等彝此則雖在控馭直隸之內不過供差發屬羈縻而已法令所不及也又其外如緬甸車里八百老撾禾邦孟良猛密緬蠻莫蓋西鈕兀

諸葬其土地之廣有數千里者千餘里者數百里者大小不一強弱攸殊各長其長各世其世此則地廣勢厚最著名於諸夷中者也其他雜小夷人未易指計若此數者之中緬最强車里八百木邦次之老撾猛密孟艮蠻莫鉏兀又次之然吾所爲致論者不在外地之葬而在沿邊之葬與內地之葬與雖在沿邊而實同於內地之葬何也外地者誅求不能及陵虐不克施隙毀之起既無其由而況時當全盛彼諸葬又豈敢有不逞之念哉若沿邊之葬內地之葬雖在沿邊而實同於內地之葬則不然其地最近勢最柔故其爲累也最苦爲禍也最易爲惡也又最深以彼區區一土司人之視之者特蠢茲夷人耳狎而易之也誅求者有矣久而不繼陵虐者有矣甲來而施之可也乙來而施之亦可也施之施之難乎其爲受者矣故曰其爲累也最苦至若狡悍慤刻又其本性或激於一忿或著於平時變起倉皇出於不意呼吸之間卽受其禍雖有智者能預爲之防乎又或憑崎負險劫掠中道一落深箝散入萬山輾轉道途卽覩而不知其爲盜捕緝固不可得行查僅屬虛文故曰其爲禍最易而猶未視其惡也彼之官世官也彼之民世民也田產子女唯其所欲苦樂安危唯其所主草菅人命若兒戲莫敢有咨嗟歎息於其側者以其世官世民不得於父必得於子於孫且數倍蓰故死則死耳無敢與較者嗟此葬民何辜而罹此慘耶漢人苦於所司動輒鳴於上官此則不敢鳴卽鳴之矣彼固有所恃而不恐歲時饋獻不過差目具文一有提調則閉匿深藏負嵎以待其洋洋然山頭望廷尉良以平日無事寬容太過及其有事雖有譴罰之名曾無懲創之實彼固視爲故事自謂土官世職莫可如何以致驕縱滋蔓尾大不掉所由肆屠虐而不悛玩法紀若罔聞者故曰其爲惡最深嗚呼其惡宜除也其禍宜防也其苦宜恤也往者滇省常受其害如阿資鳳繼祖阿克普名聲吾必奎猛庭瑞莽應龍沙定洲輩一夫作難全省震蕩前車已覆後車不戒豈非以其固結已久黨類實繁猝難遽去且地方守令鎮防將弁莫不利其蠢懦留爲魚肉之資誰肯輕言去之者曩歲曾有疏

請裁革行令各省查議乃有司鎮將或受其賄賂或狃於私情僉言不宜裁革而止嗚呼果盡不宜裁革乎蓋前疏內於土夷情形猶未透悉故於何者宜去何者宜留未知分晰議者遂得以徇私混復溺偏見而阻大計莫甚於此竊以爲在內地之土司可裁也雖在沿邊而實同於內地之土司亦可裁也宋祖云臥榻之旁豈容他人鼾睡願使侏僑異類深根固蒂分踞郡縣中豈國家久安長治之善策乎且考此輩先人受職之始皆非有開疆辟土不世之勳治亂扶危非常之績也夫茅土分封河山結誓猶有不能保其終者此輩何功何德反得子孫世守其官世虐其民匪但宗藩世祿所不能及元明迄今已六百餘年而彼不移安然坐享不朽之業揆厥由來則去之宜也非過也或者謂夷人鳥語卉服習俗攸殊爰置土司統之所以藉其保固藩籬之用而奈何去之是殆不然夷民種類雖別而畏威懼法之心與舍苦就樂之情則一苟善撫之時非赤子就滇而論從前皆夷也而今之城郭人民風俗衣冠改土歸流變夷爲夏者十且八九未聞必藉土司而後保固也若所謂藩籬者乃邊境之外者也豈有在內地者而亦藉以爲藩籬乎或者又謂夷人在內地者雖屬土官管轄土官仍屬流官節制比於子民相安已久何以更張爲哉此庸流淺見也籌邊之道在乎防微保民之方貴於經久若僅泥於目前非不晏安無事而不知其有事之機自在也且以土人言之同在中華之內而風化不能及恩澤不克沾蓋各土官以隔別之在流官曰此土人非我百姓漠視之耳至於科派之重刻虐之慘則惟土官司之在流官又曰此土人非我百姓奚預我事又漠視之耳若徭差役使土官得以疲之者流官亦得以疲之徵索需索土官得以苛之者流官亦得以苛之若近值營鎮之處則又加以將弁之騷擾其苦萬狀更僕莫數嗟乎率土之濱莫非王臣乃忍令若輩人子孫奕葉永沈淪苦海中乎救焚拯溺是誠不可緩者也雖然若一旦盡去之勢又不能必有道焉參處降調一依流官之例倘罪應斥革卽以漢官代之停其承襲善哉令狐絢所以處宦官者曰有罪不赦有缺不

補則以漸而去耳毋務爲姑息養癰之計而兼不失乎躁急然後錄其人
民籍其田地減賦役以甦其力給牛種以裕其源選用循良善加撫恤不
出百年內地可以肅清肘腋可以無虞使數千萬衆蚩蠢窮瘁悉得出湯
火而見天日其於固邊境安夷禦豈曰小補之哉若沿邊之土司則宜存
也彼既不在我腹地與我土地不相錯雜城郭不相逼近無事則藉爲藩
籬之用設或有事猶可一面禦之非若內地者一有不虞卽在心腹之間
也然非徒存之已也必有以漸變之必有以善撫之禁有司鎮防之貪黷
絕漢奸流氓棍之句唆鄰近豪民毋使有侵漁陵侮出入賓商毋使有欺騙
擾害禍患必援毋因其有事而棄之荒歉必拯毋因其被災而絕之於是
申之以法而彼知懼則其惡無敢肆嚴之以威而彼知警則其亂何由生
爲之百姓者既獲免於荼毒爲之統馭者又不病於掣肘復爲之潛消焉
默化焉又養之以恩恤之以惠使彼得以生息焉久而久之鮮不爲我良
民矣然後由近而推之由漸而被之舉緬甸八百郡縣之可也夫何慮於
永哉噫豈獨永爲然哉全滇之土司皆然也天下之土司皆然也

宣統元年會議政務處遵議督辦川滇邊務大臣趙爾豐奏德格土司納還
全境請改土歸流查原奏稱德格土舍多格生吉自揣才不勝任願將德格全
境人民土地納還 朝廷並據聲稱德格地方自該土舍與昂逆互爭雄長十
餘年來民罹虐政慘不忍聞且其地近接察台形勢險要土脈膏腴果能肇畫
經營實足外扶藏衛內屏川邊等語 臣等遵查各省土司之設在苗民嚮化伊
始因其政俗畀以職權至其治理地方並由各督撫考成黜陟會典內載土官
不遵法度例得題參治罪或另立土官或改土歸流近如雲南之鎮康北勝土
州暨四川章谷土司改設爐霍屯官亦經部議照准今德格土司因爭嬰啟衅
十有餘年重煩兵力勘定其地形既爲川藏扼要之區其土舍祇爲性命求全
之計歸心納款胥出至誠自應請 旨准將德格土地全境收回改設流官至
該土舍多格生吉自願以世守地方輸誠效順應請優予獎勵 賞給世襲都
司實職以資觀感每年由德格徵糧項下撥給銀二三千兩贍其日用其原有

二品頂戴花翎據該土舍稟稱向例年班朝貢均係襲戴等因應懇 恩准照
舊戴用並請飭下四川總督會同該大臣辦理該土舍原名多吉僧格既據聲
稱誤作多格生吉並准更正立案

二年廣西巡撫張鳴岐奏憑祥土官李樹培貪暴虐民請革去世職改土歸流
略稱憑祥西南北三面處處與越南緊接形勢最爲扼要內則與明江同知兼
攝先已改流之上石土州及甯明州承審之下石土州均屬毗連形同犄角關
隘多在憑祥上石一帶下石爲上石後路爲守關計上石不能與憑祥分畫爲
上石後路計下石又須與上石合治應將舊日上石土州地界畫出歸併憑祥
改爲廳治下石土州歸該廳兼轄承審改設同知員缺職司撫民卽定名曰憑
祥廳撫民同知駐紮憑祥土州舊治錢糧訟獄以及地方政事均歸管理一切
處分照專管之例刑名錢穀歸太平府勘轉考核仍隸太平思順道統轄甯明
州承審之下石土州撥歸該同知承審兼有管轄土官之責以便控馭原設憑
祥州判業已奏裁應請添設照舊兼司獄一員作爲咨調要缺與同知均三年
俸滿在任候升

又督辦川滇邊務大臣趙爾豐奏高日土司改土歸流應予職銜承襲並給予
贈地略稱查高日土司乃係長官司之職較之土千戶品級尤崇應懇予以世
襲守備職銜准其永遠承襲

又雲貴總督李經羲奏永昌府屬鎮康土州改流擬請添設知州一缺巡檢二
缺分司治理

又四川總督趙爾巽奏收回會理州屬五土司地方改土歸流

又奏會理州屬五土司一曰披砂土千戶二曰會理村土千戶三曰苦竹土百
戶四曰者保土百戶五曰通安舟土百戶自康雍以來祿應麟等先後投誠襲
職一姓相承垂二百餘年其地自西昌縣以南東南南界金沙江與滇省接壤幾
占會理州全境之半族大勢強自祿紹武出兼併強梁益不可制幸紹武奪魄
祿氏絕嗣於是外姻遠姓環伺以起而祿紹武之妻祿自氏祿方氏等各樹黨
援交訂互競去歲有自復祺與祿自氏爭佔苦竹土署又有貴州威甯州土舍

祿祿祥率黨越界佔據者保土署與祿自氏自復祿藉爭襲爲名聚眾互閱據會理州知州王香余稟請派兵彈壓爰飭署甯遠府知府升署建昌鎮總兵署會理州知州王香余先以兵力擒渠平亂俟夷既平祿氏改土歸流之舉益無障礙計五土司印信全行收回所收各土司轄境遼闊地多沃衍披砂地方爲會理州東路繁鎮居民千有餘家設治極爲切要見委縣丞李熙前往充設治委員一俟籌置就緒另案奏明辦理

又會議政務處奏議覆四川總督趙爾巽等奏請德格春科高日三土司改土歸流略稱原奏稱川邊土司地方遼闊者莫如德格南與瞻對及裏巴塘接壤北與西甯及俄洛野番交界西北與野番交界不止二千餘里東連麻書孔撒土司西鄰察木多乍了各界亦五六百里益以春科高日兩土司地方暨靈蔥土司之郎吉嶺四村東西延袤亦千有餘里形勢扼要據金沙江之上游統籌大勢應建置州縣十餘缺乃敷分布擬於德格春科高日交界之登科地方設知府一員德格適中之龔壩設知州一員德化之北與俄洛西甯毗連之雜渠卡設知縣一員德化之南與巴塘相連之白玉設知州一員德化之西與乍了察木多連界之洞普設知縣一員德化之東與麻書孔撒土司連界之處暫歸德化縣管理等語節經臣處管理藩部陸軍部議奏奉 旨准如所奏

三年民政部奏各省土司擬請改設流官略稱西南各省土府州縣及宣慰宣撫安撫長官諸司之制大都沿自前明遠承唐宋因仍舊俗官其酋長俾之世守用示羈縻要皆封建之規實殊牧令之治康熙雍正年間川楚滇桂各省迭議改土歸流如湖北之施南湖南之永順四川之甯遠廣西之泗城雲南之東川貴州之古州威寧等府廳州縣先後建置漸成內地乾隆以後大小金川重煩兵力迨改設民官而後永遠底定比值籌備憲政尤宜擴充民治近年各省如雲南之富州鎮康四川之巴安等處均經各該疆臣先後奏請改土歸流而廣西一省改革尤多所有土州縣均因事奏請停襲及撤任調省乃派委員彈壓代辦此外則四川之瞻對察木多等處尙未實行德爾格式高日春科等處甫經覈准伏維川滇等省僻處邊陲自非一律更張不足以鞏固疆圉惟各省

情形不同辦法亦難一致除湖北湖南土司已全改流官外廣西土州縣貴州長官司等名雖土官實已漸同郡縣經畫改置當不甚難四川則未改流者尙十之六七雲南土司多接外服甘肅土司從未變革似須審慎辦理乃可徐就範圍擬請 飭下各該省督撫暨邊務大臣詳細調查凡有土司土官地方酌擬改流辦法奏請核議施行其實有窒礙暫難擬改者或從事教育或收回法權併將地理夷險道路交通詳加稽覈繪製圖表以期稍立基礎爲異日更置之階似於邊務不無裨益

皇朝續文獻通考卷一百三十七

職官考二十三 外武職

八旗駐防

臣謹案將軍二字見於禮記將軍文左傳晉國沒故寬曰豈將公羊傳將軍子穀梁傳使軍夜姑是將軍之號當始於春秋時後漢書西南夷傳帝不重戰國始有大將軍大將軍思其今之奉天吉林黑龍江將軍唐東都北京留守宋西京南京北京留守也各省駐防將軍前漢將屯將軍後漢右校尉也駐防副都統宋總管鈐轄司副總管副都統制也協領宋同統制也城守尉宋路分都監也防守尉宋州府都監也佐領明千戶也驍騎校明百戶也謹遵前考而類次之

乾隆五十三年察哈爾駝馬場設四品總管一人牛羊羣牧場設五品副總管一人

五十五年呼倫貝爾增設額魯特驍騎校二人

長白西清曰黑龍江與俄羅斯分界處歲以五六月閒派齊齊哈爾墨爾根黑龍江協領各一員佐領驍騎校各二員共兵二百四十名分三路至格爾畢齊額爾古訥墨里勒克楚爾海圖楚爾海圖即額爾古納河出金礦近車臣汗帳此地所產鐵等河巡視謂之察邊格爾畢齊額爾古訥二河齊齊哈爾卓帳處也黑爾勒克河墨爾根卓帳處也楚爾海圖河黑龍江卓帳處也每齊齊哈爾協領與墨爾根協領會墨爾根協領與黑龍江協領會各書銜名月日於木牌瘞山上明年察邊者取歸以呈將軍副都統又各瘞木牌以備後來考驗此為定例察邊之事歲於七月內咨報理藩院而邊界宵謚例於年終專摺奏聞至將軍惟新任者察邊餘不爾察邊者既至格爾畢齊河瑪玉爾先來謁待以賓禮明日請我官過其地盛設酒肴極意款洽屋不其高敞四面多窗無樞皆嵌玻璃酒五色頗香清然限三爵不多進食則用七故我官宴瑪玉爾設掛麪瑪玉爾愛之難於入口以彼俗不慣用箸也瑪玉爾俄羅斯官名瑪玉爾來或與妻偕妻以喇嘛為侍從跬步

不離喇嘛深目高鼻髮類西洋人官兵望而遠之不與談

徐宗亮曰按中俄分江為界黑龍江城傍江而治由西徂東幾及二千里外皆其轄境支河曲港環山抱嶺所在與俄人相望四顧空闊路少行蹤欲求扼要之險以憑守禦茫無定所水陸額兵不滿二千其防護漠河金廠及養育屯丁師船水手皆在其中縱使將皆廉恥兵皆節制亦不免跋前疐後之虞總理各國事務衙門於開辦東三省練軍時奏稱黑龍江將軍遠駐齊齊哈爾控制非便副都統之任較重蓋亦慨乎其言之矣今副都統兼理中俄交涉事件夙於例案邊情均少閱歷遇有交涉僅憑邊界官一言咨達將軍進止而歷任將軍及練兵大臣亦未嘗一至其境備攬形勢之要新舊練軍數至萬五千人部庫實餉歲至八十餘萬均在經制之外朝廷籌邊大政不為不至重且周當局者所當深體此義者也又曰興安城創始於將軍文緒編旗設官事甚忽遽總管由齊齊哈爾滿洲協領內揀補公中副管由各城揀選通習文藝之員分領左右二司以資教導實則寄居站房徒擁虛位並城署亦同虛設所部五路俄倫春深藏山中不一輕出副總管以下皆其打牲頭目為之視職官俸餉固不足輕重也興安城橫跨全嶺與黑龍江城分治嶺之南北實為墨爾根黑龍江兩城犄角改部落為制兵以固邊實而杜敵誘始事者之謀慮深矣

嘉慶四年察哈爾牛羊羣牧場設四品總管一人

七年諭從前巡查寶坻等九處駐防惟派一人但地方較多一人巡查未免需用時日亦不能周到嗣後即為二缺仍著該部將寶坻縣保定府滄州霸州良鄉縣雄縣固安縣東安縣采育里等九處分為左右兩翼臨期聽派二員分管巡查嗣議定寶坻縣滄州東安縣采育里等四處作為左翼保定府固安縣雄縣良鄉縣霸州等五處作為右翼

道光六年移寶古塔防禦四員駐拉林添設筆帖式二員

二十三年移熊岳副都統協領駐金州金州城守尉駐蓋州蓋州防守尉駐熊岳統歸金州副都統兼轄改岫巖歸盛京將軍轄

謹案以上所舉者乾隆五十一年後 畿輔吉林黑龍江察哈爾等處 駐防小改革而已各省之設駐防者更有山東山西綏遠城河南江南湖北福建浙江陝西甘肅四川廣東方髮燄之燎原也上游荊州下游京口之駐防爭出死力以與官軍相犄角卒以再造咸豐十年杭州外城已不守駐防營里許耳登陴固守危而復存豈不足以作忠義之氣而仰報累朝之教養也哉

咸豐二年裁汰雙城堡協領改為副都統銜總管添設委協領一員由該堡佐領內選委並由該屯驍騎校內委用佐領由該翼領催委官筆帖式內揀委驍騎校又該堡佐領內果有人材歸入通省佐領遇有通省協參領缺出分別滿洲蒙古漢軍旗分一體入選揀放

五年雙城堡裁撤原設京旗翼各翼統歸中屯管轄並改舊設京旗六翼為六佐領仍分左右兩翼每翼各分佐領三員又由甯古塔伯都訥三姓額設一百二十名前鋒內每處各撤五名共十五名歸該堡選放並於前鋒十五名內挑取委前鋒校二員旗衆二名又由驍騎校內每翼派委虛銜防禦一員章京一員並由甲兵內派委額外官二名五年期滿遇有應升缺出先儘揀選

同治八年吉林五常堡添設協領一員佐領二員防禦二員驍騎校四員均作為公缺遇有缺出由通省所屬滿洲蒙古漢軍人員內以次拔補又擇淨丁中公正者派為領催委官十二名遇有委署驍騎校等官缺出即將該淨丁等齊補

又議准理春地方酌添旗伍分置八旗由吉林省滿洲八旗裁挪防禦五員理春地方除原有佐領三員再添佐領三員防禦委佐領二員除原有驍騎校三員再添驍騎校五員

又議准墨爾根城索倫佐領驍騎校各一員防禦四員移撥呼蘭巴彥蘇蘇並添設驍騎校三員筆帖式二員領催十六名再由甲兵領催內挑委筆帖式二員七品頂戴委官四員其佐領加協領銜防禦加佐領銜即責令兼辦該處協佐領事務

九年 諭富明阿等奏理春邊務事繁請將該處協領賞加副都統銜以資鎮攝等語理春協領訥穆錦著賞加副都統銜嗣後理春協領一缺即作為副都統銜協領永為定制

又吉林添設甯古塔伯都訥三姓阿勒楚喀雙城堡烏拉總管衙門滿教習各一員均以通省各該處無品級筆帖式考補不開底缺至吉林白山書院亦酌添漢文教習一員由將軍衙門五司當差水手營正丁貼書內揀選作為定額統俟三年差滿送部引 見倘成效不足再留三年方准保送滿教習分別滿洲蒙古漢軍各以該部落旗翼之驍騎校用過三缺後補用一員漢教習以該營六品官缺開一揀補

十一年 諭德英等奏布特哈滿洲總管請援例加銜一摺據稱布特哈滿洲總管一缺管轄地方甚廣事務亦繁該員執掌關防所有官兵牲丁皆資統率請援照呼倫貝爾掌關防總管之例賞加副都統銜以崇體制著照所請布特哈滿洲總管一缺賞加副都統銜

光緒元年吉林五常堡添設滿教習一員由該堡領催委署筆帖式內揀補作為定額三年期滿遇有本旗驍騎校缺出俟領催等用過三缺後補用一員

又議准 興京添設副都統一員駐紮 陵街管轄 永陵總管翼長關防等官及守護 陵寢各項兵役其官兵升調暨緊要事件仍歸將軍軍數辦並升廣甯防守尉為 興京協領即以興京城守尉舊署駐紮遇有缺出照例於應揀錦州協領各項人員內一體揀選其 興京城守尉移駐廣甯作為廣甯城守尉由宗室人員揀放又添設防禦四員驍騎校四員連原設防禦驍騎校各四員計共防禦八缺驍騎校八缺

二年撥荆州駐防兵改駐江甯調協領佐領防禦驍騎校等官三十一員補額設各缺

又撥荆州駐防兵改駐杭州設正白正紅兩旗四佐領各一缺鑲白鑲紅兩旗頭佐領各一缺驍騎校共四缺其鑲白鑲紅兩旗頭佐領向係協領兼管之缺俟營制規復後仍由協領兼管

又兵部奏准盛京額設滿蒙漢八旗協領等缺將保舉應升兩班人員一體入隊考驗弓馬並試以公事酌量請補

五年吉林多歡站委領催准挑補委官遇有委官缺出照例俟領催用過三缺後補用改武候補筆帖式一人第五次缺出再用委領催一人五缺一輪

又定涼州駐防額設滿洲驍騎校八員蒙古驍騎校二員遇有缺出准由文舉人挑補領催前鋒者一體揀選保送又改呼蘭左右翼副管各一員為協領分

為兩翼公缺由各翼應升人員內揀選巴彥蘇蘇新設協領一缺作為公缺由兩翼應升人員揀選呼蘭巴彥蘇蘇新設佐領驍騎校各八員均作為公缺統

由各翼各部落應升人員內選用又呼蘭原設八旗每旗佐領驍騎校各一員見添佐領驍騎校各四員上四旗每旗編為佐領驍騎校各二員下四旗每旗

仍為佐領驍騎校各一員兩協領各管四旗六佐領巴彥蘇蘇新設協領一員佐領驍騎校各四員編為上四旗其移撥北團林子陳營原編兩旗改為下四

旗統為八旗又移紮北團林子武營佐領委協領一員原由右翼索倫佐領移撥額有缺出即由該部落佐領內選補防禦委佐領四員驍騎校一員仍照舊

章辦理其餘驍騎校三缺改為公缺歸兩翼揀選又議准呼蘭副都統比照各城副都統營制添設防禦四員作為兩翼之缺由

各該翼滿洲應升人員內揀補又 諭嗣後科布多換防官兵由綏遠城將軍查照應行更換員名數目選擇

通曉滿洲蒙古漢文者造具清冊專送科城毋庸送由烏里雅蘇台分撥又議准黑龍江將軍豐紳等奏請改呼蘭城守尉為副都統原設副管二缺改

為正任協領並添設佐領四員連原設佐領八員共十二員驍騎校四員連原設驍騎校八員共十二員又巴彥蘇蘇前經移添佐領一員防禦驍騎校各四

員領催馬甲二百十六名全行移紮北團林子並於巴彥蘇蘇添設協領一員佐領驍騎校各四員就近歸新設呼蘭副都統節制

六年盛京將軍岐元等奏請奉天添設圍場總管一缺並加副都統銜兼練兵統帶官

又吉林赫哲地方添設協領一員佐領四員防禦二員驍騎校四員七年改呼倫貝爾副都統職銜總管為副都統

又 諭銘安等奏請添設副都統暨建造衙署各摺片吉林琿春地方遼闊向歸甯古塔副都統管轄相距遙遠該將軍等請添設大員以資統率係為因地

制宜起見著照所請添設琿春副都統一員其建造衙署各節均著照所議辦理

八年議准黑龍江茂興站添設掌路記防禦一員由省城實缺防禦派充三年任滿即行更換毋庸另添額缺並添設委署驍騎校二員由該營領催內挑補

又定吉林屬赫哲富新改作富克錦所有添設協領一缺佐領四缺編設鑲黃正黃正白正紅四旗名色

又裁汰雙城堡總管及委協領改設協領一員歸阿勒楚喀副都統兼轄並將阿勒楚喀原設佐領委協領一缺防禦委佐領一缺領催委驍騎校二缺拉林

原設防禦委佐領二缺領催委驍騎校一缺均改為實任至阿勒楚喀左右兩司原設辦事筆帖式六員前經移撥二員於雙城堡今仍撥還

九年黑龍江添設鄂倫春滿洲副都統銜總管一員六年俸滿送部引 見又兵部議准廣州水師旗營原設協領一員佐領二員防禦二員驍騎校六員

由領催內委署驍騎校四員均改為陸路步軍營按照左右兩翼分為八旗令協領一員統管每翼設佐領一員管轄本翼四旗鑲黃正黃兩旗各設防禦一

員其餘六旗令驍騎校六員分別管理十二年兵部等奏准琿春右翼委協領一缺及舊設防禦委佐領二缺均改為

實缺其舊設筆帖式四員除分隸邊務承辦處一缺左司二缺外右司僅止一缺今再增設一缺分隸右司並另增額委筆帖式三缺分置各司

三十四年陸軍部會奏遵議署直隸總督楊士驥熱河都統廷杰奏圍場裁撤駐防另籌安置酌留翼長等員分管旗籍略稱查圍場駐防自設立以來戶口

繁滋不下兩萬一旦裁撤聽其散漫無歸不惟流離失所且恐恃眾生非今該都統等請留翼長驍騎校各二員領催八名分管旗籍自應准如所奏至裁缺

官員令各歸京旗按原品遇缺即補其不願者准由熱河另定插補章程查駐防旗官自撥駐圍場以來年代已深無殊土著又皆清苦異常若迫令回京不惟人地生疎且與該員等生計有礙查圍場原設翼長二員防禦八員驍騎校八員除所留之翼長驍騎校四員外尚有防禦八員驍騎校六員擬請一律歸入熱河應如何插補之處由熱河都統定章奏明辦理倘各員京旗地方存有產業仍願回京者可聽自便

宣統元年會議政務處奏議覆四川總督電奏成都將軍權限略稱查各省將軍一職本為統轄駐防八旗官兵惟成都將軍設於乾隆四十一年時值大小金川甫經平定控馭土番皆以將軍為政故令統轄鎮道及番地文武各員較之福州廣州等處將軍僅兼轄綠營水師者事權尤重嗣後邊境又安則治理地方自不能不歸之總督祇以將軍原奉 敕書相承未改遇有邊務各執意見齟齬奉掣誠如該督原奏所稱第以將軍統治全川則軍府之規迥異疆圉之制如奉天吉林等處建立行省方以將軍改設督撫斷無轉裁四川總督之理至以總督兼轄旗營則川省駐防情形向與東三省旗民事務歸一者不同即為融化滿漢起見在變通旗制處甫經設立各省駐防均尚循舊辦理獨先裁併成都亦多窒礙擬請仍留成都將軍一缺專轄駐防八旗蒙古官兵事宜照舊辦理惟將原頒 敕書所載統轄松潘建昌二鎮及阜和協所屬各營松茂建昌二道所屬府廳州縣暨一切土司番情邊務統歸四川總督管轄俾專責成將軍總督同係 特簡大員膺受重寄見在權限雖分仍應共矢公忠相助為理請 飭該管衙門將成都將軍四川總督原奉 敕書一併改擬分別換給以清界限而資遵守

二年署綏遠城將軍信勤奏略稱 臣於上年奏設調查局清理款目詳察蒙情茲經蒞事應即裁撤歸併墾務公所按照新章分科治事將墾務應辦事宜遵員分任以專責成計設秘書員二掌參議渠墾機要並草擬奏咨文件一日財政掌統籌盈絀為開源節流之計畫一日考工掌審度河渠籌維水利一日蒙務掌蒙旗報地指界繕譯蒙文一日文牘掌撰擬函牘及因公簡札一日庶務

掌收發文件監用關防清理文卷經管收支以及隨時差委每科酌設科長科副課員錄事管總差弁役皆以事之繁簡定員之多寡務令按職以課功庶可得人而事舉

又東三省總督錫良奏海龍總管本為管理圍場而設今既改設府縣明定職守總管已成虛設應請裁撤原設佐領以下各官有管理兵丁之責均請毋庸裁撤並將兵丁隨時選充地方巡警以期逐漸裁改該處應辦旗務應即責成佐領直接公署仍歸旗務處考核辦理筆帖式一員專司冊檔自應一併裁撤又杭州將軍志銳奏請變通銷除旗檔舊制

三年廣州將軍增祺等奏籌備粵防生計酌擬變通辦法廣州駐防向無莊田馬廠除官署兵房外舊有將軍副都統署外羣房裁汰兵房及菜地魚塘菜塚餘地此外尚有東校場北校場燕塘礮營河南水師舊軍工廠鳳岡旗營水師礮臺見將已裁旗營水師操場閒地四百餘畝招商承領以售價為開辦工業設立農事試驗場之用更於東校場四圍陸續建築以作將來營業之基礎至於舊日兵房各署餘地或填築房屋以棲止孤寒或招人承領以融洽滿漢第粵防丁口兩萬七千有餘僅此區區祇能小補近聞韶州府屬翁源等縣荒地尚多沿河沙田歲有增漲向有民戶呈報繳價升科見在滿漢融和駐防居此多年無異土著應請 飭下兩廣督臣派員調查以為歸農之豫備又奏住居一事為憲法上之要件廣州駐防丁口既編列南海縣選民之內請將額設房閒賞給各該見任駐防官兵作為恆產俾得永續居住得為選民其有額設房閒坍塌未食錢糧貧乏各戶並無置有房產者擬將各該旗所有馬圈箭道公衙廟宇及向有公產各房閒空餘地段一律均勻配給以免偏枯

提督總兵副將 恭將游擊都司守備千總把總外委

臣謹案武官加提督始於明陝西總兵李如松漢都尉魏都督周隋總管唐節度使宋都統制元都元帥也總兵官見於元末明初因之周師帥也副將始於本朝唐節度使副使明副總兵官也明初置左右叅將漢有游擊將軍之號唐始置游擊官明置都司守備周兩司馬也又置千總把總

周伍長也茲將提鎮副將及參游以下分爲二目而以督練公所附焉

嘉慶元年 諭三廳地方惟鎮軍設有總兵駐劄鳳凰廳永綏乾州祇有副將一員駐劄永綏恐不足資鎮撫畢沅等察看情形如須添設總兵即於帶兵出力及苗衆畏服者酌留一員駐劄控制又三廳地方皆辰州所屬而該省提督遠駐常德未免鞭長莫及著一併籌酌如應移駐即奏明辦理

五年 諭提督總兵皆係一二品大員向有奏事之責而近來各提鎮所遞奏章祇循例奏報雨水及請陛見謝恩等摺於該管事務從無一人奏及其識見若何朕亦無由而知從前雍正年間各提鎮於地方營伍事務條陳利弊者甚多此時各提鎮即以地方事件本非專辦未能深悉而營伍是其專責亦未將如何整飭訓練之處隨時奏陳本日蘇靈差人齎摺專係恭謝恩賞千叟宴詩并用駢句掉用文墨殊屬非是著傳旨申飭嗣後各提鎮應循照雍正年間各武職奏事舊規將營伍事件認真經理如有所見不拘清漢字繕摺具奏即地方事務遇有關緊要者聞見既確亦當據實奏聞毋得仍前僅以尋常奏謝及具報雨水等摺塞責

又 諭書麟奏請將黔省總兵以下照浙江之例交貴州巡撫節制一摺所見甚是黔省地控苗疆界連川楚兵防最關緊要雲貴總督駐劄雲南離黔省較遠其貴州營伍不能時加校閱而鎮將平日訓練之勤惰亦恐耳目難周自應令貴州巡撫就近考察俾資整飭嗣後黔省總兵以下均著巡撫節制所有各鎮協營官兵責成該撫隨時校閱如有怠玩廢弛即知會總督分別參革著爲令

又 諭陝西五郎地方層巒疊嶂道路分歧奸民易於藏匿自當專設總兵大員永資鎮守以爲西安省城屏障著照長麟所請設立總兵一員賜名賈陝鎮在五郎廳駐劄其應設將備及安置墩汛各事著該督撫酌議具奏
七年 諭額勒登保等奏請將固原陝安提鎮仍因舊制并另籌漢南添設營汛各事宜一摺國家設立督撫提鎮原擇扼要適中之地駐劄以資控馭而垂永久不可因目前情形稍涉緊要遽議更張前長麟等請將固原提督移駐漢

中經兵部議准此祇係一時權宜并未計及久遠朕意此事所關甚重原欲降旨不改舊制今額勒登保等以見在漢中地方雖較固原爲緊要若大功告竣後所應辦者不過盤緝奸宄等事非若固原之防禦邊陲彈壓番族者可比所見甚是著照所請固原提督無須移駐漢中紛更營制至向例每三年提督至興安漢中巡閱一次爲期太遠該處萬山叢雜地方遼闊奸民最易藏迹必須常有大員往來稽查方足以資鎮撫見在海疆提鎮即有每年出洋會哨之例嗣後陝安鎮協及甯陝鎮俱著該提督每年巡查一次餘著該部覈議具奏
道光元年添設直隸大名鎮總兵官一人

十二年改廣東崖州營參將爲崖州水陸副將

十九年以四川越嶲馬邊等廳距省遙遠命提鎮等各就所轄按期分駐巡防二十二年 諭天津爲京畿藩衛前曾降旨將巴里坤總兵裁撤移置天津交兵部詳查具奏茲據該部奏稱嘉峪關外設立兩鎮一爲巴里坤一爲伊犁而巴里坤尤爲扼要該處總兵未便裁撤惟伊犁總兵與伊犁將軍駐紮相離甚近且綠營將備向歸將軍統轄可由該將軍就近稽察等語著照所議即將伊犁總兵裁撤移置天津其舊有之官弁著兵部酌裁十分之二三詳細覈議具奏至伊犁屯出兵丁應歸何員專轄兼轄之處並著陝甘總督伊犁將軍參贊大臣會同妥議章程奏明辦理

又直隸總督訥爾經額奏天津大沽南北兩岸暨迤南狼坨子一帶天津鎮總兵足資控馭惟北塘五十餘里距甯河縣城二十餘里之蘆台地方爲北塘後路南界天津東北毗連豐潤永平府一帶西北地接通州實屬扼要之區請以新添總兵駐紮蘆台名爲通永鎮總兵官將北塘海口豐潤玉田采育三河寶坻張灣等營通州協右營暨提標山海石門二路甯河樂亭二營共十五營均歸統轄於蘆台安設中左右三營左營應設總兵之中軍兼左營游擊一員左營守備一員右營都司一員並左右兩營分設左哨千總二右哨千總二頭司把總二二司把總二又分防把總二經制外委六添設游都守千把外委十九員覈計裁撤伊犁鎮標之游擊等缺移抵外尚不敷守備一員

千總一員即於直隸簡僻營分內裁撥移駐並將新設鎮標之分防把總二員撥駐新河營城二汛將原設之經制外委二員撤歸鎮標差操其蘆台之專汛千總一員即歸新鎮右營都司兼轄中左右三營撥兵一千名專操水陸技藝除蘆台本有專汛千總存營兵八千名外尚需兵九百二十名查蘆台營游擊駐紮北塘計存營兵一千一百二十四名新鎮見駐蘆台為北塘後勁擬將駐紮北塘之蘆台營游擊作為北塘營游擊仍駐北塘於存營兵一千一百二十四名內撥兵六百二十名移駐蘆台其不敷兵三百名擬於大沽協左右兩營暨葛沽營新兵內撥兵三百名共一千名連北塘之兵五百零四名作為新鎮親標統計撥歸新鎮兵五千四百八十六名仍歸舊鎮管轄兵七千五百零四名

二十三年添設江南福山鎮水師總兵

又改裁西安鎮總兵移置天津為通永鎮總兵其西安鎮兵一千六百餘名撥歸撫標一千二百名添設中營原設左營參將改為撫標中軍參將右營游擊改為左營游擊應設右營游擊即以鎮標左營游擊改撥其鎮標餘兵四百餘名准其歸併西安城守營原設城守參將改為副將移神木協副將並中軍都司歸西安城守營移西安城守參將歸神木營西安鎮原設官弁一併裁抵通永鎮添設各缺

三十年改山東登州鎮為水師兼轄陸路原設水師後營游擊為登州鎮水師中軍游擊文登協陸路副將為水師副將兼轄陸路原設陸路都司一員仍為文登協陸路中軍都司添設水師守備一員為文登協水師中軍守備撥水師前營東汛千總水師後營把總各一員水師後營登中營登右營即墨營外委各一員文登協存營水師後營登中營即墨營額外外委各一員俱隸文登協水師令新舊三營分轄洋面

咸豐五年奏准添設皖南鎮總兵一人 諭何桂清奏遵議皖南添改鎮道事宜一摺詳閱所奏係為各專責成起見此時徽甯兩府甫就肅清池太各屬尙未悉數收復地方公事與軍務交涉者多原不能過為區別惟據奏稱石景芬

所帶兵勇見已陸續裁汰是以責令專任地方而以防勦事宜仍責見辦文武亦屬因時制宜即著照所議辦理徽池防勦善後既係張芾一手經理該員見無職守自可專心籌辦若甯太兵勇雖歸鄧紹良調度而該員四出征勦並非專顧皖省之人皖南既新設總兵即應令其專司防勦豈可以本境軍務概委客兵見在簡放之豫祺本係浙江副將何桂清必能深悉其人著即詳加體察該員於新設重鎮能否勝任如果明白勇往則皖南軍務儘可責令督辦倘不能勝任亦即據實具奏不可稍存成見總之皖南既特設鎮道即不當專恃鄰省為依傍惟事屬草創需兵則不能不仰給於金陵需餉則仍賴浙江為協濟惟在不分畛域互相聯絡使可戰可守則地方日有起色該撫如有所見仍當隨時奏聞

七年 諭御史王德固奏請添設總兵一摺據稱河南額設總兵二員河北鎮在省西北南陽鎮在省西南其東南之歸德等處並未設有專崗大員歸德府為東面入省門戶地無險阻接壤穎毫蕭曹單向為匪徒出沒之區僅有參將一員難資鎮壓見值勦捻喫緊請添設總兵一員其毗連歸德之光州陳州府各屬營伍均歸管轄並請將歸德原設參將一員量移光州藉資策應自為地方緊要酌量變通起見著英桂酌度地方形勢及營伍兵數多寡是否應行添設移改之處妥議具奏

八年升歸德營為歸德鎮設總兵官一駐府城

同治三年議設長江水師提督一人

四年議設岳州漢口湖口瓜州總兵各一人副將六人參將七人游擊十一人都司六人守備六人千總二十二把總二十七人外委三十八人

又議以狼山鎮總兵兼隸長江仍聽兩江總督江蘇巡撫松江提督節制

又兩江總督會同藩奏准兵部咨開奉 上諭江南提督著李朝斌補授江南水師提督著黃翼升補授 查江南全省額設提督一員兼轄水陸駐紮松江此外並無江南水師提督員缺惟元年二月間臣於覆奏改建安徽省城摺內曾有添設長江水師提督之請旋經部臣議准在於蕪湖地方建立長江水師

提督衙署而於總兵副參以至千把應設幾缺暨分汛修艦各事宜行令_臣熟籌妥議_臣以軍務倥傯尙未議奏又因部臣所論上接九江下連江甯係專指安徽江面而言_臣所擬則當上起岳州下抵福山係通指五省江面而言必須會同五省督撫暨楊岳斌彭玉麟等往來熟商始克議定是以遲遲未及具疏上陳自奏准新設此缺至今未蒙_旨李朝斌補授江南提督自係李世忠所遺之缺其黃翼升所補江南水師提督是否即係新設長江水師提督之缺如即係此缺應請_敕部撰擬字樣新鑄印信頒發來南以昭信守至長江水師提督設官分汛修艦撥餉各事宜_臣當會同沿江督撫及楊岳斌彭玉麟等詳悉議奏

五年 諭前因左宗棠奏請將安徽補用副將馬復震酌改文職當經諭令吏部查案具奏茲據該部奏查明成案請旨遵行等語武職人員以帶隊衝鋒爲重若改歸文職轉恐用違所長咸豐九年開守備彭忠信等請改文職欽奉_硃諭著不准行並_諭以後保舉軍內再有似此者即駁令另獎_聖訓煌煌允宜遵守所有副將馬復震請改文職之處著毋庸議嗣後各路統兵大臣及各督撫等不得率行奏請

光緒元年以新設雲南澂江營歸臨元鎮總兵專管

七年直隸總督李鴻章奏略稱查張家口副將協標原有左右兩營守備兩員又千總把總經制各二員額外外委三員應令該守備兩員千把總經制額外九員均隨副將移駐多倫即以多倫原有都司一員與移往守備兩員分爲多倫協標中左右三營遇有都司守備缺出一體由外不論滿漢分別升調請補中營都司應兼防河二道泉兩汛右營守備應分駐經棚其土城子等處應分駐千把等弁多倫原有馬步兵連移駐之兵共合七百十二名再暫撥宣化練軍馬隊一營交多倫副將管帶擇要駐紮分段梭巡即責成該副將督率綠營練軍嚴拏盜賊搜查窩家保護商民其烏科兩城換防等兵二百十七名應撥歸張家口營都司管轄又張家口協屬原有萬全營膳房堡新河口堡洗馬林堡四營守備弁兵應就近改歸張家口營都司管轄柴溝營西陽河堡兩

營守備弁兵應就近改歸懷安路都司管轄毋庸再歸多倫協副將兼管至獨石口協標除多倫一營閃電河二道泉二汛撥歸多倫協標外其餘營汛均循其舊查張家口廳原設烏里雅蘇臺太平莊兩汛即以新添經制外委駐紮其太平莊汛仍循其舊所添馬兵三十九名分汛派撥又獨石口廳原設里河丁莊邱鎮二汛見開庫倫諾爾廠地係丁莊汛把總所管惟汛署詎新開地五十里照管難周應將把總移駐庫倫諾爾仍名丁莊汛所添馬兵二十名與各汛酌量分添又多倫廳諾爾營以外均係各旗游牧地面且有多倫協分設營汛無須再撥捕盜弁兵應將新設千把總外委各一員馬兵三十九名駐紮諾爾營遇有盜案責令隨即往擊平時分頭巡緝至此項新設千把總外委即在張獨兩廳捕盜營把總外委目兵內拔補

又改甯夏鎮所屬各營仍歸甘肅提督統轄

又兵部議准雲貴總督岑毓英奏請雲南開化臨元兩鎮每年秋冬二季開化鎮出駐馬白關臨元鎮出駐蒙自縣春夏二季各回駐開化臨安府城移開化中營游擊駐馬白關增設後營游擊一員駐開化府以開化左營都司分防交趾城右營都司分防古林等改石榴紅汛原設都司爲守備並移守備一員駐長嶺岡增設前營游擊一員駐蒙自縣移蒙自之右營都司分防窰頭水田右營守備分防高枝地方移臨元鎮標左營都司並雙明塘同知駐箇箇廠

_臣謹案馬白關爲滇省入越要道蒙自縣爲法人通商衝衝督臣岑毓英籌畫邊隘故以開化臨元兩鎮分地扼防爲請

十二年 諭劉銘傳奏澎湖爲閩臺門戶非特設重鎮不足以資守禦楊昌濬與該撫意見相同擬將澎湖副將與海壇鎮對調仍歸總督管轄等語即著楊昌濬劉銘傳會同籌議具奏閩臺防務關係緊要該督等商辦一切務當和衷共濟不分畛域力顧大局上年諭令該督等會議臺灣改設事宜並著一切妥議

又 諭兵部奏遵議廣東裁併改撥總兵各缺一摺廣東陽江鎮水師總兵著即裁撤改設北海鎮水陸總兵以資控制其高州鎮總兵並著改水陸總兵餘

依議

又是年設北海鎮水陸總兵官駐廉州營游擊為北海鎮標左營游擊陽江鎮標右營都司為北海鎮標右營都司廉州營中軍守備為北海鎮標左營中軍守備化石營都司為石城營都司其原隸高州之龍門協雷州營欽州營徐聞營靈山營及新改石城營均隸北海鎮統轄撥定協左右二營千總一員把總二員外委三員額外委一員歸靈山營改陽江鎮為陽江營以陽江鎮標左營游擊為陽江營游擊隸高州鎮統轄改高州鎮總兵官為水陸總兵官移陽江鎮標右營守備駐電白縣為電白營守備其原隸陽江鎮之確洲營吳川營電白營東山營陽春營均隸高州鎮統轄

又議覆兩廣總督張之洞奏請移原駐柳州之廣西提督帶同中軍參將駐龍州並裁本營前後兩營又設柳慶鎮總兵官駐柳州改提標左右二營游擊為柳慶鎮標左右二營游擊裁新太協右營守備一營改原設龍慶營都司為龍州城守游擊駐龍州歸提督管轄又設守備一員為龍州城守游擊中軍守備改原隸左江鎮總兵營都司歸提督管轄改原隸提督之慶遠協副將義甯協副將融懷營參將柳州城守營都司俱歸柳慶鎮管轄

謹案廣西南邊縣互二千餘里原設隘所一百零九處分卡六十六處與越南之諒山高平宣光等省接壤山簪紛歧路路可通而鎮南關至龍州一路較為寬平故漢為中越使商賈往來之通衢東出太平洋南甯西出歸順鎮安之總匯且自龍州以東河灘漸廣舟行下水直達潯梧其視全桂腹地東省上游據有建瓴之勢實為兩粵利害所關法越之役款議既成 朝命疆臣以重兵扼紮要隘故張之洞因有是請

十三年奏准以澎湖協副將與海壇鎮總兵對調駐紮其海壇協副將仍為外海水師改海壇鎮標中軍兼中營游擊為澎湖中軍兼左營游擊澎湖左營都司為海壇左營都司兼管中軍海壇右營守備為澎湖左營守備海壇協左營都司為福建外海水師海壇協副將歸福建提督節制海壇閩安兩協副將均歸福甯鎮總兵管轄

十七年雲貴總督王文韶等奏將原駐舊衙坪右軍守備移駐永北直隸廳華榮莊所有右軍頭司把總一員留防舊衙坪添設把總一員駐新設之挑口汛均歸右軍守備節制向隸右軍之金江片角兩汛改隸左軍三十年署兩廣總督岑春煊等奏廣西撫標擬酌留中軍參將及都司守備千總把總各一員廣西提標酌留中軍參將及守備千總把總各一員柳慶鎮總兵駐柳州本係新設擬請裁撤而以見駐左江屬百色之右江鎮總兵移駐柳州以駐南甯之左江鎮總兵移駐百色俾兩鎮之名與地名適合兩鎮鎮標均酌留游擊千總各一員其餘官弁一律全裁

三十一年 諭劉永慶著賞給兵部侍郎銜署理江北提督所有江北地方鎮道以下均歸節制

又 諭周馥等電奏請特設江淮臬司等語江北地方重要既經裁撤巡撫改設提督自宜有精強得力之大員以資統攝昨已有旨飭派劉永慶署理江北提督並令節制江北文武所有從前漕督所辦事宜均著該署提督接辦並著將標防各營認真整頓切實訓練按照練兵處定章辦理先成一鎮俾衛地方准揚海道仍遵前旨兼按察使銜清理訟獄所請特設按察使應毋庸議

三十二年考察政治館議准廣東水師陸路兩提督歸併一缺改為水陸提督統轄全省水陸綠營及內河外海師船

三十三年 諭上年岑春煊奏請將廣東水師陸路兩提督歸併一缺經政務處會議奏准改為水陸提督自係為節省經費統一事權起見聞廣東內河外海等處盜賊充斥大為行旅之害甚且擾及外人致令噴有煩言隱圖干預若不亟思整頓肅清匪蹤後患何可勝言查該提督所轄地方寥廓水陸情形又各不同步隊兵輪運用迥別際此多事之時一切巡緝彈壓事宜恐非一人所能兼顧似應規復舊制仍將水陸路提督酌分兩缺各專責成或添設水師總兵一員扼要駐紮藉資補助究應如何辦理方能防範周密妥控制得宜著張人駿體察見在情勢規畫粵省全局籌議切實可行辦法迅速具奏尋張人駿覆奏交會議政務處核議疏入 上諭會議政務處議覆張人駿奏請將水陸

提督仍分兩缺一摺據稱廣東盜賊素多海盜爲患尤劇亟宜加意防範若僅設提督一員水陸實難兼顧應仍分設兩缺各專責成以薩鎮冰補授廣東水師提督秦炳直補授陸路提督薩鎮冰未到任以前著李準署理

三十四年兩廣總督張人駿奏畫分水陸兩提督權限辦法略稱查粵省舊有水陸制兵一百營前此裁七留三將三成官兵併入六十營內除標中營水師營不計外其見有水陸提標陸路中左右前後五營係由前陸路提標五營及惠州協左右營和平永安等營歸併又水陸提標水師中左右三營係由從前水師提標五營歸併見設水師陸路兩提督擬將水陸提標陸路五營改爲陸路提標五營其水師三營則改爲水師提標三營照舊分撥管轄其餘水師二十營仍歸水師提督管轄陸路三十二營仍歸陸路提督管轄惟綠營官兵裁存無幾緝捕向賴防營見將中路之巡防隊及左右兩翼兵輪廣安詔安兩路水軍均歸水師提督統領仍督辦廣東全省保商緝捕事宜兼統巡各江水師駐防惠屬之東路巡防隊及惠安水軍均歸陸路提督統領

又貴州巡撫龐鴻書奏酌裁綠營將弁分別移併略稱查標及提鎮各標駐在同城者均可酌裁一營留千把總外委數員併歸他營管領十協中如定廣平遠清江松桃上江等處地僻事簡則副將可裁清江上江兩處並各裁都司一員永安遵義兩協各裁守備一員銅仁協之中軍都司可裁丹江朗洞之參將及右軍守備可裁各該缺遺出防地事務即以原轄之游擊都守等員遞推管理或分別撥隸移駐所有各營兵丁應俟查明併裁以昭核實茲計共裁副將五員參將兩員游擊六員都司五員守備八員千總一員把總五員外委四員

宣統元年裁湖北黃州協副將一撫標中軍與國營參將各一撫標右營提標右營荊門營鄖陽城守營宜昌前營游擊各一提標前營鄖陽前營施南協中軍都司各一督標右營撫標左營中軍撫標右營德安營中軍提標左營中軍提標後營中軍鄖陽鎮左營中軍前營中軍衛昌營中軍遠安營中軍守備各一從湖廣總督陳夔龍請也

又湖廣總督陳夔龍等奏裁湘省綠營將備略稱計常德寶慶永順等協副將三缺岳州澧州臨武桂陽宜章等參將五缺撫標右營提標右營永州鎮標左營武岡營等游擊四缺提標後營沅州協中軍靖州協中軍等都司三缺撫標右營中軍提標左營中軍綏甯營中軍辰州城守營嶺東營等守備五缺或同城營數較多或經管汛防糧餉較簡皆可一律裁去以省浮冗其各營兵丁仍照章分年裁汰凡係見存之兵丁如裁去副將者其兵馬糧餉即歸該中軍都司管理如裁去參將游擊及專閫都司者其兵馬糧餉即歸該中軍守備或千總管轄至於巡哨彈壓安輯地方仍責成見存各營悉心經理並嚴飭各路巡防隊護理地方有事各按所管汛地就近調營彈壓平時按照定章協同各營汛認真巡緝以期周密此次被裁人員擬援照鄂省裁缺辦法酌留敘補如並無差委得仍留廉俸三年以示體恤

又四川總督趙爾巽奏略稱規畫邊務保路屯兵武職同一重要而綠營員弁屢經裁汰求其銜缺相當並能勝任愉快者尤難其選值此生夷初附巡防撫輯責重事繁但期人地相需自未便拘泥成例所有沿邊之馬邊協副將一缺會川越嶲邊普安等營參將四缺建昌中左靖邊會豐等營游擊四缺懷遠冕山保安安阜甯越等營都司七缺瀘甯永定會川越嶲建昌中左戎邊左營馬邊存城右營普安左右靖邊等營守備十二缺駐紮地而壤接夷巢均極緊要擬請援照文職補用章程不拘常例量才任用尤於邊務有益

二年湖廣總督瑞澂奏湖廣綠營將弁裁撤在即遇有缺出請停補選略稱鄂湘兩省武職無論大小員弁凡遇缺出皆暫時派員署理不復請補見在湖北省出有漢陽協副將興國營守備鄖陽鎮標右營豐溪汛守備施南協右營守備共四缺湖南省出有衡州協副將保靖營參將永州鎮標右營游擊綏靖鎮標中軍游擊綏甯營游擊領溪營游擊永綏協中軍都司保靖營中軍守備武岡營守備共九缺應請一併停補派員暫行署理此外千總以下各缺並請停止補選以歸一律

又貴州巡撫龐鴻書奏續裁綠營將弁暨分別移併員缺略稱黔省地處苗疆

且與滇粵湘四省壤地相連沿邊一帶雖有巡防隊扼要駐紮而兵單地廣終覺不敷分布綠營分防各汛雖未盡能得力然其諳習苗情地勢有時或協同彈壓或藉作偵探似亦較勝於無若一旦概行裁併則邊地空虛未免多有過慮再四籌思惟有再將標及提鎮各標自副將以下各員弁擇其駐劄同城徒據虛位無裨實用者量為裁撤總計共裁副將二員游擊四員都司六員守備十五員千總十員把總二十九員外委二十九員較上屆奏裁之數已加兩倍有餘查內有應行歸併者四營如桂陽營城汛千總外委擬撥歸標中軍管轄安順營城汛千把外委擬撥歸標中軍管轄新添營城汛千總外委擬撥歸定廣營都司管轄古州左營都溪分汛把總擬撥歸中營管轄又有應行酌改者六營如八寨游擊擬移駐都司鎮遠鎮標右營都司擬移駐八弓安順營存城千總擬移駐舊州都勻協存城千總擬移駐八寨銅松協左營存城千總擬移駐石峴汛右營存城千總擬移駐巴茅汛凡此斟酌辦法固不敢失之因循亦不敢出於操切惟期因地制宜相安無事此外存留將弁各員缺查其駐劄處所半係邊要重地可輔防營兵力之所不及擬請暫緩裁撤容俟察看情形再行奏明辦理

又浙江巡撫增韞奏略稱浙省裁撤綠營照預定計畫千把以下與兵同裁於七月初一日一律開缺都司以上則留任兩月酌加公費辦理裁兵未盡事宜於九月初一日一律開缺綜計浙省綠營水陸官缺三百九十九員退休者一百五十餘員應給十年恩俸及川資已委用者約七十餘員候差者約尚有一百六十餘員給予膳費分撥水陸各巡防隊量材委用奉 硃批該撫辦理妥協殊堪嘉尚

三年署兩廣總督張鳴岐奏裁減廣東綠營先將陸路弁兵分別裁留並擬緩裁水師情形略稱廣東綠營見存水陸官缺自提鎮以至外額共五百四十一員除水師官缺提出不計外目前陸路提鎮及邊要暨兼帶防營者計有二十三缺特是防營邊要常見在武職中有日前兼帶防營而見在卸帶者亦有見時不帶防營而日後兼帶者因地制宜辦法原無一定不定某缺應裁某缺

應緩則將來辦理無所適從惟有見在兼帶防營及邊要之二十三缺定為緩裁之缺其餘陸路見任官弁遇事出缺概行裁撤不補若將來應裁之缺或值兼帶防營一時礙難卸帶者仍臨時察酌變通歸入緩裁之列以免窒礙又陸軍部會奏議覆直隸總督陳夔龍奏酌裁綠營官弁暨裁撤大沽協六營員弁各缺

又護四川總督王文韶奏川省腹地各綠營經本任督臣趙爾巽提前裁撤限宣統二年底一律裁盡兵丁則挑選精壯改練防軍將弁則為籌設學堂教練廣為安置業經奏報在案所有重慶川北兩鎮總兵無所統轄亦應同時併裁又閩浙總督松壽奏閩省武職無論大小員弁凡遇缺出不復請補庶官缺與兵額數年限滿得以同時裁盡實於軍政有裨見在福建省出有延平協副將泉州城守營參將龍巖營游擊海壇右營都司閩安建甯連羅各右營守備長福營守備共八缺應請併停補選派員暫行署理此外千把以下各缺並請停止選補以歸一律

右提督總兵副將

嘉慶二年改四川綏甯營參將為綏甯協副將

道光十年移江蘇揚州營守備駐高郵改原設千總為城守千總

又移福建漳州左營守備駐赤湖並添撥弁兵換防

二十年移直隸霸州營游擊為葛沽營游擊葛沽營都司為蘆臺營都司永甯營守備駐霸州滴水崖千總駐永甯撥天津鎮把總經制外委各一駐北塘口宣化鎮經制外委一駐滴水崖

又改雲南開化鎮屬石榴紅汛為營阿迷州屬雙水塘為汛移開化鎮右營都司千總把總各一外委二額外外委一駐石榴紅營臨元鎮千總一駐雙水汛添設廣西州屬賦草電汛移廣西州營把總外委各一駐守移臨元鎮右營都司把總外委各一及蒙自縣屬羅巖汛外委一駐蒙自縣城仍撥羅巖營守備歸臨元鎮右營留外委一駐羅巖汛改蒙自縣屬二塘為汛移縣城把總一駐守改阿迷州屬大小石牙隸文山縣歸開化鎮轄

二十一年撤陝安漢中二鎮派赴巴爾楚克換防兵丁二百名以巴爾楚克屯民募補並裁把總一經制外委四

二十三年定喀喇沙爾裁屯安戶事宜仍設千總把總經制外委各一

二十四年移湖南鄧縣千總駐未陽縣撥外委一駐鄧縣

又添設奉天捕盜千總把總各三經制外委六虛頂外委十二撥馬步兵隸之咸豐八年新設直隸天津海口前右營游擊以葛沽營游擊改駐前左營都司

以鞏華城都司改駐中左營都司以三河營都司改駐改大沽協左營都司爲中右營都司右營都司爲後右營都司

同治三年改甯國營參將爲蕪采營參將蕪采營游擊改爲甯國鎮標左營游擊

又增鎮標右營都司一人守備一人千總一人把總三人

臣謹案髮捻既平湘淮楚各營士卒多徒步起家至提鎮若副參游以下官則纍纍矣其著者手握節旄以去稍樸樸者無以自達牢落且無所容

曾國藩於同治八年五月請以大銜借補小缺屢駁屢請然安得如許小缺可以借補且小缺又將借何缺以補之則亦苟且之計也以一二品大員告身幾乎不能博一醉撤遣歸來輟耕隴畔想望風雲一被煽動邊計

爲匪爲黨亦求衣食耳迨既爲匪黨矣情法所不容容其難所不能盡忽募忽遣何異爲之阱而驅而陷之耶嗟乎不籌教養不清戶口次第而收

納之市井之間長此募兵而無改不特外侮日甚非此曹亡賴所能作且夕之支柱卽內政亦安有振刷之望哉

光緒元年甘肅增設靈武營中軍守備一員千總一員把總二員外委五員山東增設曹州鎮標右營額外外委四人四川設綿州營漢旺場汛額外外委一人

二年直隸增設馬蘭鎮標左右二營千總一員把總二員外委四員

又浙江改原設黃巖鎮左營守備一員千總一員把總三員外委五員隨同總

兵官駐海門爲新設海門城守營內江水師撥甯海右營守備一員千總二員

把總四員外委三員歸海門鎮標左營管轄移嚴州協右營屬安仁汛外委一員駐芝廈歸右營管轄

又黔省下游創設碭屯保護驛路各屯適中分立四屯每屯設千總把總外委各一員平越營撥千總一員松桃協撥千總一員外委二員安義鎮撥千總一員外委一員安順城守營撥外委一員

二年雲貴總督劉長佑奏添設恩隆營守備千總各一員駐紫縣城把總一員分防隴田外委把總馬戰兵二名分防下隆寨里額設馬戰兵五名步戰兵三十七名守兵八十八名俾資守禦防緝

三年陝甘總督左宗棠等奏請添設碭河城千總弁缺並鹽茶營都司與西安州汛千總互相移駐

又浙江移曹郵汛把總一員駐茅竹汛移茅竹汛外委一員駐曹郵汛移龍灣汛外委一員駐蔣嶺汛移蔣嶺汛把總一員駐龍灣汛

五年浙江移麗水營屬北鄉汛外委一員駐卻金館汛移碧湖汛外委一員駐太平莊爲協防北鄉太平汛

又湖北以漢陽營原設千總添轄蔡甸汛移黃陵磯額外外委一員駐侏儒山又貴州裁原設屯守備以下等官及銅屯所撥千把外委各歸原標

又山東增設濮州營額外外委七員又福建福清縣派把總一員爲專防外委一員爲協防

又河南改河北鎮標左營千總駐回隆鎮歸彰德營管轄改河北鎮標右營千總爲都司移中軍參將營守備外委各一員駐汝州所有魯寶郝伊四縣汛地均歸該守備管轄仍以河南營參將爲兼轄移原駐汝州之千總駐白沙鎮歸河南營參將管轄

六年議准直隸總督李鴻章奏增設唐山營千總一員外委三員額外外委一員千總由八溝營改撥移張家口協副將一員左右守備二員千總二員把總

二員外委二員額外外委三員駐多倫諾爾協其原設張家口協中軍都司一員千總一員把總二員外委二員額外外委一員仍駐張家口堡爲張家口營

都司以舊設多倫諾爾營都司一員為多倫諾爾副將中軍都司改張家口協原轄之萬全營膳房堡新河口洗馬林堡歸張家口都司管轄改張家口協原轄之左衛城營崇溝營西陽河堡歸懷安路管轄又設多倫諾爾營千總一員把總一員外委一員移張家口烏里雅蘇台汛千總一員駐興和城為興和城汛又設烏里雅蘇台汛外委一員

又江南增設孟河營千總一員額外外委二員由南匯營改撥又湖南改原設寶慶協石田汛千總石門汛把總歸新平營兼轄又添設龍陽城守營額外外委一員

又陝甘增設瓦亭營守備一員由八營改撥移李旺堡千總一員駐八營增設李旺堡額外外委一員又裁橫城營都司一員改設守備一員裁靈州營守備一員改設千總一員又裁廣武營游擊一員花馬池守備一員甯夏鎮標後營都司一員守備一員千總二員把總三員外委六員左右前三營千總三員把總三員左營外委一員前營外委一員中衛協把總一員外委一員靈武營把總一員外委一員玉帛營平羅營洪廣營興武營外委四員增設城守營都司一員千總一員營盤水汛千總一員把總一員外委三員又裁大馬營游擊一員改設守備一員裁千總一員把總一員外委二員裁南古城堡守備改設千總一員裁提標後營都司一員守備一員千總一員把總四員外委七員中左右前四營把總四員外委八員洪水營游擊一員把總一員外委二員甘州城守營千總一員馬營墩營把總一員增設察漢俄博營把總一員撫彝廳把總一員又裁大通營原設游擊改設參將增設中軍守備一員裁南川營都司改設守備一員裁北川營都司把總各一員改設千總一員裁西甯鎮標後營都司守備千總各一員把總四員外委五員左右前三營把總三員外委三員又裁鎮彝營原設游擊一員改設都司裁外委二員裁橋灣營都司一員改設守備一員裁平川堡守備外委各一員改設千總一員裁兩山口堡把總一員改設外委一員裁金佛堡把總一員改設千總一員裁肅州鎮標中左右三營把總三員中營外委二員左營外委三員右營外委四員沙洲營千總一員把總

一員外委二員金塔協把總一員外委二員下古城堡高台營外委二員安西協千總一員外委一員靖逆營外委一員增設清水營把總一員又裁鎮番營原設游擊一員外委一員改設都司一員裁俄博嶺游擊千總外委各一員改設都司一員裁安遠營都司一員改設守備一員裁岔口營都司外委各一員改設守備一員裁豐樂堡外委一員改設千總一員裁古浪汛把總一員改設千總一員裁松山營守備外委各一員改設千總一員裁洪水營守備外委各一員改設把總一員裁黑松堡把總一員改設外委一員裁永泰營把總一員改設外委一員裁武勝堡把總一員改設外委一員裁涼州鎮標前營都司守備各一員千總二員把總四員外委六員中左右後四營把總四員外委四員土門堡守備一員高溝堡高古城堡千總二員永昌營把總一員大靖營把總一員外委二員永甯堡莊浪協裴家營把總三員鎮羌營外委二員紅城堡外委一員增設涼州鎮標後營千總一員天井墩外委一員

又雲南復移劍川營都司駐劍川州城

又貴州移長寨營參將駐羅斛改為羅斛營參將長寨營原設左軍守備一員千總二員把總三員外委四員偕往駐紮移原駐廣順州城之長寨營右軍守備一員把總一員外委二員駐長寨改原駐羅斛定廣協千總一員駐廣順州城又移滑石汛之銅仁協右軍守備一員把總外委各二員駐大江口與銅仁縣同城另由銅仁協撥千總一人往滑石汛換防又移思南營中軍守備一員把總外委各一員駐大堡與安化縣同城

又山西復裁偏關營千總一員浙江增設海門鎮標左營額外外委三員在本營額兵內挑補移處州鎮標中營額外外委一員駐縉雲縣黃碧汛

又改甘肅甯夏鎮所屬各營歸陝西固原提督統轄

八年河南改河北鎮標右營外委為河南營外委又增設黎家集守備把總各一員武廟集千總一員即以黎家集守備為光州營中軍守備其原設光州汛十總暨存城額外外委南城協防額外外委鄭家店汛額外外委固始城守汛

把總三河尖汛額外委息縣城守汛外委包信汛把總汝南鎮汛外委本集把總並光州營右軍守備光山城守汛外委新店汛外委南城守汛外委武廟集千總外委仍皆以光州營游擊兼轄並改該游擊為專營隸南陽鎮總兵統轄

又江南增設狼山鎮標中營額外委五員又撥龍山營南山頭汛把總歸壽春中營為霍邱縣城守營把總移中營原設霍邱縣城千總駐葉家集為葉家集專汛千總又雲南移吉尾汛千總一員駐喇雞鳴移存城外委一員駐吉尾汛復撤回改駐劍川州千總一員歸鶴麗鎮標左營

九年貴州移壩陽汛千總羅斛汛改為羅斛汛千總仍隸羅斛營移擺羅汛千總駐壩陽汛改為壩陽汛千總仍隸歸化營

又福建移延平府屬均口汛外委駐巧洋汛駐巧洋汛把總駐均口汛又臺灣移分防車城汛守備一員駐鵝鑾埔石厝口仍留把總一員駐車城汛又陝西撥瓦亭營守備一員仍歸八營八營千總一員仍歸李旺堡裁額外委一員十年山西設歸化廳薩拉齊廳豐鎮廳寧遠廳和林格爾廳托克托廳清水廳等處捕盜外委各一員額外委各一員

又河南撥河北鎮標左營千總歸彰德營又右營守備歸河南營外委各一員又浙江復設海防營屬翁家汛千總一員由把總揀選考拔裁尖汛把總一員即以本汛外委專防尖汛又陝西移瓦亭汛千總駐瓦亭營屬古城川汛移石溝驛外委一員駐磁窯營汛增設石溝驛把總一員

十一年貴州裁提標左右前三營把總三員外委六員安順城守營外委二員大定協左右二營把總二員外委二員平遠協左右二營把總二員外委二員定廣左營外委一員右營把總一員外委一員遵義協左右二營把總二員外委二員羅斛營外委二員歸化黔西二營外委二員安義鎮標中右二營把總二員外委二員左營外委一員永安協左營外委一員右營把總一員外委二員

員長壩營把總一員外委一員普安安南冊亨三營外委三員古州鎮標中左右三營把總三員外委三員都勻協把總一員外委二員上江協把總二員外

委二員黎平營把總二員外委一員朗洞營把總二員外委二員荔波營外委二員下江營外委一員鎮遠鎮標中左右三營把總三員外委四員松桃協把總三員外委一員銅仁協把總一員外委六員清江協把總二員外委七員丹江營把總三員外委三員台拱營把總三員外委三員平越營外委一員威甯鎮標左右二營外委二員畢赤水城二營把總二員從署貴州巡撫李用清請也

又山西裁平定營外委一員太原鎮標左營外委一員又裁汾州營千總把總改設外委二員又裁隰州營大甯永和二汛把總改設外委二員又裁孟壽營中社汛千總改設外委一員又裁樂平汛把總改設外委一員又裁蒲州協外委平垣營外委各三員又裁太原營河莊汛千總移本營存城外委一員駐河莊汛又裁交城縣把總改設外委一員又裁澤州營白桑礦廠把總改設外委一員又裁西哄汛外委一員又裁澤州營東塢嶺把總改設外委一員又裁粟

城營原設都司改設守備一員又裁雲頭汛千總一員又裁松煙黃澤二汛把總二員移粟城汛外委一員駐黃澤汛又裁和順汛把總改設外委一員又裁大同鎮標中左右三營把總六員又裁左右營外委二員又裁北樓營北樓口守備改設把總一員又裁茹越口把總改設外委一員又裁北樓營外委二員

又裁平邢關都司改設把總一員歸北樓營管轄又裁山陰路外委得勝路外委各二員又裁助馬路外委一員又裁高山城都司改設把總一員又裁東路營胡峪口把總改設外委一員又裁朔平營都司外委各一員又裁殺虎協外委二員又裁平魯營千總一員外委三員又裁甯武營把總神池營守備各一員又裁朔州營都司外委各一員又裁偏關營外委一員又裁老營營都司把

總外委各一員又裁河保營千總把總外委各一員又裁保德營把總一員又裁水泉營將軍會堡把總改設外委一員

又浙江巡撫劉秉璋奏請金華協中軍都司改為巡防都司移駐八保山十二年雲南移提標右營游擊一員中軍守備一員千總二員把總一員外委四員額外外委四員駐蒙化城移把總三員一駐公郎汛一駐三勝汛一駐鼠

街汛移外委二員一駐羅求一駐北關

十三年奏准撥新改之澎湖鎮標左營游擊守備歸臺灣外海水師左營臺灣鎮總兵官及澎湖鎮總兵官均歸閩浙總督福建臺灣巡撫福建水師提督節制

又廣東撥廉州營千總二員把總三員外委六員額外外委二員歸北海鎮左營又陽江鎮標左營水師千總一員把總二員外委三員額外外委一員歸北海鎮右營又化石營把總二員外委二員額外外委一員歸石城營千總一員外委一員額外外委一員歸高州鎮右營又陽江鎮標左營千總一員把總五員外委六員額外外委三員歸陽江營

又廣西增設柳慶鎮標中營千總一員又柳州城守營外委一員額外外委二員又龍州城守營千總一員把總二員外委二員改原隸左江鎮上思營歸提標管轄改原隸提標永甯營歸柳慶鎮管轄

二十八年 諭各省衛所屯田原為轉漕養贖運丁而設自南漕改由海運屯衛弁丁半成虛設其原設之衛守備衛千總等官並著裁撤改歸營用即由各本省督撫於各標內仍以原班酌補

詳見田賦考屯田

謹案屯田沿自前明以至今其各衛所多有以年代久遠冊籍散失無從稽查者亦有冊籍僅存而陵谷變易坐落界址無可徵實者有軍逃地荒係民自開墾者亦有運丁貧乏將田典佃於民而輾轉相售屢易其主者更有典佃之民建造廬舍營治墳墓者是以順治十三年漕臣即請清田歸運而究未辦結非奉行之不力實勢使然至是罷衛所而數百年之積弊從此澈底澄清矣

三十四年兩廣總督張人駿奏請將黃岡都司仍歸饒平營游擊管轄並令兼帶防營與甯都司仍歸鎮標左營游擊管轄

又浙江巡撫增韞奏請將三防守備一員暨六汛額設千總二員把總三員外委八名額外外委十七名並海防營兵丁一律裁撤其鹽平汛額設把總一員外委一名額外外委並馬步兵丁向歸守備管帶者改隸乍浦同知

宣統元年湖廣總督陳夔龍奏請將湖北提標左營游擊移駐荊門

又湖南巡撫岑春煊奏請乾州協左營兩守備仍照前擬裁汰所遺汛地即以千總調防至河溪營祇有都司近來並未增設游擊查鎮溪營游擊汛地距乾州僅十五里同隸提標從前苗疆亂時原當處處設營今則節餉裁兵但可歸併之處自當力籌節省以免虛糜前奏請將鎮溪營游擊一缺裁撤所遺營汛即以河溪營都司調管其河溪營事務則以該營守備管理均歸乾州協管轄下部議奏

又浙江巡撫增韞奏甯波府屬南田設立專官改為撫民廳并移駐文武員并略稱請以提標左營游擊移駐南田之樊壽與撫民廳統轄全境原駐郡城守備千總二員移駐龍泉鶴浦兩塘分駐巡防把總一員隨同游擊駐紮樊壽作為城汛凡原立左營駐紮郡城外額各弁以及水師巡洋戰守兵丁一律隨同改駐南田各營擇要設防專巡洋汛仍歸提標統轄

二年貴州巡撫龐鴻書奏裁撤衛弁擬將屯丁衛兵各名目悉行裁革所有屯軍衛田暫仍其舊即以此項屯餉改為丁糧統歸地方各廳縣經收仍分上下忙核實報解如所請行

又直隸總督陳夔龍奏酌裁綠營官弁共裁參將一員游擊十員都司十一員守備二十員千總三十九員把總八十三員經制外委九十七員額外外委一百十三名共三百七十四員名

又奏天津鎮標大沽六營向歸海防支應局發餉庚子之變六營兵丁傷亡散逸迨天津收復以後在於大沽海口改設巡警將六營兵丁全行裁撤雖未奏明餉已停發其大沽協副將並中右營都司後右營守備共三員管帶海口巡警由海防支應局發給薪公應請免其裁缺其餘游擊一員都司三員千總六員把總六員經制外委十二員額外二十五名共五十三員名應領俸薪廉乾餉項庚子後即已停發本屬有名無實應請一律裁撤以符名實

三年兩江總督張人駿奏裁江蘇綠營參將以下三百七十七員弁又山東巡撫孫寶琦奏酌裁東省撫鎮各標營官弁計裁都司二員守備九員

千總十三員把總十五員外委五十八員其裁留各缺除總兵員缺緊要兼統巡防各營提出不計外其餘官弁遇有事故出缺概不請補又於各營汛內酌裁餘兵六十九名

右參將游擊都司守備千總把總外委

光緒二十七年直隸總督袁世凱奏見在省垣創設軍政司其中區分三處每處隸以各股一曰兵備處而考功執法籌備糧餉醫務等股屬焉一曰參謀處而謀略調派測繪等股屬焉一曰教練處而學務校兵等股屬焉謹將擬定試辦章程繕單呈覽

軍政司督辦一員由總督兼攝設參議官一二員以資贊佐專掌施行軍政更定兵制策畫戰守訓練教育各事宜隨時由司核定章程頒行所屬一體遵守閩省在營文武員弁悉歸督辦統轄

陸軍兵備處總辦一員幫辦一員稟承軍政司辦理施行軍政更定兵制事務為各處首領所屬各股一考功二執法三籌備四糧餉五醫務

考功股提調一員委員二員提調管理所屬委員分理各事其餘各股均仿此辦理其經理稽查各事開列於下 一文武員弁升降調補薪薪水公費應增應減等事 二文武員弁功罪賞罰及受傷陣亡撫卹等事 三文武員弁名冊及平時功課臨敵布陣分派職事各表 四文武員弁應得內獎外獎功牌頂戴等事

執法股提調一員委員四員其經理稽查各事開列於下 一文武員弁違犯軍律審取供證判斷擬辦等事 二潔清囹圄防範逃逸並監禁開釋等事 三遴派學校生徒課習軍律以備他日執法之選

籌辦股提調一員委員四員其經理稽查各事開列於下 一陸軍章程應行草創更改增損等事 二招募新軍遣撤舊勇及徵發等事 三各軍應用鎗礮子藥管鐵道電線一切行軍器械或製造或購買並收藏配置等事 四各軍服色禮節儀制畫一章程 五各營將弁升調告假撤退及兵丁傷亡疾病因事革除所遺缺額預籌充補等事 六遴派學生出洋習兵法

及畢業回國充補將弁等事

糧餉股提調一員委員四員其經理稽查各事開列於下 一籌定各營常年額支雜支並征戰所需各費 二文武員弁目兵所領薪餉並一切出納軍需銀兩等事 三征戰時糧餉輸運購辦等事 四兵丁應用糧食衣服及馬匹芻秣等事 五駐守營壘行軍帳棚及炊爨一切器用等事 六各營操場打靶場建置築造等事 七軍政司所管之土地房屋物件並庫儲等事

醫務股提調一員委員二員其經理稽查各事開列於下 一各軍被服是否適體糧食是否相宜駐軍處所汲飲之水是否有損並掃除污穢等事

二療治疾病醫院並預防疫癘等事 三查考各軍弁兵是否認真講求衛生等事 四征戰時分遣醫官隨營料理衛生並安置受傷弁兵等事 五衛生醫學章程隨時更改增損等事 六遴派學校生徒課習醫術以備他日醫官之選 七設立紅十字會等事

陸軍參謀處總辦一員幫辦一員稟承軍政司會商兵備處辦理策書戰守事務所屬各股一謀略二測派三測繪

謀略股提調一員委員四員其經理稽查各事開列於下 一考查沿邊沿海守禦之宜及兵力應增應減設防計畫等事 二主持戰守方略及籌議進退緩急之宜 三預查征戰時地勢險夷高下籌定駐兵運糧凡一切利害得失等事 四選派參謀委員訪查各國軍事詳細情形 五輯譯古今兵事及歐美各國近百年以來戰史

測派股提調一員委員二員其經理稽查各事開列於下 一考察平時戰時軍務情形隨時酌改編營制等事 二草創更革各項戰事章程 三遴派學校生徒課習參謀各事以備他日參謀之選 四籌辦行軍鐵路輪船轉運及電線等事 五調遣營伍區畫各營外守汛地等事 六預籌布置征戰時一切事宜

易道路遠近等事 二圖繪本國及各國山川道里都邑要塞各圖 三刷印本軍需用圖冊等事 四遠派學校生徒課習算數測繪之學以備他日測繪之選

陸軍教練處總辦一員幫辦一員稟承軍政司會商兵備處辦理訓練教育事務所屬各股一學務二校兵

學務股提調一員委員二員其經理稽查各事開列於下 一考查陸軍各學堂學業技藝區分優劣等事 二查核學堂營隊各項教育章程 三編改各種訓練準則教導規矩等書 四訪查各國陸軍教育訓練章程

校兵股提調一員委員四員其經理稽查各事開列於下 一檢閱馬步職工各營操練是否純熟軍容是否整肅並出師準備是否齊全等事 二考查將領以下戰術兵略技藝材能等事 三簡閱各營內軍械子藥並各項器用等事 四查驗行軍所需帳房器具餘糧炊爨等事

附列規條

一各股委員如有廢事責在提調提調如有廢事責在各處總辦遞相責成決無旁貸

二見在創辦之始不能備員應分別繁簡輕重的派兼辦所派委員但選材能足以勝任不得以官階大小限制

三各處各股應用文案書識及各項人役均按其事之多寡酌定數目分別稟派

四在司文武員弁除奉文調遣出差及有疾病大故等情由督辦給予假期外不得無故擅離職守每日進出辦公處所應有定時自三月初至九月末辰正二刻進司申正散班自十月初至次年二月末已初進司申初散班勿得玩忽曠誤

五各處各股應辦事宜務當遵照所立章程實力奉行凡章程內未盡事宜由各處隨時籌議稟候軍政司督辦批飭遵守其有應行變通者亦隨時稟

請改定附入一體遵行

臣謹案中國每辦一事訂立章程非不燦然明備不知章程徒法焉而已徒法未見其能行也此摺為辦督練公所之權與各省所設督練處皆仿此章程辦理故特備錄

宣統三年陸軍部會奏酌議各省督練公所暫行官制綱要略稱各省編練陸軍必須有軍政總匯之區掣領提綱方足以收畫一整齊之效前練兵處會奏陸軍營制內載凡各省新軍業經練及一協以上者應於省會設立督練公所由各將軍督撫督率籌辦等語嗣准先後奏咨辦法互歧亟應釐訂章制俾有遵循茲經會商按照奏准籌備事宜謹將官制先行釐訂酌分科局核定人員辦理一切軍政各該省原設新舊營之各項局所應行裁改歸併以一事權而節糜費除邊遠省分暨交通不便之處遇有地方緩急准由該督辦酌量辦理外至運用國軍計畫以及訓練教育等事由該軍隊學堂隨時稟呈軍諮處陸軍部辦理其督練公所應行籌辦事宜由各將軍都統督撫督率公所人員按照此次所定綱要切實整理以重軍政

陸軍部會同軍諮處暫定人員額缺

督辦一員 以將軍都統或協都統充 軍事參議官一員 以協都統或副都統充 籌備科科長一員 以副都統或參將充

參領一員 以副都統或參將充 一等科員二員 以副都統或參將充 二等科員四員 以副都統或參將充 三等科員五員 以副都統或參將充

協辦糧餉科科長一員 以副都統或參將充 一等科員二員 以副都統或參將充 二等科員五員 以副都統或參將充

軍械局局長一員 以副都統或參將充 一等科員一員 以副都統或參將充 二等科員二員 以副都統或參將充 三等科員三員 以副都統或參將充

測地分局 以副都統或參將充 一等科員一員 以副都統或參將充 二等科員二員 以副都統或參將充 三等科員三員 以副都統或參將充

書計官五員 以副都統或參將充 二等副官二員 以副都統或參將充 三等副官二員 以副都統或參將充 一三三書計官五員 以副都統或參將充

司書生十六名 以副都統或參將充 附記凡一二鎮之省分督練公所人員均依此表辦理如有三鎮以上或不

及一鎮應分別酌量增減報部核准施行

暫行官制綱要

督練公所管理該省新舊各軍及籌備糧餉編練隊伍一切事宜督辦一員

以各該省原管之將軍都統督撫兼充設軍事參議官一員以協部統或稟承督辦督率各科局辦理該省新舊各軍編練裁改籌備糧服軍械測繪一切事宜 所內分設科局一籌備科二糧餉科三軍械局四測地分局 籌備科以原有之兵備處營務處各項舊營公所督撫衙門內軍事幕僚及兵房等裁改其掌管之職務甲籌辦新軍編成改併事宜乙徵募召集退伍補充事宜丙徵發運輸交通及關於戰備各事宜丁馬匹購買及補充事宜戊掌管裁撤綠營及善後事宜己掌管防營裁改歸併訓練及善後事宜庚掌管裁撤一切雜項隊伍事宜設科長一員以副參領充 一等科員二員以協參領充 二等科員四員以正軍充 三等科員五員以副軍校充 糧餉科以原有糧餉服裝財政調查各局裁改歸併其掌管之職務甲掌管新舊軍隊及該管陸軍學堂糧餉收發存儲會計事宜乙掌管新舊軍隊及該管陸軍學堂被服裝具及軍用物品購買收發補充保存修理交換事宜丙掌管新舊軍隊及該管陸軍學堂一切建築事宜丁關於新舊軍隊及該管陸軍學堂預算決算事宜戊關於新舊軍隊財政事宜設科長一員以副參領充 一等科員二員以副參領充 二等科員五員以正軍充 三等科員六員以副軍校充 軍械局以原有之軍械各局裁改歸併其掌管之職務甲掌管新舊軍隊及該管陸軍學堂槍礮彈藥等項收發保存修理交換及購買等項事宜乙掌管新舊軍隊及該管陸軍學堂器具材料之收發保存修理交換及購買等項事宜設局長一員以副參領充 一等科員一員以協參領充 二等科員二員以正軍充 三等科員三員以副軍校充 測地分局掌管該省地圖測繪事宜以原有之測地局併入其詳章由軍諮處另行擬訂 以上各科局之事務統歸軍事參議官核辦 一二等副官稟承軍事參議官分掌一切事宜其掌管事務甲掌管督練公所內之會計經理乙傳達命令及報告丙收發文件掌管圖書及區別一切例行公事丁凡不隸各科局事件均歸掌理設一等副官一員以協參領充 二等副官二員以正軍充 書記官稟承軍事參議官分掌一切事宜受副官及所屬長官之指揮辦理一切文牘事務設一二三等書記官五員以五品文官充 司書

生十六人以八九品文官充

臣謹案光緒三十年練兵處奏准凡各省新軍業經練及一協以上者應於省會設立督練公所由各將軍督撫督率籌辦是年直督袁世凱於直省遵章設立閩督崇善繼之嗣後蘇鄂川滇奉粵皖贛等省紛紛設立各定制章省自為政旋於宣統三年經陸軍部會同軍諮處以各省所擬辦法互相歧異遂釐訂督練公所暫行官制綱要奏准施行 右各省督練公所

皇朝續文獻通考一百三十八

職官考二十四
新疆

謹案新疆未改行省以前將軍統理天山南北理事大臣參贊大臣等分理地方糧餉則委內地道員及同通等經理屯務則委內地武員駐守設官分職隨地異宜前考另立一門謹遵其例續纂以備考

乾隆五十一年 諭凡差往新疆大臣在京職任概不開缺

五十二年奏准派往新疆人員但經賞給頂戴及有效力並有效力贖罪字樣者均令其自備資斧在京在外一切得項均不准支給

五十七年奏准科布多筆帖式五年期滿有情願改補武職者即作為額外驍騎尉令回本處遇有缺出即行補用

嘉慶三年奏准科布多所屬阿爾泰烏梁海阿爾泰諾爾烏梁海札哈沁額魯特明阿特等處大臣總管各員應支俸銀就近由科布多庫放給

九年惠遠城設前鋒章京四人藍翎長四人惠寧城設前鋒章京二人藍翎長二人

又塔爾巴哈台佐領內添設藍翎一人額魯特佐領內添設藍翎三人

十三年添設錫伯營驍騎校一人額魯特驍騎校一人換防

道光八年 諭前經大學士軍機大臣議覆那彥成奏回疆積弊請將西南兩路各城辦事領隊大臣分隸統屬由該將軍都統參贊大臣認真考察如將軍都統參贊大臣有不正己秉公者亦准各城大臣據實參奏以資維制當降旨悉照所議本日朕恭閱 皇考仁宗睿皇帝實錄內載向來回疆總辦大臣遇有公事會同協辦領隊大臣等列名具奏其協辦領隊大臣遇有應奏之事亦准專摺密陳烏里雅蘇台塔爾巴哈台兩處畫一辦理該兩處協辦之參贊領隊大臣有應行據實密陳者俱准於請安摺便專摺具奏仰見我 皇考整飭邊疆豫垂 成憲本年所議於北路未經並及所有烏里雅蘇台塔爾巴哈台二處如有應行密奏之事不惟將軍等職司綜領務期秉公覈實不得稍有瞻

徇即將軍參贊等如有不公不法之處該協辦之參贊領隊大臣亦准其據實密奏總期互相維制以重邊陲

又 諭那彥成奏陳回疆歷年補放伯克積弊擬定章程一摺所議甚屬周妥定例各城大小伯克缺出由本城大臣擬定正陪咨送喀什噶爾參贊大臣驗放分別奏咨見據那彥成等查明從前伯克缺出往往有賄屬營謀等弊積習相沿回民受累見在回疆底定自應明定章程以垂久遠著照所議嗣後各城三品至五品伯克缺出由本城大臣查明先儘出力受傷或家口被害之人次儘死事人之子孫次儘出力世家並視其人才能否辦事逐細聲明照內地體製造具四柱清冊一勞績二資格三人才四家世填註事實出具切實考語將應升應補之人開列四五員咨送參贊大臣驗看其應升之員亦定為歷俸三年之例俸滿者方准保送如有蒙混不清即行駁查如果覆覈無異即照各城大臣原送考語開單奏請補放此後該伯克犯有公過與原保大臣無涉若有擾累回眾或將已革陋規改易名目斂錢肥己等事一經發覺即將原保大臣嚴加議處其六七品伯克及金頂回子缺出由各城大臣詳加遴選查明俸滿應升及應補之人亦造四柱清冊著保三四員咨送參贊大臣驗放毋庸具奏仍咨明理藩院查覈此外回子工匠及阿奇木家人並在京為奴遇赦釋回之回子均應通曉漢語充當通事各城辦事大臣以其當差熟識或瞻徇情面遂至違例升用伯克此輩出入衙門內外串通滋事滋擾著於見在伯克內查明如有會充工匠家人及有罪赦回之犯有已放伯克之人即行斥退以後此等出身之回子充當通事不准升補伯克至各城阿奇木伯克伊什罕伯克都管伯克均有經管糧賦差徭之責一切苛派弊竇皆出其手乾隆年間舊例大伯克回避本城小伯克回避本莊近來阿奇木伯克多用本城回子小伯克以本莊之人辦本莊之事該伯克等情形熟悉剝削尤其嗣後升補各城阿奇木伊什罕都管等伯克回避本城五六七品伯克回避本莊如有蒙混錯誤補放者理藩院查出照例請旨交部議處該參贊大臣仍隨時密訪如有前項各弊嚴行參奏從重辦理以昭炯戒至舊制英吉沙爾屬於喀什噶爾和闐屬於葉爾

光屬城與本城著一律回避

臣謹案乾隆二十四年伊犁回部盡入版圖命大臣前往辦事因其舊俗設立伯克等官二十七年添設二佐領以厄魯特侍衛等往領之蓋比之八旗蒙古矣諸官舊有差等而伯克爲其總名即以回人簡任區分其品秩猶古鄉官之制光緒十一年改設行省以伯克之橫暴毒民也因裁改鄉約之名以奪其權而殺其勢雖稍受束於官吏而上下相倚爲奸擾民之受其毒者如故也徒善不足以爲政徒法不能以自行信夫

又那彥成等奏回疆西四城三品至五品伯克四十六缺請以托克托尼雜爾等升補並請裁改喀什噶爾英吉沙爾等處伯克員缺得旨照所請升補責成各城大臣隨時察看如果實在潔己辦公俟一年期滿出具考語咨明參贊大臣另行奏請實授如不稱職立即撤參另揀妥員請補至葉爾羌所屬之色喀庫勒地方向設五品阿奇木及伊什罕等小伯克距卡倫較遠與什克南巴達克山連界非本莊之人熟悉情形不能勝任毋庸照卡內回避本莊之例著遇有缺出由該城大臣乘公揀補咨明參贊大臣分別奏咨辦理喀什噶爾額設五品納可布伯克五品密圖瓦利伯克五品莫提色布伯克三員管理工匠及田房地契等件均無重任罕愛里克和色爾布衣二莊回戶較多原設六七品伯克照料難周察拉根地方係大河拐開墾新田處所向無伯克經營著將前項五品伯克三員各給與五品阿奇木職銜移設罕愛里克等處駐紮其阿爾瑚莊額設六品阿奇木伯克與六品哈資伯克品級相等無所統屬著將六品哈資伯克移駐察拉根管理農田又阿斯圖阿爾圖什莊額設七品明伯克五員著裁撤二員以一員移駐察拉根辦農田事務以一員移駐阿爾瑚莊抵補六品哈資伯克裁缺英吉沙爾額設四品阿奇木一員並無伊什罕伯克幫辦該城公事較繁所有六品哈資伯克著照拜城之例賞給五品伊什罕職銜以資襄理

又 諭新疆各城辦理印房等處事務章京向由在京各衙門保送邊遠地方關緊緊要額設員缺無多必須年壯才明方足以資助理乃各衙門保送之員

往往以衰庸者塞責昨日吏部以塔爾巴哈台章京員缺將太僕寺等衙門所保之員外郎常斌等六員帶領引見除清長一員已經簡放外其餘五員察其年力才具均難勝任著即撤銷不准復送嗣後遇有新疆員缺各該堂官務遴選年力富強素能辦事者咨送吏部帶領引見不得任其濫竽充數如該員果能辦事勤奮出力年滿更換時著該處辦事大臣據實保奏回京之日由該部帶領引見量予鼓勵倘不稱職亦即隨時甄別懲處勿得姑容貽誤

十一年 諭據長齡等奏會籌善後事宜一摺前將內外諸臣各條奏回疆善後事宜發交長齡嚴議並派玉麟一同籌酌務期經久可行茲據奏參贊總理八城應請移駐葉爾羌乃能適中扼要措置咸宜該處地廣戶繁可以多駐官兵去秋回子用命著有明效該城距喀什噶爾六站外夷進卡接見在不遠不近之間足資控制其幫辦大臣仍照例專管本城事務再將和闐領隊大臣移駐一員隨同參贊就近聽其調遣喀什噶爾即留換防總兵一員在彼統兵駐守英吉沙爾仍駐領隊大臣一員在於葉爾羌阿克蘇適中之巴爾楚克一帶添調總兵一員統兵駐守以爲樹窩子咽喉鎖鑰添此一鎮則六城相距均不過數百里聲氣易爲聯絡和闐在一隅止留領隊一員足資辦理其滿漢防兵額數請於西四城見有兵六千餘名外再酌留伊犁烏魯木齊馬隊二千名陝甘綠營兵四千名通計原額新增共滿漢兵一萬二千餘名除阿克蘇烏什見各有兵一千二三百名無庸議增外喀什噶爾擬駐綠營兵三千名以總兵統之作爲前敵防守邊卡如探有卡外情形隨時具報如遇大股賊匪即稟報參贊發兵援剿英吉沙爾擬駐伊犁馬隊五百名綠營兵一千名領以游都佐領等官統歸領隊大臣管轄爲前後二城中權接應巴爾楚克擬駐綠營兵三千名以總兵統之擇地築堡駐紮和闐僅有防兵二百餘名擬再添兵二百餘名共足五百名以上各處防兵均令各該管官認真操練此外滿洲兵二千名漢兵四千餘名擬令全駐葉爾羌應以副將協領等官分領該參贊等務令加意訓練合力操防至防兵應需糧餉於各省綠營兵額內暫裁百分之二每年可節省銀三十餘萬兩所有酌添防兵六千名即在此項節省銀內支給有贏無

絀等語均著照所議辦理至所稱新增兵額酌量隨時抽撤之處究竟將來如何情形方可裁撤如裁撤之後又將如何辦理始臻妥善必須豫爲籌畫計出萬全見經此次籌議自必控制得宜賊匪斷不敢遽萌窺伺倘萬一入卡來犯總要無須內地籌餉調兵方爲妥善必應從長計議庶免撥運之勞而成久遠之道卽屯田一事以回疆物產供回疆兵糧均應酌定章程善爲經理將來各城改設各官必須慎揀得力之員以資委任該將軍等久駐回疆該處各員賢否自必深悉著出具切實考語詳晰開單保奏候朕簡放至茶葉大黃等物准其弛禁其遠部落輸忱納款並覆罕果能獻出賊目請罪投誠再准其通商交易以示羈縻至上年入卡各賊目前次開單交該將軍等按名查拏務須將著名之犯多獲數名不可任其逃匿惟卡外夷情詭詐百出借縛獻賊目爲名妄希重賞切勿受其所愚致爲外夷所笑又喀什噶爾換防總兵多隆武見已革職著卽先行派員署理以重職守

又長齡等奏回疆參贊大臣請移駐葉爾羌總理八城統轄兩鎮兼提督銜其幫辦大臣一員仍照舊制專管葉爾羌本城兼轄和闐和闐領事大臣一員移駐葉爾羌爲領隊大臣共駐滿漢防兵五千名改喀什噶爾幫辦大臣爲領隊大臣又駐總兵一員共滿漢防兵四千名駐和闐辦事大臣一員兵五百名英吉沙爾領隊大臣一員兵一千名巴爾楚克總兵一員兵三千五百名四城兩鎮合舊駐新增計滿漢防兵一萬四千名其印房等處各官既將參贊大臣移駐應將喀什噶爾葉爾羌兩城章京筆帖式互易葉爾羌設經牧章京一員專司牧事裁喀什噶爾葉爾羌糧餉章京二缺改設糧餉同知二員再於葉爾羌喀什噶爾英吉沙爾巴爾楚克各設巡檢一員下軍機大臣等議尋議奏回疆地方遼廓見辦善後事宜自應將官制兵數量爲變通爲久安長治之計所有參贊大臣移駐葉爾羌有總理八城統轄兩鎮之責著兼提督銜參贊大臣業經移駐其印房等處各官亦著將喀什噶爾葉爾羌見設之章京筆帖式互相移易並著於葉爾羌添設經牧章京一員專司牧事喀什噶爾葉爾羌糧餉章京二缺著裁去改設喀什噶爾糧餉同知一員葉爾羌糧餉同知一員添設

巴爾楚克糧餉同知一員再著於葉爾羌喀什噶爾英吉沙爾巴爾楚克等處各設巡檢一員同知管商民回子詞訟戶籍屯田巡檢管緝捕盜獄稅課均作爲邊遠差缺由陝甘兩省派往其英吉沙爾分防巡檢歸喀什噶爾糧餉同知兼轄新添文職各官由各該大臣專轄參贊大臣統轄至拜城距阿克蘇較遠著添設分防拜城巡檢一員管理拜城賽哩木二處商民回子詞訟由陝甘選派作爲差缺此次所設同知三員巡檢五員俱著陝甘總督遴選操守廉潔辦事勤能之員前往該管大臣隨時甄別倘有不職之員將濫行派往之各上司參處至喀什噶爾等處添設滿漢防兵俱著照該將軍等所請辦理

又 諭軍機大臣會同吏戶兵三部議覆長齡等奏各城換防員弁並新設差缺文職各章程分別准駁一摺著卽鈔給長齡等閱看回疆情形非內地可比見在議屯添兵雖爲慎固封守起見第兵增固足示威而官增究嫌糜帑况各城營伍惟期慎重操防俾收實效足以震懾夷回原不必悉照內地營制該將軍等請添各城武職員弁之處著照軍機大臣等所議令其仍照前奏再行酌量刪減以節糜費而昭覈實至請添文職同知巡檢各員擬由內地選派及期滿升用各章程該將軍等此番籌畫均係尋常計議溯查乾隆年間戡定西陲六十餘年邊圍綏靖爾時從未議及增兵增官如果須添文職方資治理當日諸臣定當籌及詎待今日且果照所議增設未必歷久行之無弊况文職尤非武職可比武職員弁性情粗率倘或任意妄爲尙屬易於覺察文職各員由內地調派若年老衰庸自難任事其年富力強稍有才具者希圖任滿升遷或致資緣謀調轉不足以收得人之效况夷回異俗必不能以內地禮法繩之既添文員必須書吏此輩舞文弄法因緣爲奸必致貪婪需索苦虐窮回卽經發覺官畏處分巧爲彌縫邊陲僻遠易於消弭是內地回子先受添官之累於控制外夷之道實屬無益有損卽令得人而任而回疆紛紛添設文職衙門是儼然添一省會殊失居重馭輕之策亦不值如此辦理所有添設同知等官雖經議准仍著該將軍等從長商酌不必添設更爲妥善

又 諭長齡等奏酌議善後事宜一摺據稱葉爾羌等處毋庸改設同知仍留

葉爾羌喀什噶爾糧餉章京二缺令其管理民事著照所議辦理惟所稱僅裁英吉沙爾巡檢一員仍留葉爾羌巴爾楚克喀什噶爾及阿克蘇所屬拜城等處巡檢共四員此時葉爾羌等處既不設同知所有此項巡檢亦著毋庸議增免滋流弊見計各城共添滿漢營官四十五員於喀什噶爾綠營額減去官弁三十四員實於西四城原設官弁外僅添十一員各該城邊界共設大小卡倫三十餘處需用綠營官弁較多准照前奏減定之數以資差遣其烏什所添滿州營官三員又由喀什噶爾原防額內減去綠營兵二百一十五名移駐該處酌用守備千總把總各一員仍著照前議准其安設

十二年 諭朕前次降旨因各城添設文員流弊滋多竟可概不議增此次請將巡檢一併裁撤仍照舊制所辦甚是其請暫留哈豐阿郭繼昌二員教演操防俾暨昌專辦地方事宜哈豐阿郭繼昌俱著准其留駐督同各該弁派撥操防勤加訓練俟通商事定再奏明各回本任其從前齊慎駐兵處所既據查明在烏什卡外該處久已平靜自未便再往紮營轉令布魯特等疑懼見在烏什有防兵一千七百餘名足壯聲威該將軍請就西四城留防兵數通融分設較卡外紮營更為得力著照所請行仍准留周悅勝唐唐二員分投巡防彈壓設遇緩急相機應援出奇截擊至喀什噶爾英吉沙爾和闐兵數據該將軍等查明驟難減撤著俟通商後再將喀什噶爾換防總兵裁撤並將各城換防官兵次第刪減喀什噶爾見無籌辦事件長齡等即赴葉爾羌巴爾楚克一帶會同履勘後在阿克蘇暫駐候旨遵行

二十六年 諭前據薩迎阿奏請添設印房回務章京當交軍機大臣會同該部議奏茲據會議奏稱英吉沙爾臨邊臺卡甚多地方亦屬緊要自應添設章京以專責任英吉沙爾著准其添設印房回務章京一員即專用六部筆帖式毋庸用起廢人員
咸豐五年改甘肅新疆西府為直隸廳裁府學教授訓導各一人設廳訓導一人
又裁迪化州屬昌吉縣千總三人

七年奏准塔爾巴哈台換防游擊一人由該處都司揀員題升其原設都司四人裁二人作為守備之類於成所千總內揀選題補其遞出之千把各缺於留防弁兵內咨拔

同治四年烏魯木齊裁理事通判一人

光緒四年 諭左宗棠奏覆陳新疆情形二摺據稱北路迪化等處自克復以來招徠開墾戶口日增南八城地方富庶見辦開渠丈地鑄錢徵釐諸事具有端緒開設行省於天時人事機有可乘等語新疆設行省事關創始必須熟籌於事前乃能收效於後日該大臣為長治久安之計因時變通所奏不為無見刻下伊犁未經收還一切建置事宜尚難遽定其餘南北各城應如何隨宜經理之處即著悉心籌畫次第興辦總期先實後名俟諸事辦有眉目然後設官分職改設郡縣自可收一勞永逸之計所有辦理情形並著隨時詳悉具奏六年吏部議准甘肅新疆奇寧縣歸迪化直隸州管轄

八年督辦新疆軍務劉錦棠奏擬設甘肅巡撫如蒙 允准則烏魯木齊自須設立撫標官兵南北兩路均宜另設額兵添置總兵副將參游都守千把等官烏魯木齊提督應移駐喀什噶爾城以扼要害

又新疆南路回疆東西城設巡道一員駐紮阿克蘇名為分巡甘肅新疆阿克蘇等處地方兵備道督飭所屬水利屯墾錢糧刑名事件撫取蒙部彈壓布魯特稽察卡倫又西四城設巡道一員駐紮喀什噶爾回城名為分巡甘肅新疆喀什噶爾等處地方兵備道管理通商事宜督飭所屬水利屯墾錢糧刑名事件彈壓布魯特稽察卡倫

臣謹案光緒四年左宗棠創議新疆改設行省時 朝命以伊犁尚未收復布置一切不無窒礙疏上留中以待至是全疆底定劉錦棠續援以請始設阿克蘇喀什噶爾兩道為建行省之初基

又裁烏魯木齊都統一員副都統一員協領六員佐領二十四員防禦二十四員驍騎校二十四員吐魯番領隊大臣一員協領二員佐領四員防禦四員驍騎校四員從督辦大臣劉錦棠請也

九年新疆巡撫劉銘棠陝甘總督譚鍾麟奏略稱關隴爲天下之屏蔽而塞外又居關隴之上游其地則高寒而多沙棘其人渾樸而不聯屬不問向之居國行國究其居處服食文字語言迥異中土漢唐以來殷憂西事罔不經營捍衛曩者漢置河西四郡當時雖不免耗中事西之苦而至今賴之西域自古騁騷之地往往一隅蠢動腹地爲震自 祖宗朝先後勘定南北兩路或分置屯防或開設郡縣南疆地雖饒沃而因俗類榛狉難驟繩以禮法於是分 命大臣督率文武員弁兵丁鎮駐扼要之區彈壓巡緝差徭賦稅量爲徵收舉凡疏節闕目用壯厥聲靈堅其趨向以待今日因時制宜變通盡利 臣錦棠適躬逢其盛前陳應設應裁應改應移諸端仰荷 飭部會議茲各部院議覆摺摺內於議設者如置巡撫布政使及領迪道加按察使銜改迪化州爲縣設迪化府各節暫從緩議而議裁議改議移者如裁各城都統參贊辦事領隊各大臣應俟南八城建置事宜辦有成效奉 旨准設巡撫再行會奏請 旨又裁去回官阿奇木伯克等另行酌設頭目則以均有職掌責任應更體察妥議章程核辦改設額兵將烏魯木齊提督移駐喀什噶爾亦令俟議請 旨回童見入義塾讀書有能誦習一經熟悉華語者咨部給予生監頂戴議以向無成案擬請俟回童粗通文藝時酌設學額憑文取進應另酌給獎勵請 旨遵行至請南路改設道應州縣各官均經先行議准令將應辦事宜會商妥協次第奏明辦理從前滇黔之改流官近如臺灣奉天吉林之添設郡縣皆時會之所趨 臣鍾麟所擬設立行省當從州縣辦起自准部覆即經函商辦法議定即由 臣錦棠就近先行委員往署文員雜職置輔分司見除教職緩議外其各廳州縣之照磨吏目典史應與印官同城佐理此外各屬轄境遼闊應添州判縣丞巡檢分防各按所屬繁簡酌添以便控制擬遵部議就差遣各員內分委道員同知直隸州知州通判知縣各官前往署理回官三四品阿奇木伯克等職較崇 臣前慮其權重擾累會請裁去銜額如以相沿已久擬請仍留頂戴略如各省州縣之待所轄紳士假以禮貌使有別於齊民昔之衆伯克等分理糧役訟獄諸務將來擬分撥爲吏戶禮兵刑工各書與漢書晉雜處互受漢回文言以期相

觀而善既可收其把持之權又可藉爲公家之用似屬兩有裨益俟印官履任後徐爲圖之道員以下各官印信應懇 飭部按照擬就各項缺銜鑄造頒行查吐魯番同知印文係兼用清漢回字此項印信似應一體兼鑄回文併懇 飭下妥議定鑄南疆此次設官事屬創始當就練習邊情之員先將應辦壹是趕緊興辦方足以資治理見准先設各官額懇准照吉林新設民官各缺成案統歸因地擇人由外揀補一次至於城垣衙署倉廩監禁應修各工舉不容緩已飭湘楚各軍選派勇丁趕將城工挑築並商幫辦軍務臣張曜飭令嵩武軍營勇擇要興修再懇 飭撥的款以濟要工值此經費支絀之際尤當格外撙節無如地處邊荒工係創建但期力杜浮冒未能牽合成規除繪圖貼說咨部外即照實用實銷開單具報籍省一再造冊之煩徭賦上關 國計下繫民生綜計南路正糧每年二十餘萬石將來兵制酌改需糧較少日久積儲勢難多備倉廩變價又苦無從銷售潮腐堪虞 臣錦棠擬飭各屬於此後科定賦役時權其輕重或有前章稍重者仰體 皇仁即予酌減即行折徵銀兩湊充度支庶倉糧不至霉朽而邊儲得以常充矣

又新疆設塔城屯防副將一員西路協防游擊一員城守中營並分防北路協標中軍都司一員城守右營並分防南路兼游擊中軍暨塔城東路分防守備三員千總四員把總十員外委十四員擇營路之交設汛列哨扼要駐紮兼辦屯工移原駐拱宸城之額爾果斯營參將駐瞻德城

十年議准設甘肅新疆巡撫駐烏魯木齊

又裁新疆巴爾魯特領隊大臣一員

又 諭戶部等部劉錦棠奏統籌新疆全局一摺當經諭令該部議奏茲據覆陳新疆底定有年綏邊輯民事關重大允宜統籌全局釐定新章戶部前奏以定額餉定兵數一事權三端爲要圖劉錦棠所議留兵改營設官屯田四條與該部所奏用意相同即著次第舉行以垂久遠前左宗棠創議改立行省分設郡縣業據劉錦棠詳晰陳奏由部奏准允設道廳州縣等官見在更定官制將南北兩路辦事大臣等缺裁撤自應另設地方大員以資統轄著照所議添設

甘肅新疆巡撫布政使各一員其應裁之辦事幫辦領隊參贊各大臣及烏魯木齊都統等缺除未經簡放有人外所有實缺及署任各員著俟新設巡撫布政使到任後再行交卸候旨簡用至伊犁參贊大臣一缺塔爾巴哈臺領隊大臣二缺應裁應留著劉錦棠等酌定具奏

謹案新疆北路庫爾喀喇烏蘇於乾隆三十七年設領隊大臣一員南路烏什於乾隆二十四年設辦事大臣一員三十年增設參贊大臣一員三十一年設協領一員佐領防禦驍騎校各二員阿克蘇於乾隆二十四年設辦事大臣一員幫辦大臣葉爾羌於乾隆二十四年設領隊大臣二員尋裁領隊大臣以幫辦大臣兼理領隊事務和闐於乾隆三十年設辦事副都統一員四十二年改設辦事大臣一員幫辦大臣一員喀什噶爾於乾隆二十四年設參贊大臣一員幫辦大臣一員英吉沙爾於乾隆二十四年設領隊大臣一員庫車於乾隆二十三年設辦事大臣一員喀喇沙爾於乾隆二十四年設辦事大臣一員哈密於乾隆元年設辦事大臣一員幫辦大臣一員至是建立新疆行省設巡撫司道等官

又裁庫爾喀喇烏蘇領隊大臣改為直隸廳撫民同知裁烏什辦事大臣參贊大臣領隊大臣改為直隸廳撫民同知裁阿克蘇辦事大臣幫辦大臣改為溫宿直隸州知州裁葉爾羌幫辦大臣改為莎車直隸州知州裁和闐辦事大臣幫辦大臣改為和闐州直隸州知州裁喀什噶爾參贊大臣幫辦大臣改為疏勒直隸州知州裁英吉沙爾領隊大臣改為直隸廳撫民同知裁庫車辦事大臣改為直隸廳撫民同知裁喀喇沙爾辦事大臣改為直隸廳撫民同知改哈密辦事大臣幫辦大臣地方回務改歸哈密廳通判兼管又移烏魯木齊提督駐喀什噶爾為喀什噶爾提督移喀什噶爾換防總兵官駐阿克蘇為阿克蘇總兵從督辦大臣劉錦棠請也

又新疆巡撫劉錦棠奏略稱庫爾喀喇烏蘇舊設領隊大臣一員管理庫城精河土爾扈特游牧及屯田事宜設庫城糧員一員精河糧員一員由部揀派司理戶民糧務軍興以來糧員暫行由外委署查庫城為西路衝衝東距迪化城

六百九十里距綏來城三百五十里西連伊犁至精河界二百五十里北通塔城至塔城界三百三十里幅員廣闊地方扼要軍務初定游民商旅雜出其途兼有土爾扈特游牧民人稽查彈壓悉關緊要見在領隊員缺裁撤糧員既無地方之責竊恐難資鎮撫查庫城舊設縣丞後改同知於乾隆四十八年裁改糧員擬請仿照舊制裁汰糧員仍設庫爾喀喇烏蘇撫民直隸同知一員兼理事銜管理地方戶籍田賦刑案兼管土爾扈特游牧諸事宜並轄精河屬境精河西與伊犁接壤相距二百二十里東接庫城界一百七十五里舊設典史後改糧員所管四驛轄境亦廣擬請裁糧員缺分設驛糧巡檢一員管理戶糧驛站緝捕等事仍隸同知管轄又鎮道道舊轄喀喇巴爾噶遜糧員一員地在迪化南一百八十里原管戶民本由迪化分撥兵燹後員缺久懸戶民均係由州經管臣前奏請升迪化直隸州為府增設迪化縣該處距城較近縣中自能兼顧其原設糧員一缺亦應裁汰

十一年又奏略稱南路建置諸務隨時舉辦漸有規模臣與藩司魏光燾業經先後抵任籌辦一切需員臂助省會各官未可再緩應請升迪化直隸州為迪化府設知府一員治迪化城增置迪化縣一員為附郭首縣與迪化州原屬之昌吉綏來阜康奇臺共五縣均隸迪化府屬遇事由該府核轉其迪化州原管之戶籍田賦驛刑考試及地方一切事宜概歸迪化縣經理此外藩使衙門首領各有職司擬請設布政使經歷一員又庫大使一員專司庫務至鎮道道既兼刑名應請設道庫大使兼按司獄一員迪化府首領應設府經歷兼司獄一員舊有巡檢一員擬請即裁該巡檢缺改設府經歷迪化縣應設縣典史一員專司監獄督捕擬請改迪化州吏目為縣典史原設學正一員兼管屬縣學務今升州為府擬請改為府教授照舊兼管各縣學一俟將來學校大興再擬添設以省糜費以上各缺應定為何項缺分俟設定後再行擬議辦理仍懇照吉林新設各缺酌補一次成案由外揀補一次如議行

又新疆阿克蘇喀什噶爾二道各設庫大使一員又喀喇沙爾庫車直隸廳並撫民同知各添設照磨一員烏什英吉沙爾直隸廳並撫民同知各添設照磨

一員瑪喇巴什水利撫民通判添設照磨一員兼司監獄緝捕又置溫宿疏勒
 莎車和爾開四直隸州各設知州吏目等官並溫宿分防舊城莎車分防回城巡
 檢各一員又置拜城于闐葉城疏附四縣各設知縣典史等官
 又裁伊犁參贊大臣一員設副都統二員裁巴里坤領隊大臣一員協領二員
 佐領八員防禦八員驍騎校八員並將旗營遷併古城改設城守尉一員其古
 城原設之領隊大臣一員協領二員佐領八員防禦八員驍騎校八員一律裁
 汰從新疆巡撫劉錦棠請也
 十二年新疆裁庫城精河兩處糧員改設庫爾喀喇烏蘇撫民直隸廳同知一
 員兼理事銜並添設驛糧巡檢一員又裁喀喇巴爾噶遜糧員一員
 十三年增設甘肅新疆布政使司其屬經歷一人庫大使一人
 又奏伊犁及塔爾巴哈臺等處原屬新疆北路輔車相依請增伊塔道一員駐
 紮伊犁兼管塔城事務改伊犁撫民廳為府改塔城通判為撫民同知加理事
 銜兼管屯田水利尋議准設分巡伊犁兵備道一員駐紮青遠城並庫大使一
 員升伊犁撫民廳為府設知府一員升塔城通判為直隸撫民同知加理事銜
 又奏改烏魯木齊提標各營為撫標設城守協副將一員都司二員守備一員
 千總三員把總八員外委五員改原設提標中左右三營為撫標中左右三營
 設參將一員游擊二員守備六員千總六員把總十八員外委十二員改喀喇
 巴爾噶遜營為馬隊一旗設守備一員把總二員外委一員歸城守營管轄改
 瑪納斯協營為步隊一營一旗馬隊二旗步隊營官設副將一員千總二員把
 總二員外委二員步隊旗官設中軍都司一員千總一員把總二員外委一員
 左旗馬隊旗官設都司一員把總二員外委一員右旗馬隊旗官設守備一員
 把總二員外委一員改濟木薩營為步隊一營馬隊一旗步隊營官設參將一
 員千總二員把總二員外委二員馬隊旗官設中軍守備一員把總二員外委
 一員改庫爾喀喇烏蘇營為步隊一營馬隊一旗步隊營官設游擊一員千總
 二員把總二員外委二員馬隊旗官設中軍守備一員把總二員外委一員改
 精河營為步隊一營馬隊一旗步隊營官設參將一員千總二員把總二員外

委二員馬隊旗官設中軍守備一員把總二員外委一員增設吐魯番步隊一
 旗馬隊一旗步隊旗官設游擊一員千總一員把總二員外委一員馬隊旗官
 設守備一員把總二員外委一員均隸撫標兼轄
 十四年新疆裁塔爾巴哈台參贊大臣一員以伊犁副都統一員移駐塔爾巴
 哈台仍歸伊犁將軍統轄
 又新疆巡撫劉錦棠奏准增喀什噶爾提標步隊四營馬隊七旗步隊營官設
 參將一員游擊三員千總八員把總十員外委八員馬隊旗官設守備七員把
 總十四員外委七員又增提標城守營步隊一營馬隊一旗礮隊一哨步隊營
 官設游擊一員千總二員把總二員外委二員馬隊旗官設守備一員把總二
 員外委一員礮隊哨官設守備一員把總一員又增回城協營步隊一營馬隊
 二旗步隊營官設副將一員千總二員把總二員外委二員馬隊旗官設都司
 一員守備一員把總四員外委二員又增英吉沙爾營步隊一營馬隊一旗步
 隊營官設參將一員千總二員把總二員外委二員馬隊旗官設守備一員把
 總二員外委一員又增莎車協營步隊一營馬隊三旗步隊營官設副將一員
 千總二員把總二員外委二員馬隊旗官設都司一員守備二員把總六員外
 委三員又增瑪喇巴什營步隊一旗馬隊一旗步隊旗官設游擊一員千總一
 員把總二員外委一員馬隊旗官設守備一員把總二員外委一員又增和爾
 營步隊一營馬隊一旗步隊營官設參將一員千總二員把總二員外委二員
 馬隊旗官設守備一員把總二員外委一員又增阿克蘇鎮步隊三營馬隊六
 旗步隊營官設游擊三員千總六員把總八員外委六員馬隊旗官設守備六
 員把總十二員外委六員又增阿克蘇城守營步隊一旗開花礮隊一哨步隊
 旗官設都司一員千總一員把總二員外委一員礮隊哨官設守備一員把總
 一員又增烏什協營步隊一營一旗馬隊二旗步隊營官設副將一員千總二
 員把總二員外委二員步隊旗官設都司一員千總一員把總二員外委一員
 馬隊旗官設都司一員守備一員把總四員外委二員又增喀喇沙爾營步隊
 一營馬隊一旗步隊營官設參將一員千總二員把總二員外委二員馬隊旗

官設守備一員把總二員外委一員又增庫車營步隊馬隊各一旗步隊旗官設游擊一員千總一員把總二員外委一員馬隊旗官設守備一員把總二員外委一員又增巴里坤鎮步隊三營馬隊三旗步隊營官設游擊三員千總六員把總八員外委六員馬隊旗官設守備三員把總六員外委三員又增巴里坤城守營步隊一旗設都司一員千總一員把總二員外委一員又增哈密協步隊一營馬隊二旗步隊營官設副將一員千總二員把總二員外委二員馬隊旗官設都司一員守備一員把總四員外委二員又增塔爾納沁營步隊一哨設屯田守備一員屯田把總一員又增古城營步隊一營馬隊一旗步隊營官設游擊一員千總二員把總二員外委二員馬隊旗官設守備一員把總二員外委一員又增木壘營馬隊一旗設守備一員把總二員外委一員

十五年新疆增撫標城守營職隊一哨設守備一員把總一員又陝甘總督楊昌濬新疆巡撫劉錦棠會奏議覆伊犁塔爾巴哈台除旗營及蒙哈藩部喇嘛等事並交涉事宜必須隨時決制者統歸將軍辦理其伊犁塔爾巴哈台等處地方文武均請歸新疆巡撫管轄仍照前奏由伊犁將軍節制領道

十七年新疆增伊犁鎮標步隊三旗馬隊五旗步隊旗官設游擊三員千總三員把總八員外委三員馬隊旗官設守備五員把總十員外委五員又增綏定城守營步隊一旗開花職隊一哨步隊旗官設都司一員千總一員把總二員外委一員職隊哨官設守備一員把總一員又增霍爾果斯營步隊一旗馬隊二旗步隊旗官設參將一員千總一員把總二員外委一員馬隊旗官設守備二員把總四員外委二員又增甯遠城營步隊馬隊各一旗步隊旗官設都司一員千總一員把總二員外委一員馬隊旗官設守備一員把總二員外委一員

十八年新疆增伊犁將軍標步隊一營馬隊四旗開花職隊一哨步隊營官設副將一員千總一員把總二員外委三員馬隊旗官設都司二員守備二員千總二員把總四員外委四員職隊哨官設千總一員把總一員又增塔爾巴哈

台協標步隊三旗馬隊四旗步隊旗官設副將一員都司二員千總三員把總六員外委三員馬隊旗官設守備四員把總八員外委四員

二十八年新疆升疏勒直隸州為府裁知州一員設知府一員訓導一員改州吏目為經歷置伽師縣設知縣典史各一員升莎車直隸州為府裁知州一員設知府一員改州吏目為府經歷添設分防蒲犁通判一員置澤普縣設知縣典史各一員置洛浦縣設知縣典史各一員改瑪喇巴什直隸廳為巴楚州歸疏勒府管轄裁通判一員設知州一員改廳照磨為州吏目升溫宿直隸州為府裁知州一員設知府一員訓導一員改州吏目為府經歷置溫宿縣設知縣一員改歸城巡檢為典史添設柯坪縣丞一員置輪台縣設知縣一員改布告爾巡檢為典史改卡克里克為塔羌縣升縣丞為知縣設典史一員改庫車直隸廳為直隸州裁同知一員設知州一員改廳照磨為州吏目置沙雅縣設知縣典史各一員改濟木薩為孚遠縣升縣丞為知縣設典史一員置鄯善縣設知縣一員改開展巡檢為典史升昌吉縣呼圖壁巡檢為縣丞從陝甘總督崧蕃新疆巡撫饒應祺請也

又烏里雅蘇台參贊大臣連順奏請烏城設立中俄通商事務局設承辦章京主事職銜一員額外筆帖式二員

二十九年新疆巡撫潘效蘇奏請將前撫臣饒應祺奏准分設之澤普縣移設咽瑪改名皮山縣又瑪喇巴什廳改設之巴楚州原奏歸疏勒府管轄擬請改隸莎車府屬

三十四年署伊犁將軍廣福奏查伊犁黑宰阿勒班兩部哈薩克人來自光緒八年投誠內附經前將軍金順奏請設立頭目三名放為阿哈拉克齊並請賞戴三品頂翎奉 旨著照所請前署將軍錫綸奏請將阿哈拉克齊名目改為千戶長名目前護將軍富勒銘額奏定台吉千戶長歲支津貼分別支給以資辦公後因哈薩克生齒日繁經前將軍長庚馬亮先後奏請添設千戶長分管部眾均經奉 旨允准茲查黑宰哈薩克部內有索勒唐克爾迪一族分隸千戶長喀迪爾斯孜及額斯坦弼克兩入管理骨肉分離慶弔不能相顧見在

生齒繁庶據該族之在千戶長額斯坦弼克屬下六百戶長人衆在喀迪爾斯
改屬下兩百戶長人衆稟請歸併一處另立千戶長管理公舉副千戶長額斯
提密斯充當千戶長並據稟千戶長額斯坦弼克所屬撥出六百戶長查有千
戶長額斯拉木堅所轄人數過多請撥出百戶長薩喀恰克庫改拜吐拉克比
依墨爾雜等三百戶長所管人衆隸於額斯坦弼克屬下管轄人數相均管理
稱便呈由哈薩處轉請覆查各該部落戶口既增該百戶長等所管人衆又係
一族不能不撥併游牧加設頭目以資鈐束而順輿情惟有仰懇 准將該案
勒唐克爾迪一族八百戶長所管部衆歸併一處添設千戶長一名即以副千
戶長額斯提密斯充當責令妥爲管束俾所屬人衆各知遵守法度所有千戶
長一名照章歲支津貼銀六十兩准其在於歲收租馬款內支給其應設之副
千戶長百戶長以下各頭目均令照章設立俾資分管

宣統元年新疆巡撫聯魁奏籌辦省城暨商埠等處各級審判廳略稱擬先在
省城設立高等審判廳一所並附設檢察廳其廳丞檢察長推事檢察官暫由
候補府廳州縣內甄擇通曉法律之員委用典簿主簿山府經歷縣丞錄事由
巡典雜職內揀派均暫行試辦不作額缺迪化縣設一地方審判廳城內外各
設一初級審判廳省外商埠塔城甯遠疏附等廳縣衙門各附設一地方審判
廳併擇於適中地面各設一初級審判廳照章畫分權限審理案件暫以各該
廳縣兼之初級審判廳設推事各級均附設檢察廳

二年又奏統一財政分科治事略稱新疆全省財政通盤籌畫應改良爰仿
奉天各司分科治事章程將原設房科糧台新餉所統計處商務局官錢總局
歸併分隸即於司署設立十科曰總務曰統計曰吏科曰財賦曰俸精曰軍需
曰交通曰禮學曰法科曰實業其總務統計兩科各設科長以資督率其餘各
科按事務繁簡酌設科員多寡不等擬訂治事通則各專責成

三年改甘肅新疆溫宿縣分防縣丞爲溫宿府屬分防巡檢從巡撫聯魁請也
內閣會奏議覆新疆溫宿縣分防柯坪縣丞改爲府屬分防巡檢略稱原奏
稱阿克蘇道屬溫宿之分防柯坪縣丞居溫宿府西南壤地相接而縣治遠在

府境東北與該處中隔四站東西南北均不交接實屬區畫不便應即妥籌改
正雖其正西暨西北均界烏什布魯特境南與巴楚州接壤然皆不若與溫宿
府之聯絡驛站交通亦便自以改設府佐爲宜查黑龍江直隸等省均有巡檢
運隸知府者新設莎車府亦設回城巡檢又昌吉縣屬見改縣丞之呼圖壁巡
檢向收錢糧擬請援案將柯坪縣丞改爲分防巡檢隸溫宿府管轄廉俸照巡
檢例支給其餘分管各項事件及書役工食悉令照舊等語係爲因時制宜行
政敏活起見且與黑龍江等省改設附屬巡檢成案相符自應准如所請

又新疆巡撫袁大化奏邊省瘠苦請設巡警勸業兩道

又奏于閩縣屬下轄地方請添設分防巡檢交內閣會議

又奏遵籌伊新全局查馬亮長庚奏主改設總督以一事權升允聯魁奏主甘
新聯爲一氣無取更張 臣維新疆當雍乾開立軍府於伊犁至同光回亂利平
改置行省自表面視之巡撫有統治全疆之責自內容言之將軍參贊有專理

蒙哈部落之權夫使畫分疆里明定權限則責有專歸亦無不可無如內則練
兵察吏未可分岐外則交涉通商深虞滅裂况伊塔沿邊與俄毗連若我先分

其勢必至爲人所乘則長庚等之言誠是也惟 臣查分省之始左宗棠原議督
撫並設劉錦棠則以新疆孤懸絕域請統隸甘肅兼轄資以爲援則升允等之

言亦是也權衡於二說之間竊以爲不設總督則一國三公然改設之後必將
離甘肅獨立又恐徵兵籌餉呼應不靈計不如將伊犁將軍塔城參贊新疆巡

撫一併裁撤改設新疆總督兼管巡撫事仍以迪化爲治所旗漢並用凡滿蒙
旗務請照馬亮原議裁去領隊各員留伊犁塔爾巴哈台兩副都統歸總督節

制其甘新兩省提鎮司道以下各員仍照舊兼隸甘督轄屬以示聯絡既收統
一之功仍不失聲援之助實於吏治財政兵事邊情大有裨益至另設南疆巡

撫一層似應緩議

皇朝續文獻通考卷一百三十九

職官考二十五

東三省

臣謹案奉天職官 皇朝通考列入京職見改東三省悉更新制難由舊章特援新疆例另立一門

光緒三十三年 諭東三省吏治因循民生困苦亟應認真整頓以除積弊而專責成盛京將軍著改為東三省總督兼管三省將軍事務隨時分駐三省行臺奉天吉林黑龍江各設巡撫一缺以資治理徐世昌著補授東三省總督兼管三省將軍事務並授為欽差大臣奉天巡撫著唐紹儀補授朱家寶著署理吉林巡撫段芝貴著賞給布政使銜署理黑龍江巡撫該督等受茲重寄務當悉心經畫破除情面任怨任勞於一切應辦事宜切實通籌次第舉辦用副委任其應如何分設職司之處即著該督等妥議具奏

又 諭奉天吉林黑龍江巡撫均著加副都統銜

又東三省總督徐世昌等奏請設行省公署分置廳司奉天吉林黑龍江三省每省各設行省公署以總督為長官巡撫為次官皆如各部堂官於行省公署內分設二廳一曰承宣廳承督撫掌一切機要總匯考核用人各事一曰諮議廳掌議定法令章程制各事就原有局署酌量歸併設七司曰交涉曰旗務曰民政曰提學曰度支曰勸業曰蒙務設左右參贊各一員分領承宣諮議兩廳事務交涉等七司各設司使一員總辦司事承宣廳及各司均設分科每科設僉事及一三三等科員佐之諮議廳不設官缺酌派議員副議員顧問員額外議員皆選明達政治者充之此外陸軍應另設督練處以擴軍政司法擬專設提法使以理刑法以吉林省治仍移甯古塔黑龍江仍移墨爾根其官制另行詳議具奏

又內閣會議政務處奏議准吉林省城東北蜂蜜山添設知府一人曰蜜山府省西長嶺子添設知縣一人曰長嶺縣西南蒙江添設知州一人曰蒙江州東南樺皮子甸添設知縣一人曰樺甸縣查吉省疆域東北最為遼闊且界接強

鄰邊防尤重原奏稱蜂蜜山一帶平原千里東臨興凱湖一無屏蔽西距甯古塔城七百餘里兼顧難周委係實在情形自應增設府治以資鎮懾至省西長嶺子為長春洮南兩府要道適中之地西南蒙江毗連韓境東南樺皮子甸為頭二道江及古銅河大沙河流域亦皆扼塞形便之處所請增設一府一州二縣員缺均係擇要建置應即照准

又 諭各省按察使改為提法使分設審判廳着由東三省先行試辦

又法部奏遵議東三省總督徐世昌等奏酌擬奉天提法司衙門及審判檢察廳官制員缺略稱據該督等奏稱提法司管理一省司法上之行政事務而以審判專屬之各級審判廳以提法司監督之期達於司法獨立之地位核與等前奏用意相同而其中如以秋審隸於刑事監獄另分一科登記隸於民事責令初級審判廳試辦並檢察官專司檢察事宜在各廳附設均係因時制宜保固法權之意惟所稱內地府治皆有縣令同城奉省除奉錦兩府設縣外餘皆無附郭之縣其推事長即應照各該地方官以四五六品為差等語查各直省原設之府廳州縣係就行政而言等奏設之地方廳制係就司法而言性質既有不同即品位不相統屬如謂原擬地方審判廳職官單內僅冠以某廳州縣字樣而府治無文不知府有附縣固應隸於縣中府無附縣即仍與廳州一體廳州縣均不過為畫區域省調查起見並無崇卑高下之分則府治之無縣令同城者不妨亦以府名可想原奏乃欲以各府審判廳改為廳丞升為從四與京外各高等廳勢位相侔亦屬漫無區別况臣部前奏京師地方審判廳官制摺內本有外省不得援以為例之文未便以府無附縣違可濫設至豫審推事另設專缺自係明定責成但豫審係專理疑難及情罪重大之獄此項案件無多豫審終結後即無所事似不如仍由各推事中臨時派充較省冗濫即謂該廳員缺祇有此數分派無人或於各庭中酌派候補二三員略仿日本豫備判事之法亦足以資周轉原奏又稱高等審判廳推事定為正六地方審判廳推事定為從六中缺五品一階升轉究有未便等語查臣部原定直省地方職官表內推事長係屬從六則此職即為各該推事升轉之階以每廳州縣各

設一員計之爲數當已不少即選擢諒亦無難若如所奏高等及各府地方推事酌酌所有部定審判廳官制前奏本極詳明應令該省查照辦理毋庸另議更張該督等又稱高等審判廳如一省祇設一處則距省寫遠若赴懇維艱擬再行酌量分設等語查法院編制法案業經奏交憲政編查館核議並另繕全册咨部備案內有地方遼闊或其他不便等情法部應設高等審判廳管轄之地方審判廳內設高等分廳一條是該草案內早已籌議及此應俟奏准頒行後由該督等體察情形再行咨商部妥爲設立更有請者部有管理全國司法上行政之責而提法司爲一省司法行政機關雖不得受節制於督撫以謀行政之便利然非直隸部不足收法權統一之效即將來法官請簡請補各事宜亦應由開辦審判廳各省隨時開單咨部以便奏明請旨依法升降

又東三省總督徐世昌等奏開辦各級審判廳略稱奉省地方遼闊舉行伊始普及維艱擬先於奉天省城設立高等審判廳一廳於奉天府設立地方審判廳一廳於承德興仁兩縣地方按巡警區域分設初級審判廳六廳各廳均附設檢察廳俟辦有成效再行推廣至於各廳管轄權限高等審理全省上訴案件惟各屬尚未備設審判廳今擬已設審判廳之處自應照章定級未設審判廳之處則凡上控各案已經該地方官訊結及應提審者概歸高等審理未經訊結及不應提審者由提法司分別批令該地方官訊斷地方審判廳只審理承德興仁兩首縣地面民刑訴訟之不屬初級者初級六廳各按本區域內管理該廳應管之事自各廳成立之日起奉天府承德興仁兩縣即不收管訴訟其未結舊案在兩縣呈訴者在奉天府上控係兩縣界內者均歸地方接收其不屬兩縣者概歸高等接收遇有招解勸轉等件係審判廳之案即由各該廳逕行解司解院係各州縣之案仍照舊例辦理

又奏奉省司道各缺除交涉司江省事務本簡旗務蒙務二司尚須體察情形另籌辦法均請暫從緩設外民政爲地方自治之權與提法有司法獨立之關

係度支爲通省財政之樞紐自應一律增設與原有之提學共爲四司巡警則江省城鄉居民並少擬不設道缺歸民政司兼辦並以從前之工司併入勸業在江省最爲切要而諸務並無萌芽擬亦不設道缺暫由提學司經理提法司即以見有之分巡道兼按察使銜裁改度支司則以善後局及從前之戶司併入至參贊所領之承宣諮議兩廳事務江省原有文案處辦理三年尙臻妥洽見在僉事科員議員等暫難添設擬酌設秘書官與原有委員分任其事並將從前之印務處併入其各司以下各官亦均暫用委員以歸簡易又奏吉省見有提學提法兩司巡道應遵制裁撤交涉應設專司以交涉局附入民政則以巡警局自治局及關於民政各項局所改設度支則以所有財政各局及戶司併設勸業道則以農工商礦林業各局所併設刑司裁歸提法司兼辦工司則分別併入民政司勸業道統計增設各缺合之原有兩司共爲五司一道旗務暫不設司以兵司改設旗務處蒙務從緩辦理至吉林副都統一缺應裁撤

又度支部會奏議覆吉林巡撫奏撥荒安置林哲旗丁摺略稱原奏稱臨江州富克錦地方原有林哲四旗近經設法歸農臨江州已改升臨江府富錦縣亦將設治此項林哲丁戶應照安置地界分別撥歸臨江府富錦縣管理該旗尙有佐領四員防禦二員驍騎校四員筆帖式二員應請裁撤並按照成案等因吏部查吉林等處筆帖式員缺由將軍副都統挑取本處應用人員坐名補授咨明吏部註冊仍由該將軍等以本處應升之缺照例揀選升用今富克錦筆帖式二缺既經奏請裁撤應准其依有相當缺出酌量調補如願改外即按照黑龍江裁缺章程改以未入流等官令其指定一項呈請分發到省歸候補班補用應俟該撫造具履歷到部再行辦理至該員未改就以前請給食原俸一節係爲體恤閒員起見應准如所奏辦理陸軍部查吉林富克錦地方於光緒八年開添設協領一員佐領四員防禦二員驍騎校四員其協領一缺已經會議政務處於議覆前東三省總督徐世昌等奏吉省添設民官案內奏請裁撤今富克錦地方旗丁撥地歸農分撥府縣管理既據度支部議准所有佐領防禦驍騎校等官自應一體裁撤裁缺各員俟有各城相當缺出酌量補用其未

經補用以前照案仍食原俸仍令該撫將裁缺人員銜名履歷造冊咨部備查
三十四年東三省總督徐世昌吉林巡撫朱家寶奏吉林開辦各級審判檢察
廳遵員試署又擬設檢驗學習所改作爲檢驗吏給予出身

又奏歸併奉天府各級審判廳略稱除第一初級審判廳專收省城之該管
案件無庸歸併仍改名爲承德第一初級審判廳其餘四廳將第三第六併爲
一廳改名承德第二初級審判廳第四第五併爲一廳改名承德第三初級審
判廳各檢察廳附之至省城原設之奉天府地方審判檢察廳改名承德地方
審判檢察廳

又奏設撫順地方審判檢察廳以奉天府第二初級審判檢察廳作爲撫順第
一初級審判檢察廳

又吏部議准添設長白府知府員缺
又東三省總督徐世昌等奏略稱從前江省民官過少壤地遼廓管理難周是
以吉林奏設湯原大通兩縣將江省之北岸盡入該兩縣界內見在江省新設
之與東道已與湯原大通接壤自應將江北地段仍歸江省爲該道所屬請
旨准將湯原大通兩縣所屬江北地段及依蘭府插花地之在江省者仍歸江
省管理

又奏請添設州判要缺並酌移州縣治所略稱奉天復州地方西南兩面距海
海中各島惟距該州一百四十里之長興島巍然獨存該島四面臨海東西約
七十里南北約四十里住戶逾二千男女丁口逾一萬五千雖物產不豐而鹽
產森林漁業尙可自給地方官視同曠地亟應設官鎮撫擬請添設州判一缺
卽在該島設治並將附近花柳島所屬興社一社之地畫歸管轄名曰長興州
判慎選堪勝人員前往辦理至復州城治僻在西隅控制諸多不便查瓦房店
地方近臨車站交涉日繁實爲復州全境之中樞擬請將該州移駐瓦房店俾
資策應而免貽誤又距奉省九十里之撫順地方商旅增益千金寨煤礦利源
日擴該處既無民官亟應移治鎮撫以資約束查奉省分設承德興仁兩縣同
城設治殊近復贅擬請將興仁縣移駐撫順並擬改爲撫順縣知縣以符名實

惟該縣既經移駐撫順從前兩縣所定界址應另行勘明咨部立案至撫順原
設之路紀防禦各員等自應一併裁撤統歸地方官辦理以專責成

又會奏黑龍江增改道府州廳縣辦法略稱黑龍江省南障奉吉西控蒙藩外
接鄰壤經緯縱橫幾及萬里 國初僅設駐防未立郡縣咸豐以後呼蘭綏化
相繼設官近年又於省城及開墾三蒙旗並原設呼綏兩廳增改府廳州縣一
十三處以爲綏邊撫民之計然合計全省地面民官所治僅及十之二三方今
瑯呼商埠次第開通墨布兩城墾荒開墾歷有年所黑龍江沿岸數千里皆與
俄鄰彼則屯守相望我則草萊未闢是非增設郡縣完實內力別無控制之方
見擬添設瑯呼倫貝爾道員兩缺黑河滿珠佛山嫩江知府四缺瑯呼瑪
漠河呼倫室韋羅北武興訥河布西甘南直隸廳同知十缺舒都烏雲車陸春
源直隸廳通判四缺諾敏鶴岡林甸通北鐵驢知縣五缺改設龍江海倫知府
二缺擬就開闢商埠之區及人戶較多形勢扼要者先行設立此外俟地開民
聚經費有著再行陸續籌設至墨爾根呼倫貝爾瑯呼副都統之缺應照原奏
卽行裁撤惟呼倫貝爾瑯呼兩處辦理交涉關稅事務責任較重且有兼轄屬
部之責今既改設道員應請加參領銜以資控制其擬設之黑河滿珠佛山等
府缺擬照原奏及吉林新設密山府奏案辦理不領屬縣至於設治以後應如
何明定廉費酌設佐吏添撥兵隊建置署所屆時續行具奏下會議政務處議
奏尋議准添設黑龍江省道府廳縣員缺駐所並分別先設緩設辦法 瑯呼
兵備道 加參領銜 黑河府知府 治大河屯 瑯呼直隸廳同知 治瑯呼
瑪直隸廳同知 治西爾根 卡 漢河直隸廳同知 治呼倫 以上歸瑯呼道管轄
呼倫兵備道 加參領銜 滿珠府知府 治滿州里 呼倫直隸廳同知 治呼
爾 室韋直隸廳同知 治吉拉林 舒都直隸廳通判 治免渡河 以上歸呼倫
道管轄 佛山府知府 治豐寧 蘿北直隸廳同知 治托里山 烏雲直隸廳
通判 治烏河 車陸直隸廳通判 治車陸 春源直隸廳通判 治伊春 呼倫
縣知縣 治立崗 以上歸興東道管轄 龍江府知府 治以黑水 林甸縣
知縣 治大林 嫩江府知府 治墨爾根 諾敏縣知縣 治諾敏 海倫府知府

知縣 治大林 嫩江府知府 治墨爾根 諾敏縣知縣 治諾敏 海倫府知府

以海倫同知通北縣知縣北通首河鐵驪縣知縣擬設山包訥河直隸廳同知治東布特布西直隸廳同知治西布特哈甘肅直隸廳同知治富特爾其武興直隸廳同知治多布

又奏擬請先將東三省教授教諭學正訓導遇有丁故降革出缺改設視學員其 文廟奉祀典守事宜應責成該員一併敬謹供職

又奏裁奉天府經歷

又奏裁撤吉林戶工刑兵四司管檔主事一缺戶司管庫主事一缺理刑筆帖式二缺額委筆帖式三十八缺給予出路有差

又奏略稱東三省職司官制內諮議廳各員均不定品位見在開辦一年查該廳實為全省立法機關職務極為重要應酌設實缺人員擬照承宣廳僉事品位設參事二員秩從四品

又奏擬於承宣廳交涉民政度支三司擇尤酌補僉事一員照奏定章程首科僉事之例作為從四品

又奏黑龍江裁缺防軍各員遴擬補用辦法

又奏江省改設各司變通辦理疊經 臣等奏明將原有將軍衙門戶工各司暨印務處銀庫司分別歸併在案又刑司亦經奏明歸併裁判處辦理見在新設各司均已奏飭赴任刑事亦歸裁判處辦理自應將從前各司額缺分別裁改俾昭整齊計共裁撤刑員外郎理刑主事管檔主事各一缺其銀庫主事一缺應照東三省官制改為度支司六品庫官容另派員試署又裁無品級筆帖式九缺九品筆帖式二缺額委筆帖式十七缺惟各員等從公有年見因改制裁缺擬將所裁各員均以對品分別歸部選用其未改就以前仍予原俸如原有升階者並請按照升階辦理

又奏查黑龍江省奏請裁併官缺摺內擬將駐吉水師營四品官一員改為佐領六品官一員改為驍騎校水手人等附入吉林漢軍旗內管理其五品官一員即請裁撤經陸軍部核議以駐紮吉林之江省水師營官員丁戶等應請併入吉林水師營管理至應否改為佐領驍騎校之處擬另案奏明辦理查部議

擬將駐吉水師營各員併入吉林以期畫歸一律自應遵辦惟吉林水師營原設總管一員四品官二員五品官二員六品官四員所補之缺向係推陞今以該裁員等歸併辦理誠恐驗補無期似非體恤之道擬請將該營裁缺四品官一員六品官一員暫由漢軍佐領驍騎校先行轉補其五品官一員因漢向無防禦階階應俟吉林水師營四品官缺出與該營五品官一體列選以廣出路而免向隅

又農工商部議准東三省總督徐世昌奏請設立農官

又東三省總督徐世昌等奏准裁撤盛京錦州副都統一員筆帖式二缺料理莊糧事務衙門委主事一缺筆帖式三缺催長一缺奉天撫順防禦使一員防禦三員海龍府總管一員添設東平西安西豐三縣升海龍廳為府並添撫順縣

又奏錦州裁缺副都統所屬筆帖式等員缺擬請裁撤改歸外用

又東三省政略紀奉天內務府辦事處 略稱盛京內務府初制本無總管大臣由包衣三旗佐領中奏 簡一人執掌關防司其政令與 宮禁之治司庫筆帖式都不及十人至乾隆時漸有增置以三旗佐領皆同品官不克董率於是設總管以將軍兼管之分五司廣儲會計掌儀都虞營造是也三庫三旗織造庫是也一閣一處兩館 文潮閣內管領處黑牛館是也夫陪都內務府之設所以供 宗廟齋盛及掌府中戶禮兵工之事官員升轉移之京師立法之初內外原無二致自 巡視典關典官守者失其職司大之典要章程小之例行公事率皆凌雜無序弊竇潛滋行省既立署旗務司并內務府所掌屬之虛禮制之無徵而積廢之難治特設內務府辦事處分股治事凡庫掌之收儲莊糧之出入尊藏之守護祀典貢獻之歲時以及額賦之徵旋棉之納皆考其定制使無就於廢弛至於文牘通行舊章幾無程式旗務司既隸屬公署因改以檔房為總匯凡事有應承轉通告者檔房呈明司使與承宣廳直接而府中各司處惟同署者可用片咨其上奏暨咨行京外各部院衙門仍用內務府大臣銜印以與奉天行省區別應行事宜由

掌印佐領總其成而其餘二佐領堂主事司庫等官仍如京僚之制兩載以來大典類仍幸無廢事雖一時權宜之計他日改定內務府官制亦可藉備考核

又吉林旗制篇 略稱吉林向以將軍衙門為政治上最高之機關內設兵戶刑工四司以印務處冠首額設管檔主事一員為將軍之監印因以印務名之出納財政雖歸戶司而附屬則有銀庫額設主事一員以專其責四司關防均係協領兼銜各司掌案筆帖式二員刑司則多理刑筆帖式二員額委筆帖式各司多寡不一此外並無額缺行走各員亦由各級旗員內揀派兼充無定額亦無專責僅附名隨同畫諾而已省城內與將軍同辦旗務者有副都統一員外城副都統衙門凡五日齊古塔曰伯都納曰三姓曰阿勒楚喀曰琿春專城協領衙門五日烏拉曰拉林曰雙城堡曰五常堡曰富克錦翼領衙門一日烏拉與協領同城專司貢品專城佐領二日伊通河曰額穆赫索羅邊門防禦四日佈爾圖庫曰伊通曰赫爾蘇曰巴彥鄂佛羅驛站四十九其制與內地各省迥異區分東西兩路於省城各設關防處每處派協領一員為監督額設總站官各一員副之每站筆帖式一員以領催委員副之站各有丁原由公家撥給官地並給牛具籽種使之耕作專任站中一切差徭遞送公文等差公家不另給口糧亦無陞階通省旗屬皆受成於吉林將軍惟直接間接有不同焉自改設行省地方有司逐漸增設而旗營與府縣同城者幾同冗贅吉林旗人本係土著方面甚大人丁較內省駐防為多事務較內省駐防亦繁惟有徐議變通庶可收統一之效其變通之策凡秩崇而任輕者則裁撤之若吉林並齊古塔等城副都統及富克錦協領是也事本一致而政權歧出者則歸併之若兩路驛站歸入民政部改設文報總局黑龍江水師營歸入吉林水師營是也積習相沿散漫無紀者則整頓之若兩翼官學蒙古官學改設滿蒙文小學堂是也如此循序漸進化裁通變雖收效稍緩尚無窒礙難行之患

宣統元年東三省總督徐世昌奏酌核奉天官制略稱詳閱原奏所述四端料

酌損益俱有深意惟臣於改設行省奏定官制之時悉心研究與原奏所陳有已慮及而無庸議裁者有官制本有而為緩設之缺須求統一之方未便三省分設者有官制本無而為後設之缺按諸事實應從原奏議裁者有為奉天官場習慣已經嚴予限制者如原奏謂巡撫應裁一節查內有督撫不宜同城因無職務之可分耳各有官署故遇事或有齟齬今總督統轄三邊巡撫主任全境又皆同署辦公權限既明猜嫌悉泯夫總督之駐奉天實因目前交通之便僅及瀋陽非經常制也若俟鐵路貫通則總督應三省之中權以扼軍政外交之樞紐而專為籌邊治蒙之計畫其省內一切政令皆任之以巡撫是巡撫之不應裁非僅為總督之入覲 闕廷出巡邊塞也可以巡撫為總督次官略如京部之尚侍與往日之督撫同城者不同 原定官制會奏明規仿京部是巡撫仍受總督之節制而各有所事既不能以駢枝為嫌復何至以虛設見諒議裁奉天巡撫則總督固於一隅於吉江兩省重要事件必至隔膜貽誤所辦者仍奉天巡撫之事機局既滯而不通綱領亦偏而不備三省開創重要之政必至延擱不辦又顯然以東清南滿鐵路界限畫境而治此中機括關係甚大萬難裁撤此為 慮及而無庸議裁者也原奏謂蒙務司應設一節查原定官制本有奏設蒙務司之請 到任後體察情形蒙旗分隸三省欲進而干涉之則必有畫一之方實行之策若僅於奉省設蒙務司則於吉江勢難兼顧若分設三省則事權不專政令歧出且馭蒙之術在周知其情勢以德威變化其氣質以政教干預其生產是必周歷蒙疆迎機而導非如他司之設常駐於省城僅以文牘往還也 因奏設三省蒙務局以朱啓鈴為督辦去歲出法庫邊門循遼源達洮南由齊齊哈爾折回奉省又分派人東至松林之新城派松嫩兩江西由朝陽赤峯沿新舊遼河等處循行一周考察形勢風俗又於吉林分設蒙務處以資聯絡將來款充事舉尚應移總局於蒙旗中央而分設於吉江扼要之地至原奏謂多立蒙文學堂兼用漢文教習廣開蒙民風氣誠為扼要之圖 臣已分飭學堂兼習蒙文並招致蒙王子弟入學以期教育普及此蒙務必應統一而不宜分設司缺者也原奏謂民政部與巡警道應歸併一節奉省奏

定官制本無巡警道之名良以警務即在民政範圍不當另有主任嗣因奉天巡警普及城鄉而警捐之複雜警兵之凌亂將欲改良整頓似須另設專員又因外省官制皆添設巡警道奉省警務最繁故奏請添設道缺但於吉江兩省警務初興則皆統轄於民政見在整理已將兩年且迭奉部章俾資遵守則設民政司省分自不應再有道缺以清權限而免紛歧奉天巡警道一缺應照原奏裁撤歸併民政司辦理至巡警總局亦猶民政部之有兩廳為執行警務機關勞難裁併或遵照部章改為警務公所容_臣體察情形改訂規則再行分別籌辦至奉省要案之區為治蒙防邊之最重者尚須添設員缺以資籌備應如何酌量增減之處統俟併案奏明請_旨辦理此巡警道一缺應從原奏議裁者也原奏謂雜項職銜應限制一節查奉省初無製簽人員故投效習為慣例_臣到任後嚴加考核凡投效人員先須考試並遵照吏部憲政編查館所定章程分別入法政學堂肄業非正途及學堂卒業者不得錄用且須取有不吸鴉片煙甘結是限制不為不嚴開有派科員委員者亦必試之以事果係才堪造就或奏請留奉以資任使蓋奉省投效之原因有二一則未改行省以前諸事漫無稽考投效人員或辦墾務或充稅差偷漏舞弊飽則遠颺一則因新政繁興一技片長皆思有所表見_臣於用人一事固不敢存求備之心以限制之法待中材以鼓舞之機振士氣然至一事之來尚有乏材之歎實未敢聽若輩之計計鑽營先委後捐以行其彌縫之術原奏謂奉省已不下數百員官冊具在可覆按也嗣後仍應嚴加考核期無冒濫此皆往年之習慣而歷經嚴予限制者也以上四端官制為經久不渝之典用人係辦事最要之原自應審慎圖謀以期盡善

又奏增改廳縣分畫疆界略稱一海龍府析設廳治海龍東南與吉省濛江毗接森林叢密從前本係鮮圍開有山田當光緒四年全行放棄乃庚子變亂民居焚掠殆盡嗣經升為府西北設西豐西安東平等縣獨東南一帶猶多伏莽逃戶畏沮不歸_臣擬於距府一百里之大肚川設一直隸廳以資招撫查海龍去三十六社析其東南八社而以窩集河一統河為府廳之界該廳全境在輝發江之南擬名曰輝南直隸廳即擬遴員試辦此輝南廳設治之實在情形也一洮南府添設縣治洮南東北本科爾沁右翼圖什業圖王蒙旗光緒三十二年始行丈放圈放之地縱四百二十里橫四十里曾於南北規定兩城基北曰醴泉南曰開化南段地瘠猶多未放北段地沃墾戶漸稠醴泉鎮在府東北一百八十里蒙疆僻遠劫奪時聞商民亟望設官以資衛護_臣擬先於該鎮設一縣治名曰醴泉縣仍隸洮南統屬業已派員試辦此醴泉縣設治之實在情形也一營口改為直隸廳奉省商埠以營口為最輪軌四通該埠分屬海城蓋平自開口岸以來只有海防同知藉資彈壓近年各國領事營集交涉益繁亟應設立審判廳以為收回法權地步惟該埠雖駐有海關一道而與民未親又分隸海城蓋平兩縣而距營皆遠_臣擬改海防廳為直隸廳不但新政便於設施且法官亦無虞孤立司法行政相輔而行裨益地方良非淺鮮惟該廳向無轄地擬析海蓋附近營口之地畫歸廳治海界自大石橋迤西北以達於盤山廳之大窪車站蓋界亦自大石橋迤西南以達於泥河口海口海城全境共計十九鄉歸廳治者三鄉蓋平全境共計十七鄉歸廳治者一鄉該廳重在商埠轄地無取乎太多此營口改廳之實在情形也一鹿島收隸莊河廳查鹿島在鳳莊以南孤懸海中周圍可三十里土著約九十餘戶多仰漁業為生前明崇禎初年即有居民會屬金州管轄嗣後聲教莫及海盜蹂躪靡所依歸舊年雖繪入鳳屬地圖從未編查戶口倘不收隸版圖深恐竟同化外_臣檄東邊道就近查勘據稱該島人民均由大孤山積年轉徙大孤山者莊河廳所轄之巡檢分司也該島距鳳治二百里距莊治一百四十里而距大孤山僅二十五里擬即收歸莊轄並飭該廳加意保護此鹿島收隸莊河之實在情形也此外專為畫界者則又有四一先辦設治而後清省界長白增設府治_臣前已奏明在案該府為邊防最要之地綿蕞經營西接臨江割治長生慶生二保東南地濱鴨綠天然水道界綫皆易分明惟北跨龍岡與吉林樺甸濛江接壤該地人烟稀少林莽叢深界限自來未清此時不釐正封疆以後管理地段轉恐互相推諉_臣前後據試辦各員稟報復與吉林撫臣往返咨商擬由紅旗河經荒溝掌白河上

下兩江口歷循湯河寶馬川抵三岔子之正岔定爲奉吉兩省之界南可據長白之後盾北無礙濠樁之幅員此長白府與吉林畫界之實在情形也一已經移治而更定縣界臣前奏准與仁移駐撫順並改縣名旋因距撫順八里之千金寨向有日人開採煤礦事多交涉不能不設立審判廳復移縣駐千金寨地與撫順附近似可無庸易名惟撫順路記防禦各官已裁其舊管之正紅旗藍各一旗廂紅半旗地屬興京者見距撫順較近擬畫歸撫順即以旗界爲界其承德縣東從前析屬興仁者見距撫順較遠以附省數屯仍畫歸承德擬北自碾盤溝經白台子南至楊木林子定爲承撫兩縣新界此撫興承畫界之實在情形也一地勢不足畫西界以補東界臨江縣者濱鴨綠江之要區該縣以東長生慶生二保既割屬長白左臂不足以展舒且全境皆山以之籌備邊防深虞棘手臣擬析通化以東德生一保畫歸臨江即以保界爲界該保民稠地沃堪補臨境之偏枯此臨通畫界之實在情形也一地勢不均畫東界以補西界錦西廳者本析錦縣西境而設地與熱河之朝陽接壤盜匪來去無常故設治之初注重邊防地畝之多寡肥磽未遑計及查錦縣升科之地幾二百萬畝而錦西廳升科之地纔三十萬畝廳境大半磽确近來創辦新政竭蹶異常臣擬割錦縣西偏一地方縱約六十里橫約十五里畫歸錦西北自女兒河中循鐵路南順七里河以至海口定爲廳縣新界所轄地段於錦縣無大妨損而裨益於錦西之處甚多此錦西廳錦縣畫界之實在情形也以上數端經督飭民政司張元奇或便道考查或派員勘畫臣覆加核奪莫不酌夫民情地勢之宜堪以正經界而垂永遠

又奏奉省民政既設專司自不應再設巡警道以期統一擬請將奉天巡警道員缺卽行裁撤所有職務統歸民政司兼管又洮南一府孤懸北荒南隔達爾汗王旗入昌圖之遼源州始達奉境由遼源至洮必先經達爾汗王旗二百餘里始達洮界達爾汗王旗介於洮昌之間橫絕洮南通省之路實爲經營蒙古入手第一障礙南道梗塞則洮南以北之蒙荒終無開通之望而昌圖一府東界吉林又爲鬪匪叢集之所遼源者洮昌間之咽喉也控兩府之極端對西北蒙地有高屋建瓴之勢擬請卽於昌圖府之遼源州添設道員一缺轄洮南昌圖兩府全屬名曰洮昌等處分巡兵備道又查奉省南邊防務之重要什百倍於曩昔上年畫吉省南境奏設長白府歸奉管轄於是奉省東南邊防更形喫重東西沿鴨綠江岸處處與韓連日人對岸經營著著進步彼則屯守相望我則勢孤援絕由長白至安東東邊道治且千有餘里日人趨利其捷稍事徘徊赴機已遲而南沿江岸除塔甸已設長白府治外獨臨江最據要害擬請畫東邊道東境於興京廳之臨江縣設道員一缺轄長白一府海龍府全屬臨江輯安通化三縣名曰臨長海等處分巡兵備道蓋地處邊瘠必厚集其勢始可謀進步與轄海龍爲清盜計亦爲協邊計也下會議政務處議奏尋覆奏如所請行

又吏部奏遵議東三省總督徐世昌等奏請變通分發章程略稱原奏內稱東三省初改行省繁盛之區外人雜處各屬地方之吏概須略講外交試辦設治之官大率皆關邊計有不能與內地並論者至若路礦森林畜牧農墾既賴羣策羣力自必博採旁搜冀獲得人之效是三省於用人一事責備正重稱職極難需才固較內地爲殷而取才不得不較內地爲刻今擬除奏調人員應照新章辦理投效人員照前次奏定限制辦法外所有分發擬請限定兩項一爲舉貢考試授職一爲游學及各省專門學堂畢業授職之員其他項人員概免分發等語臣等查東三省未改行省以前地方官員除特旨簡放外僅有揀發揀補之例並無掣簽分發之員上年臣部具奏請飭該督撫察看情形切實聲覆茲據該督陳請將舉貢授職及專門畢業授職人員量予分發以新舊並進之方爲採取真才之計應卽准如所請至捐納勞績兩項人數較多應仍照章停發惟其中有籍隸直隸及該三省者於人情風土既較熟悉且告近章程見經推廣若概加限制未免向隅嗣後捐納勞績內遇有直隸東三省告近人員應准其一體分發以昭平允其原奏稱見在考試官吏章程尙未大定所請變通辦法定爲暫行專章亦應准如所請

又東三省總督徐世昌署吉林巡撫陳昭常奏吉林擬援案添民政官略稱吉

林府轄地最廣前雖分其西南增設濛江樺甸二州縣其所屬尙周環千餘里雖係省治所在而民官僅一知府治理實有難周擬更畫其東北各屯設一縣缺治舒蘭站名曰舒蘭縣伊通州接壤奉省亦屬西南要區擬陞改爲伊通直隸州西北路逼近蒙界素稱繁要已設有新城府尙可控制其原屬之榆樹縣在吉省中最高富庶亦係要缺擬陞改爲直隸廳同知就北路言之雙城廳旗屯居多僑民亦衆鐵軌通行日益繁富殊非一撫民通判所能統轄擬陞改爲雙城府濱江廳原奏設於哈爾濱商埠內仿營口廳之例專管該地交涉案件名爲江防同知後因俄人不認鮮能實行職務見所轄不足十里殊難成治擬畫雙城沿江之地以益該廳而改爲雙城府分防同知賓州廳當吉黑兩省交通之要衝開化尙早戶口頗蕃地面亦較雙城爲廣擬陞改爲賓州府其南境之阿勒楚喀商民繁盛爲賓州冠擬於其地增一縣治名曰阿城縣依蘭府原治三姓轄地之廣幾兩倍於吉林府雖人煙稀少求治尙難然不預爲措置終難逐漸振興擬於其南境之樺皮川增設一縣名曰樺川縣於其東境古勃利州增設一縣名曰勃利縣其原轄之大通縣向治江北今其地亦畫歸江省擬移治於江南依蘭府西之方正泡地方臨江州北界黑龍江東界烏蘇里江居吉省之極東北邊防尤爲重要其地亦廣於吉林府僅設一州視等羈縻頗非注重邊界之道擬陞改爲臨江府於其西境增設一縣以富克勤錦巡檢陞改卽名曰富錦縣於其東境烏蘇里江附近增設一州意在綏撫邊境因名曰綏遠州就東路言之新設之蜜山府地處極東界烏蘇里江其地尤大於依蘭而戶口則更較少山野荒蕪伏莽潛滋今雖力興墾務而實邊分治斷非一知府數委員所能爲功因擬相度地勢於其東北饒河之南設一縣名曰饒河縣於其北寶清河之西設一州名曰寶清州於其東南臨興凱湖設一縣名曰臨湖縣而府治則專轄之西北各地方其次位於省之正東者則爲綏芬廳卽甯古塔副都統轄境縱橫約二千里原設治三岔口偏於極邊於行政殊多不便擬升改爲綏芬府移治塔城另於三岔口設一分防通判以其地居甯古塔東境因名曰東甯廳其塔城東北原設有一穆稜河知事並擬升改爲穆稜縣就南

路言之西自長白山東接琿春長千餘里南北亦三四百里不等僅設一延吉廳撫民同知政教安能普及且邊界交涉紛起因應尤難擬升改爲延吉府仍治局子街而於琿城設一撫民同知分治密江站以東之地名曰琿春廳其原轄之和龍哈分防經歷治圖們江北一帶越壘地方關係尤要允宜改設正印以重邊地卽擬升改爲和龍縣其延吉以北汪清河流域荒原廣漠幾爲匪巢因擬於汪清河沿岸設一縣治並分綏芬府南境之地以附益之名曰汪清縣就中路言之五常廳廣袤五百餘里實當全省中樞而民戶頗衆政事亦繁與府制相宜擬升改爲五常府由省城至塔城及至延吉沿站八百餘里皆無官治盜匪出沒極礙交通擬於額穆索站設一縣治畫分敦化北隅綏芬西隅五常東南隅之地以成該縣區域名曰額穆縣下會議政務處議奏尋覆准如所請

又奏擬改設添設各員缺分別卽設緩設清單

五常府擬以五常廳撫民同知升改 雙城府擬以雙城廳撫民通判升改 賓州府擬以賓州直隸廳同知升改 綏芬府擬以綏芬廳撫民同知升改 延吉府擬以延吉廳撫民同知升改 臨江府擬以臨江州升改 伊通直隸州擬以伊通州升改 榆樹直隸廳同知擬以榆樹縣升改 濱江廳分防同知擬以濱江廳江防同知改設 和龍縣擬以和龍哈分防經歷升改 穆稜縣擬以穆稜河知事升改 富錦縣擬以富克勤錦巡檢升改 以上六府一直隸州一直隸廳一分防廳三縣各員缺擬請卽時改設 東南路兵備道駐琿春城 東北路兵備道駐三姓城 琿春城撫民同知治琿春 東甯廳撫民通判治三岔口 綏遠州治烏蘇里江匯黑龍江處之西岸 汪清縣治汪清河岸 額穆縣治額穆索站 樺川縣治樺皮川 臨湖縣治興凱湖西北岸 以上二道二廳一州四縣各員缺擬請卽時添設 寶清州治寶清河西岸 舒蘭縣治舒蘭站 阿城縣治阿勒楚喀 勃利縣治古勃利州地 饒河縣治饒力河南岸 以上一州四縣各員缺擬請暫行緩設

又奏請裁去奉天撫順典史員缺

又奏裁奉天承德府司獄醫學正科承德縣典史各缺

又奏吉林兩省改設縣治略稱大通縣原因江北之大通河得名見在北岸既歸江省則名稱宜仍其舊作為江省新設之缺其壤地應酌量增撥委員勘明另行辦理吉省舊有之大通縣應即移駐南岸方正池地方擬改名方正縣作為吉省改設之缺該縣南岸舊管之地稍嫌褊狹應於附近之賓州直隸廳長壽縣勻撥地段俾資治理

又奏江省擬設道府廳縣酌擬設治章程略稱等語按照新定直省官制及本省原定設治章程詳細酌擬辦法大要各道府廳縣均不設大使經歷巡檢等官裁舊有之承辦處而設佐治員以分理庶政裁舊有之捕盜營民壯等名目而分設司法行政巡警以樹新政之基至見在設治各處人民本稀詞訟尙簡其各級審判廳等應請暫緩設立仍於各府廳縣各設審判員幫同地方官審理詞訟案件並於各道設司法股幫同各道核轉該管所屬地方各案件以期分理而歸詳慎

又黑龍江巡撫周樹模奏裁撤呼蘭廳學正即以其缺改設視學員

又奏度支司裁撤暫歸民政司兼管併為六科計裁司使一員科長一員正副科長九員正副司二十餘名每年節省銀三萬一千餘兩

又奏酌擬民政司分科辦事章程略稱從前民政度支二司分署辦事用人較繁見經悉心釐定併為六科一曰民政科掌地方自治戶籍疆域等事並承辦府廳以下升調補署前設之職理科即行裁併一曰會計科凡財政應行籌畫鈎稽各項悉以隸之一曰賦稅科從前田賦稅務分科辦事今則併為一科總司通省歲入之款一曰支發科度支司原有俸餉一科查歲出款項名目繁多僅以俸餉為名殊嫌掛漏今則改為支發科總司通省歲出之款一曰警務科承辦巡警事項一曰庶務科以從前民政度支兩司之庶務併為一科營繕事務無庸專設一科即用庶務科辦理

又吉林巡撫陳昭常奏省城各級審判檢察廳辦理情形查吉省開辦之初高等審判廳原設廳丞一人民刑各一庭各設推事三人典簿一人主簿二人高等檢察廳設檢察長一人檢察官二人見皆仍舊地方審判廳原設推事長一人民刑各兩庭每庭設推事三人典簿一人主簿二人所官一人嗣因民間訴訟繁多廳員不敷分配乃添委候補推事二人幫同審訊俾資練習地方檢察廳原設檢察長一人檢察官二人嗣因吉林府轄境遼闊遇有赴鄉勘驗等事動需時日而廳中收受訴狀庭庭監審各項職務轉無承乏之員遂添委幫辦檢察官二人行走員二人作為差使以資襄助又初級審判第一第二兩廳每廳原設民刑推事二人嗣因初級訴訟無多裁去一人每廳僅留推事一人兼理民刑兩科訴訟餘如初級檢察廳原設檢察官一人並各廳原有書記吏丁人等亦各照章酌設分任職務別無更動

又東三省總督徐世昌奏略稱擬於營口設地方審判一廳初級審判一廳新民設地方審判初級審判各一廳均附設檢察廳管理該廳府轄境民刑訴訟其分配法官支給薪公均照省垣酌量減少

又黑龍江巡撫周樹模奏籌設黑龍江省城各級審判廳略稱已將舊有之裁判處裁撤改為高等審判廳擬定廳丞一員民刑一庭刑科一庭每庭設合議推事三員典簿一員主簿二員錄事六人其高等檢察廳附設該廳以內設檢察長一員檢察官一員錄事二人又地方審判廳一所設推事長一員民刑一庭刑科一庭每庭各設合議推事三員典簿一員主簿二員所官一員錄事八人其地方檢察廳附設該廳以內設檢察長一員檢察官二員錄事四人又初級審判廳一所每庭各設單獨推事一員書記生二名書記四名其初級檢察廳亦附設該廳以內設檢察官一員書記生一人書記一人凡各級審判廳承發吏庭丁醫師及司法警察官兵均照部章酌量募設江省設立提法司未久審判人材無多此次所有各級審判推事及檢察各官多由原有裁判處人員及提法司各科員內選擇委充其投效人員有素習法律勤慎從公者亦復酌量選用惟廳丞掌理全廳事務監督通省地方以下各廳責任綦重見未請簡有人應飭提法司暫行兼任俟擇有相當人員再行奏明辦理

又吉林巡撫陳昭常奏定吉林旗務處辦法章程職掌事項

一司員設總理一員協理一員幫辦一員科長四員總核文牘統計主任各一員科員十一員書記長四名書記生三十八名 二權限總協理幫辦統

轄全省各城旗事務遇事稟承督撫辦理科長受總協理幫辦之命令科員以下受科長之命令 三分科共設四科曰軍衛稽賦生計庶務 四職掌

軍衛科掌通省各城旗官兵缺額世職卹案三代冊籍各事項稽賦科掌通省各城旗官兵俸餉卹賞旌表稅契租賦祭貢典禮各事項生計科掌籌畫

旗丁生計學堂工廠公田各事項庶務科掌收發撰擬奏咨文牘監用關防經理本處員司薪公雜支各事項並附統計事宜

又東三省總督徐世昌奏錦州裁缺副都統所屬筆帖式等員缺擬請裁撤改歸外用

又東三省總督錫良奏請裁東省行營中軍員缺略稱東省改設行省之初經前督臣徐世昌奏明仿照各省額設督標中軍之例設行營中軍一員俾得隨從辦理行營事務體察行營事件尙屬清簡當此庫帑奇絀經費難籌即將該

中軍員缺暨所部之軍需長司書生醫官馬弁夫役人等一律裁撤

又會議政務處奏東三省總督奏擬於圖們江上源自紅旗河以西北循省界南至石乙水中抱布爾湖里設一縣缺曰安圖縣建治於紅旗河西南岸又於

松花江上源循下兩江以東上兩江以南盡緊江漫江流域設一縣缺曰撫松縣建治於下兩江東岸之雙甸子統歸長白府管轄應如所請以資控制

又東三省總督錫良奏裁奉天奉天參贊員缺略稱東省見設奉天奉天參贊各一員推原設官之意因總督將來須移駐長春而以左右參贊改爲東三省

參贊專受欽差大臣節制同駐長春故吉江兩省但設文案而不設參贊見在度支奇絀移駐之議驟難實行揆諸東三省官制既未能自爲一律即查上年

覈定各直省官制通則亦無設立參贊之名大官太多新政所病擬請將左右參贊與承宣諸議兩廳一併裁撤將來總督移駐長春再行酌設其兩廳應辦事件遵照官制通則改設幕僚分科辦理

又東三省總督錫良奏裁奉天府經歷

又奏請升民政司爲從二品仿照布政使兼管府廳以下升調補署略稱各省督撫以下例設布政使一員管理疆域財賦考察地方官吏東三省未設布政

使惟奉天原設左參贊有稟承督撫考核用人之責見在參贊業已裁撤全省府廳州縣以及佐貳雜職一切陞遷調補不可無專司考核之官擬請升民政

使爲從二品仿各省布政使兼管府廳以下升調補署以裨吏治如蒙 俞允吉江兩省併請一律照辦

又奏奉錦山海關道業經改爲錦新營口等處分巡兵備道該道舊兼按察使銜原爲辦理外交准其專摺奏事見在設有交涉專司自毋庸再兼按察使銜

以一事權而符名實其舊轄復州一州海城蓋平二縣該州縣本係奉天府專轄奉天府見經核定直接受公署監督而該道又改轄錦新兩府營口一廳即

毋須再轄復海蓋三州縣應實行更定又與京廳已改爲府所屬教佐各缺亦應升改擬請將舊有與京廳同知經歷管司獄事改爲與京府經歷兼司獄事

舊有教諭改爲府教授並請飭部頒發印信以昭信守

又黑龍江巡撫周樹模奏請將木蘭縣原有同城巡檢一員移駐木蘭鎮所有木蘭鎮巡防委員即裁撤以節經費

又東三省總督錫良奏考察東三省情形裁併差缺摺節經費略稱東省自改設行省以來庶政繁興設官較內省爲衆用費較內省爲多時核定官制通則

尙未頒行原議官制本係試辦今既屢致人言不能不酌議變通以期妥洽見經悉心考核有實宜裁併者有毋庸更改者有應從緩議者有礙難照辦者謹

繕晰陳之如原奏內督撫同城者均巡撫裁缺奉天似宜仿照歸併一節查東三省總督於奉天吉江兩省各建行署原擬隨時周歷商同三省巡撫辦理外

交內治一切重要事件今則總督巡歷吉江爲時甚暫遵照外省官制通則總督所駐省分不另置巡撫即以總督兼管巡撫事自宜將奉天巡撫一缺裁去

以專責成惟該撫臣程德全見甫奉 旨補授應否裁撤恭候 聖裁又原奏左右參贊一司用人一司行政度支司專司財政今歸併於布政司既節費用

又免分歧則左右參贊及度支司均當裁撤一節查奉天左右兩參贊暨所領承宣諮議兩廳業經奏明裁撤度支司有總筭財政之責東三省並未設有布政司自可毋庸議裁又原奏民政司之事巡警道足以辦理何必十羊九牧似民政亦毋庸另設一節查巡警備民政之一端民政可以包括巡警奉省巡警道缺業經前督臣徐世昌奏裁併歸民政司辦理見設民政司一缺自未便再議裁撤又原奏見擬融滿漢旗務司毋庸另設一節查奉天設立旗務司專辦從前將軍衙門及三陵內務府各項旗務而尤以籌辦八旗生計為專責惟見值化除滿漢之際憲政成立八旗舊蹟皆應通變自應將奉省旗務司一缺即行裁撤仿照吉省設立旗務處而以該司原辦之事屬之又原奏蒙務司之事由督署設一分科即足辦理何必另設一司徒耗鉅款一節查奉省並無蒙務司惟省城見有蒙務局係為規畫全盟與革時宜而設因無的款業經奏請裁去該局督辦一差以節經費又原奏奉省勸業道祇藉虛名不求實際每歲用款多至六十餘萬兩見又新設農官紛擾更甚今以其事歸之商會或農會公款所省甚鉅勸業道及農官似宜緩設一節查奉省勸業道衙門暨所屬各局場所每年用款見已大加核減年可節省銀三十萬上下該道管理事件較繁未便遽議裁撤至農官見乏農業專門之員自應暫從緩議又原奏提法司為民刑總匯即屬高等審判可與地方審判直接應丞及高等審判似宜毋庸另設地方審判附入府署初級審判附入縣署即以府縣官充檢察之任一節查提法司職掌係管理司法上之行政事務監督各審判廳並調查檢察事務奉天事務較繁未便兼任審判見在行政司法正謀分立凡已設審判廳處所亦未便以府縣官兼充檢察又原奏各局處所名目甚繁擇其尤切要者存之其餘亦盡行歸併一節查奉天省城各處局所多係另派道員專辦業經迭次裁併見存局所均關切要應免再裁又原奏既有三司兩道不必再有僉事每司道署中擇候補人員才堪勝任者分科辦事一節查東三省官制各司道每科設僉事一員見未照章盡設惟首科僉事為各科領袖職務重要類皆辦事得力之員揆之東省情形實在相需未便更議其餘各科毋庸增設僉事以

省冗贅又原奏吉林省巡撫以下設藩學臬三司及交涉巡警道首府分理其事其餘官缺皆宜酌裁推之黑龍江巡撫以下設藩學臬三司及首廳而交涉巡警為事無多道缺似宜緩設一節查吉林見設交涉司民政司提學司提法司度支司勸業道各一缺黑龍江見設民政司提學司提法司度支司各一缺所有巡警事宜均由民政司兼管江省裁併無交涉司若照官制通則裁民政度支兩司改設布政司則巡警須另設差缺用費未能節省官制徒涉紛更應請悉仍其舊惟江省政務稀簡所轄僅十餘州縣見設四司事少官多擬請將該省度支司暫行裁撤歸併民政司兼管以免冗費又原奏奉省每歲進款不下五百萬兩官之廉俸及委員薪金約需一百萬兩練兵一鎮約需一百二十萬兩辦公及雜用約需一百萬兩尚有數餘可以協濟吉江兩省一節查奉省出入各款不敷甚鉅通省額支各款共需實銀六百一二十萬兩此外一切活支及特別用款約需銀二百餘萬無論如何節省萬難敷用焉有餘款可以協濟原奏似未悉奉省財政出入情形又原奏奉省之官銀號吉江兩省之官帖局均成本無多紙幣甚夥亟宜及時補救改設大清銀行一節查東省見銀缺乏半恃紙幣周轉本金太少出帖太多殊非所宜然目前若遽阻發行無見銀為之接濟官款既窮於應付市面亦立見恐慌非僅特設立大清分銀行所能補救此次巡歷吉江已分飭澈底清釐限制出票應俟統籌辦法再行奏明辦理如才到任計裁兩廳汰冗員併局所通盤核算每年實可省銀一百餘萬兩於財政不無裨益照所請行奉天巡撫事宜另候 諭旨

又奏籌設安東地方初級各審判廳並附設檢察廳略稱奉省商埠重地如奉天府之承德撫順如營口如新民業經前督臣徐世昌先期籌設此外安東遼陽鐵嶺鳳凰法庫通江六處繁簡各殊情勢互異安東一埠商務之盛不亞營新尤宜儘先籌設審判各廳以維法律而重憲政第事屬推廣求才匪易集款尤難比照法部奏定各商埠審判廳編制大綱酌以地方情形變通辦理設安東地方審判廳一第一初級審判廳一分理安東全埠民刑訴訟事務各附設檢察廳地方審判廳暫設民事刑事各一庭仿照營新兩處辦法派推事長兼

刑庭庭長一推事兼辦理民庭庭長一兩庭各派委員一人公開則集兩委員於一庭以符合議之制派主簿兼辦典簿一所官一醫官一錄事二地方檢察廳派檢察長兼檢察官一委員二錄事一初級審判廳派推事一檢察廳派檢察官一仍揀派法政學堂畢業生於各廳爲練習員藉資輔助

又奏畢拉爾部落距離東道署計程八百里重山疊嶂道路不通察核情形實屬鞭長莫及礙難兼顧見在興瓊界址均已畫分擬請將遜河迤北畫歸瓊瑋管轄所有河北之畢拉爾路協領及奏設興東管轄見尙未設之車陸廳通判均應一併改設歸瓊瑋道統屬

又東三省總督錫良吉林巡撫陳昭常奏設阿城縣員缺略稱賓州府所屬之阿勒楚喀地方商民富庶前於添改民官摺內會奏請添設阿城縣又因其地雖屬衝繁尙非邊要故初時開單列入緩設茲復再三考察該地人戶稠密庶政日見繁興尙有副都統坐鎮其間行政權限與地方官初不分明故遠隸賓州尙可暫安無事見旗署既經裁撤一切政務急須待治殊非一賓州知府所能遙制擬請將阿城縣員缺併前奏定即時添改各府廳州縣同時設立以專責成其餘畫分界址添設佐官等事統俟各屬查勘明晰一併奏咨辦理尋吏部會奏依議行

又吉林巡撫陳昭常奏籌設長春初級審判檢察各廳略稱吉省長春一埠地當衝要商旅殷闐詞訟之繁甲於他郡吉林省城各級審判廳成立之後即據提法司吳憲以設立長春審判廳爲請當經批飭照辦暫設地方審判地方檢察廳初級審判廳初級檢察廳各一所有長春府屬一切民刑各案無論已結未結概行移交各該廳管理將從前積案清釐新收訴訟隨時訊結商民稱便即各國僑居商民人等遇有詞訟案件亦皆就我範圍來廳起訴其見行人犯由警局拘送即按照條約移送該管領事執行並於各庭公開時間特設外賓旁聽座准各國人民入庭旁聽以昭大信開辦經年一切秩序頗爲整齊至各該廳官制均照部章分別設置略有變通計地方審判廳設推事長一員民刑各一庭每庭各設推事三員典簿一員主簿二員所官一員地方檢察廳設檢

察長一員檢察官二員初級審判檢察廳設推事檢察官各一員其應設之繕譯官則以地方檢察官暫行兼任以節經費均由提法司遴選熟諳法理富於經驗之員詳請札委俟該司隨時考察如果克盡厥職再行開單出考分別咨部請補

二年裁撤奉天巡撫及左右參贊以總督兼奉天巡撫事

又東三省總督錫良奏請裁撤奉省民政司僉事

又黑龍江巡撫周樹模奏查升任督臣徐世昌等會奏東三省官制要綱內開度支司別設一二等庫官等因奉 旨照准在案江省添設度支司時以戶司經管銀庫尙有未完事件暫令裁缺主事仍舊掌管見度支司併入民政部又值財政統一之時自應由司建庫置官典守以重帑款而資存儲茲擬添設庫官一員並設簿記收支以期專司分任各有責成惟見在出納無多均暫作爲差使揀員委充俟將來事務較繁再行奏請設缺

又吉林巡撫陳昭常奏請將吉林府教授磐石農安兩訓導各缺按照黑龍江省奏裁呼蘭府學正員缺成案先行裁撤所有各該府縣學官應行典禮及舊日應辦事宜即責成地方官兼辦嗣後各屬如有教職缺出仍當隨時撥案奏裁下部議奏尋吏部會奏議吉林裁撤教職准予停止銓選

又奏准裁撤吉林提學司僉事員缺改派總科長一員

又奏吉省舊有之大通縣移駐松花江南岸方正泡地方改名爲方正縣作吉省新設之缺業經奏蒙 俞允並准部文令將該縣界址分定遵即委員往勘分方正縣東至依蘭府應以牡丹江爲界北至黑龍江省應以松花江爲界南至長壽縣應照從前舊界此三面天然形勢無須另行畫分惟西面較狹應請撥賓州直隸廳所屬地段以附益之查腰嶺子地方西距賓州一百五十里東距方正泡九十里應於此堆立封堆定爲兩屬界限並查該縣缺分應定爲繁疲難近邊要缺

又奏籌辦賓州府地方初級審判檢察各廳見已成立計地方審判廳設推事長一員民刑兩庭各設推事三員典簿一員主簿二員所官一員地方檢察廳

設檢察長一員檢察官二員並先設第一初級審判廳一所廳中僅設推事一員兼理民刑訴訟事件附設第一初級檢察廳一所設檢察官一員

又會議政務處奏遵議吉林巡撫陳昭常奏添設民官各缺並添設雙陽德惠兩縣略稱查吉省東與俄領之東海濱省接界其甯古塔輝春三姓均爲扼塞要害蜂窠山又與甯輝成犄角之勢於三姓爲陸路門戶前設府治經該撫奏設呢嗎口廳屬之又奏設東南東北兩路兵備道駐劄輝春三姓而以綏芬府移治塔城處置尙爲允當茲復以改定名稱缺分爲請按綏芬府之名因沿綏芬河流域而河源實出甯古塔之穆楞窩集名以甯安既可統括綏芬且與該府所屬之東甯廳名稱相應呢嗎口廳既在七虎林河之北名以虎林亦復得當至東甯呢嗎口兩廳以及雙城府所領之濱江廳本爲分防缺分該撫以濱江爲鐵路交會之區中外環集交涉日繁呢嗎東甯距離本管甯山綏芬兩府均四五百里崎嶇阻滯各管理民刑詞訟俾資治理擬均照撫民之制改定缺分係按實在情形自應照准以期名實相副該撫又稱寶清等州縣前請緩設見查饒河密邇俄境屹然重鎮舒蘭山道崎嶇時虞伏莽均應趕緊設治以資撫馭其腹地籌防並於吉林府屬添設雙陽縣長春府屬添設德惠縣兩缺均爲規畫形勢起見德惠縣設立之後將原有朱家城照磨一缺即行裁撤按之地勢民情非此不足以裨治理並應准如所請辦理

又吉林巡撫陳昭常奏裁烏拉四品翼領員缺略稱查打牲烏拉地方設有協領一員管理旗務鈐束兵丁與各城協領職守相同該處原有總管衙門經前署將軍達桂奏准將總管一缺裁撤所有採捕 貢物等事即責成該處四品翼領承辦近年以來除 祭品所需仍遵章承辦外其餘方物之供履經奉旨停納該衙門事務清簡且與協領同城事權未能歸一擬請將烏拉四品翼領一缺即行裁撤並援照上屆奏定以五城協領派充旗務提調成案將烏拉協領派充該處承辦旗務提調刊發木質關防俾資信守所有採進 貢品事宜應飭歸該提調承辦並由旗務處總司其成

又奏擬請裁撤水師營官丁各缺分別轉補略稱吉林水師營共計總管一員

四品官二員五品官二員六品官四員船務筆帖式一員額委筆帖式一員領催十二名正丁二百五十名匠役四十五名原以修造船隻等事迨庚子之變船隻損壞已同虛設擬請將該營官丁各缺悉數裁撤以節虛糜所裁該營總管及四品以下各缺應以省城協佐等缺按品分別轉補其筆帖式及額委筆帖式仍請送部酌予出路領催正丁老弱等由宣統三年起發給一年恩餉少壯者以省城滿蒙漢各旗領催披甲分別轉補匠役撥歸旗務工廠擇優錄用並查有裁缺江省駐吉之水師營領催正丁前曾撥歸吉林水師營當差茲復裁撤應與吉林水師營一律辦理

又黑龍江巡撫周樹模奏遵章設立幕職分科治事略稱江省改設行省就舊有文案處酌設秘書官科員分科辦事均經奏陳在案見在籌備憲政事宜繁劇應即照章改設幕職惟原章秘書員僅設一員實覺不敷擬酌添一員其各項政務照章分爲十科江省蒙旗雜處籌防理藩均關緊要宜增設旗蒙邊務兩科都爲十二科擬設參事六員各兼兩科之事並分設摺本電報管卷庶務收發各處員分任以期完備

又吏部會奏議覆東督等奏更改吉林各道缺略稱查原奏內稱吉林自改行省裁改駐省分巡道爲勸業道專管實業先後添濱江道西道路道查濱江道初未明定轄地西道路雖有兵備道之稱權限多不明見既奏准裁撤五城副都統添設民官各缺其情形與前稍異吉省地方遼闊各邊均極衝要茲雖添設東北東南兩道而遼西各地人民商業較爲稠密外交內政尤覺殷繁不可無監司大員以資坐鎮擬請以濱江道改爲西北道路仍駐哈爾濱巡防吉林西北一帶兼管哈爾濱關稅及商埠交涉事宜其西道路則擬請改西南道路仍駐長春巡防吉林西南一帶兼管長春關稅及商埠交涉事宜並援例各加參領銜以歸一律更請併前設之東北東南二道各改爲分巡兵備道俾得隨時監察至各路管轄之地則擬畫依蘭臨江甯山三府呢嗎一廳綏遠寶清二州勃利樺川富錦饒河四縣爲東北道路之區域畫綏芬延吉二府東甯輝春二廳穆稜敦化額穆汪濟和龍五縣爲東南道路之區域其西北道路則擬以

新設雙城賓州五當四府檢一廳長春阿城二縣為其區域西南路道則擬以吉林長春二府伊通濛江二州農安長嶺蘇蘭樺甸磐石五縣為其區域以便事權專屬即請 飭部鑄發分巡兵備道印信以重職守至哈埠開闢已久西北路道兼辦關稅事務並請 頒發濱江關監督關防一顆其他各路道缺統俟開闢之日再行奏咨辦理等語查吉林建設行省諸事經始一切設官行政均應體察情形隨時增損茲據該督撫奏稱自係為整頓地方裨益吏治起見應請照准以清權限而專責成此後一切未盡事宜仍由該督撫隨時考核奏明辦理

又東三省總督錫良奏請將各司道僉事等缺裁撤略稱查館部奏定直省提學司提法司勸業道等官制均無僉事名目自應將奉省原設各司道僉事員缺裁撤以歸一律又同江廳河防同知一缺由前將軍趙爾巽奏設專司緝捕交涉事務查同江本係昌圖府轄境自添設同知並未畫有專地凡緝捕事係責成防營向歸營務處統轄重要交涉暨各項新政悉歸昌圖府管理同知幾同虛設應即裁撤惟同江距昌圖七十餘里必須設行政官廳藉資撫治當經檄飭民政使查明堪以設分防經歷一缺名曰昌圖府同江口分防經歷請旨飭部頒發印信以昭信守

又吏部會奏遵議吉林巡撫陳昭常奏裁改旗缺並請裁缺各員援案酌予出身略稱查原奏內稱五城副都統衙門附設各官如倉官筆帖式銀庫筆帖式以及滿教習等官均有應管事件一時未便裁撤其原有之印務處額設筆帖式八缺委筆帖式四缺左右司額設筆帖式二十二缺委筆帖式十一缺承辦處額設筆帖式四缺委筆帖式二缺富克錦協領關防處額設筆帖式二缺與司處各差名實既不相符自應一律裁撤計共裁五十三員缺即所留協佐以下各官嗣後遇有出缺概行停補惟念各員從公有年不無勞勩擬請各以對品官階分別歸部選用其未經改就以前仍請給予原俸如有升階者並請按照升階辦理等語查此項筆帖式例由本處兵丁及閒散人等咨部補放與各部筆帖式奏補者不同所請歸部選用礙難照准擬請援照黑龍江裁缺筆帖

式改外章程令其指定一項呈請分發到省歸候補班補用如原有保奏升階者應查照歷次成案分別核辦其未改以前仍請給俸一節係屬體恤起見應准如所請至原奏所稱協佐以下遇有缺出概行停補之處各官均係武職管理兵丁今吉林旗兵既未奉裁則旗官似非虛設惟查前東三省總督錫良奏奉省旗官出缺不補奉 硃批變通旗制處議奏請 飭該處衙門入前案籌辦又吉林巡撫陳昭常奏裁撤吉林清文官學左右翼助教二缺

又東三省總督錫良奏海龍總管本為管理圍場而設今既改設府縣總管已成虛設應請裁撤原設佐領以下各官有管理兵丁之責均請毋庸裁撤並兵丁隨時選充地方巡警以期逐漸裁改該處旗務應即責成佐領直接公署仍歸旗務處考核辦理筆帖式一員一併裁撤

又奏近來東三省改進行省業經設立民官奉天係產鹽省分擬請規復 國初鹽場舊制酌設鹽官並設立奉天鹽運使一缺管理東三省產鹽行鹽事宜該省既設運司見設之鹽務總局即由運司督辦仍令原辦道員幫同經理以資熟手其吉黑兩省官運事宜均仍舊辦理又該省新設場缺應就所轄灘地之廣狹產鹽之多寡酌量分設見無鹽務分省人員原辦局員如果辦事得力擬准酌量借補

三年東三省總督錫良奏奉省添設府廳縣各缺未盡事宜略稱查長白府地處極邊與韓接壤北與吉林毗連向為勦匪出沒之區近來韓僑日眾動滋交涉新設之安圖撫松兩縣責任尤重擬請定為衝繁難題調要缺安圖撫松兩同知係析海龍府東南一帶全境在輝發江之南與吉林省濛江毗連森林叢密草萊初闢擬請定為繁疲難題調升補要缺醴泉縣知縣地居洮南府東北轄境極廣蒙漢雜居擬請定為沿邊衝繁難題調升補要缺歸洮南府管轄並請將輝南直隸廳兼理事銜安圖撫松醴泉各知縣均兼理事同知銜

又奏准裁撤奉省承德縣知縣錦縣知縣新民府經歷兼司獄事遼陽州吏目安東縣巡檢管典史事昌圖府司獄鳳凰廳經歷兼司獄事復州吏目錦縣典史鐵嶺縣典史開原縣典史蓋平縣典史海城縣典史各一缺

又添設黑龍江訥河直隸廳同知湯原縣巡檢各一員從巡撫周樹模請也

又添設奉天鎮東縣從東三省總督錫良請也

又東三省總督錫良奏籌設省城特別地方審判廳略稱司法獨立為憲政之始基自法院編制法頒布以來已行司道飭辦理惟細釋原定各條款按諸奉天見在情形似有未能盡洽倘非別設補助機關轉於司法多所妨礙查原法於明定等級審分職權二者最為注意例如屬於地方審判廳者有一定之區域屬於高等審判廳者有一定之階級以奉天全省論已設審判廳者僅十之一未設審判廳者尚十之九其未設之府廳州縣人民訴訟不能禁其不上控於院司且新律未頒舊章具在如逆倫重案及人民控告官吏之案雖之舊例均應提省訊辦遇有此項案件發交地方審判廳則案係省外區域發交高等審判廳案係初審階級若仍以向日之發審局處承審又乖統一法權之指經臣飭司再三籌議擬就省城暫設特別地方審判廳一處凡未設審判廳地方上控之案或控官吏及由院司發覺提審案件並一切京控發回原省審訊者均交該廳按照廳章審理如判決不服准其按級上訴次訴至大理院庶幾階級無虞關路區域不至混淆此為目前權宜辦法一俟全省審檢各廳成立即行裁撤該廳一切組織應酌量參照地方廳章程辦理並遵章將省城原設之行政審處裁撤就該處地方改設特別廳以節經費其行營發審處向辦各項盜案仍責成該廳照常辦理

又奏查黑龍江等七處各級審判廳並原蓋平本溪三縣城治審判廳提前起辦經費應由該廳出款以資接濟請將奉天府之承德縣錦州府之錦縣即行裁併一切事宜歸該府直轄管理復查審判廳既經成立各屬舊有管獄等官亦請一併裁撤各項教職擬請援照吉林成案遇有缺出各部停選至被裁人員並請查照奉省從前五部司員裁缺辦法有升階者即行歸入升班無升階者即以本班仍留原省儘先補用

又吉林巡撫陳夔龍奏遵章改設農安縣地方審判檢察分廳並添設初級審

檢各廳

又 諭東三省總督趙爾巽奏請於公署設審計處委員專司會計檢查係為慎重財政起見即照所請行

又東三省總督趙爾巽奏東省官制自光緒三十一年到任後將五部侍郎及所屬各缺奏請一律裁併純用行省制度然僅屬於奉天一隅迨升任督臣徐世昌繼任乃將黑吉兩省一併改革當時規畫全局固已注重統一故三省巡撫既無軍衙奏事之權道府州縣候補人員又有三省均可委補之例其軍事鹽務銀號蒙務各局所則各冠以三省之名立法非不善用意非不深也乃因創辦之初區域過廣經費亦絀冀求循序漸進之方遂啟各為風氣之弊論軍制則兩鎮協自行奏辦並不會商於總督論鹽務則兩省官運各設機關亦不隸屬於總局論銀號則三省鈔票發額日鉅各不通行論稅務則此輕彼重苛斂重徵各不統一凡此之弊不獨關於行政之權多方不便而於財政之出入亦均由此而生困難即如文報總局調查局陸軍財政局旅務處蒙務處滿蒙高等學堂優級師範學堂高等實業學堂之類分之則費少而機關不完全之則力厚而經費可減又如哈爾濱一埠地為吉黑兩省商務之樞紐外交之鐵路交涉局鹽務之官運及轉運等局兩省各設其一苟使三省統一則以事務較簡之吉林交涉使移哈埠則濱江關道及兩省交涉局均可分別裁併矣新設奉天鹽運使既管理三省產鹽行鹽事宜則哈埠之兩省官運及轉運等局各屬之三省緝私局海參威營口之兩省轉運及採運各局均可分別裁併矣否則政令紛歧事權不一官吏多所奉制財政必致虛糜之舊有三省各官銀號奉天發行鈔票七百萬吉林發行官帖六七百萬黑龍江發行官帖二十餘萬聽其各自虧虧萬一市面恐慌有一省先發其難則兩省必受其影響即使此一省整理得宜而彼兩省仍前紊亂終必為其所波及此固一定不易之理也且再四思維當此時局苟欲預籌補救非力求統一不可三省逼近疆鄰非內地情形可比尤應作為特別制度以收行政敏捷之效惟以三省官制屢經更變五年之中三易督臣巡撫則或裁或設可道則或添或併每易一次

督臣卽變一次官制若遽紛紛更易又恐致淆觀聽擬請暫時姑仍舊制俟臣到任後體察情形妥慎計畫半年一年之後再行陳請或復設參贊或裁撤巡撫或歸併司局或改駐要衝務使三省外交軍事財政地方一切事宜均收統一之效而免紛歧之虞庶於邊陲危局不無裨益得 旨著該督到任後體察情形隨時奏明辦理

皇朝續文獻通考卷一百四十

職官考二十六

西藏

臣謹案駐藏大臣設於康熙年間本係一員雍正時增幫辦大臣原以一人出巡一人駐守惟前後藏相距五百餘里後藏地處極邊與英屬印度及尼泊爾即那不丹布克什米爾接壤近歲開辦商埠今昔情形迥殊聯豫請裁幫辦大臣添左右參贊而以右參贊駐後藏專督商務亦因時制宜整理西藏之要務緣官制與內地不同另立一門附後

乾隆五十一年 命嗣後駐藏大臣等所兼京缺不必開

五十六年 諭西藏戴琿第巴缺出由駐藏辦事大臣會同達賴喇嘛商議改選補放至噶布倫責任更要遇有缺出時即將達賴喇嘛議定正陪之人奏放仍不免徇情滋弊著交駐藏大臣嗣後凡噶布倫缺出會同達賴喇嘛於應陞用人內擇其能事者秉公選定正陪於各人名下注明如何出力之處奏請補用俟朕揀放駐藏大臣儘有徇私不公者必加重譴

五十七年 諭准駐藏大臣督辦藏務應與達賴喇嘛班禪額爾德尼為平等噶布倫以下番目及管事喇嘛分係屬員無論大小事務俱稟命駐藏大臣嚴辦至扎什倫布諸務亦一體稟知駐藏大臣辦理毋得仍令噶琿第巴代辦以致滋生弊端併令駐藏大臣於巡邊之便稽查管束以除積弊

光緒十六年 駐藏辦事大臣升奏奏西藏邊防宜分設駐邊番漢文武以資控治請於仁達岡以內吉碼橋地方設駐邊同知一員靖西內關格林卡地方設游擊一員千總一員外委一員亞東之靖西外關設千總一員吉碼設外委一員帕克哩設把總一員裁江孜守備其外委一缺即移駐格林番員江孜戴琿亦將所部番兵移駐格林

宣統元年 駐藏辦事大臣聯豫奏准添設參贊一員駐紮後藏

又奏公費支絀懇 恩賞加津貼略稱從前西藏設立駐藏大臣兩員每年每員各支公費銀六千兩由四川藩庫支發當時物阜民豐番情效順固無慮其

不足近則藏中百物昂貴數倍於前各埠通商費用日鉅以故歷任大臣其自愛者不免因公受累其不肖者遂至因貪獲譴無益於公有害於事失 朝廷

撫馭藩屬之權啟番人輕視漢官之漸所關匪細如才實深恨之伏查東三省新定官制四川新設邊務大臣皆經各督臣先後奏請優予薪俸悉蒙 恩准光緒三十三年奉 諭駐藏大臣應如何籌給津貼之處著張蔭棠妥議具奏並嚴禁浮冒濫索倘再有前項情弊定行從重治罪是萬里外之情形早在先皇帝聖明洞鑒之中三十四年復奉 上諭需用人員准由四川省慎選調

派厚給薪資優定獎勵具見 朝廷體恤臣工無微不至如才在藏將及三年清夜捫心方憂罪戾之不遑何敢濫邀 厚賞惟時勢所趨不得不仰懇 天恩援照奉天官制及四川邊務大臣成案將駐藏大臣兩員優給津貼以資辦公應如何加給之處應請 飭部核議

二年又奏藏以西擬設駐曲水委員一員藏以北擬設駐哈拉烏蘇委員一員藏以南擬設駐江達委員一員駐山南委員一員藏以東擬設駐碩般多委員一員三十九族地方擬設委員一員管理刑名詞訟清查賦稅數目至於振興學務工藝招徠商賈經營屯墾調查礦山鹽場皆責成委員切實籌辦

又奏封禁藏番之造鎗造幣兩廠及擬自鑄銀圓
又奏藏務緊要凡調用道員月支薪銀四百兩知府三百兩其整裝歸裝銀兩仍按部章核發

又奏見值釐定官制責任必專權限必明各省地大事股督撫同城尙經裁併况藏地規模較簡駐藏大臣兩員政見一有參差治理即多窒礙見在幫辦大臣尙未簡放應請即予裁撤并於前後藏各添設參贊一員以前藏參贊作為駐藏左參贊承辦事大臣籌畫全藏要政以後藏參贊作為駐藏右參贊監督三埠商務均由辦事大臣奏保請 旨簡放既有專一之權又收得人之效似於藏事不無裨益

臣謹案前後兩藏外連印度而近接哲孟雄壤地今印哲皆屬於英則由哲而北逾山浮江長驅入藏勢又甚便故西藏以哲孟雄為門戶而川蜀

則以西藏爲藩籬光緒十四年英人以爭哲孟雄之龍圖山開釁西藏邊防亦亟亟矣或謂蜀中歲費數十萬養西藏之客兵浮寄孤懸而山川風土飲食言語多不相諳不如召募土兵得豪勇與敵相熟之人費省而功倍或又謂西藏歲損國家之費勞兵糜餉久且不支不若使通市各國交牽互制無俾英人專利而往來經營且藉以習知西人之長徐謀所以富強之道之二說者亦皆言之成理而專責任明權限尤爲先務之急蓋有治法無治人古人固已先我言之矣

三年內閣奏准西藏改設左右參贊請暫作爲三品一切俸銀養廉卽按三品支給

臺灣

謹案臺灣爲東南之陬區實閩越之門戶雖珠崖已棄幾等陸沈而許田常歸詎容壁假况乎疆臣孽畫深殫第路之苦衷遺黎慕思尙冀漢官之重視昔偏安州郡曾留僑置之名願薄海臣民毋忘存復之意用特別爲列目庶幾見而警心焉

乾隆五十三年 諭凡遇有補放臺灣道員者俱著加按察使銜俾得自行奏事

嘉慶十三年改臺灣協右營游擊爲艋舺營游擊管轄陸路弁兵改淡水營都司爲臺灣協右營都司駐安平

十六年於噶瑪蘭地方之五圍設守備一人存城把總一人協防外委一人額外委一人頭圍設千總一人外委一人陸隆嶺地方設額外委一人溪州設把總一人均歸艋舺營管轄

又設臺灣府噶瑪蘭通判一人駐五圍設羅東巡檢一人兼司獄事

道光七年移臺灣鎮標右營游擊一人駐彰化縣竹塹爲北路右營游擊移原駐竹塹守備一人並右營千把外委各一人同駐大甲又右營把總一人駐銅鑼灣又外委一人駐斗換坪

十三年復設臺灣鎮標右營游擊改原設臺灣北路左營爲嘉義營設參將一

人駐嘉慶城歸臺灣鎮總兵統轄

十四年移加溜灣汛外委一人駐臺灣城守營屬蕭壠汛移舊社汛外委一人駐茅港尾汛移貓霧寮汛千總一人駐葫蘆墩移原駐葫蘆墩外委一人駐大墩汛移大安口汛外委一人駐吞香汛移淡水營管轄移淡水營額外外委一人駐九槐厝歸阿里港汛管轄移枋寮汛外委一人駐湖州莊

二十七年改臺灣縣羅漢門巡檢歸臺灣鳳山二縣管轄同治八年移福建臺灣府鳳山縣興隆里巡檢駐枋寮

十三年船政大臣沈葆楨奏爲臺地善後番境開荒事關勦始請移駐巡撫以專責成略稱臺地之所謂善後卽臺地之所謂勦始善後難以勦始爲善後則尤難等語爲海防孔亟一面撫番一面開路以絕彼族覬覦固未遑爲經久之謀數月以來南北諸路緇幽鑿險雖各著成效卑南歧萊各處雖分列軍屯路非不已開謂一開之不復塞則不敢知番非不已撫謂一撫之不復疑則不敢必何則臺地延袤千有餘里官吏所治祇濱海平原三分之一餘皆番社耳奸民積匪久已越界潛蹤驅番佔地而成窟穴則有官未開而民先開者人迹罕到野番穴處涵育孳生則有番已開而民未開者疊嶂外包平埔中擴鹿豕遊竄草木蒙茸則有民未開而番亦未開者是但言開山而山之不同已若此生番種類數十大概有三牡丹等社劫殺爲生豈不畏死若是者曰兇番卑南埔裏一帶居近漢民略通人性若是者曰良番臺北斗史等社雕題務面獵人如獸雖社番亦懼之若是者曰王字兇番是但言撫番而番之不同又若此今欲開山則屯兵衛刊林木焚草萊通水道定壤則招墾戶給牛種立村堡設隘硯致工商設官兵建城郭設郵驛置解署此數者孰非開山之後必須遞辦者今欲撫番則選土目查番戶定番業通語言禁仇殺教耕稼修道塗給茶鹽易冠服設番學變風俗此數者又孰非撫番之時必須並行者雖然此第言後山耳其繁重已若此山前之入版圖也百有餘年一切規制何嘗具備就目前之積弊而論班兵之情愾盡役之盤踞土匪之橫恣民俗之惛淫海防陸守之俱

虛械鬪禁之迭見學術不明庠序以容豪猾禁令不守烟賭以為養槍官於斯土者非無振作有為正己率屬之員始苦於事權牽制繼苦於毀譽混淆救過不遑計功何自使不力加整頓一洗浮澆但以目下山前之規模推而為他日山後之風氣_臣等竊以為未可也管綜前後山之幅員計之可建郡者三可建縣者有十數固非一府所能轄欲別建一省又苦器局之未成而閩省向須臺米接濟臺餉向由省城轉輸不能離而為二環海口岸處處宜防洋族教堂漸漸分布居民向有漳籍泉籍粵籍之分番族又有生番熟番屯番之異氣類既殊撫馭匪易况以初始之事為善後之謀徒靜鎮之非宜欲循例而無自使臣持節可暫不可常將責效於崇朝兵民有五日光兆之見倘逾時而久駐文武有兩姑為婦之難_臣等再四思維宜仿江蘇巡撫分駐蘇州之例移福建巡撫駐臺而後一舉而數善備何以言之鎮道雖有專責事必稟承督撫重洋遠隔文報稽遲率意徑行又嫌專擅駐巡撫則有事可以立斷其便一鎮治兵道治民本兩相輔也轉兩相妨職分不相統攝意見不免參差不賢者以為推卸地步其賢者亦時存形迹巡撫則統屬文武權歸一尊鎮道不敢不各修所職其便二鎮道有節制文武之責無遴選文武之權文官之貪廉武弁之勇怯督撫所聞與鎮道所見時或互異駐臺則不待采訪耳目能周黜陟可以立定其便三城社之巨姦民間之冤抑親聞切法令易行公道速伸人心帖服其便四臺民烟癮本多臺兵為甚海疆營制久壞臺兵為尤良以弁兵由督撫提標抽取而來各有恃其本帥之見鎮將設法羈縻只求其不生意外之事是以比戶窩賭如賈之於市農之於田有巡撫則考察無所瞻徇訓練乃有實際其便五福建地瘠民貧州縣率多虧累恆視臺地為調劑之區不肖者飢法取盈有巡撫臨之貪黷之風得以漸戢其便六向來臺員不得志於鎮道及其內渡每造蜚語中傷之鎮道或時為所挾有巡撫則此技悉窮其便七臺民游惰可惡而難直實可憐所以常聞蠢動者始由官以吏役為爪牙吏役以民為魚肉繼則民以官為仇讎詞訟不清而械鬥鬪屠之端起奸宄得志而豎旗聚眾之勢成有巡撫則能預拔亂本而塞禍原其便八况開地伊始地殊勢異成法難

拘可以因心裁酌其便九新建郡邑驟立營堡無地不需人才丞倅將領可以隨時節調其便十設官分職有宜經久者有屬權宜者隨事增革不至糜食之虛糜其便十一開煤煉鐵有第資民力者有宜參用洋機者就近察勘可以擇地興利其便十二一臺地向稱饒沃久為他族垂涎今雖外患暫平未雨綢繆正在斯時而山前山後當變革創建者非十數年不能成功化番為民尤非漸漬優柔不能渾然無間與其苟切倉皇徒滋流弊不如主持大局綱舉目張况年來洋務偏重東南臺灣海外孤懸七省門戶其關繫非輕欲固地險在得民心欲得民心先修吏治營政而整頓吏治營政之權操於督撫總督兼轄浙江移駐不如巡撫之便_臣等夙夜深思為臺民計為閩省計為沿海籌防計有不得不出於此者敢不據實上聞以為芻蕘之獻

光緒元年 諭沈葆楨等奏履勘瓊瑯形勢擬建城設官著照所議行該大臣等即飭令委員將築城建邑等事實力籌辦其餘未盡事宜並著隨時具奏沈葆楨見在回省著將船政應辦各事迅速料理即前往臺郡督飭該地方將撫番開山事務通籌全局悉心經理以副委任

又於福建臺灣南猴洞地方置恆春縣隸臺灣府設知縣典史等官裁彰化縣艋舺縣丞一員

又 諭前據沈葆楨等先後具奏臺北擬建府廳縣治請移紮南北路同知酌改臺地營制屬屬考試請歸巡撫主政各摺片當派軍機大臣等會同妥議茲據奏稱沈葆楨等所奏各節係為因時制宜起見自應准如所請著照軍機大臣等所議准其於福建臺北艋舺地方添設知府一缺名為臺北府仍隸於臺灣兵備道附府添設知縣一缺名為淡水縣其竹塹地方原設淡水廳同知即行裁汰改設新竹縣知縣一缺並於噶瑪蘭廳舊治添設宜蘭縣知縣一缺即改噶瑪蘭廳通判為臺北府分防通判移紮雞籠地方福建巡撫見在既有駐臺之日其臺地營制並著照所議該處千總以下由巡撫考拔守備以上仍會同總督揀選題補臺灣鎮總兵撤去掛印字樣歸巡撫節制即將安平協副將裁撤至所請移紮南北路同知並歸巡撫考試等語臺灣南路同知即著移紮

卑南北路同知改爲中路移紮水沙連各加撫民字樣臺灣學政事宜並著歸巡撫兼理

二年 諭侍郎袁保恆奏請將福建巡撫改爲臺灣巡撫其福建全省事宜歸總督辦理等語著該衙門議奏

四年福建臺灣設臺北府教授一員改設新竹宜蘭二縣訓導各一員又議准新竹縣訓導作爲經制之缺宜蘭縣訓導係由噶瑪蘭廳復設訓導改設仍爲復設訓導之缺又改臺灣淡水廳復設教諭爲淡水縣復設教諭又裁臺灣嘉義二縣訓導各一員

又兵部奏撥臺灣左營游擊以下等官歸撫標左營駐郡城臺灣中營游擊以下等官隨臺灣鎮移紮安平改臺灣協中右兩營都司爲臺灣鎮標陸路又撥左右兩營所屬千把外委歸鎮標左右營改臺灣水師協左營游擊爲北路協陸路左營改原駐省城之撫標左營參將爲中營參將所屬備弁改爲中營名目原設臺灣水師協左營守備中右兩營水師千總把總外委額外外委爲陸路

五年閩浙總督何璟奏福建省臺灣府屬地方既設府縣原有新莊縣丞應改爲臺北府經歷兼管司獄事務淡水縣應添設典史一員新竹縣即將竹塹巡檢改爲新竹縣典史宜蘭縣即將噶瑪羅東巡檢改爲宜蘭縣典史又臺灣北路理番同知原駐鹿港經奏准改爲中路移紮水沙連查有彰化縣南報社縣丞堪以移紮鹿港以臺灣縣羅漢門巡檢移設南報社卽作彰化縣南報社巡檢

又兵部奏定福建督標輪流赴臺撫標及臺灣改設水陸各缺仍應復舊移臺灣鎮標左營游擊一員駐恆春縣爲恆春營游擊其守備以下一律改隸臺灣鎮節制作爲游擊中軍分駐車城以千總同駐恆春爲專營以把總外委派撥縣屬楓港大樹房

八年福建臺灣府設撫民通判一員駐埔裏社
十一年 諭旨醇親王奕譞等奏遵籌海防善後事宜摺內稱臺灣要區宜有

大員駐紮等語臺灣爲南洋門戶關繫緊要自應因時變通以資控制著將福建巡撫改爲臺灣巡撫常川駐紮福建巡撫事卽著閩浙總督兼管所有一切改設事宜該督撫詳細籌議奏明辦理

又 諭臺灣南北地輿表延甚遠以形勢而論臺北各海口尤爲緊要原設臺灣道一員遠駐臺南深慮難以兼顧且巡撫常川駐紮一切錢穀刑名事宜必須分員管理各專責成應否於臺北之外添設臺北道一員著楊昌濬劉銘傳悉心會商妥議具奏

又 諭楊昌濬奏添設臺北道不如添設藩司係爲因地制宜起見自可准行臺灣雖設行省必須與福建連成一氣如甘肅新疆之制庶可內外相維著詳細會商奏明辦理

十二年 諭澎湖爲由閩赴臺要隘扼紮勁旅認真操練以資緩急該處地方官若由巡撫管轄節制自更得宜並著詳細議奏

十三年閩浙總督楊昌濬等奏准福建臺灣設布政使一員並庫大使一員又奏准臺灣道向兼按察使銜一切刑名均歸管理設司獄一員作爲按察司司獄

十九年吏部議覆臺灣巡撫邵友濂奏請以雲林縣治移駐斗六地方
二十年議准添設臺北府分防南雅里番捕盜同知一員雲林縣林圯埔分防縣丞一員

皇朝續文獻通考卷一百四十一

職官考二十七 祿秩

臣謹案俸祿惟漢最優唐宋所不及元以公田租充俸名曰公田實輸之民此法之極弊者明代祿米最薄洪武初定一品月俸八十七石遞減至五石止嗣以鈔折米每石折鈔十貫每尋鈔少又以布折鈔三四百貫鈔二百貫是以三四百官至極品月米易錢僅一千數百文不成政體我朝銀米兼支京員另有月費至一品支公費五兩遞減雍正時復有恩俸及各部堂照外官加養廉外酌給等差不一乾隆時京官概給雙俸外官正俸倍給外官加養廉外酌給等差不一乾隆時京官概給雙俸外官佐雜及武職亦予養廉加惠臣工至優且渥逮改官制祿稍益豐除前考具載外有關係頒之制者悉著於篇

乾隆五十三年 諭向來六部尚書侍郎每年俱給雙俸雙米而大學士之兼管部務者照例俸米雙支其不兼部之大學士每年系雙俸單米大學士領袖班聯職分較大所得俸米比尚書轉少殊未允協嗣後大學士不兼部務者亦加恩給予雙俸雙米以符體制
又議准熱河住居之額魯特較滿員俸銀之數按次俱減一半三品總管給四品俸四品副總管參領給五品俸五品佐領防禦給六品俸驍騎校每月支餉銀四兩米合銀數支給
五十五年覆准文職官員隨同督撫進京祝嘏全支俸銀半支養廉武職員弁隨同祝嘏全支俸薪馬乾牛支養廉
又議准各省督撫衙門筆帖式除直隸向無家口米石仍支給俸米折色銀兩外其餘七品者歲支銀三十三兩八品支銀二十八兩九品支銀二十一兩一錢
五十八年覆准督撫奉 旨調補別省暫留本省辦事者俸銀照調任應得分例支給養廉亦照新任酌給一半均於奉 旨補放之日起支
又覆准浙江鹽道改為鹽運司除原設道俸外加給銀二十五兩在缺俸下動給

嘉慶三年奏准科布多札哈沁明阿特三旗總管照烏梁海總管例每員歲支全俸銀六十五兩

四年覆准 陵寢官員止予單俸不能養贍家口應將銀庫郎中員外司庫等四員歲支養廉銀一萬八千五百兩內除貼盛京五部侍郎及理藩院軍機處養廉銀二千九百六十六兩九錢零外實支銀一萬五千五百八十三兩零應再減一半銀七千七百九十一兩五錢零作為 陵寢司員雙俸計贍禮郎讀祝官內務府正副管領等一百八十九員應加雙俸銀九千二百三十八兩二錢零以裁減銀庫司員養廉全數抵給外不敷銀一千四百四十六兩六錢九分再將戶部寶泉局滿漢監督二員每年應得銅批飯銀六千六十六兩二錢八分酌減一半抵補加俸銀兩尚餘餘銀遇有應行添用之處再行覈辦

又覆准圍場官員俸米改支折色每石銀一兩四錢
六年 諭關領俸米如逾定限不獨將該員應領米石扣留存倉並治以遲延之罪嗣議定支放俸米春季自二月起秋季自八月起旗員限六十日漢員限四十日按限放完逾限不完監督官一并議處領米官員違限將應領米石停給仍分別議處
十一年奏准各部員滿漢官員告病未滿一年痊愈者無缺人員即令在原衙門行走扣足一年方准領俸其由實缺告病之員經奏留者亦扣滿一年該衙門奏准補缺之日方准支俸
又奏准新疆烏魯木齊都統並巴里坤等處領隊大臣歲俸亦系銀米兼支遇有降革留任處分亦照在京官員之例撥扣俸銀仍支給俸米
二十四年覆准賞銜派往新疆辦事宗室覺羅人員照例支給借俸等項其所食開散宗室覺羅錢糧均各裁汰
道光元年覆准凡裁缺另補及病痊候缺等官原任並無事故奉 旨在京員上行走者按行走職任給正俸其外任奉 旨來京改用京職者毋庸給俸六年覆准文武員弁因公出差升補別缺雖經奉 旨而尚在差所未經引見又未接授部劄者其舊任俸薪養廉等仍照出差分例支食俟差竣再行住

處如運解各項委員往返需時在途奉文推升尙未交差而本任升補人員已經到任者新任人員以到任日起支全俸全廉出差之員仍支舊任全俸半廉俟差竣住處在建曠項下支給

十一年覆准武職官員因才不勝任奏請撤任另補自撤任日起至接署他缺前一日止不得支給俸薪

二十八年覆准滿漢文武官員奉 旨原品休致賞食全俸半俸並休致後由兵部奏准題准賞給全俸半俸者任內降革留任之粟均毋庸覈扣仍照原品支食俸薪

三十年奏准予告及休致官員奉 旨賞給全俸者止支正俸不准兼支 恩 俸

咸豐三年 勅文臣三品以上養廉以四成武臣二品以上以二成充軍餉

五年覆准凡奉 旨簡放及選補實缺各道府尙未到任奉 旨開缺辦理團練事宜未開缺前支食本任俸廉簡放以奉 旨之日選補以奉文之日起支開缺後照軍營襄辦人員例按品支給薪水馬乾

六年酌增直省文員減成養廉

七年覆准本省副將升任別省總兵尙未按節赴任奏留署本省總兵者仍於本省全支新任俸薪半支新任養廉非奏留者不在此例

十一年覆准理藩院差務繁多其滿洲蒙古員外郎以下遇有出差推升得缺者未引 見前仍食原俸差滿回京補行引 見始准照升任食俸

同治四年覆准各省將軍告病奉 旨賞假來京調理假期未滿又奉 命管理京營事務者所有本任俸廉銀兩一律全支

五年覆准各衙門候補主事原係例食正俸之員又奉 特旨賞郎中員外或保免補主事作為候補郎中員外者准其支食郎中員外正俸

六年覆准凡捐納到部之主事員外郎中等官旋經中式進士引 見未蒙改官奉 旨以某部主事員外郎中即用即補者於奉 旨指用部屬之日起按照特用之例起支正俸

九年覆准武職各官因人地未宜撤任留營差遣續經派委尋常差使者照在營當差人員例照銜給一半俸薪

十一年覆准提鎮督帶師船奉 旨簡放並未 陛見亦未到任仍帶師船者照出差人員例仍支舊任全俸半廉

光緒元年文麟奏哈密辦理軍務文武各官一切養廉請照回子親王俸銀均於軍餉款內坐支報銷

又恭親王奕訢等奏議覆崇實奏變通奉天吏治章程略稱原奏稱各大吏養廉宜變通戶部查盛京將軍每年額支養廉二千兩停止一成按一成實銀八

成票銀支給奉天府尹年支養廉一千兩府丞四百兩停止二成按四成實銀四成票銀支給其實銀均八折票銀每兩按市平銀二錢五分支給五部侍郎

養廉每年三百兩分春秋二季支領每季應領銀一百零八兩按八折實銀支給應領票銀四十二兩每兩按二錢五分支給將軍侍郎養廉尙由金銀庫開

支府尹府丞養廉尙由該省耗羨項下動支歷經辦理在案見據該署將軍瀝陳該省陋規欲求整頓非如養廉不可請將將軍養廉年給實銀八千兩府尹

年給實銀六千兩府丞年給實銀二千兩係為力除積弊整飭地方起見應准如所奏統俟明年為始此項養廉銀兩應准其在山海關所徵新增盈餘項下

動支即從光緒二年為始由該關道撥解並請 飭該將軍將陋規一切裁撤嗣後倘仍蹈積習立即嚴參以肅吏治此次加給養廉係為根本重地稍加優

異他省詎容並論即附近之吉林黑龍江亦與奉省稍別均不得援以為例其副都統五部侍郎養廉原額本少所請均以八成實放亦應准如所請自明年

為始以示體恤此項廉銀仍由金銀庫按季關領又原奏稱倉差規費宜變通戶部查本年七月該署將軍以旗租草豆一項弊竇叢生利歸中飽奏請無論

上中下戶但有一口六畝之糧止徵東錢一千一百二十文此外不得復立名目當經 戶部行咨在案茲據奏稱此項折色正供外尙有盈餘謂之倉差規費

每年約在一萬五六千金不如改充公費因請撥銀一萬兩作為五部侍郎公費每歲各分二千金以資貼補餘數即充軍署公費等語查倉差本係外辦章

程此次提充自爲化私爲官正辦但一經歸公無所沾染難保不額外需索仍致累及貧民應令轉飭各屬認真稽查如有前弊立即嚴辦此項公費應准提歸將軍五部衙門以資津貼

二年盛京將軍刑部尚書崇實奉天府尹慶裕奏請將驛巡道養廉每年給實銀三千兩允之

又總理各國事務衙門奏出使經費酌核定數頭等一二品充月給薪俸一千四百兩二等三品充一千二百兩三等三四品充三百兩四品八百兩署任六百兩總領事官六百兩正領事官五百兩副領事官四百兩署領事官四百兩頭等參贊官五百兩二等參贊官四百兩三等參贊官三百兩頭等繙譯官四百兩二等繙譯官三百兩三等繙譯官二百兩領事處繙譯官三百兩欽差大臣處隨員醫官二百兩以上本員火食包車雇車價跟役工價飯食在內此外一切公用作正開銷其餘武弁供事學生每月每人約須百兩以內由使臣屆時酌定準數作正開銷

又奏變通出使章程 出使各國大臣月給俸薪請照見在實職官階支給惟原擬二三品充二等欽差者月給薪俸一千二百兩三四品充三等欽差者三品一千兩四品八百兩其四品充二等者未經議及今酌中定擬月給一千兩至各國副使擬月給七百兩 一出使各國大臣有兼攝某國事務者月給俸薪毋庸另加各國副使亦一律辦理 一出使各國大臣及副使以下各員月給俸薪自到某國之日起各按應得銀數支給扣足三年爲期滿期停支俸薪如接辦大臣尙未到期滿大臣尙未交卸應按照在任日期算給俸薪接辦大臣到後停支副使以下各員亦一律辦理其參贊領事繙譯等員如經接辦大臣留用者俸薪即從年滿日接算支給 一出使各國大臣及副使以下各員由中國起程及由差次回華行裝歸裝均需整頓所有往返兩項整裝擬各按三箇月俸薪數支給由衙門前擬各關六成洋稅內動支 一出使各國大臣等每年俸薪及往返盤費駐劄各國一切經費等項由該大臣按年分晰造報衙門查核 一此項俸薪盤費及一切經費由江海關彙齊按年匯寄

應如何分別匯寄之處由衙門知總稅務司遵照辦理

三年盛京將軍崇厚等奏查興京副都統係新設之缺有統轄東邊之責公務紛繁並令其就近督辦抽收新兵堡等處山貨稅務其每年例領養廉銀五百二十兩實屬不敷辦擬請即於所抽貨稅項下自三年爲始每年撥給銀二千兩作爲該副都統養廉所有向領盛京戶部之養廉應請即行停止

又浙閩總督何璟奏福建巡撫一缺在各省中最高清苦懇 恩俯准於省城釐金項下每月開支經費銀千餘兩爲巡撫辦公渡臺經費得 旨嗣後該撫渡臺時准其每月開支經費一千五百兩

五年四川總督丁寶楨奏查川省臬司道府向來除養廉外別無津貼而養廉項下例有扣平搭票折錢及本省應行攤捐各款層層減折所贖無幾從前收受節壽規禮以辦公贖家二百餘年相沿未改中外共知實不得已然終非正辦去秋臣以川省藩司亦收陋規名義尤爲不正當經飭令刪裁刪裁之後辦公竭贖蓋川省全年正額丁糧共祇六十餘萬向無糧折酒費等項與江西安徽等省可以取資於漕羨者情形不同省庫實無閒款可籌惟自去冬開辦黔邊鹽務以來各岸局於購鹽售鹽之際照商行收扣平餘湊少漸多原以備各局一切公費茲據總辦局務候補道唐炯稟稱各該委員等願將此項餘積辦公銀兩撥充積有成數即以提撥各道府每年辦公之用等情查此項平餘既非課稅羨截正項所入又係各局員節省所積並非另取之公家且視別省漕折公費取自民間者有別以之提撥道府公費實爲名正言順見擬自光緒五年正月起即於黔邊鹽局收積平餘備公項下酌量提出成數視各道府缺分

繁簡均勻分撥准其備文赴局領回作爲辦公經費各該道府既有此領款辦公不致掣肘即明定禁令將從前一切規禮永遠裁革不准再收分毫如查有私受情弊即將該道府指名嚴參並將私自餽送之州縣一併參處用昭儆惕六年戶部奏籌備餉需略稱咸豐三年太僕寺卿李維翰奏停廉充餉請將各直省文職一品至七品武職三品以上養廉暫行減成支放嗣於咸豐六年開欽奉 上諭所有各直省文武養廉著戶部查照京官增俸章程酌核具奏等

因經臣部奏准自是年夏季起文職一二品酌給七成三四品酌給八成五品印官武職三品以上酌給九成其餘文職武職均照原額支給二十餘年循照辦理核計各直省此項放款每年節省銀九十餘萬兩軍興以來司庫不敷周轉減成銀兩陸續借撥見值籌備餉需所有前項銀兩應循名核實專提解京除雲貴甘肅支絀省分不計外其餘各省綜計約可提銀六七十萬兩應請飭下各該省督撫自光緒六年春季為始將文職武職養廉銀兩仍照章分別按成給發外其減放銀另款存儲按年批解部庫一次年清年款不得藉詞截留

又河南巡撫涂宗瀛奏查陋規因應裁革而辦公亦需資助如臬司道府等官雖均有養廉自軍興以來減成減平所得無多不比州縣尚有錢漕平餘可資津貼故江西閩皖等省將各項陋規裁革必酌定所需經費俾得辦公有資細閱該三省原定章程江西係於丁漕解部所餘留作本省公用安徽係專出於漕糧一項福建則因丁漕無幾取給於關稅釐餘今豫省一百七廳州縣有漕糧者僅五十三縣西南兩路稅釐局卡每年收數業已悉充軍餉不能如福建之關稅釐餘可以挹注即額徵漕米亦不及江皖兩省既與各省情形互異又無開款可籌再四圖維惟有酌盈劑虛變通辦理除撫藩向無陋規糧道經管漕務南北兩道兼理河工各有津貼無庸再議外惟臬司為刑名總匯需用頗繁既欲盡革陋規不能不籌公費茲查有漕折項下每石提銀二錢留為本省辦公之用臬司公費擬即由此項銀兩酌撥不敷將司庫核減扣存開封府每年應領發審修金等項一併提歸以補不足統由藩司按月移解收用漕米仍徵本色所提漕折之款即由糧道改於漕耗各州縣應領運腳項下動支其南汝光河陝汝兩道暨開封等九府公費擬於所屬州縣內除苦缺不計外核其平餘多寡酌量派提即由該州縣按季解解該管道府不必再解司庫以免領解之煩所有銀數均係按照該司道府摺開出款酌定計尚足敷公用其一切陋規悉予裁革並將攤捐各款核明解餉盤費秋審賞耗各府辦理發審案件歲科考試經費文武鄉試幫廉貢差盤費隆冬粥廠貢院渡船監獄等項工程

京省各提塘報資津貼各衙門書吏飯食紙張等項皆係每年應需之款仍舊存留分別扣廉捐解其餘原定清查軍需報銷各局經費候補通同薪水道府到任鋪墊執事司庫房銀封紙張等項全行裁汰各衙門書吏冊費一體裁四留六等情詳請具奏臣查陋規一項上官取之州縣州縣取之百姓上下誅求卒至官民交困臣素迂拙視此陋習痛恨實深風聞豫屬陋規向有節壽季章漕規等項名目到豫後即欲一併革除茲經委員陸續查明藩司概予禁革並將攤捐各款核明實係必不可少者酌量存留餘悉裁汰統計裁去各項每年共銀九萬餘兩臬司道府分別酌給公費通飭一體遵行俾各辦公有資無所藉口

又諭御史李璠奏京員等支領俸米請變通辦理等語著戶部議奏

又盛京將軍岐元奏略稱奉天添設圍場總管一缺請加副都統銜支食二品俸銀兼充練兵統帶官至添設通判巡檢等官廉俸辦公役食馬撥兵房城署工程塚堆歲修各銀兩應請概發實銀毋庸折扣免至辦公竭蹶此外總管佐領巡圍津貼執儀工食統帶應領薪水夫馬工食旗員隨缺官地折租與廉俸役食無異通在一分耗羨項下支給未便兩歧應請仍照原定銀數均發實銀以示體恤至於輪派坐卡官兵多係遠道遺調各臺地處偏僻食物較昂原有俸餉不敷養贍亦請仍照原奏官一員每月加給銀十兩兵十名每月加給銀二兩以資防守

七年雲貴總督劉長佑等奏貴州古州等廳員均無羨餘開款廉俸不敷辦公近年黔省辦理善後因該廳員等異常清苦按月各給經費銀一百五十兩擬請定為成例其各廳書役工食亦酌量添給

又恭鑒奏查烏魯木齊額設都統一員所屬領隊大臣五員除各員俸銀俸米為數無多不計外計都統歲支養廉銀二千三百八十八兩本城領隊大臣歲支七百兩庫爾喀喇烏蘇領隊大臣歲支八百兩自關內用兵以來關外協餉不繼廉俸減成支領甚有無從支領者嗣經前署伊犁將軍榮全具奏新疆將軍都統大臣歲支養廉均以八成實銀支給經戶部議准行知在案此後都統

養廉每歲應領實銀一千九百十兩四錢領隊大臣養廉歲領實銀五百六十八兩六百四十兩不等新疆僻處西陲貨物昂貴以每歲之俸廉供每歲之支用出入之數不敷其多擬請仿照內地各省酌給公費章程願懇自本年正月起將烏魯木齊都統一缺每年加給公費銀六千兩所屬領隊大臣每年各加給一千兩俾得不憂內顧專心辦公

又盛京將軍岐元奏查新設康平縣地處邊疆本係蒙古地面並無經徵錢糧是以定為煩難中缺其為蒙古代催地租辦理命盜各案與懷奉無異所請廉俸役食等項概發實銀原為養其廉隅若令酌行刪減使其辦公竭蹶內顧多虞何能勤求吏治惟有仰懇 天恩俯念該縣地方瘠苦正佐各官應支廉俸役食辦公等銀仍准按照懷德奉新兩縣章程概行給發實銀免其刪減實於吏治民情大有裨益

又直隸總督李鴻章奏張獨兩廳酌添辦公經費略稱查多倫廳額設養廉銀一千兩辦公銀二百兩又兼管稅務書吏役食等項另有作正開銷尚可敷衍張家口廳額設養廉銀八百兩無閏之年辦公銀二百二十一兩獨石口廳額設養廉銀八百兩無閏之年辦公銀七十五兩四錢九分照藩庫放款章程減成給領所得無多該兩廳缺分較苦見既減為撫民同知衝煩疲難四字要缺政務煩重倍於往昔若不酌添經費不足以資辦公應請將張獨兩廳每年各添給辦公實銀五百兩在於經徵升科廠地糧銀內留支仍扣六分減平解還藩庫其與多倫廳舊設養廉辦公俸薪役食等銀悉循其舊由司給領

又浙江巡撫譚鍾麟奏請照蕪湖等關成案月給甌海關監督薪水銀二百四十四兩以資辦公
又總理各國事務衙門奏光緒四年會紀澤由四五品候補京堂充出使英法
國大臣經 臣等以會紀澤承襲侯爵所有俸薪請照二三品充二等辦理奉
旨依議今以都察院左副都御史留使英法兩國本係三品充二品之員月給
俸薪照章應給銀一千二百兩 臣等公商會紀澤見在升任三品且兼充出使
俄國大臣其俸薪按照頭等辦理以示優異

八年吉林將軍銘安奏略稱阿勒楚喀共改實任協佐校七缺擬請仿照通省八旗武職官員應領俸餉章程計每年共需實銀三百二十八兩一錢二分五釐統歸通省官兵按年應支俸餉項下開支

又四川總督丁寶楨奏四川夔關向章除額解正額盈餘及攤賠渝關木價等款外均定有本省各署及各地地方辦公津貼暨攤捐各項多寡不等俱視公事繁簡為等差內惟督署公費較優以該關為總督專司而總督又兼管巡撫故每年酌定解銀一萬二千兩而兩任中辦公丁役人等役食亦每年定給銀一千二百兩歷來無異 臣光緒三年到川知此項雖係公費究屬私財當時即擬裁革嗣查川督歲支養廉銀一萬三千兩自經扣成減平再加本省捐款外每年所支僅八千餘兩以之辦公實不足用全賴該關所解津貼通融挹注始能敷衍今規禮盡裁若再將公費裁革在窮苦自甘者已覺竭蹶不遑設費用稍多之員必至無以自給誠恐窘迫日甚別計營謀勢必變本加厲從前川省各任於取用公費外仍照收規禮 臣再四思維裁既不能取又不可因將此項公費儘 臣任內改解藩庫暫作餘款遇有地方要事無法籌辦即於此內動支所有數年來舉凡施貧濟苦資助窮民幫補極苦州縣支應例差以及年中各項獎勵士子賞恤兵丁暨此外來往駐藏差使費重難籌者津貼川資以免需索而以寅僚中有夙行自愛病故累深者亦以此中酌給以此連年辦理既不損公家一錢而於地方實多裨益至定給丁役役食一項 臣亦未令收用仍諭其一律捐入地方以濟貧民均皆照辦此 臣歷年中借此不費之惠稍得以辦理地方之實情也惟此項公費 臣雖儘以辦公然斷不可援以為據應仍照舊留存俾後來之員辦公有所挹注

十一年貴州巡撫李用清奏黔省提鎮各標協營共裁把總四十一員外委七十員每年可節省俸銀一萬兩有奇
十二年甘肅新疆巡撫劉錦棠奏 臣前奏請升迪化直隸州為府增設知府以下等官及藩臬兩司首領官經部議核准歲支俸銀及養廉公費銀兩令於新疆徵收地糧銀內動支仍照光緒十年奏案除扣六成減平外毋庸減成等因

奉 旨依議在案查 臣前奏請將領迪一道兼按察使銜尙未議定養廉公費該道例定每年養廉銀三千兩辦公銀七百兩見既管通省刑名驛傳公事較前倍增擬請每年除照例支給按察使俸銀外加給公費銀二千兩毋庸另給按察使養廉此外各官尙有養廉之費即此次省會添設各官亦經部議比照向章支給養廉公費本可毋庸更議惟新疆地處極邊商賈罕到百物昂貴較之內地何止倍蓰各員竭蹶從公實屬入不敷出 臣前奏請加給各官津貼銀兩部議以爲多立名目轉涉紛歧不如酌將俸廉公費概照十成發給等因覆奏奉 准查養廉一項自甘肅軍興以來已經前督臣奏明關內外發給實銀惟公費俸銀仍照七折減見准部議准發十成以每員例定公費銀七百兩計之每歲所增二百餘兩在內地宜無不足而新疆異常瘠苦核其所入仍有不敷因此誤公亦非 朝廷所以綏靖邊疆之意伏查甘肅舉關道一員及東西大路各繁缺州縣向來均有加增養廉之例公費亦較他屬爲多擬請仿照辦理於例定養廉公費外酌加公費銀庶名目不致紛歧而公事可收實效南路兩道每歲請各加銀一千兩新設迪化府及迪化縣各加銀八百兩鎮西哈密喀喇沙爾瑪納巴什阜康昌吉拜城七廳縣各加銀六百兩迪化州學正向有准支公費銀八十兩見請改爲一府教授經部議照鎮西府教授例歲給公費銀六十兩除此項例定外每歲請加銀一百二十兩鎮西廳訓導每歲加一百兩其餘雜職新疆向無公費惟該員等均以未秩遠塞從公擬請仿照正印人員一體酌給公費布政司經歷一員庫大司一員每歲請各給公費銀一百六兩道庫大司一員每歲請各給公費銀一百六兩道庫大使兼按察司司獄一員迪化阜康昌吉縣典司三員哈密廳巡檢一員每歲各給銀一百二十兩以上巖共加銀一萬一千一百八十兩均請遵照部章概以十成實銀仍請在於新疆徵收地糧銀內動支分年彙總報部

公費銀六百兩以資辦公 又吉林將軍希元奏略稱擬請將原設磨盤山巡檢裁撤設州同一員名曰磨盤山州同仍歸伊通州管轄惟吉林並無州同之缺廉俸役食無案可援今酌定養廉銀四百兩俸銀六十兩每年應給工食門子一名六兩遇閏加五錢皂役八名四十八兩遇閏加四兩馬夫一名六兩遇閏加五錢馬兵十六名九十六兩遇閏加八兩均查吉省新設各官章程扣除六分減平在吉林斗稅項下發給實銀歸入民官俸工案內報銷 又奏吉林向章各官應支養廉銀兩不分正任署任均照全支數目按日推算歷經造報戶部准銷有案光緒七年經前將軍銘安奏請續設道廳州縣等官嗣將應支俸廉裁清數目造冊報銷經戶部核覆以養廉一項定例試用候補人員委署員缺均係半支署任養廉題署咨署各員應以奉文後方准支給全廉其未奉文以前仍支半廉所有從前溢支銀兩行令刪減追繳當經鈔錄從前戶部准銷成案咨請免追旋奉部覆咨稱從前所支全廉銀兩因是時部中併入彙奏漏未分核應支數目已自檢舉從前辦理係屬錯誤此次報銷不得援引准銷之案復經具文咨部以此項養廉既係部中漏未核定而吉林究屬遵章發放之款從前領廉各官半多離省請免追繳見准部咨令將在省各員就近著追即有離省者亦須咨催不准稍有短欠等因復行咨駁查吉林各官應支俸廉向照全支數目按日推算歷經奉部核銷數十年來沿爲成例一旦將前放發之款紛紛提傳領廉各官家屬勒迫不特近年離省各官往返咨催已多周折即屬前次數十餘年所放全廉皆在應追之列又將何處追賠况吉林地處邊陲所設正佐各官缺分均極清苦見時陋規一概革除淨盡即有辦公銀兩僅作敷衍既任以瘠苦繁劇之區復責以砥礪廉隅之戒若不稍事變通何能望其爲守兼優且近來養廉一項均由新設斗稅項下動支與內省動用正款者不同仰懇逾格特准 飭部將從前放過之款免其追繳以後署任各員仍請發給全廉全俸以示體恤 又雲貴總督岑毓英奏略稱新設雲南臨安開廣道駐紮邊防兼經理通商稅

務需用較鉅而中外商人聚集彈壓稽察均屬繁劇擬請按照雲南糧儲道養廉額數年支銀五千九百兩設門子兩名快手十二名皂隸十二名民壯四十名橋傘扇夫七名鋪兵二名共七十五名每名六兩共實支銀四百五十兩道庫大使請照雲南鹽庫大使養廉額數年支銀二百零四兩設門子一名皂隸四名馬夫一名共六名每名六兩共實支銀三十六兩其俸銀照例支給所有廉俸役食銀兩在藩庫徵收公件耗羨餘丁項下支放報銷仍照章減成扣平十四年雲貴總督岑毓英等奏略稱所有鑛邊撫彝直隸同知一員應請援照景東永北直隸同知額支養廉銀一千二百兩設役四十七名知事一員巡檢二員援照威遠知事及新撫巡檢各額支養廉銀二百兩各設役十名均照例章支給

十五年伊犁副都統額爾慶額奏略稱塔爾巴哈臺各營弁缺額除原設副將以下等缺三十五員不計外按照甘肅新疆巡撫劉錦棠奏定章程應裁去經制外委四員添設千總二員把總二員蒙古把總二員額外外委三十名合之原設各員缺共六十七員名應領俸廉薪蔬紙張馬乾折色料草等項銀兩照章支領外其公費一項塔城瘠苦情形與新疆南路迥殊自應酌定數目以資辦公擬每歲支給銀二千七百兩俟分防設汛後視道路遠近再行切實估計報部查核

十六年直隸總督李鴻章奏察哈爾都統經管臺站總理收改較輯蒙古寄任重要而廉俸微薄用款不敷見當積弊之後釐剔方新亟應酌加津貼俾辦公有資得以實力整頓惟部款既難節請司庫亦無可籌查有該處茶馬釐捐一項除奏定常年應放各款外尚有盈餘遇有要差向准專案奏撥擬請在此款內每年酌提實銀三千六百兩以三千兩撥歸都統衙門作為增加公費副都統職司較簡亦擬酌加六百兩以示體恤

又伊犁將軍富勒銘額奏伊犁副都統二員俸廉尚未酌定前准戶部議覆二缺係光緒十一年兵部議准添設其應支俸廉數目未據酌定額數報部應令核明報部核定伊犁將軍每歲增加養廉銀一千兩領隊大臣每員每年額支

養廉銀七百兩另有每員每歲增加增養廉銀二百兩仍令遵照舊制於伊犁牛馬稅房租項下動支均扣除六分減平自此奏准之日為始再按十成開支以符定章等因咨會遵照查伊犁副都統係屬新設員缺其應支俸廉等項擬請每年額支養廉銀一千兩俸銀一百五十五兩糧料草折銀五百五十六兩八錢七分五釐二毫隨甲四名歲銀一百四十四兩總共歲支銀一千八百六十五兩八錢七分五釐二毫動支新餉仍扣六成減平自光緒十一年兵部議准之日為始按照十成開支至將軍領隊大臣加增養廉銀兩既經部議自應遵照辦理惟伊犁自兵燹後軍民困苦異常是以牛馬稅房租等項均未舉辦見已改設行省所有善後應辦事宜自光緒十六年起悉交新疆撫臣斟酌辦理伊犁無款可籌擬仍動支新餉一俟另籌有款再行規復舊制以符定章

又奏伊犁將標應遵照新疆奏定章程擬設副將一員都司二員守備三員千總兩員把總十一員經制外委六員共官二十五員步隊一營一哨馬隊四旗總共各營旗官弁廉俸薪蔬紙紅馬乾料草本折等項歲需銀六千三百二十八兩八錢七分京斗料四百九十三石七斗五升一合一勺折價銀五百九十二兩五錢一釐四毫四絲草二萬三千四百四十束折價銀三百四十五兩六錢十七年雲貴總督王文韶雲南巡撫譚鈞培奏略稱雲南永北直隸屬北勝土州同改土歸流擬添設分防永北直隸廳華榮莊經歷一員作為夷疆極邊要缺三年俸滿在任候升年支廉俸銀二百兩門子一名皂隸八名馬夫一名禁卒二名共十二名每名歲支丁食六兩共實支銀七十二兩俸銀照例支給此項養廉役食俸薪在藩庫徵收公件耗羨條丁項下支放入冊報銷仍照章核減以歸一律

又陝甘總督楊昌濬署甘肅新疆巡撫魏光燾奏伊犁鎮標營制餉章查伊犁鎮總兵所屬統計應設參將一員游擊三員都司二員守備九員千總六員把總二十九員蒙古把總二員經制外委十四員並總兵共官六十七員擬暫照巴里坤鎮標各營旗全支折色總共標路各營官弁歲需十成俸薪蔬紅廉費馬乾草料折價及稿書書辦通事口食等項銀二萬六千七百二兩一錢一分

又奏塔爾巴哈臺設副將一員都司兩員守備四員並各旗哨應設千總三員把總十四員巡查經制外委七員共設官三十一員總共各旗官弁歲需十成俸薪蔬紅廉費馬乾料草折價及書辦通事口食等項銀一萬一千七百五十三兩七錢二分六釐

又兩廣總督李瀚章廣東巡撫劉瑞芬奏准戶部咨具奏廣東新定各界增設官缺兵額所有官員廉俸吏役工食兵丁餉糈均應照章支給其未盡事宜應令開單報部立案俟奏咨到日再行分別核議等因當經移行遵照辦理茲據署布政使王之春署按察使德泰詳稱查欽州每年額支養廉銀六百兩今改升直隸州管轄防城政務較繁自應酌增以資辦公擬請比照羅定直隸州年額支養廉銀一千兩除原有六百兩外計增給銀四百兩其防城縣係屬添設擬請比照羅定州屬之西甯縣年支養廉銀七百兩防城縣江平司巡檢亦係添設之缺應照本省各巡檢年支養廉銀六十兩除各缺原有額設養廉分別移撥支給外計增欽州直隸州知州養廉銀四百兩防城縣七百兩共銀一千一百兩應請在於司庫各官養廉項下動支江平司巡檢養廉銀六十兩應請在於司庫落地稅項下動支又欽州每年額支俸銀八十兩原設門皂各役四十九名工食銀二百九十四兩核與本省各直隸州額設俸銀相同應仍其舊該州原設民壯二十名工食銀一百二十兩鐵匠一名銀六兩亦應照舊支給以免紛更又防城縣俸銀擬照本省各縣編俸每年額支銀四十五兩該縣門皂各役照西甯縣額設四十九名每年工食銀二百九十四兩應設民壯擬照本省小縣准設二十名每年一百二十兩防城縣係係欽州州判裁改該州判原支俸銀四十五兩額設門皂馬夫九名工食銀五十四兩今改為縣丞應照本省各縣承年支俸銀四十兩額設門皂馬夫六名工食銀三十六兩計增役食銀三十兩計俸食各項共裁減銀二十三兩防城縣典史係防城司巡檢裁改典史與巡檢均每年支俸三十一兩五錢二分數目相同應仍其舊該巡檢原設皂隸二名每年工食銀六兩今改為典史應照本省各縣典史額設門皂馬夫六名每年三十六兩計增役食銀三十兩欽州林墟司巡檢係靈山

縣林墟司巡檢移改防城縣若昔司巡檢係欽州如昔司巡檢移改俸薪役食相同應仍其舊江平司巡檢應照本省各巡檢年支俸銀三十一兩五錢二分皂隸二名每年工食銀六兩防城縣訓導移住俸銀照舊動支其齊夫門子一項查欽州原設學正一員訓導一員齊夫門子共六名今訓導移駐防城縣應均撥訓導齊夫門子共六名仍留學正齊夫門子三名工食銀兩隨缺開支以上各缺俸食銀兩除裁改移住各缺應將原有俸食分別改撥支給外計應增添設之防城縣俸食銀四百五十九兩江平司巡檢三十七兩五錢二分共銀四百九十六兩五錢二分擬請在於各屬備支經費餘騰解司充餉項下動支又防城縣典史不敷役食銀三十兩擬請在於司庫裁汰酌改經費項下支給逐年均造入添設各衙署俸食冊內報銷其裁改減欽州州判俸銀二十三兩飭令該州照數扣存批解司庫兌收充餉等情開具清冊詳請奏定伏乞 勅部核覆施行

十八年直隸總督李鴻章奏議覆熱河善後事宜略稱熱河近年政以賄成婪索相競自大府以至牧令罕能以廉公自持取之僚屬者節壽有賀儀到任有規禮補缺署缺有酬謝取之商民者街市鋪戶有攤派變本加厲上下相沿不以為怪推原其故非必貪婪成性實由缺分太濇無以養其廉即如都統一缺每歲廉俸公費折實僅二千二百兩無論如何節省斷不敷用此而責以潔身率屬中人以下勢必不能查前署盛京將軍崇實條奏奉天改制事宜詳論該處賄賂公行其今日之熱河情形無異而推本於興廉善養誠為扼要之言當時奏增將軍養廉八千兩府尹六千兩此外尚各費數千兩則府尹約及萬金將軍萬金以上熱河都統事寄之重與盛京之將軍府尹相同至少亦須比照奉天府尹之例增給養廉六千兩乃足敷辦公之用奉天加款係由山海關道支解正開銷此款即擬由津海關道於洋稅項下按年撥解其道府以下亦應籌給津貼迭據奎斌函咨見擬仿前湖北撫臣胡林翼在鄂辦法通飭所屬將署內出入各款澈底查清開報應裁者全行禁革應留者化為公酌定數目改為公費使各有自然入款乃能責以一意奉公如再稍涉貪婪即當從

嚴參辦於事理則爲名正言順於治術則爲正本清源統俟飭查明確再行奏明辦理

又奏遵旨撥分駐防守醇賢親王園寢外圍地方把總外委各一員營兵六十名官兵移撥之初不無耗費原領銀米不敷養贍自宜酌加口分以示體恤擬撥照同治十三年奉派巡邏普祥齡定東陵並看守物料官兵加給津貼成案每員每日給銀八分計官兵六十二員名每年共需銀一千七百八十五兩零應由司庫照章以六成實銀撥按季發交霸昌道隨餉領回就近散給

二十年湖南巡撫吳大澂奏略稱南洲廳通判係由岳州府通判裁改俸薪養廉應請仍照原編額數支給惟直隸廳事務較繁應設額役除將岳州府通判衙門額設各役一併撥給外應添民壯八名快役四名禁卒四名伴作一名鋪司八名擬照見撥各縣地畝核計酌裁華容武陵龍陽安鄉各縣額設各役將工食銀兩抽存撥補支給以免增添額支司獄巡檢係由大龍驛巡檢裁改俸廉暨應設各役均照原編額數抽撥支給毋庸加增安鄉縣復設教諭移駐該州作爲南洲直隸廳儒學教諭並隨撥額設門斗俸養工食照原編支給澧州營左哨千總移駐該州烏嘴作爲駐防南洲廳專汛北汛協防外委移駐該州九都作爲駐防南洲廳協汛所有各弁兵俸廉餉乾仍由澧州營照原額彙領轉發毋庸添改

又戶部奏籌餉緊要請將二十一年分在京王公以下漢滿文武大小官員俸銀並外省文武大小官員養廉均按實支之數核扣三成統歸軍需動用二十二年又奏上年因關外撤防甘肅尚有軍務一切徵兵募勇需款不貲奏請將二十二年分京俸外廉再行接扣一年存儲候撥先後奉准通行遵辦見在海疆無事回匪業就肅清自二十三年起京官俸銀外官養廉應按實數開支以復舊制惟北洋歸併准軍添練海軍西路停發行餉尚需坐餉加以興修軌道堵築河工用款浩繁部庫艱窘而各省認還洋款羅掘一空且有指養廉三成湊還洋債者合俸廉兩項併計每年核扣數逾百萬以三成分計各員

所扣無多以百萬合計公家所裨實鉅當此時局艱難度支匱乏中外文武久沐皇仁宜共據忠義之忱藉伸報效惟查京外員弁其職分較卑者上年各省核扣養廉文職州縣以下武職參游以下迭經各省奏請免扣均邀允准中外事同一律臣等公同商酌擬請將光緒二十三年分京官應得俸銀文職自五品以下武職自四品以下仍照全數開支文職四品武職三品以上照案再行核扣三成外官應得養廉文職自府經歷縣丞以下武職自都司守備以下仍照全數開支其文職州縣武職參將游擊以上照案再行核扣三成併京俸外廉均撥再行接扣一年彙總奏咨存候撥用

二十四年又奏見在添練新軍購買船械用款浩繁加以攤還洋債債價不敷作抵七處釐金更須撥補且各省認借股票來年應還利息統須部籌非豫爲擘畫屆時何以應付臣等公同商酌擬請照案將光緒二十五年分京俸外廉再行接扣一年專款存儲候部撥概不准率行動用尋奉諭旨戶部奏請將京外文武各員廉俸照案再行接扣一年等語官員所得廉俸藉以養贍身家若將核扣三成之案視爲定例逐年接扣實不足以示體恤該部所請著毋庸議

二十七年 諭旨京師自上年兵燹後官民均形困苦業經令戶部前後兩次籌給津貼銀兩以資接濟見在爲日已久艱難窘迫情形益加軫念所有在京王公百官加恩著按照季俸賞給五成實銀旗綠各營兵丁加恩著賞給一月錢糧其候補無俸官員實在當差得力者著一體加恩由留京王大臣會同戶部查明分別酌給所需銀兩即著戶部照撥並飭各省關迅速解京又政務處王大臣會奏遵議外務部額缺養廉各項章程略稱外務部既設專官自應優給養廉以資辦公擬請總理王公每年給養廉銀一萬二千兩會辦大臣一萬兩侍郎八千兩左右丞二員五千兩左右參議二員四千兩郎中八員二千六百兩員外郎八員三千二百兩主事八員二千四百兩額外二十四員六百兩司務八百兩其繙譯等官薪水由該王大臣從優酌給以上各經費即在本衙門應收三成船鈔及罰款項下開支如有不敷再由出使經費項下

撥補

又兩江總督劉坤一湖廣總督張之洞奏請官重祿略稱善教以培其材尤須重祿以養其廉查京職俸銀俸米為數無多加以銀賤物貴實不足以自給查光緒八年戶部奏定各省關籌解京官津貼銀二十六萬兩行之一年旋將此項撥充餉需且原定數目較少大小各官不能備及其分給者為數亦不敷用度今日亟宜另籌辦理至三品以上大員用度較繁關係甚重必應一併籌及其名目即稱為養廉勿庸再稱津貼方為名正言順仰懇即以原議京官津貼銀二十六萬兩仍行發給各官至此項餉需應令各省照數另籌奏明抵補此外擬請即以此次奏陳裁汰屯衛各官所省之款并衛田新擬酌捐之款發給抑或另籌他款應請飭議施行大約必須籌款百萬乃足敷各衙門辦公之需至外省若府縣等官甘苦亦不一致知府有表率之責斷不可令其苦累州縣瘠區則科派繁獄而病民衝繁則虧挪庫款而病國不得已而為調劑調署之策則傳舍無常國民交病其號稱優缺者不過隱匿契稅雜稅減削驛站經費甚至捏報例災蓋州縣官卑事繁科場考棚之攤捐招解緝捕之繁費驛路大差之供億委員例差之應酬其養廉萬不足以給用不得不迫而出此故府州縣皆須令其辦公有資然後能盡心於國事民事應請 敕下各省體察本省情形省州縣繁費禁上司需索其辦公不敷者擬為撥給職田一法考晉唐宋明以來郡縣等官皆有職田明又有邊城養廉田此制仍可仿行查各州縣大率皆有充公之田私墾官荒並未升科原主久亡契據久失地棍冒認爭訟不休此項田地若認真清查一州縣至少亦有數十頃應即撥充職田之用收其租課以資辦公州縣既無累可言則可令其久任一切公款責令切實報解不得藉口侵欺知府辦公竭蹶者亦為籌增公費至增加以後京外各官如再有貪墨取檢者除參革外仍行追罰充公

館經費而歷年總署一切費用莫不取給於是收支相抵時形竭蹶本年政務處議覆總理衙門改為外務部設立專官自應優給養廉以資辦公所有各經費即在本衙門應收三成船鈔及罰款項下開支如有不敷再由出使經費項下撥補等因奉 旨允准見在同文館業經歸入大學堂所需經費前由戶部將華俄銀行息款撥歸應用可以無須另籌嗣後各海關應解銀兩自應作為部辦公專款其從前總署月支戶部經費即應停止以清款目惟查 臣部見當改革伊始支應紛繁不獨各堂司養廉繙譯官薪水等項費用較鉅即如覲見儀節購辦禮物製備寶星一切不時之需在在胥關緊要應請飭下各省將軍督撫轉飭各關道將應解銀兩務須按期解交 臣部應用其以前欠解銀兩亦須迅即補解以應急需

二十八年又奏 臣部籌備出使經費係由各關所收六成洋稅項下酌提一成半存儲候撥每年約共收銀一百餘萬兩從前支款歲有常經出入尚足相抵近年各處分館日益繁多外洋使用金磅輾轉匯兌每多折耗以致漸形支絀加以屢次 特簡專使出洋交際所需款尤鉅上年 臣部改章奏明堂司各官養廉如三成船鈔不敷支給亦從使費內撥用而近日義奧兩國使臣又迭向 臣部商請奏派使臣專駐彼國亦恐難於堅拒此外不時之需更難豫計 臣等通盤籌畫轉瞬已有竭蹶之虞惟際茲時艱孔亟亦未敢另行請款上煩宸廑計惟有就原定歲收經費之數明定限制力求樽節庶可稍資補苴見經督飭司員就近數年各國使臣報銷各冊詳加酌覈凡有可以節省之款均一律切實裁減以慎度支謹擬章程四條 一出使隨員人數光緒十四年使臣館中准設參贊二員繙譯二員隨員二員供事二員武弁學生各一員其設有分館者准添參贊或領事一員繙譯隨員供事各一員作為定額在案惟近年使臣隨帶人數仍閒有逾於定額者擬請 飭出使各大臣嗣後務必遵照定章如有逾額即由 臣部奏咨核減有延用洋員者應令併入隨帶人數內核計至出使西洋各大臣俸薪係按九成支給近因磅價日昂願受折耗應自本年起無庸減成以示體恤出使東洋各大臣俸薪均照八成支給參隨等員

俸薪查近數年各使臣報銷所開銀兩成數不一此後各館隨使人數既少參費以下俸薪亦宜量從優厚藉資鼓勵統由各該使臣隨時酌定咨報臣部查核一使費內俸薪等項約略可以豫計嗣後應明定歲支總數以示限制臣等公同商酌所有駐紮美日秘使館及紐約等處領事署經費每年准支銀二十萬兩英義比使館及新嘉坡等處領事署年支銀十二萬兩日本使館及橫濱等處領事署年支銀七萬兩俄德法三處使館每處年支銀六萬兩韓國使館及漢城等處領事署年支銀五萬兩海參崴商務委員年支銀二萬兩以上歲支共需銀六十四萬兩有閏之年照章加支如由臣部派往肄業學生薪水等項准其另款開支自行支調學生不在此例一使臣及隨員閒有留支安家銀兩者嗣後除報銷冊內仍照向章逐員聲敘外應令另造留支銀數一冊按年隨同銷冊咨部並將此次留支銀兩各在使費歲支數內聲明扣抵以便稽核一出使各館經費既經明定歲支數目嗣後如有不時之需事關重要雖爲章程所未及而實不得不作正開銷者應由各該使臣先行咨商臣部候酌定咨覆後再行撥用或有用數難以豫計暨不及咨商之事亦准一面支用一面報部統俟事竣另案核實造報

又雲貴總督魏光燾奏略稱池西道移駐騰越廳邊關兼理商務需費較鉅應請按照臨安開廣道養廉額數年支銀五千九百兩其原支俸銀一百零五兩原設門子兩名快手皂隸各十二名轎傘扇夫七名鋪兵二名每歲工食銀六兩計三十五名共銀二百一十兩均仍照舊支領添設之道庫大使請照開廣庫大使養廉額數年支銀八十兩俸銀照例支給設皂隸二名年支工食銀六兩共實支銀十二兩此項廉俸役食銀兩即在藩庫徵收公耗項下照例支放報銷仍照章減成扣平以歸一律

又烏里雅蘇臺參贊大臣連順奏擬設烏城中俄通商事務局承辦章京主事職銜一員額設筆帖式二員應支鹽糧加增等款按照烏城額設主事職銜筆帖式等員之例一體辦理惟烏城設立商務係屬創始且俄官往來似應稍加優待擬月給辦公心紅柴燭紙筆等項銀四十兩書記四名巡兵十六名每名

擬月給津貼銀四兩俄蒙繙譯通事二名月支口分每名按照六兩發給總計一年所需連閏不過二千二百餘兩暫由烏城常年各項六分減平項下核發仍歸入常年經費造報

又直隸總督袁世凱奏請將道府廳州各項陋規一律酌改公費略稱近世仕習日壞吏治日偷其賄賂潛通者攝於公義忱於人言不能公然婪索其有明目張膽昌言不諱則莫如收受陋規一事查道府廳州均有表率僚吏考核屬員之責然惟直隸州尚有糧賦平餘其道府廳除廉俸外別無進款祿入既薄辦公又繁乃不得不取給於屬吏於是訂爲規禮到任有費節壽有費查災查保甲有費甚或車馬薪水莫不有費此等風氣各省皆然非僅直隸雖相沿已久不同暮夜苞苴但既受陋規不無瞻顧設有不肖屬吏上司欲據實糾參往往爲其所挾持不克徑行其志吏治之敝所由來也當此修明內政必以整飭官方爲當務之急然平情而論必先有以養人之廉而後可以止人之貪使舉各項陋規掃蕩廓清而不籌給辦公之費則一切應用均無所出勢難責其治理地方見國帑空虛不能另增公費莫如化私爲公之一法臣通飭道府廳州各將每年應得屬員規費據實開報和盤托出即按其向來所得之多寡明定等差酌給公費擬定大順廣道月支銀一千兩清河道九百兩通永道七百兩天津道六百兩口北道五百兩霸昌道三百五十兩保定永平河間各府均月支銀六百兩天津正定順德大名廣平宣化各府五百兩東路廳二百五十兩南路廳一百三十兩北路廳一百一十兩西路廳一百兩趙州冀州深州均月支銀一百兩遵化易州定州五十兩其各州縣仍將向來應出節壽等項一律逕解司庫不加耗費另款存儲道府廳直隸州應支公費按月赴司庫請領不准折扣閏月不計司庫統計出入如有不敷另籌彌補自此定章以後道府廳直隸州不准與所屬州縣有分毫私相授受之事儻敢巧立名目藉端斂派及不肖州縣設計誑獻嘗試逢迎均准隨時據實稟揭查實後按例嚴參治罪其別經發覺者與受同科如此一轉移間廉吏既不病難爲墨吏更無所藉口長官不必有額外之需索下僚不敢作非分之鑽營奏 諭袁世凱奏整

頓吏治請將各項陋規一律酌改公費一摺國家設官分職原期大法小廉及該轄上司收受陋規吏治日益頹壞茲據袁世凱奏請將舊有規費責令和盤托出化私爲公酌給公費實爲整飭官方起見此等風氣各省皆然著各督撫仿照直隸奏定章程將各項陋規一律裁革仍酌定公費以資辦公

皇朝續文獻通考卷一百四十二

職官考二十八 綠秩

光緒二十九年綏遠城將軍貽穀等奏察哈爾兩翼墾務清丈將竣遵案將缺地牧地詳定章程略稱查察哈爾官兵等俸餉無多日艱一日此後地歸官辦無復自私自利之謀若不恤其身家寬為籌計難免失望之心擬仿照吉林烏魯木齊奏撥缺地成案酌量稍加總管每員給地八百畝正參領六百畝副參領五百畝整蘇木之佐領四百畝半蘇木及半中之半蘇木其佐領三百畝滿蒙理刑官二百畝總管下及整蘇木之前鋒校護軍校二百五十畝筆帖式及額設捕盜官二百五十畝半蘇木及半中之半蘇木其前鋒校護軍校二百畝筆帖式及額設捕盜官一百五十畝至各蘇木額設兵丁有大小錢糧之別應分別辦理馬兵每名擬給地百畝步兵六十畝各捕盜兵如係額設每名亦給六十畝此酌留之數若撥留辦法一須統劑其病一須預防其弊各蘇木官兵缺地應各由本蘇木畫留惟內有私放淨盡無地可撥者若遠由他蘇木撥補是有餘地之蘇木反因撥地於人致官局少放若干即該佐亦少得四分之一而無地者獲盜賣之價又得養贍之田殊非公允不得不量予裁減微示之罰此項無地可撥之蘇木擬照見定應得數目減半撥補並須俟有地之原蘇木先將本佐官兵缺牧撥留完竣再以餘地分撥免致喧賓奪主如備撥之地仍有不敷則擬由升科之四釐另租項下以租抵補每畝撥若干照正賦一分四釐核計若地雖未及放盡而所賸之地不足見定之數尙缺若干亦於另租項下折米抵補如尙缺十頃補以五頃之租餘可類推蒙人惟利是圖罔知後顧此次所撥各項缺地係為該官兵等永資養贍將來生計全恃乎此若不預為之防難保不仍前私賣擬自撥定之後立案造冊鈐蓋關防發存各旗遇有官兵遷調將此算入交代不得稍有含混至缺地撥給或自行耕種或招佃分收悉聽其便惟不允私行變賣無論官是兵如有盜賣盜典及假託永租不賣之賣致令地非其有一經查出或別經發覺官則參處兵則革除私買與私賣一併懲辦仍追奪原地歸旗如此嚴立防閑無非惠恤蒙旗應請准免其押荒

升科以廣 皇仁至世職承襲多寡靡定原不以缺論未使一律給以業田擬俟墾務辦清於該各旗應得四分辦公費內如有餘儲每旗提銀千兩由墾局移交就近地方官發商生息以按年所得由地方官查取該世職員名數目並派孤寡蒙民幾戶均勻給予俾資津貼

又甘肅新疆巡撫潘效蘇奏新省南北兩路改設增設各府廳州縣縣丞經前撫臣饒應祺奏明經部議准奉 旨咨行 臣到任後飭司委員勘分辦理就緒已將正佐各缺揀員委署隨時奏咨在案所有應支官役廉費俸工以及增設廳縣各衙署壇廟倉廩監獄等項銀兩均應分別籌畫酌設數目值此款項奇絀可省即省不敢鋪張查疏勒莎車溫宿三直隸州改升知府三州吏目改升府經歷庫車直隸廳同知改為直隸州知州瑪喇巴什直隸廳通判改為知州兩廳照廢改為州吏目以上十缺衙署壇廟倉廩監獄毋庸興修廉費俸工等項亦毋庸增減莎車府屬新設蒲犁通判新設澤普縣見另案奏請改名皮山縣疏勒府屬新設伽師縣和闐州屬新設洛浦縣溫宿府屬舊城巡檢升設溫宿縣柯坪添設縣丞焉耆府屬布告爾巡檢改升輪臺縣半克里克縣丞改升塔里木州屬新設沙爾湖縣康縣屬之濟木薩縣丞改升孚遠縣丞魯番廳屬關展巡檢改升鄯善縣共計九縣各添設典史一員以上添設二千餘衙署經費正署酌發銀三千二百兩佐署五百兩監獄三百兩總共以四萬兩為度其舊有縣丞巡檢衙門之處或改作正署或改作佐署減去銀五百兩此係酌定大數仍飭令切實樽節蒲犁通判應支官役廉費俸工仿照霍爾果能通判章程開支惟該處並無稅釐又與英俄接壤常多交涉事件擬再加公費銀四百兩添設九縣應支官役廉費俸工銀兩地面歸北路領道屬者即照阜康縣章程開支歸南路阿克蘇喀什噶爾兩道屬者即照拜城縣章程開支其應支公費銀兩除領道伊塔道各屬仍照舊支發外阿克蘇喀什噶爾兩道各屬額支公費銀七百兩加增公費銀六百兩亦有未加增者擬將未加者仍支原額凡有加增者各減去銀二百兩新設之缺支額定公費銀七百兩外又加增銀四百兩柯坪縣丞呼圖壁巡檢改升縣丞應支官役廉費俸工

仿照前濟木薩縣丞章程開支以上總共歲支銀四萬五千六百九十九兩零除裁改各原缺抵支銀四千二百九十餘兩尚須添支銀四萬一千餘兩作為前項動支不另請款以符原案

又諭朕欽奉 懿旨明年七旬萬壽圍澤覃敷所有在京四品以下官員見章減放三成俸米八旗兵丁減放一季甲米著加恩全數放給一年以示嘉惠三十年廣西巡撫柯逢時奏廣西匪亂由於吏治不修吏治之所以不修非盡官之不肖實由缺之不均甘苦相懸趨避不免如太平泗州城鎮安等所屬州縣道路既遠水土極惡可入之款歲或不及二千金往返川資動耗其半所出或且倍之任斯缺者無不視為畏途多方諉卸敷衍終年日求受代安望其盡心民事整理地方類靡相仍禍亂遂伏又如臨桂蒼梧等縣地居衝要供億繁多體察情形不得不予以調劑於是優瘠之缺例有更替而皆不可以久居用人者不惟為地擇人且不能不為人擇地至於道府各缺除兼管關廠稅項者經費尚充餘如左右江道柳州思恩南甯太平等府皆清苦異常供張節壽之資不得不仰給屬吏句稽鑽營由茲而起即如巡撫學政藩臬兩司衙門支入之款養廉而外亦俱項項取與均屬非義惟用度繁多自宜寬籌免滋他弊臣與寅僚商酌惟有視缺繁簡道途遠近月定公費就本有入款均勻支給養廉亦歸入計算各州縣地丁項下有坐支佐俸役食祭品廩糧等項照舊留支頃在桂林設廣西官銀錢號收發司局外款擬於梧州潯州南甯柳州等府一併設立分號凡各官公費准其在附近官號支領各缺入款亦均解交官號收儲綜計每年共應支銀五十九萬四千兩各缺原有入款約共銀六十八萬三千五百兩通盤合算尚屬有盈廣西通行花銀每百兩較庫銀少十兩有奇擬一律以花銀撥給留此餘款以備偏災之不足各官到任之始並准另給一月公費作為資斧及置備什物之需上司到任不准累及州縣州縣到任不准累及商民凡封船隻索夫馬購器具送酒席盡行革除總令缺况相均足敷所用雖邊遠之地亦可久於其任庶任事者無可藉口於吏治或有起色

又綏遠將軍貽穀奏綏遠瘠苦將軍統轄東則宣大二鎮西則烏伊兩盟體制既崇自難概從簡略然向無辦公之款將軍一缺歲僅支養廉俸銀五百兩及米折人役工食草豆等項一千一百餘兩統計不過一千五百金應領之數比之州縣備缺尚不及半何以敷用此外尚有陋規無非取諸兵餉節壽年復一年遂使旗兵日即貧弱奴才到任已盡裁之但裁汰殆盡流弊愈滋近來蒙旗開墾交涉仍繁較前尤多繁費若不預為籌及將使綏遠旗務有日敝一日者其歸化副都統情形亦復相同不敢因見居綏任避嫌不言查察哈爾都統副都統前因辦公竭蹶曾由直隸督臣奏添公費三千六百兩奉 旨允准擬懇 准予仿照辦理綏遠城將軍擬歲加公費銀三千兩歸化城副都統六百兩庶可辦事從容免致櫻心此項銀兩擬即於開辦西盟抗達兩旗之渠地租內分別撥用仍期不動庫儲

又外務部奏請駐日分館改歸駐法使署就近兼理所有派員駐墨事宜即由出使美國大臣籌辦所需經費查日館歲銷一萬六千兩嗣後即移撥此款抵充墨館常年之用日館事務較簡應派參贊暨繙譯一員足敷辦公其常年經費酌定為一萬二千兩即由使費項下撥交出使法國大臣按年支銷照章造報

又湖廣總督張之洞奏請裁撤湖北糧道查糧道應領俸銀除均攤荒缺外實支銀四十二兩有奇應領養廉銀除扣成減平外實支銀三千七百六十兩應請即以糧道原支作為施鶴道俸廉並將糧道衙門應支吏役工食一併移施鶴道衙門於帑項絲毫無所出入惟施南深僻瘠苦創設該道之意自應隨時巡察各屬周歷山鄉方能杜絕賊匪消弭教畔屬縣皆係貧瘠其所到之處夫馬供給概令自備斷不准擾及屬官鄉民是該道辦公所需斷難甚少僅此廉俸之數實有不敷臣當於清查陋規項下酌給該道辦公經費以資整飭而免擾累其鶴峯州一缺雖改為直隸廳所有俸廉役食衙署一切可悉仍其舊又外務部奏定各使館歲支公費銀數清單

英館三萬八千兩 法館三萬兩 德館二萬六千兩 俄館三萬兩 美館二萬八千兩 奧館二萬兩 義館一萬八千兩 比館一萬六千兩

和館一萬六千兩 日本館二萬五千兩 日分館五千兩 葡分館五千兩 秘分館五千兩 古分館五千兩 墨分館五千兩 新加坡總領事館五千兩 金山總領事館五千兩 小呂宋總領事館五千兩 橫濱總領事館二千四百兩 韓總領事館四千兩 海參崴商辦八千兩 紐約領事館五千兩 檀香山領事館五千兩 神戶領事館二千兩 長崎領事館二千兩 仁川領事館一千六百兩 元山領事館一千六百兩 釜山領事館一千六百兩 俄南浦領事館一千六百兩 又各使館歲支俸薪公費總數並分季撥款清單

英館歲支銀七萬九千零四十兩 每季撥銀一萬九千七百六十兩 法館歲支銀十萬零三千六百兩 每季撥銀二萬五千九百兩 德館歲支銀六萬七千零四十兩 每季撥銀一萬六千七百六十兩 俄館歲支銀七萬一千零四十兩 每季撥銀一萬七千七百六十兩 美館歲支銀五萬零四百八十兩 每季撥銀一萬二千六百二十兩 義館歲支銀四萬六千四百八十兩 每季撥銀一萬一千六百二十兩 和館歲支銀四萬六千四百八十兩 每季撥銀一萬一千六百二十兩 日本館歲支銀九萬一千一百八十四兩 每季撥銀二萬二千七百九十六兩 新加坡總領事館歲支銀一萬九千八百八十兩 每季撥銀四千九百七十兩 韓總領事館歲支銀四萬八千零八十兩 每季撥銀一萬二千零二十兩 海參崴商辦歲支銀二萬一千一百零四兩 每季撥銀五千二百七十六兩

二十一年吏部奏整頓部務擬籌經費略稱 部事繁費重所有司員筆帖式酌等津貼仰承 允准欽感莫名查 部除例解各項飯銀例支養廉外並無各省奏銷之款可以化私為官再四思維謹將承辦各事約舉數端量定數目其餘項府之件概從刪免以省煩苛就此計算果能如數解到尙可敷用至滿檔房四司司務廳等處應需紙筆飯食薪炭差役工食等項經費尙於各省例

解飯銀及養廉項下支用尙有不敷嗣後責成司員躬自任事支發各費均須出自公款為數較鉅應於新籌項下提撥司員等津貼應由 等考察動情分別等第秉公發給取之既不敢從苛用之亦何容稍濫以上開銷各款年終開單奏 閱以昭覈實自定章後如查有營私婪索等弊即應照例嚴參如蒙 俞允除知照政務處外並咨各省督撫照辦

又刑部奏軍機鈔交御史錢能訓奏請飭部亟籌辦公經費摺略稱 部公事殷繁向來清苦近年迭奉 諭旨著各部安定辦公經費無如辦理為難平日經費皆取給於各省額解飯銀此外尙有戶部奏銷及三節幫費為數無多前年因兩監恤囚經費尙由勸募實非政體奏請各省酌加飯銀及新增之款共銀四萬二千五百餘兩戶部奏銷及三節幫費八千兩每年共五萬零五百餘兩至於每月辦公之費極力樽節約需銀三千數百兩滿漢司員及筆帖式共五百餘員之多加以各司處所書手一百八十四名皂隸等一百七十四名每日進署當差無閒寒暑而堂司飯銀書役工食皆取給於此如逢閏月或承辦要差則又須增加用款數千兩騰挪借貸時形竭蹶而於司員津貼一層更無暇議及逮前年奏請酌加飯銀是時戶部尙書臣榮慶正官刑部與 等公商酌予津貼原擬最優等每節津貼銀四十兩以次遞減及屆節期通計款項不敷只得批令照八折發給茲據該御史奏請飭部亟籌辦公經費奉 旨著察核辦理查新章管杖改罰此項罰金似可藉資挹注以濟要需 等公商擬請將外州縣自理刑名案內管杖改罰金一項提解到部以資辦公酌定每一州縣年解銀一百兩按半年解五十兩分兩次彙解年清年款不得蒂欠至各州縣管杖折罰銀兩每年不止此數除解部外其餘款應令各該省年終彙報戶部並分咨 部以便互相稽核似此明定章程庶外省款歸核實而 部辦公不至無資實於刑政大有裨益如蒙 俞允即行文各該督撫將軍都統府尹一體遵辦至 部此次酌籌經費固以優給司員津貼為大宗其次增加書役飯銀查 部各司處所吏役疊經裁汰尙存三百五十餘名以閩署之大其任鈔習供奔走者祇有此數未便再議酌裁其次增加恤囚經費近年兩監

恤囚經費較從前擴充一倍圍扉之內固已實惠均霑惟查奏准新章凡各省各衙門監獄飭令一律修改並優給口糧及冬夏調理各費以示體恤等語臣部為各省問刑衙門表率尤應採仿東西各國監獄成法將南北兩監作速改良為天下先凡此款項之所需實非涓滴所能濟是在各該督撫力顧大局將此項罰金按年撥數解部則臣部辦公無虞支絀矣

又寶熙奏設立學部用款不貲各員俸廉雖不必如外商兩部之過優亦未便照舊日定制之太薄當此部款支絀之時不能不兼資外省財力略為補助伏思各省科歲兩試三年中所耗考棚費用多則四五萬少亦二三萬今擬請按省分大小將三年所籌之棚費每年提數成作為學部常年經費外省籌款備極艱難亦宜酌留一半以備擴充各屬中小學之用所提無幾第以十九行省計之亦覺積少成多若再兼以禮部國子監兩署經費與部中添籌之款當足資展布矣

又外務部奏查和蘭向設分館歸出使德國大臣兼充經臣部議設專館駐紮海牙都城就近考訂保和會事宜所有該館常年經費自當酌定數目以便開支查與義比三國初設專館前經奏定准歲支經費銀四萬兩該館事同一律擬照與義比三國使成案年支銀四萬兩作為駐和使館常年經費定額

又直隸總督袁世凱奏准順天府尹養廉照直隸布政使例支給銀九千兩三十二年 諭軍機處為用人行政樞紐關係綦重尤宜優加體恤以清治源該處行走之王大臣及滿漢章京等均著賞給養廉用資津貼經此次優賞之後該王大臣等必能整躬率屬砥礪廉隅內外一切餽贈自應永遠禁絕各避嫌疑倘仍有揣摩嘗試情事著該王大臣嚴參懲辦如或徇隱一經發覺與受同罪

又廣西巡撫李經羲奏略稱桂林同知原支養廉役食為數無多今改為中渡撫民同知事務較繁應請援案酌增養廉役食並支給祀典銀兩其添設之照磨兼司獄一員應支廉俸亦請援案支給巡檢廉俸一仍其舊尋戶部議奏查該撫咨送清冊所列同知薪俸及巡檢廉俸役食各銀兩均係本缺原支之數

自應照准同知擬給每年養廉一千兩照章停支一成實支銀九百兩照磨兼司獄每年養廉銀八十兩俸薪銀三十一兩五錢二分同知照磨兼司獄七十六名每名每年工食銀六兩四錢五分及春秋祭品各銀數核與奏准安化同知成案相符應一併准其支給各員養廉由司庫給領俸工祭品在於該同知徵收錢糧項下動支所有臨桂雜容二縣原支桂林同知及平樂鎮巡檢俸工銀兩應即照數刪除編入司庫存留項下徵解造報

又外務部奏略稱臣部各員所得廉俸不可謂薄惟新調人員不能遽得實缺區區津貼安足羈縻且各省出色人員大都身兼要差所入較豐至留學外國畢業諸生各省設立學堂相需甚殷多出重金延聘若使相形見絀安能招之使來欲廣搜羅宜優俸稍新調人員到署均擬優給薪水分別等第一以資格先後為衡

又 諭翰林院為文學之班都察院有獻替之責該堂官及所屬各官均應量予津貼用示體恤嗣後翰林院着每年賞銀三萬兩都察院每年四萬兩由度支部發給著各該堂官自行酌定數目其編檢以上及科道各員一併分別酌給如有聲名平常不知自愛者即著該堂官隨時甄別據實參奏以昭懲勸又大理院奏略稱開辦之初籌款為先舊日大理寺常年經費祇六百金為數至微無裨實用際此釐定官制期於規復國權事體重大端緒紛繁斷非敷衍因循所能成事自應另籌的款有當與法部會商者有當由臣部自辦者容自酌安再陳所有臣院開辦經費員司津貼書記雜役工食及置備器具並茶水煤炭心紅紙張等項摺節計算約需銀二萬兩仰懇 飭下度支部照撥俟三四月後辦有規模再行酌量請給常款以持永久

又江蘇巡撫陳夔龍奏前以蘇省州縣辦公困難入不敷出飭據各屬開呈清摺逐一檢查中有捐送知府三款或名公費或名清敬或名座船工食名目不一多寡不同沿為常例今若悉予開除則知府俸廉無多微獨辦公不敷即日用亦將不給然此等款項介在公私之間究非名正言順當此事求崇實應變通辦理擬通飭府州廳縣各將近年所收送之款據實開報就其原數酌中

核定知府公費從前名目一概蠲免以後各縣於季首以銀元解司各府於季中赴司清領領解概用印文並無絲毫花費知府遇有交替按日攤算廳縣遇有交替專款辦理不入交代以免轉轉倘於定章之外私相授受即以贓論與受同科

又外務部奏略稱查各館發給俸薪參差不齊理宜整齊畫一嗣後出使大臣至書記官等俸薪等酌參改定為表額分別給發參領以下各員如任職三年著有勞績而未及升轉者准照表額加給

又奏定出使人員俸薪章程
頭等出使大臣一千四百兩 二等一千兩 三等八百兩 頭等參贊五百兩 總領事五百兩 海參崴商務交涉委員當時即按照總領事章程辦理見正議改為總領事名目品秩應與總領事同 二等參贊四百兩 頭等通譯官四百兩 領事四百兩 三等參贊三百兩 二等通譯官三百兩 副領事三百兩 一等書記官三百兩 三等通譯官二百四十兩 二等書記官二百四十兩 三等書記官二百兩

又奏定各使館員數品秩等級月薪簡明單
英法俄德美國使館 二等駐使二千二百兩 一等參贊官一千四百兩 三等參贊官一千三百兩 二等通譯官一千三百兩 三等通譯官一千二百兩 商務委員一百五十兩 一等書記官一千三百兩 二等書記官一千二百兩 書記生二百兩 各一
以上五館歲支俸薪各四萬一千零四十兩
日本國使館 二等駐使六百六十兩 二等參贊官一百四十兩 三等參贊官一百四十兩 二等通譯官一百四十兩 三等通譯官一百四十兩 商務委員一百四十兩 一等書記官一百四十兩 二等書記官一百四十兩 書記生一百四十兩 各一
以上一館歲支俸薪三萬二千八百三十二兩
奧義比和國使館 二等駐使一千二百兩 二等參贊官一百四十兩 二等通譯官一百四十兩 一等書記官一百四十兩 二等書記官一百四十兩 書記生一百四十兩 各一
以上四館歲支俸薪各三萬零四百八十兩

日葡祕古墨國分館 代辦使事二等參贊四百兩 二等通譯官一千三百兩 二等書記官一千四百兩 以上五分館歲支俸薪各一萬一千二百八十兩 新加坡金山小呂宋總領事館 總領事五百兩 二等通譯官一千三百兩 二等書記官一千四百兩 三等書記官一千二百兩

韓總領事館海參崴商辦 總領事五百兩 二等通譯官一千四百兩 二等書記官一千九百兩 三等書記官一千七百兩 以上一館歲支俸薪各一萬三千一百零四兩 橫濱總領事館 總領事四百兩 二等通譯官一千四百兩 二等書記官一千九百兩 三等書記官一千六百兩 以上一館歲支俸薪一萬一千九百零四兩

紐約檀香山領事館 領事五百兩 二等通譯官一千三百兩 二等書記官一千四百兩 以上兩館歲支俸薪各一萬一千二百八十兩 神戶長崎領事館 領事五百兩 二等通譯官一千四百兩 二等書記官一千九百兩 以上兩館歲支俸薪各九千零二十四兩 仁川元山釜山南浦領事館 領事五百兩 二等書記官一千九百兩 以上四館歲支俸薪各六千一百四十四兩

三十三年學部奏請補左右丞參各司廳等員缺略稱 部為全國教育總匯之區締構經營需才至切惟是策勵之法勸養之方必使在事各員領廉有常而後能專心任事查 部經費支絀自開部以來均照新設各部養廉數目減成酌給津貼嗣後按照差事繁簡分別支給見擬暫仍其舊一俟經費稍裕再行的增務使款不虛糜而各員有所激勵
學部官員養廉章程并減成支給緣由
一查外務農工商民政等部奏定養廉章程尙書一萬兩侍郎八千兩以次各官分別給予 部自應援案辦理 一尙書每年應支養廉銀一萬兩見月支四百兩左右侍郎每年各支八千兩見月三百兩左右丞各支五千兩見月二百兩左右參議國子丞各支四千兩見月一百六十兩郎中參事官

視學官每員年支三千六百兩除郎中視學官員缺尙未奏補有人未經開支外參事官月支八十兩員外郎年支三千二百兩見月支六十兩主事年支二千四百兩見月支五十兩司務及一等書記官年支九百六十兩見月支三十兩二等書記官年支七百二十兩見月支二十兩三等書記官年支四百八十兩見未補人未經開支以上各司人員其差使繁要者酌增一

堂司各官應得俸銀俸米均各按品由度支部照例支領 一國子丞所屬各官有襲替典守之責均於俸祿外分別繁簡酌給津貼 一調部差遣各員或作額外候補或以原官派各司廳局行走或派往各省查學均酌給津貼以資辦公 一督學圖書調查等局長由原官兼充不爲實缺然經理各項事宜責任綦重局中聘用各員多係一時才俊均分別等差酌給津貼 一書記生爲繕寫文牘之用均按差事繁簡酌給津貼 又外務部奏議覆出使法國大臣劉式訓奏請變通出使事宜聲明經費一項略稱使臣奉 命出洋與國體最有關係其駐紮之國一切用款必當略爲寬裕俾免支絀而存體面查各使暨參贊等員常年經費從前本無定額自光緒二十八年開先後奏准歲支數目始有限制惟當時所定之數如俄德法等館各六萬兩奧義比等館各四萬兩多歸一律而其開用度有繁簡開支有多寡未經分晰即房租爲用款之大宗其有無自置使館尤宜分別辦理所以經費一項除俸薪業經奏定外其餘如房租歲修公議文報川資洋僕醫藥雜用各項應准歲支額數自宜詳加酌核另定章程期於慎重之中仍不使虞竭蹶等公同商酌就歷年報冊參稽支數酌量加增作爲定額并舊定章程有應變通之處繕單呈 覽

奏定出使各國大臣等應支經費更訂章程 一經費名目統俸薪及房租歲修公議文報川資洋僕醫藥雜用八項而言俸薪既奏定有常其餘各項支款應名爲公費以賅七項而示區別 一舊章二等出使大臣如係二品官員准月支俸薪銀一千二百兩此次各出使大臣已奏定爲二品實官所有月支俸薪應照原定二品官員銀數給發

一商務委員前奏已定秩五品其俸薪尙未核定所有此項委員每月應給銀二百四十兩 一前奏聲敘有醫官一項其月支俸薪應由出使大臣在於醫藥項下公費內自行給發願帶醫官與否可聽其便 一前奏聲敘有供事一項藉供書寫之用惟查各使館應帶有學生即作爲書記生學習公事并供書寫三年期滿察其學業差使酌升書記官無須保案如英法等六館額設二人奧義等四館額設一人每人月給俸薪一百兩所有供事名目聲明裁撤 一南非洲總領事經費向由華工費內開支檳榔嶼副領事向由商董兼充不設通譯書記該副領事支俸薪每月一百兩不支公費應仍照舊章辦理 一俸薪支額見既分別定爲員缺各館應支數目英法德俄美五館各四萬一千零四十兩奧義比和四館各三萬零四百八十兩日本館照章八折三萬二千八百三十二兩祕古等五分館各一萬一千二百八十兩新嘉坡等三總領事館各一萬四千八百八十兩日本橫濱總領事館照章八折一萬一千九百零四兩韓國總領事館海參崴商辦其總領事商務委員各六千兩通譯官以下照章八折各七千一百零四兩美國紐約檀香山兩領事館各一萬一千二百八十兩日本神戶長崎兩領事館八折發給各九千零二十四兩韓國仁川等四領事館八折發給各六千一百四十四兩檳榔嶼副領事館一千二百兩 一各國惟美德及日本置有館舍其餘均須租居所有公費一項見酌定歲支英館三萬八千兩法館三萬兩美館二萬八千兩德館二萬六千兩俄館三萬兩奧館二萬兩義館一萬八千兩比和兩館各一萬六千兩日本館二萬二千兩祕古等五分館各五千兩新嘉坡等三總領事館各五千兩日本橫濱總領事館二千四百兩韓總領事館四千兩海參崴商辦八千兩美國之紐約檀香山兩領事館各五千兩日本國之神戶長崎兩領事館各二千兩韓國之仁川等四領事館各一千六百兩 一俸薪公費仍照舊章以接任之日起支以卸任之日停支如前後任交替應按日核計移交具結存案仍各報部備查 一俸薪公費銀兩由部分四季撥給逢正四七十月爲撥款之期所定銀數作十二箇月計算

遇閏月仍照應支之款另撥一次 一各參贊通譯書記領事等員俸薪照此次定章實數給發撥由出使大臣及總領事轉給即取該員等具領切結由出使大臣及總領事分四季將領結送部查核其各領事署應給公費亦照此辦理 一出使大臣及參贊以下各員有請在華留支銀兩以贍家者應於每撥俸薪內預行扣除以便照給 一各館每年支用經費向須造冊報部核銷見既設定員缺多爲責任已與從前屬爲差使不同即應支俸薪公費亦定有常數所有開支一切可免其造冊以歸簡易 一另支款項如赴所兼之國親遞國書應用川資及電報費與學生學費之類仍照舊章辦理於年終造冊報銷以昭核實此外或遇有特別用款非先行咨部核准不得作爲另款開支 一電報准支另款原爲緊要事件不致僅爲節省經費起見凡電京城各衙門及各將軍督撫并與各國駐使使者方准作爲另款惟須將電局原單隨冊送部以備查核此外無論電發何處照章自行在公費內開支概不准列入另款報冊 一參贊通譯書記等員生不得再有保案屆三年而仍留任者如實係得力之員應各照原支俸薪銀數由部核准加給二成以示獎勵此後六年九年亦照此遞加以至六成爲止惟各領事不在此列 一各總領事及領商務委員既照章給發公費則所有照費統應一律歸公即先由各總領事商務委員將三年內所收照費數目分晰報部并詳擬章程由部核定頒發三聯單以便填發所有經收照費分四季報部聽候動撥 一各使館及總領事與領事館應支俸薪公費由部分四季將所撥銀數分晰開單奏銷 一整裝歸裝銀兩各照俸薪三個月分別成數開支應仍照舊章辦理造冊報部核銷惟整裝一項如由此國調彼國由參贊升使臣未便仍照初出洋時重支三個月全數經此次定章凡遇此項升調所有整裝銀兩准照一箇半月開支 一出使大臣及參贊以下各員出洋與回國應用川資銀兩原未限定支數惟各宜樽節以重公項其造冊報銷時所有往來船票火車票旅店用費各總單一併隨冊送部查核

又法部奏略稱京師根本重地將各級審判次第設立以期司法行政切實措施考東西各國司法費比較表惟英國國家負擔最微歲支總額百分之一其餘諸國俱由國家負擔大率達於總額百分之五中國審判分立縱不必步武歐洲即不得過於簡略等語悉心參酌約計自高等以及初級共設八廳員缺百有餘人京師地面遼廓四方輻輳酌設司法官檢察官約數十人統計大小員缺二百二十一人其餘警兵庭丁承發檢驗吏等又約二百餘人常年薪金飯食暨一切雜支各項預算歲費總達二十一萬兩以外今日物力艱難擬再加樽節照額支暫按五成發給其警兵吏役人等職微薄非從優厚給不足以專典守而杜弊端統計官役五成吏役十成算計每年額支經費最少須十二萬兩遇閏加一萬兩其餘八廳修造衙署調查書籍購置器用共約銀八萬兩核計今年初辦之費須款二十萬兩以後每年須的款十二萬兩方能永久成立顯懇飭下度支部無論如何爲難必如臣所請照數給足以便設立又度支部奏略稱查政治館清單內開擬加經費內開五萬兩翰林院三萬兩禮部法部各六萬兩理藩部九萬兩都察院三萬兩大理院八萬兩每年共加經費銀四十萬兩法部原奏稱初辦須款二十萬兩以後年須十二萬兩等伏查上年奉 旨賞翰林院每年銀三萬兩都察院四萬兩宗人府奏 允常年撥給津貼銀六萬兩均經先後由部照撥在案又本年法部奏 允特支經費三萬兩亦由部庫發給此次內閣等七衙門辦公經費並法部籌設各級審判經費關係緊要自應分別籌給以資應用惟部庫出入有經年來籌給各項經費實情支絀而各省關同一艱窘亦未便強爲分派查光緒三十一年 臣部會同外務部籌議考察政治經費據各認籌統計約八十餘萬兩均係常年應解之款 臣等公商所有法部請撥審判經費內八廳修造衙署調查書籍購置器用銀八萬兩擬暫由部給發其餘常年經費銀十二萬兩及內閣等七衙門辦公經費銀四十萬兩請由前項款內動支餘仍作爲考察政治專款雖名實稍有不符然轉移緩急似不妨隨時挹注以資兼顧惟前項考察政治經費自去年以來各省多未能如數解到見在添此專需勢難再有短欠應請 飭下

各督撫按照原數籌解以濟要用

又會議政務處奏議准加給鑾儀衛每年經費銀四萬兩以一萬兩補助署中公用以三萬兩津貼各員以資鼓勵

又修訂法律大臣奏豫算館中各項費用略稱大臣辦公經費並聘用外國法律專家三四員提調二員總纂總辦共五員纂修十員協修十員分理文牘會計雜務各員薪水每年約共需銀四萬七千六百兩

又大理院奏 臣院實缺錄事三十六員請按照品級給與俸銀俸米

又新疆巡撫聯魁奏請新疆提學使養廉按照甘肅提學使歲支銀四萬兩又支公費銀四千兩其書記公役等項歲支一千五百二十兩麥麵一萬八百斤又署直隸總督楊士驤奏學司照給養廉酌加公費略稱直隸提學使盧靖上年到任自應照支廉銀查順天學政額支養廉銀四千兩部章減成扣平實支銀一千八百四十二兩四錢虛靖係署無人之缺應請照給全廉惟學使改設伊始事繁倍昔津保百物翔貴舊有規費供給一概裁除實支廉項無多委難敷用近來廣東山東等省所定學使經費均在萬數千金即新疆奏定廉費亦及萬金直隸為首善之區亦應仿辦酌中定數擬請每年加給公費八千兩在耗羨銀內按十成扣平給發俾資辦公

又度支部奏 臣部此次以事分司另定職掌各員常川趨公益矢勤奮近年在京各衙門當差人員皆定有津貼 臣部總司財賦政務殷繁核算句稽簿書執掌動勞較甚於他部茲當改革伊始若不籌給公費不足以勵廉能惟 臣部人員較多實缺候補滿漢共合八百餘員若照外務部農工商部等衙門一律普及辦法則需款太鉅籌措維艱 臣等公商擬就派有烏布人員分別等第酌量加給常年需款已屬不貲計 臣部原有地丁等項飯銀僅數各司處飯食紙張等項之用捐納飯銀收數已成弩末未可恃為的款查每年各省關報解京餉隨解加平及原有飯銀約銀十萬兩有奇又津海關稅單征費年解自一萬至六七千兩不等皆係 臣部應用之款向均歸入大庫正項內列存見既擬籌給聞署公費請將前項銀兩提用如用不敷懇 恩在 臣部銀行股本官息餘利

項下動支
又東三省總督徐世昌等奏酌擬奉省各官養廉並酌定公費略稱從前東省官吏差缺所入甚微遂至貪賂公行凌成風氣見值改革伊始萬不容再蹈前轍自應明定養廉以挽頹習謹就各省督撫司道以下各官所定養廉分別比照定擬又查奉省迭遣兵燹百物昂貴數倍內地 臣等到任後一切陋規概行禁絕凡所取求皆歸自備若僅恃廉俸一項斷不敷用查各省凡官缺清苦者每於養廉外加給公費即奉省地方官前將軍趙爾巽亦曾奏請酌加公費此項養廉公費銀兩即由度支司在正款內分別籌給作正開銷公費遇閱照加由署缺派差日起支以示體恤至僉事科員等官見尚未定額數暫擬不定養廉先支公費其外府州縣以下各缺有支俸廉者有支公費者辦理未能一律應俟通盤籌定再行奏明

養廉 東三省總督三萬兩 奉天巡撫一萬二千兩 奉天左右參贊各九千兩 奉天提法交涉度支三司司使各六千兩 奉天民政司司使五千兩 奉天提學旗務兩司司使各四千兩 奉天巡警勸業兩道各三千兩
公費 東三省總督每月五千兩 奉天巡撫三千兩奉天左右參贊各一千五百兩 奉天提法交涉旗務民政提學度支各司司使各一千兩 奉天巡警勸業兩道各八百兩 奉天諮議廳顧問員二百兩 議員一百五十兩 副議員一百兩 額外議員五十兩 奉天各廳司道僉事二百兩 一等科員一百五十兩 二等科員一百兩 三等科員八十兩 司書四十兩 副司書二十兩

三十四年民政部奏略稱巡警部創設之時曾將內外城總分廳警官奏請派署一次嗣改為民政部又援案續派試署警官查八九品警官分隸各廳區執行警務與五六七品者職守本同當部務未定之先歷經奏署有人並咨由度支部查照八旗奉 旨署理職任官員無本任俸者照署缺給俸之例將 臣部五品以下奏署各員一律支俸見在 臣部委用八九品警官遵章將各官銜名

咨送吏部作為補用查法部大理院八九品錄事及部八九品錄事均奏明給與季俸自應援照懇 恩准將 部廳區八九品警官按品給予俸銀俸米統歸春秋兩季造冊領放

又河南巡撫林紹年奏豫省滿漢世職俸銀擬照閩省奏定辦法各項世職無論旗員漢員在籍在標概予支俸三成其年未及歲者照半俸支領見計在旗營世職十一員綠營世職三百三十九員兼襲六員全行按三成支領共實需銀八千六百一十一兩五錢由司庫設法騰挪尋度支部覆奏准以三百五十六名為定額照世俸三成銀數給發暫作津貼

又 諭步軍統領兩翼總兵應得養廉均著加恩按十成發給御前行走御前侍衛乾清門行走前已賞過津貼銀二千兩著改為每月賞給津貼銀一百兩由度支部給發

又貴州巡撫龐鴻書奏請裁撤貴西道缺騰出每年養廉銀二千兩津貼銀六千兩書吏紙張工食等項充作巡警道署經費裁撤糧儲道缺騰出每年養廉銀二千兩津貼銀六千兩並書吏等項改作勸業道署經費

又憲政編查館奏核准核定農工商部郵傳部會奏勸業道辦公經費由本省督撫籌撥並由農工商部郵傳部分別缺分繁簡每年酌給調查費二千兩分兩季詳請撥給

又民政部奏擬設八品錄事二十缺九品錄事三十二缺請援照法部大理院成案給與俸銀俸米

又兩廣總督張人駿奏略稱廣東水師陸路提督奉准仍設兩缺舊制每員年支養廉銀二千兩俸薪經費銀六百零五兩六錢九分四釐草價有閩支銀二十七兩三錢無閩支銀二十五兩二錢料米支九十石折銀六十三兩如遇閩春冬之年支九十九石折銀六十九兩三錢閩夏秋之年支九十九石折銀六十七兩二錢應各照舊支發

又 諭有人奏請勻定州縣公費以期久任而飭吏治一摺所陳切中官場積弊著各直省督撫體察情形奏明辦理

又四川總督趙爾巽奏遵籌勻定州縣公費略稱川省州縣之不均甲於他省是以歷任督臣或為各缺酌盈劑虛或飭調查各屬出入款項無非為均缺起見舉行之始有更難於他省者他省州縣有應得之款如漕餘平餘火耗稅契各項陋規祇須為之哀多益寡儘可量入為出川省州縣不收漕米有平餘之處甚少夫馬一項此有彼無統計不過十餘萬金無所謂哀多益寡更無所謂量入為出其難一他省州縣歲入皆有實數可稽公費尚易於籌畫川省州縣進款則無數可稽往往問一官之所歷前後週轉合數任以相衡參差難決有任著名大缺而虧累巨萬有署邊陲小缺而盈餘多金不但提取難施抑且優瘠莫定其難二所以致此二難皆由州縣向來所恃不在平餘陋規而在不經不正之職稅職稅者何州縣臨去任減價稅契之謂也他省稅契亦開有暗地私減然為數有限秘密而不敢宣獨川省視為固然張示曉諭一減再減上下相誘幾同列肆積習相沿由來久矣自有此職稅而州縣久任之說無聞署事之員一到秋成日盼瓜代實缺之官經年不調羅掘俱窮雖平時有倒職恩職太平職種種名目而所減無多民不肯稅必待交替俄頃繁擾喧雜之時乃紛沓而至故其為稅無籍可稽即詢問本員所入實數亦不能確知蓋州縣之所恃者全在平時聯絡紳團寬待書役則交卸之日各圖分潤並謀所以為報多方搜羅有大缺可唾手而得金錢數萬官以紳團書役為稅契之切要機關甚至遇有買賣田土之案無論是非一律斷買錢債控告必令變產相償總之為得稅契而已然此亦非州縣所得已蓋舍此則各項攤捐無所出長官衙門及幕書應酬無所供也夫天下庸有知足不辱之官斷無毀家做官之吏始而不肖者漁利以開端久之即自好者亦隨俗以免累此又當因事原心而不能苛論者如才受事之始即飭各屬停止職稅調查進出款項正欲照前在奉天辦法酌定州縣公費及欵奉 諭旨先為宣示各屬已曉然於公費有著內顧無憂明白官僚無不欣喜但川省一百四十餘州縣缺分繁簡各殊公費多寡不一初意欲稍從優而審勢亦難過厚悉心籌議博采曾任地方牧令之言參以各屬查報之數酌中擬定分最繁要緊要繁缺中缺簡缺為五等共需銀九十

二萬六千兩即於本年十月初一經征分局接辦稅契之日起由藩庫按季支給至州縣從前進款全憑稅契此項公費即由稅契項下支給此外尚有平餘夫馬等費為數無幾約計全省至多不過二十萬兩應即全數提解作為添撥公費之用其有各目不正如房書項各費但係州縣所私得者一概裁革各屬向有攤捐或係部攤經費或關地方善舉全省統計亦在二十萬兩以上從前概由州縣攤解見定公費前項攤捐亦自本年冬季由稅契及提存平餘等費內撥補不令再攤核計此次定公費撥補攤捐共需銀一百二十萬兩之譜而入款惟平餘等項約有二十萬金其餘全恃稅契一項而稅契每年尚有報部四十餘萬金之見撥公費攤捐各數必須稅契收至一百五十餘萬方能相抵改章之始不敢謂確有把握然事關根本要政重荷 特旨籌辦無論如何為難倘有不敷自當設法籌補

議定州縣勻缺公費

最繁要六缺每缺每年公費銀一萬二千兩另加緝捕津貼等費銀八千兩
成都縣華陽縣瀘州巴縣萬縣富順縣 繁要十四缺每缺每年公費銀一萬兩 卅州西陽州資州敘永廳打箭廳簡州合州涪州崇慶州綿竹縣
江津縣遂寧縣宜賓縣仁壽縣 繁缺邊缺四十三缺每缺每年公費銀七千兩 蘇州忠州眉州江北廳會理州廣安州漢州巴州越嶲廳金堂縣灌縣彭縣德陽縣雅安縣西昌縣冕寧縣鹽源縣溫江縣樂山縣犍為縣永川縣銅梁縣開縣達縣渠縣大竹縣梁山縣秀山縣南部縣南充縣三台縣中江縣蓬溪縣隆昌縣資陽縣內江縣新津縣新都縣安縣榮縣東鄉縣奉節縣安岳縣 中缺四十五缺每缺每年公費銀五千兩 峽邊廳馬邊廳雷波廳松潘廳郭縣太平縣大邑縣南川縣雲陽縣都縣廣元縣雙流縣什邡縣名山縣榮經縣清溪縣成遠縣彭山縣蒲江縣長壽縣榮昌縣綦江縣大足縣璧山縣定遠縣巫山縣大寧縣新寧縣墊江縣彭水縣綦江縣縣鄰水縣岳池縣射洪縣慶符縣南溪縣高縣筠連縣興文縣珙縣屏山縣古蔺縣合江縣江安縣 簡缺三十五缺每缺每年公費銀四千兩 茂州

天全州劍州蓬州城口廳石碛廳理番廳崇寧縣梓潼縣羅江縣平武縣江油縣石泉縣彰明縣汶川縣新繁縣蘆山縣峨眉縣洪雅縣夾江縣丹稜縣青神縣長壽縣蒼溪縣昭化縣通江縣南江縣西充縣營山縣儀隴縣鹽亭縣樂至縣古宋縣納谿縣井研縣各廳州縣共計一百四十三缺統共每年公費銀九十二萬六千兩

又兩廣總督張人駿奏廣東州縣提撥盈餘酌給津貼擬請照舊辦理略稱粵省情形不惟與各省有別即較昔時亦多不同州縣所入廉俸而外實以糧米羨餘為大宗原奏所稱驛站截廢差徭折供皆為粵省所無胥吏規費雖未盡裁然非必有之款亦無定數可自同治六年前廣東撫臣蔣益澧裁減州縣米羨而各缺為之一變光緒二十五年前大學士剛毅來粵籌餉復飭提盈餘報效歸公而各缺又為之再變至瘠苦之區迭經前任疆臣籌給津貼前署督臣岑春煊又飭提廣州潮州二府關稅餘款勻給各屬苦缺統計提盈餘者二府九縣給津貼者三十七廳州縣迄今優缺則所餘無幾實已無可再提苦缺亦勉敷辦公不致如前賠累此外各缺大略相等並無盈絀之殊查州縣缺分之優瘠因乎地方之繁簡優者事繁而費多瘠者事簡而費少今若盡提羨餘等款而另給公費則事簡費少者或以增款而有餘事繁費多者或因減款而不足且地方之事會無定粵省尤盜賊滋多若令將公費按月領支設遇緩急之需一時斷難接濟勢必挪動公費虧欠正供倘或應急無方致貽巨患不獨公家受累民生亦罹其殃至於催提支放之繁難挹注籌補之非易猶其小焉者也竊以為粵省州縣已無軒輊可分各牧令安於其官既不致有所希冀在疆臣量才委任亦無所用其調停且官吏而賢則聽其就缺支銷無慮取及分外官吏而不肖則雖由公家給費要難保其不朘削於民勸廉懲貪似不在是擬請照舊辦理俾免更張

又護理安徽巡撫沈曾植奏皖省新設巡警勸業兩道擬請每員歲支養廉各銀二千兩照章八成給發各另加公費銀四千兩

又雲貴總督錫良奏新設雲南勸業道缺擬請額定廉俸五千九百兩按八成

實支銀四千七百二十兩又俸薪銀一百五兩並酌設門子二名快手十二名皂隸十二名轎傘扇夫七名鋪兵二名每名工食年共額支銀二百一十兩按八成實支一百六十八兩又每年另給公費銀二千兩

又兩廣總督張人駿奏粵省新設道缺酌議俸廉公費略稱查廣東從前原設督糧道一缺未經裁撤以前每年額支養廉銀三千四百兩折給八成又額支俸銀一百三十兩除荒攤銀四兩三錢六分六釐額扣充餉銀二十四兩一錢六分外實銀一百一兩四錢七分四釐又額設門子四名皂隸十二名轎傘扇夫七名鋪兵二名快手十二名每名每年工食銀六兩共二百二十二兩遇閏加一十八兩五錢今新設勸業巡警二道應支廉俸役食擬請比照原設之督糧道缺開支所有養廉請在司道庫九分各官養廉項內支給其官俸役食即在各屬解司地丁項內動支按年奏銷冊報惟督糧道向有廣州府屬各縣遞年額餘米羨共銀一萬二千五百餘兩以資津貼自裁缺後飭將前項解繳歸公撥給巡道公費見在勸業巡警二道除俸廉外別無辦公之款亦擬查照糧道巡道津貼數目量為增減酌定每缺每年各給公費銀一萬兩丁隨小費銀一千兩由善後局按月給發部議奏覆照准

又湖南巡撫岑春煇奏湖南新設巡警勸業兩道廉俸公費擬援照裁缺糧道銀數每年各額支養廉銀四千兩俸銀一百五兩照章數扣減平至該道等公費擬照提學使年支公費銀八千兩酌減定數每年各支六千兩遇閏不加又陝甘總督升允奏請加給甘肅提學使每年公費銀六千兩又署吉林巡撫陳昭常奏各省各官養廉公費擬照奉天成案分別扣減酌定數目略稱查奉天章程巡撫每年養廉銀一萬五千兩公費銀三萬六千兩提法司交涉司度支使每年每缺各支養廉銀六千兩公費銀一萬二千兩民政司年支養廉銀五千兩提學司四千兩公費銀各一萬二千兩勸業道年支養廉三千兩公費九千六百兩吉省目前款項雖未充裕然養廉一項與奉天改設行省新設各缺品級既屬相同支放未便歧異擬照奉省新設各缺養廉數目一律支給仍核扣六分減平以符部章其應支公費吉省動用浩繁應仿照

奉省按九成核發均從設缺到任日起支

又諭見值國勢積弱庶政待舉而財用為辦事根本多一糜費即增一漏卮亦即少一實用朝廷軫念物力躬行節儉為天下先凡屬內外臣工宜如何仰體時艱力求敦樸乃迭據言官條奏近來仕途習氣踵事增華日益奢侈迨用度不繼則又多方取盈而一切資緣奔競之風亦因之百出為長官者或見好屬僚或瞻徇情面輒聽冗員坐領厚費抑知臣工所食之薪俸何莫非吾民之脂膏倘浪費滋多則正用必至竭蹶而要政皆從而廢弛上何以對國家下何以對庶民試使撫衷自問能無慚疚於心朝廷設官詔精原使領廩足以稱事祿入足以養廉並非為調劑閒冗地步嗣後著京外各衙門長官嚴飭所屬崇尚節儉屏戒浮華以為澄敘官方之本其有真能實心任事之人自應優給俸薪以勸賢勞而資養贍此外凡有挂名津貼之款項以及濫竿充數之人員均須認真淘汰勿稍姑息

臣謹案當時仕途習氣 朝廷燭照靡遺乃誥者諄諄而聽者藐藐半由執政之姑息半由親貴之攬權夫大法斯得小廉上行必然下效酣歌恆舞嗚嗚呼虛視為當然安望整飭乾嘉盛軌逸矣難追即光緒初年京曹歲入無幾專恃本省捐官印給月得二三十金循分供職茹苦安貧偶有稱貸無大虧負自戊戌變法破格用人之議興而羣生妄念自辛丑回鑾優予津貼之例起而共習奢風雖物價昂貴今昔不同而踵事增華靡所底止入愈豐者累愈重知有私不知有公縱倍給薪俸歲增經費何補若人之揮霍空益小民之負擔語曰國奢示儉又曰儉以養廉欲正本以清源宜顧名而思義周官六計以廉為本姬公其知之矣

又御史謝遠涵奏官祿不均請一財權而除積弊略稱國家之治安繫乎官吏之稱職官吏之任事亦必賴法律之完全二者相需不容偏重 國朝沿前明六曹之制以戶部總握全國之財權經常費用載在典章內外臣工罔敢踰越即以官俸言之其品位相同者祿秩亦同意至善也然行之未久外省大吏各自為政漸侵中央政府之權戶部拱手受成但司核算而已故道府州縣之缺

肥瘠相差有至數十百倍者而自變法以來新設衙門如農工商部郵傳部舊有衙門如吏部等皆各私其財力而中央財政亦成分畫之形借破格之美名以栽培其親故假重祿之正論以自便其私圖廩入既厚縱侈隨之酬應則踵事增華服用則豪華逾度津貼不足繼以兼差至有以丞參而歲得萬金以司員而月得千金者夫就法理而論何事非國家之要政何款非民庶之脂膏就事實而言祿薄者固猶是因循醇厚者亦何嘗振作願乃因衙門之異而貧富判若天淵雖班次相同而豐嗇懸於霄壤奔競之風日熾廉恥之道益墮推其所由未始非財政紛歧階之厲也東西各國官等俸給載在法規纖悉備陳無有一國之中而各爲風氣者今度支部已定清理財政章程此項財權度必在範圍以內特恐習於瞻徇而意主調停或因其煩難而憚於更改應請 敕會議政務處嚴定權限明示考成俾得先收各部之財權以次推及各省庶明年編訂官俸可於整齊畫一漸歸於平如此則兼差挂名之人隨稽而卽得任意多寡之弊不禁而自除正本清源莫要於此

又署黑龍江巡撫周樹模奏江省各官廉費照奉天成案分別扣減酌定數目略稱江省財力艱窘殆較奉吉爲甚除各官養廉仍應照奉支給並扣六分減平以歸畫一外其公費一項自應酌減支發俾示樽節惟邊荒僻處百物昂貴數倍內地加以目前銀根奇緊見發各款俱係借放廣信公司紙幣比較實銀價值又有短絀是其祿入本微若成數扣減過多相形未免偏枯辦公益形竭蹶見擬將此項公費統援奉省原定數目照八成支給均從設缺到任日起支又奏裁撤奉天府司獄承德與仁兩縣典史所有例定廉俸實銀及月食津貼歲合銀二千三百餘兩應撥歸新設模範監獄提用

皇朝續文獻通考卷一百四十三

職官考二十九 祿秩

宣統元年度支部奏議覆邊務大臣趙爾豐奏調用人員擬定薪資獎勵章程略稱查原奏內稱關外創辦伊始條理紛繁而地方苦寒飲食起居均與內地迥異調員出關大都推諉自了察木多等處畫歸邊務管轄即將來德格事竣辦理善後尤須贊助有資無如招之皆不情願又非用兵之時可以威令從事懇 恩俯念邊疆緊要辦事需才厚給薪資優定獎勵俾該員等久於所事薪水一項歲中奏定凡奏調者每員月薪百六十兩咨調者減半尚有整裝歸裝銀兩調藏之員均係佐雜或職銜人員居多而邊地所調有道府州縣及佐雜職之不同自應按官階之等級定薪資之多寡茲擬道員每員月薪三百兩知府二百兩同通州縣一百六十兩州同州判府經縣丞八十兩巡檢從九十六兩如係革職人員照對品薪資減半其僅捐有職銜者果係才堪任用亦月給薪水四五十兩均以到差之日起支所有整裝歸裝川資等費一概免發至奉公出差往返夫價道府日給銀三兩同通州縣二兩佐雜及職銜人員一兩革職人員仍照對品減半按站發給明定章程俾共遵守等語查該大臣所請奏調人員係按照吏部議覆駐藏大臣聯豫奏案辦理自應准如所請

又奏准清理財政正監理官每月給薪水銀五百兩副監理官三百兩其川資及出省調查費由該員等核實開報

又政務處議准督辦川滇邊務大臣趙爾豐奏請 賞給土舍多格生吉世襲都司實職每年由德格徵糧項下撥給銀二三千兩贍其日用

又度支部奏核覆護雲貴總督沈秉堃奏酌定司道公費查原奏內稱滇省司道為通省官場之表率查提規費酌定公費自應先從首領各官入手查藩司入款綜計冊費針費扣款平餘邊餉平餘契尾領費暨寶雲局管庫薪水每年約共銀四萬餘兩臬司年入緝捕經費銀三千兩冊費銀一千二百兩糧道年入冊費添針解費執事費暨南關地租約共銀六千餘兩鹽道年入冊費針費平餘票費緝私經費大小差費約共銀一萬四千餘兩池東池西兩道每月各

支練費銀一百兩冊費銀二百兩池南臨安開廣兩道每月各支練費銀一百兩冊費銀一百兩均由釐金局支給又藩庫大使年入針費平餘約共銀七八千兩鹽庫大使年入針費平餘票費緝私經費辦公幫貼約共銀二千一百餘兩以上各款均請一併提撥歸公其照章應定公費擬除額支養廉外藩司月支公費銀二千兩交涉司仍照奏定原案除外交經費外年支銀六千兩提學使司原案年支銀八千兩擬再加銀四百兩每年共支銀八千四百兩臬司八千兩糧道五千二百八十兩鹽道七千二百兩勸業巡警兩道原案各年支公費銀二千兩擬加支銀二千兩每年共支銀四千兩池東池西兩道各月支三百兩池南臨安開廣兩道各月支二百兩藩庫大使年支四千兩鹽庫大使年支一千四百兩藩經歷缺分最苦僅恃印送時憲書由各府廳州縣幫貼工料名目不正應即革除按年准支公費銀二千兩均一律自宣統元年七月初一日起由善後局分別支發作正報銷其歸公各款亦同日起全數解歸藩庫照數飭繳似此澈底釐定積弊一旦廓清預算不難確定等語 臣部查各省酌定公費一項前經奏定清理財政第二十七條摺內聲明官俸章程未經奏定之先除督撫公費業由會議政務處議籌外其餘文武各署應由清理財政局調查情形一面稟承督撫及 臣部酌定提出各項規費除津貼各署公費外概歸入該省正項收款在案今該省查提規費酌定公費自應暫行照准仍俟各省報齊再由 臣部擬定數目以歸一律

又 諭見在時局艱難需才佐治國家原不惜重祿以勸士破格以用人乃近來京外各衙門於舉辦要政奏調人員及請加經費往往未能綜覈名實或以微員而膺不次之擢或以一人而兼多處之差究之所薦者未必皆奇特之士所用者實不免奔競之人近年新設衙門新建省分往往多坐此弊冒濫虛糜實為惡習嗣後各部院堂官及各省督撫奏調咨調各員均由吏部切實核實官階履歷相符再准發往其所得薪金有多至數處者亦應由該管長官切實裁汰至各衙門官員薪費并著核實釐定毋得漫無限制

臣謹案張履祥言官多則人才不足必濫取以備員祿薄則難以養廉必

詭利以欺世此大儒探本之論願必省不急之枝官乃可增稱事之餽原
今新官制廣添員缺厚給薪費冒濫虛糜已成惡習史載宋熙寧時新增
吏祿歲至緡錢百一十萬有奇而良吏實寡賦取如故 高宗御批墨吏
貪得無厭即不惜重祿其貪猶是竭萬姓之膏充百司之橐何異豕豕猛虎
噬人而先剗肉以啖之蓋早鑒及末世之士風矣

又郵傳部奏遵照察案看司員核減津貼

又學部奏定視學經費略稱視學官自京師起程之日起至回京之日止應給
月薪一百六十兩夫馬費一百四十兩其視察川陝兩廣雲貴甘新四區者每
月加給夫馬費四十兩視學官二人隨帶書記生一人月薪工費銀二十兩沿
途舟車等費由視學官發給回京時報部核銷

又陸軍部奏遵議左右兩翼收羣經費擬請分年籌撥略稱兩翼收羣常年經
費內津貼暨薪餉兩項均請減成發給逐年遞加薪餉至第四年始照原請數
目支領津貼至第五年始照原請數目支領依議行

又會議政務處奏自光緒三十三年開辦後奏請先支銀一萬兩為辦事員司
津貼等用嗣經續領銀五千兩共銀一萬五千兩作為常年經費樽節動用僅
敷開支上年因籌辦立憲事宜奏請添派辦事員司津貼等項因亦增加不敷
用擬再請撥常年經費銀五千兩自本年正月始照度支部章程按季支領
又大理院奏准出入款項清單

入款 一每年由度支部發給銀八萬兩 此項擬請仍照舊發給 一每
年由法部分撥各省罰金一半此項每年解到無定數據近兩年所收計二
三萬兩不等向由法部經收分撥嗣後如法部將此款歸入部庫即按季由
度支部支領如仍由法部收發仍向法部均分 一每年 臣院見審案內經
收罰金及贓變銀兩無定數此二項擬每年按分兩季開單解交度支部其
未經度支部核定以前照舊辦理罰金一項仍畫歸法部一半 出款 額
支 堂司津貼正卿每月四百四十兩 少卿每月三百六十兩 推丞二

員每月二百兩 推丞上行走一員每月一百五十兩 詳謝處 總核六
員每月每月一百兩 總核上行走二員每月八十兩 分核六員每
員每月六十兩 分核非由推舉充 分核上行走八員每月三十兩 分
上行走者由推舉充 其詳謝處兼各庭廳差使及各庭廳兼詳謝處差使
者均從其優者給津貼一分不兼支兩差津貼 刑民兩科六庭 每庭正
審二員每員每月八十兩 每庭幫審二員每員每月六十兩 每庭得幫審
每員五十兩 每庭幫審上行走四員每員每月二十四兩 每庭錄供
編案二員每員每月二十四兩 每庭幫錄供編案一員每員每月二十兩
典簿廳 總辦一員每月七十兩 都典簿一員每月六十兩 幫辦二
員每員每月四十兩 四股每股正管股一員每員每月三十兩 每股幫管
股四員每員每月二十四兩 看守所 所長一員每月七十兩 協理一
員每月四十兩 所官四員每員每月三十兩 醫官一員每月二十四兩
九品錄事二員每員每月十八兩 總檢察廳 廳丞每月二十四兩
檢察官六員每員每月六十兩 檢察廳行走四員每員每月二十四兩
主簿一員每月二十四兩 九品錄事四員每員每月十八兩 錄事
堂錄事八品實缺二員每員每月二十四兩 實缺八品錄事十六員每員
每月二十兩 實缺九品錄事十二員每員每月十八兩 候補十員每員
每月十二兩 額外十員每員每月十兩 以上計月需銀七千九百七十
四兩 丁役工食共計月需銀八百八十七兩銀圓一百六十五圓 飯銀
心紅紙張筆墨蠟燭等項 總檢察廳 詳謝處 典簿廳 每月各六十兩
水等項均在內不另支 總檢察廳 詳謝處 典簿廳 每月各六十兩
刑民兩科六庭 看守所 統計處 每月各四十兩 以上計月需銀
五百兩 出款 活支 恤囚經費每月約需銀二百兩 統計處奏咨各
表册及刷印費每月約需銀五十兩 雜費 每月約需銀六百兩 以上
計月需銀八百五十兩 統計出款竭力樽節核實動用每年應需銀十二
萬二千四百二十二兩銀圓一千九百八十圓除度支部撥給八萬兩外計不
敷銀四萬二千四百二十二兩銀圓一千九百八十圓見由罰金項下核計支

用其有閏之年照數增加

又東三省總督錫良等奏奉屬各府廳州縣教佐續給每年津貼在本省田房契稅項下動支不敷由稅捐撥補

又奏奉屬各旗署每年津貼數目

一 盛京副都統每年津貼銀二千四百兩光緒三十四年加支銀二千兩

一 興京副都統一千兩光緒三十四年加支銀二千兩 一 八界協領

三千兩 一 錦州協領一千八百兩 一 興京協領三百六十兩 一 法庫

邊門防禦四百八十兩一彰武台邊門防禦三百六十兩 一 中前所路記

二百四十兩 一 中後所路記二百四十兩 一 寶遠路記二百四十兩

一 閭陽驛路記二百四十兩 一 白旗堡路記六百兩 一 巨流河路記六

百兩 以上十一處均於光緒三十二年支 一 小凌河路記二百四十

兩光緒三十四年起支 一 小黑山路記二百四十兩宣統元年起支 一

三陵衙門讀祝官贊禮郎二百兩光緒三十四年起支 一 三陵衙門

戶禮工三股檔房一千六百零八兩 一 三陵衙門檔房三百六十兩均

於光緒三十三年起支 此款在本省稅捐項下動支

又奏奉省各員暨旗缺續加津貼請立案

奉屬各府廳州縣教佐續給每年津貼數目 奉天府書役銀四千二百兩

該府會奏明每年津貼銀五千兩加六千兩先後共一萬五千二百兩 新

民府六千兩 昌圖府七千二百兩 錦州府四千八百兩加支銀二千四

百兩 海龍府三千六百兩加支三千六百兩 洮南府三千六百兩加支

三千六百兩 營口廳八百兩該廳會年貼六千六百兩先後共七千四百

兩 興京廳三千兩該廳會年貼六千六百兩先後共九千六百兩 法庫

廳二千四百兩 莊河廳二千四百兩 遼源州四千八百兩該州會年貼

四千八百兩先後共九千六百兩 遼陽州六千兩該州會年貼三千六百

兩先後共九千六百兩 甯遠州八千四百兩 岫巖州二千四百兩該州

會年貼四千八百兩先後共七千二百兩 安東縣四千八百兩 懷德縣

三千兩該縣會年貼四千八百兩先後共七千八百兩 柳河縣二千兩該

縣會年貼四千八百兩先後共六千八百兩 鐵嶺縣五千四百兩該縣會

年貼六千六百兩先後共一萬二千兩 本溪縣四千八百兩 臨江縣二

千四百兩加支三百兩該縣會年貼四千八百兩先後共七千五百兩 撫

順縣一千八百兩該縣會年貼六千六百兩先後共八千四百兩 奉化縣

三千兩該縣會年貼四千八百兩先後共七千八百兩 輯安縣二千四百

兩該縣會年貼四千八百兩先後共七千二百兩 寬甸縣四千八百兩

康平縣二千四百兩該縣會年貼四千八百兩先後共七千二百兩 開通

縣二千四百兩該縣會年貼四千八百兩先後共七千二百兩 安廣縣二

千四百兩該縣會年貼四千八百兩先後共七千二百兩 靖安縣二千四

百兩該縣會年貼四千八百兩先後共七千二百兩 蓋平縣四千八百兩

大孤山巡檢一千八百兩 安廣縣巡檢八百兩 奉天府司獄三百兩

該司獄會年貼五百兩先後共八百兩領至宣統元年三月底止以後此缺

裁撤津貼停支 甯遠州學正一百六十兩該學正會年貼三百二十兩先

後共四百八十兩 錦縣典史五百兩 八面城照磨八百兩

又奏奉屬新添各設治酌定每年薪公數目

一 長白府每年薪津銀四千八百兩光緒三十四年起支查長白地面遼闊

且臨邊境與他處設治情形不同其開辦經費另案奏陳 一 輝南廳每年

薪津公費銀七千二百兩廳泉縣六千兩均於宣統元年起支 一 長興島

州判每年薪津公費銀二千四百兩

光緒三十四年起支 此款在本省稅捐項下動支

又東三省總督徐世昌奏請將奉省承宣廳及交涉民政度支三司僉事每年

各定為養廉銀二千四百兩

又署黑龍江巡撫周樹模奏江省分設民政提法提學度支四司按照執掌事

務分別設科並定科長正副科員名目科長月薪薪津銀一百五十兩正科員

月薪薪津銀八十兩副科員月薪薪津銀各五十兩其司書副司書月薪薪水

銀二十四兩十六兩十二兩不等業經次第酌定名額數目綜計每司各科每月定額共應支薪津銀一千數百餘兩至二千三百餘兩不等至各司應用各項聽差雜役柴炭燈油心紅紙張一切辦公等項亦經另行酌定計每司每月共需公費銀八百兩遇閏加增

又奏准黑龍江省設治章程略稱新設道府廳各缺養廉公費應參酌本省舊設各缺成例並比照見有司缺以次遞減擬定兵備道養廉銀二千四百兩公費銀每月六百兩知府養廉銀二千兩公費銀每月五百兩同知通判養廉銀一千六百兩公費銀每月四百五十兩知縣養廉銀一千二百兩公費銀每月四百兩佐治員薪水及雜役工食並紙筆柴炭等費應參照舊有承辦處分別酌給以資辦公兵備道佐治員薪公等費銀每月六百兩各府廳縣佐治員薪公等費銀每月五百兩除此大擇要添設改設道府廳各缺外其續派設治委員應領廉費薪公均照以上定章折半發給至就近如有墾稅各局酌量令該局委員兼辦設治事宜應仍照折半發給或再減數發給應查照該地方情形隨時酌定

又東三省總督錫良等奏略稱籌設安東地方初級各審判廳并附設檢察廳各員公費比照承德撫順見章核減四成以六成實銀發給共四廳常年額支經費需銀二萬一千五百二十入兩閏年照加

又奏裁併差缺樽節經費略稱如才到任計減裁兩廳汰冗員併局所並先自革除浮費為僚屬倡每年可省銀四十萬兩嗣據各局所陸續呈報裁減通盤核算每年實可省銀一百餘萬兩

又奏盛京內務府承辦 貢差事務款項出入數目紛繁積習沿流弊滋甚見將正雜款項一律清查和盤托出所有應需貢項差費丁糧學款等項除本色貢品及折放倉糧暫仿舊章辦理外均詳加核算明定數目實用實銷每年約得餘銀一萬餘兩唯該府員司等向係浮收冒濫恃此為生今化私歸公若不別籌津貼似不足以示體恤當將此項餘銀按照人數分別等第酌定津貼計每月約需銀一千餘兩即以此數為限

又吉林巡撫陳昭常奏定吉林旗務處員司薪公數目

總理一員月支薪水銀元銀二百兩共銀二百兩 協理一員一百五十兩 幫辦一員一百兩 科長四員各五十兩共銀二百兩總核文牘員四十五兩 統計主任員四十五兩 科員十一員各二十五兩共銀二百七十五兩 書記長以下至夫役薪工月共銀元銀四百六十三兩 心紅柴炭月支四百兩火食月支三百六十九兩八錢 以上通共月需銀元銀二千二百四十七兩八錢

又奏長春府審判各廳額支經費無閏之年計共需吉市錢二十一萬三千零四十八吊開辦之初原議以禁煙局所收票照盈餘提撥見在吉省一律禁種此項無著統計該廳經常所入祇有由省暫借發商生息官帖龍圖兩項每月息錢六千五百吊全年七萬八千吊此外別無的款查內蒙哲木盟各旗新放荒地每响歲征大租錢六百六十文照章以四百二十文解歸蒙旗以二百四十文作地方衙門辦公之費長春本係郭爾羅斯前旗蒙地因開墾較早每响僅征蒙租四百四十文並未征公費若照各旗辦法一律征收六百六十文仍以四百二十文解歸蒙旗以二百四十文撥充審判經費長春一屬計有蒙地四十一萬九千餘响歲可得錢十萬吊有奇以地方應納之費辦地方應辦之事既與蒙旗毫無虧損亦非公家額外加征擬自宣統二年起計徵收撥給各廳經費動用不敷之數再行飭府籌補

又黑龍江巡撫周樹模奏各署局營廉俸等款一律按九成發給

又奏黑龍江所設省城各級審判檢察共六廳約計所需經費高等審判廳每月額支銀一千二百二十六兩高等檢察廳五百四十兩地方審判廳一千二百五十八兩兩地方檢察廳七百九十兩初級審判廳二百七十六兩初級檢察廳一百八十四兩共計每年需銀五萬一千二百八十八兩除去裁判處及巡檢一缺每年共額支銀一萬兩外餘銀四萬餘兩尚無的款應由民政司設法籌撥

又庫倫辦事大臣延祉奏請添設理刑司員一員月給薪水銀一百兩

又直隸總督楊士驤奏齊鎮總兵宗室希廉奏略稱守護 西陵綠營計鎮標原設中軍游擊一員年支八成俸薪廉乾等銀五百兩八分左右兩營原設守備二員每員年支八成俸薪廉乾等銀二百五十五兩六錢設千總八員每員年支八成俸薪廉乾等銀一百四十三兩九錢一分原設把總十二員每員年支八成俸薪廉乾等銀一百一十二兩四錢四分原設經制外委十八員每員年支八成廉餉銀四十兩九錢七分六釐原設額外委四十五員每員年支八成餉銀二十七兩四錢四分均擬請按一半加給津貼共需銀二千七百四十二兩一錢三分四釐易州營原設游擊一員守備一員千總一員把總二員額外委二員雖非守護 陵寢然相距切近青椿界內歸其管轄見建修崇陵園佔風水又係該營地面巡護稽查均關重要擬照左右營官弁一律加給津貼以免向隅共需銀六百三十兩六錢四分六釐又擬定鎮署每年公費銀二千四百兩

又奏定守護 西陵綠營官弁加給津貼數目

泰甯鎮標原設中軍游擊一員年支八成俸薪廉乾等銀五百兩八分擬按一半每年加給津貼銀二百五十四兩四分 左右兩營原設守備二員每員年支八成俸薪廉乾等銀二百五十五兩六錢擬按一半每年加給津貼銀一百二十七兩八錢核計二員每年共需銀二百五十五兩六錢 又千總八員每員年支八成俸薪廉乾等銀一百四十三兩九錢一分擬按一半每員每年加給津貼銀七十一兩九錢五分八釐核計八員每年共需銀五百七十五兩六錢六分 又把總十二員每員年支八成俸薪廉乾等銀一百一十二兩四錢四分擬按一半每員每年加給津貼銀五十六兩二錢二分一釐核計十二員每年共需銀六百七十四兩六錢五分 又經制外委十八員每員年支八成廉餉銀四十兩九錢七分六釐擬按一半每員每年加給津貼銀二十兩四錢八分八釐核計十八員每年共需銀三百六十八兩七錢八分四釐 又額外委四十五員每員年支八成餉銀二十七兩四錢四分擬按一半每員每年加給津貼銀十三兩七錢二分核計四十五員

每年共需銀六百一十七兩四錢 以上六項共需銀二千七百四十二兩一錢三分四釐 易州營原設游擊一員年支八成俸薪廉乾等銀五百兩八分擬按一半每年加給津貼銀二百五十四兩四分 又守備一員年支八成俸薪廉乾等銀二百五十五兩六錢擬按一半每年加給津貼銀一百一十二兩四錢 又千總一員年支八成俸薪廉乾等銀一百四十三兩九錢擬按一半每年加給津貼銀七十一兩九錢五分 又把總二員每員年支八成俸薪廉乾等銀一百一十二兩四錢四分擬按一半每員每年加給津貼銀五十六兩二錢二分核計二員每年共需銀一百一十二兩四錢四分 又經制外委二員每員年支八成廉餉銀四十兩九錢七分六釐擬按一半每員每年加給津貼銀二十兩四錢八分八釐核計二員每年共需銀四十九兩九錢七分六釐 又額外委二員每員年支八成餉銀二十七兩四錢四分擬按一半每年加給津貼銀十三兩七錢二分核計二員每年共需銀二十七兩四錢四分 以上六項共需銀六百三十六兩六錢四分六釐泰甯鎮署擬定每年公費銀二千四百兩

又安徽巡撫朱家寶奏皖省省城及蕪湖五廳經費預算每月需銀約三千七百兩兩歲需銀約五萬四千餘兩所擬應丞以下各員薪水款目按照部章酌量核減 又江西巡撫馮汝駉奏查江西鹽法兼巡瑞袁臨道移駐萍鄉該道向由淮鹽兩岸督銷局月支津貼銀三百七十六兩江西藩庫年支津貼銀一千二百兩前准督臣咨俟移駐萍鄉後即將鹽局津貼停止竊維鹽道移駐萍鄉改兼兵備道責重事繁鹽局津貼既停亦應籌定經費以資辦公飭司妥籌除按察司經歷向由糧庫年支津貼銀六百兩勿庸裁撤外計裁撤糧道公費及庫大使管庫書役等每年支領各款共銀三萬四千餘兩查照湖北成案每年撥給巡警勸業兩道公費銀各一萬兩鹽法道兼分巡兵備道仿照吉南贛甯道撥給公費銀一萬兩巡費銀二千兩撥給藩署辦清經費銀一千八百餘兩藩庫大使兼管糧庫酌增津貼銀二百兩藩庫年給鹽道津貼銀兩俟起支公費後即

行停止又查湖北巡警道有出巡經費係在警察經費內開支擬暫仿照辦理俟勸業道由農工商部支領津貼調查二千兩之日起亦按年在警察費內動支銀二千兩以昭畫一至該兩道應支廉俸暨新設各役工食自應一併酌擬數目在於地丁正耗銀內支給查各道均係正四品照例每年應支俸一百五十兩養俸一項照鹽法道之例年支銀三千兩各役工食亦照鹽道年支銀二百三十兩一錢查糧道俸薪役食應在豐城縣地丁銀內坐支與巡警道應支俸銀及各役工食數目相符見在糧道裁撤擬即將原編豐城糧道俸銀役食撥歸巡警道支給其勸業道應支俸銀役食即在南昌縣地丁銀內坐支各該道養廉均由司在於各屬解到地丁耗羨銀動支下部議奏尋度支部覆奏查四品官員例支俸銀一百零五兩今該撫奏稱一百五十兩核與例章不符應令按照定數開支以符定例其餘所開應支各款核與糧道支數相符應併照准惟應扣攤荒充餉減平各銀兩自應由該撫照章核扣暨覆報部

又浙江巡撫增糧奏查明浙省州縣異常虧累擬裁免攤提平餘
又奏浙省新設巡警勸業二道酌支俸廉暨各項經費略稱巡警勸業兩道秩四品照例歲支額俸各銀一百五兩共銀二百一十兩請於各屬所扣贖項項下扣減核實支銷養廉一項仿照杭巡道之例每年各支養廉銀三千五百兩並請援照鄂贛兩省成案每年各支公費銀一萬兩巡警道出巡費請照部定勸業道調查之數每年支銀二千兩均不加閏其役食一項鄂贛多寡懸殊浙江擬比照杭巡道役食之額量加一倍常年各支銀四百六十八兩以上各項除額俸外常年共銀二萬九千九百三十六兩閏年三萬一十四兩均請於地丁項下作正開支養廉役食循章扣減公費巡費並免扣平以資辦公他如改設警務勸業兩公所警務每年需銀四萬一千六百二十二兩零勸業每年需銀二萬六千四百七十二兩警務所需向有之調查費已改為視察員常時臨事特別考驗等事之用列入額款之內勸業調查費部款未領以前暫歸活支項下開列統計兩公所每年額支活支調查等費常年共需銀六萬八千九百四兩五錢七分二釐五毫亦擬請在於司庫地丁項下支給尋度支部議奏查

各省巡警勸業兩道之新設者先有安徽山東陝西湖南湖北廣東雲南貴州四川江西等省開支俸廉公費役食等項有由裁缺騰出之款撥用有由司庫動支作正開銷均經各該省督撫先後奏明在案今浙江省新設巡警勸業二道開支俸廉公費巡費四項核其數目尚屬酌中應准暫照所擬辦理仍俟各省報齊再由部擬定畫一數目通行各省原奏稱養廉照杭巡道例數開支役食一項亦應照杭巡道例定名額支給所請量加一倍之處應毋庸議至警務勸業兩公所見設科員額支薪水活支房租雜用等項綜計常年共需銀六萬八千餘兩查此項常年經費應由該撫通盤籌畫撥實開支又原奏謂勸業道調查費未領部款以前暫歸活支一節查此項銀兩前經郵傳農商二部擬定章程按照省分大小酌給津貼每年不逾二千兩之數如再不敷由本省籌撥今該撫既請暫歸活支應俟部款撥定即行裁撤以符原案

又奏撫運兩署公費仍於提存商網款內動支略稱查兩浙外銷項下每年呈解撫署列有商網公費津貼引費等款除節次裁減報效外年約解銀一萬六千數百兩如遇旺銷長征之年數在一萬八九千兩司署亦有公費津貼照費引費製費加平程毫等款除裁減報效外年約銀三萬四千數百兩長征年分則在三萬九千餘兩款皆由商按引輸繳向例外銷兵燹後數十年來歷任巡撫運司皆取為常年辦公之需實無流弊至三十二年信前升司以款難商輸究近陋規呈請全行提庫所有巡撫運司辦公之款從實核減悉自課釐項下開支名為辦公經費奏定年解撫署公費及書吏差官等薪工並撥師範學堂常年費共銀一萬八千兩司署亦准月支銀二千八百三十兩年共銀三萬三千九百六十兩遇閏照加永為定額詳立案自三十二年起按月改於課釐項下分別支放將原有之商網等款悉數提庫茲既奉部駁飭正雜不能混淆令將此項收支各款另行造冊更正務須各歸各款不得彼此牽混致虧正項課釐自應遵將三十二三兩年所在課釐項下動支巡撫運司辦公經費銀兩仍從提存之商網等款內如數查還以重正項其應支辦公經費請自三十四年起仍照張前撫臣核定之數即於提存入庫之商網等款內按月解支似

於部飭原案無背下部知之

又護湖廣總督楊文鼎奏提學使照正三品支俸學政衙門原有工食等項共銀二百三十四兩應否移作提學使衙門役食度支部覆准依議行

又湖南巡撫岑春煊奏長沙府督捕水利同知移設株州名為株州撫民同知

湘潭縣黃茅驛巡檢移駐該處名為株州巡檢兼管司獄事務所支廉俸等項

准照原額支給查株州地方壤接醴萍為輪軌要道水陸交通同知移駐該處

管理民間命盜詞訟案件用項浩繁錢糧既歸湘潭縣征收無羨餘可得自應

籌給津貼俾免掣肘茲擬每年籌銀三千二百兩同知歲支銀三千兩巡檢二

百兩在善後局款內開支

又河南巡撫吳重熹奏清理河工款項切實裁減核定數目略稱查臣署除支

巡撫養廉銀一萬兩外別無津貼向由河工年支津貼銀一萬二千兩自河督

歸併撫臣兼辦後將河督養廉銀裁去添支公費銀一萬八千兩又奏銷幕友

脩金火食霜餉節禮及文案內委薪水火食暨戈什親兵摺差巡捕稟號書役

一切人等共年支銀一萬九千四百餘兩此外別無進款茲據以上各款內裁

去銀一萬二千兩零又藩司署向由河工年支津貼銀六千兩房庫書吏年支

紙筆飯食銀一千二百三十兩今布政使朱壽鏞亦請將此款悉數裁去至開

歸陳許鄭道署支發各款向較河北道為多今該署道于滄瀾請裁去銀二千

三百四十兩又八廳公所經費及他項雜支每年裁去銀六千七百四十八兩

並將向年協助各學堂善堂諸費銀二千五百三十六兩一律裁撤由藩司另

籌撥濟每年共裁減銀三萬八千五百五十五兩零

又奏豫省省城各級審判廳經費員役薪工火食為大宗豫算年需三萬餘兩

以各屬每年擬解臬司公費銀一萬四千兩及裁撤督審局委員薪水暨各廳

所收訟費罰金儘數充用下餘所短由藩司設籌隨時撥濟

又奏籌定巡警勸業兩道俸廉公費略稱新設巡警勸業兩道照例每年各支

俸銀一百零五兩養廉銀各三千五百兩公費銀各一萬兩新章勸業道由部

支領津貼調查銀二千兩巡警道亦應支給巡費銀二千兩以昭畫一計兩道

俸廉公費津貼巡費共銀三萬一千二百一十兩統核糧鹽道裁缺舊有俸廉銀四千六十兩漕折公費銀一萬二千兩額設公費銀三千六百八十四兩此款內有應解江北提督養廉並辦漕公費等項銀兩自應提歸另存照舊支解下餘銀一萬六千六十兩撥歸巡警勸業兩道分支共計尙短銀一萬三千一百五十兩應由司庫在於正雜款內動支作正開銷

又奏豫省武職人員支食一半俸薪養廉馬乾銀兩約歲需銀二千兩有奇例在官兵朋扣項下動支近年馬守兵丁一律裁汰扣銀無幾不敷動用每逢支發必須借動別款見在清理財政應將庫款分撥清楚自應設法籌定專款以便造報查各州縣解到兵米一款自裁兵後僅有經制馬兵四十二名每年共支米折銀一百四十兩之譜餘銀足敷動支擬請將武職署事人員支食一年

俸薪廉乾銀兩除例支朋扣外不敷若干即在各州縣解到兵米項下動用又陝西巡撫恩壽奏陝省勸業道每年籌撥養廉銀二千兩公費銀五百兩吏書口食銀五百兩均在耗羨款內動支又俸薪銀五十三兩零各役工食年支銀二百三十四兩四成半幫貼銀四百五十兩加增吏書口食公費銀五十兩均每季由司給領並每月另籌公費銀三百兩在地租項下動支至勸業公所

經費每月額支銀一千四百兩開辦費銀四百兩均在釐金項下動支又山東巡撫袁樹勛奏維禁人之貪必先有以養其廉責人以忠必先有以厚其祿國家之於州縣廉俸之外有丁漕平餘所以待之者至優自價款無

出新政待與不得已攤款加提而州縣日形蕭瑟自銅元充斥銀價增漲丁漕不敷報解而州縣虧累更不能支其始原屬一時之權宜而流弊遂中於今日

夫牧令者朝廷託以數十萬生靈之命者也皇上念切民依日以子惠羣黎督責州縣若牧令皆仰屋愁歎自救不遑豈有餘閒勤勞民事警之乳母飲

食不繼飢餓呻吟而責以哺乳充饒嬰兒肥碩理之必無事所難強方今各省銅元之累大率相同州縣之艱度亦不甚大異以日擊山東州縣情形屢有

求免赴任疊請卸事甚有因虧無抵發為心疾者夫以牧民長吏至於愁苦無聊此危邦之陋風非天下之細故循此不變其何以國且彫弊既極廉能之吏

束身自愛往往觀望不前轉使卑污苟賤得以輾轉因緣使其私計聚多數貪鄙無行之吏肆居民上彼且腴削民膏之不暇而冀其教育普及之實行地方自治之成立直北轍而南轅也臣以爲見在推行新政當先重任親民之官而重任親民之官當先令其寬然有餘而後得責其事故今欲紓州縣之困莫如將歷年提款一律豁除欲地方吏治之有起色莫如統合全省州縣之缺消息羸虧務劑於平一律改爲公費而其辦法之大綱則在以後指撥之要需待解之急款不再攤州縣不加派農田別籌抵補夫如是州縣而稱職俾之久於其任設瘼厥官則嚴効隨之仕途或有澄清之一日也臣與司道籌商會以此具有數利查提取盈餘一項本籌款不得已之苦心循謹州縣尚不敢加派於民貪婪者則巧立名目暴斂橫征責償於百姓今既報解寥寥已成無著不如捐此空名令州縣無所藉口既解農民之困且杜貪吏之苛爲百姓隱留一分脂膏卽爲朝廷多培一分元氣利一也全省州縣之缺不能盡同賠累之區廉吏亦復畏避膏腴之邑巧官仍多鑽營今擬酌劑盈虧一律改爲公費明幹之吏俯仰足給爭願盡其賢勞中材之人欲望不奢亦且息其奔競作賢能之氣靖仕途之蠶利二也公費之定擬以缺之繁簡爲衡不以地之肥瘠爲準其相差之率不令懸殊一其所定之數俾足自給以示其厚在下無擇肥瘠之心在上有爲地擇人之效利三也大抵州縣之積習開徵不遠則爭謀到官丁漕既完則急思解任存一官傳舍之念妙爲民請命之忱今擬改爲公費每月由司庫支領通年合計無過豐亦無過儉人自不生趨避專心戢志以奉公蓋必先安其心而後能辦事亦必久於其任而後能盡才利四也而尤有大利者則在將公費酌中定數俾其贍身家給賓客而有餘買田宅長子孫而不足使貪夫無所利以託身而仕途清志士得所藉以施設而官治理惟是東省財政困難萬分免提盈餘款目極鉅抵補爲艱改爲公費頭緒殷繁辦理不易第念州縣彫弊至此微特所辦之要政無由策其進行且恐滿目生靈日滋糜爛根本之患固在地方影響之大關乎全局若不毅然改圖以後愈難收拾權衡輕重利害昭然力所能爲不敢不勉

又山西巡撫丁寶銓奏籌設省城各級審判廳略稱各廳常年經費逐款豫算計審判檢察各廳員役薪工月需銀三千兩有奇加以額支飯食紙筆等項歲需銀三萬九千餘兩合之活支各款通年共需四萬八千兩上下週閏照加又四川總督趙爾巽奏州縣公費原定共銀九十二萬六千兩尙有不敷開支應行加給者爲江津涪州宜賓漢州三台江北忠州梁山隆昌樂山西昌金堂灌縣綿州廣安開縣雅安達縣資陽南充縣新寧鄰水長壽名山閬中榮昌南川鄧都合江綦江太平射洪梓潼青神樂至蓮谿羅江昭化城口營山平武等四十三廳州縣應每年各加銀一千兩廣元雲陽江油劍州等四州縣應每年各加銀二千兩共計加銀五萬一千兩並均定爲週閏照加以示體恤又奏川省道府例支廉俸除扣平票攤捐等項所得無幾辦公異常竭蹶經前督臣丁寶楨奏准於滇黔邊計鹽務局平餘項下支給公費銀兩始得從容圖治嗣以整頓鹽務裁節浮費又將原定數目分別裁減當日已有不敷之處近來新政頻煩百端待理事繁費鉅措拮據愈難不能不覈實變通除缺分敷用道府不計外擬請將原定公費銀九千兩之永甯道每年加銀一千兩原定八千兩之川北建昌兩道成都重慶兩府各加銀二千兩原定五千兩之嘉定敘州兩府各加銀二千兩順慶府加銀一千兩原定四千五百兩之保寧綏定兩府各加銀一千五百兩原定四千五百兩之雅州龍安兩府各加銀一千兩原定二千兩之甯遠府加銀一千兩均自宣統元年起仍在滇黔鹽務平餘項下支給甯遠府昔爲優缺故原定銀數特少今缺分已與雅州府相埒是以於前項酌加外又另給銀二千兩以資津貼其向由鹽局領取公費之酉陽直隸州前已併歸各廳州縣案內辦理所有原支銀一千五百兩卽行裁汰俾免重複如此重加釐定每年不過多支銀二萬一千五百兩而辦公無虞拮据實於整飭吏治有神

又奏甯遠府經歷移駐普格該府經歷缺分清苦年領廉俸暨役食銀兩僅祇百餘金從前尙賴各屬酌攤幫費見在攤捐已裁今復移治事務較繁自應酌給公費擬於司庫酌盈劑虛項下年支銀四百八十兩自移治之日起按季由

司給領

又奏查川省所轄襄塘巴塘察木多拉里西藏後藏六台遠處邊荒地極艱苦從前設置糧員每台所定月費幫費等項歲僅領銀九百餘兩及一千數百餘兩不等入不敷出殊形竭絀光緒十四年經前督臣加給經費裏巴兩台歲各加銀六百兩察木多拉里兩台各三百兩西藏後藏兩台各七百兩當日事務清簡尚敷津貼近來藏中開埠通商差務絡繹各糧員款艱勢絀率多虧累虧挪公款幾於無任無之屢屢經澈查嚴追而前案未清後案踵至若不設法補救台法恐無起色見在懋功一廳五屯業經加給公費各台事同一律而邊苦過之自應仿辦仍按程途遠近釐定數目等差除原有領款照舊核發歸裝等項即行停止外擬每年加給裏巴兩台公費銀各一千兩察拉兩台各銀一千二百兩西藏後藏兩台各銀一千四百兩週均攤不再加給即在儲邊軍餉存款項下提銀十萬兩發交商生息以作此用

又奏查重慶等十六處公費銀兩前定數目較少實屬不敷開支自應照案量予增加擬請每年加給重慶府公費二千兩夔州府銀一千兩仍由滇黔鹽務平餘項下支給又江北廳忠州每加銀二千兩涪州江津宜賓榮昌都內江安岳大甯巫山大足江縣古宋各加銀一千兩統由稅契正款項下支給以上二府一廳二州十一縣共加銀一萬九千兩均自宣統二年正月始以便造報

又奏慶州府爲全川門戶地居衝要治理綦難從前因管關稅缺分素優應定道府公費均未籌給今關稅提歸委員自非優定公費不足以資應用擬每年即由該關稅款項下支給公費銀二萬兩成都府地當首輔遠府逼近夷巢治理均屬繁難原定公費較少亦資關稅挹注見擬每年加給成都府公費銀五千兩甯遠府公費銀一萬兩合之原有各成一萬五千兩之數該二府所加公費均照原案仍由鹽務項下開支期與各道府一律

又奏川省懋功廳及所屬之懋功撫邊章谷崇化綏靖五屯向設同知一員屯務五員各領月費銀六十兩役食銀七兩又每遇更換廳屯各員則有往返騎馱守候交代等項每屆修理橋船則有購料雇工等項均係銀麥兼支爲數無

多難以濟用是以歷任廳屯員每取陋規以自給積習相沿由來已久見在道府暨各廳州縣均定公費奏准有案該廳屯情事相同自應仿照辦理除原有領款照舊核發前項麥糧即行停支外擬請自宣統元年每年加給懋功廳公費銀一千二百兩懋功等五屯各銀一千兩在於提各屬平餘項下支給遇閏照加

又護兩廣總督胡湘林奏擬廣東各級審判廳官吏俸薪略稱審判廳官吏俸薪一項奉天除公費外另有津貼論者以爲過優今擬照給公費酌加夫馬更不另支津貼似已豐約得宜計省城高等審判一廳審判檢察兩項人員每月約需公費火食夫馬雜支各項銀四千餘兩每年需銀四萬八千一百餘兩閏年需銀五萬二千一百餘兩省城及五商埠地方審判共六廳每廳審判檢察兩項人員每月約需公費銀三千四百餘兩每年需銀四萬一千二百餘兩閏年需銀四萬四千六百餘兩六廳每年共需銀二十四萬七千三百餘兩閏年共需銀二十六萬七千九百餘兩各分防初級審判共二十八廳每廳審判檢察兩項人員每月約需公費銀五百餘兩每年需銀六千八百餘兩閏年需銀七千四百餘兩二十八廳每年共需銀一十九萬二千七百餘兩閏年共需銀二十萬零八千八百餘兩明年省城及五商埠各級審判成立每年統共需銀四十八萬八千二百餘兩閏年統共需銀五十二萬八千九百餘兩

又廣西巡撫張鳴岐奏定巡警道公費略稱廣西見行勻缺章程左江道年支公費銀四千八百兩右江道五千四百兩太平思順道七千一百兩養廉役食各循舊支領新設提學使缺年支公費銀一萬兩額支養廉照章解處歸併列抵役食停支該司附設之學務公所應需員薪雜項銀兩另由該司按月豫算赴處具領各在案此次新設巡警道缺擬即查照本省提學使及各道領支公費成案中擬定年支公費銀八千兩不設養廉役食該道附設之警務公所應需員薪雜項銀兩仿照學務公所辦法酌定確數按月另行赴處領支

又奏模範監獄成立之後按察司司獄桂林府司獄臨桂縣典史三缺裁撤每年節出銀一千一百餘兩應請提充監獄經費

又奏按察司署分科治事常年經費銀一萬八千六百餘兩由藩司支領
又雲貴總督錫良奏新設交涉司員缺養廉等款酌定數目略稱照章設立交
涉公所派員分科辦事惟當試辦之始籌款惟艱暫定爲總務界務工務三科
各科應設之僉事暫從緩設每科設正副科長並科員各一員亦請暫作差使
不作實缺另設英法文頭等繕譯各一員繪圖生二員優給薪水俾得盡心辦
事見經會商擬定交涉司養廉每年額支銀七千五百兩照章以八成實支銀
六千兩由司庫公件項下開支又俸薪銀一百三十兩酌設門子二名快手十
二名皂隸十二名轎傘扇夫七名鋪兵二名每名年支工食銀六兩共銀二百
一十兩按八成實支銀一百六十八兩均由條丁項下動支又每年酌給該司
公費銀六千兩外交經費銀一千二百兩正科長三員每員六十兩科員三員
每員四十兩頭等繕譯二員每員二百兩繪圖生二員每員二十兩應用書手
雜役及公所一切經費每月額定銀三百兩遇閏照加由善後局照數實支入
冊造報

又護雲貴總督沈秉堃奏滇省勸業公所全年額支經費銀八千七百二十四
兩遇閏加支

又奏滇省各司道既經酌定公費若總督衙門仍沿舊習殊非所宜據藩司等
公議暫定每月籌總督公費銀二千四百兩由善後局支送作正開報與司道
公費一律所有向章由釐金總局按月支送之冊費司庫之操賞善後局之撫
署執事人役各款費均一併截存解由司庫存儲冊報仍俟會議政務處議籌
督撫公費定案再行停支

又奏酌定司道各官公費略稱除額支養廉外藩司酌定按月支用公費銀二
千兩交涉司仍照奏定原案除外交經費外年支公費銀六千兩提學司原案
年支公費銀八千兩擬再加籌銀四百兩每年共支銀八千四百兩臬司年支
公費銀八千兩糧道年支公費銀五千二百八十兩鹽道支銀七千二百兩勸
業巡警兩道原案各支二千兩擬加二千兩每年每缺共支四千兩巡東巡西
兩道各月支三百兩巡南巡安開廣兩道各月支二百兩藩庫大使年支四千

兩鹽庫大使年支一千四百兩藩經歷缺分最苦僅恃印送時憲書由各府廳
州縣幫貼工料名目不正應即革除按年准支公費銀二千兩均一律自宣統
元年七月初一日起由善後局分別支發作正報銷

皇朝續文獻通考卷一百四十四

職官考三十 職秩

宣統二年法部奏定法官考試考官津貼薪水月支銀五百兩襄校官三十四十兩

又憲政編查館奏擬將官制提前官俸展後辦理略稱官俸應以官制為根本未有官制不定而能先議官俸者今京外各項文官多與立憲官制不合一經釐定裁併添改不可枚舉使僅議見行之官俸則與憲政何裨使遂議新制之官俸則與今制迥殊此一難也在京各署廉費多因烏布而異議者詫其名目之參差而不知由官制之未定今欲整齊畫一必先釐改名稱確定職掌增損員缺庶所訂俸乃適宜然此皆官制內事而非官俸內事此又一難也至外官司道公費各省奏定未協平均而州縣等尚多未奏見在庫款支絀既不能悉資正供則原有規費平餘不能不資挹注倘未考明遵定款從何取若仍虛擬俸額無望實行此又一難也積此數難本年頒布官俸章程實多窒礙可否將頒布官制提前一年試辦官制提前二年頒布官俸展後一年實行官俸展後二年以免凌蹙

又會奏司法經費應分開辦及常年二種開辦以建築為大宗常年以俸薪為大宗然建築究不過籌撥於一時而俸給則實應規畫於久遠請 旨飭法部迅將全國應需司法經費查直省籌擬辦法按照度支部試辦預算冊分類臚列奏明辦理至法官官俸本包於文官官俸之內見在審判各廳亟須依限籌設則法官官俸自不能不提前酌定應由法部照 臣館奏進法院編制法原奏所陳俸給等項詳商度支部從速酌中釐定作為法官官俸暫行章程奏交 臣館覆核請 旨遵行

又翰林院侍讀王榮商奏京官薪水漫無限制請 飭政務處議定京俸章程力求撙節
又學部奏定管理游日學生監督一員每月薪金四百兩按照陽曆每年四千八百兩學務委員一等一員月薪二百四十兩每年二千八百八十兩二等四

員每月每月一百六十兩每年一千九百二十兩三等二員每月每月一百二十兩每年一千四百四十兩書記生每名每月薪金四十兩至六十兩為度
又資政院奏議決京外各官公費標準清單

京官每年每員公費 軍機大臣二萬四千兩 尚書一萬兩 侍郎八千兩 左右丞四千兩 左右參議三千六百兩 候補丞參及丞參上行走丞參應行走不支薪水有主管事項者各以其事項開支至各衙門附設局所均比照各司辦理 各司烏布等級 一等二千四百兩 二等一千九百二十兩 三等九百六十兩 四等六百兩 五等四百八十兩 六等三百六十兩 七等一百八十兩 參事僉事比照司長長者照減不足者不加

外省各官每年公費 總督 繁二萬四千兩 簡二萬 巡撫 繁一萬八千兩 簡一萬四千 布政使 繁一萬 簡八千 民政使 交涉使 度支使 提法使 提學使 鹽運使 各六千兩 各道 繁五千 簡四千 各府 繁四千 簡三千 州縣照原不加修正

督撫司道各科公費 科長月支八十兩 副科長月支六十兩 一等科員月支五十兩 二等科員月支四十兩 三等科員月支三十兩
又 諭資政院會奏議決京外各官公費標準一片著俟編訂官俸時候旨施行

又度支部奏遵議庫倫大臣三多糊楚克車林奏鑄除積弊加給薪津略稱原奏稱圖車兩盟沙畢等三處屢報災饑不堪供應歷年息借債款迭經報官索欠者不下百萬餘兩詢之各旗戶口產業竟有以一旗之牲畜估計價值不足抵者加以年供本旗及各路台卡差使虧累更鉅據稱自光緒二十九年至宣統元年庫倫大臣署及印房司員筆帖式委員領催等需用修理衙門及器具鋪墊等項合銀十八萬餘兩支應馬匹食羊柴炭等項尚不在內似該三處困苦自屬實在情形 臣等詳細妥籌擬將該三處每年應供差使除柴炭羊三項照章定數供應仍發給官價外至各官調任修葺添物按照等級嚴定章程以

立限制由該三處解銀交印房估工承辦其餘修理衙署及傳用器具等項自此次查明後統由大小各員自備庫倫各差既免即各旗有假公濟私勒捐攤派之事亦難影射惟蒙因既紆而各員之公費不敷不能不量為加給查印房各員每月應支薪津優者四五兩次則一二兩即三多每月養廉鹽菜銀六十兩化私為公津貼銀三百六十六兩副都統隨甲銀六兩後地地租提取辦公銀八十三兩又兩盟一沙舉月送修署銀五十兩共銀五百六十餘兩

臣糊楚克車林每月養廉津貼銀一百五十餘兩無論如何節儉竭蹶時形等而下之拮据可知近來各省裁陋規加薪公庫倫各官自應同沾 德澤除 等應否 賞加出自 聖裁所有印房滿蒙漢各員擬參照邊務大臣趙爾豐奏准章程量為核減見滿漢各員及繙譯等官不過十餘員蒙古五六七品等官及筆齊業齊共計雖有四十一員分四季換班每班駐班僅止十一員滿蒙漢各官統計不過三十員除舊有薪津銀一萬兩有零外擬請每年賞加一萬二千餘兩先儘庫倫外銷公款項下開支倘有不敷再由庫倫金礦稅款項下暫撥奏咨核銷等語 臣等伏查圖車兩盟沙畢等三處以應差之故稱貸債款無論有傷政體流弊亦不可不防自應及早圖維以蘇蒙困所稱每年加給薪津銀一萬二千餘兩應請照准支給惟庫倫外銷究係何款每年實有若干見當清理財政均應詳報以憑預算金礦稅項向係按年解部如上項津貼實在不敷應准暫撥下餘仍應解部以重庫儲至該大臣等養廉薪貼各項為數無多實虞竭蹶應如何核定之處請 飭會議政務處併案核議以歸畫一

又黑龍江巡撫周樹模奏定巡撫司道俸銀數目略稱江省自巡撫以下俸銀尚無規定迄今亦未開支援照吉林成案擬定俸薪巡撫二百零七兩五錢七分五釐民政司同提法提學兩司各一百五十九兩三錢三分九釐與東瓊瓊呼倫各道各九十九兩三錢九分三釐暫仿照辦

又奏請將民政司養廉加三千兩共年支銀八千兩

又直隸總督陳夔龍奏酌定巡警勸業道俸廉銀數略稱直隸新設巡警勸業兩道應按正四品官俸銀每年各支銀一百五兩內除扣六分部平外各實支

銀九十八兩七錢共應支銀一百九十七兩四錢養廉一項亦照各項廉銀支給每年各支銀二千兩內除扣二成軍餉三成票銀六分部平外各實支銀一千五十二兩八錢共實支銀二千一百五兩六錢均於司庫動撥

又奏酌定司道以下公費並限制經費辦法略稱公費二字解釋宜求明確經度支部電覆以公費本兼有辦公經費各義惟近來京外應支公費多與養廉津貼無殊向不造報驟議正名恐多窒礙至因公費用範圍甚廓令據實開列查明酌定查奏定原章係因規費盈餘既須一律開報又值官俸未定以前不得不暫給公費以資津貼是此次所定之公費本與經費有殊惟各署所用員司及因公支款如不核定是在官之精祿雖有常經而因公之開支仍無限制殊非清理財政實事求是之意部電具見周詳循名責實自應分別照辦茲經籌計除各局所薪公經費向係實用實支巡警勸業兩道係新設之缺並無規費可提外直隸原有七道所有各衙門歲支心紅津貼公費及盈餘規費並一切雜支等名目計布政司原有銀十五萬五千八百餘兩提學使五萬三千六百餘兩按察使四萬二千九百餘兩鹽運使七萬九千餘兩天津海關道十五萬四千三百餘兩清河道二萬三千三百餘兩天津道二萬九千二百餘兩永定道二萬八千一百餘兩永定河道二萬一千八百餘兩大名道二萬三千餘兩口北道一萬八百餘兩共銀六十二萬一千八百餘兩擬就所報數內分為兩項一曰公費凡本官服食僕從車馬及一切私用應酬雜支屬之一曰經費凡該衙門因公費用與署內幕僚員司弁勇夫役修理房屋等項皆屬之海關道交涉接待贈答經費亦在內公費如何支用無庸造報經費動用仍造送清理

財政局歸入決算不得逾所定之數如有餘存下屆滾算見擬布政使歲給公費銀四萬八百兩經費銀七萬二千兩提學司公費一萬九千二百兩經費四萬五千六百兩按察司公費一萬九千二百兩經費二萬七千六百兩俟改提法司時經費數目再行另擬鹽運司公費三萬六千兩經費四萬二千兩津海關道公費四萬八百兩經費六萬兩清河道公費一萬二千兩經費九千六百兩天津道公費一萬六千八百兩經費一萬二千兩通永道公費一萬二千兩

經費一萬二千兩永定河道公費一萬二千兩經費八千四百兩大名道公費一萬二千兩經費九千六百兩口北道一萬八百兩經費四千八百兩以上四司七道共歲需公費經費五十三萬五千二百兩遇閏加銀四萬四千六百兩均照數實支較之冊報原有之數無閏之年共省銀八萬六千六百餘兩有閏省銀四萬二千餘兩如有漏未查出之款及例准開支見實無需已挪作他用者並應逐款查明隨時釐正除廉俸二項仍舊支給外其舊有各項名目概行停革盈餘規費等項悉數歸公巡警勸業兩道係新設之缺廉俸俟另案核定茲擬各給公費銀一萬六千八百兩警務公所係就天津南北段及保定警務處歸併設立歲需經費銀九萬九千九百六十兩勸業公所歲費六萬五千五百二十兩遇閏加增均飭於裁併之巡警工藝各局所原有款項內動支至各府及四路廳公費前督臣袁世凱於裁提漏規案內均已酌定實行計保定永平河開三府各給銀七千二百兩天津正定順德大名宣化廣平六府各給銀六千兩應仍照舊支給惟四路廳原定公費較少見擬每廳連同原案歲共給公費銀四千八百兩順天府治中有分理地方之責亦擬歲給公費銀二千四百兩其撫民廳並各州縣公費按照大中小治分別酌定大治十二處並六直隸州各歲給公費銀五千四百兩中治十六處各四千八百兩小治七十處各四千二百兩統計各府以次歲給公費共銀七十五萬一千二百兩閏增銀六萬二千六百兩惟各府廳州縣經費見因各處報冊款目套搭例案糾紛每處實需若干非詳細覆查難以確定此次取定各廳州縣公費等級亦應將各處所報出款分別性質明定範圍何者屬私不能開支何者屬公准其實報逐款釐別再與所報入款互核方可將各廳州縣及治中四路廳各公費同時實行但此時若不預定數目則州縣款項公私夾雜清理無從入手其同通雜職及大小武職衙門大率廉俸以外別無所得若議普給公費見實無此財力應俟府廳州縣經費及各廳州縣公費核定實行後酌量情形再議辦法至四司七道公費經費二項雖較原查之數有所節省然原查數中尚有出於州縣攤捐者應俟釐定州縣款目的量裁留合計全省公費經費較量盈虧再行咨部辦

理

又奏暫定督署公費略稱各處年解_臣衙門各款除廉俸外計共銀十萬一千餘兩內有東海山海兩關各應解銀四千兩已飭停解其餘擬飭全數解交財政總匯處存儲每月由該處提銀五千兩作_臣署辦公之用其廉俸銀兩照舊解支

又奏直隸提法司改設屬官其薪水等項暫照省城審判廳員月薪分別核定各科科長月給二百兩一等科員八十兩二等科員五十兩一等書記三十兩二等書記二十兩又司署計設分科經費核實預算需銀三萬九千八百九十兩遇閏加三千三百二十四兩零

又奏請將遵化營雜文峪員弁俸廉馬乾等項自本年春季起加給一半津貼每年計八成銀五百六十七兩零遇閏加增

又奏酌定交涉使俸廉公費略稱交涉司定為正三品與提法使同其俸銀應照提法使年支一百三十兩內扣六分部平銀七兩八錢實支一百二十二兩二錢養廉一項亦應照提法使每年額支八千兩內除二成軍餉一千六百兩計應支八成銀六千四百兩內除三成鈔票一千九百二十兩尚應支七千二百兩四錢該司外交經費亦應支給查奏定津海關道經費本兼有外交用款交涉司同駐天津應即在津海關道原定經費項下按月撥銀一千兩作為交涉司外交經費俟一年後綜計盈絀再行核定其該司公費每月照提法司酌定銀一千六百兩交涉公所員役薪工及公所經費每年三萬九千三百二十兩遇閏照加不敷之數在裁節公費項下撥補

又熱河都統誠勳奏新設之林西開魯兩縣並舊設灤平一縣原定津貼不敷辦公擬請各加銀一千兩以免虧累

又奏酌定赤峯直隸州烏丹城州判年支養廉銀一百二十兩俸薪四十五兩大廟巡檢年支養廉銀七十一兩五錢二分俸薪三十一兩五錢二分

又兩江總督張人駿奏酌定文職各官公費略稱_臣署舊有之款如江海關准

運司海分司江南財政局所解通商大臣及總督鹽政各公費共銀八萬五千餘兩據清理財政局議稱照北洋大臣直隸總督定案歲支公費銀六萬兩電商將司道府公費先議查每年原有公費江甯布政使二萬八千二百餘兩今定爲二萬八千兩兩淮鹽運使四萬八千餘兩今定爲三萬六千兩江安糧道一萬八千七百兩有奇今定爲一萬五千兩江南鹽運道一萬三千七百餘兩今定爲九千兩准揚海道六千六百餘兩今定爲六千兩徐州道一萬一千餘兩今定爲九千兩尚有江甯提學使江甯勸業道均新設之缺提學使原奏定公費銀八千六百兩勸業道一萬二千兩丁隨小費銀一千二百兩均照支給至知府原有公費江甯府六千四百九十餘兩今定爲六千四百兩揚州府七千八百餘兩今定爲七千兩淮安府七千五百餘兩今定爲七千兩徐州府八千五百四十餘兩今定爲八千兩其各官俸廉照舊支給統計定公費年共銀二十一萬三千二百兩自宣統三年起照辦遇閏勻支比較原有公費歲省銀四萬九千九百九十餘兩

又奏江蘇增設巡警道例章道員官秩四品級支俸銀一百五兩養廉一項蘇松太常鎮兩巡道每年各支銀三千兩巡警道事同一例應援案核給其公費巡費浙江新設巡警道年支銀一萬二千兩蘇浙壤地相連情形差等亦擬照辦均不加閏於地丁項下作正開支俸廉仍照章扣減公費巡費免扣又奏裁併江蘇同城州縣十二缺按宣統三年預算之數除行政經費不能悉裁外各縣擬給之公費及署用各款可節十餘萬兩以之改撥各屬地方審判廳之用

又奏新設勸業道酌擬俸廉公費略稱原設江南鹽運道年支養廉銀三千兩折給八成又支俸工銀三百三十九兩今新設勸業道擬請照鹽運道開支惟各省勸業道均有辦公經費江甯轄地廣需費較多擬另給每年公費銀一萬二千兩丁隨小費銀一千二百兩由江南財政局支發

又江蘇巡撫程德全奏定江蘇提法司屬官薪水科長每月銀一百二十兩一等科員八十兩二等科員四十兩書記員三十兩查司署向由各司局年解幕

友脩膳胥吏薪工紙張一萬八千八百五十餘兩分科以後約額支銀二萬一千數百兩活支銀二千數百兩統計需銀二萬四千兩左右按照奏定提法司行政經費足以敷用

又奏酌定司道公費並行政經費略稱據清理財政局報原有經費布政司及見經裁併之蘇滬牙釐善後房捐四局十五萬八千餘兩提學司四萬八千七百餘兩提法司二萬九千五百餘兩蘇糧道兼蘇州關四萬一千八百餘兩蘇松太道兼江海新常兩關二十二萬三千餘兩常鎮道兼鎮江揚由新常兩關四萬六千九百兩巡警道四萬二千三百餘兩共計五十九萬餘兩仿直隸辦法分公費行政費爲兩項公費一切私用屬之無庸造報行政費不得逾所定之額按款報告仍應審查分別准駁歸入決算布政司責重事繁擬歲支公費二萬兩行政費六萬九千六百兩提學司公費一萬二千兩行政費三萬一千二百兩提法司兼轄甯蘇兩屬公費一萬四千兩行政費二萬四千兩蘇糧道兼管蘇州關公費一萬兩行政費一萬八千兩蘇松太道兼管江海關稅務交涉繁難甲於他省惟從等級上規定未便超出藩司之上擬歲支公費二萬兩行政費九萬六千兩至該關經理部款責成甚重似宜參照特別俸制例外優給應由度支部核辦常鎮道兼管鎮江揚由兩關公費一萬兩行政費三萬二千四百兩巡警道公費一萬兩行政費二萬四千兩統計三司四道歲支公費行政費共三十九萬一千二百兩遇閏加支三萬二千六百兩除勻歸署行政會議廳及官電不敷經費一萬三千二百五十兩閏年不敷經費八千九百二十兩又各署公共豫備費一萬二千兩外較各署原支之數無閏之年可節十七萬三千餘兩有閏可節十三萬二千餘兩例支廉俸等項暫循其舊惟同通首領教佐等官值此府庫空虛勢難全體普給擬俟新官制頒行再議其武職各員綠營多循成例新軍本有部章又局所差委按事給薪本無常額均擬暫仍舊制又奏督撫公費飭清理財政局會商監理官公訂據稱署原支公費一萬八千兩行政費每年自六萬數千兩至八萬餘兩不等暫定公費二萬四千兩行政費六萬九千六百兩遇閏照加

又安徽巡撫朱家寶奏酌擬司道公費略稱安徽司缺三日布政司提學司提法司道缺四日巡警道勸業道皖南道皖北道各官俸銀湖自髮匪平後久經停支暫從緩議並將養廉及例支役食等項按章備辦外綜計各署原有歲入之款布政司約銀三萬一千六百餘兩提法司約六千一百餘兩皖南道約六萬兩皖北道約四萬三千兩其新設各署如提學司每年由藩庫原領銀五千兩巡警勸業道各四千兩又設立學務警務勸業各公所月各支銀三百兩遇閏照加統共每年原應支銀十六萬四千四百兩閏年加九百兩此次核實清釐入款悉數歸公布政司爲統一財政兼管行政近復將支應牙釐各局暨籌議公所等處併歸管理事繁倍昔擬請每年實支公費銀二萬四千兩較原有規費歲省七千六百餘兩提學使年支六千兩學務公所仍照原數年支三千六百兩全年共支銀九千六百兩較原有領款歲增一千兩提法司年支九千六百兩較原有各費歲增三千六百兩巡警勸業兩道仍照原數各四千兩其警務勸業兩公所亦請仍舊歲各支銀三千六百兩年共支七千六百兩該兩公所與學務公所向係月支茲改年支遇閏勻攤較原有領款無甚懸殊至該兩公所每年另由民政部領巡費農工商部領調查費各二千兩仍請照舊皖南道兼管蕪湖常洋兩關並通商交涉事最繁劇年支三萬六千兩較原費歲省二萬四千兩皖北道兼管鳳陽稅關年支二萬六千四百兩較原費歲省一萬六千六百兩該兩道本署行政經費皆在其內每年共支公費銀十二萬零八百兩計節省銀四萬三千六百兩但皖省各署向有分認提解練兵經費每年二萬四千兩目下公費核定餘款歸公前項報效請即以節省項內撥補除支抵外每年可餘銀一萬九千六百兩

又奏署公費暫限月支銀二千二百兩核計向有數目年省銀三千兩

又議准江西巡撫馮汝駿奏贛省銅鼓廳撫民同知由司每年津貼公費銀四千兩

又議准江西巡撫馮汝駿奏贛省併財政局所設立公所分科治事略稱查藩司每年向來入款地丁火耗銀三萬三千餘兩清務火耗三千九百兩官銀號儲

息節規一千四百餘兩以上三項本官經費及經歷問庫大使及書役人等皆取給於此此外公費及修署換季等銀七千二百兩員幕薪脩一萬二千一百八十餘兩工食雜支二萬五千餘兩均動支庫款至分管財政局所一曰稅務局總局及各分局口每年一成開支銀二十一萬餘兩一曰田賦稅契支應局年支薪費七千三百八十兩又稅契油紅銀二萬兩一曰賑捐局年支四千一百五十餘兩以上照宣統元年收支之數統計共約銀三十二萬四千兩之譜閏月尚須另計見經釐訂分爲六科曰總務曰銓敘曰田賦曰稅務曰制用曰會計即將各一概裁撤遺委科長科員分司其事田賦稅務制用三科因管轄事宜綜用人理財之責即稱布政公所所有丁漕火耗儲息及稅契油紅概提歸公規定公所常年額支經費銀六萬二千三百餘兩遇閏照加稅務科所轄各分局口按豫算一成開支之數大加刪減實支銀十七萬五千餘兩除另案奏定藩司歲支公費二萬四千兩其屬官見定經歷問庫大使共歲支公費銀四千二百兩例有廉俸役食均仍其舊庫書庫丁庫勇歲支薪工銀四千八百餘兩遇閏照加實共省銀五萬三千餘兩核與前覆度支部電裁之數計多省銀一萬八千餘兩

又奏司道公費數目略稱全省司道各缺除例支官俸養廉役食等款仍照舊辦理外所有公費撥布政司月支實銀二千兩提學司一千一百兩提法司巡警道勸業道南瑞袁臨道均月支九百兩撫建廣饒九關道兼管關稅交涉費用較繁月支三千兩遇閏照給吉南贛甯道向係歲支一萬二千兩應仍以年計遇閏不加均自宣統三年實行計南瑞袁臨道歲增銀二百兩吉南贛甯道數仍照舊因邊要事繁未便過減餘均有減無增其各署幕脩及向支歲脩換季等費及關道署內原有火耗等款除照支公費外一律提解司庫每年實省銀二萬二千兩核計彙查總數有贏無絀又奏查贛省巡撫年支俸銀一百四十五兩七錢養廉六千三百九十二兩原支公費一萬六千兩內除報效練兵經費四千兩實支銀一萬二千兩遇閏照加又有操賞歲修換季各項雜費銀七千四百三十九兩業經據實開報又有官銀號餘利項下津貼辦公銀四

五千兩不等飭令歸公茲擬暫行假定月支銀一千八百兩將原有各項一律刪除以歸畫一

又四川總督趙爾巽奏擬定新設古宋縣知縣每年俸銀四十五兩廉銀六百兩各項役食共銀四百五十八兩遇閏照加各項春秋祭祀原額加銀六十六兩酌留舖司兵工銀二十八兩八錢孤貧口糧銀七十兩八錢遇閏加增六兩古宋縣典史年俸三十一兩五錢二分廉銀八十兩役食銀三十六兩永甯直隸州知州年俸八十兩廉銀一千兩各項役食共銀三百四十八兩各項春秋祭祀原額加銀六十六兩祭品銀六兩孤貧口糧銀六十三兩九錢永甯直隸州吏目年俸三十一兩五錢二分廉銀九十兩役食銀三十兩其古宋古蘭知縣公費前已奏定歲各給銀五千兩永甯直隸州知州公費即照敘永直隸廳原定之數歲給銀一萬兩

又閩浙總督松壽奏酌定司道各官公費略稱歲入之款藩司原有火耗銀三千三百兩稅契紙料價盈餘銀二千八百兩津貼銀四千七百八十八兩又見支辦公經費六千兩提學司原有公費四千兩津貼一千二百兩臬司原有津貼五千二百兩洋務局公費一千二百兩見支辦公經費六千兩鹽道原有平餘辦公銀九千四百兩平餘辦公銀九千四百兩平餘銀約二千三百兩新案平餘銀約五千兩隨規銀約一千兩津貼銀二千四百兩漳龍道原有征收枋稅七千二百兩津貼三千三百兩興泉永道原有豬牙豆仲銀一千九百兩洋務經費一千二百兩津貼三千二百兩延建邵道原有征收木排捐銀八千八百二十四兩津貼三千二百兩又此次糧道裁併藩司管理原有糧庫米折盈餘銀約一萬二千兩津貼二千四百兩又財政局歸併藩司裁提平餘銀水等項一萬七千兩共銀十一萬四千七百七十二兩和盤托出悉數歸公原撥公費津貼停支以後除公費外並無他項進款經臣會商藩司給公費銀二千兩學司臬司鹽道各一千二百兩巡警道勸業道汀漳龍道興泉永道延建邵道各八百兩

又浙江巡撫增韞奏酌定府廳州縣公費並擬經費辦法略稱浙省十一府杭

州府缺事最繁擬給公費銀七千兩嘉湖甯紹等府次之各給六千五百兩台溫兩府又次之各給五千五百兩金衢嚴處缺事較簡各給五千兩其各廳州縣七十八缺分爲三等六級一級一級十三缺各給四千兩一等二級八缺各給三千六百兩二等一級一級十七缺各給三千四百兩二等二級十五缺各給三千二百兩三等一級九缺各給三千兩三等二級十六缺各給二千八百兩共給公費銀三十二萬二千四百兩遇閏加銀二萬六千餘兩比之直隸 畿輔要區稍從節省與廣西無甚懸殊此外應支行政經費雖已規定列入豫算尙須詳查於歲入項下分別普通與特別之款歲出項下分別經常與臨時之用實事求是 不逾準繩然後酌盈劑虛量入爲出將經費悉行釐定即與公費同時實行

又奏請設糧道庫大使專缺俸銀照品支給養廉歲給銀六十兩

又直隸總督陳夔龍奏裁督提鎮標參游都守千把經額三百二十五員名每年共節省俸薪廉乾餉項等銀一萬一千三百八十三兩五錢三分

又護湖廣總督楊文鼎奏湖北省城暨商埠各級審判廳每年約共需銀十四萬餘兩由司關道局各庫月籌銀一萬二千兩

又署湖廣總督瑞澂奏湖北司有三缺曰布政司提學司按察司道有七缺曰鹽法道勸業道巡警道漢黃德道荊宜道安襄鄖荆道施鶴道新設者固屬創舉舊有者亦事倍於前見在酌定公費實行勻給綜計歲入之款藩司原有平餘火耗傾鎔等費年約三萬數百餘兩臬司一萬零八百餘兩鹽道二萬零八百餘兩漢黃德道除已提支海運經費外尚有四萬二千兩荆宜道除提支饒商虧款外尚有二萬九千一百餘兩安襄鄖荆道八千六百兩至學司巡警勸業施鶴各道均係新設祇有原撥公費並無別項陋規計原撥學司公費一萬五千兩巡警道一萬六千六百兩勸業道一萬兩施鶴道一萬六千六百兩茲據光緒三十四年冊報應共有銀二十萬兩此次核實清釐凡有私入悉數歸公以後除公費外別無他項進款公同商酌藩司統一財政兼管行政見在善後統捐等局併歸該司辦理責重事繁每年擬給公費銀三萬四千兩學司一

萬八千兩臬司鹽道各給一萬七千兩勸業巡警兩道各給一萬四千兩漢董
 德道兼管江海關稅務並辦交涉事最繁難年給四萬兩刑宜道兼辦稅務交
 涉較繁擬給二萬二千兩襄陽道一萬二千兩施鶴道一萬三千兩以上所定
 各司道公費有較前酌加酌減者均就各署情形持平定議統計歲需公費銀
 二十萬零一千兩自本年四月初一日起支按月於司庫具領原有款項均令
 逐款解司不得短少至額支廉俸役食仍舊辦理如遇交替截日核算閏年照
 加惟查已提江漢關之平餘生息等項約銀五萬兩由監理財政官報告刑宜
 關之火耗平餘解費為饒商彌補虧款約銀二萬兩亦經咨部以上二款向係
 該關道等所得是舊有之款共應二十七萬餘兩見定各司道公費僅二十萬
 兩有零實省銀七萬兩

又湖南巡撫楊文鼎奏統一財政設立公所各員薪資及各項開銷除將藩司
 衙門及牙釐善後兩局原有經費抵支年可省銀一萬二千兩又奏省城高
 等審判一廳長沙府地方審判一廳長沙善化兩縣初級審判兩廳並附設檢
 察各廳經常費六萬二千一百兩

又開缺河南巡撫吳重熹奏藩署設立財政公所其常年經費共需庫平銀一
 萬六千餘兩

又山東巡撫孫寶琦奏去年與司道提議將各缺歲入款目悉數查核藩司朱
 其煊深明大義力顧時艱將本缺例有稅契規費五萬兩報效充公藉資提倡
 臣復會同酌定司道公費擬藩司月支實銀二千兩比較年省三千三百餘兩
 提學司一千兩比較原定公津年省三千五百餘兩臬司一千兩又審判廳見
 未成立另支發審局經費及津貼刑幕比較原有歲入各項並無懸殊俟改設
 提法司後再定鹽運司一千二百兩比較原支公費雜項年省六千九百餘兩
 巡警勸業兩道月各支銀一千兩比較原領公費各省三千餘兩濟東泰武臨
 道一千兩比較原領公津年省五千二百餘兩兗沂曹濟道一千兩另支津貼
 幕友全年一千兩比較原領公費年省二千六百兩登萊青膠道兼管關稅比
 照藩司例月支二千兩其本缺向有歲入各項屢經派員調查尚未確實另案

核咨又查前撫臣周馥奏明各州縣提取規費改定道州府公費原案東昌沂
 州兩府各歲支九千兩泰安兗州曹州登州萊州五府各七千二百兩青州府
 七千兩武定府六千二百兩均酌缺分之繁簡規定應照舊接支惟濟南府原
 定歲支一萬八千兩未免過鉅擬照各道例月支實銀一千兩比較原有歲入
 各項年省六千二百餘兩以上所定公費統以月計並刪除扣建勻閏等例以
 期簡捷遇閏照加俾資辦公均自宣統二年正月實行內惟鹽運司登萊青膠
 道暫由本庫本關支發外其餘統由藩庫支發作正開銷其各缺原有歲入款
 目半屬規費概令歸公亦自正月始全解藩庫存儲見定公費比較原支
 之數歲省銀三萬兩有奇

又奏臣署歲領養廉公費及一切常年出入款目核實裁汰自本年正月始除
 廉俸仍照章減扣支領外暫定月支公費銀二千五百兩由藩司庫支解又歲
 修各項實需及電燈紙張等七項雜支向由善後局開支年約銀一萬五千餘
 兩見定月支銀一千兩併均作正開銷其各署局向解臣署公費均撥令悉解
 司庫存儲每年核省約有二萬餘兩

又奏山東省城商埠各級審判廳暫定俸薪辦公等費合計歲需銀六萬五千
 兩上下週開照加又奏東省財政公所常年經費歲需銀五萬四百餘兩比較
 藩司及四局原支員司薪工等費年省銀一萬餘兩

又四川總督趙爾巽奏新設昭覺縣擬請歲支俸銀四十五兩廉銀七百五十
 兩衙役三十名工食銀一百八十兩禁更捕仔二十二名工食銀一百二十二
 兩至應支公費俟設廳既定再行議給其典史應支俸廉等項即照各典史缺
 例定數目支給每年另支公費銀二百四十兩又添設普威巡檢應支俸廉等
 項查照黃木廠巡檢之數支給另支公費銀二百四十兩
 又奏准每年加給儲備屯員公費銀一千兩
 又署兩廣總督袁樹勛奏粵省城商埠各級審判廳成立年需薪水公費銀
 三十八萬餘兩又廣東全省擬派看守委員繁縣二人簡縣一人合計需員一
 百三十餘人每人月給薪金公費共銀三十兩

又廣西巡撫張鳴岐奏酌定司道以下各官公費辦法略稱一酌定各官公費等級擬府直隸州分三等同通州縣分五等佐貳雜職分三等而以其缺分事務之繁簡道里之遠近支配之其銀數則府廳州一等月支銀八百兩二等六百兩三等四百兩計一等缺十三等缺二年共支銀十一萬零四百兩同通州縣一二等支數均與府廳州同三等月支銀五百兩四等四百兩五等三百兩計一等缺十三等缺二十四等缺七五等缺三年共支銀五十一萬四千八百兩佐貳雜職一等月支銀一百兩二等五十兩三等三十兩計一等缺四二等缺八十二三等缺七十四年共支銀八萬零六百四十兩府廳州縣為各項行政始基自非佐理有人吏治終難整頓擬請分科治事每署分設三科曰文牘曰主計曰庶務每科設科員一人各員公費隨缺分等統計九十缺年共支銀九萬七千九百二十兩此外司道公費除四巡道酌加變通外餘暫仍舊年共支銀八萬九千二百兩統計以上五項年共支銀八十九萬二千九百六十六兩除司道仍舊攤開支給外其餘以五年二閏核計年應增銀二萬六千七百九十二兩均係體察見情酌中擬定將來缺分如有繁簡變遷之處再當因時損益奏咨辦理惟其中有不能不併案辦理者二端查光緒三十年勻缺公費案內若缺川資亦經定章第所定多寡有無之數係以缺分之優劣為衡按之見在辦法尙嫌不均是以有釐訂川資章程之議攤款為府縣各官之累上年奉 諭分別裁除業已另案奏咨原案聲明酌留各項係政務必需之款一時無款籌抵應併入公費案內核辦是以有彌補攤款之議併此二巧通計年應支銀九十五萬五千七百餘兩此酌定各官公費川資及彌補攤款之大概辦法也一籌撥公費底款查公費底款計分兩項曰各官原支公費養廉曰各屬原收平餘規費各屬規費前此勻缺公費案內雖經分別提解然量有餘而酌取易若罄全數而清釐見查平餘以丁米為大宗而廠稅盈餘次之規費以船行為大宗其他各項次之兩項年共計銀三十四萬餘兩雖不能恃為確數而大致當不懸殊擬請自宣統三年正月起除應行裁革不計外概由公家按照原額征收俟經過一年即將全年收入實數定為

常額此外司道以下各官原支養廉銀八萬三千三百零四兩耗廉銀二萬七千八百三十兩零鹽道及各屬鹽廉銀一萬五千零四十兩原支勻缺公費除三司養廉及各項提款攤款應行核銷外合溥梧兩府公費並計共銀十四萬三千三百三十三兩以上各款統計全年收入銀六十一萬一千二百餘兩均充作公費底款不得挪作別用惟就收支兩項比較計不敷銀三十四萬四千四百餘兩桂省財力艱窘一時萬難籌措無已惟有暫行減支之法除司道佐貳雜職佐治員公費毋庸議減外府廳州縣公費每缺月擬減支銀一百兩連週閏加增計算全年可省銀十一萬一千六百兩餘銀八十四萬四千一百餘兩作為暫行實收之數收支比較尚不敷銀二十三萬二千八百餘兩酌定公費為整頓財政澄清吏治之根本再三審察實屬無可再減不敷之數自應另行設法籌補以濟要需其暫減銀兩仍俟續籌有款再行如數支給以重官祿而符原議此籌撥公費底款之大概辦法也

又雲貴總督李經羲奏雲南南關水利清軍同知改為靖邊直隸同知除俸薪照例核給外擬定年支九成養廉銀一千八十兩役食銀二百八十二兩其南關原缺廉俸役食應即撤銷添設之知事擬定俸薪照給年支廉銀二百兩役食六十兩

又奏擬定永康州知州年支養廉銀八百一十兩設役四十七名年支工食銀二百八十二兩分防猛朗巡檢分防小猛統巡檢每年各類支養廉銀二百兩各設役十名年各支丁銀六十兩俸薪照例支給除廉俸外知州定年支公費銀二千兩巡檢一百二十兩由藩庫征收正款項下支放作正報銷

又貴州巡撫龐鴻書奏續裁綠營將弁員缺節存俸薪養廉馬乾蔬紅全年共額支銀二萬一千二百餘兩由司庫查留以備添練新軍之用

又奏省城高等地方初級審判檢察六廳經費每年約需銀五萬兩內外

又廣西巡撫張鳴岐奏廣西新設勸業道缺年支公費銀八千兩不設養廉役食其道署應設科員所需員薪雜項銀兩由該道酌定

又奏憑祥同知與照磨改流設缺伊始需用浩繁擬請給津貼銀一千二百

兩

又奏臣署公費每月由善後局津貼銀一千二百二十五兩行之多年擬仍如數支用聽候部定此外提學司按察司每月各由局津貼公費銀六百六十六兩六錢巡警道勸業道月各貼銀五百兩亦均照支惟藩司辦公向來專恃平餘見正清理財政概須歸公若不定公費必致掣肘擬照雲南廣西之例將貴州布政司公費定爲月支二千兩核與平餘所入較少

皇朝續文獻通考卷一百四十五

職官考三十一 祿秩

宣統三年 諭大學士陸潤庠等見在毓慶宮行走差務重要著加恩陸潤庠每月賞給養廉銀一千兩陳寶琛每月賞給養廉銀八百兩伊克坦每月賞給養廉銀六百兩

又陸軍部奏定各省督練公所公費薪水暫定章程

公費 督練公所公費每月四百兩督辦不支薪

薪水 軍事參議官月支以^{正參領}充者五百兩 科長月支以^{副參領}充者一百二十兩 局長月支以^{副參領}充者一百二十兩 科員月支一等一百兩二等七十兩三等五十兩 副官月支一等一百兩二等七十兩

書記官月支一等六十兩二等四十兩三等三十兩司書生十二兩

又 諭東三省總督錫良等奏各省各官公費礙難核減官俸章程未定以前請按部定預算之數實行著暫照辦理

又典禮院奏請添撥經費略稱從前禮部歲入之款僅有 恩賞經費銀六萬兩養廉銀五千兩飯食銀五千兩地租銀三千餘兩常年預算不敷甚鉅是以前此核給堂司各官津貼甚屬微薄自掌印司員以下大半兼差而不兼薪烏布虛懸者十之四五見在設立專院各廳署分科辦事責成既重勢不能令其枵腹從公且事關典禮尤未便因陋就簡 等按公費最簡衙門擬定津貼數目加以一切飯食雜用核計每年所需已在十萬兩以外又此次新官制於掌院學士外特設學士多員亦應籌給津貼除禮部原有七萬餘兩外每年不敷約計萬餘兩當經列表咨商內閣茲准覆稱與度支大臣商定除從前禮部原有款項七萬餘兩外再由部撥銀六萬兩樽節動用當此款項支絀之時既經內閣及度支大臣公同核定 臣等自應遵照格外樽節懇 恩飭度支部即以改設典禮院之日為始將銀兩如數撥給由 臣院按期領支以資辦公 又度支部奏造幣廠業經開鑄新幣自應先由官俸實行以資倡導前此支發俸銀皆用生銀以兩數為主今用國幣宜以圓數為主方可昭信用而利推行

請 旨頒布實於幣制有神

又訂定海關人員俸薪章程按月以關平銀兩計

總稅務司四千兩稅務司八百兩至一千二百五十兩副稅務司六百兩以上均洋 各等幫辦超等前班洋五百兩 三百五十兩後班洋四百五十兩 三百兩頭等前班洋四百兩 二百五十兩後班洋三百五十兩 二百二十五兩二等前班洋三百兩 二百兩後班洋二百五十兩 一百八十兩 三等前班洋二百兩 一百六十兩後班洋一百七十五兩 一百四十兩 四等前班洋一百五十兩 一百二十兩後班洋一百二十五兩 一百兩

臣謹案海關高職悉為洋員占盡即同一等級而華洋亦分厚薄其餘種種無不區別如洋員居住或優予津貼或置產供給而華員則自本年始一律取消光緒三十四年設稅務學校內班華員均須學校出身非至十餘年資深難得俸金二百兩洋員則試用六月即獲此數既棄親而用釋復瘠魯以肥杞安得謂情理之平哉

又資政院會奏酌擬經費數目略稱資政院各項經費以議員公費及旅費為大宗各國議員歲費豐吝不一多如美國至一萬五千圓少如日本亦二千圓惟俄國係按日給費英國則全不給費國情不同難以比照見值度支短絀之際自應暫從節約擬定為每員於常年會期共支六百圓每會期計共十二萬圓此外議員旅費除在京各員毋庸支給外應以省分之遠近為多寡之等差最遠者八百圓最近者一百圓常年會期計共六萬圓其外藩王公業經理藩部奏蒙 恩准照例馳驛來京此項旅費應即毋庸支給至總裁副總裁公費應照各部院堂官公費數目計算擬定總裁年支一萬圓副總裁五千圓其秘書廳經費自秘書長至書記員數既嚴為限制薪俸亦力戒浮糜其餘守衛經費雜費及預備費均經核實估計統全院各款每年共支三十萬圓如遇臨時會期除議員旅費照常會期辦理外其議員公費擬減半支給加以開會費用擬每一臨時會期定為經費十三萬圓依議行 又東三省總督錫良奏奉省裁撤知縣教佐各缺騰出的款移作審判廳經費

又奏總督公費照資政院核減數目辦理

又奏暫定長白府知府月給廉費三百五十兩通年支銀四千二百兩輝南直隸廳同知安圖撫松禮泉等縣知縣月各給廉費三百兩各銀支三千六百兩

又奏總督司道原定公費數目並請酌加民政使廉費略稱奉天自改建行省後省城督撫司道均係新設官缺各衙署並無絲毫規費自無須飭局調查實與內省情形有別即公費一項曾經升任督臣徐世昌奏明計總督每月五千兩巡撫三千兩左右參贊各一千五百兩提法交涉旗務民政提學度支各司各一千兩巡警勸業兩道各八百兩惟查原定公費外尚有津貼一款計總督每年三萬兩提法交涉度支三司各三千六百兩民政使二千兩提學使二千二百兩勸業道三千兩上年到任因財政支絀業將此項津貼一律停支而東省百物奇昂數倍內地各司道自裁津貼後公私亦多竭蹶然際此庫儲匱乏何敢議增惟民政使從前事簡自裁奉天奉天巡警道缺改升該司爲從二品兼管吏政及巡警事宜職務既繁體制亦略如藩司爲各司道之領袖而原定公費與各司等養廉則每年額支五千兩視提法交涉等司較少殊不足以示體恤擬請將民政使一缺酌定額支養廉銀八千兩公費銀每月一千二百兩自本年月起按月支領遇閏照加

又奏酌定奉省巡道府廳等公費略稱據清理財政局冊開錦新營口道向有廉俸規費等項每年入銀十萬五千二百八十六兩見擬年支公費銀二萬四千兩經費銀七萬二千三百八十八兩實餘銀八千九百六兩與鳳道原報入款尚有套搭未清之處除由該局另查外約計年入銀十一萬七千餘兩見擬年支公費二萬四千兩經費七萬一千兩餘銀二萬三千餘兩遇閏加增有餘其各府廳州縣向領廉俸役食津貼等項共銀三十八萬八千五百三十二兩向收規費盈餘等項共銀四十七萬四千八百八十八兩共入銀八十五萬八千九百四十四兩應由度支司分別截留提解見擬將各府廳州縣分爲五等一等八屬每屬年支公費六千兩經費一萬一千五百七十二兩零二等二十三屬每屬年支

公費五千四百兩經費九千二百兩零三等十一屬每屬年支公費四千八百兩經費七千八百九十七兩零四等七屬每屬年支公費四千二百兩經費七千一百二十九兩零五等五屬每屬年支公費三千六百兩經費五千三百七兩零加以紙張郵電函報與夫勘驗招解囚糧及本官下鄉夫馬並交涉費等項各予規定共需銀十四萬三千四百二十三兩零統共年支銀八十七萬九千二百六十五兩內除已設審判廳各處應減支銀二萬六千七百六十二兩實支銀八十五萬三千五百三兩出入相抵計餘銀六千四百三十七兩遇閏應加七萬三千一百七十五兩以上銀數均以藩平計算各於每年季首給領自規定後向例廉俸役食津貼等名目概行取消各屬例認攤賠款項亦一併革除其餘教官佐雜武職及省內外大小局所向支公費薪津等項本係隨宜酌定擬暫仍舊

又吉林巡撫陳昭常奏定巡撫司道養廉公費略稱巡撫每年養廉銀一萬五千兩公費三萬六千兩民政司養廉五千兩交涉提法度支三司各養廉六千兩提學司養廉四千兩勸業道養廉三千兩五司公費各一萬二千兩勸業道九千六百兩均按實銀支放養廉遵章核扣六分減平公費以九成核發兩年以來率由未改茲據財政局詳稱民政司已升二品度支司職務最繁原定公費不敷從前津貼特有斗稅一成工食及田房契紙售價每張截留錢二千文藉資彌補見經和盤托出計斗稅一項常年以正稅七十萬千核計應提一成錢七萬千契紙售價姑以五萬張爲率應截留錢十萬千兩共十七萬千合實銀三萬餘兩因思吉省公費係以九成核發本已微薄見在度支司既將津貼歸公自應另定擬照舊案十成支放並將民政司養廉年加三千兩公費年加二千四百兩度支司公費年加一萬二千兩每年共增銀二萬七千九百六十兩以每兩五千二百文核計約錢十四萬四千九百餘千即以度支司歸公津貼之款撥抵尙屬有餘

又奏定巡撫司道俸銀數目略稱吉省自光緒三十三年改設行省分設巡撫暨民政交涉提法提學度支五司勸業一道又先後奏設東南東北西南西北

各路道缺所有巡撫應支各銀尚係按照副都統食俸其餘司道亦未核定茲
值預算之際亟應分別釐訂計巡撫俸薪銀二百零七兩五錢七分五釐民政
司同交涉提法提學度支四司各一百五十九兩三錢二分九釐勸業道暨四
路道各九十九兩三錢九分三釐先照上列數編入預算

又奏創辦經征局勻定府廳州縣公費略稱各屬缺分繁簡不同若不豫為籌
算恐苦樂不均吏治有礙酌中擬定各府每月酌給公費銀一千兩繁缺另加
津貼各廳州縣分爲三等最繁缺每月八百兩繁缺七百兩中缺六百兩佐貳
一律普定以免枵腹從公遇閏照加即由經征局按季撥給以省領解之煩其
向來各項攤款自應由司另行籌撥概免流攤

又奏賓州府地方初級審判四廳經費每年共需銀二萬八千餘兩
又奏擬定新設陞改四路各道督府廳州縣教職佐雜等缺俸廉役食數目清
單

新設各缺項下 道 西南路道西北路道東南路道東北路道 查勸業
道奏准年支養廉銀三千兩扣平六分以上四道擬仿照辦理惟西南西北
兩路道原名西路道哈爾濱道設立已久先經優給公費應從奉 旨改爲
西南西北兩路道缺之日起支東南東北兩路道從設缺日起支 府 新
城府依蘭府密山府 查吉林府年支俸銀一百零五兩養廉二千兩役食
四百五十八兩四錢遇閏加銀三十八兩二錢均扣平六分以上三府均居
僻地從設缺日起仿吉林府俸銀照給養廉酌減二百兩年支一千八百兩
役食三百二十二兩遇閏照加 廳 濱江廳東甯廳輝春廳虎林廳 查延
吉廳年支俸銀八十兩養廉一千兩役食四百四十六兩四錢遇閏加銀三
十七兩二錢均扣平六分以上四廳從設缺日起將俸廉兩項仿延吉廳支
給役食酌減另訂年支三百二十二兩遇閏照加 州 臨江州濛江州綏遠
州 查伊通州年支俸銀八十兩養廉八百兩役食四百四十六兩四錢遇
閏加銀三十七兩二錢均扣平六分以上三州從設缺日起將俸廉兩項照
伊通州支給役食同上惟臨江州見已陞改府缺其未改之先仍照此數辦

理 縣 榆樹縣方正縣樺甸縣長嶺縣樺川縣舒蘭縣額穆縣阿城縣富
錦縣饒河縣汪清縣雙陽縣德惠縣 查農安縣教化縣年支俸銀四十五
兩養廉八百兩役食四百四十六兩四錢遇閏加銀三十七兩二錢以上十
三縣從設缺日起俸廉照農安教化支給役食同上惟榆樹縣見已陞改直
隸廳其未改之先仍照此數辦理 教授 新城府教授 查吉林府教授
年支俸銀四十五兩役食六十兩零六錢六分七釐遇閏加銀五兩零五分
均扣六分平新城教授從設缺日起照吉林支給 經歷 新城府經歷依
蘭府經歷 查吉林府經歷年支俸銀四十兩養廉一百二十兩役食一百
六十五兩六錢遇閏加銀十三兩八錢均扣六分平以上兩府經歷擬從設
缺日起照吉林支給 巡檢 濱江廳巡檢臨江府巡檢方正縣巡檢 查
雙城廳巡檢年支俸銀三十一兩五錢二分養廉七十一兩五錢二分役食
六十兩遇閏加五兩均扣平六分以上三巡檢擬從設缺日起照雙城廳支
給 陞改各缺項下 府 雙城府賓州府臨江府甯安府五常府延吉府
以上六府均以各州廳陞改惟延吉府事務較繁擬將俸廉兩項照吉林
支給其餘各府概照新城等府新訂之數役食並照前訂數目辦理均從陞
改之日起支 廳 榆樹直隸廳 州 伊通直隸州 以上一廳一直隸
州以州縣陞改其俸廉役食等項擬從陞改日起照新訂濱江廳支給 縣
穆稜縣和龍縣 以上兩縣以知事經歷陞改其俸廉役食等項擬從陞
改日起照新訂榆樹方正等縣支給 舊設各缺俸廉役食改發實銀項下
長春府農安縣長春府教授經歷農安縣巡檢訓導榆樹廳巡檢 以上
七缺廉俸向照旗官俸銀搭票減成之例實放不足六成如長春府農安縣
養廉照額先扣一成以一半再扣二成按八成扣六分平支放一半搭票支
放役食照額扣四成按六成扣六分平支放教佐各缺俸銀役食減扣辦法
與府縣同惟佐雜養廉照額以一半扣二成按八成扣六分平支放一半搭
票支放所謂搭票支放者每票銀一兩僅發實銀二錢五分所餘七錢五分
給票赴部具領今則票已停止款成實扣以故府縣教佐無不受虧茲值整

飭吏治之際應從宣統二年起按吉省通例除扣平之外一律改發實銀以示體恤

又黑龍江巡撫周樹模奏江省省城各級審判檢察廳見均成立所有經常各款統計高等地方初級審判檢察六廳每年需銀六萬二千三百二十八兩較之原奏預算數目共加銀一萬一千零四十四兩大半因膳費薪炭等項原作活支不在上年奏報之數此次分別規定列入經常以昭核實

又署綏遠城將軍信勤奏裁撤調查局歸併墾務公所分科治事釐定經費薪工每月額定一千三百二十兩隨時差委活支各款每月約銀二百兩左右

又熱河都統誠勳奏查豐甯一縣原定每年津貼銀三千兩迨光緒二十九年因不敷辦公復加一千兩每年共銀四千兩維時該縣經徵斗秤各稅尚有贏餘連同津貼足敷辦公見在斗秤稅已撥歸森吉圖稅員儘徵盡解縣署進款少此大宗若不量加津貼不足以勵廉隅懇 恩再加一千兩至平泉州屬之大名城州判一缺原定津貼每年四百兩該州判廉俸甚微不敷辦公擬請加給銀二百兩以示體恤其開魯林西綏東三縣設立巡檢兼典史三缺見均委員試辦應領廉俸前經奏明照塔子溝等巡檢辦理是津貼一項自應查照成案每年各給銀四百兩均由到任日起支

又直隸總督陳夔龍奏財政總匯處原設四股改為軍政行政兩股所派四股之坐辦幫辦各員概行裁撤計常年經費約需銀八萬六千餘兩比較四股及陸軍餉局原支員司薪工等項年約省銀一萬七千餘兩

又兩江總督張人駿奏江蘇新設交涉使酌定俸廉公費經費略稱江蘇為南洋總匯交涉使兼轄安徽江西兩省事務繁重用人較多自應照直隸交涉使酌定費用惟財政支絀不能不量為撙節請照江蘇提法使例歲定俸銀一百三十兩養廉銀八千兩折給八成實支銀六千四百兩養廉即在甯蘇兩司庫內各半支發又年給該司公費銀一萬四千兩交涉公所員役薪工及公所經費銀二萬九千八百八十兩遇閏照加不扣小建又外交經費一項專為洋務交際之需 署向設迎賓館專員辦理由財政局月支一千兩至二千餘兩不

等 臣抵任後將該館歸併洋務局月支銀一千兩有餘流支不足歸補按月報銷今雖設交涉使 署仍不能廢酬酢之文應將此項外交經費按月解存交涉公所以便隨時提支至往來會話仍需留通譯等員擬撥北洋大臣辦法將前兩江洋務局道員鄭汝駸曾磐二員改歸 署差遣每月支薪銀二百兩今新設交涉使需費較多籌撥維艱擬將該司常年公費經費及修築開辦等費悉分十成以六成由甯蘇分認四成由兼轄之皖贛兩省分認其甯蘇之六成先儘原支洋務局經費撥充不敷再由甯蘇各半分籌並將蘇皖贛所認之款分別按月解由江南財政公所彙同甯省應撥款項併解交涉使支用其臨時特別用款如係一省之事歸一省籌給若事關三省仍照以上成數分攤

又奏裁江蘇綠營參將以下三百七十七員弁什長正兵一千五百五十三名計每歲共減俸薪餉乾庫平銀七萬四千七百八十三兩一錢五釐八毫制錢二十五千二百四文又江南軍械總分各局分別歸併酌留辦事員司統計年減薪費銀一萬二千七百八十餘兩

又安徽巡撫朱家寶奏定提法司科長月薪銀圓一百二十元一等科員九十元二等科員六十元書記官三十元

又江西巡撫馮汝駸奏裁撤洋務局所有該局經費每年向需銀一萬餘兩業經裁節五千兩餘款分別提撥 署交涉科及巡警道署員薪之用

又閩浙總督松壽奏新設交涉使酌定廉俸公費等項略稱官祿以品級為衡今交涉使定為正三品與提法使品級相同應支俸銀養廉擬請照提法使每年議給俸銀一百三十兩養廉銀八千兩仍扣減平等款又每年支公費銀一萬四千四百兩遇閏照加由司籌給役食一項交涉公所既有月支雜役護兵薪工等項名目目前籌款維艱自應力求撙節毋庸另支公所經費及接待費兩項年支銀二萬二千七百六十七兩二錢四分五釐均以原支洋務局經費分別照數撥支其有臨時特別支款應由交涉使隨時請示辦理

又奏定巡警勸業兩道廉俸役食等款略稱查巡警道係屬新設擬照福建巡道例年撥養廉銀二千兩俸薪一百零五兩夫役年支工食銀一千二百兩勸

業道係糧道改設擬年支養廉銀二千兩即將裁撤糧道原有養廉照支俸薪一百零五兩亦將糧道原有俸銀照支夫役年支工食銀一千二百兩

又浙江巡撫增糧奏定各司道公費略稱據各該衙門舊有各款藩司年約二萬一千八百餘兩臬司一萬六千二百餘兩運司三萬三千九百餘兩糧道一萬六千八百餘兩杭嘉湖道一萬四千兩甯紹台道三千五百餘兩金衢嚴道八千三百餘兩溫處道七千兩至學司交涉司巡警道勸業道等均係新設祇有原撥公費計學司一萬一千七百餘兩交涉司九千餘兩巡警道一萬二千二百餘兩勸業道一萬零二百餘兩綜計全省各司道原有辦公各款共銀十六萬五千一百餘兩均應實行勻給公同參酌藩司爲統一財政專官兼管行政見在釐餉膏酒局併歸辦理重事繁每年擬給公費銀二萬兩學司交涉司各給一萬二千兩臬司一萬五千兩運司一萬八千兩糧道巡警道勸業道各一萬兩杭嘉湖道甯紹台道主管海關權務並辦交涉較他道稍繁各一萬二千兩金衢嚴道溫處道各九千六百兩統計年需公費銀十五萬二千兩較原有各款實省銀一萬四千九百餘兩

又湖廣總督瑞澂奏裁撤局所歸併藩司擬設度支公所約計薪費歲需龍銀十一萬八千餘元折合銀八萬餘兩藩司及善後統捐兩局原有經費九萬八千餘兩以此抵支每年約節銀一萬七千餘兩

又奏定湖北提法使屬官薪水略稱提法司屬官具有獨立性質不得兼充他差自應優給薪水見定科長月薪銀元二百元一等科員一百二十元二等科員八十元書記五十元

又奏酌定府廳州縣各官公費略稱行政司法見未分立一切庶政責成牧令應辦之事視昔加多且向恃錢漕平餘爲入款之大宗見因錢價奇賤短絀甚鉅賢者視爲畏途不肖者從而滋弊關於吏治隆污實非淺鮮茲經公商擬照直隸成案將公費經費分爲兩起計湖北知府十缺分上中下三等武昌漢陽兩府爲上等各月給銀五百兩荊州宜昌襄陽鄖陽施南五府爲中等各四百兩黃州安陸德安三府爲下等各三百兩應缺二直隸州缺一州縣缺六十有

六別爲四等一等一級各月給銀四百兩爲夏口廳荊門直隸州江夏縣三治一等二級各月各三百五十兩爲漢陽沔陽黃陂孝感鶴峯江陵黃岡天門鍾祥東湖襄陽十一廳州縣二等一級各月各三百兩爲武昌興國大冶蒲圻安陸應山隨州雲夢麻城廣濟黃梅蘄州蘄水漢川監利京山潛江南漳棗陽光化巴東鄖縣恩施二十三州縣二等二級各月各二百五十兩爲嘉魚咸寧崇陽通山通城羅田公安石首松滋枝江宜都均州宜城穀城歸州長陽興山長樂黃安應城當陽遠安宣恩咸豐房縣保康鄖西竹谿竹山利川建始來鳳三十二州縣以上公費專供本官用度凡火食僕從車馬應酬雜支均賅在內年計共銀二十八萬六千二百兩遇閏加增免扣減平廉俸二項照舊支給至府廳州縣經費如幕僚員薪書役工食一切因公用款其中職務繁簡不同需費多寡懸絕固不任其浮糜尤不得使其虧累此外邊遠山缺亦應酌給赴任川資以示體恤所有進款就光緒三十四年冊報各府每年原有銀九萬一千餘兩各廳州縣原有銀五十七萬餘兩秋米四百三十石除去見定公費外將來勻定經費所差本屬無幾惟鄂省各屬進款多係丁漕平餘刻下幣制尙未實行錢價時有漲落且歲事有豐歉征收有多寡平餘盈絀隨之不同原有進款不能遂爲確數兼以近年邊瘠之缺在籤捐餘利撥給津貼亦併計在原有進款之中將來票額遞減此款全不足恃又鄂省向有攤捐各款雖無蘇浙各屬之多然亦久爲有司之累攤捐名目概予蠲除如何抵補另案核辦至藩司所屬庫大使經歷照磨三缺向有火耗平餘銀六千八百餘兩見定每員年給公費銀各一千五百兩庫大使向無養廉加給八十兩役食年給銀三百兩經歷照磨役食年各給銀一百五十兩共銀五千一百八十兩按該三廳原有之數年可省銀一千六百餘兩提歸正款其餘同通佐雜及大小武職衙門廉俸以外本無公費閒有署局津貼循案供支爲數無幾一時普議支給實苦無此財力應俟府廳州縣公費經費核定再議辦法荊州將軍副都統原有公費擬請仍舊其另由江陵縣每年供支各項銀二千八百餘兩俟核定該縣署經費另行酌辦又奏總督原有規費擬改解度支公所專款存儲由所月解銀四千兩作爲暫

定公費之數遇閏照加減平免扣俸銀養廉仍照例支給

又奏定湖北交涉使廉俸公費略稱官祿以品級爲衡交涉使與提法使同品每年應支俸銀一百三十兩扣除六成減平銀七兩八錢實支一百二十二兩二錢湖北按六成支銀七十三兩三錢一分湖南按四成支銀四十八兩八錢八分每年額支養廉六千兩八成應支銀四千八百兩除扣六成減平銀二百八十八兩實支四千五百一十二兩湖北六成二千七百七兩二錢湖南四成一千八百四兩八錢均於兩省司庫內動支又公費一項亦照提法使年定一萬七千兩遵見行部咨減爲九成開支計銀一萬五千三百兩湖北六成支銀九千一百八十兩湖南四成支銀六千一百二十兩查湘省各官公費即照部議九成發給不敷甚鉅無款可撥擬在長岳兩關稅款項下各半動支至外交經費爲交涉之要需開支本難預計見每年定七千兩湖北六成四千二百兩湖南四成二千八百兩又員役薪工公所費用年定一萬七千兩湖北六成一萬二百兩湖南四成六千八百兩遇閏照加免其扣建

又奏湖北府廳州縣經費略稱查各廳州縣署用出入相衡大半虧多贏少其閒浪費濫支雖亦在所不免而實則進款短絀迥與往歲不同此由時勢使然非可強爲一致茲請各府於原定公費外年給經費銀三千六百兩武昌漢陽荆州三府繁要而兼關稅各加二千四百兩鄖陽施南兩府距省較遠又各加赴任川資銀六百兩各廳州縣視其原定公費等級數目分別各加一倍夏口廳荆門直隸州江夏縣三處各給四千八百兩漢陽沔陽黃陂孝感感德峯江陵黃岡天門鍾祥東湖襄陽十一廳州縣各給四千二百兩武昌興國大冶蒲圻安陸應山隨州雲夢麻城廣濟黃梅蘄州蘄水漢川監利京山潛江南漳襄陽光化巴東鄖縣恩施二十三州縣各給三千六百兩嘉魚咸寧崇陽通山通城羅田公安石首松滋枝江宜都均州宜城穀城歸州長陽興山長樂黃安應城當陽遠安宣恩咸豐房縣保康鄖西竹谿竹山利川建始來鳳三十二州縣各給三千兩又繁要之夏口廳每年加給四千四百兩江夏縣加二千四百兩荆門直隸州漢陽縣各加一千二百兩江陵縣加一千兩隨州加八百兩黃岡東

湖襄陽興國光化五州縣各加六百兩有隄之荆門沔陽江陵黃岡天門鍾祥漢州監利京山潛江公安石首松滋枝江十四州縣每年再各加六百兩距省篤遠之鶴峯巴東鄖縣恩施歸州長陽興山長樂宣恩咸豐房縣保康鄖西竹谿竹山利川建始鳳來十八廳州縣每年各給赴任川資銀六百兩所有各府廳州縣經費及因繁要隄工加給之費均遇閏照加赴任川資無須加閏凡到任未滿一年者按月勻攤既滿概不重支就近委代之員亦不支給綜計各項經費連原定公費十府共銀九萬一千二百兩六十九廳州縣共銀五十一萬二千兩茲就查出各府原有歲入各款銀五十七萬五千餘兩比較有餘應留備遇閏照加及進款短絀隨時抵補之用

又河南巡撫寶森奏酌定文職各官公費清單

布政司每月三千兩年共銀三萬六千兩 提學司九百四十兩年共銀一萬一千二百八十兩 按察司八百兩年共銀九千六百兩 巡警道八百六十兩年共銀一萬三千二百兩 勸業道七百兩年共銀八千四百兩另有由部給發津貼銀二千兩仍照支 南汝光道河陝汝道同七百兩年共銀八千四百兩 開歸陳許鄭道一千五百兩防汛經費年額一千二百兩年共銀一萬九千二百兩 彰衛懷道一千五百兩防汛經費年額八百兩年共銀一萬八千八百兩 開封府八百兩司法經費三百兩年共銀一萬三千二百兩 歸德府三百兩司法經費一百二十兩年共銀五千四百兩 陳州府四百六十兩司法經費一百八十兩年共銀七千六百八十兩 彰德府五百兩司法經費二百兩年共銀八千四百兩 衛輝府五百五十兩司法經費二百二十兩年共銀九千二百四十兩 懷慶府四百二十兩司法經費一百六十兩年共銀六千九百六十兩 河南府五百五十兩司法經費二百二十兩年共銀九千二百四十兩 南陽府六百兩司法經費二百五十兩年共銀一萬二千兩 汝寧府三百八十兩司法經費一百四十兩年共銀六千二百四十兩 下南河同知一千兩防汛經費年額一千一百兩年共銀一萬三千一百兩 上南河同知一千一百兩防汛經費年額

銀一千二百兩年共銀一萬四千四百兩 中河通判 鄭中河通判各支一千一百兩防汛經費年額一千三百兩年各支銀一萬四千五百兩 黃沁河同知九百兩防汛經費年額八百兩年共銀一萬一千六百兩 下北河同知九百五十兩防汛經費年額八百兩年共銀一萬二千二百兩 祥河通判九百五十兩防汛經費年額一千兩年共銀一萬二千四百兩 衛糧通判五百兩防汛經費年額七百兩年共銀六千七百兩 理事同知鹽捕同知各一百二十兩年各支銀一千四百四十兩 南汝通判及歸德彰德 懷慶 河南 汝甯 陳州等府通判各七十兩年各支銀八百四十兩 最繁要州縣二缺各六百兩司法經費財務經費均二百兩年各支銀一萬二千兩 繁要州縣十二缺各五百兩司法經費財務經費均一百五十兩年各支銀九千六百兩 繁缺州縣十六缺各四百兩司法經費財務經費均一百兩年各支銀七千二百兩 中缺州縣六十九缺各三百兩司法經費財務經費均八十兩年各支銀五千五百二十兩 簡缺州縣八缺各二百四十兩司法經費財務經費均七十兩年各支銀四千五百六十兩 布政司庫大使一百八十兩年共支銀二千一百六十兩 布政司經歷一百兩年共支銀一千二百兩 按察司經歷八十兩年共支銀九百六十兩 按察司司獄 直隸州州同 直隸州州判 州同 州判各三十兩年各支銀三百六十兩 府經歷 縣丞 主簿 巡檢 府照磨 同知照磨 府司獄 州吏目 典史 驛丞 府教授 府訓導 州學正 州縣訓導 縣教諭各二十三兩年各支銀二百七十六兩 以上所開除河工各員防汛經費向不加開仍應照辦外其餘遇開照加至武職及局所各員俸薪或為例定或本無多均照向數暫列預算

又奏酌量增減撫署公費略稱河南巡撫兼管河防向支河工各款自上年裁減銀一萬二千兩每年尚有公費銀一萬八千兩防汛經費銀一萬兩其巡撫本缺除廉俸外祇有每年按季每季墊款兩項共銀三千九百兩併計每年原有銀三萬一千九百兩論政務地方為重河防較輕計經費巡撫甚微河工獨

多在從前積久相沿原可通融挹注此次釐訂為官俸之先導似當增設巡撫公費酌減河工支款方為正辦 臣酌量情形似可減一千兩月支二千兩豫河南北兩道月支各一千五百兩巡撫係屬兼管應減五百兩月支一千兩防汛經費原備巡視河工所用見擬月減五百兩遇開照加竊維設官制祿初非為一時一人之計原可無庸引嫌惟合計每月共銀三千五百兩與原數雖減較上年裁贖支數究增而部限綦嚴又未敢過事遲延惟有暫照此數列入預算應俟政務處度支部核定成數仍當遵支以歸一律

又山東巡撫孫寶琦奏省城商埠各級審判廳限成立略稱各廳應需經費照本省預算連開共銀七萬四千四百兩見以原定檢察官薪俸少於推事經憲政編查館核令改歸一律而各項廳員人數按法部奏改定額亦互有出入均已遵照更正此外又有預算未經計及者數事一各廳開辦之初新舊遞嬗派委各員公牘或未諳習擬於典主簿中各添一行走人員以向辦刑幕者充之於錄事下酌派書記生以向當刑書者充之一檢察廳既奉偵查要任擬設司法警察以供指揮一地方兩廳既有未決犯徒擬定口糧銀兩以資養贍一省城初級審判廳既有看守所擬設所官一員一各廳看守所既有待質人犯擬各設醫官一員高等一廳地方兩廳僅有庭丁不敷使用擬各增雜役十名一地方兩廳看守所官及六廳錄事原定薪俸較薄擬稍增加一煙臺商埠華洋雜處物值較昂雜用擬稍寬備以上各項併計連同原定預算新定經費連開共銀九萬八千五百二十七兩內尚有正月份未經准領之款除去免計實銀九萬七千八百六十九兩較原預算增銀二萬七千八百二十五兩因前准法部咨有部定審判費每廳標準高等二萬八千餘兩地方三萬兩零初級六千餘兩原案少者照增另入追加預算等語東省所增銀數各廳分計惟省城初級較部定為多統計則所省仍鉅未逾標準擬請照支

又奏酌定東省廳州縣正佐各官公費等項略稱山東州縣收入除廉俸及坐支各款外向以丁漕銀價盈餘為大宗全省約有九十二萬四千九百五十六兩雖將來頒行國幣之後此項統歸無著必須另訂辦法而目前實占鉅額此

外規費收入全省僅有十八萬九千四百七十五兩有奇加以向來支領各款預計定公費後可以停止者一州縣舊支公費一萬八千二百七十二兩役食七萬四百一兩零一地丁脚費約一萬六百七十兩零一漕倉脚費約六百七十三兩零一運漕脚價盤費約一千九百六十兩零一院司道府役食六千九百五十六兩零一同通佐雜役食一萬二千五百七十七兩零一河員津貼一千三百四十四兩連前二項合計亦不過一百二十三萬七千二百八十七兩有奇所定各官公費自不得不力從節約以防超過茲將全省州縣分別等第定為直隸州三缺一等州縣十缺月支公費七百兩以四百兩為本官公費供本官日用事務之需三百兩為本署行政費供本署延訂幕友募用勇役津貼書吏飯食辦公紙筆及征收緝捕等用二等州縣十八缺月支六百三十兩以三百六十兩為本官公費二百七十兩為本署行政費三等州縣四十缺月支四百九十兩以二百八十兩為本官公費二百十兩為本署行政費四等州縣三十六缺月支四百二十兩以二百四十兩為本官公費一百八十兩為本署行政費其他同通佐雜則定為同知十員月各五十兩布政司經歷一員通判六員月各四十兩府經歷一員府司獄一員州同七員州判六員吏目十一員典史九十六員月各三十兩縣丞三十四員巡檢二十七員主簿四員月各二十五兩共需銀七十三萬七千九百四十兩此外又有向歸州縣捐解各款一正款加重一萬二千兩一正雜解款公費一萬兩一滄倉解費加重添平等款一萬六千一百九十七兩零一漕折凌米公費三萬一千六百四十八兩零一滄倉米折項下節省裁缺糧道庫大使經費二千七百五十六兩一藩庫大使收款加重發款長平八千兩一年例攤捐三十三萬八千兩一各道府書吏紙飯一萬二千兩共銀四十三萬六千二百兩有奇以上各項或隨正雜搭解或按季攤捐向皆取之規費平餘稍資彌補見既將前項提充公費自應免其捐解合計准支公費及抵補攤捐兩項共銀一百十六萬八千五百四十二兩一錢八分一釐出入相抵尚餘銀六萬八千七百四十五兩六錢八分九釐庶於分配之中仍見撙節之意

又山西巡撫丁寶銓奏酌定司道各官公費略稱計年入養廉藩司實支銀四千七百六十四兩又地丁隨解公費並供支等項二萬七百餘兩學司二千六百三十二兩又由司庫年支公費九千二百兩又供支工程等項一千三百兩臬司四千九百六十四兩又各屬公費歲修等項一萬二千三百餘兩巡警道二千七百六十八兩又津貼銀二千八百餘兩冀甯道二千七百六十八兩又各屬公費供支等項九千五百餘兩河東道二千七百八兩又公費填衙及癸卯新綱經費官運餘利等項一萬二千五百餘兩歸綏道二千七百八兩又歸化關撥解公費一萬二千兩以上各款除養廉照額另支外餘均掃提歸公今照章酌定公費擬藩司年支銀一萬八千兩學司一萬五百兩臬司八千兩巡警道原支津貼二千八百餘兩實不敷用擬每年改支公費銀八千兩冀甯道八千兩河東道稽查鹽務歸綏道巡視邊防費用較繁每年各支公費銀一萬兩均自宣統二年正月初一日起由司庫支發作正開銷其掃提歸公各款亦同日起全數解歸司庫存儲入冊造報通盤核算計各司道每年裁省之款除加給巡警道公費外實省銀七千八百餘兩如有漏未查出之款不論年月遠近照數飭繳至府廳州縣以下應定公費俟將每缺每年入款及各項規費名目查明另案辦理又奏晉省財政困難正應力圖撙節臣為全省官員表率尤當仰體時艱躬自刻苦到任時即與藩司等酌議除養廉照支外暫定每月公費銀一千二百兩作為署辦公之用由司庫照解作正開報所有向解署各項均歸司庫存儲

又奏晉省財政公所常年經費約需銀一萬六千餘兩
又奏定晉省提法司屬官月薪科長每月八十兩一等科員六十兩二等科員五十兩一等書記二十四兩二等書記十六兩
又奏酌定府廳州縣公費經費數目清單

知府九缺分二等 太原府汾州府潞安府大同府平陽府蒲州府朔州府以上七缺均列一等每年公費銀四千兩經費銀一千兩太原府係首要另加經費銀一千兩 澤州府甯武府以上二缺均列二等每年公費銀二千

兩經費銀一千兩 口外同知通判十二缺分三等 歸化廳列一等每年公費銀三千兩 薩拉齊廳豐廳遠廳以上同知三缺均列二等每年公費銀二千八百兩 和人格爾廳托克托城廳清水河廳興和廳武川廳陶林廳五原廳東勝廳以上同知通判八缺均列三等每年公費銀二千五百兩 直隸州十缺分三等 霍州代州平定州以上三缺均列一等每年公費銀三千兩 經費銀二千兩 忻州保德州絳州解州沁州以上五缺均列二等每年公費銀二千八百兩 遼州隰州以上二缺均列三等每年公費銀二千五百兩 知州六缺知縣八十五缺分四等 永甯州朔州陽曲縣榆社縣徐溝縣汾陽縣平遙縣介休縣鳳臺縣大同縣臨汾縣曲沃縣太平縣永濟縣聞喜縣安邑縣臨晉縣祁縣以上知州二缺知縣十六缺均列一等每年公費銀二千七百兩 經費銀二千五百兩 陽曲縣係首邑另加經費銀一千兩 渾源州太原縣文水縣長治縣高平縣壽陽縣右玉縣崞縣洪洞縣猗氏縣河津縣夏縣太谷縣長子縣襄垣縣潞城縣趙城縣靈石縣天鎮縣以上知州一缺知縣十八缺均列二等每年公費銀二千二百兩 經費銀二千兩 崑崙州應州交城縣孝義縣臨縣壺關縣黎城縣陽城縣孟縣懷仁縣山陰縣廣靈縣鄆縣陽高縣甯武縣神池縣五臺縣翼城縣襄陵縣虞鄉縣榮河縣萬泉縣稷山縣平陸縣芮城縣以上知州二缺知縣二十三缺均列三等每年公費銀二千兩 經費銀一千五百兩 吉州嵐縣興縣甯鄉縣石樓縣屯留縣陵川縣沁水縣和順縣武鄉縣榆社縣沁源縣左雲縣平魯縣偏關縣五寨縣定襄縣靜樂縣繁峙縣河曲縣鄉甯縣岳陽縣浮山縣汾西縣絳縣垣曲縣大甯縣蒲縣永和縣以上知州一缺知縣二十八缺均列四等每年公費銀一千七百兩 經費銀一千兩 通共公費銀二十八萬三千一百兩 經費銀一十九萬五百兩 兩項共銀四十七萬三千六百兩

經費銀一千二百兩 年共一萬四千四百兩 遇閏照加司道以次廉俸均請照舊其公費布政司年支銀二萬兩 提學司一萬一千兩 提法司一萬四千兩 巡警道八千兩 勸業道七千兩 省外潼商安陝延榆綏三道各五千四百兩 統計三司五道每年共支公費銀七萬六千二百兩 遇閏加六千三百五十兩 均指原有入款酌量增減年共可餘銀二萬數千兩 提歸正項收儲至府廳州縣除流攤差費勢難驟停照辦外見擬府分三等西安府年支一萬兩 榆林府八千兩 同州鳳翔漢中興安延安五府各六千兩 直隸州及廳州縣擬分五等一等十一缺年各支一萬二千兩 二等十一缺各九千兩 三等三十七缺各六千兩 四等十五缺各四千五百兩 五等十九缺各三千兩 一律攤開統計府廳州縣每年共支公費銀六十二萬五千五百兩 照見查可抵之原有地丁平餘稅項盈餘驛站支贍行戶陋規僅有五十五萬兩之譜 不敷銀七萬五千五百兩 既經普定公費凡攤捐開接之款均已化私為公 自應以各府廳州縣收入之款為據院司各道公費亦應取給於此 共計無閏之年不敷銀十六萬六千一百兩 有閏十七萬三千六百五十兩 為數較鉅 應俟委員覆查之日再行釐定不足則按等核減有餘則提出歸公以符部章

又奏酌擬府廳州縣公費略稱陝西府廳州縣公費須俟調查清楚方能酌計均平據印委各員稟報到局統計契稅平餘規費等項銀六十二萬二千七百四十五兩八錢四分五釐內除預算案內契稅解款銀一萬五千九百二十兩奉部指加五萬兩 藩司報效銀一萬兩 向由各官攤捐署局書差口食塘報等費二萬二千五百兩 又提補院司道公費不敷銀二萬四千八百兩 外餘銀四十九萬九千五百二十五兩八錢四分五釐 較原擬府廳州縣公費數目計短銀十二萬五千九百七十四兩一錢五分五釐 一再調查各屬入款止有此數 自當按等核減庶可相符由該局司道會同監理官酌擬以缺分之繁簡定公費之多寡計知府七缺八千兩者一五千兩者六直隸州五缺七千八百兩者一六千八百兩者一五千九百兩者一四千九百兩者一四千兩者一廳州縣共八十八缺九千兩者五七千四百兩者四六千九百兩者四五千九百兩者

又陝西巡撫恩壽奏酌定文職各官公費略稱 臣署除廉俸照支外月支辦公

十一千四百兩者二十四千九百兩者二十四千四百兩者七千四百兩者十五千五百兩者十一千三百兩者九計共需銀四十九萬九千六百兩以餘銀相較尚須籌不敷銀七十四兩一錢五分一釐應請於宣統四年正月一律實行至例有供支不能不變通從事者爲土司喇嘛噶箕等差在所不免例銷不足沿爲流攤往往事閱數年而貽累未已請仿四川包辦之法明定限制各州縣有里局者照舊辦理其向無里局之留壩等屬則另籌辦法並將上次認攤未竣之數自明年起由司查明發給免滋轉轄

又四川總督趙爾巽等會奏德格春科高日三土司改土歸流設道員一缺知府一缺知州二缺知縣二缺各缺養廉擬定兵備道每年養廉銀二千四百兩知府二千兩知州一千六百兩知縣一千二百兩遇閏不加各缺公費擬定兵備道月支銀一千兩知府八百兩知州七百兩知縣五百兩佐治員暨司事司書通譯勇夫雜使等薪費口食均在其內各缺所設佐治員兵備道用州縣月支薪銀一百六十兩府州縣用佐雜月支八十兩各缺設司書翻譯勇夫等項司事每名月薪十兩燈油筆墨費二兩藏文翻譯生同司書生每名月薪六兩燈油筆墨費二兩藏文司書生同親兵堂勇每名月支口食銀三兩六錢隊長一名月支十二兩夫役人等每名月支銀三兩三錢

又奏擬請鑪安道月給公費銀一千五百兩巴安康定兩知府一千二百兩三壩夷化兩廳一千兩鹽井等四縣知縣八百兩貢噶嶺縣丞五百兩既定公費毋庸再支養廉尋會議政務處覆奏所擬公費數目與見擬奏設邊北道府各缺多寡不同應飭另議奏咨以歸一律

又署兩廣總督張鳴岐奏廣東提法司屬官月給薪水定科長一百六十兩一等科員一百二十兩二等科員八十兩一等書記官四十八兩二等書記官三十二兩一等錄事十六兩二等錄事十二兩三等錄事八兩又司法公所經費無閏之年需銀三萬六千六百八十一兩六錢除將裁出刑幕修金書吏工食津貼屬官廉俸役食清釐命盜積案局審判兼監獄籌辦處經費抵補外尚不敷銀五千八百六十六兩九錢七分五釐飭由藩司籌撥

又奏定綠營公費略稱查從前各營汛所收經費多寡恆以缺分之優瘠爲衡見在酌定公費數目當以地方之繁簡爲準見就粵省水陸各營汛核計應給公費每年共需九萬零六百兩依照文職津貼辦法按季請領遇閏不加以前簡便本年即從三月初一日實行禁賭之日起支惟此係臨時特別增出之款並未列入預算全案必須籌有的款方准酌議追加見於粵省確礦承商勸諭加認鉅餉以應支銷

又貴州巡撫龐鴻書奏府廳州縣佐貳雜職歲支公費銀兩數目清單

貴陽府大定府銅仁府思南府以上知府四缺各支公費四千六百兩內貴陽一府加銀八百兩共銀一萬九千二百兩 安順府鎮遠府黎平府都勻府遵義府興義府思州府石阡府盤州府松桃府赤水府應州府都勻府以上知府八同知四直隸州一各支公費三千八百兩支銀四萬九千兩 羅斛廳古州廳歸化廳水城廳以上同知二通判二各支公費三千兩共銀一萬二千兩 鎮甯州黃平州黔西州威甯州獨山州正安州貞豐州貴筑縣遵義縣清鎮縣桐梓縣仁懷縣湄潭縣開泰縣銅仁縣安化縣天柱縣荔波縣修文縣普定縣畢節縣鎮遠縣黎川縣以上知州七知縣十六各支公費三千四百兩內貴筑一縣加銀六百兩共銀七萬八千八百兩 台拱廳永甯州開州平遠州定番州安南縣普安縣興義縣安縣龍里縣貴定縣綏陽縣印江縣以上同知一知州四知縣九各支公費三千兩共銀四萬二千兩 八塞廳都江廳丹江廳清江廳下江廳廣順州麻哈州清平縣都勻縣餘慶縣龍泉縣永從縣施秉縣青谿縣玉屏縣以上同知一通判四知州二知縣八各支公費二千六百兩共銀三萬九千兩 册亨州同大塘州判長寨州判錦屏鄉縣丞以上州同一州判二縣丞一各支公費八百兩共銀三千二百兩 三脚壘州同遵義府分駐溫水經歷凱里縣丞方村縣丞郎洞縣丞柳舞縣丞勝秉縣丞正大營縣丞丙妹縣丞新城縣丞印水縣丞四十八溪主簿募役巡檢舊州巡檢得勝坡巡檢捧鮮巡檢羊場巡檢鎮遠司巡檢札佐巡檢省溪司吏目洪州司吏目以上州同一府經歷一

縣丞九主簿一巡檢七吏目二各支公費四百兩共銀八千四百兩 布政司經歷貴陽府經歷安順府經歷都勻府經歷鎮遠府經歷思南府經歷石阡府經歷思州府經歷銅仁府經歷黎平府經歷大定府經歷興義府經歷松桃府經歷水城廳照磨古州廳照磨盤州廳照磨赤水廳照磨定番州吏目廣順州吏目開州吏目鎮甯州吏目永甯州吏目麻哈州吏目獨山州吏目黃平州吏目威甯州吏目平越州吏目平遠州吏目黔西州吏目貞豐州吏目正安州吏目貴筑縣典史修文縣典史龍里縣典史貴定縣典史普定縣典史安平縣典史清鎮縣典史湄潭縣典史餘慶縣典史甕安縣典史都勻縣典史清平縣典史荔波縣典史鎮遠縣典史施秉縣典史天柱縣典史安化縣典史印江縣典史婺川縣典史龍泉縣典史青谿縣典史玉屏縣典史銅仁縣典史開泰縣典史永從縣典史畢節縣典史興義縣典史普安縣典史安南縣典史遵義縣典史綏陽縣典史桐梓縣典史仁懷縣典史亦資孔驛丞以上經歷十三照磨四吏目十四典史三十三驛丞一各支公費二百兩內布經歷貴陽府經歷貴筑縣典史三首領各加銀六十兩共銀一萬三千一百八十兩總計歲支公費共銀二十六萬五千一百八十兩

王慶雲紀耗羨歸公 今日之耗羨同於正供軍國之用取焉官之養廉取焉地方公費取焉非前代進羨餘充私藏之可比故不可以無紀案火耗起於前明 國初屢有厲禁禁之不能則爲之限限之不能乃明定其額而歸公其變法也以漸要皆不得已也康熙四十八年 聖祖諭曰所謂廉吏者非一文不取之謂若纖毫無所資給則居常用及家人胥役何以爲生如州縣官止取一分火耗此外不取便稱好官若一概剝摘則不勝參矣時各省耗羨每兩多不過一錢獨湖南加至二三錢 上擇廉介大吏如趙申喬陳瓊巡撫偏沅令禁所屬六十一年陝西虧空事聞總督年羹堯奏秦省火耗有加之四五錢者請酌留各官用度其餘俱捐出彌補 上諭斷不可行有私派之罪甚重州縣用度不敷略加些微原是私事朕曾諭陳瓊加一火耗尚可寬容瓊奏此 聖恩寬大但不可說出

許其如此其言深爲有理之 諒夫責人以公義而不恤其私情非 聖主所以使下顧 朝廷以一分者微示其意而大吏竟以數倍者昌言之不特不可禁而亦不可限其勢不至歸公不止提解歸公始倡於雍正二年 世宗諭曰州縣有大小錢糧有多寡地廣糧多州縣火耗已足養廉若地小糧少州縣則不能惟不定分數遇差多事繁酌計可以濟用或是年差少事簡即可量減又或偶遇不肖有司加增而清廉者自可減除若酌定分數竟爲成額必至有增無減凡立法行政孰可歷久無弊提解原一時權宜之計將來虧空清楚府庫充裕有司皆知自好則提解自可不行火耗亦可漸省蓋年羹堯之議至是始行後乃酌定分數而各省養廉各項公費實取諸此先是江南加耗五分後遞增至一錢 高宗卽位諭曰向來耗羨州縣任意徵求經巡撫諾岷田文鏡倡爲提解歸公之法各就本省情形酌定分數以外不許絲毫濫征然未提解以前尙爲私項提解以後恐不肖官員視同正課又於耗羨之外巧取殃民著各督撫嚴飭有司耗羨一項可減而決不可增倘多取絲毫卽題參重治乾隆四年從孫嘉淦陳世倌奏免直隸江南錫賦耗羨仍以河南耗餘撥補五年令督撫將各省必須公費分晰款項報部核奏自後各省耗羨掌於戶部湖廣司取之有定數用之有定款於 世廟諭所云將來府庫充裕提解不行火耗漸省者卒無有議及者矣他如關稅之有盈餘鹽課之有雜費昔歸私囊後充公帑亦耗羨之類也竊以爲司權之吏以繭絲爲職當 國家豐亨民閒財利充行取其餘以奉公亦不足深責獨怪夫當時制國用之臣耗羨之入既立爲歲額其出也卽定爲歲需取之惟恐不足用之不留有餘取快一時罔顧後虛使後之人主欲蠲餘利以予民而經費已定不可復減天診人事偶有不齊則國與民俱受其困嗟夫此誰之過與 臣謹案慶雲閩縣人諡文勤爲道咸開名臣著 熙朝政紀曾國藩稱其謀慮老成操之有要此篇雖述當日情事而與近時提解公費相類因節錄於此

皇朝續文獻通考卷一百四十六

職官考三十一 封階

臣謹案 皇朝通考於封階列品級後品級自乾隆五十一年改定已詳前考光宣開新設各官悉載本職之下無事駢枝惟武職名稱全更與前迥異附錄於後云

乾隆五十六年 諭恩詔內給予大小官員封典著各該督撫等將呈請封之文武各員於限內彙齊年終具奏一次不必陸續奏請以歸簡易

嘉慶元年 諭向來遇有覃恩大小官員原准封但所請封之人如係伯叔兄長外祖等尊屬身授撫育恩慈例得推恩者自應准給封典若係疏遠戚屬姻親亦輒轉懇請封典與例不合者豈可漫無限制其應准應駁部中自可

循照定例分別駁辦又何必由各衙門紛紛瀆奏耶嗣後內外大小官員懇請封者俱著彙報吏部覈所奏情節分別准駁彙題以省煩瀆而昭限制其有

情節委曲不同者該部聲明另奏若有私弊許科道封奏

四年吏部奏准內外大小各官業經受封而調任在 恩詔以前者秩雖未增

街已非舊且既有陸任改任之分則調任即為改任應照調任新銜給予封

典其未經到任者止准補請本身妻室不准再請封如上次請過本身妻室與此大不准再請封典

五年奏准倉監督一官係見任各官有銜名而無實級恭遇 覃恩應仍照原官給封

又奏准內外署事官員例應引 見奉 旨後到任在 恩詔以前者方准給封未經引 見者概不准行

又奏准軍營辦事差遣人員其升任在 恩詔以前未經到任者一體給予封贈

又奏准省親修墓葬親各官如在告假限內恭遇 恩詔悉照原官給予封贈

又奏准分發試用人員如知縣借補州同從九品借補未入流等官俱照原銜封贈

又奏准革職有餘罪報捐請封人員照捐復原官之例如問擬答杖已經贖免者銀數酌加十分之二未經贖免者酌加十分之三輕徒已竣者酌加十分之五滿徒已竣及軍臺已滿換回贖回者酌加十分之六軍流贖免者酌加十分之八發遣新疆已經放回者加倍如犯十惡貪汗等項事故者不准捐封

八年奏准捐納分發各部院學習行走人員恭遇 覃恩例不給封嗣後應令

其具呈戶部照常例報捐 封典不准在吏部呈請具奏

十一年奏准外省大小升授各官無論已未到任均以奉 旨 恩詔前者

照京官給封例一體給予新銜封贈至題升調補及推升各官以引 見奉 旨 恩詔前者方准照新銜給封咨署佐雜微員以部文覆准之日在 恩詔前者亦照新銜封贈

十三年奏准京外各官恭遇 覃恩准其於請封限內報捐新級請封仍照七

品不得過五品之例以符限制京官除舊捐之級不准計算其餘各項加級均

准計算外官雖有加級並舊捐之級概不計算捐級銀數京官照常例報捐外

官照隨帶例報捐將執照送部查驗按品給封亦不得將此項加級抵銷處分

十四年定曲阜林廟守衛司百戶恭遇 覃恩給予正五品封典

十五年奏准廕生奉 旨分部學習行走恭遇 覃恩一體給封

又奏准捐納分部候補人員由科甲出身者恭逢 覃恩概照實任官給予

封典小官亦一體辦理其由買出身之捐納分封典並各項小京官仍俟知缺後方准給封

十七年奏准京外各官有迴避開缺候補未得缺者恭遇 覃恩一體給予前

任 封典缺另補未

二十三年兵部奏准捐納武職游擊都司職銜俱不准其照加級捐封

又奏准漢世爵公侯伯子男及輕車都尉以下恩騎尉以上各世職如年未及

歲在家食半俸者毋庸給封其年已及歲奉 旨給賞差使並發標學習者恭

逢 恩旨准給封典

道光二十三年奏准三品以上各官欲捐請本身曾祖父母封贈者准照地封

曾祖父母之例報捐

又奏准捐封人員有受恩撫養之母舅舅母姑夫姑母姨夫姨母妻父妻母捐請封者准照地封外祖父母之例報捐

又奏准八品以下捐封人員止封本身不封妻室如欲捐請及妻室者准其加一倍報捐

又奏定子孫爲伊祖父之原職品級追請 封典者亦准一體捐請

二十五年奏准議敘四品職銜人員加級捐請二品 封典准照常例加倍報捐其各項捐納四品職銜人員令照常例加一倍半報捐均照見任及候補候選人員給封

又奏准見任各官凡在 覃恩以後二年截止以前升任者照常例補足升級銀兩給予 覃恩封典

又奏定京外各官及捐職人員由加級及捐加之級捐封者准照加級給封限制報捐惟捐職四品人員止准捐至三品見任及候補候選三四品人員准捐至二品其五六品以下京外各官及捐職人員有加等捐封照常例加倍交銀各准其加一等報捐仍定限制五六品准捐至三品七品准捐至四品八品以下准捐至六品

又奏定捐銜人員請封仍不得至二品

二十八年奏准京外各官捐請 封典任內所有 特恩軍功議敘加級並捐加請封之級無論初捐續捐均按其見有級數一併計算惟捐加之級仍專爲捐請 封典之用不得抵銷處分

又奏准四品至七品人員捐請地封曾祖父母八品官以下捐請地封祖父母均照常例加倍銀數報捐給封

咸豐二年奏准京外文職各官以及捐職人員有爲第三繼妻捐封者應令先封本身及原配繼配妻室再照本身品級爲第三繼妻捐封如本身及原配繼配本有 封典亦毋庸重複捐請

又奏准候補候選人員在 詔前告假告病與丁憂服滿在 詔後者如有捐封及捐級捐封應按原官品級於 覃恩期內准其一體捐請仍給予 覃恩

字樣

又奏軍營帶兵打仗出力之候補候選人員恭遇 覃恩准由該大臣擇保尤爲出力者數員奏請給予 覃恩封典告假回籍者概不准給其餘留防各營無論何項差委人員除因有別項勞績保請 封典外該管大臣概不得以未能赴補赴選爲詞請給 覃恩封典如有援案奏請者查明請 旨更正

又奏准休致人員應准各按原官品級照例定銀數報捐給封

三年准捐封人員有地封曾祖父母伯叔祖父母伯叔父母庶母兄嫂並嫡堂伯叔祖父母嫡堂伯叔父母嫡堂兄嫂從堂再從堂尊長及外曾祖父母妻祖父母均准其按例定品級一體捐請地封

又奏准爲人婦者欲追榮其故夫以伸恩義爲人後者欲顯其先代以盡孝思如有願爲其已故之祖若父捐職請封並爲祖若父地封其先人者應准呈請以遂其報本之忱

五年議准一品至三品不得地封高祖父母推廣章程准爲已故祖若父捐職請封並地封其先人應以見在捐請之人數計世代至曾祖爲斷不得地封高祖

六年 諭會國藩奏軍營保舉人員請准給封典等語會國藩軍營節次保舉各員選補尚無實缺自應先被光榮著援照羅澤南李續賓給予封典前旨准其擇保尤爲出力者數員按照原保升階咨部給予封典毋許冒濫其有告假回籍者概不准給以示區別而勵戎行

十年奏准三品人員加級請封准捐至二品爲止此次推廣擬令按例定一品人員報捐銀數加倍報捐即准其給予從一品 封典其三品虛銜人員有報捐從一品封者應照實職人員報捐銀數再加五成二品虛銜人員捐請從一品 封典其銀數照二品人員捐請之例加倍報捐如爲外姻捐請從一品 封典者應照二三品實職虛銜銀數再加二成另行捐請

同治七年奏准京外各官著有勞績保請 封典京官准照加級保請外官准照加銜保請仍照請封限制如有違例奏保者查明更正

光緒五年御史邵慶麟奏_臣恭閱會典 誥軸 敕書究於何衙門領取例所未載近聞有在吏兵二部領取者有徑赴內閣領取者辦理未能畫一難保無弊竇滋生伏思此項 誥敕既由吏兵二部查核彙題於鈐 寶後自應統交吏兵二部轉給令各該員出具親領甘結存案備查以杜冒濫請 旨飭部妥議章程奉 諭著該衙門議奏

六年奏准文職官員請封應由吏部隨時查覈分別題咨造具揭帖移送內閣撰給 誥敕內關於次年二月將一年內由工部通共咨取空白 誥敕若干軸撰給若干軸餘存若干軸分別造冊移咨吏部並將收到文職領袖執照若干咨還吏部

十一年奏准保舉孝廉方正給予頂戴者准其照捐納職銜人員之例按品交銀一體給予應得 封典

又奏准 聖廟執事官給封悉照本身實在職銜給予應得 封典其原無職銜之貢監生童均以八品給封

又議准官員職銜以 詔下之日爲定給予 封典其有 詔後身故者仍准給封其 詔後降調官員非犯貪酷者仍准給予前任 封典

又議准升銜留任各官准以升銜給封其見任人員復借管別任者仍照本任品級給封其餘補授實缺及題咨升署試署各官既在各見任應照各見任給封至候補試用人員暫行委署者概不准給封

又奏准義勇出力除奉 特旨賞給職銜者仍照本職報捐外其 賞給品級頂戴人員准照品級最次之職捐封

十五年兵部奏查武職非軍營戰功及異常勞績不得保請 封典而吏部文職保案向無此限制往往文武同案著績凡保請 封典者吏部照准_臣部隨案議駁辦理殊非畫一且_臣部定章異常尋常勞績分別著嚴其已得有陞階陞銜各該員弁再有尋常勞績除議敘加級外幾至無可再保似於獎勵之法尙未賅備伏惟 封典一項 褒榮逮及其先究與實職有開奮武無異於授文教孝卽所以作忠擬請嗣後旗綠武職候補候選大小員弁等無論異常尋

常勞績一律准保 封典京官准照加級按請封限制保請外官准照加銜保請如有違例奏保奉 旨允准者_臣部仍查明奏請更正

十八年御史李慈銘奏治國之要惟賞與罰馭臣八柄二者爲先罰固不可稍踰賞亦豈可或濫_臣湖康熙乾隆兩朝 享國久長 慶典 武功縷指難盡其時內外臣工雖屢逢 恩詔論功行賞而班序秩然未有越等者今則外官

之道員多至二品其封皆至一品矣知府同知多加三品其封皆至二品矣牧令大半四品簿尉大半五六品其封率至三四品矣甚至一捐班之丞倅或資緣出洋或挂名海運一保兩保已道員而紅頂矣此猶言在外者也內而翰林之編檢預名一典禮之末卽加侍講銜其優者加花翎有 京察者保備放後

加二品銜且驟然而冠珊瑚頂以七品而換二品矣六部之主事得一小事之議敘卽加四品銜其優者加花翎或三品矣夫宵人竊位則志士傷心倖者冒功則勞臣奪氣爵賞者人君所以進退賢愚人臣所以奔走吏士得之太易則人不知恩予之太驟則士無由勸遂至尊卑不別等級不明長僞士之浮囂惑

小民之視聽甚非所以尊 朝廷清流品也蓋倖門不塞則士習無由端流品不分則人心無由正人心日壞士習日陵小臣以此爲能大臣以此爲市而欲求官吏之守法天下之致治是猶背日而求景北轍而圖南也近奉 上諭舉行 皇太后六旬萬壽慶典行慶施 恩自有 成憲_臣風聞工部於未奉

旨之先已派司員六十人近日派至八十餘甚至堂官互相詬爭傳爲笑柄各衙門大率如是伏讀 懿旨有云此次辦理慶典王大臣等於應行典禮查明舊章請旨遵行外其餘一切用款務當力求撙節勿得稍滋糜費仰見 皇太

后聖懷謙抑念切民依燭照幾先無微不至_臣恐諸臣相沿積習不能仰體 聖心踵事增華惟務博大近以爲鑽營者侵蝕之地遠以爲資緣者保舉之階所關風氣實非淺鮮伏望 嚴飭各部院堂官慎選司員力杜情面勿長浮僞而敢觀競奉 諭著各該堂官等於應派司員須揀熟悉禮儀之人敬謹襄辦不得瞻徇情面率派多人濫竽充數以昭慎恪而重禮典 宣統元年吏部奏准京外五品八品實任各官有願將本年兩次 封典併爲

一次請封者京官照加級外官照加銜五品人員准其請至三品封贈八品人員准其請至六品封贈嗣後援例請封年限不得援以為例以示限制其非見任實缺暨不願併為一次請封者應各照本例給封

二年陸軍部奏陸軍人員在事出力應准獎敘者如有請獎虛銜 封典頂戴議敘等項自應按照文官一律辦理又禮部會奏遵議浙江巡撫增韞奏織造工料需款甚鉅量為變通藉節經費臣等公商所有 誥命應用五色及三色紅絲 敕命應用純白綾擬請均如所奏改用紙幅至升降龍文兼清漢字一律改織為繪惟顏色尺寸及軸頭綿面不得稍易舊制庶於節省款項之中仍不失分別等差之意

附武職品級

- 正一品 大將軍 將軍
- 從一品 正都統 副都統
- 正二品 副都統 軍需副都統
- 從二品 協都統 軍需協都統
- 正三品 警察隊正參領 步隊正參領
- 從三品 警察隊副參領 步隊副參領
- 副參領 工程隊副參領 輜重隊副參領
- 司藥副參領 馬醫副參領 製械副參領
- 正四品 警察隊協參領 步隊協參領
- 協參領 工程隊協參領 輜重隊協參領
- 司藥協參領 馬醫協參領 製械協參領
- 正五品 警察隊正軍校 步隊正軍校
- 正軍校 工程隊正軍校 輜重隊正軍校
- 司藥正軍校 馬醫正軍校 製械正軍校

- 正六品 警察隊副軍校 步隊副軍校
- 副軍校 工程隊副軍校 輜重隊副軍校
- 司藥副軍校 馬醫副軍校 製械副軍校
- 正七品 警察隊協軍校 步隊協軍校
- 軍校 工程隊協軍校 輜重隊協軍校
- 司藥協軍校 馬醫協軍校 製械協軍校
- 正八品 警察隊司務長 步隊司務長
- 務長 礮隊技士長 工程隊司務長
- 測繪司務長 軍樂司務長
- 從八品 警察隊上士 步隊上士
- 上士 礮隊技士上士 工程隊上士
- 會計上士 縫技上士 靴技上士
- 正九品 警察隊中士 步隊中士
- 中士 礮隊槍技中士 工程隊中士
- 會計中士 縫技中士 靴技中士
- 從九品 警察隊下士 步隊下士
- 下士 礮隊槍技下士 工程隊下士
- 下士 軍樂下士

皇朝續文獻通考卷一百四十七

賜進士出身頭品頂戴前內閣侍讀學士劉錦藻恭纂

郊社考一

謹案郊社大典秦漢以後古意寔荒輻雜以職緯家言嗣是紛紜聚訟

莫可殫詰至宋楊氏信齋勅成祭禮一書迺稍規復古制我朝敬

天勤民時虞隕越順治元年世祖章皇帝定鼎燕京首先親祀南郊

告祭天地誠重之也列聖恪恭祀事無故不攝宜迓神既而紹

鴻庥豈徒講求儀節云爾哉謹依前例續纂俾禮臣採擇焉耳

郊

乾隆五十一年 諭人君者 天之子當以敬 天勤民為首務方可以承

昊既而迓 鴻庥設於對越之事心生懈怠不能敬謹將事是不成其為 天

之子而 昊蒼亦斷不錫之嘉祐也朕臨御五十一年以來恭遇 郊壇大祀

無不祗肅躬親多至 南郊親詣五十一次上辛 祈穀親詣四十九次惟乾

隆五年及四十九年因朕躬偶爾違和遺皇子親王恭代而當臨祀時一切儀

文典禮悉本誠恪之心躬申虔敬以期 昭格近來雖年逾古稀登志 明禮

益勤勿懈是以仰蒙 上蒼鑒朕忱悃得有期頤之壽精神強固猶日孜孜萬

幾親理於 郊祀大典俱能肅將禋獻升降周旋勿愆於儀編維 上天如此

篤眷惟有益懋實恭豈忍以年壽已高稍耽安逸致精意或有未孚朕世世子

孫續緒膺圖若能以朕之心為心無刻不以敬 天為念於 郊壇大祀嚴恭

寅畏盡敬盡誠自亦必仰邀 昊穹眷顧錫以大年實我大清億萬載無疆之

庥倘不能懷承朕志永矢虔恭稍萌怠忽即非朕之子孫 天亦斷不錫之以

福也向來致祭 郊壇於 壇之二成設有幄次以備拜跪行禮迎 神上香

進爵供胙上 壇行禮畢仍回降至拜次嗣因朕年屆六旬恐精力不能如前

將亞獻終獻飲福受胙諸儀改於 壇上讀祝位次行禮以節登降之勞仍不

致或短儀節此朕因欲每次躬親祀事是以稍從簡易非敢於 郊祀大典存

耽逸之見也惟念將來朕春秋日高誠恐步履或稍遲於前意欲於 壇上讀

祝拜位添設小幄次一分俟朕年至八旬即於此內行禮設此二三年內遇風

雪迺寒亦可稍資蔽禦如果仰邀 上天眷佑仍能精力如舊至八旬而不衰

必尚照常行禮所有添設幄次原可備而不用著軍機大臣會同工部太常寺

敬謹詳勘將應添設幄次尺寸比二成之幄次收小酌擬呈覽再行備辦此非

朕之敢萌逸念也蓋 郊祀大典彌潔躬承惟期誠意感孚虔申寅恪倘因儀

節繁重或致精力不勝勉強將事或令人恭代則於精一擬承之意轉有未盡

此後 郊壇大祀朕必歲歲躬行至八十六歲歸政時始終勿懈以伸朕敬

天法 祖之志我子孫若能繼承無斁方可永膺 洪貺垂裕萬年矣尋遵

旨議奏添設幄次較二成原有幄次收小樽低燙樣繪圖恭呈 御覽得 旨

後工部敬謹成造收貯交太常寺侯屆大祀前期將應否安設之處請 旨遵

行奉 旨添設拜次著照二成原有拜次面寬樽小尺七寸進深樽小二尺頂

高樽低一尺五寸著用黃金色餘依議

六十一年 上以歲丙辰元且傳位 皇太子為 嗣皇帝前期遣官告祭

天 地 社稷 宗廟 奉先殿

嘉慶元年正月祈穀於 上帝 上以福酒躬晉 太上皇帝 太上皇帝即

以賜 上

又十一月冬至 上親祀 天於 團丘前一日詣 齋宮 駕至昭亨門外

降輦 親詣 皇穹宇上香次視 壇位又次 閱籩豆並牲牢畢至 齋宮

祭日 皇上自 齋宮乘輦詣 壇至外壇南門外 神路西降輦由外壇南

左門內壇南左門入升 壇行禮禮畢出 昭亨門左門乘輦與還宮

四年十一月 諭前以 祈穀乃新春典禮自應在立春以後得辛舉行明歲

庚申 正月初八日上辛應行 祈穀大祀係在立春以前因致祭日期業於

昨歲奏明 高宗純皇帝不敢改議是以降旨仍照禮部等衙門原題 日期

行禮嗣後 祈穀大祀總以春後得辛為度本月二十六日 南郊大祀恭奉

皇考升配先期詣 壇齋宿齋宮內向俱懸掛 皇考御製詩章扁額並陳

設 御筆詩冊朕自受璽後即敬念 皇考精誠對越舉凡治法心法俱見之

於 御製詩中朕每遇宿壇 必將 詩扁詩冊恭誦一周以昭虔恪此次敬閱至乾隆己酉年 祈穀禮成述事詩內有今年九日立新春 祈穀虔應值次辛之句因恭查詩注內載今歲正月初九日立春若用初四日辛 祈穀則尚在臘月內是以用十四日辛仰見 皇考聖意亦以 祈穀典禮應在立春以後得辛舉行爲是明歲庚申 祈穀日期上年雖經禮部等衙門循例具題惟敬憶 皇考嘗舉論語祭如在祭神如神在及吾不與祭如不祭之言以示訓自嘉慶元年以來 皇考傳位凡遇 郊壇大祀俱係朕恭詣行禮是以每次具題致祀日期本章俱令送朕閱看明歲庚申上辛係在春前該衙門具題原係錯誤而朕因是時適值 皇考聖躬不豫心緒焦切未經看出實朕之過惟念事屬既往所有禮部太常寺及欽天監等衙門應得處分俱著寬免其明歲庚申 祈穀典禮仍改用正月十八日辛舉行

六年 諭 天 地壇大祀由太常寺衙門同禮部堂官恭捧 神牌敬安龍亭詣至 壇上禮成 復御典禮臺嚴所有昇亭校尉及督率官員理宜整肅威儀用昭誠敬嗣後恭遇 大祀著鑾儀衛派熟習正身校尉並添職官四員頭役六名小心照料其職名花名先期咨送禮部太常寺嚴加查覆倘敢攙雜外人或人數不敷致有禮儀不肅之處即著該部寺據實參奏

八年 諭向來 天壇神樂署兩廊外空地有太常寺官生建屋居住並租給鋪戶收息以爲貼補當差修理之用但 郊壇重地理宜內外肅清自不便聽該官生等率行租給平民在彼存留貿易著步軍統領順天府衙門於 天壇外圍牆之外指定隙地准令各官生等將 壇內自建房間移於牆外仍准其收租貼補

又 諭凡遇 天壇大祀諸王以下及滿漢頭品大臣年在六十五以上者准其乘轎至二層門外此外頭品年未至六十五以上及二品大員均不准乘轎進頭層門以崇體制

又 諭凡遇躬祀 園丘前一日詣齋宮時前引大臣侍衛及扈從之御前侍衛乾清門侍衛等俱著在石牌坊外下馬次日祭畢啟行亦著在石牌坊外上

馬 九年大祀 園丘太常寺所進儀注豫日恭請 皇上由 昭亨門入祭日禮成出 廣利門餘與嘉慶元年儀注同

是年 御製南郊記日記云郊之祭也大報本反始也蓋萬物生於一陽來復之樞機天心可見雖行夏之時而冬至實歲之首周建子月洵爲古制也人君爲 天之子昭事 天父日監在茲何時有懈敬值 大祀先期三齋七戒靜攝寸心庶幾清明在躬上對 昊蒼使兆庶乂安百穀蕃茂典至重大理極精微其可忽哉予小子於丙辰元旦大廷受璽渥荷 聖恩始知我 皇考於癸巳年即以予名定儲位 告 上帝是予自十四歲即受 天眷感畏之忱益增敬事之誠倍切三載以來政無鉅細皆稟承 庭訓得所遵循自己未幾攀留弗及每遇用人行政無不仰祈 天佑如響應聲之 昭格曷勝枚舉感極生懼夙夜敬謹益懍受命保命之至理升香薦幣咫尺對越嚴恭寅畏之誠實不能自已茲將有事於 郊壇敬申素悃以勵前修盡人事而迓 天慈奚可稍存怠忽書曰曷其奈何弗敬予服膺斯訓永矢毋忘庶幾 皇考之志常沐 上帝之恩期於率土臣民共享昇平之福鞏固我國家丕基胥在於是爲君之要爲政之本不踰乎敬 天法 祖敢不竭誠盡敬乎謹記

十一年 諭據禮部奏十一月十三日敬值 聖祖仁皇帝忌辰是日 園丘大祀禮成後仍穿常服不掛朝珠等語所議尙屬未協 郊壇大祀即恭逢 祖 宗列后忌辰俱當備用吉禮不特祭祀之日應御禮服即前三日齋戒期內服色亦應照常蓋禮統於尊誠爲不易定制至於禮成之後即盛儀已備是以車駕還宮樂即設而不作若是日在宮內視事仍穿用常服於心實有不安嗣後 郊壇大祀之日適逢忌辰禮畢還宮後即遵照忌辰儀注更用素服庶敬 天尊 祖禮協義宜

又 諭朕惟 郊壇大祀典禮至重每歲舉行 南郊 祈穀 常雩三大祀前期詣宿齋宮凡奠豆牲牢之屬皆敬謹省視我 皇考高宗純皇帝敬 天以實 躬親股禮一切儀文品節悉經 裁定昭垂溯自乾隆七年經禮臣議

准冬至前一日 皇上詣 園丘視 壇位分獻官分詣 神庫視籩豆 神廚視牲牢迨乾隆十二年欽奉 聖諭以先期祇請 神主陳設省視復收有違神道靜穆之義應於前期一日恭詣 皇穹宇 皇乾殿上香行禮命大學士等詳悉具儀以聞維時定議因將親籩豆一節或親詣或遣官之處由太常寺臨期奏聞請旨允准遵行自是二十餘年大率遣官閱視籩豆次數居多亦閒有親詣閱視者乾隆三十年復奉 聖諭以 神位尤宜躬親展謁其省親籩豆應按例專遣臣工莅事不必再行請旨仰見 折衷定制專意 明禮與聖經籩豆司存之義尤協朕繼承 統緒敬恭匪懈嗣後 郊壇三大祀前期省親籩豆牲牢均著按照乾隆七年定例遣員將事該衙門臨期查照奏請簡派毋庸具摺雙請至恭詣 皇乾殿上香後閱視 壇位仍欽遵 前典親詣舉行

十四年 諭朕昭事 上帝肅將誠敬凡值 郊壇大祀於典禮儀節敬稽 皇考高宗純皇帝舊制遵行溯查乾隆元年至二十四年 聖駕詣 壇均至 昭亨門外降輦至乾隆二十五年 皇考聖壽五旬詣 壇時係由北首外西天門進 廣利門均降輦蓋節步履之勞正以壹精禋之格迨三十七年之後 聖壽已越六旬始經欽奉 諭旨將所有升級次數及降輦步行遠近無關大體諸儀節交廷臣詳議量從減省今朕春秋甫屆五旬一切登降儀文並未稍覺繁重惟從前 皇考既有由北首外西天門進 廣利門詣 壇成例著該衙門敬謹詳查 皇考當日降輦之處有無紀載如有一定處所即當遵照舊儀如向無存紀著將 昭亨門外降輦後步行遠近及 廣利門內應於何處降輦步行稍可節省詳細相度繪圖具奏候朕酌行

十八年十一月 諭恭值 南郊大祀朕先一日宿 壇定例由宮內乘輦陳設大駕兩簿禮儀備本年禁城內有九月十五日之變仰賴 上蒼垂佑巢魁立殲餘黨悉除其豫東賊匪派兵勦辦連奏捷音冀可計日蕩平前曾於孟冬之朔派儀親王永璇告祭 天壇朕沐非常 昊貺夙宵欽感尙未躬達悃忱茲於長至日恭祀 園丘肅陳祇謝虔願 恩慈敬當減損儀文用昭寅畏

前一日詣 壇不御輦由宮內詣 皇穹宇以至進齋宮俱乘紅桿八人大轎大駕兩簿無庸陳設祭日禮成還宮設騎駕兩簿奏導引樂著該衙門敬謹遵照豫備

十九年正月 諭和世泰等奏本月十九日 祈穀壇大祀前期詣 壇齋宿豫備禮與一摺向來恭遇南郊大祀朕前一日詣 壇例皆乘輦上年冬至乘紅桿八人轎係特減損儀文虔申告祭茲該衙門因昇輦旗尉尙未嫻習請乘禮輿試思詣 壇乘輦載在儀注典禮攸關向來出宮進 壇兩班本用旗尉惟中閒換班沿用民尉上年定議全用旗尉得旨已將兩月何以尙未教演嫻熟顯係因循怠玩藉詞支飾所有鑿儀衛堂官除長慶甫自軍營回京無庸議外和世泰孟住德克進及該管章京等俱著交部議處朕此次詣 壇姑乘禮輿見距 常雩之期尙有數月著該衙門將昇輦旗尉勤加教演屆期毋得再因循貽誤致干嚴懲

又八月 諭凡祭祀齋戒期內適遇忌辰其應用服色總以祭祀爲重 南郊大祀前一日如適遇忌辰恭閱祝版時朕御龍袍龍褂執事人員均穿蟒袍補服其餘 大祀 中祀前一日適遇忌辰恭閱祝版時朕御龍褂執事人員均穿補服以昭肅著爲令

二十三年九月 上詣 天壇行禮

又 諭 天壇望鐘杆木丈尺雍正年間定例原係九丈嗣於乾隆年間四川總督何爾泰辦到杆木較長始奏准通高十丈四尺較原立杆木增長一丈四尺見在杆木因年久開有蟲蛀處所自應敬謹更換杆木舊有定制若照增長丈尺恐一時採辦維艱著四川總督湖南巡撫仍查照雍正年間定例委員採辦長九丈大徑二尺七寸小徑一尺二寸杆木正副六根外餘木十八根即行運京以備更換

二十五年 諭朕惟 昊穹生民咸覆咸育誕降聖神作之君師俾乂安區寓泊乎功德巍巍與天同量羣黎萬姓莫不尊親則報祀之典隆焉易曰殷薦之上帝以配祖考傳曰嚴父莫大於配天其禮至鉅古今未有易也我 皇考仁

宗睿皇帝臨御天下二十五年寅承 帝命兢兢業業式光 前緒繼述率由
估冒元元覃敷愷惠拯災弭患發廢闕租損上益下之政不可殫數飭綱紀釐
百工適刑賞之中籌教養之備崇文興化而九有攸同肄武詰戎而八方震疊
德協生成功侔造化昭臨徹於幽明膏澤彌於遐邇乃聖乃神乃武乃文洵乎
共貫三才同符兩大朕載稽經義祗溯 前徽我 皇考仁宗睿皇帝允宜崇
祀 郊壇克配 上帝然必合萬國之歡心詢謀僉同用光盛典嗣後遇冬至
祀 天於南郊正月上辛 祈穀孟夏 常雩三大祀應祗奉 仁宗睿皇帝
同 六祖配享夏至祭 地於北郊禮亦如之所有應行典禮著大學士九卿
詳議以聞

道光二年正月 祈穀於 上帝恭奉 仁宗睿皇帝配享

十七年 諭御史文丕奏 壇 廟祭祀宜嚴門禁一摺 壇 廟祭祀典禮

攸關門禁理宜嚴肅以昭誠敬嗣後著稽察之王大臣於未經上祭之先嚴密
稽察毋許一人混入至行禮時尤當認真稽查無論何項差使人員概不准擅
自出入倘仍前怠玩別經查出惟王大臣是問

三十年正月頒發緘藏 御書殊諭四條曰帝郊祖宗伊古所重洪惟我 太

祖 太宗 世祖 聖祖 世宗 高宗 仁宗豐功駿烈厚澤深仁浹洽生

成彌綸宇宙開億齡無疆寶祚立萬世有道鴻謨永宜配饗 郊壇禮隆報本
朕思尊崇之典莫大於斯若世世視為成例率行無已豈止有背於古訓更難
示信於後人而又非臣子之所敢言亦非臣子之所忍言再四籌思不能不定
以限制使我後世子孫得所遵循以免後人之疵議朕萬年後斷不可行 郊

配之禮誣朕以不德不孝若繼體之君顧命之臣不遵朕諭任意強行則是甘
為我大清之不孝不忠之人矣後之人其以朕為法乎不以朕為法也嗚呼必
有知朕者焉 按禮經天子七廟周禮小宗伯辨廟祫之昭穆至於漢之七廟

六室九室唐之九代十一室宋之九世十二室其餘史冊所書不一而足自古
議此禮者是非當否又復不一而足由是觀之祫廟之說有由然也洪惟我大
清 受命於 天龍興遼瀋 祖功 宗德實邁前古自我 太祖高皇帝至

我 皇考仁宗睿皇帝巍然七室豈非上天有以命之乎朕反復思之我大清

億萬年無疆之運若不考古酌今定以法制必至議論紛紛為後人笑矣孔子

云非天子不議禮不制度不考文以朕之不德仰承基緒兢兢業業深恐不能

克紹 鴻圖更曷敢上擬 祖 考然有其位有其時若不身任此事用昭來

許豈不大負我 皇考付畀之恩也朕萬年後斷不可行 廟之禮應如何

配享之處乃當時君臣之事按禮議行可也其 奉先殿 壽皇殿 安佑宮

乃古原廟之制庶可遵循舊制嗚呼七世之廟可以觀德孰如我大清 聖

聖相承之盛也遵諭毋違 謹按各 陵五孔橋南均有 聖德神功碑清漢

崇昭茲來許在朕則曷敢上擬 鴻規妄禘顯號而亦實無稱述之處徒增後

人之譏評朕不敢也萬年後著於明樓碑上鐫刻大清某某皇帝清漢之文碑

陰即可鐫刻陵名嗣皇帝即欲撰作碑文用申追慕即可鐫於宮門外之碑上

斷不可於五孔橋南別行建造石柱四根亦不准樹立至碑文亦不可以聖神

功德字樣率行加稱若當時君臣不能仰體朕懷不遵朕諭是陷朕於不德一

世之憂勤惕厲盡成虛矣謂之孝乎蓋大不孝也大內四執事庫向有供奉

列祖 列宗冠服所以昭法守而傳儉樸也乃相沿已久愈積愈多且錦文珠

繡遞漸加增殊失垂示後昆之意朕萬年後只可將常用之秋冠涼冠各一縣

袂衣服四五襲照例收貯外餘皆酌量留用或為賞賜之需皆可再皮冠皮裘

豈是經久之物一概不必存留以歸簡約其自鳴鐘殿內收貯歷代硯墨尤屬

無謂並非尋常御用之物僅將懋勳殿不動用庫貯者照數移收實屬虛文

即應裁止

又 諭朕恭讀 殊諭遺命四條內除無庸建立 聖德神功碑及斟酌各件

供奉收貯謹當遵行外至 諭令毋庸 郊配 廟附二條事關尊崇鉅典朕

不忍違從不致違定著王大臣會同九卿翰詹科道詳議具奏

又禮部侍郎曾國藩奏為遵 旨敬謹議奏事正月十六日 皇上以 大行

皇帝殊諭遺命四條內無庸 郊配 廟附二條命臣工詳議具奏 臣等謹於

二十七日集議諸臣皆以 大行皇帝功德懿懋 郊配斷不可易 廟祔尤在所必行直道不泯此天下之公論也 臣亦欲隨從衆議退而細思 大行皇帝蹟蹟誥誥必有精意存乎其中 臣下仰測 高深苟窺見萬分之一亦當各陳其說備 聖主之採擇竊以爲 遺命無庸 廟祔一條考古準今萬難違從無庸 郊配一條則不敢從者有二不敢違者有三所謂無庸 廟祔一條萬難違從者何也古者祫廟之說乃爲七廟親盡言之有親盡而仍不祫者則必有德之主世世宗祀不在七廟之數若殷之三宗周之文武是也 大行皇帝於 皇帝爲廟廟本非七廟親盡可比而論 功德之彌綸當與 列祖列宗同爲百世不祫之室豈其弓劍未忘而蒸嘗違別且諸侯大夫尙有廟祭況以 天子之尊敢廢 升祔之典此其萬難違從者也所謂無庸 郊配一條有不敢從者二何也古聖制禮亦本事實之既至而情文因之而生 大行皇帝仁愛之德同符大造偶遇偏災立頒帑項頻年賑貸薄海含哺粒我蒸民后稷所以配天也 御宇三十年無一日之暇逸無須臾之不誠純亦不已文王所以配上帝也既已具合撰之實而欲辭 升配之文普天臣民之心終覺不安此其不敢從者一也 歷考 列聖升配惟 世祖章皇帝係由御史季周琬奏請外此繼統之聖人 特旨舉行良由上符 昊眷下愜民情毫無疑義也行之既久遂爲成例如 大行皇帝德盛化神即使無例可循臣下猶應奏請况乎 成憲昭昭曷敢踰越傳曰君行意臣行制在 大行皇帝自懷謙抑之盛意在大小臣工宜守 國家之舊制此其不敢從者二也所謂無庸 郊配一條有不敢違者三何也 壇壝規模尺寸有定乾隆十四年重加繕修一磚一石皆考律呂之正義按九五之陽數增之不能改之不可今則每壝之內僅容豆蓬七幄之外幾乏餘地我 大行皇帝慮及億萬年後或議增廣乎壇壝或議裁狹乎幄製故定爲限制以身作則世世可以遵行今論者或請西三幄之南尙可添置一案暫爲目前之計不必久遠之圖豈知人異世而同心事相沿而愈久今日所不敢言者亦萬世臣子所不敢言也今日所不忍言者亦萬世臣子所不忍言也經此次 殊諭之嚴切益廷之集議尙不肯裁決違

行後之人孰肯冒天下之不韙乎將來必至修改基址輕變舊章此其不敢違者一也古來祀典興廢不常或無其祭而舉之或有其禮而罷之史冊所書不一而足唐垂拱年間郊祀以高祖太宗高宗並配開元十年從張說議罷太宗高宗配位宋景祐年郊祀以高祖太宗高宗並配嘉祐七年從楊敞議罷太宗高宗配位我 朝順治十七年合祀天地日月星辰於 大享殿奉 太祖太宗以配厥後亦罷其祀祀典改議乃古今所常有我 大行皇帝慮億萬年後愚罔無知或有援唐宋罷祀之例妄行陳奏不可不預爲之防故 殊諭有曰非天子 議禮一經 斷定巍然七幄與天常存後世增配之議尙且不許罷祀之議何自而興所以禁後世者愈嚴則所以尊 列聖者愈久此其計慮之周非三代制禮之聖人而能如是乎 大行皇帝以制禮之聖人自居臣下何敢以尋常之識淺爲窺測有尊崇之虛文無謀事之遠慮此其不敢違者二也我 朝孝治天下遺命在所尤重康熙二十六年 孝莊文皇后遺命願於遵化州 孝陵近地安厝臣工皆謂遵化去 太宗昭陵千餘里不合附葬之例 聖祖仁皇帝不敢違 遺命又不敢違成例於 孝陵旁近建 暫奉安殿三十餘年未敢竟安地宮至雍正初敬謹歲事嘉慶四年 高宗純皇帝遺命廟號無庸稱祖我 仁宗睿皇帝謹遵 遺命故雖乾隆之豐功大烈廟號未得祖稱載在會典先後同揆此次 大行皇帝遺命一條森嚴可畏若不遵行與我 朝家法不符 且殊諭反覆申明無非自處於卑屈處 列聖於崇高此乃大孝大讓互古之盛德也與其以尊崇之微忱屬之臣子孰若以莫大之 聖德歸之 君父此其不敢違者三也 臣竊計 皇上仁孝之心兩者均有所歎不奉升配僅有典禮未備之嫌違奉升配既有違 命之嫌又有將來之慮是多一歎也一經 大智之權衡無難立判乎輕重 聖父制禮聖子行之默契精微不待臣僚擬議而後定 職在秩宗誠恐不詳不慎 皇上他日 郊祀之時上願 遺訓下願萬世或者悚然難安禮臣無所答是以專摺具奏干冒 宸嚴不勝惶悚戰慄之至 又 諭朕泣讀 皇考大行皇帝殊筆遺諭訓誡精詳懇至伏誦悲愴 深五

中 諭令毋庸升配升祔二條事關明禮鉅典天下萬世觀瞻所繫是用博諮廷議令王大臣等會同九卿翰詹科道詳考典禮務求至當茲據集議以聞聿稽周人郊祀后稷以來唐宋及明或三祖並侑或數帝分配我朝 聖聖相承均經升配 郊壇永崇禮祀第配位遞增而 壇壝之規制有定敬釋 殊識若世世親爲成例率行無已豈止有背於古訓更難示信於後人再四籌思不能不定以限制仰見 聖德謙光超邁前古而所以爲萬世慮者至深且遠今禮親王全齡等所奏謂宜仍遵 列聖成憲朕詳加披閱因思尊崇之典莫大於嚴 父配 天如我 皇考之德澤彌綸同符 列祖而違停升配雖係仰遵 遺命朕心究有難安展轉詳思應照王大臣所請 郊壇大祀俟祔 廟禮成後恭奉 皇考神牌升配並曲體 遺訓定以限制嗣後 郊祀配位歷億萬年總以 三祖 五宗爲定自朕躬而下不復舉行並恭錄 皇考殊識首條及朕此次諭旨懸奉 南郊齋宮垂示久遠著爲成式世世遵循罔數萬不准再議更張則非徒朕克展孝思實於 皇考之功德允稱而於 貽謀垂裕訓迪周詳之意亦庶可稍慰矣禮經三昭三穆與太祖之廟而七宋儒朱子謂百世不祧之廟如周之文武世室商之成湯三宗不在數中則天子七廟特禮之常制非合不祧之室而言我 皇考功德隆盛允宜祔 廟稱宗應恭俟 山陵禮成後祇奉 神主升祔以致孝享而盡尊崇凡此仰稽 舊典俯順 輿情 聖謨洋洋萬世所當效法而朕權衡審慎務求協乎天理人情之至以下副四海臣民尊親愛戴之公心惟我 皇考在天之靈當亦默垂鑒格也所有應行典禮各該衙門屆時敬謹詳察具奏將此宣諭中外知之侍郎曾國藩所奏頗有是處其餘京堂及科道等所奏各抒己見殊少折中各摺均著發還

皇朝續文獻通考卷一百四十八

郊社考二 郊

咸豐元年四月 上以恭奉 宣宗成皇帝配 天禮成頒詔天下

又 諭阿靈阿奏遵查大祀王公百官隨從行禮一摺嗣後 壇廟大祀朕

飲福受胙及謝福胙時陪祀之王公百官有應由傳贊官傳贊隨從行禮之處

俱著恪守舊章遵行如傳贊時有應行禮而不行禮者或傳贊遲誤即著糾儀

各衙門查明參奏

三年 諭聯順奏 天壇齋宿一切執事人員應敬謹將事請查照舊章添派

官兵以昭敬慎等語 天壇重地理宜嚴密稽查著自本年四月起凡遇詣

壇齋宿日期該管王大臣等於舊設守衛齋宮官兵一百名外仍按兩營輪班

次數添派官兵一百名於 壇外值宿所有新添舊設官兵均飭令各帶火器

實力巡查毋稍疏懈

又四月 諭朕以薄德敬承 考命撫育萬方兢兢業業已三年矣深慚治理

乖方愆尤叢集溯自道光三十年秋逆醜跳梁徵調頻仍迄無成效將士疲於

甲冑黔黎苦於差徭自粵而楚自楚而江妖氛狂悖可謂極矣君人者代 天

司牧斯民當今之世司牧者何事而吾民塗炭未復予一人辜 恩咎重夫復

何辭因思空言無補時值多艱朕惟有虔籲 昊天速消民劫斯與軍營諸將

士共奮安民之志羣興鼓舞之懷掃蕩此賊以蘇民困此朕之初志報 天恩

即符 考願也憶自庚戌冬至親承 大祀已經九次每逢詣 壇齋宿無不

思逆賊未平倍覺愧悚茲於本月初七日又值 零祭前期因誌吾之過以自

警焉

又十一月 殊諭恭親王奕訢等本年冬至 南郊大祀朕親詣行禮惟因駁

疾致累恐升降失儀不足以昭誠敬况朕思兩邊配案三獻往返行走亦覺稍

繁朕意欲酌量改減以嚴對越著恭親王等商酌妥協於明日當面再奏

又 諭 天壇大祀鉅典攸關凡陪祀之王公大臣以及執事各員均應整齊

嚴肅嘉慶八年欽奉 諭旨諸王以下及滿漢頭品大臣年在六十五以上者

准其坐轎至二層門外此外頭品年未至六十五以上及二品大員均不准坐

轎進頭層門以崇體制等因欽此煌煌 聖訓允宜永遠遵違乃近來執事大

小各員往往不遵舊制任意出入殊非恪恭將事之道著申諭各衙門嗣後

郊壇大祀應照嘉慶年間 諭旨並著稽查 壇廟王大臣並稽查 壇門

壇內各大臣等一體認真查察如有不遵定制之員即行嚴參其僕從跟役擁

擠喧嘩及閒雜人等闖入者一併查拿懲辦

又 諭本月二十二日冬至 南郊大祀前經降旨朕親詣行禮茲因駁疾致

累恐升降拜跪未能如常不足以昭誠敬著派恭親王奕訢恭代行禮

又 諭太常寺奏遵議稽查章程一摺 壇廟重地理宜嚴肅自應隨時稽

察以昭慎重所請分撥官員輪班值宿並官役壇戶庫夫人等造具清冊佩帶

腰牌之處均著照所議辦理並著該堂官等常川親往稽查如有官役人等偷

安曠誤或縱令閒人出入者即行嚴參懲辦不得僅委之壇官奉祀各員致令

日久生懈至 壇廟大典雖派王大臣等稽查該寺堂官職守所在豈能藉

詞推諉嗣後齋宿祭祀期內仍著該堂官等一體認真稽查以專責成

四年 諭上年冬至 團丘大祀朕以偶患駁疾未能親詣行禮私衷正深乾

惕茲屆 祈穀大祀自應敬謹舉行虔申忱悃惟微尙未全除登降猶虞隕

越若再遺恭代則大禮久曠朕益覺難安因命禮臣查照遺官分獻禮節及經

由道路先期具奏原為暫省繁文期於對越之時倍昭誠敬非敢輕改舊章著

為成例本日據宋晉奏請停新議仍遵 成憲一摺是於朕權宜申敬之衷尙

未深喻所有此次親行禮節仍著照該衙門所議行一俟朕躬履步如恆即當

照常將事大小臣工當知朕應 天以實不以文之意也

又 諭載齡奏請飭修 天壇牆基一摺 天壇重地理宜嚴肅自應一律修

整隨時稽查以昭慎重所有西南牆角內外沙土淤積及東西北三面牆基外

露並有積水淹浸坍塌數處著步軍統領衙門派兵役將沙土剷除淨盡並

擇坍塌較重處所先為培護其餘酌量輕重情形分別辦理

又 諭太常寺步軍統領衙門奏遵查例案會同請旨一摺 天壇重地理宜

殿廡所有東西北三面牆基外露並積水淹浸坍塌之處著工部遵照前旨速行修理至起除沙土一節既據查明關繫風水未敢輕動即無庸另派大臣前往查勘至收放馬匹偷砍樹株例禁禁嚴必當認真查察所有 天壇圍牆以內著太常寺飭令壇官率同壇戶人等敬謹看守其圍牆以外著步軍統領衙門飭令值班官兵梭織巡查以昭慎重仍著太常寺堂官及步軍統領等不時親往稽查倘有疏懈即將該班官員兵丁等嚴參懲辦

又 諭 壇 廟大祀鉅典攸關所有王公以下及文武百官例應陪祀人員均應恪恭將事以昭誠敬乃近日陪祀各官人數無多總因視稽查為具文怠惰苟安罔知敬畏著再行申諭宗人府禮部都察院各堂官嗣後恭遇 壇廟祭祀其應行陪祀人員如有無故不到者即著各該衙門指名查參以重祀典

六年正月 祈穀於 上帝 御製文示廷臣曰予蒙 天恩承 考命臨御天下六年於茲四海無一日安靜萬姓罹兵燹之災返躬自問 天恩未報祖考之恩未報若使稍自暇逸是誠何心哉予不敢亦不忍也每逢親詣 郊壇無不心增愧慙今年新正幸園敬循 成憲次日即恭值 皇考忌辰地猶斯地 言猶在耳與念及此真堪一痛哭也听夕常思何以兵戢民安仰答 天 祖之恩惟有永勵斯志倍加敬謹不願徒託空言務期躬行實踐爾諸臣或曾膺 顧命或備在賢良既為國之大臣當思共濟時艱既使天下治安更防恬嬉之漸書曰慎終如始我君臣其共勉之

七年十一月 諭本月初七日冬至 天壇大祀前經降旨朕親詣行禮茲因骸病尚未就痊恐升降拜跪未能如常不足以昭誠敬著派睿親王仁壽恭代行禮

八年正月 諭本月十四日 祈穀壇大祀前經降旨朕親詣行禮茲因骸疾尚未如常恐升降拜跪不足以昭誠敬著派恭親王奕訢恭代行禮先期在紫禁城內齋宿前一日詣 壇齋宿屆時朕仍在宮內敬謹致齋 又 諭朕自上年秋間染患骸疾一載以來 郊壇大典未能躬詣每抱欷歔

本年冬至 圓丘大祀業經降旨親詣行禮茲據惠親王等合詞具奏以朕體雖愈步履尚未如常登降拜跪恐多勉强願請仍暫緩親詣按諸朕心實有難安該王大臣等於召見時再三籲懇因念 大禮攸關設有愆儀轉不足以昭誠敬不得已勉從所請所有本年 大祀著派恭親王奕訢恭代行禮並著在紫禁城內齋宿先期一日恭詣 壇內齋宿朕仍在宮內敬謹致齋十八日親詣 大高殿行禮以嚴對越

九年 諭本年冬至 天壇大祀業經降旨親詣行禮一切典禮並諭惠親王等妥議具奏旋經該王大臣等議請朕行三跪九拜禮後仍遣王恭代朕思屆時仍欲行全禮以昭誠敬是以未即降旨允准乃自上月下旬偶感風寒迄今雖已就痊而步履尚未如常茲復據惠親王等合詞懇懇請朕暫緩親行仍遣王恭代按諸朕昭事之心實有難安惟念 大禮攸關設有愆儀轉不足以昭誠恪不得已勉從所請本年冬至 圓丘大祀著派恭親王奕訢恭代行禮並著在紫禁城內齋宿先期一日詣 壇內齋宿朕即在宮內敬謹致齋於二十

八日仍親詣 天壇 皇穹宇行禮以嚴對越
十一年七月 諭道光三十年 皇考大行皇帝以 皇祖宣宗成皇帝殊難遺命無庸 郊祀 廟祔二條 諭令王大臣會同九卿等敬謹妥議嗣照禮親王全齡等所請仍行 郊祀 廟祔 廟並明降 諭旨嗣後 郊祀配位以三祖五宗為定仰見我 皇考曲體 皇祖遺訓定以限制 聖訓煌煌允宜敬謹遵守惟尊崇之典莫大於嚴 父配 天我 皇考功德昭著洽於寰區海海臣民咸深欽仰 聖諭升配典禮不復舉行朕不忍違從亦不敢違定著王大臣會同大學士九卿翰詹科道敬謹詳晰妥速議奏

又 諭前據睿親王仁壽等遵議 皇考大行皇帝 郊祀配位與廷臣所議歧異本日禮親王世鐸等遵議 郊祀配位典禮一摺仁壽等又復列銜事關大典有無遷就之處著睿親王仁壽醇郡王定郡王溥煦尚書綿森伊勒東阿侍郎伊精阿左副都御史富康另行具奏以昭慎重
又十月 諭前因 郊祀配位於道光三十年奉 皇考大行皇帝嗣後以

三祖 五宗爲定之 諭朕不忍遽從亦不敢遽定諭令王大臣等敬謹詳議旋據禮親王世鐸等先後分別議奏本日復據潘祖蔭許彭壽奏議禮大典請飭廷臣再議以昭慎重一摺著王大臣會同大學士九卿翰詹科道敬謹妥議具奏其禮親王世鐸等睿親王仁壽吏部右侍郎黃宗漢並載垣等摺均著發給該王大臣閱看一併議奏

同治元年 諭雲南學政張錫燦奏請宗祀 文宗顯皇帝以備典禮一摺並附陳宗祀辨疑條說著王大臣大學士六部九卿翰詹科道敬謹會同妥議具奏

又 諭朕奉 慈安皇太后 慈禧皇太后懿旨前因雲南學政張錫燦奏請宗祀 文宗顯皇帝於大饗殿以合孝經明堂之義並附陳宗祀辨疑條說當交王大臣大學士六部九卿翰詹科道敬謹妥議嗣據該王大臣等會同議奏以窒礙難行懇請毋庸置議復以事關典禮宜倍加詳慎本日召見惠親王蘇愉悼親王奕諒醇郡王奕譞鍾郡王奕詒孚郡王奕勳禮親王世鐸睿親王仁壽肅親王華豐順承郡王慶恩軍機大臣文祥寶鋆曹毓瑛御前大臣景壽奕山貝勒載治貝子載容公載岱大學士賈植周祖培尚書瑞常朱鳳樓倭什琿布大學士銜尚書祁寯藻尚書萬青藜綿森大學士銜管理工部事務翁心存尚書倭仁侍郎張之萬阜保大理寺卿全慶光祿寺卿潘祖蔭等面加詢問僉稱 文宗顯皇帝德齊覆轉道隆繼述凡有血氣之倫罔不共切尊崇矧在臣工渥承 厚澤惟考之今制稽之古禮事多窒礙未可依行等語仰惟 文宗顯皇帝知禮善述於御極之初特頒諭旨嗣後 郊祀配位總以 三祖五宗爲定垂示久遠著爲成式今舉行宗祀明堂之典仍是 郊壇配饗揆 文宗顯皇帝垂憲萬世之心殊多未愜且乾隆年間欽奉 高宗純皇帝諭旨改 大饗殿爲 祈年殿 列聖龍位儼然在上若於季秋之月大饗 上帝禮隆獨配於 文宗顯皇帝在天之靈更有所不安至孝經嚴父之說 聖祖仁皇帝欽定孝經衍義辨晰至當深以迭饗並侑爲失禮之甚 謨烈昭垂曷敢不欽承無數惟至孝莫大乎 尊親而崇祀必求諸典禮該學政所奏既屬

窒礙難行即著毋庸置議繼志述事孝之大者皇帝惟當仰承 先志恪守彝章爾王大臣等其各矢公忠釋思 謨訓遇有事關國計民生者事事以 先帝之心爲心盡心匡弼用協厥中則 在天之靈必能降鑒無事紛更典禮爲也

光緒元年十一月戊午冬至大祀 天於 圓丘遺慶至恭代行禮

二年正月辛亥祈穀於 上帝遺奕諒恭代行禮十一月癸亥冬至大祀 天於 圓丘命奕諒恭代行禮

臣 謹案 穆宗 德宗均冲齡踐阼御之初遣官恭代 親政後始親詣行禮茲謹紀 列聖親郊歲月次第彙登以昭鉅典焉

高宗純皇帝在位六十年 元年至五十年九十八次

乾隆五十一年十一月辛未

五十二年十一月丁丑

五十三年十一月壬午

五十四年十一月丁亥

五十五年十一月壬辰

五十六年十一月戊戌

五十七年十一月癸卯

五十八年十一月戊申

五十九年十一月癸丑

六十年十一月己未 命皇太子陪祀如儀

仁宗睿皇帝在位二十五年

嘉慶元年十一月甲子

二年十一月己巳

三年十一月甲戌

四年十一月庚辰

五年十一月乙酉

六年十一月庚寅
 七年十一月乙未
 八年十一月辛丑
 九年十一月丙午
 十年十一月辛亥
 十一年十一月丙辰
 十二年十一月壬戌
 十三年十一月丁卯
 十四年十一月壬申
 十五年十一月丁丑
 十六年十一月癸未
 十七年十一月戊子
 十八年十一月癸巳
 十九年十一月戊戌
 二十年十一月癸卯
 二十一年十一月己酉
 二十二年十一月甲寅
 二十三年十一月己未
 二十四年十一月甲子

宣宗成皇帝在位三十年
 嘉慶二十五年十一月庚午
 道光元年十一月乙亥
 二年十一月庚辰
 三年十一月乙酉
 五年十一月丙申
 六年十一月辛丑

七年十一月丙午
 八年十一月壬子
 十年十一月壬戌
 十一年十一月甲子
 十二年十一月癸酉
 十三年十一月戊寅
 十四年十一月庚辰
 十五年十一月戊子
 十六年十一月甲午
 十七年十一月己亥
 十八年十一月甲辰
 十九年十一月己酉
 二十年十一月乙卯
 二十一年十一月庚申
 二十二年十一月乙丑
 二十三年十一月庚午
 二十四年十一月丙子
 二十五年十一月辛巳
 二十六年十一月丙戌
 二十七年十一月辛卯
 二十八年十一月丁酉

文宗顯皇帝在位十一年
 道光三十年十一月丁未
 咸豐元年十一月壬子
 二年十一月丁巳
 四年十一月戊辰

五年十一月癸酉

六年十一月戊寅

穆宗毅皇帝在位十三年

同治十一年十一月壬寅

十二年十一月戊申

德宗景皇帝在位三十四年

光緒十二年十一月乙卯

十三年十一月辛酉

十六年十一月丁丑

十七年十一月壬午

十八年十一月丁亥

二十年四月庚戌十一月丁酉

二十一年十一月癸卯

二十二年十一月戊申

二十三年十一月癸丑

二十七年十二月己亥

二十八年四月甲午

三十一年十一月乙未

三十二年十一月辛丑

三十三年十一月丙午

十五年 諭太常寺奏請飭與修要工一摺 天壇 祈年殿祀典攸關著工

部奏明派員敬謹勘估請旨辦理至明春 大祀伊邇應如何變通舉行之處

著禮部太常寺會同妥議具奏

三十三年 諭 壇 廟祭祀典禮最重凡應行陪祀人員當如何齊莊整肅

乃近來陪祭各員並不遵守典章甚至人數亦復寥寥殊屬不成事體嗣後務

各恪恭將事毋得視為具文經此次申諭之後倘再有延誤定行懲處不貸

三十四年禮部奏遵議 壇 廟祭祀 監國攝政王代詣行禮事宜摺

本年十一月初三日軍機大臣欽奉 諭旨朕沖齡踐阼所有 壇 廟祭祀

未能親詣舉行應如何由攝政王代詣行禮之處著禮部妥議具奏欽此欽遵

到部仰見 朝廷慎重禮實事求是之至意 等語按孝經云昔者周公郊

祀后稷以配天宗祀文王於明堂以配上帝是以四海之內各以其職來祭禮

漢祭祀志注載幽州張翥上疏引此文以為居其位攝其事郊天地供羣神之

禮南齊書禮志載祠部郎何佟之議亦謂孝經是周公居攝時禮而唐元宗注

因之蓋就居攝而言在周公為代成王則成王郊祀之禮即周公所行之禮然

召誥載周公至洛用牲於郊社於新邑而洛誥周公復子明辟則云王雖稱殷

禮祀於新邑漢書郊祀志載丞相匡衡御史大夫張譚奏亦云成王郊於維維邑

可見周公雖行郊祀之禮而實成王之也今 皇上沖齡踐阼未能躬親祀

事而以 監國攝政王代詣行禮與周公居攝之禮正復相同自非尋常遣官

恭代者所可比擬惟行禮時所當別於 皇上親奉者有二一為祝按攝主祝

辭惟曾子問有祝曰孝子某使介子某執其常事為士攝大夫之禮而其辟正

主之意可以類推今 監國攝政王代詣行禮其 壇 廟祝版昭告之辭宜

恭書嗣天子臣孫嗣皇帝臣年在沖齡監國攝政王某攝行祀事以明為

皇上所主之祭春秋繁露稱郊祀九句大戴禮載其文云維予一人某敬拜皇

天之祐注云古祝辭則云嗣王某或曰一人某王者親告之辭也是其義也一

為撮按曾子問攝主不旅不嘏之說乃指少牢饋食禮與天子之制不同周禮

量人云凡宰祭與饗人受俎注以王酌尸尸嘏王說之謂祭受福也而攝主於

受福告禮成必歸致福少儀為人祭曰致福注云攝主言致福是也今 監國

攝政王代詣行禮宜代受福而致之 皇上漢書賈誼傳注漢儀注祭天地

五時皇帝不得自行祠還致福是其義也至於行禮之位 皇上親行禮節

郊壇拜位在第二成道官則在第三成 太廟拜位在 殿門內遣官則在

殿門外按禮祭統曰尸在廟門外則擬臣在廟門中則全於君君入廟門則全

於臣全於子祭祀之禮駁奔對越以答 帝天隆孝享非以明君道乃所以明

臣子之道也故君在廟中則全為臣子臣子一例春秋之義即禮之經也 監國攝政王代詣行禮既攝祭主在 壇 廟之中明臣子之道升降拜跪之位而祭主之位與 殿廷 寶座尊君臨之位義固不同 郊壇拜位在二成宗廟拜位在門內均不為嫌周禮大宗伯所謂若不與祭則攝位也 臣等謹徵之經籍遺文按諸通禮將應行妥議之處分晰條列另單繕呈恭候 命下欽遵辦理

一 祭祀前期應恭進銅人齋戒牌今 皇上於 宮內致齋遇齋戒日應由 臣部先期奏 聞其銅人齋戒牌擬俱無庸恭進

一 親詣行禮應進各項禮節摺奏牌奏如 監國攝政王代詣行禮擬由 臣部另繕禮節前期送軍機處轉呈 監國攝政王閱看無庸具摺具牌恭進

一 祭祀前期應 升殿閱視祝版如 監國攝政王代詣行禮擬即由 監國攝政王閱視祝版惟行禮時拜位擬在 殿門外檐下詣香亭前點香用禮部官前引不奏禮成

一 祝版文仍恭書 御名昭告惟於首行詞頭將 皇上見在沖齡由 監國攝政王某代詣行禮之處敘入由 臣部將原文咨送翰林院敬謹酌擬

一 祭 天壇前一日 皇上親詣上香閱視 壇位視籩豆牲牲牲宿 齋宮如 監國攝政王代詣行禮擬請於祭日詣 壇無庸宿齋至前一日上香向奉 特旨欽派不由 臣部奏請其視 壇位及閱視籩豆牲牲應由 臣部前期奏請 遣官恭代

一 監國攝政王出入升降仍由右門右階其行禮拜位 監國攝政王既代 皇上為祭主自與尋常遣官不同 郊壇拜位擬請在第二成不設黃幄不安拜牌 太廟拜位在門內視 皇上親行拜位稍後鋪設 監國攝政王應用拜褥庶合攝祭之義仍存別嫌之意

一 祭祀前期視牲看牲擬仍奏派贊引讀祝擬由 臣部於 御前贊引讀祝各官內揀選供差無庸奏派如 監國攝政王代詣行禮時對引侍儀陪祀

各官擬均仍舊其 午門外跪迎跪送各官擬請無庸迎送 一 飲福受胙擬請照 皇上親行禮節祭畢將福酒胙肉恭進以合於祠還致福之義其受福受胙應酌改於所擬行禮拜位處 一 先農壇行耕耨禮重在 親耕為天下勸擬俟 皇上親政後再議舉行 一 先師孔子廟見在興工經 臣部奏准 遣官致祭俟工竣後再行請 旨

一二七月內凡遇 中祀仍照例 遣官行禮其 中祀內值 朝日壇親行之年由 臣部請 旨遵行 一 見經會議奏准 壇 廟大祀由 監國攝政王代詣行禮其是否另行遣員恭代之處由該衙門先期請 旨遵行等語嗣後凡遇應行 親詣各典禮再由 臣部按照奏准章程先期請 旨

宣統元年十一月冬至祀 天於 園丘遣豫親王懋林恭代行禮

皇朝續文獻通考卷一百四十九

郊社考三

祀后土

臣謹案夏以五月祭地祇殷以六月祭地祇周制夏日至禮地祇於方邱嗣後矯誣淫穢蕩而失所神其吐之矣迨明嘉靖九年從夏言疏兆方邱於北郊以祀地祭用夏至 國朝茵席之定制每歲夏至大祀 地於北郊 方澤以五嶽五鎮四海四瀆爲四從壇配享煌煌鉅典率循罔愆謹仿前例著之於篇

乾隆五十九年 諭乾隆四十五年朕年已七旬恐於秩祀大典儀節有愆始於南郊大祀時令諸皇子分詣 配位前奠帛其 北郊儀注內升香奠帛禮臣尙復沿照親行舊例具奏夫 園丘 方澤皆稱大祀而 南郊配 天典禮尤重乃未經一律更定自係彼時禮臣辦理遺漏此次大祀 方澤 皇地祇位前香帛朕親自供獻 列祖 列宗配位前宜如 南郊禮朕親自升香其奠帛禮儀亦遺諸皇子分獻此非朕怠於將事緣 郊祀大典務在精誠孚格禮節無愆方足以昭朕饗况朕春秋已八旬開四距乾隆四十五年又閱十有四載雖仰邀 昊眷精神強固如常然於登拜趨踰未免稍遜於昔若列祖 列宗配位前奠帛一節仍勉強將事不特 南北郊儀文軒輊未協崇效卑法之義且慮節文繁重跪起惟艱或至遺官恭代轉於 郊祀大典未獲躬親尤非盡誠昭事之道朕自臨御以來夙夜孜孜惟以敬 天報本爲念郊壇大祀靡不劬恭欽承茲因年壽已高不得不酌減儀文以冀升壽告備是非敢自惜其勞正所以要之於久我世世子孫承禮行慶如能似朕之年躋上壽實我國家無疆之祿所有 郊祀經曲繁文自不妨照所減禮儀奉爲法守若未逾者盡則於 園丘 方澤 宗社大祀仍應恪遵定制肅奉明禮倘或稍憚勤勞老年未屆遐思節減即非勵精昭格之義我子孫其敬承無替倍矢虔恭以迓億萬年無疆福祚方無負朕誥切訓誠至意此旨著於上書房軍機處禮部太常寺各恭錄一通敬謹遵照

嘉慶元年致祭 方澤祭日 皇上乘禮輿出 太和門降禮輿升金轎至西天門由中門入至 北天門外降輦處降輦行禮時 皇上由 櫺星門東門入升 壇北階行禮行禮節均遵照乾隆禮部儀制禮畢出 櫺星門東門詣 齋宮更衣

二年 太上皇帝勅諭內閣曰皇帝恭祭 方澤大祀大學士及各部院九卿皆應陪祀乃本日各部尙書等惟禮部堂官在 壇執事而金士松周興岱亦復來園其餘五部滿漢堂官多以會奏來園並未陪祀各部院陳奏事件該堂官等本應到園祇候但值 郊壇大典理應敬謹陪祀即有陳奏事件何妨堂官一人先行來園呈遞其餘各堂官儘可於陪祀後再行趕到即如阿哥等此次皆係於陪祀後來園爲時尚早仍可無誤况本日所奏事件多係軍機大臣會同各該部具奏該堂官等又何得藉此俱行來園自係藉稱奏事可免行禮貪圖安逸以致大祀典禮陪祀大臣寥寥殊非敬謹襄事之道所有本日來園並未陪祀之各部院堂官等俱著查明交部議處其查班之科道亦未查參著交部察議

五年奏准恭修 皇祇室前期遺官告祭 天 地 太廟後殿 奉先殿 社稷以奉請 皇地祇 列聖神位祇告祀畢禮部堂官詣 皇祇室上香行三跪九叩禮太常寺官備鳳亭恭請各 神牌奉安亭內行一跪三叩禮校尉昇亭太常寺官十人前引由中門出至 神庫前亭止太常寺官詣亭前行一跪三叩禮恭奉 神牌敬謹奉安於 神庫內禮部堂官上香行禮如初屆期遺官告祭 后土 司工之神工竣後恭請 神牌還御均與興工禮同又 諭向來恭遇祭祀齋戒日期各部院衙門不進本但思大祀如 園丘 祈穀 常等朕精誠專意祇宿齋宮應循例不進本章以昭虔敬其 方澤 太廟 社稷均係大祀雖照常齋戒而不親宿齋宮若各衙門本章概不呈進恐致事多積壓嗣後凡遇齋戒日期如 園丘 祈穀 常等親宿齋宮之日各部院仍照例不進本章至 方澤 太廟 社稷致齋三日內除刑部不必進本及各部院外省本章有關涉刑名者俱不呈進外其餘尋常事件著各

該衙門照常進奉即以本年 方澤大祀為始著為令

又 諭禮部具奏五月初一日夏至 方澤大祀 高宗純皇帝升配事宜一摺於祭日先詣 高宗純皇帝神牌前上香行禮尚未周備上年冬至恭逢

國丘大祀祇奉 高宗純皇帝神牌升配朕於前一日恭赴 天壇齋宿即敬詣 皇穹宇拈香隨至 高宗純皇帝神牌黃幄敬謹行禮今春 祈穀 升

配前一日先詣 皇乾殿次詣 神牌黃幄禮節亦同 方澤大祀 高宗純皇帝升配 地壇因每年例係在宮內齋宿禮部請於祭日先詣 神牌黃幄

行禮視 升配 天壇禮儀尚缺先期致告一節朕心殊覺未安因思 地壇於乾隆十七年初建齋宮 皇考曾詣齋宿一次彼時新栽樹木尚未成陰隨

從官員致有受病者 皇考俯加體恤以後夏至 地壇俱即齋宿宮內祭日始詣 壇行禮此次 升配前一日自應先期致告若禮畢仍行還宮於義未

合若任宿壇內齋宮雖屬正理但隨從之王公大臣侍衛等車馬喧闐其時高宗純皇帝神牌黃幄恭設 北天門外相距甚近實不足以昭虔肅心實不

安再四思維惟有於前一日閱祝版畢還宮辦事後朕由東華門恭赴 皇祇宇拈香隨至 高宗純皇帝神牌黃幄行禮畢即詣 雍和宮齋宿其隨從之

王公大臣侍衛等亦可就近致齋於次早恭詣 地壇行禮庶 國丘 方澤 升配前期致告之儀既昭畫一而禮緣義起節次更為詳備著禮部遵照

此旨於儀注內敬謹增載此次專為 升配增此禮節嗣後夏至 地壇齋宿仍照舊例行

十年 御製北郊記曰乾為父坤為母大易之微言古今之通義也一陰一陽

虛太極而分兩儀化育萬物皆沐 天 地栽培鼓盪之深慈高明博厚悠久

無疆誠不可測度亦無由仰報惟盡此寸衷之誠敬耳予去歲敬製 南郊記

專申事 天之精義茲將有事於 北郊復闡明事 地之鉅典夫雨露降自

天稼穡生於地上下絪縕化醇庶物天為用而地為體感召之運豈有歧異乎

日月著天山川著地人為萬物之靈咸沐生成 大德故燔柴於 泰壇祭

天也瘞埋於 泰折祭 地也資生載物無疆合德而品彙咸亨安貞有慶含

宏光大而純厚永賴恆久攸常發育成之妙與 天配德祀典與 國丘並重者此義也冬至一陽來復故報本於 南郊夏至祭 北郊其義同而理極元妙其典重而心主精誠為天下萬民祈福悉本於寸衷昭事庶幾上格 地祇雨暘時若百穀用成曷敢忽哉追思三年 訓政每遇予小子致祭 大祀之先期必 召至寢殿語諸申諭致齋必潔主祭必誠 言猶在耳永矢弗諼敬製斯文以示臣庶俾曉然共知予今日敬事之忱悉本我 皇考當年之

誨期與天下黎元永承 慈澤靡有涯沃矣謹記

十四年 諭本年 等壇大祀朕欽遵乾隆二十五年 皇考高宗純皇帝舊制改由北首外西天門進廣利門內降輦詣 壇因見屆 方澤大祀特命太

常寺一體詳查 皇考高宗純皇帝當日改由外西門至內西門內降輦之制並令將步行遠近詳悉查奏聞本日據太常寺奏敬往 壇內相度地勢詳

細丈量 壇之內西門外降輦處起至北極星門東門止共計一百一十丈其北門外降輦處起至北極星門東門止亦如之是兩處步行遠近實屬無異

惟乘輿之路向由外西門轉至北門外始行降輦多行約二里許未免紆遠於行禮時刻轉致耽延本年朕養秋甫閱五旬未敢遽照 皇考高宗純皇帝進

至內西門內降輦之制著自此次起改於內西門外降輦仍步行詣 壇惟向來金殿係設於 神路之東此後著該衙門查照舊制改設於 神路之西

二十年 諭嘉慶十四年 方澤大祀因降輦由外西門轉至北門外降輦路稍紆遠改於內西門外降輦並降旨交軍機處存記俟逾五年後提奏再於內

西門內酌量降輦處所見屆 方澤大祀相距已逾五年恭查乾隆三十五年以後 皇考高宗純皇帝聖壽六旬恭祀 方澤係於內西門內齋宮前甬道

北降輦朕此時春秋五十有六不敢遽行仿照著太常寺敬謹相度自內西門外至齋宮前甬道北酌定設中之地鋪設椽薦以備降輦與繪圖貼說先行具奏

至 南郊大祀禮宜從同自本年冬至為始所有降輦處所亦著太常寺敬謹相度適中處所繪圖貼說具奏

二十三年九月 上詣 地壇行禮

道光元年五月夏至祭地於 方澤恭奉 仁宗睿皇帝配享

八年九月 上詣 地壇行禮

十二年六月 諭京師入夏以來甚形亢旱見在節過小暑迫不可待風日炎燥深切憂勞前經親禱 三壇復躬祀 社稷壇虔誠布禱小雨廉纖未蒙優渥朕敬 天之威軫民之依中心如焚倍形焦灼特親撰祝文擇於本月十八日敬舉告祭 方澤典禮虔申步禱十五日先期進宮撤膳虔齋思過待 命以期 皇祇眷祐立沛甘霖庶回百穀之生而蘇萬民之命所有應行典禮各該衙門即照例敬謹豫備其齋戒閱祝版告祭服色均照步禱 社稷壇禮行應否設立 配位之處著軍機大臣會同禮部堂官速議具奏

越四日 上步詣 方澤祈雨 御製祝文曰伏思天下之廣不免水旱難齊即偶遇愆陽驟雨銜誠致禱均蒙立沛甘霖咸叨 澤既今歲入夏以來經月不雨非常亢旱 雖憂懼難名亦無補救步禱 三壇 社稷未荷 殊恩總緣 愆尤日積不戒於驕侈即有改度敗禮之行或一念之差有干 天罰或用人行政違己見而失正當茲當 垂慈示警雖深自咎悔已云無及謹齋戒 齋禱步叩 方澤欽惟 后土皇地祇 德配 上天 功昭下土當茲旱既太甚之時序逢小暑之後萬姓嗷嗷百穀難望君為輕民何辜嗚呼愧悚交加莫知所措敬祈 后土皇地祇 已往許以自新立沛 恩膏以拯萬姓無任憂惕悔悔之至

咸豐元年五月 諭 壇 廟大祀理宜整肅向來有專派稽查大臣俾司巡察朕看近來未免視為具文因循怠忽不過以站班為常差使殊失敬慎之道本月二十三日 方澤大祀著該大臣等於前一日搜查後次早尤應認真稽察不准偷安其並無執事之人及跟隨人等不得任其出入自由其樞星門內左近勿令閒人在彼偷觀若稍有疎忽惟將該大臣等懲處不貸嗣後凡遇親行 大祀均應一體嚴格將事毋稍疏懈

夏至祭 地於 方澤
二年 諭五月初四日 方澤大祀 皇考宣宗成皇帝升配 地壇朕於前

一日閱祝版畢還宮辦事後由東華門出自安定門恭詣 皇祇室拈香即至 宣宗成皇帝神牌黃幄行禮仍進安定門詣 雍和宮齋宿嗣後 地壇大祀俱照例在官齋宿

五月夏至祭 地於方澤恭奉 宣宗成皇帝配享如配 天儀
三年五月 諭本月十五日至 方澤大祀前經降旨朕親詣行禮茲因偶患微疾尚未全愈恐登降拜跪未能如常不足以昭誠敬著派恭親王奕訢恭代行禮

同治十二年恭修皇祇室前期遣官告祭 天 地 太廟後殿 奉先殿 社稷以奉請 皇地祇 列聖神位祇告祀舉禮部堂官詣 皇祇室上香行三跪九叩禮太常寺官備鳳亭恭請各神牌奉安亭內行一跪三叩禮校尉昇亭太常寺官十人前引由中門出至神庫前亭止太常寺官詣亭前行一跪三叩禮恭奉 神牌敬謹奉安於神庫內禮部堂官上香行禮如初屆期遣官告祭 后土 司工之神工竣後恭請神牌還甸均與興工時同

又夏至祭 地於 方澤 上親詣行禮
十三年五月己酉祭 地於 方澤 上親詣行禮
光緒元年四月乙酉大祀 地於 方澤 遣晉祺恭代行禮
十三年至三十三年大祀 方澤 親詣次數

十三年五月戊午
十四年五月癸亥
十八年五月甲申
十九年五月己丑
二十年五月甲午
二十三年五月庚戌
二十四年五月乙卯
二十九年四月庚子
三十一年五月壬辰

續修四庫全書 史部 政書類

三十二年五月丁酉

三十三年五月壬寅

宣統二年五月戊午夏至大祀 地於 方澤遺莊親王載功恭代行禮

一三〇七 冊 續修四庫全書 第 10 卷 文 29

皇朝續文獻通考卷一百五十

郊社考四 雩 禱水旱附

臣謹案左傳龍見而雩公羊傳言雩則旱見言旱則雩不見穀梁傳雩得兩日雩不得兩日旱漢承秦滅學正雩禮廢致使巫覡代之不經甚矣我朝凡遇水旱無不肅恭將事以迓 神庥以故兩暘時若雖偶逢偏災不為害焉續考其禮如左

乾隆五十一年 諭見屆春和清口啟壩放水之時必須各處雨水充足來源旺盛匯注洪湖啟放時方能刷沙濟運而土膏颯動東作方興凡有農民情殷望澤宜申告祭以冀仰邀 神佑見派御前侍衛副都統阿彌達恭齋御香前往陶莊清口兩處河神惠濟祠淮瀆風神廟及龜山之淮瀆廟共六處虔誠致祭著傳諭薩載李奉翰不必疑朕或派員查工心存惶惑惟當豫備祭品俟阿彌達到時一同虔誠行禮齋心默禱以迓 神庥上年淮徐一帶旱暵異常屢祈不應由該督等不能虔誠所致至湖水曾否啟壩宣放見在有無續長啟放時能否衝刷淤沙著傳諭薩載等先將見在情形據實詳悉奏聞俟阿彌達到彼再行會同履勘回京覆奏

五十二年四月戊午 上詣黑龍潭祈雨丙寅 上詣黑龍潭祈雨甲戌 上詣覺生寺祈雨

五十三年四月癸丑 上詣黑龍潭祈雨
五十七年四月乙卯 上詣黑龍潭祈雨

又 諭前日御史曹錫齡奏京畿得雨未能霑足請 旨司問擬立決之案除情罪重大者照例辦理外其餘命盜案件內按律問擬即應處決之犯暫停題奏一摺已經降旨飭行第思禁屠祈雨原期感召天和若於祈雨之齋戒日期及致祭之本日亦照常進立決本實不足以昭誠敬是其奏原有一半可行查向例凡遇祈雨齋戒日期刑部並不停進立決本章即本月二十一日係齋戒祈雨之期刑部亦會呈進所辦誠屬未協此事阿桂未免因年老重聽不能領會遂相沿舊例辦理而軍機大臣於朕降旨時都未奏及朕一時忽略當引以

為各朕於臣工功過權衡至當豈肯令軍機大臣曉曉迴護嗣後凡遇祈禱雨澤之前一日及祭日此二日所有刑部應請立決之本俱著停止進呈以速感孚而昭誠敬著為令

閏四月 諭京師自春徂夏總未獲沛甘霖朕晝夜焦勞無時或釋去冬因雪澤較稀即於春閒齋心祈禱而入夏以後望澤尤殷屢經敬謹齋求仍未即施渥霽展轉思維求所以不能感召之由而不可得至於夜不成寐昨本欲於二十八日御門聽政時召見大學士九卿等面加諮詢交相循省今早恭閱聖祖實錄康熙二十一年六月亦因天氣炎旱會令九卿科道等會議彼時九卿等奏請清理庶獄而親祈之禮未及舉行見在恤刑一事朕不待九卿奏請早經降旨並截漕緩徵平糶寬賑等事無不次第加恩且朕曾於黑龍潭覺生寺拈香敬禱又令皇子等分詣行禮凡所以祈求甘澤者已無不備至因思乾隆二十四年京城亢旱六月初旬尚未得雨朕於十一日舉行 大雩禮躬親步禱旋沛醴膏但維時朕年甫四旬有餘力能步行今春秋八十有二矣雖精神尚能如舊而步履未免稍艱即在宮內行走天色稍暗間或需人扶掖若必勉強步禱足力不支倘偶愆儀節轉不足以昭懇誠如本日召見諸臣內尚書常青年甫八十精力素稱強健乃因跪聆諭旨為時未久竟至頭目眩暈須人掖出况朕年高於常青乎且朕雖未行 大雩之禮而於設壇祈禱分遣皇子等恭詣行禮時朕每日夙興必於宮中升香 天神 地祇前默禱偶見雲氣往來必望空叩祝是朕雖未步禱而為民祈澤之誠實不敢一刻稍懈乃至三壇禮竣 昊旻未昭夙夜焦思撫躬自省或緣政治有所缺失以致未能感迓祥和但自古政治之失無如女謁宦寺權臣外戚諸大端見在宮中妃嬪四五人皆已年老且不能備位至於女樂自即位以來即不用其餘給使女子合之皇子皇孫等乳媪使婢統計不滿二百人為從來宮闈所未有至本朝閣寺止供灑掃之役從不敢干與政事近因約束更嚴稍有微愆即加斥責而伊等亦自覺愚蠢即尋常使令尚形竭蹶豈復能營私舞弊是以願充太監者日少當差竟致乏人若云權臣專政則更無其事朕乾綱獨攬太阿從不下移况見

在內外大臣俱朕親加擢用不特不敢如前明之嚴嵩輩盜竊威柄朋比為奸即本朝康熙年間明珠徐乾學等私相交結少通饋遺雍正年間及朕乾隆十年以前鄂爾泰張廷玉等素知謹慎尚不免稍存門戶之見此時諸臣中亦無一略似彼二人者以言外戚則觀音保為孝聖憲皇后之姪在散秩大臣上行走十有餘年甫得簡用副都統爵位亦不為崇若傅恆福康安之晉封公爵俱因底定金川及勦平臺灣等處逆匪懋著勞績用示酬庸並非因傅恆福康安為孝賢皇后之弟姪特加恩寵即明瑞奎林明亮皆皇后之姪俱以躬列戎行為國家宣力而明瑞又係歿於王事此等得力大臣豈必因身係外戚轉棄而不用乎其餘如興修工作等事朕早自以為過然俱動用內府帑項從無絲毫累及閭閻並以工代賑俾小民均資利益且近十餘年來亦未嘗復舉大工是朕之用人行政天下臣民所共聞共見者因復思目前重務惟有進勦廓爾喀一事外間或有議及不應勞師動衆以致雨澤愆期者殊不知廓爾喀係微外小番前此因與唐古特人等鹽稅細故侵擾後藏邊界彼時派令巴忠鄂輝成德等前往剖斷賊匪即畏懼乞降此次賊匪復因帳目未清又來滋擾經駐藏大臣具奏時朕僅令鄂輝成德帶兵往諭原不過示以兵威使之悔罪乞降不敢再萌他念即可完事而已及巴忠聞信自戕始疑從前辦理錯誤而賊匪等竟敢擾至扎什倫布肆行搶劫若不痛加殲戮賊匪無所忌憚勢必為得尺則尺之計漸至侵入前藏即察木多巴塘裏塘一帶亦必受其煽惑日久漸成邊患且此時僅以和息了事將來大兵撤後倘賊匪復來滋事後藏距川省遠遠鞭長莫及斷無屢勞兵力遠涉勦辦之理是以特命福康安海蘭察等統兵前往聲罪致討無非為綏靖邊圉保護衛藏起見朕臨御以來拓土開疆膚功屢奏以廓爾喀之葛爾丹不及回準二部及金川緬甸安南百分之一豈屑利其土地而為此勞師動衆之舉此朕不得已用兵之苦心又宜為天下臣民所共諒者或此節窮兵黷武乎朕反復推求終莫能得致旱之故但甘澤未施總由朕躬不能感格豈此自省無缺之一念即不免為盈滿之累遂致恆暘示儆耶此意朕每日召見軍機大臣未嘗不再三垂問即大學士九卿聞日召對

時均殷殷面詢令其據實直陳而諸臣等僉稱並無闕失大臣等俱受朕深恩於此等關繫民瘼重務經朕虛懷訪詢豈忍復事諱飾第 天恩未降究由人事未孚是以本日於御門聽政畢復召見皇子皇孫及大學士九卿等交相咨啟務求致旱之由益加省惕皇子等皆當 北郊大祭齋居並派皇孫大臣等分詣黑龍潭覺生寺齋宿齋禱仍令皇子等輪日前往拈香此時將屆夏至若能速霽恩膏趕緊播種大田秋收尙屬可望著大學士九卿等傳集科道公同諮議如果確有所見即據實合詞陳奏以副朕遇災戒懼側身修省之意五十七年 諭太白山禱雨輒應久著靈異將來應於香山千相寺內供奉太白山神以昭誠敬嗣後每年春初著該撫遣官虔赴太白山取水遇有便差及引見官員等順送至京供設神前設遇應行祈雨之時即可就近取水祈禱

臣謹案喇嘛亭雜錄壬子夏旱 上宣召九卿科道 召對於 勤政殿下罪已詔言本朝並無強藩宦官女謁權臣佞倖之弊惟土木繁興引為己責 命羣臣直言匡救失是日即雷雨大作四郊霑足

五十九年 諭京城旬餘以來未據奏報得雨朕驛路所經連日風勢較大仍形乾燥看來京城及近畿一帶俱未免情殷望澤四月初旬即屆 雪祭著傳諭八阿哥阿桂如 雪祭以前得雨則已如逾時尙未得雨即於覺生寺黑龍潭兩處設壇令僧道分投唵經虔誠祈禱仍著皇子皇孫等輪往拈香以期甘霖速沛所有應辦設壇等事交金簡伊齡阿照例辦理

又四月 諭本月初五日舉行 常雩大祀豫日詣 齋壇拈香適遇甘霖霑被醴澤載塗仰荷 天恩忻感之餘倍深敬惕是日溼衣之王公大臣等均著賞職任俸半年在 壇執事之禮部太常寺官員及隨從之侍衛章京等俱著一體賞俸半年護軍營兵校尉等著賞給半月錢糧步甲修墊盤路著賞一月錢糧

丁丑 上詣黑龍潭祈雨丙申京師雨

又 諭梁肯堂奏保定一帶仍未得雨見在敬率司道虔誠步禱等語直隸甘肅未沛梁肯堂身任地方自應焦急而朕軫念民依因此宵旰靡懷倍為殷切

該督見在率屬籲求固爲民事起見但雨澤未霑惟當敬謹祈禱應 天以誠以冀感召麻和不可因盼澤焦急輒聽道流妄用符錄法術強求轉致齟齬也六十年六月 諭行在內閣前據留京王大臣等奏報京城於初七日得雨四寸後迄今未據續奏昨詢問帶領旗引見官員據稱京城初七日之雨不過三寸十八日微雨不成分寸等語且聞近今通州薊州等處見俱晴霽日久看來京城及近畿一帶望澤甚殷與熱河相同見當伏內暑熱三四寸之雨本未爲透足况自初七日得雨後迄今又隔二十餘日烈日曝曬自必更形乾燥田禾恐致黃萎深爲慮念著傳諭留京王大臣及順天府尹即將近日祈禱會否得有雨澤究竟田禾有無妨礙之處即行查明據實覆奏不可稍有諱飾致令小民失所至見在雨澤短少我君臣調燮失宜已難辭咎若再任聽道流用惡法逆求更非敬事誠求之道並著留京王大臣等傳知道士等祇須虔誠祈禱以期速沛甘霖也

嘉慶元年 上行 常雩禮豫日 上乘輦至 昭亨門外降輦詣 皇穹宇拈香閱視 壇位籩豆牲牢畢入 齋宮祀日 皇上自齋宮乘輦至外城南門外 神路西降輦升 壇行禮凡一應行禮儀節均照乾隆三十七年以前舊例禮畢 上出 昭亨門乘輦回宮

謹案嘉慶九年太常寺所進儀注禮成後 皇上出廣利門

二年二月壬辰 上奉 太上皇帝命詣黑龍潭祈雨是日雨

五月甲辰 上奉 太上皇帝命詣黑龍潭祈雨

丙午 上奉 太上皇帝命詣 天神壇祈雨是日大雨

十二年 諭朕閱會典所載 大雩典禮惟乾隆二十四年曾經舉行一次其時 皇考高宗純皇帝減膳虔齋不設兩簿不陳樂不乘輦乘騎出宮詣 壇齋宿次日御雨冠素服步禱於 壇仰見 皇考敬 天勤民精虔昭格禮成後卽甘霖普降四野霑足感召之理如響斯應至雨水調勻之歲每遇 常雩大祀則前期齋宿 郊壇係由宮中乘輦而出儀物具備此次恭值 常雩朕進宮齋戒因思上年冬間雪澤較少本年春雨又稀前已設壇祈禱得雨兩次

仍未霑渥且近畿以及東豫等省均尚在望澤雖未至早嘆太甚究與往歲情形不同今當 大祀屆期若仍照常御輦詣 壇朕心實有不安本月初六日朕由宮中御禮轎前詣 天壇齋宿著該衙門敬謹豫備其一切服色儀仗均如常儀朕宵旰民依罔敢暇逸或此一念減抑之誠得以上邀 昊鑒甘膏速需福我三農實所願望而冀幸者嗣後遇雨澤稀少之年舉行 常雩祀典均著照此行

又 諭光祿寺卿錢楷奏京師春夏以來雨澤稍稀請循照漢書求雨閉陽縱陰之說將見在正陽門外修築之石道暫停工作以期甘霖速沛一摺五行生剋制勝雖見諸傳記大率經生強爲傳會其事多迂窒不可行卽如漢書求雨注內所稱閉南門禁舉火之類此或在一鄉一邑尙可遵循偶一爲之至京師都會之地車馬輻輳行旅絡繹又豈能拘泥陳言概行禁止設今正陽崇文宣武三門暫閉數日尙復成何政體從前寶光齋感於此說竟有不閉房門從窗牖行走之事豈非大笑談乎朕見因京城雨澤愆期昕夕齋心默禱惟期動修實政敬迓 天和若謂將見在所修之石道暫停工作數日遂可以立沛甘霖恐感應之理未必在此所奏應毋庸議

十六年 諭向來 天壇三大祀恭閱祝版時祝版玉帛香亭設於太和殿之西香亭設於太和殿之東及恭閱祝版玉帛香行禮後各安設亭內復詣東邊香亭行禮方始昇行朕思香亭之設原因祝版通誠於 上帝故必於香亭內上香行禮至昇行時卽昇於祝版亭之前今祝版亭安設在西朕祇於香亭前望空行禮尙於義未協嗣後 三大祀閱祝版時祝版亭卽設於東邊香亭之後朕閱祝版後再恭詣香亭前向祝版上香行禮以昭肅肅

十八年 諭春秋傳稱龍見而雩考古雩祀權輿於此乾隆七年議於孟夏龍見擇日行 常雩禮其義以蒼龍宿見東方則爲百穀祈膏雨占星之法總以節候爲準非以孟夏朔日爲斷也比年欽天監所擇日期在立夏節前後不齊殊於古義未協嗣後 常雩大祀著欽天監定於立夏節後數日內謁吉行禮其立夏節如在三月以內則擇於四月初行禮著爲令其明年 常雩大祀期

著欽天監查明如原定在立夏節以前即改擇吉日奏准頒行

甲寅 上詣黑龍潭祈雨已未 上詣 天神壇祈雨庚午 上詣黑龍潭祈

雨庚辰 上詣 社稷壇祈雨

十九年 諭方受囑奏豫省麥收統計八分有餘並據西平河內鄆城等縣呈送雙穗瑞麥等語從來 天人感應之理省歲念微歷歷不爽上年逆匪林清以畿輔小民首倡逆謀糾約夥黨突入禁城擾及三省實屬元惡大憝為覆載所不容其河南之李文成牛亮臣山東之徐安樹宋躍濼等雖亦為叛逆渠魁然皆被林清所惑聽其指使約期起事若其餘附從賊眾祇係鄉愚無知隨從劫掠並不知悖逆為何事經官兵一律剿除此二省被賊地方不特良民遭其荼毒即脅從匪眾多被誅夷思之亦覺可憫茲逆黨已靖流離安集 上蒼宥罪施仁臘雪盈尺春雨依旬麥秋普慶豐登而豫省且有麥穗兩歧者 天心仁愛斯民昭然可觀惟直隸地方逆犯林清伏匿有年流毒滋甚首逆雖已伏法逆黨如祝現等尚日久稽誅京畿一帶多雪春膏俱未霑足自入夏以來雨澤愆期朕宵旰焦思虔申祈禱昨十九日親詣黑龍潭升香之際靈雨沾濡然迄未沛然優渥良由乖辰之氣未盡消除 吳穹雖鑒朕籲禱之誠尚不肯普被甘膏於黎庶朕惟有自省積愆益修厥德以釋民罪諸臣亦當盡心化導切戒因循積善誥奸矢清矢慎以期蕩滌瑕穢感召祥和勉旃勿忘

庚辰 上詣黑龍潭祈雨

二十年 諭向例祈雨雪期內俱不進立決本章但祈雨祈雪原為京畿附近而設非概為直省而祈也嗣後祈雨祈雪期內若立決人犯應在京處決者著毋庸具奏如係應在外省處決者則奉旨之後行文該省計奉到時已相距日久俱照常進本著為令再刑部議覆立決本章期限亦覺太寬著刑部酌議量減具奏候旨遵行

二十二年五月辛酉 上詣 天神壇祈雨

壬戌 諭本年入夏以來雨澤稀少然亦時有陣雨入土總不及分寸殷雷閃作亦非亢旱否塞之象朕於本月十八日親詣 天神壇虔申祈禱升香之際

陰雲四合至午後又復開霽仰聞 昊蒼垂象之意似天氣下降地氣不能上承是以石礎不潤未能渥沛甘膏各宜省過思愆勉修人事在京部院八旗以及內務府等衙門堂官職司表率皆當殫心竭慮翊贊深戒因循怠玩遷就模稜若徒以夙夜趨公奔走效勞遂為克盡厥職失之遠矣其司員分曹供職尤應振作精神痛改因循疲玩積習至責任緝捕各衙門則當認真訪拏逸犯使所轄境內實能洞察無遺方為不負委任毋得妄疑似或俾獲他案一二餘犯即張皇入奏冀圖塞責總之誠能格 天大小臣工惟當人人實心實力為國為民不可存邀功之見不可存避過之心果能羣相策勵共矢公忠必能感召 天和甘霖立霈感應之理固較然不爽者也

二十三年三月庚申 上詣黑龍潭祈雨四月庚辰 上詣黑龍潭祈雨戊子

上詣 天神壇祈雨十二月戊辰 上詣 大高殿祈雪丙子 上再詣

大高殿祈雪 二十四年四月己丑 上詣黑龍潭祈雨閏四月己酉 上詣

天神壇祈雨是日雨

臣謹案說苑湯時大旱七年維坼川竭煎沙爛石於是使人持三足鼎祝山川教之祝曰政不節耶使民疾耶蓋辭未已而天下大雨亦越 仁宗 教 天值民罔或敢懈偶逢亢旱即側身修行為民請命觀於甘霖之立沛益想見 帝謂之遐通矣

乾隆五十一年至六十年常零禮 親詣次數

五十二年四月戊午

五十三年四月癸丑

五十七年四月乙卯

五十九年四月丙寅

嘉慶元年至二十五年常零禮 親詣次數

二年二月壬辰

又五月甲辰

十八年四月甲寅

十九年四月辛巳
二十三年四月庚辰
二十四年四月己丑

皇朝續文獻通考卷一百五十一

郊社考五 雩 雩 雩 雩

道光元年四月丁未 上詣 大高殿祈雨十二月丁亥 上詣 大高殿祈雪

二年十一月十二月 上詣 大高殿兩次祈雪癸丑以祈雪未應命再度禱七日

三年四月 命於黑龍潭覺生寺設壇祈雨 上躬禱於覺生寺

四年四月五月 上詣黑龍潭兩次祈雨十一月十二月 上詣 大高殿兩次祈雪

五年十一月十二月 上詣 大高殿兩次祈雪

六年四月甲子 上詣黑龍潭祈雨

七年二月甲戌三月辛酉六月壬午 上詣黑龍潭三次祈雨

八年十二月戊辰 上詣 大高殿祈雪

十一年四月六月八月 上詣黑龍潭三次祈雨十一月十二月 上詣 大高殿兩次祈雪

十二年五月 上詣 天神壇祈雨 御製祝文六月 上步詣 社稷壇祈雨 御製祝文

辛巳 諭京師入夏以來甚形亢旱見在節過夏至望澤彌殷月前兩次設壇並親禱 三壇小兩廉纖未慰農望昨經躬視 社稷壇虔誠步禱風威雖斂尚未渥沛甘霖朕甚懼焉因思致旱之由必有所自本年辦理王法中吉三白尹老須孟老藏等案節經各該省緝拿犯證委員差役紛紛出擾及閭閻亦難保其必無百姓皆吾赤子若一身習教累及一家一家習教累及一鄉即此恐已上干 天和朕夙夜兢兢遇災而懼思除莠本以安良若莠未必除良善轉因之擾累朕心非特有所不忍實有所不敢見在渠魁已明正典刑嗣後除實在逆情已露有確實憑據為國法所不宥仍行嚴辦外其前此令該督撫查拿案內餘犯著琦善陶澍訥爾經額楊國楨林則徐鄧廷楨善體朕意妥為辦

理無枉無縱此等無知愚民本應平日化導俾父詔其子兄勉其弟薰其德而善良及觸罹法網始行懲治已非朕移風易俗之本懷若復概行波及拖累株連試問於心安乎早既太甚蒿目時艱有可以上格 天心者朕必見之施行以冀和甘速沛轉歎為豐該督撫等務副朕敬 天恤民之至意

甲午 命定親王奕紹詣泰山祈雨 御製祝文

己亥 諭前因京師亢旱朕躬祀 天神壇 社稷壇本月十八日復步禱方澤祈雨竭誠懇懇均蒙濃雲四布微雨飄灑尚未渥沛甘霖見在節屆大暑迫不可待朕心彌形焦灼敬稽乾隆二十四年 皇祖高宗純皇帝恭行 大

雪之禮朕夙夜戰兢省躬思過特親撰祝文擇於六月二十八日敬舉 大典禮據誠步禱為民請命以祈 天佑二十五日即進宮撤膳虔齋敬謹待命齋戒之日戴緯帽穿常服不掛朝珠二十七日閱祝祝版恭詣 天壇齋宿戴兩纓帽穿青褂二十八日禮成後穿常服不掛朝珠所有典禮各該衙門敬謹豫備

壬寅 上乘馬至 天壇門外步詣 南郊齋宿

癸卯 上自齋宮步詣 圓丘行 大雩禮 御製祝文曰嗚呼 皇天世不

有非常之變不敢舉非常之典今歲亢旱異常經夏不雨豈但稼穡人民餓殍災患即昆蟲草木亦不遂其生 臣忝居人上有治世安民之責雖寢食難安焦

憂悚惕終未獲沛甘霖日前 社稷壇 方澤致齋期內均蒙濃雲四布微雨飄灑而不能暢施仰見 天心仁愛總緣 臣奉日深鮮誠鮮敬不能上感 天

心而叨 鴻貺敬稽乾隆二十四年 皇祖高宗純皇帝恭行 大雩之禮 臣

於萬不得已仰溯 成規戰兢干冒省躬思過冀可仰邀 赦宥抑 臣記事不

敬驕侈之心不覺萌而萌與日久忘於庶政不能憂勤惕厲與出言不謹有干

譴責與賞功罰過輕重不得其平與重起陵園勞民傷財與任官不得其當以致政有叢脞與刑罰不得其平含冤無所控告與懲辦邪教濫及無辜之人與官吏欺瞞民隱不能上達與西陲連次用兵未免殺戮之慘而務邊功與南省災民賑撫不得其宜委於溝壑者衆楚粵逆搖勦撫不當以致民遭塗炭與凡

此者皆_臣思慮所及宜加黽勉省改其思慮不及者蓋有之矣伏祈 皇天赦
_臣愚蒙許_臣自新無辜萬姓因_臣一人是累_臣學更難道矣夏徂秋至實難再
逾叩禱 皇天速施解作之 恩立沛神功之雨以拯民命稍贖_臣愆嗚呼
皇天其鑒之嗚呼 皇天其惠之_臣不勝憂懼惶恐之至

_臣謹案乾隆七年御史徐以升奏略言我 朝禮制具備惟粵祭尙未設
有壇埴似屬闕典尋議准孟夏龍見擇日行常粵禮祀 吳天上帝於
園丘以 列聖配享 四從壇從祀於下如遇亢旱通行大粵禮祀 吳
天上帝於 園丘先經禱祈 太廟虔告 列祖此時不設配位仍設
四從壇於下所以特隆禮祀也 宣宗法 祖敬 天時虞頌越讀 御
製祝文至誠感神視湯之禱於桑林以六事自責者殆有過之無不及矣

七月 諭本日御史徐培深奏請行報謝 天壇一摺朕恪遵 成憲 敬
天勤民凡典禮之所昭垂皆遵循而無敢廢敬稽乾隆二十四年 皇祖高宗
純皇帝恭行 大粵之禮先期齋戒在養心殿 詣 壇齋宿騎馬不乘禮輿
朕詳稽 舊典不敢有違此次因京師亢旱爲民請 命以祈 天佑敬舉
大粵典禮先期二日在齋宮省躬思過前月二十七日騎馬詣 壇齋宿不乘
禮輿凡以 祖制煌煌述遵無廢固不敢過亦不敢不及也齋宮虔誠默禱幸
蒙 昊慈垂佑二十六二十七二十八等日濃雲四布雷電交作澍雨立霑朕
欽感之餘倍深寅畏本月初二日並據順天府奏齊澤疊降近畿一帶已有深
透及四五寸之處不敢不行報謝續冀大需甘霖原非爲連次陣雨京畿卽已
一律深透也此次派睿親王仁壽恭詣 天壇行禮敬謹報謝亦係恭查乾隆
二十四年成例辦理不敢稍除朕何嘗因倖叨 靈貺遽萌侈心遂爾法宮高
拱自耽安逸乎至御史陳煒奏再申虔禱一摺祭有禱焉有報焉該御史請以
報爲 祈禱諸禮經亦無是理朕謹遵 舊禮因敢除越正應 天以實不以
文之意將此通諭知之

十三年十一月丙戌 上詣 大高殿祈雪
十四年十二月癸丑 上詣 大高殿祈雪

十五年四月丁巳戊辰 上詣黑龍潭兩次祈雨十一月丙申十二月壬戌
上詣 大高殿兩次祈雪

十六年五月丙申 上詣黑龍潭祈雨辛亥 上詣 天神壇祈雨十一月癸
卯丁巳 上詣 大高殿兩次祈雪

十八年閏四月丙子 上詣黑龍潭祈雨癸巳 上詣靜明園龍神廟祈雨十
一月庚戌丁巳十二月乙亥丙戌 上詣 大高殿四次祈雪

十九年四月己卯 上詣黑龍潭祈雨戊子 上詣萬壽山廣潤祠祈雨
二十年四月戊子 上詣廣潤祠祈雨

二十一年十二月丁亥 上詣 大高殿祈雪
二十二年四月甲午 上詣黑龍潭祈雨

二十三年十一月丁酉 上詣 大高殿祈雪
二十四年十一月甲申十二月癸巳辛丑 上詣 大高殿三次祈雪

二十五年四月丙午五月丁亥 上詣黑龍潭兩次祈雨十二月辛卯癸卯癸
丑 上詣 大高殿三次祈雪

二十六年三月乙酉四月丙午五月壬戌丁卯 上詣黑龍潭四次祈雨十一
月乙未 上詣 大高殿祈雪

二十八年六月甲寅 上詣黑龍潭祈雨十二月丙午甲寅 上詣 大高殿
兩次祈雪辛酉 上詣 天神壇祈雪

咸豐元年四月乙丑 常粵祀 天於 園丘五月乙卯 上詣 大高殿祈
雨十一月戊辰十二月丁亥丁酉癸卯 上詣大高殿四次祈雪

四年四月 諭朕寅承大寶時以法 祖爲念去歲冬至 南郊大祀未克躬
親今正 新穀又酌減儀文雖因朕疾未愈升降恐致失儀然慚愧繁衷實有
不能以言喻者茲逢 粵祭屆期幸賴 天恩朕躬步履如常一切典禮仍應
照舊舉行因思至敬無文禮昭明訓前期詣 壇祗謁暨恭親 壇位典禮允
宜遵循勿替益申嚴恪之誠其閱親蓮豆性隻非闕大典嗣後仍遣員閱視勿
庸申請祭日禮成後仍在降輿處乘禮轎出廣利門永爲例

又 諭本年近畿一帶春澤未霑入夏以來望雨尤切朕體念民依行當虔禱
所有本月二十日陞殿著即停止

五月諭前因京師雨澤稀少當經降旨開壇祈禱並於四月二十日二十七日
親詣 大高殿 時應宮拈香雖經得雨數次向未溼濡甘霖見在節近芒種

農田望澤益殷朕心實深焦灼尤宜再深虔禱以迓甘和朕於本月初十日親
詣 大高殿 時應宮拈香著派惠親王綿愉恭祀 天神壇恭親王奕訢恭

祀 地祇壇成郡王載銳恭祀 太歲壇派怡親王載垣詣 覺生寺惇郡王
奕諒詣 黑龍潭載華詣清漪園 龍神廟奕湘詣靜明園 龍神廟拈香

宣仁廟 凝和廟 昭顯廟著派克勤郡王慶惠拈香均著先期齋宿於初十
日分詣行禮同申叩禱所有 大高殿 覺生寺常川住宿並輪班住宿上香

行禮仍著原派王大臣敬謹將事並著派莊親王奕仁前往密雲縣白龍潭拈
香虔禱雨澤

又 諭京師入夏以來雨澤稀少屢經降旨設壇祈禱未獲溼沛甘霖昨復降
旨清理庶獄冀可感召和甘見在節逾芒種膏澤向未覃敷朕念切民依益深

憂惕尤宜再行敬禱以期甘澍優霑朕於本月十九日親詣 天神壇虔申叩
禱派惠親王綿愉恭祀 地祇壇恭親王奕訢恭祀 太歲壇並派惇郡王奕

諒詣 覺生寺成郡王載銳詣 黑龍潭載華詣清漪園 龍神廟奕湘詣靜
明園 龍神廟拈香 時應宮 宣仁廟 凝和廟 昭顯廟著派克勤郡王

慶惠拈香並派莊親王奕仁恭詣 關帝廟致祭豫親王義道恭詣 城隍廟
致祭均著先期齋宿於十九日分詣行禮同申叩禱所有應行典禮著該衙門

敬謹豫備

又 諭前因京師入夏以來向未得雨節經降旨設壇祈禱猶未溼沛甘霖本
月十九日朕復親詣 天神壇虔禱并派惠親王綿愉等分詣各處致祭拈香

即於是日酉刻濃雲密布雷電交作甘澍滂沱仰蒙 昊慈垂佑朕心實深寅
感從此渥澤優渥更冀頻邀 鴻恩允宜敬謹報謝用答 天庥
十一月丁丑 乙酉 癸巳 上詣 大高殿三次祈雪

十二月 諭前因京畿入冬以來未沾雪澤疊經設壇祈禱並諭刑部等衙門
清理庶獄冀感祥和旬日以來向未見祥霽溼沛深宮修省焦盼彌殷允宜仰

籲 昊慈特申虔禱著於本月十四日舉行 三壇祈雪祀典朕親詣 天神
壇虔申叩禱派恭親王奕訢恭祀 地祇壇鄭親王端華恭祀 太歲壇致祭

時執事人等著照祈雨服色俱穿青褂俟禮畢仍用常服所有應行各事宜著
各該衙門敬謹豫備並派醇郡王奕譞詣 宣仁廟 凝和廟拈香克勤郡王

慶惠詣 昭顯廟 時應宮拈香朕先於初八日親詣 大高殿拈香朕詣
壇之日著派豫親王義道恭詣 大高殿拈香

六年四月 諭入夏以來京畿得雨尚未深透降旨於本月二十九日在 黑
龍潭 覺生寺設壇祈禱朕親詣黑龍潭拈香昨日午刻濃雲密布雨澤優渥

仰荷 昊慈垂佑從此續沛甘霖農田益資霑潤實感之下冀盼尤深著暫停
開壇朕於二十九日仍親詣 黑龍潭先行拈香報謝

又 諭前因京師入冬以來僅得微雪一次農田待澤孔殷當經設壇祈禱數
日以來未見祥霽溼沛寅盼彌深允宜仰籲 昊慈特申虔禱著於本月十四

日舉行 三壇祈雪祀典朕親詣 天神壇虔申叩禱派怡親王載垣恭祀
地祇壇貝勒載治恭祀 太歲壇致祭時執事人等均著照祈雨服色俱穿青

褂俟禮畢仍用常服所有應行各事宜著各該衙門敬謹豫備是日並派恭親
王奕訢恭詣 大高殿拈香惇郡王奕諒詣 宣仁廟 凝和廟拈香醇郡王

奕譞詣 昭顯廟 時應宮拈香

十一月 諭前因入冬以來京畿得雪尚未霑足降旨派惠親王綿愉等於二
十二日虔詣 大高殿等處拈香茲於十九日夜間濃雲密布溼濡祥霽入土

深透仰荷 昊慈眷佑豫卜來歲豐登朕心實深寅感著仍派惠親王綿愉於
二十二日虔詣 大高殿拈香 宣仁廟 凝和廟仍著惇郡王奕諒拈香

昭顯廟 時應宮仍著恭親王奕訢拈香用申報謝
八年 諭四月初四日 常雩大祀朕因體疾尚未如常恐升降拜跪不足以
昭誠敬著派恭親王奕訢代行禮初一日暨初二日在禁城內齋宿初三日

在 壇內齋宿此次大祀朕雖未能親詣仍於初一日進宮在養心殿敬謹致齋以嚴對越

十二月庚申 上詣 大高殿祈雪

九年三月甲申 上詣靜明園龍神廟祈雨

又 諭四月初九日 常雩大祀朕因未能勉行全體特遣豫親王義道恭代朕仍入宮齋戒先期親詣 皇穹宇行禮藉懺敬昨據御史陳濬援引經義請親行初獻禮再行遣王恭代終事與朕寅畏之心亦相符合惟古今體制不同揆諸見行祀典實難於初獻之後續行恭代俟朕躬日臻康健步履如常即可親行全體此次毋庸更改

四月丙辰以 京師雨澤愆期 上詣 天神壇 關帝廟拈香

十二月 諭前因京師自秋冬以來雨澤稀少農田待澤孔殷當經設壇祈禱數日以來同雲密布尚未渥沛祥雲寅寅盼彌深允宜仰籲 昊慈特申虔祝著於本月二十一日舉行 三壇祈雪祀典著派恭親王奕訢恭祀 天神壇醇郡王奕譞恭祀 地祇壇豫親王義道恭祀 太歲壇致祭時執事人等著照祈雨服色俱穿青褂俟禮畢仍用常服所有應行各事宜著各該衙門敬謹豫備朕於是日親詣 大高殿 時應宮虔申叩禱並派惠親王綿愉詣 宣仁廟拈香鄭親王端華詣 凝和廟拈香怡親王載垣詣 昭顯廟拈香 道光元年至三十年常雩禮 親詣次數

元年四月丁未

三年四月癸卯

四年四月癸卯

六年四月甲子

十一年四月乙酉

十五年四月丁巳

十八年閏四月丙子

十九年四月己卯

二十年四月戊子

二十二年四月甲午

二十五年四月丙午

二十六年四月丙午

咸豐元年至十一年常雩禮 親詣次數

元年四月乙丑

二年四月壬午

三年四月壬午

四年四月己卯

五年四月甲午

六年四月甲午

七年四月甲午

八年四月己酉

九年四月己酉

十年四月庚午

同治二年十二月三口通商大臣崇厚奏天津府地方於本月十九日得雪盈寸 諭曰京師是日得雪尚未及寸惟有齋心默禱仰祈 昊天垂佑渥沛祥霽也

六年五月 諭本年天時亢旱節候已過夏至農田待澤孔殷屢經開壇祈禱親詣 大高殿拈香並派醇親王奕譞等分詣 三壇虔祈雨澤雖蒙 昊貺得有甘霖仍未深透朕心兢惕宵旰難安擇於二十九日恭祀 社稷壇虔申祈禱著派恭親王奕訢恭代行禮朕於是日仍親詣 大高殿拈香二十六日先期齋戒所有應行典禮各該衙門即照例敬謹豫備

六月 諭本年春夏以來天時甚形亢旱節候已過夏至農田待澤孔殷屢經開壇祈禱親詣 大高殿拈香並派恭親王奕訢恭代致祭 社稷壇虔祈雨澤旬日以來小兩廉纖未蒙優渥見在節逾小暑農田望澤愈形迫切深宮軫念民依宵旰思無深恐懼

擇於本月十三日敬舉告祭 方澤典禮虔申祈禱派侍親王奕諒恭代行禮
朕於是日仍親詣 大高殿拈香初十日先期齋戒據誠待 命以冀 皇祇
眷佑速沛甘霖庶回百穀之生而甦萬民之困所有應行典禮著各該衙門即
照例敬謹豫備

又 諭前因京師亢旱疊經降旨祈禱旬日以來陰雲密布霖霖並施昨日甘
澍旁敷土膏滋潤此皆仰賴 昊慈默佑寅感實深朕於二十八日親詣 大
高殿拈香以答 神庥惟時當溽暑農田望澤尤殷仍冀甘霖疊沛優渥均霑
以慰民望

七月 諭前因京師亢旱疊經開壇祈禱朕親詣 大高殿拈香派近支王公
等恭祀 三壇 社稷壇並告祭 方澤均蒙陰雲四布微雨飄灑決旬以來
頻叨渥澤二十五六等日雷電交作甘澍優渥昨復昕宵霖霖積潤郊原並據
各處奏報近畿均獲深透此皆仰賴 昊慈垂佑朕心實深寅感謹擇於本月
初八日親詣 大高殿行禮敬謹報謝 大高殿 覺生寺即行撤壇惟冀甘
霖時沛優渥常霑以慰民望

九年 諭前因京師亢旱疊經祈禱連日陰雲密布霖霖時施昨日甘澍旁敷
土膏滋潤此皆 昊慈默佑寅感實深朕於二十八日親詣 大高殿拈香以
答 神庥惟時逾夏至農田望澤尤殷仍冀甘霖疊沛優渥均霑以慰民望
十年二月丁卯丁丑己丑三月己亥四月辛未辛巳 上詣 大高殿六次祈
雨五月庚寅朔雨 上詣 大高殿報謝

十一年十二月癸亥辛未 上詣 大高殿兩次祈雪
十二年四月丙子 上詣 大高殿祈雨閏六月甲午以京畿久雨 上詣
大高殿祈晴十一月丁巳 上詣 大高殿祈雪並詣 時應宮 昭顯廟
福佑寺拈香戊午 上以祈雪詣 宣仁廟 凝和廟 普度寺拈香十二月
甲午 上詣 大高殿祈雪

光緒二年正月丙辰祈雪 上親詣 大高殿拈香二月乙亥三月丙申 上
詣 大高殿祈雨

七年十二月丁卯 上詣 大高殿祈雪己巳雪
十年閏五月己酉 上詣 大高殿 昭顯廟祈雨戊午以京師得雨 上詣
大高殿 時應宮報謝
十一年五月己酉 上詣 大高殿 時應宮祈雨

臣謹案我 朝 列聖相承偶遇水旱虔申祈禱史不絕書謹載數事以
見敬天勤民之意先後一揆至常等典禮自乾隆八年御史徐以升奏請
九年始舉行嗣是或 親詣行禮或遣官將事無廢無之 穆宗 德宗
均 親政後 親詣等祭敬謹彙登

同治十二年四月辛酉
十三年四月丙子
光緒十三年四月丙子

十四年四月乙酉
十八年四月戊戌
十九年四月乙卯

二十二年四月庚午
二十三年四月乙丑
二十四年四月乙酉

二十九年四月丁酉
三十年四月庚戌
三十一年四月己酉

三十二年四月乙卯
三十四年四月乙丑

宣統元年五月以甘霖疊沛遣貝勒載洵詣 大高殿恭代報謝拈香貝勒載
濤詣 時應宮貝子溥倫詣 昭顯廟鎮國公載澤詣 宣仁廟鎮國將軍載
摺詣 凝和廟報謝拈香
三年四月己卯常雩大祀 天於 圓丘遣載功恭代行禮

皇朝續文獻通考卷一百五十二

郊社考六 日月星辰 天神地祇太歲

嘉慶五年奏准興修 日壇神庫等工所有奉移 神牌及 神牌還御日應
遣官於本 壇告祭興工及工竣日應告祭 后土 司工之神均由欽天監
選擇吉日遣官奉請 神牌祇告祀畢禮部堂官詣 神牌前上香行三跪九
叩禮太常寺官恭請 神牌敬謹奉安於祭器庫內禮部堂官上香行禮如初
工竣後 神牌還御均與興工禮同

又奏准 日壇神庫等工告竣所有迎吻安吻插劍合龍門由欽天監擇吉迎
吻日遣官一員致祭 琉璃鑿神 日壇外壇西門之神吻上用裏金銀花二
對大紅緞二方龍旗 御仗各一對和鑿響作樂前導在工大臣官員迎接均
毋庸簪花披紅其安吻插劍合龍門吉期應遣官告祭 司工之神

是年秋分祭 月壇太常寺照例題請遣官奉 旨朕親詣行禮
十九年 臘秋祀夕 月壇嗣後如遇朕親祭之年其配位著派親郡王上香
二十三年 臘昨據禮部奏八月二十三日 世宗憲皇帝忌辰在夕 月壇
齋戒期內應用常服朕惟 列聖 列后忌辰例穿素服如值 天地宗社大
祀齋戒期內應改用常服以昭至敬至中祀典禮應較大祀稍差嗣後恭遇
列聖 列后忌辰在中祀齋戒期內惟承祭之遣官及陪祀執事人員改用常
服此外王公百官仍穿素服著為令

道光四年 臘嗣後中祀內夕 月壇受福昨時行三跪六拜禮並著傳贊王
公百官隨行三跪六拜禮以歸畫一

二十二年春分祭 日壇 上親詣行禮在西樞星門外甬道北降輿升輿
二十三年 臘給事中文丕奏定例 朝日壇以卯刻致祭本月二十一日禮
成將及卯初請將承祭官交部議處等語此次禮成將及卯初所早不過二三
刻數究與遲誤者有開承祭官著無庸議處嗣後凡遇遣官祭祀其致祭時刻
總當恪遵定例不得過早亦不得稍遲以昭敬慎

咸豐三年二月丁亥春分朝 日於東郊

十年二月癸亥春分朝 日於東郊
三月 臘前因 朝日壇行禮百官宗室世職章京未見陪祀當令仁壽等查
明覆奏茲據奏稱僅據吏部等衙門開送收到職名並未聲明陪祀與否著宗
人府吏部禮部兵部都察院查明除另有差使及例不陪祀各員外其餘應行
陪祀未到各員著開單參奏以儆忘玩
又 臘前因 朝日壇行禮應行陪祀未到各員當降旨令吏部等衙門查明
參奏茲據吏部禮部兵部都察院先後查明覆奏所有單開未到各員除另有
差使及先期送册注冊各員免其議處外其餘陪祀無故不到及臨期告病道
阻遲延各員均著交各該衙門照例議處其已經陪祀漏遞職名各員均著交
各該衙門察議是日查取職名之御史毓通王憲成未能查明即時參奏著交
部議處
同治十三年二月丁丑春分朝 日於東郊八月癸未秋分夕 月於西郊
光緒十三年興修 日壇神庫工程所有奉移 神牌及還御日遣官行祇告
禮與嘉慶五年同
十八年二月辛亥朝 日於東郊八月丁巳夕 月於西郊 上親詣行禮
二十一年二月丁卯朝 日於東郊遺凱奏行禮
八月癸酉夕 月於西郊 上親詣行禮
二十二年二月壬申朝 日於東郊 上親詣行禮八月戊寅夕 月於西郊
遺凱奏行禮
二十四年二月壬午朝 日於東郊 上親詣行禮
八月己丑夕 月於西郊 上親詣行禮
二十七年十一月 上同鑾遣官告祭 日月壇
三十二年二月朝 日於東郊 上親詣行禮
又七月夕 月於西郊
三十三年八月夕 月於西郊 上親詣行禮
宣統二年八月壬辰祭 夕月壇派莊親王載功行禮

三年二月辛卯祭 朝日壇派魁斌行禮

右日月星辰

乾隆五十七年以節逾立夏未沛甘霖遣官分詣 天神 地祇 太歲三壇
度祭越七日未雨復令原派之王仍致祭 三壇得雨未足奉 旨派皇子分
詣 三壇虔禱

又以恆暘示敬 三壇禮竣未沛甘霖 上召見 皇子皇孫及大學士九卿
等傳集科道公同諮議是日大雨越日霑足奏請令原派承祭之 皇子分往
報祀 三壇

嘉慶二年以立夏後未得透雨致祭 天神 地祇 太歲三壇五月初八日
雨澤優霑初九日 親詣 天神壇報祀 地祇 太歲壇遣王行禮
五年以雨澤愆期 上步詣 社稷壇虔禱甘霖渥沛又 親詣行禮報祀

天神 地祇 太歲三壇即令原派之王分詣致祭
八年奏准本年 常雩後雖兩次得雨土脈田苗均見滋潤但恐尚未霑足應
照例於 天神 地祇 太歲三壇致祭其顯佑宮等五廟照例令僧道虔誠
誦經

十三年四月舉行 常雩祀典後陣雨未透派王分詣 三壇虔禱並先期齋
戒一日文武大臣除內廷行走及直日奏事帶領引見各員外俱分詣陪祀即
日大沛甘霖仍令原派王分詣 三壇祀謝

十六年五月 諭上月二十四日朕恭詣 三壇祈雨禮成出境見 神祇門
外車轎馬匹甚多當將稽察 壇 廟之王大臣等交部分別議處並降旨交
軍機大臣將是日在 天神 地祇二壇執事之禮部太常寺等衙門堂司各
官並陪祀之王大臣官員查開職名具奏概行交部議處茲據軍機大臣查明

開單呈覽本應全行交議惟念向例致祭 三壇朕不親詣行禮執事陪祀人
員由北街門入壇將事相沿已久因致前次朕恭祭 天神壇 神祇門外竟
有車馬擁擠人聲嘈雜之事所有是日赴壇之王公大臣京堂等率屬將事自
應恪恭整肅御史有稽察典禮之責均非不諳體制者比乃於隨從人役車馬

不自約束咎實難辭著交部議處至執事陪祀之司員章京等雖亦有應得之
咎但係因見王大臣等停放車馬相率效尤者加恩免其議處見已有旨於初
十日朕復親祀 天神壇虔求雨澤倘屆期再有車轎馬匹在 神祇門外左
近停放者定當嚴行懲治不能復遊寬貸至向來 三壇內有太常寺印宅公
所禮部太常寺執事官及壇戶等均由北街門出入除遇朕親詣致祭之日各
官俱改由南街門出入關閉北街門不准行走外餘日仍著照常由北街門出
入

丁亥 諭本日朕親詣 天神壇虔誠祈雨執事各員宜如何敬慎祇肅乃派
充典儀之贊禮郎圖薩於應行唱贊送 神時率行唱贊送燎實屬輕慢不敬
若係他人唱贊錯誤不過交部嚴議處以革職即問罪亦止於發遣圖薩係會
經身犯命案問擬絞罪之人彼時因伊父扎郎阿熱語 壇 廟禮儀特加恩
賞發交伊父在家管束嗣據伊父扎郎阿熱稱其悔罪自新請曉禮節唱贊熟練
復錄用為贊禮郎又經補授實缺伊此次派充典儀自應倍加小心無敢褻越
乃竟漫不經心罹此錯誤其咎較重見已革職領筆著交刑部即於明日定擬
具奏至扎郎阿熱素並不認真教誨伊子輒屢次在朕前飾詞妄譽此次復將
伊子派充典儀希圖見長邀恩實屬徇私不職本應即予罷斥姑念其充當
壇 廟差使有年著加恩仍降為贊禮郎即補伊子所出之缺哈爾阿明志二
人亦屢次在朕前稱譽圖薩並將伊派充典儀明係袒庇同僚曲為援引均應
交部嚴加議處惟本日哈爾阿明於圖薩錯贊送燎之時仍贊引送 神儀注於
行禮節次得以如儀尚不致誤哈爾阿明著從寬交部議處明志著交部嚴處其
餘管理太常寺福慶等各堂官均著交部議處惟馬履泰係屬漢員不諳清語
著加恩免其議處嗣後有似此曾經身犯重罪得邀寬宥續經錄用之人遇有
一切 壇 廟祭祀差使俱不准派充執事以昭誠肅著為令

又 諭朕昨親祀 三壇虔申祈禱並於恭祀 方澤時默籲 鴻臚速沛甘
霖連日雖微雨飄灑乃其入土不成分寸朕於初九日進宮齋戒初十日再親
祀 天神壇其 地祇壇仍派二阿哥行禮 太歲壇仍派三阿哥行禮著於

初九日隨朕進宮在上書房齋戒

二十四年 龍嗣後遇祀天神壇祈雨仍在三座門外降輿步入禮成後仍在原處升輿若遇 天神壇謝雨乘輿進三座門在內層門外甬道西邊鋪設樓薦處降輿禮成在原處升輿出三座門著為令

道光十二年五月戊辰 上詣 天神壇祈雨 御製祝文曰春澤承 麻方云共慶夏霖登序倍惕淵衷復值逆搖逞惡不獲已而誅夷邪匪潛滋必應除而究治雖國法之難容實 天和之有犯皆由德薄不能感化才疏未克裁成以致乾旱恆暘虞稼穡多槁之歎赫炎不雨憫人民无妄之災敬思水旱之不齊總因政事之多失嗚呼自 天申之教菑躬而萬民是惡列地利也昭 靈既而三輔均霑步禱 神壇心憂菑屋抒微忱而早蘇民困亟叩甘膏企 恩波而速斂風威仰希 神鑒

十六年五月以農田待澤甚殷 上親詣 天神壇祈禱得雨後 親詣報謝其 地祇壇 太歲壇俱各派王分詣行禮

咸豐四年十二月以祥雲未沛 上親詣 天神壇叩禱並派王分詣 地祇壇 太歲壇恭祀致祭時執事人等照祈雨服色俱穿青掛禮畢仍用常服

同治六年五月 上親詣 大高殿祈雨派王分詣 三壇恭祀

光緒四年二月 上親詣 大高殿祈雨派王分詣 三壇恭祀三月廿霖疊沛派王分詣 三壇報謝

宣統元年十二月祭 太歲壇派訥勒赫行禮
二年十一月祭 太歲壇派載功行禮
右天神地祇太歲

皇朝續文獻通考卷一百五十三

郊社考七 社稷

謹案社稷之祭錄來舊矣禮記曰夫聖王之制祭祀也法施於民則祀之以勞定國則祀之能禦大災則祀之能捍大患則祀之是故厲山氏之有天下也其子曰農能殖百穀夏之衰也周棄繼之故祀以為稷共工氏之霸九州也其子曰后土能平九州故祀以為社家語孔子曰古之平水土及播種百穀者衆矣惟勾龍兼食於社而棄為稷易代奉之無敢益者明不可與等也我朝順治元年即定祭社稷之禮每歲春秋仲月上戊祭太社太稷之神皇帝親詣行禮歷聖因之罔或更改用示春祈秋報之隆夫是以時和年豐而神降之福也

乾隆六十年十二月以次年元旦舉行授受大典遣官告祭社稷壇

嘉慶五年四月 諭向來 常雩以後未得兩澤應遣官於 天神 地祇

太歲三壇祈禱若七日不雨則度禱 社稷壇亦仍遣官行禮昨因本年入春

以來兩澤較少立夏後仍未得甘霖寸衷愧悚晝夜靡甯已飭禮部設壇祈禱

並派睿親王溥穎等齋戒虔誠致祭而時雨尚稽見當麥苗長發之際望澤甚

殷朕心倍深焦慮嘉慶二年初次設壇祈雨 皇考曾命朕親詣 天神壇致

祭見在 三壇祈禱已過應於七日後祈禱 社稷壇朕當恭詣行禮以期感

召 天和速敷霽澤嗣後初次 三壇祈雨仍奏請遣官至恭祭 社稷壇該

部即奏請親詣行禮照大祀例齋戒三日著為令

又 諭昨因入春至今未得兩澤曾經降旨朕親詣 社稷壇祈禱以祈甘霖

速霽著於二十一日起齋戒三日二十四日詣 壇祈禱其一切應行典禮該

衙門照例豫備所有王公大臣俱應一體齋戒陪祀其稽查齋戒之武職大臣

即著上次 常雩派出各員稽查亦不必另行奏派欽此遵 旨具奏恭查祈

禱 社稷壇 親詣行禮一應典禮俱照致祭 社稷壇儀注行惟祭品用脯

醢果實不行飲福禮前三日及祭日王公百官一體齋戒不理刑名禁止屠宰

祭日 皇帝兩冠素服陪祀及執事各官均兩纓素服祭前一日 皇帝恭親

祝版請照舊例用常服不掛朝珠其不陪祀王公百官迎送 聖駕亦仍用常服至齋戒期內向用常服今酌議擬用絳纓素服奉 旨此次告祭 社稷壇求雨齋戒及閱祝版三日內戴纓冠穿元青褂藍袍祭時戴兩纓冠仍穿元青褂藍袍所有執事陪祀之王公大臣官員等俱一體遵照

閏四月 諭太常寺衙門具奏 社稷壇恭謝兩澤請照春秋祭祀儀注舉行會詢之該寺堂官據稱親詣 社稷壇祈雨舊儀係由金水橋北步行前往至報祀向係遣官行禮並無親詣儀注是以此次循照春秋親祭常例乘輿至社稷壇北門外鋪設棕蔭處降輿等語但思祈求雨澤既經步行祈禱若報祀之禮稍有不同轉似得有兩澤略涉滿假朕何敢出此况朕從前隨侍 皇考

往 黑龍潭求雨 皇考至山門降輿升階數十級俱係步行而上報祀之儀亦同節年從無更改試思 龍神尚如此申敬况 社稷壇典禮尤隆既經步行自應步謝方足以申誠敬嗣後除春秋祭祀仍照舊定儀注舉行外如遇祈禱兩澤及親詣報祀各典禮均步行前往所有此次儀注著太常寺遵照改定具奏並載入會典永遠遵行

六年 諭京師自六月初旬以來兩水連綿已及兩旬見在尚未晴霽永定河漫溢成災積潦未退朕宵旰焦思倍增悚懼稽之會典祇有親詣 社稷壇祈雨之禮祈晴未有明文但水旱同一災設禮緣義起自當一律虔祈以迓時暘而消盛漲謹擇於本月二十六日親詣 社稷壇祈晴先期於二十二日進宮

二十三日致齋三日所有一切典禮著禮部太常寺敬謹豫備 又 諭本月二十二日朕由圓明園進宮齋戒祈晴是日雨勢微細旋即霽止

二十三等日雲氣漸散昨日業已放晴今早朕親詣 社稷壇禮成天光開霽日色暢晴此皆仰賴 昊旻 神庥默垂鑒佑欣感之餘倍深兢惕向來求雨有謝晴之禮因思祈晴事同一體亦應虔誠叩謝本月二十七至二十九日

孟秋 時事齋戒次月初一日朕詣 太廟行禮後仍於宮內齋戒初二日親赴 社稷壇謝晴其一切儀文著照祈晴典禮該衙門敬謹豫備至祈晴係用常服今因謝晴之禮服色應有區別是日朕御龍袍龍褂其陪祀王公大臣及

執事各員俱著穿蟒袍補褂并著該衙門將祈晴謝晴典禮儀注一併載入會典

七年 諭向來祭 社稷壇應用上戊本年二月初七日係上戊乃欽天監所定祀期擇十七日次戊於典禮未協仍著查照向例於二月初六日上丁祭先師孔子即於次日上戊恭祀 社稷壇該衙門敬謹豫備嗣後祭 社稷壇俱遵用上戊

九年奏准伊犁八旗新開地畝疏濬渠水漸有成規請照各省地方建立 社稷壇春秋祈報以隆祀典祭品儀注均如各省之例致祭銀兩照例咨報戶部覈銷

道光十二年六月 上步詣 社稷壇祈雨 御製祝文

十九年七月 諭本年秋祭 社稷壇著遵照嘉慶二十一年之例在北門外降輿俟癸卯年再由戟殿東牆至 拜殿後北階下鋪設樓薦處降輿禮成後仍於此處升輿交軍機處存記屆期令太常寺再行具奏

咸豐五年 諭禮部奏齋戒期內服色援案請旨等語八月初八日 社稷壇大祀先期致齋三月初五日尚在 大行皇太后大事二十七日期內朕御素服冠綴纓緯帶齋戒牌初六日大祭後及初七初八日朕俱御常服戴緯帽其省牲視牲及陪祀執事各員初五日齋戒期內均著素服冠綴纓緯初六日大祭後及初七初八日均戴緯帽常服不掛朝珠其無執事人員有赴園奏事當差及在紫禁城內當差者俱著照執事人員服色

同治六年五月 諭天時亢旱節候已過夏至農田待澤孔殷屢經開壇祈禱雖蒙 昊貺得有甘霖仍未深透朕心兢惕宵旰難安擇二十九日恭祀 社稷壇虔申祈禱派恭親王奕訢恭代行禮朕於是日仍親詣 大高殿拈香二十六日先期齋戒所有應行典禮各該衙門敬謹豫備

十三年二月戊寅八月戊寅祭 大社 大稷
光緒六年閏五月 諭本年天時亢旱屢經開壇祈禱親詣 大高殿拈香並派醇親王奕詝等疊次分詣 三壇虔祈雨澤尚未渥沛甘霖見在節逾夏至

實深寅盼擇本月初七日恭祀 社稷壇派恭親王奕訢恭代行禮
十三年二月戊辰八月戊子祭 社稷壇 上親詣行禮自是至三十四年親祭者三十一次

十四年八月戊子

十五年二月戊寅

十六年二月戊寅八月戊申

十七年二月戊戌八月戊戌

十八年二月戊戌八月戊午

十九年二月戊午八月戊午

二十年八月戊申

二十一年二月戊申八月戊寅

二十二年二月戊辰八月戊辰

二十三年二月戊辰八月戊子

二十四年二月丁巳八月戊子

二十八年八月戊戌

二十九年二月戊子八月戊午

三十年二月丁巳八月戊申

三十一年二月戊申八月戊申

三十二年二月戊申八月戊辰

三十三年二月己巳八月戊辰

三十四年二月戊午

宣統元年祭 大社 大稷遣莊親王載功恭代行禮

堂子 大內 覲神附

嘉慶二十三年九月 上詣 堂子行禮

道光四年五月 諭 堂子祭 天典禮甚重見在禮部纂輯通例著於吉禮

中 南郊 北郊大祀之後謹增致祭 堂子之禮以昭明備至 太廟 社

稷壇福祚之禮俱仍照舊例行
八年九月 上詣 堂子行禮

臣謹案噶亭雜錄曰 國家起自遼瀋有設竿祭 天之禮又總祀 社稷諸神祇於靜室名曰 堂子即古明堂會祀羣神之義既 定鼎建堂子於長安左門外建祭 神殿於正中龔祀諸 神祇南向而為拜天圓殿殿南正中設 大內致祭立杆石座次稍後兩翼分設各六行行各六重第一重為諸皇子致祭立竿石座諸王貝勒公等各依序列均北向東南建 上神亭南向相傳為祀明將鄧子龍位蓋子龍與 太祖有舊誼故附祀之歲正朔 皇上率宗室王公滿一品文武官詣 堂子行拜 天禮立竿祭 神禮歲以季春季秋月朔日舉行祭日懸黃旗繫綵繩綴五色綵百縷楮帛二十有七備陳香燈司俎官於 大內恭請神位由 坤甯宮以綵亭昇出中行中路至 堂子安奉祭 神殿內東向陳饌餽九盤酒棗三 圓殿陳饌餽三酒棗一楮帛如數司俎官以贊祀致辭行禮 大內致祭後越日為馬祭 神如儀月祭孟春上旬三日餘月朔日 大內遣司俎官率 堂子官吏於 圓殿奠獻糕酒行禮如儀是日內管領一人於 上神亭獻糕酒楮帛親郡王各遣護衛一人於上神亭獻楮帛浴佛之禮歲以孟夏上旬八日司俎官率執事人等自大內請至 堂子祭 神殿陳香燈獻糕酒王公各遣人獻糕執事設盤盤贊祀二人浴佛畢六酌獻三致禮如儀是日 大內及軍民人等不祈禱不祭神禁屠宰不理刑名出師拜 堂子禮 皇上親征諏吉起行內府官豫設 御拜褥於 圓殿外及內門外 御營黃龍大纛前兵部陳螺角鑿儀衛陳鹵簿均如儀 皇上先詣 圓殿次詣齋前均行三跪九叩禮六冠凱旋 皇上入都門先詣 堂子行禮 命將出師 皇上率大將軍及隨征將士詣 堂子行禮儀均與 親征同凱旋日詣 堂子行禮 堂子行禮儀均與 親征同凱旋日詣 堂子行禮

同治十二年正月辛巳朔 上詣 堂子行禮
光緒十四年正月癸丑朔 上詣 堂子行禮十一月戊申朔大祀 堂子自是每歲正月朔 親詣者十次

十五年正月丁未朔

十六年五月壬寅朔

十七年正月丙寅朔

十八年正月辛酉朔

二十年正月己卯朔

二十一年正月癸酉朔

二十二年正月丁酉朔

二十三年正月辛卯朔

三十年正月庚辰朔

三十一年正月甲戌朔

宣統元年十二月內務府奏明年正月初一日 堂子掛紙錢請 派大臣派出增崇二十六日請神恭送 堂子明年正月初二日請進 宮內供奉二月初四日 堂子豎杆大祭

右堂子

乾隆五十二年奉 旨舊制 坤甯宮每日祀 神祭肉理宜潔淨熟暖給散秩大臣侍衛等分食乃近來該首領太監等每將整塊好肉私行偷用以冷肉及瘦瘠殘廢皮骨分給充數以致散秩大臣侍衛等進內食肉者漸少滿洲舊制祭祀敬 神祭肉晚間背鏡者例交膳房散給各處及早聞所供者例不准出殿門原承不留 神惠之意乃風俗不古散秩大臣侍衛等或竟不以此為榮反以為辱同屬非是但太監等私藏好肉以平常之肉給食尤不可不嚴行查禁嗣後祀 神祭肉著派總管太監等管理每日喫肉之時仍著派御前侍衛一員乾清門侍衛二員同喫肉之散秩大臣侍衛等進宮分食並備加查看如有仍前弊端即據實具奏將總管太監全行治罪外其派出專管之總管太

監加倍治罪仍著內務府大臣於宮庭內外隨時稽查倘有私行偷出售賣者即行嚴拿究辦

嘉慶六年奉 旨本月二十六日恭祭 社稷壇禮成後至 坤甯宮進肉嗣後凡遇齋戒之期前三日不進豬外其正祭之日 坤甯宮照常進豬

臣謹案月祭向例正月初二日祭 神初三日祭 天嘉慶四年後改用初四日祭 天如遇齋戒期內另行改期

光緒十六年 諭朕奉 皇太后懿旨十二月初七初九十八等日中正殿拈香著派禮親王世鐸恭代行禮其 坤甯宮祭神照常舉行

宣統元年禮部奏禮學開館酌擬凡例第七條云乾隆禮未載 堂子祭禮至道光重修始據 皇朝通考爲元日謁拜立杆致祭二篇而於大內祭神之禮尙未及詳伏查 皇朝通典載 坤甯宮朝夕祭外每月朔祭 神翼日祭

天其制亦立杆於庭而每歲十二月二十六日恭請 神位供於 堂子正月初二日復恭請 神位入宮與元日謁拜立杆致祭禮節相同未可闕略謹依

大清會典補載大內祭 神

十二月十八日 宮內祀 神 皇上親詣行禮
右大內祀神

皇朝續文獻通考卷一百五十四

郊社考八 山川

謹案禮記天子祭天下名山大川是以五嶽四瀆特隆望祀其餘山川之神亦不廢明禋 國朝定制於 嶽鎮海瀆有 時巡展祭有因事遣

告有 特建廟祀乾隆五十一年後悉仍其制有舉莫廢至於封祀龍神初非海瀆本神而祀典久沿崇報未敢有闕即鹽井之神亦與山川義近

謹以類從惟黑龍潭玉泉龍神宜在京都崇祀之列另有專門不附此篇乾隆五十二年奏准青海大臣巡視青海之年由柴達木一路親往致祭 星

宿海等處山川之神如值青海會盟及玉樹會盟之年差委司官前往致祭五十二年 諭本年河流順軌運道深通自賴 神明佑助之力向來四瀆雖

各有專祀而工所 黃淮河神廟每年春秋未經官為致祭典甚闕焉自宜特重明禋以昭 靈貺所有江南及河東等處工次建立 黃河神廟並江南青

黃交匯地方所建 淮河神廟均著於每年春秋二季官為致祭交該部載入祀典並著翰林院撰擬祭文發往於致祭日敬謹宣讀以報 神庥

是年頒發河東 黃河神廟江南 黃河神廟 淮河神廟祭文各一道又 諭據管幹珍和琳奏臨清開外運河全賴漳衛二水會汶北注而浮運通

漕尤藉漳水之力向有漳河神廟建於運河北汭居民等祈雨晴晴隨禱立應今因開外水弱度詣廟中祈求水澤數日雷雨油雲水勢陡長四尺餘寸軍民

商賈無不踊躍歡騰稟請代奏加錫封號等語漳水來源遠在晉省去運河千有餘里今管幹珍等虔禱數日水頭立見長發不啻應願而償若非神靈賜佑

曷克臻此允宜增益鴻稱褒崇封號以隆妥侑而答神庥著於漳河舊有封號上加利運二字並御書扁額對聯發去敬謹懸掛永昭靈貺

又奏准河南武陟蘭陽中牟睢州四處 黃河神廟均係奉 旨建立向係河工廳員逢時致祭未免簡略請嗣後每年春秋上戊交地方官敬備祭品令開

歸河北二道開封歸德懷慶三府率同丞倅州縣等官齊沐致祭五十四年奏准荊州府萬城隍向無 江神專祠今發帑修隍金湯永固允宜

特建祠宇以肅明禋而邀 神貺並載入祀典春秋致祭五十五年 聖駕東巡遣官致祭 岱廟仍 親詣拈香行禮天津 海神廟

遣官致祭汶上縣 龍神廟遣官拈香如四十一年之例是年 高宗八旬萬壽遣官致祭 嶽鎮海瀆長白山松花江

五十七年 諭據奏承恩奏請定太白山祀典一摺太白山禱雨輒應久著靈異從前曾令該地方官春秋致祭並特加昭靈普潤封號以答神庥本年該省

盼雨稍殷設壇虔禱經該撫委員自太白山取水甫至即沛甘霖通省俱獲優霑益見功濟生民允宜特隆秩祀用肅精禋著交禮部列入祀典並給祝文儀

注以昭崇報

又 諭富綱等奏請勅賜廠神封號一摺近年各廠辦獲銅斤較每年額數多至四百餘萬自屬山靈呈瑞理宜列在祀典錫之封號用答神庥著封為裕源

與寶鑛脈龍神並著該督撫於廠地相度處所建設總廟春秋致祭並交該部載入祀典其大小各廠聽其自行立祠其神牌祠額即照所定封號一律繕寫

又覆准滇省運辦京銅東川府所轄湯大等廠為辦銅總匯之區應即於府城東郭擇地建廟工竣致祭並頒發春秋致祭祝文以昭誠敬

五十八年 諭福康安奏此次官兵赴藏經過丹達山均無阻滯山靈助順請加封號並頒懸扁額等語丹達山遠在徼外最為險峻風雪不時此次自軍興

以來官員兵丁調遣至藏以及事竣凱旋均當冬令經過該處得以安穩進行毫無阻滯實為神庥佑助靈應事昭允宜列在祀典錫之封號著封為昭靈助

順山神交該部載入祀典春秋致祭並頒去御書扁額交駐藏大臣飭令於山下舊建神祠敬謹懸掛以答庥應

嘉慶元年 授 受禮成祭告 嶽鎮海瀆 長白山松花江奏派各省副都統總兵就近致祭祭文香帛由驛發交祇領屆期致祭吉林副都統祭 長白

山松花江山海關副都統祭 北海錦州副都統祭 北鎮西安副都統祭 西嶽 西鎮成都副都統祭 江濱青州副都統祭 東嶽 東鎮 濟濱 濟濱荊州副都統祭 州副都統祭 南鎮南陽副都統祭 中嶽 淮濱 濟濱荊州副都統祭

南嶽廣州副都統祭 南海太原鎮總兵祭 北嶽 中嶽 河漢 西海
四年十一月恭奉 高宗純皇帝升配 南郊禮成遣官祭 嶽鎮海濱 長
白山松花江禮部尙書前期齋戒散閱祭文香帛授承祭官付筆帖式恭齋前
往

七年奉 旨禮部奏伊犂春秋致祭格登山等處山河乾隆二十六年原頒祭
文十六道應否增改請旨遵行一摺仰惟 皇考高宗純皇帝平定新疆版圖
式廓懷柔河嶽祀典昭垂自應億萬年遵守原文用彰偉烈所有前頒祭文內
原書朕字俱敬謹改書 高宗純皇帝尊稱其餘字句概無庸更改該部即行
文伊犂將軍永遠欽遵入於交代其烏魯木齊等處亦照此畫一辦理

八年 諭川陝楚軍務告成捷書馳奏八表同歡因思前此兵燹擾及三省地
方並曾竄及豫境大兵所至仰賴 山川效靈 神祇助順用得師行貞吉全
奏底平允宜修舉明禋敬答 鴻佑所有四省 嶽瀆諸神湖廣湖南著派廣
音邵自昌於審案事竣後分往告祭四川即著勒保親往告祭凡載在祀典者
著該衙門照例撰文將應用儀物虔備發往其向來告祭所不及而用兵以來
經過名山大川靈蹟顯應各祠宇經軍機大臣查明開單進呈均著頒發藏香
交承祭各大員一體申謝

是年陝西祭 西嶽 西鎮南河祭 中嶽 淮瀆 濟瀆四川祭 江瀆湖
廣祭 南嶽祭文香帛均由驛發往其陝西 昭靈普潤太白山神 漢江之
神 終南山之神河南 河神均發交藏香一體致祭

又以浙江慈谿縣北雪山龍神素著靈應 勅封甯民普惠鎮海龍神
又 諭昨三省軍務全竣特降旨派員告祭川陝楚豫名山大川以答神佑因
思終南山作鎮關中襟絡全陝前次賊匪竄匿其中官兵入山搜捕聞那彥成
台布因入山霧阻虔祝山靈後即應時開霽師行順利今山境肅清著祖之望
查明終南舊奉山神會否錫有封號山內如有原建廟宇或兵燹之後致有傾
圮即查估修整或規模狹小亦可疊加展拓如本無祠宇即擇地鳩工營建奏
請頒發扁額俟查明奏到之日再降諭旨

又 勅封甯民顯佑終南山神遼 旨擇地建廟春秋致祭祭祀銀兩照例報
部覈銷

十年 上巡幸 盛京 親祭 北鎮廟行禮遣官致祭 長白山松花江
北海 巨流河 渾河 遼陽太子河之神
十四年 皇帝五旬萬壽遣官致祭 嶽鎮海濱如乾隆十六年之例
十五年廣東虎門新建靖海 神廟 勅賜佑民溥惠封號 欽頒扁額

又 諭興安大嶺於塞北諸山最爲崇峻且靈應素著屢見於 皇考高宗純
皇帝聖製集中向來進哨以前必派親王帶領喇嘛兩次前往致祭本年朕行
獨木蘭晴雨應時事昭順佑應加隆望秩以協懷柔著交禮部查明從前祀典
內曾否載入如本有舊章即將儀文節目詳錄具奏如未列祀典著禮部詳議
崇祀即不能與五嶽並尊亦應做照四鎮之儀酌定典禮並擬定神位封號致
祭時增設神帳書寫神牌供奉以昭虔敬奏定後載入則例永遠遵行遵 旨
議奏 興安大嶺應照 五鎮之例致祭每歲春秋仲月應令地方官謹擇吉
期恭設 神帳書寫 神牌敬謹望祭如恭逢 皇上木蘭秋獵之期其秋祭
毋庸令地方官行禮由禮部奏請 欽派官於進哨以後出哨以前致祭一次
所有 神位封號由內閣撰擬進呈恭請 欽定應用牲牢祭品等項均照例
交地方官豫備祭器由工部製造交地方官存貯以備應用其常祀及 欽派
官告祭文交翰林院撰擬頒行遵用等因奉 諭前因興安大嶺雄峙塞北素
著靈應特交禮部議祀典以隆望秩據奏請照列鎮之例告祭著依議行每
歲仲春即派熱河都統敬謹望祭至仲秋行獨木蘭著由行在禮部奏派王大
臣致祭倘遇停止進哨之年仍令都統致祭所有神位封號及一切儀文著各
該衙門詳議具奏
又議准致祭 興安大嶺儀節應照崇祀 列鎮常祭用少牢告祭用太牢之
例由熱河都統酌定望祭處所每歲仲春諷吉設位用帛一羊一豕一簋簋各
二籩豆各十尊一爵三率屬敬謹行禮至仲秋恭逢 皇上木蘭秋獵由 行

在禮部豫行欽天監擇定吉期奏 派承祭王大臣於進哨後酌定致祭處所用帛一羊一豕一豉一餅二其簋簠豆等項與仲春常祭同如過停止進哨之年其秋季仍令熱河都統照常祭之例行禮每次應用香帛祭品令熱河道飭屬敬謹豫備咨報戶部覈銷

十七年以陝西大荔縣 九龍廟雨澤應 勅加昭靈普潤封號 是年直隸永定河南下頭汛漫工合龍因 河神顯佑興建專祠 勅賜安流行澤封號

二十三年 諭向例東巡經過廣甯縣親祭 北鎮醫巫閭山儀注內有齋戒一日之文因思齋戒之禮向不舉於行在是以歷遇恭謁 陵寢行 大饗禮皆無齋戒儀節行禮以實不以文嗣後如遇巡幸致祭 嶽鎮儀注內均毋庸敘入齋戒一日之語以昭嚴實

又遣官祭 長白山 遼陽太子河 巨流河 渾河 北海 松花江諸神 道光八年遣官祭 長白山 遼陽太子河 巨流河 渾河 北海 松花江諸神

十二年六月 上命定親王奕紹詣 泰山祈雨 御製祝文曰京師自入夏以後恆陽告愆雲起風隨甘霖未沛二麥既已無望百穀何以用成宵旰焦憂省躬思過親禱三壇 社稷壇未蒙 靈貺敬復步禱 方澤為民請命當早既太甚之日思靡 神不舉之文恭讀嘉慶十九年 皇考仁宗睿皇帝 岱宗感應記仰見與雲致雨不崇朝而徧天下 神功不顯自古為昭今特遣定親王奕紹齋大藏香十炷敬謹代躬致祭親撰祝文用據誠悃並令升香後虔焚默達伏祈 明神降鑒速 賜恩膏轉歎為豐以甦民困 七月以畿輔得雨深透 上命山東巡撫訥爾經額詣 泰山祀謝 御製祝文曰京邑為四方之極感應攸昭 岱宗居五嶽之尊監觀有赫前因時逢海暑象微恆陽恭遣親藩虔修秩祀呼吸可通於 帝座代叩 鴻慈痼瘵倍切於朕躬幸邀眷佑輝騰半夜月離畢以占星澤沛崇朝雲出山而徧雨惟 神光華普照靈爽式憑迎生氣於東方溥醴膏於朔野沐甘霖而資長養億姓臚

歡昭明德以薦馨香寸衷欽感今特遣內府司員恭齋香供交山東巡撫訥爾經額敬謹代躬致祭親製祝辭用據謝悃並令升香後虔焚上達伏願期符十日歲稔三秋舉柴望以升中泰山是仰驗水流而潤下魯邦所瞻載展精禋永祈 欽鑒

咸豐十年 諭上年冬令雪澤稀少降旨派山東布政司清盛恭齋大藏香虔祀 泰山代朕叩禱茲自二月初七日起祥雲疊沛渾澤深沾農田可卜豐登朕心實深寅感著仍差內務府司官一員齋大藏香十支馳驛前往山東省城交巡撫文煜傳旨令布政使清盛恭詣 泰山虔申報謝以答 神庥

又 諭色克通額等奏參前任庫倫辦事大臣擅改祭山章程等語庫倫肯特依神山向係用湯退牛羊供獻前任庫倫辦事大臣貝子德勒克多爾濟到任後並不遵照定章沿照伊父倫布多爾濟在任時用活牛羊供獻殊屬有違定制德勒克多爾濟著交理藩院議處嗣後恭祭神山仍著用湯退牛羊以符定制

又 諭駱秉章奏遣官致祭銜名不符請另繕頒發一摺前因富森署理荊州將軍印務所有致祭南嶽等處改派文格前往茲據奏稱原發祭文與該司銜名不符不足以昭誠敬等語著駱秉章即將部發祭文改繕藩司文格銜名飭令該司迅速前往敬謹致祭若復由部改繕往返遲延殊非致敬之道該撫即遵照辦理毋稍拘泥

同治三年六月戊戌 諭本日江甯省城克復捷書馳奏八表同歡因思前此賊氛擾及數省官兵所至仰賴山川效靈神祇助順用能師行貞吉者定功成允宜修舉明禋敬答 鴻佑所有各省應祭 嶽 瀆諸神著禮部查議具奏又 敕封四川大渡河神為 護國之神並列入祀典春秋致祭 十一年題准廣東牛峙山廟祀平鼎大神 敕封為牛峙山神 十三年 敕封河南嵩山九龍潭龍神為 靈惠龍神河南府龍神為 昭應龍神 光緒十年熱河重修 河神專祠列入祀典春秋致祭祭文交翰林院撰擬永

遠遵用頒給功昭利濟扁額

十一年定四川峨眉山神屢著靈異嗣後列入祀典春秋致祭一切祭品均照常祭之例

宣統二年以豫河霜降安瀾發大藏香十支交河南巡撫寶棻詣 河神廟祀謝

又以永定河伏汛安瀾發大藏香十支交直隸總督陳夔龍祇領遣永河道呂佩芬詣 大王廟祀謝

又以黃河秋汛安瀾頒發大藏香十支功昭順軌扁額一方交孫寶琦祇領虔詣 大王廟敬謹懸掛祀謝

又以東明黃河秋汛安瀾頒發大藏香十支由陳夔龍祇領交大順廣道孫鍾祥詣李連莊高村黃莊 大王廟祀謝

三年以江北河工霜降安瀾頒發大藏香十五枝交護江北提督爽良祇領恭詣 大王將軍各廟祀謝

皇朝續文獻通考卷一百五十五

郊社考九 籍田祭 先農

臣謹案雍正四年八月以籍田生瑞穀有一莖九穗者 特命各直省督

撫及府州縣衛各於所治地方擇潔淨之所設立 先農壇及籍田自雍

正五年為始每歲仲春亥日各率所屬行耕籍禮如儀凡以示稼穡之艱

難備乘盛之芳潔世世子孫罔有佚也吉亥劬農續考典禮以著於篇

乾隆五十四年 禮部按例題耕籍特具文而已朕臨御以來恭遇 郊

廟大祀無不祗肅躬親即 中祀之禮亦嘗親行而耕籍則不啻數十次矣仰

荷 上蒼眷佑 列祖鴻庥春秋日高精神強健明歲已屆八旬是以一切

中祀典禮如 先農 朝日 夕月等壇俱於八旬以前兩年內以次親祭一

周即今春亦曾耕籍矣至於八旬後恭遇 南郊 北郊 太廟裕祭大祀仍

當歲歲躬親以及歸政之年始終勿懈若此六年內筋力設有不逮未克躬親

鉅典朕亦不敢或有勉強稍滋阻越隨時自有旨其餘 中祀及耕籍之禮若

復仍事親行轉非體 天教躬保養精神或有類於矯枉沽譽不肯為也即如

木蘭秋彌朕恪遵 家法四十餘次無不控騎行圍今秋圍場仍乘騎而行至

明年八旬以後則理宜頤養起居擬弗策馬而今歲仍必舉行者亦猶 中祀

親祭一周之意也嗣後凡遇 中祀耕籍著禮部即於本內奏請遣官行禮其

應否親詣之處不必聲明請旨矣若 太廟時享及致祭 社稷壇仍著內閣

將親詣遣官之處雙籤呈覽候朕隨時酌量降旨庶鉅典不尚虛文而祀禮益

昭誠恪其每年經筵講學從容作論原不勞筋力較衛武公之年尚少十歲歸

政以前仍應照舊舉行以示始終典學至意

五十六年 諭每歲春三月應祭 先農壇行耕籍禮禮部俱先期將祭祀日

期及籍田一應事宜豫行具題雖屬照例辦理但國家典禮以實不以文朕臨

御以來兢兢以敬 天動民為念 郊 壇大祀無不躬親即籍田親耕亦從

未嘗稍懈煩勞雖本年壽已八十有一猶親舉三推之典惟是春秋已高或恐

步履稍遲若二三年後自揣精力如常偶一舉行豈非熙朝盛事至本年甫經

親行耕籍明歲應否躬莅自應候朕酌行禮部仍照例具題竟似每歲俱親詣

行禮者然豈不轉為具文耶我國家受 命延洪純嘏敷錫世世子孫若能皆

似朕之敬勤不倦自必景祚綿長享國久遠朕所用古稀天子之寶特於乾清

宮存貯一分若我子孫內有享永祚而登上壽者亦得鈐用此寶洵為社稷靈

長之福嗣後我子孫繼承奕禩惟當不懈益勤凡遇親耕典禮若年在六十以

內禮部自應照例具題年年躬行耕籍之禮若年逾六十令禮部先期以親莅

或遣官之處具本題請庶鉅典不尚虛文而展禮益昭誠恪著為令所有此次

禮部具題一本即著照此次改繕進呈

嘉慶四年五年六年耕籍田在二十七個月內奉 旨俱遣官行禮以後俱

親詣行禮

八年奏准 天壇 先農壇外圍壇垣併泊岸開段坍塌查泊岸係甄土相開

不能膠黏一經雨水冲刷隨勢坍塌請將泊岸甄塊拆低墻身將泊岸改築灰

土以資鞏固

九年二月十七日祭 先農壇以二十六日恭逢 孝昭仁皇后忌辰由部奏

准前期一日恭請 皇帝御常服掛朝珠 陞中和殿 閱祝版執事官咸

常服朝珠行禮畢太常寺官捧祝版黃案出 皇帝次閱耕籍器具數種畢禮

部堂官奏禮成 皇帝還宮戶部捧器具數種依次出各安奉綵亭內和馨署

樂設而不作前導送至耕籍所

十六年 諭向來耕籍典禮於親耕後升親耕臺閱親耕之三王九卿以次

俱畢然後順天府尹等率父老耆民謝恩維時父老等散布籍田招集需時

行禮慮慮未足以肅觀瞻嗣後著該府尹等豫飭父老耆民整齊排列於親耕

後升親耕臺時即率領至臺下先行謝恩朕俟謝恩禮畢再閱從耕用昭整肅

又 諭嗣後 先農壇以內各壇宇每遇親詣及遣官祭祀之日俱不准開北

街門擅放車馬匹所有執事陪祀之王大臣官員均於南街門外下馬步入

壇門以內亦不准支搭帳房以昭整肅

道光五年三月 諭本年春兩較少農田盼澤甚殷朕齋心默禱本日溼沛甘

錄自正午... 皇慈益深... 欽感耕藉... 爲勸農重典... 特命御前大臣... 禮部... 奏稱... 耕藉... 水... 四推... 典... 耕藉... 大... 祭... 先農... 必... 躬... 親... 祀... 事... 以... 答... 神... 麻... 業... 經... 先... 期... 遣... 官... 齊... 戒... 本... 日... 閱... 視... 祝... 版... 十... 二... 日... 仍... 恭... 詣... 先... 農... 壇... 致... 祭... 並... 詣... 太... 農... 壇... 行... 禮... 禮... 成... 後... 還... 宮... 其... 耕... 田... 事... 宜... 著... 順... 天... 府... 府... 尹... 照... 例... 率... 屬... 行... 耕... 藉... 禮... 並... 率... 農... 夫... 終... 獻... 以... 肅... 明... 禮... 而... 重... 鉅... 典...

二十一年三月祭 先農壇 上御禮轎自外北天門入內北天門至 太歲殿西南墻角鋪設樓閣處降輿詣 壇行禮 禮案詳與典所 咸豐三年三月辛亥 上祀 先農親耕藉田三推舉加一推自是以爲常 年四年十年六年七年

七年三月祭 先農壇恭逢 孝賢純皇后忌辰 上親詣行禮時御祭服照常作樂導迎樂設而不作還宮後仍更素服 同治十二年三月遣官行耕藉禮 光緒十三年三月庚戌 上祭 先農壇 親行耕藉禮 十四年十九年二十年二十一年二十二年

臣謹案禮記天子以元日祈穀於上帝... 侯大夫躬耕藉自古帝王受命斯禮未之敢廢... 天故於勸農之典備焉我 朝一準古制尤重親耕... 御前侍衛順天府戶部禮部太常寺堂官均執事 上御黃幄脫鞋攝衽禮部堂官前引至耕所戶部堂官進犁府尹進耨戶部堂官一執筐一播種 不脫鞋 府丞執箱從 御前侍衛扶犁耨耨老農二人牽牛六人鑿笠耨帶凡四推四返次日所司於中和殿陳設農具左犁耨案右五穀箱案 五穀次序稻穀黍麥豆 祝版在南居中 上至殿太常寺官捧版供案去包楮 上敬閱一跪三叩起西向立 御前大臣乃引閱東西兩案農具 御耕牛黃色用青紅石一塊四齒鑄金鍍黃銅犁西黃色箱耨均青色玉及牛黑色犁鍍黃餘紅色 還耨進茶 駕還居日寅正 上從宮內趨行邪初至 先農壇祭畢 太歲殿

拈香具服殿更衣傳膳後詣耕所從耕大臣就耕位 禮案詳與典所 上四推四返舉坐觀耕臺黃幄綵旗飛揚田歌旋繞三王一推後九御繼推三王五推舉九卿五推 上乘輿至慶成官諸臣排班立鴻臚宮引三跪九叩 上進茶果諸臣跪一叩各 賜奶茶一盃接飲訖一叩皆起趨官門外站班候 上出一路作樂入前門正中還宮煌煌鉅典 累代舉行夫是以民生勤而年屢豐也

宣統二年三月祭 先農壇遣懋林恭代行禮 三年三月祭 先農壇遣載功行禮 親蠶祭 先蠶

臣謹案乾隆元年始建 先蠶祠七年始定 皇后親蠶之禮自齋祀躬桑授蠶治繭等儀注及蠶母蠶婦受桑布練等禮文季春巳日庚恭有恪伏讀 聖祖仁皇帝耕織圖詩二十三首第十五圖祀謝詩曰自是西陵功德盛萬年衣被澤無疆是以王政必講衣食之源循吏必重蠶桑之利恭續臚陳以識典禮

乾隆五十九年 諭吉慶奏浙省鄉民飼蠶每年在 軒轅黃帝廟祈祀 蠶神向不官爲致祭隨安設神牌於後殿率屬致祭三月下旬天氣晴和蠶桑茂育等語蠶桑本與稼穡並重浙省杭嘉湖三府尤比戶飼蠶以資生業尤宜恭祀 先蠶聿崇昭報著每年官爲致祭載入該省祀典並御書扁額發往懸掛於 軒轅黃帝廟及 先蠶後殿以祈 神貺 又議准浙江省城 軒轅黃帝廟 蠶神並杭嘉湖屬二十三州縣 蠶神祠每年官爲致祭所需祭品照致祭 先農壇之例辦理其致祭日期查照部頒祭祀日期單內致祭 先蠶吉日一體遵行 嘉慶元年三月二十三日致祭 先蠶壇奉 旨 皇后親詣行禮 七年八年十一年十二十三年十五年六十七等年同 二年奏准三月十七日祭 先蠶壇此次應 貴妃致祭行禮 三年奏准三月十七日祭 先蠶壇此次應 皇貴妃致祭行禮

十年奏准三月初九日致祭 先蠶壇此次應請 旨遣 妃恭代 皇后行禮

十四年奏准三月初九日祭 先蠶壇請 旨遣 妃恭代 皇后行禮

十六年 諭內務府奏開列恭從採桑福晉命婦清單奏請欽點一摺每年皇后親蠶以福晉命婦七人隨從採桑係屬大典乃近年來開列單內除近支福晉外大率係皇后姻親意欲藉此請安所以年年開送其餘多託故不與此次開列單內僅止九人其中大臣命婦則止有二人自係各該大臣等不令其妻恭與典禮是以託故不行開送似此積漸因循必致開列人數不敷點派成何事體此次姑就單內圈出七人以備典禮嗣後各該大臣命婦除實係有故照例聲明免其開送外餘俱著一併開列如仍前託故規避致人數短少著內務府查明無故不到者將該命婦之夫參處

二十一年奏請三月二十日蠶上簇奉 旨蠶上簇嗣後不必奏

又四月癸酉 皇后行躬桑禮 二十二年二十三年同

二十四年奏定執事女官四十六人各賞大緞一疋綢一疋

道光三年 皇后親蠶親詣行禮 十四年至十八年又十五年同

十三年親蠶遣 妃躬代行禮 十七年同

十四年親蠶 皇貴妃親詣行禮

二十年三月乙巳致祭 先蠶壇派內務府大臣行禮

又奏准遣官致祭 先蠶壇照遣官致祭 先農壇之例由西升降一應執事均用太常寺官一切事宜交太常寺辦理

二十三年三月乙巳致祭 先蠶壇奉 旨此後著派內務府大臣行禮毋庸

奏請 是後致祭 先蠶壇 曾奏請遣官行禮

咸豐三年三月乙巳朔 皇后祀 先蠶 四年六年八年十年同

九年三月十一日祭 先蠶壇遣 妃恭代行禮是日因 孝賢純皇后忌辰

改三月二十三日行禮

同治元年題三月十一日致祭 先蠶壇奉 旨著遣內務府大臣行禮 是案

平以後致祭 內務府大臣行禮均

十二年三月初三日致祭 先蠶壇奉 旨遣妃恭代行禮 十三年同

光緒元年題三月初八日致祭 先蠶壇奉 旨遣內務府大臣行禮 是案自

後致祭 內務府大臣行禮均 十五年題三月十二日致祭 先蠶壇奉 旨 皇后親詣行禮 十六年同

宣統三年三月丁巳祭 先蠶壇遣增崇行禮

皇朝續文獻通考卷一百五十六

郊社考十 告祭

臣謹案告祭云者因事而告舉無定期 國朝舊制凡遇大典於先期祭
告 園丘 方澤 太廟 奉先殿 社稷 陵寢或 親詣或遣官隨
時申敬不懈益虔至於 嶽鎮海濱 歷代帝王陵寢 先師闕里別具
本門仍通考之例不著此編其水旱禱祝則悉入零祭門矣

嘉慶元年正月戊申朔日舉行 授 受大典遣官祭告 園丘 方澤 太
廟 奉先殿 社稷

十八年 諭日前奸民突入禁門仰賴 天 地 宗 社靈佑渠魁戮餘
孽肅清朕欽感 鴻慈消吉於十月初一日虔申告祭前降諭旨甚明並令翰
林院特撰祝文敬達祀謝之忱乃太常寺拘泥是日為每歲時饗之期於 太
廟後殿用新撰祝文 太廟前殿朕躬請告祭轉沿用時饗祝文實屬昏愦錯
謬該衙門二十八日具奏之摺前止聲敘告祭所用祭品其餘恭讀祝文並未
明白請旨非尋常錯誤可比太常寺堂官俱著交部嚴加議處速具摺奏不許
稍遲時日德文著先摘去頂帶聽候部議尋議禮部尚書兼管太常寺事務德
文太常寺卿書與朱紹曾少卿舒銜均應革職

又 諭回疆遠在西陲徵調未易集事前此逆裔張格爾入卡煽亂各路官兵
應援不及遂被該逆竊據四城生靈遭其荼毒甚至我大臣官兵效命捐軀慘
罹鋒鏑實為天討所必誅自長齡等於上年二月開督兵進剿三戰皆捷未及
而月四城以次蕩平固已大張國威稍紓衆憤惟逆黨雖就誅而兇渠尙稽
顯戮是遺孽一日不除則軍務一日不竣屢經飭諭該將軍等妥籌善後仍一
面設法擒渠以期迅速成功昨長齡等露布馳奏元惡生擒從此邊徼又安外
夷響服宜修告功之典用昭寅感之誠本年孟春時享 太廟及 常寧 方

澤大祀朕將躬展明禋其飭所司於祝册內敬舉受釐宣捷之忱用申虔告恭
維盛京 三陵禮應親詣叩謝惟念畿輔陪京地方應付東三省凱撤官兵尙
未竣事恐驛路所經重勞民功宜先遣親王前往恭代行禮 東陵 西陵朕

於九月開敬詣展謁仲秋恭祀 社稷壇亦當親詣將事並著於祝文內敬載
申悃其應行禮儀及此外一切典禮各該衙門察例具奏

二十五年八月庚戌 宣宗成皇帝登極遣官告祭 天 地 太廟 社稷
頒詔天下以明年為道光元年

道光八年平定回疆加上 恭慈康豫皇太后徽號曰 恭慈康豫安成皇太
后前期遣官祇告 天 地 太廟如儀

三十年正月己未 文宗顯皇帝登極遣官告祭 天 地 太廟 社稷頒
詔天下以明年為咸豐元年

咸豐十一年十月甲子 穆宗毅皇帝登極遣官告祭 天 地 太廟 社
稷頒詔天下以明年為同治元年

同治三年六月 諭自粵逆洪秀全糾眾煽亂闖入兩湖三江盤踞江甯遺黨
肆擾疊陷郡邑荼毒生靈罪惡貫盈神人共憤朝廷命將出師特申天討疊經
克復城池殄除巨股而該逆蔓延既廣兇饒遂張自成豐十一年八月開克復
安慶省城後官軍乘勢直逼江甯賊勢漸窮燹上年以來疊將江蘇浙江各
郡縣次第克復江甯之賊遂成孤立而逆酋洪秀全等猶敢擁眾負隅抵死抗
拒今幸將上用命克拔堅城元兇授首從此掃除餘孽指日蕩平朕與薄海蒼
生共享昇平之福此皆仰賴 昊蒼眷佑 列聖垂慈得以建此偉績宜修告
成之典用昭寅感之誠所有 天壇 地壇 社稷壇盛京 三陵 東陵

西陵 太廟均著遣官致祭朕於告祭之前一日親詣 太廟中殿後殿拈香
行禮並飭所司於祝文敬舉受釐宣捷之忱用申虔告所有應行禮儀及此外
一切典禮著各該衙門敬謹察例具奏

又 諭 皇考文宗顯皇帝御極之初卽值粵逆倡亂流毒各省疊次命將出
師用申天討雖屢殄悍寇克復多城而匪勢蔓延未卽撲滅我 皇考宵旰憂
勞無時不以滅賊安民為念殷殷望捷迨咸豐十一年 龍馭上賓頒示遺詔
猶以東南諸省軍務未平百姓蕩析離居時廬 聖慮朕誕膺大統乾惕時深
日盼殲誅渠魁廓清疆宇仰承 皇考未竟之志我 兩宮皇太后親裁庶政

教育朕躬翹望捷書夜以繼日茲於本月二十九日由官文會國藩等紅旗報捷克復江甯剗除首逆是皆仰賴我 皇考貽謀久遠故能勉集大動用光前烈感幸之餘彌深悲慟即擬親謁 殯宮敬申哀感我 慈安皇太后 慈禧皇太后因秋禾正當暢茂蹕路所經車馬殷闐不免蹂踐田禾一切修墊道途恐致重煩民力即日恭奉 懿旨著派醇親王奕譞恭詣隆福寺行宮 几筵前恭代行禮敬舉宣捷之忱用申虔告

又 諭見在江甯克復全省底定朕於七月初一日先行親詣 奉先殿 大

高殿 壽皇殿行禮景山 關帝廟拈香用申敬悃

甲子以克復金陵遣官告祭 天 地 社稷 太廟 永陵 福陵 昭陵

昭西陵 孝陵 孝東陵 景陵 泰陵 泰東陵 裕陵 昌陵 昌西

陵 慕陵 慕東陵

光緒元年正月戊午 德宗景皇帝登極遣官告祭 園丘 方澤 太廟

奉先殿 社稷

十二年禮部奏光緒十三年正月十五日舉行 皇上親政典禮例應前期祭告 天 地 宗 社等壇廟由太常寺具題遣派於正月十三日敬謹將事屆期 皇上率王公百官詣 慈寧宮於 皇太后前進表行禮應派大學士二員捧表禮成 皇上升 太和殿受賀王公百官上表行慶賀禮禮成頒行詔書宣示天下得 旨允行

十五年正月壬午 命魁斌恭詣 天壇凱奏恭詣 地壇隆勳恭詣 太廟

後殿載澧恭詣 奉先殿告祭二月壬辰 上升太和殿恭奉 冊 寶詣

慈寧宮行禮恭上 慈禧端佑康頤昭豫莊誠皇太后徽號曰 慈禧端佑康

頤昭豫莊誠壽恭皇太后 命親王告祭 天 地 太廟 社稷

三十四年十一月庚寅 上以登極前期遣官告祭 天 地 太廟 社稷

辛卯登極禮成頒詔天下以明年為宣統元年

宣統元年十月禮部奏崇上 皇太后徽號前期一日告祭 天壇等處遣官

行禮事奉 旨派魁斌訥勒赫載濬載潤溥倫

皇朝續文獻通考卷一百五十七

賜進士出身頭品頂戴前內閣侍讀學士 劉錦藻恭纂

聖祀考一

臣謹案我朝釐定祀典凡秦漢唐宋封禪之文不經之祀斥不復道但有功於國有德於民靡不列入典禮春秋將祀所以隆崇報而答 神庥固已惟宜惟稱大者不誣小者不遺矣

京師崇祀 五祀八續附

乾隆六十年奉 旨所有各寺廟供奉關聖神位以及扁額內有勅封字樣者殊非敬神之義著將此二字節去欽此遵 旨將京城 關帝廟神牌並廟門扁額節去 勅封二字其後殿神牌比照 崇聖祠五王牌位之例勅封字樣亦一體節去

嘉慶十八年 諭九月十五日逆匪林清潛遣夥黨突入禁門謀逆當經官兵將逆賊殲捕淨盡嗣訊獲犯供稱是日逆匪等在紫禁城滋擾時恍惚之中望見 關帝神像該逆衆立時畏懼奔竄悉就殲擒此次逆匪滋事迅即殄除都城安堵前於孟冬朔日燭潔祀謝 天 地 宗 社敬酬 眷佑 關帝廟尙未虔申祀謝著太常寺於冬至前詣吉在地安門外 關帝廟報祀一應禮儀即照春秋二祭之例定期具奏請旨遣皇次子前往行禮用答 神庥十九年 諭上年逆匪突入禁門時恍惚之中望見 關帝神像畏懼奔竄立就殲擒本日又據那彥成奏當滑縣克復之時賊匪於黑夜拚命突圍官兵施放槍箭未能真切忽城旁廟宇自行起火照同白晝官兵兩路夾擊始將賊匪截回悉數殄除事後乃知城旁廟宇供有 關帝神像廟雖焚燬 神像歸然獨存毫無損動等語此次逆匪滋事屢荷 關帝靈爽竭衛實深寅感著該衙門於原定封號擬加封二字進呈候朕酌定通頒直省用答 神庥其滑縣廟宇候重修落成之日該撫再行奏請御書扁額敬謹懸掛尋議上加封仁勇二字

道光八年 諭我朝定鼎以來 關帝屢彰靈佑昨據長齡等奏上年張格爾

煽亂遣其逆黨擾近阿克蘇當官兵衝擊之時陡起大風塵沙飛揚該逆等遙見紅光燭天遂被殲擒又長齡等督兵進剿師次渾河沿該逆等竟夜擾營風起猛烈官兵乘風衝賊俘馘無算次早接仗時據獲賊僉供又見紅光中兵馬高大不能抵敵即各竄逸此皆仰賴 關帝威靈顯赫默祐賊魄用克生擒巨憝永靖邊圉應加展誠敬以期億萬年護國安民著禮部擬加封號數字具奏用答 神庥尋議上得 旨加威顯二字封號

咸豐二年加 封護國三年加 封保民

又 諭禮部等衙門議奏 關帝升入中祀禮節一摺我朝尊崇 關帝祀典攸隆仰荷 神威疊昭顯佑本年復加崇 封號並升入中祀茲據禮部等衙門詳擬禮節謹擬具奏著照所議自明年春季為始悉照中祀禮舉行樂用六成舞用八佾以昭崇奉而答 神庥

四年 諭太常寺奏遵旨呈進 關帝廟圖式一摺 關帝顯佑我朝神威疊著上年加崇封號升入中祀一切典禮悉照中祀舉行前據太常寺奏請展拓廟制以示尊崇朕思致敬之道以質不以文 關帝廟崇奉有年若遵易舊規轉不足以安神靈而昭誠敬所有廟宇規模著悉仍舊制無庸增拓樂器一切均照本年春季陳設至拜跪禮節僅行二跪六叩雖係照中祀例然滿洲舊俗於祭神時俱行九叩禮嗣後親詣致祭亦著定為三跪九叩禮

五年 諭禮部奏 關帝廟樂章應否另撰著翰林院敬謹撰擬此次著暫用春季樂章

又 諭太常寺奏遵查 關帝先代封爵應否推崇加封請旨一摺前以 關帝神威顯佑特加封號並升入中祀茲據太常寺查明 關帝先代封爵並應否援照 文廟 崇聖祠例加封請旨定奪自應敬謹加封以示尊崇 關帝曾祖光昭公著加封為光昭王祖裕昌公加封為裕昌王父成忠公加封為成忠王所有應辦事宜著該衙門查例具奏

六年 諭葉名琛柏貴奏神靈顯應請加封號一摺 關帝神威助順前已疊

晉崇封升為中祀茲據該督等奏稱四年六月廣東省城各門外逆匪突起攻撲城垣仰荷神靈默助連獲大捷省城得保無虞韶州新會三水龍川各府縣均被股匪圍撲嬰城固守亦賴 關帝顯應得以保全朕心實深寅感允宜加崇封號藉申虔敬著禮部謹擬具奏尋議上加 封精誠

七年加 封綏靖

又 諭 關聖帝君福佑我朝威靈顯著前已升入中祀備極崇崇茲朕親書萬世人極扁額著造辦處成造一分恭懸京師地安門外 關帝廟所有各直省府州縣 關帝廟著御書處摹勒頒發一體懸挂其墨筆著俟摹勒完時由軍機處發交山西巡撫委員齎送解州 關帝廟收藏以昭誠敬

同治三年以江甯克復 親詣拈香

七年以捻逆蕩平 親詣拈香

九年加 封翊贊

光緒五年加 封宣德

右關帝廟

凡致祭 文昌之禮歲以二月三日暨秋仲月諫吉遣官一人將事是日由廟左門入行三跪九叩禮如儀同日祭後殿以太常寺卿一人將事正中奉

文昌帝君前代神位南向設案一承祭官行二跪六叩禮如儀 凡直省府州縣暨四川梓潼縣鳳凰山 文昌廟歲均以春秋仲月地方官躬詣致祭陳設器數行禮儀節並與 京師祭 文昌廟同

嘉慶六年 諭京師地安門外舊有明成化年間所建 文昌帝君廟宇久經傾圮碑記尚存特命敬謹重修見已落成規模聿煥朕本日虔申展謁行九叩禮敬思 文昌帝君主持文運福國佑民崇正教闢邪說靈迹最著海內崇奉與 關聖大帝相同允宜列入祀典用光文治著交禮部太常寺將每歲春秋致祭之典及一切儀文仿照 關帝廟定制詳查妥議具奏

遵 旨議定 文昌帝君廟仿照崇祀 關帝春秋致祭之禮定以每歲二月初三日 聖誕為春祭其秋祭由欽天監選定吉期彙入祀冊交與太常

寺按期題請 欽派大臣一員承祭一應儀注均與致祭 關帝廟禮同又議准 文昌廟前殿見供 神像應照定制增設牌位書寫 文昌帝君神位字樣後殿龕座見供 文昌帝君先世各神牌敬查 關帝三代於雍正三年俱 勅封加號尊崇製牌安奉今 文昌帝君三代查無確據未便請加封號謹擬增製牌位一分書寫 文昌帝君先代神位字樣遇祭期照

關帝廟後殿祀典致祭以太常寺堂官一員行禮

咸豐六年 諭嘉慶六年欽奉 諭旨 文昌帝君主持文運福國佑民崇正教闢邪說靈迹最著海內崇奉與 關聖大帝相同允宜列入祀典用光文治當經禮部太常寺奏准一切禮節祭品均與 關帝廟同見在 關聖帝君已升入中祀 文昌帝君應一體升入中祀以昭誠敬一切典禮著該衙門妥議具奏

又奏准 先師廟文舞六佾今文昌廟例舞亦用文舞六佾

又 諭禮部等衙門奏遵議 文昌帝君升入中祀典禮開單呈覽一摺 文昌帝君升入中祀前期一日著遣親郡王行告祭禮春秋二祭俱著卜吉舉行

二月初三日聖誕即照 關帝廟拈香禮節並無庸禁止屠宰一切禮儀祭品樂章祝文均著照所議備辦應行酌改工程及預備各項著工部於明年春季前趕緊備齊以昭誠敬

七年 諭嗣後致祭 文昌帝君朕親詣行禮之處著照致祭 關帝廟之例由太常寺開次題奏雙簽請旨

是年二月十三日 上親詣行禮

同治十二年 上親詣行禮

光緒十三年 上親詣行禮

俾敬文昌宮碑陰錄略謂文昌帝君之祀不知其自始崔鴻後秦錄姚萇隨楊安伐蜀至梓潼嶺見一神人謂之曰君早還秦秦無主其在君乎萇請其姓氏曰張惡子也後據秦稱帝即其地立張相公廟祠之常璩華陽國志梓潼縣善版祠一名惡子民歲上雷杆十枚璩志終於永和三年在

莫稱帝前五十餘年是其之前已祀惡子矣唐封順濟王宋改封英顯王
元以道士之說封輔元開化文昌司錄宏仁帝君於是山經地志稗乘外
書附會不經之辭布滿天下前明季年議禮者欲罷其祀是不然夫王者
受命進退羣神之祀凡以爲民已耳其合乎天神地祇人鬼之典法者秩
宗之所掌維掖諸生之所誦習百世不廢者也其不合乎天神地祇人鬼
之典法而能見靈爽爲徵驗捍禦水旱兵革爲天下所奔走王者亦秩而
祀之所以從民望也

俞樾文昌改稱梓潼文君議 文昌天星也而今世所奉文昌稱爲梓潼
帝君又相傳二月三日爲其生日夫天星則何生日之有且亦豈可係之
梓潼一邑哉然則今世所奉文昌殆非天星也愚謂東漢之初自有梓潼
文君見於高朕禮殿記洪氏隸釋據華陽國志證其人爲文參而余所見
華陽國志則作文齊字子奇齊篆作舟與參相似必有一誤論古人名字
相比附或者其名取參兩之參而其字取奇偶之奇歟文君爲梓潼人官
益州太守王莽公孫述並徵用之皆拒不受是其人固賢者也其子名怵
爲北海守父子相繼同典大郡又有文恭字仲實必其子姓也是梓潼文
氏亦太族矣梓潼文君之祠必始於益州蓋文君既歿而益州之民立祠
祀之如石相祠于公祠之例耳相沿既久而梓潼文君之祠滿於蜀中流
俗訛傳因文君之稱附會爲文昌之神至今遂徧天下矣功令 文帝與
關帝同列中祀文帝生西漢之末武帝生東漢之末一以文德一以武功
皆漢臣之賢者生有明德歿爲明神俎豆千秋亦固其所關帝生日相傳
爲五月十三日既爲人鬼而非天神宜有生日則文帝之於二月三日降
生雖載籍無徵而流傳有自牲牢秩祀所謂禮亦宜之者也明嘉靖間議
禮諸臣欲廢文昌由不知其爲梓潼文君耳竊謂祠文昌者宜改稱梓潼
文君庶天人不素而名實相符或於 聖清稽古右文之化不無小補乎
臣謹案文昌星也天神也今列祀典則以人鬼 國家神道設教原不必
求其人以實之然其神出於蜀又出於蜀之梓潼自宋以來有此說世以

張惡子附會之俞樾謂梓潼文昌帝君即梓潼文君所謂文昌官者實即
梓潼文君之家廟其始惟文氏子姓奉之後乃溥及川中雖屬臆說而文
君振興文教媲美文翁又以忠義爲光武所褒固聰明正直而壹者也視
張惡子天淵矣奉張惡子爲文昌何如奉梓潼文君爲文昌其姓則文也
與文昌之號符其家梓潼也與梓潼帝君之號符樾之說不較可信歟

右文昌帝君廟

嘉慶六年 諭玉泉山 惠濟慈佑龍王廟每遇祈禱雨澤屢著靈應久經載
入祀典近因夏至以後雨澤較少本月十七日朕親詣虔誠默禱是日即有微
雨飄灑次日大霽甘霖連宵連曙尤徵靈驗允宜敬加稱號用答 神庥著稱
爲 惠濟慈佑靈護龍王廟以昭崇奉

十三年 諭廣興奏本月十一日致祭玉泉山 龍神是日恭值 太祖高皇
帝忌辰此後請令欽天監另行擇日等語向來 團丘 祈穀 方澤時享
太廟諸大祀即遇忌辰日期亦照舊致祭原以禮統於尊祭期亦有一定若
龍神諸廟皆爲羣祀向由欽天監擇日既係涓吉何必於忌辰行禮所有原擇
日期之欽天監堂司各官殊屬粗疏均著交部議處嗣後致祭羣祀不得用忌
辰著另擇日行禮

右玉泉山龍神

十七年 諭昆明湖廣濟靈雨祠 龍神靈應夙著本年三月二十九日朕因
農田望澤前往拈香甫回御園甘霖立沛旬日以來大田微覺乾燥朕昨早復
親詣拈香默禱旋即油雲密布午後甘膏滂灑四野優霑本日又得陣雨滂沛
神佑感孚如響斯應允宜崇加封號於原封安佑普濟神號下敬增沛澤廣生
四字並著禮部查照黑龍潭玉泉山兩處 龍神祠祀典一體春秋致祭以昭
靈貺欽此遵 旨議准昆明湖 廣濟靈雨祠列入祀典一體春秋致祭應由
欽天監查照致祭 龍神祠之例每歲選定春秋致祭日期彙入祀典預行送
部由部轉交太常寺按期題請 欽派大臣一員承祭朝服上香讀祝三獻行
禮如儀所有應用香帛祭品祭器等項由太常寺備辦祝文由翰林院撰擬成

式應用請即於本年仲秋為始擇吉致祭

右昆明湖龍神

十八年 諭據禮部查明密雲縣 白龍潭龍神於乾隆四十六年曾經 加封為昭靈廣濟龍神此次無庸再益微稱著增入祀典春秋以時致祭用彰靈應每屆祭期前十日由太常寺專摺具奏將散秩大臣開列名單進呈候旨派往行禮

右白龍潭龍神

十七年 諭朕敬禮 神祇為民祈福大內及御園多有供奉 諸神祠宇每遇祈報就近瞻禮以申誠敬惟 水府諸神如 天后 河神向無祠位凡遇發香申敬之時皆係望空瞻禮遙紆虔悃今擬於御園內添建祠宇著百齡親赴清江浦於崇祀各神如 天后 濟惠龍神素昭靈應載在祀典者將 神牌封號字樣詳繕陳奏俟廟宇落成照式虔造供奉以迓 神庥

臣謹案廟建於綺春園內

二十二年 諭御園惠濟祠河神廟自本年秋季為始每歲春秋二季照清漪園靜明園二處龍神一體致祭旋議惠濟祠供奉 天后之神河神廟供奉 淮濱之神 金龍四大王之神 黃大王之神均列入祀典與黑龍潭龍神祠同日遣圓明園大臣將事典禮與祭黑龍潭祠

右天后河神

咸豐八年 諭春雨軒 司土之神晉封為圓明園昭佑敷禧司土真君土母晉封為昭佑敷禧司土夫人春秋二季禮節仿照聖祀管園庭內務府大臣一人承祭中和樂伺候樂一切事宜著裕誠酌擬具奏

右司土之神

五祀八蜡

咸豐七年 諭上年入秋以後近畿一帶時見飛蝗旋據直隸等省奏報亦各有飛蝗停落之處疊經降旨嚴飭地方官吏認真撲捕原慮蝻孽滋生致傷禾稼是以古來捕蝗之法或付之烈炬或填之深溝總以不留遺孽為要務近聞

各省被災之處民間訛稱蝗為神蟲不肯捕撲鄉愚無知殊為可憫著通諭各省督撫飭令地方官一體出示曉諭如遇飛蝗入境無論是否傷稼務須盡力搜捕勿得惑於俗說任令蔓延至會典所載劉猛將軍為驅蝗正神於雍正年間曾奉 諭旨飭令各省建廟致祭上年飛蝗四起秋稼未傷今年春夏各省奏到蝻孽萌生處所或並未停落或收捕潛消並有經雷雨掃蕩無蹤者此皆靈爽驅除默為呵護應如何酌量加增致敬之處著禮部覈議具奏

又 諭禮部奏遵議劉猛將軍可否請加封號一摺劉猛將軍為驅蝗正神廟祀有年尚無封號著該衙門謹擬具奏尋奏 勅封保康劉猛將軍 同治元年加封普佑七年年加封顯應

光緒四年加封靈惠五年加封襄濟七年加封翊化十二年加封靈孚

臣謹案神名承忠元時官指揮能驅蝗元亡自沈於河世稱劉猛將軍雍正二年 飭各直省建廟道光四年以靈應昭著 頒給御書扁額懸挂 江南省城

臣又案八蜡配以昆蟲先儒謂其害稼不當與祭蘇軾曰迎貓則為貓之尸迎虎則為虎之尸近於俳優所為蓋祀捕昆蟲之神而竟以昆蟲當之失先王之禮遠矣乾隆十年臣工請行蜡祭奉 諭不必舉行所以折祀典之衷而通祭酬之意抑何謹且嚴哉

沈德潛八蜡考 蜡祭者王朝之大典歲十二月合聚萬物而索饗之非特八神也而所重者八以其有功於田故也八神鄭注云先嗇神農也司嗇后稷也農古之田畯也郵表曠井開屋宇田畯所以省約百姓處也貓虎除田鼠田豕者也坊所以畜水亦以障水水庸即水溝所以受水亦以泄水者也昆蟲螟螣之屬害苗者也王肅分貓虎為二去昆蟲分貓虎者以二獸所食各有其功也去昆蟲者以害苗之物與田鼠田豕同類不當祭也鄭氏數及昆蟲者以昆蟲不為物害即其功也然郊特牲本文於祭坊與水庸下特起其文曰土反其宅水歸其壑昆蟲毋作草木歸其澤言土安則無崩圯水歸則無泛濫螟螣之屬不起草木各歸根於藪澤不生

於耕稼之土也此係蜡祭祝辭與前文伊耆氏始爲蜡祭云云爲止而復起之文不得以昆蟲與先齊司嗇等並列且昆蟲當祭草木亦有神何爲不當祭而獨遺之乎後沙隨程氏謂昆蟲者非祭昆蟲祭其除昆蟲而有功於人者如火田之人捕蝗之夫禽鳥之能食昆蟲霜霰之能殺昆蟲者皆是也其言辨矣然於義終屬未安愚按經文云蜡之祭也主先齊而祭司嗇也祭百種以報嗇也所謂百種如黍稷稻粱秬秠糜芑雜麥荏菽之類豈貓虎之神禮當報嗇而上帝所降之種藉以率育萬世者而轉不之及邪則敘百種於先齊司嗇以下農及郵表嘽以前適爲相宜而疏禮經者卽以農及郵表嘽禽獸當之使百種爲虛而無據之屬失其旨矣愚卽以經文正舊疏之失以見勞農休息深得報本反始之意至歷代蜡祭儀文及臘與蜡祭異同之故更當詳考焉

馬其昶釋八蜡 八蜡之祭自伊耆氏始也周禮籥章國祭蜡則吹籥頌擊土鼓以息老物周衰禮廢國人若狂孔子以爲未足深過歷代王者皆制爲祀典以至於今莫之敢廢也其祭之義奈何記言之矣曰蜡也者索也歲十二月合聚萬物而索享之也蜡之祭也主先齊而祭司嗇也祭百種以報嗇也享農及郵表嘽禽獸仁之至義之盡也古之君子使之必報之迎貓謂其食田鼠也迎虎謂其食田豕也迎而祭之祭坊與水庸事也其八者何也鄭康成曰先齊一司嗇二農三郵表嘽四貓虎五坊六水庸七昆蟲八昆蟲害稼者又記所不言曷爲其祭之貓也虎也二而一之亦非也王肅出昆蟲分貓虎橫渠張子又據記文增百種是也而仍以貓虎爲一說者謂先齊神農司嗇后稷而願與貓虎同祭不其瀆乎非瀆也記言之矣蜡之祭也主先齊而祭司嗇也是先齊司嗇祭之主也自百種以下皆所謂合聚萬物而索享之者也其祝辭曰土反其宅故報坊也水歸其壑故報水庸也昆蟲毋作故迎貓虎草木歸其澤故祭百種農則凡有勞於田者也古之君子使之必報之也獨所謂郵表嘽者何神乎說之者曰郵表嘽謂田畷所以督約百姓於井間之處也而因爲神號不詞甚矣

郵表嘽非所以號神也是卽坊也水庸也畜障受泄爲水之郵必有表識連嘽故曰事也郵表嘽之指坊水庸猶禽獸之指貓虎也享農及郵表嘽禽獸仁之至義之盡也蓋預探下事而言其義也不然郵表嘽果別一神也貓虎外又何不數禽獸乎以是知其非也然則所謂八神者先齊也司嗇也農也百種也坊也水庸也貓也虎也今祭不及百種而坊水庸又與郵表嘽雜出豈非儒者釋經之未審乎子曰名不正則言不順竊謂當據禮經改祀以正其名

皇朝續文獻通考卷一百五十八

羣祀考二 直省專祀

臣謹案 國朝釐定祀典春秋以時凡以為民焉耳直省凡有能為民禦

大災捍大患者 錫之封號祀以專祠其既性迎送等儀注乾隆五十年

以前已備著於篇其後 靈昭益申安佑續為之考庶無遺缺云爾

乾隆五十一年 上至正定府詣 河神廟行禮

五十二年 諭據福康安等奏凱旋官兵分起渡洋內福州駐防一起官兵在

鹿仔港更換大船候風放洋有領催蘇榜額等乘坐哨船已至港口未上大船

陡起風暴飄至大洋正在危急忽有異鳥飛集船頭船戶等謂得神佑必可無

虞適於黑水洋遇見他船兵丁等救護過船見原坐船下有數丈大魚浮出水

面原船登時沈沒等語此次派往臺灣勦捕官兵及運送錢糧鉛藥等項渡洋

多獲平穩前次福康安自崇武澳放洋前抵鹿仔港千里洋面一晝夜即已過

達皆仰賴天后助順靈應垂庥深欽感茲福康安等奏福州駐防官兵內渡

船隻在港口被風遇危獲安疊徵靈異尤宜增益鴻稱奏封崇號著於天后舊

有封號上加增顯神贊順四字用答神庥而隆安佑

又 諭沿海處所勦建天后神廟屢著靈應而福建涓州係神原籍見在臺灣

大功告成官兵凱旋一路進行安穩仰賴神庥疊昭靈貺尤宜特著明禮用昭

崇報著翰林院撰擬祭文發往嗣後該督撫於天后本籍祠宇春秋二季敬謹

蠲潔讀文致祭以隆祀事而答嘉庥

又 諭據李奉翰奏清口惠濟祠天后神廟歲時報祭未著祀典請一體頒發

祭文於春秋二季致祭等語前因派往臺灣官兵渡洋履順仰庇神庥特於天

后封號上加顯神贊順四字並令在莆田涓州本籍祠宇春秋致祭以彰靈感

今清口惠濟祠供奉天后神像屢著靈應本年河流順軌運道深通自應一體

特著明禮以光祀典著交翰林院撰擬祭文發往於春秋二季命地方官虔誠

致祭並著李奉翰將新加封號四字敬謹增入神牌俾河工永慶安瀾益昭靈

貺

五十三年 命江南河東等處工次建 黃河神廟並於江南清黃交匯地方

建 淮河神廟春秋致祭載入祀典

五十七年 諭據秦承恩奏請定太白山祀典一摺太白山轄兩縣應久著靈

異從前會令該地方官春秋致祭並特加昭靈普潤封號以答神庥本年該省

盼雨稍殷設壇虔禱經撫臣委員自太白山取水甫至即霽甘霖通省俱獲優

渥益見功濟生民允宜特隆秩祀用肅精禋交禮部列入祀典並頒給祝文儀

注以昭崇報

又 諭富綱等奏請敕賜厥神封號一摺著封為裕源興寶礦脈龍神並著該

督撫於廠地相度處所建設總廟春秋致祭交該部載入祀典

五十八年 諭福康安奏此次官兵赴藏經過丹達山均無阻滯山靈助順請

加封號並頒懸扁額等語著封為昭靈助順山神交該部載入祀典春秋致祭

並頒去御書扁額

嘉慶元年 勅封烈彰恬顯之神廟祀浙江蕭山縣

臣謹案神王氏元楊伯遠妻相傳至正開其夫充里正值鹹水決隄官督

築圩堰不就受楚責神割股投水沙遂漲隄成名曰股隄為西興江塘

神

二年 勅封宣威助順靖遠侯鎮遠侯綬遠侯廟祀湖南永綏廳

臣謹案神楊姓兄弟三人長名瀨並武勇宋時屢禦苗寇立廟祀之 王

師平苗頗著靈異奏准加封號

又 勅封崇節惠利蟻磯靈澤夫人廟祀安徽蕪湖縣

臣謹案神卽蜀漢昭烈帝孫夫人

五年 諭沿海地方崇奉天后仰承靈佑昭垂應顯應見在各洋面巡緝兵

船及商船往來均賴神力庇佑著該衙門再擬加增四字並著翰林院撰擬祭

文即交此次冊封琉球國正使趙文楷齎往福建敬謹致祭

又加封 天后為護國庇民妙靈昭應宏仁普濟福佑羣生誠感咸孚顯神贊

順垂慈篤祐天后之神

全祖望天妃廟記今世浙中閩中粵中以及吳淞近海之區皆有天妃廟其姓氏則閩中之女子林氏也死為海神遂有天妃夫人之稱其靈爽非尋常之神可比歷代加封焉子全子曰異哉聖人之所不語也生為明聖死為明神故世之死而得祀者必以其忠節貞孝而後尊以巾幗言之湘夫人之得祀也以其從舜而死女嬃之得祀也以其為弟屈原曹娥之得祀也以其孝若此例者不可屈指若夫流俗之妄如蠅蟻夫人祠亦以謬傳其殉漢而祀之至於介山妬女之流則所謂俚誕之不足深詰者也若天妃者列於命祀遍於南方海上州縣其祀非里巷祠宇所可比然何其漫然無稽也夫婦人之為德也其言不出於閨其議不出於酒食之微其步趨不出於屏廳之近其不幸而殤所支持亦不出於門戶之間所保護亦不出於兒女之輩若當其在室則尤深自閨匿而一無所預林氏之女即云生有異稟其於海上樓船之夷險而買之往還亦復何涉而忽出位謀之日接夫天吳紫鳳之流以強作長鯨波汎之管句以要鮫人蟹戶之崇奉其無謂也古來巾幗之奇蓋遭逢不幸出於變故之來勃堯頑窳以死故其身後魂魄所之不可卒化世人亦遂因而祀之以勵風教以維末俗是三禮之精意不可廢也天妃果何居乎自有天地以來即有此海有此海即有神以司之林氏之女未生以前誰為司之而直待昌期之至不生男而生女以為林氏門楣之光海若斂衽奉為總持是一怪也天之配為地今不以宮媪為伉儷而有取於閨產是二怪也林氏生前固處子耳彼世有深居重闈之淑媛媒灼之流突過而呼之曰妃曰夫人曰娘則有類其面避之惟恐不速而林氏受之而不以為泰是三怪也為此說者蓋出於南方好鬼之人妄傳其事鮫人蟹戶本無知識輾轉相愚造為靈迹以實之於是梯航所過弓影蛇形皆有一天妃在其意中在其目中以至於盱眙之盛惟恐或後上而秩宗下而海隅官吏又無深明典禮者以折之其可歎也前乎吾而為此說者明會稽唐氏也然略示其旨而未暢吾故

為之申而明之以俟世有秋文惠公其人者曰然則海上之應祀者誰也曰海之瀕於南者祝融是也是真海神也祝融為火而海為水天一生水地二生火水火相配故海之瀕於南者其神有妃之稱而東西北三方之海無之後人不知妄求巾幗以實之吾憐其愚也是則唐氏所未及發者也

又 諭向來各省地方建立祠廟載在祀典者俱當隨時修葺上年恭上 皇考尊諡時頒發恩詔條款內已令各直省地方於嶽鎮海瀆廟宇傾頽者奏明修整各府州縣自當實力奉行况各省俱有存貯開款與其為無益之費莫若用以修葺神祠用昭妥佑如 先農壇 文廟 關帝廟 城隍廟及此外列入祀典各壇廟可以為民祈福者或有日久傾圮之處著於開款內奏明動用修葺以副朕敬 神庇民至意但不可藉此一任州縣冒銷

六年議准崇祀 天后父母請照雍正三年追封 關帝先代之例 勅封天后之父為 積慶公母為 積慶公夫人由部行文福建巡撫江南河道總督

於莆田湄州及清口惠濟祠二處 天后宮後殿製造牌位春秋致祭 又 勅封昭靈顯佑水府都君廟祀江南山陽縣

又 謹案神譚姓明初人涉洪澤湖為盜害遂為湖神舊有祠曰水府都君祠 八年加封 顯佑安瀾神為顯佑安瀾清助順之神廟祀江南丹徒縣

又 勅封靈感普濟之神廟祀江西南昌縣 謹案神許姓名遜晉旌陽令得道術斬蛟除害舊祠南昌曰鐵柱宮宋

封神功妙濟真君 又以川陝楚軍功告歲前此用兵時顯著靈應奉 旨遣官致祭定軍山 諸

葛武侯祠 九年 勅封靈元贊運純陽演正警化孚佑帝君廟祀江南清河縣

謹案神呂姓名岩唐進士成道濟世元封純陽演正警化孚佑帝君至是因祈禱晴雨保障隄防有求輒應特以清江浦士民所建廟宇列入祀

典 勅賜封號燮元贊運

又奏准各省原有 純陽帝君廟宇應令該地方士民自行供奉由部通行各省遵照

又 諭伯麟等密奏查勘五臺山行宮尖營情形分別辦理一摺前因該撫等奏晉省五臺山各廟工俱已修理完整朕意各寺廟業經見新或於一二年內巡幸五臺拈香廟宇可無須復行修飾曾諭令該撫等酌量預備旋於摺內批諭如實有難辦之處據實具奏即再遲數年亦可茲據該撫等詳細履勘據稱五臺自節年被水之後白雲寺湧泉寺臺懷等處行宮尖營均已全塌必應慎重籌辦等語此事原非必不可緩既據該撫等查明工程較大所有原擬明年巡幸之舉即著停止其一切工程俱著緩為修理該省庫貯開款前經湊撥各省急需俟數年內逐漸歸款充裕再將各處工程妥協辦理惟當遵照舊式修理完整務從簡樸彼時各工一律完竣該撫再行奏明請旨

十一年 勅封孚順侯為廣濟孚順侯孚惠侯為利濟孚惠侯孚佑侯為靈應孚佑侯廟祀浙江仁和縣

臣謹案神蔣姓兄弟三人長名崇仁次名崇義次名崇信皆仗義樂施民立廟祀之宋咸淳初賜廟額曰廣福封崇仁孚順侯崇義孚惠侯崇信孚佑侯至是奏准加封號

十三年 勅封孝女曹娥為福應夫人廟祀浙江會稽縣

臣謹案神曹娥見後漢書以孝女沈江元嘉開上虞長度尚為之改葬立碑宋大觀四年封娥為靈孝夫人政和淳佑及元至元年間累加昭順純懿慧感等字至是奏准加封號同治四年又加靈感封號 頒給福庇曹江扁額

十四年 勅封天井潭為孚惠佑民之神廟祀浙江慈谿縣

臣謹案神劉姓名揚祖宋景定開郎官屢著靈迹士民祈禱輒應至是奏准加封號

又以前浙江義烏縣靈威廟總管之神屢昭靈貺勅 加誠孚利濟封號

臣謹案神陳姓名道與元布衣前明洪武開授職漕運總管歿後鄉人立廟祀之

又 勅封都昌元將軍為顯應元將軍

王泉之增祀章水神議祭法曰山林川谷邱陵能出雲為風雨見怪物皆曰神有天下者祭百神諸侯在其地則祭之又曰山林川谷邱陵民所取財用也非此族也不在祀典故天子祭天地山川歲徧以其皆有功烈於民也管子曰水之出於山而流入於海者曰經水水別於他水入於大水及海者曰支水江西之水以章為經其源出崇義縣西南九十里縣都山舊隸大庾縣明正德十一年王守仁撫贛征橫水桶岡賊設崇義縣割大庾平正鄉義安三里與崇義山亦隸焉綿亘四十里與湖南郴州宜章縣界山脊自西而東水流江西山海經云贛水出焉都東山蓋謂此也東流七十里入大庾而良熱水入之寶字記云熱水昔名豫水漢置豫章郡因此水源以為名是章水發源於本省最先而最遠匯十二水至贛縣而合於貢故章為經水也貢水之源有四一出於項山之麓曰龍溪即湘水也地為平遠長甯界一出於武平與嶺嶺張坑洞一出於長甯周畬山一出於汀州之新樂山項山遠而新樂近則項山之湘水又當為支水之經水也寶字記言貢水源自都縣新樂山亦未為確論也漢地理志注等郡言湖漢水東至彭澤入江行千九百八十里并未言源出何山是湖漢之為貢水猶彭水之為章水也章貢名水鄴道元譏北齊劉澄之以贛字為說晉太康地志載贛縣屬南康郡因水以為名虔州圖經章貢二水合流為贛其開置邑因為贛縣廣韻云贛亦作贛貢合二十六水抵贛城北入於章水章貢既合淳濬於儲潭由是匯吉袁臨瑞諸郡之水達章江門由南昌縣左行合撫建廣饒之水入東鄱湖由新建縣右行合甯州武甯靖安奉新建昌之水入西鄱湖皆章水之所經而入者東章西貢貢近而章遠經章而支貢宜也奔流澎湃合東西鄱湖而皆經利舟楫而備材用為風雨而見怪物必有神焉寶字憑之禮崇報功以昭德章水神獨無廟

祀非缺典乎都昌元將軍明洪武間僅附祀於湖神廟嘉慶十四年前撫臣先奏請立祀專祭 勅封顯應元將軍春秋遣官致祭帆檣順利糧艘適行神之爲靈昭昭也况章江納衆水而匯彭蠡爲江西藪澤巨浸豈可失其禮祀乎 聖天子懷柔百神有功德於民者祀之今既增立章水神祀自宜以貢水神配之其從祠諸水則以漢志與水經爲斷曰豫水曰盧水曰淦水曰南水曰蜀水以次祀於右曰盱水曰餘水曰鄱水曰修水曰縵水以次祀於左道尙右禮也

十五年以江西都昌縣左蠡鎮元將軍廟靈異昭著 勅加顯應封號十六年以浙江長興縣太湖神屢著靈迹 勅賜佑民衍澤封號

臣謹案神王姓名天英明長興縣安化區人屢著靈迹於太湖商民賴之又 勅封故廣東虎門鎮副將張瑜爲襄靖普佑之神附祀英佑驍騎將軍祠二十二年 諭前於嘉慶十六年特降旨准在伊遜崖口內建立敦仁鎮遠山神廟每歲舉行秋獵大典進東哨門時朕必親詣拈香仰承靈佑風日暄和諸臻順吉因思西哨門與東哨門間巖經由崖內未曾建立神祠無由升香展敬著派慶溥常顯哈隆阿於布克崖口內數里相度平坦地址建立山神廟一區其規制及春秋致祭禮儀悉做照東崖口之式一律辦理於明歲竣工朕臨幸木蘭再進西哨門時躬親瞻禮用備明禋

二十四年 封浙江錢塘縣湧金門內鎮海威遠金華將軍靈應封號

臣謹案神曹姓名果五代時吳越人同治六年加孚惠封號

二十五年 封湖北武昌府八分山龍神爲宣潤敷化之神春秋致祭

道光六年 諭福建莆田縣治於宋治平元年有長樂錢氏室女傾資築陂該處土人立廟崇祀據孫爾準等奏稱見在尙著靈應著照所請列入祀典每年東作方興之時飭地方官致祭一次以慰輿情而昭祈報

八年 勅封浙江太湖神徐資爲廣濟伯

臣謹案神晉烏程人 二十九年 勅封顯應九龍將軍廟祀山東張秋鎮

臣謹案將軍陳姓曾於嘉慶十七年 敕建九龍廟並永定河立專祠同治六年加封顯佑七年加封贊順光緒元年加封護國靈應綏福三年加封昭顯五年加封普佑十年加封廣利十一年加封昭應

咸豐三年 諭禮部議覆護理浙江巡撫汪本銓請賜祠額一摺宋臣岳飛精忠大節炳耀古今其杭州湯陰武昌等處均有祠額表揚惟嘉興金陀坊祠宇尙無題額著內閣擬呈祠額字樣候朕親定頒賜以示褒崇而光祀典

又 諭楊殿邦奏臨清州插外 河神顯應請加封號一摺並另片奏該州紳民稟請捐資建廟等語本年南糧首幫駛入東境正值衝河盛漲而浙船行抵臨清又在冬令水落之時經督運文武各員先後詣 金龍四大王廟暨 漳神祠虔誠叩禱重運漕船得以全數出插首二兩進回空幫船亦得趁水連檣南下 神靈默佑欽感良深著禮部各擬二字封號進呈並候朕酌定加封以昭 靈貺至該州所轄尖冢地方爲豫省漕船必經之路既據紳民等稟請建立 金龍四大王暨 漳神祠廟著即准其捐資興建用申祈報

四年 勅封直隸天津縣火神爲顯佑火神

六年 諭禮部奏遵議苗疆 三侯神廟加封王爵一摺湖南永綏廳 宣威助順靈應保安靖遠侯鎮遠侯綏遠侯三神久列廟祀屢著靈感茲復疊昭顯應屢卻賊氛洵能禦災捍患有功於民著晉封爲 宣威助順靈應保安靖遠王鎮遠王綏遠王以答 神庥

七年 勅封河南永城縣火神爲耀靈火神

八年 諭載華等奏松嶺尙未淨盡擬加添兵役搜拏據稱自七月二十日起一月未見雨澤風水圍牆內松嶺漸熾甫幸復生人力難勝擬於嶺王廟叩禱等語該處既有嶺王廟三極素昭靈爽自應一面虔祈一面竭盡人力添派差役擇處較重樹株上緊揆拏務將松嶺捕捉淨盡毋留餘孽至嶺王廟何時起建並無案卷可據未知崇祀何人見供神像如何服飾著載華等查明具奏嗣以 東陵嶺王廟疊著靈爽 命改爲五神祠 頒御書扁額

同治四年 勅封四川峨眉山水神爲顯佑火神

七年 勅封原任河道總督黎世序為孚惠黎河神

臣謹案河南羅山人嘉慶元年進士由縣令歷升河督道光四年卒於官諡襄勤入祀賢良祠 御製詩勒石其墓本年著靈張秋鎮奏請 勅封

八年以神靈顯應加山西孟縣藏山廟晉卿趙武祠封號曰翊化

臣謹案藏山有藏孤洞相傳為程嬰公孫杵臼藏趙氏孤處禱雨輒靈

光緒元年奏准金龍四大王封號前定以四十字為限今奉 諭照加封天后成案辦理即於四十字外再加錫祐封號以示優容四年又加溥佑二字

二年吳大澂奏古聖倉頡請列入祀典下禮部議奏

三年江蘇巡撫吳元炳奏據藩司詳稱太倉鎮洋二州縣請建倉頡專祠業經該州縣紳民鳩工庀材於城內青雲頂地方興建見已落成請照河南成案奏請列入祀典由地方官春秋致祭如所請行

五年加封黃大王為靈佑襄濟顯惠贊順護國普利昭應孚澤綏靖普化宣仁保民誠感黃大王

臣謹案嘉慶二十年 勅建江南黃大王廟為靈佑觀嗣是疊加封號王

士禎池北偶談黃大王河南人生為河神有妻子每睨目久之輒輒云適至某地賜幾船以其時地訪之果有覆舟者李自成灌大梁劫之往初決河水輒他泛溢自成怒欲殺之水乃大入始賊未攻汴一日黃對客慘沮曰賊將借吾水灌汴京奈何未幾自成使果至黃至順治中尚在

又加封栗大王為誠孚普濟靈顯佑威顯栗大王

臣謹案神名毓美山西渾源州人嘉慶六年拔貢由知縣洊升河督創以甄易藉石之法帑省而工固道光二十年歿於工次諡恭勤民為立廟屢著靈異

臣又案 國家懷柔百神河神載在祀典每遇防河濟運顯靈經河漕兩督奏於常例外 頒賜香復請 錫封賜扁有差夫禦災捍患功德在民固 褒賞所必及也惟近年河工久停而漕船北行沿河挽運督運諸

員神奇其說幾乎以請 封請扁為常例似非政體朱大王名之錫浙江義烏人順治三年進士由縣令歷升河督生而與栗大王均河督也會典無異姓封王之例稱謂亦恐不經况諸臣所據為顯應者謂河神助順必先有水災見其朱色者乘以謂之錫栗尤誕妄無稽乎安得深明典禮之儒臣伴任秩宗一為釐正其失也

浙江甯紹台道薛福成稟巡撫竊惟崇德報功神道所以設教禦災捍患禮經列於明禋浙東沿海各郡自去年法人淪盟肇費馬江臺北迭經開戰警信頻聞羣黎驚駭迨本年正月敵艦撲犯鎮海口門與我戰臺兵輪相持數月之久而甯紹一帶眾心帖然相安無事若忘大敵之在門者屢聞民間傳言有朱將軍葛將軍顯著神靈保護郡邑謂閭境必可安全狡寇斷難逞志兵民流播異口同聲是以敵聲隆隆而市肆不驚敵氛環逼而士氣益壯每當事勢危急之際若見狂風異雲由西而起倏驚海隅者或云陰兵無數助戰卻敵或云夜見南北岸礮臺神燈有萬字朱字敵中遙望我軍常隔煙霧以致測量莫施礮無準的職道初聞此說曾發書馳訊營務處杜丞鎮海縣廉令旋據先後函復杜丞則稱與將領指揮禦敵往來於礮彈如雨之中無一受傷敵以數百磅重之炸彈日對口門轟擊多不開花誠不可謂非神助應令則稱詢訪紳民招寶山等處神燈萬目共觀事實非誣伏查葛將軍即故定海鎮葛壯節公諱雲飛道光二十一年與故壽春鎮王剛節公錫朋處州鎮鄭忠節公國鴻同守定海血戰六晝夜敵刀劈公面去其半礮洞胸穴如盤猶手刃十餘人而死世所稱定海同日殉難三總兵者也葛公原籍山陰祠墓所在忠靈布護庇及一方理固有之職道已於核轉統領貞字等營成守詳文內籲請憲核分別奏咨將定海三忠祠列入祀典春秋致祭以順輿情在案朱將軍即故 諡贈武顯將軍金華協副將朱公諱貴方英吉利兵船之踞甯波也將軍率陝甘官兵九百名扼守慈谿之大寶山敵眾由大西壩及丈亭水陸並進將軍親執大旗麾兵迎戰自辰至申殺傷過當會長溪嶺大營忽自驚潰

勢孤援絕將軍怒馬破陣手斬數十級身中兩槍馬蹶復躍起奪敵矛左
右盪決最後一火槍中要害乃仆其子昭南同時戰沒部下弁兵猶力戰
不退死者二百餘人敵亦與尸累累相與痛哭驚悸謂自入寇以來未有
如斯大創者自是大寶山上常有雲氣隱隱聞鼓角聲夜或見火光上徹
旌旗往來敵之在郡城者頗皆驚恐亦遂遠巡退去此道光二十二年事
也既奉 優旨賜卹慈谿士民醮資建祠以申報饗迄今四十餘年廟貌
常新靈應丕著客歲夏秋之交附近居民夜聞祠中播鼓若治軍然連十
餘夕祠前有流丐棲宿聞人馬行聲絡繹孔道或如身被馬足踐踏遂致
疾病是時法饒方張咸謂將軍鬱忠憤於地下且當敵愾以佑海疆遐邇
爭傳民心大定茲者 國威遠播強敵受盟氛祲潛消封圻靜謐立功將
吏旣蒙 殊恩晉秩有差職道亦濫叨非分豈敢貪天之功俾神靈顯蹟
湮沒不彰擬求奏請 勅加封號抑或與定海三忠祠同給扁額列入祀
典庶表忠蓋而答神庥

宣統元年以神靈顯應 頒西甯海神廟扁額曰澤普西陲

又東三省總督錫良奏請建長白山神祠於布勒瑚里並呈遼山景全圖從之
二年 敕賜甘肅金縣興隆山太白泉神靈佑封號